


Ley saa ni naco
Jesucristu



New Testament in Mixtec, Southern Puebla (MX:mit:Mixtec,
Southern Puebla)

Ley saa ni nacao Jesucristu

New Testament in Mixtec, Southern Puebla (MX:mit:Mixtec, Southern Puebla)

copyright © 1978 Wycliffe Bible Translators, Inc.

Language: (Mixtec, Southern Puebla)

Translation by: Wycliffe Bible Translators, Inc.

Mixteco, Sur de Puebla [mit], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Southern Puebla

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-21

PDF generated using Haiola and XeLaTeX on 18 Apr 2025 from source files dated 29 Jan 2022

8a6c83d1-922b-5d25-99ec-4724168f3b77

Contents

SAN MATEO	1
SAN MARCOS	50
SAN LUCAS	81
SAN JUAN	133
HECHOS	173
ROMANOS	221
1 CORINTIOS	242
2 CORINTIOS	262
GÁLATAS	275
EFESIOS	283
FILIPENSES	291
COLOSENSES	296
1 TESALONICENSES	301
2 TESALONICENSES	305
1 TIMOTEO	308
2 TIMOTEO	314
TITO	318
FILEMÓN	321
HEBREOS	323
SANTIAGO	339
1 PEDRO	345
2 PEDRO	351
1 JUAN	355
2 JUAN	361
3 JUAN	362
JUDAS	363
APOCALIPSIS	365

Ñà-nduá Nì Tiaa San Mateo sàhà Jesucristu

Nansa nisa nani xii Jesucristu

¹ Ñà-yòhó nduú tutu nacání sàhà ana nduú xii Jesucristu. Iin yohòtéhè-yá nduú David, te iin yohòtéhè David mà nduú Abraham.

² Te Abraham yucán, nì ia iin dèhe-ne nani Isaac. Te Isaac mà, nì ia stná iin dèhe-ne nani Jacob. Te Jacob mà, nì ia stná iin dèhe-ne nani Judá, xi stná cuàhà ñani-nè.

³ Te Judá mà, nì cacu ùi dèhe-ne, iin-ne nani Fares, te inga-nè nani Zara. Te Tamar nani dihi Zara mà. Daaní, Fares ma, nì ia stná iin dèhe-ne nani Esrom. Te Esrom mà, nì ia stná iin dèhe-ne nani Aram.

⁴ Te Aram mà, nì ia stná iin dèhe-ne nani Aminadab. Te Aminadab mà, nì ia stná iin dèhe-ne nani Naasón. Te Naasón mà, nì ia stná iin dèhe-ne nani Salmón.

⁵ Te Salmón mà, nì ia stná iin dèhe-ne nani Josafat. Te Rahab nani dihi Booz. Daaní, nì nandàhà Booz mà xi Rut, te iin dèhe-ne nani Obed. Daaní, Obed mà, nì ia stná iin dèhe-ne nani Isaí.

⁶ Te Isaí mà, nì ia stná iin dèhe-ne nì sanduu rey David. Daaní, David mà, nì ia stná iin dèhe-ne nani Salomón. Te dihi Salomón mà nduú nècuàchi ñaha nì sanduu ñahàdihí Urías antes.

⁷ Daaní, nì ia stná iin dèhe Salomón mà nani Roboam. Te Roboam mà, nì ia stná iin dèhe-ne nani Abías. Te Abías mà, nì ia stna iin dèhe-ne nani Asa.

⁸ Te Asa mà, nì ia stná iin dèhe-ne nani Josafat. Te Josafat mà, nì ia stná iin dèhe-ne nani Joram. Te Joram mà, nì ia stná iin dèhe-ne nani Uzías.

⁹ Te Uzías mà, nì ia stná iin dèhe-ne nani Jotam. Te Jotam mà, nì ia stná iin dèhe-ne nani Acaz. Te Acaz mà, nì ia stná iin dèhe-ne nani Ezequías.

¹⁰ Te Ezequías mà, nì ia stná iin dèhe-ne nani Manasés. Te Manasés mà, nì ia stná iin dèhe-ne nani Amón. Te Amón mà, nì ia stná iin dèhe-ne nani Josías.

¹¹ Te Josías mà, nì ia stná iin dèhe-ne nani Jeconías, xi stná dava ga ñani-nè. Te divi tiempu yucán nì catavà tè-ñuu Babilonia nèhiví raza-ndà cuàhàn-nè presu ndè ñuu-te.

¹² Daaní, na ndoó-né ñuu Babilonia yucán, dandu nì ia stná iin dèhe Jeconías mà nani Salatiel. Te Salatiel mà, nì ia stná iin dèhe-ne nani Zorobabel.

¹³ Te Zorobabel mà, nì ia stná iin dèhe-ne nani Abiud. Te Abiud mà, nì ia stná iin dèhe-ne nani Eliaquim. Te Eliaquim mà, nì ia stná iin dèhe-ne nani Azor.

¹⁴ Te Azor mà, nì ia stná iin dèhe-ne nani Sadoc. Te Sadoc mà, nì ia stná iin dèhe-ne nani Aquim. Te Aquim mà, nì ia stná iin dèhe-ne nani Eliud.

¹⁵ Te Eliud mà, nì ia stná iin dèhe-ne nani Eleazar. Te Eleazar mà, nì ia stná iin dèhe-ne nani Matán. Te Matán mà, nì ia stna iin dèhe-ne nani Jacob.

¹⁶ Te Jacob mà, nì ia stná iin dèhe-ne nani José. Te divi José mà nduú ì María dihi Jesucristu.

¹⁷ Ñàyucànduá, nsidaa xii-yá yucán, ùxin cùmi ní sanduu-ne dècuèndè tiempu xi Abraham xi dècuèndè tiempu xi David. Daaní, ndoó ùxin cùmi gá-nè dècuèndè tiempu xi David xi dècuèndè quivi cuàhàn-nè presu ñuu Babilonia. Daaní, después ndoó ùxin cùmi gá-nè dècuèndè tiempu xi Cristu.

Nansa nì tùinuù Jesucristu ñuhiví yohó

¹⁸ Cunaha-nsiá, dohó nì cuu na ní tùinuù Jesucristu. Sàni ndiadi tñuhu nandàhà dihi-yá María xi José. Doco tãñaha ga coo-ne xi nècuàchimà, te nì sàcùñuhu mée xi-ne nì quida Espiritu Ì xi Dios.

¹⁹ Ñàyucànduá, nì nacani ini José ñà-chicá vaha tãhndè tñuhu xi-ne cahan-né, doco mà cächí vate-néa, vächí nècuàchì vaha nduú-né, te có-cùni-nè cuitñuhu nèhiví María.

²⁰ Doco na nacání ñi ini-nè quida-ne ducán, nì sání-nè nì ndecunu iin ángel xi Stoho-ndà Señor nù-né, te dohó nì cächí ángel mà xi-né:

—Cunini-ní, José, descendencia xi David; màsà yúhí-ní nandàhà-ní xi María. Vätùni cunduu-ne ñahàdihí-ní, vächí mée xi-ne ñuhu-ma, mée sàhà Espiritu Ì xi Dios nduú-vé.

²¹ Te icúmí-vé tùinuù-vé, cunduu-ve iin mée tiàa, te Jesús cunani-vé, vächí icúmí-yá dacácu-ya nèhiví xí-yá nùu cuàchi-ne —nì cächí ángel.

²² Pues divi ducán nì cuu nsidaájàn sàhà-ñá nì cùù ndisa ñà-nduá nì cachitñuhu Stoho-ndà Señor antes na ní càhàn iin ana càhàn cuenta xi-ya, te nì cächí-nè:

²³ Cunaha-nsiá, icúmí coo mée xi iin ñahà chii nduú señorita; te nú sàni tùinuù-vé, dandu cunani-vé Emanuel, vâchi cuní cachà mà ñà-sàni quesaa Dios cutnahá-yá xi-ndà nduá.

²⁴ Daaní, ni nsicuihnú ini José, te nacua ni cachi ángel mà xi-né, divi ducán ni quida-ne, ni nandàhà-né xi María ñà-cunduu nècuàchimà ñahàdihí-né.

²⁵ Doco coní ía-ne xi nècuàchimà dècuèndè ni tùinuù mée mà. Te Jesús ni sàcùnani-vé.

2

Nansa ni casaà rey nchichí nùu Jesús, te ni cahvi-néyà

¹ Tiempu xi rey Herodes ni sandua na ní tùinuù Jesús ñuu tii Belén iá ladu Judea. Dandu ni casaà nècuàchi nchichí ñuu Jerusalén; ladu ndé caná orá ni quixi-ne.

² Te ni ndàcàtnùhù-né:

—¿Índu iá mée ni tùinuù-xí, divi mée cunduu rey xi nècuàchi Judea? Vâchi ndé caná orá sàni xini-nsi sitnúu cachitnúhu sàhà-yá; te vîchi vâxi-nsi cahvi-nsiyà —ni cachi-né.

³ Dandu rey Herodes, na ní xinitnúhu-tè ñà-nduá ndàcàtnùhù nècuàchimà, ni ndulocó-te, mii-té xi nsidaa gá stná nèhivi ñuu Jerusalén.

⁴ Ñâyùcànduá, ni cana-tè dùtù chicá xí-idònnù, xi stná nècuàchi dacuahá ley ìi, te ni xicàn tnùhù-té nùu-né índu ñuu cuàhàn tùinuù Cristu.

⁵ Te ni naxiconihí-né nùu-té, cachí-né:

—Divi ñuu tii Belén iá ladu Judea. Vâchi ducán ni tiaa iin nècuàchi ni càhàn cuenta xi Dios sàhana ndé cachí-yà:

⁶ Cunaha mii-nsiá nècuàchi ñuu Belén iá ladu Judea: màdi ñuu chicá có-ndiàà nduú ndé ndoó-nsiá; cóo, divi ñà-chicá ndiàà nduá nùu nsidaa ñuu nahnú ladu xi-nsia, vâchi divi ñuu mii-nsiá icúmí tùinuù mii-yá ana cusahnú, te icúmí-yà cunuù-yá nèhivi xí, divi nèhivi raza-nsiá Israel.

⁷ Daaní, ni cana dehé Herodes nècuàchi nchichí mà, te ni ndàcàtnùhù váha stná-te nùu-né índu tiempu meru ni tùi sitnúu mà.

⁸ Dandu ni techuún-tené cùhùn-nè ñuu Belén, cachí-te xi-né:

—Cuahán-nsiá ñuu mà, te ndàcàtnùhù váha-nsia nansa ndisa iá sàhà mée mà, dandu nacachitnúhu-nsia xí, vâchi yùhù, cuní stnáì cùhìn cahvi stnáì-vè —ni cachi-te.

⁹ Daaní, na ní nsihì ni sàcùhana nècuàchi nchichí mà nùu-té ñà-jaàn, dandu ni quihin-ne ichi cuàhàn-né. Te cunaha-nsiá, yucán ni natùu tu sitnúu ni xini-né antes ladu xínu orá. Te ni sàcòdònnù-sí nùu-né ni sàà-si ni ndòo-si diquì-xí nacua ndé iá mée mà.

¹⁰ Ñâyùcànduá, yáha ga ni cudii ini-né na ní xini tu-ne sitnúu mà.

¹¹ Dandu ni caquihvi-ne vehe, te ni xini-né mée mà xi dihi-vé nani María. Te ni tutuyuhu-né ñuhù nùu-vé, te ni cahvi-névé. Dandu ni nacuna-ne ñà-ñùhù ñà-cuicà-né, te ni dácùtâhvi-néyà, divi oro xi inciensu xi tàtnà nani mirra.

¹² Doco después ni sàni-né ni cachitnúhu Dios xi-né ñà-íá peligrú: màsà náyàha-ne ndé iá rey Herodes. Ñâyùcànduá, inga ichi ni naquihin-ne mànuhù-né ñuu-né.

Nansa ni xinudéhé José xi María xi mée Jesús cuàhàn-nè ñuu Egipto

¹³ Dandu, na sàmànùhù nècuàchi nchichí, ni sàni stná José, ni xini-né iin ángel ni quixi nùu Stoho-ndà Señor. Te dohó ni cachi ángel mà:

—Ndacuiin-ní, tnií-ní mée, te cundaca-nívè xi mamá xi-ve cuahán-nsiá ñuu Egipto cunudéhé-nsiá. Te divi ñuu mà icúmí-nsiá cundoo-nsia ndé cachi sàì cachitnúhì xi-nsiá. Vâchi icúmí Herodes nanducu-tévè ñà-cahni-tévè —ni cachi ángel mà.

¹⁴ Ñâyùcànduá, mate ñuu nduá, doco ni ndacuiin José ni saca-ne mée mà xi dihi-vé, te ni quihin-ne ichi cuàhàn-nè ñuu Egipto.

¹⁵ Te ñuu mà ni sandoo-ne dècuèndè ni xihì Herodes. Te divi ducán ni cuu sàhà-ñá ni cuú ndísá palabra yohó ni cachitnúhu Stoho-ndà Señor antes na ní càhàn iin ana càhàn cuenta xi-ya: “Dècuèndè ñuu Egipto ni cani Dèhemani’ ñà-ndixi-ya”.

Nansa ni dàndàcù rey Herodes ñà-cui nsidaa mée tiàa ladu ñuu Belén

¹⁶ Daaní, na ní xini Herodes coní ndúlócó nècuàchi nchichí sàhà ñà-nduá ni cachi-te, dandu yáha ga ni xidà ini-te. Ñâyùcànduá, ni techuún-te soldadu ni sàhàn ni casahnì xi nsidaa mée tiàa ndoó ñuu Belén xi inicutu stná ladu yucán, nsidaa luchì cuati xicá ùi cuà cuàhàn tixi-xi, ni casahnì-tévè, vâchi ñà-jaàn nduú tiempu ni cachi nècuàchi nchichí na ní ndàcàtnùhù Herodes nùu-né.

¹⁷ Ñâyùcànduá, quivì jaàn ni cuu ndisa ñà-nduá ni cachitnúhu Jeremías sàhana na ní càhàn-nè cuenta xí Dios, te dohó ni cachi-né:

18 Tiacú tnaná cuàhà-né ladu ñuu Ramá. Sacú nècuàchi ñahà, te cána-ne, divi nècuàchi descendencia xi Raquel. Sàhà mèe xi-ne sacú-né; ni mà cùì cahnde ini-nè, vàchi còò cá-vè.

19 Daaní, José, iá va-ne ñuu Egipto. Dandu ni sàà quivi ni xihì rey Herodes. Te ni sàni tu José inga xichi, ni xini-nè ìin iin àngel ni quixi nùù Stoho-ndà Señor,

20 te cachí àngel mà xi-né:

—Ndacuiñ-ní, cuaca-ní mèe xi dihi-vé, te naxicocuñ-nsià ñuu Israel, vàchi sàni xihì nèhivi cuní cahni xi-vé.

21 Ñàyucàndüá, ni ndacuiñ José, ni saca-nevè xi dihi-vé mànuhù tú-né ñuu Israel.

22 Doco ni xinitnùhu-ne sàdàndàcù dèhe Herodes mà nani Arquelao, cusáhnù-te lugar xi nsi-yua-té ladu Judea. Ñàyucàndüá, ni yùhí-nè nùhù-nè ladu mà. Daaní, inga xichi ni sàni-nè, ni cachtitnùhu Dios ñà-ndisa iá peligrú. Ñàyucàndüá, ni yàha-ne chicá nùù-xí dècuèndè ladu Galilea,

23 ni sàà-nè iin ñuu tii nani Nazaret, te yucán ni candòo-ne. Pues, divi ducán ni cuu sàhà ñà-ni cùù ndisa palabra ni cacachtitnùhu profeta xi Dios sàhana ñà-divi ñuu Nazaret cunduu ñuu-yà, cachí nèhivi.

3

Nansa ni càhàn Juan Bautista sàhù ndé nduú yucù

1 Daaní, después ni quixi Juan Bautista yucù iá ladu Judea. Te ni quesaha-né càhàn-nè sàhù yucán,

2 cachí-nè xi nèhivi ñà-ni nàxícocuñ ini-nè sàhà cuàchi-ne, vàchi sà-itúú cuni-nè cusahnú mii-yá iá ansivi.

3 Pues divi Juan mà nduú ana ni cachtitnùhu Isaías sàhà-xí na ní càhàn-nè cuenta xi Dios, te ni tiaa-ne dohó:

Tiacú càhàn fuerte ana càhàn yucù, te cachí-nè xi-ndà ñà-nsidandoo-nda (anima-ndà) na ian nduví ichi ndé yàha Stoho-ndà Señor, te ichi ndáa cundua.

(Ducán ni cachí Isaías sàhana.)

4 Te Judan mà, dòò idi sicamellu ni sandixi-ne, te iin quisi ni cuyucun siuhma tixi-ne. Te sica xi ndudi ñuñù yucù nduá nisa itiacu-nè.

5 Daaní, cuàhà nèhivi ñuu Jerusalén xi cuàhà stná nèhivi ladu Judea, xi stná nèhivi ndoó yatni yùte Jordán, nsidaa-né ni casaà-nè nùù Juan yucán.

6 Te ni cuhii-né ni quida nècuàchima ini yùte mà na ní dátúu-ne cuàchi-ne.

7 Doco ni xini Juan ñà-vàxi stná cuàhà nècuàchi fariseu xi cuàhà stná nècuàchi saduceu, cuní-nè cuhii stná-nè. Ñàyucàndüá ni cachí-nè xi nècuàchima:

—Mii-nsiá, na quidá còò, ducán quidá-nsiá, vaxi-nsia yohó xinudèhé-nsiá nùù castigu icúmí quixi. ¿Ana divi ni cachí xi-nsiá ñà-quida-nsia ducán?

8 Cunaha-nsiá, xiñuhu quida ndisa-nsia cumplir nacua ndiá icà quida-nda na naxícocuñ ndisa ini-ndà sàhà cuàchi-nda.

9 Ni màsà càhàn cuadú-nsiá cachí-nsiá inì-ni mii-nsiá ñà-divi Abraham nduú yohòtèhé stná-nsiá, te ñàyucàndüá còò ni-ñàha cuu xi-nsiá. Vàchi cunaha-nsiá, dècuèndè stná yùù ndoó yohó, vátuni nanduu stná nahi descendencia xi Abraham, nú cuní Dios.

10 Te vichi sà-íá cuàhàn (cachí-yà indù nèhivi nihì-xi castigu), na ian cuàhàn-ndà nacàxin-nda yutnù có-càná fruta, te nihì-nda hacha cahnde-ndànù coco-nù. Pues ducán icúmí cuu stná xi nèhivi có-quidá víi.

11 Vàchi yùhù, tècuí quidá ìí mii-nsiá na cuú-nsiá arrepentir; doco nchicùn gá vaxi ana chicá cahnú poder-xi nùù yùhù: te ni có-nàtùì (cundi nahi mozo xi-ya) ñà-chindeí quee ndisàn-yá. Doco mii-yá, tixi Espiritu ìì xí Dios icúmí-yá quida ì-yá anima-nsiá. Te na quidá ñuhu, ducán icúmí-yá quida stná-yá xi-nsiá (dandáñúhú stná-yá ñà-có-ndiáà).

12 Te vichi sà-íá cuàhàn-yá quida-ya na ian quida-nda xi trigu, dandiachi-ndañá xi yutnù chipála dècuèndè ndiachi nsihì trigu ndoó nùù ñuhu, dandu nùñlá, chivàha-ndañá, doco mihí-ñá, coca. Te divi ducán icúmí-yá quida stná-yá (xi nèhivi ñuhivi: nèhivi xí mii-yá, càcu-ne; doco nèhivi dava ga), nicanicuahàn icúmí-nè coco-ne —ni cachí Juan.

Nansa ni cuhii Jesús

13 Daaní, ni quee Jesús ladu Galilea, cuàhàn-yá yùte Jordán ndé iá Juan, vàchi cuní-yá quida ì nècuàchima-yá.

14 Doco nècuàchima, có-cùnì-nè, vàchi cachí-nè xi-yá:

—Yùhù xiñuhí cuhii quida mii-ní, màdiá mii-ní quixi-ní nùù yùhù, (te cuhii-ní).

15 Dandu ni cachí-yá xi-né:

—Ducanicoó vichi, vâchi ducán xiñuhu quida-nda sàhà-ñá quida ndisa-nda nsidaa ñà-nduá ndiá icà-ndà.

Dandu ni candisá Juan, te ni quida ii-néyà.

¹⁶ Daaní, ni nsihi ni cuhii-yá, te ni quee-ya nuù tècuí, dandu ni nuna ansivi, te ni xini-yà mànuu Espiritu Ì xí Dios vâxi-ya na iin si-lomá, meru diqui Jesús mànuu-ya vâxi-ya.

¹⁷ Dandu ni tiacu ni càhàn iin ana càhàn ansivi, cachí-yà:

—Dèhemaní nduu ana yohó, te cudíi cuàhà inì sàhà-yà.

4

Nansa ni cuni ñà-malu dacà-sí Jesús ñà-quida-ya iin cuàchi

¹ Daaní, nihí Espiritu Ì Jesús ni sàhàn ñà-coo-ya yucù dãná, vâchi yucán cuàhàn ñà-malu quida-sí lucha dacà-siyá. Ñâyùcandúá, ni quihin-ya ichi cuàhàn-yà,

² te yucán iá-yà ùi dico quivi ndui te ñuu; te iníhí-yá, iá docó-yà. Ñâyùcandúá, cuàhà doco xihí-yà.

³ Dandu ni trátuu ñà-malu, vâchi cuní-si dacà-siyá, te ni cachí-si xi-yá:

—Nú ndisa Dèhemaní Dios nduu-ní, dandu cachí-ní xi yùù jaàn ñà-ní nándúá pan cuxi-ní.

⁴ Doco ni cachí-yà xi-sí:

—Còó, vâchi dohó cachí nuù tutu ìi: “Màdi cuisí pan cutiacu nêhivi; còó, vâchi xiñuhu cucumi stná-nè nsidaa palabra ìi cachí Dios”.

⁵ Daaní, ni saca-siyá cuàhàn-si xi-yá ñuu ìi Jerusalén, te ni chicoo-siyá ndè dìni veheñuhu cahnú,

⁶ te ni cachí-si xi-yá:

—Nú ndisa Dèhemaní Dios nduu-ní, dandu dandiachi-ní mii-ní, vâchi ducán cachí nuù tutu ìi:

Ícúmi Dios dandacú-yá nuù ángel xi-ya ñà-cundiaa-nè mii-ní.

Te cachí stná tutu mà:

Ícúmi ángel natnii ndahà-né mii-ní ñà-màsà máquihì sàhà-ní ni-iin yùù.

⁷ Dandu ni cachí Jesús xi-sí:

—Cachí stná tutu ìi: “Màsà quídá cánúú-ndá ñà-có-cùni Stoho-ndà Señor”.

⁸ Daaní, ni saca-siyá cuàhàn-si xi-yá dìni iin yucù ducún sàstnùhù, te ni dàcùní-siyá nsidanicuú ñuu iá ñuhiví xi nsidaa ñà-vico iá yucán.

⁹ Dandu ni cachí-si xi-yá:

—Yùhù dacútâhiví mii-ní nsidaa ñuu jaàn nú ni mácuin sisi-ní nuù, te cahvi-ní yùhù.

¹⁰ Doco ni cachí-yà xi-sí:

—Cuahán-ní, Satanás, vâchi dohó cachí stná nuù tutu ìi: “Cuisi mii Stoho-ndà Dios ndiá icà-ndà cahvi-nda, te cunucuachi-nda nuù-xí”.

¹¹ Dandu ni naco-siyá cuàhàn-si, te ni caquesaa ángel ni nacuahandee ini xi-yá.

Nansa ni quesaha Jesús quidá-yá chuun ndiaha xi-yá ladu Galilea

¹² Daaní, na ni xinitnùhu Jesús ndiadi Juan (Bautista) vehecàa, dandu mànuhù-yá ñuu-yà Nazaret iá ladu Galilea.

¹³ Doco cóni cuèé-yà yucán. Còó, ni quihin-ya ichi cuàhàn-yà ñuu Capernaum iá yuhù mar ladu ndé cachí xi-né ladu Zabolón xi Neftalí.

¹⁴ Yucán cuàhàn-yà coo-ya sàhà ñà-ní cùù ndisa palabra ni cachitnùhu Isaías sàna na ní càhàn-nè cuenta xi Dios, cachí-nè:

¹⁵ Ladu Zabolón xi ladu Neftalí ndé yáha ichi yatni mar, yucán sàni dàtnúù fuerte Dios ini anima nêhivi. Stná inga ladu yùte Jordán, xi inicutu stná ladu Galilea ndé ndoó nêhivi có-ínahá xi-yà,

¹⁶ pues yucán sàni dàtnúù ndiaha stná-yà anima-nè; vâchi nêhivi nsidaa lugar mà, nisa xica-ne ichi ñaa, te cuàhàn-nè ndañuhu dahuun-ne ni cúi, doco vichí sàni dàtnúù-yà sàxinítnùnì-nè na ian ni natùu nuù-né, ni cachí Isaías.

¹⁷ Dandu divi tiempu mà ni quesaha Jesús càhàn-yà sàhù xi nêhivi, cachí-yà:

—Naxicocuñ inì-nsia sàhà cuàchi-nsia, vâchi sà-itúù tiempu cuni-nsia cusahnú mii-yá iá ansivi.

Nansa ni cana Jesús cùmi nècuàchi tavá xi siaca

¹⁸ Xicá Jesús yuhù mar iá Galilea, te ni xini-yà ùi ñàní nani Simón Pedro xi Andrés, dacaná-né ñunù xi-né mahi tècuí, vâchi nècuàchi tavá siaca nduú-né.

¹⁹ Te ni cachí-yà xi-né:

—Cunchicùn-nsià yùhù, vâchi mà cùndúù gá-nsià nècuàchi tavá xi siaca. Còó, vâchi icúmi dacuahí mii-nsià ñà-cunduu-nsia nècuàchi tavá xi nêhivi (ichi malu).

²⁰ Dandu nècuàchimà, vichí vichí ni naco-ne ñunù xi-né, te cuàhàn-nè nchícùn-nèyà.

²¹ Daaní, nì sàà-yà chicá nùu-xí, te nì xini-yà inga ù ñàní nani Jacobo xì Juan; dèhe iin tiàa nani Zebedeo xínduu-ne, te ndoo-né nùu lancha xi-ne, cutnáhá-né xì yua-né nácáhmá-nè ñunù xí-né. Te nì cana stná-yà ndúu-nè.

²² Te hora mà nì nacoo-ne yua-né nùu lancha mà, te nì tenchicùn-nèyà cuàhàn-nè.

Cuàhà gá nèhivì nì chinaha Jesús

²³ Daaní, nì xicanuu Jesús inii ladu Galilea, te nì chinaha-yà nèhivì ini iin iin veheñuhu, nì càhàn-yà xì-né ñà-ndúu razón ndiaha sàhà ñuhivì ì xì Yua-nda Dios. Te nì dándúvaha stná-yà nèhivì ndohó nsidanuu clase cuèhè.

²⁴ Ñàyùcàndüá, ndè inii ladu Siria nì xitià fama-yà. Sàhà ñà-jaàn cuàhà gá nècuàchì kuhí ndacá nèhivì nì quixi nùu-yá, xínduu-ne nèhivì ndohó quidá iin cuèhè, ò iin dolor, te xínduu stná-nè ana ñuhù ñà-malu anima-xi, xì stná nèhivì xíhì ihí, ò nèhivì sàni nduyutnu. Doco nsidaa-né, nì dándúvaha-yanè.

²⁵ Ñàyùcàndüá, yáha ga cuàhà nèhivì nì tenchicùn xì-yá, xínduu-ne nèhivì nì quixi ladu Decápolis, xì stná ñuu Jerusalén, xì stná ladu Judea, xì stná inga ladu yùte Jordán.

5

Ñà-ndüá nì cachi Jesús na ní nana-ya yucù, te nì càhàn-yà sàhù

¹ Dandu nì xini Jesús ndoo cuàhà gá nèhivì. Ñàyùcàndüá, nì nana-ya iin yucù, te nì sàcòo-ya yucán. Dandu nì tnàtuu nsidaa nècuàchì dacuahá-yá nùu-yá,

² te nì quesaha-yá chináhá-yànè; te dohó nì cachi-yà xì-né:

³ —Nansicáhàn nècuàchì ndahvì inì-xi, vächì sàni ñihitáhvi-né ñuhivì ì xì mii-yá iá ansivi.

⁴ *Nansicáhàn nècuàchì ndoo tnùnsí ini vichi, vächì contentu icúmí-nè nàcùndoo-ne después.

⁵ *Nansicáhàn nècuàchì nihnú máni inì-xi, vächì ñuhivì ndutahvì-né.

⁶ *Nansicáhàn nècuàchì yáha ga cuní quida vü, vächì icúmí Dios chindee-yánè ñà-quida vü ndisa-ne.

⁷ *Nansicáhàn nècuàchì tùha cundehè ndàhvì xì ñanitnaha-xi, vächì icúmí Dios cundehè ndàhvì stná-yà mii-né.

⁸ *Nansicáhàn nècuàchì iá ndoo anima-xi, vächì icúmí-nè cuni-nè nùu Dios.

⁹ *Nansicáhàn nècuàchì nachíndoo víi xì ñanitnaha-xi, vächì icúmí-nè cunduu ndisa-ne dèhe Dios.

¹⁰ *Nansicáhàn nècuàchì nú icúmí-nè ndoho-ne sàhà iin chuun vü nì quida-ne, vächì sàni ñihitáhvi-né ñuhivì ì xì Dios.

¹¹ *Nansicáhàn stná mii-nsiá na cánahá nèhivì xì-nsiá sàhí, te ò quidá quini-ne xì-nsiá, te ò dacuidádiquí stná-nè mii-nsiá.

¹² Vächì quivì quida-ne ducán, dandu nì cúdú inì-nsia, te cundoo-nsia contentu, vächì iin ñà-vàha cahnú cucumi-nsiá ndè ansivi. Vächì ducán nisa quida quini stná nèhivì sàhana xì nècuàchì nisa cahàn cuenta xi Dios.

Nahi iin cuhádi ñà-xixi-ndà, ducán nduú stná chuun quidá nèhivì xì Jesús ñuhivì yohó

¹³ *Mii-nsiá, nahi chuun quidá ñn, ducán quidá stná-nsiá ñuhivì yohó. Doco nú sàni ndañuhu ñà-ádi xán, dandu mà cúí nduhadí gá-ñà. Vächì còò cá chuan, ñàyùcàndüá saté uun nèhivì-ñà, te sànihni-neà.

¹⁴ *Na quidá stná orá datnúú, ducán quidá stná mii-nsiá ñuhivì yohó. Te ducán nduú stná-nsiá na iin ñuu tuí ñini iin yucù, vächì mà cúí coo dèhá nùu nèhivì.

¹⁵ Stná iin lámpara, có-nàcuicun-ndañá ñà-coo dèhá tixi iin icá; cóò. Sácùnùú ducún-ñà sàhà-ñà cutnuà, te cutùú nùu nsidaa nèhivì quíhvi vehe.

¹⁶ Ducán xiñuhu quida stná mii-nsiá: quida-nsia obra vaha sàhà-ñà cundehè nèhivì, dandu naquimani-né Yuandíhá-nsiá iá ansivi, vächì na ian datnúú-nsiá nùu nècuàchì mà nduá.

Nansa nì cachi Jesús sàhà ley xi Moisés

¹⁷ *Màsà cùcàhàn-nsiá vächì dacúxióé ley nì sàha Moisés. Mà dacúxióé ley mà, nì mà dacúxió stnáì palabra nì cachi profeta nì sachàn cuenta xi Dios. Còò, yùhù vächì sàhà ñà-nì cúú ndisa nsidaa ñà-ndüá cachí palabra mà.

¹⁸ Te ñà-ndáà nduá cachí xì-nsiá yohó, mate nsihì ansivi xi ñuhivì, doco mà nunca ndañuhu nì-iin palabra xi ley mà, te nì-iin xaan tii xán dècuèndè cuu ndisa nsidaa ñà-ndüá cachá.

¹⁹ Ñàyùcàndüá, nú có-quidá iin tiàa cumplir mate iin ley chicá tii nduá, te ducán chináhá-nè nèhivì, pues divi tiàa-ma cunduu ana chicá có-ndiàà na sàà quivì cusahnú mii-yá iá ansivi. Doco nú nì quidá ndisa-ne cumplir ñà-ndüá cachí ley xi-ya, te ducán chináhá-nè ñanitnaha-ne, dandu cunduu-ne ana chicá ndiàà na sàà quivì cusahnú-yá ñuhivì yohó.

²⁰ Vàchi yùhù cachí xì-nsiá, chicá vù xiñuhu quida-nsia nùù nècuàchì ley xi veheñùhu, xì nùù stná nècuàchì fariseu, vàchi nú coó, mà nunca sàà-nsiá cuni-nsiá ñuhiví ì xí mii-yá iá ansivi.

Cundoo mani-ndà xì ñanitnaha-nda, ni cachi Jesús

²¹ 'Mii-nsiá, sàni inini-nsia palabra ni cachi nècuàchì sàhana ñà-màsà cáhni stnaha-nda; doco te nú ni quida-nda ducán, dandu icúmí ndundaà sàhámà.

²² Doco yùhù cachí, mate cuisí ni cuídà ini-nsiá sàhà ñanitnaha-nsia, doco icúmí ndundaà sàhà stná. Te nú ni cachí-nsiá xì ñanitnaha-nsia neciu-nè, dandu icúmí ndundaà stná sàhájàn nùù juez chicá cusáhnù; doco nú ni cachí-nsiá xì ñanitnaha-nsia tonto-nè, dandu cuidadu cundoo-nsia, vàchi dècuèndè ñuhu andea ndiatu-xi-nsiá.

²³ Ni cachí-ndà cuàhàn iin nèhivi veheñùhu, nihí-né promesa nacuaàhatahvi-né Dios lugar ndé cahvi nèhivi mii-yá. Doco te nú sàni sàà-nè yucán, te ni nsinuu ini-nè iá cuàchi-ne nùù ñanitnaha-ne,

²⁴ dandu (màsà cuáha-ne) promesa mà; yucan ni ndóá, te ni cúhùn-nè nùù ñanitnaha-nemà, te cuicahnú stnahá ini-nè sàhà-né. Cuisi nú ducán, dandu vátùni naxicoçuin-nè veheñùhu mà ñà-cuáha-ne promesa mà.

Nansa ni cachi Jesús ñà-yàchi xiñuhu nàcundoo vaha stnaha-nda

²⁵ 'Nú sàni sanicuàchi iin tiàa sàhà iin-nsia, te ndacá-te mii-nsiá cuàhàn nùù tè-nihí chuun, dandu chicá vaha nacòovàha yachì-nsiá xì-té na cuàhàn-nsiá ichì, còtò sàà-te xi-nsiá nùù juez, te dayáha juez mà-nsiá ndahà comandante ñà-cundiadi-nsiá vehecà.

²⁶ Vàchi ñà-ndáá nduá cachí xì-nsiá yohó, nú ducan ni cuu-xi-nsiá, dandu mà queé-nsiá dècuèndè nú sàni dànáá nsihí-nsiá nsidaa ñà-nduá iníhíca-nsiá.

Màsà cóo-ndá xí inga nècuàchì ñahà, cachi ley xi Jesús

²⁷ 'Sà-ínahá-nsiá nansa ni cachi nècuàchì sàhana ñà-màsà cáhàn-ndá xí inga ana có-nduú nècuàchì vehe-nda, ni cachi-nè.

²⁸ Doco yùhù, (màs gà) cachí xì-nsiá vichi, vàchi nú cuisí indéhe iin tiàa iin nècuàchì ñahà, te xího-téné, dandu dava-ni queámà na ian sàni quida-tè cuàchi xi nècuàchimà, vàchi iá cuàchi ma anima-te.

²⁹ Nàyucandúá, nú nduchìnùù-nsiá, cuniá quida-nsia iin cuàchi, dandu chicá vaha tavà-nsiáñà, dacaná-nsiáñà, vàchi chicá vaha ni ndáñúhú iyuhu iin xaan xí-nsiá, te màdiá sàà inii cuerpu xi-nsia andea.

³⁰ Te ni cachí-ndá nú ndahàcuàhà-nsiá cuniá quida-nsia iin cuàchi, dandu chicá vaha ni táhndèa dacaná-nsiáñà, vàchi chicá vaha ni ndáñúhú iyuhu iin xaan xí-nsiá, te màdiá sàà inii iquicúñú-nsiá andea.

Màsà caté stnàhà-ndá, cachi ley xi Jesús

³¹ 'Nisa cachi stná nèhivi (sàhana): "Nú cuàhàn-nsiá cate stnàhà-nsiá, dandu xiñuhu cuyucun iin tutu indù itúámà", nisa cachi-nè.

³² Doco yùhù cachí, nú ni caté iin tiàa ñahàdihí-te, te màdiá ni cáhàn-ña xi inga tiàa nduá, dandu cuàchi cundua nú ni nándàhà tú-ña, vàchi (còà disàhà-xí) cate nècuàchì primeru mà-ña. Te iin nècuàchì nandàhà xi ñahà ni xitiá mà, divi-ni nsidá cuàchi stná-nè.

Cachí ley xi Jesús, màsà nunca chinaha-nda Dios sàhà iin chuun

³³ 'Sà-ínahá stná-nsiá ni cachi nècuàchì sàhana: "Nú ni chináhà-ndá Stoho-ndá Dios ñà-quida-nda ñàhà, dandu fuerza icúmí-ndá quida ndisa-ndañá cumplir".

³⁴ Doco yùhù cachí, màsà nunca chinaha-nsiá Dios sàhà iin chuun: ni màsà ndácùcahan-nsiá ansivi, te chinaha-nsiá mii-yá sàhà ni-ñàhà, vàchi meru lugar ndé dandacú-yá nduá (te solo mii-yá dandacú-yá nùá).

³⁵ Ni màsà ndácùcahan stná-nsiá quiví ñuhiví yohó, vàchi nahi lugar ndé ndetátú sàhà-yá nduá. Ni màsà ndácùcahan stná-nsiá quiví ñuu Jerusalén, vàchi divi ñuu mii-yá nduá, te rey fuerte nduú stná-yà.

³⁶ Ni màsà ndácùcahan stná-nsiá dìni-nsiá, vàchi có-dàndacú-nsiá sàhà dìni-nsiá ñà-chicata-nsia idi ndéhi, te ò idi cuxín, (mii-yá cachí-yà).

³⁷ Nú cuni-nsiá cachí-nsiá iin ñà-ndácuìsì, dandu jaan, ò á coó cachi-nsiá, vàchi nú màs gà ni cachí-nsiá, dandu ñà-vàxi nùù ñà-malu nduá.

Màsà nàchítacùhá-ndá sàhà ñà-nduá ni quida nèhivi xì-ndá

³⁸ 'Sà-ínahá stná-nsiá nisa cachi-nè: "Nú ni tavá nèhivi iin nduchìnùù-ndá, dandu xiñuhu quee stná iin nduchìnùù mii-né. Te ò nú iin nùhu-nda ni tavá-né, dandu ni quee stná iin nùhu mii-né".

³⁹ Doco yùhù cachí, màsà dúcun ndahà tñahà-ndá xì nècuàchì quidá quíní xí-ndá. Vàchi nú ni caní-né nùù-ndá ladu cuàhà-ndá, dandu ni cuáha stná-ndá inga ladu-ndá.

⁴⁰ Te nú sanicuaèchi-ne sàhà-ndà, te candiáá-nè dùhnù-ndà, dandu ni cuáha stná-ndané dòò-ndà.

⁴¹ Te nú ni tnií-nèndó ñà-fuerza cunsida-nda carga xi-ne iin dava hora, dandu inga dava hora gà ni cúnsidá-ndáñã.

⁴² Te nú xicàn iin nèhivi iñàha nùè-ndà, dandu ni cuáha-ndané; te nú cuní toó-né iñàha, dandu màsà cuidáhán-ndáñã nùè-né.

Ndiá icà-ndà cuu ini-ndà sàhà ana xiní ùhi xì-ndà

⁴³ 'Sà-ináhá stná-nsiá dohó nisa cachi nèhivi sàhana: "Icúmi-ndá cuu ini-ndà sàhà nècuàchi cutnáhá vaha xi-nda, doco nèhivi xiní ùhi xì-ndà, ni cuní ùhi stná-ndané", nisa cachi-né.

⁴⁴ Doco yùhù cachí, xiñuhu cuu ini-ndà sàhà nèhivi xiní ùhi xì-ndà te casàhú vii-ndà xì nèhivi xicàn chihán diquì-ndà; te obra vaha ni quidá stná-ndà sàhà nèhivi có-xiñùhù xì-ndà; te nú cànàhá-nè xì-ndà, te quidá quini-ne xì-ndà, dandu ni cacán tàhvi-ndà nùè Dios sàhà-né.

⁴⁵ Cunaha-nsiá, nú ni quidá-nsiá ducán, dandu cunduu ndisa-nsia dèhe Yuandiaha-nsiá iá ansivi, vachi mii-yá, dandacú-yá ñà-xinu orá nùè nsidanicuú nèhivi, vaha-ne ò malu-né. Te dacuún stná-yá dàvi nùè nsidaa nèhivi, a quidá víi-né, ò có-quidá víi-né.

⁴⁶ Vachi nú cuiis nèhivi cuú ini xì sàhà-nsiá cuú stná ini-nsia sàhà-xí, dandu mà níhi-nsiá premiú sàhájàn. Dècuèndè nècuàchi iá cuàchi-xi nahí tè-dáchiyáhvi (ñuu-ndà yohó), quidá stná-nè ducán.

⁴⁷ Te nú cuiis tñaha-nsia cásàhú xì-nsiá, pues màdi obra ndiaha nduájàn, vachi divi ducán quidá stná nèhivi có-ináhá xí Dios.

⁴⁸ Ñàyücàndüá, xiñuhu quida vii ndisa-nsia nacua quidá Yuandiaha-nsiá iá ansivi.

6

Ñà-ndüá ni cachi Jesús sàhà nansa quida-nda obra

¹ Màsà quidá-nsiá obra xi-nsia sàhà-ñã cundehè nèhivi, vachi nú sàhà ñà-jaàn nduá, dandu cóò ñà-vaha nihí-nsiá sàhámà nùè Yuandiaha-nsiá iá ansivi.

² Ñàyücàndüá, nú cuàhàn-nsiá dacútàhvi-nsiá nècuàchi ndahví, màsà cátétñuhu-nsia ñà-jaàn. Vachi ducán quidá nèhivi datiaá uun nduú nèhivi vaha, quidá váté-né obra xi-ne veheñùhù ò calle sàhà-ñã cuní-nè ndee vaha-ne nùè nèhivi. Te ñà-ndaà nduá cachí xì-nsiá yohó: cuiis ñà-jaàn cunduu ñà-vaha nihí-né.

³⁻⁴ Doco mii-nsiá, na quidá-nsiá iin obra, quida dèhé-nsiáñã, dandu coo dèhá' nùè nèhivi. Doco nùè Yua-nda Dios, cóò, vachi indéhe-yá, te nùè mii-yá icúmi-nsiá nihí-nsiá ñà-vaha xi-nsia.

Ñà-ndüá ni cachi Jesús na ní chinaha-yàndó nansa cacán tàhvi-ndà nùè Dios

⁵ 'Na xicàn tàhvi-nsiá nùè Dios, màsà quidá-nsiá na quidá nècuàchi datiaá uun nduú nèhivi vaha. Vachi mii-né, cudí ini-né cuita-ne nacuatú-ne veheñùhù ò esquina sàhà-ñã cundehè nèhivi-né. Doco ñà-ndácusi nduá yohó cachí: cuiis ñà-cundehè nècuàchimàné cunduu ñà-vaha xi-ne.

⁶ Doco ndohó, na xicàn tàhvi-ndà nùè Yua-nda Dios, ni nánshivi-nda ini vehe-nda, te nacadi-ndà yehé; dandu miini-yá iníni-yá na cáhàn-ndà xì-yá. Te indéhe-yá, mate nèhivi, cóò, có-xini-né ñà-ndüá quidà-ndà. Dandísà nihí-ndà iin ñà-vaha xi-nda nùè-yá.

⁷ 'Na cáhàn-ndà xì-yá, màsà cachi-ndà iin-ni iñàha cuàhà xichi na quidá nècuàchi có-ináhá xí Dios, vachi mà chindéamà. Mii-né, tuxí ini-né icúmi Dios cunini-yané ñà-cuàhà guá cáhàn-né, doco cóò.

⁸ Ñàyücàndüá, màsà quidá-nsiá na quidá mii-né. Vachi Yuandiaha-nsiá, mate tãñaha ga cachi-nsiá xì-yá índü necesidad icúmi-nsiá, doco sà-ináhá-yá.

⁹ Ñàyücàndüá, nahí palabra yohó cachi-nsiá na xicàn tàhvi-nsiá nùè-yá:

Yua-sí Dios iá ansivi, ni ndácucahan tñùñuhu nèhivi quiví-ní.

¹⁰ Te yàchi ni sáa stná tiempu cusahnu-ní ñuhiví yohó, xicàn tàhvi-nsí. Te nacua quidá ana ndoó ansivi ñà-ndüá dandacu-ní, divi ducan ni quidá stná nèhivi ñuhiví yohó.

¹¹ Pan xi-nsi iin quiví iin quiví, taxi tàhvi-nià nùè-nsí vichi.

¹² Te cuicahnú ini-ní sàhà cuàchi inihicá-nsí, nacua xicáhnù stná ini nsiùhù sàhà nèhivi inihicá nùè-nsí.

¹³ Te chindee-ní nsiùhù ñà-màsà dáca nèhivi nsiùhù; te dacácu stná-ní nsiùhù nùè ñà-malu nicanicuahàn. Vachi cuiis mii-ní nduu-ní rey ndiaha cusáhnù dandacu inicutu, te cuiis mii-ní ndiaha-ní nicanicuahàn. Amén. (Ducán cachi-nsiá.)

¹⁴ 'Vachi nú ni cuicáhnù ini-nsia sàhà nèhivi ni quida quini xì-nsiá, dandu stná Yuandiaha-nsiá iá ansivi, cuicahnú stná ini-yá sàhà cuàchi mii-nsiá.

¹⁵ Doco nú màsà cuicáhnû ini-nsiá sàhà nèhivi dava ga, dandu mà cuicáhnû stná ini-yà sàhà cuàchi mii-nsiá.

Nansa quida-nda na iníhî-ndà ndoó dòcò-ndà

¹⁶ Na iníhî-nsiá ndoó dòcò-nsiá, màsà datíiá-nsiá cuhúún ini-nsiá. Vàchi ducán xíquida stná nècuàchi datíiá uun nduú nèhivi vâha, quidá cánúú-nê ndoó-né tnúnsi ini sàhà-ñá cundaà ini nèhivi iníhî-né. Te ñà-ndácuisi nduá cachî xî-nsiá vichi: cuisì ñà-jaàn cunduu ñà-vâha nihî-né.

¹⁷ Doco mii-nsiá (màsà quidá-nsiá ducán). Na iníhî-nsiá nùè Dios, quisi-nsia, te nduvii dîni-nsiá

¹⁸ sàhá màsà cúndàà ini nèhivi iníhî-nsiá; cuisì Yua-nda Dios cundaà inì-xi, vâchi indêhe-yá, mate có-túi-yá nùè nèhivi; doco indêhe-yá, te cuàhatahvi stná-yànsiá ñà-vâha xi-nsia (sàhàmà).

Ndè gloria xiñuhu càyà ñà-cuicà-ndà

¹⁹ 'Màsà dácâyà-nsiá ñà-cuicà-nsiá ñuhiví yohó, vâchi icúmíá cusiquidi-ñá, te ò nana dítu-ña, te ò quíhvi tècuíhnà quida cuíhna xán.

²⁰ Còó, dècuèndè gloria ni càyà-ñà, vâchi yucán mà nunca cusiquidiá, ni mà náná dítnú-ñá, ni mà quíhvi stná tècuíhnà quida cuíhna xán.

²¹ Ducán quida-nsia, vâchi ndé quida-nda cuenta íá ñà-cuicà-ndà, divi lugar yucán cuàhàn-ndà cunihnu cuahà ini anima-ndà.

Ejemplu sàhà nduchinúú nèhivi

²² 'Nduchinúú-ndà nduú ñà-túnúú iguicúñú-ndà. Ñâyùcàndüá, nú íá vâha ma, dandu vâtùni cutuú nuù-ndà ñà-quida-nda nsidanicuú iñàha.

²³ Doco nú cuhiá, dandu inicutu nácuin tnùè. Te ducán stná xî anima nèhivi, nú iin tnúú ndé xiñuhu datnúú mii-yá, dandu ñndahví-nè! Vâchi tnùndoho nduá, nú ducán.

Mà cúí cundoo ùi patrón xi-nda

²⁴ 'Iin peón, mà cúí cundoo ùi patrón xi-tè, vâchi nú ducán, dandu iin-ne coo manì nùè-té, te inga-nè cundehè ùhi-te. Te ò ni cachí-ndà, iin-ne cahíchi ini-te, te inga-nèmà coo vâha xi-té. Te ducán íá stná xî mii-nsiá, nú cuú inì-nsia sàhà dihùn, dandu mà cúí cunucuachi stná-nsiá nùè Dios.

Nansa ndiáá Dios nècuàchi xínduu dèhe-ya

²⁵ 'Ñâyùcàndüá, yùhù cachî xî-nsiá, màsà nácání ini-nsiá sàhà vida xi-nsia nansa nihî-nsiá ñà-cuxi-nsia coho-nsia, te cundixi-nsia. Còó, vâchi màdi cuisì ñà-cuxi-nda nduá xiñuhu sàhà-ñá cucumi-nda iin vida ndiaha; te cuerpu xi-nda, chicá ndiáá' nùè sicoto ndixi-nda.

²⁶ Cundehè-nsiá laa ndavá ansivi, có-xitú-si, ni có-chívâha-si nùni, vâchi còó cosecha ndanihî-si. Còó, cuisì nùè Yuandiaha-nda íá ansivi nihî-si ñà-itiácú-si. Pues nâhá xicá, chicá ndiáá mii-nsiá nùè quisi mà.

²⁷ 'Ñâyùcàndüá, mate yáha ga ni cahní-nsiá dîni-nsiá, te nacání ini-nsiá, uun-ni queámà, vâchi mà nihî-nsiá cuahnu ga-nsiá ni-inga dava metro.

²⁸ 'Ni màsà nácání stná inì-nsia sàhà ñà-ndüá cundixi-nsia. Cundehè-nsiá nansa sahnú ita yucù. Có-quidáchúún-yá, ni có-quidá vâha stná-yá sicoto.

²⁹ Doco chicá ndiaha nâhá ita mà nùè rey Salomón (nisa ía sàhana), mate yáha ga vico ni sandixi-ne.

³⁰ 'Iin ita, yùcù-ni nduá (có-ndiáá ndisa); quivi vitni íá' campu, te tnaa sàni íchà, vihini quèa xitnú coca. Doco mate ducán nduá, ndiaha gá ni quidavâha Dios ita-ñà. Ñâyùcàndüá, vihí gá icúmí-yá cuàhatahvi stná-yá ndohó (ñà-ndüá xiñuhu). Doco mii-nsiá, iyuhu gá xiníndísá-nsiá mii-yá.

³¹ 'Pues yùhù cachî, màsà nácání ini-nsiá, te màsà cáhí-nsiá: "¿Índù tui ñà-cuxi-nsi coho-nsi, te cundixi-nsi?"

³² Vâchi nèhivi nsidaa raza gâ ndoó ñuhiví, divi ñà-jaàn nduá nandúcu-nè. Doco mii-nsiá, íá Yuandiaha-nsiá ansivi, te sà-ináhá-yá xiñuhu nsidaájàn nùè-nsiá.

³³ 'Ñâyùcàndüá, xiñuhu nanducu-nsiá (nansa chivâha vii-nsiá ley xi), ñuhiví ìi xí-yá, te quida-nsia cumplir ñà-vâha cuní-yá quida-nda, dandísá nihî stná-nsiá nsidaa gá ñà-ndüá quidámáni nùè-nsiá.

³⁴ Te màsà nácání inì-nsia sàhà ñà-ndüá cui yâha-nsia tnaa idá, vâchi nú sàni sàà quivi mà, dandu (nsidaámà icúmíá quee viá), mate ni nácání cuàhà ini-nsiá. Nsiquíví íá cuàhà ñà-ndüá yâha-nsia, ñâyùcàndüá có-xiñùhù nacani stná ini-nsiá sàhà tnaa idá —ni cachí Jesús.

¹ (Dandu nì cachi stná Jesús:)

—Màsà dácuídá cuàchi stnahá-nsiá, dandu mà dácuídá cuàchi stná Dios mii-nsiá.

² Vàchi nacua quidá mii-nsiá dacuídá cuàchi stnahá-nsiá, divi ducán icúmí stná-yà quida-ya xi-nsiá. Vàchi vara chitácuhá-nsiá, divi icúmí stná-nsiá cuitacuhá-nsiá.

³ 'Tín nèhivì, ¿índù chuun (índèhe-né falta xi ñanitnaha-ne, te xítñuhu-ne nècuàchìmà)? Vàchi ducán queámà na ian cuní-nè cundehè-né iin mihi tii ináccáa ini nduchinúù nècuàchìmà, te nduchinúù mii-né, iin yutnú cahnú nduá ináccáa.

⁴ Te nú ducán, ¿índù chuun cachí-nè xi ñanitnaha-nemà: “Nacoo-ní yùhù nì tàvì mihi tii ináccáa cucuíñ nduchinúù-ní”?

⁵ Nècuàchì cachí ducán, datiaá úún-né ndiaá ndisa-ne. Vàchi dihna xiñuhu quee yutnú cahnú nduchinúù mii-né, dandu vátùni cutùì vùù nùù-né ñà-tavà-né mihi tii ináccáa nduchinúù ñanitnaha-nemà.

⁶ '(Mà váha ndatnuhu-nda xi nèhivì nansa ni nì cui sàhà) yà-ì, còtó quida-ne xi-ndà na quidá sihina cuehè. (Uun-ni queá ñà-cachi-ndà palabra ndiaha xi nèhivì síquini mà), vàchi na quidá cochí quidá stná-nè, vàchi mate sídiqui yáha ga ndiaá ni chindóó-ndá nùù-sí, doco cuànihni sàhà-siá.

Nansa cundiatú anima-ndà

⁷ 'Càcàn tàhvi-nsiá, te nihì-nsiá. Nanducu-nsiá (ñà-vàha nùù-yá), te icúmíà tuia. Càhàn-nsiá, te nuna yehè-yá.

⁸ Vàchi nsidaa ana xícàn tàhvi, icúmí-nè ñihitáhvi ndisa-ne, te nsidaa ana nandúcu xí ñà-vàha, icúmí-nè nihì-néa; te nsidaa ana xícàn tàhvi yehè-yá, icúmí-yá nacuna-ya nùù-né.

⁹ 'Nú ni càcàn iin dèhe-nsia pan cuxan, divi pan cuàha-nsiaña, màdi yùù.

¹⁰ Te nú cuñu siaca xícàn, pues divi cuñu quisi mà cuàha-nsiaña, màdi cóo.

¹¹ Cunaha-nsiá, mate nèhivì cuàchi nduú-nsiá, doco tùha-nsia cuàha-nsia dèhe-nsia ñà-íá vùù. Ñàyúcànduá, vihi gá icúmí Yuandiaha-nsiá íá ansivi cuàha-yansiá ñà-vàha nú nì càcàn tàhvi-nsiá nùù-yá.

¹² 'Ñàyúcànduá, nacua cuní mii-nsiá quida nèhivì xi-nsiá, divi ducán quida stná-nsiá xi mii-né. Vàchi ñà-jaàn nduá cachí nùù nsidaa tutu nduú ley xi Dios, xi nùù stná tutu nì tiaa profeta nìsa càhàn cuenta xi-ya.

¹³ 'Quìhvi-nsia yehè cuiñ sáa (gloria), vàchi xica yehè ichì cahnú cuàhàn ndé ndañuhu-nda, te cuàhà gá nèhivì quìhvi yucán.

¹⁴ Doco sitnìhì yehè, te cuiñ ichì cuàhàn ndé cutiacu ndiaha-nda; te sàhà-ñà nduá ichì cuiñ, ñàyúcànduá sacu nèhivì ndácùhun xán.

Nansa cundaà ini-ndà índù nèhivì càhàn ndisa cuenta xi Dios

¹⁵ 'Cuidadu cundoo-nsia xi nèhivì tñhù dananí úún càhàn cuenta xi Dios, vàchi cutu vaxì-ne (datiaá úún-né màni ini-nè) nahi riì mansu, doco anima-nè, cóo, nahi lobu dana, ducán íá.

¹⁶ Doco cuisì cundehè-ndà ñà-nduá quidá-né, dandu cundaà ini-ndà nansa ndisa íá anima-nè. Te ducání íá stná xi-né na íá xi yutnú fruta, mà cuàha yutnú iñù ni-iin si-uva, te mà cuàha stná yùcù iñù ni-iin stná sihigu.

¹⁷ Mà cúí, vàchi nsidaa yutnú vàha, puru fruta vàha sàha-nù. Te yutnú cóo chuun xi, cutu ñà-chìcuèhè sàha-nù.

¹⁸ Doco iin yutnú vàha, mà cúí cuàha-nù iin fruta chìcuèhè. Ni-iin stná yutnú cóo chuun-xi, mà cuàha-nù ni-iin quisi vídì.

¹⁹ Te nsidaa yutnú có-sàha xi ñà-íá vùù, icúmí-nù tàhndè-nu, te quèe-nù ñuhu coco-nù.

²⁰ Ñàyúcànduá, na quida-nda xi iin yutnú, nacúni-ndànù sàhà fruta-nu, ducán nacúni stná-ndà nèhivì sàhà ñà-nduá quidá-né.

Màdi nsidaa nèhivì càcu-ne, nì cachi Jesús

²¹ 'Cuàhà nèhivì cachí-nè xì: “Stoho-nsi Señor nduu-ní”. Doco màdi nsidaa nècuàchìmà sàà-nè cundoo-ne ñuhivì ì xi Yuamáni' íá ansivi; cuisì nèhivì quidá ndisa xi ñà-nduá cuní-yá, divi sàa yucán.

²² Te cunaha-nsiá, na sàa quivì (xìnu tiempu), dandu icúmí cuàhà nèhivì cachí-nè xì: “Stoho-nsi Señor, sàni càhàn-nsi cuenta xi-ní, te nì ndacùcahan-nsi quivì-ní; dècuèndè nì tavà stná-nsi ñà-malu ñuhú ini nèhivì, te cuàhà gá stná milagru nì quida-nsi na nì ndacùcahan-nsi quivì-ní”, cachí-nè.

²³ Dandu yùhù naxiconihì nùù-né, te cachi: “Tàcùn' nsiohó; cuahán-ndà iladu, vàchi cuàhà ñà-chìcuèhè sàni quida-ndá”.

Nansa nì nacani Jesús ejemplu sàhà ùi vehe

²⁴ Ñâyücändüá, nsidaa nêhivì inínì xí ñà-ndüá cachí, te quidá ndisa-neà cumplir; nduú-né na iin tiàa nchichí nì nanducu xí iin xaan ndé iá cavà fuerte, te yucán nì chinduhù-né vehe-ne.

²⁵ Daaní, nì quesaha nì cuun dana dàvi, te nì xínu tēñuhu cuáhà. Dandu nì dàñà stná tàchi fuerte, te nì dúcùn nsidaámà icà vehe ma. Doco cóni ndüá, vâchi nuù cavà fuerte indúhá.

²⁶ Doco cunaha-nsiá, nêhivì inínì uun xí ñà-ndüá cachí, te có-quihñ casu-nè, na iin tiàa ndañuhu nduú-né, divi na iin tiàa nì quidavàha xí vehe-xi diquì ñusi-ní.

²⁷ Vâchi na ní quesaha nì cuun dana dàvi, te nì dàñà stná tàchi fuerte, dandu nì xínu tēñuhu cuáhà yucán. Te nì dúcùn nsidaámà icà vehe ma. Te nì ndua iá nì chàhmà dahuan —nì cachì Jesús.

²⁸ Daaní, na ní nsihì nì càhàn-yà xí nêhivì ducán, dandu nì ndulocó-nè sàhà ñà-ndüá chináhà-yà.

²⁹ Vâchi na iin nêhivì tûha dandacú, ducán nì chinaha-yànè, màdi nahi modo chináhà nècuàchi ley xí veheñuhu.

8

Nansa nì dándúvaha Jesús iin tiàa icúmì cuèhè lepra

¹ Daaní, nì nuu Jesús yucù yucán, te cuáhà gá nêhivì nì tenchicùn xí-yà.

² Te cunaha-nsiá, nêhivì inínì uun xí ñà-ndüá cachí, te nì tutuyuhu-né ñuhù sàhà-yà, cachí-nè xí-yà:

—Señor, nú cuní-ní, vâtùni dandúvaha-ní yùhù.

³ Dandu nì chituu Jesús ndahà-yà nuù-né, te nì cachi-yà:

—Juñ. Vichi duha nì ndúvaha-ní, cachí xí-ní.

Dandu divi hora nì cachi-yà xí-né ducán, nì ndañuhu cuèhè xí-ne.

⁴ Dandu nì cachi-yà xí-né:

—Cunaha-ní, màsà càchi-ní nì-iñàha xí nêhivì. Cuisi cuahán-ní nuù dùtù dacúndêhe-nínè icà-ní, dandu nacuaàha-ní promesa xí Dios nacua cachí ley xí Moisés sàhà-ñá cundaà inì nêhivì ñà-sàni nduvàha-ní —nì cachi-yà.

Nansa nì dándúvaha Jesús mozo xí iin capitán nì quixi ladu Roma

⁵ Daaní, nì nasaa Jesús ñuu Capernaum, te yucán nì tnàtuu iin capitán romanu, nì sacundahví-nè nuù-yà,

⁶ cachí-nè:

—Señor, iá iin mozo xí cuhí, indúhu-né cama vehi; sàni dàñà ñi cuerpu-nè, te yáha ga ndohó-né.

⁷ Dandu nì cachi Jesús xí capitán mà:

—Jaàn màsà dandúvahi-nè.

⁸ Te nì naxiconihí capitán mà nuù-yà, cachí-nè:

—Señor, có-nâtùni yàha-ní vehi. Cuisi dandacu-ní xí palabra xí-ní, te nduvàha mozo xí.

⁹ Vâchi yùhù, ndoó stná ana dandacu-xí nuù, te mí, dandacú stná nuù soldadu xí. Nú nì cachí xí iin-tè: “Cuahán”, dandu cùhùn-te; te ò nú nì cachí xí ingà-te: “Naha”, dandu quixi-tè; te na cachí stná xí iin mozo xí: “Dohó quido”, dandu ducán quida-te —nì cachi capitán mà.

¹⁰ Nì nsihì nì inini Jesús ñà-jaàn, dandu nì ndulocó-yà, te nì cachi-yà xí nêhivì xínchicùn xí-yà:

—Cunaha-nsiá, tàñàha ga cunì nì-iin nêhivì ñuu-ndà Israel yohó ndudávà xí capitán yohó, vâchi cuáhà gá xiníndísà-né.

¹¹ Te cachí stná xí-nsiá, icúmì nataca cuáhà gá nêhivì quixi inicutu ñuhivì dècuèndè ndé xínu orá xí ndé quécahnú-ya, te nataca-nè cutnahá-né xí Abraham xí Isaac xí Jacob ñà-cundoo-ne (vicò) ñuhivì ñi xí Dios.

¹² Doco nêhivì dava ga cuáhàn cundoo ñuhivì ñi mà nì cù, icúmì-nè ndiachi-né fuera ndé iin tnúú; te yucán icúmì-nè cuacu fuerte-nè, te càna ñuhu-ne.

¹³ Daaní, nì cachi Jesús xí capitán mà:

—Vâtùni ñuhù-ní vichi, te nacua sàni xinindisa-ní, divi ducán icúmì coo —nì cachi-yà.

Dandu divi hora yucán nì nduvàha mozo xí nècuàchì mà.

Nansa nì dándúvaha Jesús dido Pedro

¹⁴ Daaní, nì sàà Jesús vehe Pedro, te yucán nì xini-yà cuhí dido-ne ñahà; indúhu-né, nácuaàha yocá-nè.

¹⁵ Ñâyücändüá, nì tnii-ya ndahà-né, te nì cuxio cuèhè mà. Dandu nì ndacuiin-nè nì quesaha-né nì xinucuachi-né nuù-yà xí compañeru-yà.

Nansa nì nduvàha cuáhà gá nêhivì nì quida Jesús

¹⁶ Daaní, nì cuñaà, te yucán nì sàà stná cuàhà gá nèhivì, ndacá-né cuàhà nècuàchì inácaá ñà-malu inì-xì. Te cui-sì-nì nì càhàn-yà xì iin iin nècuàchì mà nì dándàcú-yà nù-sì, te nì quee dahuun-sì nù-né. Te nsidaa gá stná nècuàchì cuhí nì casaà yucán, nì dándúvaha stná-yànè.

¹⁷ Ducán nì quida-ya sàhà ñà-nì cùú ndisa ñà-ndùá nì cachitnùhu nèhivì xì Dios nani Isaias na ní cachi-nè palabra yohó: “Mii-yà nì dàcúxió-yà cuèhè xi-nda, vàchi nì nacuida-ya ñà-ndùá dandoho xi-nda”.

Nansa nì cachi Jesús xì nèhivì cuní cunchicùn xì-yá

¹⁸ Na ní xini Jesús sàni tnàtuu cuàhà gá nèhivì nù-yá, dandu nì cachi-yà xì nècuàchì dacuahá-yà ñà-nì cùhùn-nè xì-yá ndè inga ladu mar.

¹⁹ Te daa nì tnàtuu stná iin nècuàchì ley xì veheñuhu, cachí-nè xì-yá:

—Maestro, dispuestu ié' cunchicùn mii-ní ndéni nì cui nì cùhùn-ní.

²⁰ Doco nì cachi-yà xì-né:

—Lusu, iá nchihò-sí; te laa ndavá ansivi, iá stná tacà-si; doco yùhù ana nduú Tnaha Nèhivì Ñuhivì, còò ni-iin lugar ndé cunduhí cùdi.

²¹ Daaní, inga nèhivì nduú iin ana dacuahá-yá, nì cachi stná-nè xì-yá:

—Señor mío, díhna nì núhi vehi coo guè dècuèndè nú sàni ndùxin yué (dandu cunchicùn mii-ní).

²² Dandu nì cachi-yà xì-né:

—Còó. Cunchicùn dahuun-ní yùhù. Nècuàchì còò vida (ndiaha nù anima-xi), divi nì cùxin xì nsii xì.

Nansa nì quida Jesús iin milagru, te nì cucuìn tàchi, te nì nàcùñuhu dadí tècuí mar

²³⁻²⁴ Daaní, nì nana Jesús lancha, mii-yá xì nècuàchì dacuahá-yá, te cuàhàn-yà xì-né nù mar. Doco nì quesaha caná ndéé tàchi, te nì nacuahnu todò tècuí, te cuàhà gá-te nì quèe stná ini lancha. Doco mii-yá, quidi naà-yá.

²⁵ Ñàyúcàndúá, nì nataca nècuàchì dacuahá-yá ndé indúhu-yá, te nì dànsicuihnu ini-nèya, cachí-nè xì-yá:

—¡Stoho-nsì Señor! ¡Dacácu-ní nsiùhù, vàchi cuàhàn-ndà càhà-ndà!

²⁶ Dandu nì cachi-yà xì-né:

—¿Índù chuun yùhí guá-nsià, te có-càhvi-nsiá xì Dios?

Dandu nì ndacuiin-yà nì càhàn-yà nì sadi-yà nù tàchi xì nù tècuí mar mà. Te (vichi vichi) nì nàcuìn dadí uun inicutu.

²⁷ Dandu nì candulocó nècuàchì mà nì cachí-nè:

—¿Índù clase tiàa nduú ana yohó ñà-dècuèndè tàchi xì mar iníni xì-né?

Nansa nì tavá Jesús cuàhà ñà-malu ñuhú ini iin tiàa ñuu Gadara

²⁸ Daaní, nì sàà Jesús inga ladu mar yucán ndé nduú ñuu Gadara. Te yucán nì caquee ù nèhivì mahi cueva ndé xì-indùxin nsii, te nì tnàtuu-ne nù-yá. Ndú-nè, ñuhú ñà-malu ini-nè, te dana sàstnùhù-né, mà cù yáha ni-iin nèhivì ichi yucán ndé ndoó-né.

²⁹ Te nì càna ndee-né, cachí-nè xì-yá:

—Mii-ní, Dèhemani Dios nduu-ní. ¿Ndíá cunduu-ní nsiùhù? ¿A vaxi-ní dandoho-ní nsiùhù, mate tá sàà hora ndoho-nsi? —nì cachi-nè.

³⁰ Te xica yucán ndoó cuàhà stná cochi xixáhan-sì.

³¹ Ñàyúcàndúá, nì sacundahví nsidaa ñà-malu mà nù-yá, cachá':

—Nú cuàhàn-ní tavá-ní nsiùhù, dandu dayáha-ní nsiùhù ini cochi cuàhà yucán.

³² Dandu nì cachi-yà xán:

—Cuahán-ndá, cachí'.

Dandu nì caquee nsiha nì sàcùñuha ini cochi yucán. Ñàyúcàndúá, carrera nì canuu nsii-sì candiaa yucán, te nì còyo-sì ndè mar nì càhà-sì.

³³ Dandu tè-ndiáá xì cochi mà, yáha ga nì yùhí-te; te mànuhù-té carrera ndé nduú ñuu yucán, nì cachitnùhu-tè xì nèhivì ñuu mà ñà-ndúá nì cuu, xì sàhà stná nècuàchì nisa ñuu ñà-malu inì-xì.

³⁴ Ñàyúcàndúá, nì caquee nsiha nèhivì ñuu mà nì casaà-nè ndé iá Jesús; te na ní xini-nèya nì sacundahví-nè nù-yá ñà-nì quèe dahuun-ya ladu xi-ne.

9

Nansa nì dándúvaha Jesús iin nèhivì nì daña ù cuerpu-xi

¹ Daaní, nì nana tu Jesús lancha, te nì yáha-ya mar mànuhù-yá inga ladu ndé nduú ñuu-yà.

² Te yucán nì tnàtuu nèhivì nsida-xi iin nècuàchì cuhí nì daña ù cuerpu-xi, indúhu-né camilla. Ñàyúcàndúá, na ní xini-yà ñà-cuàhà guá xíxinindisá nèhivì yucán mii-yá, nì cachi-yà xì nècuàchì cuhí mà:

—Màsà cùhúún inì-ní, hijo, vâchi yùhù xicáhnù inì sàhà cuàchi-ní.

³ Doco cunaha-nsiá, yucán ndoó stná dava maestru xi ley xi veheñuhu, te nacání ini-nè: “¡Mà ndóo ini Dios sàhà ñà-ndúá nì cachi Jesús mà!”

⁴ Doco mii-yá, ináhá-yâ nansa nacání ini nècuàchimà, ñâyùcàndúá nì cachi-yà xì-né:

—¿Índù chuun có-nacání víi inì-nsia?

⁵ Cachi-nsiá xì: ¿Índù milagru nduú ñà-chicá ùhì quida-nda: a ñá-cachi uun-nda (xi nècuàchì cuhì) ñà-xicáhnù inì-ndà sàhà cuàchi-ne, te ò ñá-cachi-ndà xì-né nì ndácuíin-nè, te nacaca-ne?

⁶ Pues yùhù ana nduú Tnaha Nèhivì Ñuhivì, cuàhìn quide iñàha sàhà-ñá cundaà ini-nsiá iá ndisa derechu cuicahnù inì sàhà cuàchi nèhivì ñuhivì.

Dandu nì cachi-yà xi nècuàchì cuhì mà:

—Ndacuiin-ní, ndanihi-ní camilla xi-ní, te xuhun-ní vehe-ní.

⁷ Dandu, nì ndacuiin nècuàchimà, mànuhù-né vehe-ne.

⁸ Na ní xini nèhivì cuàhà itá yucán ñà-ndúá nì cuu, dandu nì yùhì-nè, te nì naquimani stná-né Dios; vâchi nì xini-nè iá ndisa ana nì ñihitáhvi cuàhà nù-yá.

Nansa nì cana Jesús iin nècuàchì dachiyàhvi nani Mateo

⁹ Daaní, nì quee Jesús lugar yucán cuàhàn-yà. Te nì xini-yà yucán iá iin tiàa nani Mateo, iá-nè nù mesa ndé dachiyàhvi-ne. Te nì cachi-yà xì-né:

—Nahà-ní cunchicùn-ní yùhù.

Dandu nì ndacuiin nècuàchimà cuàhàn stná-nè xì-yá.

¹⁰ Daaní, después iá-yà iin vehe xixí-yá, te cutnàhà stná-yà xi cuàhà nècuàchì dachiyàhvi, xi cuàhà gá stná inga nèhivì cachi-nè iá cuàchi-xi; xíndoos nsidaa-né xixí-né xì-yà xi nècuàchì dacuahá-yá.

¹¹ Te nì caxini nècuàchì fariseu nansa quidá-yá (xixí-yá xi nècuàchimà), te nì càhàn-nè xi nècuàchì dacuahá-yá mà, cachí-nè:

—¿Índù chuun cutnàhà maestru xi-nsia xixí-né xi cuàhà tè-dachiyàhvi, xi dava ga stná nèhivì cuàchi?

¹² Doco nì tiacu Jesús ñà-cachí-nè ducán; ñâyùcàndúá nì cachi-yà xì-né:

—Màdi nècuàchì ndáa vâha xiñuhu xi ana quidatatna xi-né. Còó, nècuàchì cuhì xiñuhu xi ana quidatatna xi-né.

¹³ Ñâyùcàndúá, cuahán-nsiá dacuahá-nsiá nansa cunì cachi Dios nù tutu ì ndé cachí-yà: “Chicá cudí inì ñà-cundehè ndahví stnahá-nsiá, te màdià cuàha-nsia yùhù iin promesa”, cachí-yá. Vâchi yùhù, màdi nèhivì ñuhnù ndàcuìsì inì-xi vâxi càhàn xì ñà-naxicocuiin ini-nè. Còó, nèhivì cuàchi vâxi nanduquí ama naxicocuiin ini-nè sàhà cuàchi-ne —nì cachi Jesús.

Ñà-ndúá ñà-sàhà-xì cónisá iníhù nècuàchì dacuahá Jesús na iá va-ya ñuhivì yohó

¹⁴ Dandu nì catnàtnuu nècuàchì nchícùn xi Juan Bautista, te nì ndàcàtnùhù-né nù-yá, cachí-nè:

—Nsiùhù xi stná nècuàchì fariseu, iníhù cuàhà-nsí ndoó dòcò-nsi, doco nècuàchì dacuahá mii-ní, còó, có-iníhù-né. ¿Índù chuun?

¹⁵ Dandu nì cachi-yà xì-né:

—Nècuàchì ndoó vicò nándàhà, ¿a cúí cundoo-ne tnùnsí inì na meru ndoó-né cutnàhà-né xi noviu? Còó. Doco vâxi iin quivì mà còó gá noviu nù-né; dandísá tiempu yucán icúmí-né cunihii-né cundoo dòcò-né.

Ñà-ndúá ñà-sàhà-xì icúmí ndañuhu estilu sàhana, divi sàhà estilu saa nì nacoó Jesús

¹⁶ Sicoto saa, màsà nàcàhmá-ndàñá nù ñá-tùhù, vâchi nú ducán, dandu dandásíá ndé nì nacáhmá, te chicá ndatá sicoto tuhú mà. Dandu ñà-sàni ndatá dahuun sicoto-mà cundua.

¹⁷ Stná vinu, nú vinu saa nduá, dandu mà dáquêe nèhivì-ñá inì itni iin tuhú, vâchi nú ducán, dandu ndàtá-ñá, te cuitià vinu, te cuchicuehe stná iin mà. Ñâyùcàndúá, nú vinu saa nduá, dandu itni iin sàà nì quéa, te ducán còó ni-iñàha cuu xán, nì stná iin mà.

Nansa nì dandatiácú Jesús dèhe Jairo, te nì danduvàha stná-yà iin nècuàchì ñahà ndohó iin cuèhè ùxin ùi cuià

¹⁸ Na càhàn va Jesús ducán xi nèhivì, dandu nì sàà stná iin nècuàchì dandacú, te nì tutuyuhu-né ñuhù nù sàhà-yá, cachí-nè xì-yá:

—Làcà ní quesaha xihì nihni dèheyoquí; doco nú nì cùhùn-ní, te chitàndòò-ní ndahà-ní ñiquià, dandu nanihitáhvià ñuhivì —nì cachí-nè.

¹⁹ Ñâyùcàndúá, nì ndacuiin-yà cuàhàn-yà xì-né. Te cutnàhà stná-nè xi nsidaa nècuàchì dacuahá-yá.

²⁰ Doco nisa la stná iin nècuàchi ñahà cuhí cuèhè nù. Sàcuahàn-nè ùxin ùi cuà ndohó-né ducán. Ñàyucándüá, ni quixi-ne ladu yàtà-yá, te ni dàcùhùn canúú-né dinindàhá-nè nùu sicoto xi-ya.

²¹ Váchì nihnú ini-nè: “Nú ni dúcùn ndahí mate sícotò-ni xi-ya, dandu nduváhi”.

²² Dandu mii-yá, ni nacuíco-yá yàtà-yá, te ni xini-yá nècuàchi ñahà mà, te ni cachi-yá xi-né: —Màsà cùhúún ini-ní, hija, váchì sàni nduvàha-ní ñà-ni xinindisa-ní.

Dandu divi momentu mà ni nduvàha nècuàchìmà.

²³ Daaní, ni sàà-yá vehe nècuàchi dandacu-ma, te ni xini-yá yucán ndoó cuàhà nèhivi xi stná tè-siví, sacú ndéé-nè, te tnaná-né.

²⁴ Ñàyucándüá, ni cachi-yá xi-né:

—Quee-nsia fuera, váchì ñahà chiì yohó, cóni xíhi ndisa-ña, quidí uun ni-ña.

Doco nèhivi mà, ni sàcúndiaa uun-neyá.

²⁵ Dandu mii-yá, ni dàcùhùn-yá nsidaa-né fuera, te ni quìhvi-ya ndé indúhu ñahà chiì mà. Dandu ni tnií-ya ndahá-ña, te ni dàndácó-yáña (váchì sàni natiacù-ña).

²⁶ Daaní, inicutu ladu yucán ni xitià palabra nansa ni quida-ya milagru mà.

Nansa ni dàndúvaha Jesús ùi nècuàchi cuaá

²⁷ Na ní quee-ya lugar mà, dandu yucán ni tenchicùn stná ùi nècuàchi cuaá mii-yá, cána-ne, cachí-nè xi-yá:

—Mii-ní descendencia ùi xí David, cundehè ndahví-ní nsiuhù.

²⁸ Dandu ni yàha-ya ini vehe, te ndé yucán ni casaà stná nècuàchìmà, nchícùn-nèyà. Dandu ni cachi-yá xi-né:

—¿A xinindisá ndisa-nsia ñà-vàtùni dàndúvahi mii-nsiá?

—Jaan, Señor —ni cachi-nè.

²⁹ Dandu ni chituu-ya dinindàhá-yá nduchinúú-né, te ni cachi-yá:

—Nacua sàni xinindisá-nsiá, divi ducán ni coo-xi-nsiá, cachí.

³⁰ Dandu ni natùu nùu-né. Te ni chinaha-yànè, cachí-yá xi-né ñà-màsà cúnitnùhu nèhivi sàhà ñà-ndüá ni quida-ya.

³¹ Doco mii-né, ni caquee-ne ni nacani-ne sàhà-yá xi nsidaa nèhivi ndoó inicutu ladu yucán.

Nansa ni nihí iin nècuàchi ihìn ni nacahàn-nè ni quida Jesús

³² Meru queé nècuàchi cuaá mà, te ni quesaa stná itmii nèhivi ndaca-xi iin nècuàchi ihìn ináccá stná iin ñà-malu ini-xi.

³³ Dandu ni tavà Jesús ñà-malu mà, te ni nihí-né ni nacahàn vii-né. Ñàyucándüá, ni ndulocó nèhivi, cachí-nè:

—Có-xini-ndá ni-iin ñà-ndiaha jaàn ñuu-ndá Israel yohó.

³⁴ Doco nècuàchi fariseu, ni cacachi-nè sàhà-yá:

—Cóo. Sàhà-ña chindéé jefe xi ñà-malu-nè, ñàyucándüá vátùni tavà-né dava ga ñà-malu.

Nansa cuhí ini Jesús nèhivi

³⁵ Daaní, chicá más ni xicanuu Jesús ladu yucán ni nacàhin-ya nsidaa ñuu nahnú xi ñuu cuati, dacuahá-yá nèhivi sàhàn veheñùhu iin iin ñuu, te cachítñùhu-ya razón ndiaha sàhà ñuhiví ùi xí Dios. Te ni dàndúvaha stná-yá nèhivi ndohó nsidanuu clase cuèhè.

³⁶ Te na ní xini-yá yàha ga cuàhà nèhivi ndoó, dandu ni cuhí ga ini-yànè, váchì ndoó-né nahi rii còo stohò-xi.

³⁷ Dandu ni cachi-yá xi nècuàchi dacuahá-yá:

—Ñà-ndàà nduá (cuàhà nèhivi tañáha ga cunindisá); te na iin cosecha cahnú ndaníhí-ndá nduú-né, doco sacú nèhivi nduú ana (chindéé xí-ndá) ndanchítóá.

³⁸ Ñàyucándüá, cacàn tàhvi-nsiá nùu Lamú dandacú sàhà chuun yohó ñà-ni téchúún gá-yá nèhivi cùhùn quida xi chuun (ù xi-yá mà), váchì na ian ndaníhí-ndá iin cosecha ndiaha nduá —ni cachi Jesús.

10

Nansa ni nacàxin Jesús ùxin ùi tiàa ñà-cunduu-ne apóstol xi-ya

¹ Dandu ni cana Jesús ùxin ùi nècuàchi dacuahá-yá, te ni sàhatahvi-yànè ñà-tavà-né ñà-malu ñuhú ini nèhivi. Te ni nihítàhvi stná-nè dàndúvaha-ne nècuàchi cuhí ndohó nsidanuu clase cuèhè.

² Cunaha-nsiá, dohó nani ùxin ùi nècuàchi dacuahá-yá mà: primeru iá Simón; te Pedro nani stná-nè; daaní, iá stná ñani-nè Andrés, xi stná dèhe Zebedeo nani Jacobo, xi ñani Jacobo mà nani Juan.

³ Te iá stná Felipe, xi Bartolomé, xi Tomás, xi tè-dàchíyàhvi nani Mateo, xi stná dèhe Alfeo nani Jacobo, xi stná Lebeo; te Tadeo nduú inga quivi Lebeo mà.

⁴ Daaní, iá stná Simón nì sanduu iin nècuàchì partidu cachí-nè nècuàchì Canaán, te nì iá stná Judas Iscariote, divi nècuàchì nì cahin xi-yá nù tò-xíandacú.

Nansa ni techuún Jesús nècuàchì dacuahá-yá ñà-dacutiá-nè palabra ì xi-yá

⁵ Pues divi ùxin ù nèhivì yucán nì techuún Jesús (cùhùn-nè cacanuu-ne). Te dohó nì cachi-yá xi-né quida-ne:

—Màsà cùhùn-nsià ladu ndé ndoó nècuàchì inga raza, ni màsà cùhùn stná-nsià ndé ndoó nècuàchì samaritanu.

⁶ Còó, cui-sì-ní ndé ndoó nèhivì raza-ndà Israel nì cùhùn-nsià, vèchi nahi rii nì tucù xínduu-ne.

⁷ Cuahán-nsià cachitnùhu-nsia xi-né ñà-sà-ítùu tiempu cusahnú mii-yá iá ansivi.

⁸ Dandúvaha-nsia nècuàchì cuhì, te danátíacú-nsià nècuàchì nsii. Te nècuàchì icúmí cuèhè xihì cuñí-xi, dacúxió-nsià cuèhè quini ma, te tavà-nsià ñà-malu nù nèhivì inácáá-sì inì-xi. Te màsà quidá-nsià cobrar nù nèhivì, vèchi uun-ni sàni nihítáhvì stná-nsià ñà-quida-nsia ducán.

⁹ Nì dihùn oro, nì dihùn plata, nì dihùn yahá màsà cúnihí-nsià cùhùn ini itni xi-nsia.

¹⁰ Nì morral màsà cúnihí-nsià cùhùn ichì. Cuisi-ní iin-nì òhùn-nsià cunihì-nsia, xi ndisàn sà-ínái-nsià, xi stná bastón xi-nsia. Cuisi ñà-jaàn-ní cunihì-nsia cùhùn, vèchi iin nèhivì quidáchúuñ, xiñuhu cuàha nèhivì-né raya xi-ne.

¹¹ 'Daaní, nú sàni sàà-nsià iin ñuu, ò iin ranchu, dandu nanducu-nsià vehe iin nècuàchì vaha, te iin-ni cundoo-nsia yucán ndé cachi sàà quivì quee-nsia ñuu mà.

¹² Te nú sàni sàà-nsià vehe iin nèhivì, casahú vù-nsià xi-né ñà-nì cundóó cueé-ne.

¹³ Te nú nduú-né nèhivì vaha, dandísá, ducán icúmí cuu xi-né, doco nú mà váha-ne, dandu nì cúnahá ñà-nduá nì cachi-nsià xi-né.

¹⁴ Te nú có-cùni-nè dayáha-ne mii-nsià, te ò có-cùni-nè cunini-ne palabra nihí-nsià, dandu quee-nsia vehe ma, te ò ñuu mà, te nacatù-nsià sàhà-nsià ñà-nì cóyo yàcá xi lugar mà.

¹⁵ Vèchi cunaha-nsià, chicá cuàhà castigu icúmí nèhivì ñuu mà nihì-né na sàà quivì juiciu, te chicá menos icúmí nihì nèhivì malu ñuu Sodoma xi ñuu Gomorra.

Nansa icúmí nèhivì quida quini-ne xi nècuàchì dacuahá-yá

¹⁶ Cunaha-nsià, dana ga nèhivì ndé techuún mii-nsià cacanuu-nsia, nahi quisì ìhi nduú-né, te mii-nsià nduú-nsià nahi rii. Ñàyucánduá, xiñuhu ñà-cunchito tùha-nsia, te coo mansu stná-nsià na iin loma.

¹⁷ Cuídadu gà cundoo-nsia sàhà nèhivì, vèchi dava-ne icúmí-né quida-ne mii-nsià entregar nù tò-nihì chuun, te yucán ñàhni cui-nsià ini veheñuhu xi-nsia.

¹⁸ Te sàhà-ñà nhicùn-nsià yùhù, ñàyucánduá icúmí-né datnátuu-ne mii-nsià nù gobiernu xi nù rey, dandu datú-nsia nù nècuàchimà ñà-nduá xiníndisá-nsià, te cunini stná cuàhà gá nèhivì inga raza.

¹⁹ Doco na sàà-nsià nù tò-xíandacu-ma, màsà nácánì inì-nsia índu palabra naxi-conihí-nsià nù-té, vèchi divi hora mà icúmí-nsià nihítáhvì-nsià nansa cachi-nsià xi-té.

²⁰ Vèchi màdì mii-nsià cunduu ana cuàhàn càhàn; còó, mii Espíritu Ì xi Yuandiaha-nsià cuàhàn dachítunì xi inì-nsià nansa cachi-nsià.

²¹ Te tiempu yucán, dècuèndè tñaha nèhivì icúmí quida xi-né entregar (nù autoridad) ñà-cui-nè, mate ñánì-nè, ò òhe-ne nduú nècuàchimà. Ndé stná yuadíhì-nè icúmí-nè nacuni ùhì-nè, te canicuàchì stnahá-né sàhà-né ñà-cui-nè. Ducán icúmí-nè quida-ne (quivì yucán).

²² Te mii-nsià, sàhà-ñà ndácùcàhan-nsià yùhù, ñàyucánduá icúmí nsidaa nèhivì cuni ùhì-nènsià. Doco nú iin-ni nì cúnihnú vaha inì-nsia dècuèndè cachi sàà xinu tiempu, dandísá icúmí-nsià càcu-nsia nù Dios.

²³ Te nú quidá quíni nèhivì xi-nsià iin ñuu, dandu cunudèhé-nsià ndé inga ñuu. Vèchi cunaha-nsià, tãñáha ga nacàhin-nsia nsidanicuú ñuu raza-ndà Israel, te sàni naxicocuñ yùhù ana nduú Tñaha Nèhivì Ñuhivì.

Nú dandohó nèhivì-ndó, dandu divi nduú nacua nì yàha stná Jesús, te xi ñà-jaàn nì cúdì ini-ndà

²⁴ Cunaha-nsià, màdiá chicá tùha iin nècuàchì làcà dacuahá nuu iin maestru; te ò iin peón, màdiá chicá ndiaá-te nù lamú xi-té.

²⁵ Cuisi nú sàni sàà iin nècuàchì dacuahá cunduu-ne nahi maestru xi-ne, dandu cudí ini-nè sàhájàn. Stná iin peón, nú sàni sàà stná-te cunduu-tè nahi lamú xi-té, dandu cudí stná inì-te sàhájàn. Doco nú cachì nèhivì sàhà iin nècuàchì sahnú ñà-nduú-né ñà-malu Beelzebú, dandu chicá mà ùhì càhàn quini stná-nè sàhà nèhivì vehe-ne.

Màsà yúhì-ndà nèhivì, ni màsà yúhì stná-ndà ñà-malu

²⁶ Ñâyücàndüá, màsà yúhí-nsià nêhiví. Cunaha-nsiá, còò ni-ñàha cui coo dèhé nicanicuahàn; icúmíá tùia, te icúmí nêhiví cunitnùhu stná-nè sàhà-ñá.

²⁷ Doco mii-nsiá, ñà-ndüá cachí xì-nsiá (na ndoo cuaán-nda) ndé iín tnúú, ñà-jaàn cachitnùhu-nsiá inicutu ndé tuí. Te nú nì càhàn cayí xì-nsiá ñàha, dandu mii-nsiá, nana-nsiá òmí vèhé, te càhàn vate ndee-nsiá ñà-ndüá nì cachí.

²⁸ Te màsà yúhí-nsiá nêhiví cuní cahni xì-nsiá, vâchi cuiisí iquícúñú-nsiá cunduu ñà-cui, doco anima-nsiá, mà cúí cahni-néá. Ñâyücàndüá, mii-yá nduú ana xifñuhu yúhí-nsiá, vâchi icúmí ndisa-ya poder daquée-ya nêhiví nùú andea ndé ndañuhu dahuun anima-nè xì stná iquícúñú-nè.

²⁹ Sà-ínahá-nsiá ñà-ùì chòlìhì dicó-né cùmí tuní, doco mate ducán iyuhu ndiaá-si, ni-iin-si mà sáa cui nú có-chítñuní ini Yuandiaha-nsiá Dios ducán.

³⁰ Te divi ducán stná mii-nsiá (inùú stná-yà mii-nsiá), dècuèndè inahá-yà nadaa ididíni iin iin-nsiá.

³¹ Ñâyücàndüá, màsà yúhí-nsiá, vâchi chicá ndiaá-nsiá nùú laa cuati ma.

Màsà chidèhé-ndà ñà-nchícùn-ndà Jesucristu

³² Nú cachí vate nêhiví ñà-ndüú-né nêhiví xí, dandu yùhù cachi stnáì xì Yuamáni íá ansivi ñà-divi nêhiví xí nduú stná-nè.

³³ Doco nú nì chidèhé-nè ñà-ndüú-né nêhiví xí, dandu yùhù stná, icúmí nacuaá stnáì mii-nè nùú Yuamáni.

Sàhà Jesús icúmí tàhndè dava nêhiví ñuhiví

³⁴ Màsà cúcáhán-nsiá a vâxi yùhù ñuhiví yohó ñà-cucumi nêhiví paz. Còò. Mà cundóó màni-nè; icúmí-nè cundoo-ne nâá stnàhá-nè.

³⁵ Vâchi ñà-nì quesai ñuhiví yohó, icúmí cuní ùhì iin tiàa yua-té, te cuní ùhì stná iin ñàhà chii dihi-ñá, te ò iin nècuàchì ñàhà, cuní ùhì stná-nè òdo-ne.

³⁶ Vâchi dècuèndè tñaha-ne cuní ùhì xì-né.

³⁷ Doco nú chicá cuú ini iin nêhiví sàhà yua-né, ò dihi-né, te màdì yùhù, dandu có-nâtù-ne cunduu-ne nêhiví xí. Te ò nú chicá cuú ini-nè sàhà dèhe-ne, te màdì yùhù, dandu có-nâtù stná-nè cunduu-ne nêhiví xí.

³⁸ Te nú màsà cóó-né dispuestu cunchicùn-nè yùhù mate icúmí-nè cunsiá stná-nè cruz xi-ne (te sàà-nè cui stná-nè), dandu có-nâtù-ne cunduu-ne nêhiví xí.

³⁹ Nsidaa ana cuní dacácu xi vida-xi, cutu ñà-dandáñúhú-nèamà quea. Doco nú sàhà yùhù ndañuhu vida xi-ne, dandu ñà-sàni càcu ndisa-ne nduá.

⁴⁰ Nú cudú ini nêhiví xi palabra cachí mii-nsiá, dandu davani queá na ian sàni xinindisá stná-nè yùhù. Te nú sàni xinindisá-nè yùhù, dandu ñà-sàni xinindisá stná-nè mii-yá ana nì techuun-xì nduú stná.

⁴¹ Te nú quixi iin nècuàchì profeta càhàn cuenta xi Dios, te cudú ini nêhiví xi palabra cachí-nè, dandu dava-nì nihitáhvì stná nêhiví mà nùú-yá na ian nduú stná-nè iin profeta. Te divi ducáni stná xi ndéni tiàa nì cui vâha ini-xì, nú cudú ini nêhiví xi ñà-ndüá cachí-nè, dandu davani nihitáhvì stná-nè nahi nècuàchì mà.

⁴² Dècuèndè, stná nêhiví chicá nduú nêhiví uún, nú ni cuáha-nsianè chii tècuí coho-ne sàhà-ñá nchícùn-nè yùhù, dandu seguru nihitáhvì stná-nsiá sàhàmà nùú Dios —nì cachí Jesús.

11

Nansa ni naxiconihí Jesús nùú nêhiví nì techuún Juan Bautista nì quixi nùú-yá

¹ Nì nsihì nì sàcunaha nêhiví dacuahá-yá nansa quida-ne, dandu cuàhàn mii-yá ñà-cacanu-yá ñuu te ñuu chinaha-yá nêhiví, càhàn-yá xi-né ñà-ndüú razón ndiaha xí Dios.

² Daaní, Juan, íá-nè vehecáa, te nì xinitnùhu-ne ñà-ndiaha guá milagru quidá Cristu. Ñâyücàndüá, nì techuún-nè iin ùì nêhiví dacuahá-né ñà-nì cùhùn-nè nùú-yá.

³ Ñâyücàndüá, nì sàà nècuàchì mà nì ndàcàtnùhù-nè nùú-yá, cachí-nè:

—¿A ndisá mii-ní nduú ana ndiaha icúmí quesaa, te ò inga ana vâxi cundiatu-nsi?

⁴ Dandu nì cachí-yá xi nêhiví mà:

—Cuahán-nsiá cachitnùhu-nsiá xi Juan sàhà ñà-ndüá iníni-nsiá, xi ñà-ndüá indèhe-nsiá yohó,

⁵ nansa cuú xi nècuàchì cuaá, níhì-né natùinuú-né, te nêhiví xicá cuèhè, níhì stná-nè nacaca vii-né; te nêhiví nì xihì cuñú-xì, níhì-né nduvàha-ne; te nêhiví dòhò, níhì-né natiacu-nè; te nêhiví nì xihì, ndanchító stná-nè natiácú-nè; te nêhiví ndahví, níhìhàhvì stná-nè cunini-ne razón ndiaha xí Dios.

⁶ Ñâyücàndüá, nú cudú ini nêhiví modo xi, dandu contentu icúmí-nè cundoo-ne —nì cachí-yá.

⁷ Daaní, na sámànùhù nèhivì nì quixi ma, dandu nì quesaha Jesús cáhàn-yà xì nèhivì sàhà Juan, te dohó nì cachi-yà:

—Na ní caquee-nsia ñuu-nsià cuàhàn-nsià yucù cundehe-nsià Juan, ¿a cuàhàn-nsià cundehe-nsià iin nèhivì (tùha dàma òni-xí) na iin yutnù ndóyo quidá tàchì? (Còó.)

⁸ Doco nú coó, dandu ¿nansa iá-nè cahan-nsiá? ¿A nduú-né iin nèhivì ndixí vico? Còò, vachi nèhivì ndixí vico, vehe rey ndoó-né.

⁹ Pues nú màdi ducán, dandu ¿nansa iá nècuàchìmà cahan-nsiá? ¿A iin profeta cáhàn cuenta xi Dios nduú-né? Pues ñà-ndàà nduá. Doco màdi cúsi profeta nduú-né, vachi chicá más ndiáá-nè.

¹⁰ Vachi divi nècuàchìmà nduú ana cáhàn tutu ì sàhà-xí ndé (cachí Dios palabra yohó): Cunaha-ní, cuàhìn techuín iin tiàa, te dihna-ne yàha-ne cáhàn-nè xì nèhivì ñà-nduú razón xi, te ducán (nsida vii-né anima-nè), na ian nduvii iin ichì, dandu después yàha stná mii-ní (Cristu), cachí Dios nù tutu mà.

¹¹ Te yùhù cachí xi-nsiá, nùu nsidaa nèhivì nì túnùu-xí ñuhiví, còò inga-nè chicá nì quidá ndiaha nùu Juan Bautista. Doco cachí stnàì xi-nsiá, chicá ndiaha coo xi ana cuàhàn cuni tiempu cusáhnù mii-yá iá ansivi, mate nèhivì ùun nduú-né.

¹² Cunaha-nsiá, dècuèndè quivì nì quesaha Juan Bautista cáhàn-nè sàhù xì dècuèndè vichi, cuàhà gá nèhivì sáhandee fuerte ini-nè ñà-nihì-né cundoo-ne ñuhivì ì xí mii-yá iá ansivi. Yáha ga sáhandee ini-nè, te vátùnì sàcuàhàn cuàhà-né níhitàhvi-né cundoo-ne yucán.

¹³ Vachi antes cuàhà nècuàchì profeta nisa cáhàn cuenta xi Dios, nì cachitnùhu-ne (sàhà tiempu dandacú-yá). Stná ley (xi Moisés), nì cachitnùhu stná sàhámà. Te ducán nisa ìa ndé cachi nì quesaa Juan (Bautista).

¹⁴ Te cunaha-nsiá, divi Juan mà nduú Elías (nì cachi nècuàchì sànahà) icúmí naxicocuíñ. Te nú cuní-nsià, vátùnì mànihì ini-nsià sàhà ñà-jaàn.

¹⁵ Nì cúniní vaha nsidaa-nsiá ñà-nduá cachí xi-nsiá —nì cachi Jesús.

¹⁶⁻¹⁷ Dandu nì cachi tu-ya:

—Cuàhìn cachí xi-nsiá nansa quidá nèhivì tiempu vichi. Cunaha-nsiá, dohó quidá-né na ian quidá ñà-cuati ndoó idáiquì ini iin ñuu, dava cána xì tnaha, cachá: “Siví-nsi, doco nsiohó, có-itàsáhá-ndá; daaní, xitó tàsi-nsi, doco nsiohó, có-sàcù-ndá”.

¹⁸ Te ducán iá stná xi Juan xi yùhù, vachi nì quixi nècuàchìmà nisa ìa-ne yohó, cóni sáxíxi-né comida vaha, nì cóni sáxíhì stná-nè (vinu), ñàyùcànduá nì cachi nèhivì sàhà-né: “(Tè-locó nduú-te), sàni cundee ñà-malu nù-té”.

¹⁹ Daaní, nì quesaa stná yùhù ana nduú Tnaha Nèhivì Ñuhiví, te tùha stnàì cuxi comida vaha, te xihí (vinu), doco cachí stná nèhivì xí ñà-yáha ga ndadí, te cachí stná-nè ñà-tùhe coho cuahí, dècuèndè iá vaha stnàì xi tè-dàchíyàhvi, xi stná nsidaa gá nèhivì cuàchì, cachí-nè. Doco cunaha-nsiá, nú ndisa ñà-nchichí ndiaha nduá quidá-ndà, dandu icúmí sàà-mà cunahà claruà después.

Nansa icúmí cuu xi nèhivì ñuu cóni cùú arrepentir, icúmí-nè ndoho-ne

²⁰ Daaní, nì quesaha Jesús chináhá-yà nèhivì ñuu ndé nì quida guá-yà cuàhà milagru xi-ya, doco cóni naxícocuíñ ini-nè.

²¹ Dohó nì cachi-yà:

—¡Ndahví nècuàchì ñuu Corazín! Te ¡ndahví stná nècuàchì ñuu Betsaida! Vachi cuàhà milagru fuerte sàni xini-nè (te cóni ndúlócò-nè). Doco cunaha-nsiá, nú ducánì nì coó stná milagru mà ñuu Tiro ò ñuu Sidón nì cùì, dandísá, yàchì naxicocuíñ ini nècuàchì ñuu mà sàhà cuàchì-ne, te nàcùndixi ndahví-nè, te nàcùndoo stná-nè mahì yàà tutnù, cunduumà seña ñà-ndisa cuhì ini-nè mii-nè sàhà cuàchì-ne.

²² Doco yùhù cachí xi-nsiá, chicá iyuhu castigu icúmí nihì nèhivì ñuu Tiro mà xì nèhivì ñuu Sidón mà na sàá quivì juiciu, te chicá fuerte coo castigu xi ñuu Corazín xi ñuu Betsaida.

²³ Daaní, stná nècuàchì ñuu Capernaum, mate tuxí ini-nè nana ducún-nè ndé gloria, doco còò, ndé andea icúmí-nè nuu-ne. Vachi cuàhà milagru fuerte nì quida Dios ñuu-nè (te cóni ndúlócò-nè). Doco nú ducán nì quida-ya milagru mà ñuu (malu) Sodoma, dandu iá ì ñuu mà ñuhiví yohó nì cùì.

²⁴ Doco yùhù cachí xi-nsiá, chicá iyuhu castigu icúmí nihì nècuàchì ñuu Sodoma-mà na sàá quivì juiciu, te chicá fuerte coo castigu xi nècuàchì ñuu Capernaum —nì cachi-yà.

Nùu Jesús vátùnì nàcùndoo-nda contentu

²⁵ Daaní, quivì yucán nì (naquimani) Jesús Yua-yá Dios, cachí-yà:

—Yùhù ndeníhí vahi mii-ní, Yuamáni; mii-ní nduu-ní Stoho ansivi xi ñuhiví, te palabra (ì xí-ní), sàni chitnùnì ini-ní ndòò dèhá' nùu nècuàchì nchichí, doco nùu nècuàchì (nihnù ndàhvi ini-xi) nahì ñà-cuati, sàni dàtnùù-ní sàxinítnùnì-nè.

²⁶ Ducán iá, vachi ñà-jaàn nduá nì chitnùnì ini mii-ní —nì cachi-yà xi Yuamáni-yá.

²⁷ Dandu nì cachi stná-yà (xi nèhivì):

—Nùù Yuamáni' sàni nìhitáhvi' dandacuí nùù nsidanicuú iñàha. Te còò ni-iin nèhivi ináhá ndisa ana nduú yùhù, cuisì Yuamáni' Dios. Te mii-yá, cuisì yùhù ináhí ana ndisa nduú-yá, cuisì yùhù xi stná nèhivi cuní cundaà inì-xi sàhà-yá.

²⁸ Nahà-nsia nùù, nsidaa mii-nsiá nècuàchì cuhúú inì-xi, te có-cundéé gá inì-xi, dandu nìhi-nsiá ndòò dadí ndiaha inì-nsia quide.

²⁹ (Quida-nsia ñà-ndúá cachí' xi-nsiá) na ian nsidá-nsiá yugu-xi quidáchuún-nsiá. Daaní, dacuahá stná-nsiá palabra vaha xi, vachi yùhù, màni inì, te ndahvi inì, vátùni ndòò dadí ndiaha anima-nsiá quide.

³⁰ Te mate na ian nsidá-nsiá yugu-xi quidáchuún-nsiá nùù nduá, doco yugu ñama nduú-nu, te chuun sáhi-nsiá, ñà-mà ùhi nduá.

12

Nansa ni xitnùhu nèhivi nècuàchì dacuahá-yá na ní sàhnù-nè sicâyócó trigu quivi descansu

¹ Daaní, iin quivi descansu nì quihvi Jesús iin itu, te nì yaha-ya yucán, cutnáhá stná-yá xi nècuàchì dacuahá-yá. Dandu nì xihì-nè doco. Ñâyúcandúá, nì quesaha-né nì casahnù-nè sicâyócó nùni trigu itá yucán, te nì saxi-néa.

² Doco nècuàchì fariseu, nì xini-nè ñà-ndúá quidá nècuàchimà, ñâyúcandúá nì cachì-nè xi-yá:

—Cundehè-ní nansa quidá nècuàchì dacuahá-ní, quidá-né iin chuun có-sàha ley xi-nda quida-nda quivi descansu.

³ Dandu nì cachì-yá xi-né:

—¿A cóni cáhvi-nsiá (nùù tutu ì) ndé cachá' nansa nì quida David na ní xihì stná-nè doco xi compañeru-nè?

⁴ Vachi nì quihvi-ne ini veheñùhu xi Dios, te nì xixi-ne dità vídi ì yucán, mate nì mii-né nì compañeru-nè, có-sàha ley mà cuxi-neà, cuisì nècuàchì dùtù.

⁵ Te ò inga casu, ¿a cóni cáhvi stná-nsiá nùù ley ì nansa quidá dùtù quivi descansu, quidá-né (chuun ì) ini veheñùhu, có-chívaha ndisa-ne quivi mà, doco màdi cuáchi nduá nùù-né?

⁶ Doco yùhù cachí' xi-nsiá, yohó iá ana chicá ndiaá nùù veheñùhu xi Dios.

⁷ (Náhá xicá) cumáni gá cundaà inì-nsiá sàhà ñà-ndúá cachí' Dios nùù tutu ì. Vachi dohó cachí'-yá: “Yùhù chicá cudí inì ñà-cundehè ndahví stnahá-nsiá, te màdi ñá-cuàha guá-nsiá yùhù promesa”, cachí'-yá. Nù ni sàà-nsiá cundaà inì-nsiá sàhájàn nì cú, dandu mà dácuídá cuáchi-nsia nèhivi còò falta xi.

⁸ Cunaha-nsiá, yùhù ana nduú Tnaha Nèhivi Ñuhiví, dandacuí stnáí sàhà nansa quida nèhivi quivi descansu —nì cachì-yá.

Nansa ni nduvàha iin tiàa ni ichi dahuun iin ndahà-xi

⁹ Daaní, nì quihin Jesús ichi cuàhàn-yá veheñùhu, te nì quihvi-ya yucán.

¹⁰ Te yucán iá stná inì tiàa nì ichi dahuun iin ndahà-xi. Doco veheñùhu ma ndoó stná nèhivi cuní daquéé cuáchi diquí-yá, te sàháyúcandúá nì cachì-nè xi-yá:

—¿Amádi cuáchi nduá dandúvaha-nda nèhivi nú quivi descansu nduá?

¹¹ Te nì cachì-yá xi-né:

—Nì cachí-ndá iá iin rii xi-nsiá, te sàni nacava-si xichi, pues ¿amádi cúhùn-nsiá tavà-nsiási xichi ma, mate quivi descansu nduá?

¹² Cunaha-nsiá chicá ndiaá iin tiàa nùù iin rii. Ñâyúcandúá cundáá ini-ndà, vátùni iá ñà-quida-nda chuun vii quivi descansu.

¹³ Dandu nì cachì-yá xi tiàa ma:

—Chitanini-ní ndahà-ní.

Dandu nì chitanini nècuàchimà ndahà-né, te momentu mà nì nduvàha dahuan nahi ñà-inga mà.

¹⁴ Ñâyúcandúá, nì caquee nècuàchì fariseu yucán, nì candatnuhu-né nansa cui dandáñuhú-néyá.

¹⁵⁻¹⁶ Doco ináhá-yá ñà-ndúá ndatnúhù-nè, ñâyúcandúá nì quee-ya lugar mà cuàhàn-yá. Te nì tenchicùn stná cuàhà gá nèhivi. Te nì dandúvaha-ya nsidaa nècuàchì cuhí xi-ne, doco nì chinaha-yá nècuàchimà ñà-màsà cáchì-nè xi nèhivi ana divi nduú-yá.

¹⁷ Ducán nì cachì-yá xi-né sàhà ñà-nì cúu ndisa ñà-ndúá nì cachitnùhu Isaiás sàhana na ní nacani-ne palabra yohó nì (cachì Dios sàhà Dèhemani-yá):

¹⁸ Ana yohó nduú ana xinúcuáchí nùù, vachi sàni nacàxin mii-yá. Cuú inì sàhà-yá, te cudí inì sàhà nansa quidá-yá. Nùù anima-yá cuàhin caquin Espíritu Ì xi, dandu cachitnùhu-ya xi nèhivi nsidaa ñuu nansa iá modo ndiaha xi.

¹⁹ Mà náá-yá xi nèhivi, nì mà cacánúú-yá calle ndàhi ndee-yá.

²⁰ Te nêhivî (yáha ndahví) na iin ndòò cuàhàn ndañuhu, mà cúcúú dana-ya xî-né. Còò. (Màni gá) quida-ya xî-né na ian quidá nêhivî ni mà dándâhvâ xî ñà-có-tnùù vâha. Te ducán icúmí cunduu modo xi-ya dècuèndè cundee palabra vâha xi-ya, te sâà-yâ cundee dahuun-ya.

²¹ Dècuèndè stná nêhivî inga raza, tnündé ini xî mii stná-nè cunduu-ya, te divi quivî mii-yâ icúmí-nè ndacùcahan-né.

Nansa ni dàquée cuàchi nêhivî diquì Jesús, te ni cachi-nè màdi Dios chindéé xî-yâ, cachi-nè

²² Daaní, ndacá-né iin tiàa inácaa ñà-malu anima-xi vâxi nùù-yâ, te cuaá stná nêcuàchimâ, te ihin stná-nè. Dandu ni dándúvâha-ya nêcuàchimâ, te ni nihî-né ni nacahàn-nè, te ni natùù stná nùù-né.

²³ Ñâyùcândüá, ni ndulocó nêhivî cuàhâ yucán, te ni ndacâtnùhù-né nùù-né, cachi-nè:

—¿A vîhîní nduú Jesús (nêcuàchi ndiaha) descendencia xi David (icúmí ndecunu)?

²⁴ Doco iníni nêcuàchi fariseu nansa cachi nêhivî mà, ñâyùcândüá ni cachi-nè:

—Còò, vâchi ñà-malu cusáhnù nani Beelzebú, divi nduú ana chindéé, te ducán tavá Jesús ñà-malu.

²⁵ Doco ináhâ-yâ nansa nacání ini nêcuàchimâ, ñâyùcândüá ni cachi-yâ xî-né:

—Nú ni táhndè dava nêcuàchi xídandacú nùù iin ñuu, te náâ stnáhâ-né, dandu mà cúí dandacú gá-nè nùù ñuu mà. Stná nêhivî ndoó ñuu mà, nú ni táhndè dava-ne, mà cóó gâ stná ñuu mà. Te ò nêhivî ndoó iin vehe, nú náâ stnáhâ-né, dandu mà cúí cundoo tácá gâ-nè vehe mà.

²⁶ Te nú ducán ni cúndúú stná nacua cachi mii-nsiá, ñà-távâ stnahâ ñà-malu xi Satanás, dandu ñà-sàni táhndè dava stná-si cunduajàn ni cúí, mà cúí dandacú gá quisi cusáhnù mà nú tnahâ-si, nú ducán.

²⁷ 'Mii-nsiá, cachi-nsiâ ñà-chindéé si-Beelzebú yùhù na taví ñà-malu. Doco còò, vâchi nêhivî xî mii stná-nsiâ, tûha stná-nè tavâ-né ñà-malu. Te ¿ana dipóder-xi quidá-nèamâ? (Amádi poder xi Dios chindéé xî-né.) Ñâyùcândüá, vâtùni cachi mii-nè xî-nsiá ñà-cóni càchí vîl-nsiá sâhí.

²⁸ Cunaha-nsiá, Espíritu Ìi xî Dios nduú ana chindéé xî taví-si, ñâyùcândüá nâhâ xicâ, vichi sâni sâà tiempu cuní-nsiâ nansa dandacú ndiaha mii-yâ.

²⁹ 'In tiàa ndacuì, mà cúí quihví ndevâha nêhivî vehe-tè nansa-ni ni cui ñà-tavâ-né ñà-icúmí-tè. Còò, vâchi dihna icúmí-nè chicuhni-nète, dandu vâtùni quida-neamâ.

³⁰ 'Nsidaa ana có-íâ favor xi, contra xi nduú-né. Te nsidaa ana có-chindéé xî danátáquì nêhivî xî, ducán nduá na ian taxi-né nêcuàchimâ.

³¹ 'Ñâyùcândüá, yùhù cachi xî-nsiá, vâtùni cuicahnú ini Dios sâhâ nsidanicuú cuàchi nêhivî, xî nsidanicuú modo câhàn ùhî-nè diquì-yâ; doco nú ni câhàn ùhî-nè diquì Espíritu Ìi xî-yâ, dandu mà nihî-né cuicahnú ini-yâ sâhâ-né.

³² Mate ni câhàn ùhî nêhivî diquì yùhù ana nduú Tnahâ Nêhivî Ñuhiví, doco vâtùni nihî-né cuicahnú ini Dios sâhâ-né. Doco nú diquì Espíritu Ìi ni câhàn ùhî-né, dandu mà nunca sâà-yâ cuicahnú ini-yâ sâhâ-né, ni tiempu ndoo-nda ñuhiví yohó, te ni stná tiempu cundoo-nda inga ñuhiví nicanicuhàn.

Na ian nacúní-ndâ yutnú fruta, ducán nacuni stná-ndâ nêhivî a váha-ne, ò á cóó, cachi Jesús

³³ 'Nú ni cachi-ndâ vâha iin yutnú fruta, dandu cuní cachâmâ vâha stná fruta sâha-nù. Te nú ni cachi-ndâ cóò chuun yutnú fruta mà, dandu cuní cachâmâ ñà-còò chuun stná fruta-nu, vâchi sâhâ fruta-nu cundââ ini-ndâ a yútnu vâha nduú-nu, ò á cóó.

³⁴ Cunaha-nsiá, nahi anima còò, ducán íâ anima mii-nsiá (nêcuàchi fariseu), vâchi malu sâstnùhù-nsiá. Ñâyùcândüá, mà cùí câhàn-nsiâ ñà-íâ vîi. Vâchi cuisí ñà-ñuhú chitu ini anima-ndâ nduá câhàn-ndâ sâhâ-xí.

³⁵ 'In nêcuàchi vâha, cuàhâ ñà-vâha ñuhú ini anima-nè, te ñâyùcândüá divi palabra vâha mà nduá cachi-nè. Doco iin nêcuàchi malu, cuàhâ ñà-chicuéhè ñuhú ini anima-nè, ñâyùcândüá, ñà-chicuéhè mà nduá cachi stná-nè.

³⁶ Te yùhù cachi xî-nsiá, na sââ quivî juiciu, dandu icúmí nsidaa nêhivî nacuahâ-ne cuenta índu chuun ni cachi-ne nsidaa palabra chicuéhè mà.

³⁷ Vâchi nacua ni cachi-nè yuhù-né, divi ducán icúmí ndundaâ sâhâ-né (nùù Dios), a cuàhàn-nè càcu-ne, te ò cuàhàn-nè ndañuhu-né —ni cachi Jesús.

Nansa ni xicàn nêhivî quida Jesús iin milagru cundehè-né, dandu cunindisá-né-yâ, cachi-nè

³⁸ Daaní, (ni sâà) dava maestru ley xi veheñùhu, xî stná dava nêcuàchi fariseu, te ni cachi-nè xî-yâ:

—Maestro, cuní-nsi quida-ní iin milagru fuerte cundehè-nsí.

³⁹ Dandu ni cachi-yâ xî-né:

—Cuisi nêhivî malu te siquini xícàn coo iin milagru cundehe-né, a ndísá icúmí yùhù poder cahàn-né. Doco mà níhi-né cundehe-né inga milagru, cuisí ñà-ndúá (nì xini nêhivî sàhana) na ní cuu milagru xi Jonás, iin profeta nisa cahàn cuenta xi Dios.

⁴⁰ Vâchi na ian nî ndòo Jonás mà ini tixi iin siaca cahnú ùni ndui te ùni ñuú, divi ducán icúmí cuu stná xî yùhù ana nduú Tnaha Nêhivî Ñuhivî, cunacaa stnáî tixi ñuhù ùni ndui te ùni ñuú.

⁴¹ Na quívî cuu juiciu, te màcuíta nsidaa nêhivî tiempu vichi (nùu Dios), dandu yucán icúmí màcuíta stná nêhivî ñuu sàhana nani Nínive, te daquéé cuàchi-ne diquî nêhivî tiempu vichi, vâchi nêhivî ñuu mà, nî naxicocuíin ini-né na ní cahàn Jonás xi-né. Doco nêhivî vichi, còo, mate sáni quesaa ana chicá ndiaá nùu Jonás mà.

⁴² Daaní, yucán icúmí nâculín stná nêcuàchi ñahà reina nisa dandacú nùu ladu sur sàhana. Te daquéé cuàchi stná-né diquî nêhivî tiempu vichi, vâchi dècuèndé iin ñuu chicá xica ní quixi-ne ñà-cunini-ne cahàn nchichí rey Salomón. Doco cunaha-nsiá, vichi sàni quesaa ana chicá ndiaá nùu Salomón mà, (doco có-ndúlócò nêhivî).

Nansa cuú xi iin nêhivî nú sàni naxicocuíin iin ñà-malu nî quee antes nùu-né

⁴³ Nú sàni quee iin ñà-malu ini iin nêhivî, dandu xicánúú-si yáha-si lugar íchî, nandúcu-sí ndé coo dadí-si. Te nú nî cundaà ini-si mà cùî,

⁴⁴ dandu cachî-si: “Còo, chicá vâha nùhi ini anima ndé nisa ìe antes, vâchi vehi nduá”. Ñâyúcandúá, mànuhù-sí anima nêhivî mà, doco nú nî xini-si còo inga ana inácáá, dandu quidá-si cuenta na ian sàni ndundoa, te nî nducutá.

⁴⁵ Ñâyúcandúá, cuàhàn-si nâcuàca-si inga usà tnaha-si chicá tùha quini, te quíhvi nsihi-si ini anima nêcuàchima ñà-cuñuhu-si yucán. Sàhájàn, chicá pesadu nâcòo-ne nùu antes. Te cunaha-nsiá, divi ducán icúmí cuu stná xî nêhivî malu tiempu vichi —nî cachî Jesús.

Ñà-ndúá nî cachî Jesús sàhà dihi-yá xî sàhà ñani-yá na ní casaà-nè caná-néyá

⁴⁶ Cahàn va Jesús xi nêhivî, te yucán nî sàà dihi-yá xî stná ñani-yá. Itá-né tùvehé, cunî-nè cahàn-nè xi-yá.

⁴⁷ Dandu nî cachitnùhu iin nêhivî xi-yá:

—Cunaha-nî, tùvehècá iin mamá xi-nî, xî stná ñani-nî; cunî-nè cahàn-nè xi-nî.

⁴⁸ Dandu nî cachî Jesús xi nêhivî nî cachitnùhu ma:

—¿Ana divi nduú mamá xi (cahan-nî)? Te ò ¿ana divi xínduu ñani?

⁴⁹ Dandu nî chitanini-ya ndahà-yá, nî quida-ya señalar nsidaa nêhivî dacuahá-yá mà, te nî cachî-yá:

—Divi nêcuàchi yohó xínduu nahi mamá xi, ò nahi ñani.

⁵⁰ Vâchi nsidanicuú ana quidá-xî ñà-ndúá cunî Yuamán'yá ansivi, divi mii-né xínduu-ne nahi ñani, nahi cùhe, te nahi dihi stnáî.

13

Ejemplu sàhà iin nêcuàchi xitú

¹ Daaní, divi quívî yucán, nî quee Jesús vehe ma cuàhàn-yá ndé yuhù mar.

² Te yucán nî nataca cuàhà gá nêhivî nùu-yá: ñâyúcandúá nî quècahu-ya ini iin lancha, te yucán nî sàcòo-ya. Te nêhivî cuàhà mà, yuhù mar nî sàcúndoo-ne.

³ Dandu nî dàcuàhá-yánè cuàhà iñàha, nî nacani-ya xi-né cuàhà historia nduú nahi ejemplu. Te dohó nî cachî-yá:

—Cunaha-nsiá, nisa ìa iin nêcuàchi xitú, te nî quee-ne cuàhàn-nè chíhi-ne.

⁴ Te nî sate uun-ne tata mà. Te dava-ña nî còya nùu ichî. Dandu nî quixi laa nî saxi-siá.

⁵ Te dava stná tata mà nî còya nùu cavá ndé còo cuàhà ñuhù. Te yâchi nî xitiá, vâchi có-ndòó cucún ñuhù yucán.

⁶ Doco na ní ducán orá, dandu nî xixàn nî quida cahni, te nî íchà, vâchi cóni níhà' yohá.

⁷ Daaní, dava stná tata mà, mahî iñù nî còya; te na ní sahnu iñù mà, dandu nî dàdáhvia víu cuati yucán.

⁸ Doco dava stná tata mà, nùu ñuhù váha nî còya, te nî cuàha víá, ùhùn dico gà tantu nî cana, te ò dava ga-ña, ùni dico ga tantu, te ò dava gà, òcò ùxin gà tantu nî cuàha.

⁹ Nî cúninî vâha nsidaa-nsiá ñà-ndúá cachî —nî cachî Jesús.

Ñà-ndúá dísàhà-xí nî nacani Jesús ejemplu xi-ya

¹⁰ Daaní, nî catnàtuu nêcuàchi dacuahá-yá nùu-yá, te nî cachî-nè:

—¿Índù chuun puru ejemplu nacánî-nî xi nêhivî?

¹¹ Dandu nî cachî-yá xi-né:

—Mii-nsiá, sàni níhitáhvi-nsiá cundaà ini-nsia nansa cunî cachî palabra sàhà ñuhivî ìi xî mii-yá ía ansivi, mate antes nisa ìa dèhé palabra mà. Doco nêhivî dava ga, cóni níhitáhvi-né mànhî ini-nè.

¹² Vächì nècuàchì sàñùhù (ñà-vàha) inì-xì, chicá más icúmí-nê ñihítàhvi-né sàhà-ñá cu-cumí-né más gá. Doco nèhivì có-ñùhù ndisa (ñà-vàha) inì-xì, dècuèndè iyuhu (ñà-vàha) sàñùhù inì-nè, icúmíá cuxio dahuan.

¹³ Ñàyùcándüá, puru ejemplu cáhin xì nèhivì yohó, vächì mate indéhe cuàhà-né, doco quidámáxiní-nè; te mate iníní cuàhà stná-nè, doco có-sànihì inì-nè na ian doho-né.

¹⁴ Ducán quidá-né, te ducán sàni cuu ndisa stná ñà-ndüá ni cachitnùhu Isaías sàhana (na ní tiaa-ne palabra yohó ni cachi Dios):

Mii-nsiá, cuàhà gá icúmí-nsiá cunini-nsia, doco mà sáá-nsiá mànihì inì-nsia. Te cuàhà gá icúmí-nsiá cundehè-nsiá, doco mà cundáa ndisa inì-nsia.

¹⁵ Vächì nsidaa nèhivì raza-nsiá yohó, quidámáxiní-nè na ian ùhì tiacú-nè. Te quidá-né na ian danácuáni-nè nùu-né. Vächì có-cùnì-nè cundehè-né (ìchì yùhù), ni có-cùnì stná-nè cunini-ne, ni có-cùnì stná-nè mànihì inì-nè, ni có-cùnì stná-nè natnahnù-nè ìchì yùhù, te ducán nsida vii' anima-nè, ni cachi Dios.

¹⁶ 'Doco mii-nsiá, ndiaha gá íá xì-nsiá vichì, vächì cundáa inì-nsia sàhà ñà-ndüá indéhe-nsiá; sànihì inì-nsia sàhà ñà-ndüá iníní-nsiá.

¹⁷ Vächì cunaha-nsiá, cuàhà gá nècuàchì profeta sàhana, xì cuàhà gá más nèhivì xí Dios, nsidaa-né nisa cuni sàstnùhu-nè cundehè-né ñà-ndiaha ñì sàni xininùu-nsiá vichì, doco cóni ñihítàhvi-né ducán. Yáha gá nisa cuni-nè cunini-ne palabra ndiaha sàni inini-nsia vichì, doco cóni ñihítàhvi-né ducán.

Ñà-ndüá cunì cachi ejemplu sàhà nècuàchì xitù

¹⁸ 'Vichì cunini vaha-nsia, vächì cuàhin quide explicar nansa cunì cachi ejemplu sàhà nècuàchì xitù-mà.

¹⁹ Cunaha-nsiá, nú sàni xitià ley xì ñuhivì ì xí Dios, te iníní iin nèhivì, doco có-cundáa vaha inì-nè sàhà-ñá, dandu vaxi ñà-malu, te dacúxió-si palabra xì Dios íá inì anima nècuàchì-mà. Ñàyùcándüá nacua ni cuu xi tata ni cóyo yuhù íchì, ducán-ní cuu xì stná nècuàchì-mà.

²⁰ Daaní, nahi tata ni cóyo nùu cavà nduú nèhivì iníní xí palabra ì, te vichì vichì cudí gá inì-nè sàhà-ñá.

²¹ Doco na ian cuu xi viù còd yohò-xí, ducán cuu stná xì-né; iyuhu gá quidándéé inì-nè. Vächì nú sàni yàha-ne iin tnùndoho, ò nú sàni quida quini nèhivì xì-né, dandu luegu naxícocüin inì-nè, te nacóó-né palabra mà.

²² Daaní, nahi tata ni cóyo mahì iñù nduú nèhivì iníní xí palabra xì Dios, doco cuàhà gá nacání inì-nè sàhà vida xi-ne ñuhivì yohó; cuàhà gá xího-né coo cuica-né; ñàyùcándüá, dandahviámànè, te sadiámà nùu palabra xi-ya inì-nè, mà cù ñihìndéè palabra mà chindeá-nè.

²³ Daaní, nahi tata ni cóyo nùu ñuhù vaha nduú nèhivì iníní xí palabra xi-ya, te cundáa inì-nè, te quidá ndisa-neà cumplir; quidá-né na iin viù ni cana vii, a sea cunduu-ne nahi viù ni cana ùhùn dico tantu, te ò viù ni cana ùni dico tantu, te ò ñà-ni cana òcò ùxin tantu.

Ejemplu sàhà yùcù chicuéhè ni sahnù mahì viù trigu

²⁴ Daaní, ni nacani Jesús xì-né inga ejemplu, te dohó ni cachi-yà:

—Ley xì ñuhivì ì xí mii-yá íá ansivi, ducán íá' nacua ni cuu na ní chihi iin tiaa ñà-ndüú tata vaha trigu itu-nè.

²⁵ Doco íá iin tè-xinì ùhì xì-né, te na quidi-nè, mii-né xì nsidaa compañeru-nè, dandu ni sàà tèmà ni chihi stná-te tata yùcù chicuéhè mahì itu-nèmà, te cuàhàn-te.

²⁶ Daaní, ni xitià viù cuati ma, ni sahnua, te ni cana sicàyòcò-ñà. Dandu ni natù stná ñà-ndüú yùcù chicuéhè mà.

²⁷ Te na ní caxini peón nansa íá, ni sàhàn-te ni cachitnùhu-tè xì lamú xi-tè, cachì-te: “Señor, amádi tata vaha nduá ni chihi-ní itù-nímà. Te ¿indù chuun ni xitià guá yùcù chicuéhè?”

²⁸ Dandu ni cachi lamú mà xi-tè: “Divi tè-xinì ùhì-xí' ni quida xán”. Dandu ni cachi peón mà xi-né: “¿A cunì-nì cùhùn-nsi tnuhu-nsi yùcù mà?”

²⁹⁻³⁰ “Còó”, cachì-nè, “Còtó tnuhu stná-nsià viù. Chicá vaha ducání ni cóá dècuèndè nú sàni sahnù ndüá, te sà-íá ndanchito cosecha. Dandu quivì mà cuàhin cachì xì-nsiá ñà-dihna yùcù chicuéhè datacá-nsiá, cunuhnìa manojo, te coca. Daaní después, (tàhndè vii) trigu, te nàcòovàha nùniá”.

Ejemplu sàhà tata yutnù mostaza

³¹ Daaní, ni nacani tu-ya xì-né inga ejemplu, te dohó ni cachi-yà:

—Ley xì ñuhivì ì xí mii-yá íá ansivi, ducán íá' nacua ni quida iin tiaa na ní chihi-ne iin tata yutnù mostaza itu-nè.

³² Tata mà nduú tata chicá cuati íá ñuhivì, doco nú sàni sahnua, yutnù nàhnù nduú-nu, dècuèndè laa ndavá ansivi vaxi stná quidávàha tacà-xi mahì-nù.

Ejemplu sàhà ñà-nsidátáchì xí yusàn pan, divi nduú levadura

³³ Ñuhiví ìì xí mii-yá íá ansivi, ducán nduá nahi tàtnà nsidátáché xí yusàn pan, vâchi divia nì quihìn iin nècuàchi ñahà nì dàquée-ne mahì ùni maquila yusàn harina, te nì ndutachi nsihá —nì cachi Jesús.

³⁴ Nsidaa palabra jaàn nì nacani-ya xì nèhivì cuàhà yucán, vâchi cuisì-ní ejemplu nì nacani-ya xì-né.

³⁵ Ñâyùcàndüá, ducán nì cuu ndisa palabra nì cachitnùhu iin profeta sàhana na ní càhàn-nè nì quida Dios, te dohó nì cachi-nè:

(Cachi Dios): cuàhà ejemplu cuàhìn nacani xì nèhivì. Cuàhìn datú: cuàhà iñàha nù-né, cuàhà palabra nì ia dèhé dècuèndè nì sàcòo ñuhivì, nì cachi-yà.

Nansa cuní cachi ejemplu sàhà yùcù chicuèhè

³⁶ Daanì, nì ndaquindèè Jesús xì nèhivì cuàhà yucán, te nì nansihvi-ya vehe. Te nì catnàtuu nèhivì dacuahá-yá, cachi-nè xì-yá:

—Cachi-ní xì-nsí nansa cuní cachi ejemplu sàhà yùcù chicuèhè íá itu mà.

³⁷ Dandu nì cachi-yà xì-né:

—Nècuàchi nì chihi xì tata vâha ma nduú yùhù ana nduú Tnaha Nèhivì Ñuhivì.

³⁸ Te itu mà nduú ñuhivì yohó. Te tata vâha ma nduú nèhivì cusàhnù Dios nù-xí, doco tata chicuèhè mà nduú nèhivì xí ñà-malu.

³⁹ Te tiàa nì chihi tata chicuèhè mà, divi nduú ñà-malu xiní ùhì xí'. Daanì, quivì nì ndanchito cosecha mà, divi quivì xinu tiempu yohó nduá. Te peón nì ndanihi xì cosecha mà, divi nduú ángel xì Dios.

⁴⁰ Te nacua nì cuu xì yùcù chicuèhè mà, nì sàcùnuhnià, te nì xixàn, ducán icúmí cuu stná (xì nèhivì malu) na xínu tiempu yohó.

⁴¹ Vâchi yùhù ana nduú Tnaha Nèhivì Ñuhivì, icúmí techuín ángel xì cùhùn-nè tavà-né nsidaa ana datúcù xì ñanìtnaha-xì, xì nsidaa gá stná ana quidà-xì ñà-có-ndiàá, te mà cùndóó gá-nè ñuhivì xì,

⁴² vâchi icúmí-nè ndiachi-né ini xitnù ndé xixìn ñuhu, te yucán icúmí-nè cuacu fuerte-nè, te càna nùhu-ne.

⁴³ Dandu icúmí sàà meru tiempu xì nèhivì ndàcuisì inì-xì; ndiaha gá icúmí coo xì-né, na ian ndiaha gá orá, ducán ndiaha coo xì-né quivì sàà Yua-nda Dios cusahnú-yá ñuhivì yohó. Nì cúniní vâha nsidaa-nsiá ñà-ndüá cachí xì-nsiá yohó.

Ejemplu sàhà dihùn índuxin

⁴⁴ Ñuhivì ìì xí mii-yá íá ansivi, ducán íá' nahi dihùn cuàhà índuxin dèhé nù iin ñuhu, te nì ndacùhun iin tiàa-ña. Ñâyùcàndüá nì nachidèhé-nèà, cudí gá ini-nè. Dandu mànuhù-né nì dicò nsihí-né ñà-icúmí-nè, te nì sàhàn-nè nì xiin-ne ñuhu mà.

Ejemplu sàhà si-diqui yáha ga ndiáa

⁴⁵ 'Inga ejemplu. Ducán íá ñuhivì ìì xí-yá nacua nì quida iin nècuàchi dicó te nacuíin, nducú-né si-diqui perla chicá vico cuiin-ne.

⁴⁶ Por fin nì tui iin si-diqui chicá nsiaha. Ñâyùcàndüá nì sàhàn-nè nì dicò nsihí-né ñà-icúmí-nè, te nì xiin-ne si-diqui nsiaha ma.

Ejemplu sàhà ñunù tavá-nda siaca

⁴⁷ 'Inga ejemplu. Ducán íá ñuhivì ìì xí mii-yá íá ansivi na iin ñunù chicáá-nè mahì mar, te quihvi nsidanuu clase siaca inìà.

⁴⁸ Dandu nú sàni chitúa, tavá-nèa yuhù mar, te nàcùndoò-ne nacàxin-ne siaca ma. Siaca vii, nácòvâha-sì icà sicátè, te siaca chicuèhè, xitià-sì.

⁴⁹ Te divi ducán icúmí coo stná quivì xinu tiempu yohó. Icúmí caquesaa ángel xì Dios, te nacàxin-ne nèhivì, cuaán cuita nèhivì malu, te cuaán cuita nèhivì vâha.

⁵⁰ Dandu icúmí nèhivì malu mà ndiachi-né ini xitnù ndé xixìn ñuhu, te yucán icúmí-nè cuacu fuerte-ne, te càna nùhu-ne.

Ejemplu sàhà ñà-cuicà

⁵¹ Dandu nì ndacàtnùhù Jesús nù nèhivì yucán:

—¿A sàni cundaà ini-nsiá sàhà nsidaájàn?

—Jaan, Stoho-nsi Señor —nì cachi-nè.

⁵² Dandu nì cachi-yà:

—Iin nècuàchi cuàhàn chinaha xì ley ìì, nú sàni dàcuahá vâha-ne sàhà ñuhivì ìì xí mii-yá íá ansivi, dandu (cuaha-nì íá, vâchi ináhà-nè ley sàhana, te ináhà stná-nè ley saa), te ducán queé stnámà na iin tiàa ndoó vâha cuàhà traste xì, vâtùni tavà-né iin ñà-saa, te tavà stná-nè iin ñà-sàhana.

Nansa nì quida nèhivì ñuu Nazaret na ní nùhù Jesús yucán

- ⁵³ Nì nsìhi nì nacani Jesús ejemplu jaàn, dandu nì quihin-ya ichì mànuhù-yá.
⁵⁴ Te na sàni nasaa-yà ñuu-yà, dandu cuàhàn-yà veheñùhu, te nì quesaha-yá dacuahá-yá nèhivi yucán. Ñàyùcàndúá, nì ndulocó nècuàchìmà, cachí-nè:
 —¿Índù nì xini-ndá nì cunchichí guá nècuàchì yohó, te quidá stná-nè milagru?
⁵⁵ ¿Amádi dèhe nècuàchì tùha yàcùn yutnù nduú-né, te dihi-né nduú María, te ñani-nè nduú Jacobo, xì José, xì Simón, xì Judas?
⁵⁶ Te cùha-ne, yohó xíndoo stná-nè ndé ndoo-nda. Pues nú ducán, dandu ¿índù nì nihítàhvi guá-nè quidá-né ducán?
 Ñà-jaàn nduá nì cacachi nèhivi,
⁵⁷ vachi nì cuduchi ini-nè sàhà-yá. Dandu nì cachi-yà xì-né:
 —Iin ana càhàn cuenta xì Dios, nú inga ñuu nì càhàn-nè, dandu siempre quidáñùhú nèhivi-né yucán; doco nú ñuu mii-né, ò vehe-ne, còò, có-quidáñùhú nècuàchìmà-né —nì cachi-yá.
⁵⁸ Ñàyùcàndúá, mànicúí quida-ya milagru fuerte ñuu-yàmà, vachi có-xiníndísá-néyà.

14

Nansa nì xihì Juan Bautista

- ¹ Daaní, tiempu yucán nì xinitnùhu rey Herodes ñà-cuàhà guá quidá Jesús.
² Te nì cachi-te xì nèhivi xì-te:
 —Ádi nsi-Juan Bautista nduú Jesús, te sàni natiacu-nè vichi, te ñàyùcàndúá quidá-né cuàhà milagru —nì cachi-te.
³ Vachi Herodes mà nduú ana nì chicadi xì Juan vehecàa. Ducán nì quida-tè sàhà ñahàdihí ñani-te Felipe nani Herodías.
⁴ Vachi nì cachi Juan xì-té ñà-có-sàha Dios lugar coo-tè xì ñahà mà.
⁵ Ñàyùcàndúá, cuní-te cahni-ténè, doco yúhí-te nèhivi ñuu-te, vachi quidá-né cuenta ñà-iin nèhivi yuhù núú Dios nduú nècuàchìmà.
⁶ Doco nì sàà quivì nì naxinu-tè cuàì, te nì quida-tè vicò. Te vicò mà nì ñtasaha dèhe Herodías mà núú nèhivi (nì casaà) yucán, te cuàhà gá nì cudii ini Herodes.
⁷ Ñàyùcàndúá, nì chinaha-té Dios dacútàhvi-téñá ndéni iñàha nì cui nì càcàn-ña.
⁸ Dandu (nì sàhàn-ña) núú dihi-ñá, te nì sàcùnaha-ñá (nansa càcàn-ña), te ñàyùcàndúá nì cachi-ña xì rey mà:
 —Dini Juan Bautista cuní taxi-ní, cunacaà ini iin charola quixi.
⁹ Dandu nì cuhuun ini rey mà, doco sàhà-ñá sàni chinaha guá-te Dios, te sàhà stná compañeru-te ndoó indéhe yucán, ñàyùcàndúá nì dándàcù-te ñà-nì cóò nacua nì xicàn ñahà chii mà,
¹⁰ nì sàha-tè orden, te nì quendodò dìni ndómà vehecàa.
¹¹ Te nihí nèhivi dìni-ndá nì nansihvi ndé íá-te, inácaa ini iin charola. Ñàyùcàndúá, nì tnií ñahà chii mà-ñá nì sàhàn nì sàhà-ñá dihi-ñá.
¹² Dandu nì quixi nècuàchì nisa dacuahá Juan nì ndanihi-ne nsii ma nì sùxin-ne. Dandu cuàhàn-nè cachitnùhu-ne xì Jesús.

Nansa nì dacuxí Jesús ùhùn mìl tiàa

- ¹³ Na ní nsìhi nì inini Jesús, dandu nì quècahnu-ya ini iin lancha, cuàhàn cuaán-yá inì-nu dècuèndè iin xaan ndé có-ndóò nèhivi. Doco nì xinitnùhu nèhivi cuàhàn-yà, te ñàyùcàndúá nì caquee stná-nè ñuu-nè nì tenchicùn-nèyà ñuhù íchì.
¹⁴ Sàhámà (na ní sàà-yà yucán), te nì quee-ya núú lancha mà, dandu nì xini-yà ndoó cuàhà gá nèhivi. Te nì cuhi ini-yàné; ñàyùcàndúá nì dándúvaha-ya cuàhà nècuàchì cuhí xì-ne.
¹⁵ Te na ní cuaà, dandu nì catnátuu nècuàchì dacuahá-yá núú-yá, cachí-nè:
 —Vichi sàcuàhàn nì cuaà, te lugar yohó, còò ni-iin vehe. Ñàyùcàndúá ndaquindèè-ní xì nèhivi nì cùhùn-nè ñuu cuati yatni cuiin-ne ñà-cutiacu-nè.
¹⁶ Doco nì cachi-yà xì-né:
 —Còò necesidad cùhùn-nè inga xaan; mii-nsiá dacuxí-nsiánè.
¹⁷ Dandu nì cachi-nè:
 —Cuisi ùhùn pan nihí-nsí, xì ùi siaca.
¹⁸ Te nì cachi-yà:
 —Cunihi-nsiaña quixi.
¹⁹ Dandu nì dándàcù-yá nì mácùndoo nsidaa nèhivi yucán núú yùcù cuati. Te nì tnií-ya ùhùn pan mà xì ùi siaca, te nì ndacoto ndiaá-yà diqui-xí, nì naquimani-yá Dios sàhà-ñá. Dandu nì dacuàchì-yáñá nì sàha-ya nècuàchì dacuahá-yá, te mii-né, nì dasàn-néa núú nsidaa nèhivi ndoó yucán.
²⁰ Te nsidaa-né nì xixi-ne nì ndenuu ini-nè. Te pedazu nì ndòò gá nì chitu ùxin ùi icà.

²¹ Pues cunaha-nsiá, nsidaa nêhivi nî xixi ma, nahi ùhùn mil tiàa nî sanduu-ne, te cuaán nduu stná nêcuàchi ñahà xî ñà-cuati.

Nansa nî xicandodò Jesús nùu tècuí mar

²² Vichi duha nî cachi Jesús xî nêcuàchi dacuahá-yá ñà-nî macùñuhu-ne ini lancha te cùhùn cuèé-nè nùu-xí yàha-ne inga ladu mar, doco mii-yá, cuàhàn-yà danácutià-yà nêhivi cuàhà yucán.

²³ Te na sání ndaquindèè-yá xî nsidaa nêhivi mà, dandu nî nana cuaán-yá iin yucù nî càhàn-yá xî Yuamáni-yá Dios. Daaní, na ní cuñaá, iá mindaa-yá yucù yucán.

²⁴ Doco lancha mà, sàcuàhàn-nu dava mahi mar, te cuàhà gá sàni nacuahnu todò tècuí. Ñâyücàndúá ndé ndiàchi nihní-nu, vâchi yàha ga ndee caná tàchi ladu nùu-nú.

²⁵ Daaní, sinduhá nî sàà-yá yucán xicándódo-yá nùu tècuí.

²⁶ Doco na ní caxini-nè vâxi-ya, nî cayùhi cuàhà-né, te nî càna ndee-né, cachi-nè:

—¡Duma nduá!

²⁷ Doco vichi vichi nî cachi-yá xî-né:

—Nacuàhandee inî-nsia, vâchi yùhù nduí. Màsà yúhî-nsià.

²⁸ Dandu nî cachi Pedro xî-yá:

—Stoho-nsi Señor, nú divi nduu-ní, cachi-ní xí caqui nùu tècuí sàì ndé vâxi-ní.

²⁹ Dandu nî cachi-yá xî-né:

—Nahà-ní.

Ñâyücàndúá, nî nuu Pedro nùu lancha mà nî quesaha-né nî xicandodò stná-nè nùu tècuí cuàhàn-nè ndé vâxi Jesús.

³⁰ Doco na ní xini-nè ñà-ndee guá caná tàchi, dandu nî yùhî-nè, te nî quesaha-né cuàhàn-nè càhà-nè ini tècuí mà nî cuí. Ñâyücàndúá, nî ndàhì ndee-né, cachi-nè:

—¡Stoho-nsi Señor, dacácu-ní yùhù!

³¹ Dandu vichi duha nî chitanini-ya ndahà-yá nî tnií-yanè, te nî cachi-yá xî-né:

—Iyuhu gá xinindísá-ní. Chicá vâha màsà cóo-ní xî duda.

³² Dandu nî nana-ya lancha, mii-yá xî stná Pedro. Te vichi duha nî cucuñin tàchi.

³³ Te nî tnàtuu nsidaa nêcuàchi ñuhú ini lancha mà nî sàcutitasisi-nè nùu-yá, cachi-nè:

—¡Ndisa, Dêhemani Dios nduu-ní!

Nansa nî dándúvâha Jesús cuàhà nêcuàchi cuhí ñuu Genesaret

³⁴ Daaní, na sání yàha-ya xî-né mar mà, dandu nî sàà-yá ñuhù íchí iin ñuu nani Genesaret.

³⁵ Te nî nacuni nêhivi ñuu mà-yá, te nî cachitnùhu-ne xî nsidaa gá nêhivi ladu yucán. Ñâyücàndúá, yucán nî casaà cuàhà-né nùu-yá ndacá-né nsidaa nêcuàchi cuhí xî-né.

³⁶ Te nî sacundahví-nè nùu-yá áma cuàha-ya òcùn ndahà úun-né siquiera orilla sìcoto xi-ya. Te nsidaa nêhivi nî òcùn ndahà-xí òcùn, nî nduvàha-ne.

15

Ñà-ndúá dacuidá cuàchi ndisa xi anima-ndá

¹ Daaní, ñuu Jerusalén nî caquee dava nêcuàchi fariseu, xî dava stná nêcuàchi ley xi veheñuhu vâxi-ne, te nî casaà-nè nùu Jesús. Te nî cachi-nè xî-yá:

² —Nêcuàchi dacuahá mii-ní, ¿indù chuun có-quidá-né estilu xi xii-ndá? Vâchi na cuàhàn-nè cuxi-ne, có-ndahá-né (nacua cachi estilu xi-nda).

³ Dandu nî cachi-yá xî nêcuàchimà:

—Te mii-nsiá tu, ¿indù chuun có-quidá stná-nsiá ñà-ndúá nî dándacú Dios? Vâchi iladu nacóo-nsiá ley xi-ya, te chívâha-nsia ñà-ndúú estilu xi mii-nsiá.

⁴ Vâchi dohó nî cachi-yá: nî cóo tnùñuhu xî-nda nùu yuadíhí-ndá. Te nú nî càhàn ùhì iin nêhivi diqui iin yuadíhí-nè, dandu icúmí-nè cui-nè.

⁵ Doco mii-nsiá, tucu quidá-nsiá, vâchi cachi-nsiá vátuni cachi iin nêhivi xî yuadíhí-né: “Mà cui chindeí mii-nsiá xî ñà-ndúá icúmí, vâchi sàni cachi sàhà nsidaamá ñà-ndúá dihùn ìi”.

⁶ Te nú ducán sàni cachi nêcuàchimà, dandu cóò cá obligación icúmí-né ñà-chindee-né yuadíhí-nè, cachi-nsiá. Ñâyücàndúá, sàhà estilu xi-nsiamá iladu sàni nacoo-nsia ley nî cachi Dios, te cuisí estilu xi mii-nsiá chívâha-nsia.

⁷ ¡Ndahví-nsiá! ¡Vâha ga-nsiá cahan-nsiá, doco dananí úun-nsiá! (Náhà xicà) ñà-ndácuísí nduá nî cachitnùhu Isaías sàhà-nsiá sànahà na ní tìaa-ne ñà-ndúá nî cachi Dios, te dohó nî cachi-yá:

⁸ Nêhivi yohó, yuhù-né quidáñuhú-nè yùhù. Doco ini anima-nè, cóò, vâchi xica ié cahan-né.

⁹ Cahví-né yuhù tuxí-né, doco có-ndiáá, vâchi nêhivi úun nduu ana nî quidavâha xi ley chináhà-nè nêhivi.

¹⁰ Dandu nî cana Jesús nêhivi cuàhà mà ñà-tnàtuu-ne nùu-yá, te nî cachi-yá xî-né:

—Cunini vaha-nsia, te cundaà ini-nsià.

¹¹ Mâ cûnsidâ cuàchi nèhivi sàhà ni-iin ñà-xixí-né; cóo. Doco palabra queé yuhù-né na cachí-nè iñàha, ñà-jaàn ndisa dacuidá cuàchi xi-né.

¹² Dandu ni natata nècuàchi dacuahá-yá nuù-ya, te ni cachi-nè:

—Cunaha-ní, cudúchi ini nècuàchi fariseu sàhà ñà-nduá ni cachi-ní.

¹³ Dandu ni naxiconihí-yá nuù-né, cachí-yá:

—(Có-quidámà), vâchi nú iá iñàha ñuhí yohó có-nduú ñà-ni chitnùnì ini Yuamání iá ansívi, dandu icúmiá ndañuhá na ian ndañuhu yucù tnuhu-nda itu.

¹⁴ Nacóo-nsiá nècuàchi fariseu mà, vâchi quidá-né na ian quidá iin nècuàchi cuaá cuní dacúndéhe xi inga nècuàchi cuaá ichí. Te (ináhá-ndá) nú ducán ni quida-nda, cutu sàà-ndà dacóyo nihni stnaha-nda xichi.

¹⁵ Dandu ni cachi Pedro xi-yá:

—Nacani-ní xi-nsí nansa cuní cachi ejemplu ni cachi-ní (xi nècuàchimà).

¹⁶ Dandu ni cachi-yá xi-né:

—¿A có-cùndáá stná ini mii-nsiá?

¹⁷ ¿A có-ináhá-nsiá nansa cuu-xi comida xixi-nda, queá yuhù-ndà, dandu yáha ndè tixi-nda, te después quea?

¹⁸ Doco palabra queé yuhù-ndà, divi ñà-ñuhú ini anima-nda nduá. Te divi ñà-jaàn ndisa dacuidá cuàchi xi anima nèhivi.

¹⁹ Vâchi ini anima-nè ñuhú cuàhà cuàchi, te divi sàhámà nacání quini guá ini-nè, te sahní stnahá-né, te ò cáhàn-nè xi inga nècuàchi có-nduú nècuàchi vehe-ne, te ò iá-nè xi ndéni nèhivi ní cui mate tà nándàhà-né. Te divi sàhà ñà-nduá ñuhú ini anima-ne, ñâyücànduá xího stná-nè quida cuihna-né, te cuní-nè dandahví stnahá stná-nè, ò cáhàn quini-ne.

²⁰ Divi cuàchi jaàn nduá dacuidá cuàchi xi anima nèhivi, doco ñà-có-ndàhà-ndà na xixi-nda, có-dacuidá cuàcha-ndó.

Nansa ni xinindisá iin nècuàchi ñahà inga ñuu

²¹ Dandu ni quee Jesús ladu yucán cuàhàn-yá ladu ñuu Tiro xi ñuu Sidón.

²² Te yucán ni tnàtuu iin nècuàchi ñahà raza cananeu nuù-yá, ndáhi-nè, cachí-nè xi-yá:

—Señor, mii-ní nècuàchi descendencia xi David, cundehe ndahví-ni yùhù, vâchi yáha ga fuerte dandohó iin ñà-malu dèheyoquí.

²³ Doco Jesús, cóni náxicónhí-yá nuù nècuàchimà. Dandu ni catnàtuu nècuàchi dacuahá-yá, cachí-nè xi-yá:

—(Quida-ní favor xicàn-nè), dandu taxi-nínè, vâchi ndé cuñáñá-nsí ñà-ndáhi guá-nè.

²⁴ Dandu ni cachi-yá (xi nècuàchi dacuahá-yá):

—Cuisi nuù nècuàchi raza-ndà Israel ni techuún Dios yùhù cáhàn xí, vâchi nahi riì ni tùcù xínduu-ne.

²⁵ Dandu ni tnàtuu nècuàchi ñahà mà ni sàcùlìn sisl-né nuù-yá, cachí-nè xi-yá:

—Chindee-ní yùhù, Señor mío.

²⁶ Dandu ni cachi-yá xi-né:

—(Ùhi quide ñà-nduá xicàn-ní, vâchi) có-nduá ducán dacúxió-ndá dità nuù dèhe-nda, te cuàha-nda sihina cuati.

²⁷ Doco ni cachi-nè xi-yá:

—Ñà-ndàà nduá Señor. Doco cunaha-ní, dècuèndè stná sihina cuati, níhi stná-si iyuhu xèhè dità cóyo tixi mesa xi stohò-si. (Ñâyücànduá, chindee sacu stná-ní yùhù.)

²⁸ Dandu ni cachi-yá xi-né:

—Cuàhà gá xinindisá-ní. Ñâyücànduá, ducán ni cóo nacua xicàn-ní.

Ñâyücànduá, divi hora jaàn ni nduvàha dèheyoco-né.

Nansa ni nduvaha cuàhà gá nèhivi

²⁹ Dandu ni quee Jesús ladu yucán cuàhàn-yá ichi mar de Galilea. Te na nchícùn-yá ichi mà, ni nana-ya iin yucù ni sàcòo-ya.

³⁰ Te cuàhà ga nèhivi ni natata nuù-yá yucán, ndacá-né nècuàchi cuhí xi-ne, xínduu-ne nècuàchi xicá cuèhé, xi nècuàchi cuaá, xi nècuàchi ihìn, xi nècuàchi cuhí ndahà-xí, vâchi cuàhà gá cuèhé ndohó-né. Te ni chitánduhù-ñánè nuù-yá, te ni dánduvàha-yanè.

³¹ Ñâyücànduá, ni ndulocó nèhivi cuàhà mà na ní xini-nè nansa ni cuu ni nacahàn nècuàchi ihìn, te ni nduvitá ndahà nècuàchi cuhí ndahà-xí; stná nècuàchi xicá cuèhé, ni nacaca vù stná-nè, te ni natùimù stná nècuàchi cuaá. Te nèhivi ni xini mà, cuàhà gá ni naquimani-né Dios ñà-cuàhà guá sàni chindee-yá nèhivi ñuu-nè Israel.

Nansa ni dàcuxí Jesús cùmi mil nèhivi

³² Daaní, ni cana-ya nècuàchi dacuahá-yá ñà-tnàtuu-ne nuù-yá, te ni cachi-yá xi-né:

—Cuhí inì nêhivi yohó, vâchi vichi sâcuahàn-ndâ ùni quivì ndoó-né cutnáhâ-né xi-ndâ yohó, te còò cá ñâ-cuxi-ne. Te có-cuní nacuitiâ-nè nùhù-nè nú tâñaha ga cuxi-ne, vâchi vihini cuitá-nè ichi núhù-nè.

³³ Dandu nì cacachi nècuàchi dacuahá-yá:

—Doco ¿indù nihì-ndâ ñâ-cutiacu-nè ñâ-cuahà guá-nè? vâchi yucù nduá yohó.

³⁴ Te nì ndàcàtnùhù-yá nùè-né:

—¿Nadaa pan nihí-nsiá?

—Ûsâ-ñâ xì iin ùi siaca cuati —cachí-nè.

³⁵ Dandu nì dândâcù-yá nì mácùndoo víi nsidaa nêhivi mà ñuhù.

³⁶ Te nì tnií-ya ùsâ pan xì stná siaca ma, te nì naquimaní-yá Dios sâhâ-ñâ, dandu nì dâcuachí-yáñâ nì sâha-ya nècuàchi dacuahá-yá, te mií-né, nì dasàn-néà nùè nêhivi cuahà mà.

³⁷ Te nì xixi nsidaa-né nì ndenuu ini-nè. Dandu después nì dàtâcá-nè ùsâ canasta nì chitu ñâ-nì cuyodò gá.

³⁸ Cunaha-nsiá, nsidaa nècuàchi tiàa nì xixi ma, cùmi mil nì sanduu-ne, te cuaán nduú nècuàchi ñahà xì stná ñâ-cuati.

³⁹ Daaní, nì dânácutiâ-yá nêhivi mà, te nì nana tu-ya iin lancha cuahàn-yá dècuèndè ladu ñuu Magdala.

16

Nansa nì xicàn nècuàchi fariseu ñâ-quida Jesús iin milagru cundehè-né

¹ Dandu nì quixi nècuàchi fariseu xì nècuàchi saduceu, te nì xicàn-nè ñâ-nì quidá-yá iin milagru cundehè-né, te cundua seña cudí ndisa ini Dios sâhâ-yá. Ducán nì xicàn-nè, áma níhìndèè-né daquée cuàchi-ne diquí-yá.

² Doco mií-yá, nì cachi-yá xì-né:

—Nú nì cuaà, te cuahá laa ansivi, dandu cachí-nsiá: “Seña nduá ñâ-icúmí cuun dàvì”.

³ Daaní, dàtnâà tu, nú color cuahá íá ansivi, te ndiaha gá itá vicò, dandu cachí-nsiá: “Vâxi dàvì vitni”. ¡Ndahví-nsiá! Dananí uun-nsia nchichí-nsiá, vâchi mate vâtni nacuni-nsiá seña íá ansivi, doco mà cùì nacuni stná-nsiá indù tiempu nduá vichi.

⁴ Nêhivi tiempu vichi, malu cuahà-né, vâchi có-câhvi sâhnú víi gá-nè Dios, cutu milagru-ni xicàn-nè cundehè-né. Doco mà nihì-né cundehè-né milagru cuní-nè, cuisí milagru nì cuu xì Jonás sâhana —nì cachi Jesús.

Dandu nì nacooyanè cuahàn-yá.

Nansa nì cachi Jesús xì nêhivi xí-yá ñâ-nì cúndóo-né cuidadu sâhâ ñâ-nduá chináhâ nècuàchi fariseu

⁵ Dandu nì caquee nècuàchi dacuahá-yá, cuahàn-nè (xi-yá) inga ladu mar yucán. Doco nì nandòdó-né cunihí-ne pan cùhùn.

⁶ Dandu nì cachi-yá xì-né:

—Cundehè-nsiá, cuidadu gá nì cúndóo-nsiá sâhâ tàtnâ nsidátáchí xí pan xì nècuàchi fariseu xì stná nècuàchi saduceu.

⁷ Dandu nì quesaha-né ndatnúhù-nè, cachí-nè:

—Ádi sâhâ ñâ-còò pan nihì-nda vâxi, ñâyùcânduá cachí-yá xì-ndâ ducán.

⁸ Dandu nì cundaà ini-yá ñâ-nduá ndatnúhù-nè, ñâyùcânduá nì cachi-yá xì-né:

—Mií-nsiá, iyuhu gá xiníndísâ-nsiá. Có-xiñùhù ndatnuhu-nsiá sâhâ-ñâ còò pan nihí-nsiá vâxi.

⁹ Yùhù xiní tâñaha ga cundaà ini-nsia. ¿A có-nsinúú ini-nsia sâhâ ùhùn pan (nì xixi) ùhùn mil tiàa, te nadaa ga icà pedazu pan nì ndòò nì dàtâcá-nsiá?

¹⁰ Te ¿a có-nsinúú gá stná ini-nsia sâhâ ùsâ pan nì xixi cùmi mil nêhivi, te nadaa ga icà pedazu pan nì ndòò stná?

¹¹ Xiñuhu cundaà ini-nsiá ñâ-màdi pan ndisa cáhìn sâhâ-xí na ní cachí xì-nsiá ñâ-nì càquin-nsiá cuidadu sâhâ ñâ-nsidátáchí xí pan xì nècuàchimà.

¹² Dandu nì sâà nècuàchi dacuahá-yá nì cundaà ini-nè sâhâ ñâ-nduá nì cachi-yá, màdi ñâ-nsidátáchí xí pan ndisa nduá cáhàn-yá sâhâ-xí. Còò, sâhâ ley chináhâ nècuàchi fariseu xì nècuàchi saduceu, divi nduá cáhàn-yá sâhâ-xí.

Nansa nì cachi Pedro ñâ-xiníndísâ-né Jesús ñâ-nduú ndisa-ya Cristu nì quixi nùè Dios

¹³ Daaní, cuahàn Jesús xì nècuàchi dacuahá-yá ndè ladu ñuu Cesarea de Filipo. Te nì ndàcàtnùhù-yá nùè-né, cachí-yá:

—Yùhù ana nduú Tnaha Nêhivi Ñuhiví, ¿indù nècuàchi nduú cachí nêhivi?

¹⁴ Te nì cachi-nè xi-yá:

—Dava-ne cachí-nè Juan Bautista nduu-ní, te dava-ne, Elías nduu-ní, cachí-nè. Daaní, dava tu-ne cachí-nè ñà-ndùù-ní Jeremías, te ò inga profeta sàhana ni sacahàn cuenta xi Dios.

¹⁵ Dandu ni cachí-yà xì-né:

—Doco mii-nsiá, ¿ana nduí cachí-nsià?

¹⁶ Dandu ni cachí Simón Pedro xì-yá:

—Divi Cristu Dèhemanì Dios ía nicanicuahàn nduu-ní.

¹⁷ Dandu ni cachí-yà xì-né:

—¡Nansicáhàn mii-ní, Simón dèhe Jonás! vâchi màdi nèhivì ñuhivì yohó ni dàtnúù inì xì-ní ñà-nì cundaà inì-ní ducán. Còó, divi Yuamání ía ansivi nduu ana ni dàtnúù xì sàxínítnúù-ní.

¹⁸ Te yùhù cachí xì mii-ní, Pedro, ñà-ìcúmi-ní cunduu-ní na iin cavà fuerte ndé cuàha iin vehe. Te vehe-ma cundua nahi nèhivì-xí icúmi danátáqui. Te mate (ni queé) nsihì ñà-malu yehè andea (quixa), doco mà sàà cundeá nùù ana xínduu tàcà nèhivì xí.

¹⁹ Vâchi cuàhìn daníhítáhvì mii-ní (ñà-sàhà palabra cachí-ní) icúmi yàha nèhivì ndé ñuhivì ì xì Dios, na ian cucumi-ní ndahà cáa xán. Te nú cachí-ní xì-né ñà-nsidá cuàchi ndisa-ne, dandu cundiaa stná palabra mà ndé (íá Dios) ansivi. Te ò nú ni cachí-ní xì-né ñà-màdi cuàchi nduá sàni quida-ne, dandu divi cundiaa stná mà ndé ansivi —ni cachí-yà.

²⁰ Dandu ni sàcùnahà nsidaa nècuàchi dacuahá-yà mà ñà-màsà cachí-nè xì nèhivì ñà-ndùù-yà Cristu (ni quixi dìqui-xí).

Nansa ni cachitnùhu Jesús icúmi-yà cui-yà

²¹ Daaní, quivì yucán ni quesaha-yà cachitnùhu-ya xì nècuàchi dacuahá-yà nansa icúmi cuu xì-yà na sàà-yà ñuu Jerusalén. Icúmi-yà ndoho cuahà-yà, ni cachí-yà xì-né, vâchi ducán icúmi quida nècuàchi sahnú dandacú, xì stná dùtù xícusahnú, xì nècuàchi ley xì veheñuhu. Te nú sàni xihì-yà, dandu icúmi-yà natiacu-yà tixi ùni quivì.

²² Dandu ni tavà cuaán Pedro-yà, te ni càhàn duchi inì-nè xì-yà, cachí-nè:

—Cahnú gá Dios, màsà nunca cuu xì-ní ducán.

²³ Doco ni naxiconihí-yà nùù-né, cachí-yà:

—¡Cuxio-ní nùù, vâchi nahi ñà-malu Satanás nduu-ní, te quidá quínì-ní xì! Cuisi chuun xi nèhivì ñuhivì yohó nduá nihnú inì-ní, màdi chuun xi Dios.

²⁴ Dandu ni cachí-yà xì nècuàchi dacuahá-yà:

—Nsidaa ana cuní cunchicùn xì, xíñuhu nacoo-ne ñà-nduá cuní inì-ní mii-né quida-ne, te quida-ne cuenta na ian nsidá stná-né cruz xì-ne cutnàhà-né xì ñà-cui stná-né.

²⁵ Vâchi nsidaa ana cuní dacácu xì vida xi, ñà-dandáñúhú dahuun-ne mii-né nduá. Doco nú ni cui-né sàhì, dandu ñà-sàni càcu ndisa vida xì-ne nduá.

²⁶ Vâchi mate ni níhì iin nèhivì nsidaa ñà-íá ñuhivì, doco ni mà sàà-mà cundua ñà-vàha xì-ne nú màsà sàà stná anima-nè càcu nùù Dios. Còó. Te ò nú ni cuní stná iin nèhivì nacuiin-ne anima-nè, còó, mà cúí.

²⁷ Yùhù ana nduú Tnaha Nèhivì Ñuhivì, icúmi naxicocuñ, cutnahá stnàì xì cuàhà àngel xì. Te ndiaha gá icúmi coo tnùñuhu xì, nahi tnùñuhu xì Yuamání. Dandu nsidandaì sàhà nsidaa nèhivì ñuhivì, según nansa ni quida iin iin-ne.

²⁸ Te cunaha-nsiá, dava mii-nsiá nècuàchi itá yohó, mà cúí-nsiá dècuèndè cuni-nsiá nansa coo quivì naxicocuñ yùhù ñuhivì yohó cusahnú.

17

Nansa ni nadama Jesús mii-yà, ni natnuù nihni ndiaha-yà

¹ Daaní, na ní yàha ññù quivì, dandu ni saca Jesús Pedro xì Jacobo, xì ñani Jacobo nani Juan, cuàhàn cuaán-yà xì-né ndé ñni iin yucú ducún.

² Te yucán ni nadama-ya, tucu ni nàcùnahà-yà ni xini nècuàchimà, vâchi ni natnuù nihni fuerte nùù-yà nahi orá, te ni nanchù cuxín yaa stná sicoto xì-ya nahi nduá orá.

³ Dandu nanàà ni xini stná-nè jaàn sàni ndecoyo stná nèhivì (sàhana) nani Moisés xì Elías, ndatnúhù-nè xì-yà.

⁴ Dandu ni cachí Pedro xì-yá:

—Stoho-nsì Señor, ¡nansicáhàn-ndá ndoo-nda yohó! Chicá vàha quidavàha-nsi ùni siahva, nú cuní-ní; ian coo mii-ní, ingà coo Moisés, te ingà coo stná Elías.

⁵ Meru càhàn Pedro ducán, te ni dàhvi nsidaa-né mahì iin vicò nchíí ndiaha. Dandu ni tiacu-nè càhàn iin ana càhàn mahì vicò mà, cachí-yà:

—Dèhemanì nduú ana yohó, te cudí inì sàhà-yà. Ñâyùcànduá cunini-nsia ñà-nduá cachí-yà.

⁶ Daaní, na ní inini nècuàchi dacuahá-yà palabra mà, dandu ni tutuyuhu nsidaa-né ñuhù, vâchi ni yùhì cuàà-nè.

⁷ Dandu ni tnàtuu Jesús nùù-né, te ni chituu-ya ndahà-yà icà-né, cachí-yà:

—Vàtùni ndacuita-nsia; màsà yúhí gá-nsià.

⁸ Dandu nì ndacoto-ne inicutu, te nì xini-nè, còò cá iin, ndé làcà mii Jesús iá yucán.

⁹ Daaní, nì naquihin-ya ichì mànuu-ya xì-né yucù yucán. Te ichì mà nì chinaha-yànè, cachí-yà xì-né:

—Màsà nácání-nsiá xì nèhivì ñà-nduá nì xini-nsiá vichi dècuèndè nú sàni natiacu yùhù ana nduú Tnaha Nèhivì Ñuhiví.

¹⁰ Dandu cachí-nè xì-yá:

—Nú ducán, dandu ¿índù chuun cachí nècuàchì ley xi veheñuhu ñà-dihna icúmí naxicocuíñ Elías?

¹¹ Dandu nì cachi-yà xì-né:

—Ñà-ndáa nduá, dihna icúmí Elías naxicocuíñ-nè, te nsidavii-né nsidaa chuun có-íá vii.

¹² Doco cunaha-nsiá, sàni quixi nècuàchimà, doco nì nacuaà nèhivì-né, nì quida ndevàha-ne xì nècuàchimà nacua cudí ini-nè. Te ducán icúmí-nè dandohó stná-nè yùhù ana nduú Tnaha Nèhivì Ñuhiví.

¹³ Dandu nì sàà nècuàchì dacuahá-yá nì cundaà ini-nè ñà-divi Juan Bautista cáhàn-yà sàhà-xí.

Nansa nì tavà Jesús iin ñà-malu inácaa ini iin tèchii

¹⁴ Nì nsihi nì nasaa-yà xì-né ndé ndoó cuahà nèhivì, dandu ndacá nècuàchimà iin tiàa nì quesaa nùu-yá. Te nì sàcuñ sisi tiàa ma nùu-yà,

¹⁵ cachí-nè:

—Señor, cundehè ndahví sacù-ní dèhi, vàchi cuahà gá xichi xíhi ihí-te. Yáha ga ndohó-te, vàchi cuahà xichi nduá-te mahi ñuhu xì mahi tècuí.

¹⁶ Ñàyücánduá, ndaquí-te nì quixi nùu nècuàchì dacuahá-ní, doco màni cù dandúvaha-nète.

¹⁷ Dandu nì cachi-yà xì-né:

—Mii-nsiá, mà túha-nsia cunindisá-nsiá; nì có-sàa-nsia cundaà ini-nsia. ¿Nadaa ga quivi icúmí coi xì-nsiá, te quidandee gá stná ini sàhà-nsiá? Pues cundaca-nsiáte quixi nùu.

¹⁸ Dandu (nì saca-nète vaxi nùu-yá), te nì dandacú-yá nì sadi-yà nùu ñà-malu mà, te nì quea cuahàn. Te nì nduvàha nchito-tè.

¹⁹ Daaní, después na iá cuaán-yá xì nècuàchì dacuahá-yá, dandu nì catnàtuu-ne nùu-yá, cachí-nè xì-yá:

—¿Índù chuun mànicúí tavà nsiuhù ñà-malu mà?

²⁰ Dandu nì cachi-yà xì-né:

—Sàhà-ñá iyuhu guá xiníndisá-nsiá, ñàyücánduá mànicúí. Vàchi ñà-ndáa nduú palabra cachí xì-nsiá yohó: nú xiníndisá ndisa-nsia, mate (iyuhu nduá) nahi tata cuatí yutnú mostaza, dandu vátùni dandacú-nsiá nùu yucù jaàn, te cachí-nsiá xán: “Cuxio iladu”, te seguru icúmí cuu ducán, vàchi nsidanícua ñàha cui quida-nsia, nú xiníndisá-nsiá.

²¹ Doco ñà-malu tnaha quisi nisa inacaa ini tèchii ma, có-queé yáchà, cuiñ nú nì cácan tàhvi-nsiá nùu Dios, te cunihii dócò-nsiá.

Nansa nì cachitnùhu Jesús inga xichi ñà-icúmí-yà cui-yà

²² Na iá va-ya ladu Galilea, nì cachi-yà xì nèhivì xicánúú xí-yá:

—Yùhù ana nduú Tnaha Nèhivì Ñuhiví, icúmí yàhi ndahà nèhivì (malu), vàchi iá iin tiàa cuahàn cahin xí nùu-né.

²³ Dandu cahni-né yùhù; doco tixi ùni quivi icúmí natiacuí —nì cachi-yà.

Te nèhivì dacuahá-yá, cuahà gá nì nàcúndoo-ne tnúnsí ini sàhámà.

Nansa nì nihí Jesús dihùn ñà-chiyàhvi-ya cuota xi-ya

²⁴ Daaní, na ní sàà-yà xì-né ñuu Capernaum, dandu nì tnàtuu tè-xicàn xì cuota nùu Pedro, cachí-te:

—¿A có-chiyàhvi maestru xi-nsia cuota xi-ne?

²⁵ —Jaan —cachí Pedro.

Dandu nì quihvi-ne ini vehe (ndé iá-yà). Te dihna-ya nì cáhàn-yà xì-né, cachí-yà:

—¿Nansa tuxí ini-ní, Simón? ¿Nansa quidá rey ñuhiví yohó? ¿A nùu nèhiví xí mii-té tavá-te cuota xi-tè, te ò nùu nèhiví tucù (dandacú-te nùu-xí)?

²⁶ Dandu nì cachi Pedro:

—Divi nùu nèhiví tucù.

Dandu nì cachi-yà xì-né:

—Nú ducán nduá, dandu nèhiví xínduu nèhiví xí rey, còò obligación icúmí-nè, ¿á ma ndisá?

²⁷ Doco sàhà-ñá có-cuní-ndà cuduchi ini ni-iin nèhivì sàhà-ndà, ñàyücánduá cuahàn-ní mar yucù siaca, te quisi primeru nihí-ní, nacuna-ní yuhù-sí, te tavá-ní dihùn inácaa mà.

Dandu cunihi-níà cùhùn chiyáhvi-ní nùù nècuàchìmà, vèchi vátùni sàà mà sàhà ndúù-ndà —nì cachi-yà.

18

Nansa ni cachi Jesús ana chicá ndiaá

¹ Daaní, hora yucán nì tnàtuu nècuàchì dacuahá-yá nùù-yá, te nì ndacàtnùhù-né:

—¿Ana chicá ndiaá nùù nsidaa nèhivi ñuhiví ì xí mii-yá iá ansivi?

² Dandu Jesús, nì cana-ya iin tètii, te nì chicani-yàte mahi nsidaa-né, cachí-yà xì-né:

³ —Palabra ndàcuisi nduá cachí xì-nsiá yohó; nú màsà nàxícócuñin ini-nsiá, te nàcùnihnu vì ì inì-nsiá na iin ñà-cuati, dandu mà sàà-nsiá ñuhiví ì xí mii-yá iá ansivi.

⁴ Ñàyùcàndùá, iin nèhivi, nú nihnú ndáhvi ini-nè nahi tètii yohó, pues divi-ne nduú ana chicá ndiaá ndé nduú ñuhiví ì xí Dios.

⁵ Te nú sàhà yùhù quidáñùhù nèhivi iin tètii nahi tàyòhó, dandu davani queá na ian yùhù quidáñùhù-nè.

⁶ Nú ni datùcù iin nèhivi iin ñà-cuati xiníndísá-xí, ¡ndahví-nè! Vèchi chicá vaha màcùndiacu iin yùù yódo dùcùn-né, te ndiachi-né mahi mar cunú sàhà-ñá màsà dátùcù gà-nè iin ñà-cuati.

⁷ ¡Ndahví nèhivi ñuhiví datùcù xì ñanitnaha-xi! Vèchi mate fuerza cuàhàn tùcù dava-ne, doco yáha ga ndahví tiàa òsàhà-xí tùcù-nè.

⁸ Te nú sàhà ndahà-nsiá ò sàhà-nsiá xidá cuàchi-nsiá, dandu chicá vaha nì táhndèa, te dacaná-nsiáñà, vèchi chicá nsiaha (sàà-nsiá nùù Dios), te cutiacu-nsiá nicanicuahàn, mate sání ndañuhu iin ndahà-nsiá, ò iin sàhà-nsiá, te màdiá coo nsihi-nsiá, te ndiachi-nsiá ndé xixin ñuhu nicanicuahàn.

⁹ Te nú sàhà nduchinùù-nsiá quidá-nsiá cuàchi, dandu chicá vaha tavà-nsiáñà dacaná-nsiá, vèchi chicá nsiaha (sàà-nsiá nùù Dios) xì mindaa nduchinùù-nsiá, te cutiacu-nsiá nicanicuahàn, te màdiá xì ndúùá, dandu después icúmí-nsiá ndiachi-nsiá ndé xixin ñuhu andea.

Ejemplu sàhà rii nì tùcù

¹⁰ Màsà nunca cahíchi inì-nsiá iin ñà-cuati nahi tàyòhó, vèchi cachí ndà ì-nsiá, ndé ansivi ndoó ángel (ndiaá) xán, te nicanicuahàn ndoó tùha-ne nùù Yuamání.

¹¹ Vèchi yùhù ana nduú Tnaha Nèhivi Ñuhiví, nì quesai ñuhiví yohó ñà-dacácu ana cuàhàn ndañuhu nì cui.

¹² ¿Nansa tuxí inì-nsiá quida iin tiàa nú ndoó iin cientu rii xì-né, te nì tùcù iin-si? ¿Amadí nácóó-né 99 quisi dava ga mà yucán ndé (xixáhan-si) yucù yucán, te cùhùn-nè nanducu-né quisi nì ndañuhu ma?

¹³ Te nú sàni natùì-si, dandu cudíi gà ini-nè. Ndé chicá cudíi ini-nè sàhà quisi yucán nùù nsidaa gà quisi cóni tùcù mà.

¹⁴ Pues ducán iá stná xì nèhivi nahi ñà-cuati yohó, có-cùní Yuandiaha-nsiá iá ansivi ndañuhu nì-iin-ne.

Nansa quida-nda nú sàni quida iin ñanitnaha-nda iin cuàchi nùù-ndà

¹⁵ Nú ni quidá iin ñanitnaha-nsiá iin cuàchi nùù iin-nsiá, dandu nècuàchì nì quida quini-ne nùù-xí, xiñuhu tavà cuaán-ñáné iladu, te ndatnuhu víi-né xì nècuàchìmà. Te nú nì quihín casu nècuàchìmà, dandu ñà-sàni dàcácu tnahá-né nduá.

¹⁶ Doco nú có-quihín casu nècuàchìmà, dandu xiñuhu cuaca-ne iin ò ùi gà nèhivi sàhà ñà-cunduu-ne testigu cundaá vaha inì-xi nansa ndisa iá chuun.

¹⁷ Doco nú ni-xi ñà-jaàn có-cùni-nè, dandu nì cùhùn-nsiá nùù nsidaa nèhivi natácá càhvi xì Dios. Te nú iin-ni có-cùni-nè quihín casu-nè nsidaa nèhivi mà, dandu nì cùnàhá chuun ma, te quida-nsiá cuenta na ian nècuàchì siùmí nduú-né, te ò iin ana nì cuchicuehe dahuun ànima-xi.

¹⁸ Ñà-ndàá nduá cachí xì-nsiá yohó: nú cachí-nsiá xì nèhivi ñà-nsidá cuàchi ndisa-ne, dandu cundiaa stná palabra mà ndé (iá Dios) ansivi. Stná palabra cachí-nsiá xì-né ñà-màdi cuàchi nduá sàni quida-ne, divi cundiaa stná mà ndé ansivi.

¹⁹ Te cachí stná ì-nsiá, mate cuisí ùi-nsiá ndoó, doco nú iin-ni sàni cachi ndùì-nsiá cuàhàn-nsiá càcàn tàhvi-nsiá iñaha nùù Yuamání iá ansivi, dandu icúmí-yá quida-yañà, ndéni chuun nì cui nì cùndúá.

²⁰ Vèchi nú sàni nataca-nsiá mate ùi ò ùni-nsiá iin-ni xaan, te ndácùcahan-nsiá quiví, dandu yucán icúmí coo stná ì cutnahí xì-nsiá —nì cachi Jesús.

Xiñuhu cuicahnú stnahá ini-ndà sàhà-ndà; màsà quidá-nda na ian nì quida peón cóni cùní cuicahnú inì-xi sàhà ñanitnaha-xi

²¹ Dandu nì tnàtuu Pedro nùù-yá, cachí-nè:

—Stoho-nsi Señor, ¿nadaa xichi icúmi cuicahnú inì sàhà iin ñanitnahi nú nì quida-ne cuàchi nùí? ¿A ndé' ùsà xichi, ò nadaa xichi?

²²—Còo —cachí Jesús xì-né— màdi cuisì ùsà xichi, cachí. Dècuèndè (yáha ga cuàhà tantu) ñà-jaàn xiñuhu cuicahnú inì-ní sàhà-né, mate 70 tantu gá nùù ùsà xichi nì cùndúá.

²³Ñàyucàndúá, ducán iá stná ñuhiví ì xi mii-yá iá ansivi nacua nì cuu na ní dànyàha iin rey nsidaa cuenta xi nèhivi nduú peón xi-ne.

²⁴Ni natavá ví-né cuenta, te nì cana-ne iin peón iníhíca cuàhà millón pesu nùù-né.

²⁵Doco còo ni-íñàha icúmi-té ñà-danáá-té. Ñàyucàndúá, nì dándácú rey mà ñà-nì cùyàhvi-tè, mii-té, xì ñahàdihí-te, xì dèhe-tè, xì nsidanicuú stná traste xi-tè sàhà-ñá tùi dihùn danáá-té.

²⁶Doco nì tutuyuhu-té ñuhù nùù sàhà rey mà nì sacundahví-te nùù-né, cachí-te: “¡Señor! Quida sacù-ní favor xí, cundiatu tahví gá-ní yùhù, dandu danáá nsihí”.

²⁷Ñàyucàndúá, nì cuhi ini rey mà-té, te nì nacoò-nète, nì dándütù nsihí-né ñà-ndúá iníhíca-té.

²⁸‘Doco nì quee cuisì-té nùù rey mà, te nì sàhàn-te nì nanducu-té inga peón nduú compañeru-te, vachi iníhíca stná nècuàchímà iin cientu dihùn plata nùù-té. Te nì tñii niñni tñuu tehe-té dúcùn-né nì cachí-te xi-né: “Danáá dahuun ñà-ndúá iníhíco nùí”.

²⁹Dandu nì tutuyuhu stná nècuàchímà ñuhù nùù sàhà-té nì sacundahví-né nùù-té, cachí-né: “Quida sacù-ní favor xí cundiatu tahví gá-ní yùhù, dandu danáá nsihí”.

³⁰Doco còo, cóni cùnì-te. Nì sanicuàchi-tè sàhà-né nì chicadi-tené dècuèndè danáá nsihí-né ñà-ndúá iníhíca-né.

³¹Doco na ní xini dava ga peón nduú compañeru-te, cuàhà gá nì cuduchi ini-né. Ñàyucàndúá, nì sàhàn-né nì nacani-ne xi rey mà ñà-ndúá nì quida-tè.

³²Sàhámà tucutu nì cana rey mà-té nì cachí-né xi-té: “¡Peón malu ndùù-yó! Vachi yùhù, nì xicahnú inì sàhù; nì dándütù nsihí ñà-ndúá nì iníhíco, vachi ducán nì sacundahví nùí”.

³³¿A có-ndiá icà stnáù cuhi inù compañeru nacua nì quide xi miun?” nì cachí rey mà.

³⁴Cunaha-nsiá, yáha ga nì xidà ini-né, ñàyucàndúá nì dàyàha-nète ndahà tè-dàndòhò-xi nèhivi ñà-coo-tè ndahà-témà ndé cachí danáá nsihí-te.

³⁵‘Pues ducán icúmi quida stná Yuamáni’ iá ansivi xi mii-nsiá nú có-cùnì-nsiá cuicahnú ndisa ini-nsiá sàhà ñanitnaha-nsia —nì cachí Jesús.

19

Màsà caté stnàhà-ndà

¹Daani, na ní nsihì nì cachí Jesús ducán, nì quee-ya ladu Galilea cuàhàn-yà ndè inga ladu yùte Jordán ndé nduú stná ladu Judea.

²Te cuàhà gá stná nèhivi nì tenchicùn xi-yá nì sàà stná-né yucán. Ñàyucàndúá nì dándúvaha-ya nècuàchi cuhí xi-ne.

³Dandu nì catnàtuu nècuàchi fariseu nùù-yá nì càhàn-né xi-yá áma níhìndèè-né daquéé cuàchi-ne diqui-yá. Te dohó nì cachí-né xi-yá:

—(¿Nansa cachí-ní?) ¿A vátùni cate-ndà ñahàdihí-ndà nansa nì nì cui?

⁴Te nì cachí-yà xi-né:

—Ádi sáni cahvi-nsia nùù tutu ì ndé cachá nansa nì quidayucun Dios nèhivi primeru, iin-ne nì sàcùnduu tiàa, te inga-né ñahà.

⁵Te nì cachí stná-yà ñà-jaàn nduá dísàhà-xí nándàhà iin nècuàchi tiàa xi iin nècuàchi ñahà, te quecuàân-né nùù yuadihí-né. Ñàyucàndúá, mate diín diín nì sanduu-ne antes, doco vichi na imindaa nèhivi sàni nanduu-ne.

⁶Sàhámà có-ndúù gá-né diín diín nèhivi; còo, vachi quida-nda cuenta na ian imindaa nèhivi nduú-né. Ñàyucàndúá, ndé ducán sàni dàcuàcátnáhà Dios-né, dandu ni-iin nèhivi màsà caté stnàhà-né.

⁷Dandu nì cachí nècuàchi fariseu xi-yá:

—Pues nú ducán, dandu ¿indú chuun nì cachí Moisés iá permisú, vátùni cuàha-nda ñahàdihí-ndà iin tutu cachí cuàhàn-ndà cate-ndàñá, dandu nacoò-ndàñá? —nì cachí-né.

⁸—Còo —cachí-yà—; sàhà ñà-có-cùnì-nsiá cunini vii-nsiá, ñàyucàndúá nì sàha Moisés permisú cate stnàhà-nsiá. Doco na ní quesaha ñuhiví, còo, màdi dúcàn nisá ia.

⁹Te yùhù cachí stnáxi xi-nsiá, cuàchi ndisa nduá nú nì caté iin nècuàchi tiàa ñahàdihí-né, te coo-ne xi inga nècuàchi ñahà. Doco nú sàni càhàn ñahàdihí-né xi inga tiàa, dandu màdi cuàchi cunduu ñà-cate-né ñahàdihí-nemà. Te nú nì nándàhà stná iin nècuàchi tiàa xi iin nècuàchi ñahà nì sate stnàhà, divini cuàchi cunduu stná mà.

¹⁰Dandu nì cachí nècuàchi dacuahá-yá xi-yá:

—Nú ducán (ùhi) iá chuun sàhà iin ñahàdihí-ndà, dandu chicá vaha màsà nándàhà-ndà.

¹¹ Dandu nì cachi-yà xì-né:

—Cunaha-nsiá, màdi nsidaa nêhivì sàà mànihì inì-xi sàhà ñà-nduá nì cachi jaàn, cuisì nêhivì sàni nìhitáhvi mànihì inì-xi.

¹² Dava nêhivì, có-íá nsihì iquicũnú-nè, vâchi ducán nì cacu-ne, ñâyùcânduá, có-nândàhà-nè. Daaní, dava nêhivì, có-íá nsihì-ne sàhà-ñà ducán nì quida nêhivì xì-né. Daaní, dava stná-nè cuisì sàhà-ñà (cudfi inì-nè quida-ne) chuun xì ñuhivì ì xì Dios, ñâyùcânduá có-cùnì-nè nandàhà-né. Nú nì sàà-nsiá mànihì inì-nsiá palabra yohó, vâtùni, (te nú cóo, pues mà cundáá inì-nsiá).

Nansa nì chitândòò Jesús ndahà-yá òni ñà-cuati ñà-cundiátuá

¹³ Daaní, ndacá nêhivì ñà-cuati vâxi nùu-yá ñà-chitândòò-yá ndahà-yá òni-vé, te càcàn tãhvi-yá nùu Dios sàhà-vé. Doco nècuàchi dacuahá-yá, nì sadi-nè nùu nècuàchimà.

¹⁴ Ñâyùcânduá nì cachi-yà xì-né:

—Nacoo-nsiá ñà-cuati nì quixá nú. Màsà cádí-nsiá nùá, vâchi nsidaa ana nihnú inì-xi nahi ñà-cuati, divi cunduu ana sàà ñuhivì ì xì mii-yá íá ansivi —nì cachi-yà.

¹⁵ Dandu nì chitândòò-yá ndahà-yá òni, te cuàhàn-yá.

Nansa nì cachi Jesús xì iin tèchii cuica

¹⁶ Daaní, nì sàà iin tèchii nùu-yá, te nì cachi-te xi-yá:

—Maestro, mii-ní vâha ndisa-ní. Cachi-ní xí ìndù obra vâha quide, te nìhitáhvi vida ndiaha nicanicuahàn.

¹⁷ Dandu nì cachi-yà xì-té:

—¿A ndisá (cuní-ní) càhàn-ní xì yùhù sàhà ìndù iñàha nduú ñà-vâha? Vâchi cóò nì-iin nêhivì úun vâha ndisa, cuisì nú nduú Dios, dandu vâha ndisa inì. Doco nú cuní-ní nìhitáhvi-ní vida ndiaha, dandu chivâha-ní ñà-nduá dandacú-yá.

¹⁸ Dandu nì cachi têmá:

—¿Ìndù ñà-càchí-yá icúmí chivâhi?

Te nì cachi Jesús:

—Divi ñà-màsà càhni stnaha-nda, nì màsà càhàn-ndà xì inga ana có-nduú nècuàchi vehe-nda, nì màsà quidá cuihná-ndá, nì màsà càchí stná-ndà nì-iin tñuhu sàhà ñanitnaha-nda.

¹⁹ Te nì cóo tñùuhu xì-nda nùu yuadíhí-ndá; te nacua cuú íni-ndà sàhà mii-nda, divi ducán icúmí-ndá cuu stná inì-ndà sàhà ñanitnaha-nda.

²⁰ Dandu nì cachi tèchii ma xi-yá:

—Cunaha-ní, nsidaajàn sàni chivâhi òcuèndè na tíí. ¿Ìndù iñàha cumàni gá quide?

²¹ Dandu nì cachi-yà xì-té:

—Nú ndisa cuní-ní cunduu-ní iin ana vâha ndisa, dandu cuahàn-ní dicò nsihì-ní ñà-nduá icúmí-ní, te dasàn-ní dihùn mà nùu nècuàchi ndahví; dandisá nìhitáhvi-ní cucumí-ní cuàhà ñà-cuicá íá ansivi. Te quixi-ní cunicicùn stná-ní yùhù —nì cachi-yá.

²² Daaní, na ní inini-tè ñà-jaàn, dandu yáha ga nì cuhuun inì-te, vâchi cuica cuàhà-té. Ñâyùcânduá nì quihin-tè ichi mànuhù-té.

²³ Dandu nì cachi Jesús xì nècuàchi dacuahá-yá:

—Ñà-ndácuisi nduá cachi xì-nsiá: Ùhì sàstnùhù sàà iin tècuicà ñuhivì ì xì mii-yá íá ansivi.

²⁴ Te ùhì gá stná dayáha-nda iin camellu nùu chichòhò ndúhu íqui, doco ñà-chicá ùhì nduú ñà-yàha iin tècuicà ndé ñuhivì ì xì Dios —nì cachi-yá.

²⁵ Na ní inini nècuàchi dacuahá-yá ñà-jaàn, dandu yáha ga nì ndulocò-nè, te nì cachi-nè iin-ne xì inga-nè:

—Pues nú ducán nduá, dandu ùhì ndisa càcu anima iin nêhivì.

²⁶ Dandu nì indehè vâha Jesús-nè, te nì cachi-yá:

—Nêhivì ñuhivì, mà cúí quida-neàmà. Doco Dios, vâtùni, vâchi nsidaa iñàha, mà ùhì quida-yañà.

²⁷ Dandu nì cachi Pedro xì-yá:

—Nsiùhù, sàni nacoo-nsi nsidaa ñà-nduá icúmí-nsí, te vâxi-nsi nchicùn-nsi mii-ní, Stoho-nsi Señor. Ñâyùcânduá, ¿ìndù iin ñà-vâha icúmí-nsí nihì-nsí?

²⁸ Dandu nì cachi-yà xì nsidaa-né:

—Cunini-nsiá palabra ndácuisi yohó: na sàà tiempu ndusaa nsidaa ley ñuhivì, dandu yùhù ana nduú Tnaha Nêhivì Ñuhivì, icúmí nàcòì nùu silla ndiaha xí. Te daa cunduu quivì nìhitáhvi stná nsi-úxin ùi mii-nsiá, màcùndoo stná-nsiá nùu iin iin silla vico ma, te dandacú-nsiá nùu nsidaa descendencia xì nsi-úxin ùi dèhe Israel.

²⁹ Daaní, nú sàhà yùhù sàni nacoo iin nêhivì iñàha, dandu iin cientu gá tantu ñà-jaàn icúmí-nè nìhitáhvi-né. Mate icúmí-nè nacoo-ne vehe-ne, ò ñani-nè, ò cúha-ne, ò yua-né, ò

dihì-né, ò ñahàdihì-né, ò déhe-ne, ò ñuhù xí-né sàhà yùhù, có-quidámà, vâchi iin cientu gà tantu icúmí stná-nè ñihitáhvì-né, te ñihì stná-nè vida ndiaha nicanicuahàn.

³⁰ Doco cuahà ñehivì idónuu vichi, icúmí-né sàà-nè natenchicùn-nè ndè cahà-xí quivì yucán. Te cuahà ana nchícùn cahà-xí vichi, icúmí-né nàcòdònù-né nùù-xí.

20

Ejemplu ni nacani Jesús sàhà peón xíquidachuún xi si-úvâ

¹ Ducán iá ñuhivì ìi xí mii-yá iá ansivi nacua ni quida iin lamú, naha ni quee-ne cuahàn-nè nducu-né peón caquidachuún nùù-né.

² (Te na ní tùi-tè), dandu ni ndòo-ne ñà-chiyàhvì-ne iin dihùn plata quivì, ñâyùcàndüá ni techuún-nète ñà-cacuhùn-te quidachuún-te itu-né.

³ Daaní, nahi càhìn ni quee tu-ne cuahàn-nè yàhvì, te yucán ni xini-nè itá uun itnii gá tiàa.

⁴ Ñâyùcàndüá ni càhàn-nè xi-té áma cùhùn stná-te quidachuún-te itu-né, te quiyàhvì stná-te iyuhu nacua ndiá icà. Ñâyùcàndüá, ni dàndáá stná-te cuahàn-te.

⁵ Daaní, tucu tu ni quee-ne nahi càxihù, te yucán ni ñihì tú-né iin ùi gá peón; stná càhúni ni cuaà, ducán ni quida stná-né.

⁶ Daaní, nahi càhùhùn tucu tu ni quee-ne ni xini tu-ne itá úun más gá tiàa yucán, ñâyùcàndüá, ni cachi-nè xi-té: “¿Índü chuun ndui yacá itá úun-nsiá?”

⁷ Te ni cacachì-te xi-né: “Divì sàhá còò iin taxi xí chuun quida-nsi”. Dandu ni cachi-nè xi-té: “Pues cuahàn stná-nsiá quidachuún stná-nsiá itui, te quiyàhvì stná-nsiá nacua ndiá icà”.

⁸ Daaní, na ní cuaà dahuun, dandu ni cachi lamú mà xi tiàa dandacú nùù nsidaa peón mà: “Cana-ní nsidaa-té ni quixí-te quiyàhvì-tè; doco dihna peón ni quihvi último ni cáyaha, dandu ducán cunchicùn tnahá-te quihvi-tè dècuèndè stná nùù peón ni quihvi primeru”.

⁹ Ñâyùcàndüá, dihna tiàa ni caquihvi nahi càhùhùn ni yàha, te iin iin-tè ni ñihì-té iin iin dihùn plata.

¹⁰ Daaní, ni cayàha stná peón ni quihvi naha, te chicá más cuahàn-te ñihì-té cahan-té, doco còò. Iin-ni ni canihì nsidaa-té.

¹¹ Ñâyùcàndüá ni quesaha-té daquée cuachi-tè diquì lamú mà,

¹² cachi-te xi-né: “Cuisì iin hora-ni ni caquidachuún nècuàchi último jaàn, te quida-ní cuenta na ian dava-ni ni quidachuún-né xi nsiùhù, mate ndui yacá ni quidachuún ndee-nsì nùù cahni”.

¹³ Dandu ni cachi lamú mà xi iin tiàa mahi peón mà: “Còò, amigo, màdi cuachi nduá quidè. ¿Amádi sáni ndòò sahnu-nda ñà-quiyàhvì iin iin-nsiá iin-ni dihùn plata?”

¹⁴ Tnii-ní yàhvì-ní, te cuahàn-ní, vâchi yùhù cunf ñà-dava-ni quiyàhvì stná nècuàchi último yohó nacua quiyàhvì mii-nsiá.

¹⁵ ¿Á coo derechu xi ñà-quide xi dihùn xí nacua chítñunì inì? ¿ò cumbidiá inì-ní ñà-ni quide iin ñà-vàha (sàhà nècuàchimà?), ni cachi lamú mà).

¹⁶ Sàhâyùcàndüá, nècuàchi chicá idónuu vichi, icúmí-né sàà-nè natenchicùn-nè ndè cahà-xí, te nècuàchi nchícùn cahà-xí vichi, icúmí-né sàà-nè nàcòdònù-né nùù-xí. Vâchi mate cuahà ñehivì cánà (cundoo nùù Dios), doco sacu-nè cunduu ana nacàxin-ya.

Nansa ni cachi tu Jesús inga xichi ñà-icúmí-yâ cui-yâ

¹⁷ Daaní, meru xicá Jesús ichi mànana-ya cuahàn-yâ ñuu Jerusalén, te ni tavà cuaán-yá nsi-úxìn ùi tiàa dacuahá-yá, te ni cachi-yâ xi-né:

¹⁸ —Cunaha-nsiá, icúmí-ndá sàà-ndá ñuu Jerusalén, te yùhù ana nduú Tnaha Ñehivì Ñuhivì, icúmí yàhì ndahà dùtù xicusahnú yucán, xi ndahà stná nècuàchi ley xi veheñuhu, te icúmí-né cachi-nè ñà-fuerza icúmí cui.

¹⁹ Dandu dayáha-ne yùhù ndahà tè-inga raza ñà-cuàcúndiàa-te yùhù, te cahni cui-tè yùhù, dandu chituu-tè yùhù nchica cruz, doco tixi ùni quivì icúmí natiacui.

Ñà-ndüá ni xicàn dihi Jacobo xi Juan nùù Jesús

²⁰ Daaní, vâxi ñahàdihì Zebedeo nùù-yá, ndacá-né dèhe-ne, te ni sàcuùn sisi-né nùù-yá, cuní-nè càcàn-nè iin favor nùù-yá.

²¹ Te ni cachi-yâ xi-né:

—¿Índü iñàha cuní-ní?

Te ni cachi-nè xi-yá:

—Cunf ñihitáhvì nduú dèhi yohó ñà-cundoo iin iin-tè ladu-ní quivì sàà-ní cusahnu-ní ñuhivì, iin-tè coo ladu cuahá-ní, te ingà-te ladu itnì-ní.

²² Dandu ni cachi-yâ xi nduú tiàa ma:

—Mii-nsiá, có-sânihi ini-nsiá ñà-nduá xicàn tàhvi-nsiá nùí. ¿A vátùni cundee inì-nsiá ndoho-nsiá nacua icúmí ndohi te yàha stná-nsiá tnùndoho nacua icúmí yàhi?

—Jaàn —nì cachi-nè— vátùni stná nsiùhù.

²³ Dandu nì cachi-yà xì-né:

—Ñà-ndaà nduá, icúmí-nsiá ndoho-nsiá nahi yùhù, te icúmí-nsiá yàha stná-nsiá tnùndoho nahi yùhù; doco ñà-danlhitáhví mii-nsiá cundoo iin iin-nsiá iin iin ladúí, mà cúí, vàchi có-quidá tocar yùhù quide ñà-jaàn. Yuamání nduú ana chitnùni inì-xì indù nèhivi nihitáhvì cundoo iin iin ladúí.

²⁴ Daaní, na ní xinitnùhu ùxin gà nècuàchi dacuahá-yá, nì cuduchi gà ini-nè sàhà ù ñàní mà.

²⁵ Doco nì cana-ya nsidaa-né nì nátácá-nè nùù-yá, te nì cachi-yà xì-né:

—Sà-ináhá-nsiá nansa xiquida tè-cùsáhnù inga ñuu, fuerte cusáhnù-te nùù nèhivi ñuu-te; vàchi nsidaa tè-níhi chuun ñuu yucán, ndee dandacú-te nùù nècuàchi ñuu-te.

²⁶ Doco mii-nsiá, màsà quidá-nsiá ducán. Còó, vàchi nú íá ana cuní cunduu ana dandacú nùù-nsiá, dandu icúmí-nè cunduu-ne ana xinúcuáchi nùù nsidaa-nsiá.

²⁷ Vàchi nècuàchi cuní codònnùù nùù-xì, icúmí-nè cunduu-ne nahi peón chindéé xì nècuàchi dava ga.

²⁸ Dècuèndè stná yùhù ana nduú Tnaha Nèhivi Ñuhiví, cóni quesáí ñuhiví yohó ñà-cunucuachi nèhivi nùí. Còó, sàhà-ñá cunucuachi mii nùù-né nì quesáí, dandu después cuàhi vida-xì cui cuenta xi-ne, te ducán nàcùndoo cuàhà-né libre.

Nansa nì natùinuù ùì nècuàchi cuaá nì quida Jesús

²⁹ Daaní, mii-yá xì compañeru-yà, nì quihin-ya ichì nì quee-ya ñuu Jericó, te nchícùn cuàhà gà stná nèhivi dava ga.

³⁰ Te yuhù íchí yucán ndoó ùì nècuàchi cuaá. Te na ní tiacu-nè cuàhàn yàha Jesús, dandu nì quesaha-né cána ndee-né, cachi-nè:

—¡Stoho-nsì Señor! ¡Mii-ní descendencia ùì xì David! ¡Cuhì inì-ní nsiùhù!

³¹ Dandu nèhivi cuàhà yucán, nì canáhà-nè xì nècuàchi cuaá mà:

—Màsà cána ga-nsiá —cachi-nè.

Doco nècuàchimà, chicá ndee ní cána-ne, cachi-nè:

—¡Stoho-nsì Señor! ¡Mii-ní descendencia ùì xì David! ¡Cuhì inì-ní nsiùhù!

³² Dandu nì cucuim-yà, te nì cana-ya nècuàchi cuaá mà nì cachi-yà xì-né:

—¿Ndíá nduá cuní-nsiá quide sàhà-nsiá?

³³ Te nì cachi-nè xì-yá:

—Stoho-nsì Señor, cuní-nsì natùinuù-nsí.

³⁴ Nàyùcandüá nì cuhì ini-yànè, te nì chituu-ya ndahá-yá nùù-né. Te vichi vichi nì natùinuù-né. Dandu nì tenchicùn stná-nè mii-yá cuàhàn-nè.

21

Nansa nì tui iin burru ñà-cuindànüü Jesús quìhvi-ya ñuu Jerusalén

¹ Daaní, nì sàà-yà xì-né yatni ñuu Jerusalén ndé íá iin ñuu tii nani Betfagé, yatni dìni yucú Olivo. Dandu nì càhàn-yà xì ùì nècuàchi dacuahá-yá ñà-nì cùhùn cueé-nè nùù-xì.

² Te dohó nì cachi-yà xì-né:

—Cuahán-nsiá ñuu tii chicá nùù-xì. Te yucán icúmí-nsiá cuni-nsiá nuhní iin burru xì dèhe-sì. Quisì yucán ndaxin-nsiá, cundaca-nsiá quixì.

³ Te nú càhàn nèhivi xì-nsiá sàhà-sí, dandu cachi-nsiá xì-né ñà-Stoho-ndá Señor xiñuhu xì-sí, doco luego naxicocuim-si —nì cachi Jesús.

⁴ Cunaha-nsiá, ducán (nì cachi-yà xì-né) sàhà ñà-nì cùù ndisa ñà-nduá nì cachitnùhu iin nèhivi xì Dios sàhana na ní cachi-nè palabra yohó:

⁵ Dohó cachitnùhu-nsiá xì nèhivi ñuu Sión, (dìvi nduú ñuu Jerusalén): “Cundehè-nsiá, yucán vaxi rey xi-nsiá, nihnú ndáhví íní-yà, te indánuú-yá iin burru chii nduú dèhe iin quisì (sànsidá)”.

(Ducan nì cachitnùhu nècuàchi sàhana ma.)

⁶ Daaní, nì caquihin ùì nècuàchimà ichì cuàhàn-nè chuun ma, nì caquida-ne nacua nì dandacú Jesús nùù-né.

⁷ Nì saca-ne burru mà vaxi xì dèhe-sì. Dandu nì chitándoo-né sìcoto xi-ne diquì-sí, te nì sàcùnùù-yàsi.

Nansa nì quidañuhu nèhivi Jesús na ní quìhvi-ya ñuu Jerusalén, nì chitánduhù-né dòò-né ichì según estili xi-ne

⁸ Daaní, dava nècuàchi cuàhà yucán, nì chitánduhù-né dòò-né ichì ndé icúmí-yá yàha-ya, te dava-ne, nì sahnde-nè ndahá yutnù nì chindoo stná-nè ichì mà, (te ducán nì nducutá).

⁹ Te nêhivî idónuu, xî stná nècuàchî nchícùn cahà-xí, cána ndee-né, cachí-né:

—¡Viva ana sahnú yohó! ¡Descendencia ì xí rey David nduú-né! ¡Ndiaha gá ndeníhí vâha-ndané, vâchi cuenta xi Stoho-ndâ Señor vâxi-ne! ¡Ansivéhé cahnú mii-yá íá ansivi!

¹⁰ Daaní, na sání quihvi-ya ñuu Jerusalén mà, dandu ni ndulocó gâ nsidaa nêhivî ndoó yucán, cachí-né:

—¿Ana divi nduú nècuàchî yohó?

¹¹ Te ni naxiconihí nêhivî cuáhà mà:

—Jesús nani-né, te nduú-né iin nècuàchî cáhàn cuenta xi Dios. Te meru ñuu-nè nduú ñuu Nazaret íá ladu Galilea.

Nansa ni tavà Jesús tè-dicó xi tè-xiín fuera patiu veheñùhu cahnú

¹² Dandu cuáhàn-yà veheñùhu cahnú xí Dios, te ni taxi-yá nsidaa tè-dicó xi tè-xiín yucán, te ni ducún nsihí-yá mesa xi tiâa damâ dihùn inga ñuu, te ni ducún stná-yá silla xi tè-dicó loma,

¹³ cachí-yà xî nsidaa témà:

—Dohó cachí (Dios) nùu tutu ìi: “Veheñùhu xi cunduu iin vehe ndé nataca nêhivî càcàn tàhvi-né nùí”, cachí-yà. Doco sàhà mii-nsiá sàni nandua na iin lugar ndé ndoó cuáhà tècuìhnà —ni cachi Jesús.

Nansa ni cuduchi ini nècuàchî veheñùhu sàhà Jesús

¹⁴ Dandu ni catnàtuu cuáhà nècuàchî cuhí nùu-yá, dava-ne cuaá-nè, te dava-ne xicá cuéhé-nè; te ni dândúvâha-yané.

¹⁵ Doco dùtù xícusahnú, xî nècuàchî ley xi veheñùhu, ni cuduchi ini-nè na ní xini-nè ñà-cuáhà guá milagru quidá-yá. Te ni tiacu stná-nè cána ndee ñà-cuati ini veheñùhu, cachá sàhà-yá: “¡Ndiaha gá ana sahnú yohó; descendencia ì xí rey David nduú-né!”

¹⁶ Nâyúcandüá, ni candudana nècuàchìmà, cachí-nè xî-yá:

—¿A có-iníni-ní nansa cachí ñà-cuati jaàn?

Dandu ni cachí-yà xî-né:

—Jaàn, iníni. Doco mii-nsiá, a táñaha ga cahvi-nsia (ndé cáhàn nêhivî xi Dios, cachí-nè palabra yohó):

Ndé stná ñà-cuati xi mée tíquin sàni dàtnùu stná-ní sàxínítnùni-xi, te ni nihí-vé naquimani ndiaha-vé mii-ní.

(Ducán ni cachi Jesús xi nècuàchìmà.)

¹⁷ Dandu ni nacoo-yané, te ni quee-ya ñuu mà cuáhàn-yà ñuu tii Betania, te yucán ni quidi-yà.

Nansa ni sadi Jesús nùu nù-higu cóni caná quisi vídi-nu

¹⁸ Na ní tùnuu, ni quihin-ya ichi màndixi-ya ñuu cahnú, dandu ni xihí-yà doco.

¹⁹ Te ni xini-yà jaàn yatni ichi mà iín iin nù-higu. Nâyúcandüá, ni tnàtuu-ya ndé iín-nu, doco còo quisi vídi caá, cutu ndahà cuií-ni-nù íá. Nâyúcandüá ni cachí-yà xî-nú:

—Màsà nunca cana ga quisi vídi yohó.

Dandu luegu ni ichi dahuun-nù.

²⁰ Te na ní xini nècuàchî dacuahá-yá ñà-ndüá ni cuu, ni ndulocó-nè, te ni cachí-nè:

—¿Índü chuun yâchi guá ni ichi nù-higu jaàn?

²¹ Dandu ni cachí-yà xî-né:

—Ñà-ndáà ndüá cachí xî-nsiá yohó; nú ni cúníndisâ vâha-nsia, te có-ndóo-nsiá xi duda, dandu vâtùni quida stná-nsiá milagru, doco màdi cuisí milagru na ian ni cuu xi nù-higu yohó. Còo, dècuèndè vâtùni cachí stná-nsiá xi yucu jaàn ñà-ni cúxióá, te quècáhuia ini mar, te divi ducán ndisa icúmí cuu.

²² Vâchi nú ni cúníndisâ ví-nsiá, dandu nihitâhvi-nsiá nsidaa ñà-ndüá ni càcàn tàhvi-nsiá nùu Dios.

Nansa ni cachi tè-xídandacú ñà-còo derechu xi Jesús quida-ya ñà-ndüá quidá-yá

²³ Daaní, ni nansihvi-ya veheñùhu cahnú, te ni quesaha-yá chináhà-yà nêhivî. Doco ni catnàtuu stná dùtù xícusahnú, xî stná nècuàchî xídandacú nùu ñuu mà, cachí-nè xî-yá:

—¿Índü ni nihí-ní derechu quida-ní ñà-ndüá quidá-ní? ¿Ana divi ni dândacú nùu-ní ñà-quida-ní ducán?

²⁴ Dandu ni cachí-yà xî-né:

—Yùhù cuní stnáí ndâcâtnùhí nùu mii-nsiá, te nú ni náxícónihí-nsiá nùí, dandu cahitnùhu stnáí xî-nsiá ana divi ni dândacú-xi nùí.

²⁵ Cachi-nsiá xí ana divi ni dândacú-xi nùu Juan (Bautista) ñà-quida ì-né nêhivî. ¿A Dios ni cachí xî-né, te ò nêhivî ñuhiví?

Dandu nècuàchìmà, ni candatnuhu tnahá nsidaa-ní mii-né, cachí-né:

—Nú ni cachí-ndà Dios ni dándacù-xì nùu Juan, dandu cachi Jesús xi-ndà: “¿Índu chuun cóni xinindísá-nsiá nècuàchìmà, nú ducán?”

²⁶ Doco nú ni cachí-ndà ñà-divi nèhivi ùún ni cachi xi nècuàchìmà, dandu yúhí-ndà ndiá nduá quida nèhivi xi-ndà, vâchi nsidaa-né quidá-né cuenta iin ana ni cãhàn cuenta xi Dios ni sanduu ndisa Juan mà.

²⁷ Ñâyücàndüá, ni cacachi nècuàchìmà xi-yá:

—Cò-cùndáá ini-nsi ana divi ni dándacù-xì nùu Juan.

Dandu ni cachi-yà xi-né:

—Ni yùhù, mà cáchí stnái xi-nsiá ana divi ni dándacù-xì nùú ñà-quide ñà-nduá quidé.

Ejemplu sàhà tiàa ndoó ùi dèhe-xi

²⁸ (Dandu ni cachi Jesús xi-né:)

—¿Nansa tuxí ini-nsia (sàhà ejemplu yohó)? Nisa ia iin tiàa ndoó ùi dèhe-xi. Te ni cachi-nè xi iin-tè: “Cuahán vichi duha, quidachuun itu-ndà ndé iá si-uva xi-nda”.

²⁹ Te ni cachi dèhe-ne mà: “Còó, vâchi có-cãhín cùhìn”. Doco después ni naxicocufìn ini-tè, te ni sãhàn-te ni quidachuún-te.

³⁰ Dandu ni sãhàn yua ma ní cãhàn tu-ne xi inga dèhe-ne, cachí-nè xi-té nacua ni cachi-nè xi tè-primeru mà (ñà-ni cùhùn-te quidachuún-te). Te ni cachi tèchii ùi mà: “Juùn, yohó cùhìn, papá”. Doco cóni sãhàn-te.

³¹ Pues, vichi cachi-nsiá xí índù tèchii ma ni quida ndisa ñà-nduá ni dándacú yua-té.

Te ni cachi nèhivi iníni mà:

—Divi tè-primeru mà.

Dandu ni cachi Jesús xi-né:

—(Cachí vaha-nsia.) Te palabra ndàcuisi nduá cachí xi-nsiá yohó: chicá mà úhì càcu tè-dáchíyãhvi (cahíchi guá ini-nsiá), ò iin nècuàchi ñahá quidá ndevãha, te sàà-nè ñuhiví ùi xí Dios, mientras mii-nsiá, ùhì gà càcu-nsia ducán.

³² Vâchi na ní quixi Juan Bautista cóni xinindísá-nsiá (na ní cãhàn-nè sãhù) sãhà ichi vãha Dios. Doco tè-dáchíyãhvi, xi stnà nècuàchi ñahá iá cuàchi xi, ni xinindísá-né nècuàchìmà. Te nú sãni xini-nsiá (ni xinindísá cuàhà nècuàchìmà), dandu ¿índu chuun cóni náxícocufìn stnà ini-nsiá ñà-cunindísá-nsiá?

Ejemplu sàhà medieru malu

³³ Cunini-nsia, vâchi cuãhìn nacani inga ejemplu. Ni ia iin lamú ni dãnándèe nducu yòhò si-uva nùu ñuhù xi-né, te ni quida-ne corra-ñà. Dandu ni quidavãha stnà-nè iin pilá cahnú ndé cuñuhu ndudi quisi mà. Te ni quidavãha stnà-nè iin torre ndé cundiaa peón inii itu mà. Dandu ni tatu-nè itnii medieru, te cuãhàn-nè inga ñuu xicà.

³⁴ Daani, na ní sàà tiempu cùchi quisi vidí mà, dandu ni techuún-né iin ùi peón xi-ne nùhù naquihìn xi fruta nùu medieru mà.

³⁵ Doco na ní canasaa nècuàchìmà yucán, ni catnii medieru mà nsidaa-né, te ni sahnì cuií-te iin-ne, inga-nè ni sahnì dahuun-tè, te inga-nè ni cani yuu-té.

³⁶ Daani, inga tu ni techuún lamú mà más gà peón xi-ne nùhù tu, te chicá más nduú-né nùu nècuàchi ni nùhù primeru. Doco divi ni ducán ni quida quini medieru mà xi nècuàchìmà.

³⁷ Dandu último ni techuún lamú mà dèhemani-né nùhù, vâchi ádi quidañuhu-té dèhe-ne ni cahan-né.

³⁸ Doco na ní xini-te vâxi dèhe lamú mà, dandu ni candatnuhu tnahá-te, cachí-te: “Tè-yohó nduú tè-icúmi ndutahvi (xi ñuhù yohó). Vichi cahnì-ndaté chicá vãha, dandu mii-nda nanduu-nda stoho ñuhù”, ni cacachí-te.

³⁹ Ñâyücàndüá, ni catnii-tè nècuàchìmà ni tavà-ténè iladu nùu ñuhù mà, te ni casahnì-ténè.

⁴⁰ Pues, vichi ¿ndiá nduá icúmi quida stoho itu mà xi medieru mà nú sãni nasaa-nè yucán? —ni cachi Jesús.

⁴¹ Dandu nècuàchi iníni, ni cachi-nè xi-yá:

—Icúmi-né dandãñuhú dahuun-ne tè-malu mà. Ni-iyuhu mà cúhí ini-nète. Dandu después nanducu gà-nè medieru tũha quida vii, divi nècuàchi tũha nacuãha xi-né quisi vidí tiempu iá-si.

⁴² Dandu ni cachi-yà xi-né:

—¿A táñãha ga cahvi-nsia nùu tutu ìi ndé cachá palabra yohó?:

Ni ia iin cavã, te ni cahíchi ini albañil-ñà, doco vichi sãni sàà mà ni sàcũndua yùu vicò esquina vehe. Divi Stoho-ndà Señor nduú ana ni quida ducán, te ndulócò-nsi ñà-ndiaha guá ni quida-ya.

(Ducan nacáni nùu tutu ìi.)

⁴³ Ñâyücàndüá, yùhù cachí xi-nsiá, mà ñhì gà nèhivi ñuu yohó derechu cundoo-ne ñuhiví ùi xí Dios; còó, nèhivi inga ñuu icúmi ñihitãhvi xán, te mii-né, ndisa, icúmi-né quida vii-né na iin medieru vãha tũha nacuãha vii xi cosecha.

44 Te (cunaha-nsiá, yohó iá gà stná inga ejemplu sàhà cavà mà): nsidaa ana caquìhi sàhà-xí cavà mà, icúmí-nè nacuehè-nè. Te nsidaa ana nacava mà diquì-xí, tàdi nchìhi-nè quida —ni cachi Jesús.

45 Te (cunaha-nsiá, yucán itá stná) dùtù xícusahnú, xi nècuàchì fariseu, te iníní stná-nè ejemplu ni nacani-ya, te ni cundaà ini-nè, divi mii-né cáhàn-yà sàhà-xí.

46 Ñàyücàndüá, ni cuni-nè tñii-neyà, doco yúhí-nè nèhivi cuàhà ndoó yucán, vàchi ndeníhí nècuàchì mà mii-yà ñà-ndüá-yá iin ana cáhàn cuenta xi Dios.

22

Ejemplu sàhà vicò nándàhà

1 Daaní, ni quesaha Jesús ni nacani tu-ya xi-né inga ejemplu, te dohó ni cachi-yà:

2 —Dohó iá ñuhívi ì xi Dios nacua ni quida iin rey na ní nándàhà dèhe ii-né; ni quida-ne iin vicò cahnú.

3 Te ni techuún-né peón xi-ne ñà-cacanu-u-tè cachtitnùhu-tè xi nsidaa nèhivi sàni càna. Doco cóni cùnì nècuàchì mà quixi-ne.

4 Ñàyücàndüá, ni techuún rey mà más gà peón xi-ne cacanu-u-tè cachtitnùhu-tè. Te dohó ni cachi-nè xi-té: “Cachì-ndá xi nèhivi càna mà ñà-sà-iá quixi-ne vicò, vàchi sàni cuyucun comida; sàni xihì buey xi nsidaa gà quisi ndatnù. Sà-iá nsidaa ndiatúá-nè”, ni cachi rey mà.

5 Doco nèhivi càna mà, cóni quihín casu-nè, ni caquee nsidaa-né cuàhàn-nè nùu chuun xi-ne. Iin-ne cuàhàn-nè nùu itú, inga-nè cuàhàn-nè ndé iá venta xi-ne.

6 Te dava ga-nè ni tñii xi peón xi rey mà ni quida quini-ne xi-té, ni sahnì-néte.

7 Ñàyücàndüá na ní inini rey mà, cuàhà gà ni xidá ini-nè, te ni techuún-né soldadu xi-ne ni dándàñúhú-tè nèhivi mà, te ni sahmì-tè ñuu-nè.

8 Dandu ni cachi rey mà xi peón xi-ne: “Sà-iá listu vicò-xí, doco nèhivi ni cachi quixi primeru, cóni nátüi-ne ñihítàhvi-né.

9 Ñàyücàndüá, vichi cuahán-ndá ndé ichì nahnú, te quida-ndá invitar nsidanicuú nèhivi ndácùhun stnaha-xi-ndá, te cachi-ndá xi-né ñà-ni quixi-né vicò xí”.

10 Ñàyücàndüá, ni caquee peón mà inga xichi ni nacàhin-tè calle ñuu mà ni dànatàcà-te nsidanicuú ana ni ndacùhun stnaha-xi-té, vaha-ne ò malu-nè, te ducán ni chitu vehe rey mà nèhivi.

11 Daaní, ni quihvi rey mà ndé iá vicò, te ni xini-nè jaàn iá iin tiàa có-ndixí vicò nacua ndiá icà-ndá na ndoo-nda vicò nándàhà.

12 Ñàyücàndüá, ni cachi-nè xi nècuàchì mà: “Amigo, ¿ìndü chuun ni yàha-ní vicò yohó, te có-ndixí-ní sìcoto nacua ndiá icà-ní?” Doco nècuàchì mà, mànicùì naxiconihí-né nùu rey mà.

13 Dandu ni cachi rey mà xi peón xi-ne: “Chicuhni-ndá ndahàsàhà nècuàchì jaàn, te dacana-ndánè fuera ndé iin tñúu; (ndahví-nè), vàchi yucán nduu lugar ndé yàha ga cuacu nèhivi, te càna stná nùhu-ne”, ni cachi rey mà.

14 Pues sàhà (ejemplu yohó vátüni cundaà ini-nsià) ñà-cuàhà nèhivi càna (cundoo nùu Dios), doco sacu-nè cunduu ana nacàxin-ya.

Ñà-ndüá ni cachi Jesús sàhà renta xi ñuu-ndá

15 Daaní, ni caquee nècuàchì fariseu ni ndatnuhu tnahá-né nansa cui quida-ne, te dadaná-né mii-yà na cáhàn-yà (xi nèhivi).

16 Ñàyücàndüá, ni techuún-né itñii nèhivi nchìcùn xi-né nùu-yá, te cutnàhà stná iin ùi nècuàchì partidu xi Herodes, te dohó ni cacachi-nè xi-yà:

—Maestro, ináhá-nsí nduu-ní iin nèhivi ndacuisi inì-xi, te chináhà vii-ní nansa ndisa iá ichi vàha Dios. Có-quihín casu-ní nansa cachi nèhivi, te ni có-yúhí stná-ní ní-iin-ne.

17 Ñàyücàndüá, cuní-nsi cachi-ní xi-nsí nansa tuxí inì-ní, ¿a vátüni sàha Dios lugar chiyàhvi-nda renta nùu rey cahnú César, á coó?

18 Doco Jesús, sàni cundaà ini-yà có-xicàn tñuhu sahnú ndisa-ne nùu-yá. Ñàyücàndüá ni cachi-yà xi-né:

—(Ndahví-nsià, vàchi) dananí uun-nsia vàha guá-nsià. ¿Índü chuun cuní-nsià quida-nsia maña nùí?

19 Dacuní-nsià yùhù iin dihùn xí-nsià chíyàhvi-nsia sàhà renta, cundehí.

Dandu ni sàha-neyà dihùn plata mà.

20 Te na ní indehè-yáñà, dandu ni cachi-yà:

—¿Ana ñinùu-xí, te ana diquìvi-xí itúú icà dihùn yohó?

21 —Divi rey cahnú César —ni cachi-nè.

Dandu ni cachi-yà xi-né:

—Nú ducán ndüá, dandu nacua-ha-nsia César ñà-ndüá icúmí-nsià cuàha-nsiàte, te cuàha stná-nsià Dios ñà-ndüá ndiá icà-nsià cuàha-nsiayà —ni cachi Jesús.

²² Dandu nêhivî mà, nî ndulocó-nè sàhà palabra jaàn, te nî nacoo-neyà cuàhàn-nè.

Nansa ni cachi Jesús ía nansa natiacu-ndà

²³ Daaní, quivî yucán nî tnàtuu itnî nêcuàchî saduceu nùu-yá, nî càhàn-nè xî-yá. Nêcuàchî yucán, có-xiníndísá-né ñà-ícumí-ndá natiacu-ndà. Ñâyücàndüá, dohó nî cachi-nè xî-yá:

²⁴ —Maestro, ñà-yòhó nduá nî tîaa Moisés quida-nda: nú sàni xihî iin tiàa, te còò dèhe-ne nî ndóo (xî ñahàdihí-nè), dandu ícumí ñani nsii ma nandàhà-né xî ñahàcuáán nî ndóo ma, áma cóo iin dèhe-ne; dandu quida-nda cuenta na ian dèhe nsii ma nduú mée mà.

²⁵ PUES cunaha-ní, nî sandoo ùsà ñàní ñuu-ndà yohó, te nî nandàhà nêcuàchî primeru, doco nî xihî-nè, te còò dèhe-ne. Ñâyücàndüá, nî ndóo ñahàdihí-nè nùu ñani-nè nchícùn gà.

²⁶ Daaní, divi ducán nî cuu stná xî nêcuàchî ùi, nî xihî stná-nè, te còò stná dèhe-ne, te nî ndóo ñahàdihí-nè nùu inga ñani nchícùn gà; te iin-ni nî quida-ne seguir ducán dècuèndè (nî xihî stná) nêcuàchî ùsà.

²⁷ Dandu por último nî xihî stná nêcuàchî ñahà.

²⁸ Ñâyücàndüá, na sàà quivî (cachí-nsiá) natiacu nsii, ¿índü tiàa ma nacuaça xî nêcuàchî ñahà mà? vâchi antes nsi-úsà-nè nîsa ía xî-ñá.

²⁹ Dandu nî cachi Jesús xî-né:

—Còò; có-càchî vii-nsiá, vâchi có-cùndàá inì-nsia nansa cachí tutu ìi xí Dios, nî có-cùndàá stná inì-nsia ñà-càhnü-guá poder xî-ya.

³⁰ Cunaha-nsiá, na sàà quivî natiacu nêhivî, mà nándàhà gá-nè, vâchi nahi ángel ndoo ansivî (xinúcuáchî) nùu Dios, ducán ícumí nanduu nêcuàchî nsii.

³¹ PUES vichî cuàhìn càhìn xî-nsiá sàhà nansa ía ndisa natiacu nsii. Ádi sáni cahvi-nsia nansa nî cachi Dios xî-nsiá palabra yohó:

³² “Yùhù nduí Dios cahvi nsi-Abraham, xî nsi-Isaac, xî nsi-Jacob”, cachí-yá. (Ñâyücàndüá, itíacú ìi nêcuàchî nsii ma), vâchi nêcuàchî sàni xihî dahuun ndisa, mà cúí cahvi gá-nè Dios; cuiisí ana itíacú càhvi xî-yá

³³ —nî cachi Jesús. Te na ní inini nêhivî cuàhà mà ñà-ndüá nî cachi-yá, dandu yáha ga nî ndulocó-nè.

Nansa ni cachi Jesús índü ley xî Dios nduú ley chicá ndiaá

³⁴ Dandu nî xinitnùhu nêcuàchî fariseu ñà-sàni cundee-yá nùu nêcuàchî saduceu, mànicúí nanihî tnùnî ini-nè nansa naxiconihí-né nùu-yá. Ñâyücàndüá nî nataca nêcuàchî fariseu mà;

³⁵ te iin-ne nduú nêcuàchî ley xî veheñùhu, te nî tnàtuu-ne nùu-yá nî ndàcàtnùhü-né iñàha nùu-yá, a ver nansa naxiconihí-yá. Te dohó nî cachi-nè xî-yá:

³⁶ —Maestro, nùu nsidaa ñà-ndüá nî dándàcú Dios nùu ley xî-ya, ¿índü-ñá chicá ndiaá?

³⁷ Dandu nî cachi-yá xî-né:

—Ícumí-ndá cuu ini-ndà sàhà Stoho-ndà Dios xî nsidanicuú anima-ndà, xî nsidanicuú voluntad xî-nda, xî nsidanicuú stná sàxinítnùnî-ndà.

³⁸ Ñà-jaàn nduá chicá ndiaá dandacú-yá, te chicá chuun cahnú nduú stná.

³⁹ Daaní, nacua cachí ley primeru mà, ducán cachí stná ley ùi nî dándàcú-yá, (vâchi dohó cachá): “Nacua cuú ini-ndà sàhà mü-nda, ducán ícumí stná-ndà cuu ini-ndà sàhà ñanitnaha-nda”.

⁴⁰ Cunaha-nsiá divi ley jaàn nduú yohó nsidanicuú ley xî Moisés xî nsidaa gá stná palabra nî cachi profeta nîsa cahàn cuenta xî-ya.

¿Ana divi nduú yohòtèhè Cristu?

⁴¹ Ndoó ñi nêcuàchî fariseu yucán, te nî cachi Jesús xî-né:

⁴² —¿Nansa cachí mü-nsiá sàhà ana nduú Cristu? ¿Índü descendencia nduú-yá (cahan-nsiá)?

Te nî cachi-nè xî-yá:

—Divi David nduú yohòtèhè-yá.

⁴³ Dandu nî cachi-yá xî-né:

—Pues, nú ducán, dandu ¿índü chuun nî cachi David ñà-stoho-nè nduú-yá na ní càhàn-nè sàhà-yá tixi poder xî Espíritu ñi xí Dios? Vâchi dohó nî cachi nêcuàchímà nùu tutu ìi:

⁴⁴ Nî càhàn Yua-nda Dios xî Stohi, (divi Cristu), te nî cachi-yá: “Yohó coo-ní ladu cuahí ndè cachí sàà cundei nùu nsidaa ana xiní ùhî xî-ní, dandu cusahnú fuerte-ní nùu-né”.

⁴⁵ Cundehè-nsiá, nî cachi David ñà-Stoho-nè nduú Cristu, doco nú ducán nduú-yá, dandu ¿índü modo cunduu stná-yá iin descendencia xî-ne? (Doco ñà-ndàá nduá.) —nî cachi Jesús.

⁴⁶ Doco còò ni-iin nêhivî nî nánihî tnùnî gà ini-nè naxiconihí-né nùu-yá ni-iin palabra. Ñâyücàndüá, quivî nùu-xí cóni sàha ga-nè valor dadavátnáhà-né xî-yá.

23

Ñà-nduà nì cachi Jesús sàhà nècuàchì fariseu xì sàhà nècuàchì ley xì veheñùhu

¹ Dandu nì càhàn tu-ya xì nèhivì cuàhà yucán, xínduu-ne nècuàchì dacuahá-yá, xì stná nècuàchì inínì úún.

² Te dohó nì cachi-yà xì-né:

—Nècuàchì fariseu xì nècuàchì ley xì veheñùhu, iá derechu xi-ne chinaha-nè ley ì xì Moisés.

³ Ñàyücànduá, nsidaa ñà-nduá cachi-nè, chivàha-nsiaña. Doco màsà quidá-nsiá nacua quidá mii-né, cóo, vachi diín iñàha chináhà-nè, te diín iñàha quidá-né. Nùù mii-né, mà úhi cachi-nè xì nèhivì ñà-chivàha-ne cuàhà iñàha, doco mii-né, có-chivàha-neà.

⁴ Doco nèhivì, mà cundéé ini-nè chivàha nsihi-ne ñà-nduá cachi nècuàchì-mà, vachi na iin carga vée nduá nùù-né, te mate úhi cunsida-neà, doco ndacú nùù-né. Doco nècuàchì ley mà, cóo; ni-iyuhu mà ndáníhí-neà, ni có-dúcùn ni-iin dìnindàhà-nèà.

⁵ Cunaha-nsiá, nsidaa ñà-nduá quidá nècuàchì-mà, cuiisì sàhà-ñá cundehè nèhivì-né nduá. Ndahà-né te tnaa-nè nuhnì itni ndé ñuhú tutu ìi, doco puru itni nahnú cuní-né cundua (na ian vaha guá-nè). Te divi sàhà ñà-yucán nduá nsidá naní stná-nè ñà-vico iá nùù sàhà sìcoto xi-ne.

⁶ Te na sàhàn-nè vicò, ò veheñùhu, dandu nandúcú-nè lugar ndé chicá ndiaha cundoo-ne.

⁷ Te cudí stná ini-nè ñà-cásahú tñùñuhu nèhivì xi-né yàhvi, te cachi nèhivì xi-né maestro.

⁸ Doco mii-nsiá, màsà nándúcú-nsiá ñà-cachi nèhivì xi-nsiá maestro, vachi imindaa maestru icúmí-nsiá, divi nduú yùhù Cristu, te iin-ni ñaní nduú nsidaa-nsiá.

⁹ Ni màsà cáchì-nsiá “padre” xì ni-iin nèhivì ñuhivì yohó, vachi imindaa ana nduú yua ndisa-nsia, divi nduú mii-yá iá ansivi.

¹⁰ Ni màsà cáchì stnáhá stná-nsiá “jefe”, vachi imindaa jefe icúmí-nsiá, divi nduú yùhù Cristu.

¹¹ Te nècuàchì cuní cunduu ana chicá idónuu, divi icúmí cunduu ana xinúcuáchì.

¹² Vachi nsidaa ana datiaá chicá ndiaá, icúmí-nè sàà-nè nducahan-ne. Doco nsidaa ana ndaníhì ndáhí xì mii-xí, divi nduú ana chicá icúmí nihì xì tñùñuhu.

¹³ ¡Ndahví mii-nsiá nècuàchì ley xì veheñùhu! Te ¡ndahví stná mii-nsiá nècuàchì fariseu! Vachi datiaá uun-nsia vaha-nsia. Cutu estorbu quidá-nsiá nùù nèhivì cuní quihvi ñuhivì ìi xì Dios: ni có-quihvi mii-nsiá, te nèhivì cuní quihvi, sadí-nsiá nùù-né.

¹⁴ ¡Ndahví mii-nsiá nècuàchì ley xì veheñùhu, xì stná mii-nsiá nècuàchì fariseu! Datiaá uun-nsia vaha-nsia. Vachi túha-nsia (tñii diqui uun-nsia ley, te) xidándiaá-nsiá vehe nècuàchì nì xihì ìi-xí, te después sácuita-nsia nacuatú cuàhà-nsiá na ian vaha guá-nsiá. Sàháyücànduá, iin castigu chicá fuerte icúmí-nsiá nihì-nsiá.

¹⁵ ¡Ndahví mii-nsiá nècuàchì ley xì veheñùhu, xì stná mii-nsiá nècuàchì fariseu! Vachi datiaá uun-nsia vaha-nsia. Ndé inicutu ñuhivì nácàhin-nsia, te yàha stná-nsiá mar nducu-nsiá ana dayàha-nsia nùù religión xi-nsia. Te nú sàni yàha-ne, dandu sàhà (ley) xi-nsia sàà stná-nè nanduu-ne ana malu, ndé ùi tantu gà más malu nanduu-ne nùù mii-nsiá, te sàhàjàn chicá yàchì sàà-nè andea.

¹⁶ ¡Ndahví-nsiá! vachi mate nahi nècuàchì cuaa nduú-nsiá, doco cuní-nsiá dacundéhe-nsiá nèhivì indù iá ichì. Vachi cachi-nsiá xi-né ñà-màdi obligaciòn nduá nú ni caquín-ndà compromisu, te chináhà-ndá veheñùhu. Doco ñà-nduú compromisu ndisa nduú ñà-chinaha-nda oro iá veheñùhu, cachi-nsiá.

¹⁷ (¡Ndahví-nsiá!) ¿Índu chuun có-sàà-nsiá cundaà ini-nsiá, te quidámáxini-nsiá? ¿A có-ináhà-nsiá ñà-chicá ndiaá veheñùhu nùù oro mà? vachi cuiisì sàhà-ñá iá ini veheñùhu, ñàyücànduá nduá oro ìi.

¹⁸ Daaní, cachi stná-nsiá ñà-màdi obligaciòn ndisa nduá nú ni caquín-ndà iin compromisu, te chináhà-ndá mesa ìi xì Dios. Doco ñà-nduú compromisu ndisa nduú ñà-chinaha-nda promesa iá nùù mesa mà, cachi-nsiá.

¹⁹ Pues ¿índu chuun có-sàà-nsiá cundaà ini-nsia, te quidámáxini guâ-nsia? ¿A có-ináhà-nsiá chicá ndiaá mesa ìi mà nùù nsidaa promesa? Vachi divi sàhà mesa-mà ñihì stná promesa mà ndu-iiá.

²⁰ Ñàyücànduá, nsidaa nècuàchì saquín compromisu, te chináhà-nè mesa ìi, pues davani queámà na ian chináhà stná-nè promesa iá nùù mesa mà.

²¹ Daaní, stná iin nècuàchì saquín compromisu, te chináhà-nè veheñùhu, pues iin-ni nduú stná na ian chináhà stná-nè mii-yá iá ini veheñùhu na.

²² Te nècuàchì saquín compromisu, te chináhà-nè ansivi, davani queé stná mà na ian chináhà stná-nè silla ìi xì Dios, xì stná mii-yá iá nùù silla mà.

²³ ¡Ndahví mii-nsiá nècuàchì ley xì veheñùhu, xì stná mii-nsiá nècuàchì fariseu! Vachi datiaá uun-nsia vaha-nsia, mate túha-nsia cuàha-nsia diezmu xi (yucú cuatilhá nahi) ndua

ndòò, xi anís, xi cominu. Doco ñà-ndúú ley ì chicá ndiaá, ni có-quihín casu-nsiãña, mate nacáníamà sàhà nansa cunihnu ndàcuisi ini-ndà, te cundehè ndàhvì stnahá stná-ndà, xi stná ñà-cunihnu vaha ini-ndà mii-yá. Pues ñà-jaàn ndisa ndiá ìcà-nsiá quida-nsia cumplir, te ni có-xiñhùhù nacoo stná-nsiá diezmu mà.

²⁴ Doco nahi nècuàchì cuaa cuní dacúndéhe xi inga nèhivì ìndù íá ichì, ducán nduú-nsiá. Mate daxixin-nsia nsidaa ndutè xihí-nsiá sàhà-ñà màsà cócò-nsiá ni-iin quisi tii, doco iin chuun ndiaá ndisa, ni có-ndùlòcò-nsiá sàhámà. Ñàyùcàndùá, ducán queámà na ian sàni coco-nsiá (iin quisi cahnú) na iin camellu.

²⁵ ¡Ndahví mii-nsiá nècuàchì ley xi veheñùhu, xi stná mii-nsiá nècuàchì fariseu! Pues náhà xicà datiaá uun-nsia vaha-nsia, vachi dohó íá estilu xi-nsia na ian nacaté-ndá iin pocillu, ò iin cóhò, te cuiis yàtà-ñà nacaté-ndá, doco (iniá, quini íá). Te divi ducán íá stná) anima-nsiá, chitu stná cuàchì ñà-xiho-nsiá cuahà ìñàhà, te quidá ndévaha-nsia.

²⁶ ¡Ndahví mii-nsiá nècuàchì fariseu! Cutu quidámáxini-nsiá. Vachi (nú icúmi-ndá) iin pocillu ò iin cóhò, amadí primeru iniá ndundoò, dandu vátùni coo ndoo (iniá xi) stná yàtà-ñà. (Pues ducáni xiñuhu ndoo stná anima-nsiá.)

²⁷ ¡Ndahví mii-nsiá nècuàchì ley xi veheñùhu, xi stná mii-nsiá nècuàchì fariseu! Vachi datiaá uun-nsia vaha-nsia, doco cóò. Nahi monumentu (ndé ìndùxin nsii), ducán nduú-nsiá; vachi cuaha-ni íamà nú sàni ndanuu cuxán, doco ini-xi ñuhú chitu iquí nsí xi cuahà ñà-siquini.

²⁸ Ducán íá stná mii-nsiá, indéhe nèhivì mii-nsiá na ian nèhivì vaha nduú-nsiá, doco danani uun-nsia, vachi anima-nsiá, chitúa ñà-cò-ndiáá.

²⁹ ¡Ndahví mii-nsiá nècuàchì ley xi veheñùhu, xi stná mii-nsiá nècuàchì fariseu! vachi datiaá uun-nsia vaha-nsia. Pues mii-nsiá nduú ana quidávaha monumentu nú ñaña xí nècuàchì profeta nisa cahàn cuenta xi Dios sàhaha, te nsidácútú stná-nsiá lugar ndé xí-ìndùxin nsii ni sanduu nèhivì vaha.

³⁰ Dandu cachí-nsiá: “Nú ni cúndóò nsihùhù tiempu sàhaha ni cuí, dandu mà cáhni-nsí nèhivì cáhàn cuenta xi Dios nacua ni quida xii-ndà”.

³¹ Pues cunaha-nsiá, sàhà palabra jaàn claru cachí-nsiá ñà-mii-nsiá nduú-nsiá meru descendencia xi nècuàchì ni casahni xi nèhivì xi-yá sàhaha.

³² Ñàyùcàndùá, nú yohòtéhè-nsiá nduú nècuàchì mà, dandu mà úhi quida stná-nsiá divi nacua ni quida mii-né.

³³ ¡Mii-nsiá, nahi anima cóò nduú anima-nsiá, nacua xii-nsiá sàhaha ma, te ducán stná mii-nsiá vichì! Cóò ni-iyuhu modo nansa càcu-nsia núù andea, vachi icúmi-nsiá ndoho-nsia.

³⁴ Sàháyùcàndùá, icúmi techuín nèhivì cáhàn xi-nsiá, divi nècuàchì profeta, xi stná nècuàchì nchichí, xi cuahà stná maestru. Doco ináhí mii-nsiá, ñà-icúmi-nsiá quida quini-nsia xi-né. Dava-ne cahni-nsiá; te dava-ne chituu-nsia nchica cruz, te dava ga-nè cahni cuií-nsiá ini veheñùhu xi-nsia, te dava ga-nè taxi-nsiá ñuu te ñuu.

³⁵ Ñàyùcàndùá, fuerza icúmi mii-nsiá nacuida-nsia cuàchì sàhà nsidanicuú nècuàchì vaha sàni sahnì nèhivì ñuhivì yohó. Dihna Abel ni xihì núù nsidaa gá nècuàchì vaha, dandu iin-ni vaxi-nda duha dècuèndè ni xihì stná dèhe Berequías nani Zacarías, vachi divi (nèhivì nihnú ini-xi nahi) mii-nsiá ni sahnì xi nècuàchì mà na iin-né mahi veheñùhu cahnú xi mesa ì ndé sahmí-né ñà-càmáni-ndà Dios.

³⁶ Ñàyùcàndùá, yùhù cachí xi nsidaa mii-nsiá nèhivì tiempu vichì, fuerza icúmi-nsiá cunsida-nsia cuàchì sàhà nsidanicuú nsii ma.

Nansa ni sacu Jesús sàhà nèhivì ñuu Jerusalén

³⁷ ¡Ndahví mii-nsiá nècuàchì ñuu Jerusalén! vachi tùha-nsia cahni-nsiá nècuàchì cáhàn cuenta xi Dios, vachi na techuín-yánè sàà-nè núù-nsiá, dandu caniyúú-nsiànè ñà-cui-nè. Na cuahà guá xichì ni cuní danatáqui mii-nsiá nú, na ian danatáca siùn plù xi-si ñà-nàcùñuhu quisi mà tixi ndixin-si; doco cóò, cóni cuní-nsiá.

³⁸ Ñàyùcàndùá, icúmi lugar xi-nsia yohó ndòò nihnia.

³⁹ Te cachí stná xi-nsiá, mà cuní gá-nsiá yùhù ndé cachì sàà quivì cachì-nsiá xí: “Ndiaha gá mii-ní, vachi divi ana vaxi cuenta xi Stoho-ndà Señor nduu-ní”.

24

Ñà-ndúá ni cachitnùhu Jesús icúmi cuu xi veheñùhu cahnú nisa ía ñuu Jerusalén tiempu yucán

¹ Daaní, ni quee Jesús veheñùhu cahnu-ma cuahàn-yá. Te ni catnàtuu nècuàchì dacuahá-yá núù-yá, cuní-nè dacuní-nèyà nansa ndáa vehe nahnú ndoo yatni yucán.

² Doco ni cachì-yá xi-né:

—¿A xini-nsiá nsidaa vehe yohó? Yùhù cachì xì-nsiá, vâxi iin quivì, dandu mà códotnahá gá ni-iin yùù yohó. Vâchi icúmíâ caà nsihá quida nèhivì.

Nà-nduá icúmí cuu ñà-cundaà ini-ndà sà-itúú xinu tiempu yohó

³ Daaní, cuàhàn cuaán-yá xì-né ndè yucù Olivo, te ni catnâtuu nècuàchì dacuahá-yá, cachì-nè xì-yá:

—Cachì-ní xì-nsí ¿indù quivì cuu nsidaa ñà-nì cachì-ní jaàn? ¿Indù milagru coo ñà-cundaà ini-nsi ñà-sà-itúú naxicocuíñ-ní, te xinu tiempu yohó?

⁴ Dandu ni cachì-yà xì-né:

—Cuidadu cundoo-nsia ñà-màsà dándáhvì ni-iin nèhivì mii-nsiá.

⁵ Vâchi cuàhà ana icúmí quixi dananí uun-tè nduú-te yùhù, te cachì iin iin-tè xì nèhivì ñà-Cristu nduú-te. Te sàhájân cuàhà nèhivì nihì-tè dandahví-te.

⁶ Daaní, icúmí cunitnùhu stná-nsiá iá cuàhà guerra yohó te yucán. Doco màsà yúhî-nsiá, vâchi fuerza icúmí coo ducán. Doco tãñáha ga sàà xinu tiempu yohó cundamà: iá gá ñà-vâxi cuu.

⁷ Vâchi ñuu xì ñuu icúmíâ náà stnahá. Te cuàhà rey icúmí-tè dandacú-te ñà-coo guerra xì inga ñuu. Te icúmí coo stná tnama, te caca cuàhà stná cuèhè dana. Te yohó te yucán ñuhivì icúmí tnàa stná.

⁸ Doco ñà-jaàn làcà cuàhàn quesaha tnùndoho nduá.

⁹ 'Daaní, tiempu yucán icúmí nèhivì tñii-ne mii-nsiá, te quida quini-ne xì-nsiá. Te dava-nsia icúmí-nè cahñì-né. Vâchi sàhà yùhù icúmí nsidaa nèhivì cuni ùhì-nè mii-nsiá.

¹⁰ Te cuàhà-né cuàhàn stná-né nacuaà-né Dios. Ni mà cuifúhú gá stná-né ñanitnaha-ne; mà ùhì cahin-nè ñanitnaha-ne nùù tè-xídandacú.

¹¹ Daaní, icúmí ndecoyo cuàhà stná tètñùhù. Cuenta xi Dios cãhàn-te, cachì-te, te mà ùhì nihì-tè dandahví-te cuàhà nèhivì.

¹² Te ñà-cuàhà guá cuàchi icúmí coo ñuhivì, ñâyùcandùá mà cúú stnahá gá ini nèhivì sàhà-né.

¹³ Doco nèhivì iin-ni cuniñnu vâha inì-xi dècuèndè xinu tiempu, icúmí-nè càcu-ne.

¹⁴ Te tiempu ma icúmí cuitiá stná razón ndiaha sàhà ñuhivì ìì xì Dios; inicutu ñuhivì icúmíâ cuitiá, te cunitnùhu nèhivì ndoó nsidaa ñuu. Dandísá, ñà-sàni sàà quivì xinu tiempu yohó cundua.

¹⁵ 'Sànaha ni cachitnùhu Daniel iin palabra xi Dios sàhà nansa icúmí coo iin figura dana có-xiñùhù dahuun-ya. Cunaha-nsiá, quivì cuni-nsiá sàni sàcuíñ figura mà ini lugar chicá ìì, (dandu seña cundua). Te vichi xiñuhu cundaà ini nsidaa ana càhvi-xì tutu yohó.

¹⁶ Te na sàà quivì yucán, dandu ni cunúdhèhé nsidaa nèhivì ndoó ladu Judea yohó, te cùhùn-nè yucù.

¹⁷ Te nú ndoó nèhivì quetátú ònivèhé-xi, dandu yàchì ni nuú-né, te cunudèhé stná-nè; doco màsà (nãnsihvi-ne) vehe nsiquihin-ne ñà-nduá icúmí-né. Còò.

¹⁸ Te nú ndoó-né nùù itú, dandu màsà nándúcú-né ni cotón-né.

¹⁹ Te ñndahví stná nècuàchì ñahà cuhì cuàhàn tũnuù mée-xi quivì yucán! Te ñndahví stná nècuàchì icúmí xì mée chichi!

²⁰ Te càcàn tãhvi stná-nsiá nùù Dios ñà-màsà cùvixin tiempu cunudèhé-nsiá mà, te màsà cùndúú stná iin quivì descansu.

²¹ Vâchi quivì yucán yáha ga icúmí nèhivì ndoho-ne. Còò gá tnùndoho chicá cahñú ni ía ndè quivì ni cuyucun ñuhivì xì ndé' quivì coamà; te ni quivì después, mà sàà coo ga tnùndoho nudava xi ñà-jaàn.

²² Te nú màsà cùndèhe ndahví Dios, te dacúxíó yàchì-yà tnùndoho ma, dandu ndutu nsihì nèhivì ñuhivì ni cùí. Doco sàhà nèhivì xì-yá sàni nacàxin-ya, ñâyùcandùá chicá yàchì icúmí-yá dacúxíó-yá tnùndoho ma.

²³ Quivì yucán màsà cùnindísá-nsiá yuhù nèhivì cachì xì-nsiá: "Cundehè-nsiá, yohó iá ana nduú Cristu", te ò nú cachì-nè: "Cundehè-nsiá, yucán iá-yà".

²⁴ Vâchi icúmí quixi cuàhà tètñùhù, te iin iin-tè cachì-te ñà-divi Cristu nduú-te. Te tiempu-mà quixi stná cuàhà ana dananí uun cãhàn cuenta xi Dios. Ndè quida stná-te cuàhà milagru fuerte ñà-ndulocó nèhivì, àma nihì-te dandahví-te nèhivì ni nacàxin-ya cahan-té; doco mà cùí.

²⁵ Cunaha-nsiá, sàni cachitnùhì xì-nsiá nsidaa ñà-nduá icúmí cuu.

²⁶ Ñâyùcandùá, nú cachì nèhivì xì-nsiá: "Yucán iá-yà yucù", màsà cùhùn-nsiá yucán. Te ò nú ni cachì stná-nè: "Ini vehe yohó iá-yà", màsà cùnindísá-nsiá.

²⁷ Vâchi na ian tása, te xini nèhivì natnúù fuerte ndè iin ladu ansivì xi ndé' inga laduá, ducán icúmí (natú vate) stná yùhù ana nduú Tnaha Nèhivì Ñuhivì quivì naxicocuíñ.

²⁸ (Doco nèhivì malu, ducán icúmí cuu xi-né nahi dichu cachì: "Ndé indúhu ñà-nduá ni xihì, yucán icúmí nataca stná longo".

Nansa icúmi coo quìvi naxicocufìn Jesús

²⁹ Nú sàni yàha tiempu tnùndoho ma, dandu mà cùnchíi gá ni orá ni yoo. Te sinsívi itándiaa ansívi, icúmi-sí còyo nìhni-sì nùù ñuhívi. Te sitnúù nahnú, icúmi stná-si ndacúchí ndee-sí.

³⁰ Dandu después icúmi natùì seña ansívi (ñà-cundaà ini-nsià sà-íá naxicocufìn) yùhù ana nduú Tnaha Nèhivi Ñuhívi. Dandu nèhivi nsidaa ñuu, icúmi-nè cuacu-ne na cundehè-nè mànuì mahì vicò xì poder cahnú xí, te ndiaha gá coo inicutu ndé mànuì.

³¹ Dandu icúmi sivi stná corneta, te techuín ángel xì cùhùn-nè inicutu ñuhívi ñà-danátácá-nè ana nduú nèhivi sàni nacàxin, mate lugar chicá xica ñuhívi ni cùndóó-né.

³² Vichí cuàhìn nacani iin ejemplu sàhà nù-hígu sàhà-ñá cundaà ini-nsià. Nú sàni ndunsidi-nú, te nì quesaha naná ditù yuté-nu, dandu ñà-yùcàn cùndàà ini-ndà sà-itúú tiempu ihni.

³³ Te divi ducání stná xì ñà-nduá icúmi cuu; quìvi cuni-nsià cuú ñà-nduá sàni cachi xì-nsià, dandu vátùni cundaà stná ini-nsià ñà-sà-itúú tiempu naxicocufìn nduá; sà-itúú nihni.

³⁴ Cunaha-nsià, mà sàà cui nsihi nèhivi itiácu vichí dècuèndè cachi sàni cuu ndisa nsidaa ñà-nduá sàni cachi xì-nsià.

³⁵ Cunaha-nsià, icúmi sàà ansívi xì ñuhívi ndañuhá, doco palabra nì cachi yùhù, còó, mà nunca sàà ndañuhá.

³⁶⁻³⁷ 'Doco nì quìvi, te ni hora naxicocufìn, ni-iin nèhivi có-ínahá-nè. Ni ángel ndoó ansívi, có-ínahá stná-nè; nì yùhù ana nduú Dèhemani Dios, có-ínahá stnâ, cuisì Yuamání Dios ináhá. Vàchi nacua nì cuu tiempu xì Noé, ducán icúmi cuu stná na sàà meru quìvi naxicocufìn yùhù ana nduú Tnaha Nèhivi Ñuhívi.

³⁸ Vàchi na táñàha ga cuun dàvi dàhvi ñuhívi, dandu (ndoó cuéyàà nèhivi ñuhívi), xixí-né, xihí-né, nándàhà-nè; te ducán nisa quida-ne dècuèndè nì sàà quìvi nì quìhvi Noé ini barcu cahnú.

³⁹ Te nì cóni sàà mànhìi tnùnì ini nèhivi mà dècuèndè nì quixi dàvi, te nì càhà nsihi-ne. Te divi ducán icúmi coo stná tiempu naxicocufìn yùhù.

⁴⁰ Ndé ndoó ùi nèhivi nùù itú, icúmi iin-ne cuxio-ne, te iin-ne ndòo.

⁴¹ Te ndé ndoó ùi nècuàchì ñahà cutnàhá nchicó, iin-ne cuxio, te inga-nè ndòo.

⁴² Ñàyùcànduá, cundoo tùha-nsià, vachi có-ínahá-nsià índu quìvi icúmi naxicocufìn yùhù ana nduú Stoho-nsià Señor.

⁴³ Doco nsinuu ini-nsià nansa quidá iin stoho vehe: nú sàni xinitnùhu-ne índu hora quixi tècuìhñà ñuú, dandu cundiatu tùha-ne; mà cuáha-ne quìhvi-tè nì cùì.

⁴⁴ Ñàyùcànduá, stná mi-nsià, nicanicuahàn cundoo tùha-nsià, vachi iin quìvi có-nìhnú ini-nsià, divi quìvi jaàn icúmi naxicocufìn.

Ejemplu sàhà peón xíndiaa xì vehe lamú cuàhàn xicà

⁴⁵ '¿Ana tuxí ini-nsià nduú nahi peón nùù ejemplu yohó? Nì ia iin peón tùha quida vii; nicanicuahàn quidá sahnú-te. Ñàyùcànduá, nì nihí-té chuun nùù lamú xi-tè ñà-dandacú-te nùù peón dava ga, te dasàn stná-te ñà-cutiacu nsidaa gá peón mà quìvi xihíuhá. Dandu cuàhàn xicà lamú mà.

⁴⁶ Pues nansicáhàn peón dandacu-ma nú iin-ni nì quidá ví-té dècuèndè nsiaa lamú xi-tè.

⁴⁷ Vachi cunaha-nsià, icúmi nècuàchì mà cuàha-nète chuun chicá ndiaa ñà-dandacú-te sàhà nsidanicuú ñà-cuicà-né.

⁴⁸ Doco nú peón malu nduú-te, dandu quesaha-té nacání chicuéhè ini-te, te cachi-te: "Còó, cucueè-va lamú xi, dandu nsiaa-nè".

⁴⁹ Dandu quesaha-té cahnì cuií-te peón dava ga mà, te cuisì-ní ñà-cuxi-tè, coho-tè, xini-tè cuni-te.

⁵⁰ Pues nú ducán nì quidá-te, dandu iin quìvi có-nìhnú ini-te nsiaa lamú.

⁵¹ Dandu nihí-té iin castigu cahnú sàstnùhù, te sàhámà cuacu ndee-té, te càna fuerte nùhu-tè, vachi ducán icúmi ndoho nsidaa nèhivi dananí úun vaha ini-xi.

25

Ejemplu sàhà ùxìn ñahà cuàchì nduú nahi madrina

¹ Ducán íá ley xì ñuhívi ù xì Dios na ian nì cuu xì ùxìn ñahà cuàchì cuàhàn ndé cundiatuà quesaa noviu (xì novia), te iin iàn nihá lámpara xi-ñà.

²⁻⁴ Ùhùn-ña, listu-ña, nihí-ña siquìi ndutè xixìn cuàhàn xì lámpara. Doco inga ùhùn-ña, cóni nácání inia, ñàyùcànduá còò ndúte xixìn nìsá nihí-ña cùhùn.

⁵ Daaní, sàhà-ñá nì cueue guá ana nándàhà, ñàyùcànduá nì tniì vahná nsi-ùxìn-ña nì quidá.

⁶ Te nahi dava ñuù, dandu nì tiacu ndáhi iin nèhivi, cachi-nè: "¡Cunaha-nsià, sàmàndixi noviu! ¡Naha-nsià casàhù-nsià xi-né!"

7 Ñâyücändüá, nì ndacuìta nsidaa ñahà cuàchì mà nì nacuicùn-ñá lámpara xi-ñà.

8 Dandu ñahà cuàchì mà-túha nacani inì-xi, nì cachà xi ñahà cuàchì listu mà: “Taxi toó sacu-nsiá chii ndutè xixìn xi-nsia nùù-nsí, vàchi meru cuàhàn ndàhvà lámpara xi-nsi”.

9 Doco nì cachi compañeru-ña ma: “Còó, vàchi vihini mà sàá-té sàhà nsidaa-nda; chicá vaha cuahàn-nsiá cuiin-nsiàte ndé cùyàhvi-tè, dandu cucumi-nsiàte”.

10 (Ñâyücändüá, cuàhàn-ña cuiin-ñà.) Te na sáni yàha-ñà cuàhàn-ña, dandu nì nsiaa noviu, te nì cayàha nècuàchi ndiatu-ma ndé iá vicò, te nì nandiadi yehè.

11 Daaní, después nì nsiaa tu ùhùn ñahà cuàchì nì sàhàn mà, te nì càhàn-ña yehè, cachí-ña: “¡Señor! ¡Señor! ¡Nacuna sacù-ní yehè!”

12 Doco nì naxiconihí nècuàchi nduú noviu mà, cachí-nè: “Yùhù, de plano, có-ínahí ana nduú-nsiá”.

13 (Ducán nì cuu xi ñahà cuàchì mà. Ñâyücändüá cachí stnái xì mii-nsiá:) nì cúnihnú vaha inì-nsiá, vàchi có-ínahá-nsiá índu quivì, te nì índu hora naxicocuñ yuhù ana nduú Tnaha Nèhivi Ñuhiví.

Ejemplu sàhà lamú nì dasàn tòó xi dihùn nùù peón-xi, áma ñihí-té nsida cuahà-téá

14 “Ducán iá stná ley xi ñuhiví ì xí Dios nacua nì quida iin lamú na cuàhàn-nè quee-ne cùhùn-nè inga ñuu; nì cana-ne nsidaa peón xi-ne, te nì dasàn tòó-né ñà-cuicà-né nùù-té.

15 Iin-tè nì ñihí ùhùn mil dihùn plata; ingà-te nì ñihí ù mil, te inga stná-te nì ñihí iin mil-ni, segùn nansa tiacu inì iin-tè, ducán nì ñihí-té. Dandu nì quihin lamú mà ichi cuàhàn-nè.

16 “Daaní, peón nì ñihí ùhùn mil mà, nì quesaha-té nì quida-tè negociu xì dihùn mà, te nì ñihí-té nì nandua inga ùhùn mil.

17 Te ducán nì quida stná peón nì ñihí ù mil, nì sàà nì nàcùnduu stná inga ù mil.

18 Doco tè-nì ñihí iin mil-ni, nì sate-tè fixi ñuhù, te nì sùxin-téá.

19 Daaní, na sáni yàha caní tiempu, dandu nì nsiaa lamú mà, te nì natnii-ne cuenta ñà-cundaà inì-nè nansa nì quida iin iin peón xi-ne.

20 Te nì tnàtuu peón nì ñihí ùhùn mil, nì nacuàha-tènéá xì stná inga ùhùn mil, te nì cachí-te: “Señor, ùhùn mil nì nacoo-ní nùù, te vichi yohó iá gà stná inga ùhùn mil nì quide ganar”.

21 Ñâyücändüá, nì cachi lamú mà xì peón mà: “Vàtùni nì quida-ní. Peón vaha nduu-ní. Sàni quida vii-ní mate chuun cuatilúhá nì sandua. Ñâyücändüá, icúmí cuàhi mii-ní ñà-dandacu-ní nùù cuàhà chuun nahnú. Yàha-ní yohó, cundoo-nda cudì inì-ndà”.

22 “Daaní, nì tnàtuu peón nì ñihí ù mil, te nì nacuàha-tènéá xì stná inga ù mil, te nì cachí-te: “Señor, ù mil nì nacoo-ní nùù, doco cunaha-ní, yohó iá gà stná inga ù mil nì quide ganar”.

23 Dandu nì cachi lamú mà: “Vàtùni nì quida stná mii-ní. Peón vaha nduú stná-ní. Sàni quida vii-ní mate chuun cuatilúhá nì sandua. Ñâyücändüá, icúmí cuàhi mii-ní ñà-dandacu-ní nùù cuàhà chuun nahnú. Yàha-ní yohó, cundoo-nda cudì inì-ndà”.

24 “Dandu nì tnàtuu stná peón nì ñihí iin mil-ni ma, te nì cachí-te xi lamú mà: “Yùhù inahí mii-ní ñà-dana gà-ní; mà ùhi quihin-ní cosecha ndé có-xitù-ní, te mà ùhi quindiaa-ní iñaha mate cóni quidà-ñià.

25 Ñâyücändüá, nì yùhí, te nì sùxin dihùn xí-ní tixi ñuhù. Yohó iá; naquihin-ñià”.

26 Dandu nì cachi lamú mà xi-tè: “¡Peón malu nduu-yó! ¡Dusan-yó! Nù sà-ínahú ñà-quindiaí cosecha ndé có-xitùí, te xidándiaí iñaha ndé có-quidáchuín,

27 pues, nù ducán, dandu ndiá icò cuàhu nècuàchi bancu dihùn xí, dandu quivì nsiai vàtùni ñihí stnái diquíá nì cùí”, nì cachi lamú mà.

28 Dandu (nì càhàn stná-nè) xì peón itá yucán, cachí-nè: “Quindiaa-nsiá mil dihùn jaàn nùù tè-yohó, te cuàha-nsia nècuàchi sà-icúmí ùxin mil.

29 Vàchi nècuàchi sà-icúmí algu vichi, icúmí-nè ñihí gà-nè más, dandu vihi gà cucumi-né; doco ana có-icúmí vichi, icúmí cuxio nsihi nsidaa iyuhu gà ñà-icúmí-nè.

30 Cunaha-nsiá, còó chuun peón yohó. Ñâyücändüá, dandiachi-nsiàte fuera ndé iin tnúú ndúchí, te yucán icúmí-tè cuacu ndee-té, te càna fuerte stná nùhu-tè”.

Nansa coo juiciu xi nsidaa ñuu ñuhiví

31 “Ndiaha gà coo quivì naxicocuñ yuhù ana nduú Tnaha Nèhivi Ñuhiví. Quivì naxicocuñ icúmí cutnahá stnái xì nsidaa ángel ì xí quixí. Dandu nàcò nùù silla ndiaha xí (ndé cúsáhnúí),

32 te (cani) nèhivi nsidanicuú ñuu ñà-nataca-nè nùù. Dandu icúmí tavà cuáin nèhivi (vaha nùù nèhivi malu) na quidá pastor na nácàxin-ne quisi xí-né, iladu ndoó rií, te inga ladu ndoó simbee.

33 Ladu cuahí icúmí màcuìta (nèhivi vaha na ian nduú-né) rií, te ladu itní icúmí màcuìta (nèhivi malu na ian nduú-né) simbee.

³⁴ Dandu (yùhù) ana cusáhnù, icúmí cachi xì nêhivì ladu cuahí: “Naha-nsià, cundoo-nsia ñuhivì ìi xì Yuamáni, vâchi dècuèndè tiempu nì cuyucun ñuhivì sàni chitnùni ini-yà cundiatú anima-nsià ducán.

³⁵ Vâchi na ní xihì gué' doco, nì dàcùxi-nsiá yùhù; te na ní xihì stnâi tēcui, nì dàcútâhvi-nsiá yùhù chii-té. Daaní, na ní xicanuu ndahví stnâi, dandu nì dáyâha-nsia yùhù vehe-nsia.

³⁶ Còò dúhnù, doco nì taxi-nsia ñà-nì sàcùndixi. Nì cuhi stnâi, te nì nàcòtò-nsia yùhù. Te na ní sandiadi vehecàa, nì sàà stnâ-nsià visita yucán”.

³⁷ Dandu nsidaa nêhivì vâha yucán, icúmí-nê cachi-nê xí: “Stoho-nsi Señor, (cóni cundàa ini-nsi nì chindee-nsi mii-ní ducán). ¿Índù nì xini-nsi mii-ní ñà-xíhi-ní doco, te nì dàcùxi-nsi mii-ní, te ò xihì-ní tēcui, te nì taxi-nsi tēcui nì xihì-ní?

³⁸ ¿Índù nì xini-nsi xicánúu ndahví-ní, te nì dáyâha-nsi mii-ní vehe? Ni-iin xichi cóni xini-nsi ñà-còò dúhnù-ní, te nì sâha-nsi mii-ní ñà-nì sàcùndixi-ní.

³⁹ Nì có-ináhâ stnâ-nsi nì cuhi-ní, ò ní sandiadi-ní, te nì sàà-nsi visita ndé iá-ní”.

⁴⁰ Dandu yùhù ana cusáhnù, icúmí cachi xì nêcuàchimâ: “Cunaha-nsiá, nahi ñani xinduu nêhivì itá yohó. Ñâyücândüâ na cada nì quida-nsia favor sâhâ iin-ne, mate nduú-né iin ana chicâ cahíchì ini nêhivì, doco davani queámâ na ian nì quida stnâ-nsiâ favor xì yùhù”.

⁴¹ Daaní icúmí cãhàn stnâi xì nêhivì itá ladu itnî, te cachi xì-né: “¿Cuxio-nsia nù! Còò cá nansa càcu-nsia. Cuahán-nsiâ ndé iá ñuhu xixìn nicanicuahàn, divi lugar nì quidayucun Dios ñà-coo ñà-malu xì nsidaa ángel (malu) xi-si.

⁴² Vâchi yùhù, na ní xihì doco, nì xidahan-nsiâ ñà-cuxi. Nì xihì stnâi tēcui, te ni-iyuhu-té cóni sâha-nsia yùhù cohi.

⁴³ Xicánúu ndahví stnâi, doco cóni dáyâha-nsia yùhù vehe-nsia; còò dúhnù, doco còò ni-iin sicoto nì sâha-nsia yùhù. Nì cuhi vâhi, te nì sandiadi stnâi, doco cóni sââ-nsiâ nàcòtò-nsia yùhù”.

⁴⁴ Dandu nêhivì mà, icúmí-nê cachi-nê xí: “Señor, mà nunca nì xini-nsi mii-ní na xihì-ní doco, ò xihì-ní tēcui, ò xicánúu ndahví-ní, ò còò sicoto vâha xi-ní, ò cùhî-ní, ò ndiâdi-ní. ¿Índù nì xini-ní nsùhù nì xidahan-nsi nsidaamâ nù-ní?”

⁴⁵ Dandu yùhù, icúmí cachi xi-né: “Cunaha-nsiâ, ñà-cóni chíndéé-nsiâ nêhivì ndahví yohó, ñâyücândüâ davani queámâ na ian sâni cahíchì stnâ ini-nsia yùhù”. (Ñà-jaàn nduâ icúmí cachi xì nêcuàchì malu mà.)

⁴⁶ Ñâyücândüâ icúmí nsidaa-né yâha-ne ndé ndoho-ne nicanicuahàn. Doco nêhivì vâha, còò. Vida ndiaha nicanicuahàn icúmí-nê ñihitâhvi-né —nì cachi Jesús.

26

Nansa nì ndatnuhu tnahâ nêhivì, nandúcú-nê nansa tnii-ne Jesús

¹ Daaní, nì nsihì nì nacani Jesús nsidaa ñà-jaàn xì nêcuàchì dacuahá-yâ, dandu nì cachi-yâ xi-né:

² —Sâ-ináhâ-nsiâ ñà-tixi ùi quivì icúmí nacava vicò pascua, dandu yùhù ana nduú Tnahâ Nêhivì Ñuhivì, icúmí yâhi ndahâ nêhivì, te cahni-né yùhù nchica cruz.

³ Daaní, nì nataca dùtù xícusahnù, xì nêcuàchì ley xi veheñùhu, xì stnâ nêcuàchì sahnù dandacú ñuu yucán, nì sàà nsidaa-né patiu vehe cahnú dùtù chicâ cusáhnù nani Caifás.

⁴ Te nì ndatnuhu tnahâ-né nansa tnii dèhé-nê Jesús, te cahni-néyâ.

⁵ Te nì cachi stnâ-nê:

—Chicâ vâha màdi mahì vicò tnii-nda nêcuàchimâ, vâchi nú ducán, dandu vihini nacuidâ nêhivì.

Nansa nì sòdò iin nêcuàchì ñahâ ndutè tnâmi itnu ñini Jesús

⁶ Iá-yâ vehe iin nêcuàchì ñuu Betania nani Simón. Nêcuàchimâ nduú iin nêhivì nì sandoho cuèhè lepra antes.

⁷ Te yucán nì sàà stnâ iin nêcuàchì ñahâ, ñihí-né iin quidi iá dùcùn-xí. Yùù nì cuyucán, te ñuhu ndutè tnâmi ndiaâ sâstnùhù. Te divi ndutè mà nì sòdò-nê itnu ñini Jesús na iá-yâ xixi-yâ.

⁸ Doco na ní xini nêcuàchì dacuahá-yâ, nì cuduchi ini-nê, cachi-nê (iin-ne xì inga-nê):

—¿Índù chuun nì sate uun-ne ndutè jaàn?

⁹ Chicâ vâha dicò-néte ni cuí, dandu tùi cuahâ ñihùn dasàn-ndâ nù nêcuàchì ndahví.

¹⁰ Doco Jesús, ináhâ-yâ nansa cachi-nê, ñâyücândüâ nì cachi-yâ xi-né:

—¿Índù chuun cãnhâ-nsiâ xì nêcuàchì jaàn? Vâchi iin ñà-vâha nduâ quidâ-né xí.

¹¹ Vâchi nêcuàchì ndahví, nicanicuahàn ndoó-né xi-nsiâ; doco yùhù, còò, sacù-ni quivì ié' xi-nsiâ.

¹² Cunaha-nsiâ, ñà-nì sòdò nêcuàchì yohó ndutè tnâmi ñini, divi sâhâ-ñâ cutatna cuerpu yùhù na ndúxan nduâ.

¹³ Te ñà-ndáa nduá yohó cachítñuhi xì-nsiá: nsidanicuú ñuu ndé icúmí sàà razón ndiaha xí Dios inicutu ñuhiví, yucán icúmí sàà stná palabra sàhà ñà-vàha nì quida nècuàchì ñahà yohó, te ducán mà nunca sàà nèhiví ñuhiví nandòdò-né nècuàchì mà.

Nansa nì saquin Judas compromisu cahin-nè Jesús nuù nècuàchì xidandacú

¹⁴ Nuù ùxin ùì compañeru Jesús, iin-ne nani Judas Iscariote. Pues divi nècuàchì mà nì sàhàn nuù dùtù xicusahnú,

¹⁵ te nì cachi-nè xì nècuàchì mà:

—¿Nadaa cuàha-nsia yùhù, te quide Jesús entregar nuù-nsiá?

Dandu nì sàha dùtù mà-né òcò ùxin dihùn plata.

¹⁶ Ñàyùcànduá, dècuèndè quivi yucán nì quesaha Judas mà nandùcú-né índu tiempu chicá mà úhi dayàha-ne Jesús nuù ndahà nècuàchì mà.

Nansa nì cutnahá Jesús xi compañeru-yà nì xixi-ya Cena ìì

¹⁷ Daaní, nì sàà tu quivi primeru xi vicò xixí-né pan có-ndutáchí. Te nì tnàtuu nèhiví dacuahá-yà nuù-yá, cachi-nè:

—¿Índu divi cuní-ní cùhùn-nsi quidayucun-nsi ñà-cuxi-nda comida vicò pascua?

¹⁸ Te nì cachi-yà xì-né:

—Cuahán-nsià ìni ñuu ndè vehe iin tal nèhiví, te cachi-nsià xì-né ñà-càchì maestru sà-ìtúu meru quivi xí-yá, ñàyùcànduá vehe mii-ní icúmí-yá chivàha-yà vicò pascua, mii-yá xì nsidaa nècuàchì dacuahá-yá. Ducán cachi-nsià xì-né —nì cachi Jesús.

¹⁹ Ñàyùcànduá, ducán nì quida nècuàchì dacuahá-yà nacua nì sàcùnaha-né nuù-yá, nì nsidayucun-nè comida pascua.

²⁰⁻²¹ Daaní, na ní cuaa, dandu (nì sàà stná) mii-yá yucán, te nì sàcòo-ya nuù mesa xì nsi-ùxin ùì nècuàchì dacuahá-yá. Te na iá-yá xixí-yá, dandu nì cachi-yà (xì-né):

—Cunaha-nsiá, iá iin-nsia cuahàn cahin xì.

²² Dandu nsidaa nècuàchì mà, nì nàcùndoo-ne tnùnsí ìni, te nì cachi iin iin-ne xì-yá:

—¿A víhíní yùhù, Señor mío?

²³ Te nì cachi-yà xì-né:

—Ìin mii-nsià nècuàchì iin-ni xixi-xi-nda nuù còhò yohó nduú ana icúmí cahin xì.

²⁴ Vàchì ñà-ndáa nduá, icúmí cuu ndisa ñà-nduá nì cachítñuhu nuù tutu ìì ñà-icúmí cui yùhù ana nduú Tnahá Nèhiví Ñuhiví. Doco tiàa cuahàn cahin xì, ìndahví-né! Chicá vaha màsà tùinuù-né ñuhiví nì cùì —nì cachi-yà.

²⁵ Dandu nì càhàn Judas, divi tiàa cuahàn quida xì-yá entregar, te nì cachi-nè:

—Maestro, ¿a víhíní yùhù nduí?

Te nì cachi-yà xì-né:

—Ducán nduá nacua nì cachi-ní.

²⁶ Na meru xixí nsidaa-né, nì tnii-ya iin pan, te nì naquimani-yá Dios sàhà-ñá. Dandu nì dàcuàchì-yáñà, te nì dasàn-yá nuù nècuàchì dacuahá-yá yucán, te nì cachi-yá:

—Cuxi-nsia, vachì pan yohó, nahi iquicúñu yùhù nduá.

²⁷ Dandu nì tnii stná-yá pocillu, nì naquimani-yá Dios sàhà-ñá, te nì sàha-yanè, cachi-yá:

—Nsidaa-nsiá coho-nsia chichii ndutè yòhò.

²⁸ Vàchì nahi nù mí nduú-te. Te cunaha-nsiá, sàhà nì ìcúmí nacoi iin ichì sàà cunchicùn nèhiví, vachì nú sàni xitià ní, dandu sàhàjàn icúmí ndutu cuàchì cuahà-né.

²⁹ Te vichì, mà cóhò gué ndutè sì-uva yohó ndè cachi sàà coho saa-tùì-te xì-nsiá quivi cusahnú Yuamáni inicutu ñuhiví yohó.

Nansa nì cachi Jesús sà-ínahá-yá icúmí Pedro nacuaà-néyà

³⁰ Daaní, na ní nsihì nì xito nsidaa-né iin alabanza, dandu nì quee-ne cuahàn-nè xì-yá ndè yucù Olivo.

³¹ Te nì cachi-yà xì-né:

—Ñuú vichì, icúmí nsidaa-nsià nacoo nihni-nsia yùhù; vachì ducán cachi nuù tutu ìì: “Cuahàn dacuxióé pastor, dandu cuitià nihni rii”, cachá.

³² Doco nú sàni natiacu, dandu icúmí codònuì nuù-nsià nuù ndè ladu Galilea.

³³ Dandu nì cachi Pedro xì-yá:

—Mate nì sàà nsidaa nèhiví nacoo nihni-ne mii-ní, doco yùhù, còo, mà nunca.

³⁴ Dandu nì cachi-yà xì-né:

—Cunaha-ní, divi ñuú vichì icúmí-ní nacuaà-ní yùhù. Tàñàha ga coto lehe sinduhá, te sàni nacuaà-ní yùhù ùni xichi.

³⁵ Doco nì cachi-nè xì-yá:

—Còo, mate nì cahní-nèndó, doco mà nunca sàì nacuaí mii-ní —nì cachi-nè. Te divi ducaní nì cachi gá stná nsidaa nècuàchì dacuahá-yá.

Nansa ni sàà Jesús huerta nani Getsemaní, te ni xicàn tàhvi-yá nùu Yuamáni-yá

³⁶ Dandu ni sàà-yá xi-né ndé iin xaan nani Getsemaní. Te ni cachi-yá xi-né:
—Yohó ndòo-nsia, vâchi yùhù cuahìn chicá nùu-xí càcàn tàhvi nùu Dios.

³⁷ Dandu ni saca-ya Pedro xi ùi ñàní dèhe Zebedeo, cuahàn-yá xi-né. Te ni nàcòo cuahà-yá tnùnsí ini; ni quesaha-yá yáha ga nacání cuahà ini-yá.

³⁸ Dandu ni cachi-yá xi-né:

—Yáha ga ié' tnùnsí ini, na ian cuniá cahni dáhúán yùhù. Ñâyúcàndúá, yohó ni ndòo-nsia, te cunchito tûha-nsia.

³⁹ Dandu cuahàn-yá chicá nùu-xí, ni sàcùnduhù ndéé-yá, te ni xicàn tàhvi-yá nùu Yuamáni-yá, cachi-yá:

—Yuamáni', xicàn tàhvi nùu-ní, áma dácúxió-ní (tnùndoho icúmí yáhi), vâchi nahi (ñà-úa ñuhú iin) taza nduá nùí. Doco màdi ñà-nduá cuni yùhù ni cùndúá; cóó, ñà-nduá cuni mii-ní.

⁴⁰ Dandu ni naxicocuñin-yá vâxi-ya ndé ni ndòo nècuàchi dacuahá-yá, te ni xini-yá sàquidi-nè. Ñâyúcàndúá, ni cachi-yá xi Pedro:

—¿Áma cúí cunchito stná-nsiá xi yùhù siquiera iin hora-ní?

⁴¹ Cundoo tûha-nsia, te càcàn tàhvi-nsiá nùu Dios sàhà màsà dándáhví ñà-malu mii-nsiá, vâchi mate iá voluntad xi-nsia, doco iyuhu gá valor icúmí cuerpu-nsiá ñà-quadandee ini-nsia.

⁴² Daaní, tucu tu cuahàn-yá càcàn tàhvi-yá nùu Dios, te ni cachi-yá:

—Yuamáni', nú icúmí yáhi tnùndoho fuerte, te mà cúí cuxioa, dandu ducanicoó nacua cuni mii-ní.

⁴³ Dandu vâxi tu-ya (ndé ndoó nècuàchimà), te ni xini-yá tucu tu quídi-nè, vâchi sádi vàhná-nè.

⁴⁴ Dandu ni nacooyanè inga tu, te cuahàn-yá ñà-úni, te davani ni xicàn tàhvi-yá (nahi antes).

⁴⁵ Dandu ni naxicocuñin-yá, te ni cachi-yá xi-né:

—Cùdu cuéyàà-nsiá, te quetatu-nsiá vichi, vâchi sà-íá. Sàni sàà meru hora xi yùhù ana nduú Tnaha Nèhivi Ñuhiví, divi hora icúmí yáhi ndahà nèhivi cuáchi.

⁴⁶ Ndacuita-nsia, cùhùn-ndà, vâchi sà-ítúú quesaa ana cuahàn cahin xí'.

Nansa ni tnií-tè Jesús, te ni suhni-teyá

⁴⁷ Daaní, cáhàn ìi-yá xi nècuàchimà, te ni quesaa Judas, divi tiàa nisa cutnaha-xi ùxin iin ga nècuàchi dacuahá-yá, te ndacá stná-nè cuahà gá tiàa xinihi xi espada xi garrotí. Cuenta xi dùtù xicusahnú vâxi-tè, xi cuenta xi stná nècuàchi xidandacú nùu ñuu mà.

⁴⁸ Te sàni ndatnuhu Judas xi nsidaa ana ndacá-némà ñà-coo iin seña ana tnií-tè, divi ana chítú-nè cunduu meru ana tnií cùhùn presu.

⁴⁹ Ñâyúcàndúá, ni tnàtuu Judas ndé iin Jesús, te vichi vichi ni casàhù-nè xi-yá, cachi-nè:

—¡Cuñaávaha-ní, maestro!

Te ni chítú-nè nùu-yá.

⁵⁰ Dandu ni cachi-yá xi-né:

—Amigo, ¿indù chuun nihi-ní vâxi yohó?

Dandu ni tnàtuu tè-dava ga mà ni tnií-tèyá ni ndòo-ya ndahà-té.

⁵¹ Dandu iin nèhivi xí-yá, ni tavà-né espada xi-ne ni caní-ne iin tiàa quidáchúùn nùu dùtù cusáhnú, ni sahnde-nè iin tùtnù-té.

⁵² Doco ni cachi-yá xi-né:

—Nachinacaà-ní espada xi-ní dòá, vâchi nsidaa ana caní xi espada, divi espada icúmí-nè cui stná-nè.

⁵³ ¿A có-cùndáá ini-ní ñà-vàtùni càcàn tàhvi nùu Yuamáni', te vichi duha techuún-yá cuahà mil ángel chindee xí?

⁵⁴ Doco nú ni cáquin ducán, dandu mà cúí cuu ndisa ñà-nduá ni cachitnùhu tutu ìi ñà-dúcán icúmí cuu.

⁵⁵ Daaní, ni cachi stná-yá xi nsidaa nèhivi cuahà mà:

—A ducán nduú modo tnií-nsiá yùhù, vâxi-nsia nihi-nsiá espada xi garrotí na ian tècuilhà nduú, mate nsiquívi nisa le xi-nsiá veheñùhu cahnú dacuahí nèhivi, te cóni tnií-nsiá yùhù.

⁵⁶ Doco cunaha-nsiá, dohó quidá-nsiá vichi sàhà ñà-ni cuú ndisa ñà-nduá ni tiàa nèhivi xí Dios sàhana —ni cachi-yá.

Dandu ni nacoo nihi nsidaa nècuàchi dacuahá-yá mii-yá, ni xinudèhè-nè.

Ñà-nduá ni cachi Jesús na ní sàà-yá nùu Junta Cahnú

⁵⁷ Nèhivi ni tnií xi-yá, ndacá-néyá cuahàn nùu dùtù cusáhnú nani Caifás. Te divi vehe nècuàchimà sàni nataca stná nècuàchi ley xi veheñùhu, xi stná nècuàchi sahnú xidandacú nùu ñuu mà.

⁵⁸ Te Pedro, nchícùn xicà-níné mii-yá cuàhàn-nè. Te nì yàha stná-nè patiu iá vehe dùtù cusáhnú-má, te nì sàcò stná-nè xì policia ndoó yucán, ndiatú-né cundaà ini-nè índù fin cucumi-yá.

⁵⁹ Daaní, dùtù xícusahnú, xì nsidaa tè-xídandacú, xì nsidaa stná nècuàchi Junta Cahnú, nì nducu-né ana daquée cuàchi diqui-yá sàhà-ñá cui-yá, mate té-trnhù nduú-te.

⁶⁰ Doco còò iin nì túi (cunduu testigu nacua cuní-nè), mate cuàhà nèhivì nì càhàn trnhù diqui-yá. Doco por fin nì quixi ùi-te,

⁶¹ te nì cachi-te:

—Nì cachi Jesús yohó ñà-vàtùni dacaá-né veheñùhu xi Dios, dandu tìxi ùni quivì naquidavàha saa-néa.

⁶² Dandu nì ndacuiin dùtù cusáhnú, te nì cachi-nè xì-yá:

—¿Áma náxicónihí-nì nì-iñàha? ¿Nansa iá ñà-càchí guá nècuàchi yohó sàhà-ní?

⁶³ Doco Jesús, dadí úun nì ndòò-ya. Dandu nì cachi dùtù mà:

—Fuerza icúmí-nì chinaha-ní Dios iá nicanicuàhàn, te cachi-ní xì-nsí a díví Dèhemani-yá nani Cristu nduu-ní, ò á cóo.

⁶⁴ Dandu nì cachi Jesús xì nècuàchimà:

—Nacua nì cachi-ní, ducán nduá. Te yùhù cachi stná xì-nsiá, icúmí-nsiá cuni-nsiá yùhù ana nduú Tnaha Nèhivì Ñuhivì na nui quixi mahì vicò nahnú ansivi, te coi ladu cuahá mii-yá ana cahnú poder xi.

⁶⁵ Dandu dùtù cusáhnú-má, (nì xidà ini-nè), ñàyùcànduá nì ndata canúú-nè iyuhu sìcoto ndixí-né, te nì cachi-nè xì nèhivì cuàhà mà:

—¿Cuní nècuàchi yohó ndudava-ne xì Dios! ¿Cò-xiñùhù gá-ndà ni-iin testigu quixi! Vàchi vichi sàni inini-nsia ñà-quini guá nì càhàn-nè.

⁶⁶ ¿Nansa quida-nda xì-né, cachi mii-nsiá?

Dandu nì cacachi nècuàchi Junta Cahnú-ma:

—Icúmí nècuàchi jaàn cui-nè, vachi iá cuàchi-ne.

⁶⁷ Dandu nì caquesaha nècuàchimà nì sivi díf-nè nùù-yá, te nì cani-neyà sicátú, te dava ga-nè, cahmá uun nì cani-ne nùù-yá,

⁶⁸ cachi-nè xì-yá:

—¿Cachi cuàá-nì ana nì cani xì-ní, vachi ádi Cristu (nì quixi ansivi) nduu-ní!

Nansa nì quida Pedro nì nacuaà-né Jesús

⁶⁹ Te Pedro, patiu tühèhé iá-nè. Te yucán nì tnàtuu iin ñahà chii, cachi-ña xì-né:

—Amádi mii-ní nisa cutnahá stná-ní xì Jesús de Galilea.

⁷⁰ Doco nì nacuaà-né mii-yá, ininí nsidaa nèhivì yucán, te nì cachi-nè xì ñahà chii mà:

—Cò-ináhí ñà-nduá cachi-ní.

⁷¹ Dandu cuàhàn-nè quee-ne yehè, doco nì xini inga ñahà chii-né, te nì cachà xì nèhivì dava ga itá yucán:

—Nècuàchi jaàn nisa cutnahá stná xì Jesús de Nazaret.

⁷² Dandu tucutu nì nacuaà-néyà, nì chinaha-né Dios ñà-tàcùnì-nè Jesús, cachi-nè.

⁷³ Daaní, inga ratu gá nì tnàtuu stná iin ùi nèhivì itá yatni yucán, te nì cachi-nè xì Pedro:

—Ndisa, iin compañeru Jesús nduu-ní, vachi sàhà modo càhàn-ní, ducán cundaà ini-nsi.

⁷⁴ Dandu nì cachi Pedro xì-né:

—Yùhù chináhí Dios, có-ináhí nècuàchimà. Te nú tètñhù nduú, nì daquixí-yá castigu diquí.

Dandu momentu mà nì xito lehe.

⁷⁵ Te ñà-yùcán nì nsinuu ini-nè nansa nì cachi-yá xì-né daa ñà-tañáha ga coto lehe, te sàni nacuaà-néyà ùni xichì. Ñàyùcànduá, nì quee-ne iladu patiu, iá-nè sacú cuàhà-né.

27

Nansa nì dàyáha-ne Jesús ndahà gobernador Pilatu

¹ Daaní, na ní tuiinuú, dandu nì càhàn dùtù xícusahnú xì tè-dàndacú nùù ñuu mà, nì candatnuhu tnahá-né nansa quida-ne, te cui Jesús.

² Dandu nì nachicuhni-nè ndahà-yá, te cuàhàn-nè xì-yá nùù gobernador Poncio Pilato, te yucán nì ndòò-ya ndahá témà.

Nansa nì xihì Judas

³ Daaní, Judas, divi ana nì cahin xì-yá, nì cundaà ini-nè ñà-ndisa icúmí Jesús cui-yá. Ñàyùcànduá, nì naxicocufin ini-nè, nì sàhàn-nè nì naxiconihí-né òcò ùxin dihùn plata nùù dùtù xícusahnú, xì nùù stná nècuàchi sahnú xídandacú, cachi-nè xì nècuàchimà:

⁴—Cuàchi nduá nì quide, vachi còò falta xì nècuàchi nì dàyáhi ndahà-nsiá.

Doco nì naxiconihí nècuàchimà, cachi-nè:

—Cò-dàndòhájàn nsiùhù; chuun xi mii-ní nduá.

⁵ Ñâyücàndüá, nì ducùn Judas nsidaa dihùn mà pisu veheñùhu, te nì quee-ne nì dàcuáhnà-nè mii-né xì yohò.

⁶ Daaní, después nì dàtàcá dùtù mà dihùn mà, te nì cachi-nè:

—Cò-sàha ley xi-nda permisú daquée-nda dihùn yohó alcancía xi Dios, vâchi sàhà ñà-yòhò nì xihì iin nèhivì.

⁷ Ñâyücàndüá, nì ndatnuhu tnahá-né (nansa quida-ne xi) dihùn mà, te nì xiin-ne iin ñuhù nani Itu Alfareru ñà-cundua panteón ndé cundùxin nècuàchì inga ñuu.

⁸ Ñâyücàndüá disàhà-xì nì sàcùnani ñuhù mà Ñuhù Nîi, te dècuèndè vichi ducán cachí-nè xán.

⁹ Pues divi ducán nì cuu nsidaamá sàhà ñà-nì cùù ndisa ñà-ndüá nì cachitnùhu iin nècuàchì sàhana nani Jeremías, vâchi dohó nì tiaa-ne: “Cutu ócò ùxin dihùn plata ndiáa-yà, nì cachi nècuàchì raza Israel. Dandu después nì natnii-ne dihùn mà

¹⁰ nì xiin-ne Itu Alfareru, nacua nì cachi Stoho-ndà Señor xì”.

Nansa nì cachi Jesús na iin-yá nùù gobernador Pilatu

¹¹ Pues (hora yucán sàni sàa-yà) nùù gobernador, te iin-yá nùù-té. Dandu nì ndàcàtnùhù-té nùù-yá, cachí-te:

—¿A ndísá rey xi nècuàchì raza Judea nduu-ní, á coó?

Dandu nì cachi-yà:

—Nacua cachí-ní, divi ducán nduá.

¹² Dandu dùtù xícusahnú, xì nècuàchì xídandacú, nì cãhàn trùhù-né sàhà-yà, doco còò ni-iñàha nì cachi-yà.

¹³ Dandu nì cachi Pilatu xì-yá:

—¿A có-tiàcú-ní ñà-cuàhà guá cãhàn trùhù-né diqui-ní?

¹⁴ Doco mii-yá, còò ni-iñàha nì nàxícónihí-yá. Ñâyücàndüá, nì ndulocó gobernador mà.

Nansa nì cachi stnà Pilatu ñà-icúmi Jesús cui-yá

¹⁵ Cunaha-nsiá, cada nacavá vicò pascua mà, tùha Pilatu daña-té iin tè-ndiadi, ndéni-te nì cui ndiadi nì cãcàn nèhivì.

¹⁶ Te quivì yucán ndiadi iin tiàa iá cuàhà fama-xi nani Barrabás.

¹⁷ Ñâyücàndüá, na sáni nataca nèhivì cuàhà mà nùù Pilatu, dandu nì xicàn trùhù-té nùù-né, cachí-te:

—¿Ana cuní-nsià dàñà? ¿A divi Barrabás, te ò Jesús, ana cachí nduú Cristu?

¹⁸ Ducán nì cachí-te xi-né, vâchi sà-ínahá-té ñà-cuisi sàhà envidia xi dùtù sàni yàha Jesús ndahà-té.

¹⁹ Daaní, iá ì-té nùù silla ndé nsidándàa-te chuun, te nì quesaa iin razón xi ñahàdihí-te, cachí-né: “Màsà quidá-ní ni-iñàha xi Jesús, vâchi nècuàchì vaha nduú-né. Cunaha-ní, cuàhà gá nì sãní ñuu ndùvèhè nì quida nècuàchì mà, te nì nacani cuaa ini”, cachí razón mà.

²⁰ Doco dùtù mà xì nècuàchì xídandacú, nì chiyuhù-né nèhivì cuàhà mà ñà-nì cãcàn-né dàñà Barrabás, te cui Jesús.

²¹ Ñâyücàndüá, nì cãhàn gobernador xì nsidaa nèhivì mà, cachí-te:

—Nùù ùi nècuàchì yohó, ¿índù nècuàchì cuní-nsià dàñà?

Dandu nì cachi nèhivì mà:

—¡Divi Barrabás!

²² Dandu nì cachí-te xi-né:

—Pues, nú ducán, dandu ¿nansa quide xi Jesús, divi ana cachí nduú Cristu?

Te nì naxiconihí nsidaa-né, cachí-né:

—¡Ni cui-nè nchìca cruz!

²³ Dandu cachí gobernador mà:

—¿Índù chuun cui-nè ñà-còò falta xi-ne iá?

Doco chicá ndee ní càna nèhivì cuàhà mà, cachí-né:

—¡Ni cui-nè nchìca cruz!

²⁴ Dandu nì xini Pilatu còò ni-iñàha níhíndè-té, cuisì quesáhá nacuidà fuerte nèhivì mà. Ñâyücàndüá, nì xicàn-te tècuí, te nì ndaha-tè, indéhe nsidaa nèhivì mà, te nì cachí-te xi-né:

—Yùhù, mà cúnisidá cuàchi nú nì cui nècuàchì yohó, vâchi còò ni-iñàha inihíca-nè. Chuun xi mii-nsiá nduá.

²⁵ Dandu nì cachi nsidaa nèhivì mà:

—Nsihùhù xì dèhe-nsi nì cúnisidá cuàchi-nsi sàhà nècuàchì jaàn.

²⁶ Dandu nì dàñà Pilatu Barrabás mà nùù nèhivì mà, doco Jesús, còò; nì dàndàcù-te ñà-nì ñãhni cuii-yá, te después cùhùn-yà màcùtuu-ya nchìca cruz cui-yà.

Nansa nì sàcùndiãa soldadu Jesús

²⁷ Dandu soldadu xi gobernador mà, ni saca-tèyá cuahàn-te xi-yá vehechuún. Te ni cana-tè nsidaa compañeru-te ñà-tnàtuu-tè ndé iá-yà.

²⁸ Dandu ni tava-té sìcoto xi-ya, te ni chindixi-tèyá iin capa cuahá.

²⁹ Te ni cava stná-te iin corona iñũ ni chicaà-te ñà-yá, te ni dàcùnindáha stná-teyá iin nũ-iin ndahà cuahá-yà. Dandu ni sàcuita sisi-té nũ-yá, sàcũndiaà-teyá, cachí-te:

—¡Viva! Váchi ¡rey xi tè-raza Judea nduu-ní (vichi)!

³⁰ Te ni casivi díi-teyá. Dandu ni ditá-te nũ-iin ma ndahá-yá ni cani fuerte-te ñà-yá.

³¹ Te na ní nsihí ni sàcũndiaà-teyá ducán, dandu ni tava-té capa mà, te ni nachindixi-tèyá sìcoto xi mii-yá. Dandu ni saca-tèyá cuahàn-te chituu-tèyá nchica cruz.

Nansa ni chituu-tè Jesús nchica cruz

³² Na ní caquee-tè xi-yá ni ndacũhun tnahá-te xi iin tiàa ñuu Cirene nani Simón. Te divi nècuàchima ni catnii-tè ni dàcuidá-tené cruz xi-ya cuahàn.

³³ Dandu ni casaà-te xi-yá iin xaan nani Gólgota. Quivi jaàn cachí dàhàn yucán, Nũ Iqui Dini.

³⁴ Dandu ni cuní-te dacohó-teyá vinu ia dáca tnahá xi ñà-ùà, doco na ní tuiyáá-yañà, cóni cuní gà-yà coho-yañà.

³⁵ Daaní, ni chituu-tèyá nchica cruz. Te sìcoto xi-ya, ni dasàn-téa según nansa ni ñihí iin iin-tè na ní idàdiquí-te sàhà-ñá. Pues ducán ni quida-tè sàhà ñà-ni cùú ndisa palabra ni cachitnũhu nèhiví xí Dios sàhana na ní cachí-nè: “Ni dasàn-té sìcoto xi entre mii-té, te ni idàdiquí-te sàhà-ñá”.

³⁶ Daaní, ni sàcũndoo soldadu mà ñà-cundiaà-teyá.

³⁷ Te dìquì-xí ñà cruz xi-ya ni sàcũtuu iin ñà-càchitnũhu índũ-ñá disàhà-xí dandohó-teyá. Te dohó cachá: “Ana yohó nduu Jesús, rey xi tè-raza Judea”.

³⁸ Cunaha-nsiá, yucán ni sàcũntandiaa stná ùi tècũhnà nchica cruz, iin-tè ladu cuahá-yà, te ingà-te ladu itni-yà.

³⁹ Te nèhiví yáha yucán, ni canáhà stná-nè xi-yá, dacuico díni-né, cahíchi ini-nèyà, cachí-nè xi-yá:

⁴⁰ —¡Ndahví-ní! váchi cuahàn-ní dacaá-ní veheñũhu cahnú, te tixi ùni quivi nsidavàha saa-ñá, cachí-ní. Nú ducán fuerte guá-ní, dandu dacácu-ní mii-ní, nú ndisa Dèhemani Dios nduu-ní, te danuu-ní mii-ní nũu cruz jaàn cundehè-nsí —ni cachí-nè.

⁴¹ Te divi-ni ducán ni sàcũndiaa stná dùtũ xicusahnú, te cutnàhà stná nècuàchi ley xi veheñũhu, xi stná nècuàchi xidandacú; nsidaa-né ni sàcũndiaa stná-nè, cachí-nè iin-ne xi ingà-nè (sàhà-yá):

⁴² —Nècuàchi jaàn, nisa dacácu-ne nècuàchi dava ga, doco mà cùu dacácu-ne mii-né. Nú ndisa rey xi nècuàchi raza-ndà Israel nduu-né, dandu ni danuu-né mii-né nũu cruz jaàn cundehè-ndà, dandu cunindisa-ndané.

⁴³ Dios cundéé ñà-nè, (cachí-nè): pues nú ducán nduá, dandu ni dacácu-yanè vichi, nú cuní-yà, te nú ndisa Dèhemani-yá nduu-né nacua cachí-nè —ni cachí tè-xicusahnũ-ma.

⁴⁴ Te dècuèndè stná tècũhnà itándiaa stná nchica cruz yucán, ni canáhà stná-te xi-yá.

Nansa ni xihí Jesús ni dàndà-yá sàhà cuàchi-nda

⁴⁵ Daaní, dècuèndè càxihú xi ndé càhúni ni nàcũiin tnũu inicutu ñuu yucán.

⁴⁶ Te nahi càhúni ni ndàhi ndee-yá, cachí-yà:

—Elí, Elí, ¿lama sabactani? —te dohó cuní cachàmà: ¡Dios mío, Dios mío! ¿A ñà-sàni ndòo ñihni nduá yohó?

⁴⁷ Te dava nècuàchi itá yucán, ni tiacu-nè ndàhi-yà ducán, ñàyùcànduá ni cachí-nè:

—Elías caná-né.

⁴⁸ Ñàyùcànduá, ni dàyáa iin-tè ni quihìn-tè iin ñà-ñàhmá uun nani esponja, te ni chindaxin-téa xi vinu ni xiò, ni chihi-téa ñà iin vara yutnũ, te ni sàhà-tèyá ni sihvì-yá.

⁴⁹ Dandu ni cachí ingà-te:

—Nacoo-ñinè, cundiatu-nda, áma quíxi Elías dacácu xi-né.

⁵⁰ Dandu inga xichi ni ndàhi ndee-yá, te ni xihí-yà.

⁵¹ Daaní, yucán ini veheñũhu cahnú ni quedava ù cortina cahnú sadí ñihni cuarto xan; iin-ni ni ndàtá-ñá ndè ñà-xi xi ndé tixi-xi. Te ni tñaa stná ñuhiví, te ni ndàtá cavà cahnú.

⁵²⁻⁵³ Dècuèndè ni nuna stná cuahà lugar ndé índũxin nsii. Ñàyùcànduá na sáni natiacu-yá después, dandu ni natiacu stná cuahà nècuàchi sàhana nduu nèhiví xi-yá, ni caquee-ne ndé índũxin-ne ni caquihvi-ne ini ñuu ùi (Jerusalén), te ni ndecoyo-ne nũu cuahà nèhiví ndoó yucán.

⁵⁴ (Cunaha-nsiá, frente ndé iin cruz xi Jesús,) yucán iin stná iin capitán xi compañeru-te, xindiaà-teyá. Te na ní caxini-te nansa ni cuu ñà-ni tñaa guá, dandu ni yuhí gà-te, cachí-te:

—Ñà-ndàa nduá, Dèhemani Dios ni sanduu nècuàchi jaàn.

⁵⁵ Daaní, yucán itá xica stná cuahà nècuàchì ñahà, indéhe-ne: nècuàchì ladu Galilea nduú-né, te cutnáhá-né xì-yá nì quixì ndè ñuu mà ñà-chindee stná-nèyà.

⁵⁶ Iin-ne nduú María Magdalena, te inga-nè nduú María dihi Jacobo xì José, te inga-nè nduú ñahàdihí Zebedeo.

Nansa nì chinacaa José iquicúñú Jesús inì cueva

⁵⁷ Daaní, na ní cuahà quivì yucán, dandu nì sàà stná iin nècuàchì ñuu tii Arimatea nani José. Iin nècuàchì cuicà nduú-né, te nchicùn stná-nè ichì-yá.

⁵⁸ Te divì-ne nì sàhàn nùu Pilatu, nì xicàn-nè cuerpu-yà. Dandu nì cachi Pilatu xì soldadu ñà-nì cuàha-tè nècuàchì mà iquicúñú-yà.

⁵⁹ Ñàyücàndüá, nì sàhàn José nì naquihin-neyà, te nì chidücùn-neyà iin dahmà íá ndoo.

⁶⁰ Te sàhà ñà-làcà nì sate nèhivì xì-né iin cueva nùu cavà, ñàyücàndüá, divì yucán nì chinacaa-nèyà. Dandu nì dàtùu nihni-ne iin cavà cahnú nì sàcündiadi yuhù cueva mà, te cuahàn-nè.

⁶¹ Doco yucán nì ndòo María Magdalena xì inga María mà, xíndoo-ne frente lugar ndé nì ndùxin-ya.

Nansa nì dàndàcú Pilatu ñà-cuita soldadu cundiaa xì sepultura xì Jesús

⁶² Daaní, nì yàha quivì mà, divì quivì nduú vigilia xì quivì descansu. Dandu meru quivì (descansu) mà nì sàhàn itnii dùtù xì iin ùi stná nècuàchì fariseu, nì tnàtuu-ne nùu Pilatu,

⁶³ nì cachi-nè xì-té:

—Señor gobernador, nsiùhù nsiñúu ini-nsi nansa nì cachi (Jesús) na xicánúu ñi-né dandahví-nè nèhivì, nì cachi-nè ñà-tixì ùni quivì icúmí-nè natiacu-nè.

⁶⁴ Ñàyücàndüá, cuní-nsi dandacu-ní ñà-cundiaa vaha soldadu sepultura dècuèndè nì xínu quivì ùni, vachi nú coó, vihini nataca nèhivì xì nècuàchì mà ñuu, te tavà-ñané, dandu después cachi-nè xì nèhivì ñà-sàni natiacu nècuàchì mà nduá. Te nú ducán, dandu cundua iin tnùhu chicá cahnú nùu palabra nisa cachi nècuàchì mà antes.

⁶⁵ Dandu nì cachi Pilatu xì-né:

—Vàtùni íá cùhùn iin ùi soldadu, nacua xicàn-nsià. Te cuahán stná mii-nsià nùu sepultura, te chicadi vaha-nsiàña nacua cui quida-nsià.

⁶⁶ Ñàyücàndüá, nì caquihin nècuàchì mà ichì cuahàn-nè ndé sepultura, te chicá fuerte nì chicadi-nè lugar mà. Te nì candòo stná itnii soldadu xíndiaa.

28

Nansa nì natiacu Jesús

¹ Daaní, nì yàha quivì descansu mà. Te na sàcuahàn tùinuù quivì primeru semana, dandu cuahàn María Magdalena cundehè-né sepultura, te cutnáhá stná-nè xì inga María mà.

² Datùha nì quesaha tnáa fuerte, vachi ndè ansivì nì nuu iin ángel xì Stoho-ndà Señor, nì dàcúxió-né cavà cahnú ndiadi yuhù cueva mà, te nì sàcòo-ne diquá.

³ Tnúu nihni-ne na ian tása; te cuxin yaa sicoto xì-ne nahi yùhà.

⁴ Te soldadu ndoó ndiáa yucán, nì cayùhì cuaá-te, te nì quesaha-té quidí fuerte-te, ndè nì xihì nihni-tè.

⁵ Doco nì cachi ángel mà xì nècuàchì ñahà mà:

—Màsà yúhì-nsià. Ináhi nandúcú-nsià Jesús, divì ana nì xihì nchìca cruz.

⁶ Doco cunaha-nsià, còò cá-yà yohó; sàni natiacu-yà nacua nì cachitnùhu-ya antes. Naha-nsià cundehè-nsià lugar ndé nì sanduhù-yà.

⁷ Te cuahán-nsià vichi duha ndé ndoó nècuàchì dacuahá-yà, te cachitnùhu-nsià xì-né ñà-sàni natiacu-yà, te icúmí-yà codònuù-yà nùu-nsià nùhù-yà ndé ladu Galilea. Yucán icúmí-nsià cuni-nsiàyà. Pues vichi sàni cachitnùhì xì-nsià —nì cachi ángel.

⁸ Dandu yáchi nì caquee nsihì nècuàchì ñahà mà cueva mà, te nì dáyáà-nè cuahàn-nè cachitnùhu-ne xì nècuàchì dacuahá-yà: chii yúhì-nè, te chii cudù stná ini-nè.

⁹ Doco ichì ndé cuahàn-nè yucán nì ndacùhun stnahá-né xì-yà, te nì casáhù-yà xì-né. Ñàyücàndüá nì tutuyuhu-né ñuhù nùu sàhà-yà, te nì tnii-ne sàhà-yà nì cahvi-nèyà.

¹⁰ Dandu nì cachi-yà xì-né:

—Màsà yúhì-nsià. Cuahán-nsià ndé ndoó nèhivì xínduu nahi ñani, te cachi-nsià xì-né ñà-nì nùhù-nè ndé ladu Galilea, vachi yucán icúmí-nè cuni-nè yùhù.

Nansa nì dàndàcú dùtù nùu soldadu nì sandiaa sepultura

¹¹ Daaní, na sàmànùhù nècuàchì ñahà mà, dandu nì caquee stná dava soldadu nì sandiaa yucán, mànuhù stná-te ñuu Jerusalén. Te nì nacani-tè xì dùtù xícusahnú nansa nì cuu.

¹² Ñàyücàndüá, nì nataca dùtù mà xì nècuàchì xídandacú nùu ñuu mà, te nì ndatnuhu tnahá-né nansa quida-ne. Dandu nì sàha-ne soldadu mà vihi dihùn,

¹³ te nì cachi-nè xì-té:

—Dohó cachi-nsià xì nèhivì: na hora quídi naà-nsiá ñuú, dandu nì casaà nècuàchì dacuahá Jesús, nì xidacuihna-né cuerpu nsiì ma, cachi-nsià.

¹⁴Te nú nì cunítrñuhu gobernador sàhà chuun yohó, dandu càhàn-nsì sàhà-nsiá nùù-té, te còò nì-ìñàha cuu xì-nsiá —nì cachi-nè.

¹⁵Ñàyùcàndüá, nì catnii soldadu mà dihùn mà, te nì cachi-te xì nèhivì nacua nì sàcùnaha-té. Te divi sàhà ñà-jaàn nduá ducán xicá cuentu mà nùù nèhivì raza Judea dècuèndè quivì vichi.

Ñà-ndüá nì dàndacú Jesús nùù nèhivì xì-yá ñà-quida-ne na sámànühù-yá

¹⁶Daaní, nì quihìn nsi-úxin iin nècuàchì dacuahá-yá ichì cuàhàn-nè ndè iin xaan nì cachi-yá xì-né, divi nduú iin yucù iá ladu Galilea.

¹⁷Te na ní xini-nè mii-yá nì tutuyuhu-né ñuhù nùù sàhà-yá, te nì cahvi-néyà. Doco dava-ne, ndoó-né xì duda.

¹⁸Dandu chicá nì cuyatni-ya, te nì cachi-yá xì-né:

—Yùhù nì nihitáhvi' dandacuí sàhà nsidanicuú ñàha iá ñuhivì xì ansivi.

¹⁹Ñàyùcàndüá, cuahán-nsià inicutu ñuhivì, te dacuahá-nsiá nèhivì nansa iá ichì váha, te quida ì stná-nsiànè, ndacùcahan-nsiá Yuamáni', xì stná yùhù ana nduú Dèhemani-yá, xì stná Espíritu ì xì-yá.

²⁰Te chinaha stná-nsiànè nansa quida-ne chivàha-ne nsidanicuú ñà-ndüá sàni dàndacuí nùù-nsiá. Te cunaha-nsiá, nicanicuahàn icúmí cutnahí xì-nsiá ndè cachi nsihì ñuhivì.

Yohó nì nsihì historia.

Ñà-nduá Nì Tiaa San Marcos sàhà Jesucristu

- ¹ Ñà-yòhó nduá quesáhá nacání razón ndiaha xí Dios sàhà Dèhemaní-yá Jesucristu.
² Sàhana nisa cahàn Isaías cuenta xi Dios. Te nì tiaa stná-nè (palabra yohó nì cachi-yà):
 Cunaha-ní, cuàhìn techuín iin tiàa, te dihna-ne yàha-ne càhàn-nè xì nēhivì ñà-ndúú razón
 xí, te ducán (nsida vii-né anima-nè), na ian nduvíi iin ichì, dandu después yàha stná
 mii-ní (Cristu).
³ Tiacú càhàn fuerte ana càhàn sàhù yucù, te (cachí-nè xì nēhivì ñà-nsida vii-né anima-nè)
 na ian nduvíi ichì ndé yàha Stoho-ndà Señor, nandua ichì ndáà ndé quixi-ya.
 (Ducán cachí tutu mà.)
⁴ Ñàyücàndüá, nì quixi nècuàchìmà. Juan Bautista nani-né, te yucù nì càhàn-nè sàhù xì
 nēhivì, nì cachitnùhu-ne nansa xiñuhu quida-ne ñà-naxicocuín ini-nè sàhà-ñá cuicahnú ini
 Dios sàhà cuàchi-ne, dandu cuhii-né.
⁵ Ñàyücàndüá cuàhà nēhivì ñuu Jerusalén xì nsidaa gá stná nēhivì ladu Judea, nì casaà-nè
 nùù Juan mà, nì dātúi-ne cuàchi-ne nùù Dios, te nì cuhii stná-nè nùù yùte Jordán nì quida
 nècuàchìmà.
⁶ Dòò idi sì-camellu nì sandixi nècuàchìmà. Te iin quisi nduú siuhma tixi-ne. Te sica xì
 ndudí ñùñù yucù nduá nisa itiacu-nè.
⁷ Te nì càhàn-nè xì nēhivì, cachí-nè:
 —Nú sàni yàha yùhù, dandu vaxi mii-yá ana chicá icúmí poder cahnú nùù. Nì có-nátùù
 (cundui nì mozo xi-ya) ndaxin correa ndisàn-yá.
⁸ Yùhù, tècuí quidá ìí mii-nsiá. Doco mii-yá, còò; tixi Espíritu ìì xí Dios icúmí-yá quida
 ìi-yánsiá.

Nansa nì cuhii Jesús

- ⁹ Quivì yucán nì quee-ya ñuu Nazaret iá Galilea, te nì quida ìi Juan-yà nùù yùte Jordán.
¹⁰ Te na ní quee-ya nùù tècuí mà, dandu nì xini-yà nì nuna ansivi, te nì nuu Espíritu ìì xí
 Dios diquì-yá na iin loma.
¹¹ Te nì tiacu càhàn iin ana càhàn ansivi, cachí-yà:
 —Mii-ní, Dèhemaní nduu-ní, te cudíi cuàhà ini sàhà-ní.

Nansa nì cuni ñà-malu dacà-sí Jesús

- ¹² Daaní, nì nsihì nì cuhii-yá, dandu vichi vichi nihí Espíritu ìì xí Dios-yà nì sàhàn
 ñà-coo-ya yucù dānā.
¹³ Te yucán nisa ìa-ya ùù dico quivì ndé ndoó quisi yucù. Te nì sàà Satanás, nì cuni-si
 dacà-siyá, (doco mànicùì). Daaní, después nì casaà stná ángel xì Dios nì chindee-néyā.

Nansa nì quesaha Jesús quidá-yá chuun ìi ladu Galilea

- ¹⁴ Daaní, na ní sàcündiadi Juan Bautista vehecàa, dandu mànuhù Jesús ladu Galilea. Te nì
 quesaha-yá càhàn-yà xì nēhivì inicutu ñà-ndúú razón ndiaha sàhà ñuhivì ìì xí Dios.
¹⁵ Te dohó nì cachi-yà xì-né:
 —Sàni sàà hora, sà-ítuú tiempu cusahnú Dios ñuhivì yohó. Ñàyücàndüá naxicocuín
 ini-nsiá sàhà cuàchi-nsiá, te cunindisá-nsiá ñà-ndúú razón ndiaha xí-yá.

Nansa nì cana Jesús cùmi nècuàchì tavá siaca

- ¹⁶ Xicá Jesús yuhù mar iá Galilea, te nì xini-yà Simón xì ñani-nè Andrés, dacanā-né ñunù
 xí-né mahì tècuí, vāchi nècuàchì tavá siaca xínduu-ne.
¹⁷ Te nì cachi-yà xì-né:
 —Cunchicùn-nsiá yùhù, vāchi mà cundúú gá-nsiá nècuàchì tavá xì siaca; yùhù icúmí
 dacuahí mii-nsiá ñà-cunduu-nsiá nècuàchì tavá xì nēhivì (nùù ichì malu).
¹⁸ Dandu nècuàchìmà, vichi vichi nì nacoo-ne ñunù xí-né yucán, te nì tenchicùn-nè mii-yá
 cuàhàn.
¹⁹ Dandu nì sàà-yà chicá nùù-xí, te nì xini tu-ya ùù dēhe iin tiàa nani Zebedeo, Jacobo nani
 iin-ne, te Juan nani ñani-nè, ndoó-né nùù lancha xi-ne, nácàhmā-nè ñunù xí-né.
²⁰ Te nì cana stná-yà ndúù-nè. Ñàyücàndüá nì nacoo-ne yua-né ini lancha mà xì tètátù, te
 nì catenchicùn stná-néyā cuàhàn.

Nansa nì tavá Jesús iin ñà-malu iná cáá ini iin tiàa

- ²¹ Dandu nì casaà-nè xí-yá iin ñuu nani Capernaum. Te na ní sàà quivì descansu, dandu
 cuàhàn-yà veheñuhu, te nì dàcuàhá-yá nēhivì yucán.
²² Te nì ndulocó-nè sàhà ñà-ndúá dàcuàhá-yánè, vāchi nì chinaha-yà nahi ana cusáhnù,
 màdiá nahi nècuàchì ley xi veheñuhu.

²³ Daaní, ini veheñuhu ma íá stná iin tiàa inácaa iin ñà-malu inì-xi. Te nì ndàhì-nè, cachì-nè:

²⁴ —Jesús de Nazaret, ¿ndià cunduu-ní nsiùhù? ¿A vaxi-ní dandáñuhú-ní nsiùhù? Yùhù ináhì mii-ní: ana ì nì quixi nùu Dios ndùu-ní —cachá`.

²⁵ Doco Jesús, ndee ní dandácú-yá nùá, cachì-yá:

—¡Màsà cáhàn, te quee cuahán! ¡Nacoo tiàa jaàn!

²⁶ Dandu ñà-malu mà, nì dàquidi fuerteà nècuàchimà, te nì ndàhì ndeá, dandu nì quea cuàhàn.

²⁷ Ñàyücàndüá, nsidaa nèhivi yucán, nì ndulocó sàstnùhù-né sàhá yucán, te nì ndàcàtnùhù tnàhá-né nùu-né, cachì-nè:

—¿Ndià nduá cuú jaàn? ¿Índù ley saa nduá? Vàchi na iin nècuàchi cusáhnù, ducán cáhàn nècuàchi jaàn. Mà ùhì dandácú-né nùu ñà-malu, te iníniá-né.

²⁸ Dandu nì xitià fama xi-ya inicutu ladu Galilea yucán.

Nansa nì dándúvaha Jesús dido Simón Pedro

²⁹ Daaní, na sáni caquee nsidaa-né veheñuhu yucán, dandu cuàhàn-yà xì Jacobo xì ñiani-nè Juan, nì yàha-ne vehe Simón xì Andrés.

³⁰ Te yucán indúhu dido Simón, nècuàchi ñahà, quidá yócò xì-né. Te vichi vichi nì cachitnùhu nèhivi vehe ma xi-yá sàhá nècuàchi cuhí mà.

³¹ Ñàyücàndüá, nì tnàtuu-ya ndé indúhu-né, te nì tnii-ya ndahà-né, nì dandácòo-yané. Dandu vichi duha nì cuxio cuèhè yócò mà-né, te nì quesaha-né nì xinucuachi-né nùu-yá xì compañeru-yà.

Nansa nì dándúvaha Jesús cuàhà gá nècuàchi cuhí

³² Daaní, nì quècahu orá, te nì cuñaà. Dandu nì casaca nèhivi nsidaa nècuàchi cuhí xi-ne, xì stná nècuàchi inácaa ñà-malu inì-xi nì quixi nùu-yá.

³³ Te nsidaa-né, nì nataca chitu-né yehè vehe ndé íá-yá.

³⁴ Te nì dándúvaha-ya nsidaa nècuàchi cuhí mà, nsidanuu cuèhè quidà-xì-né. Te nì tava stná-yà cuàhà ñà-malu. Doco cóni sàha-ya cáhàn gà-sì, vàchi ináhà-sì ana nduú-yá.

Nansa nì cáhàn Jesús sàhù inicutu ladu Galilea

³⁵ Daaní, itnúú gá dàtnàà nì ndacòo-ya, nì quee cuaán-yá cuàhàn-yà iin xaan ndé còò nèhivi, te yucán nì xicàn tàhvi-yá nùu Yuamáni-yá.

³⁶ Daaní, después, nì caquee stná Simón xì compañeru-nè cuàhàn-nè nanducu-neyà.

³⁷ Te na ní ndacùhun-neyà, nì cachì-nè xì-yá:

—Cunaha-ní, nsidaa nèhivi, nanducu-né mii-ní.

³⁸ Doco nì cachì-yá xì-né:

—Nì cùhùn-ndà ndé ñuu chicá nùu-xì, cachitnùhu stná xì nèhivi yucán ñà-nduú ndudu ì, vàchi divi chuun jaàn vaxi —nì cachì-yà.

³⁹ Ñàyücàndüá, ducán nì xicanuu-ya inicutu ladu Galilea yucán, nì cachitnùhu-ya ndudu ì xì-yá xì nèhivi nsidaa veheñuhu yucán, te nì tava stná-yà ñà-malu ñuhú ini nèhivi.

Nansa nì dándúvaha Jesús iin tiàa icúmí cuèhè lepra

⁴⁰ Dandu nì sàà stná iin tiàa icúmí cuèhè lepra, nì tnàtuu-ne nùu-yá, nì sàcuìn sisi-né nùu-yá xicàn tàhvi-né nùu-yá, cachì-nè:

—Nú cuní-ní, vátuni dandúvaha-ní yùhù.

⁴¹ Dandu nì cuhi ini Jesús nècuàchimà, te nì chituu-ya ndahà-yá nùu-né, cachì-yá xì-né:

—Juùn. Vichi duha nì ndúvaha-ní, cachí` xì-ní.

⁴² Dandu na momentu nì cachì-yá ducán nì quee cuèhè quidà-xì-né, te nì nduvàha-ne.

⁴³ Dandu na cuàhàn-yà techuún-yánè nùhù-né, dandu cuàhà gá nì chinaha-yánè, cachì-yá xì-né:

⁴⁴ —Cunaha-ní, màsà cáchi-ní nì-íñàha xì nèhivi. Cuisi cuahán-ní nùu dùtù ñà-cundehe-né ìcà-ní (ñà-sàni nduvàha-ní), te nacuaàha-ní promesa xì Dios, vàchi ducán cachí ley xì Moisés, dandu vátuni cundaà ini nèhivi ñà-sàni nduvàha-ní nduá —nì cachì-yá.

⁴⁵ Doco nècuàchimà, nì quee-ne nì quesaha-né nacání-né xì cuàhà nèhivi, te sàhámà nì xitià cuentu inicutu. Ñàyücàndüá mànicuí gá quihvi vate Jesús ini nì-iin ñuu. Puru campu xicánú-yá. Doco nsidanicuú xaan nì caquee nèhivi nì nataca-nè nùu-yá.

2

Nansa nì dándúvaha Jesús iin tiàa nì dàñà ù cuerpu xi

¹ Nì yàha itnii quìvì, dandu mànhù Jesús ñuu Capernaum. Te nì xinitnùhu nèhivi íá-yà vehe.

² Ñâyücàndùá luegu ni nataca cuàhà-né, ni có-núná gá indù cundoo-ne, ni siquiera nùù yehè. Te ni càhàn-yà xi-né ñà-nduú palabra xi-ya.

³ Dandu yucán ni sàà stná itnii gá nèhivì, cùmi-né nsidà-xi iin nècuàchì cuhí ni dàñà fi cuerpu xi.

⁴ Doco ñà-cuàhà guá nèhivì ndoo yucán, mànicùì quìhvi-ne dècuèndè ndé iá-yà. Ñâyücàndùá ni nana-ne òinvehé ni nacani-nè iyuhu òiníá meru ndé indéhe ndáá iá-yà ini vehe. Te na sání nacuna-nemà, dandu ni dantùú-né nècuàchì cuhí xi-ne nùù camilla.

⁵ Ñâyücàndùá, na ní xini-yà ñà-cuàhà guá xíxinindisá-néyà, dandu ni cachi-yà xi nècuàchì cuhí:

—Hijo, xicáhnù inì sàhà cuàchì-ní.

⁶ Doco yucán ndoo stná itnii nècuàchì nduú nècuàchì ley xi veheñùhu, te ni nacani ini-nè:

⁷ “¿Índù chuun càhàn Jesús ducán? ¡Mà ndoo ini Dios sàhà ñà-nduá cachi-nè! Vàchì còò inga ana cuì cuicahnù inì-xi sàhà-ndà, cuisì mii-yá”.

⁸ Doco Jesús, ni cundaà ini anima-yà ñà-nduá nacání guá ini nècuàchì-mà. Ñâyücàndùá ni cachi-yà xi-né:

—¿Índù chuun nacání inì-nsia ducán?

⁹ ¿Índù milagru nduú ñà-chicá ùhì quida-nda: a ñá-cachi uun-nda xi nècuàchì cuhí yohó ñà-xicáhnù inì-ndà sàhà cuàchì-ne, te ó ñá-cachi-ndà xi-né ni ndacuiñ-nè ndanihi-ne camilla xi-ne, te nacaca-ne?

¹⁰ Pues yùhù ana nduú Tnaha Nèhivì Ñuhivì, cuàhàn quide iñàhà ñà-cundaà inì-nsia ñà-ndisa icúmì derechu cuicahnù inì sàhà cuàchì nèhivì ñuhivì.

Dandu ni cachi-yà xi nècuàchì cuhí mà:

¹¹ —Mii-ní cachi xí, ndacuiñ-ní, ndanihi-ní camilla xi-ní, te xuhun-ní vehe-ní.

¹² Dandu ni ndacuiñ nècuàchì cuhí mà, te vichì vichì ni ndanihi-ne camilla xi-ne, ni quee-ne, mànuhù-né vehe-ne, indéhe nsidaa nèhivì yucán. Ñâyücàndùá nsidaa-né, ni ndulocó-nè, te ni ndenihi vàha-ne Dios, cachi-nè:

—Ni-iin xichi, có-xinì-ndà cuu (ndiaha guá) nahi ñà-yohó.

Nansa ni cana Jesús iin tè-dàchíyàhvi nani Leví

¹³ Daaní, ni quee-ya inga xichi cuàhàn-yà dècuèndè mar. Te ni nataca cuàhà gá nèhivì nùù-yà, te ni dàcuàhà-yáne.

¹⁴ Dandu ni yàha-ya (inga xaan), te ni xini-yà iin dèhe Alfeo nani Leví, iá-nè nùù mesa ndé dàchíyàhvi-ne. Te ni cachi-yà xi-né:

—Nahà-ní, chunchicùn-ní yùhù.

Dandu ni ndacuiñ nècuàchì-mà cuàhàn stná-nè xi-yà.

¹⁵ Daaní, después dohó ni cuu na ní là-ya vehe Leví mà. Iá-yà xixí-yà, te ndoo stná cuàhà nècuàchì dàchíyàhvi, xi cuàhà gá más nècuàchì cachi-nè iá cuàchì-xi, xixí-né xi Jesús xi nècuàchì dacuahá-yà, vachì cuàhà gá nèhivì nchícùn xi-yà.

¹⁶ Te nècuàchì ley xi veheñùhu, xi stná nècuàchì fariseu, ni xini-nè nansa quidá-yà xixí-yà xi nèhivì mà. Ñâyücàndùá ni cachi-nè xi nècuàchì dacuahá-yà:

—¿Índù chuun cutnàhà maestru xi-nsia xixí-né xi cuàhà tè-dàchíyàhvi, xi dava gá stná nèhivì cuàchì?

¹⁷ Na ní tiacu Jesús cachi-nè ducán, dandu ni cachi-yà xi-né:

—Màdi nècuàchì ndáa vàha xiñuhu xi ana quidatatna xi-né. Nècuàchì cuhí xiñuhu xi ana quidatatna xi-né. Te divi ducání stná yùhù, màdi nèhivì nihnú ndacuisì inì-xi vaxì càhàn xí. Còó, nèhivì cuàchì vaxì nanduquí, áma naxicocuiñ inì-nè sàhà cuàchì-ne.

Ndiá disàhà-xi cónisá ínhí dócò nècuàchì dacuahá Jesús na iá ìi-yà ñuhivì yohó

¹⁸ Daaní, iin xichi na ínhí nècuàchì dacuahá Juan Bautista xi stná nècuàchì fariseu, dandu ni tnàtuu itnii nèhivì nùù Jesús, te ni ndàcàtnùhù-né nùù-yà cachi-nè:

—¿Índù chuun ínhí dócò nècuàchì dacuahá Juan xi stná nècuàchì xídacuahá ley xi tè-fariseu, doco nècuàchì dacuahá mii-ní, còó?

¹⁹ Dandu ni cachi Jesús xi-né:

—Nècuàchì ndoo vicò nándàhà, ¿a vátuni iá ñà-cunihì-né na hora ndoo-né cutnàhà-né xi noviu? Còó, vachì na ndoo-né xi noviu, mà cúì cunihì dócò-nè.

²⁰ Doco vaxì iin quivì, dandu mà cóó gá noviu nùù-né, dandísá, tiempu yucán icúmì-nè cunihì dócò-nè.

Ndiá disàhà-xi sàni dàma estilu sànahà, te estilu saa nduá ni nacoo Jesús

²¹ Sicoto saa, màsà nàcàhmá-ndàñá nùù ñà-tùhù. Vachì nú ducán, dandu dandánsiá ndé ni nacàhmá, te chicá icúmì ndàtà sicoto tuhú mà. Dandu ñà-sàni ndàtà dahuun sicoto-mà cundua.

²² Stná vinu, nú vinu saa nduá, mà dáquêe stná nèhivì-ñá ini itni iin tuhú, vâchi nú ducán, ndàtà-ñá, vâchi cahnsiá quida vinu saa ma, te cuitià-ñà, te cuchicuehe stná iin mà. Ñâyücàndüá, nú vinu saa nduá, dandu ini itni iin saa covàha.

Nansa ni xitnùhu nèhivi nècuàchi dacuahá-yá na ní sàhnù-nè sicâyócó trigu quivi descansu

²³ Iin quivi descansu ni sandua, te yáha Jesús nùù iin itu ndé iá trigu, te cutnahá stná-yà xì nècuàchi dacuahá-yá. Te nacua yáha-ne ducán sàhnù-nè sicâyócó trigu mà saxì-né.

²⁴ Ñâyücàndüá, ni cachi nècuàchi fariseu xì-yá:

—Cundehè-ní nansa quida nècuàchi dacuahá-ní, quidá-né iin chuun có-sâha ley xi-nda quida-nda quivi descansu.

²⁵⁻²⁶ Dandu ni cachi-yà xì-né:

—¿A cóni cãhví-nsiá (nùù tutu ì) ndé nacaniá nansa ni quida David sãnaha na xicánúù ndahví-nè xì compañeru-nè tiempu xi jefe xi dùtù nani Abiatar, te xíhi-nè doco? Ni quihvi-ne ini veheñùhu xi Dios, te ni xixi-ne dità vídi ì, mate cóo permisú cuxi-neá, cui-si-ní dùtù iá permisú cuxi xi ñá-yúcán. Doco David, ndè stná compañeru-nè ni sãha-ne, ni caxixi stná nècuàchimà.

²⁷ Dandu ni cachi stná-yà xì nèhivi yucán:

—Sàhà ñà-cunduu ñà-vàha xi nèhivi, ñâyücàndüá ni sàcòo iin quivi descansu, màdiá ni cùyúcùn nèhivi sàhà-ñá (chicá nducahnú) quivi mà.

²⁸ Ñâyücàndüá, yùhù ana nduú Tnaha Nèhivi Ñuhiví, dandacú stnáì sàhà nansa quida nèhivi quivi mà.

3

Nansa ni nduvàha iin tiàa ni ichì dahuun iin ndahà-xí

¹ Dandu cuàhàn Jesús veheñùhu. Te na sáni quihvi-ya yucán, (ni xini-yà) jaàn iá iin tiàa ni ichì dahuun iin ndahà-xí.

² Doco ndoó stná nècuàchi fariseu yucán, indéhe vâha-neyá, áma dándùvâha-ya nècuàchi cuhí-mà cahan-né, te ducán nihindèè-né daquêe cuàchi-ne diqui-yá sàhà ñà-ndüá quivi descansu.

³ Dandu ni cachi-yà xì tiàa cuhí ndahà-xì mà:

—Ndacuiin-ní, cuiin-ní dava mahì nèhivi yohó.

⁴ Dandu ni cãhàn-yà xì nèhivi nánì xì-yá yucán, cachí-yá:

—¿Nansa ndiá icà-ndá quida-nda quivi descansu? ¿Amádi chicá iá vâha quida-nda ñà-iá vii, te màdiá ñà-cò-ndiáá? ¿Amádi chicá iá vâha dacacu-nda nèhivi quivi mà, te màdiá cahni stnàhà-ndá?

Doco nècuàchi yucán, cóo ni-ñàha ni náxicónihí-né nùù-yá.

⁵ Ñâyücàndüá, ni xiconúù-yá nùù nsidaa-né, te ni cuduchi ini-yà sàhà-né, vâchi caxin sàstnùhù anima-nè. Dandu ni cachi-yà xì tiàa ma:

—Chitanini-ní ndahà-ní.

Dandu ni chitanini nècuàchimà ndahà-né, te ni nduvàha dahuan.

⁶ Ñâyücàndüá ni caquee nècuàchi fariseu mà ni cãhàn-nè xì nècuàchi partidu herodianu, ni ndatnuhu-né nansa cui dandáñùhù-nèyá.

Nansa ni nataca cuàhà nèhivi nùù mar

⁷⁻⁸ Daaní, cuàhàn-yà xì nècuàchi dacuahá-yá nùù mar, te cuàhà sàstnùhù nèhivi ladu Galilea ni catenchicùn stná xì-yá. Te na ní xitiá cuentu ñà-ndiaha guá quidá-yá, dandu más nèhivi ni ndecoyo: nècuàchi ñuu Jerusalén, xì más gà nèhivi ladu Judea xì stná nèhivi ladu Idumea, xì nèhivi ladu duha yùte Jordán, xì nèhivi ladu ñuu Tiro xì ñuu Sidón, nsidaa-né vâxi-ne ndé iá-yá.

⁹ Ñâyücàndüá, ni cachi-yà xì nècuàchi dacuahá-yá ñà-cundiatu tùha-ne xì iin lancha ndé coo-ya sàhà màsà ndútnúù guá-yà mahì nèhivi cuàhà mà.

¹⁰ Vâchi cuàhà-nè ni dándùvâha-ya, ñâyücàndüá nsidaa nècuàchi cuhí, ni nachitu-né nùù-yá, cuní-nè dacacùhun-ne ndahà-né icà-yá, te nduvàha-ne.

¹¹ Stná ñà-malu, na ní xiniá-yá, ni sàcultasisiá nùù-yá, cachá':

—Dèhemani Dios nduu-ní.

¹² Doco mii-yá, vihi gà cuàhà ni dandàcù ndee-yá núá ñà-màsà cáhà ana divi nduú-yá.

Nansa ni nacàxin Jesús ùxin ùi tiàa ñà-cunduu-ne apóstol xi-ya

¹³ Dandu ni nana-ya yucú, te ni cana-ya nècuàchi tuxí-yá ñà-ní cáquixí-né nùù-yá.

¹⁴ Te ni nacàxin-ya ùxin ùi-nè ñà-cunduu-ne nèhivi cutnahá xi-yá cacanu, dandu después techuún stná-yànè cùhùn-nè cãhàn-nè xì nèhivi palabra xi-ya.

¹⁵ Te nì sàhatahvi-yànè ñà-dandúvaha-ne nècuàchì cuhí, te tavà stná-nè ñà-malu ñuhú anima nèhivì.

¹⁶ Te divi nècuàchì yohó xínduu nècuàchì nì nacàxin-ya: iin-ne nani Simón, te divi-ne nì dānānì stná-yà Pedro;

¹⁷ daaní, iá stná dèhe Zebedeo nani Jacobo xì ñani-nè Juan, ndúì nècuàchì mà nì dānānì stná-yà Boanerges, te cuní cachàmà na cáhàn dàvì cáhàn-nè.

¹⁸ Daaní iá stná Andrés, xì Felipe, xì Bartolomé, xì Mateo, xì Tomás, xì dèhe Alfeo nani Jacobo, xì stná Tadeo, xì Simón nì sanduu partidu cachí-nè nècuàchì Canaán;

¹⁹ te nì ia stná Judas Iscariote, divi nècuàchì icúmí cahin xì-yà.

Daaní, nì yàha-ya xì compañeru-yà ini iin vehe.

²⁰ Te yucán nì nataca cuàhà gá tu nèhivì nùù-yà. Ñàyùcandúà, cónì cúsáá gá-yà cuxi-ya, nì mii-yà nì nècuàchì dacuahá-yà.

²¹ Dandu nècuàchì xínduu nèhivì vehe-ya, nì xinitnúhu-ne nansa cachí nèhivì sàhà-yà ñà-sàni ndañuhu sàxínitnúni-yà, cachí-nè. Ñàyùcandúà, cuàhàn-nè ndé iá-yà ñà-cúni-nè cundaca-neyà nùhù.

Nansa nì dàqueé cuàchì nèhivì diqui Jesús, ñà-malu chindéé xì-yà, cachí-nè

²² Daaní, nècuàchì ley xì veheñùhu, nì caquee-ne ñuu Jerusalén, nì casaà-nè ndé iá-yà, te nì cáhàn cuàchì-ne diqui-yà, cachí-nè xì nèhivì:

—Nècuàchì jaàn, icúmí-nè ñà-malu nani Beelzebú ini-nè, divi quisi cusáhnù. Ñàyùcandúà, vátùni tavá-nè dava ga ñà-malu anima nèhivì, vàchì quisi mà chindéé xì-nè —nì cachí-ne.

²³ Ñàyùcandúà nì cana Jesús nèhivì, te nì nacani-ya historia nduu ejemplu, cachí-yà xì-nè: —Ñà-malu, ¿nansa cui tavà stnahá nsidaa mián? Mà cúí.

²⁴ Vàchì ducán iá xán na iá xì nèhivì dandacú nùù iin ñuu, nú nì táhndè dava-ne, te nàá stnahá-nè, dandu mà cúí dandacú gá-nè nùù ñuu mà.

²⁵ Te nèhivì ndoó iin vehe, nú xini ùhì stnahá-nè, dandu mà cúí cundoo tàcà gá-nè.

²⁶ Stná ñà-malu xì Satanás, nú nì táhndè dava, te cuni ùhì stnahá, dandu mà cuéà, te yàchì nsiha, nú ducán.

²⁷ Vehe iin tiàa ndacuì, mà cúí quihvi ndevàha nèhivì, te tavà-nè ñà-icúmí-tè. Còò, vàchì dihna icúmí-nè chichuhni-nè, dandu vátùni quida-ne ducán.

²⁸ Ñà-ndáá ndúà cachí xì-nsiá, mate nadaa ga cuàchì nèhivì iá nùù Dios, te ò nadaa ga xichì cáhàn ùhí-nè diqui-yà, vátùni cuicahnú ini-yà sàhà-nè.

²⁹ Doco nú nì cáhàn ùhí-nè diqui Espíritu lì xì Dios, dandísá, mà cúí cuicahnú ini-yà, sàhà-nè, vàchì nicanicuahàn icúmí-nè cunsida-ne cuàchì ma.

³⁰ Ducán nì cachí-yà xì nèhivì yucán sàhà nècuàchì cáhàn trùhù diqui-yà, vàchì cachí-nè ñà-ínacáá iin ñà-malu ini-yà.

Ñà-ndúà nì cachí Jesús sàhà dihi-yà xì sàhà ñani-yà na ní casaà-nè caná-néyà

³¹ Daaní, nì sàá stná dihi-yà xì ñani-yà tùvèhé, te nì techuún-nè iin razón caná-néyà.

³² Ñàyùcandúà, nèhivì ndoó nùù-yà, nì cachí-nè xì-yà:

—Cunaha-ní, tùvèhé cà' iin dihi-ní xì stná ñani-ní, caná-nè mii-ní.

³³ Dandu nì cachí-yà xì nèhivì mà:

—¿Ana divi nduú mamá xì cahan-nsiá? Te ò ¿ana divi xínduu ñani?

³⁴ Dandu nì xiconúù-yà nì indehè-yà nsidaa nèhivì ndoó nùù-yà, te nì cachí-yà:

—Divi nècuàchì yohó xínduu nahi mamá xì, ò nahi ñani.

³⁵ Vàchì nsidanicuú ana quidà-xì ñà-ndúà cuní Dios, divi xínduu nahi ñani, nahi cùhe, te nahi dihi stnáí.

4

Iin ejemplu sàhà iin nècuàchì xitú

¹ Daaní, inga xichì nì quesaha Jesús dacuahá-yà nèhivì nùù mar. Te yucán nì nataca cuàhà gá-nè nùù-yà. Ñàyùcandúà, nì nana-ya iin lancha iin yuhù mar mà, te nì sàcòo-ya ini-nu. Te nèhivì cuàhà mà, yuhù mar mà nì sàcùndoo-ne.

² Dandu nì dàcuahá-yànè cuàhà iñàha, nì nacani-ya xì-nè cuàhà historia nduú ejemplu. Te dohó nì cachí-yà:

³ —Cunini-nsia. Nisa là iin nècuàchì xitú, nì quee-ne cuàhàn-ne chihi-ne.

⁴ Te nì sate uun-ne tata mà. Te dava-ña, nì còya nùù ichì. Dandu nì quixi laa, nì saxì-siá.

⁵ Te dava stná mà, nì còya nùù cavà ndé còò cuàhà ñuhù. Te yàchì nì xitià, vàchì có-ndòò cucún ñuhù yucán.

⁶ Doco na ní ducàn orá, nì ichà, vàchì cónì níhi yohá.

⁷ Daaní, dava stná tata mà, mahi iñù nì còya. Te na ní sahnu iñù mà, dandu nì dàdáhvia viu cuatì ma, ñàyùcandúà cónì cuàha.

⁸ Daaní, dava stná tata mà, nì còya nùù ñuhù vâha, te nì xitià, nì sahnua, te nì cuàha; dava-ña, òcò ùxin gà tantu nì cuàha; te dava-ña, ùni dico gà tantu, te dava-ña, ùhùn dico gà tantu nì cuàha.

⁹ Dandu nì cachi-yà xi-né:

—Ni cúnini vâha nsidaa-nsiá ñà-nduá cachí.

Ñà-nduá disàhà-xí nì nacani Jesús ejemplu, divi sàhà màsà cùndáà ini nècuàchi cahíchi ini-xi

¹⁰ Na ní ndòo mii Jesús xi ùxin ùi nècuàchi dacuahá-yá xi stná nècuàchi ndoó yatni, dandu nì ndàcàtnùhù-né nùù-yá sàhà ejemplu mà.

¹¹ Ñàyùcànduá, dohó nì cachi-yà xi-né:

—Mii-nsiá, sàni nihitáhvi-nsiá cundaà ini-nsia nansa iá ñuhiví ìi xí Dios, mate nisa la dèhé palabra sàhàmà antes. Doco nècuàchi dava ga, còo. Puru ejemplu icúmí nacani xi-né.

¹² Ducán iá sàhà-ñá màsà cúnitnùhu-ne, mate indéhe-né, te màsà cùndáà ini-né, mate iníni-né. Pues ducán icúmí cuu xi-né sàhà-ñá màsà ndédúmá ini-né, te cuicahnú ini Dios sàhà cuàchi-ne.

Ñà-nduá cuní cachi ejemplu sàhà nècuàchi xitú

¹³ Dandu nì cachi stná-yà xi-né:

—¿A ñá-cò-cùndáà ini-nsia sàhà ejemplu jaàn nduá? Pues nú cóo, dandu ¿nansa cui cundaà stná ini-nsia sàhà nsidaa ejemplu dava ga?

¹⁴ 'Pues cunaha-nsia, na ian quidá nècuàchi nì dandiàchi uun xi tata mà, ducán quidá stná nècuàchi chíhi xi Palabra xi Dios ini anima nèhiví.

¹⁵ Tata nì còyo nùù ichi mà nduú nahi nèhiví iníni xí palabra xi Dios, doco yàchi vaxi ñà-malu dacúxió-si palabra nì ndòo ini anima-nè mà.

¹⁶ Daaní, nahi tata nì còyo nùù cavà nduú nèhiví iníni xí palabra ìi, te luegu cudí ini-né sàhà-ñá.

¹⁷ Doco na ian cùù xi viu còo yohò-xí, ducán cuú stná xi-né. Iyuhu gá quidándéé ini-né nhicùn vii-né. Daaní, nú nì yáha-ne iin tnùndoho, ò nú quidáquiní nèhiví xi-né ñà-nhíicùn-né palabra xi-ya, dandu luegu naxícocuñin ini-né, te nacóo-né.

¹⁸ 'Daaní, nahi tata nì còyo mahi iñù nduú nèhiví iníni xí palabra ìi,

¹⁹ doco cuàhà gá nacáni ini-né sàhà vida xi-ne ñuhiví yohó. Te cudí stná ini-né dacáyà-né ñà-cuicà-né, vachi xího sàstnùhù-né cucumi-né cuàhà iñaha. Ñàyúcán nduá sadí xi nùù palabra xi Dios ñà-mà cùì nihindéá chindeá-né.

²⁰ Daaní, nahi tata nì còyo nùù ñuhù vâha nduú nèhiví iníni xí palabra ìi, te xiníndisá-né. Ñàyùcànduá, queámá ñà-nduú-né na iin viu nì cana vii, a sea nduú-né nahi viu nì cana còo ùxin tantu, te ò ñà-nì cana ùni dico tantu, te ò ñà-nì cana ùhùn dico tantu.

Iin ejemplu sàhà iin lámpara

²¹ Dandu nì cachi stná-yà xi-né:

—Nú xicàn-ndá quixi iin lámpara, dandu mà chícáni dèhé-ndàñá tixi iin canasta, ò tixi iin cama. Còo, cuiin vateá iin xaan ndé cutnuá icicutu.

²² Cunaha-nsiá, nsidaa ñà-nì la dèhé, icumíá tui vateá. Te nsidaa ñà-nduá quidá dèhé nèhiví, icumíá natui clarúá.

²³ Ni cúnini vâha nsidaa-nsiá palabra jaàn.

²⁴ Dandu nì cachi stná-yà xi-né:

—Cunini vâha-nsia na sáha xi-nsiá (ichi váha). Vachi divi vara chitácuhá-nsiá icúmí stná mii-nsiá nacuitacuhá-nsiá. Doco nú iníni vâha-nsia, dandu chicá nihitáhvi-nsiá cundaà vâha ini-nsia.

²⁵ Vachi nècuàchi sàñuhú (ñà-vâha) ini-xi, chicá más icúmí-né nihitáhvi-né; doco nèhiví có-ñuhú ndisa (ñà-vâha) ini-xi, ndé iyuhu (ñà-vâha) ñuhú ini-né, icumíá cuxio nsiha.

Iin ejemplu sàhà tata sahnú nama

²⁶ Dandu nì cachi stná Jesús:

—Na historia yohó, ducán iá stná ñuhiví ìi xí Dios. Nì chihi iin tiàa tata mahi itù-te.

²⁷ Na túinuù, dandu ndácòo-tè (nácòtò-teá); daaní sàñaá quidí-te. Doco tata mà, xitíá te sahnúá, mate có-cùndáà ini-te índù modo sahnúá.

²⁸ Vachi iin itu, miá cuàha. Dihna viu xitíá, dandu después caná sicàyòcò-ñà, te nachitu nùniá.

²⁹ Te nú sàni sisa vâha, dandu yàchi icúmí ndanchito cosecha, vachi sà-íá.

Ejemplu sàhà tata yutnù mostaza

³⁰ Dandu nì cachi stná Jesús:

—¿Índù iñaha cui cachi sàhà-ñá cundaà vâha ini-nsia nansa iá ñuhiví ìi xí Dios? ¿Índù ejemplu cui nacani sàhà ñà-cundaà ini-nsia nansa iá tiempu mà?

³¹⁻³² Pues, cunaha-nsiá, nahi tata yutnú mostaza, ducán iá tiempu mà. Vàchi tata mà, mate tata chicá cuati iá ñuhíví nduá, doco nú sàni chihi-ndañá, dandu sahnúá. Queé nahnú ndahà-nú, te vihi gá nducáhnúá nùu nsidaa gá ñà-tátá. Dècuèndè laa ndavá ansivi vaxi sàcùitándóo casi mahi ndahà-nú —ni cachi-yá.

³³ Cunaha-nsiá, cuahà gá ejemplu nahi ñà-jaàn ni nacani-ya xi nèhivì na dacuahá-yánè, segùn nansa ni sàà-nè cundaà ini-nè.

³⁴ Puru historia nduú nahi ejemplu ni nacani-ya xi-né, doco na ní ndòo mii-yá xi nècuàchi dacuahá-yá, dandu ni dátúí nsihi-ya sàhámà nùu-né.

Nansa ni dàcùcuñ Jesús tàchi, te ni nàcùñuhu dadí tècuí mar

³⁵ Na ní cuñàà quivì yucán, ni cachi-yá xi nècuàchi dacuahá-yá:

—Cùhùn-ndà yàha-nda ladu mar.

³⁶ Dandu ni dànácutià compañeru-yà nèhivì cuahà mà. Te mii-yá, nacua iá-yà ini lancha, ducán ni saca-neyà cuahàn-nè yàha-ne mar. Te cuahàn stná iin ùi gá lancha ndoó stná yucán.

³⁷ Doco después ni dàñà iin tàchi dàná, te ni nacuahnu todó tècuí, ni xinu-tè ndè ini lancha mà, sàdaaní chitu-nú.

³⁸ Doco mii-yá, indúhu-yá quídì-yà cahà-nú, ihí almohada dìni-yá. Dandu ni dànsicuihnu ini-nèyà, cachi-nè xi-yá:

—¡Ay! ¡Maestro! ¿A có-ndúlócò-ní ñà-vihini cui-ndà?

³⁹ Dandu ni ndacuiin-yà, ni càhàn-yà ni sadi-yà nùu tàchi mà, te ni cachi-yà xi tècuí mar:

—Ihí-ní ní coó, te ni ndúdádí.

Dandu luegu ni cucuiin tàchi, te ni nàcùñuhu dadí tècuí.

⁴⁰ Dandu ni cachi-yà xi nècuàchi yucán:

—¿Índù chuun yúhí guá-nsiá? ¿A có-càhví-nsiá xi Dios?

⁴¹ Dandu ni yúhí sàstnùhù nècuàchimà, te ni cachi-nè iin-ne xi inga-nè (sàhà-yá):

—¿Índù clase nèhivì nduú nècuàchi yohó, te dècuèndè tàchi xi mar iníni xí-né?

5

Nansa ni tavà Jesús ñà-malu ñuhú ini iin nècuàchi ñuu Gadara

¹ Daaní, ni sàà-nè xi-yá inga ladu mar nùu ñuu nècuàchi Gadareno.

² Te na ní quee-ya nùu lancha, luegu ni ndacùhun tnahá-yá xi iin tiàa ñuhú ñà-malu ini-xi, vaxi-ne dècuèndè mahi cueva ndé xi-indùxin nsi.

³ Vachi de por sí, yucán iá dahuun-ne. Te còò ni-iin cui chichuhi xi-né, mate cadena ni cundúá.

⁴ Cuahà xichi ni sàcùnuhni-nè xi manilla càa, xi stná cadena. Doco siempre sahdé-nèà, te dacuahí stná-nè manilla mà. Còò ni-iin cui nsida vù xi sàxinítnùnì-nè.

⁵ Nicanicuahàn ndui te ñuu ndáhi loco-nè, xicánúú-né yucú xi mahi cueva mà, danácuèhè-nè mii-né xi yùu.

⁶ Doco na ní xini xicà-né Jesús, ni dàyáà-nè ni sàà-nè nùu-yá, te ni sàcuin sisi-né nùu-yá,

⁷ ndáhi ndee-né quidá ñà-malu, te ni cachi-nè:

—Jesús, ¿ndiá cunduu-ní yùhù? (Yùhù ináhi mii-ní), Dèhemanì Dios iá diquì-xí ansivi nduu-ní. Sàhà Dios sacúndáhví nùu-ní, ¡màsà dándóhó-ní yùhù!

⁸ Pues ducán ni cachi nècuàchimà, vachi làcà ni cachi-yà xi-ñà:

—¡Cuxio yohó ñà-malu nùu tiàa yohó!

⁹ Dandu ni ndàcàtnùhù stná-yà nùà:

—¿Nansa nanu?

Te ni cachà:

—Ejército naní, vachi cuahà nduú-nsí.

¹⁰ Dandu cuahà gá ni sacundahví tiàa ma nùu-yá ñà-màsà tèchùun-yáñà cùhàn inga ñuu.

¹¹ Te yatni yucú yucán ni sandoo cuahà cochi, xixáhan-si.

¹² Ñàyúcandúá, ni sacundahvíà nùu-yá, cachá:

—Dayáha-ní nsiùhù ni cùhùn-nsi màcùñuhu-nsi ini cochi yucán.

¹³ Dandu ni dàndáà-yàñà. Ñàyúcandúá ni caquea nùu tiàa ma cuahàn, ni sàcùñuha ini cochi yucán. Nahi ùi mil ni sanduu-si. Daaní, carrera ni nuu nsidaa-si candiaa yucán, te ni còyo-si ini mar ni càhà-si.

¹⁴ Daaní, tè-xíndiaa xi cochi mà, ni yúhí-te; carrera mànuhù-té ni cachitnùhu-tè xi nècuàchi ini ñuu mà xi stná nècuàchi ndoó ranchu. Dandu nèhivì ndoó yucán, vaxi-ne cundehè-né ñà-ndúá ni cuu.

¹⁵ Ni quesaa nsidaa-né ndé iá-yá, te ni caxini-nè nècuàchi nisa ñuhu cuahà ñà-malu ini-xi, iá-nè, ndixí-né sicoto, sàni nàcòo nsihi sàxinítnùnì-nè. Dandu nèhivì yucán, ni cayúhí-nè.

¹⁶ Te nècuàchi nì caxini nansa nì cuu, nì nacani-ne xì nsidaa nèhivì mà sàhà cochi xì sàhà stnà tiàa mà.

¹⁷ Dandu nèhivì cuàhà mà, nì quesaha-né nì sacundahví-nè nùù-yá ñà-nì quèé dahuun-ya ñuu-nè.

¹⁸ Daaní, na sàni nana tu-ya lancha yucán, dandu nì càhàn nècuàchi nìsa ñuhu ñà-malu ini-xì, nì xicàn-nè áma cui cutnahá stnà-nè xì-yá cùhùn.

¹⁹ Doco cóni sàha-ya cùhùn-nè:

—Còo—cachì-yà—, xuhun-ní vehe-nì, te cachitnùhu-ní xì tnaha-ní ñà-cuàhà guá nì quida Stohò-ní Dios xì-ní, te nì cuhi ini-yá mii-ní.

²⁰ Ñàyùcàndúá, nì quee tiàa mà cuàhàn-nè inicutu ladu mà nani Decápolis, nì cachitnùhu-ne ñà-ndiaha guá nì quida Jesús xì-né. Te nsidaa nèhivì yucán, nì ndulocó-nè.

Nansa nì dānātiácú Jesús dēhe Jairo, te nì dāndúvaha stnà-yà iin nècuàchi ñahà

²¹ Dandu nì nayàha-ya ini lancha cuàhàn-yà inga ladu mar. Te yucán yuhù mar mà nì natata cuàhà sàstnùhù nèhivì nùù-yá.

²² Dandu yucán nì sàà stnà iin nècuàchi cusáhnù nùù iin veheñùhu, Jairo nani-né. Te nì tnàtuu-ne nùù-yá, nì tutuyuhu-né ñuhù nùù sàhà-yá,

²³ te nì sacundahví cuàhà-né nùù-yá, cachì-nè:

—Meru cucáhvì dèheyoquí. Cùhùn-ndà, chindàndòò-ní ndahà-ní dìqì-ñà sàhà-ñà nduvàha-ñà, te màsà cù-ñà.

²⁴ Ñàyùcàndúá, cuàhàn-yà xì-né. Te cuàhà gá stnà nèhivì cutnahá xì-yá nchìcùn stnà-nè cuàhàn, dècuèndè tnuu cuàhàn-nè xì-yá ñà-cuàhà guá-nè.

²⁵ Te cunaha-nsiá, mahì nèhivì mà cuàhàn stnà iin nècuàchi ñahà cuhí. Ûxìn ùi cuà sàcuàhàn-nè ndohó-né cuèhè nìi.

²⁶ Te cuàhà gá sàni ndoho-ne nì quida nècuàchi quidátátná, doco cóni nìhì nècuàchimà chindee-ñánè. Còo, chicá nì quida yaa cuèhè xì-ne, dècuèndè sàni dànsihí-né dìhùn xì-né sàhà.

²⁷ Doco na ní xinitnùhu-ne sàhà Jesús, nì quixi-ne ladu yàtà-yá mahì nèhivì cuàhà mà, te nì dàcùhùn ndahà-né nùù sicoto xì-ya,

²⁸ vàchi nì nacani ini-nè: “Nú nì dúcùn ndahí mate sicoto-ni xì-ya, vàtùni nduvàhi”.

²⁹ Te (ñà-ndàá nduá), luegu nì cucuìn nùù-né, te nì cuu ini-nè sàni nduvàha-ne cuèhè dana mà.

³⁰ Daaní, momentu mà nì cundaà stnà ini-yá sàni dāndúvaha iin nèhivì xì poder xì-ya. Ñàyùcàndúá, nì naxicocuìn duma-yá yàtà-xì mahì nèhivì cuàhà mà, te nì cachì-yà:

—¿Ana divì nì dúcùn ndahà-xì icà sicoto xì?

³¹ Dandu nècuàchi dacuahá-yá, nì cachì-nè xì-yá:

—¿A có-xìni-ní ñà-cuàhà guá nèhivì ndoó yohó, te yáha ga tnuu cuàhàn-ndà? Te nú ducán, dandu ¿ìndù chuun cachì-nì: “¿Ana nì dúcùn ndahà-xì icà sicoto xì?”?

³² Dandu nì xiconuù-yá nì indehè-yá, áma nàtùì nècuàchi nì quida mà.

³³ Te nècuàchi ñahà mà, ndé quidí cuisì-né ñà-yùhì-nè, vàchi ináhà-né ñà-nduá nì cuu xì ini-nè. Dandu nì tnàtuu-ne, nì sàcùin sisi-né nùù-yá, te nì cachì ndàà-nè xì-yá nsidaa ñà-nduá nì cuu xì-nè.

³⁴ Dandu nì cachì-yá xì-né:

—Hija, sàni nduvàha-ní ñà-nì xinindisa-ní. Vàtùni nùhù-ní contentu vichì. Iin-ni nì cúxíó cuèhè dana nìsa quida xì-ní.

³⁵ Na meru cachì-yá ducán, dandu nì caquesaa nèhivì vaxì vehe presidente xì veheñùhu mà, te nì cacachì-nè xì nècuàchimà:

—Sàni xìhì dèhe yoco-ní. Có-xìñùhù cuàhachuùn gà-ní maestru.

³⁶ Doco Jesús, cóni ndúlócò-yá sàhà ñà-nduá nì cachì-nè, cuisì-ní nì cachì-yá xì presidente mà:

—Màsà yùhì-ní. Cuisì cunihnu vaha ini-ní.

³⁷ Dandu nì cachì-yá ñà-màsà cùtnáhà gá nèhivì xì-yá, cuisì-ní Pedro, xì Jacobo, xì ñani Jacobo nani Juan.

³⁸ Te nì sàà-yá xì-né ndé vehe presidente mà, te nì xini-yá ndoó chitu nèhivì, yáha ga quidácuàhà-né, sacú ndee-né, te cána fuerte-nè.

³⁹ Dandu nì nsihvi-ya vehe, te nì cachì-yá:

—¿Índù chuun cána guá-nsia, te sacú guá-nsiá? vàchi cóni xìhì ñahà chii yohó. Quidí uun ni-ñà.

⁴⁰ Doco nècuàchimà, nì sàcùndiaa uun-neyà. Ñàyùcàndúá, nì tavà nsihí-yánè fuera, te nì saca-ya yuadíhà xì nècuàchi cutnahá xì-yá, nì yàha-ne ndé indúhu ñahà chíi mà.

⁴¹ Dandu nì tnii-ya ndahà-ñà, cachì-yá:

—Talita cumi —te cuní cachàmà dàhàn ñuu yucán: Yohó cachì xì, ndacuiin xá.

⁴² Dandu vichi vichi ni ndacuñ-nã ni nacacanu-ñã, vâchi nahi ùxin ùi cuiá xicá-ñã. Te nècuàchi cutnáhá xí-yá, ni candulocó sâstñuhù-né sâhá ñã-ndúá ni cuu.

⁴³ Doco mii-yá, ni chinaha-yánè ñã-màsà cáchí-nè xí nèhiví ñã-ndúá ni xini-nè. Dandu ni cachi-yá xí-né ni dácúxí-nèña.

6

Ñã-ndúá ni quida nèhiví ñuu Nazaret na ní ñuhù Jesús ñuu-yá mà

¹ Dandu ni quee Jesús yucán mànuhù-yá ñuu-yá, te nchícùn stná nècuàchi dacuahá-yá, ndacá tnáhã-né xí-yá cuàhàn.

² Te na ní sàà quiví descansu ñuu yucán, ni sàhàn-yá veheñuhu, te ni quesaha-yá dacuahá-yá nèhiví. Te na ní inini-ne ñã-ndúá ni cachi-yá, ni ndulocó-nè, cáchí-nè:

—¿Índü ni xini-ndã ni nihítáhví guá nècuàchi yòhó? Te ¿índü ni xini-ndã ni cunchichí guá-nè? ¿Te nansa iá stná milagru quidá-né?

³ Vâchi iin ana tûha yâcùn yutnú nduú-né. Te dihi-né nani María, te ñani-nè nduú Jacobo, xí José, xí Judas, xí Simón. Te ñahâcûha-ne, ¿a có-ndóó stná-nè yohó ndé ndòò-ndã?

Ducání ni cachi-nè ñã-ní cuduchi ini-nè sâhá-yá.

⁴ Doco ni cachi-yá xí-né:

—Iin ana cáhàn cuenta xí Dios, nú inga ñuu ni cáhàn-nè, dandu siempre quidáñuhú nèhiví ñuu mà-né, doco nèhiví ñuu mii-né, ò tnahã-ne, ò nèhiví vehe-ne, cóó, có-quidáñuhú-ñãné —ni cachi-yá.

⁵ Ñâyücândüá, mànicüi quida-ya milagru ñuu-yá mà, cuisí iin ùi nècuàchi cuhí, ni chitândóó-yá ndahã-yá diquí-né, te ni nduvâha-ne.

⁶ Te ni ndulocó-yá ñã-có-cùní nècuàchi ñuu mà cunindisá-né.

Nansa ni techuún Jesús nècuàchi dacuahá-yá ñã-dacutiã-nè palabra ìi

Dandu ni nacâhin-ya vuelta cuàhã ñuu cuati, ni dàcuahã-yá nècuàchi ñuu yucán.

⁷ Dandu ni cana-ya ùxin ùi nècuàchi dàcuahã-yá, te ni dândâcú-yá ñã-cutnahã ùi ùi-nè cùhùn. Te ni sâhatahví-yánè ñã-tavã-né ñã-malu.

⁸ Te ni cachi stná-yá xí-né ñã-còò ni-íñãha cunihí-ne cùhùn ichí mà, cuisí-ní bastón xí-ne; cóò morral, cóò pan, cóò dihùn cunihí-ne ini siuhmatixí-ne,

⁹ te ndisân uun ni cúnái-né. Te cuisí imindaa dùhnù cundixí-ne cùhùn.

¹⁰ Te ni cachi stná-yá xí-né:

—Nú cuàhàn-nsiã cundoo-nsiã iin vehe, dandu iin-ni cundoo-nsiã yucán ndè cachi sàà quiví quee-nsiã ñuu mà.

¹¹ Te nú có-cùní nèhiví quihin casú-nè cunini-ne, dandu quee-nsiã ñuu-nemà, te catù-nsiã sâhá-nsiã ñã-còyo yâcã ñuu mà. Vâchi ñã-jaàn cunduu testigu diquí-né quiví coo juicio xí-ne. Te yùhù cachí xí-nsiã, na sâà quiví ndâcàn Dios cuenta sâhá cuàchi, dandu chicá cuàhã castigu icúmi nècuàchímã nihí-né nùù nècuàchi (malu) ni sandoo ñuu Sodoma xí ñuu Gomorra sânahã.

¹² Dandu nècuàchi dacuahá-yá mà, ni caquihin-ne ichí cuàhàn-nè, ni càhàn-nè xí nèhiví ñã-ndiã ìcã-né naxicocuñí ini-nè sâhá cuàchi-ne.

¹³ Te ni tavã stná-nè cuàhã ñã-malu ñuhú ini nèhiví, te ni saquin stná-nè seña xí aceite òni cuàhã nècuàchi cuhí, te ni dândúvâha-ñãné.

Nansa ni xihí Juan Bautista

¹⁴ Ñã-cuàhã guá ní xitã fama xí Jesús, ñâyücândüá, ni xinitñuhu stná rey nani Herodes. Te sâhãmã ni cachi têmã:

—Sâni natiacu Juan Bautista, te ñâyücândüá quidá-né milagru.

¹⁵ Ducán ni cachi têmã. Doco dava ga nèhiví, ni cacachi-nè sâhá-yá ñã-divi Elías nisa ìa sânahã nduú-yá. Te dava ga-nè, ni cachi-nè ñã-iin nècuàchi cáhàn cuenta xí Dios nduú-yá, nahi nècuàchi profeta sânahã.

¹⁶ Doco Herodes mà, dohó ni cachi-te na ní xinitñuhu-tè sâhá-yá:

—Còó, divi Juan nduú-né, vâchi sâni natiacu-nè, mate ní quendodó òni-né ni quide.

¹⁷ Ducán ni cachi têmã, vâchi antes ni chicadì-te Juan, ni dândâcú-te nùù soldadu xí-tè, te ni tñii têmànè. Ñâyücândüá ni sâcùnuhni-nè cadena, te ni sâcündiadi-nè vehecãa. Pues nsidaa ñã-jaàn ni quida Herodes mà sâhá-ñã cuní-te ndòò vâha-tè nùù iin ñahã nani Herodías. Vâchi sâni nandahã-té xí-ñã mate ñahãdihí ñani-te Felipe nduú-ñã.

¹⁸ Ñâyücândüá ni cachi Juan xí-té:

—Cò-sâha Dios lugar coo-ní xí ñahãdihí ñani-ní.

¹⁹ Pues divi sâhá ñã-jaàn ni xini ùhí Herodías mà Juan, te cuní-ñã cahni-ñãné, doco mànicüi.

²⁰ Vàchi Herodes mà, ináhà-té Juan ñà-ndúú-né iin nècuàchì nihnú ndáá ini-xi, te ì stná ini-nè. Ñàyùcàndúá, yúhí-tené. Te divi sáhàjàn nì xidahan stná-te nècuàchìmà nùù ñahà mà. Te cudí stná ini-te cunini-tè ñà-ndúá cachi nècuàchìmà, mate cóni sáa-te cundaà vaha ini-te.

²¹ Doco nì sàà iin quivì nì cuu ofrecer nansa dandáñúhú ñahà màné, vàchi nì naxinu rey mà cuàh, te nì quida-tè iin vicò cahnú nì casaà cuàhà tè-cúsáhnú ñuu mà, xì cuàhà stná comandante capitán, xì stná cuàhà tècuicà ndoó ladu Galilea yucán.

²² Dandu nì quihvi dèheyoco Herodias mà ndé iá vicò, te nì itasaha sàstnùhù-ñá, nì dàcúdí ini-ña rey mà xì stná tè-xínduu visita xi-tè. Ñàyùcàndúá, nì cachi-te xi-ña:

—Ndéni iñàha nì cui cunú, càcùn-ñá nùù, te nihùn-ñá.

²³ Te nì chinaha-té Dios ñà-ndéni iñàha nì cui nì càcàn-ña, cuàha-tèñá, mate nì cundúá iin davatahvi ñuu ndé cusáhnú-te, cuàha-tèñá.

²⁴ Ñàyùcàndúá nì quee-ña cuàhàn-ña ndàcàtnùhù-ñá nùù dihi-ñá:

—¿Ndíá nduá càquin?

Te nì cachi dihi-ñá:

—Dini Juan Bautista càcùn —nì cacha.

²⁵ Ñàyùcàndúá, yàchi nì nansihvi ñahà chiì mà ndé iá rey mà, te nì xicàn-ña, cachí-ña:

—Dini Juan Bautista taxi-ní luegu, cunacaà ini iin charola cahnú —cachá.

²⁶ Dandu rey mà, cuàhà gá nì cuhuun ini-te, doco sàhà-ñá sàni dándáa-te, te sàhà stná visita ndoó yucán, ñàyùcàndúá có-cunì-te dama-tè ñà-ndúá nì cachi-te xi-ñá.

²⁷ Sáhàjàn vichi vichi nì techuún-te iin tè-cùhùn cahnì xì Juan, te cunihi tèmà dìni-né ndixi.

²⁸ Ñàyùcàndúá, nì sàhàn tèmà vehècàa, nì quendodò-té dìni-né, te nihí-teá ini iin charola nì nansihvi nì sàha-tè ñahà chiì mà, dandu mii-ñá, nì sàha-ña dihi-ñá.

²⁹ Daaní, na ní caxinitnùhu nècuàchì nisa dacuahá Juan, dandu nì casahàn itni-né nì naquihin-ne iquicúñú nsiì ma nì sùxin-ne nì chicao-nèà ndé nduú cueva xi nsiì.

Nansa nì dàcúxí Jesús ùhùn mìl nèhivì

³⁰ Daaní, nì cansiaa nècuàchì nì techuún Jesús cacanu, te nì canataca-nè nùù-yá, nì nacani-ne xi-yá nsidaa ñà-ndúá nì quida-ne xì ñà-ndúá nì chinaha-nè.

³¹ Dandu nì cachi-yá xi-né:

—Naha-nsià cùhùn cuaán-nda iin xaan ndé có-ndòò nèhivì, quetatu chiì-nsià.

Ducán nì cachi-yá, vàchi nì có-cúsáá gá-nè cuxi-ne, ñà-cuàhà guá nèhivì queé nsihvi nùù-né.

³² Ñàyùcàndúá nì nana-ya xi-né ini iin lancha ñà-cùhùn cuaán-yá xi-né iin xaan ndé còò iin.

³³ Doco nì xini nèhivì cuàhàn-yá, te cuàhà-né nì nacuni-nèyá, ñàyùcàndúá nì caquee-ne nsidaa ñuu nì dàyáa-nè, te dihna-ne nì sàà-nè nùù-yá.

³⁴ Ñàyùcàndúá, na ní quee-ya nùù lancha mà, nì xini-yá cuàhà gá-nè ndoó, te nì cuhi ini-yànè, vàchi nahi riì còò stohò-xi, ducán nduú-né. Ñàyùcàndúá, nì dàcuahá-yànè cuàhà iñàha.

³⁵ Daaní, na ní cuaà nì catnàtuu nèhivì siempre nchícùn xi-yá nùù-yá, cachí-nè:

—Vichì sàcuahàn nì cuaà, te lugar yohó, còò ni-iin vehe.

³⁶ Ñàyùcàndúá, ndaquindèè-ní xì nèhivì yohó ñà-nì cuítia-nè cùhùn-nè ndé rancho ò ñuu cuati ndoó yatni, te cuiin-ne ñà-cutiacu-nè, vàchi còò ñà-cuxi-ne lugar yohó.

³⁷ Dandu nì cachi-yá xi-né:

—Mii-nsià dacuxí-nsiánè.

Te nì cachi-nè xi-yá:

—¿A cùhùn-nsì xì ùi cientu dihùn plata, te cuiin-nsi pan dacuxí-nsinè?

³⁸ Dandu nì cachi-yá xi-né:

—¿Nadaa pan icúmi-nsià? Cuahán-nsià cundehè-nsià.

Ñàyùcàndúá, (nì ndàcàtnùhù-né), te na ní cundaà ini-nè, nì cachi-nè:

—Ùhàn, xì ùi siaca.

³⁹ Dandu nì dándacú-yá nì mácúndoo nsidaa nèhivì mà, cuaán cuaán iin iin grupu-nè nùù yùcù cuií.

⁴⁰ Te ducán nì quida-ne nì sàcúndoo yucùn-né, cientu cientu-ne, te dava cientu dava cientu-nè nùù iin grupu-nè.

⁴¹ Dandu nì tni-ya ùhùn pan mà xì ùi siaca ma, nì ndacoto ndiaá-yà dìqui-xí, te nì naquimani-yá Dios sàhà-ñá. Dandu nì dàcuàchí-yá pan mà nì sàha-ya nècuàchì dacuahá-yá, te mii-né, nì dasàn-nèà nùù nèhivì cuàhà mà; daaní, divi-ni ducán nì quida stná-yá xì ùi siaca, nì dàcuàchí stná-yàsi nùù-né.

⁴² Te nì xixi nsidaa-né nì ndenuu ini-nè.

⁴³ Dandu ni chivàha-ne ñà-ni cuyodò gá, pedazu siaca xi stná pedazu pan, te ni chitu ùxin ùi icà-ñá.

⁴⁴ Te cunaha-nsiá, ùhùn mil tiáa ni sanduu nêhivì ni xixi xi pan mà.

Nansa ni xica ndodò Jesús nuù tècuì mar

⁴⁵ Daaní, vichi duha ni cachi-yá xi nècuàchi dacuahá-yá ñà-ni mácuñuhu-ne ini lancha, te codonùu cueé-nè nuù-yá cùhùn-nè inga ladu mar dècuèndè ñuu Betsaida. Doco mii-yá, cuàhàn-yá danácuìtiá-yá nêhivi cuahá mà.

⁴⁶ Te ni nsihì ni ndaquindèè-yá xi-né, dandu ni nana-ya iin yucù ni xicàn tàhvi-yá nuù Dios.

⁴⁷ Daaní, na ní cuñaà, xicá fi lancha mà mahi mar. Doco mii-yá, mindaa-yá iá-yá ñuhù íchí.

⁴⁸ Dandu ni xini xicà-yánè ñà-ùhi gà dacacá-nènu xi yutnú iá nahi pala, vâchi caná tàchi ladu nuù-né. Ñâyùcándúá, sinduhá ni sàà-yá nuù-né, xicándódo-yá nuù tècuì mar, te nihnú ini-yá yâha-ya iin ladu.

⁴⁹ Doco na ní caxini-nè nansa xicá-yá nuù tècuì ducán, dandu ni càna ndee-né, vâchi duma nduá càhàn-né.

⁵⁰ Vâchi nsidaa-né, ni xini-nèyâ, te ni ndulocó-nè, yúhí cuàhà-né. Doco ni càhàn-yá xi-né, cachi-yá:

—Nacuàhandee inì-nsia, vâchi yùhù nduí; màsà yúhí-nsiá.

⁵¹ Dandu ni quècahnú-ya ini lancha ndé ndoó-né, te ni cucuiin tàchi mà. Ñâyùcándúá, cuàhà sàstnùhù ni ndulocó gà-nè.

⁵² Vâchi cóni sánihì váha ini-nè sàhà milagru ni nducuahá pan mà, vâchi ùhi mànihì ini-nè.

Nansa ni dàndúvâha Jesús cuàhà nècuàchi cuhí ñuu Genesaret

⁵³ Daaní, na sáni yâha-ya xi-né mar mà, dandu ni sàà-yá ñuhù íchí iin ñuu nani Genesaret.

⁵⁴ Te na ní quecoyo-ne xi-yá nuù barcu mà, dandu vichi vichi ni nacuni nêhivi ñuu mà-yá.

⁵⁵ Ñâyùcándúá, ni cadayáà-nè cuàhàn-nè inicutu ladu yucán, ni sàquihin-ne nècuàchi cuhí xi-ne, te nihí-né nècuàchimà vâxi nuù-yá itánduhù-né nuù camilla. Te ndéni ni cui ni xinitnùhu-ne iá-yá, divi yucán ni sàà-nè xi nècuàchi mà.

⁵⁶ Te na yâha-ya ñuu cuati, ò ñuu nahnú, te ò iin ranchu, o ndéni ni cui, yucán ni cachitánduhù-né nècuàchi cuhí xi-ne ichi, te ni xicàn-nè ñà-siquiera nuù sàhà sicoto xi-ya ni dúcùn ndahà nècuàchi cuhí mà. Te nsidaa ana ni dúcùn ndahà-xí ducán, ni nduvâha-ne.

7

Ñà-ndúá dacuidá cuàchi ndisa xi anima-ndà

¹ Daaní, ñuu Jerusalén ni caquee dava nècuàchi fariseu xi stná nècuàchi ley xi veheñùhu vâxi-ne, ni quesaa-nè nuù Jesús.

² Te ni caxini-nè nansa quidá nècuàchi dacuahá-yá, xixí-né comida xi-ne, te cóni ndáhá-né. Ñâyùcándúá, ni caxitnùhu-ne nècuàchimà. Vâchi modo jaàn nduhí ndahà-ndà (càhàn-né).

³ Vâchi nècuàchi fariseu mà, xi nsidaa gá nècuàchi raza Judea, nú màsà ndáhá-né, mà cúxí-né, vâchi ducán iá estilu xi xii-né chivâha-ne.

⁴ Te nú ni sàhàn-nè yâhvi, dècuèndè ndaha-ne, dandu cuxi-ne. Te cuàhà sàstnùhù gá estilu icúmí-nè chivâha-ne, vâchi icúmí-né nacate stná-nè taza, quidi, yoo, càa, cama.

⁵ Ñâyùcándúá, nècuàchi fariseu mà, xi stná nècuàchi ley xi veheñùhu, ni xicàn tnùhù-né nuù Jesús, cachi-nè:

—Nècuàchi dacuahá-ní, ¿índù chuun có-nchícùn-nè estilu xi xii-ndà? vâchi có-nduhí ndahà-né na xixí-né.

⁶ Dandu ni cachi-yá xi-né:

—Ñà-ndàá nduá ni cachitnùhu Isaiás sàhà mii-nsiá sàhana, vâchi dananí uun-nsia vâha-nsia. Pues ñà-yohó nduá ni cachi Dios, te ni tiaa Isaiás yucán: Nêhivi yohó, cui-sí yuhù-né quidáñùhù-né yùhù, màdì ini anima-nè, vâchi xica ié' cahan-né.

⁷ Cahvi-né yùhù tuxí-né, doco có-ndiáá', vâchi nêhivi úun nduú ana ni quidavâha xi ley chináhá-nè nêhivi, cachí Dios.

⁸ Vâchi mii-nsiá, mà ùhi nacóo nihni-nsia ñà-ndúá ni dàndácú Dios, doco ñà-ndúú ley xi nêhivi úun, ñà-jaàn ndisa quidá-nsiá cumplir. Costumbre xi-nsia nduú ñà-nàcáté-nsiá quidi, xi taza, te cuàhà gá costumbre icúmí stná-nsiá nahi ñà-jaàn.

⁹ Dandu ni cachi gà-yá xi-né:

—Mii-nsiá, tuxí inì-nsia vâtùni nacoó-nsia ñà-ndúá ni dàndácú Dios, te cui-sí estilu xi mii-nsiá chivâha-nsia.

¹⁰ (Cundehè-nsiá casu yohó): sàhana nì cachi Moisés ñà-ìcúmí coo tñũuhu xi-nda nùu yuadhí-ndá, te nú nì cáhàn úhì iin nèhivì ñìquì iin yuadhí-nè, dandu icúmí-nè cui-nè. (Ducán nì cachi Dios.)

¹¹ Doco tucu cachi mii-nsiá, vâchi cachi-nsiá vâtùni cachi iin nèhivì xì yuadhí (ndahví-nè): “Mà cúí chindeí mii-nsiá xì ñà-ndúá icúmí, vâchi sàni cachi sàhà nsidaámà ñà-ndúá ñìhùn ñì; vâchi sàni cachi: Corbán nduá, te cuní cachàmà, ñìhùn xì Dios nduá”.

¹² Te nú ducán nì cachi nècuàchìmà, dandu có-sàha ga-nsiá chindee gá-nè yuadhí-nè (xì ñìhùn mà).

¹³ Ñâyücàndúá, sàhà estilu xi-nsiamá, iladu sàni ndòo ley ñì mà, te cuisì estilu nì ndòo nùu-nsiá chívàha-nsiá. Te cuàhà gá estilu tñaha ñà-yúcán icúmí stná-nsiá —nì cachi Jesús.

¹⁴ Dandu nì cana-ya nèhivì cuàhà mà ñà-tñàtuu-ne nùu-yá, te nì cachi-yà xì-né:

—Cunini nsidaa-nsiá, te cundaà vâha ini-nsiá:

¹⁵ mà cúnsidá cuàchi nì-iin nèhivì sàhà ñà-ndúá xixí-né. Còó. Ñà-ñìhnú ini anima-nè, te quidá-néà, divi ñà-jaàn nduá dacuidá cuàchi xì anima-nè.

¹⁶ Nì cúnini vâha nsidaa-nsiá.

¹⁷ Dandu nì yâha-ya ini vehe, te nì ndòo nèhivì cuàhà mà tùvèhé. Dandu nì ndàcàtnhù nècuàchì dacuahá-yá nùu-yá ndiá ndúá cuní cachi ejemplu mà.

¹⁸ Te nì cachi-yà xì-né:

—¿A có-sànhì stná ini mii-nsiá? Cunaha-nsiá, ñà-íá fuera iquicúñú-ndà, nú nì queá yuhù-ndá, mà cúí dacuidá cuàcha-ndó nùu Dios.

¹⁹ Vâchi màdi ini anima-ndá quíhvía. Còó, tixi-nda cuàhàn, dandu después queá.

Ducán nì cachi-yà sàhà-ñà cundaà ini-nda comida vù nduú nsidaa clase ñà-cutiacu-nda, màdi cuàchi nduá cuxi-ndañá.

²⁰ Dandu nì cachi stná-yà:

—Ñà-ndúá ñìhnú ini nèhivì, te queá anima-nè, divi nduá dacuidá cuàchi xi-né.

²¹ Vâchi anima nèhivì ñìhùú cuàchi-ne, te sàhà ñà-ñìhámà ini-nè, ñà-yúcàndúá quidá stná-nè cuàhà ñà-cò-ndiáà; vâchi nacání quini ini-nè, te ò cáhàn-nè xì nècuàchì cóni nándàhà xi-né, te ò dava-ne, uun-ni ndóo-né xì ndé nì nèhivì ní cui; te dava-ne, sahni stnahá-né,

²² ò xidá cuíhná-nè; te xího stná-nè ñà-ìcúmí ñànìtnaha-ne; quini quidá stná-nè xì ñànìtnaha-ne, te dandahví stnahá stná-nè; tùha quini stná-nè, te có-cùcáhàn nùu-né; te cuàhà-né, cúmbidia stnahá stná ini-nè, te cáhàn quini-ne ñìquì ñànìtnaha-ne; cuadú stná-nè, te nacání ndévàha ini-nè.

²³ Pues ducán quidá-né, vâchi ñìhùú nsidaájàn ini anima-nè, te na quidá-néà, dandu dacuidá cuàcha-nè —nì cachi-yà.

Nansa nì xinindisá iin nècuàchì ñahà inga ñuu icúmí xì inga religión

²⁴ Dandu nì quee Jesús ladu yucán cuàhàn-yà ladu ñuu Tiro xì ñuu Sidón. Te yucán nì sàà-yà visita iin vehe, doco có-cùnì-yà cundaà ini nèhivì ñà-íá-yà yucán; doco mànicúì coo dèhé-yà.

²⁵⁻²⁶ Vâchi vichi vichi nì xinitnùhu iin nècuàchì ñahà inácaa iin ñà-malu ini dèheyoco-xì. Iin nècuàchì inga ñuu nduú-né, iin ñuu nani Sirofenicia. Te na ní sàà-nè ndé íá-yà, nì sàcùìnn sisl-né nùu-yá, nì sacundahví-nè nùu-yá áma táva-yà ñà-malu anima dèhe-ne.

²⁷ Doco nì cachi-yà xì-né:

—Dìhna icúmí cutahví dèhe (ñuu nsiùhù, dandu después nèhivì inga ñuu), vâchi ducán íá na ian xixí ñà-cuati. Dìhna cuxi mii-vé, te ndenuu ini-vè, dandu después cuxi sìhina cuati. Vâchi mà vâha cuxio dità-vé, te cuxi-siá.

²⁸ Doco nì cachi tu nècuàchìmà xì-yà:

—Ñà-ndáà nduá, Señor. Doco cunaha-ní, dècuèndè stná sìhina xicánúú tixi mesa, ñìhì stná-sì iyuhu xèhé dità cóyo ndé xixí dèhe-nda. (Ñâyücàndúá, chindee sacu stná-ní yuhù.)

²⁹ Dandu nì cachi-yà xì-né:

—Vâtùni cachi-ní. Ñâyücàndúá, xuhun-ní vehe-ní, vâchi sàni quee ñà-malu nùu dèhe-ní.

³⁰ Daaní, mànhù nècuàchìmà vehe-ne, te nì xini-nè indúhu víi dèhe-ne cama, vâchi sàni cuxio ñà-malu nisa dandoho-xi-ñá.

Nansa nì nduvàha iin nècuàchì dòhò, te ihin stná-nè

³¹ Dandu nì quee Jesús ñuu Tiro mà, nì yâha-ya ñuu Sidón, xì stná ladu Decápolis, te nì nasaa-yà mar íá Galilea.

³² Te nèhivì yucán, nì saca-ne iin nècuàchì dòhò có-cáhàn vù stná, te nì casaa-nè nùu-yá, nì sacundahví-nè ñà-nì chindánuu-yà ndahá-yà ñìni nècuàchìmà, te nduvàha-ne.

³³ Dandu nì táva cuaán-yà nècuàchìmà, te nì dàquìhvi-ya ñìnindáhá-yà ini tùtnù-né. Te nì dàcóyo-ya tédii-yà ñìnindáhá-yà nì chituu-ya nùu yáà-nè.

³⁴ Dandu ni ndacoto ndiaá-yà dìquì-xí, te ni sàcàn ini-yà, cachí-yà xì tiàa ma dàhàn ñuu mà:

—¡Efata! —ñà-nduá cuní cachà: Ni nuná tùtù-ní.

³⁵ Dandu ni nuna tùtù-né, te ni nduvàha stná yáá-nè, vètùni càhàn vì-né.

³⁶ Te ni cachi-yà xì nsidaa nèhivì ndoo yucán ñà-màsà cáchí-nè ni-ìñàha xì nèhivì, doco entre más cachí-yà xì-né ducán, vihi gá cuàhà ni sate tñuhu-ne sàhà-yá.

³⁷ Te yáha ga ni ndulocó nsidaa nèhivì, cachí-nè:

—Vii gá quidá-yá nsidanicuú ìñàha. Dècuèndè tètòhò natiácú quidá-yá, xì stná tè-ìhin dãnácàhàn-yà.

8

Nansa ni dàcuxí Jesús cùmi mìl nèhivì

¹ Quivì yucán ni nataca tu cuàhà sàstnùhù nèhivì, doco còò ni-ìñàha cuxi-ne. Ñàyùcànduá, ni cana Jesús nècuàchì dacuahá-yá, te ni cachi-yà xì-né:

² —Yùhù cuhí inì nèhivì yohó, vèchi sàcuàhàn-ndà ùni quivì ndoo-né cutnàhà-né xì-ndà yohó, te còò cá ñà-cuxi-ne.

³ Te nú ni dãnàcutiè-nè nùhù-nè vehe-ne, vihini cuità-nè ichì, vèchi có-xixí-né, te xica ní caquixi dava-ne.

⁴ Dandu ni naxiconihí nècuàchì dacuahá-yá nùu-yá:

—Doco ¿índù nihi-ndà ñà-dacuxi-ndané? vèchi yucú nduá yohó.

⁵ Dandu ni xicàn tñùhù-yá nùu-né:

—¿Nadaa pan nihi-nsiá?

—Ûsà-ñà iá —ni cachi-nè.

⁶ Dandu ni dãnàdácú-yá ni mácùndoo vìi nsidaa nèhivì mà ñuhu. Te ni tñii-ya ùsà pan mà, ni naquimani-yá Dios sàhà, ni mì dàcuàchí-yañà. Dandu ni sàha-ya nècuàchì dacuahá-yá, te mìi-né, ni dasàn-néa nùu nèhivì cuàhà mà.

⁷ Te ni la stná iin ùi siaca cuati; ñàyùcànduá ni naquimani stná-yà Dios sàhà-sí, te ni cachi-yà xì nècuàchì mà ñà-dasàn stná-nèsi nùu nèhivì.

⁸ Dandu nèhivì cuàhà mà, ni caxixi nsidaa-né, te ni ndenuu ini-nè. Te después, ni dàtácá-nè ñà-nduá ni cuyodò gá, te ni chitu ùsà canasta-ñà.

⁹ Te nèhivì ni caxixi ma, nahì cùmi mìl ni sanduu-ne. Daaní, na sáni dãnàcutià-yà nsidaa nèhivì mà,

¹⁰ dandu ni nana tu-ya iin lancha xì nècuàchì dacuahá-yá cuàhàn-yà xì-né ndè ladu ñuu Dalmanuta.

Nansa ni xicàn nècuàchì fariseu ñà-quida Jesús iin milagru cundehè-né

¹¹ Daaní, ni casaà nècuàchì fariseu nùu-yá, te ni quesaha-né cuáà-nè xì-yá, dasaá-nèya xicàn-nè ñà-quida-ya iin milagru xi Dios cundehè-né.

¹² Dandu ni sàcàn cuàhà ini-yà, te ni cachi-yà xì-né:

—Mii-nsiá xì dava ga nècuàchì ñuu yohó, ¿índù chuun xicàn guá-nsiá quide iin milagru cundehè-nsiá? Yùhù cachí xì-nsiá, mà sàà coo ni-iin milagru cundehè-nsiá.

¹³ Dandu ni nacoo uun-yanè, ni ndècàhnu-ya ini lancha inga xichi, te ni quihin-ya ichì cuàhàn-yà inga ladu mar.

Nansa ni dãnínúú ini Jesús nècuàchì dacuahá-yá milagru sàhà pan ñà-màsà nácání gá ini-nè sàhà nansa nihi-nè ñà-cutiacu-nè

¹⁴ Cunaha-nsiá, sàni nandòdò nècuàchì dacuahá-yá cunihì ga-nè pan cùhùn ini lancha mà. Cuisi iin-nia nihi-né cuàhàn.

¹⁵ Dandu ni cachi-yà xì-né:

—Cundehè-nsiá, cuidadu gá ni cùndóó-nsiá sàhà tàtnà nsidátáchí xí pan xi nècuàchì fariseu xi stná Herodes.

¹⁶ Dandu ni quesaha-né ni ndatnuhu-né, cachí-nè:

—Ádi ñà-còò pan nihi-nda vèxi, ñàyùcànduá cachí-yà xì-ndà ducán —cachí-nè.

¹⁷ Sàhájàn na ni cundaà ini-yà ñà-nduá ndatnúhù-nè, dandu ni cachi-yà xì-né:

—Cò-xiñùhù ndatnuhu-nsiá sàhà-ñà còò pan nihi-nsiá vèxi. ¿A có-nsinúú inì-nsia (ñà-nduá ni xini-nsiá)? Yùhù xiní tãñàha ga cundaà ini-nsia. ¡Na cueé guá sánihì inì-nsia!

¹⁸ Iá nduchìnúú-nsiá, ñàyùcànduá xiñuhu cundehè-nsiá. Te iá stná tùtù-nsiá; xiñuhu cunini-nsia. ¿A có-nsinúú inì-nsia nansa ni cuu daa?

¹⁹ Na ní dasín ùhùn pan, te ni xixi ùhùn mìl tiàa, ¿nadaa ga icà pedazu pan ni ndoo ni dàtácá-nsiá?

—Ûxin ùà —cachí-nè.

²⁰ Dandu ni cachi tu-ya:

—Na ní dasín usà pan nì caxixi cùmi mil nèhivì, ¿nadaa ìcà pedazu pan nì dàtácá-nsià?

—Ûsà —cachí-nè.

²¹ Dandu nì cachi tu-ya xì-né:

—¿A táñâha ga mànihì inì-nsia?

Nansa nì dândúvâha Jesús iin nècuàchì cuaá ñuu Betsaida

²² Dandu nì sàà-yà xì-né ñuu Betsaida, te nèhivì ndoó yucán, ndacá-né iin nècuàchì cuaá nì quesaa nùù-yà, sacúndáhvì-nè ñà-nì chítúú-yà ndahà-yà nùù-né, te nì ndúvâha-ne.

²³ Ñâyücàndúá, nì tnii-ya ndahà nècuàchìmà, te nì tavà-yánè fuera ñuu tii ma. Dandu nì dàcùchì-yà tèdii-yà nduchinúù-né, te nì chituu-ya ndahà-yà ndé cuhí nùù-né. Dandu nì ndàcàtnùhù-yà nùù-né, a sámi natùinuù-né, á coó.

²⁴ Dandu nì ndacoto-ne, te nì cachi-nè:

—Vâtùni indéhi nèhivì, xicánúú-né, doco na íá yutnù, ducán ndáa-ne.

²⁵ Dandu, nì nachituu-ya ndahà-yà nduchinúù-né, te nì indehè nsíi-né. Te momentu yucán nì nduvâha nduchinúù-né, te nì natù nina.

²⁶ Dandu nì cachi-yà xì nècuàchìmà ñà-nì nùhù-nè vehe-ne, doco màsà yâha-ne ñuu tii ma, nì màsà cáchì-nè xì nèhivì ndoó yucán.

Nansa nì cachi Pedro ñà-xinndísâ-né divi Cristu nduú Jesús

²⁷ Daani, cuahàn-yà xì nècuàchì dacuahá-yà ndè ñuu cuati ndoó yatni ñuu Cesarea de Filipo. Te na cuahàn-nè ichì, dandu nì xicàn truhù-yà nùù-né, cachí-yà:

—¿Ana nduú yùhù, cachí nèhivì?

²⁸ Te nì cachi-nè xì-yà:

—Dava-ne cachí-nè Juan Bautista nduu-ní. Te dava-ne cachí-nè Elías nduu-ní, te dava ga-nè cachí-nè ñà-ndùù-ní nahi profeta sâhana.

²⁹ Dandu nì cachi-yà xì-né:

—Doco mii-nsiá, ¿ana nduú cachí-nsià?

Dandu nì cachi Pedro:

—Divi Cristu (nì quixi diquì-xì) nduu-ní.

³⁰ Dandu nì sàcùnaha nsidaa nècuàchì dacuahá-yà mà ñà-màsà cáchì-nè xì nèhivì dava ga ni-iin palabra mà.

Nansa nì cachitnùhu Jesús icúmí-yà cui-yà

³¹ Dandu nì dàtúí-ya nùù-né nansa icúmí cuu xì-yà después. Nì cachi-yà xì-né ñà-mii-yà ana nduú Tnaha Nèhivì Ñuhivì, icúmí-yà ndoho cuahà-yà. Vâchì tè-sâhnú xidandacú, xì stná dùtù xícusahnú, xì stná nècuàchì ley xi veheñùhu, nsidaa-né icúmí-nè cahíchì inì-nèyà, dandu (càcàn-nè) cahni nèhivì-yà. Doco tixi ùni quivì icúmí-yà natiacu-yà,

³² nì cachi-yà, càhàn vate-yà xì-né ducán. Ñâyücàndúá, nì tavà cuaán Pedro-yà, nì cachi-nè xì-yà ñà-màsà cáchì-yà ducán.

³³ Doco nì nacuíco-yà ladu yàtâ-yà, nì indehè-yà dava ga nècuàchì dacuahá-yà, te nì càhàn duchi inì-yà xì Pedro, cachí-yà:

—Cuxio-ní nùí, vâchì nahi ñà-malu Satanás nduu-ní. Có-nìhnú vâha inì-ní Dios. Cuisi chuun xi nèhivì ñuhivì nihnú inì-ní.

³⁴ Dandu nì cana-ya nècuàchì dacuahá-yà xì dava ga nèhivì ndoó yucán, te nì cachi-yà xì-né:

—Nsidaa ana cuní cunchicùn xí, xiñuhu nacoó-ne ñà-ndúá cuní inì-ni mii-né quida-ne, te cunchicùn-nè yùhù, quida-ne cuenta na ian nsidá stná-nè cruz xì-ne ñà-cui stná-nè xí.

³⁵ Vâchì nú cuní iin nèhivì dacácu-ne vida xì-ne, cutu ñà-dandáñúhù-nêmà cundua. Doco nú nì cui-nè sâhá yùhù ò sâhá razón ndiaha xí, dandu ñà-sàni càcu ndisa vida xì-ne nduá.

³⁶ Vâchì mate ní nihì iin nèhivì nsidaa ñà-íá ñuhivì, doco ní mà sâá-mà cundua ñà-vâha xì-ne nú màsà sâá stná anima-nè càcua nùù Dios. Cóó, mà cúí.

³⁷ Te ò nú nì cuní stná iin nèhivì nacuiin-ne anima-nè, cóó, mà cúí.

³⁸ Vâchì nèhivì tiempu vichì, nacóó-né Dios, te xidá cuàchì-ne. Ñâyücàndúá, iin nècuàchì íá mahì nèhivì malu ndoó vichì, te cucáhàn nùù-né yâha-ne ladu xí, te ò cucáhàn nùù-né cunini-ne palabra xi, ndahví-nè, vâchì nú ducán, dandu yùhù ana nduú Tnaha Nèhivì Ñuhivì, icúmí stnáí nacuaí mii-né quivì naxicocufín. Vâchì icúmí naxicocufín ñuhivì yohó, cutnahì xì ángel ì-xí quixi, te ndiaha gá icúmí nanchií quida Yuamání.

9

¹ Dandu nì cachi stná-yà xì-né:

—Palabra ndàcuisi nduá yohó cachitnùhi xì-nsiá, ñà-dava mii-nsiá nècuàchì itá yohó, antes cui-nsiá icúmí-nsiá cuni-nsiá cusahnú fuerte Dios xi poder xi-ya —nì cachi-yà.

Nansa ni nadama Jesús mii-yá ni natnuù nihni ndiaha-yá

² Daaní, ni yàha iñu quivi, dandu ni saca-ya Pedro, xi Juan, cuàhàn cuaán-yá xi-né ndè dìni iin yucù ducún, te yucán ni nadama-ya mii-yá; tucu ni nàcùnàhà-yà ni xini nècuàchimà.

³ Ni nducuxín yaa sìcoto xi-ya, te ni nanchiù yéhà. Na cuxín yaa ñà-nduù yùhà (dìni yucù), ducán ni nducuxán. Còò ni-iin nèhivì ñuhiví cui nsida cuxín xán ducán.

⁴ Daaní, yucán ni ndecoyo stná nèhivì (sàhaha) nani Elías xi Moisés, ndatnúhù-né xi-yá.

⁵ Dandu ni cachi Pedro xi-yá:

—Maestro, ñansicáhàn-ndà ndoo-nda yohó! Chicá vaha quida vaha-nsi ùni siahva, ian coo mii-ní, te inga coo Moisés yohó, te inga coo stná Elías yohó —ni cachi-nè.

⁶ Doco ñà-yáha guá yúhi nsidaa-né, ñàyùcànduà ni cóni cùndàà ini Pedro nansa cachi-nè.

⁷ Daaní, ni nuu iin vicò yucán, te ni dàhvi nsidaa-né vicò mà. Dandu ni tiacu-nè càhàn iin ana càhàn mahiá, cachi-yá:

—Dèhemaní nduú ana yohó. Cunini-nsia ñà-nduà cachi-yà.

⁸ Daaní, ni ndacoto nècuàchì dacuahá-yá, doco na iin cachi còò cá iin ni xini-nè, ndé làcà mii-yá iá yucán.

⁹ Daaní, ni naquihin-ya ichi mànuu-ya xi-né yucù yucán. Te ichi mà ni dandàcú-yá nù-nè, cachi-yá:

—Masà nácánì-nsiá xi nèhivì ñà-nduà ni xini-nsia dècuèndè nú sàni natiacu yùhù ana nduú Tnaha Nèhivì Ñuhiví.

¹⁰ Ñàyùcànduà, ni chivàha nècuàchimà chuun jaàn ini anima-nè, doco nacánì cuàhà ini-nè nansa coo ñà-natiacu-yá.

¹¹ Dandu ni xicàn tñùhù-né nù-yá, cachi-nè:

—¿Índù chuun cachi nècuàchì ley xi veheñùhu ñà-dihna icúmí Elías naxicocuñ-nè?

¹² Dandu ni cachi-yá xi-né:

—Ñà-ndàà nduá, dihna icúmí Elías naxicocuñ-nè, te nsida vii-né nsidaa chuun có-íá vii. Doco ñansa cachi stná tutu ì sàhà yùhù? Pues nacániamà nansa icúmí ndohi xi nansa icúmí nèhivì cahíchi ini-nè yùhù.

¹³ Doco cunaha-nsiá, sàni quixi Elías mà. Doco nèhivì, ni quida ndevàha-ne xi nècuàchimà nacua ni cudì ini-nè, vachi ducán sàni cachitñuhu tutu ì.

Nansa ni tavà Jesús iin ñà-malu inácaa ini iin tèchii

¹⁴ Dandu ni nasaa-yá xi compañeru-yá ndé ni ndoo dava ga nècuàchì dacuahá-yá. Te yucán ni xini-yá ndoo cuàhà nèhivì sàni nataca nù nècuàchimà. Te ndoo stná nècuàchì ley xi veheñùhu, náá tnahá-nè xi nèhivì xi-yá mà.

¹⁵ Te na ní xini nèhivì cuàhà mà mii-yá, luegu ni ndulocò nsidaa-né, te ni cadayà-nè vaxi-ne, ni casàhù-nè xi-yá.

¹⁶ Dandu ni ndàcàtñùhù-yá nù-né:

—¿Ndíá ndatnúhù guá-nsiá xi nècuàchì yohó?

¹⁷ Dandu ni càhàn iin ana iin mahì nèhivì cuàhà mà, cachi-nè:

—Maestro, yohó ndaquí dèhi vaxi nù-ní, vachi inácaa iin ñà-malu ini-te, te sadiá nù-té, mà cù càhàn-te.

¹⁸ Te ndéni ni cui iá-te, vaxa sahnì ihá-te, ducán-te, dandu queé chihñù yuhù-té, saxíndiaá tnahá nùhu-té, te nduyútnú tehe-té. Te sàni xicàn tàhvi nù nècuàchì dacuahà-ní ñà-tavà-néà, doco mànicúí.

¹⁹ Dandu ni cachi Jesús:

—Mii-nsiá, mà túha-nsia cunindisá-nsiá. ¿Nadaa ga quivi icúmí coi xi-nsiá, te quidandee gá stná ini sàhà-nsiá? Pues cundaca-nsiáte quixi núí.

²⁰ Dandu ni saca-ne tèchii ma vaxi nù-yá. Doco na ní xini ñà-malu mà mii-yá, luegu ni sahnì ihá-te, ñàyùcànduà ni sàcasàn-té, natúí nihní-te, te caná chihñù yuhù-té.

²¹ Dandu ni xicàn tñùhù-yá nù yua-té, cachi-yá:

—¿Nadaa tiempu sàcuàhàn-ndà ndohó-te ducán?

Dandu cachi yua-té:

—Ndè tii-té.

²² Te cuàhà xichi nduá-te mahì ñuhu quidá ñà-malu. Ndè stná ini yùte sàcasàn-té, vachi cuníà cahniá-te. Ñàyùcànduà, nú vátùni chindee-ní nsiùhù, dandu cundehè ndahví-ní nsiùhù, te quida mani-ní xi-nsi.

²³ Dandu ni cachi Jesús xi-né:

—Cuisi cuníà cunindisa-ní, te vátùni. Vachi iin nècuàchì xinindisá, vátùni nihitáhvi-né nsidaa ñà-vàha xicàn-nè.

²⁴ Dandu luegu ni sacu yua-té, te ni càhàn fuerte-nè, cachi-nè:

—Yùhù, xiníndísê vichi; te nú cô-sâi cunindísá vâhi, dandu chindee-ní yùhù ñà-ní cúnindísá gué’.

²⁵ Dandu ni xini Jesús ñà-vihi gá cuàhà nèhivi natáca. Ñàyúcàndúá, ni dàndácú-yá ni sadi-yà nùù ñà-malu mà, cachí-yà:

—Yohó ñà-malu quidá quini xi téchii yohó ñà-mà cùi cáhàn-te, te có-tiácú-te, nacao dahuun-tè, te màsà nácíocúin gò nansihvu inì-te.

²⁶ Dandu yáha ga ndee ní ndàhià, ni dàndácúchá`-te, te ni quea cuàhàn. Doco nahi ana ni xihì ni ndòo-tè. Ñàyúcàndúá, cuàhà nèhivi ni cachí-nè:

—Sàni xihì dahuun-tè.

²⁷ Doco ni tnii-ya ndahà-té ni ditá-yà, te ni dàndácúin-yàte.

²⁸ Daaní, ni quihvi cuaán-yá xi nècuàchì dacuahá-yá ini iin vehe, te yucán ni xicàn tnùhù-né nùù-yá, cachí-nè:

—Índù chuun mànicúì tavà nsiùhù ñà-malu mà (nùù-te)?

²⁹ Dandu ni cachí-yá xi-né:

—Mànicúì, vâchi ñà-malu tnaha quisi mà, có-queá nansa ni ni cui, cuisì nú ni cacán tàhvi-nsiá nùù Dios, te cunihiì stná-nsiá cundoo dòcò-nsiá.

Nansa ni cachitnùhu Jesús inga xichi ñà-icúmí-yá cui-yá

³⁰ Dandu ndacá-yá nècuàchì dacuahá-yá cuàhàn-yá xi-né ndè ladu Galilea. Doco cuàhàn dèhé-yá, vâchi có-cúni-yá cundaà ini nèhivi índù xicánúú-yá.

³¹ Te tiempu mà chináhá stná-yá nècuàchì dacuahá-yá mà (sàhà nansa icúmí-yá cui-yá), te dohó ni cachí-yá xi-né:

—Yùhù ana nduú Tnaha Nèhivi Ñuhiví, icúmí yâhi ndahà nèhivi (malu), vâchi iá iin tiàa icúmí quida xí entregar ñà-cahni nèhivi yùhù; doco tixi ùni quivì icúmí natiacu.

³² Pues divi nduá ni cachí-yá, doco cóni sàà nècuàchimà mànihì ini-nè ñà-nduá cuní cachàmà. Te yúhì stná-nè ndacàtnùhù-né nùù-yá sàhà-ñá.

Nansa ni cachi Jesús ana chicá ndiaá

³³ Dandu ni sàà-yá xi-né ndè ñuu Capernaum. Te na iá-yá ini iin vehe yucán, dandu ni xicàn tnùhù-yá nùù-né, cachí-yá:

—Índiá nduá ndacàtnùhù tnahá guá-nsiá ichì vâxi-nda?

³⁴ Doco dadí úun ni ndòo-ne, vâchi ichì mà ni cuàà-nè ndacàtnùhù tnahá-né índù nècuàchì chicá ndiaá.

³⁵ Ñàyúcàndúá, ni sàcòo-ya, te ni cana-ya nsi-úxin ùi-nè, te ni cachí-yá xi-né:

—Íin ana cuní cunduu ana chicá ndiaá, xiñuhu cunihnu ini-nè nduú-né ana chicá có-dàndácú, te cunucuachi stná-nè nùù nsidaa nècuàchì dava ga.

³⁶ Dandu ni cana-ya iin tètii ni chicani-ya mahì nsidaa-né, te ni numi nihni-yàte, cachí-yá xi-né:

³⁷ —Nú sàhà yùhù quidáñúhù nèhivi iin tètii nahi tè-yohó, dandu davani queá na ian yùhù quidáñúhù-nè. Te nú yùhù quidáñúhù-nè, dandu iin-ni quee stná ñà-quidáñúhù stná-nè ana ni techuun-xí vâxi.

Nècuàchì có-xini ùhi xi-nda, favor xi-nda iá-nè

³⁸ Dandu ni cachí Juan xi-yá:

—Maestro, ni xini-nsi iin tiàa tavá xi ñà-malu nùù nèhivi, te ndácùcahan-né quivì mii-ní. Doco có-nduú-né iin ana cutnáhá xi-nda xicánúú. Ñàyúcàndúá, ni sadi-nsi nùù-né ñà-màsà quidá gá-nè ducán.

³⁹ Doco ni cachí Jesús xi-né:

—Còó, màsà cádi-nsiá nùù-nè, vâchi iin nècuàchì ndácùcahan xi quivì, te quidá-né milagru ducán, ùhi cáhàn quini stná-nè diquí.

⁴⁰ Vâchi nsidaa ana có-xini ùhi xi-nda, favor xi-nda iá-nè.

⁴¹ Te nú ináhá nèhivi nduú-nsiá nèhivi xí, te sàhámá quidá víi-né xi-nsiá, dandu seguru icúmí-nè nùù-né ñà-vàha xi-ne nùù Dios, mate iyuhu tècuí-ni nduá ni sàha-nensiá ni xihì-nsiá.

Cuidadu cundoo-nda ñà-màsà quidá-nda cuàchì

⁴² Dandu ni cachí tu Jesús:

—Íin ñà-cuati xiníndísá-xí, nú ni dátùcù nèhivi-ñá, dandu ¡ndahví-nè! Vâchi chicá vâha màcundiacu iin yùù yodò dùcùn-né, te ndiachì-né mahì mar sàhà-ñá màsà dátùcù gá-nè ñà-cuati.

⁴³ Te nú sàhà ndahá-nsiá xidá cuàchì-nsiá, dandu chicá vâha ni táhndèa. Vâchi chicá nsiaha (sàà-nsiá nùù Dios) xi iin-ni ndahá-nsiá, te cutiacu-nsiá nicanicuahàn, te màdiá coo ndúà, te ndiachì-nsiá andea, vâchi yucán, mà cúí ndàhvà ñuhu.

⁴⁴ Te sicùdi ñuhú yucán, mà nunca cui-si, te ñuhu yucán, mà sàà ndàhvà.

⁴⁵ Te nú sàhà sàhà-nsiá xidá cuàchi-nsia, dandu chicá vaha ni táhndè stná, vachi chicá nsiaha (sàà-nsiá nùu Dios) xi iin-ni sàhà-nsiá, te cutiacu-nsiá nicanicuahàn, te màdiá coo ndùuà, te ndiachi-nsiá andea, vachi yucán, mà cúí ndàhvà ñuhu.

⁴⁶ Te sicùdi ñuhú yucán, mà nunca cui-si, te ñuhu yucán, mà sàà ndàhvà.

⁴⁷ Te nú sàhà nduchinúú-nsiá xidá cuàchi-nsia, dandu chicá vaha ni tavá-nsiáñà. Vachi chicá nsiaha sàà-nsiá xi imindaa nùu-nsiá, te màdiá coo ndùuà, te ndiachi-nsiá andea.

⁴⁸ Vachi sicùdi ñuhú yucán, mà nunca cui-si, te ñuhu yucán, mà sàà ndàhvà.

⁴⁹ 'Nsidanicuú nèhivì, icúmí-né (yàha-ne trùndoho) na ian nsù yadi-né yoho te yucán; (doco bien xi-ne cunduumà, na ian nduhádi comida) ñà-quéa ìin.

⁵⁰ Vaha ga ìin, vachi nsidá ádiá ñà-xì-xì-ndà; doco nú sàni ndañuhu ñà-ádi xán, dandu mà cúí gá nduhadiá. Te na ian quidá ìin (iá vaha), ducán xiñuhu quida stná mii-nsiá xi anima-nsiá, te cundoo màni stná-nsiá.

10

Màsà caté stnàhà-ndà xi nècuàchi vehe-nda

¹ Dandu ni quee Jesús ñuu yucán, cuàhàn-yà ladu Judea, divi iin ladu Judea iá ndè inga ladu yùte Jordán. Te yucán ni nataca tu cuàhà gá nèhivì nùu-yá. Te ni quesaha-yá dacuahá-yànè nacua quidá-yá siempre.

² Te yucán ni casaà stná nècuàchi fariseu, te ni càhàn-nè xi-yá àma nihindèè-né coo nansa daquéé cuàchi-ne diqui-yá. Te dohó ni cachi-nè xi-yá:

—¿A vátuni iá ñà-cate stnàhà-ndà xi ñahàdihí-ndà?

³ Dandu ni cachi-yà xi-né:

—¿Ndíá nduá ni dándacú Moisés quida-nsia?

⁴ Te ni cacachi nècuàchi yucán:

—Ni sàha Moisés lugar ñà-cuyucun iin tutu nùu juez, dandu vátuni cate stnàhà-ndà.

⁵ Dandu ni cachi-yà xi-né:

—Cunaha-nsiá, cuisì sàhà ñà-cò-cùnì-nsiá cunini vù-nsiá, ñàyucànduá ni tiaa Moisés ley jaàn.

⁶ Doco na ní sàcòo ñuhivì, còo. Vachi na ní quidayucun Dios ñuhivì, dandu ni quidayucun stná-yà nèhivì, iin-ne ni sàcùnduu tiàa, te inga-nè ñahà.

⁷ Ñà-jaàn nduá disàhà-xì nándàhà iin nècuàchi tiàa xi iin nècuàchi ñahà, te quecuàân-né nùu yuadihí-né.

⁸ Ñàyucànduá, mate diín diín ni sanduu-ne antes, doco na imindaa nèhivì sàni nanduu-ne vitni. Te sàhámà, có-nduú gá-nè diín diín nèhivì; quida-nda cuenta na ian iin-ni nèhivì nduú-né.

⁹ Ñàyucànduá, nú ducán sàni dàcuacá stnahá Dios-nè, dandu ni-iin nèhivì màsà caté stnàhà-né —ni cachi Jesús.

¹⁰ Daaní, na sàni nansihvi-ya ini vehe, dandu ni ndacàtnùhù gá nècuàchi dacuahá-yá nùu-yá sàhà chuun jaàn.

¹¹ Te ni cachi-yà xi-né:

—Nú ni caté iin tiàa ñahàdihí-né, te coo-ne xi inga nècuàchi ñahà, dandu cuàchi ndisa nduá nùu Dios, te cuàchi nduú stná nùu ñahàdihí-nè primeru.

¹² Stná nècuàchi ñahà, nú ni caté-nè ìi-né, te nandàhà tú-né xi inga tiàa, cuàchi nduú stná.

Nansa ni chitándóo Jesús ndahà-yá òni ñà-cuati sàhà-ñà cundiátú anima-ve

¹³ Daaní, ndacá nèhivì ñà-cuati xi-né vaxi nùu-yá ñà-chitándóo-yá ndahà-yá òni. Doco nècuàchi dacuahá-yá, ni sadi-nè nùu nècuàchìmà.

¹⁴ Te na ní xini-yà ñà-nduá quidá-né, ni cuduchi ini-yà, cachi-yà:

—Nacoo-nsia ñà-cuati ni quixá nùu. Màsà cádi-nsiá núá, vachi ana nihnú inì-xi nahi ñà-cuati, divi cunduu ana sà ñuhivì ìi xì Dios.

¹⁵ Te yùhù cachí xi-nsiá, nú màsà cóo (vitá ini nèhivì) nahi ñà-cuati, te ducán quihvi-ne ichi ñuhivì ìi xì mii-yá, dandu mà nunca sàà-nè yucán —ni cachi-yà.

¹⁶ Dandu ni numi nihni-yañà, ni chitándóo-yá ndahà-yá òni, te ni xicàn tàhvi-yá ñà-ndiaha nùu Dios sàhà-ñà.

Nansa ni cachi Jesús xi iin tèhii cuica

¹⁷ Daaní, na lácà ni quihin Jesús ichi cuàhàn-yà, dandu ni xini-yà yucán vaxi iin tèhii carrera. Te na ní quesàa-te nùu-yá, ni sàcùin sisi-té, cachí-te:

—Maestro, vaha ndisa-ní. Cachi-ní xí ndiá nduá quide, te nihitáhvì vida ndiaha nicanicuahàn.

¹⁸ Dandu ni cachi-yà xi-né:

—¿Ndíá nduá dísáhà-xí cachí-ní xí: “Mii-ní vaha-ní”? Vàchi còò ni-iin nèhiví úun vaha ndisa, cui si nú nduí Dios, dandu vaha ndise.

¹⁹ Pues vichi, ináhà-ní nansa nì dándàcú-yá quida-nda: màsà cáhni stnaha-nda, ni màsà cáhàn-ndà xí inga ana có-ndúú nècuàchi vehe-nda, te màsà quídá cuihna-nda, ni màsà cáhí-ndà ni-iin tnùhu sàhà ñanitnaha-nda; te màsà dándáhví stnàhà-ndà. Te icúmí stnà-ndà quidañuhu-nda yuadíhí-ndà.

²⁰ Dandu nì cachi tu tèmà xì-yá:

—Maestro, nsidaajàn sàni chivàhià dècuèndè na tíi.

²¹ Dandu màni màni nì indehè-yáte, vachi cuú ini-yá sàhà-té, te nì cachi-yá:

—Cumáni gá inga ñàhà quida-ní. Dicò nsihí-ní ñà-nduá icúmí-ní, te dasàn-ní dihùn mà nùú nècuàchi ndahví, dandísà, nihitáhví-ní sàà-ní ansiví, te yucán cucumi ndisa-ní cuàhà ñà-cuicà. Dandu quixi stnà-ní, cunchicùn-ní yùhù; te dispuestu coo-ní cui-ní sàhí, mate ni cui-ní nchica cruz.

²² Doco tèchii ma, na ní inini-tè ñà-nduá nì cachi-yá, nì ndulocó-te, te nì cuhuun cuahà inì-te, vachi yáha ga cuicà-té. Ñàyucànduá, nì quihin-tè ichi cuahàn-te.

²³ Dandu Jesús, nì xiconúú-yá nùú nècuàchi dacuahá-yá, te nì cachi-yá xì-né:

—¡Na ùhì guá sàà iin tècuicà ndè ñuhiví ì xí Dios!

²⁴ Doco na ní inini nècuàchimà, yáha ga nì ndulocó-nè. Ñàyucànduá, inga xichi nì càhàn-yá xì-né, cachí-yá:

—Hijos, na ùhì guá nihitáhví iin nècuàchi càhvi xì ñà-cuicà-xí yáha-ne ñuhiví ì xí Dios.

²⁵ Ñà-ndáà nduá, ùhì dayáha-nda iin camellu nùú chícòhò nduhù iquì; doco chicá ùhì yáha iin tècuicà ndè ñuhiví ì xí Dios.

²⁶ Na ní inini nècuàchi dacuahá-yá ñà-jaàn, dandu yáha ga nì ndulocó-nè, te nì cachi-nè iin-ne xì inga-nè:

—Pues nú ducán, ¿nansa cui càcu anima iin nèhiví?

²⁷ Dandu nì indehè vaha-yanè, te nì cachi-yá:

—Nèhiví ñuhiví, mà cúí quida-neàmà. Doco Dios, vātùni, vachi nsidaa ñàhà, mà ùhì quida-yañà.

²⁸ Dandu nì cachi Pedro xì-yá:

—Nsiùhù, sàni nacoo-nsi nsidaa ñà-icúmí-nsí, te vaxi-nsi nchícùn-nsi mii-ní, Stoho-nsi Senór.

²⁹⁻³⁰ Dandu nì cachi Jesús xì-né:

—Yùhù cachí xì-nsiá, nú sàhà yùhù icúmí iin nèhiví nacoo-ne ñàhà, dandu iin cientu gá tantu icúmí-nè nihitáhví-né. Mate icúmí-nè nacoo-ne vehe-ne, ò ñani-nè, ò cùha-ne, ò yua-né, ò dihi-né, ò ñahàdihí-nè, ò déhe-ne, ò ñuhù xì-né sàhà yùhù, ò sàhà razón ndiaha, có-quidá, vachi iin cientu gá tantu ñà-jaàn nihitáhví-né mientras iá-nè ñuhiví yohó, mate icúmí-nè ndoho stnà-nè quida nèhiví ñuhiví. Doco na sàà-nè inga ñuhiví vaxi xì-nda, dandu nihì stnà-nè vida ndiaha nicanicuahàn.

³¹ Doco cuàhà nèhiví idónuu vichi, icúmí-nè sàà-nè natenchicùn-nè cahà-xí quiví yucán; te cuàhà ana nchícùn cahà-xí vichi, icúmí-nè sàà-nè nàcòdònnù-nè.

Nansa ni cachi tu Jesús inga xichi ñà-icúmí-yá cui-yá

³² Daaní, ndacá Jesús nècuàchi dacuahá-yá cuahàn-yá xì-né ichi mànana ndè ñuu Jerusalén, te idónuu-yá nùú-né. Doco mii-né, yáha ga nacáni ini-nè, te yúhí-nè. Dandu nì tavà cuàán-yá nsi-úxin ùi-nè, te nì nacani-ya xì-né ñà-nduá sà-itúú cuu xì-yá,

³³ cachí-yá xì-né:

—Cunaha-nsiá, icúmí-ndá sàà-ndà ñuu Jerusalén. Te yùhù ana nduú Tnaha Nèhiví Ñuhiví, icúmí yàhi ndahà dùtù xícusahnú yucán, xì ndahà stnà nècuàchi ley xi veheñùhu. Te icúmí nècuàchimà cachí-nè ñà-fuerza icúmí cui. Dandu dayáha-ne yùhù ndahà tè-inga raza.

³⁴ Te mii-té, cuàcundiaà-te yùhù, te cahni cui-te yùhù; te sivi díi-te nùí, dandu después cahni-té yùhù. Doco tixi ùni quiví icúmí natiacuí —nì cachí-yá.

Ñà-nduá nì xicàn Jacobo xì Juan nùú Jesús

³⁵ Daaní, nì natuu déhe Zebedeo nani Jacobo xì Juan nùú-yá, cachí-nè xì-yá:

—Maestro, cuní-nsi quidamaní-ní xì-nsí iin favor ñà-nduá xicàn-nsi.

³⁶ Dandu nì cachi-yá:

—¿Índù ñàhà cuní-nsià quide?

³⁷ Te nì cachi-nè xì-yá:

—Na sàà tiempu ndiaha na cusáhnú-ní, cuàha-ní lugar ñà-cundoo iin iin-nsi iin iin ladu-ní; iin-nsi coo ladu cuàhà-ní, te inga-nsi coo ladu itnì-ní.

³⁸ Dandu nì cachi-yá xì-né:

—Mii-nsiá, có-sánihi ini-nsiá ñà-nduá xicàn tàhvi-nsiá núí. ¿A vátùni cundee ini-nsiá ndoho-nsia nacua icúmí ndohi, te yàha stná-nsiá tnùndoho nacua icúmí yàhi?

³⁹ —Jaán —nì cachi-nè—, vátùni stná nsiùhù.

Dandu nì cachi-yà xì-né:

—Ndisa, icúmí-nsiá ndoho-nsia nahi yùhù; te icúmí stná-nsiá yàha-nsia tnùndoho nahi yùhù.

⁴⁰ Doco ñà-danìhítàhvi mii-nsiá cundoo iin iin-nsia iin iin ladúí, mà cúí, vàchi có-quidá yùhù tocar quide ñà-jaán. Nècuàchi nihítàhvi cundoo ladúí, cui si nèhivi señaladu cunduu-ne, vàchi divi sàhà mii-né icúmí lugar mà cuyucàn.

⁴¹ Daaní, na ní xinitnùhu ùxin gà nècuàchi dacuahá-yá, dandu nì cuduchi gá ini-nè sàhà Jacobo xì Juan mà.

⁴² Doco Jesús, nì cana-ya nsidaa-né ñà-nì nátácá-nè nùu-yá, te nì cachi-yà xì-né:

—Ináhá-nsiá sàhà tè-cùsàhnú inga ñuu, xínduu-tè autoridad cahan nèhivi, te fuerte cusàhnú-te nùu-né. Vàchi nsidaa tè-nihí chuun ñuu yucán, ndee dandacú-te nùu nèhivi yucán.

⁴³ Doco mii-nsiá, màsà quidá-nsiá ducán. Còó, vàchi nú íá ana cuní cunduu ana dandacú nùu-nsiá, dandu icúmí-né cunduu-ne ana xinúcuáchi nùu nsidaa-nsiá.

⁴⁴ Vàchi nècuàchi cuní codònùu nùu-nsiá, icúmí-né cunduu-ne nahi peón chindéé xì nèhivi dava ga.

⁴⁵ Dècuèndè stná yùhù ana nduú Tnaha Nèhivi Ñuhiví, cóni quésái ñuhiví yohó ñà-cunucuachi nèhivi núí. Còó, sàhà-ñà cunucuachi mií nùu-né nì quésái, dandu después cuàhi vida xì cui cuenta xì-ne, te ducán nàcùndoo cuàhà-né libre —nì cachi-yà.

Nansa nì quida Jesús milagru, te nì natùinuú iin nècuàchi cuaá nani Bartimeo

⁴⁶ Daaní, nì sàà-yà xì compañeru-yà iin ñuu nani Jericó. Te na xicá-yá ichì queé-yá ñuu mà, dandu nhicùn stná cuàhà gá nèhivi. Te yuhù ichì yucán íá iin nècuàchi cuaá xicàn caridad. Bartimeo nani-né, vàchi dèhe Timeo nduú-né.

⁴⁷ Te nì tiacu-nè sà-cùyátní Jesús de Nazaret. Ñàyùcànduá nì quesaha-né ndàhi-nè, cachí-nè:

—¡Jesús! ¡Mii-ní descendencia ì xì David! ¡Cuhì inì-ní yùhù!

⁴⁸ Doco cuàhà nèhivi cuàhàn yucán, nì canàhà-nè xì nècuàchìmà:

—Màsà ndàhi gà-ní —cachí-nè.

Doco nècuàchi cuaá mà, chícá ndee ní ndàhi-nè, cachí-nè:

—¡Jesús! ¡Mii-ní descendencia ì xì David! ¡Cuhì inì-ní yùhù!

⁴⁹ Dandu nì cucuiin-yà, te nì cachi-yà xì compañeru-yà:

—Cana-nsianè nì quixí-né.

Dandu nì cana-ne nècuàchi cuaá mà, cachí-nè xì nècuàchìmà:

—Màsà cùhúún inì-ní; ndacuiin-ní, vàchi caná-yá mii-ní.

⁵⁰ Ñàyùcànduá, nì tavà-né dòò-né, nì dandiàchì-né iladú. Te yàchì nì ndacuiin-nè cuàhàn-nè ndé íá-yà.

⁵¹ Dandu nì xicàn tnùhù-yà nùu-né, cachí-yà:

—¿Ndíá nduá cuní-ní quide?

Te nì cachi-nè xì-yà:

—Cuní natùinuú, maestro.

⁵² Dandu nì cachi-yà xì-né:

—Cuahán cuéyàà-ní, vàchi sàni nduvàha-ní ñà-nì xinindisa-ní.

Dandu luegu nì natùinuú-né, te nì tenchicùn stná-nèyà ichì cuàhàn-yà.

11

Nansa nì cuu na ní sàà Jesús ñuu Jerusalén

¹ Daaní, nì sàà-yà xì-né yatni ñuu Jerusalén ndé nduú ñuu cuati nani Betfagè xì Betania, yatni dñi yucú Olivo. Dandu nì càhàn-yà xì ùi nècuàchi dacuahá-yá ñà-cùhùn cuéé-nè nùu-xì.

² Te dohó nì cachi-yà xì-né:

—Cuahán-nsiá ñuu tii chícá nùu-xì; te yucán icúmí-nsiá cuni-nsiá ndé iin iin burru nuhní. Quisi tàñàha ga cuida nduú-si. Quisi yucán ndaxin-nsiá cundaca-nsiá quixi.

³ Te nú ndácàtnùhù nèhivi nùu-nsiá índú chuun ndaxin-nsiá, dandu cachi-nsiá xì-né ñà-Stoho-ndà Señor xiñuhu xì-sí, doco luegu naxicocuiin-sí —nì cachi-yà.

⁴ Daaní, luegu nì quihin ùi nècuàchìmà ichì cuàhàn-nè, te nì xini-nè yucán iin burru nì cachi-yà, nuhní-si yuhù ichì yatni yehè iin vehe. Ñàyùcànduá nì ndaxin-nési.

⁵ Doco dava nècuàchi itá yucán, nì cachi-nè:

—¿Índu chuun ndaxin-nsiá burru jaàn?

⁶ Dandu ni naxiconihí nècuàchimà nacua ni cachi-yà xi-né. Dandu ni sàha nèhivi mà permisú ñà-cundaca-nèsi cùhùn.

⁷ Ñàyucàndúá luegu ni saca-nèsi cuàhàn-nè ndé iá-yà, te ni chitándòò-né sicoto xi-ne diquì-sí. Dandu ni sàcùnùù-yási.

⁸ Te cuàhà nècuàchì yucán, ni chitánduhù-né dòò-né ichì nacua cuàhàn yàha-ya. Te dava-ne, ni sahnde-nè ndahà yutnú ni chindoo stná-né ichì.

⁹ Te nèhivi idónuu, xi stná nècuàchì nhíicùn cahà-xí, cánandee-né, cachí-nè:

—¡Viva ana sahnú yohó! ¡Ndiaha gá ndenihí vaha-ndané, vachi cuenta xi Stoho-ndà Señor vaxi-ne!

¹⁰ Ndiaha gá coo, vachi vaxi-ne cunduu-ne rey, cusahnú-né na ian nisa cusahnú xii-ndà David. ¡Ansivéhé mii-yá iá ansivi! —ni cachi-nè.

¹¹ Cunaha-nsiá, ducán ni sàà Jesús ñuu Jerusalén. Dandu cuàhàn-yà veheñuhu cahnú, te ni xini-yà nansa iá nsidaa iñaha yucán. Dandu ni quee-ya ñuu mà cuàhàn-yà xi úxin ùi compañeru-yà ndé ñuu tii Betania, vachi sàni cuàà.

Nansa ni sadi Jesús nùù nù-higu cóni caná quisi vídi-nu

¹² Dandu dàtnàà inga quivi ni quee-ya xi-né ñuu Betania mà vaxi-ya. Te xihí-yà doco.

¹³ Te ni xini xicà-yá iin iin yutnú nani nù-higu, te iá ndahà cuií-nu. Ñàyucàndúá, cuàhàn-yà cundehé-yá a có-caá si-higu caxi-yá. Doco na ní tnàtuu-ya ni xini-yà micuísì ndahà-nú iá. Còò quisi vídi, vachi tãñaha ga sàà tiempu cana-si.

¹⁴ Dandu ni cachi-yà xi yutnú mà:

—Màsà nunca cana ga quisi vídi-yó caxì nèhivi.

Te ni inini stná nècuàchì dacuahá-yà ni cachi-yà ducán.

Nansa ni tavà Jesús tè-dicó xi tè-xiín fuera patiu veheñuhu

¹⁵ Ni nsihì ñà-yucán, dandu ni sàà-yá xi nècuàchimà ñuu Jerusalén. Dandu cuàhàn-yà veheñuhu cahnú, te ni taxi nsihí-yá tè-dicó xi tè-xiín yucán. Ni naxiconihí-yá mesa xi tiàa dama-xi dihùn inga ñuu, te ni ducùn stná-yá silla xi tè-dicó xi loma.

¹⁶ Te cóni sàha stná-yà lugar nacuíco ni-iin nèhivi carga xi-ne yàha-ne patiu veheñuhu cahnu-ma.

¹⁷ Te ni càhàn fuerte-yà xi nèhivi yucán, cachí-yà:

—Dohó cachí Dios nùù tutu iì: “Veheñuhu xi cunduu iin vehe ndé nataca nèhivi vaxi nsidanicuú ñuu càcàn tàhvi-né nùù”, cachí-yà. Doco sàhà mii-nsiá sàni nandua na iin lugar ndé ndoó cuàhà tècuñhà.

¹⁸ Doco dùtù xicusahnú, xi nècuàchì ley xi veheñuhu, iníní stná-né ñà-nduá ni cachi-yà. Te vichì yúhí-nèyà, vachi ináhà-nè ndulócò nsidaa nèhivi sàhà ñà-nduá dacuahá-yá. Ñàyucàndúá ni quesaha-né nandúcu-né nansa cui cahni-nèyà.

¹⁹ Daaní, na ní cusinsiquin, dandu ni quee-ya ñuu mà mànhuhù-yá (ñuu tii Betania).

Nansa ni ichì dahuun nù-higu mà

²⁰ Daaní, dàtnàà inga quivi vaxi tu-ya xi nècuàchì dacuahá-yá, te ni nayàha-ne xi-yá (ndé iin yutnú mà), te ni xini-nè sàni ichì dahuun-nù ndé yohò-nú.

²¹ Dandu ni nsinuu ini Pedro, te ni cachi-nè xi-yá:

—Cundehè-ní, Maestro, yutnú ni càhàn xi-ní, te ni sadi-ní nùù-xí icu, ¡sàni ichì-nu!

²² Dandu ni cachi Jesús xi-né:

—Xíñuhu cunindisá vaha-nsiá Dios.

²³ Vachi palabra seguro nduá cachí xi-nsiá yohó: nsidaa nèhivi có-lá xi duda, dècuèndè vātùnì dandacú stná-nè nùù yucù jaàn ñà-cuxioa, te quècahna ini mar, te divi ducán ndisa icúmì cuu, nú nihnú ndisa ini-nè cuu nacua ni cachi-nè.

²⁴ Ñàyucàndúá, yùhù cachí xi-nsiá, nsidaa iñaha ni càcàn tàhvi-nsiá nùù Dios, nú xiníndisá-nsiá ñà-sà-íá ñà-nduá ni xicàn-nsiá, dandu nihi-nsiáñà.

²⁵ Doco dava xichì xicàn tàhvi-nsiá nùù-yá, te xiní ùhì-nsiá iin ñanitnaha-nsiá. Nú ducán nduá, dandu dihna icúmì-nsiá cuicahnú stnahá ini-nsiá, dandu vātùnì cuicahnú stná ini Yuandiáhá-nsiá iá ansivi sàhà cuàchi-nsiá.

²⁶ Vachi nú có-xicáhnú ini-nsiá sàhà ñanitnaha-nsiá, dandu mà cuicáhnú stná ini mii-yá sàhà cuàchi-nsiá.

Nansa ni cachi tè-xidandacú còò derechu xi Jesús quida-ya ñà-nduá quidá-yá

²⁷ Daaní, ni sàà tu-ya xi-né ñuu Jerusalén. Te na xicánúù-yá ini veheñuhu cahnú yucán, dandu yucán ni casaà stná dùtù xicusahnú, xi nècuàchì ley xi veheñuhu, xi stná nècuàchì xidandacú nùù ñuu mà, ni tnàtuu-ne nùù-yá,

²⁸ cachí-nè:

—¿Índù nì nihì-ní derechu quida-ní ñà-nduá quidà-ní? ¿Ana divi nì dándacú nù-ní ñà-quida-ní ducán?

²⁹ Te nì cachi-yà xì-né:

—Yùhù cuní stnái ndàcàtnùhí nù mii-nsiá, te nú nì nácíoníhí-nsiá nùí, dandu cachtñuhu stnái xì-nsiá ana divi nì dándacù-xì nùí.

³⁰ Cachi-nsiá xí ana divi nì dándacù-xì nùú Juan (Bautista) ñà-quida ì-né nèhivì. ¿A Dios nì cachi xì-né, te ò nèhivì ñuhiví? Naxícóníhí-nsiá nùí.

³¹ Dandu nècuàchìmà, nì candatnuhu tnahá nsidaa ní míí-né, cachi-né:

—Nú nì cachí-ndà Dios nì dándacù-xì nùú Juan, dandu cachi Jesús xì-ndà ¿índù chuun cóni xíníndísá-ndà nècuàchìmà?

³² Te nú nì cachí-ndà divi nèhivì úun nì cachi xì-né, (dandu nì mà queé víi stná mà).

Ducán nì cacachi nècuàchìmà, vèchi yúhí-né ndiá nduá cachi nèhivì xì-né, vèchi nsidaa nèhivì, quidà-né cuenta iin nècuàchì yuhù nùú Dios nì sanduu Juan.

³³ Ñàyúcànduá, nì cacachi nècuàchìmà xì-yá:

—Cò-cùndáa ini-nsì ana divi nì dándacù-xì nùú Juan.

Dandu nì cachi Jesús xì-né:

—Nì yùhù, mà cáhí stnái xì-nsiá ana divi nì dándacù-xì nùí ñà-quide ñà-nduá quidé.

12

Ejemplu sàhà medieru malu

¹ Daaní, nì quesaha Jesús nacání-yá xì-né puru ejemplu. Te dohó nì cachi-yà xì-né:

—Nì ìa iin lamú, nì dānāndēe-ne nducu yòhò sì-uva nùú ñuhù xì-né. Te nì quida-ne corra-ñà, xì stná iin pila cahnú ndé cuñuhu ndudi quisì mà; te nì quidavàha stná-né iin torre ndé cundiaa peón inii itu-né. Dandu nì tatu-né itnii medieru, te cuàhàn-né inga ñuu xicà.

² Daaní, na sání sàa tiempu cùchi quisì vídì mà, dandu nì techuún-né iin peón xì-ne nùhù naquihín chii fruta mà nùú medieru xì-ne.

³ Doco na ní sàa peón mà, nì catnii medieru mà-né, nì sahnì cuií-tené, te nì taxi-téné, còò nì-ñàha nihí-né nì násáa.

⁴ Daaní, inga tu nì techuún lamú mà inga peón xì-ne, doco divi-nì nì cacani yuu-téné, ndé nì dānācuèhè-te ònì-né, te nì canáhà-te xì-né.

⁵ Daaní, tucutu nì techuún lamú mà inga peón nùú-té. Doco tēmà, nì sahnì dahuun-téné. Dandu cuàhà gá xichi nì techuún lamú mà más gá peón nùú-té. Doco divi ducán-ní nì cuu, vèchi dava-ne nì sahnì cuií-tené, te dava ga-né nì sahnì dahuun-té.

⁶ 'Ndé làcà mindaa dēhemani lamú mà ndóo ga. Ñàyúcànduá último nì techuún stná-né dēhe-ne cuàhàn, vèchi ádi quidañuhu-té dēhe-ne, nì cahan-né.

⁷ Doco medieru mà, nì candatnuhu tnahá-te, cachí-te: “Tè-yòhó nduú tè-ìcúmí ndutahví xì nsidaa ñuhù yohó. Vichì cahni-ndatè chicá vaha, dandu mii-nda nanduu-nda stohà”, nì cachi-te.

⁸ Ñàyúcànduá nì catnii-tè dēhe lamú mà, nì sahnì-téné, te nì dācānà-te nsii ma yàtà corra.

⁹ 'Pues vichì, ¿ndiá nduá icúmí lamú mà quida-ne xì medieru mà? Icúmí-né nùhù-né yucán, te cahni nsihí-nète, dandu nanducu saa-né inga ana quidachuún ñuhù xì-né.

¹⁰ Dandu nì cachi gà-yà xì nèhivì mà:

—A tñàha ga cahvì-nsia nùú tutu ì xí Dios ndé cachá' palabra yohó:

Nì ìa iin cavà, te nì cahichì ini albañil-ñà. Doco vichì sání sàa mà nì sàcùndua yùú vico esquina vehe.

¹¹ Divi Stoho-ndà Señor nduú ana nì quida ducán. Te ndulócò-ndà ñà-ndiaha guá nì quida-ya.

(Ducán nacání nùú tutu ì, nì cachi Jesús.)

¹² Daaní, nècuàchì xícusahnú sàhà religión ñuu mà, nì cundaa ini-né divi mii-né cāhàn-ya sàhà-xí na ní nacani-ya ejemplu mà. Ñàyúcànduá, nì cuni-né tñii-neyà, te chicadi-neyà. Doco ñà-yúhí-né nèhivì cuàhà yucán, ñàyúcànduá, nì naco-neyà, cuàhàn-né.

Nansa nì cachi Jesús sàhà renta xì ñuu-ndà

¹³ Dandu nì techuún-né iin ùi nècuàchì fariseu quixì xì iin ùi nècuàchì partidu xì rey Herodes, cunì-né dadaná-neyà na cāhàn-ya.

¹⁴ Ñàyúcànduá, nì tnàtuu-ne nùú-yá, cachí-né xì-yá:

—Maestro, ináhà-nsí mii-ní, ana ndàa cuisì inì-xì nduu-ní. Cò-quihín casu-ní nansa cachí nèhivì, nì có-yúhí stná-ní nì-iin nèhivì, vèchi chináhà víi-ní ñà-nduú ichì vaha Dios. Cachí-ní xì-nsí: ¿A vátuni sàha Dios lugr ñà-chiyahví-nda renta nùú rey cahnú César, á coó? ¿A ndiá icà-ndà chiyahví-nda, á coó?

¹⁵ Doco Jesús, sàni cundaà ini-yà có-xìcàn tñhù sahnú ndisa-ne nùù-yá; ñàyùcàndüá, nì cachi-yà:

—¿Índü chuun cuní-nsià quida-nsia maña nùí? Cunihí-nsia iin dihùn quixi, cundehíá nansa iá’.

¹⁶ Dandu na ní quesaa dihùn plata mà, nì indehè-yáñà, te nì cachi-yà xì-né:

—¿Bueno, ana ònùù-xí, te ana òiquívi-xì itúú ìcà dihùn yohó?

Te nì cachi-nè:

—Divi rey cahnú César.

¹⁷ Dandu nì cachi-yà xì-né:

—Nú ducán nduá, dandu nacuaàha-nsia César ñà-ndüá icúmí-nsià cuàha-nsiàte, te cuàha stná-nsià Dios ñà-ndüá ndiá ìcà-nsià cuàha-nsiayá —nì cachi-yà.

Dandu nèhivì ininí, nì ndulocò-nè ñà-nchichí guá nì naxiconihí-yá nùù nècuàchìmà.

Nansa nì cachi Jesús iá nansa natiacu-ndà

¹⁸ Dandu nì catnàtuu itnii nècuàchì saduceu nùù-yá nì càhàn-nè xì-yá. Nècuàchì yucán, có-xiníndisá-né icúmí natiacu nsii. Ñàyùcàndüá, dohó nì cachi-nè xì-yá:

¹⁹ —Maestro, ñà-yohó nduá nì tiaa Moisés quida-nda: “Nú sàni xihì iin tiàa, te còò dèhe-ne nì ndóo xì ñahàdihì-nè, dandu icúmí ñani nsii ma nandàhà-né xì ñahà mà, áma cóó iin dèhe-ne; dandu quida-nda cuenta na ian dèhe nsii-ma cunduu mée mà”.

²⁰ Cunaha-ní, nì sandoo ùsà ñaní. Te nècuàchì chicá sahnú, nì nandàhà-né xì iin nècuàchì ñahà, doco nì xihì-nè, te còò dèhe-ne.

²¹ Dandu ñani-nè chicá nchìcùn gá, nì nandàhà stná-nè xì ñahà cuaán ma, doco nì xihì stná nècuàchì ùi mà, te còò stná dèhe-ne. Te divi ducán nì cuu stná xì nècuàchì ùni.

²² Dècuèndè nì sàà nsi-ùsà-nè nì nandàhà iin iin-ne xì ñahà mà, (te iin iin-ne nì xihì-nè), doco còò nì-iin dèhe-ne nì iá (xì ñahà mà). Daaní, último nì xihì stná nècuàchìmà.

²³ Ñàyùcàndüá, na sàà quívi (cachí-nsià) natiacu nsii, ¿índü tiàa ma nacuaa xì nècuàchì ñahà mà? vachi antes nsi-ùsà-nè nìsa la xì-ñá —nì cachi-nè.

²⁴ Dandu nì cachi Jesús xì-né:

—Còó, có-càchì vii-nsiá, vachi có-cùndàà ini-nsia nansa cachí tutu ìi xí Dios, nì có-cùndàà stná ini-nsia ñà-càhnù-guá poder xì-ya.

²⁵ Cunaha-nsiá, na sàà quívi natiacu nèhivì, mà nándàhà gá-nè, vachi nahi ángel ndoó ansivi icúmí-nè nanduu-ne.

²⁶ Te vichi cuàhìn càhìn xì-nsiá sàhà nansa iá ñà-natiacu nsii. Ádi sání cahvi-nsia nùù tutu nì tiaa Moisés ndé cachá’ sàhà yutnú tii (xixín), te iá Dios mahi-nù, te nì cachi-yà xì Moisés: “Yùhù nduí Dios càhvi nsi-Abraham, xì nsi-Isaac, xì nsi-Jacob”, cachí-yà.

²⁷ (Ñàyùcàndüá, itiacú ìi nècuàchì sánaha ma), vachi nècuàchì ní xihì dahuun ndisa, mà cúí cahvi-né Dios, cuiisì nèhivì itiacú càhvi xì-yá. Ñàyùcàndüá, ni-iyuhu có-ìá vii ñà-ndüá cachí mii-nsiá —nì cachi Jesús.

Nansa nì cachi Jesús índü ley xì Dios chicá ndiáá

²⁸ Daaní, iin nècuàchì ley xì veheñùhu, nì inini-ne nansa nì ndatnuhu stnahá-né, te nì cundaà ini-nè yáha ga nì naxiconihí víi Jesús nùù nècuàchì yucán. Ñàyùcàndüá, chicá nì tràtuu-ne, te nì ndàcàtnhù-nè nùù-yá, cachí-nè:

—Nùù nsidaa ñà-ndüá nì dándacú Dios, ¿índü ñà-chicá ndiáá?

²⁹ Dandu nì cachi-yà xì-né:

—Ñà-dándacú Dios chicá ndiáá nduá yohó: “Cunini vaha-nsia, nèhivì Israel, vachi Stoho-ndà Dios, imindaa-yá.

³⁰ Te icúmí-ndá cuu ini-ndà sàhà-yá xì nsidanicuú anima-ndà, xì nsidanicuú voluntad xì-nda, xì nsidanicuú sàxinítnùni-ndà, te nsidanicuú stná valor xì-nda”. Ñà-jaàn nduá dándacú Dios chicá ndiáá chivàha nèhivì.

³¹ Daaní, nacua cachí ley primeru mà, ducán cachí stná ley ùi dándacú-yá: “Nacua cuú ini-ndà sàhà mii-nda, ducán icúmí stná-ndà cuu ini-ndà sàhà ñanitnaha-nda”. Còò cá ñà-nì dándacú Dios chicá ndiáá nùù ùi ñà-jaàn.

³² Dandu nì cachi nècuàchì ley xì veheñùhu ma:

—Cachí vaha ndisa-ní, maestro; ñà-ndàà nduá, vachi imindaa Dios iá, còò cá ana nduú Dios, cuiisì mii-yá.

³³ Te icúmí-ndá cuu ini-ndà sàhà-yá xì nsidanicuú anima-ndà, xì nsidanicuú sàxinítnùni-ndà, xì nsidaa voluntad xì-nda, xì nsidaa stná valor xì-nda; te icúmí stná-ndà cuu ini-ndà sàhà ñanitnaha-nda nacua cuú ini-ndà sàhà mii-nda. Vachi ñà-jaàn chicá ndiáá nùù nsidanicuú promesa cuàha-ndayá, a sea nduá iin quisi coco nùù-yá; te ò ndéni promesa nì cúí —nì cachi-nè.

³⁴ Dandu Jesús, nì xini-yà nì naxiconihí víi nècuàchìmà nùù-yá; ñàyùcàndùà nì cachi-yà xì-né:

—Làcà iyuhu-ni cumáni, te sàà-ní cunduu-ní iin nèhivì ñuhivì ì xí Dios.

Daaní, (na ní nsihì nì cachi-yà ñà-jaàn), dandu ni-iin nèhivì, cóni sáha ndee gá ini-nè dadavátnáhà-né xì-yá.

Ana divi nduú yohótéhè Cristu

³⁵ Daaní, iin quivì iá-yà veheñùhu cahnú, dacuahá-yà nèhivì, te nì cachi-yà xì-né:

—Cachí nècuàchì ley xi veheñùhu: “Descendencia xi xii-ndà David nduú Cristu”. Ducán cachí nècuàchìmà, doco ñìnduvì cunì cachàmà?

³⁶ Vàchi divi xii-ndà David nì tiaa stná-nè sàhà Cristu tixi poder xi Espíritu Ìi xí Dios, te dohó nì cachi-nè:

Nì càhàn Yua-nda Dios xì Stohì (divi Cristu), nì cachi-yà: “Yohó coo-ní ladu cuàhí ndé cachi sàà cundeì nùù nsidaa tè-xinì ùhì xì-ní, dandu cusahnú fuerte-ní nùù-é”, nì cachi Dios.

³⁷ Cundehè-nsiá, nì cachi David ñà-Stoho-nè nduú Cristu. Doco nú ducán nduú-yá, dandu ñìndù modo cui cunduu stná-yà iin descendencia xi-ne? (Doco ñà-ndàà nduá) —nì cachi Jesús.

Te nsidaa nèhivì cuàhà yucán, cudú ini-nè xì ñà-nduá cachí-yà.

Ñà-nduá nì cachi Jesús sàhà nècuàchì ley xi veheñùhu ñà-có-quidá-né cumplir, cachí-yà

³⁸ Dandu nì dàcuahá gá-yà nèhivì, cachí-yà:

—Còtó quida-nsia na xíquida nècuàchì ley xi veheñùhu. Vàchi ñà-dii xì-né nduá canuun-ne cundixi-ne sicoto quihín vico, te casáhú tñùñuhu nsidaa nèhivì xì-né yàhvi.

³⁹ Te na sàhàn-né veheñùhu, ò ndoó-né iin vicò, dandu nandúcu-né lugar ndé chicá ndiaha cundoo-ne.

⁴⁰ Te tùha stná-nè (tnii diqui-né ley, te) xidándiáá stná-nè vehe nècuàchì nì xihì ì-xí, dandu después sàcuita-ne nacuatú cuàhà-né na ian ndisa guá vaha-ne. Sàháyùcàndùà, iin castigo chicá fuerte icúmi-né ñihì-né —nì cachi Jesús.

Nansa nì nacuni Jesús cuàhà gá ndiaa promesa tii nì sàha ñàhàcuàán ndahví

⁴¹ Iin xichi iá-yà veheñùhu cahnú yatni ndé itá alcancia xi Dios, te indéhe-yà nèhivì daquéé-ne dihùn ini alcancia mà. Tècuicà, cuàhà gá dihùn nì dàquéé-tè.

⁴² Dandu nì quixi stná iin nècuàchì ñahà ndahví nì xihì ì-xí; te nì dàquéé-ne ù ò dihùn cuàti ndiaá nahi ùxin centavu.

⁴³ Ñàyùcàndùà, nì cana Jesús nècuàchì dacuahá-yà nataca-nè nùù-yá, te nì cachi-yà xì-né: —Cunaha-nsiá, chicá más nduá nì sàha nècuàchì viuda ndahví yohó nùù ñà-nì sàha nsidaa gá nèhivì yucán.

⁴⁴ Vàchi nsidaa gá-nè, cuisì ñà-cùyódo nùù-né nduá nì sàha-ne. Doco nècuàchì ñahà yohó, mate ndahví dahuun-ne, doco nì sàha-ne nsidanicuù dihùn sàhà ñà-cuiin-ne ñà-cutiacu-nè.

13

Ñà-nduá nì cachitnùhu Jesús cuu xi veheñùhu cahnú iá ñuu Jerusalén tiempu xi-ya

¹ Daaní, na ní quee-ya veheñùhu cahnú, dandu nì cachi iin nècuàchì dacuahá-yà xì-yá:

—Cundehè-ní, Maestro. ¡Na vico guá iá yùù nahnú nì cuàha veheñùhu yohó, te na cuaha guá ndàa stná vehe yohó!

² Doco nì naxiconihí Jesús nùù-né:

—¿A xiní-nsiá vehe nahnú yohó? Cunaha-nsiá, vaxi iin quivì, dandu ni mà códotnahá gá ni-iin yùù yohó, vachi icúmiá caà nsihá quida nèhivì.

Ñà-nduá icúmi cuu ñà-cundaà ini-ndà sà-itúú xinu tiempu yohó

³ Daaní, cuàhàn cuaán-yà xì-né ndé yucù Olivo iá frente veheñùhu cahnú, te yucán nì sàcòo-ya. Te na ndoó-né xì-yà yucán, dandu nì càhàn ùni-nè xì-yá, divi Pedro, xì Jacobo, xì Juan, nì ndàcàtnùhù-né nùù-yá, cachí-né:

⁴ —Cachí-ní xì-nsí ñìndù quivì cuu nsidaa ñà-nì cachi-ní jaàn. Ñìndù milagru coo ñà-cundaà ini-nsi ñà-sà-itúú quivì cuu nsidaajàn?

⁵ Dandu nì cachi-yà xì-né:

—Cuidadu cundoo-nsia ñà-màsà dándahví ni-iin nèhivì mii-nsiá.

⁶ Vàchi cuàhà ana icúmi quixi danani úún-né nduú-né yùhù, te cachi iin iin-ne xì nèhivì ñà-Cristu nduú-né. Te sàhàjàn cuàhà nèhivì ñihì-né dandahví-nè.

⁷ Doco mii-nsiá, na cunitnùhu-nsia iá cuàhà guerra yoho te yucán, màsà yúhì-nsiá, vachi fuerza icúmi coo ducán. Doco tãñàha ga xinu tiempu yohó nduajàn, iá gá ñà-vaxi cuu.

⁸Daani, ñuu xí ñuu, icúmiá nàá stnahá. Vàchi cuàhà rey, icúmi-tê dandacú-te coo guerra xí inga ñuu. Te icúmi tnàa stná yoho te yucán ñuhiví, te coo stná tnama. Doco ñà-làcà cuàhàn quesaha tnùndoho cunduaamá.

⁹'Doco mii-nsiá, cundoo tũha-nsia, vâchi icúmi nêhiví tnii-ne mii-nsiá cundaca-nsiá cùhùn nùu tè-xícusahnú. Te icúmi-nsiá ñàhni cuii-nsiá ini veheñũhu. Te sàhà-ñà càhvi-nsiá yùhù, ñâyücandüá, icúmi-nê datnátuu stná-nê mii-nsiá nùu gobernador xí nùu rey (ñà-càhàn tnùhù-né diquì-nsiá). Dandu ñà-jaàn cunduu tiempu vâha cachi vate-nsiá ñà-ndüá xiníndisâ-nsiá cunini-temà.

¹⁰Te dècuèndè inicutu ñuhiví icúmi cuitià stná razón ndiaha xí Dios, dandu después xínu (tiempu yohó).

¹¹Doco icúmi nêhiví canicuàchi-ne sàhà-nsiá, te cundaca-nsiá cùhùn nùu tè-xícusahnú. Doco màsà nácáni ini-nsiá ni-iyuhu indü palabra naxiconihí-nsiá nùu-té. Còo, cuisì nacua dachitnùni ini Dios mii-nsiá hora yucán, divi cachi-nsiá xi-té. Vâchi màdi mii-nsiá cunduu ana càhàn; còo, divi Espiritu Ìi xí Dios icúmi dacàhàn xi-nsiá.

¹²'Doco dava nêhiví, dècuèndè ñani-nê icúmi-nê cahin-nê nùu autoridad ñà-cui nècuàchimà. Te dava stná-nê, dècuèndè dèhe-ne cahin stná-nê ñà-cuià. Te dava stná-nê, dècuèndè yuadíhí-nê cuni ùhì-nê, te canicuàchi stnahá-né ñà-cui-nê.

¹³Te mii-nsiá, sàhà yùhù icúmi nsidaa nêhiví cuni ùhì-nènsiá. Doco nú iin-ni cunihnu vâha ini-nsia dècuèndè sàà xínu tiempu, dandu càcu-nsia nùu Dios.

¹⁴'Sàhaha ni cachitnùhu Daniel iin palabra xi Dios sàhà nansa icúmi coo iin figura dana có-xiñùhù dahuun-ya. Cunaha-nsiá, quivì cuni-nsiá sàni sàcuìin figura mà iin xaan ndé còo permisù cuian, (dandu seña cundua). Te vichi xiñuhu cundaà ini nsidaa ana càhvi-xi tutu yohó. Pues na sàà quivì yucán, dandu ni cunúdhé nsidaa nêhiví ndoó ladu Judea yohó cùhùn-nê yucù.

¹⁵Te nú dìnivèhé ndoó-né (quetátú-nè), dandu (yàchi ni nuú-né cunudèhé stná-nè), doco màsà nànsihvi ga-nê vehe nsiquihin-ne ñà-ndüá icúmi-nê.

¹⁶Te nú ndoó-né nùu itú, dandu màsà nándúcú-né ni cotón-né.

¹⁷Te ñdahví nècuàchi ñàhà cuhì cuàhàn tũnuù mèe-xi quivì yucán! Te ñdahví stná nècuàchi icúmi xí mèe chichì!

¹⁸Te càcàn tàhvi stná-nsiá nùu Dios ñà-màsà cùvixin na sàà tiempu cunudèhé-nsiá mà.

¹⁹Vâchi yâha ga icúmi nêhiví ndoho-ne quivì yucán. Còo cá tnùndoho chicá cahnú ni ía ndé quivì ni cuyucun ñuhiví xi ndé quivì coamà. Ni quivì después, mà sàà gà coo tnùndoho ndudava xán.

²⁰Te nú màsà cùndèhe ndahví Dios, dacúxió yàchi-yà tnùndoho ma, dandu ndütü nsihí nêhiví ñuhiví ni cùí. Doco sàhà nêhiví sàni nacàxin-ya, ñâyücandüá sàni chitnùni ini-yà ñà-chicá yàchi dacúxió-yà tnùndoho.

²¹'Quivì yucán màsà cúníndisâ-nsiá yuhù nêhiví cachi xi-nsiá: "Cundehè-nsiá, yohó ía ana nduú Cristu", te ò: "Yucán ía-yà".

²²Vâchi icúmi quixi cuàhà tètñùhù, te iin iin-tè cachi-te ñà-divi Cristu nduú-te. Te icúmi quixi cuàhà stná ana danani uún càhàn cuenta xi Dios. Ndé quida stná-te cuàhà milagru sàhà-ñà ndulocó nêhiví, àma nihi stná-te dandahví-te nêhiví ni nacàxin-ya cahan-té, doco mà cùí.

²³Ñâyücandüá, mii-nsiá, cundoo tũha-nsia, vâchi sàni cachitnùhi xi-nsiá nsidaa ñà-ndüá icúmi cuu.

Nansa icúmi cuu quivì naxicocuíin Jesús

²⁴'Nú sàni yâha tiempu tnùndoho quivì yucán, dandu mà cúnchí gá ni orá ni yoo.

²⁵Te sìnsiví itándiáá ansivi, icúmi-sí còyo nihi-si nùu ñuhiví. Te sitnùu nahnú, icúmi stná-si ndacúchí ndee-sí.

²⁶Dandu natüi yùhù ana nduú Tnaha Nêhiví Ñuhiví, cundehè nêhiví ñuhiví yùhù sàmànui mahì vicò xi poder cahnú xí. Te ndiaha gá coo inicutu ndé mànuí.

²⁷Dandu luegu icúmi techuín àngel xi cùhùn-nè inicutu ñuhiví ñà-danátácá-nè ana nduú nêhiví sàni nacàxin, mate ndoó-né iin xaan ndé vihi gá xica ñuhiví xi ansivi, doco icúmi-nè nataca-nè quixi-ne quida àngel xi.

²⁸'Vichi cuàhin nacani xi-nsiá iin ejemplu sàhà nù-higu sàhà ñà-cundaà ini-nsia iñàha. Nú sàni ndunsidi-nú ni quesaha naná ditù yuté-nu, dandu ñà-yúcán cundaà ini-ndà sà-itúú tiempu ihni.

²⁹Pues ducáni stná xi mii-nsiá; quivì cuni-nsiá cuú ñà-ndüá sàni cachi xi-nsiá, dandu vátüni cundaà stná ini-nsia ñà-sàni cuyatni tiempu naxicocuíin nduá; sà-itúú nihi.

³⁰Te mà sàà cui nsihí nêhiví itiá-cú vichi dècuèndè cachi sàni cuu ndisa nsidaa ñà-ndüá sàni cachi xi-nsiá vichi.

³¹ Cunaha-nsiá, icúmí sàà ansivi xì ñuhiví ndañuhá, doco palabra xi, còo, mà nunca sàà ndañuhá.

³² 'Doco ni quivì, te ni hora naxicocuñin, ni-iin nēhivì có-ínahá-nē, ni ángel ndoó ansivi, có-ínahá stnā-nē. Ni stnā yùhù ana nduú Dēhemaní Dios, có-ínahá stnāi; cuisí Yuamáni' nduú ana inahá.

³³ Ñàyücàndüá, cundoo tūha-nsiá, te cunihnu vāha ini-nsiá, vāchi có-ínahá-nsiá índu hora divi cuu nsidaájān.

³⁴ Ducán iá na ian quidá iin lamú na cuyúcun-nē cūhùn xicā-nē, dandacú-nē nùu mozo xi-ne sàhà biene xi-ne. Iin iin mozo mà, nihí-te chuun quida-tē. Te mozo ndiaá yehè, ndacú nùu stnā-te ñā-cundiaa tūha-tē yucán.

³⁵ Pues divi ducán stnā mii-nsiá, xiñuhu cundoo tūha-nsiá, vāchi có-ínahá-nsiá índu hora divi naxicocuñin yùhù ana nduú Lamú xi-nsiá, sea cuñaá, ò dava ñūu, ò sinduhá cundua, te ò naha.

³⁶ Vāchi nanāá icúmí naxicocuñin, ñàyücàndüá còtò (nandòdó-nsiá ñā-jaàn), te na ian quidí-nsiá cundua.

³⁷ Ñàyücàndüá, yùhù cachí xi-nsiá nacua cachí xi nsidaa nēhivì xí, ni cúndóo tūha-nsiá —ni cachi Jesús.

14

Nansa ni ndatnuhu tnahá nēhivì ñā-nàndúcu-nē nansa tñii-ne Jesús

¹ Daani, cumáni gá ùi quivì cunduu vicò pascua xì stnā vicò xixí-né pan có-ndütáchi. Te dütü xicusahnú, xi nēcuächì ley xi veheñuhu, ni nanducu-né nansa tñii dēhé-nē Jesús ñā-cui-yà.

² Doco ni cachi-nē:

—Còo, màdì mahì vicò (quida-nda ducán), vāchi te nú còo, vihini nacuidà nēhivì.

Nansa ni sòdò iin nēcuächì ñahà ndutè tñami itnu ñini Jesús

³ Iá-yà vehe iin nēcuächì ñūu Betania nani Simón, iin nēhivì ni sandoho cuèhè lepra antes. Te iá-yà xixí-yà, te yucán ni sàà stnā iin nēcuächì ñahà, nihí-né iin quidí iá dúcun-xí. Yùu ni cuyucàn mà, te ñuhá ndutè tñami finu nani nardo; te ndiaá sàstnùhù-té. Dandu ni sàhnù nēcuächimà dúcun quidí ma ni sòdò-nēte itnu ñini-yà.

⁴ Doco dava nēcuächì xixí yucán, ni cuduchi gá ini-nē, cachí-nē iin-ne xì inga-nē:

—¿Índü chuun ni sate uun-ne ndutè jaàn, te ndiaá guá-te?

⁵ Chicá vāha dicò-nēte ni cuí, te mà ùhì quee iin ùni cientu dihùn plata dasàn-ndà nùu nēcuächì ndahví.

Ducán cachí-nē, cánahá-nē xì nēcuächimà.

⁶ Doco ni cachi Jesús xi nēhivì mà:

—Nacoo-nsiá nēcuächì jaàn. ¿Índü chuun cánahá-nsiá xi-né? Vāchi iin ñā-vāha nduá sàni quida-ne xí'.

⁷ Vāchi nēcuächì ndahví, nicanicuahàn ndoó-né xi-nsiá, te mà ùhì chindee-nsiánè ní cahan-nsiá. Doco yùhù, còo, sacù-ni quivì ié' xi-nsiá.

⁸ Ñàyücàndüá, nēcuächì ñahà yohó, ñā-ndüá sàá-nē quida-ne, divi nduá sàni quida-ne sàhì, na ian sàni quidatatna-né cuerpu xi sàhà-ñā cundüxan, ducán nduá.

⁹ Te yùhù cachíñhì xi-nsiá, nsidanicuú ñūu ndé sàà razón ndiaha xí Dios inicutu ñuhivì, yucán icúmí sàà stnā palabra sàhà ñā-vāha ni quida nēcuächì ñahà yohó, te ducán mà nunca sàà nēhivì nandòdó-né nēcuächimà.

Nansa ni saquin Judas compromisu cahin-nē Jesús nùu nēcuächì xídandacú

¹⁰ Nùu ùxin ùi compañeru Jesús, iin-ne nani Judas Iscariote. Nēcuächì yohó, ni sàhàn-nē nùu dütü xicusahnú, ni ndatnuhu-né xi nēcuächimà ñā-cahin-nēyà.

¹¹ Te ni cacudii ini nēcuächimà na ní cundaà ini-nē. Te ni saquin-nē compromisu chiyàhvi-ne. Ñàyücàndüá, ni quesaha Judas mà nandúcu-né índu modo dayáha-neyà ndahà nēcuächì yucán.

Nansa ni cutnahá Jesús xi compañeru-yà ni xixi-ya Cena ii

¹² Daani, ni sàà tu quivì primeru xi vicò xixí-né pan có-ndütáchi. Te quivì yucán xihì stnā lelu nduú promesa siempre sàha-ne vicò pascua mà. Ñàyücàndüá, ni cachi nēcuächì dacuahá-yà xi-yà:

—¿Índü divi cuní-ní cūhùn-nsi quidayucun-nsi ñā-cuxi-ní comida vicò pascua?

¹³ Dandu ni dandacú-yà nùu ùi compañeru-yà, cachí-yà:

—Cuahán-nsiá ini ñūu. Te yucán icúmí-nsiá ndacūhun tnahá-nsiá xi iin tiàa idádócò xi iin yoo tēcuí. Nēcuächì yucán cunchicùn-nsiá cūhùn.

¹⁴ Te divi vehe ndé quihvi-ne, yucán càhàn-nsià xì nècuàchì divéhé-xímá, cachi-nsià xì-né ñà-dòhó cachi maestru: ¿Índù íá quartu cahnú ndé cuxi-ya comida pascua xì nècuàchì dacuahá-yá?

¹⁵ Dandu icúmí nècuàchì mà dacuní-nè mii-nsiá índù íá iin vehe cahnú pisu diquì-xí ndé sà-íá nsidaa ñà-nduá xiñuhu. Yucán quidayucun-nsià ñà-cudiní-nda.

¹⁶ Dandu nì quihin ùi nècuàchì mà ichì cuàhàn-nè. Te nì sàà-nè ini ñuu mà, te nacua nì cachi-yà, ducán ndisa nì cuu. Ñàyùcànduá divi yucán nì quidayucun-nè comida pascua.

¹⁷ Daaní, na ní cuñaà, dandu nì sàà stná-yà xì nsi-úxin ùi nècuàchì dacuahá-yà.

¹⁸ Te na ndoó-né xixí-né, dandu nì cachi-yà xì-né:

—Cunaha-nsiá, íá iin-nsia cuàhàn cahin xí'. Te yohó íá-nè xixí-né xì-ndà.

¹⁹ Dandu nì nàcùndoo nsidaa nècuàchì mà tñnsí ini, te nì cachi iin iin-ne xì-yà:

—¿A víhíni yùhù?

—¿Te ò yùhù? —cachi inga-nè.

²⁰ Dandu nì cachi-yà xì-né:

—Nùù nsi-úxin ùi-nsiá, iin-nsia cuàhàn cahin xí', mate iin-ni xixí-né xì-ndà, te tavá stná-nè pan nùù cazuela yohó.

²¹ Ñà-ndáa nduá, icúmí cuu ndisa ñà-nduá' nì cachitnùhu nùù tutu ìi ñà-icúmí cui yùhù ana nduu Tnaha Nèhivi Ñuhiví. Doco tiàa cuàhàn cahin xí', ¡ndahví-nè! Chicá vaha màsà túinuù-né ñuhiví nì cùí —nì cachi-yà.

²² Na meru xixí nsidaa-né, nì tñni-ya iin pan, te nì naquimaní-yá Dios sàhà-ñá, te nì dàcuàchí-yáñà, nì dasàn-yá nùù nècuàchì dacuahá-yá mà, cachi-yà:

—Tñni iin iin-nsia pan yohó, vachi nahi iquicúñu yùhù nduá.

²³ Dandu nì tñni stná-yá pocillu, nì naquimaní stná-yá Dios sàhà ñà-ñuhú, te nì sàha-ya nì caxihí nsidaa-né.

²⁴ Dandu nì cachi-yà:

—Ndutè si-uva yohó, nahi nìi nduú-te, vachi divi sàhà nìi icúmí nacoi iin ichì sàà cunchicùn nèhivi nù sàni xitià-ñà sàhà cuàhà-né.

²⁵ Doco cunaha-nsiá, mà cóhó gué' ndutè si-uva yohó dècuèndè cachi sàà nacoho saa túi-te quivì sàà cusahnú Dios inicutu ñuhiví yohó.

Nansa nì cachi Jesús xì Pedro ñà-ináhá-yá icúmí-nè nacuaà-néyà

²⁶ Daaní, nì xito nsidaa-né alabanza, te nì quee-ne cuàhàn-nè xì-yá ndè yucù Olivo.

²⁷ Dandu nì cachi-yà xì-né:

—Ñuú vichi icúmí nsidaa-nsiá nacoo nihni-nsia yùhù, vachi ducán cachí tutu ìi: “Cuàhàn dacúxióe pastor, dandu icúmí rii cuitià nihni-sí”, cachá'.

²⁸ Doco nù sàni natiacuì, dandu icúmí codònuì nùù-nsiá cùhùn ndè ladu Galilea.

²⁹ Dandu nì cachi Pedro xì-yà:

—Mate nì sàà nsidaa nèhivi nacoo nihni-ne mii-ní, doco yùhù, còò, mà nunca.

³⁰ Dandu nì cachi-yà xì-né:

—Cunaha-ní, divi ñuú vichi icúmí-nì nacuaà-ní yùhù. Tãñáha ga coto lehe ùi xichi sinduhá, te sàni nacuaà-ní yùhù ùni xichi.

³¹ Doco Pedro, yáha ga ndee ní càhàn-nè, cachí-nè:

—Còò. Mate nì cahni-ñèndó, doco mà nunca sàì nacuaí' mii-ní —nì cachi-nè.

Te divi ducání nì cachi gà stná nsidaa nècuàchì dacuahá-yá mà.

Nansa nì sàhàn Jesús huertu nani Getsemaní, te nì xicàn tàhvi-yá nùù Yuamání-yá

³² Dandu nì sàà-yà xì-né iin xaan naní Getsemaní. Te nì cachi-yà xì-né:

—Mii-nsiá, yohó ndòo-nsia. Te yùhù, cùhìn chicá nùù-xí càcàn tàhvi nùù Dios.

³³ Dandu nì saca-ya Pedro xì Jacobo xì Juan, cuàhàn-yà xì-né. Te nì sàcòo-ya na ian yúhí-yà, te nì quesaha-yá yáha ga nacání cuàhà ini-yà.

³⁴ Te nì cachi-yà xì-né:

—Yáha ga ié' tñnsí ini, na ian cuníà cahni dahuan yùhù. Ñàyùcànduá, yohó nì ndóo-nsia, te cunchito túha-nsia.

³⁵ Dandu cuàhàn-yà chicá nùù-xí, te nì sàcùnduhù ndèé-yá nì xicàn tàhvi-yá nùù Dios, áma cui cuxio tñndohò icúmí-yá yáha-ya.

³⁶ Te dohó nì cachi-yà:

—Yuamání, nsidaa ñàhà vátùnì quida-ní. Ñàyùcànduá, xicàn tàhvi nùù-ní áma cuxíó tñndohò icúmí yáhi, vachi na iin (ñà-úà ñuhú iin) taza nduá nùù, te ùhì cohíà. Doco màdì ñà-nduá cuní yùhù nì cùnduá, cuiisí ñà-nduá cuní mii-ní.

³⁷ Dandu vaxi tu-ya ndé nì ndòo nècuàchì dacuahá-yá, te nì xini-yà xíquidí-nè. Ñàyùcànduá, nì cachi-yà xì Pedro:

—Simón, ¿índù chuun quidí-ní? ¿Áma cui cunchito-ní ducán iin hora nì?

³⁸ Cundoo tũha-nsia, te cãcãn tãhvĩ-nsiã nũu Dios sãhá mãsã dãndãhvĩ ñã-malu mii-nsiã, vãchi mate iã voluntad xi-nsia, doco iyuhu gã valor icúmĩ cuerpu-nsiã ñã-quidandee ñni-nsia.

³⁹ Dandu ni sãhãn-yã inga xichi, te divi ducãn-nĩ ni cachi tu-ya xi Yua-yã Dios.

⁴⁰ Dandu vãxi tu-ya, te ni xini-yã tucutu quidi-nẽ, vãchi sãdi vãhnã-nẽ. Ni có-nãnihĩ tũnũ ñni-nẽ nansa naxiconihĩ-nẽ nũu-yã.

⁴¹ Dandu tucu tu ni sãhãn-yã ñã-ũni, te ni nsiaa tu-ya nũu-nẽ, cachĩ-yã:

—Cũdũ cuẽyãã-nsiã, te quetatu-nsiã vichi, vãchi sã-iã, sãni sãã hora xi yũhũ ana nduũ Tnaha Nẽhivĩ Nũhivĩ, divi hora icúmĩ yãhi ndahã nẽhivĩ cuãchi.

⁴² Ndacũita-nsia, cũhũn-ndã, vãchi sã-itũu quesaa ana ni cahĩn xĩ.

Nansa ni tũii nẽhivĩ Jesũs, te ni suhni-nẽyã

⁴³ Daanĩ, na cãhãn ñi-yã xi nẽcuãchimã, dandu ni quesaa Judas, divi iin nẽcuãchi nũu ùxin ù nẽcuãchi dacuahã-yã. Te ndacã stnã-nẽ cuãhã gã tiãa xinihi xi espada xi garroti. Cuenta xi dũtũ xicusahnũ vãxi-tẽ, xi cuenta xi stnã nẽcuãchi ley xi veheñũhu, xi stnã nẽcuãchi xidandacũ nũu ñuu mã.

⁴⁴ Te sãni ndatnuhu Judas xi nsidaa tiãa xicutnahã xi-nẽ ñã-coo iin seña ana tũii-tẽ. Divi ana chĩtũ-nẽ cunduu meru ana tũii cũhũn presu.

⁴⁵ Dandu na sãni quesaa-nẽ, dandu vichi vichi ni tnatuu-ne nũu Jesũs, cachĩ-nẽ:

—¡Maestro, maestro!

Dandu ni chĩtũ-nẽ nũu-yã.

⁴⁶ Dandu compãneru-nemã, ni tũii-tẽ Jesũs, ni ndõo-ya ndahã-tẽ.

⁴⁷ Doco iin nẽhivĩ xĩ-yã, ni tavã-nẽ espada xi-ne, ni cani-ne iin tiãa quidãchũn nũu dũtũ cusãhnũ, ni sahnde-nẽ iin tũtnũ-tẽ.

⁴⁸ Dandu ni cachĩ-yã xi nsidaa nẽhivĩ cuãhã mã:

—A ducãn nduũ modo tũii-nsiã yũhũ, vãxi-nsia nihĩ-nsiã espada xi garroti ñã-tũii-nsia yũhũ, na ian tẽcuĩhnã nduĩ,

⁴⁹ mate nsiquĩvĩ nisa ie xi-nsiã veheñũhu cahnũ dacuahĩ nẽhivĩ, doco cóni tũii-nsiã yũhũ. Doco cunaha-nsiã, dohó quidã-nsiã xĩ vichi sãhã-ñã cuu ndisa ñã-ndũã cachĩ nũu tutu ñi —ni cachĩ Jesũs.

⁵⁰ Dandu ni nacoo nihni nsidaa nẽcuãchi dacuahã-yã mii-yã, ni xinudẽhẽ-nẽ.

Iin tẽchii ni xinudẽhẽ stnã

⁵¹ Daanĩ, nchĩcũn stnã iin tẽchii ndixi-xi iin dahmã. Te ni tũii stnã-tẽ.

⁵² Doco ni ndõo sicoto xi-tẽ, te ni xinu-tẽ cuãhãn-te iã chaa-tẽ.

Ñã-ndũã ni cachĩ Jesũs na nĩ sãã-yã nũu Junta Cahnũ

⁵³ Daanĩ, ndacã tiãa ma-yã ni sãã dẽcuẽndẽ ndẽ iã dũtũ chicã cusãhnũ. Te yucãn sãni nataca nsidaa gã dũtũ xicusahnũ, xi stnã nẽcuãchi sahnũ xidandacũ nũu ñuu mã, xi stnã nẽcuãchi ley xi veheñũhu.

⁵⁴ Te Pedro, nchĩcũn xicã nĩ-nẽ mii-yã cuãhãn-nẽ. Te ni yãha stnã-nẽ patiu xi vehe dũtũ cusãhnũmã, te ni sãcõo stnã-nẽ xi policia ndõo nadãã nũu ñuhu.

⁵⁵ Daanĩ, dũtũ xicusahnũ, xi nsidaa Junta Cãhnũmã, ni nducu-nẽ ana daquẽe cuãchi diquĩ Jesũs, (te cundua iin cuãchi pesadu) sãhã-ñã cui-yã. Doco cõo iin ni tũii cãhãn ducãn.

⁵⁶ Vãchi cuãhã tẽtnũhũ ni cãhãn tũhũ diquĩ-yã, doco cóni ndũdãvã ñã-ndũã ni cachĩ iin iin-tẽ.

⁵⁷ Vãchi dava-tẽ, ni ndacũita-tẽ ni cãhãn tũhũ-tẽ diquĩ-yã, cachĩ-tẽ:

⁵⁸ —Nẽcuãchi yohó, ni inini-nsi ni cachĩ-nẽ cuãhãn-nẽ dacaã-nẽ veheñũhu ni quidavãha nẽhivĩ (ñuu-ndã). Dandu tixi ùni quivĩ cuãhãn-nẽ quidavãha saa-nẽ inga-ñã, doco mãdi xi ndahã nẽhivĩ cuyucãn, cachĩ-nẽ —ni cachĩ tẽtnũhũ mã.

⁵⁹ Doco ni ñã-jaãn, cóni ndũdãvã xĩ ñã-ndũã ni cachĩ ingã-tẽ.

⁶⁰ Dandu ni ndacuiin dũtũ cusãhnũ, cachĩ-nẽ xi-yã:

—¿Ama nãxicónihĩ-nĩ ni-ñãhã? ¿Nansa iã ñã-cãchĩ guã nẽcuãchi yohó sãhã-nĩ?

⁶¹ Doco mii-yã, dadĩ uun ñĩn-yã; cõo ni-ñãhã ni cachĩ-yã. Dandu tucutu ni cãhãn dũtũ mã, cachĩ-nẽ:

—¿A divi Cristu Dẽhemanĩ Yua-nda Dios ndũu-nĩ cãhãn-nĩ?

⁶² Dandu ni cachĩ-yã xi nẽcuãchimã:

—Jaãn, divi nduĩ. Te icúmĩ-nsiã cuni-nsiã yũhũ ana nduũ Tnaha Nẽhivĩ Nũhivĩ na naxicocũin, iẽ ladu cuahã mii-yã cahnũ poder-xi mãnuĩ mahĩ vicõ cahnũ ansivi.

⁶³ Dandu dũtũ cusãhnũ mã, (ni xidã ñni-nẽ, ñãyucãndũã) ni ndata canũu-nẽ iyuhu sicoto ndixĩ-nẽ, te ni cachĩ-nẽ xi nẽhivĩ cuãhã mã:

—¡Cõ-xiñũhũ gã-ndã ni-iin ana quixi cunduu testigu!

⁶⁴ Vâchi vichi sâni inini-nsia ñâ-quini guá ni cãhàn nècuàchì yohó. ¿Nansa quida-nda xi-né, cachí mii-nsiá?

Dandu nsidaa-né, ni cachi-nè ñâ-ícúmí-yâ cui-yâ.

⁶⁵ Dandu ni caquesaha dava tiãa ma ni sivi dií-teyá, te ni chidãhvi stná-te nuù-yá, sahní cuií-teyá xi sîcátú, cachí-te:

—¡Cachi cuãá-ní ana ni caní xi-ní!

Daaní, stná policíá yucán, ndee ní caní-ne nuù-yá.

Nansa ni quida Pedro ni nacuaà-né Jesús

⁶⁶ Doco Pedro, tixi-xi iá-nè patiu. Dandu ni quixi iin ñahà chii quidáchúun vehe dùtù mà.

⁶⁷ Te na ní xiníã Pedro iin-né nadáã stná-nè nuù ñuhu, dandu ni indehè váha-ñâ nuù-né, te ni cacha xi-né:

—¿Amadí mii-ní nîsa cutnahá stná-ní xi Jesús de Nazaret?

⁶⁸ Doco ni nacuaà-né mii-yá, cachí-nè:

—Coo, tàcùnî nècuàchímã, ni có-cùndáã iní ñâ-nduá cachú.

Dandu ni quee-ne cuãhàn-nè corredor yucán. Te daa ní xito iin lehe.

⁶⁹ Te ñahà chii mà, ni indehè tú-ñané, te ni cachi-ña xi nècuàchì itá yucán:

—Compañeru Jesús nduú stná nècuàchì jaàn.

⁷⁰ Doco divi-ní ni nacuaà tú Pedro-yâ.

Daaní, tixi inga ratu gà, tucutu ni cãhàn nècuàchì itá yucán xi-né, cachí-nè:

—Nîsa, iin compañeru nècuàchímã nduu-ní, vâchi nècuàchì ladu Galilea nduu-ní, te nacua cãhàn nèhivì ladu yucán, ducán cãhàn stná-ní.

⁷¹ Dandu ni cachi-nè:

—Nú tètñùhù nduí, ni quixí castigu xi nuù Dios. Yùhù, chináhí Dios, tàcùnî nècuàchì cachí-nsiãmã.

⁷² Dandu momentu yucán ni xito lehe ñâ-úi; te ni nsinuu ini Pedro nansa ni cachi Jesús xi-né daa, ñâ-tãñãha ga coto lehe ùi xichi, te ùni xichi sâni nacuaà-né mii-yá. Pues divi palabra mà (ní nsinuu ini-nè), te na ní nacani ini-nè sãhãmã, ni quesaha-né ni sacu-ne.

15

Nansa ni dàyãha-ne Jesús ndahã gobernador Pilatu

¹ Na ní tùinuù, dandu ni ndatnuhu dùtù xícusahnú xi tè-cúsahnú nuù ñuu mà, xi stná nècuàchì ley xi veheñùhu, xi nsidaa gá stná Junta Cahnú. Ñâyücandüã, ni nacuhni-nè ndahã Jesús, cuãhàn-nè xi-yá nuù gobernador nani Pilatu, te yucán ni ndòo-ya ndahã témã.

² Dandu ni xicàn tnùhù-té nuù-yá, cachí-te:

—¿A ndísã rey xi nècuàchì raza Judea nduu-ní, á cóó?

—Nacua cachí-ní, divi ducán nduá —cachí-yâ.

³ Dandu dùtù xícusahnú, cuãhã ní cãhàn tnùhù-né sãhã-yâ.

⁴ Dandu ni ndacãtnùhù Pilatu nuù-yá inga xichi, cachí-te:

—¿Ama náxicónihí-ní sãhã ñâ-cuãhã guá cãhàn-nè diqui-ní?

⁵ Doco Jesús, còò ni-iñãha ni náxicónihí-yá. Ñâyücandüã, ni ndulocó Pilatu.

Nansa ni cachi stná Pilatu icúmí Jesús cui-yâ

⁶ Cunaha-nsiã, cada nacavá vicó pascua mà, tũha gobernador mà dañã-té iin tè-ndiãdí, ndéni-te ni cui ndiãdí cudí ini nèhivì cuãhã.

⁷ Te quívi yucán ndoó itnii tiãa vehecãa. Vâchi ni casahàn-te revolución diqui gobiernu, te ni sahní stnãhá-te. Te iin tèmã nani Barrabás.

⁸ Ñâyücandüã ni caquixi tu nèhivì cuãhã mà ni quesaha-né ni xicàn-nè nuù Pilatu ñâ-ni quidã tú-te ñâ-nduú costumbre xi-tè cada vicó mà.

⁹ Te ni naxiconihí-te nuù-né, cachí-te:

—¿A vátùni dañí Jesús yohó, divi nècuàchì cachí nduú rey xi nècuàchì raza-nsiã Judea?

¹⁰ Ducán ni cachi-te xi-né, vâchi ináhã-té ñâ-sãhã mbidiã xi dùtù xícusahnú, ñâyücandüã ni dàyãha-ne Jesús ndahã-té.

¹¹ Doco dùtù mà, ni chiyuhù-né nèhivì cuãhã mà ñâ-ni cãcàn-nè dàñã Barrabás mà, te màdiã Jesús.

¹² Dandu ni cãhàn tu Pilatu xi nèhivì mà, cachí-te:

—¿Ndiã nduã cuní-nsiã quide xi nècuàchì yohó? Vâchi rey xi mii-nsiã nècuàchì raza Judea nduú-né, cachí-nsiã.

¹³ Dandu ndee ní càna nsidaa nèhivì yucán, cachí-nè:

—¡Ni cuií-nè nchica cruz!

¹⁴ Dandu ni cachi tu Pilatu:

—¿Índù chuun cui-nè ñâ-còò falta xi-ne iá?

Doco chicá ndee ní càna nèhivì mà, cachí-nè:

—¡Ni cui-nè nchìca cruz!

¹⁵ Te sàhà ñà-cùnì Pilatu ndòo vaha-tè xì nèhivì mà, ñàyùcàndúá nì ñaño-tè Barrabás. Te nì dándàcú-te ñàhni cuiì Jesùs xì chirrión. Dandu nì dándàcú stná-te nùù soldadu xì-tè ñà-cundaca-temàyá cùhùn chituu-tèyá nchìca cruz.

¹⁶ Doco primeru, nì casaca-tèyá ndè patiu vehechuún, te nì cana-tè nsidaa compañeru-te ñà-tnátuu-tè.

¹⁷ Dandu nì chindixi-tèyá iin sicoto moradu. Te nì cavà-tè iin corona iñù nì chicaà-te ònì-yá.

¹⁸ Dandu nì sàcùndiaa-teyá, cána-tè, cachí-te:

—¡Viva! ¡Ádi rey xì tè-raza Judea nduu-ní!

¹⁹ Te nì cani fuerte-te ònì-yá xì iin nù-yòò. Dandu nì casivi dií-teyá, te nì sàcùitasisi-tè nùù-yá, na ian quidáñúhú-tèyá.

²⁰ Daaní, na ní nsihì nì sàcùndiaa-teyá ducán, dandu nì tavà-tè sicoto moradu mà, te nì nachindixi-tèyá sicoto xì mii-yá. Dandu nì saca-tèyá cuàhàn-te ñà-chituu-tèyá nchìca cruz.

Nansa nì chituu-tè Jesùs nchìca cruz

²¹ Ichi yucán nì ndacùhun tnahá-te xì iin tiàa nani Simón, màndixi-ne nì sàhàn-nè nùù itú. Iin nècuàchi ñuu Cirene nduú-né, te yua Alejandro xì Rufo nduú stná-nè. Te divi nècuàchimà nì tniì soldadu, te nì dàcuídá-tené cruz xì Jesùs cuàhàn-nè.

²² Dandu nì casaa-te xì-yá iin xaan nani Gólgota. Quivì jaàn cachí dàhàn yucán, Nùù Iquidini.

²³ Dandu nì cuni-te dacohó-teyá vinu dácà xì iin dùsa tatna nani mirra, doco cónì cùnì-yá.

²⁴ Daaní, nì chituu-tèyá nchìca cruz. Te nì dasàn-tè sicoto xì-yá segùn nansa nì nihì iin iin-tè na ní idiquí-te sàhà-ñá.

²⁵ Nahi cà-ñin dàtnàà nduá nì chituu-tèyá nchìca cruz mà.

²⁶ Te yucán nì cachituu stná-te iin ñà-càchitnùhu índù-ñá disàhà-xì dandohó-teyá. Te dohó cachá: “Rey xì tè-raza Judea”.

²⁷ Cunaha-nsiá, yucán nì sàcùtundiaa stná ùi tècuihnà nchìca cruz, iin-tè ladu cuàhá-yá, te ingà-te ladu itnì-yá.

²⁸ Te ducán nì cuu ndisa ñà-nduá nì cachitnùhu tutu ìi ndé cachá: “Nì quida nèhivì cuenta na ian tiàa malu nduú-yá”.

²⁹ Dandu nèhivì yáha yucán, nì canàhá-nè xì-yá, dacuico dínì-né, cahíchi ini-nèyá, te ndacótó dana-ne nùù-yá, cachí-nè:

—¡Ndahví-ní! ¡Cuàhàn-ní dacao-ní veheñùhu cahnú, te tixi ùnì quivì naquidavàha saa-ní inga-ñà cahan-ní!

³⁰ Pues nú ducán fuerte guá-ní, dandu dacácu-ní mii-ní. Danuu-ní mii-ní nùù cruz cundehè-nsí —nì cachi-nè.

³¹ Ndè stná dùtù xícusahnú, xì nècuàchi ley xì veheñùhu, divi-ni ducán nì sàcùndiaa stná-nèyá, cachí-nè iin-ne xì inga-nè:

—Nècuàchi jaàn, nisa dacácu-ne nècuàchi dava ga, doco mà cùì dacácu-ne mii-né.

³² Doco nú ndisa Cristu rey xì nècuàchi raza-ndà Israel nduú-né, dandu nì dánúú-né mii-né nùù cruz jaàn cundehè-ndà, dandísá cunindisa-ndané.

Ducán nì cachi-nè. Te dècuèndè stná tiàa itándiáá stná nchìca cruz yucán, nì canàhá stná-te xì-yá.

Nansa nì xihì Jesùs, nì dānāá-yá sàhà cuàchi-nda

³³ Daaní, càxíhúì xì ndé càhúni, nì nàcùlìn trùù inicutu ñuhivì.

³⁴ Dandu càhúni nì ndàhì ndee-yá, cachí-yá:

—Eloi, Eloi, ¿lama sabactani? —te dohó cunì cachàmà: Dios mío, Dios mío, ¿a ñá-sàni ndòo nihni nduá yohó?

³⁵ Te dava nècuàchi itá yucán, nì tiacu-nè ndàhì-yá ducán, ñàyùcàndúá nì cachi-nè:

—Cunini-nsia, caná-né Elías.

³⁶ Dandu nì ñàyáá iin-tè nì quihin-tè iin ñà-ñàhmá uun nani esponja, te nì chindaxin-tèá xì vinu nì xiò, nì chihi-tèá ònì iin vara yutnù, te nì sàha-tèyá nì sihvì-yá, cachí-te:

—Vichi nacoo-ndané cundiatu-nda, áma quíxí Elías nanihì xì-né.

³⁷ Dandu nì ndàhì ndee-yá, te nì xihì-yá.

³⁸ Daaní, yucán ini veheñùhu cahnú (ñuu mà) nì quedava ìi cortina cahnú (sadí nihni cuarto xan). Iin-ni nì ndàtá-ñá ndè ònì-xì xì ndé tixi-xì.

³⁹ Te iin iin capitán nùù-yá, te nì xini-te nansa nì ndàhì-yá, te nì xihì-yá. Ñàyùcàndúá nì cachi-te:

—Ñà-ndáá nduá, Dèhemani Dios nì sanduu nècuàchi yohó.

⁴⁰ Daaní, yucán itá xica stná itnii nècuàchi ñahà, indéhe stná-nè (nansa cuú). Iin-ne nduú María Magdalena, te inga-nè nduú María dihi José xì Jacobo chii. Te inga-nè nduú Salomé.

⁴¹ Nècuàchi ladu Galilea xínduu nsidaa nècuàchimà, te na ní xicanuu-ya ladu yucán, ni cutnahá stná-nè xì-yá ni chindee-néyà. Te vichi itá xica-né, (indéhe-ne), cutnahá-né xì cuahà gá stná nècuàchi ñahà ni quixi stná xì-yá ndè ñuu Jerusalén.

Nansa ni ndúxin Jesús ini cueva

⁴² Te sàdaaní quècahuu orá quivi yucán. Te quivi mà nduú stná quivi icúmi-nè nsidayu-cun-nè sàhà quivi descansu cunduu inga quivi mà.

⁴³ Ñàyucànduá ni sàà stná iin nècuàchi ñuu tii Arimatea nani José, ni xicàn-nè cuerpu xì Jesús. Iin nècuàchi dandacú nùu Junta Cahnú nduú-né, te nihnú stná ini-nè sàà tiempu cusahnú Dios ñuhiví yohó. Divi-ne ni sàhàn nùu Pilatu; cóni yúhí-nè, ni xicàn-nè cuerpu xì-ya.

⁴⁴ Te ni ndulocó-te, a ndísá yàchi gá sàni xihì-yà, á coó. Ñàyucànduá, ni cana-tè iin capitán, ni xicàn tñuhù-té nùu témà a ndísá sàni xihì-yà, á coó.

⁴⁵ —Jaán —ni cachi capitán mà.

Ñàyucànduá, ni sàhà Pilatu lugar naquihin José mà cuerpu xì-ya.

⁴⁶ Sàháyucànduá, ni xiin nècuàchimà iin dahmà finu, te nihi-nèa cuahàn ni nanihi-ne cuerpu xì-ya, ni chidúcùn-néyà, te ni chinacaa-néyà ini cueva xì nsii sàni càan canúu ìcà cavà. Dandu ni dátui-né iin cavà cahnú yuhù cueva mà ni sàcùndiadià.

⁴⁷ Te María Magdalena, xì María dihi José, ni caxini stná-nè lugar ndé ni sàcùnacaa-yà.

16

Nansa ni natiacu Jesús

¹ Daaní, na sàni cuñaà quivi descansu, dandu ni sàhàn María Magdalena, xì Salomé, xì María dihi Jacobo, ni xiin-ne tàtnà tñamí ñà-cunihi-ne cùhùn dacuchí-né cuerpu xì Jesús.

² Dandu naha quivi primeru semana ni quihin-ne ichi cuahàn-nè cueva ndé iá-yà. Te ni xínu orá.

³ Te cachi-nè, iin-ne xì inga-nè:

—¿Ana chindee xì-nda dacúxió xì cavà cahnú ndiadi yuhù cueva mà?

⁴ Doco ni candacoto-ne, te ni xini-nè sàni cuxio cavà mà, mate cahnú sàstñuhá.

⁵ Dandu ni quihvi-ne ini cueva mà, te ni xini-nè iá iin ana nduú na iin nècuàchi chiì, iá-nè ladu cuahá cueva mà, ndixí-né iin sicoto quihín cuxín yaa. Ñàyucànduá ni candulocó gá nècuàchi ñahà mà.

⁶ Doco ni càhàn nècuàchi iá yucán, cachi-nè xì nècuàchimà:

—Màsà yúhí-nsià; Jesús de Nazaret nandúcú-nsià, divi ana ni xihì nchìca cruz. Doco cunaha-nsià, sàni natiacu-yà. Còò cá-yà yohó. Cundehe-nsià lugar ndé ni sanduhù-yà.

⁷ Ñàyucànduá, cuahàn-nsià cachitñuhu-nsià xì Pedro xì nècuàchi dava gá nisa dacuahá-yà, te cachi-nsià xì-nè ñà-icúmi-yà codònuù-yà nùu-nsià nùhù-yà ladu Galilea. Yucán icúmi-nsià cuni-nsiayà, vachi ducán ni cachi-yà xì-nsià —ni cachi àngel.

⁸ Daaní, ni caquee nècuàchimà cueva mà, ni dàyáà-nè cuahàn-nè. Vachi ni quesaha-né quidi-né, te ndulocó gá-nè. Doco sàhà ñà-ni yúhí guà-nè, cóni cachi-nè ni-ñàhà xì nèhiví.

Nansa ni xini María Magdalena Jesús

⁹ Ducán ni natiacu Jesús naha quivi primeru semana. Te María Magdalena nduú nècuàchi primeru ni ndecunu-ya nùu-xí. Nècuàchimà, usà ñà-malu ni sañuhu ini-nè antes, doco ni tavà-yà nsidaámà anima-nè.

¹⁰ Pues divi nècuàchimà ni xini xì-yà primeru, dandu ni sàhàn-nè ni cachitñuhu-ne xì compañeru-yà, divi nècuàchi nisa xicanuu xì-yà antes. Vachi ndoó-né tñunsi ini, te sacú-né.

¹¹ Dandu ni nacani María mà xì-né ñà-sàni natiacu-yà, te ni ndecunu-ya nùu-né. Doco cóni xiníndísà nècuàchimà.

Nansa ni ndecunu Jesús nùu ùi nècuàchi dacuahá-yà

¹² Daaní, después cuahàn ùi nèhiví xì-yà nùu campu, te yucán ni ndecunu tu-ya nùu-né, doco tucu ni nàcùnahà-yà.

¹³ Dandu ni naxiocuñin nècuàchimà ni cachitñuhu-ne xì compañeru-nè. Doco cóni xiníndísà stná nècuàchi dava gá mà yuhù-né.

Ñà-nduá ni dandacú Jesús nùu nècuàchi dacuahá-yà quida-ne ni sàmànühù-yà

¹⁴ Chicá después ni ndecunu tu-ya ni natùu-ya nùu nsihúxin iin nècuàchi dacuahá-yà na meru ndoó-né xixí-né. Te ni càhàn duchi ini-yà xì-né sàhà ñà-caxin guá anima-nè, vachi cóni xiníndísà-né yuhù nècuàchi ni xini xì-yà primeru ñà-sàni natiacu-yà.

¹⁵ Dandu ni cachi-yà xì-né:

—Cuahán-nsià inicutu ñuhiví, te cachitnúhu vate-nsiá razón ndiaha xí ñà-cunini nsidan-icuú nèhiví.

¹⁶ Nècuàchì cunindisa-xán, te cuhìi-né, icúmí-nê càcu-ne nùù Dios. Doco nècuàchì mà cúnindísá-xân, nicanicuahàn icúmí-nê cunsida-ne cuàchi-ne.

¹⁷ Te nú sàni xinindisá nèhiví, dandu icúmí stnâ-nè quida-ne milagru. Sàhà yùhù icúmí-nê tavà-né ñà-malu ñuhú anima nèhiví, te càhàn stná-nè dàhàn sàà.

¹⁸ Te nú ni tnií-né iin còò dãná, te ò nú ni cohó-né ndutè dãná, dandu còò ni-íñàha cuu xi-né. Te icúmí stnâ-nè chitandòó-né ndahà-né òni nècuàchì cuhí, te nduvàha nècuàchimà —nì cachi-yà.

Nansa mànuhù Jesús ansivi cuàhàn-yà

¹⁹ Daaní, na ní nsihi nì càhàn-yà xi nècuàchì dacuahá-yá ducán, dandu mànana cuisì-yá ansivi cuàhàn-yà, te nì sàcòo-ya ladu cuàhá Dios.

²⁰ Dandu nècuàchimà, nì caquihin-ne ichì cuàhàn-nè, nì cachitnúhu vate-né inicutu ñà-ndùù razón ndiaha xí-yá. Te Stoho-ndà Señor, nì chindee stná-yànè nì sàha-ya milagru ñà-cucumi-nda seguru divi palabra ndàcuisì nduá cachí-nè.

Yohó nì nsihi historia.

Nà-nduá Nì Tiaa San Lucas sàhà Jesucristu

Nansa ni nacani ini San Lucas ni tiaa-ne tutu yohó ñà-cahvi iin amigo xi-ne nani Teófilo

¹⁻² Cuahà nêhivi sàni quida lucha tiaa-ne iin tutu ndé nachutnahá víi-né historia nacání xí ñà-nduá ni xini nêhivi xí-nsí ni cuu, ni tiaa-ne nacua ni cachitnùhu nêcuàchi ni xininùu mà, vâchi ináhà nêcuàchimà nansa ni cuu dècuèndè quivì primeru, dandu ni dàcuítia stná-nè palabra mà, te ducán ni xinitnùhu stná nsiùhù.

³⁻⁴ Ñâyücàndüá, stná yùhù ni nacani stná ini tiai iin tutu ñà-nacání víi xi-ní sàhà nsidaa ñà-nduá ni ìa. Vâchi yùhù, sàni sàni ni cundaà vâha ini sàhà nsidaa chuun yohó dècuèndè quivì primeru na ní quesaha-ñá. (Ñâyücàndüá, tiaí tutu yohó) nùu mii-ní don Teófilo, sàhà-ñá vâtùni cundaà vâha ini-ní divi ñà-ndáa nduá sàni nacani nêhivi xi-ní sàhà-ñá.

Nansa ni cachitnùhu iin ángel ñà-icúmi tûinuú Juan Bautista ñuhiví

⁵ Tiempu dandacú rey Herodes nùu ñuu Judea ni sandua, te ñuu yucán nisa ìa stná iin dùtù nani Zacarías. Turnu ni saquidachuún-né chuun xi dùtù. Te mii-né xi dùtù compañeru-né, nsidaa-né nani-né turnu xi Abías. Te ñahàdihí-nè nani Elisabet. Descendencia xi dùtù Aarón sàhana xínduu ndùu nêcuàchimà.

⁶ Te nihnú ndàcuisi ini-né Yua-nda Dios; chívâha ndisa-ne nsidaa ñà-nduá dandacú-yá, nsidaa ñà-nduá cachí-yá.

⁷ Doco còò dèhe-ne, vâchi de por sí, còò mée xi Elisabet, te vichi ndúu-nè sàni sahnu cuahà-né.

⁸⁻⁹ Daaní, iin quivì ni sàà ni quida tocar Zacarías mà turnu xi-ne ñà-quida-ne chuun xi dùtù nùu Dios. Te estilu nisa icumi dùtù mà nduá ñà-quidá-né iin sorteu (índu chuun divi quida cada iin iin-ne). Te Zacarías ni quida tocar ñà-quihvi-ne veheñùhu cahnú ñà-chiñùhmá-nè inciensu.

¹⁰ Te nsidaa nêhivi dava ga sàhàn veheñùhu yucán, ndoó-né tûvèhé nacuatú-né na hora chiñùhmá dùtù mà inciensu.

¹¹ Dandu ini veheñùhu ma ni ndecunu iin ángel xi Stoho-ndà Señor, te ni xini Zacarías-nè, iin-né ladu cuahá mesa ndiaha ndé sàhmí-xi inciensu.

¹² Te ni yuhí Zacarías mà, yâha ga nacání ini-nè.

¹³ Dandu ni càhàn ángel mà xi-né, cachí-nè:

—Màsà yuhí-ní, Zacarías, vâchi cunaha-ní, sàni tiacu Dios ñà-nduá ni xicàn tàhvi-ní nùu-yá; ñâyücàndüá, cuahàn coo iin dèhe-ní, vâchi cuahàn coo iin mée xi nêcuàchi vehe-ní Elisabet; mée tiaa cunduu-ve, te Juan dactúnání-nsiâvè.

¹⁴ Cuahà gá icúmi-nsiâ cudii ini-nsia, te naquimani stná-nsiâ mii-yá; te cuahà gá stná nêhivi icúmi cudii ini-xi na quesaa-vè.

¹⁵ Te na cuahnu-ve, icúmi-vè nihí-vé iin chuun cahnú nùu Yua-nda Dios. Te ni vinu te ni ndutè ihní, mà nunca sàa-nè coho-ne ndutè mà. Mate táñâha ga tûinuú-né ñuhiví, doco sâchitu anima-nè Espíritu ìi xí Dios.

¹⁶ Te sàhà palabra cachí-nè icúmi cuahà nêcuàchi raza-ní Israel naxicocuñ ini-nè, te natenchicùn-nè Stoho-ndà Dios.

¹⁷ Dihna dèhe-ní icúmi codònuú quesaa, dandu mii-yá. Icúmi-né quida-ne nacua nisa quida Elías sàhana, iin-ni cunihnu ini-nè Dios nacua nisa quida nêcuàchi yucán, te iin-ni chindee stná Dios-nè. Te icúmi-nè càhàn stná-nè xi ana xínduu nêcuàchi sahnú ñuu-ní, dandu nsinuu ini nêcuàchimà dèhe-ne, te nàcúndoo víi nsidaa-né. Te càhàn stná dèhe-ní xi cuahà nêhivi có-ndulócô xi Dios sàhà-ñá nihí nêcuàchimà nàcúnhnu vâha stná ini-nè, dandu nsidavii-né anima-nè, te cundoo tûha-ne na quesaa Stoho-ndà Señor —ni cachí ángel mà.

¹⁸ Dandu ni cachí Zacarías xi ángel:

—¿Índu iin milagru coo sàhà-ñá cundaà ndisa ini ñà-ndáa nduá cachí-ní? Vâchi yùhù, sàsàhnú cuáhí, te ducán stná ñahàdihí, sàsàhnú stná-nè.

¹⁹ Te ni cachí ángel mà:

—Yùhù nduí Gabriel, te nùu Dios iin tûhe nicanicuahàn. Te divi-ya ni techuún-yá yùhù vâxi cachitnùhi xi-ní ñà-nduá sàni cachí xi-ní.

²⁰ Doco vichi icúmi-ní nduhihín-ní, mà cúf gá càhàn-ní ni-iin palabra dècuèndè quivì cuu ndisa ñà-nduá ni cachí xi-ní, vâchi có-xiníndísá-ní. Doco seguru icúmi cuu ñà-nduá ni cachí xi-ní —ni cachí ángel.

²¹ Daaní, nêcuàchi xíndiatu tûvèhèmà, nacání gá ini-nè, ¿índu chuun ni cueue guá Zacarías ini veheñùhu?

²² Dandu ni quee nècuàchìmà, doco mà cùi gá càhàn-nè. Ñàyùcàndúá, nì cundaà ini nèhivì mà sàni dàcùnì Dios nècuàchìmà iñàha na iá-nè veheñùhu, vàchi sàni nduhihin-nè, te vichi cui-sì-ní ndahà-né cuú quidá-né seña.

Nansa ni cuu ndisa ñà-ndúá ni cachitnùhu ángel

²³ Daanì, después nì cuee Zacarías nì ia-ne ñuu yucán dècuèndè nì xinu quivì xinúcuachí-nè yucán, dandu nì naquihìn-ne ichì mànuhù-nè vehe-ne.

²⁴⁻²⁵ Te nì yàha iin tiempu, dandu nì cundaà ini-nè sàñhùhù mèe xi ñahàdihí-nè Elisabet. Ñàyùcàndúá, ùhùn yòò nì ndòo Elisabet mà vehe-ne, cudfì ini-nè, cachí-nè: “(Ansivéhé) Dios, sàni chindee-yá yùhù, vàchi ináhá-yá sácúndiaa nèhivì yùhù; ñàyùcàndúá nì indehè ndahví-yá yùhù, te vichi mà cáhíchi gá ini-nè yùhù”.

Nansa ni cachitnùhu iin ángel icúmì tùinuù Jesús ñuhivì

²⁶ Daanì, nì sàà iñù yòò, te nì techuún Dios ángel Gabriel mà inga xichi vaxi-ne iin ñuu tii nani Nazaret iá ladu Galilea,

²⁷ vaxi-ne cachitnùhu-ne xi iin nècuàchì ñahà chì nani María. Señorita nduú nècuàchìmà; te sàni ndiadi tñuhu xi-ne ñà-cuàhàn-nè nandàhà-né xi iin tiàa nani José, iin nècuàchì descendencia xi rey David.

²⁸ Te nì sàà ángel mà ndé iá María mà, nì yàha-ne ini vehe, te nì cachí-nè:

—Cuaàváha-ní. Cunaha-ní, sàni ñhì cuàhà-ní gracia nùu Stoho-ndà Dios, te cutnàhà-yá xi-ní. Chicá ndiaha sàni ñihítàhvi-ní nùu nsidanicuú gá nècuàchì ñahà.

²⁹ Dandu María, indéhe-né ángel mà, te nì ndulocó-nè: ¿índù chuun cásàhù nècuàchìmà xi-né ducán? càhàn-né.

³⁰ Dandu cachí ángel mà:

—Màsà yúhí-ní, María, vàchi ndiaha gá sàni ñihítàhvi-ní nùu Dios ñà-quida-ya gracia sàhà-ní.

³¹ Cunaha-ní, icúmì coo iin mèe xi-ní, tùinuù-vé ñuhivì; mèe tiàa cunduu-ve, te Jesús cunani-vé quida-ní.

³² Cahnú chuun icúmì-yá ñhì-yá, vàchi Dèhemani Stoho-ndà Dios iá ansivi cunduu-ya. Te chuun cucumi-yá nùu Yuamàni-yá cunduu ñà-dandacú-yá nacua nìsa dandacú yohòtéhé-yá David.

³³ Te nicanicuahàn icúmì-yá cusahnú-yá nùu nsidaa nèhivì raza-ní Israel, te mà nunca sàà iin quivì mà dándácú gá-yá.

³⁴ Dandu nì cachí María xi ángel mà:

—Doco ¿índù modo cuu xí ducán, como tàyóo ì yùhù?

³⁵ Dandu nì cachí tu ángel mà xi-nè:

—Fuerte icúmì quixi Espíritu ì xí Dios ini anima-ní xi poder ì xi-yá; vàchi iin milagru cundua quida Yua-nda Dios iá ansivi. Ñàyùcàndúá, ì sástnùhù icúmì coo mèe xi-ní, vàchi Dèhemani Dios cunduu-ve.

³⁶⁻³⁷ Cunaha-ní, tñaha stná-ní Elisabet, cuàhàn coo stná iin mèe xi-ne, mate sàsàhnù cuàhà-né. Te vichi sàcuàhàn-ndà iñù yòò ñuhù mèe xi-ne, mate antes nìsa cachí nèhivì mà cúí coo ni-iin dèhe-ne. Ducán nì ñihítàhvi-né nùu Dios, vàchi mà ùhì quida-ya nsidanicuú iñàha.

³⁸ Dandu nì cachí María:

—Còó, vātùnì; yùhù icúmì quide ñà-ndúá cachí mii-yá. Vātùnì nì quidá-yá xí nacua cachí-ní —nì cachí-nè.

Dandu nì quee ángel mà cuàhàn-nè.

Nansa ni cachí María na ní sàhàn-nè visita vehe Elisabet

³⁹⁻⁴⁰ Quivì yucán nì quihìn María ichì cuàhàn ndee-né iin ñuu iá ladu Judea ndé iá puru yucú cuachì. Te na ní sàà-nè ñuu yucán, nì sàhàn-nè vehe Zacarías, nì casàhù-nè xi Elisabet.

⁴¹ Na ní tiacu nècuàchìmà cásàhù María xi-né, dandu nì cundaà ini-nè nì ndacùchí fuerte mèe xi-ne tixi-ne. Dandu fuerte nì quixi Espíritu ì xí Dios ini anima-nè.

⁴² Te ndee ní càhàn-nè, cachí-nè xi María:

—Ndiaha gá sàni quida Yua-nda Dios xi mii-ní nùu nsidaa gá nècuàchì ñahà, te ndiaha gá coo stná mèe xi-ní.

⁴³ Mii-ní, dihi Stoho-ndà Señor nduu-ní, doco vichi sàni quesà-ní ndé ié, mate có-nàtù (quixi-ní vehi).

⁴⁴ Vàchi cunaha-ní, na ní tiacu cásàhù-ní xí, dandu nì ndacùchí fuerte mèe-xi tixi ñà-cùdñì guá ini-vè.

⁴⁵ Vàchi, ndiaha gá sàni cundiatú anima-ní, ñà-nì xinindisa-ní; te vichi seguru icúmì cuu ndisa razón xi Dios nì inini-ní.

⁴⁶ Dandu nì cachí María:

Yùhù, cuàhà gá naquímání' Stoho-ndà Señor vichi,

⁴⁷ te cuàhà gá cudíi ini animè sàhà-yá, divi mii-yá ni dàcácu xí.

⁴⁸ Vàchi sàni xinimàni-yá yùhù, mate nècuàchi ndahví nduí. Ináhí, dècuèndè vichi xì ndé nicanicuahàn icúmí nèhivi cundaà ini-nè ndiaha gá ni quida Dios xí.

⁴⁹ Fuerte sàstnùhù-yá, te cuàhà gá obra sàni quida-ya xí; ìi ndisa-ya sàni cundaà ini.

⁵⁰ Nicanicuahàn icúmí-yá cundehè ndahví-yá nèhivi càhvi xí-yá.

⁵¹⁻⁵² Te ndiaha gá obra nahnú quidá-yá, ñàyùcàndüá nsidaa nècuàchi cuadú, sàni cundee dahuun-ya nùù-né, xì nsidaa stná tè-xídandacú, sàni dàcúxió stná-yàte nùù chuun xi-tè, te ni chidònùù-yá nècuàchi ndahví.

⁵³ Stná nècuàchi xíhi guá doco, sàni sàha-yanè ñà-vàha xi-ne, te ni ndòo vaha ini-nè. Doco nècuàchi cuicà, còò ni-ñàha ni níhi-né nùù-yá, te cuàhàn-nè.

⁵⁴⁻⁵⁵ Sàhana ni càhàn-yá xì xii-ndà Abraham, te ni quida-ya comprometer ñà-nicanicuahàn icúmí-yá chindee-yá mii-né xì descendencia xi-ne. Ñàyùcàndüá, vichi sàni quida-yañà-mà cumplir, sàni chindee-yá raza-ndà Israel, vachi cóni nándodó-yá ñà-ndüá ni cachi-yá daa, ni cachi María.

⁵⁶ Daaní, ùni yòò nisa ia ga nècuàchimà xì Elisabet, dandu mànuhù-né vehe-ne.

Nansa ni cuu quivi ni tùinuù Juan Bautista ñuhivi

⁵⁷ Daaní, ni sàà quivi quesaa mée xi Elisabet, te ni tùinuù-vé, mée tiàa nduú-vé.

⁵⁸ Te nsidaa vecinu xi-ne, xì nsidaa stná tñaha-ne, ni xinitnùhu-ne nansa ni indehè ndahví Stoho-ndà Señor nècuàchimà. Ñàyùcàndüá, ni cudíi gá ini nsidaa-né.

⁵⁹ Te na ní xinu ùnà quivi, ni casaà nsidaa nèhivi mà (vehe Elisabet), vachi cuàhàn màcütuu seña xi Dios ìcà-vé; te cuni nèhivi mà dàcúnání-nèvé Zacarias, nacua nani yua-vé.

⁶⁰ Doco ni cachi dihi-vé:

—Còó, Juan cunduu quivi-vé.

⁶¹ Te ni cacachi nècuàchimà:

—¿Índü chuun? vachi còò ni-ìin tñaha-nda nani Juan.

⁶² Dandu ni caquida nècuàchimà seña ni ndacàtnùhù-né nùù yua-vé, a ver nansa cuni mii-né cunani-vé.

⁶³ Ñàyùcàndüá, ni xicàn nècuàchimà iin tabla tii ni tiaa-ne ñà-Juan cunduu quivi-vé. Dandu nsidaa nècuàchi yucán, ni candulocó-nè.

⁶⁴ Te divi momentu mà ni quesaa ni nacahàn ni nacahàn vii-né vichi. Te ni ndenihi vaha-ne Dios.

⁶⁵ Daaní, nsidaa nèhivi ndoó yucú ladu Judea mà, ni ndatnuhu cuahà-né sàhà ñà-ndüá ni cuu ma.

⁶⁶ Te nsidaa ana ni xinitnùhu sàhà-ñá, ni chivàha nsihi-neà ini anima-nè, cachi-nè:

—¿Índü iin clase nèhivi cunduu mée yohó?

Ducán ni cachi-nè, vachi cuàhà gá ni chindee Dios-vè.

Ñà-ndüá ni cachi Zacarias na ní càhàn ndiaha-né ni cachitnùhu-ne nansa cuàhàn quida dèhe-ne Juan

⁶⁷ Daaní, yua-vé Zacarias, fuerte ni quixi Espíritu Ìi xí Dios ini anima-nè, te ndiaha gá ni càhàn-nè ni quida-ya, cachi-nè:

⁶⁸ Cuàhà gá naquímání-ndà Stoho-ndà Dios, divi mii-yá ana càhvi nsidaa raza-ndà Israel, vachi sàni indehè ndahví-yá ndohó nècuàchi nduú nèhivi xí-yá, te sàni dàcácu-yàndó.

⁶⁹ Sàni techuún-yá iin ana chicá fuerte dacácu xi-nda, divi iin descendencia xi nèhivi xí-yá nani David.

⁷⁰ Vachi dècuèndè chicá sàhana sàni quida-ya comprometer ñà-quixi ana dacácu xi-nda, vachi ducán ni cachi-yá xì nèhivi xí-yá (sàhana), te ni cachitnùhu nècuàchi ìi mà

⁷¹ ñà-icúmí-yá dacácu-yàndó nùù nsidaa ana xiní ùhi xí-ndà, xì nùù stná ana dava ga có-xiñhù xí-ndà,

⁷² te cundehè ndahví-yá nsidaa yohòtèhè-ndà. Mà nándodó-yá tratu ìi ni saquin-yá xì xii-ndà.

⁷³⁻⁷⁵ Vachi fuerte ni càhàn-yá ñà-seguru quida-ya ñà-ndüá ni cachi-yá xì xii-ndà Abraham, icúmí-yá cuidahan-yàndó nùù ndahà nsidaa tè-xiní ùhi xí-ndà, te mà yúhi gà-ndà. Dandu vātùni cunucuachi víi-nda nùù-yá nicanicuahàn, cunduu-nda nèhivi ìi xí-yá, nèhivi nihnú ndàcuisi ini-xi.

⁷⁶ Te miun xu, icúmú cunduu ana càhàn sàhà Yua-nda Dios iá dìqui-xí ansivi, vachi dihna miun icúmú càhùn xì nèhivi sàhà-ñá natenchicùn-nè ichi váha, dandu na quivi quesaa Stoho-ndà Señor, sàndóò tùha-ne.

⁷⁷ Vachi icúmú cachitnùhu xì nèhivi xí-yá nansa cui càcu anima-nè, te nandutu cuàchi-ne.

78 Vächì vichì, sàni cuhi ini Dios ndohó. Ndè dìquì-xí ansivi nì quee-ya nì quesaa-yà ñà-datnúù-yà sàxínítnùní-ndà,

79 xì stná sàxínítnùní nèhìvì có-sàà cundaà ini-xì, divì nèhìvì sà-ítúú ndañuhu anima-xì. Te vichì vátùni cundaca-yàndó iin ichì víi ndé cundoo víi-ndà nùù-yà, te cudíi gá ini-ndà, nì cachi Zacarías.

80 Daaní, nì sahnú mée Juan mà, te nì sàcòo fuerte anima-nè. Te iin-nì nì ìa-ne yucù dècuèndè nì sàà quìvì nì quesaha-né cacanu-ne cáhàn-nè sàhù sàhà mii-yà xì nèhìvì raza-nè Israel.

2

Nansa nì cuu quìvì nì tùmuù Jesús ñuhivì

1 Daaní, quìvì yucán nì dándacù tè-cùsàhnù César Augusto ñà-ìcúmí nandiahvi nsidaa nèhìvì cusàhnù-te nùù-xì.

2 Ñà-yùcán nì sanduu censu primeru nì quida-tè na tiempu dandacù Cirenio nùù ladu Siria.

3 Ñàyùcàndùá, nsidanicuú nèhìvì, mànuhù-né ñuu-nè ñà-nayàha-ne nùù lista,

4 xì stná José, nì quee stná-nè ñuu Nazaret íá ladu Galilea mànuhù-né ladu Judea ndé nduú ñuu-nè nani Belén, vächì descendencia xì David nduú stná-nè, ñàyùcàndùá, mànuhù-né ñuu tii ma ndé ñisa ìa David sàhana,

5 cuàhàn-nè dayàha-ne quìvì-né nùù lista mà. Te cutnáhà stná-nè xì María nècuàchì cuàhàn nandàhà xì-né, te ñuhú mée xì nècuàchì mà.

6 Daaní, ndoó ñi-né ñuu yucán, te nì sàà quìvì tùinuù mée mà.

7 Ñàyùcàndùá, yucán nì quesaa-vè ñuhivì; mée nuu xì-né nduú-vé, te nì chidùcùn-névé sìcoto ndahví, te nì chinduhù-névé ini iin canoa, vächì có-sàà gá vehe ndé quídì nècuàchì xicá ichì.

Nansa nì ndecunu ángel ndé ndoó nècuàchì Xíndiaa xì rii

8 Cunaha-ní, yatni ñuu yucán ndoó stná nèhìvì quídì ndiaá xì rii xì.

9 Te na íin cachí nì ndecunu iin ángel xì Stoho-ndà Señor, nì sàcùìin-nè nùù nècuàchì mà, te ndiaha gá nì natnuù inicutu ndé ndoó-né nì quida Stoho-ndà Señor. Ñàyùcàndùá, nì cayúhì cuaá-nè.

10 Dandu nì cachi ángel mà xì-né:

—Màsà yúhì-nsiá, vächì cunaha-nsiá, yohó vaxi nihí iin razón vaha cunini-nsia, iin razón cudíi ini nsidaa nèhìvì ñuhivì nduá.

11 Vächì vichì ndè ñuu xì-nsiá David sàni tùinuù iin ana dacácu xì-nsiá, divì Stoho-ndà Cristu.

12 Te na sàà-nsiá yucán, ícúmí-nsiá cuni-nsiàya, idáducùn-yá sìcoto, indúhu-yá ini iin canoa. Ñà-jaàn cunduu seña cundaà vaha ini-nsiá divì ñà-ndáà nduá cachí xì-nsiá —nì cachi ángel.

13 Daaní, na íin cachí nì ndecoyo cuàhà gá ángel nì caquixi ansivi, cutnáhà-né xì ángel nì quesaa primeru mà. Te ndeníhì vaha nsidaa-né Dios, cachí-nè:

14 Dìquì-xí ansivi nì quee cuàhà tnùùhuu xì Yua-nda Dios, te ñuhivì yohó nì cùndóó víi nsidaa nèhìvì cudíi ini-yà sàhà-xì.

15 Daaní, nì ndanchito nsidaa ángel mà mànuhù-né gloria. Dandu nì cachi nècuàchì Xíndiaa xì rii mà:

—Cùhùn-ndà vichì duha ñuu tii Belén, cundehè-ndà ñà-nduá nì cuu nì cachitnùhu Stoho-ndà Señor xì-ndà.

16 Ñàyùcàndùá, ndee nì quihìn-ne ichì cuàhàn-nè, te nì casaà-nè yucán, nì xini-nè yucán íá María xì José xì stná mée, indúhu-vé ini canoa.

17 Dandu nì nsihì nì xini-nè mée mà, dandu nì cachitnùhu-ne xì nèhìvì ñà-nduá nì cachi ángel xì-né sàhà-vé.

18 Te nsidaa nèhìvì nì inini xì ñà-nduá nacání pastor mà, nì ndulocó-nè.

19 Te María, cónì nándodó stná-nè ñà-nduá nì cachi ángel xì-né, iin-nì nacání ini-nè sàhámà.

20 Daaní, nì caquihìn pastor mà ichì mànuhù-né, ndeníhì vaha-ne Dios, naquímání cuàhà-nè mii-yà sàhà nsidaa ñà-nduá nì xinitnùhu-ne, xì ñà-nduá nì xini-nè, vächì nacua nì cachitnùhu ángel mà xì-né, divì ducán nì cuu.

Nansa nì quida José xì María na nì quida-ne Jesús presentar nùù Yua-nda Dios ini veheñùhu cahnú

²¹ Na ní yàha ùnà quivì, dandu nì sàcùtuu seña xi Dios icà meé Jesús mà, te nì nihì stná-yà quivì-yà; nì sàcùnani-yà Jesús, vâchi ñà-jaàn cunduu quivì-yà nì cachi ángel na tâñaha ga nacùhun ndiaha-yà tixi dihi-yà.

²² Daaní, nì yàha quivì cuhí quihmi María, vâchi nì quida-ne cumplir nacua iá ley xi Moisés sàhà nadaa quivì coo quihmi-né. Dandu mii-né xi José, nihí-névé cuàhàn ñuu Jerusalén ñà-chitanini-nevé nùu Yua-nda Dios,

²³ vâchi dohó cachí tutu ì nduú ley xi Dios: “Tiàa primeru quesaa ñuhivì, nsidaa-vé cunduu-ve meé ndiaha xi Dios”.

²⁴ Te cachí stná ley mà ñà-icúmí-né cuàha-ne ù lungu, te nú coó, ù loma cuachi. Ñàyucàndüá, nì sàhàn-né nì sàha stná-né quisi mà ñà-cui-si cunduu-si promesa nùu Dios.

²⁵ Cunaha-ní, ñuu Jerusalén yucán nisa la iin tiàa nani Simeón. Nècuàchi nihnú ndàcuisi ini xi Dios nduú stná-né, vâchi cahvi víi-néyà, te nihnú vaha ini-né ñà-quixi ana cuàhàn chindee xi raza-né Israel, te icúmí stná-né Espíritu Ì xi-yà.

²⁶ Te divi Espíritu Ì mà sàni cachitnùhu-ya xi-né antes ñà-mà cúí-né dècuèndè cachi cuninùu-né ana nduú Cristu nì quixi nùu Stoho-ndà Señor.

²⁷ Ñàyucàndüá, quivì yucán nì càhàn Espíritu Ì xi-né, te nì sàà-né veheñuhu cahnú na meru quihvi stná yuadíhí-vé nihí-névé vâxi quida-ne nacua cachí ley ì.

²⁸ Dandu nècuàchi sàhnù-mà, nì sàcùnindiaa-névé, te nì naquimani-né Dios, cachí-né:
²⁹⁻³⁰ Sà-íá vichí, Señor mío, vâtùni nacuaa-ní yùhù vichí, vâchi contentu ié, vâchi nacua nì cachí-ní xí, divi ducán nì cuu ndisa, sàni xini ana nì techuun-ní ñà-dacácu xi-nsí.

³¹ Mii-ní, nì chitnùni inì-ní quesaa-yà, dandu nihì nèhivì nsidanicuú ñuu cundaà ini-né nansa cui càcu anima-né quida-ya.

³² Vâchi icúmí-yà datnúu-yà sàxinítùnùni nsidaa nèhivì mà; te divi ducání stná nècuàchi raza-nsí Israel, cuàhà gá tñùñhù ndiaha icúmí-nsí nihì-nsí sàhà-yà, nì cachi Simeón.

³³ Ñàyucàndüá, cuàhà gá nì ndulocó José xi María sàhà ñà-ndüá nì cachi nècuàchimà sàhà meé mà.

³⁴ Dandu nì xicàn tàhvi Simeón gracia xi Dios sàhà yuadíhí-vé, te nì cachi stná-né xi dihi-vé:

—Cunaha-ní, sàhà meé yohó icúmí cundiatú anima cuàhà gá nècuàchi ñuu-ndà Israel. Doco dava ga stná-né, quixi tñundoho cahnú diqui-né, segùn nansa indéhe-né mii-yà nduú meé yohó. Te icúmí-yà cachitnùhu-ya sàhà ichì Yua-nda Dios, doco cuàhà stná nèhivì cahíchi ini xi-yà.

³⁵ Te sàhàmà icúmí cundaà inì-xi ñà-ndüá nihnú ini-né ini anima-né. Daaní, mii-ní, icúmí stná-ní (cunì-ní tñundoho), na ian xida iin càa anima-ní —nì cachi Simeón.

³⁶⁻³⁷ Daaní, yucán nisa la stná iin nècuàchi ñahà nani Ana, te sàni nihítàhvi-né càhàn-né cuenta xi Dios. Dèhe iin tiàa nani Fanuel nduú-né, te Aser nani yohòtéhè-né. Sàsàhnú cuàhà-né vichí. Nì nandàhà-né na chii-né, te ùsà cuà nì la-ne xi ì-né, dandu nì xihì nècuàchimà. Te vichí sàcuàhàn-ndà 84 cuà iá mii-né. Te có-queé-né veheñuhu cahnú, vâchi ndui te ñuú iá-né yucán, xinúcuàchí-né nùu Dios, iníhí-né, te xicàn tàhvi-né nùu-yà.

³⁸ Ñàyucàndüá, divi momentu mà nì tñàtuu nècuàchimà (ndé iin María xi José), te nì naquimani stná-né Dios (sàhà meé Jesús), dandu nì quesaha-né nì càhàn-né xi nèhivì ñuu Jerusalén sàhà-vé, nì cachitnùhu-ne xi nèhivì xindiatu ñà-quesaa mii-yà quida-xi obra, te càcu-nda.

³⁹ Daaní, José xi María, nì nsihì nì quida-ne nsidaa ñà-ndüá dandacú ley xi Dios, dandu nì naquihin-ne ichì mànuhù-né ladu Galilea, nì nasaa-né ñuu-né Nazaret ndé ndoó-né.

⁴⁰ Te meé nduú mii-yà, nì sahnu-ya, nì cufuerté anima-yà, te chicá nì cunchichí-yà, cuàhà gá gracia xi Dios icúmí-yà.

Nansa nì quida Jesús na chii-yà, te nì sàhàn-yà iin vicò ñuu Jerusalén

⁴¹ Cunaha-ní, cuà cuà nì sasàhàn yuadíhí-yà ñuu Jerusalén quivì nacávà vicò pascua.

⁴² (Te nì cuu iin xichi) na sàxicá-yà ùxin ùi cuà, dandu cuàhàn tu-ya xi-né vicò ñuu mà, vâchi ñà-jaàn nì sanduu estilu xi-ne.

⁴³ Daaní, nì nsihì vicò mà, te nì naquihin-ne ichì mànuhù-né; doco nì ndòo Jesús ñuu Jerusalén mà, te cóni xini José xi María,

⁴⁴ vâchi ádi vâxi-ya cutnáhà-yà xi nèhivì dava ga càhàn-né. Ñàyucàndüá, iin quivì sàxicá-né mànuhù-né, dandu nì quesaha-né xicánúu-né nandúcú-néyà, ndàcàtnùhù-né nùu tñaha-ne xi stná amigò xi-ne.

⁴⁵⁻⁴⁶ Doco còó, cóni natùu-ya. Ñàyucàndüá, nì naxicocuñ-né ñuu Jerusalén, áma ndàcùhun-neyà càhàn-né. Te tixi ùni quivì nì natùu-ya, veheñuhu cahnú iá-yà, dava mahi maestru xi ley ì, iníni-yà ñà-ndüá cachí nècuàchimà, te ndàcàtnùhù stná-yà nùu-né.

⁴⁷ Te nsidaa ana iníni má, ni ndulocó-nè ñà-nchichí guá-yà, te naxícónihí nchichí-yà nùù-né.

⁴⁸ Te na ní xini José xì María íá-yà yucán, dandu ni ndulocó-nè, te ni cachi dihi-yá:

—Hijo, ¿indù chuun ni quido xi-nsí ducán? vâchi yùhù xì yuo, cuàhà gá ni xicanuu-nsi nandúcú-nsí yohó, nacání cuàhà ini-nsí.

⁴⁹ Dandu ni cachi-yà xì-né:

—Còó, có-ndúá fuerza nanducu-nsiá yùhù, vâchi xiñuhu ñà-cundaà ini-nsia íá chuun ni nihí nùù Yua mií, te icúmí quideà.

⁵⁰ Doco José xì María, cóni sáníhi ini-nè ñà-ndúá ni cachi-yà xì-né.

⁵¹⁻⁵² Dandu ni nacuaa-neyà mànùhù-né xì-yá ñuu Nazaret. Te nsidaa ñà-ndúá ni cuu ma, ni chivàha María-ñà ini anima-né. Te mií-yá, nisa inini-ya nsidaa ñà-ndúá ni cachi yuadíhí-yá. Te chicá ni cunchichí-yà, te chicá ni sahnu-ya, te nicanicuahàn ndéè vâha-ya nùù Dios, te nsidaa stná nèhivì, ni cudíi stná ini-nè sàhà-yá.

3

Nansa ni quida Juan Bautista ni càhàn-nè sàhù yucù

¹ Daaní, ni yàha tiempu, te ni sàà sàhùn cuià cusáhnù rey cahnú Tiberio. Mismo cuià yucán dandacú stná Poncio Pilatu nùù ladu Judea, nduú-te gobernador. Te ladu Galilea dandacú rey Herodes. Te ñani-te Felipe dandacú ndé nduú ladu Iturea xì ladu Traconite. Daaní, ndé ladu Abilinia dandacú iin gobernador nani Lisanas.

² Te dùtù chicá xicusahnú xínduu Anás xì Caifás. Te divi tiempu yucán ni quesaha Dios datnúù-yà ini sàxinítnùni Juan (Bautista) ndé íá-nè yucù.

³ Ñàyucàndúá ni quee-ne cuàhàn-nè inicutu ladu yatni yùte Jordán, te yucán ni càhàn-nè sàhù xì nèhivì ñà-icúmí-nè cuu-ne arrepentir sàhà ñà-cucahnú ini Dios sàhà cuàchi-ne, dandu cuhii-né.

⁴ Vâchi ducán cachi stná nùù tutu ìi ni tiaa profeta Isaías, divi nècuàchì ni sacahàn cuenta xi Dios; dohó ni tiaa-ne:

Tiacú càhàn fuerte ana càhàn yucù, te cachi-nè xì-ndà ñà-nsida vii-ndà (anima-ndà) na ian nduvii ichi ndé yàha Stoho-ndà Señor, te ichi ndáà cundua.

⁵ Te ducán íá stná na ian cuàhàn chitu stná nsidaa yui, te ndundaà stná nsidaa yucù, xì nsidaa lùnsi, xì nsidaa stná ichi càvá, icúmíá ndundaà, te ndé íá ichi chicuèhè, nduvii stná yucán. (Ducán icúmí nduvii stná anima nèhivì),

⁶ dandu nsidanicuú-né, icúmí-nè sàà-nè cuni-nè nansa sáhatahvi Dios salvación xi-ya.

(Ducán ni cachtinùhu tiaa ma nùù libru mà.)

⁷ Ñàyucàndúá ni caquee cuàhà nèhivì inii ladu yucán, cuàhàn-nè nùù Juan, vâchi cuni-nè cuhii stná-nè. Dandu ni cachi Juan xì-né:

—Mii-nsiá, na quidá còó, ducán quidá-nsiá, vâxi-nsia yohó xinúdhé-nsiá nùù castigu cahnú icúmí quixí. ¿Ana divi ni cachi xi-nsiá quida-nsia ducán?

⁸ Pues, ñà-ndúá xiñuhu nduá quida ndisa-nsia cumplir nacua ndiá icà-ndà nú sàni cuu ndisa-nda arrepentir. Ni màsà càchi-nsia: “Divi Abraham nduú yohòtèhè-ndà, còó ni-íñàha cuu xi-nda”. Vâchi canaha-nsiá, dècuèndè stná yùù ndoó yohó, vâtni nanduu stná nahi nèhivì raza-ndà Abraham nù cuni mií-yá.

⁹ Te vichi sà-íá cuàhàn cachi-yà índù nèhivì nihì xì castigo, te ducán íá na ian nácàxin-nda yutnú có-cáná fruta, te sà-iníndáhà-ndá hacha tàhndè-nu coco-nù. Pues ducán icúmí cuu stná xì nèhivì có-quidá víi —ni cachi Juan.

¹⁰ Dandu ni cachi nèhivì cuàhà yucán:

—Nú ducán íá, ¿nansa ndiá icà-nsí quida-nsi, maestro?

¹¹ Dandu ni cachi Juan xì-né:

—Nú ndoó nècuàchì còó dùhnù-xí, dandu ni dácútàhvi-ndàné ian, nú icúmí-ndá uà. Te nècuàchì xihí doco, ni dácúxí stná-ndàné nú íá ñà-cutiacu-ndà.

¹² Daaní, yucán ni casaà stná nècuàchì dachiyàhvi, te ni cuhii stná-nè. Dandu ni xicàn tnùhù stná-nè nùù Juan, cachi-nè:

—Te nsiùhù, ¿nansa ndiá icà-nsí quida stná-nsi, maestro?

¹³ Dandu ni cachi Juan xì-né:

—Nacua cachi ley, divi ducán dachiyàhvi-nsia nèhivì, màdiá chicá más.

¹⁴ Daaní, stná soldadu, ni caxicàn tnùhù stná-nè nùù nècuàchì mà, cachi-nè:

—Nsiùhù, ¿nansa ndiá icà-nsí quida stná-nsi?

Dandu ni cachi Juan:

—Màsà dáyùhí-nsiá ni-iin nèhivì, te tavà-nsiá dihùn nùù-né; ni màsà quidáyúcùn uun stná-nsiá tnùhu. Te cundoo stná-nsiá conforme xì ñà-ndúá quiyàhvi-nsia —ni cachi Juan.

¹⁵ Ñàyücàndüá, nsidaa nêhivî, nacánî ini-nê sàhà Juan mà, a Cristu (icúmî quixi nuù Dios) nduú-né cahan-né.

¹⁶ Dandú nî càhàn Juan xì nsidaa nêhivî yucán, cachí-né:

—Yùhù, tècuî quidá ìí mii-nsiá, doco nchícùn gà vaxî mii-yá ana chicá cahnú poder xi nuù yùhù. Nî có-nâtùî cundui iin mozo xi-ya ñà-tavî ndisàn-yá. Te icúmî-yá quida ìi-yá anima-nsiá tixi Espíritu ìì xî Dios, te na ian quidá ñuhu, ducán quida stná-yá xì-nsiá (dandáñúhú stná-yá ñà-có-ndiáá).

¹⁷ Vàchi vichî sà-íá cuàhàn-yá quida-ya na quida-nda xi trigu, yutnú chipála dandi-achi-ndañá, dècuèndè ndiachî nsihî trigu ndoó ñuhù, dandu chivàha-nda nùni mà, doco mihî-ñá, icúmîá coca. Pues ducan icúmî stná-yá quida-ya (xî nêhivî, nêhivî xí mii-yá dacácu-ya, doco nêhivî dava ga), còò, nicanicuahàn icúmî-né coco-ne.

¹⁸ Ducán nî cachî Juan na nî càhàn-nê sàhù, te cuàhà gà stná ñà-vàha nî cachí-né xì nêhivî yucán, áma nánsidá vii-né modo xi-ne.

¹⁹ Daaní, rey Herodes, nî càhàn stná Juan mà xì-tè sàhà cuñada xi-tè nani Herodías, vâchi iá-te xì ñàhà mà, te ñàhàdihî ñani-te Felipe nduú-ña. Te nî càhàn stná-nê xì-tè sàhà nsidaa gà ñà-có-íá vii quidá-te.

²⁰ Doco tèmà, chicá más nî quida chicuèhè-te, dècuèndè nî sadi stná-te Juan vehecàa.

Nansa nî quida ìi Juan Jesús na táñâha ga cundiadi-né

²¹ Na nî nsihî nî cuhîi nsidaa nêhivî dava ga, dandu nî cuhîi stná Jesús. Te iín-yá yucán xícàn tàhvi-yá, dandu nî nuna ansivî,

²² te nî nuu Espíritu ìì xî Dios diquî-yá; na iá loma, ducán iá-yà mànui-ya. Te nî tiacu stná tàchî Dios càhàn-yà ansivî, cachí-yà (xî Jesús):

—Mii-ní, Dêhemaní nduu-ní. Te cudîi cuàhà inî sàhà-ní.

Ana xínduu yohòtéhè Jesucristu

²³ Cunaha-ní, xicá Jesús nahi òcò ùxìn cuìà na nî quesaha-yá (quidá-yá chuun ndiaha xí-yá), te tuxî ini nêhivî dèhe José nduú-yá. Te iin tiàa nani Elí nî sanduu velú xi-ya.

²⁴ Te yua Elí mà nî sanduu Matat; te yua Matat nî sanduu Leví; te yua Leví nî sanduu Melqui; te yua Melqui nî sanduu Jana; te yua Jana nî sanduu inga José;

²⁵ te yua José mà nî sanduu Matatías; te yua Matatías nî sanduu Amós; te yua Amós nî sanduu Nahum; te yua Nahum nî sanduu Esli; te yua Esli nî sanduu Nagai;

²⁶ te yua Nagai nî sanduu Maat; te yua Maat nî sanduu inga Matatías; te yua Matatías mà nî sanduu Semei; te yua Semei nî sanduu inga José; te yua José mà nî sanduu Judá;

²⁷ te yua Judá nî sanduu Joana; te yua Joana nî sanduu Resa; te yua Resa nî sanduu Zorobabel; te yua Zorobabel nî sanduu Salatiel; te yua Salatiel nî sanduu Neri;

²⁸ te yua Neri nî sanduu inga Melqui; te yua Melqui mà nî sanduu Adi; te yua Adi nî sanduu Cosam; te yua Cosam nî sanduu Elmodam; te yua Elmodam nî sanduu Er;

²⁹ te yua Er nî sanduu Josué; te yua Josué nî sanduu Eliezer; te yua Eliezer nî sanduu Jorim; te yua Jorim nî sanduu inga Matat;

³⁰ te yua Matat mà nî sanduu inga Leví; te yua Leví mà nî sanduu Simeón; te yua Simeón nî sanduu inga Judá; te yua inga Judá mà nî sanduu inga José; te yua inga José mà nî sanduu Jonán; te yua Jonán nî sanduu Eliaquim;

³¹ te yua Eliaquim nî sanduu Melea; te yua Melea nî sanuu Mainán; te yua Mainán nî sanduu Matata; te yua Matata nî sanduu Natán;

³² te yua Natán nî sanduu David; te yua David nî sanduu Isaí; te yua Isaí nî sanduu Obed; te yua Obed nî sanduu Booz; te yua Booz nî sanduu Salmón; te yua Salmón nî sanduu Naasón;

³³ te yua Naasón nî sanduu Aminadab; te yua Aminadab nî sanduu Aram; te yua Aram nî sanduu Esrom; te yua Esrom nî sanduu Fares; te yua Fares nî sanduu inga Judá;

³⁴ te yua Judá mà nî sanduu Jacob; te yua Jacob nî sanduu Isaac; te yua Isaac nî sanduu Abraham; te yua Abraham nî sanduu Taré; te yua Taré nî sanduu Nacor;

³⁵ te yua Nacor nî sanduu Serug; te yua Serug nî sanduu Ragau; te yua Ragau nî sanduu Peleg; te yua Peleg nî sanduu Heber; te yua Heber nî sanduu Sala;

³⁶ te yua Sala nî sanduu Cainán; te yua Cainán nî sanduu Arfaxad; te yua Arfaxad nî sanduu Sem; te yua Sem nî sanduu Noé; te yua Noé nî sanduu Lamec;

³⁷ te yua Lamec nî sanduu Matusalén; te yua Matusalén nî sanduu Enoc; te yua Enoc nî sanduu Jared; te yua Jared nî sanduu Mahalaleel; te yua Mahalaleel nî sanduu inga Cainán;

³⁸ te yua Cainán mà nî sanduu Enós; te yua Enós nî sanduu Set; te yua Set nî sanduu Adán; te yua Adán nduú Dios.

4

Nansa ni cuni ñà-malu dacà-sí Jesús ñà-quida-ya iin cuàchi

¹ Daaní, (ni nsihi ni cuhii Jesús) ni quee-ya ladu yùte Jordán, chitu anima-yà Espiritu Ìì xí Dios. Dandu nihí Espiritu Ìì mà-yá ni sàhàn ñà-coo-ya yucù dānā.

² Ùi dico quívi nisa la-ya yucán, te ni cuni ñà-malu dacà-siyá, (doco cóni cundéé-sí). Te inii tiempu mà ni ìa dòcò-yà.

Daaní, na ní yàha quívi mà, dandú ni xihì-yà doco.

³ Te ni cachi ñà-malu xi-yá:

—Nú ndisa Dèhemanì Dios nduu-ní, dandu cachi-ní xi yùù yohó ni nándúá pan cuxi-ní.

⁴ Dandú ni cachi Jesús xi-sí:

—Còó, vāchi dohó cachi nùù tutu ìi: “Màdi cuiisi pan cutiacu nēhivì; còó, vāchi xiñuhu cucumi stnā-nē nsidaa palabra ìi cachi Dios”.

⁵ Daaní, ni saca-siyá cuàhàn-si xi-yá òni ìin yucù ducún, te ni dācùnì-siyá nsidanicuú ñuu iá ñuhivì; ìin ratu tii, te sàni dācùnì-siyá nsidaámà.

⁶ Dandu cachi-si xi-yá:

—Vātùni dacútāhvì mii-ní nsidaa ñuu yucán ñà-dandacu-ní nùá, te nihì stnā-ní nsidaa ñà-vico icumíá, vāchi ndahí sà-ìá nsidaájàn, te dandacúí nùá, te anà-ni ni cui cudí ìni dacútāhvì ñà-dandacú-né nùá.

⁷ Ñayucāndúá nú ni mácuìn sisi-ní nùí, te cahvi-ní yùhù, dandu dacútāhvì mii-ní nsidaájàn.

⁸ Dandu ni cachi Jesús xi-sí:

—Còó, vāchi dohó cachi nùù tutu ìi: “Cuisi mii Stoho-ndà Dios ndiá ìcà-ndà cahvi-nda, te cunucuachi-nda nùù-xí”.

⁹ Daaní, ni saca-siyá cuàhàn-si xi-yá ndè ñuu Jerusalén. Yucán ni chicoo-siyá ndè òni veheñùhu cahnú, te ni cachi-si xi-yá:

—Nú ndisa Dèhemanì Dios nduu-ní, dandu dandiachi-ní mii-ní,

¹⁰ vāchi ducán cachi nùù tutu ìi:

Icúmí Dios dandacú-yá nùù ángel xi-ya ñà-cundiaa-nè mii-ní.

¹¹ Te cachi stnā tutu mà:

Icúmí ángel mà natnii ndahà-né mii-ní ñà-màsà máquihì sahà-ní ni-ìin yùù.

¹² Dandu ni cachi Jesús xi-sí:

—Cachi stnā tutu ìi: “Màsà quidá canúú-ndá ñà-có-cùnì Stoho-ndà Señor”.

¹³ Dandu na ní nsihi ñà-ni cuni-si dacà-siyá, dandu ni nacoo chii-siyá cuàhàn-si.

Nansa ni quesaha Jesús quidá-yá chuun ndiaha xi-yá ladu Galilea

¹⁴ Daaní, mànuhù-yá ladu Galilea, chitu-yá poder xi Espiritu Ìì xí Dios. Te ni xinitnùhu nēhivì sàhà-yá ìnicutu ladu yucán.

¹⁵ Te ni xicanuu-ya ni nacāhin-ya nsidaa veheñùhu ñuu ladu yucán, dacuahá-yá nēhivì. Te nsidaa-né, ni ndenihì vāha-neyà.

Nansa ni quida nēhivì na ní nùhù Jesús ñuu-yà Nazaret

¹⁶⁻¹⁷ Dandu ni nasaa-yá ñuu Nazaret ndé ni sahnu-ya. Te na ní sàà quívi descansu, dandu ni sàhàn-yà veheñùhu yucán, vāchi ducán nduú estilu xi-ya. Te ni ndacuiin-yà ìni veheñùhu ma cuàhàn-yà cahvi-ya (tutu ìi) cunini nēhivì mà. Te ni sàha ìin nēhivì-yá tutu ni tiaa profeta Isaías ni sacahàn cuenta xi Dios sàhana. Dandu ni nacuna-ya tutu mà ni nanducu-yá ìin lugar, te dohó cachi ndé ni ndacūhun-ya:

¹⁸ Fuerte ináčáá Espiritu Ìì xí Dios ìni anímè, vāchi sàni sàha-ya yùhù chuun ìi cachitnùhi ñà-vàha ndiaha xi nēcuàchi ndahvì, daaní, vāxi stnāi ñà-cāhìn xi ana xíndoo tnùnsí ìni, dandu cahnde ìni-nè sàhāmà. Te vāxi stnāi cachitnùhi xi ana có-ndóó libre ñà-vātùni caquee-ne libre quide; te nēcuàchi cuaá, vātùni natùì stnā nùù-né quide, xi nēcuàchi yáha tnùndoho, vātùni càcu ndisa-ne nùámà quide.

¹⁹ Te vāxi stnāi cachi xi nsidaa nēhivì (ñà-vitni nduú) meru tiempu nācūndoo vāha-ne xi Stoho-ndà Señor.

²⁰ Daaní, ni nacadi Jesús tutu mà, te ni naxiconihí-yāñà nùù tiaa xinúcuáchi yucán. Dandu ni sàcòo-ya, te nsidaa nēhivì ndóó veheñùhu yucán, indéhe vāha-neyà.

²¹ Dandu ni cachi-yá xi nsidaa-né:

—Vichi na meru ni ìnini-nsia palabra ni cahvi nùù-nsiá jaàn, ñà-sàni cuu ndisa nduá, (te quidé nacua cachá).

²² Te nsidaa nēhivì yucán, ni ndenihì vāha-neyà, te ni ndulocó-nè, vāchi yáha ga ndiaha cāhàn-yà. Doco cachi stnā-nè ìin-ne xi inga-nè:

—¿Amádi dèhe José nduú nēcuàchi yohó?

²³ Dandu ni cachi-yá xi-né:

—Ádi cuàhàn-nsià cachi-nsià xí' nacua cachi dichu: “Nú cuhí-ní, te nduu-ní doctor, dandu ¿indú chuun có-dándúvaha-ní mii-ní?” Vàchi sàni xinitnúhu-nsia nansa ni quide milagru ñuu Capernaum, ñàyücàndüá ádi cuàhàn-nsià cachi-nsià xí' ñà-xiñùhù quida stnái milagru mà ñuu-ndà yohó nacua ni quide yucán.

²⁴ Dandu ni cachi tu-ya:

—Ñà-ndáa ndúa, ni-iin tiàa ni ñihí chuun càhàn cuenta xi Dios, có-quidáñùhù nècuàchi ñuu-nè mii-né.

²⁵ Doco cunini-nsia palabra ndàcuisi yohó: na ní sanduu tiempu xi Elías sàhana, te cóni cùun dàvi ùni cuàà dava, dandu fuerte ni quixi tnama inicutu ñuu-ndà Israel yohó, te ndoó cuàhà nècuàchi ñahà ni xihí ì-xí ladu xi-nda,

²⁶⁻²⁷ doco ni-iin-ne cóni ñihitáhvi-né sàà Elías vehe-ne. Còò, iin nècuàchi cuaán inga ñuu nani Sarepta yatni ñuu Sidón, divi ni ñihitáhvi sàà nècuàchimà vehe-xi. Daaní, stná tiempu xi profeta Eliseo, mate ndoó cuàhà ana cuhí cuèhè lepra ñuu-ndà Israel yohó, doco ni-iin-ne cóni dándúvaha Eliseo-né, cuisí iin nècuàchi inga ñuu Siria nani Naamán —ni cachi Jesús.

²⁸ Daaní, nsidaa nèhivi ndoó veheñùhu yucán, yáha ga ni caxidà ini-né ñà-ní cachi-yà ducán.

²⁹ Ñàyücàndüá, ni ndacuía nsihi-ne, ni tavà-néyà iladu ñuu mà. Te sàhà-ñá ñini yucù indúhá, ñàyücàndüá nihí-néyà ni casaà ndé iá tahvi, cuàhàn-nè dandiachi-néyà ni cúfi.

³⁰ Doco ni yàha uun-ya mahi nsidaa-né cuàhàn-yà.

Nansa ni tavà Jesús iin ñà-malu inácaa ini iin tiàa

³¹ Dandú ni sàà-yà ñuu Capernaum iá ladu Galilea, te yucán ni dàcuahá-yà nèhivi sàhàn veheñùhu quiví descansu.

³² Te nècuàchimà, ni ndulocó-nè sàhà ñà-ndüá dacuahá-yánè, vachi chináhá-yà nahi ana cusáhnù.

³³ Te mahi nèhivi ndoó ini veheñùhu yucán nisa ia iin tiàa inácaa iin ñà-malu anima-xi. Te fuerte ni ndàhì ndee-né,

³⁴ cachi-nè:

—¡Nacoo-ní nsiùhù! ¿Ndíá cunduu-ní nsiùhù, Jesús de Nazaret? ¿A váxi-ní dandáñùhù-ní nsiùhù ndúa? ¡Yùhù ináhi mii-ní! ¡Ana ì ni quixi nùu Dios nduu-ní!

³⁵ Dandu ní sadi Jesús núa, cachi-yà:

—¡Màsà càhùn, te quee cuahán! ¡Nacoo tiàa yohó!

Dandu indéhe nsidaa nèhivi yucán, te ni nacasàn tiàa ma ni quida ñà-malu, te ni quee-si cuàhàn-si, cóni dánacuèhè-siné.

³⁶ Ñàyücàndüá ni ndulocó sàstnùhù nèhivi ndoó yucán, cachi-nè iin-ne xi inga-nè:

—¡Yáha ga fuerte palabra xi nècuàchi yohó! Vàchi na dandacú iin ana ni ñihí chuun cahnú, ducán dandacú-né nùu ñà-malu, te fuerza queá cuàhàn.

³⁷ Ñàyücàndüá, ni xitià razón sàhà-yà inicutu ladu yucán.

Nansa ni dándúvaha Jesús dido Simón Pedro

³⁸ Daaní, na sáni quee-ya veheñùhu yucán, dandu cuàhàn-yà vehe Simón. Te yucán indúhu dido-ne ñahà; cuhí vaha-ne, fuerte quidá yòcò xi-né. Dandu ni sacundahví nèhivi yucán ñà-ní quidá-yà favor chindee-yà nècuàchimà.

³⁹ Ñàyücàndüá ni nacahnù ndee-ya ladu ñini-né, te ni dándacú-yà nùu yòcò mà ñà-ní cúcuàñ leugu. Te divi ducán ni cuu. Vichi vichi ni ndacuiin nècuàchimà ni quesaha-né ni xinucuachi-né nùu mii-yà xi compañeru-yà.

Nansa ni dándúvaha Jesús cuàhà gá nècuàchi cuhí

⁴⁰ Daaní, na ní quècahu orá, dandu ni casaca cuàhà nèhivi nècuàchi cuhí xi-ne, nihí-né nècuàchimà ni sàà nùu-yà, nsidanuu cuèhè ndohó-né, ñàyücàndüá ni chitándóó-yà ndahà-yà ñini iin iin-ne, te ducán ni canduvàha-ne.

⁴¹ Nùu cuàhà nècuàchi cuhí ni caquee stná ñà-malu, cána-si, cachi-si xi-yà:

—Dèhemani Dios nduu-ní.

Dandu ni sadi-yà nùu-sí, cóni sàha-ya càhàn gá-si, vachi ináhá-sí Cristu ni quixi nùu Dios nduu-yà.

Nansa ni càhàn Jesús sàhù inicutu ladu Galilea

⁴² Daaní, na ní tùinuù (inga quiví), ni quee cuaán-yà cuàhàn-yà iin xaan ndé còò nèhivi. Te nandúcú nèhivi-yà ni casaà-né ndé iá-yà, te ni xicàn-né ñà-màsà nácóó-yánè, te cùhùn-yà.

⁴³ Doco ni cachi-yà xi-né:

—Ndé cuàhà stná inga ñuu icúmí cùhìn cachitnùhì xi nèhivi razón ndiaha sàhà ñuhiví ì xi Dios, vachi sàhà chuun jaàn ni techuún Yuamání' yùhù váxi —ni cachi-yà.

⁴⁴ Ñàyücàndüá, ducán ni xicanuu-ya ladu Galilea ni nacàhin-ya iin iin veheñùhu, te ni càhàn-yà sàhù (xi nèhivi xínataca yucán).

5

Nansa ni cuu iin milagru ni tavà nêhivì xì Jesús cuàhà siaca

¹ Iin xichi ni nataca cuàhà sàstnùhù nêhivì (nùù-yá), te yáha ga ndutnúù-yá quidá-né, vâchi cuní-né cunini-ne palabra xì Dios. Yuhù mar de Genesaret iin-yá;

² te ni xini-yá yucán itá ùi lancha (mahì tècuìi mà), doco sàni caquee stohò-nu, nacaté-né ñunù xí-né, vâchi tè-tává siaca xínduu-ne.

³ Ñâyücàndüá, ni nana-ya ni quècahnu stná-yá ini iin lancha yucán, Simón nani stohò-nu. Dandü ni càhàn-yá xì nècuàchimà áma dácùxícá tii gá-nènu cùhùn mahì tècuìi, te ducán ni quida-ne. Dandü ni sácòo-ya ini lancha mà, te ni quesaha-yá ni dâcuàhá-yá nêhivì cuàhà mà.

⁴ Daaní, ni nsihì ni dàcuàhá-yánè, dandü ni cachi-yá xì Simón:

—Vichi dacaca-ní lancha xi-ní dècuèndè ndé chicá cunú ñuhú tècuìi, te danuú-nsiá ñunù xí-nsiá, te tñii-nsia siaca.

⁵ Doco ni cachi Simón xi-yá:

—Ñiüyacá sàni quidachuún-nsí, te còò ni-iin-sì ni nìhì-nsí, Maestro. Doco vichi vátuni danuú tú-nsí ñunù xí-nsí nacua cachí-ní.

⁶ Daaní, na ní dâñùù tú-né ñunù xí-né, ni tù cuàhà siaca, dècuèndè ni quesaha ndátá ñunù xí-né ñà-cuàhà guá-si.

⁷ Ñâyücàndüá ni quida-ne seña nùù compañeru-nè ndoó inga lancha ñà-ní tnátuu stná nècuàchimà chindee stná-nè. Doco na ní caquesaa-nè, ni chitu ndüi lancha mà puru siaca, sàmérù càhà-nu ni cuí.

⁸ Na ní xini Simón Pedro ni cuu ducán, dandü ni sàcuìin sisi-né nùù-yá, cachí-nè:

—Nacoo-ní yuhù, por favor, vâchi iin nêhivì cuáchi nduí, Señor mío —ni cachi-nè.

⁹ Vâchi mii-né xì nsidaa nècuàchi cutnâhà xí-né, yáha ga ni ndulocó-nè sàhà ñà-cuàhà guá siaca ni catavà-né.

¹⁰ Te ducán stná dèhe Zebedeo nani Jacobo xì Juan, cuàhà gá ni ndulocó stná-nè, vâchi iin-ni compañeru xínduu-ne xì Simón nùù chuun xi-ne. Dandü ni cachi Jesús xì Simón:

—Màsà yúhí-ní, vâchi quivì nùù-xí màdì gá siaca tavà-ní; nêhivì icúmí-ní tavà-ní ñà-quee-ne (ichì malu).

¹¹ Ñâyücàndüá, ni dàtnátuu-ne lancha xi-ne nùù ñuhù íchí, te nsidaa-né ni nacoo ì-né ñà-ndüá icúmí-né, te ni tenchicùn-nè mii-yá.

Nansa ni cuu ni dândúvâha Jesús iin nêhivì ndoho-xi cuèhè lepra

¹² Daaní, ni cuu iin xichi iá-yá iin ñuu, te yucán iá stná iin tiàa ndoho-xi cuèhè lepra. Te nècuàchimà, ni xini-né yucán iin Jesús, ñâyücàndüá ni sàcuìin sisi-né nùù-yá ni tutuyuhu-né nùù sàhà-yá, te ni xicàn tàhvi-né nùù-yá, cachí-nè:

—Señor mío, nú cuní-ní, vátuni dândúvâha-ní yuhù.

¹³ Dandü ni dácùhùn Jesús ndahà-yá dìni-né, te ni cachi-yá:

—Juùn. Vichi duha ni ndúvâha-ní, cachí xi-ní.

Dandü na momentu ni cachi-yá ducán, ni quee cuèhè quida-xi-né.

¹⁴ Dandü ni sàcùnaha-né nùù-yá ñà-màsà cachí-né xì nêhivì, cui-sí ni cùhùn-nè nùù dùtù dacuní-né nècuàchimà icà-né (ñà-sàni nduvâha-ne), dandü nacuaâha-ne promesa nùù Dios, vâchi ducán cachí ley xi Moisés, te ducán cundaà stná ini nêhivì ñà-sàni nduvâha-ne.

¹⁵ Doco còò, vihi gá más ni xitià palabra sàhà-yá, te cuàhà gá nêhivì ni nachitu nùù-yá, cuní-né cunini-ne càhàn-yá, te cuní stná-né nduvâha-ne sàhà cuèhè quida-xi-né.

¹⁶ Doco mii-ya, nîsa quecuâán-yá lladu ndé còò nêhivì, te yucán ni xicàn tàhvi-yá.

Nansa ni dândúvâha Jesús iin tiàa ni dàñà ñi cuerpu xi

¹⁷ Daaní, iin quivì iá-yá dacuahá-yá nêhivì. Te yucán ndoó stná nècuàchi fariseu xì stná nècuàchi ley xi veheñùhu; nduú-né nêhivì ni caquixi cuàhà ñuu ladu Galilea, xì stná ñuu cuachi ladu Judea xì stná ñuu Jerusalén. Te fuerte ni chindee Dios ni dândúvâha Jesús cuàhà nêhivì.

¹⁸ Daaní, yucán ni casaà gá stná itnii nêhivì nsida-xi iin camilla indúhu iin nècuàchi ni dàñà ñi cuerpu-xi. Te nandúcu nècuàchimà nansa dayáha-ne nècuàchi cuhí xi-ne ini vehe, te chinduhù-né nècuàchimà nùù-yá.

¹⁹ Doco cóni nîhí-né nansa quida-ne ducán ñà-chitu guá nêhivì ndoó. Ñâyücàndüá, ni canana-ne ñinivêhé, ni nacani-né teja, te ni dâñùù-né camilla mà dècuèndè ndé iin Jesús mahì nêhivì mà.

²⁰ Te na ní xini-yá ñà-cuàhà guá xixinindisá nècuàchimà mii-yá, dandü ni cachi-yá xì nècuàchi cuhí mà:

—Mii-ní nècuàchi tiàa jaàn, xicáhnù ini sàhà cuàchi-ní.

²¹ Dandu nècuàchì ley xi veheñùhu, xì stná nècuàchì fariseu, nì quesaha-né nacání ini-nè, te cachí-nè entre mii-né: “¿Índù chuun cachí guâ tè-yòhó ducán? Mà ndóo ini Dios sàhà palabra cachí-te, vâchi còo inga ana cui cuicahnú ini-xi sàhà-ndà, cuiisí Dios”.

²²⁻²³ Doco Jesús, nì cundaà ini anima-yà ñà-nduà nacání guâ ini cada iin iin nècuàchìmà, ñàyùcànduà nì cachí-yà xi-né:

—¿Índù chuun nacání ini-nsià ducán? Vichi cachí-nsià xì índù milagru nduú ñà-chicá ùhì quida-nda: a ñà-cachí uun-nda xì nècuàchì cuhí ñà-xicahnú ini-ndà sàhà cuàchi-ne, te ò ñà-cachí-ndà xi-né nì ndacuíñ-nè, te nacaca-ne.

²⁴ Pues yùhù ana nduú Tnaha Nèhiví Ñuhiví, cuàhìn quide iñàha ñà-cundaà ini-nsià ñà-icúmí ndise derechu cuicahnú ini sàhà cuàchi nèhiví ñuhiví.

Dandu nì cachí-yà xì nècuàchì cuhí mà:

—Vichi cachí xi-ní, ndacuíñ-ní ndanihi-ní camilla xi-ní, te xuhun-ní vehe-ní.

²⁵ Vichi vichi nì ndacuíñ nècuàchì cuhí mà, indéhe nsidaa nèhiví yucán; te nì ndanihi-ne camilla xi-ne, mànuhù-né vehe-ne ndeníhí vâha-ne Dios.

²⁶ Dandu yâha ga nì ndulocó nsidaa nèhiví mà, te nì ndeníhí vâha stná-nè mii-yá, te yúhì stná-nè, cachí-né:

—Mà cándisâ ini-ndà ñà-nduà nì xini-ndà vichi.

Nansa nì cana Jesús iin nècuàchì dachíyâhvi nani Mateo Leví ñà-cunchicùn-nè mii-yá

²⁷ Daaní, nì quee-ya cuàhàn-yà, te nì xini-yà iin nècuàchì dachíyâhvi renta nani Leví, iá-nè lugar ndé naquihín-né renta. Te nì cachí-yà xi-né:

—Nahà-ní cunchicùn-ní yùhù.

²⁸ Dandu nì ndacuíñ-nè nì nacoo nsihi-ne nsidaamà, te cuàhàn stná-nè xi-yá.

²⁹ Daaní, después nì quida-ne iin vicò cahnú vehe-ne ñà-cañùhu-né Jesús. Te yucán nì casaà stná cuàhà nècuàchì dachíyâhvi, xì cuàhà stná nèhiví úun, te ndoó nsidaa-né (xixí-né) yucán.

³⁰ Doco nècuàchì ley xi veheñùhu xì stná nècuàchì fariseu, nì xitnùhu-ne nècuàchì dacuahá-yá, cachí-nè:

—¿Índù chuun cutnâhâ-nsià xì nècuàchì dachíyâhvi jaàn xì stná dava ga nècuàchì cuàchi, te ndoó-nsià xixí tàcá-nsià xi-né?

³¹ Dandu nì naxiconihí Jesús nùù nècuàchìmà, cachí-yá:

—Màdi nècuàchì ndâa vâha xiñuhu xi ana quidatatna xi-né. Còo; divi nècuàchì cuhí xiñuhu xi ana quidatatna xi-né.

³² Yùhù, màdi nèhiví nihnú ndacuisi ini-xi vâxi càhàn xì. Còo; nèhiví cuàchi vâxi nanduquí, âma naxicocuíñ ini-nè sàhà cuàchi-nè.

Ndià disâhâ-xí cónisâ ínhî nècuàchì dacuahá Jesús na iá ì-yà ñuhiví yohó

³³ Daaní, nì cachí nèhiví xi-yá:

—Nècuàchì dacuahá Juan xì stná nècuàchì xidacuahá tè-fariseu, xì-inihii nsidaa-né ndoó dòcò-nè, te nacuatú cuàhâ-né, doco nècuàchì dacuahá mii-ní, còo. Có-nàcòo-né ñà-íticú-nè.

³⁴ Dandu nì cachí Jesús xi-né:

—Nècuàchì ndoó vicò nandâhâ, ¿a cúí cunihii-né cundoo dòcò-nè nú ndoó-né cutnâhâ-né xì noviu? Còo.

³⁵ Doco vâxi iin quivi mà cóo gá noviu nùù-né, dandísâ, tiempu yucán icúmí-nè cunihii-né cundoo dòcò-nè.

Iin ejemplu nì nacani Jesús sàhâ-ñà cundaà ini-ndà ùhì dàcàstnâhâ ley saa xì estilu sànahâ

³⁶ Dandu nì nacani stná-yà xi-né inga ejemplu, cachí-yà:

—Sicoto saa, mà ndátâ-ndâñâ quee iin pedazu tii ñà-nacâhmâ-ndà ñà-tùhú. Nú ducán nì quida-nda, ñà-sàni ndátâ sicoto saa nduá, te nì mà ndúdávâ stná pedazu saa ma xi sicoto tùhú, vâchi nâhâ-ñà.

³⁷ Stná vînu, nú vînu saa nduá, dandu mà dáquêe nèhiví-ñâ ini itni iin tuhú, vâchi nú ducán, cahnsià quida vînu saa ma, te ndátâ-ñâ, dandu cuitiâ vînu mà, te cuchicuéhè stná itni iin mà.

³⁸ Ñàyùcànduà, nú vînu saa nduá, dandu itni iin sàà chívâha nèhiví-ñâ, te còo ni-iñâha cuu xán, te nì stná itni mà.

³⁹ Iin tiàa tùha coho vînu tuhú, có-cùni-te vînu saa, vâchi cachí-te: “Ñà-tùhú chicá vâha”.

6

Nansa nì xitnùhu nèhiví Jesús iin quivi descansu

¹ Daaní, iin quivi descansu nì yâha Jesús mahi iin itu. Te nì quesaha nècuàchì dacuahá-yá sâhnù-nè sicâyócó trigu mà, te dacóyo-ne nuniâ ini ndahâ-né, te saxí-néâ.

² Doco nì cacachí nècuàchì fariseu xi-yá:

—¿Índu chuun quidá-nsiá iin chuun có-sáha ley xi-nda quida-nda quivi descansu?

³ Dandu ni naxiconihí Jesús nuù-né, cachi-yá:

—¿A cóni cãhví-nsiá (nuù tutu ì) ndé cachá' nansa ni quida David sãnaha quivi ni xihì cuahã-né doco, mii-né xi stná compañeru-né?

⁴ Ndé ini veheñũhu xi Dios ni quihvi-ne, ni tñui-ne ditã vídi ì iá nuù Dios, te ni xixi-neã, dẽcuẽndẽ compañeru-né ni sãha stná-né, mate cõo permisu cuxi-nda ditã mã, cuisì dùtũ xixi xi ñã-yucán.

⁵ Te ni cachi stná-yã xi-né:

—Yũhũ ana nduũ Tnaha Nẽhivi Ñuhiví, dandacũ stnáì sãhã nansa quida nẽhivi quivi descansu.

Nansa ni nduvãha iin nẽhivi ni ìchì iin ndahã-xí

⁶ Daaní, inga quivi descansu ni quihvi-ya ini veheñũhu, te ni dàcuahã-yã nẽhivi; te yucán iá stná iin tiãa sãni ìchì ndahã cuahã-xi.

⁷ Te yucán xindoo stná nẽcuãchi fariseu xi stná nẽcuãchi ley xi veheñũhu, xínãni-nè mii-yã, a cuahã-yã danduvãha-ya tiãa ma, mate quivi descansu nduã, vãchi nú ducán, dandu nihi ndèè-né daquẽe cuãchi-ne diqui-yã cahan-né.

⁸ Doco mii-yã, inãhá-yã nansa nacáni ini-né. Ñãyucãnduã, ni cachi-yã xi tiãa ni ìchì iin ndahã-ximã:

—Ndacuiin-ní, cuiin-ní mahi nẽhivi yohó.

Te ducán ni quida nẽcuãchimã.

⁹ Dandu ni cachi Jesús xi nsidaa-né:

—Yũhũ cuní cachi-nsiã xí' nansa ndiã icã-ndã quida-nda quivi descansu. ¿Amádi chicá iã vãha quida-nda ñã-ìã vii, te mãdiã ñã-có-ìã vãha? ¿Amádi chicá cãsiha dacãcu-nda nẽhivi quivi mã, te mãdiã cahni stnãhã-ndã?

¹⁰ Dandu ni xiconuũ-yã nuù nsidaa-né, te ni cachi-yã xi tiãa ma:

Chitanini-ní ndahã-ní.

Te ducán ni quida-ne, te ni nduvãha dahuan.

¹¹ Dandu nẽcuãchi ni xitnũhu yucán, yãha ga ni caxidã ini-né, te ni candatnuhu-né índu modo cadi-né nuù Jesús.

Nansa nani ùxin ùi nẽhivi ni cana Jesús ñã-dacuahã-yánẽ

¹² Daaní, quivi yucán ni quecuaán-yã cuahã-yã yucũ, te niũyacã ni ìa-ya yucán cãhã-yã xi Dios.

¹³ Na ní tũinuũ ni cana-ya nẽhivi dacuahã-yã, te ni nacãxin-ya ùxin ùi-né; nẽcuãchi apóstol cucumi chuun nuù-yã cunduu-ne ni cachi-yã xi-né.

¹⁴ Iin nẽcuãchimã nani Simón, doco Pedro ni dácúnãni-yãnẽ; daaní, inga-nè nani Andrés, divi ñani Pedro; te iã stná Jacobo, xi Juan, xi Felipe, xi Bartolomé.

¹⁵ Xi Mateo, xi Tomás, xi Jacobo nduũ dẽhe Alfeo, xi stná inga Simón. El Celador cachi stná-né xi Simón mã.

¹⁶ Daaní, iã stná ñani Jacobo nani Judas, xi stná Judas Iscariote, divi tiãa icúmí cahin xi-yã.

Nansa ni chinaha Jesús cuahã nẽhivi; te ni dãnduvãha stná-yã nẽcuãchi cuhí xi-ne

¹⁷ Daaní, ni nuu-ya dẽcuẽndẽ iin xaan ndé chicá ndãã, te ni nataca nsidaa nẽcuãchi dacuahã-yã nuù-yã, mii-né xi cuahã gã stná nẽhivi, xinduu-ne nẽhivi ladu Judea, xi nẽhivi ñuu Jerusalén, xi nẽhivi ñuu Tiro xi ñuu Sidón ndoo yuhũ mar. Pues nsidaa nẽhivi mã, ni casaã-nè yucán, cuní-nè cunini-ne cãhã-yã, te cuní stná-nè nduvãha nẽcuãchi cuhí xi-ne.

¹⁸ Stná nẽhivi xindoho quidã ñã-malu, ni canduvãha stná nsidaa-né ni quida-ya.

¹⁹ Te nsidaa nẽhivi cuahã mã, cuní-nè dũcũn ndahã-né icã-yã, te nduvãha-ne, vãchi fuerte iã milagru xi-ya, vãtũni danduvãha nsihi-yanẽ.

Nansa quida-nda, te cundoo-nda contentu ñuhiví

²⁰ Daaní, ni indehẽ-yã nsidaa nẽhivi xinchicũn xi-yã ndoo yucán, te ni cachi-yã:

—Nansicãhãn mii-nsiã nẽcuãchi ndahví, vãchi sãni ñihitãhvi-nsiã ñuhiví ì xi Dios.

²¹ 'Nansicãhãn mii-nsiã nẽcuãchi xihì doco vichi, vãchi icúmí-nsiã sãã-nsiã ndenuu ini-nsiã.

'Nansicãhãn mii-nsiã nẽcuãchi sacũ, (te ndoo-nsiã tñũnsi ini) vichi, vãchi icúmí-nsiã sãã-nsiã cudũ cuahã ini-nsiã.

²² 'Nansicãhãn stná-nsiã na cahìchì ini nẽhivi-nsiã, te nacóo dahuun-ne mii-nsiã, te ò cãnhã-né daquẽe cuãchi-ne diqui-nsiã sãhã yũhũ ana nduũ Tnaha Nẽhivi Ñuhiví.

²³ Quivi cuu xi-nsiã ducán, dandu contentu ni cundóo-nsiã, te cudũ ini-nsiã, vãchi iin ñã-vãha cahnú cucumi-nsiã ndé gloria. Te nú quidã quini nẽhivi xi-nsiã vichi, dandu nsinuu ini-nsiã ñã-divi ducán nisa quida stná xil-né xi nẽcuãchi nisa cãhãn cuenta xi Dios sãnaha.

²⁴ 'Doco mii-nsiá nècuàchì cuicà, ìndahví-nsiá! vèchi mate iin vida vaha icúmí-nsiá vichi, doco después mà níhì gá-nsiá ni-ìñàha.

²⁵ 'Te ìndahví stná mii-nsiá nècuàchì xixì tnahà guá vichi! vèchi icúmí sàà iin quìvi tnahà inì-nsiá. Te mii-nsiá nècuàchì cudíi guá inì-xi sàhà vida-xi vichi, icúmí-nsiá cundoo-nsiá tñunsi inì, te cuhuun ga inì-nsiá.

²⁶ 'Te ìndahví stná mii-nsiá nú ndeníhí vaha nsidanicuú nèhìvi mii-nsiá! vèchi divi ducán nisa quida stná yohòtèhè nèhìvi vichi, nisa ndeníhì vaha stná nsidaa-né tètñùhù cachi càhàn cuenta xi Dios.

Ndiá icà-ndà cuu stnahá ini-ndà sàhà-ndà

²⁷ 'Yùhù cachí xì nsidaa mii-nsiá nècuàchì iníni vichi, xiñuhu-ñá cuu inì-nsiá sàhà nèhìvi xiní ùhì xì-nsiá, te obra vaha quida stná-nsiá sàhà ana cahíchi inì xì-nsiá.

²⁸ 'Te càhàn vii stná-nsiá xì nèhìvi xícàn chihàn dìquì-nsiá; te càcàn tàhvi stná-nsiá nùu Dios sàhà nèhìvi quidá quini xì-nsiá.

²⁹ 'Te nú ni caní iin tiàa iin ladu nùu-nsiá, dandu danácuicó stná-nsiá inga ladu nùu-nsiá; te nú candiáá iin tiàa sacú ndixí-nsiá, te cuní stná-te candiáa-tè dùhnù-nsiá, dandu màsà cuidáhàn-nsiáñà nùu-té.

³⁰ 'Nsidaa ana xícàn iñàha nùu-nsiá, cuàha-nsiá nècuàchì mà, te nú ni candiáá-né iñàha xi-nsiá, màsà nándácàn gá-nsiáñà.

³¹ 'Nacua cuní mii-nsiá quida nèhìvi xì-nsiá, divi ducán xiñuhu quida stná mii-nsiá xì-né.

³² 'Vèchi nú cuisì nèhìvi cuú inì-xi sàhà-ndà cuú stná ini-ndà sàhà-xí, dandu mà cuàha Dios premiu sàhájàn, vèchi ducán quidá stná ndéni nèhìvi cuàchi nì cui, cuú ini-nè sàhà nècuàchì cuú inì-xi sàhà mii-né.

³³ 'Te nú cuisì quida-nda obra xì nèhìvi quidá stná obra xì-ndà, dandu mà cuàha Dios premiu sàhájàn, vèchi divi ducán xiquida stná ndéni nècuàchì cuàchi nì cui.

³⁴ 'Te nú cuisì sàha too-nda dìhùn nùu nèhìvi ndiatu-nda danáa xì nùu-ndà, dandu mà cuàha Dios premiu sàhájàn, vèchi ndé stná nèhìvi cuàchi, ducán xiquida stná-nè, sàha too stnahá stná-nè dìhùn, te naquhín tú-néa.

³⁵ 'Ñàyucàndüá, (cachí xì-nsiá), xiñuhu-ñá cuu ini-nsiá sàhà nèhìvi xiní ùhì xì-nsiá, te quida stná-nsiá obra xì-né, te cuàha too stná-nsià nè iñàha, te màsà cúnihnú ini-nsiá naquihín-nsiá dìhùn mà, dandu cahnú coo premiu xì-nsiá, te cunduu ndisa-nsiá dehe Yua-nda Dios iá dìquì-xí ansivi, vèchi mii-yá, quidá stná-yà favor xì nèhìvi mà túha naquimanì xì-yá, xì stná nèhìvi malu.

³⁶ 'Ñàyucàndüá, nacua cuhí ini Yuandiaha-nsiá nsidaa nèhìvi, divi ducán ndiá icà stná mii-nsiá quida-nsiá, cuhì stná ini-nsiá nsidaa nèhìvi.

³⁷ 'Màsà dácuídà cuàchi stnahá-nsiá, dandú mà dácuídà cuàchi stná Dios mii-nsiá. Màsà dáquèe cuàchi stnahá-nsiá dìquì-nsiá, dandu mà dáquèe cuàchi stná Dios dìquì mii-nsiá. Te cuicahnú stnahá stná ini-nsiá sàhà-nsiá, dandu cuicahnú stná ini mii-yá sàhà-nsiá.

³⁸ 'Nú dacutáhvi stnahá-nsiá iñàha, dandu icúmí stná-nsiá nìhitáhvi-nsiá (nùu mii-yá), te ñà-ndüá cuàha-yansià cundua na ian xiin-nda nùni, te itácùha vii medida mà, ndé quidínihní-teá ñà-queè tnuà, te sádi vaha-téa, dècuèndè chiyódo gá stná-teá nùu-ndà. Pues, ducán iá stná na nìhitáhvi-nsiá nùu mii-yá. Vèchi divi vara chitácùhá-nsiá icúmí stná-nsiá nacuitacùhá-nsiá.

³⁹ Dandu nì nacani-ya xì-né iin ejemplu, te dohó nì cachi-yà:

—Nècuàchì cuaá, ¿a vátùnì dacúndèhe stnahá-né ichì? ¿Amadí dacóyo nihni stnahá-né ini xìchì?

⁴⁰ 'Cunaha-nsiá, ni-iin tiàa làcà dàcuàhá nùu iin maestru, màdiá chicá ndiáá-nè nùu maestru xi-ne mà. Còó. Doco nú sàni nsihì nì cutùha vaha-ne, dandísá, nahi maestru-mà cunduu stná-né.

⁴¹ 'Màsà (cuítnùhu tnahá-nsiá), vèchi nú jaan, dandu queámà na ian nandúcu iin tiàa iin xèhè tii inácaa nduchìnúù ñanitnaha-ne. Doco ini nduchìnúù mii-né inácaa stná iin ñà-chicá cahnú na iin sì-ndùhú yutnú, te có-quihín casu-né.

⁴² Màsà (cuítnùhu tnahá-nsiá, cachí), vèchi ducán queámà na ian cachí iin-nsiá xì iin ñanitnaha-nsiá: "Nacoo-ní yùhù taví xèhè tii inácaa dacúcuíin nduchìnúù-ní". Doco nècuàchì cachí ducán, dananì uun-ne ndiáa ndisa-ne, vèchi inácaa stná iin ñà-cahnú nduchìnúù mii-né, te có-quihín casu-né. Dihna xiñuhu tavà-né ñà-jaan nùu mii-né, dandu vátùnì cutù vii nùu-né ñà-tavà-né xèhè tii inácaa nduchìnúù ñanitnaha-nemà.

Nansa nacuni-ndà ana nduú nèhìvi vaha, te ana nduú nèhìvi malu

⁴³ 'Nú iá vaha iin yutnú fruta, mà cuàha-nù fruta chicuèhè. Te iin yutnú iá cuèhè-xi, mà cuàha stná-nu fruta vaha.

⁴⁴ Vâchi sâhà fruta-numa cundââ ini-ndâ, a yûtnu vâha nduú-nu, ò á coó. Na iin yutnú ìñù, de por sí, có-cànâ si-higu nùù-nú. Stná si-uva, mà cuídâ-ndá quisi mà nùù iin nducu yòhò ìñù.

⁴⁵ (Te ducán iá stná xì mii-nsiá.) Iin nècuàchi vâha, cuàhâ ñâ-vâha ñuhú ini anima-nè; te ñâyùcândúâ, divi palabra vâha ma nduá cachí-nè. Doco iin nècuàchi malu, cuàhâ ñâ-chicuèhè ñuhú ini anima-nè, ñâyùcândúâ ñâ-chicuèhè nduá cachí stná-nè. Vâchi ñâ-ñuhú chitu ini anima-ndâ, divi nduá câhân-ndâ sâhâ-xí.

Ejemplu sâhâ ùi vehe

⁴⁶ ‘Mii-nsiá, “Stoho-nsi Señor” cachí-nsiá xí’, doco ¿índu chuun có-câhvi-nsiá ñâ-nduá cachí xì-nsiá?

⁴⁷⁻⁴⁸ Vichi cuàhin nacani xì-nsiá sâhâ nèhivi quíhvi ichi yùhù, te iníni víi-né palabra xì, quidá-néâ cumplir. Nècuàchi xíquida ducán, queámâ na ian nì quida iin tiâa na ní quidayucun-nè vehe-ne, cunú nì sate-ne ndè nì natúi cavâ, dandu nì chicao-nè cimientu xan. Daaní, después nì quixi tēñuhu cuàhâ, nì xinu-tè nì ducùn-te ndè icâ vehe ma, doco cóni nduá, vâchi nùù cavâ indúhâ.

⁴⁹ ‘Doco nèhivi iníni uun xì ñâ-nduá cachí’, te có-quíhín casu-nè sâhâ-ñâ, ducán cuu stná xì-né na ian nì quida inga tiâa, nì quidayucun-nè vehe-ne nùù ñuhù ùin, cóò cimientu xan. Dandu nì xinu stná tēñuhu nì ducùn-te ndè icâ vehe ma, te vichi vichi nì ndua iá; nì châhmâ dahuan —nì cachí Jesús.

7

Nansa nì dândúvâha Jesús iin tiâa quidáchúûn nùù iin capitán

¹ Daaní, nì nsihi nì câhân-yâ nì inini nsidaa nèhivi yucán, dandu cuàhân-yâ ñuu Capernaum.

² Te yucan iá iin tiâa nduú capitán dandacú, te icúmí-nè iin mozo màni cuàhâ nùù-né, doco sâni quicuehè nècuàchimâ, meru cucâhví-nè.

³ Ñâyùcândúâ, na ní xinitñuhu capitán mà sâhâ-yâ, dandu nì cana-ne itnii nècuàchi sahnú dandacú nùù nècuàchi raza Judea, te nì techuún-nè nècuàchimâ ñâ-cùhùn-nè cuacundahví-nè nùù-yâ ñâ-quixi-ya dândúvâha-ya mozo mà.

⁴ Ñâyùcândúâ, nì casaâ nècuàchi sahnùmâ nùù-yâ, te nì casacundahví-nè nùù-yâ, cachí-nè:

—Quida sacù-ní favor xì capitán mà, vâchi vâha ndisa ini-nè.

⁵ Cuú ini-nè sâhâ nèhivi raza-ndâ. Te nì chindee stná-nè nì cuyucun iin veheñuhu xì-nsi.

⁶ Daaní, nì sacatnahâ-yâ xì nècuàchimâ cuàhân-yâ. Te na sâ-itúú-yâ sââ-yâ vehe capitán mà, dandu vâxi iin ùi amígo xì-ne, nihí-né razón xì nècuàchimâ vâxi nùù-yâ, te dohó cachá: —Señor mío, màsâ dândohó gà-ní mii-ní sâhí, vâchi có-nâtui yâha-ní vehi.

⁷ Nì có-nâtui stnáí tnâtui ndé iá mii-ní. Cuisi icúmí-ní cachí-ní, dandu nduvâha mozo xì.

⁸ (Ináhí), vâchi iá inga nèhivi dandacú nùù yùhù, te yùhù dandacú stnáí nùù tē-xínduu soldadu xì; te nú cachí xì iin-tè: “¡Cuahán!” dandu cùhùn-te; te ò nú cachí xì ingâ-te: “¡Naha!” dandu quidá stná-teá; te ò nú cachí xì mozo xì: “Dohó quido”, dandu quidá stná-teá. Ducán cachí razón xì capitán mà.

⁹ Na ní nsihi nì inini Jesús razón mà, dandu nì ndulocó-yâ sâhâ nècuàchimâ, te nì nacuíco-yâ yâtà-yâ nì indehè-yâ nècuàchi nchícùn mà, te nì cachí-yâ xì-né:

—Cunaha-nsiá, có-xínf nì-iin nèhivi raza-ndâ Israel xiníndisâ vâha guá nahi capitán yohó.

¹⁰ Dandu amígo xì capitán mà, mànuhù-né vehe nècuàchimâ, te nì xini-nè sâni nduvâha mozo cuhí mà.

Nansa nì dânatíacú Jesús dêhe iin nècuàchi cuáán

¹¹ Daaní, nì yâha iin tiempu, te cuàhân-yâ inga ñuu nani Naín, te cuàhâ nècuàchi dacuahâ-yâ xínchicùn xì-yâ, te cuàhâ stná nèhivi dava ga.

¹² Te sâ-itúú-yâ sââ-yâ yehè cahnú ndé quíhvi-nda ñuu mà, te nì xini-yâ yucán vâxi nèhivi xínsida xì iin nsihi. Vâxi stná dihi nsihi ma, cutnâhâ-né xì cuàhâ nèhivi. Sâni xihí stná ì nècuàchi ñahâ mà, te mindaa dêhe-ne nduú nsihi cuàhân cundúxin vichi.

¹³ Doco na ní xini Stoho-ndâ Señor nècuàchimâ, nì cuhi ini-yânè, te nì cachí-yâ xì-nè:

—Màsâ cuácú gà-ní.

¹⁴ Dandu nì tnâtuu-ya nùù caja mà, te nì chituu-ya dínindâhâ-yâ icâ-nú. Ñâyùcândúâ, nì cucuita tiâa xínsida xì-nú. Dandu nì cachí-yâ xì nsihi ma:

—Ndacuíin-ní, cachí xì-ní, xu.

¹⁵ Dandu nsihi ma, nì ndacóo-ne nì quesaha-né nì nacahân-nè. Dandu nì cachí Jesús xì dihi-né:

—Yohó iá dêhe-ní.

¹⁶ Dandu ni cayúhí nsidaa nêhivî mà, te ni candenihi vâha-ne Dios, cachî-nê:
—Vîchî ndisa, yohó sàni ndecunu ana vâxi câhàn razón ndiaha xí Dios, te cuâhà sàstnùhù ñà-nduá quidá-yá.

Te dava ga-nê xîcachi stná-nê:

—Sàni indehè ndahví Dios ndohó tè-nduú nêhivî xí-yá.

¹⁷ Ñâyücànduá, ni xitià palabra sâhà Jesús inicutu ladu Judea yucán, xî inicutu stná ñuu chîcá xîca.

Nansa ni naxiconihî Jesús nùù nêhivî ni techuún Juan Bautista ni quixi nùù-yá

¹⁸ Daaní, nècuàchî dacuahá Juan, ni nacani-ne xî nècuàchîmâ nsidaa ñà-nduá quidá Jesús.

¹⁹ Ñâyücànduá, ni cana Juan mà ùi tiàa dacuahá-né, te ni techuún-né nècuàchîmâ ñà-cùhùn-né nùù-yá ndàcàtnùhù-né nùù-yá a ndísá mii-yá nduú ana ndiaha icúmî quesaa, te ò inga ana vâxi cundiatu-ne.

²⁰ Ñâyücànduá, cuâhàn nècuàchîmâ ndé iá-yà, te ni cachi-nê xî-yá:

—Juan Bautista ni techuun-xî-nsî vâxi-nsî yohó ñà-ndàcàtnùhù-nsî nùù-ní, ¿a divi mii-ni nduú ndisa ana ndiaha icúmî quesaa, te ò inga ana vâxi cundiatu-nsî?

²¹ Daaní, divi hora xíndoo nècuàchîmâ yucán ni dândúvâha-ya cuâhà nècuàchî cuhî. Te ni nduvâha stná cuâhà nècuàchî ñuhù ñà-malu inî-xî, xî cuâhà stná nècuàchî cuaá ni dânatù-yá nùù-xî.

²² Dandu ni cachi-yá xî tiàa ni caquesaa mà:

—Cuahán-nsià cachtitnùhu-nsia xî Juan sâhà ñà-nduá ni xini-nsia yohó, xî ñà-nduá ni inini-nsia, te cachi-nsià xî-né nansa ni cuu ni natùinuù nècuàchî cuaá, te ni nacaca stná nècuàchî xîcâcúehè, te ni nduvâha stná nècuàchî ndohó cuèhè lepra, te ni nihi stná nècuàchî dòhò ni natiacu tùtnù-né; stná nêhivî ni xihî, ni natiacu stná-nê. Te nècuàchî ndahví, sàni nihítâhvi stná-nê cunini-ne razón ndiaha xí Dios.

²³ Ñâyücànduá, nú cudîi ini nêhivî modo xî, dandu contentu ni cúndóó-né —ni cachi-yá.

²⁴ Daaní, na sâmànùhù nêhivî ni caquixi nùù Juan mà, dandu ni câhàn-yá xî nêhivî cuâhà ndoó yucán; dohó ni cachi-yá xî-né sâhà Juan:

—Na ní caquee-nsia ñuu-nsià cuâhàn-nsià yucù cundehè-nsiá Juan, ¿a cuâhàn-nsià cundehè-nsiá iin nêhivî (tùha dâma dinî-xî) na iin yutnù ndóyo quidá tàchî? (Còó.)

²⁵ Te nú cóó, dandu ¿nansa iá-né cahan-nsiá? ¿A iin nêhivî ndixî vico nduú-né cahan-nsiá? Còó, vâchî nêhivî ndixî vico, te xíndoo-ne vicò nsiquívi, puru vehe rey xíndoo-ne.

²⁶ Pues nú màdi ducán, dandu ¿nansa iá nècuàchî cuâhàn-nsià cundehè-nsiá? ¿A iin profeta câhàn cuenta xi Dios nduú-né? Pues jaan. Doco màdi cuisî profeta nduú-né, chîcá más ndiaá-nê,

²⁷ vâchî divi nècuàchîmâ câhàn tutu ìi sâhà-xî ndé cachî Dios:

Cuâhîn techuún iin tiàa cùhùn, te dihna-ne yâha-ne câhàn-nê xî nêhivî ñà-nduú razón xî, te ducán nsida vîi nècuàchîmâ anima-nê, na ian nduvîi iin ichî, dandu después yâha stná mii-ní (Cristu), cachî Dios nùù tutu ìi mà.

²⁸ “Te yùhù, cachî xî-nsiá, nùù nsidaa nêhivî ni tùinuù ñuhivî, còò inga profeta chîcá ni quida ndiaha nùù Juan Bautista. Còò ana inga ndudává xí-nê. Doco cachî stnáî xî-nsiá, chîcá ndiaha coo xi ana cuâhàn cuni tiempu cusahnù Dios ñuhivî yohó, mate nêhivî ùtù nduú-né —ni cachî Jesús.

²⁹ Daaní, nècuàchî dachiyâhvi, xî nsidaa stná nêhivî, ni naquimani-né Dios sâhà ñà-nduá ni cachi-yá, vâchî cuâhà-né sàni quida ìi Juan-nê.

³⁰ Doco nècuàchî fariseu xî nècuàchî ley xî veheñùhu, ni cahîchî ini-nê palabra ni cachi Dios sâhà-né, vâchî cóni sâha-ne cuhî-né quida Juan.

³¹⁻³² Daaní, ni cachi tu Stoho-ndâ Señor:

—Cuâhîn cachî xî-nsiá nansa quidá nêhivî tiempu vîchî. Dohó quidá-né na quidá ñà-cuati ndoó idáidiquî ini iin ñuu, dava caná xî tnaaha, cachá: “Sivî-nsî, doco nsiohó, có-ításâhá-ndâ; daaní, xitò tàsî-nsî, doco nsiohó, có-sâcù-ndâ”.

³³ (Te ducán iá sâhà Juan Bautista xî yùhù), vâchî ni quixi Juan mà, nîsa ìa-ne yohó, cóni sâxîxî-né comida vâha, ni cóni sâxîhî stná-nê (vinu); ñâyücànduá, ni cachi-nsià sâhà-nê: “(Tè-loco nduú-te), ádi sâni cundee ñà-malu nùù-té”.

³⁴ Daaní, ni quesaa stná yùhù ana nduú Tnaaha Nêhivî Ñuhivî, te tùha stnáî cuxi comida vâha, te xihî stnáî (vinu), doco cachî-nsià sâhî ñà-yâha ga ndadí, te cachî stná-nsià ñà-tùhe coho cuahî, dècuèndè iá vâha stnáî xî nècuàchî dachiyâhvi, xî stná nsidaa gá nêhivî cuâchî, cachî-nsià.

³⁵ Doco cunaha-nsiá, nú ndisa ñà-nchîchî ndiaha nduá quidé, te xini stná inga ana quidá stná ducán, dandu quidáñùhù stná-nê yùhù.

Nansa ni quida Jesús na iá-yá vehe iin nècuàchî fariseu nani Simón

³⁶ Daaní, ni canà-yá cùhùn-yà vehe iin nècuàchi fariseu ñà-cutnahá-yá xì-né cuxi-ne xì-yá. (Ñàyucàndüá, cuàhàn-yá yucán), te ni yàha-ya ini vehe ni sàcòo-ya.

³⁷ Te ñuu yucán íá iin nècuàchi ñahà có-quidá sahnú. Te ni xinitnúhu nècuàchì mà sà-cuàhàn Jesús vehe nècuàchi fariseu-mà cuxi-ya. Ñàyucàndüá ni tni-ne iin quidi tii ni cuyucun yùu finu nani alabastro; ñuhú tàtnà tnàmi quidi ma,

³⁸ te ñihí-néa cuàhàn ndé íá-yá. Te ni sàcuùn-nè yàtà-yá yatni nùu sàhà-yá, te sacú cuàhà-né. Te ndutènùu-némà ni dàndàxín-né sàhà-yá, dandu ni nsida íchí-nèa xì ididíni-né. Ni tutuyuhu stná-né sàhà-yá, te ni dàcánúu-né ñà-tnami ma ìcà sàhà-yá.

³⁹ Doco nècuàchi fariseu ni cana xì-yá mà, inì-ni mii-né ni nacani ini-nè, cachí-nè: “Nú ndisa iin nèhivi vaxi cuenta xì Dios nduú Jesús, dandu mà úhi cundaà ini-nè sàhà nècuàchi ñahà tnií xì (sàhà-né) ñà-nduú nècuàchì mà iin nèhivi cuàchi”. Ducán ni nacani ini nècuàchi fariseu mà.

⁴⁰ Doco Jesús, ni cachi-yá xì-né:

—Íá ñà-ndüá cuní cachi xì-ní, Simón.

—Juùn, Maestro, cachi-ní xí —ni cachi Simón mà.

⁴¹ Dandu ni cachi-yá:

—Ni sandoo ùi tiàa, te ndüi-nè, xì-inihica-né dihùn nùu inga iin tiàa. Iin nècuàchì mà, inihíca-nè ùhùn cientu pesu, te inga-nè, cutu ùi dico ùxin pesu inihíca-né.

⁴² Doco ni-iin-ne, cóò ni-ñàha ícúmí-né ñà-danáa-né. Ñàyucàndüá, tiàa inihíca-nè nùu-ximá, ni dàndütù-né cuenta xì ndüi nècuàchì mà. Ñàyucàndüá, vichi cachi-ní xí, ùndü tiàa ma chicá cuàhàn cuu inì-xì sàhà nècuàchì mà cahan-ní?

⁴³ Dandu ni cachi Simón mà:

—Yùhù tuxí inì, nècuàchi chicá ni sanihica cuàhà mà, divi cunduu ana chicá cuú inì-xì sàhà nècuàchì mà.

Dandu cachí Jesús xì-né:

—Sàni cachi vàha-ní.

⁴⁴ Dandu ni ndacoto-ya yàtà-yá ndé íá nècuàchi ñahà mà, te ni cachi-yá xì Simón mà:

—¿A xini-ní nècuàchi ñahà yohó? Na ní quesai, te ni quihvi vehe-ní, cóò tècúu ni chindánuu-ní ñà-ndoo sàhí; doco nècuàchi yohó, ndutènùu-né ni dàndàxín-né sàhí, te ni nsida íchí-nèa xì ididíni-né.

⁴⁵ Te mii-ní, cóni tütüyúhú-ní yùhù na ní casàhú-ní xí, doco nècuàchi yohó, dècuèndè hora ni quesai, có-nàcòó-né ñà-tütüyúhú-né sàhí.

⁴⁶ Te mii-ní, cóni (quidáñúhú-ní yùhù) ñà-dacánúu-ní aceite díní. Doco nècuàchi yohó, tàtnà tnàmi sàni dàcánúu-né sàhí.

⁴⁷ Ñàyucàndüá, mate cuàhà cuàchi-ne íá, doco ñà-sàni ñihí-né perdón sàhà mà ndüá, (náhà xicà), vàchi cuàhà gá cuú ini-nè (sàhí). Doco nú iyuhu cuàchi íá sàni ñihí nèhivi perdón sàhà-xí, dandu chicá iyuhu cuú ini-nè (sàhí).

⁴⁸ Dandu ni cachi-yá xì nècuàchi ñahà mà:

—Sàni xicahnú inì sàhà cuàchi-ní.

⁴⁹ Doco nèhivi dava ga ndoó xixí xì-yá yucán, ni nacani ini-nè, cachí-nè (entre mii-né):

—¡Cò-ndüá ducán cachi Jesús ñà-jaàn, vàchi mà cuí cuicahnú ini-nè sàhà cuàchi-nda!

⁵⁰ Doco Jesús, ni cachi-yá xì nècuàchi ñahà mà:

—Sàni càcu-ní ñà-ni xinindisa-ní. Vàtùni cùhùn-ní, te contentu ni coo-ní.

8

Nansa nani itni nècuàchi ñahà ni chindee xì Jesús

¹ Daaní, ni quihin-ya ichi cuàhàn-yá ni nacàhin-ya ñuu nahnú te ñuu cuati, càhàn-yá sàhù, cachitnúhu-ya xì nèhivi ñà-ndüú razón ndiaha sàhà ñuhiví ùi xì Dios. Te cutnàhá stná-yá xì nsì-ùxin ùi nècuàchi dacuahá-yá,

² xì dava stná nècuàchi ñahà ni dàndúvàha-ya. Dava-ne, nisa ñuuhu ñà-malu ini-nè, te dava ga-nè, cuèhè ni sandoho-ne, doco ni dàndúvàha-ya nsidaa-né. Iin nècuàchi ñahà mà nani María Magdalena. Úsà ñà-malu ni tavà-yá nùu-né.

³ Te inga-nè nani Juana, ñahàdihí Chuzà, iin nècuàchi dandacú nùu biene xì rey Herodes. Te inga nècuàchi ñahà mà nani Susana, te cuàhà gá stná nècuàchi ñahà dava ga cutnàhá xì-yá cuàhàn-nè, chindéé-nèyà, te quidá stná-nè cooperar.

Ejemplu sàhà iin nècuàchi xitú

⁴ Daaní, ni quesaa cuàhà nèhivi ni caquixi iin iin ñuu, ni nataca-nè nùu-yá. Te ni càhàn-ya xì-né, ni nacani-ya xì-né iin historia nduú ejemplu. Te dohó ni cachi-yá:

⁵ —Ni ìa iin tiàa, te cuàhàn-nè chihi-ne. Te ni sate uun-ne tata mà. Ducán ni quida-ne, te dava-ña ni cóya mahí ichi. Te yucán ni sànihi nèhivi-ñá; stná laa ndavá ansiví, ni saxí-siá.

⁶ Te dava stná tata mà, ni còya nùu cavà. Te yucán ni xitía, doco ni íchà, vâchi còò ndèhì.

⁷ Te dava stná tata mà, ni còya mahì iñù, te iin-ni ni sahnua xi-ñá mà. Doco ni dàdáhviamá-ñá.

⁸ Doco dava stná tata mà, nùu ñuhù vâha ni còya, te ni xitía viiá; ndè ùhùn dico tantu ni cana —ni cachi Jesús.

Dandu fuerte ni cachi-yá:

—¡Ni cúnini vâha nsidaa-nsiá ñà-ndüá cachí!

Ñà-ndüá disáhà-xí ni nacani Jesús cuàhà ejemplu

⁹ Después ni xicán tnùhù nècuàchì dacuahá-yá nùu-yá, cachì-nè:

—¿Ndíá ndüá cuní cachi ejemplu ni nacani-ní mà?

¹⁰ Dandu ni cachi-yá:

—Sàni sàhatahvi Dios mii-nsiá ñà-cundaà ini-nsiá sàhà ñuhivì ìi xí-yá, mate antes nisa ia dèhámà. Doco nècuàchì dava ga, còó. Puru ejemplu nacani xi-né sàhà-ñá màsà cúnitnùhu-ne, mate indèhe-né, te màsà cündáà ini-né, mate iníni-né.

Ñà-ndüá cuní cachi ejemplu sàhà nècuàchì xitü

¹¹ 'Cunaha-nsiá, ñà-yòhó ndüá cuní cachi ejemplu mà: Tata mà nduú nahi Palabra xi Dios.

¹² Te tata ni còyo mahì ichì mà nduú nahi nèhivì iníni palabra (xi-ya), dandu vâxi ñà-malu, te dacúxió-si palabra mà ini anima-nè sàhá màsà cúnindisá-nè, te càcu anima-nè.

¹³ Daaní, tata ni còyo nùu cavà mà nduú nèhivì iníni xí palabra ìi, te luegu cudí ini-nè sàhá mà. Doco nahi viu còò yohò-xí nduú-né, iin ratu tii xiníndisá-né, dandu na yâha-ne tnùndoho, luegu nacóó-né palabra mà.

¹⁴ Daaní, tata ni còyo mahì iñù mà nduú nèhivì iníni xí palabra xi-ya, doco cuàhà gá nacani ini-nè sàhá vida xi-ne ñuhivì yohó; cuú cuàhà ini-nè sàhá biene xi-ne, te cuàhà gá diversión có-íá vii nandúcu-nè. Ñâyücàndüá, ducán queá xi-nè na ian ni cuu xi viu mà, ni dàhvia ni quida iñù, vâchi có-sàà-nè quida-ne ñà-vâha nacua cuní Dios.

¹⁵ Daaní, tata ni còyo nùu ñuhù vâha nduú nèhivì niñnú ndàcuisi ini-xi; vâha anima-nè, iníni-né palabra vâha ma, te quidá ndisa-neà cumplir, iin-ni nchícùn-nèà, te sàhá mà nduú-né nahi viu ni cana vii.

Ejemplu sàhà ñuhu itnúu

¹⁶ 'Nú sàni nacahmí-nda iin lámpara, mà chicáni-ndáñá tixi iin cazuela, ò tixi iin cama. Còó, icumíá cuian ndé ducún ñà-cutnuà nùu nèhivì yâha ini vehe.

¹⁷ Cunaha-nsiá, nsidaa ñà-íá dèhé, icumíá tui vateá. Vâchi nsidaa ñà-ndüá quidádèhé nèhivì, icumíá natü claruá, te cunitnùhu nèhivì sàhá-ñá.

¹⁸ 'Cunini vâha-nsia na sâha xi-nsiá ichì vâha, vâchi nècuàchì ñuhù (ñà-vâha) ini-xi, chicá màs icumí-nè nihitâhvi-né; doco nèhivì có-ñuhù ndisa (ñà-vâha) ini-xi, mate tuxí ini-nè íá iyuhá, doco nsidaájàn, icumíá cuxio nsiha.

Ñà-ndüá ni cachi Jesús sàhà dihi-yá xi sàhà ñani-yà na ní casaà-nè caná-neyà

¹⁹ Daaní, ni sàà dihi-yá xi ñani-yá, doco mànicüi quihvi-ne ndé íá-yá sàhá-ñá cuàhà guá nèhivì ndoó yucán.

²⁰ Dandu ni cachi nèhivì xi-yá:

—Cunaha-ní, tùvehè cà' iin dihi-ní xi stná ñani-ní; cuní-nè càhàn-nè xi-ní.

²¹ Dandu ni cachi-yá xi-né:

—Nsidaa ana iníni xi Palabra xi Dios, te quidá ndisa-neà, divi-ne nduú nahi dihi, nahi ñani, te nahi cùhe.

Nansa ni quida Jesús ni cucuiñ tàchi, te ni nacuiñuhu dadí tècuiñ mar

²² Iin quivi ni nana-ya ini iin lancha, mii-yá xi nècuàchì dacuahá-yá, te ni cachi-yá xi-né:

—Cùhùn-ndà yâha-nda inga ladu mar.

Ñâyücàndüá, ni quihin lancha mà ichì cuàhàn-nu.

²³ Te na xicá-nu cuàhàn-nu mahì mar; dandu ni quidi-yá. Daaní, ni quesaha ni cana iin tàchi fuerte vâxi ndè ñuhù íchí, te ni quesaha cuàhàn chitu lancha mà tècuiñ, yâha ga íá peligrú xi nsidaa-né.

²⁴ Dandu ni catnâtuu-ne ndé indúhu-yá quidi-yá, te ni dàndácòo-neyá, cachì-nè xi-yá:

—¡Maestro! ¡Maestro! ¡Cuàhàn-ndà càhà-ndá!

Ñâyücàndüá, ni ndacuiñ-yá ni càhàn-yá ni sadi-yá nùu tàchi mà xi nùu ñà-nàcuáhnú tódo tècuiñ. Dandu ni cucuiñ ìi nsidaámà, ni nàcuiñ dadí uun.

²⁵ Te ni cachi-yá xi-né:

—¿Índü chuun có-niñnú vâha ndisa ini-nsia Dios?

Ñâyücàndüá, ni yúhí-nè, te ni ndulocó-nè, cachì-nè iin-ne xi inga-nè sàhá-yá:

—¿Índu clase tiàa nduú ana yohó? Vâchi ndè tàchì xì ndè stná mar dandacú-né nùù-xí, te iníniá-nè.

Nansa ni tavà Jesús cuàhà ñà-malu ñuhú ini iin tiàa ñuu Gadara

²⁶ Daaní, cuàhàn lancha mà, te nì sàà-nu ndè ñuu nècuàchì gadarenu. Frente ladu Galilea indúhu ñuu mà.

²⁷ Te nì nuu Jesús lancha mà nùù ñuhù íchí. Dandu yucán vâxi iin tiàa ñuu mà, ñuhú cuàhà ñà-malu anima-nè. Sàcàni tiempu ñuhà anima-nè. Có-ndixí-nè sicoto, nì còò stná vehe-ne, cui sí mahì cueva ndé xí-indúxin nsi iá-nè.

²⁸ Doco na ní xini-nè Jesús, nì ndàhì ndee-né nì sàcuìn sisi-né nùù-yá, te fuerte nì cachi-nè xì-yá:

—Jesús, ¿ndiá cunduu-ní yùhù? (Yùhù ináhi), Dèhemani mii-yá dandacú ndé chicá ansivi nduu-ní. Sacúndáhvì nùù-ní jmàsà dándóhó-ní yùhù!

²⁹ Ducán nì cachi nècuàchì-mà, vâchi sàcàchì Jesús xì ñà-malu mà ñà-nì quèá ini-nè. Vâchi antes cuàhà xichì nì dándóhà-nè, ñâyúcándüá nì sàcùnuhni-nè xì cadena xì stná manilla càa, te ducán nisa iá-ne, ndiáà nèhivì-né. Doco siempre sahné uun-ne ñà-nùhní-nè, te xinúdhé-nè yucú sàhàn-nè quidá ñà-malu mà.

³⁰ Dandu Jesús, nì xicán tnùhù-yá nuá, cachí-yá:

—¿Nansa nanu?

Te nì cachà:

—Ejército nani —cachá, vâchi cuàhà sàstnùhù ñà-malu ñuhú anima-nè.

³¹ Te nì sacundahví nùù-yá ñà-màsà dándacú-yá cùhàn cuñuha yavi cunú sàstnùhù.

³² Te yatni yucán iá iin yucú ndé ndóò cuàhà cochi xixáhan-sì. Ñâyúcándüá, nì xicán tàhviá nùù-yá áma cuáha-ya permisio cùhàn caquihvia ini cochi yucán. Te nì sàha-ya permisio.

³³ Dandu nì canacoyo nsidaa-ñá ini tiàa ma cuàhàn, te nì caquihvia ini cochi mà. Dandu nsidaa quisi mà, (nì culocó-sì); carrera nì canuu-sì candiaa mà nì còyo-sì mar, te nì càhà-sì.

³⁴ Daaní, tè-xíndiáa xì cochi mà, na ní caxini-te nì cuu ducán, dandu carrera mànuhù-té nì nacani-tè xì nèhivì ñuu yucán xì stná nèhivì ranchu.

³⁵ Dandu ní caquee nsidaa-né vâxi-ne cundaà ini-nè ndiá nduá nì cuu. Te nì casaà-nè ndé iá Jesús, nì xini-nè, yucán iá tiàa nì caquee ñà-malu anima-xi, iá-nè nùù-yá, sàndixí-nè sicoto vichi. Sàni nàcòò nsihi sàxinínùnì-nè. Ñâyúcándüá, yáha ga nì cayùhì nèhivì mà.

³⁶ Dandu tiàa nì caxini nansa nì cuu nì dándúvâha-ya tiàa ma, nì nacani-ne xì nèhivì nì caquesaa mà.

³⁷ Dandu nsidaa nècuàchì ladu Gadara mà, nì sacundahví-nè nùù-yá ñà-nì quèé-yá nùù ladu mà, vâchi yúhì cuaá-nè. Ñâyúcándüá, nì nana tu-ya lancha ñà-cùhùn-yá.

³⁸ Dandu tiàa nì caquee ñà-malu nùù-ximà, nì sacundahví-nè nùù-yá cuni-nè cutnahá-né xì-yá cùhùn. Doco nì techuún-yánè nùhù-nè, cachí-yá:

³⁹ —Xuhun-ní vehe-ní. Te nacani nchihì-ní nsidaa favor nì quida Dios xì-ní —nì cachi-yá. Ñâyúcándüá, mànuhù nècuàchimà ñuu-nè yucán, te inii ní xicanuu-ne nacáni-né xì nèhivì nansa (nì nduvâha-ne) nì quida Jesús.

Nansa ni dándúvâha Jesús dèhe Jairo, te ni dándúvâha stná-yá iin nècuàchì ñahà

⁴⁰ Daaní, na ní nasaa-yá, nì cacudii ini nèhivì ndóò yucán, vâchi xíndiatu nsidaa-né ñà-nsiaa-yá.

⁴¹ Daaní, nì sàà iin nècuàchì nani Jairo nùù-yá; iin nècuàchì cusáhnù nùù iin veheñùhu nduú-né. Te nì tutuyuhu-né ñuhù nùù sàhà-yá nì sacundahví-nè nùù-yá ñà-cùhùn-yá vehe-ne.

⁴² Vâchi mindaa dèheyoco-né iá, nahi ùxin ùi cuià xicá-ña, doco vichi sàcúcáhvì-ña. Ñâyúcándüá nì quihin Jesús ichì cuàhàn-yá. Doco cuàhà stná nèhivì cutnahá xì-yá, dècuèndè yáha ga tnuu cuàhàn-nè xì-yá ñà-cuàhà guá-nè.

⁴³ Te mahì nèhivì mà cuàhàn stná iin nècuàchì ñahà, ùxin ùi cuià sàcuàhàn-nè ndohó-né cuèhè nì, te sàni nsihi dihùn xí-né cuàhàn nùù cuàhà nècuàchì nì quidatamna xì-né, doco nì-iin nècuàchimà, cóni níhi-né dándúvâha-ñané.

⁴⁴ Te vichi divi ñahà mà nì quixi ladu yàtà Jesús, nì dàcùhùn-nè ndahà-né nùù icà sicoto xì-ya. Te hora nchito ma nì cucuìn nì-né.

⁴⁵ Dandu ní cachí Jesús:

—¿Ana divi nì dúcùn ndahà-xí yùhù?

—Nì-iin-nsi —cachí nsidaa-né.

Te Pedro xì compañeru-nè, nì cachi-nè xì-yá:

—Yáha ga ndutnúú, Maestro; tnuu ga vâxi-nda mahì nèhivì. ¿Índu chuun ndácàtnùhù-ní ana nì dúcùn ndahà-xí icà sicoto xì-ní?

⁴⁶ Doco nì cachí-yá:

—Inahí ía ana nì quida xí ducán, vâchi nì cundaà inì nì quide iin milagru.

⁴⁷ Dandu nècuàchi ñahà mà, nì cundaà stná ini-nè ñà-sà-ináhá Jesús ñà-nduá nì quida-ne. Ñâyücânduá, vâxi-ne, ndé quidí cuisì-né nì sàcuiin sisi-né nuù-yá. Te itá nsidaa nèhivi yucán, iníni-né, te nì nacani nècuàchimà xi-yá índù ñà-dìsáhà-xí nì dácacùhun-ne ndahà-né ìcà-yá, te nì nduvàha-ne vichi duha.

⁴⁸ Dandu nì cachi-yà xi-né:

—Hija, sàni nduvàha-ní ñà-nì xinindisa-ní. Vâtùni nuhù-ní vichi, te contenu nì coo-ní.

⁴⁹ Na meru cachí-yà ducan, dandu nì quesaa iin tiàa nì quixi vehe presidente xi veheñuhu ma, te nì càhàn-te xi nècuàchimà, cachí-te:

—Sàni xihì dèheyoco-ní. Có-xiñùhù cuàhachuún gà-ní Maestru.

⁵⁰ Doco nì tiacu Jesús ñà-nduá nì cachi-te, ñâyücânduá nì cachi-yà xi nècuàchi dândacù-mà:

—Màsà yúhí-ní. Cuisì cunihnu vâha inì-ní, te càcu-ñà.

⁵¹ Daaní, (nì sàà-yà xi-né), te nì quihvi-ya xi-né ini vehe. Doco cóni sáha-ya quihvi inga nèhivi (ndé indúhu nsii ma), cuisì Pedro xi Jacobo xi Juan xi stná yuadíhí-ñà.

⁵² Vâchi ndoó cuàhà nèhivi, te sacú ndee-né, cána-ne ñà-sàni xihì-ñà. Dandu nì cachi-yà xi-né:

—Màsà cuácú-nsiá, vâchi cóni xihì-ñà; quidí uun ni-ñà.

⁵³ Dandu nècuàchimà, nì sàcundiaa-nèyà, vâchi ináhà-nè ñà-sàni xihì-ñà nduá.

⁵⁴ Doco mii-yá, nì cachi-yà nì cáquéé nsihi-ne fuera. Dandu nì tnii-yà ndahà-ñà, te nì càhàn fuerte-yà, cachí-yà:

—¡Ndacuiin xá!

⁵⁵ Daaní, nì nsiaa tu espíritu xi-ñà, te yâchi nì ndacuiin-ñà. Te nì dândacú-yá daquixí-né ñà-cutiacù-ñà.

⁵⁶ Te yuadíhí-ñà, yáha ga nì ndulocó-nè. Dandu nì cachi-yà xi-né ñà-màsà nácáni-né xi ni-iin nèhivi.

9

Nansa nì techuún Jesús ùxin ùi nèhivi dacuahá-yá ñà-dacútià-nè palabra ìi

¹ Daaní, nì cana Jesús ùxin ùi nècuàchi dacuahá-yá, te nì sàhatahvi-yánè ñà-vâtùni tavà-né nsidanuu clase ñà-malu ñuhù ini nèhivi, te vâtùni dandúvâha stná-nè nèhivi cuhí.

² Te nì sàcunaha-né ñà-cùhùn-nè cachitnùhu-ne xi nèhivi palabra sàhà ñuhiví ìi xí Dios, te dandúvâha stná-nè nècuàchi cuhí.

³ Dohó nì cachi-yà xi-né:

—Ni-íñàhà màsà cúnihí-nsiá cùhùn, ni bastón, ni morral, ni dìtà, ni dñhùn, ni inga dñhùn-nsiá ñà-nadama-nsia màsà cúnihí-nsiá cùhùn.

⁴ Te nú nì sàà-nsiá iin vehe ndé cundoo-nsia, iin-ni cundoo-nsia yucán dècuèndè cachi sàà quivì quee-nsia ñuu mà.

⁵ Doco nú có-cuní nèhivi dayáha-ne mii-nsiá, dandu quee-nsia yucán, te nacatù-nsiá sàhà-nsiá còyo yacá ñuu mà, cunduumà seña cóni quidá víi nècuàchimà (xi-nsiá) —nì cachi-yà.

⁶ Daaní, nècuàchi dacuahá-yámà, nì caquihin-ne ichi cuàhàn-nè, nì nacàhin-ne cuàhà ñuu cuati nì càhàn-nè xi nèhivi nansa ía razón vâha xi Dios, te nì dandúvâha stná-nè nècuàchi cuhí nsidanicuú lugar.

Nansa nì nacani cuàhà ini rey Herodes

⁷ Daaní, rey Herodes, nì xinitnùhu-tè ñà-cuàhà guá milagru quidá-yá, te nì ndulocó-te, vâchi cachí dava nèhivi ñà-sàni natiacu Juan (Bautista) nduájàn.

⁸ Doco dava ga-nè, nì cachi-nè divi Elías sàni ndecunu, te ò iin nècuàchi yuhù núú Dios sàni natiacu.

⁹ Doco Herodes, (nì ndulocó-te), te nì cachi-te:

—Yùhù nì sàhi orden tãhndè òni Juan (Bautista). Doco inga nècuàchi càhàn guá nèhivi sàhà-ximà, ¿ana divi nduú-né, te cuàhà guá ñà-quidà stná-nè? —nì cachi-te. Ñâyücânduá cuní-te cundehè-té Jesús.

Nansa nì dácútiácú Jesús cuàhà mil nèhivi

¹⁰ Daaní, sàmàndixi nsidaa nècuàchi dacuahá-yá nì cansiaa-nè, te nì nacani-ne xi-yá nsidaa ñà-nduá nì quida-ne ndé nì sàhàn-nè. Dandu nì nacuaa-ya nsidaa-né cuàhàn cuaán-yá xi-né iin xaan yatni ñuu Betsaida ndé còò nèhivi.

¹¹ Doco cuàhà nèhivi nì tenchicùn xi-yá, vâchi nì xinitnùhu-ne cuàhàn-yà. Ñâyücânduá, nì casáhú-yá xi-né, te nì càhàn-yá xi-né sàhà ichi dandacú Yua-nda Dios. Te nì dandúvâha stná-yá nècuàchi cuhí xi-ne.

¹² Dandu ni cuaà quìvi yucán. Te ùxin ùi nècuàchi dacuahá-yá, ni tnátuu-ne nùu-yá, cachí-nè xì-yá:

—Ndaqúndèè-ní xì nèhivì, dandu cùhùn-nè ñuu cuati, te ò ranchu yatni, te ñihì-né ndé cuxi-ne, te cùdù-nè, vâchi yohó ndé ndoo-nda, còò vehe.

¹³ Doco ni cachí-yá xì-né:

—Mii-nsiá dacuxí-nsiánè.

Te ni cachí-nè:

—Cuisi ùhùn pan ñihì-nsí, xì ùi siaca. ¿A cuní-ní cùhùn-nsi cuiin-nsi ñà-cuxi nsidaa nècuàchi yohó? —ni cachí-nè.

¹⁴ Vâchi nècuàchi tiàa ndoó yucán, ùhùn mìl nduú nsidaa-né.

Dandu ni cachí-yá xì nècuàchi dacuahá-yá:

—Cachí-nsiá xì nèhivì ñà-ní màcúndoo-ne ñuhù, iin iin grupu-nè ùi dico ùxin, ùi dico ùxin ni cùndúú-né.

¹⁵ Ñâyùcándúá, ducán ni caquida nècuàchi dacuahá-yá, ni càhàn-nè xì nèhivì, te ni sàcùndoo nsihi-ne.

¹⁶ Dandu ni tnii-ya ùhùn pan mà xì ùi siaca ma, te ni ndacoto ndiáa-yá diquì-xí, ni naquimani-yá Dios sàhámà. Dandu ni dàcuàchí-yáña, te ni sàha-ya nècuàchi dacuahá-yá, te ni dasàn-néa nùu nèhivì.

¹⁷ Te nsidaa-né, ni xixi-ne ni ndenuu ini-nè. Dandu ni chivàha-ne ñà-ní cuyodò, te ni chitu ùxin ùi icà pedazu pan mà.

Nansa ni cachi Pedro ñà-xiníndísá-né ñà-divi Cristu dacácu xi-nda nduú Jesús

¹⁸ Daaní, ni ia iin xichi ni quecuaán-yá xì nècuàchi dacuahá-yá, te ni xicàn tàhvi-yá nùu Dios. Dandu después ni ndàcàtnùhù-yá nùu nècuàchimà, cachí-yá:

—¿Ana nduú yùhù, cachí nèhivì?

¹⁹ Te ni cachí-nè xì-yá:

—Dava-ne cachí-nè ñà-Juan Bautista nduu-ní. Te dava-ne cachí-nè Elías nduu-ní. Te dava ga-nè cachí-nè iin nècuàchi profeta sàhana nduu-ní, te sàni natiacù-ní vichi cahan-né.

²⁰ Dandu ni cachí-yá xì-né:

—Doco mii-nsiá, ¿ana nduí, cachí-nsiá?

Dandu ni cachi Pedro xì-yá:

—Divi Cristu ni quixi nùu Dios nduu-ní.

²¹ Dandu ni dàndacú-yá nùu-né ñà-màsà nácání-né xì nèhivì nduú-yá Cristu.

Nansa ni cachtinùhu Jesús icúmí-yá cui-yá

²² Dandu ni cachi stná-yá xì-né:

—Yùhù ana nduú Tnaha Nèhivì Ñuhivì, cuàhà gá icúmí ndohi. Vâchi tè-sàhnú xídandacú, xì stná dùtù xícusahnú, xì stná nècuàchi ley xì veheñùhu, nsidaa-né icúmí-nè cahíchi ini-nè yùhù, dandu cacahnì nèhivì yùhù. Doco tìxi ùni quìvi icúmí natiacù.

²³ Te ni cachi stná-yá xì nsidaa-né:

—Nsidaa ana cuní cunchicùn xí, xíñuhu naco-ne ñà-ndúá cuní ini-ni mii-né quida-ne, te nsiquìvi quida-ne cuenta na ian nsidá stná-nè cruz xi-ne cutnàhà-né xí (ñà-cui stná-nè).

²⁴ Vâchi nsidaa ana cuní dacácu xi vida xi vichi, ñà-dàndáñùhù-nè mii-né nduá. Doco nú ni cui-nè sàhí, dandu ñà-sàni càcu ndisa vida xi-ne cundua.

²⁵ Vâchi nú ni ñihì iin nèhivì nsidaa ñà-ía ñuhivì, ni ñà-jaàn, mà cùndúá iin bien xi-ne nú màsà sàá anima-nè cundiatú stná, te càcua.

²⁶ Iin nèhivì, nú cucáhán nùu-né coo-ne ladu xi, o nú cucáhán nùu-né cunini-ne palabra xi, (ndahví-nè), vâchi icúmí stná nacuai mii-né quìvi naxicocuñ yùhù ana nduú Tnaha Nèhivì Ñuhivì. Te ndiaha gá coo quìvi mà sàhà yùhù, xì sàhà Yuamáni, xì sàhà àngel ì cacutnahá xí quixi.

²⁷ Doco ñà-ndáá nduá cachí xì-nsiá, dava mii-nsiá nècuàchl itá yohó, tàñáha ga cui-nsiá, te cuni-nsiá nansa íá ñuhivì ì xí Dios —ni cachí-yá.

Nansa ni nadama Jesús mii-yá ni natnuù nihni ndiaha-yá

²⁸ Daaní, ni nsihi ni cachí-yá ducán, dandu ni yàha nahí ùnà gá quìvi, te ni saca-ya Pedro xì Juan, xì Jacobo, cuàhàn-yá xì-né iin yucù ndé cuàhàn-yá càhàn-yá xì Dios.

²⁹ (Daaní, na íá-yá yucán) xicàn tàhvi-yá nùu Dios, dandu ní xini nècuàchimà tucu ni nàcùnahà-yá. Ni nducuxín yaa sicoto xi-ya, te tnúù nihni ndiaha-ñá.

³⁰⁻³¹ Dandu ni xini stná-nè, yucán ni canatù stná ùi nècuàchi (sàhana) iin-ne nani Moisés, te inga-nè nani Elías. Te itá stná ndómà ndatnúhù-ndá xí-yá. Te tnúù nihni stná-ndá, càhàn-ndá xì-yá sàhà nansa icúmí-yá cui-yá ñuu Jerusalén.

³² Te Pedro xì compañeru-nè, sádi gá vahná-nè. Doco na ní nsiacuñnú vii ini-nè, dandu ni caxini-nè ndiaha gá tnúù nihni-ya, te mímí ni caxini-nè itá stná ùi ndósàhnù-mà.

³³ Daaní, na meru cuàhàn cuxica-nda, dandu ní cachi Pedro xì-yá:

—Maestro, nansicáhàn-ndá ndoo-nda yohó! Chicá vaha quidavaha-nsi ùni siahva, ian coo mii-ní, inga stná coo Moisés yohó, te ingá coo stná Elías yohó.

Ducán nì cachi Pedro, vàchi cóni cùndáà ini-nè nansa cachí-nè.

³⁴ Daaní, sà-càhàn-nè xì-yá ducán, dandu nì nuu iin vìcò, te nì dàhvi nsidaa-né mahiá. Te nì cayúhi cuaá-nè na ní xini-nè nì cuu ducán.

³⁵ Dandu nì tiacu-nè càhàn iin ana càhàn mahi vìcò mà, te dohó cachí-yà:

—Dèhemaní nduu ana yohó. Cunini-nsia ñà-ndúá cachí-yà.

³⁶ Daaní, nì ndacoto nècuàchi dacuahá-yámà, te nì xini-nè ndé cuisì mindaa mii-yá iá yucán. Doco después cóò nì-ñàha nì cachí-nè xì nì-iin nèhivi sàhà nsidaa ñà-ndúá nì xini-nè yucán.

Nansa nì tavà Jesús iin ñà-malu ináccá nùu iin tèchii

³⁷ Daaní, inga quívi nì nuu-ya xì-né yucù mà vaxi-ya. Dandu nì ndacùhun stnahá-yá xì cuàhà nèhivi sàni nataca.

³⁸ Te iin nècuàchimà nì càhàn-nè xì-yá, sacúndáhvì fuerte-nè nùu-yá, cachí-nè:

—Maestro, sacúndáhvì nùu-ní, cundehe ndahví-ní tèchii xí, vàchi mindaa-té nduu dèhi.

³⁹ Cunaha-ní, iin ñà-malu dandoho-xì-té, dandáhià-te, te xihì ihí-te quidá, queé chihíñu yuhù-té: quini ga quidá xì-té, có-cunià nacoà-te.

⁴⁰ Ñàyùcàndúá nì sacundáhvì nùu nècuàchi dacuahá-ní ñà-tavà-néà, doco mànicùí.

⁴¹ Dandu nì cachi Jesús xì-né:

—Ndahví-nsià, vàchi mà túha-nsia cunindisá-nsià, nì có-sàà-nsià cundaa ini-nsia. ¿Nadaa ga quívi icúmí coo guè xì-nsià, te quidandee gá stná inì sàhà-nsià? Pues cundaca-ní dèhe-ní quixi —nì cachí-yà.

⁴² Daaní, sàvaxi-ne xì-té, te nì ducùn ñà-malu-te ñuhù ní sahni ihá-te. Ñàyùcàndúá, nì sadi-yá nùá, te nì dàndúvaha-yàte. Dandu nì quida-yàte entregar nùu yua-té.

⁴³ Te nsidaa nèhivi ndoo yucán, nì ndulocó cuàhà-nè ñà-ndiaha guá nì quida Dios.

Daaní, na ndulócó guá-nè sàhà nsidaa obra nì quida-ya, dandu nì cachí-yà xì nècuàchi dacuahá-yá:

⁴⁴ —Cunini vaha-nsia palabra cuàhàn cachi xì-nsià. Yuhù ana nduu Tnaha Nèhivi Ñuhívi, icúmí yahi coi ndahà nèhivi (malu), vàchi iá iin tiàa cuàhàn quida xí entregar —nì cachí-yà.

⁴⁵ Doco nècuàchimà, cóni cùndáà ini-nè ñà-ndúá nì cachí-yà, vàchi nì la dèhe chuun ma nùu-né; ñàyùcàndúá, cóni sánihì ini-nè. Te yúhì stná-nè ndacàtnùhù-né nùu-yá sàhámà.

Nansa nì cachi Jesús ana chicá ndiaá

⁴⁶ Daaní, nì quesaha-né nì cuàà-nè ndacàtnùhù stnahá-né nùu-né ana chicá ndiaá.

⁴⁷ Dandu nì cundaa ini-yá nansa xínacani ini-nè, te ñàyùcàndúá nì nacuaca-ya iin tètii nì chicani-yàte iladú-yà,

⁴⁸ te nì cachí-yà xì nècuàchimà:

—Nú sàhà yuhù quidáñuhù iin nèhivi tètii yohó, dandu dava-ni queá na ian yuhù quidáñuhù-nè. Te nú yuhù quidáñuhù-nè, dandu iin-ni queá ñà-quidáñuhù stná-nè ana nì techuun-xì vaxi. Vàchi nècuàchi chicá nihnù ndáhvì ini-xì, divi nduu ana chicá ndiaá ndisa.

Nècuàchi có-xinì ùhì xì-ndà, favor xi-nda iá-nè

⁴⁹ Dandu nì cachi Juan xì-yá:

—Maestro, nì xini-nsi iin tiàa tavá xì ñà-malu nùu nèhivi, te quívi mii-ní ndacùcahan-né. Doco có-ndúu-né iin ana cutnáhà xì-ndá xicánúú. Ñàyùcàndúá, nì sadi-nsi nùu-né ñà-màsà quidá gá-nè ducán.

⁵⁰ Dandu nì cachi Jesús xì-né:

—Cóó, màsà cádí-nsià nùu-né, vàchi nsidaa ana có-xinì ùhì xì-ndà, favor xi-nda iá-nè.

Nansa nì cachi Jesús na ní cuni Jacobo xì Juan càcàn-nè quixi castigu nùu ana cóni quidáñuhù xì-yà

⁵¹ Daaní, na sà-ítúú tiempu nana-ya ansivi nùhù-yà, dandu nì quihin-ya ichi cuàhàn-yà ñuu Jerusalén, iin-ni nihnù ini-yá sàà-yá yucán.

⁵² Te nì techuún-yá itnii tiàa codònuu nùu-yá ñà-cachitnùhu-ne icúmí-yà yàha-ya ichi yucán. Ñàyùcàndúá, nì casaà tiàa ma iin ñuu tii nècuàchi raza samaritanu, cuàhàn-nè nanducu-né ndé coo-ya nì cùí.

⁵³ Doco nècuàchi ñuu mà, nì loho cóni cándisá-né coo chii-yá ñuu-nè, vàchi sàni xinitnùhu-ne ñà-ichi Jerusalén nduá cuàhàn-yà.

⁵⁴ Ñàyùcàndúá, ùi nècuàchi dacuahá-yá nani Jacobo xì Juan, na ní tiacu-nè ñà-dúcán nì cachi nècuàchi ñuu mà, dandu nì cachí-nè xì-yá:

—Stoho-nsi Señor, ¿a có-cùni-ní dandacú-nsí còyo ñuhu ansivi, te coco nsihi nêhivi ñuu yohó, vâchi ducán ni quida stná Elías sâhana?

⁵⁵ Doco ni dà-ihí Jesús nècuàchìrà, cachí-yà:

—Mii-nsiá, có-cùndáá inì-nsia nansa ndiá icà-nsiá cunihnu vâha inì-nsia.

⁵⁶ Vâchi yùhù ana nduú Tnaha Nêhivi Ñuhiví, ¿índù divi chuun ni quesai ñuhiví yohó? Pues divi sâhá ñâ-dacái nêhivi, te màdiá dandáñuhí-nè —ni cachí-yà.

Dandu cuàhàn-yà xì-né inga ñuu chicá nuù-xí.

Ñâ-nduá ni cachí Jesús xì nêhivi cuní cunchicùn xì-yá

⁵⁷ Daaní, na xicá-yà xì-né ichí, ni càhàn iin tiàa xì-yá, cachí-nè:

—Yùhù, dispuestu ié` cunchicuìn mii-ní ndéni ni cui ni cùhùn-ní, Señor mío.

⁵⁸ Dandu ni cachí Jesús xì-né:

—Lusu, iá nchihò-sí, te laa ndavá ansivi, iá stná tacà-si; doco yùhù ana nduú Tnaha Nêhivi Ñuhiví, còò ni-iin lugar ndé cunduhí cùdi.

⁵⁹ Daaní, ni cachí-yà xì inga nêhivi:

—Cunchicùn-ní yùhù.

Te ni cachí nècuàchìrà:

—Señor mío, dihna ni núhi ñâ-coo chii gué` vehi dècuèndè (ni cui) yué, te ni ndùxin-ne.

⁶⁰ Dandu ni cachí Jesús xì-né:

—Nècuàchì có-íá vida anima-xi, divi ni cúxin xi nsii-xi. Doco mii-ní, cuahán-ní cacitnúhu-ní razón sâhá ñuhiví ìi xí Dios.

⁶¹ Dandu inga nêhivi, ni cachí-nè xì-yà:

—Yùhù, cunchicuìn mii-ní, Señor mío. Doco dihna ni núhi (coo chí) ndaquindei xì nêhivi vehi.

⁶² Dandu ni cachí Jesús xì-né:

—Iin nêhivi sâ-itní-xí yàtà, nú cui yàtà-né indéhe-né, dandu mà quée víamà. Te ducán iá stná xí iin nêhivi (mà iin-ni nihnú ini xì yùhù), mà cù sâá-nè cunduu-ne nêhivi xí ñuhiví ìi xí Dios.

10

Nansa ni techuún Stoho-ndá Señor 70 nêhivi xì-yá ñâ-cùhùn-nè càhàn-nè palabra xi-ya

¹ Daaní, na ní nsihi ni cuu ducán, dandu ni nacàxin Stoho-ndá Señor ùni dico ùxin (70) tiàa, te ni techuún-yànè cùhùn-nè ùi ùi-nè codònuù-né nuù-yá nacàhin-ne nsidaa ñuu xì nsidaa xaan ndé icúmí-yá yâha stná-yâ.

² Ñâyücànduá, ni cachí-yà xì-né:

—Ñâ-ndáá nduá, cuàhà nêhivi (tàñâha ga cunindisá). Te na iin cosecha cahnú ndanihi-nda nduú-né, doco sacu nêhivi nduú ana (chindéé xí-ndá) ndanchitoa. Ñâyücànduá, càcàn tàhvi-nsiá nuù Lamú dandacú sâhá chuun yohó ñâ-ní téchúun gá-yà nêhivi cùhùn quida xi chuun (ìi xì-yá), vâchi na ian ndanchitò iin cosecha ndiaha nduá.

³ Vâtùni cùhùn-nsiá vichí. Yùhù techuún mii-nsiá cùhùn-nsiá cacanuú-nsiá mahi nêhivi dâná, cunduu-nsiá nahi lelù xicánúu mahi lobu.

⁴ Doco màsà cúnihí-nsiá ni-iin itni cuñuhu dihùn, ni stná morral xi-nsia, ni inga ndisàn-nsiá. Te ni-iin nêhivi màsà cásâhú xì-nsiá ichí.

⁵ Te nú sâni sâá-nsiá iin vehe ndé cundoo-nsia, dandu cachí-nsiá xì stoho vehe ma: “Ni cundóó máni mii-nsiá nêhivi vehe yohó”.

⁶ Dandu nú ndisa ndoó nêhivi tûha cundoo ndiaha vehe ma, dandu vâtùni. Doco nú cóó, ni cúnâhá ñâ-nduá ni cachí-nsiá.

⁷ Cuisi iin-ni vehe cundoo-nsia, te cuxi-nsia te coho-nsia ñâ-nduá sâha nècuàchì divéhé-xímá mii-nsiá. Vâchi nsidaa ana quidáchúun, xiñuhu cuàha xì-né iin algu. Màdi vehe yohó vehe yucán cundoo-nsia, còó; iin-ni ni cundóó-nsiá cuisì iin-ni vehe.

⁸ Te nú ni sâá-nsiá iin ñuu, te candísá nêhivi cundoo-nsia yucán, dandu ñâ-nduá sâha-nensiá, divi ñâ-jaàn nduá cuxi-nsia.

⁹ Te dandúvâha stná-nsiá nècuàchì cuhí ndoó yucán, te dohó cachí-nsiá xì nêhivi yucán: “Vichí sâni quesaa razón sâhá ñuhiví ìi xí Dios ndé ndoó-nsiá”, cachí-nsiá.

¹⁰ Doco nú ni sâá-nsia iin ñuu, te có-xiníndísá nêhivi yucán mii-nsiá, dandu màcuíta-nsia mahi ichí cahnú ñuu mà, te cachí-nsia xì-né:

¹¹ “Dècuèndè yácá ñuu-nsiá ni tñi sâhá-nsí, icúmí-nsí catù vâha-nsiñâ còya, (vâchi ndahví gâ modo xi-nsia). Doco cunaha váha-nsia, yohó ndé ndoó-nsiá sâni quesaa stná razón sâhá ñuhiví ìi xí Dios (mate cóni ndúlócò-nsiá)”. Ducán cachí-nsiá (xì nêhivi ñuu mà).

¹² Te yùhù cachí xì-nsiá na sâá quiví juiciu, dandu chicá cuàhà castigu icúmí nêhivi ñuu mà nihí-né nuù nêhivi (malu) ñuu Sodoma.

¹³ ¡Ndahví nêhiví ñuu Corazín! ¡Ndahví stná nècuàchì ñuu Betsaida! Vàchi cuàhà milagru fuerte nì xini-nè, (te cóni ndúlocò-nè). Doco cunaha-nsiá, nú ducani nì coó stná milagru mà ñuu Tiro, ò ñuu Sidón nì cui, dandísá, yàchì naxicocuñin ini nècuàchì ñuu mà sàhà cuàchi-ne, te nàcùndixi ndahví-nè nàcùndoo-ne mahì yàà tutnù, (te cunduumà seña ñà-ndisa culhì ini-nè mii-nè sàhà cuàchi-ne).

¹⁴ Te quivì cuu juiciu, chicá iyuhu castigu icúmí nihì nêhiví ñuu Tiro mà, xì nêhiví ñuu Sidón mà, te chicá fuerte coo castigu xi ñuu Corazín xì ñuu Betsaida mà.

¹⁵ Stná nècuàchì ñuu Capernaum, mate tuxí ini-nè nana ducún-nè ndè gloria, doco còò, ndè andea icúmí-nè nuu-ne.

¹⁶ 'Cunaha-nsiá, nú ni quihín casu nêhiví sàhà ñà-nduà cachí mii-nsiá, dandu iin-ni queámà na ian quihín casu stná-nè yùhù. Te nú ni cáhichi ini-nè mii-nsiá, icúmí quee stná mà na ian cahíchi stná ini-nè yùhù. Te nú yùhù ni cáhichi ini-nè, dandu iin-ni quee stná mà na ian sàni cahíchi stná ini-nè mii-yá ana ñichúún-xí vaxi.

Ñà-nduà nì cachì Jesús xì 70 nêhiví nì dàcutià xì palabra xi-ya

¹⁷ Daaní, nì naxicocuñin ùni dico ùxin (70) nècuàchì dacuahá-yá, te cudii ini-nè, cachí-nè xì-yá:

—Cunaha-ní, Stoho-nsi Señor, ñècuèndè stná ñà-malu nì cundee-nsí nùù-xí ñà-nì ndacùcahan-nsí quivì-ní.

¹⁸ Dandu nì cachí-yá xì-né:

—Nì xini stnái ñà-malu cusáhnù, nì quea ndè gloria vaxan, nì nacava na ian nì fasa.

¹⁹ Cunaha-nsiá, vichi sàni ñà-nihitáhvì stnái mii-nsiá ñà-nú ni cuánihni-nsia còò ò siduhma, dandu (còò ni-ñàha cuu xi-nsiá); te vátuni cundee stná-nsiá nùù nsidaa ñà-malu, mate yáha ga xini ùhiandó, te yáha ga nacúndéa, doco còò ni-ñàha cuu xi-nsiá.

²⁰ Xiñuhu cudii ini-nsiá vichi, doco màdi sàhà-ñá vátuni nì cundee-nsiá nùù ñà-malu. Còò, cuisi xiñuhu cudii ini-nsia sàhà ñà-sàni sàcùitandiaa quivì-nsiá nùù (tutu iá) ansivi.

Ñà-nduà ñà-sàhà-xì nì cudii ini Jesús na ní nsiaa nècuàchì dacuahá-yá

²¹ Divi hora yucán nì cudii ini Jesús nì quida Espíritu Ì xì Dios, te nì cachí-yá (xì Yuamáni-yá):

—Ndenihí vahi mii-ní, Yuamáni' Dios; vachi mii-ní nduu-ní Stoho ansivi xì ñuhiví. (Te palabra Ì xì-ní), sàni chitnùni ini-ní ndòò ñèhá' nùù nècuàchì nchichí; doco nùù nècuàchì nihnú ndahvi ini-xi nahi ñà-cuati, sàni ñà-núù-ní sàxinítùnì-nè. Ducán iá, vachi ñà-jaàn nduá nì chitnùni ini-ní quida-ní, te nì cudii ini-ní coo ducán —nì cachí-yá xì Yuamáni-yá.

²² Dandu nì cachí stná-yá:

—Nùù Yuamáni' sàni nihitáhvì dandacuú nùù nsidanicuú ñàha; te còò ni-iin nêhiví ináhà ana nduú yùhù, cuisi mii-yá; te cuisi yùhù ináhà stnái mii-yá, cuisi yùhù xì stná nêhiví cuní cundaà ini-xi sàhà-yá —nì cachí-yá.

²³ Dandu nì nacucio-yá nùù nècuàchì dacuahá-yá, te nì cachí-yá xì-né:

—Nansicáhán mii-nsiá, vachi ndiaha gá iá ñà-nduá sàni xininùù-nsiá.

²⁴ Cunaha-nsiá, cuàhà profeta sàhana, xì cuàhà stná rey, nisa cuni-nè cundehè-nè ñà-nduá sàni xini mii-nsiá, doco cóni nihitáhvì-nè cuni-nè. Te nisa cuni stná-nè cunini-ne ñà-nduá sàni inini mii-nsiá, doco cóni sàa-nè nihitáhvì-nè cunini-ne.

Nècuàchì samaritanu vaha ini-xi

²⁵ Daaní, nì ndacuiin iin nècuàchì ley xi veheñuhu, cuní-nè cundaà ini-nè nansa naxicónihí Jesús nùù-nè. Te dohó nì cachí-nè xì-yá:

—Maestro, ¿ndiá nduá quide, te nihitáhvì vida ndiaha nicanicuahàn?

²⁶ Dandu nì cachí-yá xì-né:

—¿Nansa cachí tutu nduú ley xi Dios? Sàni cahvi-ñá. Pues ¿nansa cachá'?

²⁷ Dandu nì cachí nècùachimà:

—Dohó cachá': "Icúmí-ndá cuu ini-ndà sàhà Stoho-ndà Dios xì nsidanicuú anima-ndà, xì nsidanicuú ini-ndà, xì nsidanicuú valor xi-nda, xì nsidanicuú stná sàxinítùnì-ndà. Te nacua cuú ini-ndà sàhà mii-nda, ducán icúmí stná-ndà cuu ini-ndà sàhà ñànitnaha-nda".

²⁸ Dandu nì cachí Jesús xì-né:

—Cachí vaha-ní. Ducán quida-ní, dandu nihì-ní vida ndiaha nicanicuahàn.

²⁹ Doco nècùachimà, có-cuní-nè cachí nêhiví xi-né tonto iá-nè, ñàyùcànduá, nì cachí-nè xì-yá:

—Doco ¿índù clase nêhiví cachí xi-ndà nduú ñànitnaha-nda?

³⁰ Dandu nì cachí-yá xì-né:

—(Cunini-ní historia.) Nisa Ìa iin tiàa ñuu Jerusalén, te nì quee-ne cuàhàn-nè inga ñuu nani Jericó. Doco (ichì mà) nì ndacùhun tnahá-né xì itnii tēcùhna. Te nì sadi-te nùù-nè, nì xidacùhna-té nsidaa sicoto xi-ne, nì sahnì cuií-tené, grave nì ñàncùehè-tené, te cuàhàn-te.

³¹ Daaní, ni cuu ni yaha iin dùtù ichi mà. Te ni xini-nè indúhu nècuàchi ni nacuehè mà, doco iladú ni yaha-ne.

³² Daaní, yucán ni yaha stná iin tiàa levita (quidáchúun veheñùhu), te ni xini stná-nè nècuàchimà. Te divini iladú ni yaha stná-nè.

³³ Daaní, ichi yucán ni yaha stná iin nècuàchi ñuu Samaria, te na ní sàa-nè ndé indúhu nècuàchimà, ni xini-nè nècuàchimà, te ni cuhi ini-ñané.

³⁴ Ni tnàtuu-ne ni quidatatna-né ndé ni nacuehè xi nècuàchimà, ni dàquée-ne aceite xi vinu, te ni chidúcùn-nèa. Dandu ni chindànùú-ñané quisi ndacá-né. te cuàhàn-nè xi nècuàchimà dècuèndè iin vehe ndé quetátú nècuàchi xicá ichi caní. Yucán ni ìa-ne ni sandiaa-nè nècuàchimà.

³⁵ Dandu inga quivi na ní quihin-ne ichi cuàhàn-nè, ni tavà-né ùi dihùn, ni sàha-ne nècuàchi divéhé-ximá, cachí-nè: “Cundiaa sacù-ní nècuàchi ndahví yohó, te nú chicá cuàhà cuàhàn-ní quida-ní gastu, dandu icúmí danáí na náyáhi”, ni cachi-nè.

³⁶ Pues, vichi cachi-ní xí: nùu nsi-úni tiàa (ni yaha yucán), ÿindú nècuàchi meru ni sanduu ndisa ñanitnaha nècuàchi ni ndacùhun tnahá xi tècuìhnà mà cahan-ní? —ni cachi Jesús.

³⁷ Dandu ni cachi nècuàchi ley xi veheñùhu ma:

—Pues, divi tiàa ni indehè ndahví xi nècuàchimà.

Dandu ni cachi-yà xi-né:

—Pues, cuahán-ní, te divi ducán quida stná mii-ní.

Nansa ni cachi Jesús xi ùi cùhi nani Marta xi María

³⁸ Daaní, ni yaha-ya xi compañeru-ya ndé chicá nùu-xí ndé iá iin ñuu tii. Te yucán iá iin nècuàchi ñahà nani Marta, te divi-ne ni quida xi-yà invitar ña-coo-ya vehe.

³⁹ Te yucán iá stná iin cùhi nècuàchimà nani María. Te María mà, cudí ini-nè coo-ne ñuhù nùu Jesús cunini-ne ñà-ndúá cachí-yà.

⁴⁰ Doco Marta, cuàhà gá chuun yuhùnùhú icúmí-nè, te ndé cutóntó-nè sàhà chuun ma. Ñàyúcàndúá, vaxi-ne ndé iá-yà, cachí-nè xi-yà:

—Señor mío, ¿a có-dándohá mii-ní ñà-sàni nacoo cùhi yuhù quidachuún mindá. Cachí-ní xi-né ñà-ní chindéé stná-nè yuhù.

⁴¹ Doco ni cachi-yà xi-né:

—¡Ndahví-ní, Marta! Cuàhà gá nacání ini-ní. Cuàhà gá chuun sahní-ní mii-ní sàhà-xí.

⁴² Doco cuisí imindaa chuun nduú ñà-íá ndisa necesidad quida-nda. Te divi chuun vaha ma nduá cudí ini María quida-ne vichi, te yuhù, mà cuáhi cuxio chuun vaha ma nùu-né.

11

Nansa quida-nda nú cuní-ndá càcàn tàhvi-ndá nùu Yua-nda Dios

¹ Daaní, ni cuu iin xichi iá-yà iin xaan xicàn tàhvi-yà nùu Dios. Te ni nsihi ní càhàn-yà xi Dios ducán, dandu ni cachi iin nècuàchi dacuahá-yá:

—Señor mío, dacuaa-ní nsiuhù càcàn tàhvi stná-nsi nacua nisa dacuahá Juan (Bautista) ana nchícùn xi mii-né.

² Dandu ni cachi-yà xi-né:

—Na xicàn tàhvi-nsiá nùu Dios, dohó cachí-nsia:

Yua-nsí Dios iá ansivi, ni ndacùcahan tnùñuhu nèhivi quivi-ní; te yàchi ni sàa stná tiempu cusahnu-ní ñuhivi yohó, xicàn tàhvi-nsí. Te nacua quidá ana ndoó ansivi ñà-ndúá dandacu-ní, divi ducán ni quidá stná nèhivi ñuhivi yohó.

³ Pan xi-nsi iin quivi, iin quivi taxi tahvi-niá nùu-nsí.

⁴ Te cuicahnú ini-ní sàhà cuàchi inihicá-nsí, vachi nsiuhù, xicáhnú stná ini-nsi sàhà nsidaa ana inihicá nùu-nsí. Te chindee-ní nsiuhù ñà-màsá dáca nèhivi nsiuhù, te dacácu stná-ní nsiuhù nùu ñà-malu nicanicuahàn. (Amén.)

⁵ Te ni cachi stná-yà xi-né:

—Ni cachí-ndá nú iá iin amigo xi-nda, te dava ñuu sàa-ndá vehe-ne, te cachí-ndá xi-né: “Amigo, taxi ica-ní ùni pan nùu,

⁶ vachi sàni quesaa iin amigo xi vehi, ichi caní ni quixi-ne. Te còò ni-ìñàha cuàhi-nè cuxi-ne”.

⁷ Dandu amigo xi-nda ini vehe ma, vihini tiacu-nè, te cachi-nè xi-ndá: “Còò, màsá dáñáná-ní yuhù, vachi ndiadi vaha yehi, te itánduhù-nsí xi dèhe-nsi. Mà cùu ndácòu cuàhi mii-ní ñà-ndúá xicán-ní”, cachí-nè vihini.

⁸ Cunaha-nsiá, mate amigo xi-nda nduú-né, doco ni sàhà ñà-jaàn mà cándísá-né ndacòo-ne cuàha-nèndó ñà-ndúá xiñuhu-nda. Còò, doco sàhà-ñá ni cunaha iin-nda càhàn-ndá yehè-né, ñàyúcàndúá icúmí-né ndacòo-ne cuàha-nèndó ìñàha.

⁹ Te yuhù cachí stnáí xi-nsiá, càcàn tàhvi-nsiá, te nihitáhvi-nsiá. Nanducu-nsiá (ñà-vàha nùu-yá), te tùia. Càhàn-nsiá (yehè-yá), te nuna.

¹⁰ Vàchi nsidaa ana xicàn tàhvi, icúmí-nè nihitàhvi ndisa-neà; te nsidaa ana nandúcu xí ñà-vàha, icúmí tui ndisamà nùu-né; te nsidaa ana xicàn tàhvi nùu yehè-yá, icúmí-yá nacuna-yañà nùu-né.

¹¹ 'Nú ni cacán iin dèhe-nsia iin pan cuxi-tè, amádi pan cuàha-nsiàte, te màdi iin yùu. Te nùu cuñu siaca xicàn-te, màdi iin còò cuàha-nsiàte.

¹² Te ò nú nsvi xicàn-te caxì-té, màdi iin siduhma cuàha-nsiàte. Còò.

¹³ Mii-nsiá, mate nèhivi cuáchi nduú-nsiá, doco tũha-nsia cuàha-nsia dèhe-nsia ñà-íá vii. Ñàyucàndùá Yuamáni-ndà íá ansivi, chicá icúmí-yá cuàhatahvi-yá mii-nsiá Espiritu lì xí-yá nú ni cacán tàhvi-nsiá nùu-yá.

Nansa ni dàquee cuáchi nèhivi dìqui Jesús, có-quidá víi-yá, cachí-nè

¹⁴ Daaní, iin xichi ni cuu ni tavà-yá iin ñà-malu ihin (ní nsida ihin xi) iin nèhivi. Daaní, ni nsihi ni queamà, dandu vátuni ni nacahàn nècuàchìmà. Te ni ndulocó nèhivi cuáhà ndoó yucán.

¹⁵ Doco dava-ne, ni (xitnũhu-ne), cachí-nè:

—Ñà-malu cusáhnũ nani Beelzebú, divi nduú ana chindéé, te ducán tavá Jesús ñà-malu —ni cachi-nè.

¹⁶ Te dava ga stná nèhivi yucán, ni xicàn-nè quida-ya iin milagru xi Dios cundehè-né, a ndísá cui quida-yañà, á cóó, cahan-né.

¹⁷ Doco mii-yá, ináhà-yá ñà-nduá nacání ini-nè. Ñàyucàndùá, ni cachi-yá xi-né:

—Nècuáchi xídandacú nùu iin ñuu, nú ni táhndè dava-ne, te náá stnahá-né, dandu còò gá modo cadandacú gá-nè nùu ñuu mà; te nèhivi ndoó iin vehe, nú xiní ùhi stnahá-né, dandu mà cúí cundoó tàcá gá-nè vehe mà.

¹⁸ Te ñà-malu Satanás, nú ni cuní ùhi-si tnaha-si, dandu mà cúí gá dandacú-si nùu quisi dava ga mà. Ducán cachí, vachi cachí mii-nsiá sàhí ñà-chindéé si-Beelzebú yùhũ, te ducán taví ñà-malu. Doco còò,

¹⁹ vachi stná nèhivi xí mii-nsiá, tũha stná-nè tavà-né ñà-malu, te ¿ana dipódér-xi quidá-néamà? (Amádi poder xi Dios chindéé xí-nè), ñàyucàndùá, vátuni cachí mii-né xi-nsiá ñà-cóni cachí vii-nsiá sàhà yùhũ.

²⁰ Doco Dios nduú ana chindéé xí taví-si, ñàyucàndùá náhà xicá ñà-vichi sàni sàà tiempu cuni-nsia nansa dandacú ndiaha Dios.

²¹ 'Iin tiàa ndacuí, nú nihí-te iin càa dana, te ndiaá-te vehe-tè, dandu còò ni-íñàha cuu xi ñà-icúmí-té.

²² Doco nú ni quésáa iin ndósáhnũ chicá fuerte, te cundee ndómà nùu-té, dandu dandi-achi nsihi-nda arma nihí-te, divi arma tuxí-te cuáhàn chindéé xi-té ni cúí. Daaní, icúmí ndósáhnũmà nihí-nda nsidaa ñà-icúmí-témà, te quida-nda xán nacua cudii ini-nda.

²³ 'Nsidaa ana có-íá favor xi, contra-xi nduú-né; te nsidaa ana có-chindéé xí danátáqui (nèhivi xí), ducán queamà na ian tàxi-né nècuàchìmà.

Nansa cuu xi iin nèhivi nú sàni naxicocuíñ iin ñà-malu ni quee nùu-né antes, doco cóni quíhvi ndisa-ne íchi Dios

²⁴ 'Nú sàni quee ñà-malu nùu ini iin nèhivi, dandu xicánúu-si, yáha-si lugar íchí, nandúcu-sí ndé coo dadí-si; te nú ni cundáa ini-si mà cùi, dandu cachí-si: "Còò, chicá vaha nùhi ini nèhivi ndé nisa le antes, vachi vehi nduá".

²⁵ Ñàyucàndùá, mànuhũ-sí anima nèhivi mà, te quidá-si cuenta na ian sàni ndundoa, te ni nducutá.

²⁶ Ñàyucàndùá, cuáhàn-si nácuaça-si inga ùsà tnaha-si chicá tũha quini, te caquíhvi nsihi-si ini anima nècuàchìmà ñà-cuñuhu-si yucán. Sáhàjàn chicá pesadu nácòò tiàa ma nùu antes.

Nansa nihí-ndà cucumi-nda iin anima ndiaha

²⁷ Na cáhàn-yá ñà-jaàn xi nèhivi cuáhà mà, dandu ni cachí iin nècuàchi ñahà xi-yá:

—Nansicáhàn nècuàchi ní dātũinuũ xi-ní ñuhiví, te ni dàchìchì-né mii-ní.

²⁸ Dandu ni cachi-yá xi-né:

—Jaan. Doco chicá vaha cachi-nda nansicáhàn nèhivi iníní xí Palabra ù xí Dios, te quidá ndisa-neà cumplir.

Nansa ni cachi Jesús na ní xicàn nèhivi quida-ya iin milagru cundehè-né

²⁹ Daaní, chicá ni nachitu nèhivi cuáhà nùu-yá. Te ni cáhàn-yá xi-né, cachí-yá:

—Nèhivi tiempu vichi, malu-nè. Xicàn-nè coo iin milagru cundehè-né, a ndísá icúmí poder cahan-né. Doco mà nihí-né cundehè-né inga milagru, cuiisí ñà-nduá (ni xiní nèhivi sàna) na ní cuu iin milagru xi Jonás, iin nècuàchi nisa cáhàn cuenta xi Dios.

³⁰ Vachi milagru xi Jonás mà, ñà-yúcán ni sanduu iin seña nùu nèhivi ñuu Nínive. Doco divi ducán icúmí cuu xi stná yùhũ ana nduú Tnaha Nèhivi Ñuhiví, icúmí cuu stná iin milagru xí, te cunduu stná mà iin seña nùu nèhivi tiempu vichi.

³¹ Na quivi cuu juicio, te màcuita nsidaa nèhivi tiempu vichi (nùu Dios), dandu yucán icúmí nàcuiln stná iin nècuàchi ñàhà nì sanduu reina dandacú nùu ladu sur sàhana. Te daquéé cuàchi-ne dìquì nèhivi tiempu vichi, vàchi dècuèndè iin ñuu chicá xica nì quixi-ne ñà-cunini-ne càhàn nchichí guá rey Salomón. Doco cunaha-nsiá, vichi sàni quesaa inga ana chicá nchichí nùu Salomón mà, doco (cò-ndùlócò nèhivi).

³² Te quivi coo juicio mà, yucán màcuita stná nèhivi tiempu sàhana nani Nínive, te daquéé cuàchi stná-nè dìquì nèhivi tiempu vichi, vàchi nèhivi yucán, nì naxicocuñin ini-nè sàhà cuàchi-ne na ní càhàn Jonás xi-né. Doco nèhivi tiempu vichi, cóo, cò-nàxicócuñin ini-nè mate sàni quesaa ana chicá ndiaha nùu Jonás mà.

Nansa ndiá icà-ndà cundiaa-ndà anima-ndà sàhà-ñá vātùni datnúu Dios sàxinítnùni-ndà

³³ 'Jin lámpara, cò-nàcuicun-ndañá sàhà-ñá cuiin dèhá; nì mà cuián tixi iin icà; cóo, icúmíá cuian ndé ducún, dandu cutnuá cutùì nùu nèhivi yáha ini vehe.

³⁴ Nduchínúu-ndà nduú ñà-tuínúu iguicúñú-ndà. Ñàyùcàndúá, nú iá vaha ma, dandu vātùni cutùì nuù-ndà ñà-quida-nda nsidanicuú iñàha. Doco nú cuhí nduchínúu-ndà, dandu nàcuítnúu núu-ndà.

³⁵ Te ducán stná xi anima-ndà. Ñàyùcàndúá, cuidadu cundoo-nsia, cóto cuiin tnuu ini anima-nsiá ndé cuàhàn datnúu mii-yá nì cúì.

³⁶ Doco nú ndisa, inicutu sàxinítnùni-nsiá datnúu-yá, dandu mà cóo ni-iin lugar ndé iin tnúu, vàchi cundua mà na ian nchií ndiaha inicutu sàxinítnùni-nsiá, te quee stná mà na ian tnúu fuerte iin lámpara nùu-ndà.

Nansa nì cachi Jesús ñà-cò-quidá vii nècuàchi fariseu, te có-quidá vii stná nècuàchi ley xi veheñùhu

³⁷ Daaní, na ní nsihi nì càhàn-yá, dandu nì quida iin nècuàchi fariseu mii-yá invitar cùhùn-yá cuxi-ya xi-né. Ñàyùcàndúá cuàhàn-yá, te nì yàha-ya ini vehe nècuàchimà, te nì sàcòo-ya.

³⁸ Doco nècuàchimà, nì ndulocò-nè ñà-cóni ndàhá-yá nacua nduú estilu xi-ne na cuàhàn-nè cuxi-ne.

³⁹ Dandu nì cachi Stoho-ndà Señor xi nècuàchimà:

—(Ndahví estilu chívaha) mii-nsiá nècuàchi fariseu, vàchi ducán queamá na ian nacaté-ndá iin pocillu, ò iin còhò, te cuiisì yàtà-ñá ndoó, doco (inià, quini iá). Pues ducán iá stná) ini anima mii-nsiá, vàchi sàni xida cuàchi-nsia ñà-xího guá-nsiá cuàhà iñàha, te niñnú quini ini-nsiá.

⁴⁰ 'Ndahví-nsiá! vàchi mà túha-nsia cundaà ini-nsia. ¿A có-ináhá-nsiá ñà-iin-ni mii-yá nì quida vaha xi stná anima-nsiá, màdiá cuiisì iguicúñú-nsiá?

⁴¹ Doco nú niñnú vaha ini-nsia, te cutùha-nsia dacútàhvi stnahá-nsiá, dandu vātùni cundaà ini-nsia iá vii nsidaa ñà-ndúá (nì quidayucun Dios).

⁴² 'Ndahví mii-nsiá nècuàchi fariseu! vàchi mate túha ndisa-nsia cuàha-nsia diezmu, (iá gà ndé có-quidá vii-nsiá). Mate sàha-nsia diezmu xi yucù cuatiluha caxi-ndà nahi ndua ndoò, ò yucù cuati nani ruda, doco nú nduá (iin chuun cahnú), cò-ndùlócò-nsiá sàhámà, vàchi có-niñnú ndàcuisi ini-nsiá, nì mà túha stná-nsiá cuu ini-nsiá sàhà Dios. Pues divi ñà-jaàn ndisa ndiá icà-nsiá quida-nsia cumplir, te nì có-xiñùhù nacoo stná-nsiá diezmu mà.

⁴³ 'Ndahví mii-nsiá nècuàchi fariseu! vàchi na sàhàn-nsiá veheñùhu, cuiisì lugar ndé cundoo vii-nsiá nandúcú-nsiá; te na sàhàn-nsiá yàhvi, cuní stná-nsiá casàhù tnùñuhu cuàhà nèhivi xi-nsiá.

⁴⁴ 'Ndahví mii-nsiá nècuàchi ley xi veheñùhu, xi mii stná-nsiá nècuàchi fariseu! Datiaá uun-nsia vaha-nsia. Vàchi na iin yavi xi nsii, ducán iá mii-nsiá, te ò na iin ñàña có-nàhà gà, te vihini cuàniñni nèhivi núá ñà-cò-sàha-ne cuenta nduá yavi. Ducán iá stná mii-nsiá.

⁴⁵ Dandu iin maestru xi ley ì mà, nì cachi-nè xi-yá:

—Maestro, nú ducán cachí-ní sàhà nècuàchimà, dandu queamá na ian dìquì stná nsiihù càhàn-ní.

⁴⁶ Dandu nì cachi-yá xi nècuàchimà:

—'Ndahví stná mii-nsiá nècuàchi ley xi veheñùhu! vàchi túha-nsia quidayucun-nsiá cuàhà ley ñà-chívaha nèhivi, mate mà cùndéé ini-nè quida-neà. Doco mii-nsiá, có-dúcùn ni-iin òinndàhá-nsiáñà.

⁴⁷ 'Ndahví-nsiá! vàchi túha-nsia quidavàha-nsia monumentu nùu ñàña xi nècuàchi nisa càhàn cuenta xi Dios sàhana, doco divi xi-nsiá nduú ana nì sahnì xi nècuàchimà.

⁴⁸ Ñàyùcàndúá, ducán queá na ian cudí ini-nsia sàhà cuàchi nì quida xi-nsiámà, vàchi òiñna mii-né nì sahnì xi nècuàchimà, dandu vichi (daxínu mii-nsiá chuun xi-ne), quidávàha-nsia monumentu xi nsii ma.

⁴⁹ Ñâyucândüá, dohó cachí Dios ña-nchichí guá-yá: “Cuàhà profeta icúmí techuín, te càhàn-né xì nêhivì ñà-ndüú razón xì. Te cuàhà stná nècuàchì apóstol icúmí techuín nù-né. Doco nêhivì malu mà, cahni-né nêhivì xí, te nú coó, siquiera taxi-né nècuàchìmà”, cachí Dios.

⁵⁰ Doco cunaha-nsiá, icúmí nêhivì tiempu vichi cunsida-ne cuàchi sàhà nsidaa profeta ni casahni nêhivì dècuèndè tiempu ni cuàha ñuhiví.

⁵¹ Ñà-ndáa nduá cachí xì-nsiá, icúmí nêhivì tiempu vichi cunsida-ne cuàchi sàhà nsidaa profeta ni xihì mà dècuèndè tiempu ni xihì Abel xì dècuèndè tiempu ni xihì stná Zacarías, divi Zacarías ni sahnì-né mahi veheñuhu cahnú xì mesa ì ndé sahmì-né ñà-càmàni-ndà Dios.

⁵² 'iNdahví mii-nsiá nècuàchi ley xì veheñuhu! vâchi ducán iá na lan dandacú-nsiá sàhà (vehe ndé dacuahá) nêhivì cundaà ini-né (sàhà Dios), doco ni chidèhé-nsiá ndahàcáa nuna yehè vehe ma. Ni cóni quihvi mii-nsiá ñà-cundaà ini-nsiá sàhà-yá, te ni sadi stná-nsiá nùu nêhivì cuní quihvi dacuahá —ni cachí Jesús.

⁵³ Daaní, ni nsihì ni cachi-yá nsidaajàn, dandu ni xidà ini nècuàchi ley xì veheñuhu ma, xì stná nècuàchi fariseu, te ni caquesaha-né ni càhàn ndee-né xì-yá, cunì-né càhàn-yá, te cachi-yá sàhà cuàhà iñaha,

⁵⁴ áma cáchì-yá iñaha ñà-cui daquéè cuàchi-ne diqui-yá.

12

Ícúmí cundaà ini-xì sàhà nsidaa nêhivì danani úun nduú nêhivì vâha

¹ Vichi sàni nataca chitu cuàhà mil nêhivì, dècuèndè sànihi tnahá-né. Dandu ni càhàn Jesús xì nêhivì mà. Primeru ni càhàn-yá xì nècuàchì dacuahá-yá, cachí-yá:

—Cuidadu cundoo-nsiá, còtò quida-nsiá na quidá nècuàchi fariseu. Vâchi nacua (còò permisú cuichuún-nsiá) levadura (vicò xì-nsiá), divi ducán còò stná permisú quida-nsiá na quidá nècuàchìmà, danani úun-né nduú-né nêhivì vâha.

² Cunaha-nsiá còò ni-iñaha coo dèhé nicanicuahàn. Ícúmíá tùia, te cunitnùhu nêhivì sàhà.

³ Dècuèndè stná ñà-ndüú ni cachí nêhivì na ndoó dèhé-né ndé iin tnúú, icúmí palabra mà natùú vate stná ndé nchíí orá. Te mate caya ni càhàn iin tiàa sàhà tùtnù compañeru-né ndé ndoó-né vehe chicá ndiadi, doco icúmí palabra mà (cùitià), vâchi nana ducún nêhivì, te cachitnùhu ndee-né nsidaámà.

Chicá vâha yùhì-ndà mii-yá dandacú sàhà vida xi-nda inga ñuhiví

⁴ 'Amigos, cachí xì-nsiá: màsà yùhì-nsiá ana cui cahni xì cuisì iquicúfú-nsiá; còò, vâchi nú sàni xihì-nsiá, dandu còò cá ni-iñaha cui quida ga-né.

⁵ Doco yùhù cachí xì-nsiá ana ndiá icà-nsiá yùhì-nsiá. Xiñuhu yùhì ndisa-nsiá mii-yá ana icúmí derechu dandiachi xì anima-nsiá andea nú sàni xihì-nsiá. Mii-yá, ndisa xiñuhu yùhì-nsiá.

⁶ Sàhà cuisì ùi tuní dicó-né ùhùn chòlìhì. Doco ni-iin quisi mà, có-nândòdó Dios-si.

⁷ Dècuèndè ináhà stná-yá nadaa ididíni itá dìnì iin iin nêhivì. Ñâyucândüá, màsà nácánì inì-nsiá, vâchi chicá ndiáa-nsiá nùu iin chòlìhì tù, te ò nùu cuàhà stná-si.

⁸ 'Yùhù cachí xì-nsiá, nú cachí vate iin nêhivì ñà-ndüú-né nêhivì xí, dandu yùhù ana nduú Tnahà Nêhivì Ñuhiví, icúmí stnáì cachì nùu ángel xì Dios ñà-divi nêhivì xí nduú stná nècuàchìmà.

⁹ Doco nú ni chidèhé-né ñà-ndüú-né nêhivì xí, dandu yùhù stná, icúmí nacuaà stnáì mii-né nùu ángel xì Dios.

¹⁰ 'Mate ni càhàn ùhì iin nêhivì diqui yùhù ana nduú Tnahà Nêhivì Ñuhiví, doco vátùnì nhì-né cuicahnú ini Dios sàhà-né. Doco nú diqui Espiritu ì sàni càhàn ùhì-né, dandu mà nuna sàà-yá cuicahnú ini-yá sàhà nècuàchìmà.

¹¹ 'Daaní, nú ni dátatuu nêhivì mii-nsiá nùu nècuàchì dandacú nùu veheñuhu, ò nùu juez, te ò nùu tè-nihí chuun, màsà nácánì ini-nsiá nansa naxiconihí-nsiá nùu-té,

¹² vâchi momentu yucán icúmí Espiritu ì xí Dios chindee-yá mii-nsiá ñà-cundaà ini-nsiá ìndù-ñá chicá ndiaha cachi-nsiá —ni cachí Jesús.

Cuàhà peligrú ndacá ñà-cunduu-nda nècuàchì cuicà

¹³ Daaní, iin tiàa ìin mahi nêhivì cuàhà yucán, ni cachi-né xì Jesús:

—Maestro, càhàn-ní xì ñani ñà-nì cándisâ-né dacuahí-né interés ni ndutahvi-nsí (nùu yua-nsí).

¹⁴ Dandu ni cachi-yá xì nècuàchìmà:

—Senór, còò chuun ni nihí' cundui juez nsidandà sàhà chuun xì mii-nsiá, ni có-ndüú stnáì iin ana dacuahí-xi biene xì-nsiá.

¹⁵ Te ni cachí stná-yá xì nêhivì cuàhà mà:

—Cuidadu cundoo-nsiá, màdí xihò-nsiá cuàhà iñaha, vâchi mate ni coó cuàhà gá biene xi-nda, có-cunì cachàmà ñà-sàni nhì ndisa-nda vida ndiaha. Còó.

¹⁶ Dandu ni nacani-ya xi-né iin ejemplu, cachí-yà:

—Nisa ia iin tècuicà; te iin cosecha cahnú ni cuàha itù-te.

¹⁷ Nàyùcàndüá, ni nacani ini-te, cachí-te: “¿Nansa quide? Vàchi có-cuàhà gá ndé covàha cosecha xi”.

¹⁸ Dandu ni cachí-te: “Chicá vaha dohó quide; cuàhìn duquín vehe cuachi yohó, te quidavàha saí vehe chicá nahnú sàhà-ñá vátùni sàà nàcòvaha cosecha xi, xi nsidaa gá stná ñà-cuicé.

¹⁹ Dandu cachí ini-ni mií: Vichi sà-ia cuàhà iñàha íá vaha. Vátùni sàà ñà-jaàn cutiacuì cuàhà cuà; vátùni quetatù vichi, vachi íá ñà-cuxi, te cohi. Contentu cuàhìn coi”, ni cachí-te.

²⁰ Doco ni càhàn Dios xi-té, cachí-yà: “¡Loco íó! vachi ñuú vichi icúmi naquihìn animo, dandu nsidaa biene sàni chivàhu, ¿ana ndòo xán?”, ni cachí-yà.

²¹ Te ducán icúmi coo xi nèhivì dacáyà xi cuàhà ñà-cuicà sàhà mii-xí, te nú còò ni-iñàha nduú ñà-cuicà ndisa-ne nuú Dios —ni cachí Jesús.

Nansa ndiaá Dios nècuàchì xínduu dèhe-ya

²² Daanì, después ni cachí stná-yà xi nècuàchì dacuahá-yà:

—Yühù, cachí xi-nsiá, màsà nácánì ini-nsiá sàhà vida xi-nsiá nansa nìhì-nsiá ñà-cutiacu-nsiá, ni sàhà cuerpu xi-nsiá, nansa tui ñà-cundixi-nsiá. Còó,

²³ vachi màdi cuisì ñà-cuxi-nda nduá xiñuhu sàhà-ñá cucumi ndisa-nda vida ndiaha; te cuerpu xi-nda ¿amadí chicá ndiaámà nuú sìcoto ndixi-ndà?

²⁴ Cundehe-nsiá càlù, có-xitù-sì, có-ndànihì-sì cosecha xi-sì, ni còò vehe icúmi-sì, ni còò stná ni-iin lugar ndé chivàha-sì iñàha; doco Dios, dacútiácú-yàsi. Te mii-nsiá, ¿amadí chicá ndiaá-nsiá nuú laa mà?

²⁵ Cunaha-nsiá, mate yáha ga sahní-nsiá dìni-nsiá, te nacánì ini-nsiá, uun-ni nduámà, mà nìhì-nsiá cuahnu ga-nsiá ni-iin dava metro.

²⁶ Nàyùcàndüá, nú mà cù quida-nsiá chuun tii jaàn, dandu chicá vaha màsà càhni gá-nsiá dìni-nsiá sàhà chuun dava ga.

²⁷ Cundehe-nsiá nansa sahnú ita nani lirio; có-quidáchuún-yá, ni có-quidavàha stná-yà sìcoto, doco chicá ndiaha ita mà nuú rey Salomón (nisa ia sànahà), mate yáha ga vico ni sandixi-ne.

²⁸ Iin ita, yùcò-ni nduá, (có-ndiaá ndisa); quivì vitni íá` campu, te tnaa sàni ìchà, vihini quèa xitnú coca. Mate ducán nduá, doco ndiaha gá ni quidavàha Dios ita mà. Nàyùcàndüá, vihi gá icúmi-yà cuàhatahvì stná-yà ndohó iin ñà-cundixi-nda. Doco mii-nsiá, iyuhu gá xiníndisá-nsiá Dios.

²⁹ Màsà cacánúú-nsiá cahnì-nsiá dìni-nsiá nansa tui ñà-cuxi-nsiá, coho-nsiá.

³⁰ Vachi nsidaa nèhivì ndoó ñuhivì, divi ñà-jaàn nduá nandúcu-nè. Doco ndohó, ía Yuamáni-ndà Dios, te ináhà-yá xiñuhu nsidaámà nuú-ndà.

³¹ Nàyùcàndüá, dihna xiñuhu nanducu-nsiá nansa chivàha vii-nsiá ley xi ñuhivì ì xí-yá, dandísá nìhì stná-nsiá nsidaa ñà-ndüá cumáni gá nuú-nsiá.

Ndè Gloria xiñuhu dacáyà-ndà ñà-cuicà-ndà

³² Mii-nsiá, nahi rii-xí nduú-nsiá, te cachí xi-nsiá, màsà yúhì-nsiá, mate mà tuú-nsiá, vachi sàni chitnùnì ini Yuandiaha-nsiá ñà-cundiatú anima-nsiá ndè ñuhivì ì xí-yá.

³³ Dicò-nsiá biene xi-nsiá, te dacútàhvì-nsiá nècuàchì ndahví. Dandu queámà na ian sàni chivàha-nsiá ñà-cuicà-nsiá ndè gloria. Te queé stná na ian íá vaha mà ini iin itni mà sàà tèhì, vachi ndè gloria yucán, mà sàà ndañuhá, vachi mà quihín tècuìhnà-ñá, ni mà cúsiquídí stná.

³⁴ Vachi ndé quida-nda cuenta íá vaha ñà-cuicà-ndà, divi lugar yucán cuàhàn-ndà cuni-hnu cuàhà ini anima-ndà —ni cachí Jesús.

Ndiá icà-ndà cundoo tùha-nda, vachi sà-itúú-yá naxicocúin-yá

³⁵⁻³⁶ Dandu ni cachí-yà:

—Cundoo tùha-nsiá na ian quidá peón xíndiatu na nsiaá lamú xi-tè na cuàhàn nècuàchimà vicò nandàhà; nacúcuin-té lámpara, te yáha ga ndiatú-te. Daanì, nú sàni nsiaa nècuàchimà, te nì càhàn-nè yehè, dandu vichì vichì cuàhàn-te nacuna-tè nuú-né.

³⁷ Nansicáhàn-tè nú ndiatú tùha-tè na nsiaa-nè, vachi seguru icúmi-nè quidayucun-nè, te dayáha-ne peón mà ndé cundoo-tè cuxi-tè.

³⁸ Te nú ndé dava ñuu, ò ndé` sinduhá ni nsiaá lamú mà, te xíndiatu ì peón mà, pues nansicáhàn-tè nì sandiatu-tè.

³⁹ (Inga ejemplu), nú ináhà-ndá ndévi hora quixi tècuìhnà quihvi-tè vehe-nda, dandu cundiatu tùha-nda, mà cuàha-nda quihvi-tè.

⁴⁰ Divi ducán stná mii-nsiá, cundoo tùha stná-nsiá, vachi iin quivì có-nìhnú ini-nsiá naxicocúin yühù ana nduú Tnahà Nèhivì Ñuhivì —ni cachí-yà.

Ejemplu sàhà peón xíndiaa xì vehe lamú cuàhàn xicà

⁴¹ Dandu nì cachi Pedro xì-yá:

—Señor mío, ¿a ní nacani-ní ejemplu jaàn ñà-cutùha miini nsiùhù, te ò cuní stná-ní quihin casu nsidaa nēhivì dava ga?

⁴² Dandu nì cachi Stoho-ndà Señor xì-né:

—¿Ana tuxí ini-nsià nduú nahi peón nù ejemplu yohó? Nì ìa iin peón; tùha-tè quida vī-té, quidá sahnú-te. Te nì nìhì-té chuun nù lamú xì-tè ñà-dandacú-te nù peón dava ga, te dasàn stná-te ñà-cutiacu nsidaa nēcuàchimà quivì cuiñuhá. Daanì, cuàhàn lamú mà.

⁴³ Pues nansicáhàn peón nì ndòo dandacu-ma nú iin-ni quidá ví-té dēcuèndè nsiaa tu lamú xì-tè.

⁴⁴ Cunaha-nsiá, icúmí nēcuàchimà cuàha-ne peón mà chuun ñà-dandacú-te sàhà nsidan-icúú ñà-cuicà-né.

⁴⁵ Doco nú nacánì chicuèhé ini peón mà, te cachí-te: “Cucuee va lamú xi, dandu nsiaa-nè”, te quesáhá-té cahnú cuií-te peón dava ga mà, tiàa-ne te ñahà-né, te cuisì-ní ñà-cuxi-tè, te coho-tè cucahan-té, te cutnàhà stná-te xì tè-xíni xihí-te.

⁴⁶ Pues nú quidá-te ducán, dandu icúmí lamú xì-tè nsiaa-nè iin quivì có-nihnú ini-te, cundua iin tiempu có-ínahá-tè, dandísá nìhì-tè iin castigu cahnú sàstnùhù, iin-ni ndoho-tè ñà-ndúá icúmí ndoho nsidaa gá ana có-xíníndísá xì-yá.

⁴⁷ Iin peón, nú inahá vâha-tè ñà-ndúá cuní lamú xì-tè quida-tè, te có-quidá-teá, có-ínini-te ñà-ndúá cachí-nè, dandu cuàhà gá icúmí-tè ñàhni-tè.

⁴⁸ Doco nú có-cundáá vâha ini peón mà, te quidá-te iin falta, dandu chicá iyuhu ñàhni-te. Vâchi ducán queá na ian nacóó-ndá cuàhà ñà-icúmí-ndá nù ndahà inga nēhivì (ñà-cundiaa-nèà). Pues nú ducán, dandu cuàhà stná iñàha icúmí-ndá naquihin-nda nù nēcuàchimà. Vâchi nú nì ndóo cuàhà iñàha ndahà iin nēhivì, dandu divi-ni ducán cuàhà iñàha icúmí stná-ndà nandacàn-ndà nù-né.

Mà ndóo ini dava nēhivì sàhà ichi Jesús; mà úhì tãhndè dava-ne sàhà

⁴⁹ Cunaha-nsiá, yùhù vâxi cundui nahi ñuhu quiñuhu ñuhivì, (vâchi sàhà yùhù icúmí nēhivì tãhndè dava-ne). Te ja sácú vâha ñà-sànì quiñuhu ñuhu mà nì cundúá!

⁵⁰ Vâchi iá iin tnùndoho icúmí yâhì, te cuàhà gá nacánì ini ndè cachi sàà hora yàhamà.

⁵¹ ¿A túxí ini-nsià vâxi ñuhivì yohó ñà-cucumi nēhivì paz? Còo, vâchi sàhà yùhù icúmí tãhndè dava nsidaa-né.

⁵² Ndè vichì xì ndé' quivì nù-xì icúmí tãhndè dava-ne. Por ejemplu, nú iá iin vehe, te ndóo ùhùn nēhivì, ùni-nè cunì ùhì xì nēcuàchì ùi mà. Te nú coó, ùi-nè cunì ùhì xì nēcuàchì ùni mà.

⁵³ Te ò iin tiàa, cuàhàn-nè cunì ùhì-nè dēhe-ne, te nú coó, dēhe-ne cuàhàn cunì ùhì xì mii-né; te ò iin nēcuàchì ñahà, cunì ùhì-nè dēheyoco-né; ò nú coó, dēheyoco-nemà cunì ùhì xì mii-né; te ò ñàndòo iin nēcuàchì ñahà cunì ùhì xì sànu-ne; ò nú coó, sànu-nemà cunì ùhì xì mii-né.

Ndiá icà-ndà nacuni-ndà índuvì tiempu nuná ñuhivì, te sáhatahvì Dios gracia xi-ya, vâchi icúmí tiempu mà nsiha

⁵⁴ Dandu nì cachi-yá xì nēhivì cuàhà ndóo yucán:

—Mii-nsiá (nēcuàchì ñuhu yohó), nú nì xini-nsiá itá vicò ladu quecàhnu orá, dandu cachí-nsiá: “Vâxi dàvì”, te ducán iá.

⁵⁵ Te nú caná tàchì ladu sur; dandu cachí-nsiá: “Cuàhàn coo ihni”, te divi ducán coo.

⁵⁶ ¡Ndahví-nsiá! Danani uun-nsiá nchichí ndisa-nsiá, vâchi mate túha-nsiá nacuni-nsiá seña iá ñuhivì xì ansivì, doco ¿índù chuun mà cui nacuni stná-nsiá índù tiempu nduá vichì?

⁵⁷ Có-chíndéé sàxínitnùní-nsiá mii-nsiá sàhà-ñá cui mànhì ini-nsiá índù chuun nduá chuun vâha.

⁵⁸ Nú sàni sanicuàchi iin tiàa sàhà iin-nsiá, te ndacá-tensíá cuàhàn nù tè-nihí chuun, dandu chicá vâha nanducu-nsiá ñà-nacahan stnahá-nsiá Dios sàhà-nsiá na meru xicá-nsiá ichi cuàhàn-nsiá, te màdiá cundaca-tensíá sàà nù juez, vâchi juez mà, dayâha-tensíá ndahà comandante xì-tè, te chicadì tēmà-nsiá vehēcà.

⁵⁹ Te ñà-ndáá nduá cachí' xì-nsiá, nú nì cuu-xi-nsiá ducán, dandu mà queé gá-nsiá dēcuèndè nú sàni dànáá nshí-nsiá nsidanicuú ñà-ndúá nihíá-nsiá —nì cachi Jesús.

13

Chuun cahnú nduú ñà-cuu-nda arrepentir sàhà cuàchi-nda

¹ Daanì, tiempu yucán nì cachitnùhu nēhivì xì-yá nansa nì cuu xì nēcuàchì ladu Galilea, nì dàndàcú Pilatu, te nì sahnì soldadu-nè na meru sáhatahvì-né quisi nduú promesa xi-ne nù Dios; meru xihì quisi mà, te nì sahnì-ténè.

² Dandu nì naxiconihí-yá nù nēcuàchì nì nacani mà, te dohó nì cachi-yá:

—Nècuàchi Galilea mà, ¿a tuxí ini-nsià ñà-chicá nì sanduu-ne nèhivi cuàchi nùu nsidaa nècuàchi ñuu-nè, te sàhà mà nì xihì-nè ducán?

³ Còó, cachí, vàchi divi ducání ndañuhu stná mii-nsiá nú màsà cúu-nsiá arrepentir sàhà cuàchi-nsiá.

⁴ Te ináhà stná-nsiá nansa nì cuu yatni Siloé yucán na ní ndua iin torre, te nì chàhmà sàhùn ùni nèhivi. Pues ¿a tuxí ini-nsià chicá nisa ia cuàchi nècuàchì mà nùu nsidaa gá nèhivi ñuu-nè Jerusalén?

⁵ Còó, cachí; vàchi dècuèndè mii stná-nsià, divi ducání icúmí stná-nsià ndañuhu-nsiá nú màsà nàxícócuiln inì-nsiá sàhà cuàchi-nsiá.

Ejemplu sàhà yutnù cóni cuàha quisi vídi-xi

⁶ Dandu nì nacani-ya ejemplu yohó:

—Nisa ia iin tiàa icúmí xí iin ñuhù íá ñà-tàtá, te yucán iin stná iin nù-higu. Te nì sàà tiàa ma iin xichi yucán, cuàhàn-nè cuida-ne fruta-nu ni cuí, doco còò ni-iin sihigu-nu ni ndacùhun-ne.

⁷ Ñàyùcàndúá, nì cachi-nè xì tèndiáá xì yutnù tatá mà: “Cunaha-ní, sàcuàhàn ùni cuià quixí indéhi, áma níhí síhigu yutnù yohó cahín, doco còò-sí. Nì táhndè-nu chicá vaha; có-cuní cuiin uun gá-nu yohó”.

⁸ Doco peón mà, nì cachi-te: “Senór, nacoó gá-nínu dècuèndè inga cuià, vàchi cuní dadayí ñuhù sàhà-nú, te daquéi majada,

⁹ áma cuàha-núsi; te nú coó, dandísá, táhndè-nu”, nì cachi peón mà.

Nansa nì quida Jesús iin quivi descansu, nì dándúvaha-ya iin nècuàchi ñahà xicá todo

¹⁰ Daaní, iin quivi sábadó íá-yà iin veheñuhu dacuahá-yá nèhivi.

¹¹ Te yucán nì quihvi stná iin nècuàchi ñahà, sàhùn ùni cuià dandohó iin ñà-malu-nè, nì cuiá yaa-ne quidá-sí, ñàyùcàndúá xicá todo-ne, mà cui nàcuiln ndàà-nè.

¹² Doco na ní xini Jesús-nè, nì cana-yanè ñà-tnàtuu-ne. Dandu ní cachi-yà xì-né:

—Mii-ní nècuàchi ñahà jaàn, sàni quee cuèhè malu quidá quini xì-ní.

¹³ Dandu nì chitandòó-yá ndahà-yá dìni-né. Te vichi vichi nì ndundaà cuerpu xi-ne, te nì nihì-né nì nàcuiln ndàà-nè. Ñàyùcàndúá, cuàhà gá nì naquimanì-né Dios.

¹⁴ Doco nècuàchi dandacú nùu veheñuhu yucán, nì cuduchi ini-nè, vàchi quivi descansu nduá na ní dándúvaha-ya nècuàchì mà. Ñàyùcàndúá, nì cachi nècuàchi dandacu-ma xi nsidaa nèhivi yucán:

—Íñù quivi ùun íá quidachuun-nda; ñàyùcàndúá, quivi jaàn quixi-nsiá nduvàha-nsiá, màdiá quivi descansu.

¹⁵ Dandu nì naxiconihí Stoho-ndà Señor nùu nècuàchì mà, cachí-yà:

—¡Ndahví-ní! ¡Cachí uun-ní vaha-ní! vàchi nsidaa-nsiá, cada quivi descansu ndàxin-nsiá buey xi-nsiá, ò burru xi-nsiá, te sàhàn-nsiá xì-sí ñà-coho-sí tècuil.

¹⁶ Te nècuàchi ñahà yohó, descendencia xi xii-ndà Abraham nduú stná-nè, ñàyùcàndúá, amádi ndiá ícá stná-nè dàñà stná-nè nùu cuèhè itní xì-nè, mate quivi descansu nduá, vàchi sàcuàhàn-ndà sàhùn ùni cuià nuhní iquicúñú-nè quidá ñà-malu —nì cachi-yà.

¹⁷ Daaní, nsidaa nècuàchi xini ùni xì-yá, nì nducahan-ne; doco nèhivi cuàhà mà, nì cudii ini-nè sàhà nsidaa obra ndiaha quidá-yá.

Iin ejemplu nì nacani Jesús ñà-cundaà ini-ndà nansa coo tiempu na xítia palabra xi-ya

¹⁸ Daaní, nì cachi gá-yà xì-né:

—¿Índù iñàha cui cachi sàhà-ñà cundaà vii ini-nsiá nansa íá ñuhiví ì xí Dios? ¿Índù ejemplu cui nacani xì-nsiá, te sàà-nsiá cundaà ini-nsiá nansa íá tiempu mà?

¹⁹ Pues cunaha-nsiá, nahí tata yutnù mostaza, ducán íá tiempu mà, na ian nì cuu na ní chíhi iin tiàa tata mà itu-nè, te nì sahnuu; iin yutnù cahnú nì nanduu-nù. Dècuèndè laa ndavá ansivi, vaxi stná-sí quidávaha-sí tacà-si mahì-nú.

Ejemplu sàhà tàtnà nsidátáchi xí yusàn pan, divi nduú levadura

²⁰ Daaní, tucutu nì cachi-yà:

—¿Índù ejemplu cui nacani xì-nsiá sàhà ñuhiví ì xí Dios?

²¹ Na iin tàtnà nsidátáchi xí yusàn pan, ducán nduá, vàchi divia nì quihin iin nècuàchi ñahà nì dàquée-ne mahì ùni maquila yusàn harina, te nì ndutachi nsihá —nì cachi Jesús.

Yehè Sitnìhi

²² Daaní, na xicá-yá ichì Jerusalén, nì nacàhin-ya ñuu nahnú te ñuu cuati, dacuahá-yá nèhivi ndoó yucán.

²³ Te nì cachi iin nèhivi mà xì-yá:

—Señor mío, ¿a iyuhu nèhivi cunduu nècuàchi càcu anima-xí?

Dandu nì cachi-yà xì nsidaa nèhivi mà:

²⁴—Quida-nsia lucha fuerte quihvi-nsia yehè sitníhi gloria, vâchi ñà-yòhó cachí xì-nsiá: nùu nsidaa nèhivi cucuni quihvi yucán, cuahà-né, mà níhi-né yâha-ne.

²⁵ Vâchi quida-nda cuenta na ian iá iin vehe, te cuní-nsiâ quihvi-nsia, doco sàni nacadi nècuàchi divéhé-ximá yehè-né. Ñâyùcândüá sâa-nsiâ, te câhàn-nsiâ yehè, cachí-nsiâ: “Stoho-nsi Señor, nacuna sacù-ní nùu-nsí”. Dandu nècuàchimâ, icúmí-né cachi-né: “Còó, tàcùnf mii-nsiâ, (ní có-ínâhi) îndü nì quixi-nsia”.

²⁶ Dandu mii-nsiâ, cuahàn-nsiâ cachi-nsiâ: “Nsiùhù, nisa cutnahá-nsí xì-ní nì sandoo-nda nisa xixi-nda nisa xihì-nda (tècuií); te mii-ní, nisa dacuaha-ní nèhivi ñuu-nsi, calle ñuu-nsí”.

²⁷ Dandu nècuàchi sahnú yucán, icúmí-né cachi-né: “Yùhù cachí xì-nsiâ, tàcùnf mii-nsiâ, ni có-ínâhi îndü nì quixi-nsia. Ñâyùcândüá, cuahàn-nsiâ iladu, vâchi nècuàchi chicuèhé xinduu-nsia”, cachi nècuàchi sahnú-ma.

²⁸ Pues (ducán stná mii-nsiâ), icúmí-nsiâ cuni-nsiâ na yâha xii-ndâ Abraham ndè ñuhiví ì xí Dios, mii-né xí stná Isaac, xí Jacobo, xí nsidaa stná nècuàchi profeta nisa câhàn cuenta xi-ya sâhana. Nsidaa-né icúmí-né màcúndoo-ne nùu Dios ñuhiví ì xí-yâ. Doco mii-nsiâ, còó; fuera icúmí-nsiâ ndòo-nsia. Dandu yâha ga cuahàn-nsia cuacu-nsia, ndé càna nùhu-nsia (ñâ-ndòhó guâ-nsiâ).

²⁹ Vâchi nsidanicuú ladu icúmí quee nèhivi sâa-né ñuhiví ì xí-yâ, cunduu-ne nèhivi vâxi ladu caná hora, xí nèhivi ladu quécachu stná, xí nèhivi ladu norte, xí nèhivi ladu sur, nsidaa-né icúmí-né casaâ-né màcúndoo-ne (ndé iá vicò) ñuhiví ì xí-yâ.

³⁰ Vâchi nèhivi nchícùn cahâ-xí vichi, icúmí-né sâa-né nâcòdò nùu-né nùu-xí (quívì yucán), te nècuàchi idónuu vichi, icúmí-né sâa-né natenchicùn-né ndé cahâ-xí.

Nansa ni sacu Jesús sâhà nèhivi ñuu Jerusalén

³¹ Divi quívì yucán nì casaâ dava nècuàchi fariseu nùu-yâ, te nì cachi-né xí-yâ:

—Cuahàn-ní quecuâán-ní yohó, vâchi cuní Herodes cahni-té mii-ní.

³² Dandu nì cachi-yâ xì nècuàchimâ:

—Cuahàn-nsiâ, te dohó cachi-nsiâ xì tè-icúmí guá maña mà: “Cunaha-ní, vichi xi tnaa cuahàn tavi ñâ-malu ñuhú anima nèhivi, te dandúvâha stnâi nècuàchi cuhí, dandu quívì ùni cuahàn dansihí chuun xí”.

³³ Doco sâ-íá ñâ-caqui vichi, te tnaa, te idá, vâchi ndé ñuu Jerusalén nduú lugar ndé tûha ndisa nèhivi cahni-né iin ana câhàn cuenta xí Dios.

³⁴ ¡Ndahví mii-nsiâ nècuàchi ñuu Jerusalén! vâchi tûha-nsia cahni-nsiâ nècuàchi câhàn palabra xí Dios, vâchi na techúün-yânè sâa-né nùu-nsiâ dandu caniyúú-nsiânè ñâ-cui-né. Na cuahâ guá xichi nì cuní danátáqui mii-nsiâ nùu na ian danátácá sùun pilu xí-sì ñâ-nâcúñuhu quisi mà tixi ndixi-sí; doco còó, cóni cuní-nsiâ.

³⁵ Ñâyùcândüá icúmí lugar xí-nsia yohó ndòo nihnia. Te cachí stnâi xì-nsiâ, mà cuní gâ-nsiâ yùhù ndé cachi sâa quívì cachi-nsiâ xí: “Ndiâha gá mii-ní, vâchi divi ana vâxi cuenta xí Stoho-nda Señor nduu-ní”.

14

Nansa ni dândúvâha Jesús iin nècuàchi ndòhó cuèhé cuiun

¹⁻² Daaní, iin quívì descansu cuahàn-yâ vehe iin nècuàchi idónuu nùu nècuàchi fariseu, cuahàn-yâ cuxi-ya yucán. Te vehe nècuàchimâ iá stná iin nècuàchi cuhí cuèhé cuiun, te iin-né nùu-yâ. Ñâyùcândüá, dava ga nècuàchi fariseu ndòó yucán, indéhe váha-neyâ, nansa quida-ya.

³ Ñâyùcândüá, nì cachi-yâ xì nècuàchi fariseu mà xì stná nècuàchi ley xi veheñuhu ndòó yucán:

—¿A sâha ley ì xì-ndâ dandúvâha-nda nèhivi nú quívì descansu nduá? (Cachi-nsiâ xí’.)

⁴ Doco nècuàchimâ, dadí úún nì ndòo-ne. Ñâyùcândüá, nì tñii-ya ndahâ nècuàchi cuhí mà, te nì dândúvâha-yanè. Dandu nì cachi-yâ xì-né:

—Vâtùni cùhùn-ní vichi.

⁵ Dandu nì cachi stná-yâ xì nècuàchi ndòó yucán:

—Nú iá iin burru, ò iin buey xi-nsia, te nì nacava-si ini iin xichi, ¿âma cùhùn-nsiâ carrera tavâ-nsiâsi, mate quívì descansu nduá? —nì cachi-yâ.

⁶ Te mii-né, mànicúí nanihí tñuní ini-né nansa naxiconihí-né nùu-yâ.

Mâ váha ndanihi-nda mii-nda nduu-nda ana chicá ndiâá

⁷ Daaní, nì xini Jesús nansa quidâ nècuàchi nì quesaa vicò mà, nandúcu-né lugar cundoo-ne ndé chicá quee tñùñuhu xí-né. Ñâyùcândüá, nì nacani-ya xì-né iin ejemplu, cachí-yâ:

⁸ —Nú càna iin nèhivi cùhùn-né iin vicò nandâhâ, màsâ cóó-né ndé nduú lugar chicá iá tñùñuhu-xí, vâchi vihini sâa stná inga ana chicá quidâñuhú nècuàchi divéhé-xí.

⁹ Nú ducán, dandu icúmí nècuàchi divéhé-xímá tnàtuu-ne ndé iá nècuàchi ni sàà primeru mà, te cachi-nè xi nècuàchimà: “Cuxio-ní, te ni coó nècuàchi sahnú yohó lugar xi-ní”. Dandu nècuàchimà, ndacuiin-nè, te cùhùn-nè coo-ne inga lugar ndé cahà-xí, te ndòo cahan-ne.

¹⁰ Cunaha-nsiá, nú cànà-ndà cùhùn-ndà iin vicò, dandu nanducu-nda lugar chicá cahà-xí coo-nda, dandu na tnàtuu nècuàchi divéhé-xímá, icúmí-nè cachi-nè xi-ndà: “Amigo, nahà-ní, coo-ní ndé ndúu lugar chicá iá tnùñuhu-xí”. Pues nú ni quidá-né ducán, dandu chicá quee tnùñuhu xi-nda nùu nècuàchi cutnàhá xí-ndá ndoo-nda xixi-nda yucán.

¹¹ Vàchi nsidaa ana datiaá chicá ndiaá, icúmí-nè sàà-nè ndòo cahan-ne. Doco nsidaa ana daníhí ndahví xi mii-xí, divi ndúu ana chicá icúmí nihí xi tnùñuhu —ni cachi Jesús.

¹² Daaní, ni càhàn-yà xi nècuàchi ni cana xi-yá ñà-cuxi-ya, cachi-yà xi-né:
—Nú cuàhàn-ní quida-ní iin vicò vehe-ní, dàtnàà ò sàcuàá, dandu màsà cànà-ní amigo xi-ní, ò ñani-ní, ò tnaha-ní, ò nècuàchi cuicà ndoó yatni, còtó cana stnà-nè mii-ní vehe-ne, te ducán danàà-né favor ni quida-ní.

¹³ Còó, vachi nú cuní-ní quida-ní iin vicò, dandu cana-ní nècuàchi ndahví, xi nècuàchi ni nacuehè, xi nècuàchi xicá cuéhè, xi nècuàchi cuaá;

¹⁴ dandu ndiaha gá coo xi-ní, vachi nsidaa nècuàchi yucán, mà cúí danàà-nè nùu-ní. Daaní (ndé inga vida) na natiacù-ní xi nsidaa gá nèhivi nihnú ndàcuisi ini-xí, icúmí-ní nihí-ní ñà-vàha xi-ní sàhámá —ni cachi Jesús.

Ejemplu sàhà vicò cahnú

¹⁵ Daaní, iin nècuàchi cutnàhá xí-yá na xixí-yá yucán, ni tiacu-nè ñà-ndúá ni cachi-yà, te ni cachi-nè xi-yá:

—Ndiaha gá coo tiempu cundoo-nda ñuhiví ìi xí Dios, te cuxi-nda pan yucán.

¹⁶ Dandu ni cachi Jesús xi nècuàchimà:

—Nisa ia iin tiàa ni quida iin vicò cahnú. Cuàhà gá nèhivi ni cana-ne.

¹⁷ Dandu na hora cuàhàn-nè cacuxi-ne, ni techuún-nè iin xon-xi-ne (ñà-caca-tè) cachtñuhu-tè xi nsidaa nècuàchi ni cànà mà ñà-sà-íá hora yàha-ne, vachi sà-íá listu nsidaa.

¹⁸ “Doco iin-ni ni cacachi nsidaa-né ñà-ní cuicáhnú ini nècuàchi quidà-xi vicò mà sàhà-né. Nècuàchi primeru, ni cachi-nè: “Còó, làcà ni xiin iin ñuhù xí, te icúmí cùhin cundehiá. Ni cuicáhnú ini-nè sàhí”, cachi-nè.

¹⁹ “Daaní, inga-nè, ni cachi-nè: “Còó, vachi làcà ni xiin ùhùn yunta buey, te icúmí cùhin cundaa ini sàhà-sí, a quidá víi-sí, á coó. Ni cuicáhnú ini nècuàchimà sàhí”, ni cachi tiàa ma.

²⁰ Daaní, inga-nè, ni cachi-nè: “Còó, vachi làcà ni nandáhi, te ñàyücàndúá, mà cúí cùhin”.

²¹ Ñàyücàndúá, mànuhù peón mà, te ni nacani-tè xi lamú xi-tè nansa ni cacachi iin iin nèhivi mà. Ñàyücàndúá, ni xidà ini nècuàchimà, te ni cachi-nè xi peón mà: “Cuahán-ní vichi duha cacanu-ní inii calle ñuu-ndà yohó, calle nahnú te calle cuati, te danátàcà-ní nècuàchi ndahví, nècuàchi ni nacuehè, xi stnà nècuàchi xicá cuéhè, xi nècuàchi cuaá ñà-ní quixí-né vicò xí”.

²² Ñàyücàndúá, (ducán ni quida peón mà); dandu ni cachi-te: “Sàni quide ñà-ndúá ni cachi-ní xí, señor, te vátuni cundoo más gá nèhivi”.

²³ Dandu ni cachi tu lamú mà xi peón mà: “Vichi cuahán tu-ní nsidaa ichi xi nsidaa callejón, te datnàtuu-ní nèhivi sàhà-ñà chitu vehi nèhivi.

²⁴ Vachi ñà-yohó cachí xi-nsiá, ni-iin nèhivi ni quide invitar daa, mà ñhi-né ni-iyuhu ñà-cuxi-ne vehi”.

Nansa ni cachi Jesús xi-ndà ñà-iin-ni ni nácáni ini-ndà cunchicùn-ndàya

²⁵ Cunaha-ní, cuàhà gá nèhivi xinchicùn xi-yá cuàhàn stnà-né. Ñàyücàndúá ni naxic-ocufin-yà yàtà-yá, te ni cachi-yà xi-né:

²⁶ —Nú vaxi iin nèhivi nùí, te cuní-nè cunchicùn-nè yùhù, dandu (màsà ndúlócò gà-né ñà-ndúá cachí) yua-né, ò dihi-né, ò dèhe-ne, ò ñani-né, ò cùha-ne, mate (ni cá-cútúxi ini nècuàchimà) sàni xini ùhi tnaha-nemà mii-né. Ni màsà cúú gá stnà ini-nè sàhà vida xi-ne, vachi nú coó, mà cúí sàà-né cunduu-ne iin ana nchícùn xí’.

²⁷ Te xiñuhu stnà (ñà-coo-ne dispuestu cui-nè sàhí), quida-ne cuenta na ian nsidá-né iin cruz cuàhàn-nè cui-né. Vachi nú có-nihnú ini-nè ducán, te có-nchícùn stnà-né yùhù ducán, dandu mà cúí sàà-né cunduu-ne iin nèhivi xí.

²⁸ Vachi nú cuní-ndà quidavàha-nda iin vehe ducún, amádi dihna coo-nda quida-nda cuenta xi-nda a vátuni sàà dihùn xi-ndà,

²⁹ còtó mà cúí daxínu-ndañá, cuisì cimientu xan daquésáhá-ndá, te sà-íá ni. Dandu nècuàchi indéhe, cuàhàn-nè cuàcúndiaa-nèndó,

³⁰ cachi-nè: “Cuàhàn tè-jaan quidavàha-tè iin vehe ni cuí, doco cóni nihí-té daxínu-teá”, cachi-nè (cuàcúndiaa-nèndó).

³¹ Daaní, stná iin rey, nú cuní-te cùhùn-te guerra nàà tnàhá-te xì inga rey vaxi xi soldadu-xi, amádi dihna coo-tè nacani vaha inì-te, a vátùni sàà ùxin mil soldadu xi-tè ñà-cundee-té nùù òcò mil soldadu xi inga rey mà, á coó.

³² Te nú mà sàà soldadu xi-tè, dandu na táñáha ga cuyatni inga rey mà, dandu techuún-te nèhivi xí-te cùhùn-nè ndatnuhu-né xì temà nansa nsihí pleitu xi-tè.

³³ Te ducán stná mii-nsiá, xiñuhu nandòdó-nsiá nsidanicuú iñàha icúmí-nsiá, vächì nú coó, dandu mà cúí sàà-nsiá cunduu-nsia ana nchícùn xì’.

Ejemplu nacání sàhà ìin ni cuchicuehe, te ducán stná ndohó, màdí cuchicuehe anima-ndà

³⁴ Vaha ga ìin, (vächì nsidá ádiá ñà-xixi-ndà); doco nú sàni ndañuhu ñà-ádi xán, dandu mà cúí gá ndu-adi gá’.

³⁵ Vächì còò cá chuan, mà cùndúá ñuhu chihi-nda, ni mà vaha daquée stná-ndà nùù itu-ndà. Chicá vaha cate-ndañá. Ni cúnini vaha nsidaa-nsiá palabra jaàn.

15

Ejemplu nacání sàhà rii ni tùcù

¹ Daaní, ni catnàtu cuahà tè-dàchíyàhvi, xì cuahà gá stná nèhivi iá cuàchi-xi, vächì cuní-nè cunini-ne ñà-ndúá cachi-yà.

² Dandu nècuàchi fariseu, xì stná nècuàchi ley xi veheñuhu, ni xitnùhu-neyà, cachí-nè: —Nècuàchi jaàn, cudíi ini-nè cutnahá-né xì nècuàchi cuàchi; dècuèndè xixí tàcá stná-nè xì nècuàchimà.

³ Dandu ni nacani-ya xi-né iin ejemplu, te dohó ni cachi-yà:

⁴ —Nú ndoó iin cientu rii xi-ndá, te ni quecuaán iin-si ¿ndiá nduá quida-nda? ¿Amádi nacoó-nda 99 quisi dava ga mà iin yodó, te cùhùn-ndà nanducu-nda inga quisi mà ndè cachí nanihi-ndási?

⁵ Daaní, nú sàni ndacùhun-ndasi, cudíi ini-ndà

⁶ mànuhù-ndà vehe-nda idádócò-ndà quisi mà. Dandu cana-nda amigo xi-nda xì stná nècuàchi ndoó yatni, te cachí-ndà xi-né: “¡Nahà-nsia cundoo-nda cudíi ini-ndà, vächì sàni natùì rii xì ni ndañuhu ni cuí!”

⁷ Te yùhù cachí stnáì xi-nsiá, nú ni sàà iin nèhivi iá cuàchi xi cuu-ne arrepentir, dandu yáha ga xícudíi ini ana ndoó gloria. Ndè chicá cudíi ini-nè sàhà nècuàchimà nùù 99 nèhivi niñnú vaha inì-xi, vächì mii-né, có-xiñùhù gá cuu-ne arrepentir.

Ejemplu nacání sàhà dihùn ni ndañuhu, te ni natùia

⁸ Te ò (inga ejemplu. Ni cachí-ndà iá) iin nècuàchi ñahà icúmí xì ùxin dihùn plata. Pues nú ni ndañùhù ian, amádi nacuicùn-né iin isi, te nasihvi-né vehe-ne ñà-nanducu-nèà ndè cachí natùia.

⁹ Daaní, nú sàni nanihi-néà, dandu cana-ne amigo xi-ne xì stná nècuàchi ñahà xíndoo yatni, te cachí-nè xì nècuàchimà: “Naha-nsiá cundoo-nda cudíi ini-ndà, vächì sàni natùì dihùn xì ni ndañuhu ni cuí”, cachí-nè.

¹⁰ Te cachí stnáì xi-nsiá, ducán cudíi stná ini nsidaa ángel xi Dios nú ni sàà iin nècuàchi iá cuàchi-xi cuu-ne arrepentir.

Ejemplu nacání sàhà dèhe ni sàhàn xicà

¹¹ Dandu ni cachí stná-yà:

—Ñisa ìa iin tiàa ndoó ùi dèhe-xi.

¹² Te ni cachí tèchicá chii xi yua-té: “Papá, taxi-ní ñà-ndúú tàhvi niñi-nsí nùù-ní”. Ñàyücàndúá, ni sàha-ne iin iin-tè ñà-ndúú tàhvi-té.

¹³ Cóni yáha cuahà quivi, te ni dàtácá tèchicá chii ma nsidaa ñà-icúmí-tè, te cuahàn xicà-té inga ñuu. Yucán ni quida ndevàha-tè gastu dihùn xí-te, ni quihvi-tè cuahà viciu.

¹⁴ Daaní, na ní nsihí dihùn mà, ni quixi fuerte tnama ñuu yucán, te ni quesaha-té ni ndundahví-te.

¹⁵ Ñàyücàndúá, cuahàn-te nùù iin lamú ñuu yucán, te ni niñi-té chuun nùù nècuàchimà, ni techuún-nète cuahàn-te campu dacaxáhan-tè cochi.

¹⁶ (Ñàyücàndúá, yucán iá-te campu mà), dècuèndè nchichí yùcù saxí cochi-mà cahan stná-te caxí-té, doco còò ni-iin nèhivi sàha xi-té ni-iñàha.

¹⁷ Dandu ni nàcùnihnu sahnú inì-te, te ni cachí-te: “Cuahà gá peón ndoó vehe yué, te iá cuahà ñà-cutiacu-nè, dècuèndè cuyódo gá-ñà nùù-né. Doco yùhù, yohó ié’ ndè cuní cui quidá doco.

¹⁸ Chicá vaha naquihìn ichì nùhì ndé iá papá xi, te cachí xi-né: Papá, nsidá cuàchi nùù Dios, te nsidá cuàchi stnáì nùù mii-ní.

¹⁹ Ní mà natùì cunduu guè nahi dèhe-ní; nahi peón xi-ní cundui quida-ní cuenta”. Ducán nacání inì-te entre mii-té.

²⁰ Ñâyùcàndüá, ñi naquihin-tè ichì mànuhù-té ndé iá yua-té.

“Te xica ñi vaxi-tè ndé iá nècuàchimà, te ñi xini-nète. Dandu ñi cuhi ini-nète, te ñi dàyàà-nè cuàhàn-nè ñi numi nihni-nète. Ñi tutuyuhu tnahá-né nùd-né.

²¹ Dandu ñi cachi dèhe-nemà xi-né: “Papá, nsidá cuàchi nùu mii-yá iá ansivi, te nsidá cuàchi stnái nùu mii-ní. Mà nátüi cunduu guè nahi dèhe-ní”, ñi cachi-te.

²² Doco yua-té, ñi cachi-nè xi peón xi-ne: “Tavà-nsiá sicoto chicá finu, te chindixi-nsiàte; te ñi cúnacáá stnái iin anillu ñinindáhá-te; ñi nácuáin stnái-te iin ndisàn.

²³ Te cundaca stnái-nsia chelù ndatnù quixi cui-si quida-nda vicò.

²⁴ Vàchi sàni xihì dèhi yohó cahín, doco vichi (sàni nsiaa-te) na iin tiàa ñi natiacu. Sàni ndañuhu-té ñi cuí, doco vichi sàni natüi-tè”, ñi cachi yua-té. Te nsidaa nècuàchi ndoó yucán, ñi quesaha-né ñi quida cahnú-né vicò mà.

²⁵ “Daaní, dèhe sahnú nècuàchimà, iá-te nùu itú. Te ñi naquihin-tè ichì màndixi-tè. Te na ní cuyatni-tè vehe, ñi tiacù-te quidándáá nèhivi, te itásáhá stnái-né.

²⁶ Ñâyùcàndüá, ñi cana-tè iin peón; ñi xicàn tñuhù-tè nùu nècuàchimà, cachí-te: “¿Ndíá ndüá cùu-guá vehi?”

²⁷ Dandu ñi cachi peón mà xi-té: “Sàni nsiaa ñani-ní, ñâyùcàndüá ñi cachi yua-ní ñà-ñi càhni-nsí chelù ndatnù, vachi sàni natüi dèhe-ne, te còò ni-ñàhà ñi cuu xi-té”.

²⁸ Ñâyùcàndüá, ñi xidá ini ñani sahnúmà, có-cùni-te nansihvi-tè vehe. Dandu ñi quee yua-té ñi càhàn vii-né xi-té.

²⁹ Doco ñi cachi-te xi-né: “Cunaha-ní, sàcání cuia ié nùu-ní quidáchuín, te iníni nsidan-icuú ñà-ndüá cachí-ní xí; doco tñáha ga dacútahvi-ní yùhù ñi-iin litú quida stnái vicò xi amigo xi.

³⁰ Doco vichi sàhà ñà-ñi nsiaa tè-ndüú dèhe-ní yohó, (ñâyùcàndüá quidà-ní iin vicò cahnú), dècuèndè ñi xihì stnái chelù ndatnù xi-nda sàhà-té, mate nduú-te iin ana ñi quida uun gastu xi biene xi-ní sàhà ñahà xi-te”, ñi cachi dèhe sahnuma.

³¹ Dandu ñi cachi yua-té: “Yohó, dèhi nduú stnáu. Siempre ió xí. Te nsidaa ñà-ndüú biene xi, stoho stnái nduú stnáu.

³² Doco vitni ndíá icà-nda quida-nda vicò, te cudíi ini-ndá, vachi tè-ñanù yohó, ñi xihì-te cahín, doco vichi yohó iá-te na ian ñi natiacù-te; sàni ndañuhu dahuun-tè ñi cahín, doco còò, sàni nsiaa-te vichi”.

16

Ejemplu nacání sàhà mayordomu cóni quidá ví

¹ Dandu ñi cachi Jesús xi nècuàchi dacuahá-yá:

—Iin nècuàchi cuicà, ñi la iin mayordomu xi-ne, te ñi cachtinùhu nèhivi xi-né: “Cò-quidá ví mayordomu xi-ní xi biene xi-ní”.

² Ñâyùcàndüá, ñi cana-ne temà, cachi-né xi-té: “¿Nansa iá ñà-ndüá quidà-ní? vachi càhàn tñuhù nèhivi sàhà-ní nù. Pues vichi icúmi-ní quida nsihí-ní entregar cuenta xi-ní nù, vachi cuàhin taví mii-ní nùu chuun xi-ní ñà-ndüú-ní mayordomu”, ñi cachi-né.

³ Ñâyùcàndüá, ñi quesaha-témà nacání inì-te, cachí-te inì-ni mii-té: “¿Nansa quide vichi? vachi cuàhàn lamú xi dacúxió-né yùhù nùu chuun xi. Ndahví, vachi còò valor xi quidachuín xi pala. Vihini càcàn stnái caridad, doco cucáhàn nùí.

⁴ ¡Áá! Vichi sàni cundaà ini nansa quide, te cundoo ana cuàha lugar coi vehe-xi na quei nùu chuun xi”, ñi cachi-te.

⁵ Ñâyùcàndüá, ñi cana-tè iin iin nèhivi inihíca nùu lamú xi-tè. Te ñi ndacàtñuhù-tè nùu nècuàchi primeru mà: “¿Nadaa inihíca-ní nùu lamú xi?”

⁶ Te ñi cachi nècuàchimà: “Iin cientu tonel aceite inihíqué”. Dandu ñi cachi mayordomu mà: “Tñii-ní cuenta xi-ní, coo-ní yohó, te yàchi natiaa-ní cuenta xi-ní ñà-cundua cuisí ùi dico ùxin (50) tonel vichi”.

⁷ Dandu ñi cachi-te xi inga-nè: “Te mii-ní, ¿nadaa inihíca-ní?” Te ñi cachi nècuàchimà: “Iin cientu carga nùni trigo inihíqué”. Dandu ñi cachi-te: “Tñii-ní cuenta xi-ní, te natiaa-ní cùmi dícó (80) carga-ní”.

⁸ Daaní, lamú xi-té, ñi cundaà ini-nè ñà-ndüá quidá-te. Ñâyùcàndüá, ñi cachi-nè xi-té sàhà-ñá cóni quidá ví-té: “¿Na nchichí guá ñi quida-ní?” ñi cachi-nè. Vachi cunaha-nsiá, nèhivi nihnú inì-xi cuisí ñuhiví yohó, chicá cuehé-nè nùu chuun xi-ne entre nsidaa mii-né, te chicá mà cuehé nèhivi datnúú Dios sàxinítnùnì-xi.

⁹ Te yùhù cachí xi-nsiá: mate dava-tè, có-quidá ví-té xi dihùn xi-te, doco mii-nsiá, xiñuhu cuichuún ví-nsiá ñà-cuicà-nsiá sàhà-ñá naquimanì nèhivi-nsiá, dandu na quívì nsihí dihùn xi-nsiá mà, vätùnì cuàha Dios sàa-nsiá nùu-yá vehe ndiaha-yá nicanicuahàn.

¹⁰ Nú sàni ñihì iin ñèhivì iin chuun tii, te quidá víi-nea, dandu ñà-jaàn cundaà ini-ndà vətùni quida vïi stnà-nè iin chuun chícá cahnú. Te ò nú có-quidá víi-né chuun tii ma, dandu ni mà quidá víi stnà-nè iin chuun cahnú.

¹¹ Ñàyücàndüá, nú icúmí-ndá ñà-cuicà ñuhivì cuàchi yohó, te có-quidá víi-nda xán, dandu còò iin cuàha xi-nda ñà-ndüü ñà-cuicà ndiaha ndisa.

¹² Te nú có-quidá víi-nda chuun ñà-cundiaa-ndà biene xi inga ñanitnaha-nda, dandu còò iin cuàha xi-nda ñà-cunduu biene xi mii-nda.

¹³ 'Iin tè-quidáchuùn, mà cúí coo ùi patrón xi-tè, vàchi nú ducán, dandu icúmí-tè cuni ùhì-te iin-ne, te inga-nè cuu ini-te sàhà-xí. Te ò ni cachí-ndá, iin-ne coo vaha xi-té, te inga-nè cahíchì ini-te. Te ducán stnà mii-nsiá, nú cuú ini-nsiá sàhà ñihùn, dandu mà cúí cunucuachi stnà-nsiá nùù Dios —ni cachi Jesús.

¹⁴ Daaní, nècuàchì fariseu, itá stnà-nè yucán, iníní-né nsidaa ñà-ndüá cachí-yà, te ni sàcündiaa-neyà, vàchi cuàhà gá cuú ini-nè sàhà ñihùn.

¹⁵ Ñàyücàndüá, ni cachi-yà xì-né:

—Mii-nsiá, nùù ñèhivì cuní-nsiá ndee vaha-nsia, na ian ni cündüü-nsiá ñèhivì váha guá. Doco Dios, ináhà-yá ñà-ñühù ini anima-nsiá. Vàchi ñà-ndüá chícá xihò nècuàchì ñuhivì yohó, có-nàtùia nùù mii-yá, vàchi ñà-chícá có-íá vaha nduá nùù-yá.

Iin palabra ni cachi Jesús sàhà ley xi Moisés xi sàhà ñuhivì ùi xí Dios

¹⁶ 'Inii tiempu antes quesaa Juan (Bautista) ni sandiaa ley (xi Moisés) xi stnà palabra ni cachi profeta nisa cahàn cuenta xi Dios. Doco tiempu xi Juan vaxi duha ni quesaha xitíá cuentu sàhà ñuhivì ùi xí Dios, te vichi nsidaa ñèhivì, quidá-né lucha sàà-nè ñuhivì ùi mà.

¹⁷ 'Doco ley (sànahà) ma, nicanicuahàn cundua iin ley vaha; vàchi ni-iin seña tii xí iin letra xan, mà nunca sàà ndañuhá. Chícá mà ùhì ndañuhu ansivi xi ñuhivì, doco ley mà, nicanicuahàn coa.

Nansa ni cachi Jesús ñà-mà váha cate tnàhà-ndà

¹⁸ 'Nú ni caté stnahá iin tiàa xi ñahàdihí-nè, te coo-ne xi inga nècuàchì ñahà, cuàchi ndisa cundua. Te nú ni nándàhà stnà iin nècuàchì tiàa xi iin nècuàchì ñahà ní sate stnahá, divini cuàchi cunduu stnà mà.

Nansa ni cuu xi iin tècuicà xi stnà iin nècuàchì ndahví nani Lázaro

¹⁹ 'Nisa ia iin tècuicà, ndixí-te sicoto cuxín finu, xi cuàhà gá sicoto chícá vii. Te nsiquívì nisa quida-tè vicò cahnú vehe-tè.

²⁰ Te nisa ia stnà iin nècuàchì satú nani Lázaro, indúhu-né yehè cahnú tècuicà mà, te itándiaa chitu nsihì uhi icà-né.

²¹ Te cuni-nè ñihì-nè pedazu cuati comida cóyo nùù mesa xi tècuicà mà cuxi-ne. Dècuèndè stnà sihina, vaxi-si ndé iá-nè, te nacuahá yáa-si nsihì uhi icà-némà.

²² Daaní, ni sàà quivi ni xihì-nè, te ni caquixi ángel ni nacua-ne anima nècuàchì mà cuàhàn-nè ndé iá xii-ndà Abraham. Daaní, después ni xihì stnà tècuicà mà, te ni ndùxin-tè.

²³ Dandu (ni sàà-tè) ndé ndoó anima nècuàchì xinduu nsii. Te yucán ni quesaha-tè ndohò cuàhà-té. Dandu ni ndacoto-tè ni xini xicà-té yucán iá Abraham, te yatni uun iá stnà Lázaro.

²⁴ Ñàyücàndüá, ni ndàhì ndee-té, cachí-te: “¡Abraham! ¡Xii-nsí nduu-ní! Cundehe ndahví-ní yühù; techuun-ní Lázaro quixi-ne dandaxín-né ñimindàhà-nè tècuí, te danchico-ne yáf, vàchi yáha ga ndohí ié mahi ñuhu yohó”.

²⁵ Doco ni cachi Abraham: “Nsinuu ini-ní, hijo, vàchi na nisa itiacù-ní ñuhivì, vaha vida nisa icumí-ní. Doco Lázaro yohó, còò; yáha ga ndahví nisa yàha-ne. Doco vichì sàni ñihitáhvi-né cudii cuàhà ini-nè, mientras mii-ní, icúmí-ní ndoho-ní.

²⁶ Te iá stnà inga iñaha, vàchi mahi nsiühù yohó xi mii-nsiá jaàn iá iin yui cahnú cunú sàstnühù. Ñàyücàndüá, mate ni cùcàhàn-nsí yàha-nsi ndé iá-ní, doco mà cúí; te stnà mii-nsiá, mà cúí yàha stnà-nsiá ndé ndoó nsiühù yohó”.

²⁷ Dandu ni cachi tèmà: “Pues, nú ma cúí, dandu sacúndahví nùù-ní, tío Abraham; techuún sacù-ní Lázaro nühù-nè vehe papá xi.

²⁸ Vàchi yucán ndoó ñhùn ñani, te cuní càhàn Lázaro xi-té ñà-màsà quixí stnà-te lugar yohó ndé ndohò guá-nsí”.

²⁹ Dandu ní cachi Abraham xi-té: “Sà-icúmí-tè libru ùi ni tiaa Moisés, xi stnà libru ni tiaa nècuàchì profeta. Ni cuníní-te ñà-ndüá cachí nùù tutu mà”.

³⁰ Dandu ni cachi-te: “Còó, tío Abraham, vàchi nú ni nátiácú iin nsii, te sàà-nè càhàn-nè xi-té, dandísá, icúmí-tè cuu-tè arrepentir”.

³¹ Doco ni cachi Abraham xi-té: “Nú có-cuní-te cunini-tè ñà-ndüá ni cachi Moisés, te ni ñà-ndüá ni cachi profeta, dandu mà sàà-te naxicocuñ inì-te mate ni nátiácú iin nsii (càhàn xi-té)”.

17

Cuàhà gá ni coo-nda cuidadu, còtó quida-nda iin cuàchi

¹ Dandu ni cachi Jesús xì nècuàchi dacuahá-yá:

—Ñà-ndáa nduá, icúmi dava nèhivi tùcù-nè ichi có-ndiáá quida ñanitnaha-ne. Doco ndahví nècuàchi datùcù tñàhà-ximà.

² Vàchi chicá vaha ni mácùndiacu iin yùù yódò dùcùn-né, te ndiachi-né mahi mar sàhà-ñà màsà datùcù-nè ni-iin ña-cuati yohó.

³ Ñàyùcàndúá, cuidadu cundoo-nsia sàhà ñà-ndúá quidá-nsiá.

⁴ Nú quidá iin ñanitnaha-nsia cuàchi nùù-nsiá, dandu càhàn-nsiá xì-né sàhámà. Te nú ni nàxícócuñ inì-né sàhà ñà-ndúá ni quida-ne, dandu cuicahnú inì-nsia sàhà-né.

⁵ Mate usà xichi iin quivì ni quidá-né iin cuàchi nùù-nsiá, có-quidá, vachi nú cada iin iin xichi vaxi-ne cachí-nè ñà-cuù-né arrepentir, dandu icúmi-nsiá cuicahnú inì-nsia sàhà-né —ni cachi Jesús.

Vàtùni quida stná-ndà milagru nú nihnú vaha ini-ndà mii-yá

⁶ Dandu nècuàchi ni nihì chuun nùù Stoho-ndà Señor, ni xicàn tàhvi-né nùù-yá, cachí-né: —Chindee-ní nsiùhù ñà-ni sáa-nsi cunindisá ví gá-nsi.

⁷ Dandu ni cachi-yá xì-né:

—Cuati lihngu tata yutnù nani nù-mostaza. Te ñà-yòhò cachí xì-nsiá: nú xiníndisá ndisa-nsia, mate (iyuhu nduá) nahi tata mà, dandu dècuèndè vátùni dandacú-nsiá nùù yutnù nahi yutnù fruta jaàn ñà-ni ndánchító-nu yohó, te cùhùn-nu ndiachi-nú mahi mar, dandu seguru ducán icúmi coo.

Ejemplu sàhà peón quidáchuùn nùù-ndà

⁸ Ni cachí-ndà iá iin peón xi-nda, te quidachuùn sáin-te nùù-ndà. Te vihini xitú-te, o ndiáa-te quisi xi-nda. Doco nú ni nsiaa-te vehe, ¿a cachí-ndà xì-té ñà-ni cùhùn-te cudamá-te?

⁹ Còó, dohó cuàhàn-ndà cachi-ndà xì-té: “Quidayucùn-ní ñà-cudamí, dandu nsidavii-ní mii-ní, te taxi-ní ñà-cuxi, te cohi. Doco mii-ní, dècuèndè después icúmi-ní cuxi-ní”, cachi-ndà xì-té.

¹⁰ Pues, ¿a náquímá-ni-ndà peón mà nú sàni quida-tè nsidaa ñà-ndúá ni ndacu nùù-té? Ádi coó.

¹¹ Pues divi ducán stná xì mii-nsiá, vachi nú sàni nsihì ni quida-nsia nsidaa ñà-ndúá ni ndacu nùù-nsiá, dandu icúmi-nsiá, cachí-nsiá: “Còò ni-ñàhà ni quidá-nsi, cuisì ñà-ndúá ndiá icà-nsi ni quida-nsi”, —ni cachi Jesús.

Nansa ni dàndúvaha Jesús ùxin tiàa ndohó cuèhè lepra

¹² Nchicùn Jesús ichi Jerusalén cuàhàn, te ni yàha-ya ladu Galilea xì stná ladu Samaria.

¹³ Te na ní sàa-yá iin ñuu tii ni xini-yá yucán vaxi ùxin tiàa ndohó cuèhè lepra. Itá xica-né,

¹⁴ cána ndee-né, cachí-né:

—¡Stoho-nsi Jesús! ¡Cundehe ndahví-ni nsiùhù!

¹⁵ Daaní, na ní xini Jesús nècuàchimà, ni cachi-yá xì-né:

—Cuahán-nsià dacuní-nsià dùtù icà-nsiá.

Ñàyùcàndúá ni caquihin-ne ichi cuàhàn-nè. Te meru xicá-né ichi mà, dandu ni nduvàha nsidaa-né.

¹⁶ Te iin-ne, na ní xini-nè sàni nduvàha-ne, ni naxicocuñ-nè, ni ndenihi vaha cuahà-né Dios, ndee càhàn-nè.

¹⁷ Te ni sàcuñ sisi-né nùù-yá, naquímá-ni-néyà. Te nduú-né iin nècuàchi ñuu Samaria.

¹⁸ Dandu ni cachi-yá xì-né:

—¿Amadí ùxin tiàa ni nduvàha? Doco 9 nècuàchi dava ga mà, còò-né ni nàxícócuñ.

¹⁹ Cuisi mindaa nècuàchi tùcù yohó ni naxicocuñ naquímá-ni xì Dios.

²⁰ Dandu ni cachi-yá xì tiàa ni naxicocuñ mà:

—Ndacuñ-ní xuhun-ní vehe-ní. Vátùni ni xinindisa-ní, te ñàyùcàndúá ni nihì-ní ni nduvàha-ní.

Nansa icúmi cuu quivì naxicocuñ Jesús ñà-cusahnú-yá nùù ñuhivì yohó

²¹ Daaní, ni ndàcàtnùhù nècuàchi fariseu nùù-yá indù tiempu sàa quivì cusahnú Dios ñuhivì yohó. Te ni cachi-yá xì-né:

—Màdiá nduchinúù-nsiá cuni-nsiá ñuhivì ì xì Dios.

²² Mà cùndúámà ñà-cachitnùhu nèhivi xì-nsiá, cachí-nè yohó iá ñuhivì ì mà, te ò yucán iá. Còó, vachi yohó mahi mii-nsiá iá ñuhivì ì mà.

²³ Dandu ni cachi-yá xì nècuàchi dacuahá-yá:

—Vàxi iin tiempu na yáha ga cunì-nsia cundua tiempu ndiaha (naxicocuñin) yùhù ana nduú Tnaha Nèhivi Ñuhiví, doco tañáha ga sàa cundua tiempu mà.

²³ Te nú cachi nèhivi xi-nsiá ñà-yòhó sàni naxicocuñin, te ò yucán ié', màsà cùhùn-nsiá xi-né, màsà cùnhícùn-nsiànè.

²⁴ Váchì na ian tása, te natnuú fuerte inicutu ansivi ndè iin ladu xi ndè inga ladu, ducán icúmi cuu stná xi yùhù na sàa quivi xí, (te cundehè nsidaa nèhivi yùhù).

²⁵ Doco antes, cuàhà ñàha icúmi ndohi; vachi icúmi nèhivi tiempu vichi cahíchi ini-nè yùhù.

²⁶ Te nacua ni cuu tiempu xi Noé sàhana, ducán icúmi cuu stná na sàa meru quivi xí yùhù ana nduú Tnaha Nèhivi Ñuhiví.

²⁷ Váchì tiempu xi Noé mà nisa (ndoo cuéyàà nèhivi ñuhiví), xixí-né, xihí-né, te nándàhà-né. Te ducán nisa quida-ne dècuèndé ni sàa quivi ni quihvi Noé barcu cahnú, dandu ni quixi dàvi ni sahnì xi nsidaa nèhivi mà.

²⁸ Daaní, ducaní stná nèhivi ñuu Sodoma tiempu xi Lot sàhana, xixí-né, xihí-né, xiín-né, te dicó-né; xitú stná-nè, te quidávàha stná-nè vehe;

²⁹ doco divi quivi ni quee Lot ñuu mà, dandu ndè ansivi ni còyo ñuhu xi tàtnà cuaán sahán quini, te ni caxihì nsidaa nèhivi ñuu mà.

³⁰ Ducán icúmi cuu stná na quivi naxicocuñin, te cuni nèhivi yùhù.

³¹ Quivi mà, nú ndoo nèhivi ñinivèhé-né (quetátú-nè), te ini vehe ñuhú ñà-icúmi-nè, dandu màsà ndúlócò-nè sàhàmà. Cuisi-nì ni cùnù dèhé-nè chicá vaha. Te ò nú ndoo-né nùù itú, dandu màsà nàxícócùñin-nè vehe-ne.

³² Màsà nándódó-nsiá nansa ni cuu xi ñahàdihí Lot.

³³ Nsidaa ana cuní dacácu xi vida-xi, cutu-ñà dandáñuhú-nèàmà quea; doco nsidaa ana có-dàcácu xi vida xi, divi cunduu nècuàchi càcu.

³⁴ Yùhù cachi' xi-nsiá, na sàa ñuu naxicocuñin, dandu ndé quidí ùi nèhivi, icúmi cuxio iin-ne, te iin-ne ndòo.

³⁵ Te ndé ndoo ùi nècuàchi ñahà cutnàhà nchicó, iin-ne icúmi cuxio, te inga-nè ndòo.

³⁶ Te ndé ndoo stná ùi tiàa nùù itú, iin-ne cuxio, te inga-nè ndòo.

³⁷ Dandu ni ndàcàtnùhù-né nùù-yá, cachi-nè:

—Stoho-nsì Señor, ¿indú cuàhàn cuu ñà-jaàn?

Te ni cachi-yà:

—Cunaha-nsiá, (ducán iá nahi dichu cachi): “Ndé indúhu ñà-nì xihì, yucán icúmi nataca stná longo”.

18

Ejemplu nacaní sàhà iin nècuàchi ndahví ni sàhàn nùù iin juez cuehé

¹ Dandu ni nacani Jesús xi-né iin ejemplu ñà-cundaà ini-nè ñà-iin-ni icúmi-ndá càcàn tàhvi-ndá nùù Dios, te màdiá cuhuun ini-ndá.

² Dohó ni cachi-yà:

—Nisa ia iin juez iin ñuu; doco ni cóni sácáhví-té Dios, ni stná nèhivi.

³ Te divi ñuu yucán nisa ia stná iin nècuàchi ñahà ni xihì ùi-xí. Te sàhàn nècuàchìmà nùù juez mà, cachi-nè: “Nsidandaà-ní chuun xi, vachi iá iin nècuàchi xiní ùhì xí”.

⁴⁻⁵ Doco cóni cuní-te. Daaní, después ni nacani ini-te, cachi-te ini-ni mii-té: “Yáha ga sáhachuún ñahàcuàán yohó yùhù. Ñàyücàndüá mate có-càhví Dios, ni có-càhví stnái ni-iin nèhivi, doco cuàhìn nsidandaì chuun xi nècuàchi yohó, vachi cuñáñi ñà-tutoo quixi-guá-nè nùù”.

⁶ Dandu ni cachi Stoho-ndá Señor:

—Cundehè-nsiá nansa ni cachi juez mà, mate malu-nè, (doco icúmi-nè chindee-né nècuàchìmà).

⁷⁻⁸ Ñàyücàndüá, Dios, ¿áma nsidandaà stná-yà sàhà nèhivi ni nacàxin-ya nú ndui te ñuu xicàn tàhvi-né, te sacúndáhví-nè nùù-yá? Te ¿a caní tiempu cueé-yà, te sàa quivi nsidandaà-yà ducán? Còo, yáchì icúmi-yà nachitacùhá-yà sàhà-né, cachi' xi-nsiá. Doco quivi naxicocuñin yùhù ana nduú Tnaha Nèhivi Ñuhiví, ¿a ndísá cunindisá cuàhà nèhivi yùhù cahan-nsiá? —ni cachi Jesús.

Ejemplu nacaní sàhà iin nècuàchi fariseu cuadú, xi sàhà stná iin nècuàchi dachiyàhvi ni naxicocuñin ini-xi

⁹ Daaní, ni nacani-ya iin ejemplu sàhà nèhivi ndaníhí vaha guá xi mii-xí, te cahíchi ini-nè nècuàchi dava ga. Dohó ni cachi-yà:

¹⁰ —Ùi tiàa, cuàhàn-nè veheñuhu cahnú ñà-càcàntàhvi-né nùù Dios. Iin-ne nduú nècuàchi fariseu, te inga-nè nduú nècuàchi dachiyàhvi.

¹¹ Te nècuàchi fariseu mà, nì sàcuìin-nè yucán, te nì naquimani-nè Dios sàhà mii-né, cachí-nè: “Ansvéhé-nì Yua-nsí Dios, vâchi yùhù, có-quidá ndevàhi nacua quidá nècuàchi dava ga mà, te có-quidá cuihna stnáì ni-ìñàha, vâchi có-quidé ni-iin ñà-có-ndiá ìqué quide, có-câhin xì inga nècuàchi ñahà, ni có-quidá stnáì na quidá tè-dàchiyàhvi jaàn.

¹² Còò; nùù cada ùnà quivì inihíí íá dòquí ùì quivì, te nùù cada ùxin pesu quidè ganar, chivàha cúaín ian ñà-cunduu diezmu xan”, nì cachi nècuàchimà.

¹³ ‘Doco nècuàchi dachiyàhvi ma, xica íin-né, cucáhán nùù-né ndacoto-ne ansivi. Ñàyucàndüá, íin-ne, caní-né nchica-ne (ñà-cùù guá-nè sentir sàhà cuàchi-ne), te cachí-nè: “Yua-nsí Dios, cundehè ndahví-nì yùhù, vâchi nècuàchi cuàchi nduí”, nì cachi-nè,

¹⁴ dandu mànuhù-né. Ñàyucàndüá, yùhù cachí xì-nsiá, divì nècuàchi yucán nduú ana nì ndee vâha ndisa nùù Dios, te màdiá nècuàchi primeru mà. Vâchi nsidaa ana datiaá uun nduú nèhivì vâha guá, icúmí-né nducahan-ne; te nsidaa ana ndaníhí ndahví xì mii-xí, chicá icúmí-nè nihí-né tñùñuhu.

Nansa ni cachi Jesús ñà-màsà cádí-ndà nùù ñà-cuati ñà-cunchicuàn mii-yá

¹⁵ Daanì, ndacá nèhivì ñà-cuati xí-né vâxi nùù-yá ñà-chitàndòò-yá ndahà-yá òmí-vé. Doco na ní caxini nècuàchi dacuahá-yá, nì sadi-nè nùù nècuàchimà.

¹⁶ Ñàyucàndüá, nì cana Jesús ñà-cuati ma nì tñátua, te nì cachi-yá:

—Nacoo-nsia ñà-cuati nì quixá nùù. Màsà cádí-nsiá nùá, vâchi cuisì nècuàchi nihnú inì-xi nahi miá cunduu ana sàà ñuhivì ìì xí Dios.

¹⁷ Ñà-ndáà nduá cachí xì-nsiá, nùù ní coó (vítá inì) nèhivì nahi ñà-cuati, dandu nihí-né quihvi-ne ñuhivì ìì xí-yá, doco nú coó, mà sàà-nè yucán —nì cachi-yá.

Nansa ni cachi Jesús xì iin tèchii cuica

¹⁸ Daanì, nì càhàn iin tè-nihí chuun, nì xicàn tñùhù-té nùù-yá, cachí-te:

—Maestro, mii-ní vâha ndisa-ní. Cachi-ní xí ndiá quide, te nihitáhvì vida ndiaha nicanicuahàn.

¹⁹ Dandu nì cachi Jesús xì-té:

—¿Ndiá òsàhà-xí cachí-ní xí: “Mii-ní vâha-ní”? Vâchi còò ni-iin nèhivì uùn vâha ndisa, cuisì nú nduí Dios, dandu vâha ndisa inì.

²⁰ Pues vichì, sà-ináhá-ní nansa nì dándacù-yá ñà-màsà càhàn-ndà xì inga ana có-nduú nècuàchi vehe-nda; te màsà càhni stnaha-nda, nì màsà quidá cuihná-ndá, nì màsà cachí-ndà iin tñùhu sàhà ñanìtnaha-nda, te ní coó stná tñùñuhu xì-nda nùù yuadíhí-ndá.

²¹ Dandu nì cachi tu-tè xì-yá:

—Cunaha-ní, nsidaájàn sàni chivàhi dècuèndè na tíí.

²² Na ní inini Jesús ñà-nduá nì cachi-te, dandu nì cachi-yá:

—Cumáni gá inga ñàha quida-ní. Dicò nsihì-ní ñà-nduá icúmí-ní, te dasàn-ní dihùn mà nùù nècuàchi ndahví; dandisá nihitáhvì-ní sàà-ní ansivi, te yucán cucumi ndisa-ní cuàhà ñà-cuicá. Te quixi-ní cunchicùn stná-ní yùhù —nì cachi-yá.

²³ Doco tèmà, na ní inini-tè nì cachi-yá ducán, dandu yáha ga nì cuhuun inì-te, vâchi cuica cuàhà-té.

²⁴ Te na ní xini Jesús ñà-nì cuhuun guá inì-te, dandu nì cachi-yá:

—¡Na uhì guá sàà iin tècuicá ñuhivì ìì xí Dios!

²⁵ ùhì gá stná dayáha-nda iin camellu nùù chòcòhò ndúhu iquì; doco chicá ùhì yáha iin tècuicá ndè ñuhivì ìì xí Dios.

²⁶ Dandu nècuàchi xí-inini yucán, nì cachi-nè:

—Nú ducán nduá, dandu ¿nansa cui càcu anima iin nèhivì?

²⁷ Dandu nì cachi-yá:

—Ñà-nduá có-sàà nèhivì quida-ne, vâtùni quida Dios-ñà.

²⁸ Dandu nì cachi Pedro xì-yá:

—Nsiùhù, sàni nacoo ìì-nsí nsidaa ñà-nduá icúmí-nsí, te vâxi-nsi nchícùn-nsí mii-ní, Stoho-nsí Señor.

²⁹ Dandu nì cachi-yá xì nsidaa-né:

—Ñà-ndáà nduá cachí xì-nsiá yohó, nú nchícùn iin nèhivì ñuhivì ìì xí Dios, te sàhámà icúmí-nè nacoo-ne ñàha, (màsà ndúlócò-nè), mate ní nácóò-nè vehe-ne, ò yuadíhí-nè, ò ñani-nè, ò cùha-nè, ò ñahàdihí-nè, ò dèhe-ne, (có-quidámà),

³⁰ vâchi después yáha ga cuàhà gá más icúmí-nè nihitáhvì-né vida xì-ne ñuhivì yoho. Daanì, na sàà-nè inga ñuhivì vâxi xì-nda, dandu nihitáhvì stná-nè vida ndiaha nicanicuahàn.

Nansa ni cachi tu Jesús inga xichi ñà-icúmí-yá cui-yá, dandu natiacu-yá

³¹ Daanì, nì tavá cuaán-yá ùxin ùì nècuàchi dacuahá-yá, te nì cachi-yá xì-né:

—Cunaha-nsiá, ichì ñuu Jerusalén nchícùn-ndà vichì, te ñuu yucán icúmí cuu ndisa nsidaa ñà-nduá nì ttaa nèhivì xí Dios sàhà sàhà yùhù ana nduú Tnaha Nèhivì Ñuhivì.

³² Vâchi icúmí nèhivì dayáha-ne yùhù ndahà tè-inga raza ñà-cuàcùndiaà-te yùhù, te canàhá stná-te xí. Te icúmí stná-te sivi díí-te nù, te cahní cuií-te yùhù.

³³ Dandu después cahní-té yùhù. Doco tíxi ùni quivì icúmí natiacuí —ni cachi-yà.

³⁴ Doco nècuàchì dacuahá-yá, cóni cùndáa ini-nè sáhámà. Cóni sáa-nè mànihì ini-nè, vâchi nahì palabra dèhé nì sandua nù-né.

Nansa ni quida Jesús milagru ñuu Jericó, ni dânatûi-ya nùu iin nècuàchì cuaá

³⁵ Yatni iá-yà ñuu Jericó vâxi-ya, te yuhù íchí yucán iá iin nècuàchì cuaá xicàn xi caridad.

³⁶ Te na ní tiacu-nè yáha cuàhà nèhivì, dandu nì ndacàtnùhù-né ndiá nduá cuú.

³⁷ Te nì cachi nèhivì ñà-divi Jesús de Nazaret cuàhàn yáha.

³⁸ Ñâyùcândüá, nì ndàhi-nè, cachi-nè:

—¡Jesús! ¡Mii-ní descendencia ì xí David! ¡Cuhì inì-ní yùhù!

³⁹ Doco nèhivì idónuu (nùu nèhivì cuàhà mà), nì canàhá-nè xi nècuàchì cuaá mà, nì cadí-nè yuhù-né cachi nècuàchimà xi-né. Doco mii-né, chicá ndee nì ndàhi-nè, cachi-né:

—¡Mii-ní descendencia ì xí David, cuhì inì-ní yùhù!

⁴⁰ Dandu nì cucuiin Jesús, nì dândacú-yá ñà-nì cùndácá nèhivì nècuàchimà quixi. Te na ní tnàtuu-ne, nì xicàn tnùhù-yá nùu-né,

⁴¹ cachi-yà:

—¿Ndíá nduá cuní-ní quide?

Dandu nì cachi-nè xi-yá:

—Señor mío, cuní natùinuí.

⁴² Dandu nì cachi-yá xi-né:

—¡Ni ndúvaha nduchinúu-ní, cachí xi-ní! Vâchi ñà-sàni xinindisa-ní, ñâyùcândüá sàni nduvàha-ní.

⁴³ Dandu luegu nì natùinuú-né, te nì tenchicùn stná-nèyà, naquímáni-né Dios. Te nsidaa nèhivì nì xini ñà-ndüá nì cuu, nì ndenihì ndiaha stná-nèyà sáhámà.

19

Nansa ni xinindisá iin nècuàchì cuicà nani Zaqueo, te ni nanduu-ne iin nèhivì xí Jesús

¹ Na ní sàa-yà ñuu Jericó, nì yáha uun-ya inii ñuu mà.

² Te cunaha-nsiá, ñuu mà iá stná iin nècuàchì cuicà nani Zaqueo. Te chuun xi nècuàchimà nduá dandacú-né nùu dava ga tè-dàchiyàhvi.

³ Te cuní stná-nè cundehè-né Jesús ana nduú-yá. Doco mànicùí ñà-cuàhà guá nèhivì itá yucán, vâchi iin nècuàchì cuisì nduú-né.

⁴ Ñâyùcândüá, nì dayáa-né chicá nùu-xí, te nì nana-ne dòcò iin yutnù fruta tnuu, vâchi yucán icúmí Jesús yáha-ya.

⁵ Dandu na ní sàa-yà lugar mà, nì ndacoto-ya diquí-xí, te nì xini-yà nècuàchimà, dandu nì cachi-yá xi-né:

—Zaqueo, dansíhi-ní nuu-ní, vâchi vichì icúmí sài vehe-ní.

⁶ Ñâyùcândüá, vichì vichì nì nuu yàchì nècuàchimà, te ndacá-nèyà mànuhù vehe-ne, cudí ini-nè.

⁷ Doco nèhivì cuàhà mà, na ní xini-nè cuàhàn-yà xi nècuàchimà, dandu nì xitnùhu-neyà, índù chuun cuàhàn-yà vehe iin nècuàchì iá cuàhà cuàchì-xí, nì cachi-nè.

⁸ Daaní, (na iá-yà vehe Zaqueo mà), nì ndacuiin nècuàchimà, cachi-nè xi-yá:

—Señor mío, ñà-ndúú davatahvi biene xi cuàhìn dasín nùu nèhivì ndahví. Te nècuàchì nì dândàhví nì quihin dihùn-xí, cùmi tantu gá cuàhìn nacuàhi-nè.

⁹ Dandu nì cachi Jesús (xi nèhivì yucán):

—Vichì sà-íá salvación xi nècuàchì divèhé-xí yohó, vâchi nacua nì quida yohótèhè-ndá Abraham, ducán nì quida stná-né, (te sáhámà nì càcu-ne),

¹⁰ vâchi yùhù ana nduú Tnaha Nèhivì Ñuhiví, nì quesai ñuhiví yohó ñà-nanduquí ana nì tucù inga ichì, te dacácuì anima-nè —nì cachi-yá.

Ejemplu nacaní sàhà ùxin dihùn oro

¹¹ Daaní, nsidaa nèhivì yucán, ndoó-né iníní-né ñà-ndüá cachi-yá. Dandu nì nacani tu-ya xi-né inga ejemplu, vâchi sà-ítuú-yá sàa-yà ñuu Jerusalén, te tuxí ini-nè ñà-mà cuéé gá, te sàà tiempu ndiaha cusahnú Dios (ñuhiví yohó).

¹² Ñâyùcândüá, nì cachi-yá xi-né:

—Nisa ia iin dèhe rey, cuní-nè cùhùn xicà-né inga ñuu ñà-nihì stná-nè chuun dandacú stná-nè, dandu después ndixi-ne (cusahnú-né).

¹³ Ñâyùcândüá, (na táñaha ga quihin-ne ichì, dandu) nì cana-ne ùxin peón xi-ne, te nì sàha-ne iin iin-tè iin iin dihùn oro, te nì cachi-nè xi-té: “Inii tiempu dècuèndè quivì

naxicocuñin icúmí-nsiá quida-nsia lucha nducuahà dihùn yohó”, (ni cachi-nè xì-té, dandu cuàhàn-nè).

¹⁴ Doco nècuàchì ñuu-nè, sàhà-ñá có-xiñùhù-né nècuàchìmà, ñàyùcàndùá, ni techuún-né itnii nèhivi xí-né nihi-xi razón cuàhàn, te dohó cachí razón mà: “Cò-cùni-nsi cusahnú nècuàchì jaàn nùu-nsí”, cachá’.

¹⁵ Doco nècuàchìmà, vátùni ni nihi-né chuun cusahnú-né, te ni naxicocuñin-nè ñuu-nè mà. Dandu ni dàndàcù-né càna nsidaa peón ni sàha-ne iin iin dihùn mà, vàchi cuni-né cundaa ini-nè nadaa ni nandua.

¹⁶ Dandu ni tnàtuu tè-primeru, cachí-te: “Señor, imindaa dihùn oro ni taxi-ní, doco vichi sàni nandua ùxin dihùn”.

¹⁷ Dandu ni cachi nècuàchìmà xì-té: “¡vátùni íá! Peón vaha nduu-ní. Ñàyùcàndùá icúmí-ní dandacu-ní nùu ùxin ñuu nahnú, vàchi vii gá ni quida-ní xi iin chuun tii”.

¹⁸ Dandu ni tnàtuu peón ùi, cachí-te: “Señor, ni taxi-ní imindaa dihùn oro, doco vichi sàni nandua ùhùn”.

¹⁹ Ñàyùcàndùá, ni cachi-nè xì témá: “Mii-ní, icúmí-ní dandacu-ní nùu ùhùn ñuu nahnú”.

²⁰ Dandu ni tnàtuu inga peón, cachí-te: “Señor, yohó naquihìn-ní dihùn xí-ní, vàchi ni chivàhià nùu iin sìcoto.

²¹ Vàchi yúhí mii-ní. Ináhí nansa íá-ní, dana-ní, dècuèndè tùha stná-ní candiaà-ní iñàha mate cóni quidáchuún-ní, te tùha stná-ní quihìn-ní cosecha ndé cóni xitù-ní”.

²² Dandu ni cachi nècuàchì dàndàcù-mà xì peón mà: “¡Peón malu nduu-yó! Ináhú dana yùhù, te candiaí iñàha ndé cóni quidáchuún, te ndanihí cosecha ndé cóni xitú.

²³ Te nú ináhú ducán quidé, dandu ¿índù chuun cóni dàcùhùn dihùn xí nùu iin vehe ndé quidachuún-né xán, dandu na quívi nsiaí, vátùni nihi stnáí diquáá ni cui?”

²⁴ Dandu ni cachi-nè xì peón itá yatni ma: “Candiaà-nsia dihùn nùu tè-yohó, te cuàha-nsia nècuàchì icúmí ùxin dihùn oro jaàn”.

²⁵ Dandu ni cacachi peón mà xì-né: “Doco Señor, sà-icúmí nècuàchìmà ùxin-ñà vitni”.

²⁶ Doco ni cachi nècuàchì cusahnú-má: “Cunaha-nsiá, ana sà-icúmí algu vichi, icúmí-né nihi gá-nè más, te ana icúmí cui sí iyuhu iñàha, icúmí cuxio nsidaa ñà-ndúá icúmí-né.

²⁷ Doco nèhivi xini ùhi xí, te có-cùni-nè cusahnú nùu-né, cundaca-nsianè quixí nùu, te cahni-nsiánè yohó”, ni cachi rey mà.

Nansa ni cuu na ní sàà Jesús ñuu Jerusalén

²⁸ Daaní, ni nsihi ni nacani-ya ejemplu mà, ni quihin tu-ya ichi cuàhàn-yà Jerusalén, idónuu-yá nùu compañeru-yà cuàhàn-yà.

²⁹ Te sà-ítúú-yá sàà-yà ñuu cuati Betfagé xi Betania, frente yucù Olivo. Dandu ni càhàn-yà xì ùi nècuàchì dacuahá-yá ñà-ní cùhùn cueé-nè chicá nùu-xí.

³⁰ Te dohó ni cachi-yà xì-né:

—Cuahán-nsiá ñuu tii yatni yucán. Te na sàà-nsiá yucán, dandu icúmí-nsiá cuni-nsiá ndé nuhní iin burru chii. Burru tãñáha ga cuida nduú-si. Quisí yucán ndaxin-nsiá cundaca-nsia quixí.

³¹ Te nú ndàcàtnùhù nèhivi nùu-nsiá índù chuun ndaxin-nsiási, dandu cachi-nsiá xì-né ñà-Stoho-ndà Señor xiñuhu xi-sí —ni cachi-yà.

³² Dandu luegu ni caquihin ùi nècuàchìmà ichi cuàhàn-nè chuun ma, te ni xini-nè ñà-divi nacua ni cachi-yà xì-né, ducán ndisa ni ía.

³³ Te na meru ndaxin-nesi, dandu ni càhàn stohò-si xì-né, cachí-nè:

—¿Índù chuun ndaxin-nsiá burru yohó?

³⁴ Dandu ni cachi-nè:

—Stoho-ndà Señor xiñuhu xi-sí.

³⁵ Dandu ni saca-nesi cuàhàn-nè ndé ía-yà; te ni chindàndòò-né sìcoto xi-ne diquí-sí, te ni sàcùnùú-yàsi

³⁶ ni quihin-ya ichi cuàhàn-yà (ñuu Jerusalén). Te ichi yucán ndé yàha-ya ni chitànduhù nèhivi dòò-né.

³⁷ Te na sà-ítúú-yá nacataca-ya yucù Olivo yucán, dandu nsidaa nèhivi nchicùn xì-yá, ni quesaha-né cána fuerte-ne, naquimáni-né Dios sàhà ñà-cuàhà guá milagru ni quida-ya ni xini-nè;

³⁸ te palabra yohó nduá ni cachi-nè:

—¡Ndiaha gá rey yohó vaxi cuenta xi Stoho-ndà Señor! ¡Ndiaha gá ía paz ansivi! ¡Ndiaha gá quidá mii-yá ía diquí-xí! —ni cachi-né.

³⁹ Dandu dava nècuàchì fariseu cuàhàn mahi nèhivi cuáhà mà, ni cachi-nè:

—Maestro, càhàn-ní xì nèhivi xí-ní (ñà-màsà cachí-né ducán).

⁴⁰ Dandu ni cachi-yà xì-né:

—Cunaha-nsiá, nú ni cúdádí nècuàchì cána guá yohó, dandu fuerza icúmí càna stná nsidaa yùù ndoó yohó.

⁴¹ Daaní, nì sàà-yà yatni ñuu Jerusalén. Te nì indehè-yá ñuu cahnu-ma. Te nì sacu-ya sàhà nèhivi ndoó yucán,

⁴² cachi-yà:

—¡Ndahví-nsià! Vàchi meru quivì vaha xi-nsia nduá vitni. ¡A sácú vaha nú ni sàà-nsià cundaà ini-nsia nansa coo ndisa paz ñuu-nsia ni cui! Doco cóni cùndàà ini-nsia. Ñàyucànduá, vichi sàni ndòo dehámà nuù-nsiá, te mà nìhi gá-nsiá cundaà ini-nsia.

⁴³ Cunaha-nsiá, vaxi iin quivì caquixi contra xi-nsia, te natnahà-te ñuu-nsiá, dandu caquidavàha-tè nama orilla ñuu-nsiá ñà-cadi-te nuù-nsiá. Dandu nàà stnahá-te xi-nsiá nsidanicuú ladu.

⁴⁴ Te dacaá nsihì-tè vehe-nsia, te cahni nsihí stná-te mii-nsiá. Mà ndóo ga ni-iin yùù idótnahá víi yohó. Nsidaájàn icúmí cuu xi-nsiá sàhà ñà-cóni nácúni-nsiá ana dacácu xi-nsiá ni cui.

Nansa ni tavà Jesús tè-dicó xi tè-xiín fuera patiu veheñuhu

⁴⁵ Daaní, cuàhàn-yà veheñuhu cahnú, te nì taxi nsihí-yá tè-dicó xi tè-xiín ndoó yucán,

⁴⁶ cachi-yà xi-té:

—Dohó cachi Dios nuù tutu ì: “Veheñuhu xi, icúmíá cundua iin vehe ndé natácá nèhivi càcàn tàhvi núí”. Doco sàhà mii-nsiá sàni nandua na iin lugar ndé ndoó cuàhà tècuìhnà —nì cachi-yà.

⁴⁷ Daaní, nsiquívi sàhàn-yà veheñuhu cahnu-ma, te dacuahá-yà nèhivi. Doco dùtù xicusahnú, xi nècuàchì ley xi veheñuhu, xi stná nècuàchì nìhi chuun ñuu mà, nandúcu-né nansa cui dandáñuhú-néyà.

⁴⁸ Doco mànicúì nìhi-né nansa quida-neà, vachi nsidaa nèhivi cuàhà mà, iníni vaha-ne ñà-nduá dacuahá-yà.

20

Nansa ni cachi tè-xidandacú ñà-còò derechu xi Jesús quida-ya ñà-nduá quidá-yá

¹ Daaní, nì cuu iin quivì mà iá-yà dacuahá-yà nèhivi veheñuhu cahnu-ma. Te na meru càhàn-yà razón vaha xi Dios, dandu nì casaà stná dùtù xicusahnú, cutnàhà-né xi nècuàchì ley xi veheñuhu, xi stná nècuàchì xidandacú nuù ñuu mà,

² cachi-nè xi-yá:

—Cachì-ní xi-nsí ìndù nì nìhi-ní derechu quida-ní ñà-nduá quida-guá-ní. ¿Ana divi nì dándacú nuù-ní ñà-quida-ní ducán?

³ Dandu nì cachi-yà xi-né:

—Yùhù ndácàtnùhù stnáì nuù mii-nsiá iñàha, te cachi-nsiá xí.

⁴ ¿Ana divi nì dándacú-xi nuù Juan Bautista ñà-quida ì-né nèhivi? ¿A Dios nì cachi xi-né, te ò nèhivi ñuhivi?

⁵ Dandu nècuàchimà, nì candatnuhu tnahá nsidaa-ní mii-né, cachi-né:

—¿Ndíá cachi-ndà? Vàchi nú ni cachi-ndà divi Dios nì dándacú-xi nuù Juan, dandu cachi Jesús xi-ndà: “¿Índù chuun cóni xiníndisâ-nsiá nècuàchimà, nú ducán?”

⁶ Doco nú ni cachi-ndà divi nèhivi ùún nì cachi xi nècuàchimà, dandu cahni nèhivi-ndó xi yùù, vachi nsidaa-né ndenihí-né Juan mà ñà-nì sanduu ndisa-ne iin ana nìsa càhàn cuenta xi Dios —nì cachi-né.

⁷ Ñàyucànduá, nì naxiconihí-né nuù Jesús ñà-có-cùndàà ini-né ana divi (nì dándacú-xi nuù Juan mà).

⁸ Dandu nì cachi-yà xi-né:

—Nì yùhù, mà cáhí stnáì xi-nsiá ana divi nì dándacú-xi núí quide ñà-nduá quidé.

Ejemplu sàhà medieru malu

⁹ Dandu nì nacani-ya xi nèhivi iin ejemplu, te dohó nì cachi-yà:

—Nìsa ia iin lamú, te nì dándàdèe-ne nducu yohò si-úvà nuù ñuhù xí-né. Dandu nì tatu-né itnii medieru cundiaa xán, te cuàhàn xicà-né caní tiempu.

¹⁰ Daaní, después, na sàni sàà tiempu cùchi quisi vídì mà, dandu nì techuún-né iin peón xi-ne nuhù naquihin xi chíi fruta mà nuù medieru mà. Doco na ní sàà peón mà, nì casahnì cuií-tené, te nì taxi-téné, còò ni-iñàha nìhi-né nì násáá.

¹¹ Daaní, inga tu nì techuún lamú mà inga peón. Doco medieru mà, tucutu nì casahnì cuií-tené, nì quida quini-tè xi-né, te nì taxi tú-tené, còò ni-iñàha nìhi-né nì násáá tu.

¹² Daaní, ñà-ùni nì techuún tu lamú mà inga nèhivi, doco divini ducán nì cuu xi-né, dècuèndè nì dándacúhè tèmà-né, te fuerza nì tavà-ténè nuù ñuhù ndé iá ñà-tàt mà.

¹³ Ñâyücàndüá, nì cachi lamú mà: “¿Ndíá quide vichi? Ádi chicá vaha techuín dèhemaní nùhù-te, vachi vihini quidañuhu-té dèhi”, cachi-nè.

¹⁴ Doco medieru mà, na ní xinì-te vaxi dèhe lamú xi-tè, dandu nì candatnuhu tnahá-te, cachi-te: “Tè-yòhó nduú tè-icúmí ndutahvi xi ñuhù yohó. Vichi cahni-ndátè chicá vaha, dandu mii-nda nanduu-nda stoho ñuhù yohó”, nì cacachi-te.

¹⁵ Ñâyücàndüá, nì tava-té nècuàchìmà iladu nùu ñuhù mà, te nì casahnì-ténè.

‘Pues vichi, ¿ndíá ndüá icúmí lamú mà quida-ne xi medieru mà?’

¹⁶ Icúmí-nè nùhù-nè cahni nsihí-nète, dandu nanducu saa-né inga ana quidachuún ñuhù xi-né —nì cachi-yà.

Dandu nì cachi nèhivi xí-inini ma:

—¡Ay! ¡Ndíaha ñni Dios, màsà cùu ducán!

¹⁷ Dandu nì indehè-yánè, te nì cachi-yà:

—Nacua cachi nùu tutu ñi xí Dios, ña-jaàn nduá icúmí cuu, vachi dohó cachá’:

Ñi ña ñi cavà nì cahíchi ñni albañil. Doco vichi sàni sàà mà nì sàcùndua yùu vico esquina vehe.

¹⁸ Te nsidaa ana caquihì sàhà-xí cavà mà, icúmí-nè nacuehè-nè. Te nsidaa ana nacava cavà mà dìquì-xí, tàdi nchìhi-nè quida-mà —nì cachi Jesús.

Nansa nì cachi Jesús sàhà renta xi ñuu-nda

¹⁹ Dandu dùtù xí-cusahnú, xi nècuàchi ley xi veheñuhu ma, nì cuni-nè tñii-neyà hora mà, vachi nì cundaà ñni-nè ña-sàhà mii-né nì nacani-ya ejemplu mà, doco mànicuí tñii-neyà, vachi yúhí-nè nèhivi cuáhà mà.

²⁰ Ñâyücàndüá, nì techuún-né nèhivi cùhùn quida màña, datiaá uun-ne nduú-né nèhivi vaha, te cunini vaha-ne nansa cachi-yà, áma ñhìndèè-né cànhan tñuhu-ne sàhà ña-ndüá cachi-yà, te ducán tñii-neyà dayàha-neyà ndahà gobernador.

²¹ Ñâyücàndüá, cuàhàn nècuàchìmà nùu-yá, te nì ndàcàtnùhù-né, cachi-nè:

—Maestro, ñahá-nsí mii-ní, ana ndàa cuisì ñni-xi nduu-ní, te cuisì ña-ía vii dacuaha-ní nèhivi. Nì có-yúhí stná-ní nì-ñi nèhivi; cóò, vachi chináhà víi-ní ña-ndüú ichi vaha Dios.

²² Ñâyücàndüá, cuní-nsi cachi-ní xi-nsí, ¿a vátuni sáha Dios lugar ña-chiyàhvi-nda renta nùu rey cahnú César, á cóò?

²³ Doco Jesús, sàni cundaà ñni-yà ña-có-xícàn tñuhù sahnú ndisa-ne nùu-yà nduá. Ñâyücàndüá, nì cachi-yà xi-né;

—¿Índü chuun cuní-nsià quida-nsia màña nùí?

²⁴ Dacuní-nsià yùhù ñni dihùn cundehí. Bueno, vichi cachi-nsia xí’ ana ñinúú-xí, te ana dìquívì-xí itúú ñca dihùn yohó.

Te nì cachi-nè:

—Divi rey cahnú César.

²⁵ Dandu nì cachi-yà xi-né:

—Nú ducán nduá, dandu nacuaàha-nsia César ña-ndüá icúmí-nsià cuàha-nsiàte, te cuàha stná-nsià Dios ña-ndüá ndíá ñca-nsià cuàha-nsiayà —nì cachi-yà.

²⁶ Ñâyücàndüá, (nì cundaà ñni nèhivi nì ndàcàtnùhù mà) ña-mà cùì dadaná-neyà na cànhan-yà nùu nèhivi cuáhà mà. Ñâyücàndüá, nì ndulocó-nè, te dadí uun nì candòo-ne.

Nansa nì cachi Jesús ía nansa natiacu-nda

²⁷ Daaní, nì casaà itñii nècuàchi saduceu nùu-yà. Te nècuàchìmà, có-xiníndisá-né ña-icúmí-nda natiacu-nda. Ñâyücàndüá, nì xicàn tñuhù-né nùu-yà,

²⁸ cachi-nè:

—Maestro, ña-yòhó nduá nì tiaa Moisés quida-nda: nú sàni xihì ñni tiàa, doco cóò dèhe-ne nì ndóo (xi ñahàdihí-nè), dandu icúmí ñani nsii ma nandàhà-né xi ñahàcuààn mà áma cóò ñni dèhe-ne; dandu quida-nda cuenta na ñan dèhe nsii ma nduú mée mà.

²⁹ Pues cunaha-ní, nì sandoo usà ñaní. Te nècuàchi chicá sahnua-ma, nì nandàhà-né xi ñni nècuàchi ñahà, doco nì xihì-nè, te cóò dèhe-ne.

³⁰ Dandu ñani-nè chicá nchìcùn gà mà, nì nandàhà stná-né xi nècuàchìmà, doco nì xihì stná nècuàchi ùi mà, te cóò stná dèhe-ne.

³¹ Daaní, nì nandàhà nècuàchi ùni xi ñahà mà, doco nì xihì stná-nè; te divi ducán nì cuu xi nsí-usà ñaní mà; doco divini, cóò nì-ñni dèhe nsidaa-né.

³² Daaní, último nì xihì stná nècuàchi ñahà.

³³ Ñâyücàndüá, na sàà quívì (cachi-nsià) natiacu nsii, ¿Índü tiàa ma nacuaça xi nècuàchi ñahà mà ña-nsi-usà-nè ñni ña xi-ñá? —nì cachi-nè.

³⁴ Dandu nì cachi Jesús xi-né:

—Ña-ndaà nduá, tùha nèhivi ñuhiví yohó nandàhà-né.

³⁵ Doco nèhivi natùu natiacu cundoo inga ñuhiví, mà nándàhà gà-nè.

³⁶ Ni mà cúí gá-nè, vâchi cuâhàn-nè ndudava-ne xî ángel, cunduu-ne dèhe ndisa Dios, vâchi ñà-sàni natiacu-nè cundua.

³⁷ Doco sàhà chuun ñà-natiacu-ndà, claru ni cachi Moisés sàhà sàhà ñà-jaàn na ní nacani-ne sàhà yutnù tii (xixin); ni cachi-nè ñà-divi Stoho-ndà Señor nduú Dios càhvi nsi-Abraham, xî nsi-Isaac, xî nsi-Jacob.

³⁸ (Ñàyùcàndüá, itíácú ì nsii ma), vâchi nècuàchi ni xihì dahuun ndisa, mà cúí cahvi-né Dios; còò, cuisì nèhivi itíácú càhvi xî-yá. Vâchi nùù mi-yá, itíácú nsidaa ana nduú nèhivi —ni cachi Jesús.

³⁹ Dandu ni naxiconihí dava nècuàchi ley xi veheñùhu, cachí-nè:

—Vâtùni cachí-ní, Maestro

⁴⁰ Daaní, ni nsihì ni càhàn-yá xî-né ducán, còò gá iin ni sàhandee inì-xi ndàcàtnùhù gá xî nùù-yá sàhà ni-ñàhà.

¿Ana divi nduú yohòtéhè Cristu?

⁴¹ Dandu ni cachi Jesús xî nèhivi cuàhà mà:

—Cachí nèhivi, yohòtéhè xii-ndà David cunduu (rey ndiaha nani) Cristu. Doco ¿nansa iájàn?

⁴²⁻⁴³ Vâchi mii David mà, ni tíaa-ne nùù libru ì nani Salmos, te dohó ni cachi-nè:

Ni càhàn Yua-nda Dios xî Stohi (divi Cristu), ni cachi-yá: “Yohó coo-ní ladu cuahí ndé cachi sàà cundeí nùù nsidaa ana xíní ùhì xî-ní, dandu cusahnú fuerte-ní nùù-né”, ni cachi Dios.

⁴⁴ Cundehè-nsiá, ni cachi David ñà-Stoho-nè nduú Cristu. Doco nú ducán nduú-yá, dandu ¿índù modo cunduu stná-yá iin descendencia xi-ne? (Doco ñà-ndáá nduá.) —ni cachi Jesús.

Ñà-ndüá ni cachi Jesús sàhà nècuàchi ley xi veheñùhu, ñà-cò-quidá-né cumplir, cachí-yá

⁴⁵ Daaní, ni cachi-yá palabra yohó xî nècuàchi dacuahá-yá, iníní nsidaa nèhivi yucán:

⁴⁶ —Còtò quida-nsia na xíquida nècuàchi ley xi veheñùhu, vâchi ñà-dii xî-né nduá canuuo-ne cundixi-ne sicoto quihín vico, te casàhú tñùùhu nèhivi xî-né yàhvi. Te na sàhàn-nè veheñùhu, ò ndoó-né iin vicò, dandu nandúcu-né lugar ndé chicá ndiaha cundoo-ne.

⁴⁷ Te tùha stná-nè (tnii diqui-né ley, te) xidándiáá-nè vehe nècuàchi ni xihì ì-xí, dandu después sàcuíta-ne nacuatú cuàhà-né na ian ndisa vaha guá-nè. Sàháyùcàndüá, iin castigu chicá fuerte icúmí-nè nihi-né —ni cachi Jesús.

21

Nansa ni nacuni Jesús cuàhà gá ndiáá promesa tii ni sàhà nècuàchi ñahà ndahví

¹ Iá-yá veheñùhu cahnú, te ni ndacoto-ya ni xini-yá daquéé tècuicà promesa xi-tè ini alcancia xi Dios.

² Te ni xini stná-yá iá iin nècuàchi ñahà ndahví ni xihì ì-xí, te ni dàquéé-ne ùì ñà-ùhùn centavu.

³ Dandu ni cachi-yá:

—Ñà-ndáá nduá cachí xî-nsiá, chicá más nduá ni sàhà ñahà ndahví jaàn nùù ñà-ni sàhà nsidaa gá nèhivi yucán.

⁴ Vâchi nsidaa gá-nè, cuisì ñà-cuyódo nùù-né nduá ni sàhà-ne. Doco nècuàchi ñahà yohó, mate ndahví dahuun-ne, doco ni sàhà-ne nsidanicuú dihùn sàhà ñà-cuiin-ne ñà-cutiacu-nè.

Ñà-ndüá ni cachitnùhu Jesús icúmí cuu xi veheñùhu cahnú iá ñuu Jerusalén tiempu xi-ya

⁵ Daaní, ni quesaha dava-ne ni càhàn-nè sàhà veheñùhu cahnú, na cuaha guá iá yùù nahnú ni cuyucàn, te na cuaha guá iá promesa ni sàhatahvi nèhivi ni nducutá, cachí-nè. Ñàyùcàndüá ni cachi-yá xî-nè:

⁶ —Cunaha-nsiá, vâxi iin quivì icúmí nèhivi ducùn-né nsidaa ñà-ndüá indéhe-nsiá yohó, ni mà códotnahá gá ni-iin yùù yohó.

Ñà-ndüá cuàhàn cuu quivì vâxi xi-nda

⁷ Dandu ni ndàcàtnùhù-né nùù-yá, cachí-nè:

—Maestro, ¿índù quivì cuu ñà-ndüá ni cachí-ní jaàn? ¿Índù milagru coo ñà-cundaà ini-nsi sà-itúú quivì mà?

⁸ Dandu ni cachi-yá xî-né:

—Cuidadu cundoo-nsia màsà dándahví ni-iin nèhivi-nsiá. Vâchi cuàhà ana icúmí quixi danani uun nduú-né yùhù, te cachi iin iin-ne xî nèhivi ñà-Cristu nduú-né. Te ò cachí-nè: “Vichì ndisa sàni sàà quivì (xí-yá)”. Doco mii-nsiá, màsà cúnchícùn-nsiá nècuàchimà.

⁹ Te nú cunitnùhu-nsia iá cuàhà guerra, ò iá revolución, màsà yúhì-nsiá, vâchi fuerza icúmí cuu ducán primeru. Doco tãñaha ga nsihì tiempu yohó nduámà, iá gá ñà-vâxi cuu.

¹⁰ Dandu ni cachi stná-yá xî-né:

—Cunaha-nsiá, ñuu xì ñuu icúmíâ nàa stnahá. Te cuahà rey, icúmí-tê dandacú-te coo guerra xì inga ñuu.

¹¹ Te icúmí tnàa fuerte, te quixi stná tnama yohó te yucán, te coo cuahà stná cuèhè cuahà ñuu; te ndè ansivi icúmí coo cuahà seña nahnú dayúhí xì nèhivi.

¹² 'Doco na tãñâha ga cuu nsidaájàn, dandu icúmí nèhivi tnui-ne mii-nsiá, te quida quini-ne xi-nsiá, cundaca-ne mii-nsiá cùhùn nùù tè-xidandacú veheñũhu, te chicadi stná-nè mii-nsiá veheçaa. Te icúmí stná-nè datnátuu-ne mii-nsiá nùù rey xì nùù gobernador (ñà-daqueé cuàchi-ne diqui-nsiá). Nsidaájàn icúmí-nè quida-ne xi-nsiá sàhà ñà-nchícùn-nsiá yùhù.

¹³ Dandu cundua quivi quida tocar mii-nsiá datúi stná-nsiá nùù nsidaa-nè ñà-ndúá xiníndisá-nsiá.

¹⁴ Doco iin-ni cunihnu ini-nsiá; màsà nácání ini-nsiá nansa nachutnahá víi-nsiá palabra naxiconihí-nsiá nùù nècuàchi gobiernu mà,

¹⁵ vâchi mií, icúmí chindeí sãxínítnúni-nsiá ñà-vátùni càhàn nchichí-nsiá, te naxiconihí víi-nsiá nùù-né. Te mii-né, ni mà nánhi tnùni ini-nè nansa naxiconihí-nè nùù-nsiá. Còó, mà nihí-né nacahnù-nè mii-nsiá.

¹⁶ 'Daaní, ndè stná yuadíhí-nsiá, ò ñani-nsiá, ò tnaha ga-nsiá, ò amigo xi-nsia, icúmí-nè cahín stná-nè mii-nsiá nùù tè-xidandacuma; te dava-nsia icúmí-nè càcàn-nè ñà-cui-nsiá.

¹⁷ Te sàhà yùhù icúmí nsidaa nèhivi cuni ùhí-nè mii-nsiá.

¹⁸ Doco mà sãa-nsiá ndañuhu-nsiá (nù); ni-iin ididíni-nsiá mà ndáñũhú.

¹⁹ Te nú iin-ni ni cúníndisá-nsiá, dandu nihí-nsiá cutiacu ndisa anima-nsiá.

²⁰ 'Doco quivi cuni-nsiá inicutu sàni natnaha soldadu ñuu Jerusalén yohó, dandu ñà-jaàn cundaà iní-nsia sà-ítúú quivi cuahàn-te dandáñũhú-tê ñuu yohó.

²¹ Ñâyücandúá, na sãa quivi mà, ni cunúdehè nsidaa nèhivi ndoó ladu Judea yohó, te cundoo dehé-nè yucu. Te nècuàchi ndoó ini ñuu yohó, ni càqueé-nè fuera, te nècuàchi ndoó fuera, màsà nãnsihvi ga-nè ñuu.

²² Vâchi quivi yucán cunduu quivi nihí (cuahà nèhivi) castigu, te cuu ndisa nsidaa ñà-ndúá ni cachitnũhu tutu ì xì Dios sãnahá.

²³ 'ñdahví nècuàchi ñahà kuhí cuahàn tùinuù meé-xi! Te ñdahví stná nècuàchi icúmí xì meé chichi! Vâchi quivi yucán cuahà gá tnũndoho icúmí coo inicutu ñuu yohó; cuahà castigu icúmí nèhivi yohó nihí-né.

²⁴ Te cuahà gá-nè cui nùù guerra, te cuahà gá stná-nè cundaca-tè fuerza cùhùn ñuu xìcà (ñà-quadachuún-né). Te icúmí nècuàchi inga raza dandacú-nè nùù ñuu Jerusalén yohó deçuèndè nsihí tiempu iá permisú quida-ne ducán.

Nansa icúmí cuu quivi naxicocũñ Jesús

²⁵ 'Quivi yucán icúmí coo cuahà seña nùù orá, xì nùù yoo, xì stná nùù sitnúú; te yáha ga icúmí ndulocó nèhivi ñuhiví yohó, te nacani cuaá ini-nè na tiácú-nè ñà-fuerte guá cahá ndee tècuíí mar, te nacuahnú ducún-te.

²⁶ Deçuèndè cuñaà-nè ñà-yúhí guá-nè ndoó-nè ndiatú-né cuu ñà-ndúá cuahàn cuu ñuhiví. Ndè stná sitnúú nahnú itãndiaa ansivi, icúmí-sí ndacúchí ndee-sí.

²⁷ Dandu natúi yùhù ana nduú Tnaha Nèhivi Ñuhiví, cundehè nèhivi yùhù sãmãni mahi vicó nahnú. Cahnú poder cucumí, te yáha ga ndiaha coo inicutu ndé ié.

²⁸ Daaní, quivi quesaha cuu nsidaájàn, dandu contentu ni cundóo-nsiá; ndacoto ndiaá-nsiá diqui-xí, vâchi sà-ítúú hora càcu-nsia —ni cachi-yà.

²⁹ Dandu ni nacani-ya xì-né inga ejemplu, te dohó ni cachi-yà:

—Cundehè-nsiá nù-higuera jaàn, ò ndéni yutnú ni cui;

³⁰ nú indéhe-nda sàni ndunsidi-nú, dandu ñà-yúcán cundaà ini-ndà sà-ítúú tiempu ihni.

³¹ Pues ducán stná mii-nsiá, quivi cuni-nsiá cuú ñà-ndúá sàni ndiá, dandu vátùni cundaà iní-nsia ñà-sà-ítúú tiempu cusahnú Dios ñuhiví ndúa.

³² 'Ñà-ndáá nduá cachí, mà sãa cui nsihí nèhivi itiacú vichí deçuèndè cachi sàni cuu ndisa nsidaa ñà-ndúá sàni cachí xì-nsiá vichí.

³³ Cunaha-nsiá, icúmí sãa ansivi xì ñuhiví ndañuhá, doco palabra cachí yùhù, còó, mà nunca sãa ndañuhá.

³⁴ 'Cuidadu cundoo-nsia, còtó nandòdó-nsiá ichi váha, vâchi nú quidá cuahà-nsiá vicó, te xíni-nsia, te ò nacání cuahá ini-nsia sàhà vida xi-nsia ñuhiví yohó, pues vihini nandòdó-nsiá ichi mà, dandu nanáa sãa quivi coo tnũndoho, te có-nihnú ini-nsia.

³⁵ Vâchi na ian (nanáa tnú ini quisi ini) iin trampa, ducán icúmí quixi tnũndoho diqui nèhivi inicutu ñuhiví.

³⁶ Ñâyücandúá, cunihnu tùha iní-nsia, te càcàn tàhvi-nsiá nicanicuahàn sàhà-ñã vátùni càcu-nsia nùù nsidaa tnũndoho vâxi mà, te nihitáhvi-nsiá natúi-nsia màcundoo-nsia nùù yùhù ana nduú Tnaha Nèhivi Ñuhiví —ni cachi Jesús.

³⁷ Quivì yucán, veheñùhu cahnú iá-yà ndui, dacuahá-yá nèhivì, te ñuú núhù-yà (iin ñuu tii íá) Yucù Olivo.

³⁸ Dandu nsiquivì dàtnàà vaxì tu-ya veheñùhu. Ñàyùcàndüá, nèhivì cuáhà mà, naha vaxì stná-nè veheñùhu, vächì cunì-nè cunini-ne nansa cachí-yá.

22

Nansa ni ndatnuhu tnahá nèhivì nandúcu-nè nansa tñii-ne Jesús

¹⁻² Vicò pascua nisa nani iin vicò nisa xixi-ne pan có-ndütáchi. Te sà-itúú vicò mà vaxan, te ni ndatnuhu tnahá dùtù xícusahnú xì nècuàchì ley xì veheñùhu, nandúcu-nè nansa nihì-né cahni-né Jesús, vächì yúhì-nè (cunitnùhu) nèhivì cuáhà sàhámà.

³ Daaní, ni quihvi ñà-malu ini anima iin tiàa dacuahá Jesús nani Judas Iscariote.

⁴ Ñàyùcàndüá, ni sàhàn-nè nùù dùtù xícusahnú. Te ni càhàn-nè xì nècuàchìmà, xì stná tè-xidandacú nùù policia, ni ndatnuhu-né xì nècuàchìmà nansa cui quida-ne, te dayáha-ne mii-yá ndahà nècuàchìmà.

⁵ Te nècuàchìmà, ni cacudii ini-nè, te ni ndòo sahnú-né chiyàhvi-ne.

⁶ Ñàyùcàndüá ni cachi Judas vätùni íámà, te ni quesaha-né ni nanducu-né nansa nihì-né dayáha-neyà ndahà nècuàchìmà, doco ni cündüá na có-ndòò cuáhà nèhivì indéhe.

Nansa ni cutnahá Jesús xì compañeru-yà ni xixi-ya Cena ìi

⁷ Daaní, ni sàà vicò xixì-né pan có-ndütáchi, te quivì yucán xihì stná iin lelù nduú promesa siempre sàha-ne vicò pascua mà.

⁸ Ñàyùcàndüá ni techuún Jesús Pedro xì Juan, cachí-yà xì-né:

—Cuahán-nsià quidayucun-nsià ndé cuxi-nda vicò pascua.

⁹ Te ni cachi-nè xì-yá:

—¿Índù divì cunì-nì cùhùn-nsi quidayucun-nsì?

¹⁰ Dandu ni cachi-yà xì-né:

—Na sàà-nsià ñuu mà, icumí-nsià ndacùhun tnahá-nsià xì iin tiàa idadóco xì iin yoo tècuí. Divì nècuàchìmà cunchicùn-nsià cùhùn dècuèndè vehe ndé quihvi-ne.

¹¹ Dandu càhàn-nsià xì nècuàchì divéhé-xì má cachi-nsià xì-nè ñà-dòhó cachì maestru xì-né: “¿ndévi íá vehe cahnú ndé cuxi-ya comida pascua xì nècuàchì dacuahá-yá?”

¹² Dandu nècuàchì divéhé-xì má, icumí-nè dacunì-nè mii-nsià índù íá iin vehe cahnú pìsu dìqul-xì ndé sà-itá víi yutnù. Yucán nsidayucun-nsià ñà-cudinì-nda.

¹³ Dandu ni caquihìn nècuàchìmà ichì cuáhàn-nè. Te nacua ni cachi-yà xì-né, ducán ndisa ni cuu. Ñàyùcàndüá yucán ni quidayucun-nè comida pascua.

¹⁴ Daaní, na ní sàà hora mà, dandu ni sàà-yà yucán, te ni sàcòo-ya xì nsi-úxin ùì nècuàchì ni nihì chuun nùù-yá.

¹⁵ Te ni cachi-yà xì-né:

—Yùhù, ñuhú cuísi ini cutnahí xì-nsià cuxi-nda vicò pascua yohó, dandu después icumí ndohi.

¹⁶ Vächì cachí xì-nsià, mà cúxì guè comida vicò pascua ndé cachi sàà tiempu cusahnú Dios ñuhivì yohó; vächì vicò yohó, ejemplu nduá, doco na sàà quivì cusahnú-yá, dandu cunduamà ñà-sànì cuu ndisa ñà-ndüá cunì cachi vicò yohó —ni cachi-yá.

¹⁷ Dandu ni tñii-ya pocillu, te ni naquimani-yá Dios (sàhà ndutè sì-úv à ñuhu-ma), te ni cachi-yá:

—Tñii-nsià pocillu yohó, te coho nsidaa-nsià chichí-tè.

¹⁸ Vächì cachí xì-nsià, mà cóhó guè ndutè sì-úv à ndé cachi sàà tiempu cusahnú Dios ñuhivì yohó.

¹⁹ Dandu ni tñii stná-yà iin pan, ni naquimani-yá Dios sàhà, te ni dàcuàchì-yáñà; dandu ni dasàn-yáñà nùù nsidaa-né, te ni cachi-yà xì-né:

—Pan yohó, nahi iquicúñuì nduá, vächì cuàhìn cuàhatahvi vida xì (cui) sàhà nsidaa-nsià. (Cuxi-nsià vichì, dandu después), nacua ni quida-nda vichì, ducán quida stná-nsià (quivì nùù-xì) sàhà-ñà nsinuu ini-nsià yùhù —ni cachi-yá.

²⁰ Daaní, divini ducán ni quida stná-yà xì pocillu mà: na ní nsihì ni xixi-ne, dandu (ni tñii-yañà), te ni cachi-yá:

—Ñà-ñuhú pocillu yohó nduú seña xì ichì saa nacóí cunchicùn nèhivì, vächì nahi niú nduá, te icumí nìi cuitià sàhà-ñà nihitáhvi ndiaha-nsià.

²¹⁻²² Doco cunaha-nsià, tiàa cuàhàn cahìn xì yùhù ana nduú Tnahà Nèhivì Ñuhivì, íá-nè yohó xixì tàcá-ndà xì-nè nùù mesa yohó. Te mate ñà-ndáa nduá, icumí cui, vächì ducán ni chitnùni ini Dios, doco tiàa cuàhàn cahìn xì, ñdahví-nè! —ni cachi Jesús.

²³ Ñàyùcàndüá, ni quesaha nèhivì ndoó yucán ni xicàn tnùhù stnahá-né nùù-né ana nduú tiàa cuàhàn quida ducán cahan-né.

Nansa ni cuàà nècuàchì dacuahá-yá, iin iin-ne cuní-nè cunduu-ne ana chicá ndiaá

²⁴ Ní cuàà stná-nè sàhà-ñá ana cunduu nècuàchì chicá ndiaá.

²⁵ Ñàyùcàndüá, nì cachi-yà xì-né:

—Tè-cùsàhnú inga ñuu, fuerte cusàhnú-te nùù nèhivì ñuu-te. Yua ñuu dandacú víi cachì tè-xícusahnuma sàhà mii-té.

²⁶ Doco mii-nsiá, màsà quidá-nsiá na quidá tè-yúcán. Vàchi nsidaa ana nihì chuun dandacú nùù-nsiá, icúmí-né cunihnu (ndahví ini-nè) na iin nèhivì chicá chui; vachi iin nècuàchì chicá idónuu, xiñuhu cunduu-ne nahi ana xinúcuáchí.

²⁷ Vachi ni cachí-ndá iá iin lamú iá xixí, te iá stná iin nècuàchì xinúcuáchí (nùù chuun yuhùnùhú), pues ¿ana chicá idónuu cahan-nsiá? ¿Amádi lamú mà nduú ana chicá idónuu? Doco cundehè-nsiá yùhù, nansa quidé xì mii-nsiá: na ian quidá iin peón xinúcuáchí, ducán nduú modo xì quidé xì-nsiá.

²⁸ Mii-nsiá nduú nècuàchì iin-ni sàni tenchicùn xí, te nì yàha stná-nsiá nsidaa tnùndoho nì yàhi.

²⁹ Ñàyùcàndüá, nacua nì sàha Yué yùhù chuun cusahnúí, ducán nihitáhvi stná mii-nsiá quide, nihì stná-nsiá chuun dandacú-nsiá.

³⁰ Vachi na sàa quivì cusahnúí, dandu icúmí stná mii-nsiá cutnahá-nsiá xì' cundoo-nda cuxi-nda nùù mesa xi, te nihitáhvi stná-nsiá cundoo iin iin-nsiá silla ndiaha, dandacú-nsiá nùù ùxin ù ñuu-ndá ndé cundoo nèhivì raza-ndá Israel.

Nansa ni cachi Jesús xi Pedro ñà-inhá-yá icúmí-né nacuaà-néyá

³¹ Dandu nì cachi Stoho-ndá Señor xì Simón (Pedro):

—¡Ay, Simón! Nì xicàn ñà-malu permisu quida ndevàha-sì xì anima-ní na ian quidá-ndá na dandiáchí-ndá nùni.

³² Doco yùhù, nì xicàn tàhvi sàhà-ní ñà-màsà nándòdó-ní yùhù, Simón. Dandu mii-ní, quivì sàni sàa-ní naxicocuñ inì-ní, dandu nacuaàhandee inì-ní ñanìtnaha-ní.

³³ Dandu nì cachi Simón xì-yá:

—Señor mío, iin-ni ié' dispuestu cunchicuñ mii-ní mate nì chícádí-nèndó, te ò nì cahní-nèndó.

³⁴ Doco nì cachi-yà xì-né:

—Cachí xì-ní, Pedro: ñuú vichi na táñaha ga coto lehe sindùhá, te sàni nacuaà-ní yùhù ùni xichi.

Nansa ni cachi Jesús na sá-itúú hora tñii nèhivì-yá

³⁵ Dandu nì cachi stná-yá xì nsidaa-né:

—Na ní techuín mii-nsiá nì xicanuu-nsiá daa, nì dàndacuí nùù-nsiá ñà-nì ndóo cartera xi-nsiá, xì stná morral xi-nsiá, te nì màsà cúnihí stná-nsiá inga ndisàn-nsiá cùhùn. Pues, (vichi cachi-nsiá xì'), ¿a ní quidamani iñaha nùù-nsiá quivì yucán?

Dandu nì cachi-nè xì-yá:

—Còó.

³⁶ Dandu nì cachi-yà xì-né:

—Pues, tucu iá vichi, vachi xiñuhu-ñá cunihì-nsiá cartera xi-nsiá na cùhùn-nsiá, te cunihì stná-nsiá morral xi-nsiá cùhùn. Te nècuàchì có-icúmí espada, chicá vaha nì dicó-né dùhnù-né, te cuin-ne ian.

³⁷ Vachi dohó cachá' sàhí nùù tutu iì: “Nì quida nèhivì cuenta na ian nduú-yá iin tiàa malu”. Ñàyùcàndüá, yùhù cachí' (xì-nsiá), fuerza icúmí cuu ducán xí, vachi nsidaa ñà-ndüá cachá' sàhí, icúmíá cuu ndisa.

³⁸ Dandu nì cachi-nè xì-yá:

—Stoho-nsì Señor, cundehè-ní yohó: Òi espada nihí-nsí.

Dandu nì cachi-yà xì-né:

—¡Daanì xì palabra jaàn!

Nansa ni sàhàn Jesús huertu nani Getsemaní, te nì xicàn tàhvi-yá nùù Yuamánì-yá Dios

³⁹ Daanì, nì queue-ya vehe, te nacua nduú estilu xi-ya cuàhàn-yá Yucù Olivo, te nchícùn stná nècuàchì dacuahá-yá.

⁴⁰ Te na ní sàa-yá lugar cuní-yá, dandu nì cachi-yà xì-né:

—Càcàn tàhvi-nsiá nùù Dios sàhà-ñá màsà dándáhvi ñà-malu mii-nsiá.

⁴¹ Dandu nì cuxica tii-yá chicá nùù-xí, nacua sàa dacana-nda iin yùù. Te yucán nì sàcuinì sisi-yá nì xicàn tàhvi-yá nùù Dios,

⁴² cachí-yá:

—Yuamánì, xicàn tàhvi nùù-ní. Nú cuní-ní, dandu dacúxió-ní tnùndoho icúmí yàhi, vachi nahi (ñà-ùá ñuhù iin) taza, ducán nduá nùù. Doco màdi ñà-nduá cuní yùhù nì cundúá; còó, ñà-nduá cuní mii-ní —nì cachi-yá.

⁴³ Dandu ni ndecunu iin ángel ni quixi ansivi, te ni chindee-né mii-yá ñà-nìhì gá-yà valor xi-ya.

⁴⁴ Váchi yáha ga nacání ini-yà. Ñàyúcàndùá chicá fuerte ni càhàn-yà xì Dios. Te ni cana cuahà tètñì-yá, doco tètñì mà, na ian cóyo gota nahnú nì, ducán ni cóyo-tè ñuhu.

⁴⁵ Daaní, ni ndacuiin-yà vaxi-ya ndé itánduhù nècuàchì dacuahá-yá, te ni xini-yà xiquidi-nè ñà-cuahà guá ndóo-né tñùnì ini.

⁴⁶ Ñàyúcàndùá, ni cachi-yà xì-né:

—¿A ñá-sàni quidi-nsia nduá? Chicá vaha ndacuita-nsia, te càcàn tàhvi-nsiá nùu Dios sàhá màsà dándàhvi ñà-malu mii-nsiá.

Nansa ni tñii nèhivi Jesús, te ni suhni-nèyá

⁴⁷ Na càhàn ìi-yá xì nècuàchì mà, dandu ni quesaa cuahà nèhivi. Te iin tiàa ni sanchicùn xi-yá nduú ana ndàcà-xì-né vaxi, divi Judas, vaxi iin ana nisa cutnahá xì nsi-úxin iin ga nècuàchì dacuahá-yá nduú-né. Te divi-ne ni tñatuu-ne nùu-yá, ni chitù-nè nùu-yá.

⁴⁸ Dandu ni cachi-yà xì-né:

—Judas, ñà-nì chitù-nì nùu, ¿a ducán nduú modo cahín-nì yùhù ana nduú Tnaha Nèhivi Ñuhivi?

⁴⁹ Dandu compañeru-yà, ni cundaà ini-nè nansa cuahàn cuu, ñàyúcàndùá ni cachi-nè xi-yá:

—Stoho-nsi Señor, ¿a cáni-nsi mii-né xì espada vichi?

⁵⁰ Dandu iin compañeru-yà, ni cani-ne espada xi-ne iin tiàa quidáchúñ nùu dùtu cusáhnù, te ni tàhndè tñtñ-té ladu cuahá-te.

⁵¹ Doco ni cachi-yà:

—¡Daaní xì ñà-jaàn!

Te ni chituu-ya ñinndàhá-yà tñtñ témá, te ni nduvàha dahuan.

⁵² Dandu ni càhàn-yà xì nsidaa nèhivi ni caquesaa tñii xi-yá, divi dùtu xicusahnú, xì tè-dàndàcú xíndiaa veheñuhu, xì dava ga stná nècuàchì nihí chuun, te ni cachi-yà xì nsidaa-né:

—A ducán nduú modo (tñii-nsiá yùhù), vaxi-nsia nihí-nsiá espada xì garroti na ian təcuihnà nduú,

⁵³ mate nsiquívi nisa ìe xì-nsiá veheñuhu cahnú, te cóni tñii-nsiá yùhù. Doco vichi, meru tiempu xì mii-nsiá nduá, divi tiempu quida quini guá mii-si dandacú nùu ichi ñáa.

Nansa ni nacuaà Pedro Jesús

⁵⁴ Dandu ni tñii-tèyá ni saca-tèyá cuahàn-te ndé ini vehe dùtu cusáhnù. Te Pedro, nhicùn xica ní-né mii-yá cuahàn-nè, (te ni yáha stná-nè) ini patiu vehe ma.

⁵⁵ Dandu nèhivi ndóo yucán, ni xicùn-né iin ñuhu mahi patiu mà, te ni sàcùndoo-ne; te ni sàcòo stná Pedro mahi nsidaa-né.

⁵⁶ Doco iin ñàhà chii quidáchúñ yucán, ni xini-ña Pedro na ía stná-nè ndé tñuú ñuhu mà, te ni indehè váha-ñané, cachi-ña:

—Nècuàchì yohó, compañeru Jesús nduú stná-nè.

⁵⁷ Doco Pedro, ni nacuaà-nèyá, cachi-nè:

—Yùhù, có-ináhì Jesús, señorita.

⁵⁸ Daaní, después, indéhe stná inga nèhivi-né, te ni cachi-nè:

—¿Amádi iin nèhivi xí Jesús nduú stná mii-ní?

Doco ni cachi Pedro:

—Còó, mà ndisá, señor.

⁵⁹ Daaní, ni yáha inga hora, te fuerte ni cachi inga nèhivi (xi compañeru-nè):

—Ñà-ndáa nduá, nècuàchì yohó nduú iin nèhivi ni cutnahá stná xì Jesús, vaxi nècuàchì ladu Galilea nduú stná-nè.

⁶⁰ Doco Pedro, ni cachi-nè:

—Señor, ni có-cùndáa inì ñà-nduá càhàn-ní sàhà-xì.

Te càhàn ìi Pedro palabra mà, te momentu mà ni xito lehe.

⁶¹ Dandu Stoho-ndá Señor, ni nacuíco-yá yàtà-yá, ni ndacoto-yanè. Te sàhà ñà-yùcán nduá ni nsinuu ini-nè nansa ni cachi-yà xì-né daa ñà-tàñáha ga coto lehe, te ùni xichi sàni nacuaà-nèyá.

⁶² Ñàyúcàndùá, ni quee-ya iladu patiu mà ni sacu cuahà-né.

Nansa ni quida quini policía xi Jesús, te ni sàcùndiaà-teyá

⁶³ Daaní, tiàa xíndaca xi-yá, ni sàcùndiaà-teyá, te ni cani-tèyá.

⁶⁴ Ni chidàhvi-tè nùu-yá, te ni cani-tèyá, cachi-te xi-yá:

—¡Cachi cuaa-nì ana ni cani xi-ní!

⁶⁵ Te cuahà gá stná iñàha ni cacachì-te ni cahíchi uun ini-teyá.

Ñà-ndúá nì cachi Jesús na ní sàà-yà nùù Junta Cahnú

⁶⁶ Daaní, na ní tùmùù, nì nataca nsidaa nècuàchì nduú Junta Cahnú; nì càna nècuàchì sahnú dandacú nùù ñuu yucán, xì stná dùtù xícusahnú, xì stná nècuàchì ley xì veheñùhu. Dandu nì dàtnátuu-ne Jesús nùù nsidaa-né, te nì cachi-nè xì-yá:

⁶⁷ —Nú divi Cristu ndiaha nduu-ní, dandu cachi ndàà-ní xì-nsí.

Dandu nì cachi-yà xì-né:

—Nú nì cachí xì-nsiá, mà nunca cunindisá-nsiá.

⁶⁸ Te ò nú nì ndàcàtnùhí nùù mii-nsiá iñàha, nì mà nàxícónihí stná-nsiá nùù, te nì mà dàñá-nsiá yùhù.

⁶⁹ Doco yùhù ana nduú Tnaha Nèhivi Ñuhivi, dècuèndé vichi cuàhàn duha icúmí coi ndahà cuahá mii-yá ana chicá cusáhnù, divi Dios.

⁷⁰ Ñàyùcàndúá, nsidaa nècuàchì Junta mà, nì xicàn tnùhù-né nùù-yá, cachí-né:

—¿A ndísá Dèhemani Dios nduu-ní cahan-ní?

—Jaan —cachí-yà— nacua nì cachi-nsiá, divi ducán nduá.

⁷¹ Ñàyùcàndúá, nì cachi nèhivi Junta mà:

—Cò-xiñùhù gá-ndà nì-iin testígu quixi, vàchi divi mii-né sàni cachi-nèà, te nì inini-nda —nì cachi-nè.

23

Nansa nì dàyáha-ne Jesús ndahà gobernador Pilatu

¹ Dandu nsidaa nècuàchì Junta yucán, nì ndacuita-ne, nì saca-neya cuàhàn-nè xì-yá nùù Pilatu.

² Te cuàhà nì càhàn tnùhu-ne sàhà-yá nùù témà, cachí-nè:

—Nècuàchì yohó, sàni xini-nsi, dacá-né ònì nèhivi ñuu-nsi yohó, vàchi cachí-nè mà váha chiyáhvi-nsi renta xì naciòn nùù rey cahnú César, vàchi cachí-nè mii-né nduú-né rey Cristu.

³ Dandu nì ndàcàtnùhù Pilatu nùù-yá, cachí-te:

—Mii-ní, ¿a ndísá rey xì nècuàchì raza Judea nduu-ní, á cóó?

Dandu cachí Jesús:

—Nacua cachí-ní, divi ducán nduá.

⁴ Dandu nì cachi Pilatu xì dùtù xícusahnú, xì stná nèhivi cuàhà yucán:

—Sàni càhìn xì nècuàchì yohó, te còò nì-iin falta nì quidá-né tuxí.

⁵ Doco nècuàchì càhàn tnùhu sàhà-yá mà, vihi gá dana nì càhàn-nè, cachí-nè:

—Nècuàchì yohó, cuàhà nèhivi raza-nsi dacuahá-né, te danácuídà-nè nècuàchimà dècuèndé ladu Galilea xì ndé stná ladu yohó, nsidanicuú ladu ndé ndoó-nsí —nì cacachi-nè.

⁶ Na nì inini Pilatu ñà-jaàn, dandu nì ndàcàtnùhù-té, ¿a nècuàchì Galilea nduú Jesús, á cóó?

⁷ Te divi (ñà-ndáà nduá). Ñàyùcàndúá, nì cundaà inì-te ñà-divi rey Herodes nduú ana ndiá icà nsidandaà sàhà chuun ma. Sàháyùcàndúá, nì dàyáha-tèyá ndahà rey mà, vàchi iá stná témà ñuu Jerusalén quivi yucán.

⁸ Daaní, na ní xini rey mà-yá, nì cudiú gá inì-te, vàchi sàcàni tiempu cuní-te cundehè-tèyá. Vàchi cuàhà gá ñà-nduá cachí nèhivi sàhà-yá, te cuní stná-te cundehè-té quida-ya iin milagru.

⁹ Ñàyùcàndúá, cuàhà ní ndàcàtnùhù-té nùù-yá, doco còò nì-iñàha nì nàxícónihí-yá nùù-té.

¹⁰ Te yucán nì casaà stná dùtù xícusahnú, xì nècuàchì ley xì veheñùhu, nì sàcuíta stná-nè, te yáha ga dana nì càhàn tnùhu-ne diquí-yá.

¹¹ Doco Herodes xì soldadu xì-tè, cuisí-ní nì dàvádiqui uun-tèyá, te nì sàcùndiaà-tèyá. Dandu nì chindixi-tèyá sicoto vico, te nì dānùhù-tèyá nùù Pilatu.

¹² Te cunaha-ní, divi quivi yucán nì nàcòovàha stnahá Herodes xì Pilatu, vàchi nìsa xini ùhì stnahá-te.

Nansa nì cachi stná Pilatu icúmí Jesús cui-yà

¹³ Dandu Pilatu, nì nacana-tè dùtù xícusahnú, xì nsidaa tè-nihí chuun, xì nsidaa gá nèhivi. Te nì nsihì nì catnátuu nsidaa-né nùù-té,

¹⁴ dandu nì cachi-te xì-né:

—Ndacá-nsiá nècuàchì yohó vaxi, vàchi cahan-nsiá dacá-né ònì nèhivi ñuu-nsia yohó. Doco sàni xicàn tnùhù vahi nùù-né indèhe nsidaa-nsiá, te sàni cundaà inì, còò nì-iin cuàchì-ne nacua cachí-nsiá.

¹⁵ Daaní, después nì dàyáhi-nè ndahà Herodes, te nì sàhàn stná-nsia nùù nècuàchimà, doco nì mii stná-nè, cóni càchí stná-nè sàhà ñà-cui Jesús, vàchi còò nì-iñàha inihí-cá-nè.

¹⁶ Ñàyùcàndúá, cuàhàn dandacuí ñàhni cuií-nè, dandu dàñá-né.

¹⁷ (Ducán nì cachi Pilatu), vàchi fuerza icúmí-té dañá-té iin nècuàchì ndiadí cada nacává vicó mà.

18 Doco nêhivi cuáhà itá yucán, iin-ni cána fuerte sàstnùhù-né, cachí-né:

—¡Ni cuí Jesús! ¡Barrabás ni dañà cuní-nsi! —ni cachi-né,

19 vâchi Barrabás mà nduú iin tiàa ni quida revolucíon ñuu yucán, te ni sahnì stnàhá-te, ñâyücàndüá, ndiadi-te vehecaa.

20 Daaní, tucutu ni càhàn Pilatu xì nêhivi cuáhà mà, fuerte ni càhàn-te, vâchi dispuestu iá-te dañà-té Jesús.

21 Doco nêhivi mà, tucutu cána ndee-né, cachí-né:

—¡Ni cuí Jesús nchica cruz! ¡Ni cuí-né, cuní-nsi!

22 Dandu ñà-ùni ni càhàn-te xì-né, cachí-te:

—¿Índü chuun cui-né ñà-còo ni-iin falta xi-ne íá? Sàni ndàcàtnùhì nùu-né, te còo ni-iñàha dísàhá-xì cui-né. Ñâyücàndüá, icúmi-né ñàhni cui ni-ne, te dañà-né —ni cachi-te.

23-24 Doco nêhivi cuáhà yucán xì stnà dùtù cutnàhá xì-né, vihi gá fuerte ni cána ndee-né, xicàn-né ñà-cui Jesús nchica cruz. Te ñà-fuerte guá ni cána-ne, sàhámà ni cundee-né (ni dàxinù ini-né Pilatu) ñà-quida-tè nacua ni cuni mii-né.

25 Ñâyücàndüá, ni dañà-té Barrabás nùu-né, vâchi divi-tè ni xicàn-né dañà, mate iin ana ni quida revolucíon nduú-te, te ni sahnì stnàhá-te, ñâyücàndüá ni sàcündiadi-te. Doco Jesús, còo. Ni dáyáha Pilatu mii-yá (ndahà soldadu) ñà-quida temà xì-yá ñà-ndüá ni xicàn nêhivi cuáhà mà.

Nansa ni chituu-tè Jesús nchica cruz

26 Dandu ni saca-tèyá cuàhàn-te xì-yá. Te ichì yucán ni xini-te vâxi iin nècuàchi ñuu Cirene nani Simón, màndixi-ne ni sàhàn-né nùu itú. Te divi nècuàchì mà ní tniì soldadu, te ni dàcuidá-tené cruz xì-ya; ñâyücàndüá, nsidá-né cruz cuàhàn-né nchícùn-nèyà.

27 Cunaha-ní, cuáhà gá nècuàchi ñàhá nchícùn stnà xì-yá cuàhàn, te cuáhà stnà nêhivi dava ga. Te nècuàchi ñàhá mà, yáha ga xísacu-ne, ndoó-né trnùsi ini sàhá-yá.

28 Dandu ni nacuco-yá yàtá-yá, cachí-yá xì-né:

—Cunini vâha mii-nsiá nècuàchi ñàhá ñuu Jerusalén. Màsà cuácú-nsiá sàhá yùhù. Chicá vâha ni cuacú-nsiá sàhá mii-nsiá xì sàhá dèhe-nsia.

29 Vâchi vâxi iin tiempu (ùhì) quivi nùu-xì, dandu icúmi nêhivi cachi-né: “Nansicáhàn nêhivi còo mèe-xì. Chicá nsiha màsà cacú ni-iin dèhe-nda ni cuí, te màsà cúcúmi-ndá ni-iin mèe dachichi-nda chicá vâha”.

30 Te icúmi stnà-né cachi-né: “¡A sácú vâha ni caá yucú ò lúnsi diqui-ndà, te dàhvi dahuun-nda!” cachi-né.

31 Vâchi (ducán ía nahi ejemplu sàhá tutnù): nú dècuèndè yutnù vida cuní nêhivi (cahmi-ne), dandu vihi gá mà ùhì coco stnà tutnù ichí. (Te ducán stnà yùhù: nú dècuèndè yùhù cuní nêhivi dandohó-né, dandu vihi gá más icúmi nêhivi malu ndoho stnà-né) —ni cachi-yà.

32 Cunaha-nsiá, ndacá stnà soldadu mà ùi tiàa ni quida falta, cutnàhá stnà-te xì-yá cuàhàn ndé cui stnà-te.

33 Dandu ni casaà nsidaa-né iin xaan ndé cachí-né Nùu Iqui Dini. Te yucán ni chituu soldadu mà-yá nchica cruz, mii-yá xì stnà ùi tè-ni quida cuàchi ma, iin-tè ladu cuahá-yá, te ingà-te ladu itni-yá.

34 Dandu ni cachi-yá:

—Padre mío, cuicahnú inì-ní sàhá nêhivi yohó, vâchi có-ínàhá-né ñà-ndüá quidá-né.

Daaní, tè-xínduu soldadu mà, ni dasàn-té sicoto xì-ya según ni nihì iin iin-tè na ní idàdiqui-te sàhá-ñà.

35 Te indéhe vâha nsidaa nêhivi cuáhà mà. Te itá stnà nècuàchi nihì chuun, sàcündiaa-nèyà, cachí-né:

—Nècuàchi yohó, nisa dacácu-ne nècuàchi dava ga; pues vichì xiñuhu dacácu stnà-né mii-né, nú ndisa Dios ni techuun-xì-né vâxi, te nú mii-yá nani Cristu nduú-né cahan-né —ni cachi-né.

36 Daaní, stnà soldadu mà, ni sàcündiaa stnà-teyá, ni catnàtuu-tè nùu-yá chitánini-te vinu ia ñà-coho-ya,

37 cachí-te:

—Nú ndisa rey xì nècuàchi raza Judea nduu-ní, dandu dacácu-ní mii-ní —cachí-te.

38 Te itúú stnà ñàhá dini cruz ndé itándiaa palabra dàhàn griegu, xì dàhàn latín, xì stnà dàhàn hebreu, te dohó cachá: “Ana yohó nduú rey xì tè-raza Judea”.

39 Daaní, ni càhàn stnà iin tè-itúú stnà nchica cruz yucán, divi iin tè-ni quida falta mà; te ni canàhá stnà-te xì-yá, cachí-te:

—Nú ndisa rey Cristu nduu-ní, dandu dacácu-ní mii-ní, te dacácu stnà-ní nsihùh.

40 Doco inga tè-itúú stnà yucán, ni càhàn duchi inì-te xì compañeru-tema, cachí-te:

—¿A có-yúhì stnà-ní Dios ñà-iin-ni castigu sàni nihì nsidaa-nda?

41 Te ndohó, ndiá icà-ndà ndoho-nda, vâchi iá ndisa cuàchi-nda, ñâyùcàndüá iá castigu xi-nda. Doco Jesús yohó, còó; còó ni-ñàha iníhíca-yà.

42 Dandu ni cachi-te xi Jesús:

—Nsinuu ini-ní yùhù na quìvi naxicocufin-ní cusahnu-ní ñuhiví yohó.

43 Dandu ni cachi-yà xi-té:

—Ñà-ndàà nduá cachí xi-ní, quìvi vichi icúmí-ní cutnaha-ní x' cundoo-nda ñuhiví ndiaha xi Dios —ni cachi-yà.

Nansa ni xihí Jesús ni dandáa-yá sàhà cuàchi-nda

44-45 Daaní, nahi càxihù ni dàhvi orá, te ni nàcùn tnuù inicutu ñuhiví, te iin-ni ni ndòo ducán dècuèndè càhùni ni cuaà. Te ini veheñùhu cahnú ni quedava cortina cahnú (sadi nihni cuarto yucán).

46 Dandu Jesús, fuerte ni ndàhì ndee-yá, cachí-yà:

—Padre mío, nuù ndahà mii-ní quidè entregar animè —ni cachi-yà. Dandu ni xihí-yà.

47 Daaní, capitán (iín yucán), ni xini-te nsidaa ñà-ndüá ni cuu, te ni ndenihi vâha-tè Dios, cachí-te:

—Ñà-ndàà nduá, nèhiví ndàcuisi ini-xi ni sanduu nècuàchi yohó.

48 Te nsidaa gá nèhiví ni sàà yucán, ni xini-nè nansa ni cuu, dandu ni naquihin-ne ichi mànuhù-nè vehe-ne, caní ndàha-né nchica-ne.

49 Te yucán ndoó stná cuàhà nècuàchi ñahà ni quixi ñuu Galilea cutnàhà-né xi-yá ni quesaa ñuu Jerusalén. Te mii-né xi stná nècuàchi dava ga ináhà xi-yá, xica itá-né, indéhe vâha-ne ñà-ndüá ni cuu.

Nansa ni ndùxin Jesús ini cueva

50-51 Daaní, (ñuu mà) nisa la stná iin tiàa nani José. Iin nècuàchi vâha nduú-né, vâchi ndàcuisi ini-nè. Te meru ñuu-nè nduú iin ñuu tii nani Arimatea ndé ndoó puru nècuàchi raza-nè Judea. Iin nècuàchi Junta Cahnú nduú stná-nè, doco mii-né, cóni ndóo ini-nè xi ñà-ndüá ni dandácú compañeru-nè ñà-cui Jesús, vâchi nihnú ini-nè (Dios, te xiníndisá-né) ñà-icúmí-yá cusahnú-yá ñuhiví yohó.

52 Pues divi nècuàchimà ni sàhàn nuù Pilatu, ni xicàn-nè iquicúñú Jesús.

53 Dandu ni sàhàn-nè ni nanihi-neyà, ni chidúcùn-neyà iin dahmà, te ni chinacaa-neyà ini cueva xi nsi ni sate nèhiví nuù cavà. Te cueva mà, ni-iin nsi ñàhà ga cundùxin inìà.

54 Cunaha-ní, quìvi yucán ni sanduu víspera xi vicò pascua, te sà-itúú cunduu stná quìvi descansu.

55 Ñâyùcàndüá, nècuàchi ñahà ni quixi Galilea mà, ni catenchicùn stná-nè ni sàhàn ndé ni sàcundùxin-ya, te ni xini-nè lugar mà, xi nansa ni sàcùnacaa cuerpu-yà.

56 Dandu mànuhù-né, ni quidayucun-nè tàtnà tñami xi pomada sàhàn tñami. Daaní, quìvi descansu mà ni quetatu-nè nacua cachí ley (xi-ne).

24

Nansa ni natiacu Jesús

1 Naha va quìvi primeru semana ni quihin nècuàchi ñahà mà ichi cuàhàn-nè ndé ni ndùxin-ya, nihí-né tàtnà tñami ni quidayucun-nè, te cutnàhà stná-nè xi itnií gá nècuàchi ñahà. Te na ní casaà-nè yucán

2 ni xini-nè sàni cuxio cavà cahnú ni sandiadi yuhù cueva mà.

3 Dandu ni caquihvi-ne ini-xi, doco còó cá Stoho-ndà Jesús ni xini-nè.

4 Ñâyùcàndüá, cuàhà gá ni ndulocò-nè. Dandu ni xini-nè yatni uun yucán ni sàcuíta ùi ana ndixín sicoto cuxín yéhe.

5 Te ni cayùhí cuaà-né, te ni nàcùnihni ndee-ne. Dandu ni cachi ángel mà xi-né:

—Còó necesidad nanducun-nsiá mii-yá yohó ndé nduú lugar xi nsi, vâchi sà-itiácú-yà.

6 Còó cá-yà yohó, vâchi sàni natiacu-yà. ¿A có-nsinúú ini-nsia ñà-ndüá ni cachi-yà na iá va-ya xi-nsiá ladu Galilea?

7 Vâchi dohó ni cachi-yà: “Yùhù ana nduú Tnaha Nèhiví Ñuhiví, icúmí yàhi ndahà tè-malu, dandu cachituu-tè yùhù nchica cruz; doco tixi ùni quìvi icúmí natiacu”, ni cachi-yà.

8 Dandu nècuàchi ñahà mà, ni nsinuu ini-nè ñà-dúcán ndisa ni cachi-yà xi-né daa.

9 Dandu ni caquee-ne cueva mà mànuhù-né ndé ndoó-né, te ni nacani-ne nsidaámà xi ùxin iin nèhiví xi-yá, xi stná nècuàchi dava ga.

10 Cunaha-ní, nècuàchi ñahà mànuhù cachitnùhu xi nèhiví mà nduú María Magdalena, xi Juana, xi María dihi Jacobo, xi itnií gá stná nècuàchi ñahà dava ga.

11 Doco nècuàchi tiàa (ni inini mà), ni tuxi ini-nè ádi cuentu uun nduá ni nacani nècuàchi ñahà mà. Ñâyùcàndüá, cóni xiníndisá-né.

¹² Doco Pedro, después ni ndacuiin-nè ni dàyàa-nè cuàhàn-nè sepultura mà. Te (na ní sàa-nè) ni xito nihni-ne inià ni xini-nè mii dahmà ni ndòo itánduhù iladú. Dandu mànuhù-né vehe-ne, nacání cuáhà ini-nè ndià nduá ni cuu cahan-né.

Nansa ni ndecunu Jesús nuù ùi nèhivi xicá ichi ñuu tii Emaús

¹³ Daaní, divi quivi yucán cuàhàn ùi nèhivi xí-yá ichi ñuu Emaús. Nahí ùi hora nduá caca-nda ndé ñuu Jerusalén xi ndé ñuu tii yucán.

¹⁴ Te ùi nècuàchìmà, ndatnúhù-nè cuàhàn-nè, cáhàn-nè sàhà nsidaa ñà-nduá làcà ní cuu.

¹⁵ Te meru ndatnúhù-nè ducán, te ni cuyatni Jesús vaxi-ya; ni ñatuu-ya ni sacatnahá-yá xi-né cuàhàn.

¹⁶ Doco cóni nácóó-yá mii-né nacuni-nèyà.

¹⁷ Dandu ni cachi-yá xi-né:

—¿Ndià nduá ndatnúhù guá-nsià cuàhàn-nsià, te ndoó-nsià tñnsi ini?

¹⁸ Dandu ni naxiconihí iin nècuàchìmà nani Cleofas, ni cachi-nè xi-yá:

—Nsidaa gá nèhivi ndóo ñuu Jerusalén, ináhà-né ñà-nduá ni cuu yucán quivi vichi. Ádi cuiisi mii-ni nduú ana tàcúnitnúhu sàhàmà.

¹⁹ Dandu ni cachi-yá:

—¿Ndià nduá ni cuu yucán?

Te ni cachi-nè:

—Cáhàn-nsi sàhà Jesús de Nazaret, vàchi cunaha-ní, iin ana cáhàn ndisa cuenta xi Dios ni sanduu-ya. Cuáhà milagru fuerte ni quida-ya, te cuáhà palabra ndiaha ni chinaha-ya. Chuun ndiaha xí Dios nisa quida-ya ni cundaà ini nsidaa nèhivi ñuu-ndà.

²⁰ Doco dùtù xícusahnú, xi stná tè-nihí chuun ga, ni dàyáha-neyà ndahà ana ni sahnì xi-yá, te ni chituu-tèyá nchica cruz.

²¹ Doco cunaha-ní, mii-yá nduú ana cuàhàn dacácu xi ñuu-ndà Israel ni cahan-nsí. Te vichi sàcuàhàn-ndà ùni quivi ni cuu xi-yá ducán.

²²⁻²³ Te quivi vichi ni sàa itnii nècuàchì ñahà iin-ni xiníndisá stná xi-yá, te ni ndulocó-nsi ni quida-ne, vàchi naha ni sàhàn-nè sepultura (xi-ya), te còò gá iquicúñú-yá ni xiní-nè, cachi-nè. Te ni ndecoyo stná ángel nuù-né, te cachí ángel mà sàni natiacu-yá.

²⁴ Daaní, ni sàhàn stná dava compañeru-nsi sepultura mà, te nacua ni nacani nècuàchi ñahà mà, divi ducán ni xini stná-nè ñà-còò gá iquicúñú-yá yucán.

²⁵ Dandu ni cachi-yá xi nècuàchìmà:

—¡Ndahví-nsià! Mà túha-nsia mànihì ini-nsia; cueé sàstnúhù-nsià cunindisá-nsià nsidaa ñà-nduá ni tiaa nècuàchi ni cáhàn cuenta xi Dios sàhana.

²⁶ Vàchi (claru ni cachitnúhu-ne sàhà) ana nduú Cristu, xi nansa icúmí-yá ndoho-ya, dandu después nanihí-yá tññuhu ndiaha xí-yá —ni cachi-yá.

²⁷ Dandu ni quesaha-yá ni dàtúí-ya nuù-né nansa cachí tutu ùi sàhà mii-yá, divi tutu ni tiaa Moisés, xi stná tutu ni tiaa nsidaa gá nècuàchi profeta.

²⁸ Doco vichi, sà-itúú sàa-nè xi-yá ñuu tii ndé cuàhàn-nè. Dandu ni cundaà ini-nè cuní-yá cùhùn-yá chicá nuù-xí.

²⁹ Ñàyúcandúà, ni sacundahví-nè nuù-yá, cachí-nè:

—Yohó ndòo-ní, chicá vaha, vàchi sàni cuaà, te cuàhàn cuñàa.

Dandu ni yàha nsidaa-né ini iin vehe ñà-cutnahá chii gá-yá xi-né.

³⁰ Te ni sàcòo-ya nuù iin mesa ñà-cuxi-ya xi-né. Te ni tñii-ya pan, ni naquimani-yá Dios sàhà, te ni dàcuàchí-yáñà; dandu ni dasàn-yáñà nuù-né.

³¹ Te momentu jaàn ni nihì-né ni nacuni-nèyà ana nduú-yá. Doco na íin cachí ni ndañuhu-yá nuù-né.

³² Dandu ni cachi-nè iin-ne xi inga-nè:

—¡Na ndiaha guá nihnú ini-ndà na ní cáhàn-yá xi-ndà vaxi-nda ichi mà, te ni dàtúí-ya nuù-ndà nansa cuní cachi tutu ùi!

³³ Dandu vichi duha ni ndacuita-ne mànuhù-né ñuu Jerusalén, ni nasaa-nè vehe ndé sàni nataca ùxin iin nècuàchi dacuahá-yá xi stná compañeru gà-nè.

³⁴ Te nsidaa nècuàchìmà, ni cachitnúhu-ne xi nècuàchi làcà ni cansiaa mà, cachí-nè:

—Ñà-ndàá nduá, sàni natiacu Stoho-ndà Señor, vàchi sàni xini Simón-ya.

³⁵ Dandu nècuàchi ni cansiaa mà, ni nacani stná-nè xi nècuàchi yucán nansa ni cuu xi-né na cuàhàn-nè ichi yucán, te después ni nacuni-nèyà na ní dàcuàchí-yá pan (cuàhàn-nè cuxi-ne).

Nansa ni ndecunu Jesús nuù ùxin iin nèhivi dacuahá-yá

³⁶ Daaní, nacání vá nècuàchìmà ñà-jaàn, te nanàà ni sàcuìin Jesús dava mahi-xí. Te ni cachi-yá xi-né:

—¡Ni ndóo vaha ini nsidaa-nsià!

³⁷ Doco mii-né, ni cayùhí cuaá-nè; yáha ga ni ndulocó-nè, vâchi ádi дума nduá ni cahan-né.

³⁸ Ñâyùcàndüá, ni cachi-yà xi-né:

—¿Índü chuun yúhí guá-nsiá? ¿Índü chuun nacání guá ini-nsia?

³⁹ Cundehè-nsiá ndahí xi sáhí, dandu cundaá ini-nsia divi yùhù nduí. Tnií ndahà-nsiá yùhù, te cundaá ini-nsia màdi ihna nduí, vâchi ihna, còò iquicúñüá, doco yùhù, iá iquicúñüí sà-indéhe-nsiá

⁴⁰ —ni cachi-yà.

Dandu ni dâcuní-yànè ndahà-yá, xi sàhà-yá.

⁴¹ Doco có-xiníndisá ndisa-ne ñà-cuàhà guá cudí ini-nè, te ndulócó-nè. Ñâyùcàndüá, ni cachi-yà xi-né:

—¿Á coo iyuhu ñà-cuxi-nda yohó?

⁴² Dandu ni sàha-neyá iyuhu cuñu siaca ni chòhò, xi stná iin dahnde ñùñù.

⁴³ Ñâyùcàndüá, ni tnií-yañá ni xixi-ya ni sandehè nsidaa-né.

⁴⁴ Dandu, ni cachi-yà xi-né:

—Ñà-yohó nduá ni cachi-xi-nsiá na nisa le xi-nsiá antes, te ni cachi-xi-nsiá ñà-fuerza icúmí cuu ndisa nsidaa ñà-ndüá cachá` sáhí nùù ley xi Moisés xi nùù tutu nduú alabanza, xi nùù stná tutu ni tiaa nècuàchì profeta; nsidaamá, fuerza ni cuu ndisa, —ni cachi-yà.

⁴⁵ Dandu ni dátú-ya nùù nsidaa-né nansa cuní cachi tutu ìi, te ni sàà-nè ni cundaá ini-nè ni quida-ya.

⁴⁶ Dandu ni cachi stná-yà xi-né:

—Nacua ni cachi-xi-nsiá, ducán nisa ia destinadu cuu xi (yùhù ana nduú) Cristu, vâchi ducán ni cachitnùhu tutu ìi ñà-icúmí ndohi, te cui, dandu tixi ùni quiví natiacuì.

⁴⁷ Te ni cachitnùhu stná tutu mà ñà-después cuitiá razón ndiaha ma inicutu ñuhiví, vâchi icúmí-nsiá cùhùn-nsiá càhàn-nsiá sáhí xi nsidaa nèhiví ñà-ndiá icà-né naxicocuíñ ini-nè sàhà cuàchi-ne, dandu cuicahnú ini xi sàhà-né. Te ñuu primeru ndé càhàn-nsiá razón mà nduú ñuu Jerusalén yohó.

⁴⁸ Te vichí sàni xini-nsia nsidaa ñà-ndüá ni cuu (tiempu vichi), ñâyùcàndüá testigu xínduu-nsia.

⁴⁹ Cunaha-nsiá, sàni quida Yuamáni' comprometer quixi iin ana (chindee) xi-nsiá. Te yùhù cuàhìn techuín yàmà quixi coo-ya ini anima-nsiá. Ñâyùcàndüá, yohó ni cúndóó-nsiá ñuu Jerusalén dècuèndè cachi sàni cundiatú-nsiá ndudu ìi vâxi ansivi —ni cachi-yà.

Nansa mànuhù Jesús gloria

⁵⁰ Daaní, ni saca-yanè cuàhàn-yà xi-né (fuera) ñuu Jerusalén dècuèndè ñuu tii Betania. Dandu ni chítanini ducún-yà ndahà-yá, te ni xicàn-yà ni quidá Dios gracia sàhà nsidaa-né.

⁵¹ Te meru xicàn tàhvi-yà nùù Dios ducán, dandu ni ndanchito-ya mànana-ya mànuhù-yà gloria.

⁵² Ñâyùcàndüá ni sàcuíta sisi nsidaa-né ni naquimani ndiaha-néyà. Dandu ni quihin tu-ne ichi mànuhù-né ñuu Jerusalén, cudí gá ini-nè.

⁵³ Te nsiquiví nisa sàhàn-nè veheñùhu cahnú, ndoó-né ndeníhí vaha cuahà-né Dios, te naquimáni stná-nèyà. Sà-íá.

Ñà-nduá Nì Tiaa San Juan sàhà Jesucristu

Jesús nduú ana datúí nansa íá Dios, vâchi nì nanduu-ya nèhivi

¹ Na táyô ñuhiví, sà-íá mii-yá ana datúí nansa nihnú ini Dios. Nùù Yua-nda Dios íá-yà, te mii stná-yà nduú stná-yà Dios.

² Te divi-ya íá nùù Yua-nda Dios na táyô ñuhiví.

³ Mii-yá nì quidayacun-yà nsidanicuú ñàhà íá ñuhiví. Te nú màsà cóó-yá, ni-ñàhà mà cóó stná ñuhiví.

⁴ Sàhà mii-yá xí-itiacu nsidaa ana itiacú. Te sàhà ñà-itiacú ndiaha-yá, ñà-jaàn sàni sàà-yà datnúù ini-yà nèhivi ñuhiví.

⁵ Cunaha-nsiá, ichi ñàa nduá ñuhiví yohó, doco iin-ni datnúù ndiaha-yá ini anima-nda; te nsidaa ñà-íá ichi ñàa ma, cóni cùí cundeá nùù-yá.

⁶ Nisa la iin tiaa nì nihì chuun nùù Dios; Juan nani-né.

⁷ Te nì quixi-ne nì cachì-nè ñà-ndácuisi xì nèhivi nansa íá mii-yá ana datnúù xì sàxínítnúni-nda sàhà-ñá vâùnì cunindisá nsidaa-néyà.

⁸ Màdi Juan yucán nì sándúú ana datnúù ndiaha xì ini-nda, cóó; cuisì nì quixi-ne ñà-cachitnùhu uun-ne nansa íá mii-yá quidà-xì ñà-jaàn,

⁹ vâchi ndisa sàvâxi mii-yá ana datnúù ndiaha xì ini anima nsidaa nèhivi, te mà dándâhvi-yândó.

¹⁰ Nì ìa-ya ñuhiví, divi ñuhiví nì quidayacun-yà, doco cóni nácúni nèhivi-yá.

¹¹ Stoho ñuhiví nduú-yá, te nì quixi-ya yohó, doco nèhivi ñuhiví xì-ya, nì cahìchi ini-néyà.

¹² Doco nsidaa ana nì dâyáha xì-yá ini anima-xì, nì nihitâhvi-né cunduu-ne dèhe ndisa-ya, te divi nduú nsidaa ndohó nècuâchi xíníndisá-xì-yá, te ndácûcahan xì quivì-yá.

¹³ Te ¿nansa nì nihì-nda nì sàcunduu ndisa-nda dèhe-ya? Pues màdi sàhà-ñá nduu-nda descendencia xì iin nèhivi (chica ndiaá), nì màdi sàhà yua-nda, nì sàhà stná ñà-ducán cuní iin nèhivi coo. Cóó, sàhà cuisì-ña ducán cuní Dios.

¹⁴ Ndè ñuhiví yohó nì quixi mii-yá ana datúí nansa íá Dios, te nì nduvâha-ya iin nèhivi íá iquicúñù-xì. Te nisa la chii-yá yohó ndé ndoo-nda. Te nsiùhù, nì xini-nsi ñà-ndiaha guá íá-yà. Ndiaha gá-yà, cachí, vâchi mindaa Dèhemani Yua-nda Dios nduú-yá, te chitu-yá gracia xì stná palabra ndácuisi.

Ñà-nduá nì cachì Juan Bautista sàhà Jesús

¹⁵ Daaní, nì càhàn Juan mà sàhà Jesús, nì ndâhì-nè, cachì-nè (xì nèhivi):

—Divi mii-yá nduú ana disàhà-xì nì càhìn xì-nsiá daa, te nì cachì, dihna yàha yùhù, dandu después vâxi mii-yá ana chicá ndiaá nùí, vâchi na táyô yùhù, sà-íá mii-yá.

¹⁶ Chitu-yá cuàhà gá ñà-ndiaha ñì ñuhú ini-yà, ñâyúcandùá nùù mii-yá sàni nihitâhvi stná-nda cuàhà ñà-jaàn, cuàhà sàstrnùhù gracia.

¹⁷ Vâchi ley sàhana nduá nì datúí Moisés antes, doco vichi sàni datúí-ya ñà-nduú gracia ndiaha xì-yá xì stná palabra ndácuisi xì-yá.

¹⁸ Còò nì-iin nèhivi nì xini xì Yua-nda Dios nì-iin xichi. Doco mindaa Dèhemani-yá íá nùù-yá, sàni datúí yà-yúcán nansa íá Yuamáni-yá sàhà-ñá cundaá ini-nda.

Ñà-nduá nì cachì Juan Bautista sàhà mii-né

¹⁹ Daaní, nècuâchi raza Judea ndoo ñuu Jerusalén, nì techuún-né iin ùì dùtù xì-ne nùù Juan, te cutnâhà stná-nè xì dava nècuâchi (xinúcuâchì veheñùhu nani) Levita. Te nì xicàn tnùhù-né nùù nècuâchìmà ana divi nduú-né.

²⁰ Ñâyúcandùá, ñà-yohó nduá nì cachì Juan; cóni cachì-nè á cóó; nì cachì ndàà-nè:

—Yùhù, có-nduú mii-yá nani Cristu.

²¹ Dandu nì cacachi nècuâchìmà:

—(Pues nú cóó), ¿ana divi nduu-ní? ¿A nsi-Elías nduu-ní?

Te nì cachì Juan:

—Còó.

Te nì cacachi tu nècuâchìmà:

—Entonces, ¿a divi nduu-ní mii-yá ana icúmí quixi canúú càhàn cuenta xì Dios?

—Còó —cachì Juan.

²² Ñâyúcandùá, nì cachì nècuâchìmà:

—Pues, ¿ana divi nduu-ní? vâchi icúmí-nsi cachitnùhu-nsi xì nèhivi nì catechuun-xi-nsi vâxi-nsi. ¿Ndíá cachì-ní sàhà mii-ní?

²³ Dandu nì cachì Juan:

—Yùhù nduí ana cáhàn fuerte sàhù yucù, (te cachí xì nèhivì ñà-nsidavii-né anima-nè) na ian ndundaà iin ichì ndé yàha Stoho-ndà Señor nacua ni cachitnùhu Isaías sàhana na ní cáhàn-nè cuenta xi Dios —ni cachi Juan.

²⁴ Cunaha-nsiá, nècuàchì nì casaà nùu Juan mà, nècuàchì fariseu xínduu-né.

²⁵ Dandu nì xicàn tnùhù gá-nè, cachí-nè:

—Vichi, ¿índù chuun quidá ì-ní nèhivì nú có-ndùu-ní mii-yá nani Cristu, te có-ndùu stná-ní nsi-Elías, te nì có-ndùu stná-ní mii-yá icúmí quixi cáhàn cuenta xi Dios?

²⁶ Dandu nì cachi Juan xi-né:

—Yùhù, ndisa, quidá ì' nèhivì xi tècuí. Doco mahì mii-nsiá iá iin ana có-nàcúni-nsiá.

²⁷ Te mii-yá, nchícùn gá vaxi-ya nù, te chicá ndiaá stná-yà nù. Ni mà nátui (cundui iin mozo xi-ya) ñà-tavà xì ndisàn-yá —ni cachi Juan.

²⁸ Cunaha-nsiá, ndé iá ñuu tii Betábara ladu duha yùte Jordán, yucán nì cuu nsidaa ñà-yòhó.

Nì quixi Jesús ñuhivì yohó ñà-cui-yà na ian xhì iin lelù nduú promesa

²⁹ Daanì, nì yàha inga quivì, dandu nì xini Juan vaxi Jesús, te nì cachi-nè:

—Cundehe-nsiá, jaàn vaxi mii-yá ana nduú nahi Lelù Ì nì sàhatahvi Dios (ñà-cui-yà) dacúxió-yá cuàchì nèhivì ñuhivì.

³⁰ Sàhà mii-yá nì cahn daa na ní cachi: nchícùn gá vaxi-ya nù, vachi na táyôo yùhù ñuhivì, sà-íá-yà, vachi nicanicuahàn íá-yà.

³¹ Te cóni nácúni mii-yá antes, doco sàhà-ñá cundaà ini raza-ndà Israel ana divi nduú-yá, sàhàjàn nì nihí chuun quida ì' nèhivì xi tècuí —ni cachi Juan.

³² Daanì, nì cachi tu-ne inga palabra yohó:

—Yùhù, nì xini nì nuu Espíritu Ì xí Dios; nahi loma nàhà-yà mànuu-ya ansivi nì sàcòo-ya òni Jesús, te nì ndòo-ya yucán.

³³ Yùhù, cóni nácúni mii-yá antes. Doco na ní sàha Yua-nda Dios yùhù chuun quida ì' nèhivì, dandu nì cachi stná-yá xì: “Na cùnì-ní nuu Espíritu Ì màcòo-ya òni iin (ana cuhí), dandu ñà-jaàn cundaà ini-ní divi nduú mii-yá cuàhàn nsida ì xì anima nèhivì tixi Espíritu Ì”.

³⁴ Ñàyùcàndúá, yùhù, sàni xini, te datú: nùu-nsiá ñà-divi Dèhemani Dios nduú Jesús —nì cachi Juan.

Nècuàchì primeru nì catenhicùn xì Jesús

³⁵ Daanì, nì yàha inga quivì, te yucán iin Juan, cutnàhà-né xì ù tiàa dacuahá-né.

³⁶ Te nì xini-nè yatni yàha Jesús, ñàyùcàndúá nì cachi-nè:

—Cundehe-nsiá, jaàn cuàhàn mii-yá ana nduú Lelù Ì vaxi nùu Dios.

³⁷ Te ù tiàa dacuahà-ma, nì tiacu-nè nì cáhàn Juan ducán, te nì tenchicùn-nè Jesús cuàhàn-nè.

³⁸ Dandu nì ndacoto-ya, te nì xini-yá xinchicùn nècuàchìma. Ñàyùcàndúá nì cachi-yá xi-né:

—¿Ndía nduá nandúcu-nsiá?

Dandu nì cachi-nè xi-yá:

—Maestro, ¿índù íá-ní?

³⁹ —Nahà-nsia, cundehe-nsiá —nì cachi-yá xi-né.

Ñàyùcàndúá, cuàhàn-nè xi-yá, te nì xini-nè índù íá-yá. Te nì ndòo-ne xi-yá sàcuaà yucán, vachi nahi càcúmi nì cuaà nduá.

⁴⁰⁻⁴¹ Iin tiàa nani Andrés nduú iin ana nì inini na ní cáhàn Juan daa, te nì tenchicùn stná-nè Jesús. Dandu vichi duha nì sàhàn stná-nè nì nanducu-né ñani-nè nani Simón Pedro, te nì cachi-nè xì nècuàchìma:

—Sàni ndacùhun stnahá-nsí xì mii-yá nduú Mesías.

Quivì Mesías nì cachi Andrés dàhàn mii-né, vachi cunì cachàmà Cristu (nì quixi dìqui-xì).

⁴² Dandu nì saca-ne ñani-nè nì casaà-nè ndé íá-yá. Te na ní xini-yá Simón mà, dandu nì cachi-yá xi-né:

—Dèhe Jonás nduu-ní, te nani-ní Simón, doco yùhù cuàhàn cachi xi-ní Cefas —nì cachi-yá. Te quivì Cefas mà, Pedro cunì cachà.

Nansa nì cana Jesús iin tiàa nani Felipe xì inga-nè nani Natanael

⁴³ Daanì, nì yàha inga quivì, te cunì Jesús nùhù-yà ladu Galilea. Te nì ndacùhun tnahá-yá xì iin tiàa nani Felipe, te nì cachi-yá xi-né:

—Cunchicùn-ní yùhù nùhù-ndà.

⁴⁴ Cunaha-nsiá, ñuu Felipe mà nduú ñuu Betsaida, divi ñuu Andrés xì Pedro.

⁴⁵ Ñàyùcàndúá nì nanducu Felipe iin tiàa nani Natanael, te nì cachi-nè xì nècuàchìma:

—Cunaha-ní, sàni ndacùhun tnahá-nsí xì mii-yá nì tiaa Moisés sàhà-xí nùù ley ìi, te divi sàhà stná-yà nì tiaa stná cuàhà profeta nì càhàn cuenta xi Dios sàhana. Jesús de Nazaret nani-yá, te yua-yá nani José.

⁴⁶ Dandu nì cachi Natanael:

—¿A ndísá? ¿A íá iin nèhivì vaha ñuu Nazaret?

Dandu nì cachi Felipe:

—Nahà-ní cundehè-ní.

(Dandu cuàhàn-nè xì nècuàchìimà.)

⁴⁷ Te na ní xini Jesús vaxi Natanael, dandu nì cachi-yà sàhà-né:

—Yohó vaxi iin tiàa quidá ndisa nacua ndiá icà quida nècuàchì raza-ndà Israel, te ni-iyuhu mà túha-ne dandahví-nè.

⁴⁸ Dandu nì cachi Natanael xi-yá:

—¿Nansa ináhà-nì yùhù?

Te nì cachi Jesús xi-né:

—Na tãñáha ga cana Felipe mii-ní, te íá-ní sàhà iin nù-higu, dandu nì xinitùú mii-ní.

⁴⁹ Dandu nì cachi Natanael xi-yá:

—Dèhemani Dios nduu-ní, Maestro, divi rey icúmí cusáhnù nùù ñuu-ndà Israel nduu-ní.

⁵⁰ Dandu nì cachi Jesús xi-né:

—Mà úhi guá nì xinindisa-ní na ní cachi nì xinitùú mii-ní sàhà yutnù yucán. Cunaha-ní, icúmí-ní cuni-ní milagru chicá ndiaha.

⁵¹ Ñà-ndácuisi nduá cachí xi-ní, icúmí-ní cuni-ní nuna ansivi, dandu quecoyo ángel xi Dios mànana mànuu cucuu-ne diquì-xì ndé iin yùhù ana nduú Tnahà Nèhivì Ñuhivì.

2

Nansa nì quida Jesús milagru iin vicò nandàhà nì ia ñuu Caná

¹ Daaní, quivì ùni nì ia iin vicò nandàhà ñuu tii Caná íá ladu Galilea. Te yucán nì sàà stná dihi Jesús.

² Te nì càna stná mii-yá xì nècuàchì dacuahá-yá.

³ Te nì cuu nì nsihì tècuíí vidi sì-uva coho-ne. Ñàyücàndüá, nì càhàn dihi-yá xi-yá, cachí-nè: —Sàni nsihì tècuíí vidi sì-uva.

⁴ Dandu nì cachi-yà xi-né:

—Chicá vaha nacoo-ní ñà-jaàn nùù yùhù, vachi tãñáha ga sàà meru hora xi.

⁵ Dandu nì càhàn dihi-yá xì tiàa xinúcuáchì yucán, cachí-nè:

—Quida-nsia nacua cachí dèhi xi-nsiá.

⁶ Cunaha-nsiá, yucán itá iñù barril yùù, iin ian vátuni cuñuhu cùmi ò úhùn yoo tècuíí. Tècuíí mà xichúùn nècuàchì raza Judea ñà-nsidandoo-ne mii-né segùn estilu nduú ley xi-ne.

⁷ Te nì cachi Jesús xi tiàa yucán:

—Dachitu-nsiá barril jaàn tècuíí.

Ñàyücàndüá, ducán nì caquida-tè, dècuèndè yuhá nì chitu.

⁸ Dandu nì cachi-yà xi-té:

—Vichi chitacuhá-nsiá chii-té cunihì-nsia cùhùn nùù nècuàchì iin sáhnù nùù vicò.

Ñàyücàndüá, ducán nì caquida-tè.

⁹ Te nì xihì nècuàchìimà iyuhu tècuíí mà, doco sàni nanduu-tè tècuíí vidi sì-uva. Te cóni sáha-ne cuenta indù nì quixi ndutè mà, doco tè-xinúcuáchì nì catavà xi-té, ináhà-tè. Daaní, na ní cundaà ini-nè nansa xihí ndutè mà, dandu nì cana-ne noviu nándàhà,

¹⁰ te nì cachi-nè xi nècuàchìimà:

—Nsidaa nèhivì, na sáha-ne tècuíí vidi sì-uva coho-nda, dihna sáha-ne ndutè chicá vaha, dandu nú sàni xihì cuahà-ndatè, dandu tavá-né ndutè chicá ndahví. Doco mii-ní, cóò, làcà vichi nì tavá-ní ndutè chicá finu —nì cachi-nè.

¹¹ Ñà-jaàn nduú milagru primeru nì quida Jesús. Te ñuu Caná íá ladu Galilea nduú lugar ndé nì quida-yañá. Ducán nduú nì dàcùnì-yà nèhivì ñà-ndiaha guá quidá-yá, te nì xinindisá stná nècuàchì dacuahá-yá mii-yá.

¹² Daaní, nì sàhàn Jesús ñuu Capernaum, mii-yá xì dihi-yá xi ñani-yá, xì stná nècuàchì dacuahá-yá. Te yucán nì cuee-yà iin ùi quivì.

Nansa nì tavá Jesús nèhivì dicó ini patiu veheñuhu cahnú

¹³ Dandu nì quihìn tu-ya ichì cuàhàn-yà ñuu cahnú Jerusalén, vachi sà-ìtúú vicò pascua, iin vicò nsidácáhnù nècuàchì raza Judea yucán.

¹⁴ (Ñàyücàndüá, nì sàà-yà ñuu mà), te nì xini-yà yucán yehè veheñuhu cahnú itá nèhivì dicó; dicó-né buey, dicó-né rii, dicó-né loma, te ndoó stná nèhivì nadámá tnahá xi dihùn (vaxi inga ñuu).

¹⁵ Dandu ni cava-yà itnii yohò ni quidayucun-yà iin chirrión, te ni taxi nsihí-yánè yehè veheñùhuma, mii-né xi rii xi-né xi stná buey xi-ne. Te ni dàndiàchi-yá dihùn damá-né, te ni ducùn nsihí-yá mesa xi-ne.

¹⁶ Te ni cachi stná-yà xi nècuàchi dicó xi loma mà:

—¡Tavá-nsiá quisi yohó fuera! vâchi màdi yàhvi nduú vehe ìi Yuamáni' —ni cachi-yà.

¹⁷ Dandu ni nsinuu ini nècuàchi dacuahá-yá nansa cachí nùu tutu ìi ndé cachá: “Yáha ga cuahà nacáni ìni sàhà veheñùhu ìi xi-ní ñà-màsà dándãñùhú nèhivi ñà-ìi icúmíã”.

¹⁸ Dandu nècuàchi raza-yà Judea yucán, ni cachi-nè xi-yá:

—Quida-ní iin milagru cunduu seña ñà-cundaã ini-nsi a icúmí-ní derechu quida-ní ñà-nduá ni quida-ní, á coó.

¹⁹ Dandu ni cachi-yà xi-né:

—Vâtùni. Ducùn-nsiá veheñùhu yohó, te tixi ùni quivi nsida saí-ñà.

²⁰ Dandu ni cachi nècuàchi yucán:

—Ûi dico ìñù cuiá ni quidachuún nèhivi ni dàxínu-ne veheñùhu yohó. Te mii-ní, ¿a ndísá dàxínu-niá tixi ùni quivi? —ni cachi-nè.

²¹ Doco màdi veheñùhu ndisa nduá cãhàn-yà sàhà-xí; coó, vâchi ejemplu-ni nduámã; divi cuerpu mii-yá cãhàn-yà sàhà-xí.

²² Ñàyúcandüá, después, na quivi sàni natiacu-yà, dandu ni nsinuu ini nècuàchi nchícùn xi-yá ñà-dúcán ni cachi-yà xi-né daa, te ni sàà-nè ni xinindisá-né ñà-nduá cachí nùu tutu ìi, te ni xinindisá stná-nè ñà-nduá ni cachi mii-yá daa.

Ináhã Jesús nansa iã anima nsidanicuú nèhivi

²³ Cuahã nèhivi ni xinindisa-xi-yá na ní xini-nè milagru ni quida-ya na iá-yà ñuu Jerusalén quivi vicó pascua ma.

²⁴ Doco mii-yá, cóni icúmí-yã nècuàchimã seguru, vâchi ináhã-yã ñà-ñùhú ini anima nsidanicuú-né.

²⁵ Còo necesidad icúmí-yã cachi iin nèhivi xi-yá nansa iã anima ñanitnaha-ne, vâchi ináhã-yã nsidaa ñà-nduá ñuhú ini anima nèhivi.

3

Nansa ni cãhàn iin tiãa nani Nicodemo xi Jesús

¹ Nisa ìa iin nècuàchi fariseu nani Nicodemo. Iin nècuàchi xidandacú nùu ladu Judea mà nduú stná-nè.

² Te divi-ne ni sãhàn ndé iã Jesús iin sãñaã, te ni cachi-nè xi-yá:

—Maestro, ináhã-nsi divi mandu xi Dios vãxi-ní, vâchi nú màsã chindéé Dios, dandu ni-iin nèhivi, mà ñihí-né quida-ne milagru nacua quidã mii-ní.

³ Dandu ni cachi Jesús xi-né:

—Palabra ndãcuisi nduá yohó cachí xi-ní: nú màsã nácacú sáã nèhivi, dandu mà cúí sàà-nè cuni-nè ñuhiví ìi xí Dios.

⁴ Dandu ni cachi Nicodemo xi-yá:

—¿Nansa cui nacacu-nda nú sàni sahnu-nda? ¿A cúí nàcũñuhu saa-nda ini dihimáni-ndã, te nacacu-nda?

⁵ Dandu ni cachi Jesús xi-né:

—Ñà-ndãcuisi nduú palabra yohó cachí xi-ní: nú màsã nácacú sáã iin nèhivi quida tècuif xi stná Espiritu ìi, dandu mà ñihí-né yãha-ne ñuhiví ìi ndé cusãhnú Dios.

⁶ Vâchi nú sàni cacu-nda nùu yuadihí-ndã, dandu iquicũñú icúmí-ndã. Doco nú sàni cacu anima-ndã quida Espiritu ìi xí Dios, dandu espíritu (saa) cucumi stná-ndã.

⁷ Màsã ndúlócõ-ni ñà-ni cachi xi-ní icúmí-ni nacacu saa-ní.

⁸ Vâchi ducán quidã stná tàchi, caná te caná yohó yucán, doco có-ináhã-nsiã ìndù lugar vãxa, ni ìndù lugar cuahàn. Ducán iã stná xi anima nsidaa nèhivi ni nacacu ni quida Espiritu ìi.

⁹ Dandu ni cachi Nicodemo xi-yá:

—Pues, ¿ìndù modo cunduu nsidaa ñà-càchí-ni jaàn?

¹⁰ Dandu ni cachi Jesús xi-né:

—Iin maestru ñuu-ndã Israel nduu-ní, te có-sãnihí ini-ní sãhãjàn nacua ndiã ìcã-ní.

¹¹ Ñà-ndãcuisi nduá yohó cachí xi-ní: ñà-nduá ináhã-nsi, divi ñà-jaàn cachí-nsi xi-nsiã. Te datú stná-nsi nùu-nsiã ñà-nduá sãni xini-nsi, doco có-xinindisã-nsiã.

¹² Mate cuisí sàhã ñà-ìã ñuhiví yohó-ní nduá cãhìn xi-nsiã, doco có-xinindisã-nsiã; ñàyúcandüá, ùhi cunindisã stná-nsiã nú ni cãhìn xi-nsiã sàhã gloria (xi Dios).

¹³ Ni-iin nèhivi tàñãha ga nana-ne gloria. Doco yùhù ana nduú Tnaha Nèhivi Ñuhiví, ansiví nduú vehi, te ni nui ni quesai (ñuhiví yohó).

¹⁴ Te nacua ni quida Moisés (sàhaha) na nisa ia-ne yucù, ni chituu ducùn-nè iin còò (càa), pues ducán stná yùhù, icúmí nèhivì chituu ducùn stná-nè yùhù.

¹⁵ Dandu nsidaa nèhivì cunindisa-xí, mà nunca sàà-nè ndañuhu-né; còò, nicanicuahàn cutiacu-nè.

¹⁶ Vàchi ñà-cuàhà guá cuú ini Yua-nda Dios sàhà nèhivì ñuhiví, ni sàhatahvì-yá mindaa Dèhemanì-yá (ñà-cui-yà), dandu nsidaa nèhivì xiníndísá-xí-yá, mà sàà-nè ndañuhu-né, còò, nicanicuahàn icúmí-nè cutiacu-nè.

¹⁷ Vàchi màdi sàhà-ñá dandohó-yá nèhivì cuáchi nduá disàhà-xí ni ndacu nuù Dèhemanì-yá quixi-ya ñuhivì yohó, còò; divi sàhà-ñá càcu-ne nduá.

¹⁸ 'Nú xiníndísá iin nèhivì Dèhemanì Dios, dandu ñà-sàni càcu-ne nuù castigu sàhà cuáchi-ne nduá; doco nèhivì có-xiníndísá, sà-ia vaxi castigu xi-ne nuù-yá, vachi có-xiníndísá-né ñà-nduá cachí mindaa Dèhemanì-yá.

¹⁹ Te ñndiá nduú meru ñà-disàhà-xí vaxi castigu mà diquì-né? Divi sàhà-ñá sàni quesaa palabra ndàcuisi ñuhivì yohó ñà-datnúá sàxinítnùnì nèhivì, doco chicá ni cudíi ini-nè cacá-ne ichi ñáa, màdi ichi ndé datnúú Dios, vachi quini íá ñà-nduá quidá-né.

²⁰ Te nsidaa nècuàchìmà, có-cùnì dahuun-ne cunini-ne palabra datnúú xi sàxinítnùnì-nè, ni có-ntátuu stná-nè ndé càhàn xi palabra mà sàhà-ñá màsà tui ñà-quini guá quidá-né.

²¹ Doco iin nèhivì quidá víi nacua cachí palabra ndàcuisi, cudíi ini-nè ntátuu-ne ndé íá palabra datnúú xi sàxinítnùnì-nè, vachi cunì-nè cundaà ini nsidaa nèhivì ñà-quidá víi-nè nchícùn-nè ichi Dios —ni cachí Jesús.

Ñà-nduá ni cachí gá Juan Bautista sàhà Jesús

²² Daani, ni quihin tu Jesús ichi cuàhàn-yá ladu Judea, mii-yá xi nècuàchì xínchicùn xi-yá. Te yucán ni ndòò chii-yá xi-né, dandu ni cuhii nèhivì cuàhà gá ni sàà yucán.

²³ Stná Juan Bautista, yucán quidá í stná-nè nuù iin xaan nani Enón yatni lugar nani Salim, vachi ñuhú cuàhà tècuíi yucán. Nàyucànduá, divi lugar mà sàhàn cuàhà nèhivì ñà-cuhii-né,

²⁴ vachi tàñáha ga cundiadi Juan.

²⁵ Tiempu mà ni cuu ni quesaha ni cuàà nèhivì nchícùn xi Juan xi itnii gá nècuàchì raza-nè Judea, vachi tucu tucu cachí iin iin-ne sàhà modo nduhii-ndá.

²⁶ Dandu nsidaa-né ni quixi-ne nuù Juan ni cacachi-nè xi nècuàchìmà:

—Maestro, ináhá-ní ana nisa ia xi-ní ladu duha yùte Jordán, te ni càhàn-ní sàhà-né, ndiaha gá-nè ni cachí-ní; pues vichi mii stná-nè quidá í stná-nè nèhivì, te cuàhà gá nèhivì sàhàn nuù-né.

²⁷ Dandu ni cachí Juan xi-né:

—Ni-iin nèhivì, mà cúí ñihì-né iin chuun ndiaha nú màsà cuàha Dios-né.

²⁸ Ináhá-nsiá nansa ni cachí: “Yùhù, có-ndúí (rey ndiaha nani) Cristu, cuisì iin ana ni techuún Dios nduí, te dihna vaxi nuù mii-yá”.

²⁹ Cunaha-nsiá, na íá vicò nandàhà, íá iin noviu, te íá stná novia cutnàhà xí-nè. Doco íá stná padrinu iladú, iníni-né, te cudíi ini-nè na càhàn noviu. Pues, ducán íá stná yùhù, nahi padrinu nduí, te yáha ga cudíi ini sàhà mii-yá.

³⁰ Mii-yá, cueé-ni cueé-ni chicá icúmí-yá ñihì gá-yá tñùuhu xí-yá, doco yùhù, còò. Cueé-ni cueé-ni icúmí nèhivì nandòdó-né yùhù.

Jesús nduú ana ni nuu ansivi

³¹ Mii-yá, dècuèndé diquì-xí ni quee-ya, ñàyucànduá chicá ndiaá-yá nuù nsidaa-nda. Iin nèhivì ñuhivì yohó, nèhivì úun nduú-né, te cuisì sàhà ñuhivì yohó càhàn-nè. Doco mii-yá, ansivi ni quixi-ya, te chicá ndiaá-yá.

³² Te ñà-nduá sàni xini-yá, xi ñà-nduá ni inini-ya, ñà-jaàn nduá cachí-yá xi nèhivì, doco có-xiníndísá-né ñà-nduá cachí-yá.

³³ Doco nú xiníndísá iin nèhivì-yá, dandu nàhà claru sàni cundaà ini nècuàchìmà ñà-mii palabra ndàcuisi nduá cachí Dios.

³⁴ Vachi Jesús, mandu xi (Yua-nda) Dios vaxi-ya, te divi palabra ndiaha xí Yuamánì-yá càhàn-yá, vachi màdi iyuhu-ní Espíritu Ìi sàni ñihitàhvì-yá, còò. Sàni ñihì nsihí-yá Espíritu Ìi.

³⁵ Te cuú ini Yuamánì-yá sàhà-yá. Ndahà-yá sàni ñàyáha Yuamánì-yá nsidanicuú ñàhà.

³⁶ Cunaha-nsiá, nsidaa ana xiníndísá-xí Dèhemanì Dios, nicanicuahàn cucumi-né vida ndiaha. Doco nèhivì có-xiníndísá, mà-ñihì-né vida ndiaha ma. Còò, iin castigu cahnú icúmí-né ñihì-né nuù-yá, te sà-ítuá vaxan.

4

Nansa ni yàha iin nècuàchì ñahà ñuu Samaria ladu xi Jesús

¹⁻² Quivì yucán ni nducuahà gá nèhivì nchícùn xì Jesús. Te ni cuhii stná-nè. Doco màdi mii Jesús ni quidá ì xì-né, cuiisì nècuàchì dacuahá-yá ni quida ì xì-né. Dècuèndè más gá nèhivì xí-yá ni cuhii nùu nèhivì ni quida ì Juan Bautista. Dandu ni xinitnùhu stná nècuàchì fariseu ñà-cuàhà guá nèhivì nchícùn xì-yá. Ñàyùcàndüá, na ní cundaà ini-yá ñà-sà-ináhá nècuàchimà ñà-jaàn,

³ dandu ni quee-ya ladu Judea mànuhù-yá ladu Galilea, (mii-yá xì nècuàchì dacuahá-yá).

⁴ Te ichi mà icúmi-yá yàha-ya ladu Samaria.

⁵ Te xicá-yá ni nasaa-yá yatni iin ñuu tii nani Sicar. Te divi yucán nduú stná ñuhù ndé nisa itnii José sànahà, vàchi ñuhù ni ndutahvi-né nùu yua-né Jacob nduá.

⁶ Te yucán iá stná pozo nisa xichuún Jacob mà sànahà. Pues divi yuhù pozo mà ni sàcòo chii-yá, vàchi caní ichi ni xica-ya, te xávi-yá. Nahi càxihú nduá,

⁷⁻⁸ te sàcuàhàn nsidaa nècuàchì dacuahá-yá ñuu mà ñà-cuiin-ne ñà-cutiacu-né. Dandu (nùu pozo mà) ni ntàuu stná iin nècuàchì ñahà ladu Samaria mà ñà-tavà-né tècuí. Te ni cachi-yá xì-né:

—Taxi tahvi-ní iyuhu tècuí cohi.

⁹ Te ni cachi nècuàchimà xì-yá:

—Doco mii-ní, iin nècuàchì raza Judea nduu-ní. ¿Índu chuun xicàn-ní tècuí coho-ní nùu yuhù? vàchi nsidaa nècuàchì ñuu-ní, indéhe úhi-né nsiùhù tè-nduú nècuàchì Samaria yohó.

¹⁰ Dandu ni cachi Jesús xì-né:

—Ndahvi-ní, vàchi có-cùndáà ini-ní nansa quidá Dios, dacútahvi-yá tnùmanì xí-yá nùu nèhivì; ni có-ináhá stná-ní ana divi nduú yuhù ana xicàn xì tècuí nùu-ní. Vàchi nú ni cùndáà ini-ní, dandu càcàn tahvi-ní nùu, te dacútahvi mii-ní tècuí cutiacu ndiaha-ní.

¹¹ Dandu ni cachi-nè xì-yá:

—Señor, còo ni-ñàha nihi-ní tavà-ní tècuí yohó, vàchi cunú ñuhù-te. ¿Nansa cui tavà-ní tècuí cutiacu ndiahi?

¹² Cunaha-ní, pozo yohó nduú ndé nisa xihì xii-ndà Jacob, mii-né xì nsidaa dèhe-ne xì quisi xì-né, dandu ni nacoo-neà nùu nsiùhù. ¿Te mii-ní, a chicá ndiaá-ní nùu xii-ndà mà cahan-ní?

¹³ Dandu ni cachi Jesús xì-né:

—Nú ni cohó nèhivì tècuí pozo yohó, dandu tucutu icúmi-né cui-nè tècuí después.

¹⁴ Doco nú ni cohó-né tècuí dacútahvi yuhù-né, dandu mà nunca cui gà-nète nicanicuahàn. Vàchi ducàn quea na ian ñuhù tècuí ini-né, te ndéa ndiaha-té dècuèndè nihitahvi-né vida ndiaha nicanicuahàn.

¹⁵ Dandu ni cachi nècuàchì ñahà mà:

—Señor, taxi-ní tècuí mà cohi ñà-màsà cú guè tècuí, te màsà quixí guè yohó tavi-te.

¹⁶ Dandu ni cachi Jesús xì-né:

—Cuahán-ní cana-ní ì-ní quixi-nsia.

¹⁷ Dandu ni cachi nècuàchimà:

—Còo ì yuhù.

Dandu ni cachi Jesús xì-né:

—Ñà-ndáa nduá cachi-ní còo ì-ní,

¹⁸ vàchi ùhùn xichi sàni nandàhà-ní, te ni sate tnahá-nsiá. Te tiàa iá xì-ní vichi, màdi ì-ní nduú-né. Ñà-jaàn ndisa ni cachi ndàa-ní.

¹⁹ Dandu ni cachi nècuàchimà:

—Vichi sàni cundaà ini, na iin nèhivì càhàn cuenta xì Dios nduu-ní, señor.

²⁰ Doco estilu xì xii-nsí nduá cahvi-nsí Dios dìni yucù jaàn; doco mii-nsiá, còo. Ñuu-nsiá Jerusalén nduú lugar ndé ndiá icà-ndà cahvi-nda Dios, cachi mii-nsiá.

²¹ Dandu ni cachi Jesús xì-né:

—Señora, cunindisa-ní yuhù: vaxi iin quivì, dandu màdi cuiisì dìni yucù jaàn, ni màdi cuiisì ñuu Jerusalén cùhùn-nsiá cahvi-nsiá Yua-nda Dios.

²² Mii-nsiá, có-ináhá ndisá-nsiá ana divi cahvi-nsiá. Doco nsiùhù, ináhá vâha-nsi ana cahvi-nsí, vàchi cuiisì nsiùhù tè-nduú nècuàchì raza Judea icúmi xí palabra nansa càcu anima nèhivì.

²³ Cunaha-ní, vaxi iin quivì, dandu nèhivì cuní cahvi ndisa xì Dios, inì-ni anima-né icúmi-né cahvi-néyá, te cahvi stná-néyá nacua cachi palabra ndacuisì xí-yá, vàchi ducàn cuní-yá quida-ne na cahvi-néyá. Te vichi sàni sà stná quivì quida-ne ducàn.

²⁴ Vàchi mii espíritu ndiaha nduú Dios. Ñàyùcàndüá, nú cuàhàn-ndà cahvi-ndayá, dandu inì-ni anima-ndà icúmi-ndà cahvi-ndayá; te icúmi-ndà cahvi stná-ndayá cuiisì nacua cachi palabra ndacuisì xí-yá —ni cachi Jesús.

²⁵ Dandu ni cachi nècuàchì ñahà mà:

—Yùhù ináhí quixi mii-yá ana nduú Mesías, divi mii-yá nani Cristu. Te nú sàni quesaa-yà, dandu cachtinùhu-ya xi nèhivi nsidaa ñà-ndúú ñà-ndáà.

²⁶ Dandu nì cachi Jesús xi-né:

—Yùhù ana cáhàn xi-ní vichi, divi nduú mii-yá.

²⁷ Daaní, cáhàn va-ya xi nècuàchì yucán, te nì cansiaa tu nècuàchì dacuahá-yá. Te nì ndulocó-nè, cóni cundáà ini-nè índu chuun ndatnúhú-yá xi nècuàchì ñahà mà. Doco cóni xicàn tnùhù-nè nùu-yá índu chuun cáhàn-yà xi-né, nì cóni ndácàtnùhù-nè nùu-yá índu palabra cachi-yá xi-né.

²⁸ Dandu nècuàchì ñahà mà, nì naco-ne yoo xi-ne mànuhù-nè ini ñuu mà, te nì cáhàn-nè xi nèhivi, cachi-nè:

²⁹ —Naha-nsiá cùhùn-ndà cundehè-nsiá iin tiàa iá yucán, vachi nì nacani-ne xí nsidaa ñà-ndúà nì quide vida xi. ¿Amádi mii-yá nduú Cristu (ndiatu-nda)?

³⁰ Ñàyücàndüá, nì ndecoyo cuàhà nèhivi ñuu yucán vaxi-ne ndé iá Jesús,

³¹ vachi iá iì-yá xi nècuàchì dacuahá-yá. Te nì sacundahví nècuàchì dàcuahá-yá mà nùu-yá, cachi-nè:

—Maestro, cuxi-ní iyuhu.

³² Doco nì cachi-yá xi-né:

—Sà-icúmí ñà-cutiacuì mate có-cundáà inì-nsia índu iñàha nduá.

³³ Dandu nì ndatnúhu nècuàchì dacuahá-yá iin-ne xi inga-nè, cachi-nè:

—¿A vihi-ni nì quixi iin nèhivi nihí xi ñà-ndúà cuxi-ya cahan-nsiá?

³⁴ Ñàyücàndüá nì cachi-yá xi-né:

—Còó. Ñà-itiácú yùhù nduú ñà-quide cumplir nacua nì cachi mii-yá nì techuun-xí vaxi. Cuní dansihí chuun ndiaha nì sàha-ya yùhù. Te ñà-jaàn nduá itiácú.

³⁵⁻³⁶ (Ináhí) cachi-nsiá cumáni gá cümü yòò, dandu ndanchito cosecha. Doco yùhù cachi xi-nsiá, cundehè-nsiá (nadaa nèhivi ndoó ñuhiví), vachi nahi cosecha xinduu stná-nè, te sà-lá ndanchitoa. Te na quidá nèhivi chuun ndiaha xí cosecha mà, pues ñà-nihí ñanitnaha-ne vida ndiaha nicanicuahan nduá. Dandu después, icúmí-nè nihì-nè ñà-vàha xi-ne, te cudii gá ini-nè, mii-né xi stná nèhivi nì chihí stná xì (palabra primeru).

³⁷ Te ñà-jaàn nduú nahi dichu cachi: “Diín nèhivi chihí, te diín nèhivi ndanhi xí cosecha”.

³⁸ Yùhù nì techuín mii-nsiá ñà-quida-nsia iin chuun (ndiaha ñà-chindee-nsiá nèhivi nihì-nè vida ndiaha, na ian) ndanhi-nsia cosecha. Doco màdi mii-nsiá nduú ana nì dàquésáhá xí chuun ma; còó, diín nèhivi nduú ana nì caquidachuún primeru, dandu después nì quihvi stná mii-nsiá —nì cachi Jesús.

³⁹ Cunaha-nsiá, cuàhà nèhivi ñuu tii ladu Samaria mà nì xinindisa-xi-yá, vachi nì xinindisá-né palabra nì cachi nècuàchì ñahà mà ñà-nì nacani-ya xi-né nsidaa ñà-ndúà nì quida-ne vida xi-ne.

⁴⁰ Ñàyücàndüá na ní quesaa nsidaa-né ndé iá-yá, dandu nì sacundahví-nè nùu-yá ñà-nì cóò chii gá-yá ñuu-nè; te sàhàjàn nì la ga-yá ùi gá quivi.

⁴¹ Dandu cuàhà gá stná nèhivi nì xinindisa-xi-yá, vachi nì inini-ne nì cáhàn mii-yá.

⁴² Ñàyücàndüá, nì cacachi-nè xi nècuàchì ñahà mà:

—Vichi màdi cuisì sàhà ñà-ndúà nì cachi-ní nì xinindisá-nsi; cóò, vachi vichi sàni inini stná-nsi mii-yá na cáhàn-yá palabra xi-ya, ñàyücàndüá sàni cundaa ini-nsi ñà-divi mii-yá nduú ana dacácu xi nèhivi ñuhiví; meru Cristu nduú-yá —nì cachi-nè.

Nansa nì dándúvaha Jesús dèhe iin nècuàchì dandacuì

⁴³ Daaní, nì nsihì nì la Jesús ñuu yucán ùi quivi, dandu nì naquihin-ya ichi mànuhù-yá ladu Galilea.

⁴⁴ Te mii-yá nduú ana nì cachi ñà-có-quidáñhúhú nèhivi iin tiàa cáhàn cuenta xi Dios nú nduú-né iin nècuàchì ñuu-nè.

⁴⁵ Daaní, na ní nasaa-yá ladu Galilea mà, nì cudii ini nècuàchì ladu yucán sàhà-yá, vachi nì sàhàn stná-nè ñuu Jerusalén quivi nì la vicò, te nì xini stná-nè nsidaa milagru nì quida-ya yucán.

⁴⁶ Daaní, nì nasaa stná-yá ñuu tii Caná iá ladu mà, divi ñuu ndé nì quida-ya milagru xi tēcuí uun nì nanduu-tè ndutè vidi si-uva. Te yucán nì quesaa stná iin nèhivi xí gobiernu nì quixi ñuu Capernaum, vachi iá iin dèhe-ne cuhí.

⁴⁷ Te nì xinitnúhu-ne sàni nsiaa tu Jesús nì sàhàn-yá ladu Judea. Ñàyücàndüá vaxi-ne nchícun-nèyà, te nì sacundahví-nè nùu-yá àma cùhùn-yá xi-né ñuu-nè, te dándúvaha-ya dèhe-ne, vachi sàcùcàhvì-te.

⁴⁸ Doco nì cachi Jesús xi-né:

—Mii-nsiá, nú màsà quidé iin milagru fuerte cundehè-nsiá, mà sàà-nsiá cunindisá-nsiá.

⁴⁹ Doco nì cachi nècuàchì mà xi-yá:

— Señor, cùhùn-ndà vehi por favor, còtó cui dèhi.

⁵⁰ Dandu nì cachi Jesús xi-né:

— Vâtùni nùhù-ní, vâchi cuàhàn nduvàha dèhe-ní.

Dandu nì xinindisá nècuàchimà palabra nì cachi-yà xi-né, ñàyùcàndüá mànuhù-né vehe-ne.

⁵¹ Te na sá-itúú-né nasaa-nè, nì ndacùhun tnahá-né xì itnii peón xi-ne nihi-xi razón vâxi, te nì cachi-te:

— Sàcuàhàn nduvàha dèhe-ní.

⁵² Dandu nì xicàn tnùhù-né índü hora nì quesaha nì nchico cuèhè. Te nì cachi-te:

— Icu, nahi càhiin nì nchico ini-vè.

⁵³ Ñàyùcàndüá, nì cundaà ini-nè, divi hora nì càhàn-nè xì Jesús nì sanduamà, divi hora nì cachi-yà xi-né ñà-cuàhàn nduvàha dèhe-ne. Ñàyùcàndüá, nì xinindisá-néyà, mii-né xì nsidaa stná nèhivi vehe-ne.

⁵⁴ Cunaha-nsiá, milagru yohó nduú milagru ùi nì quida-ya na ní nasaa-yà ladu Galilea nì sàhàn-yà ñuu Judea.

5

Nansa nì dándüvaha Jesús iin tiàa nì dàñà tnahá ù iquicúñü-xi

¹ Daaní, quivì yucán nacává iin vicò xí nècuàchì raza Judea, ñàyùcàndüá, nì quihin tu-ya ichi cuàhàn-yà ñuu Jerusalén.

² Te ini ñuu mà iá iin pila cahnú tècuí. Te yucán itánduhù stná ùhùn vehe nahi corredor. Te lugar mà, Betesda naniá, te yatni iá mà ndé iá iin yehè ñuu mà nani Yehè Rii.

³ Pues divi vehe ma itánduhù cuàhà nècuàchì cuhí, nècuàchì cuaá, nècuàchì xicá cuèhè, nècuàchì yáha ga nì ichi, xíndiatu nsidaa-né ndacùchí tècuí mà.

⁴ Vâchi (cachí-nè) cada yáha iin tiempu, dandu nuú iin ángel xi Dios dandácuchí xi-té. Dandu nèhivi primeru quihvi mahi-té, icúmí-nè nduvàha-ne nuú cuèhè quida xi-né, ndéni cuèhè nì cui nì cundúá, icúmíá cuxioa.

⁵ Te yucán iá stná iin tiàa indúhu yuhù tècuí mà, 38 cuà icúmí-nè cuèhè quida xi-né.

⁶ Dandu, nì xini Jesús jaàn indúhu-né, te ináhá stná-yà ñà-càní cuà iá-nè xì cuèhè mà, ñàyùcàndüá, nì cachi-yà xi-né:

— Mii-ní, ¿a cuní-ní nduvàha-ní?

⁷ Dandu nì cachi-nè xi-yá:

— Señor, còó iin chindee xí na hora ndácuchí tècuí, te quihvi stná mahi-té. Vâchi na meru sái, dihna inga-nè nì sàà-nè nùí, te nuú-né ndé ñuhú tècuí.

⁸ Dandu nì cachi Jesús xi-né:

— Ndacuiin-ní, ndanihi-ní camilla xi-ní, te caca-ní.

⁹ Dandu vichi vichi nì nduvàha nècuàchimà nì ndanihi-ne camilla xi-ne, nì nacaca-nè cuàhàn-nè. Te quivì yucán, quivì descansu nduá.

¹⁰ Ñàyùcàndüá, nì cachi dava nècuàchì ñuu mà xì nècuàchì nì nduvàha ma:

— Quivì descansu nduá vichi. Còó ley xi-nda cunsida-ní camilla xi-ní.

¹¹ Dandu nì cachi tiàa ma xi-né:

— Nècuàchì nì dándüvaha xí, nì cachi-nè xí: “Ndanihi-ní camilla xi-ní, te caca-ní”.

¹² Dandu nì ndàcàtnùhù nèhivi mà nuú tiàa ma, cachí-nè:

— ¿Ana divi nì cachi xi-ní ducán?

¹³ Doco nècuàchimà, có-ináhá-nè nansa nani ana nì dándüvaha xi-né, vâchi sàcuàhàn Jesús, te cuàhà gá nèhivi ndoó lugar yucán.

¹⁴ Daaní, después nì ndacùhun tnahá-yá xi-né na xicánúú-né patiu veheñuhu, te nì cachi-yà xi-né:

— Vichi sàni nduvàha-ní. Màsà nàxicócuñin-ní quida-ní cuàchi, còtó quixi iin tnùndoho chicá fuerte diquì-ní.

¹⁵ Dandu tiàa ma, nì sàhàn-nè nì cachitnùhu-ne xì nècuàchì raza-nèmà ñà-divi Jesús nduú ana nì dándüvaha xi-né.

¹⁶ Ñàyùcàndüá nì caxini ùhì nècuàchì yucán mii-yá, te nì quesaha-né ndatnùhù-nè nansa cahni-néyà ñà-nì quida-ya milagru mà iin quivì descansu.

¹⁷ Dandu nì cachi-yà xi nsidaa nècuàchì yucán:

— Yuamání, iin-ní quidáchuñin-yá nsiquíví, ñàyùcàndüá ducán quidá stná yùhù.

¹⁸ Ñàyùcàndüá chicá más nì cuni nècuàchì ladu Judea mà cahni-néyà, vâchi màdi cuisí-ní có-chivàha vii-yá quivì descansu (cahan-né), sino que nì cachi stná-yà Dios nduú Yua-yá, te ducán ndudává stnahá-yá xì mii Dios.

Nansa icúmí Jesús derechu dandacú-yá

¹⁹ Dandu nì naxiconihí-yá nuú nècuàchimà, cachí-yà:

—Cunini-nsia palabra yohó cachí. Mii mà cúí quide ni-ñàha, cuisì ñà-nduá sàni xini quidá stná Yuamáni' Dios, vâchi nacua quidá mii-yá, divi ducán icúmí quida stná.

²⁰ Cunaha-nsiá, cuú ini-yá sâhí, te nsidaa obra ndiaha quidá mii-yá, ñà-jaàn dacuní stná-yá yùhù quide. Te vichi sàni xini-nsiá iin ùi milagru, doco cuàhà obra chicá ndiaha icúmí-yá dacuní-yá yùhù, dandu más gà icúmí-nsiá ndulocó-nsiá.

²¹ Vâchi nacua danátiácú-yá nècuàchi nsi, te nacuaaha-yanè vida, divi ducán quidá stná yùhù. Ñâyùcànduá, vâtùni danátiácú stná ndéni nèhivì ní cui cudíi ñi.

²² Te có-nsidándáa-yá sàhà cuàchi nèhivì, vâchi ndahà yùhù sàni dàyáha-ya chuun jaàn.

²³ Ducán, dandu quidañuhu stná nèhivì yùhù nacua quidañuhú-nè mii-yá. Vâchi nú màsà quidañuhú-nè yùhù ana nduú Dèhemaní-yá, dandu queámà na ian có-quidañuhú stná-nè mii-yá ana nì techuun-xí vâxi.

²⁴ 'Ñà-ndácuisì nduá cachí xì-nsiá: nú iníni iin nèhivì ñà-nduá cachí, te xiníndísá-nè mii-yá nì techuun-xí vâxi, dandu cutiacu-nè nicanicuahàn. Mà sàà-nè cuni-nè juiciu, vâchi sàni yàha-ne ndahà mii-yá ana sàha xi vida ndiaha. Mà cóó gá-nè ladu ndé xihí anima-nè.

²⁵ 'Ñà-ndáá nduá yohó cachí xì-nsiá: vâxi iin tiempu, dandu icúmí yùhù ana nduú Dèhemaní Dios ndàhì fuertí, te caní nsidaa nècuàchi sàni xihí, dandu nsidaa ana cunini xí, nihí-nè vida ndiaha. Te cunaha-nsiá, vichi nduú stná tiempu mà.

²⁶ 'Yuamáni', nicanicuahàn ñuhú vida saín ini-yá. Te sàni chitnùni stná ini-yá ñà-nicanicuahàn cucumí stná yùhù vida saín mà, vâchi Dèhemaní-yá nduú.

²⁷ Te sàni sàha stná-yá yùhù chuun nsidandá sàhà cuàchi nèhivì, vâchi tñaha nèhivì ñuhivì nduú stná.

²⁸ Te có-nduá ñà-ndulocó-nsiá sàhà palabra jaàn, vâchi vâxi iin quivì, dandu nsidaa ana ñuhú tixi ñuhú, icúmí-nè tiacu-nè na caní mii-nè.

²⁹ Dandu quecoyo nsihí-ne. Nècuàchi nìsa quida vèi, nihí-nè natiacu-nè sàhà ñà-cutiacu ndiaha-nè nicanicuahàn. Doco nècuàchi cóni quidá víi, cuisì natiacu-nè sàhà ñà-nihí-nè castigu sàhà cuàchi-ne.

Nansa ni cachi Jesús ñà-mandu xi Yuamáni-yá ni quesaa-yá ñuhivì yohó

³⁰ 'Cuenta xi mii, mà cúí quide ni-ñàha. Cuisì nacua nì sàcùnahí, divi ducán nsidándái sàhà cuàchi nèhivì. Te nú nsidándái sàhà-nè ducán, dandu meru nacua ndiá icà cundua, vâchi divi Yuamáni' nduú ana nì techuun-xí nì quesá ñuhivì, te ñà-nduá cuní mii-yá coo, divi nduá quidé, màdiá nandúquí ñà-quide ñà-cuní mii.

³¹ 'Nú cuisì yùhù nì cundúú ana cachítnùhu xì-nsiá sàhà ana nduú, dandu mà có-ndiáà mà.

³² Doco iá inga nèhivì cachítnùhu sâhí, te inâhí cachí ndáa-nè.

³³ Pues divi nduú Juan (Bautista). Te nì techuún-nsiá compañeru-nsiá ndacàtnùhù-nè nùu nècuàchimà, te ñà-ndáa nduú palabra nì naxiconihí-nè.

³⁴ Doco yùhù, cóo necesidad icúmí càhàn iin nèhivì ùun sâhí. Te ñà-nduá cachí xì-nsiá, ñà-jaàn cachí sàhà-ñà nihí-nsiá càcu anima-nsiá.

³⁵ Iin ratu tii nì cudíi iní-nsiá sàhà ñà-nduá quidá Juan (Bautista), vâchi iin ana datnúú xì sàxiníntnùni-nsiá (sàhà ichi Dios) nì sanduu ndísa-ne.

³⁶ Doco iá inga ñàha chicá fuerte nùu palabra nì cachi Juan sâhí. Vâchi cuàhà chuun ndiaha nì sàhatahvi Yuamáni' yùhù ñà-quide, te divi sàhà chuun ndiaha ma vâtùni cundáa iní-nsiá ñà-divi mandu xi mii-yá vâxi.

³⁷ Daaní, stná mii-yá sàni dátùi-ya ana divi nduú yùhù. Doco mii-nsiá, tàcùnì-nsiá nansa càhàn-yá; te tàcùnì stná-nsiá nansa indéhe-yá.

³⁸ Nì có-nihnú stná ini-nsiá ñà-nduá cachí-yá, vâchi có-xiníndísá-nsiá yùhù ana vâxi cuenta xì-ya.

³⁹ 'Cuàhà gá dacuahá stná-nsiá tutu ùi, vâchi ducán nihí-nsiá vida ndiaha nicanicuahàn, cachí-nsiá. Doco cunaha-nsiá, divi sàhà yùhù càhàn stná tutu ùi mà.

⁴⁰ Doco có-cuní-nsiá cunindísá-nsiá yùhù, te nihí-nsiá vida ndiaha.

⁴¹ 'Yùhù, có-xicánúí nandúquí nansa quidañuhu nèhivì yùhù.

⁴² Doco inâhí nansa nihnú ini mii-nsiá; inâhí có-cuú ini-nsiá sàhà Dios.

⁴³ 'Mate cuenta xi Yuamáni' vâxi, có-xiníndísá-nsiá yùhù. Doco nú nì quixí inga ana càhàn cuisì sàhà mii-xí, dandu divi cuàhàn-nsiá cunindísá-nsiá.

⁴⁴ 'Tùha-nsiá nanducu-nsiá quidañuhu nèhivì mii-nsiá, doco ñà-ndee vâha-nsiá nùu ana nduú mindaa Dios, cóó, có-nànducú-nsiá ñà-jaàn. Ñâyùcànduá, sadíamà nùu-nsiá ñà-mà cùi cunindísá-nsiá yùhù.

⁴⁵ 'Màsà tuxí ini-nsiá yùhù cuàhàn daquéé cuàchi diquí-nsiá nùu Yua-nda Dios. Cóó, diín nduú ana icúmí canicuaèhi sàhà-nsiá, divi nduú Moisés, mate tuxí ini-nsiá ley xi nècuàchimà nduá cuàhàn dacácu xì-nsiá.

⁴⁶ Vâchi nú nì xinindísá-nsiá ñà-nduá nì tiaa Moisés nì cúí, dandu cunindísá stná-nsiá yùhù, vâchi divi sàhà yùhù nì tiaa nècuàchimà.

⁴⁷ Doco nú có-xiníndísâ-nsiá palabra ni ttaa-nemà, dandu mà sàà stná-nsiá cunindisá-nsiá ñà-nduá cachí yùhù —ni cachi Jesús.

6

Nansa ni dàcùxi Jesús ùhùn mìl tiàa

¹ Daaní, ni quihin tu-ya ichi cuàhàn-yà inga ladu tècuí cuàhà nani mar de Galilea. Te mar de Tiberio nani stná mà.

² Te cutnàhà stná-yà xì cuàhà gá nèhivì, vàchi sàni xini-nè nansa ni quida-ya milagru ni dàndúvaha-ya cuàhà nècuàchi cuhí.

³ Dandu ni nana-ya iin yucù yucán, te ni sàcòo-ya, mii-yá xì stná nècuàchi dacuahá-yá.

⁴ Te quivì yucán nduú quivì sà-itúú nacava vicò pascua, iin vicò cahnú xí nècuàchi raza Judea.

⁵ Te ni indehè-yá, ni xini-yà ñà-cuàhà guá nèhivì vaxi nuù-yá, ñàyùcànduá, ni cachi-yà xì Felipe:

—¿Índú cui cùhùn-ndà cuiin-nda ñà-cutiacu nsidaa nèhivì yohó cahan-ní?

⁶ Ducán ni cachi-yà xì nècuàchimà, doco sà-ináhà-yá nansa cuàhàn-yà quida-ya; ni cachi uun-ya xì-né a ver nansa cachi-nè.

⁷ Ñàyùcànduá, ni cachi-nè xì-yá:

—Còó, ni mà sàà ù cientu dihùn plata ñà-cuiin-nda pan cuxi-ne, vàchi ni ñà-jaàn mà sàà nihi iin iin-ne iyuhu iyuhá —ni cachi-nè.

⁸ Dandu ni càhàn iin nècuàchi dacuahá-yá nani Andrés, divi ñani Simón Pedro, te ni cachi-nè xì-yá:

⁹ —Yohó íá iin tèchii nihi-xi ùhùn pan tnuu xì ù siaca cuati. Doco iyuhu nduájàn; mà sàà cuxi nsidaa nèhivì ñà-cuàhà guá-nè.

¹⁰ Dandu ni cachi Jesús:

—Càhàn-nsiá xì nèhivì ni màcúndoo-ne ñuhù.

Ñàyùcànduá ni sàcúndoo nsidaa nèhivì nuù yucù cuií, vàchi íá cuàhà yucù yucán. Te cunaha-nsiá, cuiis nècuàchi xínduu tiàa, ùhùn mìl ni sanduu-ne.

¹¹ Dandu ni tniì-ya nsì-ùhùn pan mà, ni naquimani-yá Dios sàhà-ñà, te ni dasàn-yáñà nuù nècuàchi dacuahá-yá. Dandu mii-né, ni dàcuàchí-néà ni sàha-ne nèhivì ndoó yucán. Te divi ducán ni quida stná-nè xì siaca. Te nsidaa nèhivì, ni nihi-né nacua cudí ini-nè cuxi-ne.

¹² Daaní, na sàni chitu tixi nsidaa-né, dandu ni cachi-yà xì nècuàchi dacuahá-yá:

—Datacá-nsiá ñà-ni cusobrá sàhà màsà ndáñúhú ni-iyuhá.

¹³ Ñàyùcànduá, ni dàtácà-nè ñà-ni ndòo ma na ní nsihì ni xixi nsidaa-né. Te nuù ùhùn pan mà ni cuyodò gá ùxin ù icà sicàté chitu pedazu-ñà.

¹⁴ Dandu ni cundaà ini nèhivì yucán iin milagru nduá ni quida-ya, ñàyùcànduá ni cachi-nè:

—Ñà-ndàà nduá, Jesús yohó nduú ana xíndiatu-nda quesaa ñuhivì, divi nècuàchi icúmi càhàn cuenta xì Dios.

¹⁵ Doco Jesús, ináhà-yá nansa xínihnu ini-nè quida-ne, divi ñà-cùnì-nè tniì-neyà fuerza, te cunduu-ya rey dandacú nuù-né. Ñàyùcànduá, ni quecuàán-yá inga xichi, cuàhàn mindaa-yá ndé nduú yucù.

Nansa ni xicandodò Jesús nuù tècuí mar

¹⁶ Daaní, ni cuaà quivì yucán, te ni nuu nècuàchi dacuahá-yá dècuèndè yuhù tècuí cuàhà mà.

¹⁷ Ni sàcùñuhu-ne ini lancha, te ni quihin-ne ichi cuàhàn-nè inga ladu mar tii ma, cunì-nè cùhùn-nè ñuu Capernaum. Te ni cuñaà, te tãñáha ga quesaa Jesús.

¹⁸ Dandu ni quesaha caná fuerte tàchi, ñàyùcànduá, ducún ni nacuahnu todò tècuí.

¹⁹ Te na sàcuàhàn-nè ini lancha mà nahì ùhùn ò íñù kilómetro, dandu ni xini-nè jaàn vaxi-ya, xicándodo-yá nuù tècuí, te sà-itúú-yá quesaa-yá ndé cuàhàn lancha. Doco mii-né, ni yuhí-nè.

²⁰ Dandu ni cachi-yà xì-né:

—Yùhù nduí; màsà yuhí-nsiá.

²¹ Ñàyùcànduá, ni dàyáha-neyà ini lancha, cudí ini-nè. Te vichi vichi na iin cachí sàni sàà lancha mà dècuèndè ñuu ndé nchícùn-nè cuàhàn-nè.

Nansa ni yàha stná nèhivì mar nandúcu-né Jesús, te ni cachi-yà xì-né nansa sáhatahvì-yá vida ndiaha

²² Daaní, inga quivì, te ni nataca cuàhà tú nèhivì yuhù mar (ndé ni quee lancha), te ináhà-nè imindaa-nú nisa ía yucán, te vichi cuàhàn nsihì nècuàchi dacuahá-yá ini-nu. Doco ináhà stná-nè ñà-có-cùtnáhà-yá xì nècuàchimà cuàhàn, vàchi micuísì-né cuàhàn-nè.

²³ Doco después nì caquesaa tu itnii gá lancha nì quixi dècuèndè ñuu Tiberias nì quesaa-nu ndé ndoó nêhivì cuahà mà, divi lugar ndé nì caxixi-ne pan na nì naquimanì-yá sàhà-ñá.

²⁴⁻²⁵ Ñàyùcàndüá, na nì cundaà ini nêhivì yucán, nì còò-yá, te nì còò stná nêcuàchì dacuahá-yá, dandu nì quècoyo stná-nè ini lancha, nì quihùn-ne ichì cuahàn-nè mahì mar, te nì casaà stná-nè ñuu Capernaum, nandúcú-nèyá inga ladu mar mà. Te na nì ndacùhun-neyà, nì cachi-nè xì-yá:

—Maestro, ¿índù hora nì quesaa-nì yohó?

²⁶ Te nì cachi-yà xì-né:

—Cunini-nsia palabra yohó: yùhù ináhí índù chuun nandúcú-nsià yùhù. Màdi sàhà ñà-nì xini-nsià milagru nduá; còò. Sàhà ñà-nì xixi vaha-nsia, te nì chitu tìxi-nsia nduá.

²⁷ Doco màsà nácánì inì-nsia sàhà nansa nihì-nsià ñà-cutiacu-nsià ñuhivì yohó, vâchì sacù-nì tiempu cundiaà mà. Chicá nsiha nanducu-nsià ñà-ndiaha ñi cutiacù-nsia nicanicuahàn. Te divi ñà-jaàn nduá sàhatahvi yùhù ana nduú Tnaha Nêhivì Ñuhivì, vâchì nùù Yua-nda Dios sàni nihitáhvi ñà-quide chuun ñi xì-yá.

²⁸ Dandu nì cachi nêhivì mà xì-yá:

—Cachi-nì xì-nsí nansa quida-nsi sàhà-ñá cundua obra vaha nacua cuní Dios quida-nda.

²⁹ Dandu cachi-yà xì-né:

—Ñà-cunindisá-nsià yùhù ana nì techuún-yá nì quesaa, divi ñà-jaàn nduú chuun vaha cuní Dios quida-nsia.

³⁰ Dandu cachi-nè xì-yá:

—Pues nú ducán, dandu ¿índù seña quida-nì cundehè-nsí, te cunindisá-nsí? ¿Índù milagru quida-ní?

³¹ Vâchì xii-ndà, na nì saxica-ne yucù dâná, nisa còyo ñà-ndiaha nani maná nisa xixi-ne, vâchì ducán cachi nùù tutu ñi: “Nùù ansivi nì dâcòyo Yua-nda Dios pan nisa xixi-ne”.

³² Dandu nì cachi Jesús xì-né:

—Ñà-ndâcuisi nduá cachi xì-nsià: pan nì nihì xii-nsià nùù Moisés sàhana ma, cóni sândúú ndisa pan ndiaha vâxi ansivi. Còò. Yuamánì nduú ana sàhatahvi xì pan ndisa ndiaha ma.

³³ Vâchì pan sàhatahvi mii-yá nduú yùhù ana nì techuún-yá nì quixi ndè gloria sàhà ñà-cutiacu nêhivì ñuhivì.

³⁴ Ñàyùcàndüá, nì cachi nêhivì yucán:

—Señor, nicanicuahàn taxi tahvi-nì nsiùhù pan mà cuxi-nsi.

³⁵ Dandu nì cachi-yà xì-né:

—Yùhù nduú nahi pan xì-nsia cuxi-nsia nsiquívì, te cutiacu-nsià. Vâchì nsidaa ana sàà cunindisá-xí, (ndiaha gá cundiatú anima-nè), na ian mà nunca cui-nè doco, te nì mà nunca cui stná-nè tècuií.

³⁶ Doco nacua nì cachi xì-nsià, sàni xini-nsià nansa quidè, te có-xinindisá-nsià.

³⁷ Doco sàni chitnùnì ini Yuamánì ñà-cundoo ana nduú nêhivì xí, te nsidanicuú nêcuàchmà, icúmì-nè (sàà-nè cunchicùn-nè yùhù). Te mà nunca taxi nì-iiin ana cuní nàtuu nùí.

³⁸ Vâchì divi sàhà-ñá quide ñà-nduá cuní mii-yá nì techuun-xí, ñàyùcàndüá nì quei gloria nì quesai. Mà vâxi quide ñà-nduá cuní míí.

³⁹ Te ¿ndiá nduá cuní mii-yá nì techuun-xí? Pues, cuní-yá (ñà-iiin-ni cundoo vii) nsidaa nêhivì nì sàhatahvi-yá yùhù; có-cùnì-yá ndafluhu ni-iiin-ne. Dandu na sàà xinu tiempu, icúmì-nè natiacu nsihi-ne quide.

⁴⁰ Ñàyùcàndüá, ndéni nêhivì ni cunítñuhu sàhà yùhù ana nduú Dêhemani-yá, te cunindisá-nè yùhù, vida ndiaha nicanicuahàn cucumì-nè, vâchì ducán nì chitnùnì ini Yuamánì. Dandu quívì xinu tiempu, icúmì-nè natiacu-nè quide —nì cachi Jesús.

⁴¹ Ñàyùcàndüá, nì cunà nêcuàchì raza-yá Judea sàhà-yá ñà-nì cachi-yà nduú-yá pan ndiaha nì quixi gloria.

⁴² Te dohó nì cachi-nè, iin-ne xì inga-nè:

—Amádi dèhe José nduú Jesús yohó. Ináhà-ndá ana nduú yuadíhì-nè. ¿Índù chuun cachi-nè ndè gloria nì quixi-ne?

⁴³ Ñàyùcàndüá, nì cachi Jesús xì nêcuàchì yucán:

—¿Índù chuun cuàà-nsià ducán?

⁴⁴ Mà nihì nì-iiin nêhivì nâcùnihu ini-nè yùhù nú cóni nihitáhvi-nè ducán nùù Yuamánì nì techuun-xí; doco nú nì nihitáhvi-nè ducán, dandu na quívì xinu tiempu, icúmì danátíacui-nè.

⁴⁵ Sàhana nì tiaa nêcuàchì profeta nùù tutu ñi, te dohó nì cachi-nè: “Cunaha-nsià, icúmì Dios chinaha-yá nsidaa-nè”, nì cachi-nè. Ñàyùcàndüá, nsidaa nêhivì inínì xí Yua-nda Dios, te cundaà vaha ini-nè, divi nduú nêcuàchì icúmì cunchicùn xì yùhù.

⁴⁶ Còò nì-iin ni xiní xì Yua-nda Dios. Cuisì mindaa ana nì quixi nùù-yá nì xininùù xì-yá, (divi yùhù).

⁴⁷ Ñà-ndáa nduá cachí xì-nsiá, nsidaa ana xiníndísá-xí yùhù, vida ndiaha nicanicuahàn sàni nihítáhvì-né.

⁴⁸ Yùhù nduí nahi pan (cuxi nèhivì), te cutiacu-nè nicanicuahàn.

⁴⁹ Xìi-nsiá nisa xica yucú dānā, nisa xixi-ne nùnì ansivi nani maná, doco nì xihì nsihi-ne.

⁵⁰ Doco pan cáhàn yùhù sàhà-xí, còò. Nùù gloria nì quea vāxan, te nù sàni xixi iin nèhivì-ñā, dandu mà cúí gā-nè.

⁵¹ Pues cunaha-nsiá, yùhù nduí pan mà. Nùù gloria nì nui vāxi, te nù nì cúnchicùn iin nèhivì yùhù, dandu nicanicuahàn cutiacu-nè, (na ian) sàni xixi-ne yùhù, te ducán cutiacu-nè. Te ¿índù iñāha cundua cuāhi ñā-cunduu nahi pan mà? Pues divi cuerpu xi cunduu pan mà, vāchi icúmí cuāhi vida xi cuenta xi nèhivì ñuhiví sàhà-ñā nihì-né cutiacu-nè —nì cachì Jesús.

⁵² Ñāyúcāndúá, nì quesaha nècuāchi raza-yā Judea mà cuāà-nè entre mii-né, cachí-né:

—¿Índù modo cuāha nècuāchi yohó iquicúñú-nè ñā-caxi-ndāñá?

⁵³ Dandu nì cachì-yā xì-né:

—Palabra ndācuisì nduá cachí xì-nsiá yohó: nù màsà cáxi-nsiá cuñu yùhù ana nduú Tnaha Nèhivì Ñuhiví, te nù màsà cóhó-nsiá nìí, dandu còò vida ndiaha nùù-nsiá.

⁵⁴ Nsidaa ana saxi xi cuñui, te xihì-né nìí, vida ndiaha nicanicuahàn icúmí-nè, te icúmí-nè natiacu-nè na xinu tiempu.

⁵⁵ Vāchi cuñui, ñā-cutiacu-ndā nduá, te nìí, ñā-coho-nda nduú stnā.

⁵⁶ Nsidaa ana saxi xi cuñui, te xihì-né nìí, sàni ndèe anima-nè ini anima yùhù, te iá stnāi ini anima mii-né.

⁵⁷ Yùhù itiácuí sàhà mii-yá ana nì techuun-xí vāxi, divi sàhà Yua-nda Dios iá nicanicuahàn. Te divi ducání stnā xi nsidaa ana saxi xi yùhù, sàhà yùhù cutiacu-nè.

⁵⁸ Pues, ducán nduú pan nì quixi gloria. Doco tucu iá pan nisa xixi xì-nsiá sàhana, vāchi siempre nì xihì-nè. Cunaha-nsiá, nsidaa ana xixi-xì pan cachí xì-nsiá vichi, nicanicuahàn cutiacu-nè.

⁵⁹ Ñā-jaàn nduá nì cachì Jesús na iá-yā veheñuhu ñuu Capernaum dacuahá-yā nèhivì.

Sàhà palabra xi Jesús nihì-ndā vida ndiaha nicanicuahàn

⁶⁰ Na sàni inini nècuāchi dacuahá-yā ñā-nduá nì cachì-yā, dandu nì cachì dava-ne:

—Ūhì cunindisa-nda ñā-jaàn. Mà cándísā nèhivì palabra jaàn.

⁶¹ Doco Jesús, ducání ináhá-yā nansa xícachì-nè cáhàn ndiaa-nèyā ducán. Ñāyúcāndúá, nì cachì-yā xì-né:

—¿A có-ndóo ini-nsiá sàhà ñā-nduá nì cachì?

⁶² Pues nù còò, (dandu ¿nansa cachì gā-nsiá sàhà) yùhù ana nduú Tnaha Nèhivì Ñuhiví na cuni-nsiá yùhù mànaní ansivi nùhì?

⁶³ Cunaha-nsiá, cuisì sàhà anima-ndā nihì-ndā cutiacu ndiaha-nda, màdi sàhà iquicúñú-ndā, vāchi còò nì-iñāha nihì-ndā nùájān. Cuisì palabra sàni cachì xì-nsiá nduá dacútiácu xi anima-nsiá.

⁶⁴ Doco ináhí mii-nsiá ñā-dava-nsia có-xiníndísā ndisa-nsia —nì cachì-yā.

Vāchi dècuèndè antes sà-ináhá-yā ana xínduu nèhivì có-xiníndísā, te ináhá stnā-yā indù tiāa cuāhàn cahin xì-yā.

⁶⁵ Ñāyúcāndúá, nì cachì-yā xì nsidaa-né:

—Nacua nì cachì xì-nsiá daa, ducán nduá: mà cúí cunchicùn iin nèhivì yùhù nù màsà nihítáhvì-né ducán nùù Yuamáni'.

⁶⁶ Daaní, divi quiví yucán nì quecuān cuāhà nècuāchi dacuahá-yā, nì naxicocuíñ ini-nè, cóni cútnáhá gā-nè xì-yā cacanu-ne.

⁶⁷ Ñāyúcāndúá nì cáhàn-yā xì xìn ù nècuāchi dacuahá-yā (cóni quécuaán):

—Mii-nsiá, ¿a naco stnā-nsiá yùhù?

⁶⁸ Dandu nì cachì Simón Pedro xì-yā:

—Señor mío, còò inga gā ana cùhùn-nsì nùù-xí, vāchi cuisì sàhà palabra xi mii-ní nihítáhvì-nsí vida ndiaha nicanicuahàn.

⁶⁹ Te xiníndísā-nsí mii-ní ñā-nduù-ní Cristu, divi Dèhemani mii-yá iá nicanicuahàn. Ináhá vāha-nsi ñā-jaàn.

⁷⁰ Dandu nì cachì Jesús xì-né:

—Ūxìn ù mii-nsiá sàni nacaxin, doco iin-nsia nduú nahi ñā-malu.

⁷¹ Pues divi palabra mà nì cachì-yā sàhà dèhe Simón, nècuāchi nani Judas Iscariote, vāchi divi-ne nduú tiāa cuāhàn cahin xì-yā, te nduú stnā-nè iin nècuāchi dacuahá.

7

Nà-nduá nì cachi ñani Jesús xi-yá ñà-có-xiníndísá-né mii-yá

¹ Daaní, después, cuisi ladu Galilea nì quesaha xicánúú Jesús. Có-cuní gà-yà cacanu-u-ya ladu Judea, vâchi nècuàchì raza-yà ndoó ladu mà, cuní-nè cahni-néyâ.

² Doco vichi sâ-itúú iin vicò nsidácáhnû-né ladu Judea, divi vicò ndoó-né siahva.

³ Ñâyücândüâ, nì cãhàn ñani Jesús xi-yá, cachí-nè:

—Vichi chicá vâha quee-ní ladu yohó cuahán-ní ladu Judea, dandu cuni nsidaa nècuàchì dacuaha-ní mii-ní, te cundehè stná-nè milagru quida-ní.

⁴ Vâchi nú cuní-ndâ cuitiâ fama xi-nda nuù nèhivì, dandu mà quidá dèhé-ndâ ñà-nduá quida-nda. Ñâyücândüâ, nú cuahà guá ñà-nduá quida-ní, dandu quida vate-níâ cundehè nsidaa nèhivì —nì cachi-nè xi-yâ,

⁵ vâchi cunaha-nsiá, nì ñani-yâ có-xiníndísá-xí-yâ.

⁶ Ñâyücândüâ, nì cachi Jesús xi-né:

—Tãñáha ga sàà quivì xí. Doco mii-nsiá, ndéni tiempu nì cui, vâtùni quida-nsia ñà-nduá cudí ini-nsia.

⁷ Te mà cuní ùhì nèhivì ñuhivì mii-nsiá. Doco yùhù, xiní ùhì-nè yùhù, vâchi cachí xi-né chuun quini nduá quidá-né.

⁸ Cuahán-nsiá vicò mà; vâchi yùhù, tãñáha ga cùhìn, vâchi tàsàà quivì xí.

⁹ Ñà-jaàn nduá nì cachi-yâ xi-né, te nì ndòo ì-yá ladu Galilea yucán.

Nansa nì quida Jesús na ní sãhàn-yâ vicò ndoó-né siahva

¹⁰ Daaní, nì nsihì nì caquihin ñani-yâ ichì, dandu nì quihin stná-yâ ichì cuahàn-yâ vicò mà. Doco cuahàn dèhé-yâ, mà cuahàn vate-yâ.

¹¹ Te yucán ndé iá vicò mà nì nanducu nècuàchì ladu Judea mii-yá, cachí-nè:

—¿Índü iá Jesús?

¹² Te cuahà gá nì ndatnuhu stná-nè sàhà-yâ. Vâha ga-yâ, cachí dava-ne, doco dava ga-nè, còò, mà vâha-ya, vâchi dandahví uun-ya nèhivì, cachí-nè.

¹³ Doco ni-iin nèhivì, cóni cãhàn vate-né sàhà-yâ, vâchi yùhí-nè nècuàchì ladu Judea mà.

¹⁴ Daaní, sàni cudava vicò, dandu nì sàà-yâ yehè veheñuhu cahnú, te nì quesaha-yâ dacuahá-yâ nèhivì ndoó yucán.

¹⁵ Ñâyücândüâ, nì ndulocó nècuàchì ñuu mà, cachí-nè:

—¡Na nchichí guá cãhàn nècuàchì yohó, te cóni xicá-né escuela (xi-nda)!

¹⁶ Dandu nì cachi Jesús xi-né:

—Cunaha-nsiá, màdi ñni yùhù tavi ñà-nduá dacuahí nèhivì. Vâchi divi mii-yá nì techuun-xí vâxi nduú ana nì chitnùni ini-xi nansa coo ñà-nduá chináhi.

¹⁷ Te ndéni nèhivì nì cui, nú iá voluntad xi-ne quida ndisa-ne ñà-nduá cuní Dios, vâtùni sàà-nè cundaà ini-nè sàhà palabra chináhi, a divi ñni mii queá, te ò Dios chindéé xí.

¹⁸ Vâchi nú ini-ni mii-nda chitnùni ini-nda índü palabra chinaha-ndâ, dandu náhâ claru cuisi cuní-ndâ tavâ-ndâ tnùñuhu xí mii-nda. Doco nú nanducú-ndâ nansa quee tnùñuhu xí ana nì techuun-xi-nda vâxi, dandu vâtùni cundaà ini-xi, ñà-ndââ nduá cachí-ndâ, màdiâ dandahví-ndâ nèhivì nduá.

¹⁹ Moisés nì sàha xi-nsiá ley sãnaha. Doco ni-iin-nsia có-quidá ndisa-nsia ñà-nduá cachí ley mà. ¿Índü chuun cuní-nsiâ cahni-nsiá yùhù?

²⁰ Dandu nì cachi nèhivì cuahà yucán:

—Ndisa sàni culocó-ní nì quida ñà-malu. ¿Ana cuní cahni xi-ní cahan-ní?

²¹ Dandu nì cachi Jesús xi-né:

—Sàni ndulocó nsidaa-nsiá sàhâ imindaa milagru nì quide.

²² (Inhá-ndâ), sãnaha nì saquin Moisés iin ley ñà-màcòo seña xi Dios icà-ndâ. Doco màdi mii Moisés nduú ana nì chitnùni ini-xi ñà-coo estilu mà, vâchi xi-ndâ chicá antes nduú ana nì ñàquésáhâ xân. Ñâyücândüâ, ñucan quida-nda vichi, mate iin quivì descansu nduá, doco fuerza màcòo seña mà icà iin mée.

²³ Cundehè-nsiá, ñècuèndè stná iin quivì descansu saquin stná-nsiâ seña mà icà-vé, (danácuehè-nsiâvè) sàhâ ñà-cuní-nsiâ chivâha vii-nsiâ ley mà. Te yùhù, divi stná quivì descansu mà nì sandua na ní ñàndùvâhi iin tiâa, te nì ndòo vâha-ne; doco sãhájàn xidâ ini-nsia. ¿Nansa nduájàn?

²⁴ (Yùhù cachí xi-nsiá), màsâ cuítñuhu ndevâha-nsia nacua tuxí uun ini-nsiâ. Nú cuahàn-nsiâ cãhàn tnùhù-nsiâ sàhâ iin nèhivì, dandu ñà-ndâcuisi xiñuhu cundua cachi-nsiâ —nì cachi-yâ.

Nansa nì cachi Jesús xi nèhivì tuxí ini-xi nduú-yâ iin nèhivì ñuhivì yohó

²⁵ Ñâyücândüâ, dava nècuàchì ñuu Jerusalén yucán, nì cachi-nè iin-ne xi inga-nè:

—¿Amádi nècuàchì jaàn nduú tiàa cuní-nè cahní-né?

²⁶ Doco cundehè-nsiá, jaàn iin-né mahi nèhivì, chináhá-nè, te cóá cachí nècuàchì cuní dandáñhú xí-nè. ¿A vihi-ni sàni nacuni tè-xidandacú nùu-ndà ñà-divi Cristu (ni quixi nùu Dios) nduú-né?

²⁷ Doco nsiùhù, cóo, vèchi sà-ináhá-nsí indù nì quixi nècuàchì jaàn. Vèchi na quívi quixi mii-yá ana nduú ndisa Cristu, mà cundáá ini-xi indù nì quixi-ya —ni cachi-nè.

²⁸ Ñàyücàndüá, ndee ní càhàn Jesús xì nèhivì dacuahá-yá yehè veheñùhu, cachí-yà: —¿A ináhá-nsiá yùhù (tuxí ini-nsiá)? ¿A ndisa ináhá-nsiá ndévi nì quixi? Pues yùhù, màdiá ini-ni mii nì ndacú ini quixi; cóo. Iá ana nì techuun-xí vèxi, te vátuni cahvi-nda xi-yá. Doco mii-nsiá, có-ináhá-nsiáyá.

²⁹ Yùhù, ndisa, ináhi mii-yá, vèchi divi-ya nduú ana nì techuun-xí, te ñàyücàndüá nùu mii-yá nì quixi —ni cachi Jesús.

³⁰ Ñàyücàndüá, nì nanducu nècuàchì mà nansa tñii-neyá, doco cóni níhi-né quida-neá, vèchi tãñáha ga sàa quívi cuu xi-yá ducán.

³¹ Doco cunaha-nsiá, cuàhà gá nèhivì itá yucán nì xinindisá stná-nè mii-yá, te nì cachi-nè: —Cuàhà gá milagru quidá Jesús yohó. Ádi có-xiñhù gá cundehè gá-ndà milagru sàhà-ñá cundaá ini-ndà divi rey ndiaha nì quixi nùu Dios nduú-yá.

Nansa nì quixi policia cuenta xi nècuàchì fariseu ñà-catnii-tè Jesús

³² Dandu nì caxinitnùhu nècuàchì fariseu ñà-ndüá cachí nèhivì sàhà-yá. Ñàyücàndüá, mii-né xì dùtù xícusahnú, nì càhàn-nè xì policia ñà-cùhùn-te catnii-tèyá.

³³ Dandu nì càhàn-yá xì nèhivì inga xichi, cachí-yá:

—Sacù-ni tiempu coo guè xì-nsiá yohó, dandu icúmí nùhì nùu ana nì techuun-xí vèxi.

³⁴ Te mate nì nándúcú-nsiá yùhù, doco mà ndacùhun-nsiá yùhù, vèchi ndé cùhìn, mà cúí sàà-nsiá.

³⁵ Dandu nècuàchì raza-yá Judea yucán, nì ndatnuhu-né entre mii-né, cachí-nè:

—¿Índü cùhùn nècuàchì yohó, te (cachí-nè) mà cúí ndacùhun-ndané? ¿A cùhùn xicà-né ñuu griegu ndé ndoó stná nècuàchì raza-ndà, te dacuahá-né nècuàchì griegu mà?

³⁶ Có-sànhi ini-ndà ñà-cachí-nè ñà-mà cúí ndacùhun-ndané, mate nì nándúcú-ndané, te mà cúí sàa stná-ndà lugar ndé cùhùn-nè —ni cachi nèhivì mà.

Na ian queé fuerte tèñuhu iin yùte limpiu, ducán fuerte icúmí Dios cuàhatahvi-yá vida ndiaha xi-yá ini anima-ndà

³⁷ Daani, nì sàa quívi nì xinu vicó mà, divi quívi chicá nducáhnú. Dandu nì ndacuiin Jesús mahi nèhivì, te nì càhàn ndee-yá, cachí-yá xi-né:

—Nú íá ana xíhi tècuí, dandu nì quixí-né nù, te coho vaha-ne.

³⁸ Vèchi nú xinindisá iin nèhivì xí, ducán queá nùu-né na ian caná fuerte tècuí ini anima-nè, te xitiá-te, nduú-te nahi tècuí coho-nda cutiacu-ndà nicanicuahàn, divi nacua cachitnùhu nùu tutu ì —ni cachi-yá.

³⁹ Doco tècuí nì cachi-yá mà nduú (ejemplu, vèchi cunaha-nsiá), Espiritu Ì nduú tècuí mà, te nsidaa ana xinindisá-xí-yá, icúmí-nè nihitáhvi-né Espiritu Ì mà. Doco tãñáha ga cuàhatahvi Dios Yá-ì mà, vèchi tãñáha ga nanihi Jesús tnùñuhu ndiaha xi-yá.

Nansa nì ndatnuhu nèhivì cuàhà sàhà Jesús

⁴⁰ Daani, na ní inini dava nècuàchì itá yucán ñà-ndüá nì cachi-yá, dandu nì cachi-nè:

—Ndisa, nècuàchì ndiatu-nda quesaa càhàn cuenta xi Dios nduú ana yohó.

⁴¹ Te dava ga-nè, cachí-nè:

—Divi rey ndiaha Cristu nduú nècuàchì yohó.

Doco dava ga-nè, nì cachi-nè:

—¿A tuxí ini-nsiá rey ndiaha Cristu cunduu iin nècuàchì nì quixi ladu Galilea (nahi Jesús)?

⁴² Amádi cachitnùhu tutu ì sàhà rey mà ñà-divi yohótèhè-yá nduú David, te ñuu nècuàchì mà nani Belén cunduu ñuu-yá, cachá.

⁴³ Ñàyücàndüá, nì tãhndè dava nèhivì sàhà-yá.

⁴⁴ Te mate cuní dava-ne tñii-neyá, doco ni-iin-ne có-sàhandee ini-nè quida-neá.

Nansa nì cachi nècuàchì xidandacú ñà-có-càndisá-né Jesús

⁴⁵ Daani, na sámànùhù tè-xínduu policia ndé ndoó dùtù xícusahnú xì nècuàchì fariseu, te nì cachi nècuàchì mà xi-té:

—¿Índü chuun cóni sándacá-nsiá Jesús quixi?

⁴⁶ Te nì naxiconihí policia, cachí-te:

—Còo inga ana càhàn ndiaha guá na càhàn nècuàchì yucán.

⁴⁷ Dandu nì cachi nècuàchì fariseu mà:

—¿A ndé stná mii-nsiá sàni dandàhví Jesús?

⁴⁸ Cundehe-nsiá nsiùhù tè-xidandacú, ¿a sání xinindisá-nsí? Còó, ni-iin-nsi. Te ¿ò dává gá nècuàchi fariseu? Còó. Ni-iin-ne, có-xinindisá-né.

⁴⁹ Doco dava ga nèhivi ndahví yucán, ni có-ínahá-né nansa cachí ley ì, sàhàyùcàndúá icúmí-né nìhì-né castigu xi-ne —ni cachí nècuàchìmà.

⁵⁰ Cunaha-nsiá, yucán iá stná Nicodemo, divi nècuàchi ni sàhàn nùù Jesús daa, vèchi iin nècuàchi xidandacú nduú stná-né. Te vichi ni càhàn stná-né xi nsidaa compañeru-nèmà, cachí-né:

⁵¹ —(Náni), ndéni nèhivi ní cui, nú cuní-ndà nsidandaà-ndà sàhà-né, dihna icúmí-ndá cunini-nda nansa cachí mii-né, dandísá, vètùni cundaà ini-ndà sàhà chuun xi-ne. Amádi ñà-jaàn nduú stná ley xi-nda.

⁵² Doco ni naxiconihí compañeru-nèmà cachí-né:

—¿A ndé stná mii-ní nduú stná-ní iin nècuàchi ladu Galilea? Nanducu váha-ní (nùù tutu ì), dandu cundaà inì-ní, còò ni-iin nècuàchi càhàn cuenta xi Dios quixi ladu Galilea —ni cachí-né.

⁵³ Dandu nsidaa-né ni nacuitià-né mànuhù-né vehe-ne.

8

Ñà-ndúá ni cachí Jesús xi iin nècuàchi ñahà cóni quidá ví

¹ Daaní, ni quee Jesús cuàhàn-yà yucú Olivo.

² Dandu inga quivi na ní tùinuù, vèxi tu-ya veheñùhu cahnú. Te ni nataca cuàhà gá nèhivi nùù-yá; te ni sàcòo-ya ni chinaha-yànè.

³ Dandu yucán ni sàà stná itnii maestru ináhá ley sàna, xi stná dava nècuàchi fariseu, xindaca-ne iin nècuàchi ñahà ni sàà, te ni chicani-ne nècuàchìmà nùù-yá, vèchi ñahà mà, ni càhàn-né xi iin nècuàchi có-nduú nècuàchi vehe-ne.

⁴ Ñàyùcàndúá ni cacachi nècuàchi tiàa ma xi-yá:

—Maestro, ni tnii-nsi ñahà yohó na quidá-né iin cuàchi.

⁵ Te cachí ley xi Moisés ñà-icúmí-né cui-né xi yùù nú quidá-né ducán. Doco mii-ní, ¿nansa cachí-ní quida-nda?

⁶ Ducán ni cachí nècuàchìmà, áma cáchi-yà iin ñà-có-ndiá icà-yá cahan-né, te ducán nihindè-né daquée cuàchi-ne diqui-yá. Doco mii-yá, ni nàcòo ndee ni-ya, tiaá-yá nùù ñuhù xi òmíndáhá-yà.

⁷ Dandu chicá cuàhà ni ndàcàtnùhù-né nùù-yá, ñàyùcàndúá, ni nàcòo ndaà-yà, te ni cachí-yà xi-né:

—Nú iá ndisa iin-nsia còò ni-iin falta-xi, dandu divi ni cundúú primeru caniyuu-xi nècuàchi yohó.

⁸ Dandu ingà tu ni nàcòo ndee-ya, tiaá tú-yá nùù ñuhù.

⁹⁻¹⁰ Doco nsidaa nècuàchi itá yucán, ináhá-né iá stná cuàchi-ne. Ñàyùcàndúá, dihna nècuàchi chicá sahnú ni caquee cuàhàn, dandu después ni caquee stná iin iin nècuàchi dava ga mà cuàhàn-né, ndé mii Jesús ni ndòo, xi stná nècuàchi ñahà mà. Dandu ni nàcòo ndaà-yà, te ni xini-yà ndélà mindaa nècuàchìmà iín. Ñàyùcàndúá, ni cachí-yà xi-né:

—Señora, ¿a sàcuàhàn nsidaa nèhivi daquée cuàchi diqui-ní? ¿Á coo cá ana cuní cahní xi-ní?

¹¹ Dandu ni cachí nècuàchìmà:

—Còó, Señor; còò cá iin.

Dandu ni cachí Jesús xi-né:

—Pues ni yùhù, có-cuní stnáí cui-ní. Cuahán-ní, te màsà nàxícócuñ-ní quida gà-ní cuàchi ma —ni cachí-yà.

Jesús nduú ana datnúú xi sàxínítnúni nèhivi ñuhiví

¹² Daaní, ni càhàn gà Jesús xi nèhivi yucán, cachí-yà:

—Yùhù nduí ana datnúú xi sàxínítnúni nèhivi ñuhiví. Ñàyùcàndúá, nsidaa ana nchícùn xí, icúmí cutnuù ndiaha nùù ichi nchícùn-né, te ducán nihitáhvi stná-né vida ndiaha, vèchi mà nunca cunduamà ichi ñáa.

¹³ Dandu ni cachí nècuàchi fariseu xi-yá:

—Còó, mà ndisá, vèchi cuisì mii-ní ndeníhí vaha-ní mii-ní.

¹⁴ Dandu ni cachí-yà xi-né:

—Mate mií càhìn sàhà-xí, doco vètùni cundiaa mà, vèchi ináhí índù ni quei vèxi, te ináhí índù icúmí nùhì. Doco mii-nsiá, có-ínahá-nsiá índù ni quei vèxi, ni có-ínahá stná-nsiá índù icúmí nùhì.

¹⁵ Indéhe uun-nsia nansa quidá nèhivi, te ñà-jaàn cachí-nsiá sàhà-né, a quidá ví-né, ò á coó. Doco yùhù, có-càchí nú quidá ví-né, ò á coó.

¹⁶ Doco nú ndisa indéhi sàhà-né, dandu ñà-ndácuisì nduámà, vèchi màdi cuisì yùhù nduú ana cachí ducán, vèchi cutnáhà stná Yuamání xí, divi mii-yá ana ni techuun-xí vèxi.

¹⁷ Cachi ley xi-nsia: xi ùi testigu vàtùni cunindisa-nda ñà-ndàà nduá cachi-né.

¹⁸ Pues, cunaha-nsiá, yùhù nduú iin ana cáhàn favor xi. Daaní, iá stná mii-yá nì techuun-xí, divi Yuamáni', te cáhàn stná-yà favor xi.

¹⁹ Dandu nì cacachi nècuàchì mà xì-yá:

—¿Índù iá yua-ní?

Te nì cachi-yà xì-né:

—Mii-nsiá, nì có-ináhá-nsiá yùhù, nì có-ináhá stná-nsiá Yuamáni'. Vàchi nú nì cúnáhá ndisa-nsia yùhù nì cúí, dandu ñà-jaàn nìhì stná-nsiá cunaha stná-nsiá mii-yá.

²⁰ Ñà-jaàn nduá nì cachi Jesús na nì dàcuàhà-yá nèhivì ndoo yehè veheñùhu cahnú yatni ndé itá alcancia xi Dios. Doco còò iin nì tniì-xi-yá, vèchi tãñáha ga sàà quivì cuu xi-yá ducán.

Nansa nì cachi Jesús icúmi-yá cùhùn xicà-yá, te mà cúí cunchicùn stná nèhivì có-xiníndísá

²¹ Daaní, nì cachi tu Jesús xi nècuàchì yucán:

—Yùhù icúmi cùhùn xiqué, te mii-nsiá, icúmi-nsiá nanducu-nsiá yùhù, doco na quivì cui-nsiá, icúmi-nsiá cui-nsiá xi cuàchi-nsia. Te lugar ndé cùhìn, mà cúí cùhùn stná-nsiá.

²² Ñàyúcànduá, nì cachi nècuàchì raza-yà Judea mà entre mii-né:

—¿A vihini cahni nècuàchì jaàn mii-né, ñàyúcànduá nì cachi-né lugar ndé cùhùn-nè mà cúí sàà stná-ndá?

²³ Dandu nì cachi-yà xì-né:

—Nèhivì ñuhivì yohó xinduu-nsia, doco yùhù, diquì-xí ansivi nì quixi, có-ndúì nèhivì ñuhivì yohó.

²⁴ Ñàyúcànduá nì cachi xì-nsiá daa ñà-icúmi-nsiá cui-nsiá xi cuàchi-nsia. Vàchi nú có-xiníndísá-nsiá yùhù ñà-ndúì ana nì cachi xì-nsiá, dandu quivì cui-nsiá cunsida ì-nsiá cuàchi-nsia.

²⁵ Ñàyúcànduá, nì cachi-né xì-yá:

—Pues, mii-ní ¿ana divi nduu-ní?

Te nì cachi-yà xì-né:

—Ndé primeru sàni cachi xì-nsiá ana nduú.

²⁶ Te cuàhà gá icúmi guè' cundehí, te cachi sàhà-nsiá. Cunaha-nsiá, palabra ndàcuisi nduá cachí mii-yá ana dichúun-xí vèxi. Nùù mii-yá nì sàcunahí cachí nsidaa ñà-nduá cachí xi mii-nsiá nèhivì ñuhivì yohó —nì cachi Jesús.

²⁷ Doco nèhivì yucán, cóni sànihì ini-né ñà-divi Yua-nda Dios cáhàn-yà sàhà-xí.

²⁸ Ñàyúcànduá nì cachi tu-yà xì-né:

—Nú sàni sàà-nsiá nì chituu ducùn-nsiá yùhù ana nduú Tnaha Nèhivì Ñuhivì, dandu cundaà ini-nsiá ñà-divi yùhù nduú ana cachí xì-nsiá, te màdi dìni mii chituní ini quide ñà-nduá quidé. Cuisi quidé ñà-nduá nì dandàcú Yuamáni' nùì, te divi ñà-jaàn nduá cachí xì-nsiá.

²⁹ Cunaha-nsiá, divi Yuamáni' nì techuun-xí vèxi, te nicanicuahàn iá-yà cutnàhà stná-yà xí; mà nunca nacóò-yá yùhù, vèchi nicanicuahàn quidé ñà-nduá cudí ini-yá.

³⁰ Ducán nì cachi Jesús, te sàhà palabra jaàn nì sàà nì xinindisá cuàhà gá nèhivì-yá.

Ndoó nèhivì iníni xí Dios, te ndoo nèhivì iníni xí cuàchi

³¹ Daaní, nì cáhàn Jesús xi nèhivì xinindisá-xí-yá, cachí-yá:

—Nú iin-nì cunindisá vaha-nsia, dandu cunduu ndisa-nsia nèhivì xí,

³² te sàà stná-nsiá mànihì ini-nsiá ñà-nduú palabra ndàcuisi. Te divi sàhà palabra mà icúmi-nsiá caquee-nsia libre.

³³ Dandu nì cachi nèhivì xì-yá:

—Nsidaa-nsí, yohótèhè-nsí nduú Abraham, te ni-iin xichi cóni ía ni-iin lamú dandacu-xi nù-ní. Ñàyúcànduá, ¿índù chuun cachí-ní ñà-icúmi-nsí quee-nsi libre?

³⁴ Dandu nì cachi-yà xì-né:

—Palabra ndàcuisi nduá yohó cachí xì-nsiá: nsidaa ana tùha quida xi cuàchi, divi cuàchi ma nduá dandàcù-xi nù-né vida xi-ne, na ian peón xi cuàchi ma nduú-né.

³⁵ Te iin peón, màdi nicanicuahàn coo-tè vehe lamú xi-tè. Tucu íá xi dèhe iin lamú, nicanicuahàn icúmi-né coo-ne nùù nècuàchì mà.

³⁶ Ñàyúcànduá, nú sàni dàcácu Dèhemani (Dios) mii-nsiá, te sàni quee-nsia libre, dandisá, libre dahuun icúmi-nsiá cundoo-nsia.

³⁷ Yùhù ináhí Abraham nduú yohótèhè-nsiá. Doco vichi cuní-nsiá cahni-nsiá yùhù, vèchi có-ndóò ini-nsia xi ñà-nduá cachí xì-nsiá.

³⁸ Cuisi ñà-nduá sàni xini nùù Yuamáni' nduá cachí xì-nsiá, te ducán stná mii-nsiá, ñà-nduá nì inini-nsia nùù yua-nsiá, divi nduá quidá stná-nsiá.

³⁹⁻⁴⁰ Dandu nì cacachi nècuàchì mà xì-yá:

—Nsiùhù, Abraham nì sanduu primeru yua-nsí.

Te nì cachi Jesús xì-né:

—Nú ndisa Abraham nì cundúú yohòtéhè-nsiá nì cùí, dandu icúmí-nsiá quida vii-nsiá nacua nisa quida nècuàchìmà sàhana. Doco vichi cuní-nsiá cahni-nsiá yùhù, mate palabra ndàcuisi nduá cachí xì-nsiá, te nduú stná mà palabra nì inini nùù Dios. Cunaha-nsiá ni-iin xichi cóni cùní Abraham quida-ne nacua cuní mii-nsiá quida-nsiá xí.

⁴¹ Doco mii-nsiá, nacua quidá yua-nsiá, divi ducán quidá stná-nsiá.

Dandu nì cachi nèhivi mà xì-yá:

—Nsihù, có-ndúú-nsí dèhe ndahví. Mindaa Yua-nsí iá, te divi nduú Dios.

⁴² Dandu nì cachi-yá xì-né:

—Nú Dios nì cundúú yua-nsiá nì cùí, dandu icúmí-nsiá cuu ini-nsiá sàhí, vàchi nùù mii-yá nì quei vaxi. Màdì yùhù nì nácání míf inì quixi, cóó. Divi mii-yá nì techuun-xí vaxi.

⁴³ Te ¿índù chuun mà cùí mànlhì inì-nsia ñà-nduá cachí xì-nsiá? Pues divi sàhà-ñá mà cundéé inì-nsia cunindisá-nsiá palabra xí.

⁴⁴ Vàchi divi ñà-malu nduú yua-nsiá, te nacua cudí inì quisi mà quida quini-si, divi ducán stná mii-nsiá, cudí stná inì-nsia quida-nsia ducán. Dècuèndè tiempu chicá antes cudí inì-si dacadhni stnahá-si nèhivi. Mà nunca tùha-si quida-si ni-íñàha nduú ñà-ndàà, vàchi cóò ni-iin palabra vaha nìhnú inì-si. Te na cáhàn tnùhù-sí, (màsà ndúlócò-ndà), vàchi ducání tnuhu inì anima-si. Tnhu-sí, te yua ñà-nduú nduú-si.

⁴⁵ Te yùhù, sàhà-ñá cachí xì-nsiá ñà-nduú ñà-ndàcuisi, ñàyùcànduá có-xìníndisá-nsiá yùhù.

⁴⁶ Te nú iá cuàchi nì quide cahan-nsiá, dandu ¿índù chuun có-càchí claru-nsiáñà? Doco te nú ñà-ndàà nduá cachí xì-nsiá, dandu xíñuhu cunindisá-nsiá yùhù.

⁴⁷ Nsidaa ana nduú nèhivi xí Dios, cudí inì-nè cunini-ne palabra vaxi nùù-yá. Doco sàhà-ñá có-ndúú-nsiá nèhivi xì-yá, ñàyùcànduá có-íníni-nsiá palabra xì-ya —nì cachi Jesús.

Sà-íá Jesús na táyóo nèhivi sàhana

⁴⁸ Dandu nì cáhàn tu nèhivi raza-yá Judea xì-yá, cachí-nè:

—Ádi ñà-ndàà nduá cachí-nsi, iin nècuàchì samaritanu (siquini) nduu-ní, te iá stná iin ñà-malu anima-ní.

⁴⁹ Dandu nì cachi-yá xì-né:

—Còò ñà-malu animè. (Na cáhàn xì-nsiá), cuisì cuní quee tnùñuhu xí Yuamání. Doco mii-nsiá, cahíchi inì-nsia yùhù.

⁵⁰ Có-nànduquí nansa tavà nèhivi tnùñuhu xí míí, vàchi iá iin ana quida-xi ñà-jaàn, te mii-yá nduú stná ana icúmí nsidandaà vii sàhà nsidaa chuun.

⁵¹ Palabra ndàcuisi nduá cachí xì-nsiá yohó: nú nì chívàha iin nèhivi ñà-nduá chináhi, dandu mà nunca sàà-nè cui-nè nicanicuahàn.

⁵² Dandu nì cachi nècuàchì raza-yá Judea yucán:

—Vichì sàni cundaà ndisa ini-nsí iá ñà-malu anima-ní, vàchi sàhana nì xihì Abraham yucán, te nì xihì stná nsidaa profeta nisa cáhàn cuenta xi Dios. Doco mii-ní cachí-ní mà nunca sàà cui nèhivi chívàha xí ñà-nduá cachí-ní.

⁵³ ¿A tuxí inì-ní chicá ndiáá-ní nùù xì-ndà Abraham? Vàchi cóò gá ndómá, xì stná profeta nisa cáhàn cuenta xi Dios, sàni caxihì nsihi-ne. ¿Ana divi nduu-ní cahan-ní?

⁵⁴ Dandu nì cachi Jesús xì-né:

—Nú míí nì cachí ñà-chicá ndiaf, dandu, mà cundíáá mà. Vàchi divi Yuamání nduú ana icúmí tavà xì tnùñuhu xí yùhù, mate mii-yá nduú ana cáhvi stná-nsiá, cachí-nsiá.

⁵⁵ Doco mii-nsiá, có-ináhá-nsiâyá; cuisì yùhù, ndisa, ináhí-yá. Te nú nì cachí có-ináhí-yá, dandu cunduu stnáí tè-tnùhù nahí mii-nsiá. Doco yùhù, ináhí mii-yá, te chívàhi ñà-nduá cachí-yá.

⁵⁶ Xì-ndà Abraham mà, nì cudí inì-nè ñà-nihítàhvi-né cuni-nè tiempu (quesai ñuhivi yohó). Ñàyùcànduá, contentu nì ndòo-ne na ní cuu ndisa ñà-jaàn.

⁵⁷ Dandu nì cachi nèhivi mà xì-yá:

—Mii-ní, nì có-xicà-ní ùi dico ùxin cuià, te ináhá-ní Abraham cahan-ní!

⁵⁸ Dandu nì cachi Jesús xì-né:

—Cunaha-nsiá, táyóo Abraham, doco yùhù sà-íé`.

⁵⁹ Ñàyùcànduá nì datàcá nècuàchìmà yùù cuàhàn-nè cahni-néyá nì cùí, doco nì quee dèhé-yá veheñuhu ma nì chindaà-yá mahí-né cuàhàn-yá.

9

Nansa nì dàndúvaha Jesús iin nècuàchì cuaá dècuèndè quivi nì cacu-ne

¹ Dandu nì yàha Jesús chicá nùù-xí, te nì xini-yá yucán iá iin nècuàchì cuaá, dècuèndè nì cacu-ne cuaá-nè.

² Te nì xicàn tnùhù nècuàchì dacuahá-yá nùù-yá, cachí-nè:

—Maestro, ¿ana cuàchi-xi nduá, te cuaá nècuàchi yohó ni cacu-ne? ¿A yuadíhí-nê ía cuàchi-xi, ò mii-né?

³ Dandu ni cachi Jesús xi-né:

—Ni còò cuàchi ni quidá nècuàchi yohó, ni stná yuadíhí-nê. Cunaha-nsiá, sàhà-ñá ni sàà nèhivi cundaà ini-nè ñà-ndiaha guá quidá Dios, ñàyùcàndüá ni cuu xi nècuàchi yohó ducán.

⁴ Yùhù, na ía va quivi, icúmí quide obra ndiaha ni sàcùnahí nùù mii-yá ana ni techuun-xí vaxi; vachi (vaxi iin tiempu ùhì) nàcùin tñùù, dandu mà cúí gá quida ni-iin nèhivi chuun xi mii-yá.

⁵ Yùhù, na ía ve ñuhiví yohó, chuun xi nduá datnúì sàxinítnùnì nèhivi.

⁶ Dandu ni nsihì ni cachi-yà ducán, ni dàcòyo-ya tédíí-yá ñuhù, te ni quidavàha-ya iyuhu ndèhì ni dàcánúú-yá nùù nècuàchi cuaá mà.

⁷ Te ni cachi-yà xi-né:

—Vichi cuahán-ní quisi-ní ndé ñuhú tècuí pila nani Siloé.

Pues cunaha-nsiá, quiví Siloé mà cuní cachá' dàhàn ñuu yucán ñà-sàni techuún nèhivi-ndó. Ñàyùcàndüá, ni sàhàn tiàa ma ni quisi-ne, te na mándixi-ne sàtùinüù-né.

⁸ Dandu nsidaa nècuàchi ndoó yatni ndé ía-nè, xi stná dava ga nècuàchi ináhá xí-nè antes cuaá-nè, ni cachi-nè:

—¿Amadí nècuàchi tiàa jaàn nduú ana nisa ía xicàn xi caridad?

⁹ Te dava-ne, cachí-nè:

—Divi nduú-né.

Te dava ga-nè, cachí-nè:

—Còó, cuiis na indéhe nècuàchi cuaá mà, ducán indéhe stná nècuàchi yohó.

Doco nècuàchi ni sanduu nècuàchi cuaá mà, ni cachi-nè:

—Divi nduí.

¹⁰ Dandu ni cacachi nècuàchi yucán xi nècuàchìmà:

—¿Nansa ni cuu ni natùinuù-ní?

¹¹ Te ni cachi nècuàchìmà:

—Iin tiàa nani Jesús, ni quidavàha-ne iyuhu ndèhì ni dàcánúú-né nùù, te ni cachi-nè xí: “Cuahán-ní ndé pila Siloé, te quisi-ní”. Ñàyùcàndüá, ducán ni quide, te ni natùinuú'.

¹² Dandu ni cachi nèhivi mà xi-né:

—Pues vichi, ¿índü ía tiàa ma?

Te ni cachi nècuàchìmà:

—Cò-cùndáa inì.

¹³ Dandu nèhivi yucán, ndacá-né nècuàchìmà cuahàn nùù nècuàchi fariseu.

¹⁴ Vachi cunaha-nsiá, quiví descansu nduá na ní quidavàha Jesús ndèhì ni dànatùì-ya nùù nècuàchìmà.

¹⁵ Ñàyùcàndüá, ni xicàn tñùhù stná nècuàchi fariseu nùù nècuàchìmà nansa ni cuu ni natùinuù-né. Dandu ni cachi-nè:

—Ni quidavàha nècuàchìmà ndèhì, te ni dàcánúú-nè nùù; dandu ni sàhìn ni quisi, te vichi duha ni natùinuú'.

¹⁶ Dandu dava nècuàchi fariseu mà, ni cacachi-nè:

—Tiàa ni quida ducan xi nècuàchi yohó, có-íá-nè ladu xi Dios, vachi có-chívàha-ne quiví descansu.

Doco dava ga nècuàchìmà, ni cacachi-nè:

—Còó, vachi nú nècuàchi cuàchi ni cùndúú nècuàchìmà, dandu mà cúí quida-ne iin milagru nahi ñà-yòhó.

Ñàyùcàndüá, ni tãhdè dava nècuàchi fariseu mà.

¹⁷ Dandu ni cachi tu-ne xi tiàa ni sanduu nècuàchi cuaá mà:

—Te mii-ní tu, ¿nansa cachí-ní sàhà nècuàchìmà ñà-sàni dànatùì-ne nùù-ní?

Dandu ni cachi nècuàchìmà:

—Iin profeta càhàn cuenta xi Dios nduú-né.

¹⁸ Doco nècuàchi xidandacú nùù tè-raza Judea, cóni xiníndísá-né ñà-cuaá ndisa nècuàchìmà na ní cacu-ne. Ñàyùcàndüá, ni cana-ne yuadíhí nècuàchìmà,

¹⁹ te ni xicàn tñùhù-né nùù nècuàchi sahnuma, cachí-nè:

—¿A dèhe-nsiá nduú nècuàchi yohó, te a ndísá cuaá-nè na ní cacu-ne, cachí-nsiá? Te nú ducán, ¿nansa ni cuu ni natùinuù-né vichi?

²⁰ Dandu ni cachi yuadíhí nècuàchìmà:

—Ináhá-nsí dèhe-nsi nduú tè-yòhó, te ñà-ndáa nduá cuaá-te na ní cacu-tè.

²¹ Doco có-cùndáa ini-nsi nansa ni cuu ni natùinuù-té, ni có-ináhá stná-nsi ana nduú nècuàchi ni dàndúvaha xi-té. Cunaha-nsiá, tè-sàhnú sàndúú-te; nùù mii-té ndàcàtnùhù-nsiá. Vátùni nacani-tè nansa ni cuu xi-té.

²² Ñà-jaàn nduá ni cachi yuadíhí nècuàchìmà, vàchi yúhì-nè nècuàchì dava ga raza-nè Judea, vàchi sàni ndatnuhu váha nècuàchì (dandacú) sàhà nsidaa ana cachi vate sàhà Jesús ñà-ndúú-yá Cristu (ni quixi nuù Dios); te vichi sàni tavà-né orden ñà-mà cóo gá permisú cùhùn nècuàchìmà veheñùhu.

²³ Ñàyücàndúá, ni cachi yuadíhí tiàa ma ñà-sàsàhnú dèhe-nemà, chicá vàha ndàcàtnùhù xì nuù mii-né.

²⁴ Daaní, ni cana tu nècuàchì dandacu-ma tiàa ni nduvàha ma ñà-tnàtuu-ne, te ni cachi-nè xì nècuàchìmà:

—Tavà-ní tnùñuhu xí Dios; vàchi nsiùhù, ináhá-nsí nècuàchì cuàchi nduú nècuàchì ni càhàn xì-ní.

²⁵ Dandu ni cachi tiàa ma xi nsidaa-né:

—Yùhù, có-cùndáa iní, a nècuàchì cuàchi nduú-né, á cóo. Cuisi imindaa iñàha ináhí: divi ñà-antes nisa ìa cuaá dahuin, doco vichi sàni natùinuú.

²⁶ Dandu ni cachi nècuàchìmà:

—¿Nansa ni quida-ne xì-ní? ¿Ndíá nduá ni quida-ne, te ni nanihì-ní vista xì-ní?

²⁷ Dandu ni cachi tiàa ma xi-né:

—Pues sàni cachi xì-nsiá nsidaámà, te có-xiníndisá-nsiá. ¿Índù chuun cuní-nsiá nacani guè xì-nsiá ingà tu? ¿A cuní stná-nsiá yàha-nsiá ladu xi Jesús?

²⁸ Dandu ni quesaha nècuàchìmà cànàhá-nè, cachi-nè:

—Mii-ní, ladu xi nècuàchìmà iá-ní, doco nsiùhù, ladu xi (xiì-ndà) Moisés iá-nsi.

²⁹ Ináhá-nsí ni càhàn Dios xì Moisés, doco nècuàchì jaàn, ni có-ináhá-nsí índù ladu ni quixi-ne.

³⁰ Dandu ni cachi tiàa ma xi nsidaa-né:

—Pues ndiaha máni ndujàn. Ni có-ináhá-ndá índù ni quixi-ne, doco sàni dándúvaha-ne nduchinúí.

³¹ Pues ináhá-ndá ñà-có-íníni Dios na xícàn tàhvi iin nèhivi có-quidá víi. Doco nú nihnú vaha ini-ndáyá, te quida-nda ñà-ndúá cachí-yà, dandu quihín casu-yà na xícàn tàhvi-ndà nuù-yá.

³² Te ni dècuèndè sàhana có-xinítnùhu-nda coo ana danátù xi nuù iin nèhivi cuaá dècuèndè quivi ni cacu-ne.

³³ Ñàyücàndúá, sàni cundaà iní, ladu xi Dios iá Jesús, vàchi nú cóo, mà cúí quida-ya ni-iin milagru.

³⁴ Dandu ni cachi nsidaa nècuàchìmà xì tiàa ma:

—Mii-ní, dècuèndè ni quesaa-ní ñuhívi sà-íá cuahà cuàchi-ní, te ¿a tuxí iní-ní cuahàn-ní chinahà-ní nsiùhù?

Ducán ni cachi-nè, te ni taxi-né nècuàchìmà tùvehè.

³⁵ Dandu ni xinitnùhu Jesús nansa ni cuu xi nècuàchìmà ñà-ní taxi-ñànè. Ñàyücàndúá, na ní ndacùhun stnahá-yá xì-né, ni cachi-yà xì-né:

—¿A xiníndisá-ní mii-yá ana nduú Dèhemani Dios?

³⁶ Dandu ni cachi nècuàchìmà xì-yá:

—Señor, cachi-ní xí ana divi nduú-yá, dandu cunindisé.

³⁷ Te ni cachi Jesús xì-né:

—Sàni xini-ní mii-yá, vàchi divi nduú yùhù ana càhàn xì-ní vichi.

³⁸ Dandu ni cachi tiàa ma:

—Yùhù xiníndisè, Señor mío.

Te ni cahvi-néyà.

³⁹ Dandu ni cachi-yà:

—¿Índù chuun ni quesai ñuhívi yohó? Divi sàhà-ñà cunahà claru ana quidá víi ndisa; dandu nèhivi cuaá ini anima-xi, vètùni nihì-né (cundaà ini-nè, na ian ni) natùinuú-né. Doco nèhivi tuxí iní-xi sàcùndáa vaha ini-xi, mii-né nduú ana icúmi cuaá anima-xi, (mà cùndáa gá ini-nè) —ni cachi-yà.

⁴⁰ Doco dava nècuàchì fariseu cutnàhá xí-yá yucán, ni inini-ne ñà-ndúá ni cachi-yà, te ni cacachi-nè xì-yá:

—Te nsiùhù tu, ¿a cuaá stná ini anima-nsi cahan-ní?

⁴¹ Dandu ni cachi-yà xì-né:

—Nú sàni nacuni-nsià cuaá ini anima-nsià ni cúí, dandu mà cóo gá cuàchi-nsià; doco vichi cachí-nsià (ñà-cùndáa vaha ini-nsià), te claru ináhá-nsià nsidaa iñàha. Ñàyücàndúá, iá ìi cuàchi-nsià.

¹ Palabra ndàcuisi nduá yohó: nú quíhvi dèhé nèhivi ìcà corra ndé có-nduú yehè, dandu ináhà-ndá nècuàchi vaxi quidadacuihna xi rii xi-ndà nduú-né.

² Doco nècuàchi quíhvi yehè corra, còó, nècuàchi ìrifi-xí nduú-né.

³ Te íá stná peón xi-ne ndiaá xi yehè mà. Te cuisì nùù nècuàchi ìrifi-xí nacúná-te. Te na càhàn nècuàchmà xi rii xi-né, nacùnì-siné. Te caná-nèsi quívi iin iin-sì, dandu queé-si xi-né.

^{4,5} Te na tavá-nèsi ducán, dandu sácòdònùù-né nùù-sí cuàhàn-nè; te vivì-ni xínchicùn-siné, vachi ináhà-sí tàchi stohò-si. Doco inga nèhivi tùcù, còó, mà cúnchicùn-siné. Xinúdehé-si nùù-né, vachi có-nàcùnì-si tàchi nèhivi tùcù.

⁶ Ñà-jaàn nduú iin ejemplu ni nacani Jesús xi nèhivi yucán, doco cóni cúndáà ini-nè ndià nduá cunì cachàmà.

Pastor ndiaha nduú Jesús

⁷ Dandu ni càhàn tu Jesús xi nèhivi yucán, cachí-yà:

—Palabra ndàcuisi nduá yohó: na iin yehè ndé quíhvi rii, ducán nduú yùhù.

⁸ Nsidaa ana ni quixi antes, tècuihnà xinduu-tè, te cutu cunì-te quidadacuihna-té rii xí. Doco nèhivi nduú nahi rii xí, cóni ndúlócò-nè.

⁹ Te (nacuá ni cachì) ñà-nahi yehè nduí, ñàyùcànduá, sàhà yùhù vátùni quíhvi nèhivi, te nihì-né salvación xi-ne, dandu después cucumí-né vida ndiaha xí-né, na iin rii sàhàn ndé íá cuàhà pastu, dandu màndixi tu-sì corra-sì.

¹⁰ Iin tècuihnà, cutu quixi-te ñà-quidadacuihna-té ñà-nduá icúmí-ndá, te ò cahni-téndò, te ò quida quini-tè xi-ndá. Doco yùhù, còó, sàhà ñà-cui nihitáhvi nèhivi cutiacu ndiaha-né nicanicuahàn, ñàyùcànduá ni quesai (ñuhiví yohó).

¹¹ Yùhù nduú ndise pastor vaha. Te sáhi vida xi sàhà-ñá nihì nèhivi nduú nahi rii xí cutiacu-nè.

¹² Doco dava tè-ndiaá xi rii, peón-ni nduú-te, te mà úhi nacoo-tésì, vachi có-nduú ndisa-tè pastor xi-sì; có-nduú-te meru stohò-si. Ñàyùcànduá nú ni xinì-te vaxi nsivòhú, dandu nacóó nihni-tésì, te xinúdehé-te; dandu tnií quisi mà-sí, te xitià nihni nsihi-sì.

¹³ Te ¿índu chuun xinúdehé tèmà? Pues divi sàhà-ñá nduú-te peón-ni, te có-ndúlócò-te sàhà-sí.

¹⁴ Doco yùhù, pastor vaha ndisa nduí, te ináhà vahi nèhivi xí. Te mii-né, ináhà stná-nè yùhù.

¹⁵ Na ináhà Yuamání yùhù, ducán ináhà stná mii-yá. Te yùhù, vida xi sáhi sàhà-ñá càcu nèhivi xí, vachi nahi rii xí xinduu-nè.

¹⁶ Te ndoó gá más nèhivi nduú nahi rii xí. Te mate diin xaan ndoó-né vichi, doco icúmí cùhìn cundaqui-nè ndixi; dandu cunchicùn-nè yùhù, te iin-ni nacuatnahá-né xi nsidaa gá ana nduú rii xí; te mindaa yùhù cundiaì-nè.

¹⁷ Yùhù icúmí cuàhi vida xi, te nú sàni nsihi ni cuu ducán, dandu icúmí naquihin tuià. Sahjàn cuú ini Yuamání sáhi.

¹⁸ Cunaha-nsiá, còò ni-iin cui quindiaa xi vida xi. Voluntad xi mií cuàhià. Vátùni cuàhià, te vátùni danátíacúú mií, vachi ducán ni nihitáhvi nùù Yuamání; divi ducán ni cachí-yà xí —ni cachì Jesús.

¹⁹ Daani, nècuàchi ladu Judea mà, ni tànhè dava-ne sàhà ñà-nduá ni cachí-yà.

²⁰ Cuàhà-né ni (cachíchi ini-nèyà), cachí-nè:

—Iin ñà-malu inácaá ini tè-jaàn. Tè-loco nduú-te. ¿Índu chuun ndulócò-nsiá sàhà-té?

²¹ Doco dava ga-nè ni cachí-nè:

—Còó, màdì iin nècuàchi inácaá ñà-malu nduú nècuàchi càhàn ducán. ¿A tuxí ini-nsiá cui dandúvaha ñà-malu iin nècuàchi cuáá?

Nansa ni cunì tu nècuàchi raza Judea cahni-né Jesús

²²⁻²³ Daani, ni sàà quívi nducahnú ñà-ni xinu veheñùhu cahnú. Tiempo vixin ni sandua, te ía tu Jesús ñuu Jerusalén, xicánúú-yá patiu veheñùhu ma ndé nani Portal de Salomón.

²⁴ Te yucán ni sàà stná itniì nècuàchi raza-yà Judea, cachí-nè xi-yá:

—¿Nadaa ga tiempo cuàhàn-ní chidèhé gà-ní ana nduú-ní? Nú ndisa mii-yá nani Cristu nduú-ní, cachì ndàà-ní xi-nsí.

²⁵ Dandu ni cachì Jesús:

—Sàni cachì xi-nsiá, doco có-xiníndisà-nsiá. Ni ndacùcahín quívi Yuamání, te ni quide cuàhà milagru. Xi ñà-jaàn vátùni cundaà ini-nsiá ana divi nduí.

²⁶ Doco mi-nsiá, có-xiníndisà-nsiá, vachi có-nduú-nsiá ana nduú rii xí, nacua ni cachì xi-nsiá.

²⁷ Vachi nèhivi nduú nahi rii xí, iníni-né na càhàn xi-né. Te ináhì-nè, te nchicùn-nè yùhù.

²⁸ Te sáhi-nè vida ndiaha nicanicuahàn, te mà nunca sàà ndañuhu anima-nè, ni còò iin tavá xi-né nùù ndahí.

²⁹ Vächì nùù Yuamání' nì nìhí nèhivì nduú nahi riì xí, te còò cá ana chicá fuerte nùù mii-yá; còò iin cui dandáñhú-xí-nè nùù ndahá-yá.

³⁰ Te yùhù xì Yuamání', iin-ni xínduu-nsi —nì cachi Jesús.

³¹ Ñâyùcàndüá, nècuàchì raza-yá yucán, nì dâtàcá tu-ne yùù ñà-caniyuu-néyà, te cahni-néyà.

³² Dandu nì cachi-yà xì-né:

—Cuàhà gá obra vaha sàni quide nì xini-nsià. Te nsidaa obra mà nduá nì nìhitáhvi' nùù Yuamání'. Pues ¿indü obra xì (cò-ndiàá), te sàhámà cuní-nsià cahni-nsià yùhù?

³³ Dandu nì cachi nècuàchimà xì-yá:

—Còó, màdi sàhà ñà-nì quidà-ní obra cuní-nsi cahni-nsi mii-ní; còó. Sàhà ñà-nì cachi-ní iin cuàchi, ñâyùcàndüá ndià icà-nsi caniyuu-nsi mii-ní, vächì cuní-ní ndudava-ní xì Dios, te nèhivì uún nduu-ní.

³⁴ Dandu nì cachi Jesús xì-né:

—Pues, ¿nansa divi cachí nùù tutu nduú ley xi-nsia? Dohó cachá': "Nahi dios xínduu-nsia, cachí".

³⁵ Pues, ducán cachá' sàhà nèhivì sàhana ma, mate cuiisì nèhivì uún nì inini razón xi Dios nduú-né, doco nahi dios nduú-né, cachá', te ináhà-ndá, siempre ñà-ndácuisi nduá cachí tutu ì.

³⁶ Doco yùhù, mate ní nìhí iin chuun ì nùù Yuamání', te nì techuún-yá yùhù nì quesai ñuhivì yohó, doco cachí-nsià iin cuàchi nduá ñà-càchí nduí Dèhemani-yá.

³⁷ Cuisi cundehe-nsià obra quidé, te nú cò-ndüá nahi obra quidá stná Yuamání', dandu màsà cúnindisá-nsià yùhù.

³⁸ Doco nú dava-ní iá obra quidé xì obra quidá stná mii-yá, dandu xíñuhu cunindisá-nsià. Te mate cò-xinindisá-nsià yùhù, doco siquiera cunindisá-nsià milagru quidé, dandu vätùni sàà-nsià cundaà ini-nsià, te cunindisá stná-nsià ñuhú saín vida xì Yuamání' animé, te ñuhú saín stná vida xì yùhù ini mii-yá —nì cachi Jesús.

³⁹ Dandu nsidaa nècuàchì yucán, tucutu nì cuni-nè tnii-neyà, doco nì càcu-ya nùù-né.

⁴⁰ Daaní, inga xichi cuàhàn-yá inga ladu yùte Jordán ndé lugar ndé nì saquida ì Juan (Bautista) nèhivì. Te nì cuee chiì-yá yucán.

⁴¹ Ñâyùcàndüá, cuàhà nèhivì nì casaà stná nùù-yá yucán, vächì dohó cachí-né:

—Còó milagru nisá quidá Juan (Bautista), doco nsidaa ñà-ndüá nì cachitnùhu-ne sàhà Jesús, divi ñà-ndáà nduá, (sàni xini-nsi) —nì cachi nècuàchimà.

⁴² Te tiempu iá-yá lugar yucán nì xinindisá cuàhà nèhivì mii-yá.

11

Nansa nì xihì Lázaro, te nì natiacu-nè

¹⁻² Daaní, después nì quicuehè iin nècuàchì ñuu tii Betania nani Lázaro. Te divi ñuu yucán ndoó stná ùi cùha-ne, iin-ne nani María, te inga-nè nani Marta. Te María mà nduú nècuàchì (nì sàà nùù Jesús después), te nì dâcùchí-né tâtnà tnàmì sàhà-yá, dandu nì nsida ichí-nèà xì ididini-né.

³ Pues divi cùha Lázaro mà nduú ana nì catechuún iin razón nùù Jesús, cachí-nè xì-yá:

—Stoho-nsi Señor, cuhí vaha nècuàchì màni guá nùù-ní.

⁴ Ñâyùcàndüá, (nì sàà razón mà ndé iá-yà); doco na ní tiacu-yá palabra mà, dandu nì cachi-yá:

—Cuèhè jaàn, cò-ndüá cuèhè ñà-cui-ndà, cuiisì iin cuèhè ñà-naquimanì cuàhà-ndà Dios nduá, te quee cuàhà stná tnùñuhu xì Dèhemani-yá —nì cachi-yá.

⁵ Cunaña-nsià, màni cuàhà Marta xì cùhi-nè xì cùha-ne nùù-yá.

⁶ Doco na ní xinintnùhu-ya cuhí nècuàchimà, nì cuee chiì gá-yá ùi quivi lugar yucán.

⁷ Dandu nì cachi-yá xì nècuàchì dacuahá-yá:

—Vichi cùhùn tu-nda ladu Judea.

⁸ Te nì cacachi nècuàchimà xì-yá:

—Maestro, ¿a cuní tu-ní cùhùn-ní yucán? vächì nècuàchì ladu mà, cuàhàn-nè cahni-né mii-ní xì yùù nì cùí, te tàyáha cuàhà quivì.

⁹ Dandu nì cachi-yá xì-né:

—Ûxin ùl hora nchií orá nùù-ndà, ñâyùcàndüá mà ùhì cacanu-nda nduí, te mà cáquihì sàhà-ndà, vächì tnùù nùù-ndà ñuhivì yohó. Te ducán iá stná xì nsidaa ana datnùù ndiaha (Dios) anima-xì, (mà yúhi-nè).

¹⁰ Doco tucu iá nú xica-nda ñuu, mà ùhì nàcasàn-ndà. Te divi ducán iá stná xì nèhivì cò-dàtnùù Dios ini anima-xì.

¹¹ Na ní nsihì nì cachi-yá ducán, dandu nì cachi gá-yá xì-né:

—Quidí amigo xi-nda Lázaro. Ñâyùcàndüá, cùhin dansicuihnu inì-nè.

- 12 Dandu nì cachi nècuàchì dacuahá-yá:
—Vàtùni Stoho-ndà Señor, vâchi nú quidì uun-ne vichi, ádi vâtùni nduvâha-ne.
- 13 Ducán nì cachi-nè, vâchi tuxí ini-nè càhàn-yà sàhà ñà-quidì-ndà na quetátú-ndà; doco cóò, sàhà ñà-xihì-ndà càhàn-yà.
- 14 Ñâyùcàndüá, chicá claru nì càhàn-yà xì-né, cachí-yà:
—Cunaha-nsiá, sàni xihì Lázaro.
- 15 Te mate có-íé xì-né (na ní xihì-nè), doco vâtùni, vâchi chindeámà ñà-sàà-nsiá cunindisá ndisa-nsia. Pues vichi cùhùn-ndà ndé iá nsii ma —nì cachi-yà.
- 16 Te yucán iá stná iin nècuàchì dacuahá-yà nani Tomás. Cuatí cachí nèhivì xì-né. Te vichi nì cachi-nè xì nsidaa gá compañeru-nè:
—Cùhùn stná-ndà xì-yá, te cui-ndà.
- 17 Daaní, (nì quihin nsidaa-né ichi cuàhàn-nè xì-yá), te nì sàà-nè ñuu tii Betania ndé iá nsii ma, te nì xinitnùhu-ne sàcuàhàn-ndà cùmì quivi inácaá-ndà cueva ndé índuxin-nda.
- 18 Cunaha-nsiá, yatni iá stná ñuu cahnú Jerusalén ndé nduú ñuu tii ma, nahi dava hora caca-nda,
- 19 (te yucán ndoó cuáhà) nècuàchì raza Judea. Ñâyùcàndüá, nì casaà stná cuáhà nècuàchimà ndé iá Marta xì María, cuní-nè nacuahandee ini-nè nècuàchimà sàhà nsi-cùha-ne.
- 20 Daaní, na ní xinitnùhu Marta sàni quesaa Jesús, dandu cuàhàn-nè nànhicùn-nèyá. Doco María, nì ndòo-ne vehe.
- 21 Te na ní sàà Marta ndé iin-yá, dandu nì cachi-nè xì-yá:
—Señor mío, nú ní ía-ní yohó nì cúí, dandu mà cúí cùhe.
- 22 Doco yùhù ináhí, nsidaa ñà-ndüá nì cácan tàhvi-ní nùù Dios vichi, seguru cuàhatahvi-yá mii-ní.
- 23 Dandu nì cachi Jesús xì-né:
—Icúmi cùha-ní natiacu-nè.
- 24 Dandu nì cachi Marta xì-yá:
—Yùhù ináhí, icúmi-nè natiacu-nè na sàá xinu tiempu, te natiacu nsidaa nèhivì.
- 25 Dandu nì cachi Jesús xì-né:
—Yùhù nduú ana danátíacú xì nèhivì, te sáhatahvi stnáì vida ndiaha. Ana càhvi xí, mate sàni xihì-nè, doco icúmi-nè natiacu-nè.
- 26 Te nsidaa ana itíacú, te xiníndísá-né yùhù, mà nunca sàà-nè cui ndisa-ne. ¿A xiníndísá-ní ñà-jaàn?
- 27 Dandu nì cachi-nè xì-yá:
—Jaan, Señor mío; yùhù xiníndísê ñà-mii-ní nduu-ní Cristu Dèhemanì Dios, te ndé inga ñuhivì nì quee-ní nì quesaa-ní.
- 28 Ducán nì cachi-nè, dandu mànhùhù-né vehe-ne, te nì cana dèhé-nè cùhì-nè, cachí-nè xì nècuàchimà:
—Sàni quesaa maestro Jesús, te caná-yá mii-ní.
- 29 Ñâyùcàndüá, na ní tiacu María ñà-jaàn, dandu luegu nì ndacuiin-nè cuàhàn-nè ndé iá-yà,
- 30 vâchi tàñáha ga sàà-yà meru ini ñuu mà, iá va-ya ndé nì ndacùhun tnahá-yá xì Marta.
- 31 Daaní, nècuàchì raza Judea ndoó nacuahandee xì ini María vehe-ne, nì xini-nè na ní ndacuiin yâchì nècuàchimà cuàhàn-nè, ñâyùcàndüá, nì tenchicùn stná-nè cuàhàn-nè, cachí-nè:
—Ádi cuàhàn nècuàchì jaàn ndé índuxin nsii ñà-coo-ne cuacu-ne.
- 32 Dandu nì sàà María ndé iá Jesús. Te nì sàcuuìn sisi-né nùù-yá, cachí-nè:
—Señor mío, nú ní ía-ní yohó nì cúí, dandu mà cúí cùhe.
- 33 Daaní, na ní xini Jesús sacú María, te sacú stná nèhivì cutnâhâ xí-nè, dandu nì sàcan fuerte ini-yà, te nì cutâsi ini-yà.
- 34 Dandu nì cachi-yà xì nèhivì yucán:
—¿Índü índuxin nsii?
Te nì cachi-nè xì-yá:
—Cùhùn-ndà cundehè-ní, Stoho-nsi Señor.
- 35 Dandu nì sacú stná-yà.
- 36 Te sàháyùcàndüá nì cacachi nècuàchì raza-yà (nì quixi Jerusalén):
—Cundehè-nsiá na cuahà guá cuú ini-yà sàhà nsii ma.
- 37 Doco dava nèhivì yucán, nì (xitnùhu-ne), cachí-nè:
—Dècuèndè iin nècuàchì cuaá nì danátüi Jesús yohó nùù-xí. ¿Índü chuun mànicúì dandúvâha-ne nècuàchì nsii yohó sàhà ñà-màsà cúí-nè nì cúí? —nì cachi-nè.
- 38 Daaní, cuàhàn-yà xì-né te nì sàà nsidaa-né dècuèndè ndé índuxin nsii ma. Cueva nduá, te ndiadi iin cavá cahnú yehá. Te mii-yá, sàcan ndee ini-yà nì sàà-yà.

³⁹ Dandu ni cachi-yà xì nèhivi yucán:

—Ditá-nsià cavà jaàn.

Doco ni càhàn Marta, cùha nsi-Lázaro, cachí-nè:

—Señor mio, sàcuàhàn-ndà cùmi quìvi vichi; ádi sàsàhàn quini nsià jaàn.

⁴⁰ Dandu ni cachi-yà xì-né:

—Sàni cachí xì-ní cuisì xiñuhu cunindisá vaha-ní, dandu cuni-ní ñà-ndiaha guá quidá Dios.

⁴¹ Ñàyucàndüá, ni ditá nèhivi mà cavà ndiadí yehè cueva mà. Dandu ni ndacoto ndiaá-yà dìqui-xí, te ni cachí-yà:

—Ansivéhé-ní, Yuamáni', vachi ni inini-ní ñà-ndüá ni xicàn tàhvi nùu-ní.

⁴² Te ináhi, ducani iníni-ní yuhù na xicàn tàhvi nùu-ní, doco ducán cachí xì-ní vichi sàhà-ñá ni cúnini nèhivi itá yohó, te cunindisá-né mii-ní ñà-ndüu-ní ana ni techuun-xí vaxi

⁴³ —ni cachí-yà.

Dandu ni ndàhi ndee-yá, cachí-yà:

—¡Lázaro! ¡Quee-ní, nahà-ní!

⁴⁴ Dandu ni natiacu nècuàchi nsi ma ni quee-ne cueva, idádúcun ñi-né sicoto. Te nuhní stná ndahásàhà-né, te nùu-né, idàhvi stná iin sicoto. Dandu ni dandácú-yá nùu nèhivi itá yucán, cachí-yà:

—Nacani-nsiànè, te ni cacá-né —ni cachí-yà.

Nansa ni ndatnuhu tnahá nèhivi ñà-tnii-ne Jesús, te cahni-nèyà

⁴⁵ Ñàyucàndüá, cuàhà nècuàchi raza Judea yucán, ni xinindisá stná-nèyà na ní xini-nè nansa ni quida-ya. Divi nèhivi ni sàhàn vehe María nàcòtò xì nècuàchima xínduu-ne.

⁴⁶ Doco dava ga nèhivi yucán, mànuhù-né, te ni cachitnùu-ne xì nècuàchi fariseu nansa ni quida-ya.

⁴⁷ Ñàyucàndüá, ni nataca nècuàchima xì dùtù xícusahnú, te ni ndatnuhu tnahá-né, cachí-nè:

—¿Ndíà quida-nda? vachi cuàhà gá milagru quidá Jesús.

⁴⁸ Te nú ni nácóo uun-ndané, dandu icúmí nsidaa nèhivi cunindisá-né nècuàchima. Te nú ducán, dandu caquixi tè-romanu, dacaá-te veheñùhu xi-nda, te dandutu stná-te nsidaa-nda ñuu-ndà yohó —ni cachí-né.

⁴⁹ Dandu ni càhàn iin tiàa nani Caifás, divi nècuàchi nduú dùtù cusáhnú cuià yucán. Te dohó ni cachí-nè:

—Mii-nsiá, có-cùndáà ini-nsiá.

⁵⁰ Có-sànihì inì-nsiá ñà-nùu ndohó chicá vaha quea nú ni cuí imindaa nèhivi sàhà ñuu-ndà yohó, te màdiá ndañuhu nsidaa-nda —ni cachí-né.

⁵¹ Doco Caifás mà, màdi inì-ni mii-né ni chitnùnì inì-nè cachí-nè ducán; cóo, vachi sàhà-ñá nduú-né dùtù cusáhnú cuià yucán, ñàyucàndüá Dios ni dàchitnùnì ini-yànè cachí-nè ducán sàhà Jesús ñà-icúmí-yá cui-yá sàhà nèhivi ñuu-yà.

⁵² Te màdi cuisì sàhà nèhivi ñuu-yà. Cóo, vachi icúmí stná-yá cundaca-ya nsidaa nèhivi nduú dèhe ndisa Dios, te danátacá-yànè ñà-cundoo-ne iin-ni cahnú-ní, mate vichi xíndoo-ne inicutu ñuhiví.

⁵³ Cunaha-nsiá, ndè quìvi yucán ni quesaha tè-xídandacú ñuu mà ndatnuhu stnahá-te nansa quida-tè ñà-cahni-téyá.

⁵⁴ Ñàyucàndüá, cóni xicanuu vate gá-yá mahi nèhivi raza-yá yucán, cóo. Ni quee-ya cuàhàn-yá inga ñuu nani Efraim, iin ñuu indúhu yatni ndé nduú puru yucú. Te yucán ni là chíi-yá xì nècuàchi dacuahá-yá.

⁵⁵ Daaní, quìvi yucán sà-itúú nacava iin vicò nani vicò pascua, nduámà iin vicò siempre nsidacáhnú nècuàchi raza Judea yucán. Ñàyucàndüá, cuàhà nèhivi ni quee ñuu cuati vaxi ñuu Jerusalén sàhà ñà-nduhii-né antes sàà vicò mà.

⁵⁶ Te itá nècuàchima veheñùhu cahnú ndatnúhú-né, ndacàtnùhù stnahá-né nùu-né a quixi stná Jesús vicò mà, á cóo, cachí-né iin-ne xì inga-né:

—¿Nansa tuxí inì-nsiá? ¿A quixi-ne, á cóo? Ádi mà quíxí-né cahan-nsí.

⁵⁷ Cunaha-nsiá, sàni quee iin orden nùu dùtù xícusahnú, xì nùu nècuàchi fariseu, cachí-né xì nsidaa nèhivi ñà-icúmí-né cachitnùu-ne índú iá-yá, nú ináhà-né, sàhà-ñá cùhùn nècuàchima tñii-nèyá.

12

Nansa ni quida iin nècuàchi ñahà, ni dàcùchí-né sàhà Jesús xì tàtmà tñami

¹ Daaní, cumáni gá iñù quìvi cunduu vicò pascua, dandu ni sàà Jesús ñuu tii Betania, divi ñuu ndé iá nècuàchi ni danátiacú-yá nani Lázaro.

² Te ñuu mà nì quida stná nèhivi iin vicò tii sàhà-ñá cundoo-ne cuxi-ne xì-yá. Te vicò mà nì chindee stná Marta, nì quida-ne chuun yuhùnùhú. Te iá stná Lázaro yucán mahì nèhivi cutnáhá xí-yá xixí-yá.

³ Daaní, nì sàà stná María yucán, nihí-né dava litro ñà-tnami nani nardo, finu cuàhà-té, te yàhvi gà-te. Te nì dàcùchí-nète sàhà-yá, dandu nì nacuaaha-nète xi ididíni-né. Te inicutu vehe nì nacutu dico tnami-té.

⁴ Doco yucán iá stná iin nècuàchì dacuahá-yá nani Judas Iscariote, divi dèhe Simón, te nduú stná-nè tiàa icúmí dicò xì-yá después. Te dohó nì cachi-nè:

⁵ —¿Índù chuun cóni cùyàhvi ñà-tnami jaàn chicá vaha ni cui? Vàchi vátuni tui ùni cientu dihùn plata sàhà ñà-jaàn, te dasàn-ndañá nùù nècuàchì ndahví.

⁶ Ducán nì cachi nècuàchìmah, doco màdi cuiis mi-yá cuní-nè cundehè-né, cóo. Stná Lázaro cuní-nè cundehè-né, vàchi iin nècuàchì cuinhà nduú-né. Te ndahà-né iá itni dihùn xí nsidaa nècuàchìmah, te tùha stná-nè cuida cuinhà-né dihùn ñuhuma.

⁷ Ñàyùcàndüá, nì cachi Jesús xì-né:

—Nacoo-nì nècuàchì ñahà yohó, vàchi sàhà-ñá sà-itúú quivì cundùxin, ñàyùcàndüá nì chivàha-ne ñà-tnami yohó, te vichi nì xichuún-néa.

⁸ Nècuàchì ndahví, nicanicuahàn ndoó-né yohó, doco yùhù, cóo, sacù-ni quivì ié xì-nsiá —nì cachi-yà.

Nansa nì ndatnuhu tnahá nèhivi ñà-cahni stná-nè Lázaro

⁹ Daaní, cuàhà gá stná nècuàchì raza Judea, nì sàà stná-nè ñuu tii Betania mà na ní xinitnùhu-ne yucán iá-yá. Doco màdi cuiis mi-yá cuní-nè cundehè-né, cóo. Stná Lázaro cuní-nè cundehè-né, vàchi sàni natiacu nècuàchìmah.

¹⁰ Ñàyùcàndüá, dècuèndè stná nècuàchìmah cuní stná dùtù xicusahnú cahni-né, te sàhámà nì quesaha-né ndatnùhú tnahá-né (nansa quida-ne).

¹¹ Vàchi sàhà Lázaro cuàhà nèhivi ladu Judea mà cuní-né yàha-ne ladu xi Jesús ñà-cunindisá stná-nèyà.

Nansa nì sàà Jesús ñuu Jerusalén

¹² Daaní, nì yàha inga quivì. Te nèhivi cuàhà sàni quesaa ñuu Jerusalén chivàha xi vicò mà, nì xinitnùhu-ne ñà-icúmí Jesús quesaa stná-yá.

¹³ Ñàyùcàndüá, nì sahnde-nè ndahà nù-ñuú, te nihí-nènu nì quee-ne cuàhàn-nè dècuèndè ndé vàxi-ya, cána ndee nsidaa-né, cachi-nè:

—¡Viva! ¡Ndiaha gá nècuàchì yohó, vàchi cuenta xi Stoho-ndà Señor vàxi-ne! ¡Ndiaha gá-né, vàchi cuàhàn-nè cusahnú-né nùù ñuu-ndà Israel!

¹⁴ Dandu nì tui iin burru chii, te nì sàcùnùú-yá yàtà-sí. Ducán nì quida-ya, vàchi dohó cachi nùù tutu ì:

¹⁵ Mii-nsiá nèhivi ñuu Sión yohó, màsà yúhí-nsiá, vàchi icúmí quesaa mii-yá ana cusahnú nùù-nsiá, cuindànùú-yá iin burru chii —cachi tutu mà.

¹⁶ Doco nècuàchì dacuahá-yá, có-ináhà-né ñà-sàhà mii-yá cachi tutu ì ducán. Cuisi dècuèndè después na sàni nanihì-yá tñùñuhu ndiaha xí-yá, dandu nì nsinuu ini-nè, ndisa, ducán cachi tutu mà, te divi ducán nì chindee stná-nèyà, (te nì quida ndisa-ya) nsidaamá.

¹⁷⁻¹⁸ Pues vichi sàni ndecoyo cuàhà nèhivi (ñuu mà) nánchicùn xì-yá, vàchi sàni xinitnùhu-ne sàhà milagru cahnú nì quida-ya na ní cana-ya Lázaro nì quee-ne sepultura nì natiacu-nè. Vàchi nèhivi nì xini xì milagru mà, sàni dàcuítia-nè cuentu inicutu.

¹⁹ Daaní nì xini nècuàchì fariseu ñà-cuàhà guá nèhivi nì ndecoyo, te nì ndatnuhu tnahá-né entre mii-né, cachi-né:

—Jaàn xini-nsiá ni-iyuhu có-quidà-ndà ganar! Cundehè-nsiá, nsidanicuú nèhivi nchicùn xi Jesús vichi.

Nansa nì quixi nècuàchì raza Grecia nandúcu-nè Jesús

²⁰ Daaní, vicò mà nì sàà stná itnii nècuàchì ñuu Grecia ñà-cahvi-né Dios vicò mà.

²¹ Te nì tñàtuu-ne nùù Felipe, iin nècuàchì ñuu Betsaida iá ladu Galilea, te nì cachi-nè xi nècuàchìmah:

—Señor, cuní-nsi càhàn-nsi xi Jesús.

²² Dandu nì sàhàn Felipe nì cachitnùhu-ne xi Andrés, dandu nduú-nè cuàhàn-nè nùù mii-yá, te nì cachi-nè xì-yá sàhà nècuàchì ñuu Grecia mà.

²³ Dandu nì naxiconihí-yá nùù-né, cachi-yá:

—Vichi sàni sàà quivì nanihì tñùñuhu ndiaha xí, divi yùhù ana nduú Tnahà Nèhivi Ñuhivì.

²⁴ Cunini-nsia palabra ndàcuisi yohó: nú (cuhí ini-ndà) iin nùni, te sàhámà có-chihì-ndañá, dandu imindaa nùni cundua nicanicuahàn. Doco nú sàni chihì-ndañá, dandísá icúmíá nducuahà.

²⁵ Pues ducán iá stná xì vida xì nèhivì. Nú cuhí gà ini-nè vida xi-ne ñuhivì yohó, dandu icúmíá ndañuhu dahuan. Doco nú có-cùhì ini-nèà, dandu nicanicuahàn cucumi-né vida ndiaha.

²⁶ Te nú nduú ndisa-ne iin ana xinúcuáchì nù, dandu ni cúnchicùn-nè yùhù, te ndéni ni cui ni sà, yucán icúmí sàà stná nècuàchìmà cutnahá-né xí. Te nsidaa ana xinúcuáchì nù, icúmí Yuamání quidañuhu-yánè.

²⁷ Vichi yáha ga nacání cuáhà inì. Doco ¿a cuáhìn càquin nù Yuamání ñà-nì dácàcu-ya yùhù nù ñà-nduá icúmí cuu xí vichi? Còò, vàchi divì sàhà ñà-nì cùu-xí ducán nduá ni quesai ñuhivì.

²⁸ Te vichi dohó cachí xì Yuamání: “Tavà-ní tñùñuhu xí-ní cundehè nèhivì”.

Dandu ni tiacu tàchi ana càhàn ansivi, cachí-yà:

—Sàni tavì tñùñuhu xí, doco más gà-ñà icúmí quee nù nèhivì quivì nù-xí.

²⁹ Ñàyùcànduá, nèhivì itá yucán, na ní tiacu-nè tàchi-yá, ni cachi-nè:

—Dàvì ní càhàn.

Te dava ga-nè ni cachi-nè:

—Ádi ángel ni càhàn xì Jesús.

³⁰ Dandu ni cachi-yá xì-né:

—Màdi sàhà yùhù ni càhàn Dios ndè ansivi ni tiacu-nsiá; sàhà mii-nsiá nduá ni càhàn-yà.

³¹ Cunaha-nsiá, sà-itúu ndundaà sàhà nsidaa ñà-có-ndiàà ñuhivì yohó. Te vichi icúmí Dios tavá-yá quisi dandacú nù ñuhivì yohó.

³² Daaní, nú sàni chituu ducún nèhivì yùhù, dandu icúmí danátàquì cuáhà nèhivì nù.

³³ Palabra mà ni cachi-yá nahi ejemplu sàhà-ñà cundaà ini-ndà indù modo icúmí nèhivì cahni-néyà (nchica cruz).

³⁴ Dandu ni cachi nèhivì cuáhà mà xì-yá:

—Nsiùhù, sàni inini-nsi ni cahvi-ne nù ley ì ndé cachá: “Nicanicuahàn icúmí coo mii-yá nani Cristu”. Doco mii-ní, cachí-ní ñà-icúmí nèhivì dananá ducún-nè mii-ní, (te cui-ní). Te cachí stná-ní ñà-nduú-ní Tnaha Nèhivì Ñuhivì. Pues ¿nansa iá (chuun quidá) iin ana nduú Tnaha Nèhivì Ñuhivì?

³⁵ Dandu ni cachi Jesús xì-né:

—Iyuhu nduú tiempu cuàhàn cutnuú ndiaha luz (xi Dios) mahi-nsiá. Ñàyùcànduá, nacua datnúu ndiaha-yá nù-nsiá, ducán quida ndisa-nsia cumplir vichi, vàchi (vaxi iin quivì) vihini cuxio nsidaamá, te ndé cui si ichi ñaa ndòo nù-nsiá. Cunaha-nsiá, nú ni cacá iin nèhivì ichi ñaa, mà có-cundáà tñunì ini-nè indù nù-xí sàà-nè.

³⁶ Doco vichi nduú meru hora datnúu ndiaha-yá luz (xi-ya) nù-nsiá, ñàyùcànduá cunindisá-nsiá sàhà-ñà sàà-nsiá cunduu-nsia dèhe mii-yá ana datnúu ndiaha xi-nsiá —ni cachi-yá.

Dandu ni quecuaán-yá iin xaan ndé mà ndácùhun nècuàchìmà-yá.

Nansa ni cahichì ini nècuàchì ñuu Jesús mii-yá

³⁷ Mate cuáhà milagru nahnú ni quida-ya ni xini nèhivì, doco cóni sàà-nè cunindisá-néyà.

³⁸⁻³⁹ Te ducán ni cuu ndisa ñà-nduá ni tiaa profeta sàhana nani Isaiás, vàchi dohó ni cachitnùhu ndómà:

Stoho-nsi Señor, sacu nèhivì ni xinindisá ñà-nduá ni cachi-nsi xì-né, mate cuáhà gà sàni quida-ní milagru fuerte, ni cachi ndómà.

Ñàyùcànduá, mànicúí gá cunindisá nèhivì (raza-yà), vàchi dohó ni tiaa stná Isaiás mà (ñà-nduá ni cachi Dios) sàhà-né:

⁴⁰ Sàni dàcuàí anima-nè, te quidámáxiní-nè quidé. Ñàyùcànduá, có-cunì-nè cundehè-né ichi yùhù, ni có-cunì stná-nè mànihì ini-nè, ni có-cunì stná-nè natnahnù-nè (ichi vàha), te ducán nsida vii' anima-nè, ni cachi-yá.

⁴¹ Ñà-jaàn nduá ni tiaa Isaiás sàhana na ní xini ndómà seña xi Dios ñà-ndiaha guá cuàhàn quida Jesús, te ni cachitnùhu-nda sàhámà.

⁴² Doco cunaha-nsiá, cuáhà gà stná nèhivì raza-yà ni xinindisá stná-néyà, dècuèndè stná cuáhà nècuàchì dandacú. Doco cóni càchì vate-né ñà-jaàn, vàchi ni yuhì-nè (cuidà ini) nècuàchì fariseu-nè, te mà cóó gá permisú cùhùn-nè veheñùhu.

⁴³ Vàchi chicá ni cudii ini-nè ndee vàha-ne nù nèhivì ñuhivì, te màdi nù Dios.

Nansa icúmí palabra ni cachi Jesús nsidandaà sàhà cuàchi nèhivì ñuhivì

⁴⁴ Daaní, ni ndàhi ndee Jesús, cachí-yà:

—Nú xinindisá nèhivì yùhù, màdi cui si yùhù xinindisá-né; còò. Stná mii-yá ana ni techuun-xí vaxi xinindisá stná-nè.

⁴⁵ Te nú indèhe-né yùhù, dandu indèhe stná-nè ana ni techuun-xí vaxi.

⁴⁶ Cunaha-nsiá, sàhà-ñà datnúi nùu nèhivi ichì cùhùn-nè, ñàyùcàndüá nì quesai ñuhiví yohó, dandu nsidaa ana xiníndisá xí, mà cáca gá-nè ichì ñáa.

⁴⁷⁻⁴⁸ Te nú cundáa ini iin nèhivi ñà-ndüá cachí, te có-chívàha-neà, dandu icúmí ndundaà sàhà cuàchi-ne, te nihì-né castigu. Doco màdi yùhù icúmí nsidandaà xì sàhà-né. Còó, vàchi màdi sàhà-ñà dandohí nèhivi nì quesai ñuhiví yohó. Còó; sàhà-ñà càcu-ne nì quesai. Divi palabra sàni cachì icúmí nsidandaà sàhà cuàchi nèhivi cahìchi ini-xì, te có-càndisá-né ñà-ndüá cachí. Icúmí palabra mà cachà nansa nihì-né castigu na sáa xìnu tiempu.

⁴⁹ Nsidaa ñà-ndüá sàni cachì xì-nsiá, màdi òni mii nì queá; còó, divi Yuamáni' nduu ana nì sàcùnahí nùu-xì; divi mii-yá nì cachì-yá xí ñà-ndüá cuní-yá cachì xì-nsiá.

⁵⁰ Te ináhi, nú nì cúníndisá-nsiá ñà-ndüá dandacú-yá, dandu vida ndiaha cucumi-nsiá nicanicuaàn. Ñàyùcàndüá, nacua sàni cachì-yá xí, divi ñà-jaàn nduá cachí xì-nsiá —nì cachì Jesús.

13

Nansa nì nacate Jesús sàhà nècuàchi dacuahá-yá

¹ Daaní, nì sàa vigilia vicò pascua, te ináha Jesús sà-irúu stná quivi icúmí-yá quee-ya ñuhiví yohó nùhù-yá ndé iá Yuamáni-yá. Te cunaha-nsiá, cuú cuàhà ini-yá sàhà nèhivi xí-yá ndoo ñuhiví yohó, ñàyùcàndüá nì (quida-ya ináha ñà-cundaà ini-ndà) yáha ga cuú cuàhà ini-yá sàhà-ndà.

² (Vàchi divi ñuu vigilia mà) iá-yá cudíní-yá xì (nèhivi xí-yá). Doco iin nècuàchimà nani Judas Iscariote, divi òhe Simón, sànihnú ini-nè cahin-nèyà (nùu tè-xíandacú), vàchi ducán nì dānācāni ini ñà-malu-nè quida-ne.

³ Te mii-yá, ináha stná-yá sàni chitnùnì ini Yuamáni-yá ñà-dandacú-yá nùu nsidanicuú ináha, te ináha stná-yá ñà-nùu Yuamáni-yá nì quixi-ya, te después nùhù-yá.

⁴ Ñàyùcàndüá, nì nacoo-ya ñà-xixí-yá, te nì ndacuiin-yá, nì tavà-yá dùhnù quihín-yá, te nì chicuñi nihni-ya iin sicoto caní tixi-ya.

⁵ Daaní, nì tni-yá iin tina, te nì dàchitù-yáñà tècuí, dandu nì quesaha-yá nacaté-yá sàhà nècuàchi dacuahá-yá, te después nì nsida ichí-yàñà xì sicoto caní-ma.

⁶ Te na ní sàa-yá ndé iá Simón Pedro, dandu nì cachì-nè xì-yá:

—¿A ndisa cuní-nì nacate-ní sàhí, Señor mío?

⁷ Te nì cachì-yá xì-né:

—Vichi có-sànihi ini-ní índù ináha nduá cuàhìn quide xì-ní, doco vaxi iin quivi, dandu sàa-ní cundaà vaha ini-ní.

⁸ Dandu nì cachì-nè xì-yá:

—¡Còó! ¡Mà nunca cuàhi nacate-ní sàhí!

Te nì cachì tu-ya xì-né:

—Nú màsà nácátí sàhà-ní, mà cúí cunduu-ní nèhivi xí.

⁹ Te nì cachì tu-ne xì-yá:

—Señor mío, nú ducán nduá, dandu nacate stná-ní ndahí xì òni, te màdià cuisì sàhí.

¹⁰ Dandu nì cachì-yá xì-né:

—Cunaha-ní, nú làcà nì xichi iin nèhivi, còó necesidad cuchi tu-ne, vàchi sà-lá ndoo inicutu icà-né, cuisì sàhà-né (cúdi), te ñà-jaàn xiñuhu ndoo. Te ducán iá stná xì mii-nsiá vichi, sàni ndoo vaha dahuun anima-nsiá. Doco màdi nsidaa-nsiá iá ndoo-nsiá.

¹¹ Ducán nì cachì-yá, vàchi ináha-yá ana cuàhàn dicò xì-yá, ñàyùcàndüá nì cachì-yá: “Màdi nsidaa-nsiá iá ndoo-nsiá”.

¹² Daaní, nì nsìhi nì nacate-ya sàhà-né, dandu nì nàcùndixi-ya dùhnù quihín-yá, te nì sàcòo-ya. Te nì cachì-yá xì-né:

—¿A cundáa ini-nsiá índù chuun nì quide xì-nsiá ducán?

¹³ Pues Maestro cachì-nsiá xí, te Stoho-nsì Señor cachì stná-nsiá xí. Te vātùnì iámà, vàchi divi nduí.

¹⁴ Doco cunaha-nsiá, mate maestru xì-nsiá nduí, te stoho-nsiá nduí, doco nì nacati sàhà-nsiá. Ñàyùcàndüá, stná mii-nsiá ndiá icà-nsiá nacate stnahá stná-nsiá sàhà-nsiá.

¹⁵ Vàchi nacua nì quide xì mii-nsiá, divi ducán xiñuhu quida stná-nsiá.

¹⁶ Ñà-ndáa nduá cachí xì-nsiá yohó: màsà cútúxí ini iin peón ñà-chicá ndiáá-te nùu lamú xì-tè. Stná iin tè-nihì-xì iin razón, màsà cútúxí ini-te ñà-chicá ndiáá-te nùu ana nì techuun-xì-tè xì razón mà.

¹⁷ Ñàyùcàndüá, nú sàni cundaà vaha ini-nsiá ñà-ndáa nduá sàni cachì xì-nsiá, te quida ndisa-nsiá cumplir, dandu ndiaha gá cundoo-nsiá.

¹⁸ Doco có-càhin sàhà nsidaa-nsiá. Yùhù ináhi índù nèhivi sàni nacàxin. Te nacua nì cachitnùhu nùu tutu ò, ducán ndisa sàni cuu xí, vàchi dohó cachá: “Iin tiàa cutnàhà xí na xixí, divi nduú ana sàni nanduu ana xini ùhì xí”.

¹⁹ Yùhù, tàñàha ga yàhi tñùndoho icúmí cuu xí, doco sàni cachitnùhi xì-nsiá sàhà-ñà, dandu na sàà cuu ducán, icúmí-nsiá cunindisá-nsiá ñà-divi yùhù nduú mii-yá.

²⁰ Ñà-ndácuisi nduá yohó cachí xì-nsiá: nú xiníndisá nèhivi iin ana ni techuín, dandu queámà na ian sàni xinindisá stná-nè yùhù. Te nú ducán xiníndisá-nè yùhù, dandu cuní cachámà xiníndisá stná-nè mii-yá ni techuun-xí vaxi

²¹ —ni cachi-yà.

Nansa ni cachi Jesús ñà-divi Judas icúmí quida xi-yá entregar

Dandu ni quesaha-yá cuhúun cuáhà ini-yá, te ni cachitnùhu-ya xì nèhivi xí-yá yucán:

—Cunaha-nsiá, iá iin-nsia cuàhàn cahin xí.

²² Ñàyúcandüà ni quesaha nsidaa nècuàchimà indéhe stnahá-nè nùù-nè, nacání ini-nè ana divi cáhàn-yà sàhà-xí cahan-nè.

²³ Te yatni uun diin-yá iá iin nècuàchì màni guá nùù-yá.

²⁴ Ñàyúcandüà, ni quida Pedro iin seña nùù nècuàchimà ñà-ni ndácàtnùhù-nè nùù-yá ana divi cáhàn-yà sàhà-xí.

²⁵ Dandu nècuàchimà, chicá ni cuyatni-ne nùù-yá, te ni cachi-nè xì-yá:

—Señor mío, ¿ana divi nduú tiàa cachí-ní?

²⁶ Dandu ni cachi-yà xì-né:

—Cuàhìn dandaxín iyuhu pan, te ana cuàhi, divi nècuàchì jaàn nduú-nè.

Dandu ni dándaxín-yá pan mà, te ni sàha-ya Judas Iscariote, divi dèhe Simón.

²⁷ Te na ní tniì nècuàchimà pan mà, dandu ni quìhvi ñà-malu Satanás ini anima-nè. Dandu ni cachi-yà xì-né:

—Ñà-nduá cuàhàn-ní quida-ní, yàchì quida-niá.

²⁸ Doco nèhivi dava ga cutnàhá xí-yá yucán, cóni cundáa ini-nè indù chuun ni cachi-yá palabra mà xì nècuàchimà.

²⁹ Dava-ne, ni tuxi ini-nè ni cachi-yá ducán sàhà ñà-nduú nècuàchimà ana ndiaá xì dihùn xí nsidaa-né, te ádi iá iñàha cùhùn-nè cuiin-ne ñà-nducahnú vicò, te ò cùhùn-nè dasàn-né dihùn nùù nècuàchì ndahví cahan-nè, (doco còò).

³⁰ Daaní, na ní nsihi ni tniì Judas mà pan mà, dandu vichi vichi ni quee-ne cuàhàn-nè; te ñuú nduá.

Ñà-nduú palabra saa ni dándacú Jesús nùù-ndà

³¹ Na sàcuàhàn Judas, dandu ni cachi Jesús:

—Yùhù ana nduú Tnaha Nèhivi Ñuhiví, vichi sàni nihì ndise tñùñuhu xí, te sàhà stná yùhù icúmí quee ga stná tñùñuhu xí (Yuamáni) Dios.

³² Ñàyúcandüà, nú sàhà yùhù chicá coo tñùñuhu xí-yá, dandu stná yùhù nihì gá stnáí más tñùñuhu quida-ya; te yàchì icúmí-yá quida-ya ducán.

³³ Hijos, làcà iyuhu-ní coo guè xì-nsiá yohó. Vàchi nacua ni cachi xì nècuàchì raza-ndà Judea daa, ñà-jaàn nduá cachí stnáí xì mii-nsiá vichi, icúmí-nsiá nanducu-nsiá yùhù, doco lugar ndé cùhìn mà-cúí sàà-nsiá.

³⁴ Te vichi dandacuí iin ley saa chivàha-nsia, divi ñà-cuu stnahá ini-nsiá sàhà-nsiá, ñà-jaàn nduá dandacuí; nacua cuú cuáhà ini sàhà mii-nsiá, divi ducán xiñuhu cuu stnahá stná ini-nsiá sàhà-nsiá.

³⁵ Vàchi nú ni cuú stnahá ini-nsiá sàhà-nsiá, dandu sàhájàn vátuni cundaà ini nsidaa nèhivi ñà-divi nèhivi xí yùhù nduú-nsiá.

Nansa ni cachitnùhu Jesús ñà-icúmí Pedro nacuaà-néyà

³⁶ Dandu ni cachi Simón Pedro xí-yá:

—Señor mío, ¿indüví cùhùn-ní?

Dandu ni cachi-yà xì-né:

—Vichi mà cúí cutnaha-ní xí cùhùn indù icúmí cùhìn. Doco después, dandu icúmí stná-ní sàà-ní yucán.

³⁷ Dandu ni cachi-nè xì-yá:

—Señor mío, ¿indù chuun mà cúí cutnahá stnáí xì-ní cùhùn vichi? Vàchi cunaha-ní, dispuestu ié' cui sàhà-ní.

³⁸ Dandu ni cachi-yà xì-né:

—¿A ndisa dispuestu iá-ní cuí-ní sàhì cahan-ní? Yùhù cachí xì-ní, te ñà-ndàà nduá, tàñàha ga coto lehe, te sàni nacuaà-ní yùhù ùni xichi.

14

Ñà-nduá ni cachi Jesús xì nèhivi xí-yá ñà-mii-yá nduú-yá ichì sàà-ndà nùù Yua-nda Dios

¹ Màsà nacání gá ini-nsiá; cuiisì cunihnu ini-nsiá Dios, te cunihnu stná ini-nsiá yùhù.

² Ini vehe cahnú Yuamání' íá cuàhà gá lugar ndé cundoo-nda. Te nú màdi ñà-ndáa nduájàn, dandu sàni cachi xi-nsiá ni cui. Doco icúmí codònú nù-nsiá cùhìn sàhà ñà-quida vii' ndé cundoo stná-nsiá xi'.

³ Daaní, na nsihi quideamà, dandu icúmí naxicocuñin nàcuàqui mii-nsiá nùhù-ndà sàhà-ñà cutnaha-nda cundoo-nda yucán.

⁴ Te lugar yucán, sàcundàa ini-nsia ìndù íá', te sàcundàa stná ini-nsia ìndù ichi sàa yucán.

⁵ Dandu ni cachi Tomás xi-yá:

—Señor mío, có-ínahá-nsí ichi mà, vèchi có-cundàa ini-nsi ìndù cùhùn-ní.

⁶ Dandu ni cachi Jesús xi-né:

—Yùhù nduí ichi mà, te nduú stnáí ñà-ndácuisi, te nduú stnáí ana (sàha xi) vida ndiaha. Nú màdi sàhà yùhù, còò ìin sàa nù Yuamání'.

⁷ Doco nú inahá-nsiá yùhù, dandu inahá stná-nsiá mii-yá. Ñàyucànduá, vichi sàni xini-nsiàyà, te sà-ínahá stná-nsiàyà.

⁸ Dandu ni cachi Felipe xi-yá:

—Señor mío, cuní-nsi cundehè-nsí Yua-nda Dios, dandu ndòo vaha ini-nsi.

⁹ Dandu ni cachi-yà xi-né:

—Sàcuàhà gá tiempu ié' cutnàhí xi-nsiá, te ¿a táñaha ga nacuni-ní yùhù, Felipe? Cunaha-ní, nú sàni xini-nsiá yùhù, dandu ñà-sàni xini stná-nsiá Yuamání' nduá, te còò cá necesidad cachi-ní ñà-cuní-nsiá cundehè-nsiàyà.

¹⁰ Ádi sá-xiníndisá-ní ñà-ñùhù saín vida xi ini Yuamání', te ñuhù stná vida xi-ya ini yùhù. (Pues divi ducán nduá, te sàhámà) nsidaa ñà-nduá cachí' xi-nsiá, màdiá ini-ní mii ndacú ìnià, vèchi ini animè íá Yuamání', te divi-ya nduú ana quidà-xi obra ndiaha xi-yá (xini-nsiá).

¹¹ Cunindisá-nsiá ñà-ñùhù vida xi ini mii-yá, te íá stna vida xi-ya ini yùhù. Te nú có-xiníndisá-nsiá mate sàni cachi xi-nsiá ducán, doco siquiera cunindisá-nsiá ñà-sàni xini-nsiá milagru ndiaha ni quide.

¹² Ñà-ndáa nduá cachí' xi-nsiá yohó: nú xiníndisá ndisa iin nèhivi yùhù, dandu vātùni quida stná-nè milagru nahi ñà-nduá quidé. Dècuèndè milagru chicá fuerte vātùni quida stná-nè, vèchi icúmí nùhì ndé íá Yuamání'.

¹³ Te nsidaa ñà-nduá ni cacán tãhvi-nsiá, te ndacùcahan-nsiá quiví, icúmí quideà, dandu chicá más nihi Yuamání' tñũhuhu xi-yá sàhà yùhù ana nduú Dèhemaní-yá.

¹⁴ Ndéni iñaha ni cui ni cacán tãhvi-nsiá, te ndacùcahan-nsiá quiví, quideà.

Nansa ni quida Jesús comprometer techuún-yá Espíritu Ìi xi-yá quixi

¹⁵ Nú cuú ndisa ini-nsiá sàhí, dandu icúmí-nsiá chivàha-nsia ñà-nduá dandacuí nù-nsiá.

¹⁶ Ícúmí cacán tãhvi stnáí nù Yuamání', dandu techuún-yá inga ana quixi chindee xi-nsiá, te Yà-ìcúmí quixi ma, nicanicuahàn icúmí-yá coo-ya cutnahá-yá xi-nsiá.

¹⁷ Divi Espíritu Ìi xí Dios nduú-yá, te cuisí ñà-ndácuisi cachí-yá. Nèhivi dava ga ñuhiví yohó, mà cúí nihi-né Yà-ì mà, vèchi có-tuú-yá nù-ndé, te ni có-ínahá stná-nèyà. Doco mii-nsiá, sà-ínahá-nsiàyà, vèchi sà-ìá-yá cutnàhà-yá xi-nsiá, te después, icúmí-yá yàha-ya ini anima-nsiá coo-ya nicanicuahàn.

¹⁸ Yùhù, mà cuáhi ndòo penchi-nsiá, vèchi icúmí naxicocuñin ñà-coi xi-nsiá.

¹⁹ 'Làcà sacu tiempu, dandu mà cúní gá nèhivi ñuhiví yùhù. Doco mii-nsiá, jaan. Vātùni cuní-nsiá yùhù. Ìin-ni itiácuí, te sàhà ñà-itiácuí, ñàyucànduá ìin-ni cutiacu stná mii-nsiá.

²⁰ Na sàa quiví yucán, dandu cundaa vaha ini-nsia ñà-ìin-ní nduí xi Yuamání', te cundaa stná ini-nsia ñà-sà-ìá stná mii-nsiá ini animè, te yùhù, ini anima mii-nsiá íá stnáí.

²¹ 'Ana inahá xí ñà-nduá dandacuí, te quidá-néà cumplir, divi nècuàchimà nduú ana cuú ndisa ini-xi sàhí. Daaní, nú cuú ini-nè sàhí, icúmí Yuamání' cuu stná ini-yá sàhà-né, te stná yùhù, cuu stná ini sàhà mii-né, te datú nansa nduú modo xi nù-ndé.

²² Daaní, ni càhàn Judas xi-yá, (doco inga Judas), màdi Judas Iscariote, te dohó ni cachi-nè xi-yá:

—Señor mío, ¿ìndù chuun cuisí nù nsiùhù icúmí-ní datú-ní nansa nduú modo xi-ní? ¿Ìndù chuun mà quidá-ní ducán xi dava ga nèhivi ñuhiví?

²³ Dandu ni cachi Jesús xi-né:

—Nèhivi cuú ini-xi sàhí, tùha-ne chivàha-ne ñà-nduá cachí' xi-né. Dandu Yuamání', icúmí stná-yá cuu ini-yá sàhà-né, te sàà-nsi nù-ndé ñà-cundoo-nsi ini anima iin ìin-ne.

²⁴ Doco nècuàchì có-cuú ini-xi sàhí, có-chivàha-ne ñà-nduá cachí'. Te ñà-nduá cachí' xi-nsiá, màdi ini-ní mii ndacú ini cachi ñà-jaàn. Còò, Yuamání' nduú ana chítñuní ini-xi ñà-nduá cachí' xi-nsiá.

²⁵ 'Cunaha-nsiá, nsidaa ñà-jaàn sàni cachi xi-nsiá mientras íá ve xi-nsiá yohó.

²⁶ Doco iá inga ana cuàhàn chindee xi-nsiá, divi nduú Espíritu ìi icúmí Yuamáni' techuún quixi cuenta xi. Te Yà-ìi mà, icúmí-yà chinaha-yà mii-nsiá nsidaa iñàha, te dansínúú ini-yà mii-nsiá nsidaa ñà-nduá sàni cachì xi-nsiá.

²⁷ 'Mate cùhìn, doco sàhà yùhù vātūni cundoo-nsia contentu, divi nacua ié' contentu, ducán sáhatahvi stnài mii-nsiá ñà-cundoo stnà-nsià contentu. Mà quidé na quidá nēhivì ñuhivì yohó, diin modo ndoó dū-né. Còó, màsà nácáni ini-nsià sàhà ni-iñàha, ni màsà yúhí-nsià.

²⁸ Vichì sàni inini-nsia nì cachì ñà-icúmí nùhù xìqué, dandu naxicocuñ. Te nú ni cuú vaha ini-nsià sàhì nì cùì, dandísà cudíì gá inì-nsia ñà-nì cachì icúmí nùhì ndé iá Yuamáni', vachi chícá dandacú mii-yá.

²⁹ Cunaha-nsiá, sàni cachitnùhì xi-nsiá palabra yohó sàhà ñà-nduá cuàhàn cuu después, dandu quivì cuu ndisa nacua sàni cachì xi-nsiá, vātūni cunindísà víi-gá-nsià.

³⁰ 'Pues vichì, mà càhàn cuàhà gué' xi-nsiá, vachi sà-vàxi mii-sí dandacu-xi nùè nēhivì ñuhivì yohó, te còò ni-iñàha nduú-si xi yùhù.

³¹ Doco ñà-nduá cuàhìn quide, cuàhìn quideà sàhà ñà-cundaà ini nēhivì ñuhivì ñà-cuú ndisa inì sàhà Yuamáni', te cunì quidandise ñà-nduá nì dandacú-yá nùì. Ñàyücànduá, ndacuita-nsia cùhùn-ndà.

15

Ejemplu sàhà nducuyòhò si-uva

¹ 'Ñà-ndàá nduá, ducán ié' xi nēhivì-xì na ian nducuyòhò ndèè nduú. (Te mii-né, nahi rama-nu nduú-né.) Te Yuamáni', nahi nècuàchi ndiaá xi-nú nduú-yá.

² Vachi nsidaa ndahà nducuyòhò, nú có-càná quisi vídià, tãhndèà. Te nú cuàha-si nùè ndahà-nú, dandu tãhndè ndodó iin ian ndundoa sàhà-ñá chícá màs quisi vídi cana. Ducán nduú modo quidá stnà Yuamáni' xi nsidaa nēhivì nihnú vaha ini xì'.

³ Ñàyücànduá, stnà mii-nsiá, sàni ndundoo stnà anima-nsià ñà-sàni càhìn xi-nsiá palabra ndiaha.

⁴ Te vichì, iin-ni ni cúníhnú vaha ini-nsià yùhù, dandu icúmí coo stnà vida-xi ini anima-nsià, vachi ducán iá' na iin ndahà nducuyòhò, nú có-itúú gá' icà nducuyòhò ndèè mà, dandu mà cuàha ga quisi vídi. Te ducán iá stnà xi mii-nsiá, nú có-níhnú vaha ga inì-nsia yùhù, dandu mà cúì quida ga-nsià ni-iin ñà-vaha.

⁵ Ñàyücànduá, yùhù nduú nahi nducuyòhò ndèè mà, te mii-nsià nduú-nsià nahi rama-nu. Nú iin-ni nihnú vaha ini-nsià yùhù, te iá stnà vida xi ini anima-nsià, dandu vātūni quida stnà-nsià cuàhà gá ñà-vaha. Doco nú màsà chindéi mii-nsiá, mà cúì quida-nsia ni-iñàha.

⁶ Doco iin nēhivì, nú có-cùnì-nè cunihnu ini-nè yùhù, dandu ducán cuu xi-né na iin ndahà yutnú sàni tãhndè, vachi dífà-nèà iladu ñà-ichà, te nú sàni ichà, dandu danátacá-nèà quèa ñuhu coca.

⁷ Doco nú ndisa, nihnú vaha ini-nsià yùhù, te iin-ni nsinúú ini-nsià ñà-nduá cachì xi-nsiá, dandísà, vātūni càcàn tãhvi-nsià nùè Dios ndéni iñàha ni cùì, te nihì-nsiàñà.

⁸ Te nú cuàhà gá ñà-vaha nihì-nsià quida-nsia, dandu chícá màs tnùñuhu xì Yuamáni' quee, te sàà stnà-nsià cunduu ndisa-nsia nēhivì nchícùn vù xì'.

⁹ 'Cunaha-nsiá, divi nacua cuú ini Yuamáni' sàhì, divi ducán cuú stnà inì sàhà mii-nsiá. Ñàyücànduá, iin-ni ni cundóò màni-nsià nùì.

¹⁰ Cunaha-nsiá, nú ni chívàha-nsia ñà-nduá dandacuí, dandísà, iin-ni cundoo màni-nsià nùì. Vachi yùhù, chívàha stnài ñà-nduá cachì Yuamáni', ñàyücànduá màni gué' nùè-yá.

¹¹ 'Nsidaa ñà-jaàn sàni cachì xi-nsià sàhà-ñá ni cudíì stnà ini-nsià nacua cudíì ini yùhù, vachi cunì' cundoo-nsia contentu nicanicuahàn.

¹² Ñà-yòhò nduá dandacuí nùè-nsiá, ñà-nì cúú stnahá ini-nsià sàhà-nsiá, nacua quidá yùhù xi mii-nsiá, ducán cunì' quida stnà-nsià.

¹³ Nú ni cúì iin nēhivì sàhà iin ana iá vaha xi-né, dandu cundaà ini-ndà, yáha ga cuú ndisa ini-nè sàhà nècuàchimà.

¹⁴ Pues cunaha-nsiá, nècuàchì xíndoo vaha-xì nduú stnà-nsià nú ni quidá ndisa-nsia ñà-nduá dandacuí.

¹⁵ Vichì mà cáhì gué' xi-nsiá ñà-nduú-nsiá ana xinúcuáchì uun nùì; còó, amigo-xi cachì xi-nsiá, vachi iin ana xinúcuáchì uun nùè lamú-xi, có-cundáà ini-nè nansa nacáni ini lamú mà quida-ne. Doco yùhù, claru sàni cachì xi-nsiá nsidaa ñà-nduá nì cachì Yuamáni' xì', ñàyücànduá, nahá xicà, amigo-xi sànduú-nsiá.

¹⁶ Cunaha-nsiá, màdi mii-nsià nì nácàxin-nsia yùhù. Còó, yùhù nì nacàxin mii-nsiá, te nì chitnùni inì ñà-cuhùn-nsià, quida-nsia cuàhà ñà-vaha. Te obra quida-nsiamà, mà ndutà. Dandu nsidaa ñà-nduá nì càcàn tãhvi-nsià nùè Yuamáni', te ndácùcahan-nsiá quivì, seguru nihì-nsiàñà.

17 'Ñà-yòhò nduá dandacuí nùù-nsiá, ñà-nì cùù stnahá ini-nsiá sàhà-nsiá.

Nansa ni cachitnùhu Jesús ñà-mà cuññúhú dava nêhivi ñuhiví ndohó tè-nduú nêhivi xí-yá, vâchi ni cóni xiññùhù stná-nè mii-yá

18 'Na xini-nsiá xini ùhì nêhivi ñuhiví mii-nsiá, dandu xiññuho nsinuu ini-nsiá ñà-dihna yùhù ni xini ùhì stná-nè.

19 Doco nú iin-ni ni cúnñhú stná ini-nsiá na niñnú ini mii-né, dandísá cuu ini-nè sàhà-nsiá ni cùí. Doco yùhù, sàni nacàxin mii-nsiá nùù nsidaa-né, te ñàyùcànduá xini ùhì-nènsiá, vâchi có-niñnú gá ini-nsiá nahi mii-né.

20 Doco xiññuho nsinuu ini-nsiá nansa ni cachì xi-nsiá daa, ñà-màsà cútúxí ini iin peón ñà-chicá ndiáá-te nùù lamú xi-tè. Vâchi nú sàni quida quini nêhivi xi yùhù, dandu stná mii-nsiá icúmí-nè quida quini xi-né. Te nú ni chívâha-ne ñà-nduá ni cachì yùhù ni cùí, dandísá chívâha stná-nè ñà-nduá cachì mii-nsiá.

21 Cunaha-nsiá, ducán icúmí nêhivi cuni ùhì-nè mii-nsiá sàhà-ñá nduú-nsiá nêhivi xí, te sàhà stná ñà-có-ináhá-nè mii-yá ana ni techuun-xí vâxi.

22 Nú màsà quésáí ñuhiví yohó càhìn xi-né, dandu mà cúnsídá cuàchi-ne ni cùí. Doco vichi có-nàñhì gá ini-nè nansa cachì-nè sàhà cuàchi ni quida-ne.

23 Nú có-xiññùhù nêhivi yùhù, dandu nàhà claru ñà-có-xiññùhù stná-nè Yuamání' nduú stná.

24 Cuàhà milagru sàni quide ni xini-nè. Mate ndoó gá nêhivi ni quida ga stná milagru, doco có-ndúdávamá xi ñà-nduá sàni quida yùhù. Te nú màsà quidé milagru mà, dandu mà cúnsídá cuàchi stná-nè ni cùí. Doco vichi sàni xini-nè yùhù xi stná Yuamání', te ñàyùcànduá xini ùhì-nè yùhù xi stná mii-yá.

25 Doco ducán ni quida-ne sàhà-ñá ni cuú ndisa ñà-nduá cachì nùù tutu ìì xí-né ndé cachá: "Ni xini ùhì-nè yùhù, mate cóò ni-ñàhà disáhà-xí nduá".

26 'Cunaha-nsiá, nú sàni nasà nùù Yuamání', dandu icúmí techuín mii-yá ana nduú Espíritu ìì ñà-quixi-ya chindee-yá mii-nsiá. Te mii-yá, puru ñà-ndácuisi niñnú ini-yá. Nùù Yuamání' icúmí-yá quee-ya quixi-ya ñà-datnùù ini-yá mii-nsiá sàhì.

27 Dandu icúmí stná-nsiá càhàn-nsiá xi nêhivi sàhì, vâchi ndè quiví primeru xicánúú-nsiá xí.

16

1 'Cuàhà gá sàni càhìn xi-nsiá sàhà-ñá màsà nàxícócuññ ini-nsiá.

2 Vâchi nêhivi dava ga, icúmí-nè taxi-né mii-nsiá nùù veheññuho xi-ne. Te vâxi stná iin tiempu na cutuxi ini-nè ñà-cùdñ gá ini Dios nú ni cahní-né mii-nsiá.

3 Doco sàhà-ñá có-ináhá-nè Yuamání', te ni có-ináhá stná-nè yùhù, ñàyùcànduá icúmí-nè quida-ne ducán.

4 Doco vichi sàni cachitnùhì xi-nsiá sàhà nsidaájàn, te sàhámà quiví cuu xi-nsiá ducán, vátùnì nsinuu ini-nsiá ñà-divi ducán ni cachì xi-nsiá.

Chuun ndiaha icúmí Espíritu ìì xí Dios quida-ya

'Cóni càchitnùhì xi-nsiá palabra yohó antes, vâchi yohó ié' cutnàhì xi-nsiá.

5 Doco vichi icúmí nùhì nùù mii-yá ana ni techuun-xí vâxi. Te ni-iin-nsiá có-ndácàtnùhù-nsiá nùù índù cùhìn.

6 Doco ñà-nì cachì xi-nsiá ñà-nduá ni cachì, ñàyùcànduá yáha ga ndoó-nsiá tnùnsí ini vichi.

7 Doco cunaha-nsiá, ñà-ndáà nduá, chicá ndiaha icúmí quea nùù-nsiá nú sàcuàhìn, vâchi nú màsà cùhìn, dandu mà quixí mii-yá ana icúmí chindee xi-nsiá. Doco nú sàcuàhìn, dandu icúmí techuín mii-yá quixi-ya.

8 Te nú sàni quesaa-yá, dandu dacúndáà ini-yá nêhivi ñuhiví sàhà cuàchi-ne, xi sàhà stná ichi váha, xi sàhà stná nansa icúmí ndundaà sàhà-né.

9 Claru icúmí-yá dacúndáà ini-yá nècuàchimà ñà-íá ndisa cuàchi-ne ñà-có-xiníndísá-né yùhù.

10 Te icúmí-yá cachì stná-yá xi-né nansa íá ichi váha, vâchi yùhù, mànuhì nùù Yuamání' (íá ansivi), te mà cúní gá-nè yùhù.

11 Daaní, icúmí-yá cachì stná-yá xi-né nansa icúmí ndundaà sàhà-né, vâchi cunaha-nsiá, sàni cachì Dios sàhà ñà-malu dandacú ñuhiví yohó ñà-icúmí-sí cunsida-sí cuàchi-sí nicanicuahàn.

12 'Cuàhà gá ñàhà cumáni gá cachì xi-nsiá, doco vichi mà cùí, vâchi tàñáha ga cui màñhì ini-nsiá.

13 Doco después icúmí quesaa Espíritu ìì, te mii-yá, puru ñà-ndácuisi niñnú ini-yá. Te icúmí-yá chindee stná-yá mii-nsiá sàhà-ñá vátùnì cundaà ini-nsiá nsidaa ñà-nduú ndisa palabra ndácuisi. Vâchi màdì ini-ni mii-yá ndacu ini-yá ñà-nduá cuàhàn-yá cachì-yá. Cóò,

cuisi cachi-yà ñà-nduá iníní-yá cachí (Yuamání). Te icúmí-yâ cachtñuhu stná-yà xì-nsiá nansa icúmí coo quiví vâxi xì-nda.

¹⁴ Te tavà gá stná-yà más tñũñuhu xí; vâchi nùu yùhù icúmí-yâ ñhì-yá ñà-ndiaha ì xí, te datnúu-yà sâxinítnùnì-nsiá.

¹⁵ Cunaha-nsiá, nsidaa ñà-nduá icúmí Yuamání, divi stoho stná nduí. Ñâyùcànduá cachí xì-nsiá ñà-icúmí Espíritu Ì mà ñhì-yá nsidaa ñà-nduú ñà-ndiaha ì xí, dandu datnúu stná-yà sâxinítnùnì mii-nsiá.

Icúmí ñèhivì xí Jesús cuhuun ini-nè iin tiempu tii, doco yâchi icúmí-nè ndudiì ini-nè inga tu na natiacu-yà, nì cachi-yà

¹⁶ 'Làcà sacu tiempu, dandu mà cúní gâ-nsiá yùhù. Vâchi mànuhí nùu Yuamání. Doco sacù-nì quiví cunduamà, te cuni tu-nsia yùhù —nì cachi-yà.

¹⁷ Ñâyùcànduá, nì ndàcàtnhù tnahà dava nècuàchi dacuahá-yà mà nùu-né, cachí-nè:

—Ndíà nduá cuní cachi-yà ñà-sacu gá tiempu, te mà cúní gâ-ndáyá, te inga sacu quiví, dandu sà-cuni tu-ndayá, nì cachi-yà; te cachí stná-yà mànuhù-yá nùu Yuamání-yá.

¹⁸ Pues ¿ndíà nduá cuní cachi palabra nì cachi-yà mà ñà-sacu gá tiempu coo ga-yà yohó? Cò-cùndáà ini-nda nansa cuní cachi ñà-jaàn —nì cachi-nè.

¹⁹ Daaní, Jesús, ñà-sà-ináhá-yà cuní-nè ndàcàtnhù-né nùu-yá sàhà mà, ñâyùcànduá nì cachi-yà xì-né:

—¿A cuní-nsiá ndàcàtnhù-nsiá nùu sàhà ñà-nduá nì cachi xì-nsiá ñà-làcà iyuhu tiempu, te mà cúní gâ-nsiá yùhù, te inga sacu quiví, dandu sa-cuni tu-nsia yùhù?

²⁰ Ñà-yohó cachtñuhì xì-nsiá: icúmí-nsiá cuacu-nsia, te cundoo-nsia tñùnsí ini (iin tiempu tii), doco ñèhivì dava ga ndoo ñuhiví, còó. Icúmí-nè cudíi ini-nè. Doco mii-nsiá, mate ducán nì cùndóó-nsiá tñùnsí ini, doco después icúmí cuxio nsidaamá nùu-nsiá, te ndudiì tú ini-nsiá.

²¹ Iin nècuàchi ñàhà, nú sàni sàà hora tñuñu mèe xi-ne ñuhiví, dandu yáha ga cuhúun ini-nè, vâchi sàni sàà quiví ndoho-ne quidamà. Doco nú sàni tñuñu-vé, dandu nándodó-né sàhà dolor; vâchi cudíi gá ini-nè ñà-sàni quesaa inga luchí tii.

²² Te ducán icúmí coo stná xì mii-nsiá. Mate cuahà gá cuhúun ini-nsia vichi, doco yùhù icúmí cuni tui mii-nsiá después, dandu cuahà gá ndudiì tú ini-nsiá. Te ni-iin ñèhivì, mà cufí cadi-nè nùu ñà-jaàn.

Nansa icúmí Jesús cundee-yá

²³ 'Quiví yucán, mà ndàcàtnhù gâ-nsiá ni-ñàhà nùu, vâchi cuisí icúmí-nsiá ndacùcahan-nsiá quiví na xícàn tãhvi-nsiá nùu Yuamání, dandu ñhì-nsiá nsidaa ñà-nduá xícàn-nsiá. Palabra ndàcuisí nduájàn.

²⁴ Tãháha ga ndacùcahan-nsiá quiví na xícàn tãhvi-nsiá ñàhà. Doco vichi nì cacán tãhvi-nsiá ducán, te ñhì-nsiáñà, dandu chicá cudíi ini-nsiá.

²⁵ 'Ndè vichi cuisí puru ejemplu-nì nduá nì nacani xì-nsiá. Doco vâxi iin quiví, dandu mà nácání gué ejemplu xì-nsiá, vâchi claru icúmí cachi xì-nsiá sàhà Yuamání.

²⁶ Daaní, tiempu yucán màdi yùhù cacán gué nùu-yá sàhà-nsiá, cachí. Còó, cuisí quiví yùhù icúmí-nsiá ndacùcahan-nsiá (na cacán tãhvi-nsiá).

²⁷ Vâchi cuú ini-yà sàhà-nsiá sàhà-ñá cuú stná ini-nsiá sàhí, te xiníndísá stná-nsiá ñà-nùu mii-yá nì quixi.

²⁸ Vâchi (ñà-ndáà nduá), nùu mii-yá nì quixi nì quesai ñuhiví yohó; te vichi icúmí nacoí ñuhiví yohó, te nùhì nùu-yá.

²⁹ Dandu nì cachi nècuàchi dacuahá-yá xì-yá:

—Vichí ndisa, claru cãhàn-ní. Màdi ejemplu uun nduá cachí-ní vichi.

³⁰ Vitni sàni sàà-nsì nì cundaà ini-nsì ñà-ñàhà-ní nsidanicuú ñàhà. Te mate tãháha ga ndàcàtnhù-nsí nùu-ní sàhà ñàhà, (doco vátuni cachi-ní xì-nsì). Ñâyùcànduá vichi xiníndísá vâha-nsi, ñà-ndáà nduá, nùu Yua-nda Dios nì quixi-ní.

³¹ Dandu nì cachi Jesús xì-né:

—¿A ndísá xiníndísá vâha-nsia vichí?

³² Cunaha-nsiá, vâxi iin tiempu, dandu cuitià nihni-nsia vehe-nsia, te làcà mindaí nacoó-nsia. Te vichí sàni sàà stná tiempu mà. Doco màdi ndisa ndòo mí; còó, vâchi cutnãhã stnái xì Yuamání.

³³ Nsidaa ñà-jaàn sàni cachi xì-nsiá sàhà-ñá nì cùndóó-nsiá contentu ñà-nihnú vâha ini-nsiá yùhù. Te mate quidá quíní ñèhivì xì-nsiá na ndoo ñ-nsiá ñuhiví yohó, doco màsà cuhúun ini-nsiá sàhájàn, vâchi yùhù, sàni cundei nùu ñèhivì malu ñuhiví yohó.

¹ Na ní nsihí nì cachi Jesús nsidaájàn, dandu nì ndacoto ndiaá-yà ansivi, te nì cachi-yà xì Yuamáni-yá:

—Cáhn xì-ní Yuamáni'. Vichi ndisa, sàni sàà hora. Te yùhù ana nduú Dèhemani-ní, xíquèn ñà-nì tàv-á-ní tnùñuhu xí nùù nēhivi ñuhiví, dandu vātuni quee stná tnùñuhu xí mii-ní quide.

² Vachi sàni chitnùni inì-ní ñà-ndahà yùhù cundoo nsidanicuú nēhivi. Dandu nēhivi nì chitnùni inì-ní cunduu nēhivi xí, nìhì-né vida ndiaha nicanicuhàn nù.

³ Te ¿ìndù modo nìhì-né vida ndiaha ma? Cuisi sàhà ñà-cunaha-né mii-ní xì stná yùhù Jesucristu, vachi mii-ní, ñà-ndacuisi mindaa Dios nduu-ní, te yùhù nduí ana nì techuun-ní vaxi ñuhiví.

⁴ Vichi sàni dàxínuí chuun nì dandàcù-ní nùí quide, te sàhà ñà-jaàn sàni quee cuàhà tnùñuhu xí-ní.

⁵ Ñàyücandüá, vichi xíquèn nùù mii-ní Yuamáni' ñà-coi cutnahí xì-ní, te ducán quee más gá tnùñuhu xí; xíquèn ñà-coi nùù-ní xì tnùñuhu xí nacua nisa le antes na táyoo ñuhiví.

⁶ Mii-ní, nì nacáxin-ní dava nēhivi ñuhiví yohó, te nì chitnùni inì-ní ñà-cunduu-ne nēhivi xí. Te yùhù, sàni dàtú nùù-né nansa iá-ní. Nēhivi xí mii-ní nì sanduu-ne, dandu nì chitnùni inì-ní ñà-cunduu-ne nēhivi xí yùhù. Te vichi sàni chivàha-ne palabra xì-ní.

⁷ Te sàni cundaà stná inì-né sàhà nsidaa iñàha nì sàhatahvi-ní yùhù, sà-ináhà-né ñà-nùù mii-ní nì nìhì-ñà.

⁸ Te palabra ndiaha nì cachi-ní xí, sàni cachi stná-í-ñà xì-né, te mii-né, cudí inì-né xì palabra mà, te cundaà vaha inì-né ñà-nùù mii-ní nì quei vaxi, vachi xiníndísà-né ñà-divi mii-ní nì techuun-xí nì quesai ñuhiví.

⁹ Vichi xicán tàhvi nùù-ní sàhà-né, màdi sàhà dava ga nēhivi ñuhiví, cóo, cuisì sàhà nēhivi nì chitnùni inì-ní cunduu nēhivi xí; vachi nēhivi xí mii-ní xínduu stná-né.

¹⁰ Nsidaa nēhivi-xí, nēhivi xí mii-ní nduú stná-né. Te nēhivi xí mii-ní, nēhivi xí yùhù nduú stná-né, te sàhà mii-né sàni quee más gá tnùñuhu xí.

¹¹ 'Pues vichi, mà cóo gué' ñuhiví yohó. Icúmí nasai nùù mii-ní ana nduu Yua Í Ndiahí. Doco nēhivi nì sàhatahvi-ní yùhù, yohó icúmí-né candoo-ne. Ñàyücandüá, sàhà poder xì-ní cundiaà-ní nsidaa-né sàhà-ñà iin-ni cunduu nsidaa-né nahi mii-ní xì yùhù, iin-ni xínduu-nda.

¹² Na iá ve xì-né ñuhiví yohó, nì sandia-è xì poder xì-ní. Te nsidaa ana nì dàyàha-ní nùí, iin-ni ndiaá vahi-né, cóni ndáñuhu nì iin-ne, cuisì imindaa tè-de por sí icúmí ndañuhu, vachi ducán icúmí coo sàhà-ñà nì cuú ndisa ñà-ndüá cachi nùù tutu ì sàhà-té.

¹³ Te vichi sàmànasai nùù-ní. Doco ñà-yohó nduá cachí na iá ve ñuhiví yohó sàhà-ñà nì cundúo nēhivi-xí contentu nacua iá stná yùhù contentu.

¹⁴ Sàni cachitnùni xì-né palabra xì-ní. Doco nēhivi dava ga, xiní ùhì-ñané sàhà ñà-có-nìhnú gá inì-né nahi nēcuàchimà. Te ducán stná yùhù, có-nìhnú stná inì nahi nēhivi ñuhiví.

¹⁵ Te có-xíquèn ñà-tavà-níné ñuhiví yohó. Cuisì xíquèn-ñà cundiaà-níné ñà-màsà dáca ñà-malu-né.

¹⁶ Yuhu, có-nìhnú inì nahi nēhivi ñuhiví yohó, ñàyücandüá, stná nēhivi-xí, có-nìhnú gá stná inì-né nahi nēcuàchì dava ga mà.

¹⁷ Daaní, xicán tàhvi stná-í ñà-nì chináhà-níné ñà-nduú palabra ndacuisi, te ducán sàà-né cunduu-ne nēhivi nìhnú ñi inì-xi. Te palabra sàni cachi-ní, divi ñà-jaàn nduú ñà-ndacuisi.

¹⁸ Nacua nì techuun-ní yùhù nì quesai ñuhiví yohó, ducán quidá stná-í, techuín mii-né ñà-cùhùn-né (càhàn-né xì) nēhivi ñuhiví.

¹⁹ Te sàhà ñà-vaha xì mii-né ié' dispuestu quide nsidaa chuun ì (iá gá quide), dandu vātuni sàà stná-né cunihnu ì inì-né nú sàni chivàha-ne ñà-nduú palabra ndacuisi.

²⁰ Doco màdi cuisì sàhà nēhivi yohó xicán tàhvi. Cóo, vachi icúmí mii-né càhàn stná-né xì nēhivi dava ga, dandu cunindisá stná nēcuàchimà yùhù. Ñàyücandüá, sàhà nēcuàchì yucán xicán tàhvi stná-í.

²¹ Daaní, xicán tàhvi ñà-nahi iin-ni nēhivi nì cundúu nsidaa nēcuàchimà, te iin-ni nì cundúu stná anima mii-né xì anima ndohó, nahi mii-ní xì yùhù, iin-ni xínduu-nda: iá-ní inì animé, te yùhù, iá stná inì anima mii-ní. Ñàyücandüá xicán tàhvi ñà-iin-ni anima nì cucúmí nsidaa-né, dandu vātuni cunindisá nēhivi ñuhiví ñà-divi mii-ní nì techuun-xí nì quesai ñuhiví.

²² Te nacua nì chitnùni inì-ní ñà-coo tnùñuhu xí yùhù, ducán sàni nìhítàhvi stná mii-né cucumi-né tnùñuhu ma, dandu iin-ni cahnú cunduu nsidaa-né, nahi iin-ni xínduu stná ndohó.

²³ Mii-ní, iá-ní inì animé, te yùhù, inì anima mii-né coi; dandu iin-ni cahnú cunduu ndisa nsidaa-né xì ndohó. Te ducán icúmí nēhivi dava ga ñuhiví cundaà stná inì-né ñà-divi mii-ní nì techuun-xí vaxi, te cundaà stná inì-né ñà-cùù stná inì-ní sàhà nēhivi-xí nacua cuú inì-ní sàhà yùhù.

²⁴ 'Mii-ní nduu-ní Yuamáni', te nì chitnùnì inì-ní cundoo ana cunduu nèhivì xí. Ñàyücàndüá, yùhù cuní sàà stná nsidaa nècuàchì mà cundoo-ne ndé cuàhìn coi sàhà-ñá iin-ni cutnahá-né xí, te cundehè-né nansa iá tñùñuhu ndiaha nì sàhatahì-nì yùhù, vächì ndé antes na tàyôo ñuhivì, iin-ni cuú inì-ní sàhí.

²⁵ Mii-ní, ndàcuisì nihnú inì-ní. Doco nèhivì ñuhivì, tàcùnì-nè mii-ní. Doco yùhù, ndisa, ináhi mii-ní. Te nèhivì cutnahá xí yohó, sàni cundaà stná inì-nè ñà-divi mii-ní nì techuun-xí.

²⁶ Te yùhù, sàni dàtúi nùu-né nansa iá-ní nacua cuàhìn quide quivì nùu-xí. Ducán dandu nihì-né cuu stnahá stná ini-nè sàhà-né nacua cuú ini mii-ní sàhà yùhù. Te ducán nihì stná yùhù coi ini anima nsidaa-né —nì cachi Jesús.

18

Nansa nì tñii-tè Jesús

¹ Nì nsihì nì cachi-yà ducán, dandu nì quee-ya cuàhàn-yà nì yàha-ya inga ladu yui Cedrón, cutnahá-yà xì nècuàchì dacuahá-yá. Te nì yàha-ya xì-né mahì iin huertu iá yucán.

² Doco tiàa cuàhàn cahin xì-yá, divi Judas, ináhá stná-nè indù iá huertu mà, vächì cuàhà xichi sàhàn-yà xì nècuàchì dacuahá-yá yucán.

³ Ñàyücàndüá, nì saca nècuàchì mà itnii soldadu, te nì nihì stná-nè itnii policia nùu dùtù xicusahnú xì nùu stná tè-xínduu fariseu, te cuàhàn-nè xì nsidaa témà ndé nduu huertu mà. Te nsidaa-té, iníndáhá-tè lámpara xì nù-ñùhú xixin, xì stná càa dana nduú arma xì-tè.

⁴ Daaní, Jesús, como ináhá-yà nsidaa ñà-ndüá cuàhàn cuu xì-yá, nì quee-ya nì sànhicùn-yà témà, te nì cachi-yà xì-té:

—¿Ana divi nandúcu-nsiá?

⁵ Te nì cachi-te xì-yá:

—Divi Jesús de Nazaret.

Dandu nì cachi-yà xì-té:

—Yùhù nduí.

Te yucán iin stná Judas, cutnahá-né xì nsidaa témà. Te divi Judas mà nduú ana nì dicó xì-yá.

⁶ Daaní, na ní nsihì nì cachi-yà: “Yùhù nduí”, dandu yàchì nì naxiconihí duma candüá-te.

⁷ Dandu inga xichi nì cachi-yà xì-té:

—¿Ana divi nandúcu-nsiá?

Te nì cacachì-te:

—Divi Jesús de Nazaret.

⁸ Dandu nì cachi-yà:

—Sàni cachi xì-nsiá, yùhù nduí. Ñàyücàndüá, nú yùhù nchicùn-nsiá, nacoo-nsia nèhivì xí yohó nì nùhù-nè.

⁹ Ducán nì cachi-yà xì-té sàhà-ñá nì cuú ndisa ñà-ndüá nì cachi-yà ñà-còò nì-iin nèhivì xì-yá nì ndánúhú, nì-iin nèhivì nì chitnùnì ini Dios cunduu nèhivì xì-yá, cóni ndáñúhú-nè.

¹⁰ Daaní, nì tavà Simón Pedro espada xì-ne, te nì cani-ne iin mozo xì dùtù cusáhnú, nì sahnde ì-né tütñù nècuàchì mà ladu cuahá-nè. Te Malco nani mozo mà.

¹¹ Doco nì cachi Jesús xì Pedro:

—Nachinacaà-ní espada xì-ní, vächì yùhù, icúmí yàhi ñà-ndüá nì chitnùnì ini Yuamáni' cuu xí.

Nansa ndacá-te Jesús nì sàà nùu dùtù cusáhnú

¹² Dandu capitán yucán, xì soldadu xì-tè, xì stná policia yucán, nì catnii-tèyá nì chichuhñi-teyá.

¹³ Te nì saca-tèyá cuàhàn-te xì-yá nùu nècuàchì nani Anás, vächì dido dùtù cusáhnú cuàa yucán nduú-né. Te Caifás nani dùtù cusahnu-ma.

¹⁴ Te divi-ne nduú ana nì càhàn-nè xì nècuàchì raza-nè Judea daa na ní cachi-nè ñà-xiñùhù cui iin tiàa sàhà nsidaa nèhivì ñuu-nèmà.

Nansa nì nacuaà Pedro Jesús

¹⁵ Daaní, chicá cahá-xí ndé cuàhàn Jesús vaxi stná Simón Pedro xì inga stná nècuàchì dacuahá-yá. Te compañeru-nèmà, ináhá-nè dùtù cusáhnú. Ñàyücàndüá, na ní dàyáha soldadu-yà ini patiu vehe dùtù mà, dandu nì quihvi stná inga-nèmà.

¹⁶ Doco Pedro, nì ndòo-ne nùu yehè patiu-ni ma. Ñàyücàndüá, vaxi tu compañeru-nè ináhá xì dùtù mà, te nì càhàn-nè xì ñahà chii ndiaá yehè mà áma dàyáha stná-ña Pedro.

¹⁷ Dandu nì cachi-ña xì Pedro:

—¿Amádi mii stná-ní nduu-ní iin nècuàchì nchicùn xì Jesús?

Te nì cachi-nè:

—Còó.

¹⁸ Daaní, divi yucán itá stná mozo (xi dùtù mà) xi stná policia. Te ni xicùn-té iin ñuhu tnùu ñà-nadaà-té, vâchi cùvixin ga. Te yucán ni tnàtuu stná Pedro, iin-né nadâx stná-nè.

Nansa ni ndâcâtnùhù dùtù cusâhnù nùu Jesús sâhà ñà-nduá quidâ-yá

¹⁹ Daaní, dùtù cusâhnù, ni ndâcâtnùhù-né nùu-yâ sâhà ñèhivi dacuahâ-yâ xi sâhà stná palabra chináhâ-yànè.

²⁰ Ñâyùcânduá, ni cachi-yâ xi-né:

—Yùhù, vate ní câhìn xi nsidaa ñèhivi ini veheñùhu cuachi, te ini stná veheñùhu cahnù ndé siempre natácâ ñèhivi raza-ndâ Judea. Divi yucán nduú lugar ndé siempre nisa dacuahí ñèhivi. Còò ni-ñàhà ni chináhâ dèhí.

²¹ Chicâ vâha màsâ ndâcâtnùhù-ní nùu mii; nùu ñèhivi ni inini xi ñà-nduá ni cachi chicâ vâha, vâchi mii-né ináhâ-né ñà-nduá ni cachi.

²² Daaní, yatni ndé iin Jesús iin stná iin policia, te na ní cachi Jesús ducán, dandu ni cani-tè nùu-yâ, cachi-te:

—¿Índù chuun câhàn-ní xi dùtù ìi ducán?

²³ Dandu ni cachi Jesús xi-té:

—Nú cóni câhàn vii' tuxi-ní, dandu cachi-ní xí' índù palabra cóni câchi vii'. Doco nú còò ni-ñàhà ni câhàn quini, dandu có-ìcúmí-ní cani-ní yùhù.

Nansa ni nacuaà Pedro Jesús ùi gà xichi

²⁴ Dandu ni dàyâha Anás mà-yâ cuâhàn-yâ ndahâ dùtù cusâhnù nani Caifás. Te nuhní tnuu-ya cuâhàn-yâ.

²⁵ Doco Simón Pedro, iin stná-nè nadâà-né. Dandu ñèhivi itá yucán, ni ndâcâtnùhù-né nùu nècuâchimâ, cachi-nè:

—¿Amâdi mii stná-ní nduu-ní ñèhivi xí Jesús?

Dandu ni nacuaà nècuâchimâ mii-yâ, cachi-nè:

—Còò, màdi yùhù.

²⁶ Daaní, ni câhàn inga mozo xi dùtù yucán, divi tnaha tiàa ni tàhndé tùtnù-xí; te ni cachi-te xi Pedro:

—¿Amâdi mii-ní ni xini iá xi Jesús huertu yucán?

²⁷ Doco inga tu ni cachi-nè:

—Còò.

Daaní, divi momentu mà ni xito lehe.

Nansa ni dàyâha-tè Jesús nùu Pilatu

²⁸ Daaní, ni saca-tèyâ ni caquee-tè xi-yâ nùu Caifás, cuâhàn-te xi-yâ ndé vehe gobernador, te yucán ni dàyâha-tèyâ ini vehe. Iin vâa gà nduá. Doco tè-xínduu raza Judea mà, cóni cá-quìhvi-tè vehe yucán, vâchi nú ni quìhvi-tè, dandu mà cóò ndoo ga-né (nacua cachi ley xi-ne), te mà cóó gà permisú cuxi-tè ñà-nduá xixi-te na nduá vicò pascua mà.

²⁹ Dandu Pilatu, ni quee-tè fuera vâxi-tè ndé itá ana ni casaà mà, te ni cachi-te:

—¿Ndâi nduá ni quida tiàa yohó, te sanícuâchi-nsia sâhâ-né?

³⁰ Dandu ni cacachi-te xi Pilatu:

—Nú ni cùndúú-né iin nècuâchi cóni quidâ cuâchi ni cuí, dandísâ, mà cùndácâ-nsínè quixi nùu-ní.

³¹ Dandu ni cachi Pilatu:

—Cundaca-nsianè cuahán, te mii-nsiâ nsidandaà-nsiâ sâhâ-né nacua cachi ley xi mii-nsiâ.

Doco ni cacachi tè-raza Judea mà:

—Ley (xi mii-nsiâ), có-sâha ñà-cahni-nsí iin ana iá falta xi.

³² Ducán ni cacachi-te sâhâ-ñâ ni cuú ndisa ñà-nduá ni cachitnùhu Jesús na ní cachi-yâ nansa icúmí-yâ cui-yâ.

³³ Daaní, ni nansihvi Pilatu vehe-tè, te ni cana-tè Jesús, ni cachi-te xi-yâ:

—Mii-ní, ¿a ndísâ rey xi nècuâchi raza Judea nduu-ní cahan-ní?

³⁴ Dandu ni cachi Jesús xi-té:

—¿A mii-ní ni nacani iní-ní ndâcâtnùhù-ní nùí ducán, te ò inga ñèhivi ni cachi xi-ní ducán?

³⁵ Dandu ni cachi Pilatu xi-yâ:

—Yùhù, có-ndúí iin tè-raza-ní Judea. Divi nècuâchi ñuù-ní xi dùtù xícusahnù nduú ana ni dàyâha xi-ní ndahí. ¿Índù cuâchi ni quida-ní?

³⁶ Dandu ni cachi Jesús xi-té:

—Cunaha-ní, ñuu ndé cusâhnùí, có-nduá ñuhiví yohó, vâchi nú ñuhiví yohó ni cùndúá, dandísâ icúmí ñèhivi-xí cuidahan-né yùhù nùu ana xini ùhí xí sâhâ-ñâ màsâ yâhi ndahâ nècuâchi raza Judea ni cuí. Doco ñuu ndé cusâhnùí, tucu iá, mà ndúdávâ xí ñuhiví yohó.

³⁷ Ñâyùcânduá, ni cachi tu Pilatu xi-yâ:

—¿Àsù nduú stná-ní iin rey cusáhnú?

Dandu nì cachi Jesús xì-té:

—Nacua cachí-ní, divi ducán nduá, divi rey nduí. Te divi sàhà-ñá cachitnùhi xì nèhivì ñà-nduú palabra ndàcuisì, ñàyùcànduá nì quesai ñuhivì yohó. Te vichi nsidaa ana cudí ini xì palabra ndàcuisì mà, divi nduú stná ana cudí ini xì ñà-nduá cachí.

³⁸ Dandu nì cachi Pilatu xì-yá:

—¿Índù ñà-ndisa nduú palabra ndàcuisì?

Nansa nì dàndáa Pilatu ñà-cui Jesús

Daaní, nì nsihi nì cachi Pilatu ducán, dandu nì quee-tè inga xichi nì càhàn-te xì tè-xínduu raza Judea, cachí-te xì témà:

—Sàni càhin xì nècuàchi yohó, te còò ni-iin falta ndàcùhin-nè.

³⁹ Doco estilu xì-nsia nduá ñà-dàña iin tè-ndiadi cada nacávà vicò pascua yohó. Ñàyùcànduá, vichi ¿a cuní-nsià dàña nècuàchi yohó cachí nduú rey xì tè-raza-nsià Judea?

⁴⁰ Daaní, tucu tu nì càna fuerte nsidaa-témà, cachí-te:

—Còó, màdì nècuàchi jaàn cuní-nsià dàña. Barrabás chicá vaha ni dàña —nì cacachí-te.

Doco cunaha-nsiá, iin tècuihnà nduú Barrabás mà.

19

¹ Daaní, nì dàndàcù Pilatu nùò soldadu, te nì tavà-téyâ iladú, nì sahnì cuí-teyá xì iin chirrión.

² Dandu nì quidavàha-tè iin sicàtè iñù, te nì chinacaà-teá dìni-yá. Te nì chindixi stná-teyá iin capa moradu.

³ Dandu nì catnàtuu-tè nùò-yá, (nì sàcùndiaà-teyá), cachí-te:

—¡Tùinuuvàha-ní, seño! ¡Vichi ndisa, sàni sàcùnduu-ní rey xì tè-raza Judea!

Dandu nì cacani-tè nùò-yá.

⁴ Daaní, tucutu nì quee Pilatu nùò nèhivì ndiatú yucán, cachí-te xì-né:

—Cunaha-nsiá, cuàhin taví Jesús cundehè-nsiá, te cundaà inì-nsia ñà-còò ni-iin falta xì-ne nì ndàcùhin.

⁵ Ñàyùcànduá, nì quee Jesús (vehe ma), ñuhú díni-yá sicàtè iñù mà, te ndixí stná-yá capa moradu mà. Dandu nì cachi Pilatu xì nsidaa nèhivì ndoó yucán:

—Cundehè-nsiánè, yohó iin-né.

⁶ Daaní, dùtù xicusahnú, xì stná policia, na ní xini-nèyà, dandu nì càna ndee-né, cachí-nè: —¡Nchìca cruz nì cuí nècuàchi jaàn! ¡Cahnì-nínè!

Dandu nì cachi Pilatu xì nsidaa-né:

—Mii-nsiá cundaca-nsianè cùhùn, te cahnì-nsiánè, doco yùhù, còò, vachi còò cuàchi-ne nì ndàcùhin.

⁷ Dandu nì cacachí nècuàchi raza Judea mà:

—Nsiùhù, icúmí-nsí iin ley, te según cachí ley mà icúmí nècuàchi jaàn cui-nè sàhà ñà-nì cachi-nè nduú-né Dèhemani Dios.

Dandu Pilatu, na ní inini-tè ñà-nì cacachí nècuàchimà ducán, chicá nì yuhí-te,

⁹ te nì nansihvi-tè ini vehe cahnú-te nì càhàn tu-tè xì-yá, cachí-te:

—¿Índù ndisa nì quixi mii-ní?

Doco Jesús, cóni càhàn gà-yà.

¹⁰ Dandu cachí tu Pilatu xì-yá:

—¿Índù chuun có-càhàn-ní xì? ¿A có-ináhà-ní ñà-yùhù icúmí poder: vátùni cahnì mii-ní, te ò vátùni dacácuí mii-ní?

¹¹ Dandu nì cachi-yá xì-tè:

—Nì còò ni-iyuhu poder cucumi-ní nú màsà chítùnini ini mii-yá iá ansivi ducán. Sàhá mà tiàa nì dàndàcù quixi nùò-ní, chicá nsidà cuàchi-tè (mùò mii-ní) —nì cachi-yá.

¹² Daaní, dècuèndè hora yucán nì nanducu Pilatu nansa dàña-téyâ, doco chicá fuerte nì càna nsidaa tè-raza Judea mà, cachí-te:

—Nú nì dàña-ní Jesús jaàn, dandu náha claru có-nduù-ní amigo ndisa xì rey cahnú César. Vachi nsidaa ana cachí nduú stná rey, xini ùhì stná-nè rey cahnú César.

¹³ Daaní, na ní inini Pilatu ñà-jaàn, dandu nì tavà tú-teyá inga xichi, te nì sàcòò-tè silla ndé siempre iá-te nsidándàà-te chuun. Te silla mà, iin-nu diquí yùò chipála itánduhù ñuhù, te Gabata nani lugar mà dàhàn hebreu.

¹⁴ Te sàni cahin quivi yucán, divi quivi nduú vigilia vicò pascua mà, dandu nì càhàn-te xì nsidaa nèhivì yucán, cachí-te:

—Cundehè-nsiá, yohó iin nècuàchi nduú rey xì-nsia.

¹⁵ Doco ndee ní càna nsidaa nèhivì mà:

—¡Còó! ¡Ni cuí-nè cuní-nsi! ¡Cahnì-nínè! ¡Ni màcùtuu-me nchìca cruz!

Dandu cachí Pilatu xi nsidaa-né:

—¿A ndísá cuní-nsià cui rey xi-nsia nchica cruz?

Te ni cacachi dùtù xícusahnuma:

—Cuisi imindaa rey xi-nsi íá, divi nduú César.

¹⁶ Ñàyücàndüá, ni candisá Pilatu ñà-ndüá xicàn nècuàchimà; ni dàndàcù-te ni cui Jesús nchica cruz. Dandu ni saca soldadu-yà cuàhàn-te xi-yá.

Nansa ni sàcùtuu Jesús nchica cruz

¹⁷ Daaní, ni sàcùnsida-ya cruz xi-ya cuàhàn-yà, te ni sàà-yà nùu iin xaan nani lunsì Calvariù. Te Gólgota nani stná lugar yucán nùu dàhàn hebreu.

¹⁸ Te yucán ni cachituu-tèyá nchica cruz, mii-yá xi inga ùi stná tiàa, iin iin-tè iin iin ladu-yà, te mii-yá mahi-xí.

¹⁹ Daaní, ni dàndàcù stná Pilatu ñà-ni mácùtuu òmì cruz xi-ya iin ñà-càchì: “Jesús de Nazaret, rey xi tè-raza Judea”.

²⁰ Dandu ni cahvi cuàhà nècuàchì ñuu mà nansa cachá, vèchi lugar ndé ni chituu-tèyá nchica cruz, yatni uun ñuu mà nduá. Te ùni dàhàn ni tiaa palabra mà: dàhàn hebreu, xi dàhàn griegu, xi dàhàn latín.

²¹ Dandu dùtù xícusahnu-ma, ni càhàn-nè xi Pilatu, cachí-nè:

—Màsà càchì palabra mà “Rey xi tè-raza Judea”. Còo, chicá vaha tiaa-ní ñà-ni cachi uun-ne nduú-né rey xi nèhivi raza-nsi.

²² Dandu ni cachi Pilatu xi nècuàchì yucán:

—Còo. Ñà-ndüá sàni tiaa, ducanicoá

²³ Daaní, ni nsihi ni chituu soldadu-yà nchica cruz, dandu ni dàcuàchì-te sicoto xi-ya nùu nsiçúmi-té. Chii chiá ni ñihì iin iin-tè. Doco cuaán nduú òhñù quihín-yà, vèchi iin-ni cahnú ni cuàhà; còò ni-iin xaan xi-ña ndé ni nsícu.

²⁴ Ñàyücàndüá, ni cacachi soldadu mà:

—Màsà dàcuàchì-ndáñã. Chicá vaha cuidàdiquí-ndà suerte sàhà-ñá cundaà ini-ndà ana ñihì xán.

Pues ducán ni cuu sàhà-ñá ni cuú ndisa ñà-ndüá ni cachitnùhu nùu tutu ìi ndé cachí palabra yohó: “Ni cadasàn-té sicoto xi entre mii-té, te ni idàdiquí-te suerte, a ver ìndù-té ñihì xi ñà-ndüá ndixí”. Ñàyücàndüá, ducán ni caquida soldadu mà.

²⁵ Daaní, sàhà cruz xi-ya iin stná dihi-yá xi cùhì-nè nani stná María, divi ñahàdihí Cleofas; te yucán iin stná María Magdalena.

²⁶ Te ni xini-yà dihi-yá, te ni xini stná-yà yucán iin stná iin nècuàchì dacuahá-yá cuú cuàhà ini-yà sàhà-xí. Ñàyücàndüá, ni cachi-yà xi dihi-yá:

—Cundehè-ní mamá, jaàn iin dèhe-ní.

²⁷ Dandu ni cachi-yà xi nècuàchì dàcuàhàmà:

—Cundehè-ní, jaàn iin mamá xi-ní.

Te divi hora yucán ni nàcùndiaa nècuàchimà dihi-yá.

Nansa ni xihì Jesús

²⁸ Daaní, ináhá-yá ñà-sàni cuu ndisa nsidaa ñà-ndüá ni cachi tutu ìi, ñàyücàndüá, ni cachi-yà:

—Xíhi tècuí.

²⁹ Te yatni uun yucán iin iin quidi chitu vinu ni xiò. Ñàyücàndüá, ni quihin soldadu iin ñà-ñahmá nani esponja, ni chihi-tèá òmì iin vara nù-hisopo. Dandu ni chindaxin-tèá vinu mà, te ni dàcùhùn-teá nùu yuhù-yá

³⁰ ni sihvi-yá chiá. Dandu ni cachi-yà:

—Vichi ndisa sà-íá.

Te ni nàcuindee òmì-yá, te ni xihì-yà.

Nansa ni dàquhvi iin soldadu lanza xi-tè òmì tixì Jesús

³¹ Dandu nècuàchì raza Judea, cóni cùnì-nè ndòo nsidaa nsii ma nchica cruz, vèchi vigilia xi quivì descansu nduá. Te divi quivì descansu mà ni nacava stná iin vicò cahnú xí-né. Ñàyücàndüá, ni ca-xicàn-nè favor nùu Pilatu ñà-ni cãtnáhnù iquì nani sàhà iin iin ana itándiaa nchica cruz (sàhà ñà-ni cui yàchì-nè), dandu cuxio-ne nùu cruz.

³² Ñàyücàndüá, ni casaà tu soldadu (ndé itá cruz), te ni casahnù-te iquisáhà iin tiàa itúú nchica cruz iin ladu Jesús, dandu después ingà-te.

³³ Doco na ní tnàtuu-tè ndé itúú mii-yá, ni cundaà ini-te sàni xihì-yà; ñàyücàndüá, cóni sáhnù gà-te iquisáhà-yá.

³⁴ Doco iin soldadu mà, ni dàquhvi-tè lanza xi-tè òmì tixì-yá, te ni dàñà nù-yá xi tècuí.

³⁵ Yuhù ni xini nsidaájàn, teayücàndüá nacání xi-nsiá sàhà. Te ñà-ndàcuisi nduá cachí. Yuhù ináhì, te cachitnùhu ndai xi-nsiá sàhà-ñá ni cùnindísá stná-nsiá.

³⁶ Cunaha-nsiá, nsidaa ñà-jaàn ni cuu xi-yá sàhà-ñá ni cuu ndisa nacua ni cachitnúhu nùu tutu ì ndé cachá: “Ni-iin iquì-yá mà-tnáhnù”.

³⁷ Daaní, cachí stná inga xaan nùu tutu mà, ndé cachá: “Ícúmí nèhivì cuni-nè mii-yá ana ni dàquìhvi-tè (càa) icà-xí”.

Nansa ni ndùxin Jesús ini iin cueva

³⁸ Daaní, ni nsihamà, dandu ni sàhàn iin tiàa nani José nùu Pilatu. Iin nècuàchì ñuu Arimatea nduú nècuàchimà, te nduú stná-nè iin nèhivì xí Jesús, doco chidèhé-nè, vàchì yúhì-nè tè-dava ga raza-nè Judea. Pues divi mii-nè ni sàhàn ni xicàn permisú nùu Pilatu nanihi-ne iquicúñú-yà. Te juùn ni cachi Pilatu. Ñàyùcàndüá, ni sàhàn-nè ni nanihi-ne iquicúñú-yà.

³⁹ Daaní, ni sàà stná Nicodemo yucán, divi nècuàchì ni sàhàn ñuu visita ndé iá-yà. Te vichì nihí-né ñà-tnami nani mirra ni sàà, te dácà stnahá stná mà xi inga ñà-tnami nani áloe. Nsidaájàn cùvèa nahi òcò ùxin kilo.

⁴⁰ Ñàyùcàndüá, José xí Nicodemo mà, ni nanihi-ne iquicúñú-yà nùu cruz, te ni chidùcùn-neyà sicoto finu cuxín, te ni dàquée stná-nè ñà-tnami ma, vàchì ducán nduú estilu xi nèhivì raza Judea na sácùndùxin-ne.

⁴¹ Cunaha-nsiá, yatni ndé ni sa-ittuu Jesús nchica cruz, yucán itá stná itnii yutnú tàtá. Te mahì yutnú mà iá stná iin cueva làcà ní sate, doco tàñáha ga cundùxin ni-iin nsi-ña.

⁴² Te sàhà-ñá sà-ittúu quivì descansu xi nècuàchì ñuu mà, ñàyùcàndüá, ini cueva yucán-ní ni chindùxin-neyà, vàchì yatni nduá.

20

Nansa ni natiacu Jesús

¹ Daaní, quivì primeru semana, (divi quivì domingu) vaxi María Magdalena cueva ndé índùxin Jesús. Naha nduá, te iin tnuu va nduá. Dandu ni xini-nè, sàni cuxio cavà cahnú nadiadí yuhù cueva.

² Ñàyùcàndüá, ni dàyàà-nè cuàhàn-nè ndé iá Simón Pedro xi inga nècuàchì dacuahá-yá, divi nècuàchì màni guá nùu-yá, te ni cachi-nè xi nècuàchimà:

—Sàni tavà-té Stoho-ndá Señor ndé ni sácùndùxin-ya. Te có-cùndáà ini-nsi índù cuàhàn-te xi-yá.

³ Ñàyùcàndüá, ni quee Pedro xi compañeru-nè, cuàhàn stná-nè cueva yucán.

⁴ Te cutnáhá-né ni dàyàà-nè cuàhàn-nè, doco chicá ndee ní dàyàà compañeru Pedro mà, teayùcàndüá, dihna nècuàchimà ni sàà-nè nùu cueva.

⁵ Te ni nacàhnu ndee-ne ni xito nihni-ne ini cueva, te ni xini-nè ndé sicoto xi-ya itánduhù, doco cóni quìhvi-ne inì-xi.

⁶ Daaní, nchícùn Simón Pedro ni sàà stná-nè, doco mii-né ndisa, ni quìhvi-ne inì-xi, te ni xini stná-nè itánduhù sicoto xi-ya,

⁷ xi stná pañuelu nisa idàhvi nùu-yá, doco có-índúhá xi sicoto dava ga; iladù índúhá, te sàni natnahnù viá.

⁸ Dandu ni quìhvi stná compañeru Pedro ni sàà primeru, te ni xini stná-nè nansa iámà, te ni xinindisá-né.

⁹ Doco ni mii-né ni stná Pedro, tàñáha ga cundaà ini-nè nansa cachí nùu tutu ì ndé cachí icúmí-yá natiacu-yá.

¹⁰ Daaní, ndúu-nè mànuhù-né vehe-ne.

Nansa ni ndecunu Jesús nùu María Magdalena

¹¹ Doco yucán ndé iá cueva mà (ni sàà) stná María. Te vichì iin-né fuera sacú-né. Te ni nacàhnu ndee-ne, ni xito nihni stná-nè ini cueva.

¹² Te yucán ni xini-nè ndoó ùi ángel xi Dios lugar ndé nisa induhù Jesús, iin-ne ndé ni sanduu dìni-yá, te inga-nè ndé ni sanduu sàhà-yá.

¹³ Te ni cachi ángel mà xi María:

—Señorita, ¿índù chuun sacú-ní?

Dandu cachí-nè xi nècuàchimà:

—Vàchì sànihí-te Stoho-nsi Señor cuàhàn, te có-cùndáà inì índù cuàhàn-te xi-yá.

¹⁴ Dandu ni ndecoto María ladu yàtà-né, te ni xini-nè yucán iin mii-yá, doco cóni nácúni-neyà nduú-yá Jesús.

¹⁵ Te ni cachi-yá xi-né:

—Señorita, ¿índù chuun sacú-ní? ¿Ana divi nandúcu-ní?

Doco María, ni tuxi ini-nè ádi té-ndiáà yutnú tàtá iá yucán nduú ana cáhàn; ñàyùcàndüá ni cachi-nè:

—Señor, nú mii-ní nì tavà-níyà, dandu cachi sacù-ní xí' índù nì sànihi-níyà, te cùhin naquihin-yà.

¹⁶ Dandu nì cachi-yà xì-né:

—¡María!

Dandu nì naxicocuñin-nè ladu yàtà-né, te nì cachi-nè dàhàn mii-né:

—¡Raboni! —ñà-nduà cuní cachà Maestro.

¹⁷ Dandu nì cachi-yà xì-né:

—Màsà dúcùn ndahà-ní yùhù, vâchi tâñáha ga nani nùu Yuamáni'. Còo. Cuahán-ní, cachitnùhu-ní xì nèhivì xí, vâchi nahi ñani xínduu-ne. Te cachi-ní xì-né ñà-icúmí nani nùhì nùu Yuamáni'. Te cunaha-nsiá, Yuamáni mii-nsiá nduú stnà-yà. Te ana càhvì yùhù nduú-yà, nacua nduú stnà-yà ana càhvi mii-nsiá —nì cachi Jesús.

¹⁸ Ñâyùcànduà, nì sàhàn María Magdalena mà nì cachitnùhu-ne xì dava ga nècuàchì dacuahá-yà, nì nacani-ne nansa nì xini-nè Stoho-ndà Señor, te dohó te dohó nì cachi-yà xì-né.

Nansa nì ndecunu Jesús nùu nècuàchì dacuahá-yà

¹⁹ Daaní, na ní cuñià quivì domingu mà nì nataca nsidaa nècuàchì dacuahá-yà. Te nì nacadi vâha-ne yehè, vâchi yùhì-nè nèhivì dava ga raza-nè Judea. Dandu (na iin cachí) nì sàcùin Jesús dava mahi-né, te nì cachi-yà xì-né:

—Contentu nì cúndóó-nsiá.

²⁰ Na ní nsihi nì cachi-yà ducán, dandu nì dàcùnì-yànè ndahà-yà xì diin tixi-yà. Ñâyùcànduà, cuahà gá nì cudíi ini-nè ñà-sàni xini-nè divi Stoho-ndà Señor nduú-yà.

²¹ Dandu inga xichi nì cachi-yà xì-né:

—Contentu nì cúndóó-nsiá. Nacua nì techuún Yuamáni' yùhù nì quesà, ducán techúin stnái mii-nsiá cùhùn-nsiá.

²² Daaní, nì sivi tàchi-yà nùu nsidaa-né, te nì cachi-yà:

—¡Ni nándèe Espíritu Ìi ini anima-nsiá, cachí!

²³ Nú nì cuicáhnù ini-nsiá sàhà cuàchi nèhivì, dandu ñà-sàni ndutu ndisa-ña cundua; te nú màsà cuicáhnù ini-nsiá sàhà-né, dandu iá Ìi cuàchi-ne —nì cachi-yà.

Nansa nì sàà Tomás nì xinindisá-né ñà-nì natiacu Jesús

²⁴ Doco nùu ùxin ùi nècuàchì dacuahá-yà, iin-ne cóni ía-ne xì compañeru-ne na ní ndecunu Jesús nùu-né. Divi Tomás nduú nècuàchimà, te Cuatí cachí stnà nèhivì xì-né.

²⁵ Ñâyùcànduà, nì cachi compañeru-nè xì-né:

—Cunaha-ní, ¡sàni xini-nsi Stoho-ndà Señor!

Doco mii-né, nì cachi-nè:

—Dècuèndè cundehí yantà ndahà-yà ndé nì ìhi clavu, te daquíhvi òinindàhì ndé nì xida mà, te daquíhvi stnái ndahí ndé (nì nacuehè) diin tixi-yà, te nú cóo, mà cúinindisè —nì cachi-nè.

²⁶ Daaní, na ní xinu inga ùnà quivì, nì nataca tu nècuàchì dacuahá-yà ini vehe. Doco daa ndisa ía stnà Tomás xì nècuàchì ndòò-mà. Te ndiadí vâha tu yehè. Te nì sàà Jesús inga xichi nì sàcùin-yà mahi-né, te nì cachi-yà:

—Contentu nì cúndóó-nsiá.

²⁷ Dandu nì cachi-yà xì Tomás:

—Yohó daquíhvi-ní òinindàhà-ní, te cundehè-ní ndahí; dandu daquíhvi-ní ndahà-ní diin tixi. Te cunindisá vâha-ní. Màsà cachí gá-ní có-xinindisá-ní.

²⁸ Dandu nì cachi Tomás xì-yà:

—Stohì Señor nduu-ní, vâchi Dios nduu-ní.

²⁹ Dandu nì cachi-yà xì-né:

—Tomás, sàhà-ñá nì xininùu-ní yùhù, ñâyùcànduà nì xinindisa-ní. Vihi gá ndiaha cundua nú nì cúinindisá-nsiá mate tâñáha ga cuninùu-nsiá yùhù —nì cachi-yà.

Ñà-nduà disàhà-xí nì tiaa Juan tutu yohó

³⁰ Cunaha-nsiá, cuahà gá stnà milagru nì quida Jesús nì indehè nècuàchì dacuahá-yà, doco cóni tiàà nsiha nùu tutu yohó.

³¹ Doco ñà-nduà cachí nùu tutu yohó, nì tiaa-ña sàhà-ñá nì sàà-nsiá cunindisá-nsiá divi Cristu Dèhemani Dios nduú Jesús. Vâchi nú sàni xinindisá-nsiá ñà-jaàn, te ndácùcahan-nsiá quivì-yà, dandu vida ndiaha sàni nìhì stnà-nsiá.

21

Nansa nì ndecunu Jesús nùu ùsà nècuàchì dacuahá-yà

¹ Daaní, nì nsihajàn, dandu nì ndecunu tu Jesús nùù nècuàchì dacuahá-yá na ndoó-né iin xaan yuhù mar nani mar Tiberias. Cuàhìn nacani xì-nsiá nansa nì cuu na ní ndecunu-ya nùù-né yucán.

² Cunaha-nsiá, cutnáhâ Simón Pedro xì Tomás nècuàchì nani Cuatí, te cutnáhâ stná Natanael nècuàchì ñiñúù-xì nani Caná iá ladu Galilea. Te ndoó stná (ù) ðehe Zebedeo, xì stná inga ùi nècuàchì dacuahá-yá.

³ Te nì cachi Simón Pedro xì nsidaa-né:

—Cuàhìn taví siaca.

Dandu nì cachi compañeru-nè:

—Nì cùhùn nsidaa-nda.

Ñàyücàndüá, nì sàcùñuhu nsidaa-né ini iin lancha cuàhàn-nè; doco ni-iin siaca cóni nihì-né niù yacà.

⁴ Daaní, na sàcuàhàn nì tùinuù, yucán nì sàà stná Jesús, iin-yá yuhù mar (yatni ndé ndoó-né) mà. Doco cóni nácùnì-nèyà.

⁵ Ñàyücàndüá, nì cachi-yà xì-né:

—Hijos, ¿a sání nihì-nsiá ñà-caxì-ndà?

—Còó, còò ni-iin-sì —nì cachi nècuàchì mà.

⁶ Dandu nì cachi-yà xì-né:

—Ladu cuahá lancha, jaàn dacaná-nsiá ñunù xì-nsiá, dandu nihì-nsiási —nì cachi-yà.

Dandu ducán nì quida-ne, te ni mà cùù gá tavà-né ñunù xì-né ñà-chitu guá' cuàhà siaca nì nihì-né.

⁷ Dandu iin nècuàchì dacuahá-yá, divi nècuàchì màni guá nùù-yá, nì cachi-nè xì Pedro:

—Divi Stoho-ndà Señor nduú Yà-yohó!

Nì nsihi nì inini Simón Pedro ñà-divi Stoho-ndà Señor nduú-yá, dandu nì nàcùndixi-ne sacù-nè, vàchi cuisì sicoto inì-xì ndixì-né. Dandu ní ndàvà-nè mahì tècuù cuàhàn-nè.

⁸ Te después cuàhàn stná dava ga nècuàchì dacuahá-ma, doco ini lancha cuàhàn-nè, vàchi yatni iin-nu nùù ñuhù íchì, nahì 100 metro. Te cahà-nú itácáá ñunù chitu siaca.

⁹ Dandu nì nuu nècuàchì yucán ñuhù íchì, te nì xini-nè yucán ndoó tnùù sàxìxin, te sà-itàndoó stná siaca chòhò. Te iá stná pan.

¹⁰ Dandu nì cachi Jesús xì-né:

—Cuahán-nsiá quihìn-nsia itnii siaca nì tavà-nsiá.

¹¹ Ñàyücàndüá, nì nana tu Simón Pedro lancha, te nì ditá-nè ñunù mà nì naxìnuu ndè nùù ñuhù íchì. Chitu ñinì ñunù mà siaca, vàchi ñuhù 153 siaca nahnú. Mate cuàhà gá-sì ñuhù, doco cóni sàchì ñunù mà.

¹² Dandu nì cachi Jesús xì nsidaa-né:

—Naha-nsiá, cadì inì-nsia.

Te ni-iin nècuàchì dacuahá-ma, cóni sàha ndee ini-nè ndàcàtnùhù-né nùù-yá ana nduú-yá, vàchi ináhà-nè divi Stoho-ndà Señor nduú-yá.

¹³ Dandu nì tnàtuu Jesús nì tnii-ya pan, te nì dasàn-yáñà nùù-né. Te nì dasàn stná-yà siaca (nì chòhò mà) nùù-né.

¹⁴ Ñà-jaàn nì sanduu ùni xichi nì ndecunu Jesús nùù nècuàchì dacuahá-yá na sání natiacu-yá.

¹⁵ Daaní, na ní nsihi nì sadi ini nsidaa-né, dandu nì cachi-yà xì Simón Pedro:

—Simón, ðehe Jonás, ¿a ñà-ndàà chicá cuú ndisa inì-ní sàhì nùù nècuàchì dava ga yohó?

—Jaan, Señor mío. Sà-ínáhà-ní cuú inì sàhà-ní —nì cachi-nè.

Dandu cachì tu-ya xì-né:

—Nú ndisa, dandu cundiaà-ní nèhivì xì na ian ndiaá pastor lelù xì-né.

¹⁶ Daaní, ñà-ùì nì cachi-yà xì-né:

—Simón, ðehe Jonás, ¿a cuú ndisa inì-ní sàhì?

Te nì cachì tu-ne xì-yá:

—Jaan, Señor mío. Sà-ínáhà-ní cuú inì sàhà-ní.

Dandu cachì Jesús xì-né:

—Dacúndèhe-ní (nèhivì-xì íchì váha), na ian ndiaá-ndà riì.

¹⁷ Daaní, ñà-ùì nì cachi tu-ya xì-né:

—Simón, ðehe Jonás, ¿a ñà-ndàà nduá, cuú ndisa inì-ní sàhì?

Pues vichì nì cuhuun inì-nè ñà-sà-ùni xichi ndàcàtnùhù-yá a ndísá cuú ini-nè sàhà-yá, á coó. Ñàyücàndüá nì cachi-nè xì-yá:

—Señor mío, nsidanicuú ñàhà ináhà-ní. Ñàyücàndüá, ináhà stná-ní, yuhù cuú ndisa ini sàhà-ní.

Dandu nì cachi-yà xì-né:

—Pues nú ducán, dandu cundiaà-ní nèhivì xì, na ian ndiaá-ndà riì xì-ndà.

¹⁸ Cunaha-ní, ñà-ndáà nduá cuàhìn cachitnùhi xì-ní yohó: na cuachi-ní, (nìsà nàcùndixi-ní sicoto xì-ní), nì sansidatnuu-ní cinturón xì-ní, te cuàhàn-ní ndéni nì cui cudí inì-ní. Doco nú sàni sahnú-ní, dandu icúmí-ní ndanihi-ní ndahà-ní, te inga-nè icúmí-nè nsidatnuu-ne cinturón xì-ní, te cunihi-ne mii-ní cùhùn ndé có-cudí inì-ní cùhùn-ní.

¹⁹ Ñà-jaàn nduá nì cachi Jesús cachitnùhu-ya nansa quida nèhivì xì Pedro na quivì cui-nè, te ducán chicá quee tñùhu xí Dios.

Nansa icúmí cuu xí Juan

Daaní, nì nsihi nì cachi-yà ñà-jaàn, dandu nì cachi tu-ya xì Pedro:

—Cunchicùn-ní yùhù.

²⁰ Daaní, nì nacuico Pedro yàtà-né, te nì xini-nè nchícùn stná nècuàchì dacuahá cuú guá inì-yà sàhà-xí. Te divi nècuàchimà nduú nècuàchì nì ìa yatni òin Jesús na ní sandoo-ne nì xixí-ne xì-yà daa, te nì xicàn tñùhù-né nù-yà nì cachi-nè: “Señor mío, ¿ana divi nduú tìa icúmí cahìn xì-ní?”

²¹ Pues, divi nècuàchimà nì xini Pedro nchícùn vaxì, te nì cachi-nè xì-yà:

—Te nècuàchì jaàn tú, ¿nansa icúmí cuu xì-né, Señor mío?

²² Dandu nì cachi-yà xì-né:

—Pues nú cudí inì cutiacu-nè ndé cachi sàà quivì naxicocuñ, doco mii-ní, màsà nácánì inì-ní sahàjàn. (Chuun xì-ní nduá) ñà-cunchicùn-ní yùhù —nì cachi-yà.

²³ Ñàyücànduá, nì xitià cuentu nù nèhivì xì-yà, ñà-mà nunca cui nècuàchì dacuahama, cachi cuentu. Doco cóni cachi-yà mà cù-nè. Còó, cuisì ní cachi-yà nú cunì-yà cutiacu-nè ndé cachi sàà quivì naxicocuñ-yà, màsà nácánì inì Pedro sàhámà.

²⁴ Cunaha-ní, divi nècuàchimà nduú yùhù, te divi yùhù nì tìa nsidaa palabra yohó. Te ñà-ndácuisi nduá cachí, vachi ináhi cachí ndài xì-nsiá.

²⁵ Cunaha-nsiá, cuàhà gá stná inàha iá nì quida Jesús (ñuhivì yohó). Doco nú cunì-ndà tìa nsihi-nda nsidaámà, dandu cuàhà sàstnùhù libru cundua. Te mà cuàhà-ñá nì inicutu ñuhivì, cachi yùhù. Sà-ia.

Chuun Nsiha Nì Caquida Nècuàchì Nì Nìhì Chuun Ì nùù Jesús

Nansa ni quida Jesús comprometer icúmi quixi Espíritu Ì xí Dios

¹⁻² Cásàhùì xì mii-ní señor Teófilo. Cunaha-ní, tutu ni tiai primeru, nacáníámà sàhà ñà-nduá ni quida Jesús xì ñà-nduá ni chinaha-yà ndé quivi ni quesaha-yá xì ndé quivi ni nana-ya mànuhù-yá ansivi. Doco na táñàha ga nùhù-yà, dandu ni càhàn-yà xì apóstol ana ni sàhatahvi-yá chuun xi-ya; sàhà poder xi Espíritu Ì xí Dios ni càhàn-yà xi-né ni dándà-cù-yá nùù-né nansa quida-ne.

³ Vàchi antes, na ní nsihi ni ndoho-ya, te ni xihì-yà, dandu vivu ni ndecunu-ya, te ni xini-nèyà ñà-sàni natiacu-yà, ùi dico quivi ni ndòo ga-yà ñuhivì, te cuàhà xichì ni ndecunu-ya nùù-né, te cuàhà gá stná ñà-nduá ni quida-ya sàhà-ñà cundaà ndisa ini-nè divi nduú-yá. Te ni càhàn stná-yà xi-né sàhà chuun xi ñuhivì ùi xí Dios.

⁴ Daaní, na iá va-ya xi-né, ni cachi-yà xi-né ñà-màsà quéé yàchi-nè ñuu Jerusalén:
—Còó —cachi-yà— yohó cundiatu-nsia dècuèndè nihitáhvi-nsiá cuu xi-nsiá nacua sàni quida Yuamánì comprometer, divi ñà-nduá ni cachi stnàì xi-nsiá antes.

⁵ Vàchi ñà-ndáà nduá, tècui nisa quida ùi Juan nèhivi. Doco mii-nsiá, tixi Espíritu Ì xí Dios icúmi anima-nsiá nduhùì tixi saca quivi —ni cachi-yà.

Nansa mànana Jesús mànuhù-yá gloria

⁶ Daaní, ni nataca tu nsidaa nècuàchì dacuahá-yà-mà nùù-yá, te ni xicàn tnùhù-né, cachi-nè:

—Stoho-nsi Señor, ¿a vichi nacání ini-ní quee libre ñuu-ndà Israel quida-ní?

⁷ Dandu ni cachi-yà xi-né:

—Cò-sàhatahvi Dios mii-nsiá ñà-cunaha-nsiá indù iin quivi, ò indù iin tiempu cuu ñàha. Còó, vachi cuisì Yuamánì iá ansivi chítùnì ini-xi sàhà nsidaájàn.

⁸ Doco mii-nsiá, icúmi-nsiá nihitáhvi-nsiá quivi quixi fuerte Espíritu Ì ini anima-nsiá, dandu inicutu icúmi-nsiá càhàn-nsiá sàhì. Primeru ñuu Jerusalén yohó càhàn-nsiá, te ducán stná iniì ladu Judea, xi stná ndé ladu Samaria xi dècuèndè stná inicutu ñuhivì

⁹ —ni cachi-yà.

Daaní, indéhe-né ni ndanchito-ya mànana cuisì-yá ansivi, te ni dàhvi-ya nùù-né mahì iin vicò mànuhù-yá.

¹⁰ Te na indéhe váha-ne ansivi ndé mànana-ya, dandu yucán ndé itá-né ni sàcuita stná ùi ana ndixin cuxín.

¹¹ Te ni cachi nècuàchì mà xi nècuàchì xí-indehè mà:

—Mii-nsiá nècuàchì ñuu Galilea, có-nduá cundehè gá-nsiá ansivi, vachi divi Jesús ni xini-nsiá mànuhù yucán, icúmi-yà naxicocuñn-yà. Vàchi nacua iá-yà mànana-ya mànuhù-yà, divi ducán icúmi-yà naxicocuñn-yà nuu-ya.

Nansa ni quee Matías nombradu cundehè-né chuun xi Judas

¹²⁻¹³ Dandu nsidaa nècuàchì apóstol mà, ni nuu-ne yucù Olivo yucán, mànuhù-né ñuu Jerusalén, vachi yatni iá ñuu mà nùù yucù yucán, nahi dava hora caca-nda. Te na ní nasaa-nè, ni yàha-ne ndé iin vehe idótnahá, ni canana-ne diqui-xí ndé ndoó-né. Te nèhivi ndoó yucán, dohó nani-né: Pedro, xi Jacobo, xi Juan, stná Andrés, xi Felipe, xi Tomás, xi Bartolomé, xi Mateo, xi stná dèhe Alfeo nani stná Jacobo, xi stná Simón Zelote, xi ñani Jacobo mà nani Judas.

¹⁴ Nsidaa nècuàchì mà, iin-ni nihnù ini-né, te iin-ni xicàn tàhvi-né nùù Dios, mii-né xi stná ñani Jesús, xi dihi-yá María, xi más gá stná nècuàchì ñàhà.

¹⁵⁻¹⁶ Daaní, quivi yucán ni nataca nsidaa nèhivi nichìcùn ichì-yá. Na iin cientu òcò xínduu-ne. Te ni ndacuiin Pedro mahì nsidaa-né, cachi-nè:

—Ñàni, sàhana ni chindee Espíritu Ì xí Dios xii-ndà David, te ni tiaa-ne ni cachtìnhu-ne sàhà Judas, divi tiaa ni sacatnahá xi nècuàchì ni tñii xi Jesús. Te ducán ni cuu, vachi ñà-nduá ni cachi Dios sàhana ma, fuerza ni cuu ndisa-ña.

¹⁷ Vàchi Judas mà, nisa cutnahá-né xi-ndà, iin-ni chuun nisa quida-nda xi-né antes.

¹⁸ Doco ni quida-ne iin cuàchi, ni tñii-ne dihnùn, te sàhà dihnùn mà ni xiin-ne iin ñuhù. Dandu ni nacava candéé-né yucán, ni cahnsi ùi-né ni quecoyo ùi sisi-né.

¹⁹ Te nsidaa nèhivi ñuu Jerusalén yohó, ni xinitnhù stná-nè sàhà mà. Ñàyùcànduá ni sàcùnani ñuhù mà Acéldama, te cuní cachi quivi mà: “Ìn ñuhù ndé ni xitiá niì”.

²⁰ Vächì ducán nì cachitnùhu libru ndé itándiaa alabanza ì ndé cachá': "Ni ndóo nihni vehe-ne. Màsà cúndóó gá nêhivì yucán". Te cachí stná tutu mà: "Ni ndóo chuun xi-ne nùu inga nêhivì".

²¹⁻²² Ñâyücándüá, xiñuhu nanducu-nda inga tiàa chindee tnaha-xi-nda cachitnùhu-nda xi nêhivì ñà-sàni natiacu Stoho-ndà Jesús. Doco icúmì-nè cunduu-ne iin ana sàni cutnahá xi-nda inii tiempu nisa xicanuu-ya mahì-ndà dècuèndè tiempu nisa quida ì Juan xì ndé quivì nì nana-ya ansivì cuàhàn-yà —nì cachì Pedro.

²³ Ñâyücándüá, nì catavà-né ùi nêhivì. Iin-ne nani José Barsabás, te Justo nduú inga quivì-né. Daaní, inga nèmà nani Matías.

²⁴⁻²⁵ Dandu nì xicàn tàvhi nsidaa-né nùu Dios, cachí-né:

—Stoho-nsi Señor, ináhá-nì nansa iá anima nsidaa nêhivì. Ñâyücándüá, nùu ùi tiàa yohó cuàha-ní nsìhùu ìni seña índu nêcuàchì cundehe chuun xi-ní cuenta xi Judas, vächì nêcuàchimà, sàhà cuàchì-ne, ñâyücándüá nì ndóo chuun xi-ne, te cuàhàn-né ndé nì nchihò ini-né cùhùn-né —nì cachì-né.

²⁶ Dandu nì caquida-ne iin sorteu, te nêcuàchì nani Matías mà nì quee nombradu ñà-cutnahá stná-né xì ùxin iin ga nêcuàchì apóstol.

2

Nansa nì nuu Espíritu Ì xì Dios

¹ Daaní, meru quivì nducáhnù vicò Pentecostés, dandu iin-ni xaan nì nataca nsihì nêcuàchì nchícùn ichì mii-yá.

² Ndoó-né, te nanàá nì tiacu-né ndé dìquì-xì ansivì na ian cahá fuerte guá tàchì, te nì tiacu inii ini vehe ndé ndoó-né.

³ Dandu nì xini-né nchíi ñuhu cuati nahi yáá-ndà, te nì xitià nihnia, iin ian nì ndóo òini iin iin nêhivì yucán.

⁴ Te nsidaa-né, nì chitu anima-né Espíritu Ì xì Dios, te nì quesaha-né cáhàn-né dàhàn sàa segùn nansa nì dàtnùu Espíritu Ì sàxínitnùni iin iin-ne.

⁵ Cunaha-ní, ñuu Jerusalén yucán ndoó cuàhà nêcuàchì raza Judea nì caquee nùu nsidaa ñuu inicutu ñuhiví. Nêhivì càhvì víi xi Dios nduú-né.

⁶ Te na ní tiacu-né cáhàn guá nêhivì yucán, dandu nì nataca cuàhà-né, te yáha ga nì ndulocó-né, vächì iníni-né cáhàn nêcuàchimà dàhàn cada iin iin ñuu nêcuàchì nì nataca iníni má.

⁷ Ñâyücándüá, nì ndulocó nsidaa-né, nacáni ini-né, cachí-né iin-ne xì inga-né:

—Amádi puru nêcuàchì ñuu Galilea xínduu nêcuàchì cáhàn guá yohó.

⁸ Doco vichì iníni-ndá cáhàn-né dàhàn nì sahnu cada iin iin ndohó. ¿Nansa cui quida-neàmà?

⁹ Vächì mii-nda, cuàhà ñuu nì quixi-nda: ñuu Partia, xì ñuu Media, xì ñuu Elam, xì ñuu Mesopotamia, xì ladu Judea yohó, xì ñuu Capadocia, xì ñuu Ponto, xì ladu Asia,

¹⁰ xì ladu Frigia, xì ladu Panfilia, xì ñuu Egipto, xì stná ladu Africa iá nùu-xì ñuu Cirene, te yohó ndoó stná nêcuàchì Roma, nduú-né nêcuàchì raza Judea, te nduú stná-né nêcuàchì nì yàha ndè religión xi raza mà.

¹¹ Daaní, ndoó stná nêcuàchì ñuu Creta, xì stná nêcuàchì ladu Arabia. Doco nsidaa-nda iníni-ndá cáhàn nêcuàchì yohó dàhàn iin iin-nda, ndeníhí vaha-ne Dios sàhà obra ndiaha quidá-yá —nì cacachi-né.

¹² Ñâyücándüá nsidaa nêcuàchì iníni yucán, nì ndulocó cuàhà-né, nacáni cuàhà ini-né, ndácàtnùhù tnàhá-né nùu-né, cachí-né:

—¿Ndíá nduá cuní cachì ñà-yòhó?

¹³ Doco dava ga nêhivì, nì sàcúndiaa uun-ne, cachí-né:

—Ádi xini nsidaa nêcuàchì jaàn nì quida vinu fuerte —cachí-né.

Ñà-ndüá nì cachì Pedro xì nêhivì cuàhà

¹⁴ Dandu Pedro, iin-né cutnahá-né xì ùxin iin nêcuàchì icúmì stná chuun nùu Jesús, te ndee nì cáhàn-né xì nsidaa nêcuàchì sàni nataca yucán, cachí-né:

—Mii-nsiá tè-ndùu ñanitnaha raza-ndá Judea, xì nsidaa mii-nsiá nêcuàchì ndoó ñuu Jerusalén yohó, cunini-nsia cuàhàn càhàn.

¹⁵ Xini-nsi tuxì ini-nsia, doco cóo. Có-ndüá ñà-xini-nsi, vächì làcà ní cahin vitni.

¹⁶ Cóo, ñà-ndüá cáhàn nêcuàchì yohó, divì nduú ñà-ndüá nì cachì Joel sàhana na ní cachitnùhu-ne iin razón ndiaha xì Dios.

¹⁷ Te dohó cachí-yà, nì cachì Joel mà:

Quivì xinu tiempu, cuàhà icúmí cuàhatahví nsidaa nèhivì Espíritu lì xí. Ndè dèhe ii-nsiá xì dèhe yoco-nsiá, icúmíá càhàn ñà-ndúú razón ndiaha xí. Te tiàa cuachi, icúmí dacuní nùí-nè cuàhà ñà-ndiaha; xì stná nècuàchì sahnú, icúmí quixi stná sani nùù-né.

¹⁸ Te quivì yucán, cuàhà icúmí cuàhatahví nècuàchì xinúcuàchì nùí, tiàa-ne te ñahà-né, cuàhà gá icúmí-nè nihitáhvi-né Espíritu lì xí, dandu càhàn-nè ñà-ndúú razón xì.

¹⁹ Te dìquì-xí ansivi icúmí cuu cuàhà stná milagru fuerte quide, xì stná ñuhiví yohó, icúmí stná-nsiá cuni-nsiá milagru ndiaha xí. Vàchi icúmí cucuu nùí, te cucuu ñuhu, te cucuu ñuhmà nahi ñuhmànsivi.

²⁰ Doco dìhna icúmí ndàhvà orá, xì stná yoo, icúmí-sì nducuahá-si nahi nùí, dandu sàà quivì xì yùhù ana nduú Stoho-nsiá Señor.

²¹ Te nsidaa ana ndacùcahan xì quivì, icúmí-nè càcu-ne, nì cachi-yà.

²² 'Nsidaa-nsiá nècuàchì ñanitnaha raza Israel, cunini vâha-nsia ñà-nduà cuàhìn cachi: nì quixi Jesús de Nazaret nì xicanuu-ya mahi nsidaa-nda, te ndiaha gá nì quida-ya nacua cuní Yua-nda Dios, vâchi sàhà poder ndiaha xí Dios nì quida-ya cuàhà milagru fuerte, cuàhà milagru ndiaha. Ináhà vâha-nsia sàhà ñà-jaàn.

²³ Doco Dios, nì chitnùnì ini-yà ñà-tnii-nsia Jesús, te coo-ya ndahà-nsiá. Te divi ducán nì cuu, vâchi ináhà Dios nansa cuàhàn cuu xì (Dèhemani-yá) Jesús. Ñâyùcànduà, nì tnii-nsiayà, te nì sahnì-nsiáyà, vâchi iin-nì nì ndatnuhu-nsiá xì tiàa malu, te nì cachituu-tèyà nchìca cruz.

²⁴ Doco nì dānātiácu Yua-nda Dios-yà, nì tavà-ñâyà nùù tnùndoho ñà-nì xihì-yà, vâchi có-nduà ducán ndòo-ya tixi ñuhù.

²⁵ Te divi ducán nduà nì cachitnùhu stná David sàhaha sàhà-yà, vâchi dohó nì cachi-nè:

Dios nì quide cuenta cutnàhá-xì nicanicuahàn, vâchi yatni iá-yà ladu cuahf sàhà-ñà màsà dáyùhì nèhivì yùhù, te quidi yùhù.

²⁶ Ñâyùcànduà, cuàhà gá nì cudìi ini animé, te nì naquimaní (mii-yà), vâchi mate nì ndùxin iquicùñùí, doco ináhì iá tnùndé ini xì.

²⁷ Vâchi dohó sàni cachi xì Dios: "Ináhì, mà nácóo-nì animé ñà-ndòa ndé ndòo vâha anima nècuàchì nsi; còo, yùhù tè-ndúú dèhemani-ní, mà cuàha-ní tnani iquicùñùí ñuhù.

²⁸ Sàhà mii-ní sàni sàni nì cundaa ini nansa iá ichì cutiacu ndiahi; icúmí-ní dacúfì ini-ní yùhù, vâchi seguru icúmí naxicocuñin cundehì nùù-ní", nì cachi David.

²⁹ 'Doco ináhà-ndá nì sàà xii-ndàmà nì xihì-nè, ñáni, dandu nì ndùxin-ne, (ináhà-ndá), vâchi ñuu yohó nduú ndé indùxin-ne, te ndé vichi nàhá lugar mà.

³⁰ Doco iin ana tùha cachitnùhu razón xì Dios nì sanduu stná nècuàchimà, ñâyùcànduà ináhà stná-nè ñà-sàni quida Dios comprometer ñà-divi Cristu cunduu iin descendencia xi-ne, te seguru cusahnú stná-yà nacua nisa cusahnú mii-né.

³¹ Ñâyùcànduà, nì dacuní Dios-nè iñàha, te nì xini-nè nansa cuàhàn cuu xì Cristu ñà-icúmí-yà natiacu-yà, mà ndòo anima-yà ndé ndòo vâha anima nsi, nì mà tnání stná iquicùñùí-yà ñuhù.

³² Te divi ducán nì cuu, nì natiacu-yà nì quida Yua-nda Dios. Ináhà-nsì, vâchi testigu nduú-nsì.

³³ Dandu después dècuendè gloria mànana ducún-yà nì quida ndahà cuàhá Yua-nda Dios, te divi nduú ana nì quida comprometer cuàhatahvì stná-yà Espíritu lì xí-yà. Ñâyùcànduà sàni dàquixí fuerte Jesús Espíritu lì, te ñà-jaàn nduà disàhà-xì cuú ñà-nduà xini-nsiá te iníni-nsiá vichi.

³⁴ Doco nsi-David (sàhaha ma), tãñàha ga nana ducún-nè ndè ansivi; còo, vâchi palabra yohó nduà nì cachi-nè:

Nì cachi Dios xì Stoho yùhù: "Yohó coo-ní ladu cuahf

³⁵ ndè cachi sàà cundei nùù nsidaa ana xiní ùhì xi-ní, dandu cusahnú fuerte-ní nùù-né".

³⁶ Ñâyùcànduà, mii-nsiá xì dava ga stná nècuàchì Israel, nì cúnáhà vâha-nsia ñà-yohó: mate nchìca cruz nì chituu-nsia Jesús, doco nì chitnùnì ini Dios ñà-divi mii-yà cunduu Stoho-ndà, te cunduu stná-yà rey ndiaha Cristu —nì cachi Pedro.

³⁷ Daanì, nì nsihi nì inini nèhivì cuàhà mà ñà-jaàn, nì nàcùndoo-ne tnùnsi ini. Cuàhà gá nì nacani ini-nè, te nì cachi-nè xì Pedro xì dava ga nècuàchì apóstol:

—¿Nansa chicá vâha quida-nsì vichì, ñáni?

³⁸ Dandu nì cachi Pedro xi-né:

—Icúmí iin iin-nsia naxicocuñin ini-nsia sàhà cuàchi-nsia, te cuhii-nsiá, ndacùcahan-nsiá quivì Jesucristu sàha ñà-dùcàn ndoo cuàchi anima-nsiá, te nihitáhvi-nsiá nandèe Espíritu lì xí-yà anima-nsiá;

³⁹ vâchi sàni quida Stoho-ndà Dios comprometer ñà-icúmí-ndá nihitáhvi-ndá Espíritu lì xí-yà nú nì cúnindísá-ndá na caná-yàndó. Vátùni nihitáhvi-ndá, mii-nda, xì stná dèhe-nda, xì stná anà-nì nì cui mate xica gá xindoo-ne.

⁴⁰ Ducán nì cachi Pedro xì nsidaa nècuàchìmà, vèchi cuàhà gá nì càhàn-nè nì dàtúi-ne ichì-yá nùu nècuàchìmà; te dōhō nì cachi stnà-nè:

—Nèhivì tiempu vichì, icúmí-nè ndañuhu-né, vèchi malu-nè. Ñàyúcàndüá, nacoo-nsianè, te càcu-nsia —nì cachi Pedro.

⁴¹ Daaní, cuàhà gá nècuàchì yucán, nì cudíi ini-nè palabra nì inini-ne mà; nahi ùni mil nèhivì nduú-né, te nì yàha-ne ladu xì nècuàchì xiníndísá. Te divì quívi yucán nì cuhíi nsidanicuú-né.

⁴² Daaní, iin-ni nì quesaha-né nchícùn-nè palabra dacuahá nècuàchì apóstol. Mání mání ndoó-né, xixí tàcá-nè, te iin-ni xicàn tàhvi stnà-nè nùu Dios.

Nansa nisa quida nècuàchì primeru cahvi xi Jesús

⁴³ Daaní, nsidaa nèhivì dava ga, yáha ga nì ndulocó-nè, vèchi (nì chindee Dios) nècuàchì apóstol, te nì caquida-ne cuàhà milagru fuerte, cuàhà milagru ndiaha.

⁴⁴ Te nsidaa nècuàchì xiníndísá xí-yá, iin-ni nihnú ini-nè, te nsidaa ñà-ndüá icúmí-né, nisa xichuún tàcá-nè.

⁴⁵ Te nú iá iin ñuhu xí-né, ò inga iñàha xi-ne, nì dicò-néá, nì tui dñhùn, te nì dasàn-né dñhùn mà según iá necesidad nùu iin iin-ne.

⁴⁶ Te nsiquívi nisa nataca-nè veheñùhu cahnú, te vehe vehe iin iin-ne nisa xixí tàcá stnà-nè, cudíi ini-nè, te ndóo vaha ini-nè,

⁴⁷ te ndeníhí vaha stnà-nè Dios. Te nsidaa nèhivì dava ga, cudíi stnà ini-nè sàhà nècuàchì xiníndísámá, te quidáñuhú stnà-nè nècuàchìmà. Te quívi quívi más gá nèhivì nì càhà nùu Stoho-ndà Jesús ñà-càcu anima-nè, te nì nacuaastnahá stnà-nè xì nèhivì xí-yá.

3

Nansa nì nduvàha iin tiàa mà cùu cáca

¹ Iin quívi cutnàhá Pedro xì Juan cuàhàn-nè veheñùhu cahnú. Càhúni nì cuaà cuàhàn-nè yucán, vèchi divì hora yucán nisa xicàn tàhvi nèhivì nùu Dios.

² Te iin yehè cahnú veheñùhu ma nisa nani Yehè Ndiaha. Te nsiquívi nisa saà nèhivì yehè mà nsidá-né iin tiàa mà cùu caca. De por sí ducán nì tuiñuú-né ñuhivì. Ñàyúcàndüá, yucán nisa chicoo nècuàchìmà-né sàhà-ñà càcàn-nè caridad nùu nècuàchì quíhvi yehè mà.

³ Pues vichì nì xini-nè Pedro xì Juan ñà-cuàhàn-nè quíhvi stnà-nè, te sàhámá nì xicàn-nè iin caridad nùu nècuàchìmà.

⁴ Ñàyúcàndüá nì candacoto nècuàchìmà ndé iá-nè, te nì cachi Pedro xì-né:

—Cundehe-ní yohó.

⁵ Dandu nì ndacoto-ne nùu Pedro xì Juan, cuàhàn-nè nihì-né iñàha cahan-né.

⁶ Doco nì cachi Pedro xì-né:

—Nì còo plata nihí, te nì còo stnà oro. Doco ñà-ndüá sái quide. Ndácùcáhin quívi Jesucristu de Nazaret, te cachi xì-ní ndacuiin-ní caca-ní.

⁷ Dandu nì tñii-ne ndahàcuàhá tiàa ma, nì ndacani-ne nècuàchìmà. Te vichì duha nì ndufuerté sàhà-né,

⁸ yàchì nì ndanchito-ne, nì ndacuiin-nè, te luegu nì quesaha-né xicá-né; nì quíhvi stnà-nè veheñùhu, cutnàhá-né xì Pedro xì Juan, nandávà nihni-ne, xicánúú-né naquímáni cuàhà-nè Dios.

⁹ Te nsidaa nècuàchì itá yucán, nì xini-nè xicánúú nècuàchìmà, ndeníhí vaha-ne Dios,

¹⁰ te nì nacuni-nè nècuàchìmà ñà-ndüú-né tiàa nisa ia Yehè Ndiaha veheñùhu cahnú xicàn caridad. Ñàyúcàndüá, cuàhà gá nì ndulocó nèhivì mà, nacání ini-nè sàhà ñà-ndüá nì cuu xì tiàa ma, te nì nduvàha-ne.

Nansa nì càhàn Pedro sàhù na iá-nè Portal de Salomón

¹¹ Lugar yucán nduú corredor nani Portal de Salomón. Te tiàa nì nduvàha ma, itnii ndàha stnahá vaha-ne xì Pedro xì Juan. Dandu nsidaa nèhivì veheñùhu yucán, nì nataca-nè ndé iá Pedro xì Juan, yáha ga ndulocó-nè.

¹² Ñàyúcàndüá na ní xini Pedro natàcà-guá nèhivì, dandu nì càhàn-nè xì nsidaa-né, cachi-nè:

—Nècuàchì ñuu-ndà Israel, ¿índü chuun ndulocó-nsià sàhà ñà-yohó? ¿Índü chuun indéhe vaha-nsia nsiùhù na ian nsiùhù nì dándüvaha xì nècuàchì yohó cahan-nsiá? Còo, màdi sàhà fuerza xi nsiùhù nì nihì nècuàchì yohó caca-ne, te nì màdi sàhà ñà-ii guá stnà-nsi. Còo.

¹³⁻¹⁴ Xii-ndà Abraham, xì Isaac, xì Jacob, nsidaa-né nisa cahvi-né Dios ndiaha xi-nda, te divì mii-yá nduú ana nì chitnùnì inì-xì ñà-cucumi Dèhemani-yá Jesús tñùñuhu ndiaha xí-yá. Doco mii-nsiá, nì dáyàha-nsiayà ndahà Pilatu, te nì nacuaà-nsiayà na ní cuni tèmà dañà-téyá. Ana ii ndisa nduú-yá, te ndàà cuisì ini-yá, doco (cóni ndulocó-nsià), iin tè-sàhni nì xicàn-nsià dàñà.

¹⁵ Dandu ni sahnì-nsiàyà, mate divi sàhà mii-yá itiacú-ndà. Doco (Yua-nda) Dios, ni ònàtiácú-yà Jesús. Ináhà-nsì, vâchi testigu nduú-nsì.

¹⁶ Te cunaha-nsiá, divi sàhà ñà-nihnú vâha ini-nsì mii-yá, te ndâcùcahan-nsì quivì-yá, ñâyùcândüà ni ndufuerté tiàa yohó. Indêhe-nsiánè, ináhà-nsiánè. Náhà xicà sàni nduvâha vâha-ne ñà-nì xinindisá stná-nè mii-yá.

¹⁷ Te vichi sàni sànhì ini ñà-cóni cundáà ini-nsia nduá, ñànì. Stná nècuàchi cusáhnú nùu ñuu-ndà, ni cóni cundáà stná ini-nè, ñâyùcândüà ni quida-nsia ducán.

¹⁸ Doco ñà-nduá ni cachitnúhu Dios sàhana, divi ñà-jaàn nduá ni cuu ndisa ni quida-ya. Vâchi ñà-icúmí Cristu ndoho-ya, divi nduá nisa cachi nsidaa nècuàchi profeta sàhana. Te ducán ni cuu ndisa.

¹⁹ Ñâyùcândüà, naxicocuñ inì-nsia sàhà cuàchi-nsia vichi, te natenchicùn-nsià ichi mii-yá sàhà-ñà ndutu cuàchi-nsia, dandu quixi tiempu cundoo ndiaha-nsiá quida-ya,

²⁰ te techuún-yá Jesucristu ndixi-ya, vâchi divi-ya nduú ana ni chitnúni ini Dios cunduu rey ndiaha xi-nda.

²¹ Doco vichi iá-yà gloria, te yucán icúmí-yà coo-ya ndè cachi sàà tiempu nsida vii-yá nsidaa iñàha. Vâchi ducán ni cachitnúhu nèhivi xí Dios sàhana na ní càhàn-nè ni quida-ya.

²² Vâchi ñà-ndâcuisi nduá ni cachitnúhu Moisés xi xii-ndà sàhana na ní cachi-nè palabra yohó: “Icúmí Stoho-ndà Dios nacâxin-ya iin descendencia xi-nda cunduu ana càhàn cuenta xi-ya. Te divi nacua ni quida yùhù, ducán icúmí quida stná ana quixi ma. Dandu mii-nsiá, icúmí-nsiá cunini-nsia nsidaa ñà-nduá cachi-yà xi-nsiá.

²³ Te nú ni coó iin nècuàchi có-cùni cunini xi-yá, dandu icúmí nècuàchimà ndañuhu-né ñuu-nè”, ni cachi Moisés.

²⁴ Cunaha-nsiá, nsidaa nècuàchi sàhana nisa càhàn cuenta xi-ya, inii décuèndè tiempu nisa càhàn Samuel te vâxi duha, nsidaa-né ni càhàn-nè sàhà tiempu vitni.

²⁵ Te vichi, mii-nda nduu-nda dèhe nècuàchi nisa càhàn razón mà. Ñâyùcândüà icúmí-ndá nihitâhvi-ndà ñà-ndiaha ñi ni quida Dios comprometer xi xii-ndà na ní saquin-yà tratu xi Abraham, te ni cachi-yà palabra yohó: “Sàhà iin descendencia xi-ní icúmí quixi ñà-ndiaha ñi cundiatú anima nsidanicuú nèhivi ñuhiví”, ni cachi-yà.

²⁶ Ñâyùcândüà, dihna ndohó nècuàchi (ñuu yohó) ni nihitâhvi-ndà, vâchi divi chuun jaàn ní sàhatahvi Dios Dèhemani-yá (Jesús), ni quixi-ya ndè ndoo-nda ñà-cundiatú anima nsidaa-nda nú ni náxicocuñ ini-ndà, te nacoo-nda ichi malu nchicùn-nda —ni cachi Pedro.

4

Ñà-nduá ni cuu na ní càhà Pedro xi Juan nùu Junta Cahnú

¹ Daaní, na meru càhàn-nè xi nèhivi yucán, dandu ni caquesaa nècuàchi nduú dùtù ndé itá-nè, cutnáhà nècuàchimà xi comandante ndiaá veheñùhu cahnu-ma, te cutnáhà stná-nè xi nècuàchi saduceu,

² có-ndòo ini-nè ñà-chináhà Pedro xi Juan sàhà nansa natiacu-ndà quida Jesús.

³ Ñâyùcândüà, ni tnii-ne nècuàchimà ni chicadi-ñánè vehecàa, te sàhà ñà-sàni cuàa, ñâyùcândüà ni candò-ne yucán ndè inga quivì.

⁴ Doco nècuàchi ni inini ni càhàn Pedro xi Juan palabra xi Dios, cuàhà-né ni xinindisá-né, ndè ùhùn mìl sàni nanduu nècuàchi tiàa xiníndisá.

⁵ Daaní, inga quivì ni nataca nècuàchi cusáhnú, xi nècuàchi sahnú nchichí, xi nècuàchi ley xi veheñùhu, nsidaa-né ni nataca-nè

⁶ ñuu Jerusalén yucán. Te ni sàà stná dùtù cusáhnú nani Anás, xi stná Caifás, xi Juan, xi Alejandro, xi nsidaa dava ga traha dùtù cusáhnú má.

⁷ Dandu ni favà-né Pedro xi Juan ñà-cundaca trahá-né quixi, te ni sàcùita nècuàchimà dava mahi-xí. Dandu ni candacâtnùhù nècuàchi Junta mà nùu-né, cachi-nè:

—¿Ana divalor-xi ni càhàn-nsià sàhà-xí ni quida-nsia ñà-nduá ni quida-nsia? ¿Ana òiquivì-xí ni ndacùcahan-nsiá?

⁸ Dandu fuerte ni quixi Espiritu ñi xí Dios ini anima Pedro, te ni naxiconihí-né nùu nècuàchimà, cachi-nè:

—Mii-nsiá nècuàchi xícusahnú ñuu-ndà yohó, xi mii stná-nsià nècuàchi sahnú nchichí raza-ndà Israel, cunini vâha-nsia.

⁹ Vichi xicàn trùhù-nsiá nùu-nsí nansa ni quida-nsi iin obra xi nècuàchi ndahví yohó, nansa ni nduvâha-ne.

¹⁰ Pues ni cúnahá mii-nsiá xi nsidaa stná nècuàchi Israel ñà-divi Jesucristu de Nazaret nduú ana òiquivì-xí ni ndacùcahan-nsì, te ni nduvâha-ne. Te yohó iin stná-nè dava mahi-nsiá, indêhe-nsiánè. Te mate ní chituu-nsia Jesucristu nchica cruz, te ni xihì-yà, doco ni natiacu-yà ni quida Yua-nda Dios.

¹¹ Te mate ní cahíchì íní-nsiàà, doco vichi sàni cuu xi-yá na ian nì cuu xi iin cavà nì cahíchì inì albañil, te después nì sàà nì sàcùndua yùu vicò indúhu esquina vehe.

¹² Te còò inga gà ana sáha xi salvación, cuisì mii-yá. Vàchi ínicutu ñuhiví còò inga gà ana ñà-dacácu xi-nda, cuisì mii-yá —nì cachi Pedro.

¹³ Dandu nècuàchi dandacuma, nì xini-nè, có-yúhí Pedro cáhàn-nè, te có-yúhí stá Juan. Te nì có-ndúú stá ñà-nì dàcuahá cuáhà-né, còò, vâchi cóni xíca cuahà-né escuela. Ñâyücandüá, na ní quida nècuàchi Junta mà cuenta ducán, nì ndulocó-nè, te nì cundaa ini-nè, divi Jesús nisa cutnahá xi nècuàchimà.

¹⁴ Te tiàa nì nduvàha ma, yucán iin stá-nè xi nècuàchimà. Ñâyücandüá, mà nì cùì ñihindè nècuàchi Junta mà canicuàchi-ne sàhà Pedro xi Juan.

¹⁵ Ñâyücandüá, nì dândácù-né ni cáquée nècuàchimà iladu, te nì ndatnuhu nsidaa-ní mii-né,

¹⁶ cachi-nè:

—¿Nansa quida-nda xi nècuàchi caá? Vâchi iin milagru cahnú ndisa nduá nì quida-ne, ináhà nsidaa nèhivi ñuu-ndà Jerusalén yohó, te ùhi cachi-nsi nduá tñuhu.

¹⁷ Doco sàhà-ñà màsà cuitiá gà palabra yohó, chicá vâha dayúhí-ndànè ñà-màsà cáhàn gà-nè sàhà Jesús xi nì-iin nèhivi —nì cachi-nè.

¹⁸ Dandu nì cana-ne Pedro xi Juan, te fuerte nì chinaha-né nècuàchimà ñà-màsà cáhàn gà-nè xi nèhivi sàhà Jesús, nì màsà dàcuahá gà-nè nì-iin nèhivi sàhà-yá.

¹⁹ Doco Pedro xi Juan, nì cachi-nè:

—¿Índü ñà-tùxí ini mii-nsiá, a chicá vâha cunini-nsi ñà-ndüá cachi mii-nsiá, te ò ñà-ndüá cachi Dios?

²⁰ Pues cunaha-nsiá, có-ndüá ducán cuhivin-nsí. Vâchi ndiá icà-nsí cáhàn-nsi xi nèhivi ñà-ndüá sàni xininùu-nsí xi ñà-ndüá sàni tiacu tütñu-nsí —nì cachi-nè.

²¹ Dandu nècuàchimà, chicá nì cáhàn dana-ne xi Pedro xi Juan, dandu después nì dañà-ñanè, vâchi cóni túi nì-iin falta ñà-ndoho-ne. Te yúhí stá nècuàchi dandacu-ma ñà-vihini nacuidà nèhivi cuáhà ñuu-nè, vâchi nsidaa nècuàchimà, naquímànì-né Dios sàhà ñà-ndüá nì cuu.

²² Vâchi tiàa nì nduvàha sàhà milagru mà, sàni yàha-ne ùi dico cuà xicá-né.

Nansa nì xicàn tàhvi nèhivi xí Dios nùu-yá, cuní-nè nacuañandee ini-yànè

²³ Daani, na ní quee Pedro xi Juan libre, dandu mànuhù-né ndé ndoó compañeru-nè, te nì cachitñuhu-ne nsidaa ñà-ndüá nì cachi dùtù xicusahnú, xi ñà-ndüá nì cachi nècuàchi sahnú xidandacú.

²⁴ Te nì nsihi nì cachitñuhu-ne, dandu nsidaa-né, iin-ni nì xicàn tàhvi-né nùu Dios, cachi-nè:

—Stoho-nsi Señor, na mii-ní nduu-ní Dios; cuisì mii-ní nduú ana nì quidavàha xi ansivi, ñuhù íchí, mar, xi nsidaa stá ñàha iá ínicutu ñuhiví xi ansivi.

²⁵ Te mii-ní nduú ana nì dácáhàn xi iin nècuàchi sàhana cahvi xi-ní, divi xì-nsí David, te dohó nì cachi nècuàchimà:

Nèhivi ñuhiví, ¿índü chuun cuadú guá-nè, te cánahá guá-nè ñà-có-ndiáá?

²⁶ Vâchi cuáhà rey xicusahnú ñuhiví yohó, nì sàcuíta listu-te xi dava ga tè-xidandacú; nì nataca nsidaa-té ñà-cuni ùhi-te Yua-nda Dios xi Dèhemaní-yá Cristu, nì cachi David.

²⁷ Te divi ñà-ndáa nduá, vâchi ducán nì cuu, divi ñuu yohó nì nataca rey Herodes, xi Poncio Pilatu, xi stá nècuàchi ñuu Israel yohó, xi stá cuáhà nèhivi inga nación, vâchi cuní-nè quida quini-ne xi Dèhemaní-ní Jesús, mate divi-yá nduú ana nì chitñuní inì-ní cusahnú.

²⁸ Doco na ní quida nècuàchimà ducán, cuisì ñà-ndüá nì nacani inì-ní dihna nì sandua, te nì sàha-ní lugar nì quida-ne ducán; vâchi mii-ní, nì chitñuní inì-ní coo ducán,

²⁹ Stoho-nsi Señor. Te vichi (xicàn tàhvi-nsi) ñà-cunini-ní ñà-ndüá cachi nècuàchimà, ndee gà cáhàn-nè, cuní-nè dayúhí-nè nsìuhù. Doco nacuañandee inì-ní nsìuhù nècuàchi cahvi xi-ní, te ducán vâñuní cachitñuhu-nsi palabra ñi xí-ní, te mà yúhí-nsi.

³⁰ Xicàn tàhvi-nsi nùu-ní ñà-ní dándúvâha-ní nècuàchi cuhí sàhà poder ñi xí-ní. Te nsìuhù, icúmí-nsi ndacùcahan-nsí Dèhe ndiàha-ní Jesús, dandu mii-ní quida-ní nsidaa clase milagru (cundehè nèhivi) —nì cacachi nècuàchimà.

³¹ Daani, nì nsihi nì xicàn tàhvi-né nùu Dios ducán, dandu nì ndacùchí vehe ndé ndoó-né, te fuerte nì quixi Espiritu ñi xí-yá ini anima nsidaa-né, te ndee ní cáhàn-nè palabra ñi xí-yá, cóni yúhí-nè.

Nansa nisa quida nècuàchi xiníndísá, iin-ni cahnú nisa ña biene xi nsidaa-né

³² Cunaha-ní, iin-ni sàxínítnùnì nìsa icumi nsidanicuú nècuàchi xiníndísá. Còò ni-íñàha nìsá xidáhàn-nè nùù ñànìtnaha-ne, vàchi iin-ni cahnú-ní nìsa ìa nsidaa ñà-ndúá icúmí-nè.

³³ Te poder cahnú xí Dios, cuàhà gá nì chindeá nècuàchi apóstol, vàchi fuerte nì càhàn-nè sàhù sàhà nansa nì xininùù-né Stoho-ndà Jesús na sáni natiacu-yà. Te cuàhà stná gracia xi-ya íá nùù nsidaa nèhivi xí-yá.

³⁴⁻³⁵ Ñàyùcándúá, cóni quidámání ni-íñàha nùù ni-iin-ne, vàchi nècuàchi nìsa ìa ñuhù-xí, ò vehe-xí, nì dicò-néa, te nihí-né dihùn mà nì sàhàn nì nacoo-neà nùù nècuàchi apóstol, dandu mii-né, nì dasàn-néa nùù nèhivi icúmí necesidad.

³⁶ Te iin nècuàchi nì dicò mà nani José; doco Bernabé nìsa cachi nècuàchi apóstol xi-né, vàchi quiví mà, iin ana nàcuàhandee ini xi-ndà cuní cachàmà. Ñuu Chipre nduú ñuu-nè, te Leví nduú yohòtéhè-né.

³⁷ Pues divi-ne nìsa icumi stná xi iin ñuhù, te nì dicò-néa. Dandu nihí-né dihùn yàhvía nì sàhàn nì sàha-ne nècuàchi apóstol, te nì ndòa ndahà nècuàchimà.

5

Nansa nì quida Ananías xì Safira, nì xida cuàchi-ne

¹ Daaní, nìsa ìa iin tiàa nani Ananías xì ñahàdihí-nè Safira, te nì dicò stná-nè iin ñuhù.

² Doco nì chivàha cuaán-né chii dihùn sàhámà. Dandu dihùn nì cusobrá mà nduá nì tniì nècuàchi tiàa ma, te nihí-néa nì sàhàn nì sàha-ne nècuàchi apóstol, (na ìan íá nsiha). Te ináhá stná ñahàdihí-nè nansa nì quida-ne.

³ Doco Pedro, nì cachi-nè:

—Ananías, ¿ìndù chuun nì sàha-ní nì dacà ñà-malu òni-ní? Dècuèndè cuní-ní dandahví stná-ní Espiritu ìi xí Dios, vàchi nì chidéhè-ní sàhà ñuhù mà.

⁴ ¿Amádi ñuhù xí mii-ní nì sandua daa, te vètuni quida-ní disponer sàhá? Daaní, na sáni dicò-nía, ¿amádi dihùn xí mii-ní nì sanduu stná? ¿Ìndù chuun nì nacani quini inì-ní, te nì quida-ní dohó? Cunaha-ní, màdì nùù nèhivi nì càhàn tnùhù-ní. Còò, nùù Dios nì càhàn tnùhù-ní —nì cachi Pedro.

⁵ Daaní, na ní nsihi nì inini Ananías ducán, dandu nì natnahnù-nè, te nì xihì-nè. Te nsidaa ana nì xinitnùhu ma, nì yuhí cuaá-nè.

⁶ Dandu nì caquixi tiàa cuachi gá, nì chidúcùn-te nsiì ma, te nì xida-tèndó cuàhàn-ndà cundùxin-nda.

⁷ Daaní, na ní yàha ùni hora, nì quesaa stná ñahàdihí ndómà, doco tàñàha ga cunitnùhu-ne nansa nì cuu.

⁸ Dandu nì ndàcàtnùhù Pedro nùù-né, cachí-nè:

—Cachí-ní xí, ¿a ndísá tantu dohó nì dicò-nsiá ñuhù xí-nsiá?

Te cachí nècuàchimà:

—Jaan, divi ducán nì sandua.

⁹ Dandu nì cachi Pedro xi-né:

—¿Ìndù chuun nì ndatnùhu ndúì-nsià quida-nsia ducán, a ndísá cuìdà ini Espiritu ìi xí Stoho-ndà Señor, cahan-nsiá? Cunaha-ní, tiacú sàni nsiaa ana nì casahàn nì sùxin xi ìi-ní, te vichi icúmí-tè cunsida stná-te mii-ní cùhùn —nì cachi Pedro.

¹⁰ Te vichi duha nì natnahnù stná nècuàchimà nùù sàhà Pedro, te nì xihì-nè. Te na ní nansihvi tècuachima, sàni xihì-nè nì xini-te, ñàyùcándúá, nì tavà stná-te nsiì ma nì sàhàn-te nì sùxin stná-te ndómà divi ndé nì sàcundùxin nsi-ii-ndà.

¹¹ Ñàyùcándúá, cuàhà gá nì yuhí nsidaa nècuàchi xiníndísá ichi-yá, mii-né xì nsidaa stná nècuàchi dava ga nì xinitnùhu ma.

Nansa nì cuu cuàhà milagru ndiaha

¹² Daaní, nècuàchi apóstol, ndiaha gá nì caquida-ne cuàhà milagru nì indehè nèhivi. Te nsidaa nècuàchi xiníndísámá, nsiquívì nìsa nataca-nè nùù Portal de Salomón (ìá yehè veheñùhu). Te iin-ni sàxínítnùnì nìsa icumi nsidaa-né.

¹³ Doco nèhivi dava ga, ni-iin-ne cóni sàhandee ini-nè cutnahá-né xì nècuàchi natácá mà, mate ndenihí vàha cuahà-né nècuàchimà.

¹⁴ Te nì sàà nì xinindísá cuàhà gá nèhivi, tiàa te ñahà-né, nì xinindísá-né Stoho-ndà Señor.

¹⁵ Dècuèndè nìsa tavà stná nèhivi nècuàchi kuhí xi-ne, nì chitanduhù-né nècuàchimà yuhù íchí, dava-ne nùù cama, te dava-ne nùù yuì, ndiatù-né yàha Pedro, áma dúcùn-né casi nècuàchimà, te nduvàha-ne.

¹⁶ Stná ñuu cuati ndoó yatni nì caquee cuàhà stná nèhivi vaxi ñuu Jerusalén ndacá-né cuàhà nècuàchi ndohó quidá cuèhè, xì stná nècuàchi dandohó ñà-malu. Te nsidaa-né, nì nduvàha-ne.

Nansa nì catnii-ne nsidaa nècuàchi apóstol

¹⁷ Dandu dùtù xícusahnu-ma, yáha ga ni cumbidia ini-nè, mii-né xì compañeru-nè tè-ndúù nècuàchì saduceu.

¹⁸ Ñàyùcàndüá, ni tñii-ne nècuàchì icúmí chuun nùù Jesús, te ni chicadi-nè nècuàchì mà vehecà.

¹⁹ Doco iin ángel xi Stoho-ndà Señor, ñuu ni sàà-nè vehecàa yucán, te ni nacuna-ne yehè ni tavà-né nècuàchì mà, te ni cachi-nè:

²⁰ —Cuahán-nsià cuita-nsià veheñùhu cahnú, te nacani-nsià xì nèhivi nansa ñhitàhvì-né cutiacu ndiaha anima-nè.

²¹ Ducán ni dándacú-né nùù nècuàchì mà quida-ne. Ñàyùcàndüá, na ní tñiunù, dandu ni quìhvi-ne veheñùhu cahnú, te ni quesaha-né dacuahá-né nèhivi.

Daaní, dùtù cusáhnù, xì compañeru-nè, ni cana-ne nècuàchì Junta ñà-nataca nsidaa-né, te quixi stná nsidaa nècuàchì sahnú nchichí ñuu Israel yucán. Dandu ni techuún-né policíia cuahàn-te vehecàa ñà-cundaca-tè nècuàchì ndiadí quixi.

²² Doco na ní casaà-te yucán, còò cá iin ni ndácùhun-tè. Ñàyùcàndüá, ni naxicocuñin-te ni cachitnùhu-tè,

²³ cachì-te:

—Ñà-ndàá nduá, ndiadí vaha yehè vehecàa ma, te itá stná soldadu ndiaá xán, doco na ní nacuna-nsi, còò cá nècuàchì ndiadí mà.

²⁴ Dandu dùtù cusáhnù, xì comandante ndiaá veheñùhu, xì stná dùtù nihí gá chuun nahnú, ni ndulocó-nè na ní xinitnùhu-ne ducán. ¿Índù fin cucumi chuun yohó? cahan-né.

²⁵ Daaní, divi momentu mà ni quesaa inga tiàa ni cachitnùhu xi-né:

—Cunaha-nsiá, nècuàchì ni chicadi-nsià vehecàa, yucán sàndóò-né veheñùhu cahnú, dacuahá-né nèhivi —ni cachì-te.

²⁶ Dandu comandante mà, cuahàn-te xi policíia xi-tè, te vivíi-ni ni saca-tè nècuàchì mà vaxi-ne, vachi yúhi-te nèhivi cuáhà mà ñà-vihini cacani yuu-néte cahan-té.

²⁷ Ñàyùcàndüá, ndacá-te nècuàchì mà ni quesaa, te ni sàcuíta-ne nùù nsidaa nècuàchì Junta mà. Dandu ni cachi dùtù cusáhnù:

²⁸ —¿Amádi sání dándacú-nsí nùù-nsiá ñà-màsà chináhà gá-nsià nèhivi sàhà Jesús? Doco vichi, nsidanicuú lugar ñuu yohó sàni càhàn-nsià sàhù ñà-ndúù dàñùhù xi-nsià, te cuní-nsiá ñà-nsiùhù nacuida-nsi cuàchì sàhà nècuàchì ni xihí mà.

²⁹ Dandu Pedro xi dava ga nècuàchì apóstol, ni naxiconihí-né nùù nècuàchì mà, cachì-nè:

—Nsiùhù, icúmí-nsí cunchicùn-nsi ñà-ndüá cachí Dios, te màdi ñà-ndüá cachí nèhivi úun.

³⁰ Mii-nsiá ni chituu-nsià Jesús nchica cruz. Doco mate modo ducán ni sahní-nsiáyá, doco vichi sání natiacu-yà ni quida Dios, divi mindaa Dios nisa cahvi xii-ndà.

³¹ Te vichi sání saquin-yà Jesús ndahà cuahá-yà ñà-cunduu-ya ana cusáhnù, te cunduu stná-yà ana dacácu xi-nda. Te ducán ni cuu sàhà-ñá ni cuu-nda arrepentir; nsidaa ndohó nècuàchì ñuu Israel yohó, te ducán nihí-yà nansa cuicahnú ini-yà sàhà cuàchì-nda.

³² Te nsiùhù, testigu xinduu-nsi, vachi ni xininùù-nsí ducán ni cuu. Te testigu nduu stná Espíritu ñi xí-yá ñuhú ini anima-nsi, vachi nsidaa ana cunini xi-yá, ñhitàhvì-né ndèe Espíritu ñi xí-yá ini anima-nè quida-ya —ni cachì Pedro.

³³ Doco nècuàchì dandacu-ma, na ní inini-ne ñà-jaàn, yáha ga ni caxidà ini-nè, te ni quesaha-né ni ndatnuhu tnahá-né nansa dandáñùhù-nè nècuàchì mà.

³⁴ Doco nùù nèhivi Junta mà, iá iin maestru nani Gamaliel, iin nècuàchì fariseu chináhà xi ley xi Dios. Nècuàchì vaha nduú-né cachí nsidaa nècuàchì ñuu yucán. Te divi-ne ni ndacuiin-nè ni dándacú-né quee cuaán chii nècuàchì apóstol mà.

³⁵ Dandu ni cachi-nè xi nsidaa compañeru-nè yucán:

—Nsidaa mii-nsiá nècuàchì raza-ndà Israel, cuidadu ni cúndóò-ndá sàhà ñà-ndüá quida-nda xi nècuàchì càá.

³⁶ Vachi ¿a có-nsínuu ini-nsià nansa ni cuu tiempu na ní ia iin tiàa nani Teudas? Tè-càhnù icá-xi nduú-te nisa cachì-te. Te nahi cümü cientu nèhivi ni quìhvi tnahá xi-té ni sanchicùn-nète. Doco por fin ni sahní nèhivi-té, te ni xitiá nihni nsidaa nècuàchì nchícùn xi-tè, te ducán ni nsihi chuun ma.

³⁷ Daaní, después ni yáha inga casu na tiempu ni cuu-nda empadronar. Iin tiàa ladu Galilea nani Judas, ni nihí-té ni dáyáha-tè cuahà nèhivi ladu xi-tè. Doco ni xihí stná-te, te ni xitiá nihni stná nsidaa nèhivi ni chiyuhù-té.

³⁸ Ñàyùcàndüá, yùhù cachí xi-nsiá vichi, ni cúnahà nècuàchì sàni tñii-nda jaàn. Chicá vaha nacoo-ndané, vachi nú ini-ni mii-né ni nacani ini-nè quida-ne ñà-ndüá quidá-né, dandu icúmíá ndòo uan.

³⁹ Doco nú Dios ni dándacú-xi nùù-né, dandu mà nunca nihí-ndà cadì-ndà nùù-né, te cachí, còtó Dios nàá stnàhà-xi-ndà —ni cachì Gamaliel mà.

⁴⁰ Dandu nsidaa compañeru nècuàchìmà, nì dajuùn-nè nècuàchìmà, te nì cana-ne nècuàchì apóstol nì nansihvi tu-ne. Dandu nì sahnì cuií-nè nècuàchìmà, te nì chinaha-ñánê ñà-màsà càhàn gà-nè xì nèhivi sàhà Jesús. Dandu nì daña Junta Cahnu-mané,

⁴¹ te nì caquee-ne libre, cudíi ini-nè ñà-nì natùì stná-nè ndoho-ne sàhà chuun xì mii-yá.

⁴² Daaní, nsiquívi vehe vehe nisa xicanuu-ne dacuahá-né nèhivi. Sàhàn stná-nè veheñùhu cahnú, te chináhà stná-nè nèhivi yucán, càhàn-nè sàhù sàhà Jesucristu, ni-iyuhu cóni nácóó-némà.

6

Nansa ni cuu nombrar usà tiàa dasàn ñà-cutiacu nècuàchì ndahví

¹ Quívi yucán vihi gá nì nducuahà nècuàchì nchícùn ichì mii-yá; dava-ne càhàn-nè dàhàn hebreu, te dava ga-nè càhàn-nè dàhàn griegu. Dandu nì quesaha nècuàchì griegu mà nì xitnúhu-ne compañeru-nè càhàn hebreu, vàchi ñahàcuáan xì-icumì nècuàchì griegu mà, có-níhi váha-ne ñà-cutiacu-nè na dásàn-ñà quívi quívi.

² Ñàyucándüá nì cana nsi-úxin ùì apóstol nsidaa nècuàchì xiníndísà, te nì cachi-nè xì nècuàchìmà:

—Nsiùhù, có-ndüá ñà-nacoo nihni-nsi chuun xì palabra xì Dios, te cacanu-nsi dasàn-nsi ñà-cutiacu nèhivi.

³ Ñàyucándüá, mii-nsiá nanducu-nsiá usà tiàa nchichí dandacú sàhà chuun yohó, ñáni. Nècuàchì tnùñuhu nì cundúú-né, te nì cóo chitu stná anima-nè Espíritu Ì xì Dios.

⁴ Doco nsiùhù, iin-nì cuàhàn-nsi quida-nsi seguir càcàn tàhvi-nsí nùù-yá, te dacuahá-nsi nèhivi palabra xì-ya —nì cachi-nè.

⁵ Daaní, nsidaa nèhivi mà, nì cudíi ini-nè ñà-ndüá nì cachi nècuàchì apóstol mà. Ñàyucándüá, nì caquee nombradu usà tiàa. Iin-ne nani Esteban. Iin nècuàchì nihnú váha inì-xì nduú-né, te chitu stná anima-nè Espíritu Ì xì Dios. Te nì caquee stná nombradu nècuàchì nchícùn yohó: Felipe, Prócoro, Nicanor, Timón, Parmenas, xì Nicolás. Nècuàchì inga raza nì quixi ñuu Antioquia nduú Nicolás mà, doco nì yàha-ne religión xì nècuàchì raza Judea.

⁶ Daa-ní, nsidaa nèhivi mà, nì saca-ne nècuàchì nombradu mà nùù nècuàchì apóstol; dandu apóstol mà, nì xicàn tàhvi-né nùù Dios, te nì chindóó-né ndahá-né ñini nècuàchìmà.

⁷ Daaní, después, chicá más nì cucuahà palabra xì Dios, vàchi cuàhà gá nèhivi ñuu Jerusalén nì sàà nì xinindísà, te cuàhà gá stná nècuàchì dùtù nì sàà-nè nì xinindísà stná-nè palabra mà.

Nansa ni tnù Esteban

⁸ Daaní, nì xicanuu Esteban mahì nèhivi, te nì quida-ne cuàhà milagru ndiaha, vàchi cuàhà gá icúmì-nè gracia xì Dios, te fuerte iá palabra cachi-nè.

⁹ Doco dava nèhivi, nì quesaha-né nàá tnahá-né xì nècuàchìmà. Nèhivi sàhàn veheñùhu nani Veheñùhu xì Nèhivi Libre xinduu-ne, te nì caquixi-ne inga ñuu, divi ñuu Cirene, xì ñuu Alejandría, xì ladu Cilicia, xì ladu Asia.

¹⁰ Doco mànicúì nihíndèè-né màcòdònùù-né nùù Esteban, vàchi chindéé Espíritu Ì xì Dios-nè càhàn nchichí-nè.

¹¹ Ñàyucándüá, nècuàchì nàá xì-némà, nì nducu-né iin ùì tètñùhù, te nì chiyàhvi-nète ñà-càhàn tnùhù-té diquì Esteban. Sàhà ñà-jaàn, dohó nì cachi tèmà:

—Nì inini-nsi nì cachi quini Esteban diquì (yua-nda) Moisés xì diquì stná Dios.

¹² Ñàyucándüá, ducán nì nihì nècuàchì malu mà nì dànácüidà-nè nèhivi ñuu mà, mii-né xì stná nècuàchì sahnù dandacú, xì stná nècuàchì ley xì veheñùhu, te nì quida cuàhà-né sàhà Esteban; yàchi nì sàà-nè ndé iá nècuàchìmà, te nì tnùì-ñané, te ndacá-ñané nì casaà nùù nècuàchì Junta.

¹³ Yucán nì cana-ne tètñùhù mà nì tnàtuu-tè, te nì sanicuàchì-tè sàhà Esteban, cachí-te:

—De por sí, túha quini tè-jaàn, vàchi quini càhàn-te diquì veheñùhu ì xì-ndà, xì diquì stná ley ì xì-ndà.

¹⁴ Te nì inini stná-nsi nì cachi-te ñà-icúmì quixi Jesús de Nazaret, te dacaá-né veheñùhu xì-nda. Dandu fuerza icúmì dàma estilu xì-nda, divi estilu nì nacoo xì-ndà Moisés —nì cachi tèmà.

¹⁵ Dandu nsidaa nèhivi ndoó Junta mà, nì indehè-né nùù Esteban, te nì xini-nè, na indéhe àngel indéhe nècuàchìmà vichi.

7

Ñà-ndüá nì cachi Esteban na ní càhàn-nè sàhà mii-né

¹ Dandu dùtù cusáhnù, nì cachi-nè xì Esteban:

—¿A diví ñà-ndáa nduá (xícachi nècuàchi jaàn), á cóó?

² Dandu ni naxiconihí Esteban, cachí-nè:

—Mii-nsiá, nècuàchi sahnú nchichí, cunini chii-nsiá, ñani, vachi (cuàhìn nacani) nansa ni quida Dios ndiaha xi-nda sànahe dècuèndè na ía ì xì-ndà Abraham ñuu nani Mesopotamia. Tañáha ga nadàma-ne ndè ñuu Harán, dandu ni dàcùnì Dios-nè mii-yá,

³ te dohó ni cachi-yà xi-né: “Nacoo-ní ñuu-ní yohó, te nacoo-ní tnaha-ní, quihin-ní ichi cuahán-ní inga ñuu icúmì dacuní mii-ní”.

⁴ Ñàyùcànduá, ni quee-ne ladu Caldea yucán, te ni sàa-nè ñuu Harán. Te ñuu mà ni ndòo-ne dècuèndè ni xihì yua-né. Dandu inga xichi ni càhàn tu Dios xi-né, ñàyùcànduá ni quihin-ne ichi ni quesaa-nè ñuu yohó ndé ndoo-nda vichi.

⁵ Doco cóni sáha-yanè ni-iin ñuhù cunduu ñuhù xí mii-né, ni siquiera iin ñuhù tì. Doco ni cachi-yà xi-né ñà-después cuàhàn-yà dacutàhvi-yánè ini ñuu yohó, te cucumi-néa, mii-né xi dèhe-ne. Ducán ni cachi-yà xi-né, mate táyôo ni-iin dèhe-ne.

⁶ Te ni cachi stná-yà ñà-icúmì descendencia xi-ne sàa-nè cundoo-ne inga ñuu xicà ndé cuichuún uun-ní nècuàchimà-né, ni cachi-yà; te cuàhà icúmì-né ndoho-ne quida nècuàchimà, te cùmì cientu cuià cundua.

⁷ Doco dohó ni cachi stná-yà (xi Abraham mà): “Después icúmì dandohó stnài nèhivi cuichuun-xi tnaha-ní ñuu xicà mà, dandu caquee-ne libre, ndixi-ne cahvi-né yuhù lugar yohó”, ni cachi-yà.

⁸ Dandu ni quida stná-yà iin tratu xi Abraham, ni cachi-yà ñà-icúmì tàhndè iin seña icà nsidaa dèhe ii-né. Ñàyùcànduá, na ní tùinuù dèhe ii-né nani Isaac, dandu tixi unà quivi ni sàcùnìhi seña icà-vé. Daaní dèhe Isaac mà nani Jacob, ni sàcùtuu stná seña mà icà-vé. Te divi-ni ducán ni quida stná Jacob mà xi nsihúxin ùi dèhe ii-né, divi nècuàchi nduú xì-ndà.

⁹ Te xì-ndà mà, ni cumbidia ini-nè sàhà ñani chii-né nani José. Te ñàyùcànduá ni dicò-né nècuàchimà nùù nèhivi cuàhàn ñuu Egipto. Doco Dios, ni cutnahá stná-yà xi nècuàchimà ía-nè ñuu yucán,

¹⁰ ni dáyáha-yanè nùù nsidaa tnùndoho ni xini-né. Dandu ni cunchichí-nè ni quida-yà, te ni ndòo maní-né nùù rey Faraón ñuu Egipto yucán, vachi mii-yá ni chindee-yánè. Te ni quida rey mà nombrar José ñà-cunduu-ne nècuàchi cu-ù nùù-té ñuu mà, dècuèndè ni cachi-te ñà-dandacú stná-nè nùù nsidaa nècuàchi quidachuún vehe-tè.

¹¹ Daaní, ni quixi iin tnama inicutu ñuu mà, xi stná ini ñuu Canaán; iin tnùndoho cahnú ni sandua. Te xì-ndámà, có-nihì gá-nè ñà-cutiacu-nè.

¹² Dandu ni xinitnùhu yua-né Jacob ñà-íá trigu ndè ñuu Egipto. Ñàyùcànduá, ni techuún-né dèhe-ne cuàhàn-nè ñuu mà. Te primeru viaji ni sanduamà.

¹³ Daaní, viaji ùi nduá na ní dàtùì José mii-né nùù ñani-nèmà. Dandu ni cundaà ini rey Faraón indù raza nèhivi nduu José.

¹⁴ Te ni dàquixí stná José iin razón ñà-cùhùn stná yua-né Jacob xi nsidaa stná tnaha-ne. Te nsidaa nsidaa-né ùni dico sàhùn (75) nduú-né.

¹⁵ Ñàyùcànduá, ni sàa Jacob ñuu Egipto mà, te yucán ni ndòo-ne dècuèndè ni xihì-nè, mii-né xi nsidaa stná dèhe-ne.

¹⁶ Doco después ni natavà xì-ndà iquì nsii ma, te nihí-néa màndixi-ne ñuu-nè yohó dècuèndè ndè ía ñuu tii Siquem, te yucán ni ndùxan ini iin cueva, divi cueva ni xiin xì-ndà Abraham nùù dèhe iin tiàa nani Hamor.

¹⁷ Daaní, ni cuyatni tiempu cuu ndisa ñà-nduá ni cachi Dios na ní càhàn-yà xi Abraham daa. Te yáha ga ni nducuahà descendencia xi nècuàchimà ndoo ñuu Egipto yucán; cuàhà sàstnùhù ni nanduu-ne.

¹⁸ Dandu ni quihvi inga rey dandacú nùù ñuu yucán. Te rey mà, cóni cùndáa ini-te nansa (ni chindee) José antes.

¹⁹ Ñàyùcànduá, ni dàndàhvi-te xì-ndà mà, ni quida quini-tè xi-né, ni dàndàcú-te nùù-né ñà-nacoo nihni-ne mée cuati xí-né sàhà-ñà cui-vé.

²⁰ Te divi tiempu mà ni tùinuù Moisés ñuhiví, te cudí ini Dios sàhà-vé. Cutu ùni yòò ni ìa-ve xi yuadihí-vé,

²¹ Te ni sàa hora icúmì-né nacoo nihni-nevè, doco (ni càcu-ve), vachi ni ndacùhun iin dèheyoco rey mà-vé. Te ni dàcuàhnù-ñavé na iin dèhe-ñà.

²² Dandu después ni dàcuàhà vaha-ne nsidaa palabra nchichí ñuu Egipto yucán. Ni cutùha vaha-ne càhàn-nè sàhù, te ni ìa stná fama-nè sàhà chuun nahnú nisa quida-ne.

²³ Daaní, na cuàhàn-nè xinu-ne ùi dico cuià, ni nacani ini-nè nùhù-nè nàcòtò-nè tnaha-ne, divi nècuàchi xindu (descendencia xi xì-né) Israel.

²⁴ Te yucán ni xini-nè iin tè-Egipto dandohó-te iin tnaha-ne. Ñàyùcànduá, ni nacuidahan-né nècuàchimà nùù tèmà, te ni nachitacùhà-nè sàhà tnaha-nemà, ni sahní-né tèmà.

²⁵ Vàchi nì tuxi ini-nè cuàhàn nsidaa tnahe-ne cundaà ini-nè ñà-sàhà mii-né icúmí Dios dacácu-ya nsidanicuú-né. Doco còò, cóni cécúndáà ini nècuàchimà.

²⁶ Daaní, inga quivì-mà tucu tu xicánúú-né yucán, te nì xini-nè itá ùi tnahe-ne náá stnahá. Ñàyücàndüá, nì cuni-nè nachindovü-né nècuàchimà, te nì cachi-nè xì nècuàchimà: “Señores, ¿Indü chuun caní stnahá-nsiá? ¿Amádi iin-ni ñani xínduu-nda?”

²⁷ Dandu tià caní stnahama, nì chindaha níhni-te Moisés, cachi-te: “¿Ana nì cachi xì-ni ñà-dàndàcù-ni nùù-nsí? Còò, còò permisu nsidandaà-ni chuun xi nsìuhù.

²⁸ ¿A cuní-ni cahni stná-ní yùhù nacua nì sahnì-ní tè-Egipto icu?” nì cachi-te.

²⁹ Dandu na ní inini Moisés ñà-jaàn, nì xinudèhé-nè cuàhàn-nè ñuu Madián. Te yucán nì ndòo-ne, te nì sàcúndoo stná ùi dèhe ii-né.

³⁰ Daaní, nì yàha ùi dico cuià iá-nè yucán, dandu iin quivì xicánúú-né icà yucù nani Sinaí, te nì xini-nè xixìn iin yutnù tii. Te mahì ñuhu mà nì natüi iin àngel.

³¹ Ñàyücàndüá, nì ndulocó-nè sàhà ñà-ndüá nì xini-nè. Te na ní cuyatni-ne ña-cuàhàn-nè cundehè váha-ne, dandu nì tiacu-nè càhàn Stoho-ndà Dios xi-nè, cachi-yà:

³² “Yùhù ndüí Dios. Cuisi yùhù nisa cahvi xii-ní Abraham, xi Isaac xi Jacob”, nì cachi-yà. Ñàyücàndüá, nì quesaha Moisés quidí-né, te yúhi-nè cundehè gá-nè.

³³ Dandu nì cachi tu Stoho-ndà Señor xi-né: “Tavà-ní ndisàn-ní, vàchi ñuhù ndé iin-ni yohó, ñuhù ñi ndüá.

³⁴ Cunaha-ní, sàni xini nansa ndohó nèhivi-xí ndoo ñuu Egipto. Sàni tiacuì xítana-ne, te ndoho-guá-nè. Ñàyücàndüá, sàni nui yohó ñà-vàxi nacuaqui-nè caquee-ne ñuu mà. Pues vichi cùhùn-ndà, vàchi cuàhàn techuín mii-ní nùhù-ní ñuu Egipto”, nì cachi Dios.

³⁵ Ñàyücàndüá, divi Moisés nduú ana nì techuún-yá nùhù dandacu-xi nùù tnahe-nda, te dacácu-ne nècuàchimà, vàchi divi ducán nì ndacu nuù-nè nùù mii-yá nì tui mahì yutnù tii mà, te indéhe-yá nahi àngel. Pues divi-ne nduú ana nì cahichì ini tnahe-nda daa na ní cachi-nè: “¿Ana nì cachi xi-ní dandacu-ní nùù-nsí? Còò permisu nsidandaà-ni chuun xi-nsí”.

³⁶ Doco divi Moisés mà nduú ana nì tavà xi nècuàchimà ñuu Egipto yucán, te nì quida stná-nè cuàhà milagru fuerte ñuu mà, cuàhà milagru ndiaha. Dandu nùù Mar Cuahá, yucán nì cuu ga más milagru fuerte. Te inii ùi dico cuià nì cuu ga stná milagru nùù yucù dāná (ndé nì Xicanuu-ne).

³⁷ Dandu después nì cachitnùhu Moisés inga palabra xi xii-ndà nècuàchì Israel mà, te dohó nì cachi-nè: “Vàxi iin quivì na icúmí Stoho-ndà Dios cuàha-ya iin tnahe-nda chuun ndiaha càhàn cuenta xi-ya ñuu-ndà. Te nacua quidá yùhù, ducán icúmí quida stná ana icúmí quixi ma. Te icúmí-nsiá cahvi-nsiá ñà-ndüá cachi-yà”, nì cachi Moisés.

³⁸ (Ináhá-nsiá), divi Moisés nduú ana nisa ìa yucù dāná yucán, cutnàhà-né xi nèhivi cuàhà nduú xii-ndà mà, te cutnàhà stná-nè xi mii-yá nì càhàn xi-né yucù Sinaí mà, divi mii-yá indéhe nahi àngel. Te (ináhá-nsiá, divi nùù mii-yá) nì nihì stná-nè palabra xi vida ndiaha icúmí-ndà chivàha-nda.

³⁹ Doco xii-ndà mà, còò, cóni cuní-nè cunini-ne Moisés. Nì cahichì ini-nè nècuàchimà, vàchi cuisì cuní-nè nùhù dahuun-ne ñuu Egipto.

⁴⁰ Te nì cacachi stná-nè xi Aarón: “Quidayucùn-ní iin ñà-cunduu stoho-ndà cundaca-nda codònnù nùù-ndà, vàchi sàcuàhàn Moisés, te cutu ní tavà úun-nèndó ñuu Egipto, te vichi còò-cùndàà ini-nsi ndià nì cuu xi-né”, nì cachi nècuàchimà.

⁴¹ Te divi quivì yucán nì quidavàha-ne iin chelù. Dandu nì sahnì stná-nè quisi cunduu promesa nùù chelù mà, te cudfì gá ini-nè, vàchi sàni quidavàha-ne (iin ñà-cahvi-né).

⁴² Ñàyücàndüá, nì naxicocuñn ini Dios sàhà-né, te nì nacoo uun-yanè ñà-quida-ne ñà-ndüü gustu xi-ne cahvi-né orá, xi yoo, xi sitnùu. Ináhá-ndà nì cuu ducán, vàchi dohó cachi-yà nùù libru nì tiaa profeta sàhana ndé cachi-yà:

¿Nsiohó nècuàchì Israel, ùi dico cuià nì xica-ndá yucù, te nì sàha-ndá yùhù ofrenda xi promesa, divi quisi nì sahnì-ndá sàhí? Doco ¿a ndisá nì cahvi ndisa-ndá yùhù na ní quida-ndá ducán?

⁴³ Còò, mà ndisá; yùù yócó (nduú nisa cahvi-ndá, vàchi divia) nisa nihì-ndá xicánúú, divi yùù yócó nani Moloc inácaá ini veha, xi stná stohò-ndá nani Renfán nàhà nahi sitnùu cahnú. Vàchi figura-ñà mà nì quidayucùn-ndá, te nì cahvi-ndá. Pues (divi sàhà nsidaámà) icúmí taxi xiqué nsiohó ndé nùù-xi ñuu Babilonia, nì cachi Dios.

⁴⁴ (Dandu nì cachi gá stná Esteban palabra yohó):

—Na nì sandoo xii-ndà mà yucù, nisa icumi-né iin vehe sìcoto ndé nisa cahvi-né Dios. Vàchi nì dāndàcù-yá nùù Moisés ñà-quidavàha-ne vehe ìi mà, te ndudava xi ñà-ndüá nì dācùnì-yànè antes. Ñàyücàndüá, nì cuyucun vehe ma.

⁴⁵ Daaní, después nì ndòo nùù dèhe xii-ndà mà. Te nècuàchimà, nsidá-néà nì quesaa-nè xi Josué ladu nación yohó ndé nì sandoo nèhivi cuàhà inga raza. Doco nì cacuxio nèhivi

mà nùù ñuu-nè yohó, te nì nandua ñuu xii-ndà, vâchi nì chindee Dios xii-ndàmà ní taxi-né nècuàchimà. Ñâyùcândüá, ñuu yohó nì ndòo vehe ìì mà inii tiempu dècuèndè tiempu xi David.

⁴⁶ Te David mà, nì xini màni Dios-nè. Ñâyùcândüá, nì xicàn tàhvi-né nùù-yá, áma cuáha-ya lugar quidayucun-nè iin veheñuhu cahnú xí-yá, vâchi divi-ya nduú ana cahvi nsidaa descendencia xi xii-né Jacob.

⁴⁷ Doco (màdi mii-né, sino que dèhe-ne) Salomón nduú ana nì nihitáhvi nì quidayucun xi veheñuhu cahnu-ma.

⁴⁸ Doco cunaha-nsiá, cahnú Dios icúmí-ndá, màdi cuiisi veheñuhu ñuhiví yohó iá-yà. Còo, vâchi ducán nì cachi stná iin nècuàchi nì càhàn cuenta xi-ya sàhana, nì tiaa-ne palabra yohó ndé cachi-yà:

⁴⁹ Na iin silla cahnú ndé ié' dandacuí, ducán nduú ansivi. Te nahi bancu tii ndé quetátú sáhí, ducán nduú ñuhiví. Ñâyùcândüá, mà sáà nèhivi quidavàha-ne iin vehe cahnú ndé coi, vâchi màdi iin xaan-ni ié' quetátú.

⁵⁰ Còo, yùhù nduí ana nì quida vâha xi ansivi xi ñuhiví; nsidaa ñà-jaàn nì quidavâhi xì ndahí, nì cachi Dios.

⁵¹ (Dandu nì cachi gà Esteban):

—Ndisa, ndee íní mii-nsiá. Cò-nìhnú inì-nsia Dios, vâchi nahi tè-siùmí xínduu-nsia, ñâyùcândüá mà túha-nsia cunini-nsia. De por sí, xini ùhì-nsiá Espíritu ìì xí Dios; vâchi divi nacua nisa quida xii-ndà sàhana, ducán quidá stná mii-nsiá vichi.

⁵² Vâchi nècuàchi yucán, quini ga nì quida-ne xi nsidaa nècuàchi nisa càhàn cuenta xi Dios, nì sahnì-né nècuàchimà, mate nduú nècuàchimà ana nì cachtitñuhu ñà-icúmí quixi mii-yá ana ndàa cuiisi inì-xi. (Daaní, na ní quesaa-yà), divi mii-nsiá nì cahin xi-yá, te nì sahnì-nsiáyà.

⁵³ De por sí, có-cunì dahuun-nsia chivàha-nsia ley xi Dios, mate ángel ndiaha nì sàha xi-nda ley mà.

⁵⁴ —Ducán nì cachi Esteban xi nèhivi yucán.

Nansa nì sahnì nèhivi Esteban xi yùù

Dandu nèhivi iníni má, yáha ga nì caxidiá ini-nè, nì saxindiá stnahá ñuhu-ne.

⁵⁵ Doco Esteban, chitu anima-nè Espíritu ìì xí Dios. Dandu nì indehè-né diquì-xí ansivi, te nì xini-nè tnùù ndiaha ndé iá Yua-nda Dios, te yucán iin Jesús ladu cuahá-yà.

⁵⁶ Dandu nì cachi-nè:

—Cundehè-nsiá, nuná ansivi indéhi, te yucán ladu cuahá Yua-nda Dios iin mii-yá ana nduú Tnaha Ndiaha Nèhivi Ñuhiví.

⁵⁷ Doco nèhivi yucán, ndee cána dana-ne, te sadí ndahà-né tùtnù-né, cuàhàn nsidaa-né carrera ndé iá nècuàchimà.

⁵⁸ Nì tavà-ñànè ñuu mà ñà-cahni-ñànè xì yùù. Te tiàa nì càhàn tnùhù sàhà-né, nì tavà-né dùhnù-né, nì ndòo nùù iin tiàa chíi nani Saulo.

⁵⁹ Dandu nì quesaha-né nì cani-ne cuàhà yùù diquì nècuàchimà ñà-cui-nè. Doco mii-né, nì ndacùcahan-né Jesús, cachi-nè:

—Stoho-nsì Jesús, jsà-íá natnii-ní animè!

⁶⁰ Dandu nì sàcuìn sisi-né, te nì ndàhì ndee-né, cachi-nè:

—Stoho-nsì Señor, xicàn tàhvi nùù-ní ñà-màsà quihín cuenta-ní sàhà cuàchi quidá nèhivi yohó xì.

Te na ní nsihi nì cachi-nè ducán, dandu nì ndàhvà-ne ñuhiví, na ian nì quidì-nè.

8

Nansa nì sanchicùn Saulo nèhivi cahvi xi Jesús ñà-dandohó-né nècuàchimà

¹ Te Saulo mà, cudí stná ini-nè ñà-nì xihì Esteban ducán. Daaní, divi quivì yucán nì quesaha nì cucuahá gá sàhà nècuàchi nchícùn ichì Jesús. Nì quesaha nèhivi dava ga dandohó-né nsidaa nèhivi xí-yá ndoó ñuu Jerusalén. Ñâyùcândüá, nì xinudèhé nècuàchimà, cuàhàn-nè inicutu ladu Judea xi ladu Samaria. Doco nècuàchi apóstol, cóo, cóni xitià-nè.

² Daaní, (nì nsihi nì sahnì nèhivi Esteban), dandu nì casaà dava nècuàchi nihnú vâha ini xi Dios, nì (nsiquihin-ne ndómà), te nì sùxin-nèndó. Te cuàhà gá nì casacu-ne sàhà-ndà.

³ Doco Saulo, yáha ga nì quida quini-ne xi nsidaa nècuàchi nchícùn ichì Jesús, vâchi vehe vehe nì xicanuu-ne, nì quihvi-ne nì tavà-né nècuàchimà, tiàa-ne te ñahà-né, te ñuhú-né nècuàchimà nì sàhàn nì chicadi vâha-ne.

Nansa nì xitià nihni razón ndiaha ndé' ladu ñuu Samaria

⁴ Doco nècuàchi nì xitià mà, inicutu nì sàhàn-nè nì dàcutià-nè razón ndiaha xí Dios.

⁵ Iin nècuàchìmà nani Felipe, te divi-ne nì sàhàn iin ñuu iá ladu Samaria. Te yucán nì càhàn-nè sàhù sàhà Cristu.

⁶ Te nì nataca cuàhà nèhivì ñuu mà, nì inini vaha nsidaa-né ñà-nduá nì cachi Felipe, vachi nì xini stná-nè milagru nì quida nècuàchìmà,

⁷ vachi nì dándúvaha stná-nè cuàhà nèhivì ñuhù ñà-malu inì-xi. Caná fuertèa nì caquea inì-nè. Te nì nduvaha stná cuàhà nècuàchì nì dàña ñi cuerpu xi, xì cuàhà gá stná nècuàchì xicá cuéhè.

⁸ Ñàyucándüá, nì cudìi sàstnùhù inì nècuàchì ñuu mà.

⁹ Doco yucán iá stná iin tiàa nani Simón. Sà-íá cuà ñà-íá-te ñuu mà. Tètàtnà tàdì nduú-te, te dandahví uun-te nèhivì ladu yucán, vachi cachí-te xi-né ñà-chuun cahnú nduá nì ñihítàhvì-té.

¹⁰ Ñàyucándüá, nsidaa nèhivì ñuu mà, xiníndísá-né yuhù-té, nècuàchì ndahví te nècuàchì cuicà, nsidaa-né tuxí inì-nè ndudu ndiaha xí Dios icúmí-té.

¹¹ Ñàyucándüá, cahví váha-nète, vachi caní tiempu dandahví-tené xì tàtnà xí-te.

¹² Doco na ní sàa Felipe yucán, te nì dàtúu-ne razón ndiaha sàhà ñuhivì ñi xí Dios xì sàhà ichì Jesucristu, dandu nì xinindísá cuàhà nècuàchìmà, te nì cuhìi stná-nè, tiàa-ne te ñahà-né.

¹³ Dècuèndè stná Simón mà, nì xinindísá stná-te, te nì cuhìi stná-te. Dandu iin-nì nì tenchicùn stná-te Felipe, ndulócò cuàhà-té, vachi nì xini-te cuú cuàhà milagru ndiaha, cuàhà milagru fuerte.

¹⁴ Daaní, nècuàchì apóstol ndoó ñuu Jerusalén, nì xinitnùhu-ne ñà-nduá nì cuu ladu Samaria yucán, ñà-sàni xinindísá cuàhà stná nècuàchì ladu yucán ñà-nduú palabra ñi xí Dios. Ñàyucándüá, nì techuún-né compañeru-nè Pedro xì Juan

¹⁵ ñà-cùhùn-nè ñuu mà, te càcàn tàhvi-né nùù Dios sàhà-ñà nandèe stná Espiritu ñi xí-yá inì anima nsidaa nècuàchì yucán.

¹⁶ Vachi tàñáha ga ñihítàhvì nècuàchìmà Espiritu ñi, cuisì-ñá nì cuhìi-né na ní xinindísá-né Stoho-ndà Jesús.

¹⁷ Ñàyucándüá, nì sàa Pedro xì Juan yucán, te nì chitándòò-né ndahà-né ñi nècuàchìmà, te nì nandèe Espiritu ñi xí Dios inì anima-nè.

¹⁸ Doco Simón mà, na ní xini-te nansa nì ñihítàhvì nècuàchìmà Espiritu ñi xí Dios ñà-nì sàcùitandòò ndahà apóstol ñi-nè, dandu nì cahìn-te ñi ñi nùù nècuàchìmà,

¹⁹ cachí-te:

—Cuàhatahvì stná-nsià yùhù ndudu ñi mà, vachi cuní stnáì chitándòì ndahí ñi nèhivì, te ñihì stná-nè Espiritu ñi xí Dios —nì cachí-te.

²⁰ Doco nì cachi Pedro xì-té:

—Nì sàà-nì ndañuhu dahuun-ní xì ñi ñi ñà-tuxí inì-ní vátùnì cuyàhvì tàhvi ndiaha-nda nùù Dios.

²¹ Cò-nduá ducán cucuu-ní xì chuun yohó, vachi anima chicuèhè icúmí-ní nùù mii-yá.

²² Te vichì xiñuhu cuu-ní arrepentir sàhà cuàchì nì quida-ní, te càcàn tàhvi-ní nùù-yá, àma cuicàhnù inì-yá sàhà-nì ñà-nì nacani quini guá inì-nì.

²³ Vachi sàni cundaà inì, cuàhà gá cùmbidia inì-ní, te ñuhù inì-ní, vachi sadí cuàchì-ní nùù-ní —nì cachi Pedro.

²⁴ Dandu nì cachi Simón mà:

—Càcàn tàhvi-nsià nùù Stoho-ndà Señor sàhì ñà-màsà cúú xí ñi-ñàha nacua nì cachi-nsià jaàn.

²⁵ Daaní, Pedro xì Juan, chicá nì càhàn gà-nè (xì nècuàchì ñuu mà) palabra ñi xí-yá sàhà ichì ndiaha Stoho-ndà Señor.

Dandu mànuhù cuèyàà-nè ñuu Jerusalén, nì yàha-ne cuàhà ñuu cuatì ndé ndoó nècuàchì samaritanu, te yucán nì càhàn stná-nè xì nèhivì mà ñà-nduú razón ndiaha xí mii-yá.

Nansa nì xinindísá iin nècuàchì ñuu Etiopía

²⁶ Dandu nì quixi iin ángel xì Stoho-ndà Señor, nì càhàn-nè xì Felipe, cachí-nè:

—Quihin-ní ichì cuahán-ní ladu sur ndè cachi sàà-ní ichì cuàhàn ñuu Jerusalén xì ñuu Gaza; te ichì yucán, yucù nduá.

²⁷⁻²⁸ Ñàyucándüá, nì quihin nècuàchìmà ichì cuàhàn-nè. Te cunaha-ní, yucán yàha stná iin tiàa ñuu Etiopía. Iin nècuàchì eunuco nduú-né, te chuun cahnú ñihí-né nùù Candace, divi ñahà dandacú nùù ñuu Etiopía yucán, vachi ana ndiaá xì ñà-cuicà ñahà mà nduú-né. Te vichì sàmànùhù-né ñà-nì sàhàn-nè ñuu Jerusalén nì cahví-né Dios. Te xicá-né carreta xi-ne, cahví-né tutu ñi nì tiàa profeta nani Isaías.

²⁹ Dandu Espiritu ñi xí Dios, nì càhàn-yá xì Felipe, cachí-yá:

—Cuahán ndé cuàhàn carreta yucán, cutnahu xì nècuàchìmà cùhùn.

³⁰ Ñâyücândüá nì dáyáá Felipe nì sànihì-né carreta mà, te nì tiacu-nè cahví nècuàchìmà tutu nì tiaa Isaías. Ñâyücândüá, nì xicàn tñùhù-né nùù nècuàchìmà:

—¿A sànihì inì-nì ñà-ndüá cahví-ní, á cóó?

³¹ Dandu nì cachi nècuàchìmà:

—Còó, mà cúí, vàchi còò iin cachi xí nansa cuní cachà sàhà-ñá ducán mànihì inì.

Dandu nì sàcündàhvì nècuàchìmà nùù Felipe ñà-nì nàná stná-né nùù carreta, te cut-nahá-né cundoo-ne mà.

³² Te tutu ìi cahví nècuàchìmà, dohó cachi meru ndé cahví-né:

Na ian ndaca-nda iin riì cuàhàn-si ndé cui-si, ducán nì saca stná-te ndómà cuàhàn ndé cui-ndà, te divi na ian cuhíhín iin riì tii na dátê-si, ducán nì quida stná ndómà, cóni cáhàn-ndà.

³³ Doco nèhivì, nì cahíchi inì-nèndó. Ndahví nì quida-ne, nì dàtnátuu-nèndó nùù juez, te nì dàcuídà cuàchi uun-nèndó, mate còò cuàchi-nda, dandu nì sahnì-nèndó. Te vichi mà cóó gá nì-iin descendencia xi-nda cahan nèhivì, (cachi tutu mà).

³⁴ Dandu nì cachi nècuàchìmà xi Felipe:

—Quida sacù-ní favor, cachi-ní xí; ¿Índü nèhivì cáhàn tutu yohó sàhà-xí? Isaías nì tiaa xán, doco ¿a divi mii-né cáhàn sàhà-xì, te ò sáhà inga-né?

³⁵ Dandu nì quesaha Felipe nì nacani-ne ñà-ndüá cuní cachi palabra meru ndé cahví nècuàchìmà, te nì cachitnùhu nsihì-ne nansa íá ichì Jesús.

³⁶ Daaní, nì casaà-nè iin xaan ndé ñuhú tècuí. Te nì cachi tiàa ma:

—Cundehè-ní, yucán ñuhú tècuí. ¿A íá ñà-cùmánì quide? vàchi cuní cuhìi stná vichi.

³⁷ Dandu nì cachi Felipe:

—Nú ndisa, iin-nì nihnú vaha inì-ní, vätùni.

Dandu cachi nècuàchìmà:

—Yùhù xiníndísé Dèhemani Dios ndüú Jesús.

³⁸ Ñâyücândüá, nì dandácù nècuàchìmà ñà-cucuiin carreta xi-ne, te ndüi-nè nì nuu-ne cuàhàn-nè ndé ñuhú tècuí mà. Te nì quida ìi Felipe nècuàchìmà.

³⁹ Dandu nì caquee-ne nùù tècuí mà mànana-ne. Te na iin cachi nì ndiachi Felipe nì quida Espiritu ìi xí Stoho-ndà Señor cuàhàn-nè, nì ndañuhu-nè nùù vista xi inga nècuàchìmà. Ñâyücândüá nì quihìn tu nècuàchìmà ichì mànuhù-né, cudíí gá stná inì-nè.

⁴⁰ Daaní, Felipe, ndé ñuu Azoto nì natù-ne, te ñuu ñuu nì yàha-ne, dacuítià-nè razón ndiaha xí Dios dècuèndè nì sàà-nè ñuu Cesarea.

9

Nansa nì quihvi Saulo ichì Jesús

¹ Daaní, Saulo, iin-nì xidà sàstnùhù inì-nè sàhà nècuàchì nchícùn ichì Stoho-ndà Señor. Dana cáhàn-nè, cuàhàn-nè cahni nsihì-né nècuàchìmà, cachi-nè. Ñâyücândüá nì sàhàn-nè nùù dùtù cusáhnù,

² nì xicàn-nè tutu cunihì-ne cùhùn ñuu Damasco (cahvì nècuàchì dandácù) nùù veheñùhu xi nèhivì raza-nè yucan sàhà-ñá ducán nihì-né permisù nanducu-né nèhivì nchícùn ichì Jesús, te màcùnuhni nècuàchìmà quixi-ne presu ñuu Jerusalén, tiàa ò ñáha nì cündüú-né.

³ Ñâyücândüá, nì quihìn Saulo ichì cuàhàn-nè ñuu Damasco mà. Te sà-ítuú-né sàà-nè ñuu mà, dandu na iin cachi ndé dìquì-xí ansivi nì tñùù fuerte iin luz.

⁴ Te nì sàcasàn-né ñuhù nì quidamà, te nì tiacu-nè cáhàn iin ana cáhàn cachi xi-né:

—¡Saulo, Saulo! ¿Índü chuun nchícùn-ní yùhù quida quini-ní xí?

⁵ Dandu nì cachi Saulo:

—¿Ana nduu-ní, Señor mío?

Te nì cachi tu-ya:

—Yùhù nduí Jesús, divi ana dandoho-ní. Doco mii-ní quidá quini-ní xì mii-ní, na ian quidá quisi caní sàhà nùù garrocha —nì cachi-yà.

⁶ Dandu Saulo, ndé quidí cui-si-né ñà-yúhí guá-nè, te nì cachi-nè:

—¿Ndíá nduá cuní-ní quide, Señor mío?

Dandu cachi tu Stoho-ndà Señor xi-né:

—Ndacuiin-ní, cuahán-ní ñuu Damasco, te yucán ndacu nuu-ní nansa quida-ní —nì cachi-yà.

⁷ Doco tiàa xícutnaha-xi-né cuàhàn ichì mà, nì yúhí cuaa-te, vàchi nì inini-tè íá ana nì cáhàn, doco còò iin tuí.

⁸ Dandu nì ndacuiin Saulo, te nì nacuna-ne nduchinùù-né, doco mànciúí gá cundehè-né, (vàchi sàni cuaa nduchinùù-né). Ñâyücândüá íditá ndahà tnahá-né nì sàà-nè ñuu Damasco.

⁹ Te yucán nì ìa-ne ùni quivì, có-tùinùù-né, có-xixí-né, nì có-xihí stná-nè tècuí.

¹⁰ Te ñuu mà iá stná iin nècuàchì nchícùn xì Stoho-ndà Jesús nani Ananías. Te nì dàcùnì Jesús-nè mii-yá, cachí-yá xì-né:

—¡Ananías!

Te nì naxiconihí-né nùu-yá, cachí-nè:

—Yohó ié', Señor mío.

¹¹ Dandu nì cachí Stoho-ndà Señor xì-né:

—Quihin-ní ichi cuahán-ní calle nani Calle Ndàa, te yucán nanducu-ní iin tiàa nani Saulo. Iin nècuàchì ñuu Tarso nduú-né, te iá-nè vehe iin nèhivì nani Judas. Te vichi iá-nè xícàn tãhvi-né nùu.

¹² Te quivì vitni nì xini-nè iin seña na ian sánì-nè, te nì xini-nè mii-ní nì quihvi-ní ndé iá-nè, te nì chitándòò-ní ndahà-ní ònì-nè, te nì nihì-nè nì natùinuù-nè.

¹³ Doco nì cachí Ananías mà:

—Señor mío, cuahà nèhivì sàni cachí-nè xí nansa quidá nècuàchimà, ñà-cuahà guá sàni dàndòhó-nè nèhivì xì-ní ndoó ñuu Jerusalén.

¹⁴ Te vichi yohó sàni quesaa stná-nè nihí-né orden nùu dùtù xícusahnù ñà-tniì-ne nsidaa ana ndácùcahan xì quivì-ní.

¹⁵ Doco nì cachí Stoho-ndà Señor xì-né:

—Cuahán-nì, vachi sàni nacàxin nècuàchimà sàhà ñà-quida stná-nè chuun xì, cùhùn-nè càhàn-nè sàhù sàhì nùu nèhivì ndoó cuahà inga ñuu, xì nùu stná tè-xidandacù yucán, xì nùu stná nècuàchì Israel.

¹⁶ Te icúmì cachitnùhu stnàì xì-né ñà-cuahà guá icúmì-né ndoho-ne sàhì —nì cachí Jesús.

¹⁷ Ñàyùcàndüá, nì quee Ananías mà cuahàn-nè vehe yucán, te nì yàha-ne ndé iá Saulo, nì chitándòò-né ndahà-né ònì nècuàchimà, cachí-nè:

—Ñàni Saulo, ichi vaxi-ní nì xini-ní Stoho-ndà Jesús. Pues divi-ya nì techuun-xí vaxi ndé iá-ní ñà-natùinuù-ní, te chitu stná anima-ní Espíritu Ìì xí-yá— nì cachí Ananías.

¹⁸ Daanì, vichi duha nì còyo ñà-sàdì nihni nduchinúu Saulo, nahì chididà ònì sandua, te nì natùì dahuun nduchinúu-né. Dandu nì ndacuiin-nè, te nì cuhì-nè.

¹⁹ Te na ní nacuxi-ne, dandu nì ndundee ini-nè. Te divi ñuu Damasco mà nì ndòo-ne itnii gá quivì, nìsa ìa-ne xì nèhivì xì Jesús ndoó yucán.

Nansa nì càhàn Saulo palabra xì Dios ñuu Damasco

²⁰ Daanì, vichi duha nì sàhàn-nè iin iin veheñùhu xì nècuàchì raza-nè Judea, nì càhàn-nè sàhù sàhà Jesús ñà-divi Dèhemani Dios nduú-yá.

²¹ Ñàyùcàndüá, cuahà gá nì ndulocó nsidaa ana iníni nì càhàn-nè, te nì ndàcàtnùhù tnahá-nè nùu-nè, cachí-nè:

—¿Amàdi nècuàchì yohó nduú tiàa nìsa ìa ñuu Jerusalén nìsa dandáñùhù guá xì nèhivì ndácùcahan xì quivì Jesús? Te ¿aconì quesáá stná-nè ñuu-ndà yohó ñà-tniì-ne nècuàchimà, te cundaca-ñané presu nùhù ñuu Jerusalén ñà-cundoo-ne ndahà dùtù xícusahnù? —Ducán nì cachì nèhivì mà.

²² Doco Saulo, chicá ndee ní càhàn-nè xì nècuàchì raza-nè Judea ñuu Damasco mà, te nècuàchimà, cónì nànihì tñuni gá ini-nè nansa naxiconihí-né, vachi claru nì dàtúì Saulo sàhà Jesús, ñà-divi rey ndiaha xì raza-nè nduú-yá.

Nansa nì càcu Saulo nùu nèhivì raza-nè Judea

²³⁻²⁴ Daanì, nì yàha canì quivì, dandu nì nataca dava tè-raza Judea mà, te iin-nì nì candatnuhu-té ñà-cahni-té Saulo. Ñàyùcàndüá, ndui te ñuú ndiatú-te yehè nahnù ñuu mà, áma nihì-té cahni-ténè. Doco nì xinitnùhu-ne nansa cunì tèmà quida-té xì-nè.

²⁵ Ñàyùcàndüá, ñuú nì saca nèhivì xì Jesús-nè, cuahàn-nè diquì nama ndiadí nùu ñuu mà, te yucán nì dànuù-ñáné yàtà nama mà, inácáá-nè ini iin ìcà sicàtè.

²⁶ Dandu mànhù-né ñuu Jerusalén.

Ñà-ndüá nì quida Saulo na ní nasa-nè ñuu Jerusalén

Ñuu yucán nì cuni-nè nacuatnahá-né xì dava ga nèhivì xì Jesús, doco nsidaa nècuàchimà, nì yùhì-nè, vachi có-xiníndisá-né ñà-ndàà ndüá nchícùn ndisa Saulo ichi mii-yá.

²⁷ Ñàyùcàndüá, nì saca Bernabé nècuàchimà, te ndacá tnahá-nè nì sàà nùu nècuàchì apóstol, nì nacani-ne xì nècuàchimà nansa nì cuu na ní xini Saulo Stoho-ndà Señor, te nì càhàn-yá xì-né. Te nì nacani stná-nè nansa nì quida Saulo ñuu Damasco, nì càhàn vate cuahà-nè sàhà Jesús ñuu yucán.

²⁸ Ñàyùcàndüá, yucán nì ndòo Saulo ñuu Jerusalén, xicánúu-né xì nèhivì xì Jesús.

²⁹ Te cuahà gá nì càhàn-nè sàhà-yá, cónì yùhì-nè. Dècuèndè stná nècuàchì raza-nè càhàn dàhàn griegu nì càhàn stná xì-né, cuahà gá nì ndatnuhu-né xì nècuàchimà. Doco nècuàchimà, cuisì xícuni-nè cahni-ñáné.

³⁰ Doco dava nêhivî cahvi stná xî Jesús, nî xinitnúhu-ne sàhà peligrú mà. Ñâyùcándüá, nî saca-ne Saulo mà cuàhàn-nè ndé ñuu Cesarea, dandu mànuhù nècuàchímà ñuu Tarso.

³¹ Daaní, inicutu ladu Judea mà, xî ladu Samaria, xî stná ladu Galilea, nî ndudadí uun; vâtùni nataca cuéyàà nêhivî xî Jesús. Ñâyùcándüá nî nacuahandee gá ini-nè, te chicá nî cahvi víi-né Stoho-ndà Señor, vâchi nî chindee stná Espíritu Ìi xí-yá mii-né, te sàhámà chicá nî nducuahà-né.

Nansa nî nduvàha iin tiàa nani Eneas

³² Daaní, xicánúú Pedro visita inicutu ladu yucán, te nî sàà-nè iin ñuu tii nani Lida ñà-coo-ne visita xî nêhivî xî Jesús ndoó yucán.

³³ Te ñuu mà nî xini-nè iá iin tiàa nani Eneas; ùnà cuià indúhu-né cama, vâchi sàni dàñà ñi cuerpu xî-ne.

³⁴ Ñâyùcándüá, nî cachi Pedro xî-né:

—Cunaha-ní, Eneas: momentu yohó cuàhàn Jesucristu dandúvaha-ya mii-ní. Ñâyùcándüá ndacuiin-ní, nsida víi-ní cama xî-ní.

Dandu momentu mà nî ndacuiin-né.

³⁵ Te (nî xicanuu-ne) ñuu Lida mà, xî stná yodò nani Sarón, te nî xini nêhivî-né. Ñâyùcándüá cuàhà nècuàchímà nî tenchicùn stná-né ichi Stoho-ndà Señor.

Nansa nî natiacu iin nècuàchi ñahà nani Dorcas

³⁶ Daaní, tiempu yucán nîsa la iin nêhivî xî Jesús ñuu Jope nani Tabita. Te Dorcas nduú quívi-né dàhàn griegu. Te cuàhà gá obra nîsa quida-ne; cuàhà gá nîsa chindee-né nècuàchi ndahví.

³⁷ Doco quívi yucán nî quicuehè-nè, te nî xihì-nè. Ñâyùcándüá, nî dàcùchí nêhivî nsii ma tècuíí, te nî chinduhù-néndò iin cuarto dîquí-xí pisu ùi.

³⁸ Dandu nêhivî xî Jesús (ndoó ñuu mà), nî xinitnúhu-ne ñà-yatni uun iá Pedro ñuu Lida. Ñâyùcándüá, nî techuún-né ùi tiàa nî sàhàn nî sacundahví xî nùù nècuàchímà ñà-quixi-ne vichi duha.

³⁹ Ñâyùcándüá, nî quihìn Pedro ichi vaxi-ne cutnáhà-né xî tiàa ma, te nî caquesaa-nè vehe nsii ma. Dandu nî saca nêhivî mà-né nî nana-ne ndé vehe dîquí-xí. Te yucán nî tnàtuu nsidaa nècuàchi ñahà cuàán, itá-né sacú-né, dacurí-né Pedro vestidu-né xî dùhnú-né, vâchi na nîsa itiacu nsí-Dorcas mà, nî sansicu-nda sicoto xî nècuàchímà.

⁴⁰ Dandu nî cachi Pedro xî nsidaa nêhivî mà ñà-ní cáqueé-né fuera. Te na sání caquee-ne, dandu nî sàcuìn sisi Pedro, nî xicàn tàhvi-né nùù Dios. Te nî nacuíco-né, nî indehè-né ndé indúhu nsii ma, te nî cachi-nè xî ndómà:

—Ndacuiin-ní, Tabita.

Dandu nî nacuna nècuàchímà nduchínúù-né, te na ní xini-nè Pedro, nî ndacòo-ne.

⁴¹ Te nî chitanini Pedro ndahà-né nî ndacani-ne nècuàchímà. Daaní, nî cana-ne nsidaa nècuàchi dava ga ñà-nansihvi-ne, divi ñahàcuàán mà, xî dava ga stná nêhivî xî Jesús. Te nî cachi-nè xî nècuàchímà:

—Yohó iá Tabita xî-nsia; sàni natiacu-nè.

⁴² Ñâyùcándüá, nî xitià cuentu mà inicutu ñuu Jope nansa nî cuu xî nsii ma, te cuàhà gá nêhivî nî xinindisa-xí Stoho-ndà Señor.

⁴³ Dandu después, caní quívi nî ndòo ga Pedro ñuu mà, iá-nè vehe iin tiàa nani Simón, iin nècuàchi túha dacáhi iin.

10

Nansa nî sàcùnaha iin soldadu nani Cornelio ñà-cana-ne Pedro quixi-ne vehe-ne

¹ Ñuu Cesarea nî sandoo cuàhà soldadu. “Tè-italianu” nîsa cachi nêhivî ñuu mà xî soldadu ndoó yucán. Te iin capitán xî soldadu mà nani Cornelio.

² Mii-ne xî nsidaa stná nêhivî ndoó vehe-ne, xínduu-ne nêhivî tnùñuhu cahvi ndisa xî Dios, te chívaha ndisa-ne tnùñuhu xí-yá. Te dasán stná-nè cuàhà dhùn ñà-chindee xî nècuàchi ndahví, te nacuatú cuàhà stná-nè.

³ Te nî cuu iin quívi nahi càhúnì nî cuaà nî dàcùnì Dios-nè tuí ndáí vaxi iin ángel quíhvi-ne vehe ndé iá-nè mà, te nî cachi ángel mà xî-né:

—¡Cornelio!

Dandu nî indehè váha-ne ángel ma, te yúhí cuàhà-né; dandu nî cachi-nè:

—¿Ndíá iá, señor?

Te nî cachi ángel mà xî-né:

—Sàni inini Dios ñà-ndüá xicàn tàhvi-ní nùù-yá, te sàni natùù stná obra xî-ní nùù-yá.

⁵ Ñâyùcándüá, vichi duha techuun-ní nêhivî cùhùn ñuu Jope, te cana-ní iin tiàa nani Simón Pedro quixi-ne.

⁶ Cunaha-ní, iá-nè vehe iin nècuàchì dacáhi xì iin quisi, te yuhù mar indúhu vehe nècuàchìmà. Pues divi Pedro mà icúmí cachi xì-ní nansa ndiá icà-ní quida-ní —nì cachi ángel mà,

⁷ te cuahàn-nè.

Daaní, luegu nì cana Cornelio ùi mozo xi-ne tnàtuu-ne, te nì cana stná-nè iin soldadu xinúcuáchi nùu-né, vâchi iin nècuàchì cahví víi xì Dios nduú stná nècuàchìmà.

⁸ Dandu nì nacani nsihi-ne xì nècuàchìmà nansa nì cuu, te nì techuún-ñané cùhùn-nè ñuu Jope.

⁹ Daaní, nahi càxihúì inga quivì na sá-ìtúú-né casaà-nè ñuu mà, dandu divi hora mà nì nana Pedro ònivèhé ndé iá-nè, cuahàn-nè càcàn tàhvi-né nùù Dios.

¹⁰ Dandu nì quesaha-né nì xihì cuahà-né doco, te cuní-nè cuxi-ne. Ñâyücàndüá, cuahàn cuyucun ñà-cudamá-nè. Doco na táñaha ga coo listuámà, dandu nì dàcuní Dios-nè iin seña na ian sání-nè.

¹¹ Nì xini-nè nì nuna ansivi, te yucán iá iin sìcoto na iin dahmà càcùhun nsi-cúmi punta-ñà dìqui-xì, mànuà dècuèndè ndé iá-nè.

¹² Te nì xini-nè ini dahmà mà ñuhú nsidanuu clase quisi; quisi nahnú, quisi cuàti, xì quisi nduú laa.

¹³ Dandu nì tiacu-nè càhàn iin ana càhàn xì-né, cachí-yà:

—Ndacuiìn-ní cahni-ní quisi jaàn caxì-ní, Pedro.

¹⁴ Doco nì cachi Pedro:

—Còó, Señor mío, mà túhe caxí ñà-quini. Mà túhe caxí ñà-có-ndiá lque caxí.

¹⁵ Dandu cachí tu ana càhàn xì-némà:

—Màsà càchi-ní quini iá-sì, vâchi Dios nduú yuhù, te sàni cachi, iá víi quisi jaàn —nì cachi-yà.

¹⁶ Ûnì xichi nì càhàn-yà ducán, dandu nì nana dahmà mà ansivi mànuhá.

¹⁷ Ñâyücàndüá, cuahà gá nì nacani ini Pedro; ¿ndiá nduá cuní cachàmà? cahan-né. Te divi hora daa sàni caquesaa tiàa nì techuún Cornelio, itá-né yehè, vâchi sàni ndacàtnùhù-né nùù nècuàchì ñuu mà ndévi iá vehe Simón mà.

¹⁸ Ñâyücàndüá, meru càhàn-nè yehè, xicàn tnùhù-né a divi vehe ma iá Simón Pedro, á coó.

¹⁹ Daaní, Pedro, iá-nè nacani vá ini-nè (ndiá cuní cachi) ñà-ndüá nì dàcuní Dios-nè, te nì cachi Espiritu ìì xì-né:

—Cunaha-ní, sàni quesaa ùni tiàa cuní càhàn xì-ní.

²⁰ Ndacuiìn-ní, nuu-ní, te cuahàn-ní xì-né. Màsà nácáni ini-ní, vâchi yuhù nduú ana nì cana xì-né.

²¹ Ñâyücàndüá, nì nuu Pedro dècuèndè ndé itá tiàa vâxi nùù Cornelio mà, te nì cachi-nè xì nècuàchìmà:

—Amádi yuhù cuní-nsià càhàn xì-nsià. ¿Índü iin chuun nihí-nsià vâxi?

²² Dandu nì cacachi nècuàchìmà:

—Nùù capitán Cornelio vâxi-nsi. Nècuàchì ndàà cuisì ini-xì nduú nècuàchìmà. Chívàha víi-né tnùñuhu xì Dios, te cuú ini nsidaa nècuàchì raza-ní Judea sàhà-né. Te iin ángel ìì xì Dios nì cachi xì-né ñà-nì càná-né mii-ní cùhùn-ní vehe-ne càhàn-ní xì-né cunini-ne —nì cacachi tiàa ma.

²³ Dandu nì dàyàha Pedro tiàa ma ini vehe-ne, te yucán nì caquidì nècuàchìmà iin ñuu. Dandu inga quivì nì naquihin-ne ichì ndacá tnáhà-né xì Pedro mànuhù. Te iin ùi nècuàchì ñuu Jope cahví stná xì Dios, cutnáhà stná-nè xì Pedro cuahàn.

²⁴ Dandu quivì ùi nì casaà-nè ñuu Cesarea. Te yucán ndiatú Cornelio vehe-ne, mii-né xì tnaha-ne, xì nsidaa stná nècuàchì chicá cutnáhà vâha xì-né, vâchi sàni cana-ne nècuàchìmà ñà-quixi-ne vehe-ne.

²⁵ Dandu nì sàà Pedro meru vehe ma, te nì quee Cornelio, nì casàhù-nè xì nècuàchìmà, nì sàcuiìn sisi-né nì cahví-né nècuàchìmà.

²⁶ Doco Pedro, nì ndacani-ne nècuàchìmà, cachí-nè:

—Ndacuiìn-ní, vâchi na tiàa nduú mii-ní, ducán tiàa nduú yuhù.

²⁷ Dandu nì quesaha-né ndatnúhù-né xì nècuàchìmà, te ducán nì cayàha-ne ini vehe, te nì xini Pedro cuahà gá nèhivi sàni nataca ndò-mà.

²⁸ Dandu nì cachi-nè xì nsidaa nècuàchìmà:

—Mii-nsià, sà-ínahá-nsià nansa iá ley xì nsihù tè-nduú raza Judea, ñà-có-sàha ley xì-nsi nacuatnahá-nsí xì nèhivi inga ñuu (nahi mii-nsià). Nì còò stná permisú yàha-nsi vehe-ne. Doco vichi sàni sàni nì cundaà ini nì quida Dios ñà-mà vâha cachi-ndà xì nèhivi inga ñuu ñà-có-xiñhù Dios-nè, te ò nècuàchì siquini nduú-né. Còó.

²⁹ Ñâyücàndüá, na ní cana-nsia yuhù quixi, cóni càchí á coó. Vichi duha nì quihin ichi vâxi. Ñâyücàndüá, cuní cundaà ini ndiá ndüá disàhà-xì nì cana-nsia yuhù.

³⁰ Dandu ni cachi Cornelio:

—Cunaha-ní, sàcuàhàn-ndà cùmi quìvi, divi hora yohó nahi càhùni ni cuaà ni sandua. Te inihíí íá dòquí, te xícàn tàhvi nùù Dios. Dandu yucán ni ndecunu iin tiàa ni xinì, ndiaha gá nchíí sicoto xi-ne.

³¹ Te ni cachi-nè xí: “Cornelio, sàni tiacu Dios xícàn tàhvi-ní nùù-yá, te sàni natùì stná obra xi-ní nùù-yá.

³² Ñàyùcàndüá, techuun-ní nèhivi cùhùn ñuu Jope, te cana-ní iin tiàa nani Simón Pedro; íá-nè vehe inga Simón, iin nècuàchì dacáhi xi ñin. Yuhù mar nduú vehe-ne. Te nú sàni quesaa-nè yohó, dandu icúmi-nè càhàn-nè xi-ní”.

³³ Ñàyùcàndüá, vichi vichi ni dásài razón ñà-quixi-ní. Te vátùnì ni quida-ní ni quesaa-ní. Te vichi, yohó ndoó nsidaa-nsí nùù Dios ndiatú-nsí cunini-nsi nsidaa ñà-ndüá sàni cachi Dios xi-ní —ni cachi Cornelio.

Ñà-ndüá ni cachi Pedro na íá-nè vehe Cornelio

³⁴ Dandu ni càhàn Pedro xi nsidaa nècuàchìmà, cachí-nè:

—Vichi sàni cundaà inì, ñà-ndáà nduá, có-càhìchì inì Dios ni-iin nèhivi.

³⁵ Váchi có-quidá mà, nú cuisì cahvi víi iin nèhivi mii-yá, te quidá víi-né, dandu icúmi-nè ndee vaha-ne nùù-yá, mate nèhivi ndéni ñuu ni cui ni cùndüú-né.

³⁶⁻³⁷ Te mii-nsiá, sà-ináhá-nsiá ñà-ndüá ni cachitnùhu Dios xi raza-nsi Israel, ni dàquesáa-yá iin razón ndiaha nansa nàcùndoo vaha-nda nùù-yá quida Jesucristu. Te Jesucristu, Stoho nsidanicuú nèhivi ñuhívi nduú-yá.

Pues ináhá vaha-nsia ñà-ndüá ni cuu, ñà-dihna Juan ni quixi ni càhàn xi nèhivi, te ni quida ñi stná-nè nècuàchìmà. Daaní, ndè ñuu Galilea ni quesaha chuun xi Jesús de Nazaret, te dècuèndè inicutu ladu Judea ni xitiá stná palabra sàhà chuun ma.

³⁸ Te ináhá stná-nsiá nansa ni quida-ya, ni ñihí fuerte-yá Espíritu ñi xí Dios. Ñàyùcàndüá, ni xicanuu-ya ni quida-ya milagru ndiaha, ni dándüvaha-ya nsidaa ana ndohó quidá ñà-malu, vachi Yuamáni-yá Dios íá xi-yá.

³⁹ Te nsiùhù, testigu xínduu-nsí, vachi ni xinínùù-nsí nsidaa ñà-ndüá ni quida-ya ladu Judea xi stná ñuu Jerusalén. Dandu ni sahnì nèhivi-yá. Nchìca cruz ni chituu-neyà.

⁴⁰⁻⁴¹ Doco tixi ùni quìvi ni natiacu-yá ni quida Yua-yá Dios. Dandu cuàhà xichi ni ndecunu-ya nùù nèhivi, doco màdi nùù nsidaa-né. Còó, cuisì nùù nsiùhù nècuàchì ni chitnùni inì Dios ndecunu-ya nùù-xí, vachi divi nsiùhù ni nacáxin-ya cunduu ana cunínùù xi-yá na ní natiacu-yá, dècuèndè ni cutnahá stná-yá xi-nsí ni xixi-nsi (nùù mesa).

⁴² Dandu ni sàcunaha-nsí nùù-yá ñà-dacuítia-nsí palabra sàhà-yá nùù nèhivi, cachi-nsi xi-né ñà-divi mii-yá ni chitnùni inì Dios nsidandaà sàhà cuàchi nsidanicuú nèhivi, nèhivi itiácu, xi nèhivi sàni xihì.

⁴³ Te cunaha-nsiá, divi sàhà mii-yá ni cachitnùhu stná nsidaa nècuàchì nisa càhàn cuenta xi Dios sàhana, ni cachi-nè ñà-sàhà mii-yá vátùnì ndoo cuàchi nsidaa ana cunindisa-xi-yá, te ndacùcahan xi quìvi-yá —ni cachi Pedro.

Nansa ni ndèe Espíritu ñi xí Dios ini anima nèhivi inga raza ndoó vehe Cornelio

⁴⁴ Daaní, meru càhàn Pedro, dandu fuerte ni quixi Espíritu ñi xí Dios ini anima nsidaa nècuàchì (inga raza) iníni mà.

⁴⁵⁻⁴⁶ Te ni quesaha ní càhàn-nè dàhàn sàà, ndenihí vaha-ne Dios. Ñàyùcàndüá ni ndulocó nècuàchì raza Judea ni quixi xi Pedro, vachi ni xini-nè dècuèndè stná nècuàchì inga raza sàni ñihitáhvi Espíritu ñi xí Dios.

⁴⁷ Ñàyùcàndüá ni cachi Pedro xi nècuàchì raza-nè xiníndísá-má:

—Sàni xini-nsiá nansa ni ñihitáhvi stná nècuàchì yohó cucumi-né Espíritu ñi xí Dios nahi nsiùhù. Ádi còò iin cuní cadì xi nùù-né ñà-cuhii-né vichi.

⁴⁸ Dandu ni cachi Pedro xi compañeru-nèmà ñà-ni ndacùcahan-né quìvi Jesucristu, te quida ñi-nè nècuàchì sàà mà. Ñàyùcàndüá, na ní nsihi ni cuhii nsidaa nècuàchìmà, dandu ni sacundahví-nè nùù Pedro ñà-ni còò chíi gá-nè iin ùi gá quìvi xi-né.

11

Ñà-ndüá ni cachi Pedro na ní càhà-né nùù nècuàchì xiníndísá ndoó ñuu Jerusalén

¹ Daaní, ni xitiá cuentu nansa ni cuu ni xiníndísá stná nècuàchì inga raza mà. Dècuèndè stná ladu Judea ni sàà razón mà, te ñàyùcàndüá ni xinínùhu stná nècuàchì apóstol xi dava ga nècuàchì xiníndísá.

² Sàhájàn na ní nasaa tu Pedro ñuu Jerusalén, dandu ni tnátuu cuàhà nècuàchì raza-nè nùù-né, te ni quesaha-né xitnùhu-ñané,

³ cachí-nè:

—¿Indú chuun nì quihitnaha-ní xì nècuàchì có-nchìcùn ley xi-nda, te nì yàha-ní vehe-ne nì xixi-nsia?

⁴ Dandu nì nacani nsihi Pedro xì nècuàchì mà nansa nì cuu, te dohó nì cachi-nè:

⁵ —Ñuu Jope ié' xicàn tàhvi nùù Dios, te nì dàcùnì-yà yùhù ìñàha. Nì xini iin ñà-nduú nahi dahmà cahnú cəcùhun nsi-cúmì punta-ñà dìqui-xì, te ndè ansivi nì nua vaxan ndé ié'.

⁶ Indéhe váhi, te nacánì inì, ¿ndiá nduá ñuhuma? Te yucán ñuhú nsidanuu clase quisi: quisi nahnú, quisi yucù, quisi cuatì, xì stná laa.

⁷ Dandu nì tiacui cáhàn iin ana cáhàn, cachí-yà xì: “Ndacuiin-ní cahnì-nísi caxì-ní, Pedro”.

⁸ Doco nì caxì xì-yá: “Còò, Señor mío, mà túhe caxì nì-iin ñà-quini, nì-iin ñà-có-ndiá iqué caxì”.

⁹ Dandu, inga xichi nì cáhàn-yà ansivi, cachí-yà xì: “Màsà cächì-ní quini iá-si, vächi Dios nduú yùhù, te sàni caxì, iá vii-sí”, nì cachi-yà.

¹⁰ Ùni xichi nì cáhàn-yà xì ducán, dandu nì nana dahmà xì quisi mà mànuhá ansivi.

¹¹ Daaní, divi hora yucán sàni quesaa ùni tiàa, itá-né tùvehé ndé ié'. Ndé ñuu Cesarea nì quixi-ne nandúcú-né yùhù.

¹² Dandu nì cachi Espiritu ìi xì: “Cuahán-nì, cutnaha-ní xì nècuàchì mà cùhùn, doco màdì cächì-ní a ndísá, á cóó”. Dandu nì saqui ìñù compañerù iin-nì cahvi stná xì Jesús, divi nècuàchì itá yohó, te ndacá tnahá-nsí cuahàn-nsi (ñuu yucán. Te na ní sàà-nsi), nì quihvi-nsi inì vehe tiàa nì cana xì.

¹³ Dandu nì nacani-ne xì-nsí nansa nì cuu nì xini-nè iin iin ángel xì Dios ini vehe-ne, te nì caxì ángel mà xì-né: “Techuun-ní tiàa cùhùn ñuu Jope cana-ní Simón Pedro quixi-ne,

¹⁴ vächi icúmì Pedro mà cachitnùhu-ne xì-ní iin razón ndiaha nansa càcu anima-ní nùù Dios, mii-ní xì nsidaa stná nèhivi vehe-ní”, nì caxì ángel mà.

¹⁵ Daaní, làcà ní quesahì cáhàn xì nèhivi ndoó yucán, te fuerte nì quixi Espiritu ìi xì Dios dìqui-né, nacua nì quida-ya xì ndohó daa.

¹⁶ Dandu nì nsinuu inì nansa nì cachitnùhu Stoho-ndà Señor xì-ndà na ní cachi-yà: “Ñà-ndàá nduá, tècuìi nisa quida ìi Juan nèhivi, doco mii-nsiá, tixi Espiritu ìi xì Dios icúmì-nsiá nduhì-nsiá”, nì cachi-yà.

¹⁷ Pues divi ducán ndisa nì cuu stná xì nècuàchì inga raza mà, nì nihitáhvi stná-nè Espiritu ìi xì Dios nacua nì nihitáhvi ndohó na ní xinindisa-nda Stoho-ndà Jesucristu. Ñàyücandüá, (nì cundaá inì), divi Dios nduú ana nì quida xì ñà-jaàn, te sàhàmà nì nacani inì chicá vaha màsà càdi nùù-yá —nì cachi Pedro.

¹⁸ Dandu na ní nsihi nì inini nècuàchì Jerusalén mà palabra jaàn, dandu nì ndòò vaha ini-nè, te nì naquimani-né Dios, cachí-né:

—Pues ñà-ndàá nduá, dècuèndè stná nècuàchì inga raza sàni nihitáhvi ñà-cuu-ne arrepentir sàhà cuàchi-ne, te ducán cundiatù-nè vida ndiaha nicanicuahàn —nì cachi-nè.

Nansa nì xinindisá stná nèhivi ñuu Antioquia

¹⁹ Cunaha-ní, divi tiempu nì casahnì nèhivi Esteban nì quesaha stná-nè quida quini-ne xì nsidaa gá nèhivi xì Jesús. Ñàyücandüá, cuahà nècuàchì mà nì xitià nihni cuahàn cuahà ñuu. Dècuèndè stná ñuu Fenecia nì casaà dava-ne, xì ndé stná ñuu Chipre, xì ñuu Antioquia. Te yucán nì cáhàn stná-nè palabra xì Dios, doco xì cuisì nècuàchì raza-nè Judea.

²⁰ Daaní, dava nècuàchì ñuu Chipre xì dava stná nècuàchì ladu Cirene, nì casaà stná-nè ñuu Antioquia mà, te mii-né, ndisa, nì cáhàn-nè xì nèhivi ñuu mà có-nduú raza Judea, nì cachitnùhu-ne ñà-nduú razón ndiaha sàhà Stoho-ndà Jesucristu.

²¹ Te cuahà gá nì chindee-yánè, vächi cuahà nècuàchì ñuu mà nì xinindisá, te nì tenchicùn stná-nè ichì-yá.

²² Daaní, nì xinitnùhu stná nèhivi xì Jesús ndoó ñuu Jerusalén nsidaájàn. Ñàyücandüá, nì techuún-né Bernabé cuahàn-nè Antioquia.

²³ Te na ní sàà-nè yucán, yáha ga nì cudì ini-nè na ní xini-nè ñà-cuahà guá gracia sàni sàhatahvi Dios nèhivi yucán. Ñàyücandüá, nì cáhàn-nè xì nècuàchì mà ñà-siempre Stoho-ndà Señor nì cahvi xi-né.

²⁴ Vächi Bernabé mà, vaha ndisa ini-nè, vächi chitu anima-nè Espiritu ìi xì Dios, te xinindisá fuerte-nèyà. Te cuahà gá stná nèhivi ñuu mà nì tenchicùn xì ichì-yá.

²⁵ Dandu nì quihìn Bernabé mà ichì cuahàn-nè ñuu Tarso nandúcú-nè Saulo. Te na ní ndacùhun tnahá-né, nì nacuatnahá-né màndixi-ne ñuu Antioquia.

²⁶ Daaní, inii iin cuàa tootoo nì nataca-nè xì cuahà nèhivi xì Jesús, nì dàcuahá tnahá-né. Te cunaha-ní, divi ñuu Antioquia mà nduú ndé nì quesaha nèhivi cachí-nè cristianu xì nècuàchì nchìcùn ichì Jesús.

²⁷⁻²⁸ Daaní, quivi yucán nì casaà stná itnii nècuàchì profeta ñuu mà. Ñuu Jerusalén nì quixi-ne. Te iin-ne nani Agabo; te divi nècuàchì mà sàcuiin-nè mahì nèhivi natácá mà, te

nì dâcâhàn Espírìtu lì xí Dios-nè, nì cachitnùhu-ne ñà-vàxi tnama inicutu ñuhiví. Te ñà-ndáà nduá, vâchi ducán nì cuu ndisa tiempu xi rey cahnú nani Claudio.

²⁹ Ñâyùcândüá, (na ní tiacu) ñèhiví (ñà-vàxi tnama), dandu nì nacani ini-nè chicá vâha chindee-né ñècuâchi hermanu (ndahví) ndoó ladu Judea, vâtùni cuâha iin iin-ne iyuhu segùn ñà-ndüá sâa-nè cuâha-ne.

³⁰ Ñâyùcândüá, nì nacuatnahâ dihùn, te nì quida-neà entregar nùu ndahâ Bernabé xi Saulo. Dandu ñècuâchìmâ, ñihí-nèâ nì sââ (ladu Judea), te nì ndòâ ndahâ ñècuâchi sahnú idónnuu.

12

Nansa nì xihí Jacobo, te nì tñi stná Pedro

¹ Daaní, divi tiempu yucán nì dândácú rey Herodes tñi dava ñècuâchi natácá cahvi xi Jesús, ñà-dandohó-tene.

² Te iin ñècuâchi nì ndoho ma nduú ñani Juan nani Jacobo, vâchi nì dândácú rey mà, te nì sahní-té ñècuâchìmâ xi espada.

³ Dandu nì xini rey mà cudí ini ñècuâchi ñuu mà ñà-nì xihí ndómâ, ñâyùcândüá nì nacani inì-te chicá vâha tñi stná-te Pedro. Meru quívi iá vicò xixí-né pan có-ndútáchí nì sanduamâ.

⁴ Ñâyùcândüá nì tñi stná Pedro, te nì sâcündiadi-nè, nì ndòo-ne ndahâ soldadu, cùmi cùmi-té nì sandiaa xi-né, te cùmi turnu iá nsiquíví. Te rey mà, cuiis ndiatú-te yâha inga vicò, divi vicò pascua, dandu tavâ-té ñècuâchìmâ ñà-cundehe ñèhiví-né, (te cui-né).

⁵ Ñâyùcândüá, yucán iá Pedro, ndiadi-nè vehecâa. Doco ñècuâchi natácá cahvi xi Jesús, cuâhâ gá nì xicàn tâhvi-né nùu Dios sâhâ ñècuâchìmâ.

Nansa nì quee Pedro vehecâa nì quida Dios

⁶ Daaní, nì sââ iin ñuu antes quívi cuâhàn rey mà tavâ-té Pedro cundehe ñèhiví-né. Te indúhu-né ini vehecâa ma, quídí naâ-né. Te itánduhù stná soldadu iin iin ladu-nè, itnífí-te cadena nuhní-nè, te xí-ita stná soldadu ndiaâ yehè.

⁷ Dandu na iin cachí yucán nì ndecunu iin ángel xi Stoho-ndâ Señor, te nì natnuú iin luz ini vehecâa ma. Te nì tuxìn ndâha ángel mà diin tixi Pedro, nì dândácòo-ñané, te nì cachi-nè: —Ndacuiin-ní vichi duha.

Daaní, cadena nuhní ndahâ Pedro, nì dâñâtnâhá miá.

⁸ Te nì cachi tu ángel:

—Nacuhni-ní siuhmatixi-ní, te nacuaìn-ní ndisàn-ní.

Te na ní nsihí nì quida Pedro ducán, dandu nì cachi tu ángel mà xi-né:

—Cundixi-ní dòo-ní, te cunchicùn-ní yùhù cùhùn-ndâ.

⁹ Ñâyùcândüá, nì tenchicùn Pedro ángel mà cuâhàn-nè, doco cóni cundââ ini-nè a ndísâ ñà-ndââ nduá cuú xi-né, á cóó, vâchi na ian sâni-nè quídâ Dios nduá cahan-né.

¹⁰ Dandu nì cayâha-ne ndé iin iin soldadu ndiaâ, te después nì yâha stná-nè nùu ingâ-te, dandu nì sââ-nè ndé yehè cáa cahnú quee-nda calle ñuu mà. Te nì nuna miá, dandu nì caquee-ne fuera cuâhàn-nè. Te nì sââ-nè ndé nacâhndé-nè inga calle, te yucán nì nacoó ángel mà-né cuâhàn-nè.

¹¹ Dandu nì sââ Pedro nì cundaâ vâha ini-nè, te nì cachi-nè:

—Vichi sâni cundaâ inì, ñà-ndââ nduá, nì techuún Stoho-ndâ Señor ángel xi-ya, nì sââ-nè nì tavâ-né yùhù ndahâ Herodes. Te vitni cóó gá iñâha cuu xí nacua nì cuni tè-raza Judea cuu xí.

¹² Daaní, na ní nsihí nì nacani ini-nè sâhâmâ, dandu cuâhàn-nè vehe María nduú dihi Juan Marcos. Te yucán ndoó cuâhâ ñèhiví sâni nataca, xicàn tâhvi-né nùu Dios.

¹³ Dandu nì dâcâsan Pedro tranca mà, cásâhù-nè. Te nì quee iin ñâhâ chii nani Rode vâxi-ñâ cunini-ñâ ana câhân.

¹⁴ Te nì nacuni-ñâ tâchi Pedro. Doco ñà-cuâhâ guá cudí ini-ñâ, cóni nâcúnâ-ñâ yehè; nì dâyââ-ñâ nì nansihviâ vehe, nì cachitnùha xi ñèhiví mà ñà-divi Pedro nduú ñècuâchi câhân yehè mà.

¹⁵ Doco ñèhiví yucán, cóni xíníndísâ-né, ñâyùcândüá nì cachi-nè xi-ñâ:

—Ádi sâni culocú.

Doco mii-ñâ, iin-ni cachí-ñâ divi ñà-ndââ nduá.

—Còó —cachí-nè—, ádi ángel (ndiaâ) xi-né nduú ana câhân.

¹⁶ Doco iní-né casan yehè, cásâhù ñi Pedro. Ñâyùcândüá nì (caquee-ne nì) nacuna-ne yehè, te nì xini-nè ñi divi Pedro nduú-ne! Ñâyùcândüá nì ndulocó sâstnùhù-nè.

¹⁷ Dandu nì cuu ndahâ Pedro ñà-nì cúníni ñècuâchìmâ ñà-ndüâ cuâhàn-nè cachi-nè, te nì nacani-ne nansa nì ñihí-né nì quee-ne vehecâa ma nì quida Stoho-ndâ Señor. Te nì cachi

stná-nè xì nècuàchìmà (nì cùhùn-nè) cachitnùhu stná-nè xì Jacobo xì dava ga compañeru-nè xiníndísà. Dandu nì quee-ne cuàhàn-nè inga xaan.

¹⁸ Daaní, na ní tùnuù quìvì yucán, cuàhà gá nì ndulocó soldadu, ¿índù cuàhàn Pedro? cahan-té.

¹⁹ Te rey Herodes, nì dàndàcù-te ñà-nanducù-né cuàhà xaan. Doco cóni nátùì-ne. Ñàyùcàndùà, nì sanicuàchi rey mà sàhà soldadu mà, te nì sahnì-ñáté. Dandu nì quee rey mà ladu Judea cuàhàn-te ñuu Cesare, te yucán nì ndòo-tè.

Nansa nì xihì rey Herodes

²⁰ Cunaha-ní, xiní ùhì rey mà nèhivì ñuu Tiro xì nèhivì ñuu Sidón. Doco mii-né, cuní-nè nàcùndoo vaha-ne xì-té, vàchi ndè ñuù-te quixí ñà-itiácù-nè ñuu-nèmà. Ñàyùcàndùà, nì nihì-né nì nàcùndoo vaha-ne xì iin ana xinúcuáchi nùù-té vehe-tè, divi iin tiàa nani Blasto. Dandu iin-nì nì ndatnuhu nsidaa-né, te nì catnàtuu-ne nùù rey mà tixi Blasto mà, (àma nihì-né nàcùndoo vaha-ne xì-té).

²¹ Te nì saquin-te iin quivì (quixi tu nsidaa-né). Ñàyùcàndùà, divi quivì mà nì sàcòo-tè silla cahnú xì-te, ndixí-te sicoto vii xì-te, te nì càhàn-te sàhù xì nsidaa nècuàchìmà.

²² Dandu yáha ga nì càna fuerte-nè, cachí-nè:

— ¡Màdì nèhivì úún càhàn! ¡Iin dios nduú ana càhàn! —cachí-nè, càna-ne.

²³ Dandu vichi duha nì dùcùn rey mà iin castigu nì quida ángel xì Stoho-ndà Señor, vàchi cóni tàvà-te tñùuhu xì-yá. Ñàyùcàndùà, nì saxi sindacu inì-te, te nì xihì-te.

²⁴ Doco razón ndiaha xì Stoho-ndà Señor, chicá nì xitià inicutu, te chicá cuàhà nèhivì nì tenchicùn xì palabra mà.

²⁵ Daaní, na ní nsihi nì xinu chuun nì quida Bernabé xì Saulo ñuu Jerusalén yucán, dandu nì saca-ne Juan Marcos, te ndacá stnahá-né nì quee-ne ñuu mà mànuhù-né.

13

Nansa nì quihìn Bernabé xì Saulo iin ichì caní cuàhàn-nè chuun xì Jesús

¹ Ñuu Antioquía mà nì sandoo cuàhà nècuàchi natáca cahvi xì-yá. Te dava-ne nduú nècuàchi chináhà, te dava-ne nduú profeta cachitnùhu razón xì Dios. Te nècuàchi chicá xiquida ducán nì sanduu Bernabé, xì Simón el Negro, xì stná Lucio nì quixi ñuu Cirene, xì stná Saulo, xì stná Manaén, iin nècuàchi dava-nì nì sahnù xì gobernador Herodes.

² Daaní, nì cuu iin quivì na cahvi nsidaa-né Stoho-ndà Señor, te inihí stná-nè nùù-yá ndoo dòcò-nè, dandu nì cachi Espiritu Ìi xì-né:

—Cunaha-nsiá, cuaán cunduu chuun xì Bernabé xì Saulo vichi, vàchi sàni nacàxin mii-né. Ñàyùcàndùà, nacoo-nsianè nì cùhùn-nè quida-ne inga chuun xì —nì cachí-yà.

³ Ñàyùcàndùà chicá nì inihii-né, te nì xicàn tàhvi stná-nè nùù-yá. Dandu nì chitándòò-né ndahá-né òni Bernabé xì Saulo (ñà-cunduajàn seña ñà-sàni nihì nècuàchìmà chuun ndiaha). Dandu nì ndaquindèè-né xì nècuàchìmà cuàhàn-nè.

Nansa nì quida Bernabé xì Saulo na ní sàà-nè ñuu Chipre

⁴ Ñàyùcàndùà, nì quihìn nècuàchìmà ichì cuàhàn-nè, vàchi sàni techuún Espiritu Ìi-né cùhùn-nè. Te nì sàà-nè ñuu Seleucia. Te yucán nì nana-ne iin barcu cuàhàn-nè ndè iin ñuu cahnú nani Chipre.

⁵ Te meru ñuu ndé nì nuu-ne barcu mà nani Salamina. Dandu cuàhàn-nè veheñuhu xì nècuàchi raza-nè Judea iá yucán, te nì càhàn-nè palabra xì Dios. Te cutnàhá stná Juan xì-né, xinúcuáchi nècuàchìmà nùù-né.

⁶⁻⁸ Dandu nì nacàhin-ne inii ñuu mà dècuèndè nì sàà-nè inga orilla mar ndé iá ñuu Pafos. Te yucán nì ndacùhun tnahá-né xì iin tètàtnà nani Barjesús. Te Elimas nani stná-te, vàchi ducán cachí-nè xì tètàtnà dahàn yucán. Iin tè-raza Judea nduú stná-te, te càhàn-te razón xì Dios, cachí-te, doco dandahví uun-tè. Pues divi-tè iá nùù iin nècuàchi nchichí cusáhnù ladu yucán nani Sergio Paulo. Te nècuàchìmà, nì cana-ne Bernabé xì Saulo, vàchi cuní-nè cunini-ne palabra xì Dios. Doco tètàtnà mà, nì càhàn-te diquì Bernabé xì Saulo, daquítñuhu-tè nùù nècuàchi cusáhnù-má ñà-màsà cúnindísà stná-nè ichì Jesús.

⁹ Dandu Saulo, ò nì cachi stná-ndà Pablo, fuerte nì quixi Espiritu Ìi xì Dios ini anima-nè, ñàyùcàndùà nì indehè vaha-ne tètàtnà mà,

¹⁰ cachí-nè xì-té:

—Ndahví-ní, vàchi dandahví uun-ní nèhivì ñà-cuàhà gá maña quida-ní, te nì-iin ñà-vaha có-cùù inì-ní sàhà-xí, vàchi dèhe ñà-malu nduu-ní. ¿Índù chuun tùha guá-ní datùcù-ní nèhivì ñà-màsà cúnchícùn-nè ichì ndàcuisi Stoho-ndà Señor?

¹¹ Doco cunaha-ní, sàhà-ñá quida-ní ducán, ñàyùcàndüá icúmí-ní ñihí-ní iin castigu xi Dios vichi. Icúmí-ní cuaà dahuun-ní iin ratu; ni nduá orá mà cútui ga nùu-ní —ni cachi Pablo.

Dandu vichi duha ni cuaà nùu témà, te ni nàcuìin trùu dahuan. Ñàyùcàndüá, ni quee-tè cuàhàn-te nanducu-té ana cusidá xi-té cacanu.

¹² Te na ní xini nècuàchi cusáhnú-má ñà-ndüá ni cuu, dandu ni xinindisá stná-nè palabra xi Dios, vachi ni ndulocó-nè sàhà ñà-ndüá chináhá Pablo sàhà Stoho-ndá Señor.

Ñà-ndüá ni quida Pablo xi Bernabé na ní sàà-nè ñuu Antioquia ía ladu Pisidia

¹³ Dandu Pablo xi compañeru-nè, ni nana-ne iin barcu, te ni yàha-ne mar, ni sàà-nè ñuu Perga ía ladu Panfilia. Te yucán ni nacoo Juan-nè mànuhù-né Jerusalén.

¹⁴ Dandu nècuàchimà, ni quee-ne ñuu Perga mà ni sàà-nè ndè ñuu Antioquia ía ladu Pisidia. Te quivi descansu cuàhàn-nè visita veheñuhu xi nècuàchi raza-nè Judea, te ni sàcùndoo-ne yucán.

¹⁵ Dandu ni cahvi nècuàchi xícusahnú veheñuhu ma tutu nduú ley xi Dios, xi stná tutu ìi ni tiaa nècuàchi profeta sàhana. Dandu ni techuún-né razón nùu Pablo xi Bernabé, cachí-nè: —Nú ía iin conseju vaha cuàha-nsia nsiuhù, vátuni càhàn-nsià vichi, ñáni.

¹⁶ Dandu ni ndacuiin Pablo, te ni dánhà ndahà-né ñà-ni cùndóó dáfi nsidaa-né, te ni cachi-nè:

—Mii-nsiá nècuàchi raza xi Israel, xi nsidaa gá mii-nsiá nècuàchi cahvi stná xi Dios, cunini vaha-nsia.

¹⁷ Divi Yua-nda Dios nduú ana càhvi nsidaa nèhivi raza-ndà, vachi sàhana ni nacàxin-ya xi-nda ñà-cunduu-ne nèhivi xi-yá. Te na ndoo xicá ñi-nè ñuu Egipto, dandu ndiaha gá ni chindee-yánè, ni quida-ya cuàhà milagru nahnú, te ni tavà nsihí-yánè nùu ñuu mà ni caquee-ne libre.

¹⁸ Daaní, ùi dico cuià ni xicanuu-ne yucù dánhà. Te mate ndahví modo xi-ne, doco ni quidandee ini-yà sàhà-né ini cuià mà.

¹⁹ Daaní, después na ní sàà-nè ladu Canaán, dandu ni dándañúhù ñi-yá nèhivi ndoo ùsà ñuu nahnú yucán, te ni sàhatahvi-yánè ñuu mà.

²⁰ Daaní, ni yàha 450 cuià, te inii tiempu yucán puru juez nisa dandacu-xi nùu xi-nda mà, vachi ducán ni cachi mii-yá. Te ducán nisa ia dècuèndè tiempu ni quesaha Samuel càhàn-nè cuenta xi-ya.

²¹ Dandu ni xicàn xi-ndàmà coo iin rey dandacú nùu-né, (te màdi gá juez). Ñàyùcàndüá, ni cachi Dios ñà-iin tiaa nani Saúl canduu rey xi-ne, iin descendencia xi xi-nda Benjamín, te yua-né ni sanani Cis. Pues divi nècuàchimà ni dándacú ùi dico cuià nùu ñuu-ndà.

²² Daaní, después ni dàcúxió Dios nècuàchimà, te ni sàha-ya David chuun dandacuma, vachi dohó ni cachi-yà sàhà-né: “Sàni xini, vaha ga modo xi dèhe Isaí nani David, te cudí gá ñi sàhà-né. (Vàchi ináhi) icúmí-né quida-ne cumplir nsidaa ñà-ndüá cuní coo”, ni cachi Dios.

²³ Dandu ni quida stná-yà comprometer ñà-cunduu iin descendencia ndiaha xi nècuàchimà ana dacácu xi raza-ndá Israel. Ñàyùcàndüá, cunaha-nsiá, divi Jesús nduú ana ndiaha ma ni chitnùni ini Dios dacácu xi-nda.

²⁴ Doco na tãñaha ga quesaha Jesús (càhàn-yà palabra xi-ya), dandu dihna Juan ni quixi ni càhàn sàhù xi nsidaa nècuàchi raza-ndá Israel sàhà-ñà ni cùu-né arrepentir, te cuhí-né.

²⁵ Dandu después na sádaa-ní nsihi vida xi Juan ñuhivi yohó, dandu ni càhàn-nè xi nèhivi, cachí-nè: “¿Ana nduú yùhù, cahan-nsiá? Pues cunaha-nsiá, màdi mii-yá nduú. Doco después na sáni yàhi, dandísá vaxi ana nduú mii-yá. Vachi yùhù, ni có-nàtùni cundi mozo xi-ya ñà-taví ndisàn-yá”, ni cachi Juan.

²⁶ Ni cúnini vaha nsidaa mii-nsiá nècuàchi nduú descendencia xi xi-nda Abraham, xi nsidaa stná mii-nsiá nècuàchi dava ga cahvi stná xi Dios, vachi nùu mii-nsiá sàvaxi razón yohó nansa càcu anima-ndà, ñáni.

²⁷ Vachi nècuàchi ndoo ñuu Jerusalén, xi stná tè-xícusahnú nùu-né yucán, cóni cùndàà ini-nè ana nduú Jesús, ni cóni cùndàà stná ini-nè ñà-ndüá cuní cachi tutu ìi, mate divi nduá cahví-né cada quivi descansu, te divi nduú stná tutu ndé ni cachitnùhu profeta sàhana ñà-icúmí nèhivi cahni-néyà. Te divi ducán ndisa ni cuu, vachi tè-xícusahnú ñuu-ndàmà, ni dàyàha-téyá ndahà nèhivi cahni xi-yá.

²⁸ Mate còo ni-iin falta xi-ya, doco ni xicàn-te nùu Pilatu ñà-cui-yà.

²⁹ Ñàyùcàndüá, divi ducán ni cuu nacua ni cachitnùhu tutu ìi icúmí cuu xi-yá, ni dándohó-teyá, (te ni xihí-yà). Dandu ni nanihi nèhivi cuerpu xi-ya nùu cruz, te ni chinduhù-néyà ini cueva.

³⁰ Doco después ni natiacu-yà ni quida Yua-nda Dios.

³¹ Te cuàhà xichi nì ndecunu-ya nùù nècuàchi ladu Galilea nì quixi xi-yá ndé ñuu Jerusalén. Caní quivì nì ndecunu-ya ducán, te nèhivi nì xini xi-yá, testigu xínduu-ne, nacání-né xi nèhivi sàhà-yá.

³²⁻³³ 'Ñàyucàndüá, nsiùhù, cachítnùhu-nsi xi-nsiá iin razón ndiaha, vàchi nacua nì quida Dios xi xii-ndà comprometer ñà-icúmi-yá danatiácü-yá Jesús, pues divi ducán sàni quida ndisa-ya vichi tiempu xi ndohó nècuàchi nduú descendencia xi xii-ndà mà. Vàchi dohó cachí Dios nùù alabanza ìì, divi alabanza ùì ndé cachí-yá: "Mii-ní, Dèhemaní' nduu-ní. Sà-itiácü-ní vichi nì quide".

³⁴ Daaní, iá gà más ñà-ndüá nì cachi Dios sàhà-ñá cundaà ini-ndà cuàhàn-yá danatiácü-yá Jesús, te mà cúí gà-yá, nì mà téhi cerpu xi-ya, vàchi dohó nì cachi stná Yuamáni-yá xi-yá: "Nacua nì cachi xi David ñà-seguru icúmi cundehe ndahví' mii-né, pues divi ducán icúmi quida stná xi mii-ní", nì cachi-yá sàhana.

³⁵ 'Ñàyucàndüá, nùù inga alabanza ìì iá ndé nì càhàn David xi Dios, te dohó nì cachi-nè: "Mà cuàha-ní téhi ana ìì xi-ní ini yaví".

³⁶ Pues (inaha-nda), ñà-ndáá ndüá, nì quida vii David mà xi nèhivi ñuu-ndà tiempu xi-ne, nacua nì cachi Dios xi-né, doco nì xihì-nè, te nì ndùxin-ne ndé nì ndùxin xii-né, dandu nì tnàni iquicúñü-nè ñuhù.

³⁷ Doco Jesús, còò. Cóni tnàni iquicúñü-yá, vàchi nì natiacu-yá nì quida Yua-nda Dios.

³⁸ 'Ñàyucàndüá, nì cúnáhá nsidaa-nsiá ñà-divi sàhà Jesús vätüni ndutu cuàchi-nda, ñàni.

³⁹ Mate tíxi ley sahnú xí Moisés còò nansa ndoo ndisa cuàchi-nda, doco vichi nú nì cúníndisá-ndá Jesús, dandisá, vätüni, vàchi nsidaa ana xiníndisá xí-yá, seguro ndoo nsihì cuàchi-ne.

⁴⁰ 'Ñàyucàndüá, cuidadu cundoo-nsia ñà-màsà cúú xí-nsiá nacua nì cachi nècuàchi sàhana ndé nì cachi-nè:

⁴¹ Cundehe vaha-nsia, mii-nsiá tè-càhíchi inì-xi, vàchi cuàhìn quide iin milagru cahnú tiempu xi-nsia. Doco mà cúníndisá-nsiá, mate claru nì cachítnùhu nèhivi xi-nsiá, te sàhámà cuiisí icúmi-nsiá ndulocó cuàhà-nsiá, te sàà-nsiá ndañuhu dahuun-nsia. Ducán nì cachi Dios —cachí Pablo.

Nansa nì càhàn Pablo xi cuàhà gà más nèhivi ñuu Antioquia iá ladu Pisidia

⁴² Daaní, na ní quee-ne xi compañeru-nè veheñùhu ma, dandu nì sacundahví nèhivi cuàhà mà nùù-né àma nácání gà-nè xi nècuàchimà palabra yucán inga quivì descansu.

⁴³ 'Ñàyucàndüá, na ní nsihì nì nacutiía nsidaa nècuàchimà veheñùhu ma, dandu nì tenchicùn cuàhà-né Pablo xi Bernabé, xínduu-ne nècuàchi raza Judea, te xínduu stná-nè nècuàchi inga raza nì yàha ndé religión Judea mà ñà-cahvi stná-nè Dios. Dandu Pablo xi Bernabé, nì càhàn-nè xi nsidaa nècuàchimà ñà-iin-ni nì cúnchicùn-nè ichi-yá ndé ñihì ndisa-nda gracia.

⁴⁴ Daaní, nì yàha ùnà quivì, dandu nì nataca tu nèhivi, te làcà iyuhu-né nì cumani cunduu nsidanicuú nèhivi ñuu mà nì nataca ñà-cunini-ne palabra ìì xí Dini.

⁴⁵ Doco dava nècuàchi raza Judea mà, na ní xini-nè ñà-cuàhà guá nècuàchi inga raza sàni nataca, dandu nì cumbidia ini-nè, te nì càhàn ùhí-nè diquì ñà-ndüá nì cachi Pablo; quini ga nì càhàn-nè sàhà (palabra ìì mà).

⁴⁶ Doco Pablo xi Bernabé, cóni yúhí-nè; nì naxiconihí-né nùù nècuàchimà, cachí-nè:

—Primeru mii-nsiá nì nihitáhvi-nsiá cunini-nsia palabra ìì xí Dios, doco vichì sàni cahíchi inì-nsia palabra mà, na ian có-cuní-nsiá natüi-nsia cucumi-nsiá vida ndiaha nicanicuahàn. 'Ñàyucàndüá icúmi-nsí càhàn-nsi razón mà xi nèhivi inga raza yohó.

⁴⁷ Vàchi ducán nì sàcùnaha-nsí nùù Stoho-ndà Dios quida-nsi, vàchi dohó nì cachi-yá (xi Jesús):

Sàni sàhi mii-ní chuun ñà-danátnüù-ní ini anima nèhivi nsidanicuú raza. Sàhà mii-ní icúmi càcu anima nèhivi ndoó dècuèndé ñuu chicá xica ñuhiví, nì cachi Dios.

Ducán nì cachi Pablo.

⁴⁸ Te na ní nsihì nì inini nsidaa nècuàchi inga raza mà, dandu yàha ga nì cudü ini-nè; palabra vaha ndisa ndüá yohó, nì cachi-nè. Dandu nì xiníndisá cuàhà nèhivi mà palabra xi-ya, divi nècuàchi nì chitnüní ini Dios cundiatü anima-xi cutiacu nicanicuahàn.

⁴⁹ Te ducán nì xitiá palabra xi Stoho-ndà Jesús inicutu ladu yucán.

⁵⁰ Doco nècuàchi raza Judea (có-xiníndisámá), nì dàquítnùhu-ne nùù ñàhà cuicà sàhàn veheñùhu ma, xi nùù stná nècuàchi idónuu nùù ñuu mà, te nì ñihì-né nì ndulocó nsidaa nècuàchimà nì quida-ne. 'Ñàyucàndüá, nì cucuahà sàhà Pablo xi Bernabé, dècuèndé fuerza nì catavà-ñànè ñuu mà cuàhàn-nè.

⁵¹ Dandu nì catü-né sàhà-né ñà-ní cóyo yàcá nì tnà ñuu mà, te (seña nduámá ñà-icúmi nècuàchi ñuu-mà cunsida-ne cuàchi-ne). Daaní, nì quihìn Pablo xi Bernabé ichi cuàhàn-nè inga ñuu nani ñuu Iconio.

⁵² Doco nècuàchì xìnindísá nì candòo ñuu Antioquía mà, cuàhà gá nì cudii ini-nè (sàhà fe xi-ne), te nì chitu stná anima-nè Espíritu Ìi xí Dios.

14

Ñà-ndúá nì caquida Pablo xì Bernabé ñuu Iconio

¹ Daaní, nì sàà Pablo xì Bernabé ñuu Iconio, te nì quìhvi-ne veheñùhu xì nècuàchì raza-nè Judea nì càhàn-nè sàhù. Ñàyùcàndùá, cuàhà nèhivi raza-nè ndoó yucán nì xinindísá stná-nè, xì cuàhà stná nècuàchì raza ñuu mà.

² Doco dava nècuàchì raza Judea cóni xìnindísámá, nì dacá-né ònì nècuàchì ñuu-nè mà. Ñàyùcàndùá, cóni cuú gá ini nècuàchì ñuu mà sàhà compañeru-nè xìnindísá.

³ Doco Pablo xì Bernabé, caní quìvì nì sandoo-ne yucán, te cuàhà gá nì càhàn vate-né xì nèhivi; cóni yúhì-nè, vachi nì cundee ini-nè Stoho-ndá Señor sàhà gracia xi-ya. Te mii-yá, nì chindee-yánè, te nì quida-ne milagru ndiaha sàhà-ñá cundaà ini nèhivi divì ñà-ndáà nduú palabra chináhá-nè mà.

⁴ Doco nì tàhndé dava nècuàchì ñuu mà. Dava-ne nì ndòo-ne ladu xì nècuàchì raza Judea, te dava-ne nì ndòo-ne ladu xì nècuàchì apóstol.

⁵ Dandu nì nacuatnahá nècuàchì raza Judea mà xì dava ga nècuàchì ñuu mà, xì stná tè-xíandacú, te vaxi nsidaa-né carrera ñà-cuní-nè quida quini-ne xì Pablo xì Bernabé, cuní-nè cahni-nè nècuàchimá xì yùù.

⁶⁻⁷ Doco nècuàchimá, nì xìnìtñùhu-ne ñà-vàxi nsidaa nèhivi mà, te nì xinudèhé-nè cuàhàn-nè ladu Licaonia ndé iá ñuu Listra xì ñuu Derbe xì ranchu cuati xí ñuu mà. Te inicutu ma nì nacàhin-ne nì càhàn-nè xì nèhivi ñà-ndúú razón ndiaha.

Nansa nì caquida nèhivi siùmí ñuu Listra, nì cani yuu-né Pablo ñà-cui nècuàchimá

⁸ Cunaha-nsiá, ñuu Listra mà nisa ia iin tiàa cuhí sàhà-xí, vachi ducán nì quesaa-nè ñuhiví. Te sàhámá nicanicuahàn iá-nè; mà cùì caca-ne.

⁹ Doco (iin quìvì) na càhàn Pablo, dandu nì inini stná nècuàchì mà. Te na ní indehé vaha Pablo-nè, nì cundaà ini-nè xìnindísá vaha nècuàchimá, te sàhámá mà úhì nduvàha-ne.

¹⁰ Ñàyùcàndùá, nì càhàn ndee Pablo xì-né, cachí-nè:

—Ndacuiin-ní, cuiin ndaà-ní.

Dandu vichi duha nì ndacuiin nècuàchimá, te nì quesaha-né xicánúú-né.

¹¹ Te na ní xini nèhivi cuàhà yucán ñà-ndúá nì quida Pablo, nì càna ndee-né, cachí-nè:

—Íadi stoho-ndá xínduu nècuàchì yohó, te nì nuu-ne ñuhiví yohó nì nanduu-ne tiàa! —nì cachi nècuàchimá, càhàn-nè dàhàn mii-né ladu Licaonia yucán.

¹² (Cunaha-nsiá, iin stoho nècuàchì siùmí mà nduú yùù yócò nani) Júpter, ñàyùcàndùá ducán nì cachí-nè xì Bernabé. (Te inga stoho-nè nani Mercurio.) Ñàyùcàndùá, divì ducán nì cachí-nè xì Pablo, vachi chicá càhàn Pablo nùù Bernabé.

¹³ Te ñuu mà nisa ia stná iin tiàa dacuxi-xi Júpter mà ndé iá vaha orilla ñuu mà. Ñàyùcàndùá, vaha cuàhàn tèmá xì cuàhà nèhivi, te ndacá stná-te idunsiquì nì nducutu xì ita, cuàhàn-te cahni-tésì cunduu-sì promesa nùù Pablo xì Bernabé nì cùì.

¹⁴ Doco na ní xìnìtñùhu nècuàchimá sàhájàn, dandu nì dàcuàchí-né orilla sicoto xi-ne (ñà-nì cuduchí guá ini-nè), te nì dáyáa-nè nì quìhvi-ne mahì nèhivi cuàhà yucán, te nì càna ndee-né xì nècuàchimá, cachí-nè:

¹⁵ —Íay, señores! Màsà quídá-nsiá xì-nsí ducán, vachi iin-ni xínduu stná-nsì nèhivi úún nahi mii-nsiá. Te divì vaxi-nsi cachitñùhu-nsi xì-nsiá ñà-ndiá icá-nsiá nacoo-nsia yùù yócò yohó, vachi cóò ni-íñàha quidá, te cunchicùn-nsiá Dios iá nicanicuahàn, vachi cuiisì mii-yá nì quidavàha xì ansivi xì ñuhù íchí, xì mar; xì nsidaa gá ñà-íá ñuhiví.

¹⁶ Te tiempu nì yàha xi-nda nì sàha-ya nèhivi lugar cundoo-ne ñuhiví modo xì mii-né,

¹⁷ mate siempre sàha-yándó ñà-cundaà ini-nda nansa iá-yà, vachi màni gá quídá-yá xì-nda, dacuún-yá dàvì sàhà-ñá cana ñà-cuxi-nda, te ndenuu ini-nda, dandu cudii cuàhà ini-nda —nì cachi Pablo.

¹⁸ Doco mate ducán nì cachí-nè xì nèhivi cuàhà mà, ùhì nì sadí-nè nùù nècuàchimá ñà-màsà cáhni-né idunsiquì-mà cunduu-sì promesa nùù-né.

¹⁹ Daaní, dava nècuàchì raza Judea ndoó ñuu Antioquía xì ñuu Iconio, nì quixi stná-nè ñuu Listra mà, te nì dàquítñùhu-ne nùù nèhivi ñuu mà. Ñàyùcàndùá, nì cacani yuu nècuàchimá Pablo, nì sahnì-ñánè nì cahan-né. Dandu ñuhú nihni-ne nècuàchimá cuàhàn-nè iladu ñuu mà, te yucán nì nacoo-ñané.

²⁰ Doco después na sáni nataca nècuàchì xìnindísá ndé indúhu-né, dandu nì ndacuiin-nè mànuhù-né ñuu mà inga tu. Daaní, inga quìvì cutnàhà-né xì Bernabé nì quihin-ne ichì cuàhàn-nè chicá nùù-xí ndé ñuu Derbe.

²¹ Te yucán nì cãhàn stná-nè xì nêhivì ñà-ndúú razón ndiaha xí Dios. Ñâyücândüá, cuàhà nècuàchìmà nì xiníndísá stná, te nì dàcuahá-né palabra xi-ya.

Daaní, nì quihín tu Pablo xì Bernabé ichì mànuhù-né, nì nayàha-ne ñuu Lистра xì ñuu Iconio, te nì nasaa-nè ñuu Antioquía.

²² Te iin iin ñuu ndé nì nayàha-nemà nì nacuahandee ini-nè nêhivì xiníndísá, cachí-nè xì nècuàchìmà ñà-iin-nì nì cúníndísá vâha-ne, te quidandee stná ini-nè, vâchi cuàhà vida icúmí yâha nsidaa nêhivì cuní sàà ñuhiví ù xí Dios.

²³ Te iin iin ñuu mà nì quida stná-nè nombrar iin ù nècuàchì sahnú cunduu ana codònuù nù nêhivì xí Jesús ndoo yucán. Te na ní cuu nècuàchìmà nombrar nì xicàn tàhvi cuàhà-né nùú Dios, te nì inihì stná-nè. Dandu Pablo xì Bernabé, nì cachí-nè xì nsidaa nècuàchì xiníndísá-má:

—Yohó nì ndóo-nsia ndahà Stoho-ndà Señor, vâchi divi-ya nduu ana sàxiníndísá-nsiá vichì —nì cachí-nè.

Nansa mànuhù Pablo xì Bernabé ñuu Antioquía iá ladu Siria

²⁴ Daaní, nì nayàha-ne ladu Pisidia, xì ladu Panfilia,

²⁵ te nì nasaa-nè ndé ñuu Perge. Te na ndoo-né yucán nì cãhàn stná-nè xì nêhivì ñà-ndúú razón ndiaha xí Dios. Dandu nì yâha-ne chicá nì nù dècuèndè ñuu Atalia;

²⁶ te yucán nì quécoyo-ne iin barcu, nì yâha-ne mar, mànuhù-né ñuu Antioquía, vâchi divi yucán nduu ñuu ndé nì cachí nêhivì xì-né ñà-nì cùhùn-ne chuun xì Dios, te nì cúcúmí-né cuàhà gracia xi-ya. Te vichì ndisa, sàni xinu vù chuun xi-ne mà.

²⁷ Daaní, ñuu Antioquía mà nì dãnátácá tnahá-né xì nsidaa nècuàchì xiníndísá, te nì nacani nsihì-ne xì nècuàchìmà nansa nì chindee Dios-nè, te nì sãhatahvi-yá nì xiníndísá stná nècuàchì ñuu xicà.

²⁸ Dandu caní quivì nì ndoo Pablo xì Bernabé ñuu Antioquía mà, cutnâhá-né xì dava ga nècuàchì nchícùn ichì-yá.

15

Ñà-ndüá nì ndatnuhu nêhivì xí Jesús na ní nataca-nè ñuu Jerusalén

¹ Daaní, ñuu Antioquía yucán nì casaà stná dava nècuàchì ñuu Judea. Te nì quesaha-né dacuahá-né nêhivì xiníndísá, te dohó nì cachí-nè:

—Fuerza màcòo seña xì Dios icà-nsiá, vâchi nú cóo, còo salvación xi-nsia, vâchi ñà-jaàn nduu estilu nì nacoo xii-ndà Moisés.

² Dandu Pablo xì Bernabé, cuàhà gá nì cuàà-nè xì nècuàchìmà, te nì cucahnú chuun ma. Ñâyücândüá, ndúú-nè nì caquee-ne nombradu xì itnii gá nêhivì ñà-cùhùn-nè ñuu Jerusalén nataca-nè xì nècuàchì apóstol xì stná nècuàchì sahnú idónuu yucán, te ndatnuhu víi nsidaa-né sàhà chuun ma.

³ Ñâyücândüá, nêhivì xí Jesús ñuu Antioquía yucán, nì sãndaca ichì tnahá-né, te cuàhàn nècuàchì nombradu mà. Nì yâha-ne ñuu Fenicia, xì ñuu Samaria, te yucán nì cãhàn stná-nè xì nêhivì xí Jesús, nì nacani-ne nansa nì quihivì cuàhà nècuàchì ñuu xicà ichì mii-yá. Ñâyücândüá, cuàhà gá nì cudii ini nècuàchì iníni má.

⁴ Daaní, na ní sàà nècuàchì nombradu mà ñuu Jerusalén, dandu nì casahú stnahá-né xì nècuàchì apóstol xì nècuàchì sahnú idónuu, xì nsidaa gá stná nêhivì xí Jesús. Te nì nacani-ne nsidaa ñà-ndüá nì quida-ne, xì nansa nì chindee Dios-nè sàhà chuun nì sãhàn-nè.

⁵ Doco dava nècuàchì fariseu xiníndísá stná ichì-yá, nì ndacuita-ne, te nì cachí-nè:

—Nsidaa tiàa inga raza mà, xiñuhu màcútuu stná seña xí Dios icà-né, te màcùnaha stná-nè ñà-nì chivâha-ne ley sãnaha xí Moisés —nì cachí-nè.

⁶ Ñâyücândüá, nì nataca cãnúú nsidaa nècuàchì apóstol, xì nsidaa gá stná nècuàchì sahnú idónuu, te nì ndatnuhu-né sàhà chuun ma.

⁷ Cuàhà gá nì cãhàn-nè; dandu nì ndacuiin Pedro, te nì cachí-nè:

—Sà-ínahá-nsiá nansa nì quida Dios sãcuàhàn-ndà itnii cuàà, ñáni. Nùú tàcá-ndà nì cachí-yá ñà-yuhú cunduu ana cãhàn xì nècuàchì inga raza sàhà-ñã cunini stná-ne razón ndiaha xí-yá, te cuníndísá-né.

⁸ Te sàhà ñà-ínahá-yá nansa iá anima nsidanicuú nêhivì, ñâyücândüá nì quida-ya xì nècuàchìmà nacua nì quida stná-yá xì ndohó daa, nì sãhatahvi stná-yànè Espíritu Ì. Dandu nì cundaà ini-ndà, stná nècuàchìmà sàni ndee vâha nùú-yá.

⁹ Te sàhà-ñã iin-nì ndenihí vâha-ya ndohó xì stná mii-né, ñâyücândüá nì nsida ndoo stná-yá cuàchi anima-nè na ní xiníndísá-né.

¹⁰ Doco vichì ¿indú chuun có-ndoo ini-nsiá xì ñà-ndüá nì quida Dios, te cachí-nsiá xì nècuàchì inga raza mà ñà-fuerza chivâha stná-nè estilu sãnaha mà, vâchi nahi yugu vèe nduá? Nì mii-nda, te nì xii-ndà, cóni cundéé ini-ndà chivâha-ndañá.

¹¹ Còò, (ni mà càcu stná-ndà sàhà ley mà), vèchi xiníndísá-ndá ñà-sàhà cuisì gracia xi Stoho-ndá Jesucristu icúmi càcu anima-ndá, te divi ducán stná xi nècuàchi inga raza mà, sàhà cuisì gracia xi-ya càcu stná-nè —ni cachi Pedro.

¹² Daaní, dadí uun ni nàcùndoo nèhivi cuàhà mà, dandu ni nacani stná Bernabé xi Pablo ñà-ndiaha guá ni quida Dios na ní xicanuu-ne mahi nèhivi inga raza, te ni chindee-yànè ni quida-ya cuàhà milagru ndiaha yucán, cuàhà milagru fuerte.

¹³ Daaní, ni nsihi ni cacahàn nècuàchìmà, dandu ni càhàn stná Jacobo, cachí-nè: —Cunini vaha-nsiá ñà-nduá cuàhìn cachi, ñani.

¹⁴ Sàni nacani Simón (Pedro) xi-ndá nansa ni quida Dios (sà-lá tiempu), ni indehè ndahví-yà nècuàchi inga raza, te ni quesaha-yá ni nacàxin stná-yànè ñà-cunduu stná-nè nèhivi xi-yá.

¹⁵ Te divi ducán cachí stná libru ni tiaa nècuàchi profeta sàhana, vèchi dohó cachí iin tutu mà:

¹⁶ (Càhàn Dios, cachí-yà): “Icúmi naxicocuin después, te nachindee saa-túí nècuàchi descendencia xi David, vèchi cuàhà tñundoho sàni yàha-ne; doco ndiaha máni icúmi-nè nàcùndovì-nè quide. Na ian nduyucun saa iin vehe sàni chàhmà, ducán icúmi raza David mà nanihítàhvi sàà-nè quide.

¹⁷ Te nú ducán, dandu nsidaa stná nècuàchi raza dava ga inga ñuu, icúmi stná-nè nanducu-né yùhù ana nduú Stoho ñuuhí, vèchi nèhivi-xí xínduu stná-nè”.

¹⁸ ‘Ducán ni cachi Stoho-ndá Señor, vèchi dècuèndè chicá sàhana sàni cachitñuhu-ya ñà-dùcán icúmi cuu.

¹⁹ Ñàyucànduá, yùhù cachí xi-nsiá sàhà nècuàchi inga raza sàni caquihvi ichi Dios: chicá vaha màsà cuàhuuñ gá-ndané xi ley sàhana mà.

²⁰ Chicá vaha tiaa-nda iin tutu dacùhùn-ndá nù-nè, te cachi-ndá xi-nè ñà-mà váha caxi-ndá comida ni sàcùndoo nùu yùu yócò, vèchi sàni ndòo quinia. Ni màsà càhàn-ndá xi ni-iin nèhivi cóni nándàhà xi-ndá. Ni màsà càxi-nda cuñu quisi dacuáhnà uun nèhivi. Te màsà cúxi stná-ndá nù.

²¹ (Cuisi ñà-jaàn-ní xiñuhu chivàha-ne), vèchi ley xi Moisés mà, dècuèndè sàhana ndoó cuàhà tiaa iin iin ñuu chináhà xán, te cada quivì descansu cahví-nèà ndé natácá-nè veheñuhu —ni cachi Jacobo.

²²⁻²³ Daaní, chicá ni ndatnuhu nècuàchi apóstol, xi nècuàchi sahnú idónuu, xi nsidaa gá stná nèhivi xí Jesús, te ni nacàxin-ne ùi nècuàchi idónuu mà ñà-cutnahá-né xi Pablo xi Bernabé cùhùn-nè ñuu Antioquía, cunihi-ne carta-mà cùhùn. Te nècuàchi ni caquee nombradu mà, iin-ne nani Judas Barsabás, te inga-nè nani Silas. Te dohó cachí tutu mà: “Nsiùhù tè-icúmi chuun nùu Jesús, xi stná nècuàchi sahnú idónuu, xi nsidaa gá stná nèhivi xí mii-yá, càsàhú-nsi xi mii-nsiá nècuàchi ñani-nsi inga raza ndoó ñuu Antioquía xi ladu Siria xi ladu Cilicia.

²⁴ Cunaha-nsiá, sàni xinitñuhu-nsi ni sàhàn dava compañeru-nsi yucán ndé ndoó-nsiá, te ni dānācāni ini-nè mii-nsiá ñà-ni cachi-nè ñà-fuerza màcòo seña xi Dios icà-nsiá, te fuerza chivàha stná-nsiá ley sàhana, ni cachi-nè. Ñàyucànduá ni ndulocó-nsiá ni quida-ne. Doco màdi nùu nsiùhù ni ndàcù nùu-nè ñà-dàcuàhà-né ducán, còò.

²⁵ Sàhà ñà-jaàn nduá iin-ni ni ndatnuhu váha nsidaa-nsí, te ni cachi-nsi chicá vaha nacàxin-nsi iin ùi nèhivi cutnahá xi ñani màni-ndá Bernabé xi Pablo sàà ndé ndoó-nsiá.

²⁶ Vèchi sà-ináhà-nsiá nècuàchìmà, (ñà-cuàhà guá vida) sàni yàha-ne sàhà Stoho-ndá Jesucristu, dècuèndè cuàhàn-nè cui-nè ni cùí.

²⁷ Pues divi-ne sàni techuún-nsí, te cutnahá stná-nè xi Judas xi Silas casaà ndé ndoó-nsiá ñà-cachitñuhu nsidaa-nè nansa íá ñà-nduá ni ndatnuhu-nsí.

²⁸ Vèchi cachí Espíritu ìi xí Dios, te cachí stná nsiùhù, chicá vaha màsà dāndācū-nsí ñà-chivàha-nsia cuàhà iñàha, cuisì iin ùi ley nduá chicá xiñuhu, divi ñà-yòhò:

²⁹ Ñà-màsà càxi-nda ñà-nduá ni sàcùndoo nùu yùu yócò, te màsà cúxi-ndá nù; ni màsà càxi-nda cuñu quisi ni sàhnà uun; te ni-iin nèhivi, màsà càhàn-nè xi ana cóni nándàhà xi-nè. Cunaha-nsiá, nú ni chivàha ndisa-nsia ñà-jaàn, dandu ñà-sàni quida vii-nsiá cundua. Ni cúcuéé ni-nsia”. Ducán cachí tutu mà.

³⁰ Ñàyucànduá, ni techuún nècuàchi Jerusalén mà nsidaa nècuàchi nombradu mà cuàhàn-nè ñuu Antioquía. Te na ní casaà-nè yucán, ni dānātācā tnahá-né xi nsidaa nècuàchi xiníndísá-xi-yá, te ni quida-ne entregar tutu mà.

³¹ Te na ní nsihi ni cahví nècuàchìmà tutu mà, dandu cuàhà gá ni cudii ini-nè, vèchi cuàhà gá ni chindee razón mà mii-nè.

³² Dandu, Judas xi Silas, ni càhàn stná-nè ni nacuàhandee ini-nè nsidaa nèhivi xí Jesús ndoó yucán, vèchi nduú stná-nè profeta cachitñuhu razón xi Dios. Ñàyucànduá chicá ni sàà nècuàchìmà ni sàcùnhu vaha ndisa ini-nè mii-yá.

³³ Daaní, yucán nì candòo Judas xi Silas itnii gá quìvì, dandu nì ndaquindèè stnahá-né, te nì naquimani váha stnahá-né, cuàhàn-nè quihìn-ne ichì nùhù-né.

³⁴⁻³⁵ Doco Silas, nì nacani ini-nè ñà-ndòo chii gá-nè yucán. Stná Pablo xi Bernabé, nì candòo stná-nè yucán. Ñàyùcàndüá, mii-né xi cuàhà gá stná-nè, iin-ni nì chinaha stnahá-né ñà-ndüü palabra xi Stoho-ndà Señor, te nì cãhàn-nè xi nèhivi ñà-ndüü razón ndiaha nansa càcu-ne.

Nansa nì quihìn Pablo ichì cuàhàn-nè ñà-üi cacanu-ne xi Palabra xi Dios

³⁶ Daaní, nì yaha chii tiempu, dandu nì cachi tu Pablo xi Bernabé:

—Cùhùn tu-nda naxicocufìn-ndà nsidaa ñuu ndé nì sãhàn-ndà nì cãhàn-ndà palabra xi Stoho-ndà Señor, te nàcòtò-ndà ñanìtnaha-nda cahvi xi-yá ñuu yucán sàhà ñà-cundaà ini-ndà nansa nihí-né cuàhàn —nì cachi Pablo.

³⁷ Doco Bernabé, nì nacani ini-nè cundaca stnahá stná-nè xi Juan Marcos cùhùn.

³⁸ Doco Pablo, cóni cùnì-nè, vãchi tuxí íní-nè, mà váha cundaca-ne nècuàchimà cùhùn, vãchi na nì sãhàn-nè ñuu Panfilia daa, nì nacoò nihni nècuàchimà-né màndixi-ne, cóni sãhàn gá-nè chii gá nùù-xí quida-ne chuun ma.

³⁹ Ñàyùcàndüá, nì cuàà Pablo xi Bernabé sàhà chuun ma; mànicúí cundoo-ne de acuerdo; dècuèndè nì sàà-nè nì tãhndè dava-ne. Sãhámà nì saca Bernabé Marcos mà, nì canana-ne barcu cuàhàn-nè ñuu Chipre.

⁴⁰ Daaní Pablo, nì saca-ne Silas ñà-cutnahá-né cùhùn. Dandu nècuàchi hermanu ndoó yucán, nì xicàn tàhvi-né nùù Dios sàhà nècuàchimà ñà-nì chindéé gracia xi-ya mii-né ichì cùhùn-nè. Ñàyùcàndüá, nì quihìn-ne ichì cuàhàn-nè,

⁴¹ nì nacãhin-ne ladu Siria xi ladu Cilicia, te iin ñii ñuu ladu yucán nì cãhàn-nè xi nèhivi cahvi xi Jesús nì nacuaãhandee ini-nè nècuàchimà.

16

Nansa nì quesaha Timoteo xicánüü-né cutnahá-né xi Pablo xi Silas

¹ Daaní, nì nasaà Pablo xi Silas ñuu Derbe xi ñuu Listra. Te yucán iá iin nècuàchi chii nchícùn stná ichì Jesús nani Timoteo. Dèhe iin nècuàchi ñahà raza Judea nduü-né. Te cahvi stná dihi-némà mii-yá. Doco yua-né, iin nècuàchi raza griegu nduü-né.

² Te Timoteo mà, quidá vli ndisa-ne, cachi nsidaa nèhivi xí Dios ñuu Listra xi ñuu Iconio yucán.

³ Pues divi nècuàchimà cuní Pablo cutnahá stná xi-né cùhùn. Ñàyùcàndüá, nì saca-ne nècuàchimà nì chicoo-ne seña xi raza-nè Judea icà-né sàhà màsà cúdúchí ini nècuàchi raza-nè ndoó ladu yucán, vãchi nsidaa nècuàchimà, ináhà-né ñà-iin nèhivi raza griegu nduü yua Timoteo mà.

⁴ Daaní, Pablo xi compañeru-nè mà, nì quihìn-ne ichì cuàhàn-nè, te ñuu ñuu nì nacãhin-ne, nì cãhàn-nè xi nèhivi xí Jesús, nì cachitnùhu-ne ñà-ndüá icúmì-nè chivàha-ne nacua nì sacùnaha-né nùù nècuàchi apóstol xi dava ga nècuàchi sahnú ñuu Jerusalén.

⁵ Ñàyùcàndüá, nì nacuaãhandee ini nsidaa nècuàchi cahvi xi Jesús ndoó nsidaa ñuu mà, te quivì quivì nì nducuaahà gá stná-né.

Nansa nì dácùnì Dios Pablo seña xi-ya, te nì xini-nè iin iin nècuàchi ladu Macedonia cana-xi-né

⁶ Daaní, Pablo xi compañeru-nè, nì dándacú Espíritu ñi xí Dios nùù-né ñà-màsà cùhùn-nè xi razón ndiaha ndè ladu Asia. Ñàyùcàndüá, nì yàha-ne ndè chicá nùù-xí cuàhàn-nè, te nì nacãhin-ne ladu Frigia xi ladu Galacia.

⁷ Dandu nì sàà-nè raya ladu Misia, te yucán nì cunì-nè nãcahnde-nè sàà-nè ndè ladu Bitinia. Doco cóni sáha Espíritu ñi xí Jesús quida-ne ducán.

⁸ Ñàyùcàndüá, nì yàha ndaà-nè inii ladu Misia, te nì sàà-nè dècuèndè ñuu Troas.

⁹ Dandu ñüü nì dácùnì Dios Pablo iin seña, nì xini-nè ndè ladu Macedonia, te yucán iin iin tiãa ñuu mà, cachi-nè: “Nahà-ní ladu Macedonia yohó, te chindee-ní nsiühù”, cachi-nè.

¹⁰ Daaní, ñà-nì sàní Pablo ducán, ñàyùcàndüá vichi duha nì nsidayucun-nè ñà-cùhùn-nè yucán, mii-né xi compañeru-nè xi stná yühù, vãchi sàni cundaà ini-nsì, Dios nduü ana techúün-xí-nsì cùhùn-nsì cachitnùhu-nsì xi nèhivi ladu mà ñà-ndüü razón ndiaha xí-yá.

Nansa nì tàvã Dios Pablo xi Silas vehecàa iá ñuu Filipos

¹¹ Daaní, nì nana-nsi iin barcu ñuu Troas mà, te nì quihìn-nù ichì cuàhàn-nu ñà-yàha-nù mar. Te nì yàha ndaà-nsi dècuèndè ñuu Samotracia, dandu inga quivì nì sàà-nsi ñuu Neápolis. Yucán nì nuu-nsi barcu mà,

¹² Te cuàhàn-nsi chicá nùu-xí dècuèndè ñuu Filipos. Te divi ñuu mà nduú ndé iá chuun chicá nahnú ladu Macedonia yucán, te ndoó cuàhà stná nècuàchi Roma yucán. Pues divi ñuu yucán nì sàà-nsì nì sandoo chii-nsí itnii quivì.

¹³ Daaní, na ní sàà iin quivì descansu, dandu nì quee-nsi ñuu mà cuàhàn-nsi yuhù yúte ndé siempre natácá itnii nèhivi xícàn tàhvi nùu Dios. Ñàyúcànduá, nì sàà-nsì yucán, nì sàcùnnoo-nsi, te nì càhàn-nsì palabra xi Dios nì inini nècuàchi ñahà nì casaá stná yucán.

¹⁴ Te iin nècuàchimà nani Lidia. Ñuu Tiatira nduú ñuu-ne, te chuun quidá-né nduá dicó-né sicoto finu moradu. Te cahvi stná-nè Dios. Ñàyúcànduá na ní càhàn Pablo palabra ì, ndiaha gá nì chindee Dios-nè ñà-nì inini vaha-ne ini anima-nè, te nì xinindisá stná-nè palabra mà.

¹⁵ Dandu nì cuhii stná-nè, mii-nè xì nèhivi vehe-ne. Te después nì càhàn-nè xì-nsí nì sacundahví-nè nùu-nsí, cachí-nè:

—Nú sàni cundaà inì-nsia ñà-iin nècuàchi nihnú vaha ndisa ini xì Jesús nduí, dandu yaha-nsia vehi cundoo chii-nsiá —nì cachí-nè.

Te vátuni nì cundee-né nì candidá-nsí cundoo-nsi yucán.

¹⁶ Daaní, iin quivì cuàhàn-nsi ndé xícàn tàhvi-nsí nùu Dios, dandu nì ndacùhun tnahá-nsí xì iin ñahà chii inácáá iin ñà-malu inì-xi, te sàhà ñà-malu-mà tùha-ñà cachí-ña suerte xì-nda. Ñàyúcànduá, tiàa xídandacu-xi sàhà-ñá, vihi dihùn nihí-té ñà-tùha-ñà cachí-ña suerte xì nèhivi.

¹⁷ Pues divi ñahà chii mà nì quesaha-ñá nì tenchicùn-ña nsiuhù, ndàhì-ña palabra (sàhà-nsí), cachí-ña:

—Tiàa yohó, nècuàchi xinúcuáchi nùu mii-yá dandacú ndé chicá ansivi xínduu-ne, te cachítñuhu-ne xì-nda nansa iá ichi ndé càcu anima-nda —nì cachí-ña.

¹⁸ Pues nsiquívì nì quida-ñà ducán, dècuèndè màni cundéé gá ini Pablo. Ñàyúcànduá, nì nacuico-né yàtà-né nì càhàn-nè xì ñà-malu iá inì-ña, cachí-nè:

—Ndácùchín quivì Jesucristu, te dandacú nùu yohó nì yúxin-yó ini ñahà chii jaàn, te cuàhàn.

Dandu vichi duha nì quee ñà-malu cuàhàn.

¹⁹ Doco tiàa xínduu patrón xi-ñà, nì cundaà inì-te ñà-mà níhi gá-te dihùn sàhà-ñá. Ñàyúcànduá, nì catnii-tè Pablo xi Silas, te nì ditá-tené cuàhàn-te xi-né dècuèndè inì-xi ndé ndoó nècuàchi dandacú.

²⁰ Te yucán nì dàtnátuu-tèné nùu nècuàchi nsidándàà sàhà chuun, te nì cachí-te xì nècuàchimà:

—Tiàa yohó, tè-raza Judea xínduu-tè, te cuàhà gá quidá tóntò-te nècuàchi ñuu-nda.

²¹ Díin estilu chinàhà-te, mate có-sàha ley xi-nda candidá-nda estilu mà. Còò permisú chivàha-ndañá, vachi nècuàchi romanu nduu-nda.

²² Dandu nèhivi cuàhà itá yatni yucán, nì xidá stná ini-nè, ñàyúcànduá nì dàndacú juez mà ñà-tavà-té sicoto xi ndúu-nè, te cani-tèné xì vara.

²³ Te na ní nsihì nì sahnì cuií-tené xì vara, dandu nì dàquécoyo-tèné vehecàa, te nì chinaha-té nècuàchi ndiàá yucán ñà-nì cundíadí vaha nècuàchimà.

²⁴ Ñàyúcànduá, nì dàyàha-ne nècuàchimà ndé chicá inì-xi vehecàa ma, te nì dàquécoyo-ne sàhà nècuàchimà màhi iin yutnú cahnú.

²⁵ Daaní, nahi dava ñuu ndoó-né (vehecàa ma) xícàn tàhvi-né nùu Dios, te nacuatú-né alabanza xi-ya. Te iníni stná tè-xíndiadi gá mà.

²⁶ Dandu nanàá nì tñaa fuerte sàstñuhù, te nì ndòyo nihni inii vehecàa ma, dècuèndè cimientu xan nì xichí stná. Ñàyúcànduá nì nuna nsihì yehé, te nì dàñà tnahá nsihì cadena nuhní tè-ndiadi mà.

²⁷ Dandu nì nsiicuhnú ini nècuàchi ndiàá mà, te nì xini-nè nuná yehé vehecàa. Ñàyúcànduá nì tavà-né espada xi-ne, cuàhàn-nè cahni-né mii-né ni cui, vachi nì tuxi ini-nè sàni caquee nsihì tè-ndiadi mà.

²⁸ Doco nì ndàhì ndee Pablo, cachí-nè:

—¡Màsá quidá quíni-ní xì míi-ní, vachi ndoó nsihì-nsi!

²⁹ Dandu nècuàchimà, nì xicàn-nè ñà-tñuú nùu-né, te nì quihvi-ne ndé ini vehecàa ma, ndé quidí cuii-né, te nì sàcùin sisi-né nùu Pablo xi nùu Silas.

³⁰ Dandu nì tavà-ñáné fuera, te nì cachí-nè:

—Señores, cachí-nsiá xí, ¿ndiá nduá quide, te càcu animè?

³¹ Dandu nì naxiconihí Pablo xi Silas nùu-né, cachí-nè:

—Cuisi cunindisa-ní Stoho-nda Jesucristu, te càcu-ní xì stná nèhivi vehe-ní.

³² Dandu nì càhàn-nè xì nècuàchimà ñà-nduú palabra xi Stoho-nda Señor, te nì inini vaha-ne, mii-né, xì nsidaa stná nèhivi vehe-ne.

³³ Daaní, divi hora ñuu mà nì saca-ñáné cuàhàn-nè xì nècuàchimà nì nacate-ne mandù icà nècuàchimà ndé nì ducùn. Daaní, vichi duha nì cuhii-né xì stná nèhivi vehe-ne.

³⁴ Dandu ni saca-ñané ni nana-ne ni nansihvi-ne vehe-ne, ni sàha-ñané ñà-ni xixi-ne, cudí ini-nè, vâchi sàni xinindisá-né Dios vichi. Te cudí stná ini nsidaa nêhivi ndoó vehe-nemà.

³⁵ Daaní, na ní tùinuù inga quivi, dandu ni techuún juez itnii policia cuàhàn-te cachitnùhu-tè ñà-vàtùni dàña Pablo xì Silas.

³⁶ Ñâyücàndüá, nècuàchi ndiàá xì vehecàa ma, ducán ni cachitnùhu-ne xì Pablo, cachí-nè: —Sàni dândacú juez dàña-nsiá: sà-íá caquee-nsia libre, cachí-nè. Ñâyücàndüá, màsà nacáni gá ini-nsia, vâchi vâtùni quee-nsia cùhùn-nsiá —ni cachí-nè.

³⁷ Doco Pablo, ni cachí-nè xì policia yucán:

—Nsiùhù, nècuàchi romanu nduú stná-nsi. Doco ni ñàhni cuií-nsi nùu nsidaa nêhivi, te ni còo stná justicia ni ía sàhà-nsi na ní sàcùndiadi-nsi yohó. Sàhâyücàndüá, mà cándisá-nsi quee déhé-nsi. Cuní-nsi ni cáquixí mii juez tavà-né nsiùhù —ni cachí Pablo.

³⁸ Dandu ni sàhàn policia mà ni cachitnùhu-tè xì juez ñà-ndüá ni cachí Pablo. Ñâyücàndüá, ni yuhí nècuàchimà na ní cundaà ini-nè nècuàchi romanu nduú stná Pablo xì Silas, (te ía stná derechu xi-ne).

³⁹ Dandu ni quixí juez mà, te viví-ni ni càhàn-nè xì nècuàchimà, ni tavà-ñánè, te ni sacundahví-nè nùu nècuàchimà ñà-ni quèé-né ñuu mà.

⁴⁰ Ñâyücàndüá, na sàni quee-ne vehecàa ma, dandu cuàhàn-nè vehe Lidia, ni nàcòtò-nè nsidaa nêhivi iin-ni cahvi xì Jesús, ni nacuaàhandee ini-nè nècuàchimà. Dandu ni quihin-ne ichi cuàhàn-nè.

17

Nansa ni cucuahà sàhà Pablo ñuu Tesalónica

¹ Daaní, ni yàha-ne ñuu Anfípòlis xì ñuu Apolonia, te ni sàà-nè ñuu Tesalónica. Te yucán ía iin veheñùhu xì nècuàchi raza-nè Judea.

²⁻³ Te Pablo, de por sí sàhàn-nè visita veheñùhu xì nècuàchimà (na sàà-nè iin iin ñuu). Ñâyücàndüá ùni semana cada quivi descansu ni sàhàn-nè veheñùhu yucán, ni càhàn-nè sàhù xì nècuàchi natácá yucán, nacáni-né xì nècuàchimà nansa cachitnùhu tutu ì sàhà rey ndiaha ndiatú-né ndé cachá ñà-ìcúmi rey mà ndoho-ya, dandu después natiacu-yà. Ducáni ni dàcùahá-né nècuàchimà, nacáni-né sàhà Jesús ñà-divi mii-yà nduú rey ndiaha ma.

⁴ Ñâyücàndüá, ni xinindisá dava nècuàchimà, te ni tenchicùn stná-nè Pablo xì Silas. Cuàhà-né xínduu nècuàchi raza griegu ináhá stná ía Dios, te cuàhà stná-nè nduú nècuàchi ñàhà xí-idònuù ladu yucán.

⁵ Doco dava tè-raza Judea yucán, cóni xiníndisá-te palabra mà, vâchi ni cacumbidia ini-te sàhà Pablo. Ñâyücàndüá, ni saca-tè itnii tiàa tùha quini xicánúu xíxín, te ni nacana gà-te nêhivi cuàhà, te ni quida cuahà-tè sàhà Pablo ñuu yucán; ni sàà-te ndé vehe Jasón, ni caquihvi-tè fuerza ini vehe-ne, nandúcú-tè Pablo xì Silas, vâchi cuní-te tavà-ténè fuerza, te quida-ténè entregar ndahà nêhivi cuàhà mà.

⁶ Doco cóni ndácùhun-ténè. Ñâyücàndüá, ni tavà-té Jasón xì iin ùi gá stná nècuàchi xiníndisá-xí-yà. Te ñuhú níhni-tené ni sàà-te nùu tè-xicusahnú nùu ñuu mà, cána fuerte nsidaa-té, cachí-te:

—Ndé stná ñuu-ndá yohó sàni quesaa nècuàchi quidá tóntó xì nêhivi inicutu ñuhivi.

⁷ Te Jasón yohó, ni dàyàha stná-nè nècuàchimà ini vehe-ne, mate ni-iin nècuàchimà có-ndulócò-nè sàhà ñà-ndüá dandacú rey cahnú César xi-nda, vâchi cachí-nè ía inga rey chicá cusahnú nani Jesús.

⁸ Ducan ni cachí têmà xì nècuàchi ñuu mà. Ñâyücàndüá cuàhà gá ni ndulocó tè-xicusahnu-ma sàhà palabra mà,

⁹ te ni dândacú-te ñà-fuerza ni dàquihvi Jasón xì compañeru-nè dihùn nduú fianza, dandu ni cadaña-né.

Ñà-ndüá ni quida Pablo xì Silas ñuu Berea

¹⁰ Daaní, nêhivi xì Jesús ndoó yucán, ñuu ni tavà déhé-nè Pablo xì Silas ni sàndaca ichi-ñané ñà-cùhùn-nè ñuu Berea. Te na ní casaà-nè yucán, ni sàhàn stná-nè veheñùhu xì nècuàchi raza Judea.

¹¹ Te nêhivi veheñùhu yucán, chicá ni nacani vii ini-nè nùu nècuàchi ñuu Tesalónica, vâchi xì nsidaa voluntad xi-ne ni inini vâha-ne palabra ì xì Dios. Nsiquivi ni nanducu vâha-ne nùu tutu ì ñà-cùni-nè cundaà ini-nè a ndísá ñà-ndáa nduá cachí Pablo, á cóó.

¹² Ñâyücàndüá, cuàhà nècuàchi raza Judea ni xinindisá, te cuàhà stná nècuàchi ñàhà raza griegu xí-idònuù, xì cuàhà stná nècuàchi tiàa ñuu mà.

¹³ Doco tè-raza Judea ndoó ñuu Tesalónica, ni xinitnùhu-tè ñà-ndé stná ñuu Berea dacuítia Pablo razón ndiaha xì Dios. Ñâyücàndüá, ni sàà stná-te ñuu Berea mà, te ni dacà stná-te ñini nêhivi ñuu mà, ni danácuidà-tené (sàhà Pablo).

¹⁴ Ñâyùcàndüá, nècuàchì cahvi xi Jesús, vichi vichi ni ñàyáha-ne nècuàchì mà cuàhàn-nè ndé yuhù mar. Doco Silas xi Timoteo, cóni quèé-né ñuu mà.

¹⁵ Daaní, nècuàchì ndaca-xi Pablo cuàhàn, cutnáhâ-né ni sàà ndé ñuu Atenas. Dandu na cuàhàn-nè naquihin-ne ichi mànuhù-né, ni sàcùnaha-né cachi-né xi Silas xi Timoteo ñà-luegu ni quixí stná nècuàchì mà ndé iá Pablo.

Ñà-ndüá ni cachi Pablo na ní càhàn-nè xi nècuàchì xícusahnú ñuu Atenas

¹⁶⁻¹⁷ Daaní, ndiatú Pablo quesaa compañeru-né ñuu Atenas yucán, te ni xini-nè itá chitu figura cahvi nèhivi ñuu mà. Te ni cuduchi cuàhà ini-nè sàhàmà, ñâyùcàndüá, itni xi chichi ni sàhàn-nè veheñuhu xi nècuàchì raza-nè Judea yucán, te ni càhàn-nè xi nècuàchì mà, xi stná nècuàchì inga raza sàhàn yucán. Te nsiquívi nisa sàhàn stná-nè yàhvi, ni càhàn-nè xi nsidaa nècuàchì ndàcùhun tñaha-xi-né.

¹⁸ Te dava tiàa nchícùn ley xi tè-epicúreo, xi dava stná tè-ley estoico, ni ndacùhun stnahá-te xi-né, te ni xicán tñuhù stnahá-te nù-né. Ñâyùcàndüá cachi dava-tè xi compañeru-te:

—¿Ndíá ndüá cachi guá tè-jaàn xi-ndà?

Te ni cachi dava gà-te:

—Ádi stoho nècuàchì inga ñuu càhàn-te sàhà-xí.

Ducán ni cachi-te, vachi iníni-te càhàn Pablo sàhà Jesús, xi sàhà nansa natiacu-ndà.

¹⁹ Dandu ni saca-tè Pablo, cuàhàn-te xi-né iin xaan nani Areópago ndé natácá tè-xícusahnú nù ñuu mà. Te yucán ni ndàcàtnùhù témà nù-né, cachi-te:

—¿Nansa iá dàñùhù sàà dacuaha-guá-ní nèhivi?

²⁰ Vachi sàni xinitnùhu-nsi càhàn-ní sàhà iñàha tàcùnì-nsi, te ñâyùcàndüá cuní-nsi cundaà ini-nsi sàhà ñà-ndüá càhàn guá-ní jaàn —ni cachi-te.

²¹ Vachi nsidaa nècuàchì ñuu Atenas yucán, xi stná nècuàchì inga ñuu ndoó yucán, chicá cudí ini-nè cunitnùhu-ne, te ò cachi-nè sàhà iin ñà-saa.

²² Ñâyùcàndüá, ni sàcùin Pablo nù nècuàchì sàni nataca lugar nani Areópago mà, te ni cachi-né:

—Mii-nsiá nècuàchì ñuu Atenas yohó, sàni cundaà ini, cuàhà gà cahvi-nsiá stoho-nsiá.

²³ Vachi na xicánú yohó ni xini itá cuàhà ñà-ndüá cahvi-nsiá; te ni xini stná yucán iin iin altar ndé itándiaa palabra yohó: “Dohó quidáñuhù-ndá iin Dios tàcùnì-ndá”, cachi. Pues cunaha-nsiá, mate có-ináhá-nsiá Dios mà, te quidáñuhù-nsiáyà, doco yuhù cuàhìn cachtinùhi xi-nsiá sàhà-yá.

²⁴ Mii-yá ndüú ana dandacu-xi nù ansivi xi sàhà ñuhiví, vachi mii-yá ni quidayucun xán xi nsidaa stná ñà-iá nùá. Ñâyùcàndüá, có-xiñùhù-yá quidayucun nèhivi ni-iin vehe ndé coo-ya.

²⁵ Vachi itiácú mii-yá; còò ni-iin ana dacútiácú xi-yá, vachi còò ni-iñàha quidámànì nù-yá; còò. Mii-yá taxi-yá vida xi-nda, tàchì-ndá, xi nsidaa iñàha.

²⁶ Te iin-ni yohòtèhè-ndá ni quidayucun-yàndó, ñâyùcàndüá vichi xíndoo-nda inicutu ñuhiví, te cuàhà raza nduu-nda. Te mii-yá ndüú ana ni chitnùhi ini-xi índú tiempu cundoo iin iin raza ñuhiví, xi índùvi nù-xi cunduu iin iin ñuu cada raza,

²⁷ áma nanducu-né mii-yá, te cunitnàhâ-né xi-yá na ian nandúcú ndáha cuaá-nèyà. Doco, cunaha-nsiá, yatni uun iá-yà ndé ndoó iin iin-nda.

²⁸ Vachi sàhà mii-yá itiácú-ndá; divi sàhà mii-yá xicánúú-ndá, te ndoo-nda ñuhiví. Te dava stná tè-tùha nachutnahá palabra ñuu-nsiá yohó, sàni cachi-te: “Divi mii-yá ndüú yohòtèhè-ndá”.

²⁹ Ñâyùcàndüá, nú ndisa, descendencia xi Dios nduu-nda, dandu màsà cútúxí ini-ndá Dios ndüú iin figura ni nacani ini nèhivi, te ni quidavàha-neà xi oro ò plata ò yùù.

³⁰ Cunaha-nsiá, tiempu ni yàha xi-nda, cóni itnúi Dios cuenta sàhà modo xi nèhivi, vachi cónisá cùndáà ini-né. Doco vichi, nù nsidanicuú nèhivi inicutu ñuhiví dandacú-yá ñà-naxicocufin ini-ndá sàhà cuàchì-nda.

³¹ Vachi sàni saquín-yá iin quívi cuàhàn-yà ndàcàn-yà cuenta sàhà cuàchì nèhivi ñuhiví, te nihí-né nacua ndiá icá. Te sàni cachi stná-yà ana cunduu juez nsidandaà cuenta xi-ya; divi ndüú iin ana (ni xihí, te) ni natiacu ni quida-ya. Pues sàhàmà vátùnì cucumì ndisa-nda seguru ñà-icúmí coo ndisa juicio —ni cachi Pablo.

³² Daaní, na ní inini nècuàchì mà ñà-cachí Pablo iá nansa natiacu-ndá, dandu ni sàcùndiaa uun-ñané. Doco dava-ne, còò; dohó ni cachi-né:

—Nsiùhù, cuní-nsi cunini ga-nsi càhàn-ní xi-nsí inga quívi sàhà chuun jaàn.

³³ Dandu ni queue Pablo cuàhàn-nè.

³⁴ Doco dava tiàa ni inini ma, ni xinindisá-né, te ni tenchicùn-nè nècuàchì mà. Iin-ne ndüú iin juez quidáchúun lugar nani Areópago mà, te quívi-né ndüú Dionisio. Te inga-nè ndüú iin ñàhà nani Dámaris; te ndoó gà stná iin ù ana ni xinindisá.

18

Ñà-ndúá ni quida Pablo ñuu Corinto

¹ Ni nsihi (ni cãhàn Pablo xi nècuàchìmà), dandu ni quee-ne ñuu Atenas cuàhàn-nè ñuu Corinto.

² Te yucán ni ndacùhun tnahá-né xi iin nècuàchi raza-nè Judea nani Aquila. Mii-né xi ñahàdihí-nè Priscila, xinduu-ne nècuàchi iin ñuu iá ladu Ponto, doco vichi làcà ní quixi-ne ñuu Roma iá ladu Italia, vachi ni dándácú rey cahnú Claudio ñà-fuerza caquee nsihi nèhivi raza Judea ñuu mà cùhùn-nè. Ñàyúcàndúá, ñuu Corinto yucán sàni caquesaa nècuàchìmà. Dandu ni sàà stná Pablo visita vehe-ne,

³ te yucán ni ndòo-ne cutnáhà-né xi nècuàchìmà quidáchúùn-né, vachi iin-ni oficiu icúmí nsidaa-né, divi ñà-quidavàha-ne vehe sicoto ndee.

⁴ Te cada iin iin quivì descansu sáhàn-nè veheñùhu xi nècuàchi raza-nè, te ni cãhàn Pablo xi nèhivi yucán, vachi cunì-nè cunindisá stná nècuàchìmà, a sea nduú-né nècuàchì raza-nè, te ò nèhivi inga raza.

⁵ Daaní, ni quee Silas xi Timoteo ladu Macedonia, ni quesaa-nè ndé iá Pablo. Dandu Pablo, ndé cuisì chuun cãhàn-nè palabra xi Dios ni quesaha-né quidá-né, te cuàhà gá ni dàcuàhá-né nècuàchi raza-nè yucán, cachí-nè ñà-divi rey ndiaha nani Cristu nduú Jesús.

⁶ Doco nècuàchi yucán, ni caquesaha-né ni cahíchi ini-nè palabra mà, te ni cãhàn úhí-nè diquíá. Ñàyúcàndúá, ni naquidi Pablo sicoto xi-ne, (te seña nduámà ñà-cuàhàn-nè nacoo dahuun-ne nècuàchìmà). Te ni cachi-nè:

—Yùhù, mà cúnisá cuàchi nú ni sáà anima-nsiá ndañuhá. Mii-nsiá cunsida cuàchi-nsia sàhà-nsiá. Ñàyúcàndúá, vichi, nèhivi inga raza icúmí-nsí cãhàn xi-nsí —ni cachi-nè.

⁷ Dandu ni quee-ne veheñùhu ma cuàhàn-nè vehe iin tiàa nani Justo. Iin nècuàchi nihnú vaha stná ini xi Dios nduú nècuàchìmà, te yatni inítnáhà stná vehe-ne xi veheñùhu yucán.

⁸ Doco ni iá iin nècuàchi inúú xi veheñùhu ma nani Crispo, te ni xinindisá stná nècuàchìmà ichi Jesús, mii-né xi nsidaa nèhivi vehe-ne. Daaní, cuàhà gá stná nècuàchi ñuu mà, ni inini stná-nè palabra xi-ya, te ni xinindisá stná-nè, dandu ni cuhì-nè.

⁹ Daaní, iin ñuu ni dàsání Dios Pablo ni cachi-yà xi-né:

—Màsà yúhí-ní, te màsà cú-íhín-ní xi ni-iin nèhivi. Iin-ni quida-ní seguir cãhàn-ní xi-né.

¹⁰ Vachi yùhù ié' cutnáhí xi-ní, te còò iin quida quini xi-ní, vachi cuàhà nèhivi ñuu yohó icúmí cunduu nèhivi xí —ni cachi-yà.

¹¹ Ñàyúcàndúá, iin cuà dàva ni iá Pablo ñuu yucán, ni dàcuàhá-nè nèhivi ndoó yucán ñà-nduú dàñùhù xi Dios.

¹² Daaní, ladu Acaya yucán iá stná iin tè-dándácú nani Galión. Te tiempu xi-tè ni nataca cuàhà tè-raza Judea, ni catnii-tè Pablo, ni saca-tènè cuàhàn-te xi-né nùù tè-dándácú-mà, sanícuàchi-tè sàhà-né,

¹³ cachí-te:

—Tiàa yohó, diín nduú modo chináhà-nè cahvi-nda Dios, vachi cunaha-ní, có-sàha ley xi-nda cahvi-nda Dios nacua cachí mii-né.

¹⁴ Dandu meru cuàhàn cãhàn stná Pablo ni cùí, te ni cachi Galión mà:

—Mii-nsiá tè-raza Judea, nú ndisa quidá quíni tiàa yohó, te ò iin falta cahnú nduá ni quida-ne ni cùí, dandisá, vètùni candisé ñà-sanícuàchi-nsia sàhà-né núí.

¹⁵ Doco còò, vachi cuisì sàhà dàñùhù xi mii-nsiá cãhàn-nsiá, xi sàhà stná nècuàchi nchichí xi-nsia, xi sàhà stná ley xi mii-nsiá. Ñàyúcàndúá, mii-nsiá cundehè-nsiá sàhà chuun yohó, vachi yùhù, mà nsidándái-ñà —ni cachi-te.

¹⁶ Dandu ni dándácú-te cuxio nsihi-ne nùù-té.

¹⁷ Daaní, dava nècuàchi raza griegu ñuu mà, ni catnii-ne iin nècuàchi cusáhnù nùù veheñùhu xi nècuàchi raza Judea mà. Sóstenes nani nècuàchìmà, te ni sahni cuií-ñané nùù Galión mà. Doco cóni ndúlócò-te.

Nansa ni naxicocuíñ Pablo ndè ñuu Antioquíá, dandu ni quihin tu-ne ichi inga xichi cuàhàn-nè chuun xi Jesús

¹⁸ Daaní, cuàhà gá quivì ni iá Pablo ñuu yucán. Dandu ni ndaquindèè-né xi nècuàchi hermanu ndoó ñuu mà, te cuàhàn-nè ñuu Cencrea. Te yucán ni dátè tehe-né, vachi seña (ni sanduamà) ñà-sàni saquin-nè iin compromisu nùù Dios. Daaní, ñà-cuní-nè nùhù-nè ladu Siria, ñàyúcàndúá, ni nana-ne iin barcu, mii-né xi Aquila xi ñahàdihí nècuàchìmà nani Priscila, te nsidaa-né cuàhàn-nè barcu mà

¹⁹ ni sàà-nè ñuu Éfeso, vachi divi ñuu yucán icúmí ndòò Priscila xi Aquila. Dandu ni sàhàn (nsidaa-né) veheñùhu xi nècuàchi raza-nè ñuu mà, te ni cãhàn Pablo xi nèhivi natácá yucán.

²⁰ Te nècuàchìmà, ni cuni-nè cucuee chii gá Pablo xi-né inga ratu gá. Doco cóni cándisá-né,

²¹ vachi ni cachi-nè:

—Icúmí nùhì ñuu Jerusalén ñà-coi yucán quivì nacava vicò sà-itúú. Doco primeru Dios icúmí naxicoquín yohó inga xichi —nì cachi-nè, dandu nì ndaquindèè-né xì nècuàchimà. Te nì nana tu-ne iin barcu iá ñuu mà cuàhàn-nè.

²² Dandu nì sàà barcu mà ñuu Cesarea, (te yucán nì nuu-ne), mànuhù-né ñuu Jerusalén, nì casahù-né xì nèhivì xí Jesús ndoó yucán, dandu nì quee tu-ne cuàhàn-né ñuu Antioquía.

²³ Te yucán nìsa ìa-ne iin ratu, dandu nì quihin tu-ne ichì cuàhàn-né ladu Galacia xì ladu Frigia. Te ñuu ñuu nì nacàhin-ne nì càhàn-né xì nècuàchì nchícùn ichì Jesús, nì nacuàhandee ini-né nècuàchimà.

Ñà-ndúá nì cuu na ní sàà Apolos ñuu Éfeso, te nì càhàn-né palabra ì xí Dios

²⁴ Daaní, ñuu Éfeso mà nì sàà stná iin nècuàchì raza Judea nani Apolos. Alejandría nduú meru ñuu-nè, te tùha vaha-ne càhàn-né sàhù. Te ináhá vaha stná-né nansa nacání tutu ì,

²⁵ vachi cuàhà gá sàni dàcuàhá-né ichì Stoho-ndá Dios. Te dii gá stná ini-né càhàn-né sàhù. Ñàyùcàndúá, claru chináhá-né sàhà ichì-yá. Doco cuisì ley xì Juan Bautista nduá ináhá-né.

²⁶ Pues divì nècuàchimà nì quesaha-né càhàn ndee-né xì nèhivì sàhàn veheñùhu xì raza-né ñuu Éfeso mà. Te nì inini stná Priscila xì Aquila. Ñàyùcàndúá nì tavà cuàán-ñané nì nacani vù-né xì nècuàchimà nansa meru iá ichì Dios.

²⁷ Daaní, después, nì cuni nècuàchimà yàha-ne nùù-xí ndé nduú ladu Acaya. Te nsidaa hermanu (ñuu Éfeso mà), nì cachi-nè:

—Ndiàha gá nú nì cùhùn-ní yucán.

Te nì tiaa stná-né iin tutu cùhùn nuu nèhivì xí Jesús ndoó ladu Acaya mà ñà-cundua nùù nècuàchimà. Daaní, después na sání sàà nècuàchimà yucán, cuàhà gá nì nacuàhandee ini-né nsidaa nèhivì sàni ñihitáhvi cunindisá ichì-yá.

²⁸ Vachi nì càhàn stná-né xì cuàhà tè-raza-né Judea, nì cahvi-ne libru ì iníní-te, te ducán claru nì quida-ne comprobar ana nduú Jesús, ñà-divì rey ndiàha nani Cristu nduú-yá, te ducán nì cundee-né nùù témá, iníní nsidaa nèhivì.

19

Ñà-ndúá nì quida Pablo na ní ìa-ne ñuu Éfeso

¹ Daaní, na iá ì Apolos ñuu Corinto, dandu nì quihin Pablo ichì nínu, nì yàha-ne ladu yucú mà, te nì sàà-né ñuu Éfeso. Yucán nì ndacùhun tnahá-né xì itniù nècuàchì dacuahá ichì Dios.

² Te nì cachi-né xì nècuàchimà:

—Na ní xinindisá-nsiá palabra xì Dios, ¿a ní ñihitáhvi stná-nsiá cucumi-nsiá Espíritu ì xí-yá?

—Còó —cachi nècuàchimà— tàñáha ga cundaà ini-nsi a ñà-ìá Espíritu ì, ò ñà-còò-yá.

³ Dandu nì cachi Pablo xì-né:

—¿Ana diquívì-xí nì ndacùcahan-né na ní cuhii-nsiá?

—Dàñùhù xì Juan Bautista nduá nì cuhii-nsí —nì cachi nècuàchimà.

⁴ Dandu nì cachi Pablo:

—Ñà-ndáà ndúá, nìsa quida ì Juan mà nèhivì na ní cuu-ne arrepentir. Doco nì cachi stná-né ñà-después icúmí quixi ana cunihnu vaha ndisa ini-ndá, divì nduú Jesucristu.

⁵ Ñàyùcàndúá, na ní cundaà ini nècuàchimà nansa cachi Pablo, dandu nì canduhii sàà-né, doco vichi quívì Stoho-ndá Jesús nì ndacùcahan-né.

⁶ Dandu nì chitandòo Pablo ndahà-né dìni nècuàchimà, te nì quixi fuerte Espíritu ì xí Dios ini anima nsidaa-né, te nì dàcàhàn-yànè dàhàn sàà, te nì càhàn stná-né razón ndiàha nì quixi nùù Dios.

⁷ Te nsidaa nèhivì mà, ùxin ùi tiaa nduú-né.

⁸ Dandu ùni yòò nì ìa ga Pablo ñuu mà, sàhàn-né veheñùhu xì nècuàchì raza-né, te càhàn-né xì nèhivì yucán, nacání-né nansa iá ichì ndé dándacú Dios, te dacàhàn-né nècuàchimà ñà-nì cùnhicùn vù-né ichì-yá.

⁹ Doco dava-ne, conì cùdí ini-né ley mà; conì cùnì-né cunindisá-néá, ñàyùcàndúá, quini ga nì càhàn-né xì nèhivì diquì ichì-yá. Sàhà ñà-jaàn nì nacoò Pablo nècuàchimà, te nì tavà cuàán-né nsidaa nècuàchì nchícùn ichì-yá cuàhàn-né vehe iin tiaa nani Tiranno ndé nduú escuela. Te divì lugar mà nì dàcuàhá-né nècuàchimà nsiquívì.

¹⁰ Te ùi cuà nì chinaha-né nèhivì ducán. Ñàyùcàndúá, nsidanicuú nèhivì ndoó ladu Asia yucán, nì xinitnùhu-ne nansa iá razón ndiàha xí Stoho-ndá Jesús, nècuàchì raza Judea, xì stná nècuàchì dava ga, nsidaa-né nì xinitnùhu-ne.

¹¹ Te cuàhà gá milagru fuerte nì sàhatahvi Dios nì quida Pablo.

¹² Dècuèndè pañuelu xì-ne, ò ndé sicutò itándiaa icà-né sàhàn nùù nècuàchì cuhí, te ndúvaha-ne, te yúxin stná ñà-malu ñuhù ini-né.

¹³⁻¹⁴ Doco yucán nì sandoo stná dava tè-raza Judea xicánúú tavá xi ñà-malu. Ùsà ñàní dèhe iin dùtù cusáhnú nani Esceva nduú-te. Te nì quesaha-té xicánúú-te ndácùcahan stná-te quìvi Jesús tavá-te ñà-malu. Te dohó cachí-te xán: “Yùhù ndácùcahín quìvi Jesús, divi ana cáhàn Pablo sàhà-xí, te dandacuí nùù-ndá ñà-quee-ndá, te cuahán-ndá”, cachí-te.

¹⁵ Doco (iin xichi) na ní quida-tè ducán, dandu nì naxiconihí ñà-malu nùù-té, cachá':
—Yùhù ináhi Jesús, te ináhá stnáí ana nduú Pablo. Doco nsiohó, còò cuenta quihín nsiohó —cachá'.

¹⁶ Dandu tiàa inácaá-ñà anima-xi, nì ndàvà-te nì ducùn ndàhà tnàhá-te xi témà, te nì cundee-té nùù nsi-úsà témà, dècuèndè nì dānācùhèhè stná-te témà, te nì dāndiāchì ù-té sìcoto xi témà. Ñàyùcāndùá, nì canacoyo nsihì-tè vehe ma cuahàn-te.

¹⁷ Ñà-jaàn nduá nì cuu, te nì xinitnùhu stná nsidaa nēhivì ñuu Éfeso yucán, nēcuāchi raza Judea, xi stná nēcuāchi dava ga. Ñàyùcāndùá, yáha ga nì yùhì-nè, te chicá nì ndenihi vāha stná-nè Stoho-ndá Jesús.

¹⁸ Te cuahà gá stná nēcuāchi xiníndísá-xí-yá, nì quixi-ne nì nāhmà vate-né, nì dátúí-ne falta nì quida-ne.

¹⁹ Te cuahà nēcuāchi nì sanduu nēcuāchi tàtnà, nì catnii-ne tutu itúì ndé itāndiaa ñà-tàtnà xí-né vāxi-ne, te nì sahmi nsihì-neà nùù nsidaa nēhivì. Te nì tavá stná-nè cuenta nadaa xíndiaa nsidaa tutu ma, te nì cundaá ini-nè nahi ùi dico ùxin mil (50,000) dihùn plata ndiaá'.

²⁰ Ducán fuerte nì chindee Stoho-ndá Señor nì xitiā niñni palabra xi-ya, te nì cucuahà-ñá.
²¹ Daaní, na ní nsihì nì cuu ducan, dandu nì nacani ini Pablo cùhùn tu-ne ladu Macedonia xi ladu Acaya, dandu nùhù-nè ñuu Jerusalén. Te nì cachí stná-nè:

—Nú sàni la chíí ñuu Jerusalén yucán, dandu xiñuhu cùhùn stnáí ñuu Roma.

²² Dandu nì cāhàn-nè xi ùi nēcuāchi xinúcuáchi nùù-nè nani Timoteo xi Erasto, te nì techuún-nè nēcuāchimā ñà-mācòdonùù-nè. Ñàyùcāndùá, nì quee nēcuāchimā cuahàn-nè ladu Macedonia, doco Pablo, nì ndòo chíí gá-nè nì ia-ne ladu Asia.

Nansa nì cuu cuahà sàhà ichi Jesús ñuu Éfeso

²³ Quìvi yucán yáha ga nì cuu cuahà sàhà ichi-yá.

²⁴ Iin tiāa nani Demetrio nì dàquésáhá xān. Chuun xi nēcuāchimā nduú ñà-quadachuún-né xi plata, quidávāha-ne vehe cuati tñaha vehe cahnú yùù yóc Diana (iá ñuu yucán). Te divi sàhà Demetrio mà cuahà gá chuun nisa niñi maestru quidáchiún stná xi plata mà.

²⁵ Ñàyùcāndùá iin quìvi nì cana Demetrio mà nsidaa maestru mà xi dava ga stná tiāa tñaha quidachuún nahi oficiu xi stná mà, te nì cachí-nè xi nsidaa-té:

—Mii-nsiá, sà-ináhá-nsiá ñà-sàhà chuun xi-nda yohó icúmí-ndá ñà-cuicà-ndá, ñàni.

²⁶ Doco sàni xini-nsia, te ò sàni xinitnùhu-nsia nansa quidá iin tiāa nani Pablo, cāhàn-nè xi nēhivì, cachí-nè ñà-màdi dios ndisa nduú ñà-quadáyúctùn ndahà nēhivì ñuhivì, cachí-nè, te ducán sàni dacà-né cuahà nēhivì ñuu-ndá yohó, xi cuahà stná nēhivì, inicutu ladu Asia yohó.

²⁷ Ñàyùcāndùá, vihini sàà stná nēhivì cahíchi ini-nèndó sàhà chuun quida-nda. Te màdi cuisì ñà-jaàn, vāchi vihini sàà stná-nè cahíchi ini-nè veheñuhu xi dios xi-nda Diana, te dandáñuhú stná-nè tññuhu xi-ña, mate mii-ñá nduú ana cahvi nsidanícúu nēhivì ladu Asia yohó, xi nsidaa stná nēhivì inicutu ñuhivì. —Ducán nì cachí Demetrio mà.

²⁸ Ñàyùcāndùá, na ní nsihì nì inini nēcuāchimā ñà-jaàn, dandu yáha ga nì caxidà ini-nè, te nì cana ndee-né, cachí-nè:

—¡Ndiaha gá stoho-ndá Diana iá ñuu Éfeso yohó!

²⁹ Ñàyùcāndùá, nì candulocó nēhivì inicutu ñuu mà, te cuahà gá nì cuu cuahà sàhámà dècuèndè nì tñii-ne ùi compañeru Pablo nani Gayo xi Aristarco. Nēcuāchi ladu Macedonia cuntnáhà xi Pablo nì quixi-ne ichi nduú nēcuāchimā. Dandu nsidaa nēhivì cuahà yucán, ñuhú-nè nēcuāchimā carrera cuahàn-nè, nì caquihvi-ne ini lugar cahnú ndé natácá nēhivì ñuu mà.

³⁰ Te Pablo, nì cuni stná-nè quihvi-ne cāhàn-nè xi nēhivì mà, doco compañeru-nè nchícùn stná xi ichi Jesús, cóni sáha-ne lugar.

³¹ Te dava stná tè-xidandacú ladu Asia mà, ndoó vāha stná-te xi Pablo, ñàyùcāndùá nì dāsàà-te iin razón nùù-nè, sacúndáhvi-te ñà-màsà quihvi-ne lugar yucán. (Sàhà ñà-jaàn nduá cóni quihvi-ne.)

³² Doco ini lugar mà, iin-ni cana ndee nēhivì cuahà mà, mate tucu tucu xicachi iin iin-ne, te ñà-yáha guá sàni nacuidá nsidaa-né, ñàyùcāndùá chicá cuahà-né nì cóni sáha tñuni ini-nè indù chuun nì nataca-nè yucán.

³³ Daaní, dava tè-raza Judea, nì chindaha-té iin tñaha-tè nani Alejandro ñà-nì mácuùn-nè nùù nsidaa nēhivì cuahà mà. Te nì ndáhi dava nēhivì mà xi Alejandro mà ñà-nì cāhàn-nè xi nsidaa-né. Ñàyùcāndùá, nì dānāhà ndahà-né áma mácuúndoo dadí nēcuāchimā, vāchi cuni-nè cāhàn-nè sàhà mii-né xi sàhà compañeru-nè nì cúf.

³⁴ Doco nêhivì cuàhà mà, na ní xinitnùhu-ne ñà-iin nècuàchè raza Judea nduú nècuàchèmà, dandu iin-ni nì càna ndee nsidaa-né, cachí-nè:

— ¡Ndiaha gá stoho-ndà Diana iá ñuu Éfeso yohó! — cachí-nè. Te iin-ni nì càna fuerte nsidaa-né ducán nahi ùi hora.

³⁵ Daaní, por fin nì nihì tè-nduú secretariu ñuu mà nì nachindoo dadí-te nêhivì cuàhà mà. Dandu nì cachi-te xi-nè:

— Mii-nsiá nècuàchè ñuu-ndà Éfeso yohó, zamádi sà-ínahá-nsiá ñà-nsidanicuú nêhivì sàni xinitnùhu nansa quida-nda ñuu yohó, ndiaá-ndà vehe stoho cahnu-nda, divi mii-ñá ní quee ndè ansivi nì nacava-ñà ndé yohó?

³⁶ Pues (ínahá-nè), te mà cùì cachí-nè có-nduá ñà-ndáá. Ñàyùcànduá, ndiá icà-nsiá cundoo sahnú-nsiá, te màdiá quida cuahà-nsiá ducán.

³⁷ Vàchi nècuàchè nì tnii-nsia ndacá-nsiá vaxi yohó, cóni quidá quini-ne xì veheñuhu xi-nda, nì cóni càhàn quini-ne diqui dios xi-nda.

³⁸ Ñàyùcànduá, nú cuní Demetrio xì compañeru-nè canicuàchi-ne sàhà iin nêhivì, dandu nì cùhùn-nè nùù juez ndoó ñuu yohó, te yucán nì canicuàchi stnahá-né sàhà-nè.

³⁹ Te nú iá gá chuun xi-nsia vichi, dandu xiñuhu nataca-ndà ndatnuhu ví-nda ñà-nduú ichi ley.

⁴⁰ Vàchi vichi sàndòò-ndà tixi peligrú canicuàchi gobiernu sàhà nsidaa-nda, vachi vihini cutuxi ini-nè ñà-cuàhàn-ndà daquésáhá-ndá iin revolución nduá, te mà nánihì tnùnì gá ini-nda nansa cachi-nda xì-né ndiá disáhá-xì nì cuu cuahà guá vichi.

⁴¹ Ducán nì cachi tè-nduú secretariu mà, dandu nì dànacuitiá nsihì-tè nêhivì mà.

20

Nansa nì sàhàn Pablo ladu Macedonia xì ladu Grecia

¹ Daaní, na ní nsihì nì cuu cuahà mà, dandu nì cana Pablo nsidaa nêhivì xì Jesús ndoó yucán, te nì nacuañandee ini-nè nècuàchèmà. Dandu nì ndaquindè stnahá-né, te nì quihìn-ne ichi cuàhàn-nè ladu Macedonia.

² Te yucán nì nacàhìn-ne cuàhà ñuu, te nì càhàn cuàhà-né xì nècuàchè hermanu ndoó yucán sàhà-ñá chicá nì cúnihnú vaha ini-nè mii-yá. Dandu nì quee-ne cuàhàn-nè chicá nùù-xì ndè ladu Grecia.

³⁻⁴ Te yucán nì ìa-ne ùni yòò.

Doco na meru cuàhàn-nè quihìn-ne barcu nùhù-nè ladu Siria nì cùì, dandu nì xinitnùhu-ne ñà-sàni ndatnuhu tè-raza Judea, cuní-te cahni-ténè. Ñàyùcànduá, nì naxico-ocuin ini-nè, nì quihìn-ne ichi cuàhàn-nè nayàha-ne ladu Macedonia, dandu nùhù-nè ladu Asia. Te ichi mà cutnàhá stná-nè xì iin nècuàchè ñuu Berea nani Sópater, xì stná ùi nècuàchè ñuu Tesalónica nani Aristarco xì Segundo. Te cuàhàn stná iin nècuàchè ñuu Derbe nani Gayo, xì stná Timoteo, xì stná ùi nècuàchè ladu Asia nani Tiquico xì Trófimo.

⁵ Pues nsidaa compañeru Pablo mà, idónuu-né nì sàà-nè ñuu Troas. Te yucán nì cucuita-ne ndiatú-nè sàà stná Pablo xì yuhù.

⁶ Daaní nsiùhù tu, na sání yàha vicò xixí-né pan có-ndutáchí, dandu nì nana-nsi barcu ñuu Filipos. Te ùhùn quivì nì xica-nù mar dècuèndè nì sàà-nu ñuu Troas. Yucán nì nacuatnahá-nsí xì nècuàchè cuàhàn cueé mà. Te ùsà quivì nì cuee-nsi nì sandoo-nsi yucán.

Nansa nì natiacu iin tèchii ñuu Troas na ní nacava-tè nùù iin vehe idómahá

⁷ Quivì primeru semana nì nataca nsidaa nècuàchè nchícùn ichi Jesús, te nì cudiní-né. Dandu nì càhàn Pablo xì-né ñà-nduú palabra xì Dios, dècuèndè dava ñuu nì càhàn-nè, vachi dàtnàà inga quivì icúmí-nè quihìn tu-ne ichi.

⁸ Te cuàhà ñuhu tnùù nihni ndé ndoó-nsí cuarto diqui-xì mà.

⁹ Te nùù iin ventana xan ma iá stná iin tèchii nani Eutico. Doco sádi vàhná-te ñà-nì cucaní guá hora càhàn Pablo. Sàhà ñà-yucán nì quidi naà-té, te nì naxiconihí-te nì nacava-tè dècuèndè pisu ùni. (Ñàyùcànduá, nì nuu nêhivì mà) nì ndanihì-nè, doco sàni xihì-te.

¹⁰ Dandu nì nuu stná Pablo ndé indúhu-té, te nì numi nihni-nète, te nì cachi-nè:

— Màsà yúhí-nsiá, vachi itiacù-te.

¹¹ Dandu nì nana tu nsidaa-né, te nì caxixi-ne. Te caní tiempu nì ndatnuhu gá Pablo xì-né dècuèndè nì tùinuú, dandu ní quihìn Pablo ichi cuàhàn-nè.

¹² Doco tèchii ma, ndacá nêhivì mà-té mànuhù, vachi sàni natiacu-te, te ñàyùcànduá nì cudii gá ini nsidaa-né.

Nansa nì yàha Pablo ndè ñuu Mileto

¹³ Daaní, nsiùhù, nì sàcòdonù-nsí nùù Pablo, nì quihìn-nsi barcu cuàhàn-nsi ñuu Asón, vachi sàni ndatnuhu sahnú-nsí xì Pablo ñà-nacuaca-nsinè yucán, vachi cuní-nè cacasahà-né cùhùn-nè ichi mà.

¹⁴ Sáháyucándüá, ñuu Asón mà nì nacuatnahá-nsí xì-né. Dandu divi barcu mà nì sàhàn ndàà-nsí chícá nùù-xí ndé ñuu Mitilene.

¹⁵⁻¹⁶ Daaní, inga quívi nì quihin tu barcu mà ichi cuàhàn-nu xì-nsí ndé yatni ñuu Quío. Dandu inga quívi nì sàà-nsí ladu Samos, te después nì sàà stná-nsí ñuu Trogilio. Yucán nì quetatu chii-nsí. Dandu inga quívi nì yàha uun-nsí ñuu Éfeso, nì sàà-nsí ñuu Mileto. Vàchi ducán nì nacani ini Pablo quida-nsí ñà-có-cùní-né cucuee-nè ladu Asia mà, vachi yàha ga cuní-né nasaa-né ñuu Jerusalén antes nacava vicò Pentecostés.

Ñà-ndüá nì cachi Pablo xì nècuàchì inüù chuun xi Jesús ñuu Éfeso

¹⁷ Daaní, na ndoó-nsí ñuu Mileto, dandu nì techuún Pablo iin razón cuàhàn ñuu Éfeso, caná-né nècuàchì sahnú inüù chuun xi Jesús ñà-quixi-né.

¹⁸ Te na ní caquesaa-nè, dandu nì cachi Pablo xì-né:

—Mii-nsiá, sà-inhá-nsiá modo xi, nansa quidè dècuèndè quívi primeru nì quesai ladu Asia yohó; te ináhá stná-nsiá nansa nisa quidè inicutu tiempu nisa ìe cutnáhi xì-nsiá,

¹⁹ xinúcuàchì nùù Stoho-ndá Señor. Vachi cónisá la cuadú. Dècuèndè nisa sacu stnáì cuàhà xichi sàhà-nsiá. Te cuàhà gá vida nì yàhi nì quida tè-raza Judea na ní candatnuhu-té ñà-dandañúhú-té yùhù.

²⁰ Te ináhá stná-nsiá ñà-cóni chídèhí nì-ñàha cunduu ñà-vàha xi anima-nsiá. Còò, vachi nsidaamà nì cachitnùhi xì-nsiá. Cuàhà gá nì chinahì mii-nsiá na ní nataca-ndá iin-nì xaan, te na xicánúù stnáì dacuahí-nsiá dècuèndè vehe-nsiá.

²¹ Nsidanicuú nèhivi nì càhàn xì, a ducán xínduu-ne nècuàchì raza Judea, te ò nècuàchì inga raza, doco claru nì cachi xì-né ñà-ndiá ìcà-né cuu-ne arrepentir nùù Yua-nda Dios, te cunihnu vaha ini-nè Stoho-ndá Jesucristu.

²² Pues vichi, yàha ga dansihì animè ñà-nùhù-tui ñuu Jerusalén, mate có-cùndáà ini nansa cuu xí yucán.

²³ Cuisi ináhì ñà-yohó: cada sái iin ñuu, dandu cachí Espiritu ìì xí Dios ini animè ñà-ìcúmì cundiadi, te ò ndohì yucán.

²⁴ Doco có-nàcánì ini sàhámà, vachi có-ndülócò guè sàhà vida xi, mate ni cahní-te yùhù. Cuisi cuní daxínu vii chuun icúmì, dandu cudì ini. Vachi cuní quidè cumplir chuun nì nihì nùù Stoho-ndá Jesús ñà-càhìn xì nèhivi ñà-ndüù razón ndiaha sàhà gracia xi Dios.

²⁵ Cunaha-nsiá, mahi mii-nsiá nì xicanui càhìn palabra sàhà ñuhivì ìì xí Dios. Doco vichi, ináhì mà cúnístnahá gá-ndá.

²⁶ Ñàyucándüá, dohó cachí xì-nsiá vichi: nú ni sàà ndañuhu anima iin-nsia, yùhù mà cúnisá cuàchì guè,

²⁷ vachi sàni dàcuàhì mii-nsiá nsidaa ñà-ndüá nì cachi Dios quida-nda, cóni chídèhí nì-iyuhu razón mà.

²⁸ Sáháyucándüá, cundiaa vaha-nsia mii-nsiá, te cundiaa vaha stná-nsiá nsidaa gá nèhivi xí Dios, vachi nahi iá chuun ndiaá-ndá riì, ducán iá stná chuun icúmì-nsiá nùù Espiritu ìì xí Dios. Ñàyucándüá, cunuù víi-nsiá nèhivi xí-yá, vachi xì nì-yá sàni òndàà-yá sàhà nsidaa-nda sàhà ñà-cunduu-nda nèhivi xí-yá.

²⁹ Yùhù ináhì, nú sàcuàhìn, dandu icúmì ndecoyo tiàa dana cuni dacà xì òndi-nsiá. Na quidá quisi ìhi, có-dàcàcu-sì riì, ducán quida stná nècuàchì mà xì-nsiá.

³⁰ Te nùù nsidaa stná mii-nsiá icúmì dava nèhivi quesaha stná-nè chináhá stnahá-né iin ñà-trùhù àma cunchícùn stná-nsiá ichi mii-né.

³¹ Ñàyucándüá, cuàhà gá cundoo tùha-nsia, te nsinuu ini-nsiá nansa nì quidè, vachi ùni cuà nì ìe xì-nsiá, te nicanicuàhàn nisa chinahì mii-nsiá; ndui te ñuu nisa càhìn xì-nsiá, ndé nisa sacu stnáì sàhà-nsiá.

³² Pues vichi nì ndóo-nsia xì Dios, te nì cundiáá-yànsiá, ñàni. Te nì cunchícùn-nsiá palabra sàhà gracia xi-ya, vachi nú nì cundèhe-nsiá palabra mà, dandu sàà-nsiá cunindisá víi-nsiá, te ducán cundiátú stná anima-nsiá ñà-vàha ndiaha xí-yá, te nihitáhvi stná-nsiá cutnahá-nsiá xì nsidaa gá ana sàni ndoo anima-xì nì quida-ya.

³³ Yùhù, nì-iin biene xi nì-iin nèhivi cóni xíhoé, nì plata xi-ne, nì oro xi-ne, nì sicoto xi-ne.

³⁴ Còò, vachi ináhá-nsiá, xì ndahì nisa quidachuín, te ducán nisa tui ñà-ndüá nisa itiacu-nsi.

³⁵ Sàni xini-nsiá nsidaa ñà-ndüá nisa quidè, te sàhámà vátùnì cundaà ini-nsia ndiá ìcà nsidaa-nda quidachuun-nda, dandu nihì-ndá nansa chindee stná-ndá ana iá necesidad xi. Te xiñuhu nsinuu stná ini-nsia palabra nì cachi Stoho-ndá Jesús na ní cachi-yá: “Chicá cundiátú anima-nda ñà-dacutáhvi-nda ìñàha, te màdiá cutahvi mii-ndañá”.

³⁶ Daaní, nì nsihì nì cachi Pablo ñà-jaàn, dandu nì sàcùitasisi nsidaa-né, te nì xicàn tàhvi Pablo nùù Dios.

³⁷ Dandu cuàhà gá nì casacu nsidaa-né, te nì numi nihni stnahá-né, te nì tutuyuhu stnahá-né nùù-né,

³⁸ vâchi yâha ga ni nâcûndoo nsidaa-né tnûnsî ini ñâ-nî cachi Pablo mà cúni stnâhá gá-nè. Dandu ni sândaca ichi-ñânê dècuèndè nùu barcu.

21

Nansa mànuhù Pablo ñuu Jerusalén

¹ Ni nsihi ni ndaquindèè-nsî xî nêhivî yucán, dandu ni quihîn barcu mà ichi cuàhàn-nu. Primeru ni yâha ndaa-nu ndé ñuu Cos. Dandu inga quivî ni sâà-nsî ñuu Rodas, te después ni sâà-nsî ñuu Pátara.

² Yucán ni xini-nsî iin barcu icúmî cùhùn ladu Fenicia. Ñâyùcândüá, yutnù yucán ni nana-nsî cuàhàn-nsî.

³ Te na ní xini xicâ-nsî ñuu cahnú mahî mar nani Chipre, dandu ni yâha-nsî iin ladu, te ladu itní-nsî ni ndòo ñuu mà. Dandu ni sâà-nsî ladu Siria. Meru ñuu ndé ni sâà barcu mà nùu ñuhù nani ñuu Tiro, te divi lugar mà cuàhàn nuu carga xi-nù.

⁴ Te yucán ni ndacùhun tnâhá stnâ-nsî xî nêhivî xí Jesús; ñâyùcândüá, usà quivî ni sandoo-nsî xi-né mà. Dandu ni ñacàhàn Espíritu Ìlî xî Dios dava nècuàchìmá, te ni cachi-nè xi Pablo ñâ-màsà cùhùn-nè ñuu Jerusalén.

⁵⁻⁶ Doco na ní nsihi usà quivî mà, dandu ni quihîn tu-nsî ichi cuàhàn-nsî, te ni sândaca ichi nsidaa nècuàchìmá nsiùhù, tiàa xi ñâhá xi stnâ dèhe-ne, nsidaa-nsî ni sâhàn-nsî orilla ñuu mà dècuèndè yuhù mar. Te yucán ni sâcùtasisî-nsî ni xicàn tâhvi-nsî nùu Dios, dandu ni ndaquindèè tnâhá-nsî, te ni numî nihni stnâhá-nsî. Dandu ni nana nsiùhù barcu mà, te mànuhù nècuàchìmá vehe-ne.

⁷ Daaní, ni quee barcu mà ñuu Tiro, te ni xica-nù mahî mar ndé ñuu Tolemaida. Yucán ni nuu-nsî, te ni casâhú-nsî xi nècuàchî hermanu ñuu mà. Te iin quivî-nî ni cuee-nsî yucán.

⁸ Dandu inga quivî ni quihîn tu-nsî ichi cuàhàn-nsî, Pablo xi nsiùhù nècuàchî cutnâhá xí-nè, te ni sâà-nsî ñuu Cesarea. Te yucán cuàhàn-nsî vehe Felipe cundoo-nsî. Te Felipe mà nduú iin nècuàchî nùu usà tiàa (nîsa dasàn xi ración), doco vichi xicánúú stnâ-nè câhàn-nè xi nêhivî ñâ-ndùú palabra sâhá Jesús.

⁹ Te cùmî dèhe yoco-né ndoó xînduu señorita, te sàni nihitâhvi stnâ nsicúmîá cachitnùha razón xi Dios.

¹⁰ Pues divi vehe nècuàchìmá ni sandoo-nsî itnî quivî. Dandu yucán ni sâà stnâ iin tiàa ni quixi ladu Judea nani Agabo. Te tûha stnâ-nè cachitnùhu-ne razón xi Dios.

¹¹ Te ni tnâtuu-ne nùu-nsî, ni ndaxin-né siuhmatixi Pablo, dandu ni suhni-nèà sâhá-né xi ndahâ-né, te ni cachi-nè:

—Dohó cachitnùhu Espíritu Ìlî xî Dios: “Tiàa ñisîuhmâtixi-xi yohó, icúmî stnâ-nè cunuhni-nè quida tè-raza Judea ñuu Jerusalén, dandu yâha-ne ndahâ tè-inga ñuu”.

¹² Ñâyùcândüá, na ní cachi-nè ducán, dandu nsiùhù xi stnâ nècuàchî ñuu Cesarea mà, ni sacundahví-nsî nùu Pablo ñâ-màsà cùhùn-nè ñuu Jerusalén.

¹³ Doco ni cachi-nè xi-nsî:

—Màsà cuácú gá-nsiá, vâchi yâha ga cuí sentir ñâ-quidâ-nsiá ducán, vâchi dispuestu ié màcûnuhni ñuu Jerusalén, mate dècuèndè ni cùí stnâí yucán sâhá Stoho-ndâ Jesús —ni cachi-nè.

¹⁴ Pues sâhá-ñâ mànciú cadî-nsî nùu-né, còò ni-ñâhá ni cachí gâ-nsî, cuisî ní cachi-nsî:

—Dios cachi-yâ.

¹⁵ Daaní, ni nsidayucun-nsî carga xi-nsî cuàhàn-nsî ñuu Jerusalén.

¹⁶ Te ni cutnâhá stnâ-nsî xi iin ùi nècuàchî xiníndisâ ndoó ñuu Cesarea mà cuàhàn-nsî, te (ni sâà-nsî ñuu Jerusalén) ndé vehe iin nècuàchî ni quixi ñuu Chipre nani Mnasón. Mii-né, sâcâni quivî nhicùn stnâ-nè ichi Jesús, te divi vehe-ne nduú ndé cundoo-nsî.

Nansa ni sâhàn Pablo ni ndatnuhu-né xi Jacobo

¹⁷ Daaní, na ní sâà-nsî ñuu mà, dandu ni casâhú-nsî xi nècuàchî hermanu ndoó yucán, te ni cudii ini-nè ñâ-sàni sâà-nsî.

¹⁸ Daaní, inga quivî cuàhàn-nsî xi Pablo dècuèndè ndé iá Jacobo. Te yucán sàni nataca stnâ nsidaa nècuàchî sahnú inùu xi nêhivî xí Dios.

¹⁹ Dandu ni casâhú Pablo xi nècuàchìmá, te ni nacani nsihi-ne nansa ni cuu na ní sâhàn-nè ñuu xicâ, te (ni quida-ne chuun ìlî xî Dios), te ndiaha gá ni chindee-yánè yucán.

²⁰ Daaní, na ní nsihi ni inini nècuàchìmá, dandu ni naquimanî-néyâ, te ni cachi-nè xi Pablo:

—Ñâni, sâxini-nî ndoó cuàhá mil nècuàchî raza-ndâ xiníndisâ ichi-yâ. Te nsidaa-né, nhicùn vii-né ley xi Moisés.

²¹ Doco cachi cuentu sâhá mii-nî ñâ-chinâhá-nî nècuàchî raza-ndâ ndoó inga ñuu ñâ-màsà quihîn casu gâ-nè sâhá ley mà, ni có-xiñùhù gá màcùtuu seña xi Dios icâ dèhe-ne, ni có-ndiá icâ stnâ-nè chivâha ga-né estilu xi raza-ndâ.

²² Ñàyücàndüá ¿ndiá quida-nda? vâchi icúmí nêhivî nataca-nê nú sàni xinitnûhu-ne iá-nî yohó.

²³⁻²⁴ Chicá vâha dohó quida-ní. Cundaca-ní cùmî tiâa ndoó yohó sàni saquin xî iin compromisu nùu Dios, te cùhùn-nsiâ nduhî-nsiâ (nacua cachí ley xi-nda), te quida-ní chii gastu sâhâ-né. Dandu después datê tehe dìni-né. Vâchi nú ducán ni quida-ní, dandu vâtûni cundaâ ini nêhivî cuentu uun nduâ ndatnûhú-nê sâhâ-ní, vâchi (cuninû-né) quidâ víi-ní, te chívâha víi-ní ley xi-nda.

²⁵ 'Doco nsidaa nêcuâchî inga raza yucán, còó; sàni dâsâa-ndâ iin carta nùu-né ndé cachí-ndâ ñâ-còò necesidad chívâha-ne ley mà, cuiisî ñâ-màsâ cáxi-né ñâ-nî sàcùndoo nùu yûu yócó, te màsâ cúxî stnâ-nê nîi, ni màsâ cáxi-né cuñu quisi ni sâhnâ uun, ni màsâ còó-né xî nêcuâchî cóni nândâhâ xî-né —ni cachi Jacobo.

Nansa ni catnii-tê Pablo na iá-nê veheñûhu cahnú

²⁶ Daaní, ni saca Pablo nsî-cúmî tiâa ma, te ni quee-ne inga quivî ni casahân-nê ñâ-nsidandoo nsidaa-né mii-né nacua cachí ley xi-ne. Dandu ni quihvi-ne veheñûhu cahnú, ni cachitnûhu-ne nadaa ga quivî cunihî-né, dandu después cuâha iin iin-ne quisi cunduu promesa xi-ne.

²⁷ Ûsâ quivî nduú tiempu (cunihî-né). Te sâdaaní xînu quivî mà, dandu dava tè-raza Judea ni caquixi ladu Asia, ni xini-te Pablo na iá-nê veheñûhu ma. Ñàyücàndüá ni quesaha-té ni nsida tontó-te nêhivî cuâhâ yucán. Ni catnii-tê Pablo,

²⁸ te ni cána ndee-té, cachí-te:

—Mii-nsiâ tè-raza-ndâ Israel, chindee-nsiâ nsiuhû, vâchi divi têtòhó nduú tiâa cáhân guá diquî-ndâ ñâ-có-ndiââ raza-ndâ, cachí-te, ni có-ndiââ stnâ ley xi-nda, te ni có-ndiââ gâ stnâ veheñûhu yohó, cachí-te. Te ducán chinâhâ-te nêhivî inicutu. Te màdî sâhâ cuiisî ñâ-jaân nduâ; còó, vâchi ni saca stnâ-te iin tè-raza siquini ni quihvi-tê xî témâ veheñûhu yohó. Ñàyücàndüá, sàni cuchicuehe ñâ-îi icúmî vehe ìi yohó.

²⁹ Ducán ni cachi témâ, vâchi antes ni caxini-te xicánú Pablo ñuu mà cutnâhâ-né xî iin nêcuâchî ñuu Éfeso nani Tróximo, (iin nêcuâchî inga raza). Te ni catuxi ini-te ndacá stnâ Pablo tiâa ma ni sâhân ini veheñûhu cahnu-ma.

³⁰ Ñàyücàndüá ni nacuidâ nsidaa nêhivî inicutu ñuu mà, ni dâyââ-nê vâxi-ne ni nâ-chitu-né. Te ñuhú nihi-ne Pablo ni tavâ-né nêcuâchîmâ fuera veheñûhu cahnu-ma, te vichi duha ni nacadi nsihi-ne yehê patiu mà.

³¹ Meru nandúcú-nê modo nansa cahni-né Pablo, dandu ni sââ razón nùu comandante coronel ñâ-sàni nacuidâ sâstnûhû nsidaa nêhivî ñuu Jerusalén mà.

³² Dandu ni nacuaa comandante mà cuâhâ soldadu xî stnâ capitán xi-ne, te ni dâyââ-nê xî-té cuâhân-nê ndé quidâ cuâhâ guá nêhivî. Te na ní xini nêhivî mà vâxi comandante xî soldadu mà, dandu ni cucuita ìi-né, cóni caní gâ-nê Pablo.

³³ Dandu ni tnâtuu comandante ni dândâcú-né nùu soldadu xi-ne ñâ-nî tnîi-te Pablo, te màcûnuhni-nê xî ìi cadena. Dandu ni ndâcâtnûhú-né nùu nêhivî cuâhâ mà:

—¿Ana nduú tiâa yohó, te ndiá ni quida-tê?

³⁴ Doco nêhivî cuâhâ yucán, cána ndee-né; tucu tucu cachí iin iin-ne, mànicûi cundaâ ini comandante nansa ndisa iá chuun ma ñâ-cána guá nêcuâchîmâ. Ñàyücàndüá, ni dândâcú-né nùu soldadu xi-ne ñâ-nî cundâcá-te Pablo nûhu ini vehe cahnú-te.

³⁵ Sâhâmâ, ndacá témâné ni nasaa vehe-tê, cuâhân-te nana-tê cuai. Doco ñâ-dana guá ndoó nêhivî cuâhâ mà, ñàyücàndüá fuerza ni sâcùnsida-tê Pablo ni nana,

³⁶ vâchi nchícûn chitu nsidaa-né, cána-ne, cachí-né:

—Cahnî-ndâ tè-jaân chicá vâha.

Nansa ni câhân Pablo sâhâ mii-né nùu nêhivî cuâhâ

³⁷ Daaní, na meru cuâhân soldadu mà dayâha-tê Pablo ini vehe cahnú-te, dandu ni cachi-nê xî comandante coronel yucán:

—¿A iá permisû câhân tíi xî-ní?

Dandu ni cachi-nê xî Pablo:

—¿A túha stnâ-ní câhân-ní dâhân griegu?

³⁸ ¿A có-ndûu-ní tè-ñuu Egipto ni quida revoluciôn daa, te ni idònûu-ní nùu cùmî mil tè-têhîi ni saca-níte cuâhân-nsia yucû?

³⁹ —Còó —cachí Pablo—, yûhû, tè-raza Judea nduí. Meru ñui nduú ñuu Tarso iá ladu Cilicia. Tiâa iá derechu-xi nduí; te ñui mà, có-nduú stnâ iin ñuu tii. Ñàyücàndüá sacúndâhvî nùu-ní âma táxî-nî permisû câhân xî nêhivî cuâhâ yohó —ni cachi-nê.

⁴⁰ Dandu ni sâha comandante mà lugar câhân-nê. Ñàyücàndüá, ni ndacuiin-nê nùu cuai mà, te ni dânáhâ ndahâ-né ñâ-nî cúdâfî nsidaa nêhivî mà. Te na ní ndudadí nsihî

nècuàchimà, dandu ni càhàn-nè. Doco puru dàhàn (nèhivi ñuu mà) ni càhàn-nè, divi dàhàn hebreu, te dohó ni cachi-nè:

22

¹—Mii-nsiá nècuàchi sahnú, xi nsidaa gá stná ñani dava ga, cunini-nsia cuàhìn càhìn sàhà mii —ni cachi Pablo.

² Dandu nèhivi cuàhà yucan, na ní cundaà ini-nè ñà-divi dàhàn mii-né càhàn stna nècuàchimà, dandu chicá ni cudadí-né. Te ni cachi gà Pablo:

³—Yùhù, iin nècuàchi raza Judea nduí. Ñuu Tarso iá ladu Cilicia nduú lugar ndé ni tùinuí ñuhivi, doco ñuu yohó ni sahnui. Te maestru Gamaliel nduú ana nisa dacuaaha-xí. Ñàyücandüá, ni dàcuàhá vahi nsidaa ñà-ndüá cachi ley xi xii-ndà, vachi yáha ga nisa cuni chivàha víi ley xi Dios, divi nacua cuni stná mii-nsiá vichi.

⁴Daani, ni quesahí dandohó stnáì nècuàchi nchícùn ichi Jesús. Tiàa te ñahà nisa chicuhni, te nisa chicadí-nè; dècuèndè cui stná-nè nisa cuni.

⁵ Ináhà dùtù cusáhnù ndoó vichi, xi stná nsidaa nècuàchi sahnú dandacú, vátuni cachi stná-nè nansa nisa quide nú ni cúcáhán-nè, vachi ináhà-nè (vida xi). Te divi nuú mii-né ni nihí tutu nduú orden ñà-cunihì cùhùn nuú nècuàchi raza-ndà ñuu Damasco. Ñàyücandüá, ni quihin ichi ñuu mà cuàhìn tnií nsihì nèhivi xí Jesús (ndoó yucán), te chicuhni-nè cundaqui-nè ndixi ñuu-ndà yohó sàhà ñà-ndoho stná-nè ni cahín.

⁶ Ñàyücandüá, xiqué cuàhìn (ichi mà). Te nahi càxíhù ni sandua na sá-itúú sàì ñuu Damasco mà, dandu nanáà ni natnuú nihni inicutu ndé cuàhìn; dècuèndè diqui-xí ansivi ni quixi nduà luz mà.

⁷ Te hora mà ni nacásin, te ni tiacuí càhàn iin ana càhàn xí, cachi-yà: “¡Saulo, Saulo! ¿Índu chuun nchícùn-ní yùhù quida quini-ní xí?”

⁸ Dandu yùhù, ni cachi xi-yá: “¿Ana nduú mii-ní, Señor mío?” Te ni cachi tu-ya: “Jesús de Nazaret nduí, divi ana dandoho-ní”, ni cachi-yà.

⁹ Doco compañeruí, mate ní xini-nè ñà-tnúú luz mà, te ni cayuhí cuàhà-né, doco cóni tiacú-nè ñà-ndüá ni cachi-yà xí.

¹⁰ Dandu ni cachi xi-yá: “¿Ndíá nduá cuni-ní quide, Señor mío?” Dandu ni cachi-tu-ya xí: “Ndacuiin-ní, cuahán-ní ñuu Damasco, te yucán icúmí-ní ndacu nuú-ní ñà-ndüá sàni chitnùni inì quida-ní”, ni cachi-yà.

¹¹ Doco cunaha-nsiá, ñà-fuerte guá ni tnúú ndiaha ni xini mà, ñàyücandüá ni ndañuhu vista xi. Te sàhà-ñà có-tùinúí, ñàyücandüá ni sàcùtnii ndahà tnahí xí compañeruí, te ni saca-ne yùhù cuàhàn-nsi ndé cachi ni sàà-nsi ñuu Damasco mà.

¹² Te divi ñuu mà iá iin tiàa nani Ananías. Iin nècuàchi cahvi xi Dios nduú-né, te chivàha vii-né ley xi-ya. Ñàyücandüá, nsidaa nècuàchi raza-ndà ndoó yucán, ndenihí vaha stná-nè nècuàchimà.

¹³ Pues divi nècuàchimà ni sàà ni sàcuin nuú, te ni cachi-nè xí: “Ñáni Saulo, ndacoto-ní, natùinuú-ní vichi, cachi xí-ní”, ni cachi-nè. Dandu luegu ni natùinuú, te vátuni ni xini mii-né.

¹⁴ Dandu ni cachi-nè xí: “Mii-yá nisa cahvi xii-ndà, dècuèndè sàhana ni chitnùni ini-yà ñà-cundaà inì-ní sàhà-yá, te nihitáhvi stná-ní cuninuú-ní mii-yá único ana ndàcuisi inì-xi, divi Jesús, te cunini stná-ní càhàn-yà.

¹⁵ Ñàyücandüá, vichi icúmí-ní càhàn-ní sàhà-yá xi cuàhà nèhivi, te nacani-ní xi-né ñà-ndüá ni xini-ní, te ni tiacú-ní.

¹⁶ Pues vichi, sà-íá, ndacuiin-ní, te cuahán-ní cuhii-ní, ndacucahan-ní quivi Stoho-ndà Señor, dandu ndoo cuàchi anima-ní”, ni cachi Ananías mà xí.

¹⁷ Daani, después ni nsiai ñuu Jerusalén yohó, te ni sàhìn veheñuhu cahnú. Te na ié yucán xicán tàhvi nuú Dios, dandu ni dàcùnì-yà yùhù iin seña xi-yà.

¹⁸ Ni xini mii-yá, te cachi-yà xí: “Dansihì-ní, te quee yàchi-ní ñuu Jerusalén yohó, vachi nècuàchi ñuu-ní yohó, mà cúnindisá-né ñà-ndüá cachi-ní xi-né sàhí”.

¹⁹ Dandu ni naxiconihí nuú-yá, cachi: “Señor mío, nsidaa nèhivi, sà-ináhà-nè nansa nisa quide antes, nisa nacàhìn veheñuhu tnií nècuàchi xinindisá-xí-ní, te sadf-nè vehecàa, te ni sahnì cui stná-nè.

²⁰ Stná nèhivi xi-ní nani Esteban, testigu ni sanduu stnáì na ní sahnì nèhivi-né, te ni xitá ni-né. Ni cuí-nè, ni cachi stnáì. Dècuèndè ni sandiaì sicoto xi nèhivi ni sahnì xi-né mà”.

²¹ Dandu mii-yá, ni cachi-yà xí: “Quee-ní yohó, vachi icúmí techuin mii-ní cùhùn xicà-ní dècuèndè ndé ndoó nèhivi inga raza”, ni cachi-yà. —(Ducán ni cachi Pablo, càhàn-nè xi nèhivi cuàhà mà.)

²² Doco jaàn-ní nduú nuú-xí ni inini nècuàchimà, vachi ni quesaha tú-né ni càna ndee-né, cachi-nè:

—¡Ni cui dahuun tējaàn! ¡CÓ-xiñhù coo gà-te ñuhiví!

²³ Ducán ni cachi-nè, cána-ne, dandiachi-né dùhnù-né, te quidá canúú-né yácá.

²⁴ Ñàyücándüá, ni dándácú comandante coronel mà nùù soldadu xi-ne ña-daquíhvi-tè Pablo ini vehe cahnú-te, te dandohó-tené xi chirrión sàhà-ñá nàhmà-né, te cundaà ini-xi ndiá disàhà-xí cána guá ñehivi sàhà-né ducán.

²⁵ Doco na ní nsihì ni chicuhni vaha soldadu-nè, dandu ni cachi-nè xi iin capitán iin yucán:

—¿A sàha ley xi gobiernu quida-ní xí' dohó, ña-cahni cuií-ní yùhù? vachi ñècuàchi romanu nduí, (iá derechu xi), te tãñáha ga coo justicia sàhì —ni cachi-nè.

²⁶ Ñàyücándüá, na ní cundaà ini capitán mà ña-jaàn, dandu ni sàhàn-te ni cachitnùhu-tè xi comandante mà:

—Cuidadu coo-ní xi ñècuàchi jaàn, vachi ñècuàchi romanu nduú-né —ni cachi-te.

²⁷ Dandu ni quixi comandante mà ndé iá Pablo, te ni cachi-nè xi ñècuàchimà:

—Cachi-ní xí, ¿a ndísá ñècuàchi romanu nduu-ní, á coó?

—Jaan —ni cachi-nè.

²⁸ Dandu cachí tu comandante mà:

—Yùhù, yáha ga cuahà dihùn ni dàquíhvi, te ni nihì stnái ni sàcùndui ñècuàchi romanu.

Dandu ni cachi Pablo:

—Doco yùhù, cóo, vachi dècuèndè ni quesai ñuhiví nduí ñècuàchi libre.

²⁹ Dandu tiàa cuahàn cahni cuií xi-né ni cui, luego ni nacoo-téné cuahàn-te. Dècuèndè stná comandante coronel mà, ni yùhì-né sàhà ña-ní dándácú-né ni sàcùnhni ñècuàchimà, te nduú-né iin ñècuàchi romanu, iin ñècuàchi libre.

Ñà-ndüá ni cachi Pablo xi ñècuàchi Junta

³⁰ Daaní, ni tünüü inga quiví, dandu cuní comandante-mà cundaà ndisa ini-né ndiá disàhà-xí cãhàn tnùhù guá tè-raza Judea mà diqui Pablo. Ñàyücándüá, ni ndaxin-né cadena nuhní ñècuàchimà, te ni dándácú-né nataca dùtù xicusahnú, xi nsidaa stná ñècuàchi sahnú idónuu. Dandu ni tavà-né Pablo cuahàn-né xi ñècuàchimà vehe ndé natácá ñècuàchi sàhnümà, te ni chicani-ñané mahi nsidaa ñècuàchimà.

23

¹ Dandu ni indehè vaha Pablo nùù nsidaa ñècuàchi Junta mà, te ni cachi-nè:

—Ñáni, ndahà Dios ié' ñuhiví yohó, te quiví vichi, cóo ni-ñàha dandohó gá xi animè.

² Doco dùtù cusáhnú yucán nani Ananías, ni dándácú-né nùù tiàa itá yatni ndé iin Pablo ñà-ni càni-te yuhù-né.

³ Dandu ni cachi Pablo xi dùtù mà:

—Cunaha-ní, icúmí stná Dios cani-ya mii-ní iin castigu, ña-dànaní uun-ní nduu-ní ñehivi vaha. ¿Amádi iá-ní jaàn ña-cuahàn-ní nsidandaà-ní chuun-xi sàhà ley xi-nda? Pues nú ducán, dandu ¿indù chuun ni dándácú-ní nùù-té ña-ni càni-te yùhù? vachi có-sàha ley xi-nda (cani stnaha-nda) —ni cachi Pablo.

⁴ Dandu ñècuàchi xí-ita yatni yucán, ni cachi-né xi Pablo:

—¿Indù chuun cànàhá-ní xi ndómà, vachi dùtù cusáhnú iá nùù Dios nduù-ndà?

⁵ Dandu ni cachi Pablo:

—Ñáni, cóni cundáa ini nduú ndómà dùtù cusáhnú. Vachi cachí libru ìì: “Màsà cànàhá-ndà diqui ñècuàchi nihí chuun ñuu-ndà” —ni cachi-nè.

⁶ Dandu ni indehè Pablo nùù ñècuàchi Junta mà, te ni xini-nè, dava-ne, ñècuàchi saduceu nduú-né, te dava ga-nè, ñècuàchi fariseu nduú-né. Ñàyücándüá, ndee ní cãhàn Pablo, ni cachi-né xi nsidaa ñècuàchimà:

—Ñáni, ñècuàchi fariseu nduú stná yùhù; vachi yué, divi fariseu ni sanduu stná-nè. Te divi sàhà-ñá xiníndísé iá tnündé ini natiacu-ndà nú ni xihì-ndà, ñàyücándüá sanícuàchi ñehivi sàhí vichí.

⁷ Na ní nsihì ni cachi-né ducán, dandu ni quesaha ñècuàchi fariseu mà ni nàá stnahá-né xi ñècuàchi saduceu mà. Dècuèndè ni tãhndé dava-ne, vachi tucu tucu xínacani ini-nè.

⁸ Vachi nsidaa ñècuàchi saduceu mà, có-xiníndísá-né ña-icúmí-ndá natiacu-ndà, ni cóo ángel, ni cóo stná anima-ndà, cachí-nè. Doco ñècuàchi fariseu, ndisa, xiníndísá-né nsidaámà.

⁹ Ñàyücándüá, yáha ga ni cucuahà sàhámà, te fuerte ni cána nsidaa-né. Dava maestru nduú fariseu, ni ndacuítà stná-nè, cãhàn fuerte-nè, cachí-nè:

—Còo, nuá nùù nsìuhù, cóo falta xi ñècuàchi yohó. Vihini ña-ndàà ndüá iin ángel ni cachi xi-né ñàha, te ò iin espíritu xi Dios ni cãhàn xi-né. Ñàyücándüá (cuidadu ni cundóo-ndá) còtó Dios nàá stnàhà xi-ndà —ni cachi-nè.

¹⁰ Dandu yáha ga ni cucuahà gá nàá stnahá ñehivi mà, ndé yùhí comandante mà vihini cuahàn-nè danácuèhè dahuun-ne Pablo. Ñàyücándüá, ni dándácú-né ni tnátuu soldadu, te

fuerza nì tavà-té Pablo nù nècuàchì yucán, nì nacuaca-tèné mànuhù-té xí-nè ndè vehe cahnú-te.

¹¹ Daaní, nì cuñaà quivì yucán. Dandu nì dàcùnì Stoho-ndà Señor Pablo mii-yá. Yatni iin-yá, cáhàn-yà xì-né, cachí-yà:

—Màsà cùhúun inì-nì, Pablo, vèchi nacua sàni cáhàn-nì sàhí ñuu Jerusalén yohó, ducán icúmí-nì cáhàn stná-nì sàhí ndè ñuu Roma.

Nansa nì candatnuhu tè-có-xiníndísà ñà-cahni-té Pablo

¹² Na nì tûinuù inga quivì, dandu dava tè-raza Judea mà, nì candatnuhu-té nì chinaha-té Dios, cachí-te:

—Mà cúxí-ndá, ni mà cóhó-ndá tècuí ndè cachí cahni-ndà Pablo, te nú cóó, ni sáa Dios cahni-yándó.

¹³ Cunaha-ní, tiàa nì candatnuhu ducán, yáha ùi dico nì sanduu-tè.

¹⁴ Ñàyücándüá, nì caquee-tè cuàhàn-te nù dütù xicusahnú ndóo cutnáhá xí nècuàchì sahnú xídandacú, te nì cacachì-te xì-nè:

—Nsiühù, sàni chinaha-nsí Dios ñà-mà cúxí gá-nsì ndè cachí cahni-nsí Pablo, te nú cóó, ni cuí-nsì quida-ya.

¹⁵ Ñàyücándüá, mii-nsiá xì nsidaa dava ga nècuàchì dandacú, càcàn-nsiá favor nù comandante coronel, cachí-nsiá xì-né ñà-cùnì-nsiá ndàcàtnùhù gá-nsiá nù Pablo, te sàhájàn nduá cuní-nsiá quixi-ne tnaa, cundaca-ne Pablo quixi nù-nsiá. Dandu nsiühù, cuàhàn-nsì cuita tùha-nsì ichì cahni-nsinè —nì cachí tè-raza Judea mà.

¹⁶ Doco yucán nìsa là iin sobrino xi Pablo, iin dèhe cùha-ne, te nì xinitnùhu stná-te nansa cuàhàn tiàa cuahà mà quida-tè, cundiatu dèhé-tené. Ñàyücándüá, nì sàhàn tèchii ma vehe cahnú soldadu, te nì quìhvi-tè nì cachtitnùhu-tè xi Pablo.

¹⁷ Dandu nècuàchìmà, nì cana-ne iin capitán, cachí-nè xì témà:

—Cundaca-ní tèchii yohó cùhùn nù comandante coronel, vèchi nihí-te iin razón cuní cundaa ini-nè.

¹⁸ Ñàyücándüá, nì saca capitán mà tèchii ma cuàhàn-te nù comandante coronel, te nì cachì-te xi nècuàchìmà:

—Nècuàchì ndiadí nani Pablo, nì cana-ne yùhù nì xicàn-nè favor cundaqui tèchii yohó quixi nù-ní, vèchi nihí-te iin razón vaxi.

¹⁹ Dandu nì tñii comandante mà ndahà tèchii ma nì tavà cuàán-nète nì xicàn tnùhù-né nù-té:

—¿Índü iñàha cuní-nì cachí-nì xì?

²⁰ Te nì cachí tèchii ma:

—Cunaha-ní, iin-nì sàni ndatnuhu váha dava tè-raza Judea ñà-cuàhàn-te càcàn-te favor nù-ní ñà-cundaca-ní tiu xi Pablo cùhùn nù nsidaa nècuàchì xídandacú, vèchi cuàhàn-nè quida-ne na ian cuní-nè ndàcàtnùhù gá-nè nù tiu-xi.

²¹ Doco, mii-ní, màsà cùníndísà-ní quida-ne, vèchi cuàhà tiàa cuàhàn cundiatu dèhé, más ùi dico xínduu-tè, te sàni chinaha-té Dios ñà-cuàhàn-te cahni-té tiu xi. Ni mà cúxí gá-te, ni mà cóhó gá-te tècuí ndè cachí cui-nè, xicachì-te. Te vichì, sà-itá tùha-tè ndiatú-te dandáa-ní —nì cachí tèchii ma.

²² Dandu nì chinaha comandante témà, cachí-nè:

—Sà-íá nùhù-ní vitni, doco màsà cachí-ní xì ni-iin nèhivì ñà-ndüá nì cachtitnùhu-ní xí.

Nansa nì dásàa comandante Pablo nùu gobernador Félix

²³ Dandu nì cana comandante mà ùi capitán, te nì cachí-nè xì-té:

—Quidayucun-nsiá ñà-caquihìn-nsiá ichì cundaca-nsiá ùi cientu soldadu cùhùn ñuu Cesarea, te nì càcùhùn stná ùni dico ùxin (70) soldadu xi ùu, xi stná ùi cientu tè-nihí lanza. Nsidaa-nsiá cundoo tùha-nsiá caquee-nsiá cà-ín sàñà —nì cachí-nè.

²⁴ Dandu nì cachí stná-nè nì cuitá iin ùi idu cunù stná Pablo, te nì cundácá víi-ténè sàa nùu gobernador Félix.

²⁵ Daaní, nì tiàa stná comandante mà iin tutu cùhùn, te dohó cachá:

²⁶ “Yùhù nani Claudio Lisias, te casàhù tnùñuhí xì mii-ní nècuàchì gobernador Félix.

²⁷ Tiàa nani Pablo, nì catnii tè-raza Judea-nè, cuàhàn-te cahni-ténè nì cúí, dandu nì sàa yùhù ndacá stnahí xì soldadu, te nì nacuidahìn-nè nù témà, vèchi sàni cundaà ini nduú-nè iin nècuàchì romanu.

²⁸ Daaní, cuní cundaà inì ndiá disáhà-xí dacuidá cuàchì guá-tené, ñàyücándüá nì saquìn-nè nù nsidaa tè-xídandacú nùu raza-nè.

²⁹ Te yucán nì xinì, cóò ni-iin cuàchì icúmí-nè ñà-cui-nè, ni ñà-cundiadi stná-nè, cui-si-ní sàhà dàñùhù xì mii-té càhàn tnùhù-té sàhà-né.

³⁰ Daaní, después ni xinitnùhu stnái nansa ndatnúhú dava-tè, cuní-te dandáñúhú-têné. Ñâyücándüá, vichi duha ni dândacuí sàà-nè nùu mii-ní; te ni dândacú stnái nùu tiàa xicahàn tnùhù mà ñà-ní sàà stnà-te nùu-ní. Ni cúcuéé ni-ní". (Ñà-jaàn ndüá ni tiàa comandante mà.)

³¹ Daaní, soldadu mà, ducán ni caquida-tè cumplir, divi ñuu mà ni saca-tè Pablo ni sàà-te xi-né ndè ñuu Antípatris.

³²⁻³³ Dandu inga quivi ni naxicocuíñ tè-xicásàhà mà mànuhù-té ndé ndoó-te, doco tè-xinihi xi idu, ni ndòo-tè xi Pablo. Dandu ni quihin tu-tè ichi cuàhàn-te xi-né ni sàà ñuu Cesarea. Yucán ni nacoo-tè carta nihí-te nùu gobernador, te ni nacoo stnà-te Pablo ndahà témà.

³⁴⁻³⁵ Dandu ni nsihí ni cahví témà tutu mà, dandu ni xicàn tnùhù-té nùu Pablo índu ladu nduu ñuu-nè. Te na ní cundaà inì-te divi ladu Cilicia nduu ñuu-nè, dandu ni cachi-te:

—Na quésáá stnà nècuàchi cáhàn tnùhù sàhà-ní, dandísá ndundaà dahuun chuun xi-ní —ni cachi-te.

Dandu ni dândacú-te cundiadi Pablo vehechuún cahnú ni quidavàha nsi-Herodes.

24

Ñà-ndüá ni cachi Pablo xi Félix na ní cáhàn-nè sàhà mii-né

¹ Tixi ùhùn quivi ni quesaa dùtù cusáhnú nani Ananías xi stnà dava nècuàchi sahnú dandacú. Te ni quesaa stnà iin tiàa nduu abogadu nani Tértulo, ñà-cunduu-ne yuhù nècuàchì mà. Te ni tnàtuu nsidaa-né nùu gobernador ñà-canicuàchi-ne sàhà Pablo.

² Dandú ni càna stnà Pablo quixi-ne. Te na ní quesaa-nè, dandu ni quesaha Tértulo mà ni cáhàn tnùhù-né sàhà nècuàchì mà, cachi-nè:

—Señor gobernador, sàhà mii-ní ndoó dádi nsidaa-nsí caní tiempo ñuu-nsí yohó, te cuàhà iñàha sàni nacani inì-ní ni quida-ní sàhà ñà-vàha xi ñuu-nsí.

³ Ñâyücándüá, nicanicuahàn naquímáni-nsí mii-ní ndéni ni cui ni cúndóo-nsí ñà-ní quida-ní xi-nsí cuàhà favor.

⁴ Doco vichi sàhà-ñà màsà cuàha chuún gá-nsí mii-ní, ñâyücándüá sacúndáhví-nsí ñà-quida-ní favor cunini chii-ní cáhàn-nsí.

⁵ Cunaha-ní, iin tè-chìcuéhé nduu Pablo jaàn, vachi yáha ga datáhnè dava-tè nèhivi raza-nsí inicutu ñuhiví. Idónuu-té nùu nècuàchi nchícùn ley tucu xi iin nècuàchi ñuu Nazaret.

⁶ Te ni cuni stnà-te quidachicuéhé-tè ñà-ì icúmi veheñùhu xi-nsí. Ñâyücándüá, ni tnii-nsite, te mii-nsí cuàhàn-nsí nsidandaà-nsí sàhà chuun ma modo xi-nsí ni cúí,

⁷ doco yucán ní sàà comandante coronel nani Lisias, te ni candiaa-nè tiàa jaàn fuerza nùu-nsí.

⁸ Dandu ni dândacú-né nùu-nsí ñà-quixi-nsí yohó nùu mii-ní nú cuní-nsí canicuàchi-nsí sàhà-té, ni cachi-nè. Te vichi vátuni cundaà ndisa inì-ní ndiá disàhà-xí sanicuàchi-nsí sàhà-té, cui-nsí ndàcàtnùhù-ní nùu mii-té —ni cachi Tértulo mà.

⁹ Dandu ni cáhàn stnà nsidaa gá tè-raza Judea itá yucán, divi ñà-ndacuisi nduu nsidaájàn, ni cacachì-te.

¹⁰ Dandu ni quida gobernador mà seña nùu Pablo ñà-vátuni cáhàn stnà-nè vichi. Ñâyücándüá, ni cáhàn-nè, cachi-nè:

—Yùhù ináhi cuàhà cuià iá-ní icúmi-ní chuun nsidandaà-ní ñuu-nsí yohó. Ñâyücándüá, cudí inì ñà-vátuni cáhàn sáhi nùu-ní.

¹¹ Cunaha-ní, mà úhi ndàcàtnùhù-ní, te cundaà vaha inì-ní ñà-làcà ùxin ù quivi cuàhàn-ndà ni nasai ñuu Jerusalén cuàhàn cahví Dios.

¹² Doco ni-iin xichi cóni nái xi ni-iin nèhivi veheñùhu yucán, te ni-iin xichi cóni dánàcuidè-nè, ni nèhivi sàhàn veheñùhu, ni stnà nèhivi xicánú calle.

¹³ Mate sanicuàchi nècuàchi yohó sáhi, doco cóo ni-iñàha cui quida-ne comprobar.

¹⁴ Doco yùhù cachi ndài xi-ní, iin ichi ndiaha nduá nchícùn, te ducán cahví Dios, divi mii-yá nisa cahví stnà xi-nsí, mate cachi nècuàchi yohó iin ichi tnùhù nduá. Doco yùhù xiníndísé nsidaa ñà-ítuú nùu tutu nduu ley xi-nsí, te xiníndísá stnái nsidaa ñà-ndüá ni tiàa profeta nisa cáhàn cuenta xi-ya.

¹⁵ Nacua ni cachi mii-né, ducán cachi stnà yùhù, ñà-íá ndisa tnùndé ini ndiatu-nda nùu-yá, vachi icúmi nsidaa-nda natiacu-ndà, nèhivi vaha te nèhivi malu.

¹⁶ Ñâyücándüá, yùhù, nicanicuahàn quidé lucha ñà-màsà cóo ni-iin cuàchi dandoho-xi animè, vachi ni-iin cuàchi có-cuní quide nùu Dios, te ni nùu nèhivi.

¹⁷ Cunaha-ní, caní cuià có-íé` ñui, dandu ni nasai yucán, nihí cuàhà ñà-ndüá cutahvi nèhivi ndahví ndoó yucán, te nihí stnái promesa xi.

¹⁸ Pues chuun jaàn nduá disàhà-xí ni nasai yucán, te ni nsidandoo stnái míi (nacua cachi ley xi raza-nsí). Te xicánúú sahnúí patiu veheñùhu cahnú yucán, cóni dánàcuidè nèhivi, ni

cóni quidá stnái ni-iin escándalo. Doco dava nècuàchì raza-nsì nì quixi ladu Asia, nì xini-nè yùhù yucán.

¹⁹ Te nú ndisa cuní nècuàchì mà càhàn tnùhù-né sàhì, dandu ndiá là-né màcùita stnà-nè nù-nì yohó, te canicuàchì mii-né sàhì.

²⁰ Te ò nècuàchì itá yohó, nú nì xini-nè iá iin falta nì quide na ní ìe nù nsidaa tè-xidandacú, dandu nì cachi-nèa vichi duha, cuní.

²¹ Cuisì vihini tuxí ini-nè iin falta nduá na ní càhàn fuertí xì nsidaa nècuàchì mà nì cachi ñà-xiníndisè icúmí-ndá natiacu-ndà —nì cachi Pablo.

²² Daaní, na ní inini Félix ñà-jaàn, nì cucani-tè chuun xi Pablo, cachi-te xi nsidaa-né: —Nì quesáa gà comandante coronel Lisias, dandu ndàcàtnùhù gué' sàhà-ñá cundaà vaha inì nansa iá chuun xi-nsia.

Ducán nì cachi Félix, vachi algu ináhá stnà-te sàhà ichi Jesús.

²³ Dandu nì dandacú-te nù iin capitan ñà-nì cundiáa-te Pablo, doco màsà cundiadí dahuun-ne, te nì màsà cadi stnà-te nù nì iin ana iá vaha xi-né nú cuní nècuàchì mà quixi-nè dacutiácu-ñané, te ò nácótò stnahá-né.

²⁴ (Daaní, mànuhù Félix mà.) Te nì yaha itnii quivì, dandu nì quixi tu-tè xì ñahàdihí-te nani Drusila; iin nècuàchì ñahà raza Judea nduú-né. Dandu nì cana-tè Pablo ñà-tnàtuu-ne, vachi cuní-te cunini-tè nansa iá ichi cunihnu vaha ini-ndá Jesucristu.

²⁵ Ñàyucánduá, nì càhàn Pablo xì nduú-né, dansitnù ini-nè nècuàchì mà nansa cuní Dios quida vù-ndá sàhà-ñá màsà quidá ndevàha-nda nansa ni nì cui, vachi icúmí coo iin quivì juiciu. Dandu Félix mà, cuahà gà nì yùhì-te, cachi-te xi Pablo:

—Còó, xuhun-ní (cuartu xi-ní) vichi. Te después, nú cusáí, dandu cana-tui mii-ní.

²⁶ Ducán nì cachi-te, vachi tuxí stnà ini-te vihini daquíhvi Pablo dihùn sàhà-ñá dañá-téné. Ñàyucánduá, cuahà xichi nì cana-téné nì ndatnuhu-té xí-né.

²⁷ Doco na ní yaha ù cuà, dandu nì quee-tè nù mesa, te nì quihvi inga tiàa nani Porcio Festo lugar xi-tè. Doco cóni tàvátè Pablo libre, vachi cuní-te ndòo vaha-tè xì nèhivi raza Judea.

25

Nansa nì càhàn Pablo sàhà mii-né nù gobernador saa nani Festo

¹ Daaní, nì quesaa Festo mà ladu yucán. Doco tixi ùnì quivì nì quee-tè ñuu Cesarea cuahàn-te ñuu Jerusalén.

²⁻³ Te yucán nì tnàtuu dùtù cusáhnù, xì stnà nècuàchì chicá idónuu, nì càhàn-nè xì Festo sàhà Pablo, càhàn tnùhù-né sàhà nècuàchì mà. Te nì xicàn-nè cana-tè nècuàchì mà quixi-nè ndé Jerusalén, vachi cuahà tiàa cuahàn cundiatu dèhé ñà-cahni-téné ichi mà.

⁴ Doco nì naxiconihí Festo nù nècuàchì mà, cachi-te:

—Còó, ñuu Cesarea mà icúmí Pablo ndòo-ne. Yucán ndiaá soldadu-né. Te yùhù, tixi iin ù quivì icúmí stnái naxicocufin yucán.

⁵ Ñàyucánduá, yucán nì cùhùn stnà nsidaa mii-nsiá nècuàchì idónuu, cutnáhà-nsiá xì cùhùn-ndá. Dandisá, nú iá cuàchì nècuàchì mà, dandu vātùnì canicuàchì-nsia —nì cachi-te.

⁶ Daaní, nì cuee gà-te ùnà ò úxin gà quivì ñuu yucán, dandu mànuhù-té ñuu Cesarea, (te cuahàn stnà tè-xidandacu-ma). Dandu inga quivì nì yaha Festo ndé ndundáa sàhà nèhivi, te nì sàcòo-tè. Dandu nì dandacú-te nì queé Pablo.

⁷ Te na ní quesaa nècuàchì mà, dandu nì sàcùita stnà nècuàchì raza Judea nì quixi Jerusalén mà, nì càhàn tnùhù-né sàhà nècuàchì mà. Cuahà gà chuun pesadu nì cachi-né diqui nècuàchì mà. Doco puru ñà-mànicùì nihindèè-né nì sandua.

⁸ Daaní Pablo, nì naxiconihí-né nù nècuàchì mà, cachi-né:

—Yùhù, còó ni-iin falta nì quidè diqui ley xi nècuàchì raza xi, ni còó stnà falta nì quidè diqui veheñùhu xi-nsi, ni diqui stnà rey cahnú César.

⁹ Doco Festo, cuní-te ndòo vaha-tè xì nècuàchì raza Judea mà, ñàyucánduá, nì cachi-te xi Pablo:

—¿A cándisá-nì cùhùn-ní ñuu Jerusalén, te yucán nsidandaì sàhà ñà-nduá cachi nècuàchì yohó?

¹⁰ Dandu nì cachi Pablo xì-té:

—(Còó.) Divi lugar yohó nduú ndé cachi rey César xiñuhu ndundaà sàhà nèhivi. Ñàyucánduá yohó ié. Te mii-ní, sàvaha ináhà-nì còó falta nì quidè diqui nècuàchì raza xi.

¹¹ Doco cunaha-ní, nú ndisa iá pesadu cuàchì, te ò nú ndisa cuahà gà inihíquè, te xiñuhu cuì, pues vātùnì; cahni-nsiá yùhù, mà cachi á coó. Doco nú coó, nú tnùhu nduá cachi nècuàchì yohó, dandu còó permisù danáyàha ni-iin juez yùhù ndahà-né. Pues vichi xiquèn ñà-dayàha-nì yùhù ndahà rey cahnú César —nì cachi Pablo.

¹² Daaní, Festo, nì ndatnuhu-té xí nècuàchì sáha razón xì-té nansa quida-tè, dandu nì cachi-te xì Pablo:

—Mii-ní, sàni xicàn-ní ndundaà chuun xi-ní nùu César. Pues vâtùni iá; divi nùu César icúmí-ní cùhùn-ní.

Nansa ni xicàn rey Agripa cãhàn Pablo nùu-né

¹³ Na ní yàha itnii quívi, dandu nì sàà stná rey Agripa xì Berenice ñuu Cesarea mà ñà-casàhú-nè xì Festo.

¹⁴ Te como caní quívi nì ndòo-ne yucán, ñàyùcàndúá nì cãhàn Festo xì rey mà sàhà Pablo, cachi-te:

—Na ní quee Félix nùu mesa, nì ndòo iin nècuàchì ndiadí yohó (nani Pablo).

¹⁵ Ñàyùcàndúá na ní sàhìn ñuu Jerusalén, dandu nì catnàtuu dùtù xicusahnú xì stná nècuàchì dandacú nùu ñuu mà, nì xicàn-nè dandacuí ñà-cui nècuàchì ndiadí mà.

¹⁶ Doco nì naxiconihí nùu-né: “Nsiùhù tè-ndúu nècuàchì romanu, còò estilu icúmí-nsí cahní-nsí ni-iin nèhivi nansa ni nì cui. Còò, vächì dihna icúmí-té cuita-tè nùu nècuàchì sanícuàchì sàhà-ñà ducán vâtùni cucumi-té lugar cãhàn stná-te sàhà mii-té nansa iá ñà-ndúá cãhàn tnùhù-né sàhà-té”.

¹⁷ Ñàyùcàndúá, nì caquixi nècuàchì ñuu Jerusalén mà dècuèndè yohó, te vichi duha inga quívi nì sàhìn vehechuún, nì sàcòi silla xi, te nì dandacuí nì tavá-te Pablo mà.

¹⁸ Dandu nì sàcuíta stná nècuàchì cãhàn tnùhù, te nì sanícuàchì-ne sàhà nècuàchì mà. Chuun pesadu cundua nì cahnìn. Doco còò, cóni sàndúá ducán.

¹⁹ Cuisi sàhà creencia xi-ne nì cãhàn-nè, xì sàhà stná iin ana nì xihì nani Jesús. Doco Pablo, tucu cachi-nè: itiacú Jesús, cachi-nè.

²⁰ Doco yùhù, cóni cundáá vaha inì nansa chicá vaha quide xì chuun jaàn. Ñàyùcàndúá, nì cãhìn xì Pablo, áma cándísá-nè cùhùn-nè ñuu Jerusalén, te yucán ndundaà sàhà chuun xi-ne.

²¹ Doco còò, lugar yohó nì xicàn-nè cundiadi-nè ndè cachi (cùhùn-nè) ndundaà sàhà-né nùu rey cahnú César. Ñàyùcàndúá, nì dandacuí coo vaha-ne ndè cachi techuín-nè cùhùn-nè nùu rey mà —nì cachi Festo.

²² Dandu nì cachi rey Agripa mà xì Festo:

—Yùhù, cudíi stná inì cunini ñà-ndúá cachi nècuàchì mà.

—Vâtùni, tnaa cunini-ní —nì cachi Festo.

²³ Daaní, inga quívi vaxi tu Agripa xì Berenice ndè salón cahnú ndè ndundáà sàhà nsidaa chuun. Nì quíhvi-ne yucán, vico sàstnùhù ndáa-ne. Te yucán sàni caquesaa stná comandante coronel xì cuahà stná nècuàchì chicá idónuu ñuu yucán. Dandu nì dandacú Festo ñà-nì tavá-te Pablo. (Te na ní quesaa-nè),

²⁴ dandu nì cachi Festo mà:

—Mii-ní rey Agripa, xì nsidaa stná mii-nsiá nècuàchì nì quesaa, yohó indéhe-nsiá nècuàchì (cachi xì-nsiá). Cunaha-nsiá, na ní sàhìn ñuu Jerusalén, cuahà gá nècuàchì raza Judea nì xicàn favor nùu, dècuèndè nì càna fuerte-nè, cuní-nè cui nècuàchì yohó. Stná ñuu Cesarea yohó, divi nì ducán xicàn stná-ne.

²⁵ Doco nùu yùhù, còò ní-iin falta xi-ne nì túi. Dandu mii-né, nì xicàn stná-nè ndundaà sàhà-né nùu rey cahnú, ñàyùcàndúá, sàni nacani inì, te icúmí techuín-nè cùhùn-nè yucán.

²⁶ Doco cuisì ñà-còò ní-ñàhà cui cachi ndise na taii nùu señor rey cahnú sàhà-né. Ñàyùcàndúá sàni tavá cànúí-nè nùu mii-ní rey Agripa, xì nùu stná nsidaa mii-nsiá nècuàchì dava ga, vächì cuní nanducu-nsiá indù ñàhà cui taii nùu tutu cùhùn xi-né.

²⁷ Vächì có-ndúá ñà-techuun-nda iin nècuàchì presu cùhùn nùu rey mà nú còò ní-ñàhà cachtínùhù ñà-ndúu falta xi-ne —nì cachi Festo.

26

Ñà-ndúá nì cachi Pablo na ní cãhàn-nè sàhà mii-né nùu rey Agripa

¹ Daaní, Agripa mà, nì cachi-nè xì Pablo:

—Vâtùni cãhàn-ní sàhà-ní vichi.

Dandu nì cuu ndahà Pablo, te nì quesaha-né nì cãhàn-nè, cachi-nè:

² —Nansicãhìn vichi, vächì nùu mii-ní cuahìn cãhìn. Pues cuahà gá ñà-ndúá nì cãhàn tnùhù nècuàchì raza-ndà sàhì, rey Agripa.

³ Doco cudíi inì vichi, vächì ináhá-ní nansa ndisa iá nsidaa estilu xì raza-ndà, te cundáá stná inì-ní sàhà nsidaa chuun ndatnùhù cuahà-ndà. Ñàyùcàndúá, sacúndáhvi nùu-ní ñà-nì còò calma xi-ní cunini-ní ñà-ndúá cuahìn cãhìn.

⁴ Nsidaa nècuàchì ñuu Judea, ináhá-né nansa nisa quide na ní sandui tèchii. Dihna nisa ie ñui, dandu nì sàhìn nisa ie ñuu Jerusalén.

⁵ Te nècuàchì raza-ndà ndoó yucán, dècuèndè sàhana ináhà-nè yùhù. Te nú cuní-nè cachitnúhu ndaà-nè, vátùni cachi-nè nansa nisa quide na ní sanchicuìn ley xì nècuàchì fariseu. Nsidaa nècuàchì ley mà, chicá fuerte chívàha-ne religiòn xì raza-ndà.

⁶ Doco vichì yohó ié, sanícuàchi-ne sàhí. Te ¿índù falta xì íá? Cuisì ñà-xiníndísè palabra nì quida Dios comprometer xì xii-ndà, divi ñà-cuàhàn-yà danátíacú-yà nsii.

⁷ Pues sàhà ñà-nì cachi-yà ducán, ñàyùcàndùá, nsidaa nèhivì nduú nsi-úxin ùi dècendencia xì raza-ndà, xinúcuàchí vî-né nùù Dios ndui te ñuu, xiníndísà-né, te ndiatú-né cuu ndisa ñà-nduá nì quida-ya comprometer mà. Cunaha-ní rey Agripa, yùhù xiníndísà stnái, te ñà-jaàn nduá disáhà-xì sanícuàchi nèhivì raza-ndà sàhí.

⁸ Mii-nsiá, ¿a ndísá có-xiníndísà stnà-nsiá ñà-vátùni danátíacú Dios nsii? (Pues ináhà-ndá, vátùni.)

⁹ Yùhù, ndisa, nisa tuxi inì ñà-ndiá ìquè quida quini xì nèhivì ndácùcahan xì Jesús de Nazaret.

¹⁰ Te divi ñà-jaàn nduá nisa quide ñuu Jerusalén, vàchi ndè nùù dùtù cusáhnù nì taví permisú, te cuàhà nèhivì xì Jesús nisa sadi vehecàa. Dandu quivì cuàhàn-te cacahni-té nècuàchimà, stnà yùhù nì sadandáá stnái.

¹¹ Te nisa nacàhin stnái nsidaa veheñùhu cuachi nisa nanduquí nèhivì xì Jesús ñà-dandohí-nè áma níhíndéi nacuaà-né mii-yá. Te ñà-cuàhà guá nisa xidá inì sàhà-né, dècuèndè nisa sahàn stnái ñuu xicá nì sanchicuìn-nè.

¹² Pues sàhà chuun jaàn nduá cuàhìn ichì ñuu Damasco, nihí orden nì quee nùù dùtù xícusahnù. Ñàyùcàndùá, íá permisú-xì cuàhìn sàhà chuun ma.

¹³ Te nahi càxíhúì nì sandua, señor rey, dandu ichì cuàhìn mà nì xinì yáha ga fuerte nì natnuù nihni iin luz ndé xiquè cuàhìn xì compañeruì, ndè diquì-xì ansivì vàxa, te chicá ndiaha nì natnuà nùù orá.

¹⁴ Ñàyùcàndùá, nì nacàsàn nsidaa-nsí ñuhù, te nì tiacuí nì càhàn iin ana càhàn dàhàn hebreu, cachí-yà xì: “¡Saulo, Saulo! ¿Índù chuun nchícùn-ní yùhù quidá quíni-ní xì? Cuisì mii-ní quidá quíni-ní xì mii-ní, vàchi na quidá quisi caní sàhà nùù garrocha, ducán quidá stnà-ní”.

¹⁵ Dandu yùhù, nì cachi: “¿Ana nduú mii-ní, Señor mío?” Dandu nì cachi-yà xì: “Yùhù nduú Jesús, divi ana dandoho-ní.

¹⁶ Doco vichì ndacuìin-ní, vàchi sàhà-ñà nì xinì-ní yùhù, ñàyùcàndùá icúmí-ní cunduu-ní ana cucucuachi nùì, cunduu-ní testigu sàhà ñà-nduá nì xinì-ní vichì, xì sàhà ñà-nduá cunì gá-ní na dacuní guè mii-ní mí quivì vàxi xì-nda.

¹⁷ Te vichì cunaha-ní, cuàhìn techuìn mii-ní ñà-cùhùn-ní càhàn-ní xì nècuàchì nsidaa inga raza. Te nú cuní-nè quida quini-ne xì-ní, dandu cuidahín mii-ní nùù-né, nùù mii-né xì nùù stnà nècuàchì raza-ní Judea.

¹⁸ Doco icúmí-ní càhàn-ní xì-né sàhà-ñà datnúù Dios sàxiníntnùmí-nè, te quee-ne ichì ñàa, quihìn-ne ichì ndiaha-yá. Vàchi nú nì càhàn-ní xì-né, dandu vátùni dàñà-né nùù ndàhá ñà-malu, te candòo-ne ndahà Dios. Nduu stnà cuàchi-ne, te cunduu-ne nèhivì ìì xì, dandu cutnahá-né xì nsidaa gá ana xiníndísà-xì, te nihitáhvi stnà-nè cuàhà ñà-ndiaha”, nì cachi Jesús xì.

¹⁹ Ñàyùcàndùá, nì quida ndise cumplir nsidaa ñà-nduá nì cachi-yà xì na ní xinì mii-yá ansivì, señor rey.

²⁰ Vàchi primeru nì càhìn xì nècuàchì ñuu Damasco, dandu nì ndixi stnái ñuu Jerusalén, te nì càhìn xì nèhivì yucán xì stnà inicutu ladu Judea, xì cuàhà stnà ñuu inga raza. Te nsidaa lugar mà nì cachi xì-né ñà-xiñùhù cuu-ne arrepentir, te yàha-ne ladu xì Dios, dandu quida vî-né nacua ndiá ìcá-né nùù ndisa sàni naxicocuíin inì-né sàhà cuàchi-ne, nì cachi xì-né.

²¹ Pues cunaha-ní, nsidaajàn nduá disáhà-xì nì tniì nècuàchì raza-ndà yùhù patiu veheñùhu cahnù, cuàhàn-nè cahnì-né yùhù nì cùì.

²² Doco Dios nduú ana chindéé xì, ñàyùcàndùá, iin-ni nchícùn ndài (ichì váha-ya) dècuèndè quivì vichì, iin-ni càhìn xì nèhivì sàhà-yá, a xinduu-ne nècuàchì ndahví, te ò nècuàchì chicá idónuu, nsidaa-né càhàn xì, cachí xì-né ñà-nduá nì cachitnúhu Moisés, xì ñà-nduá nì cachi stnà nècuàchì profeta,

²³ ñà-icúmí Cristu ndoho-ya, (te cui-yà), dandu cunduu-ya ana primeru natiacu, te después danátnùù-yà ichì ndiaha-yá nùù nèhivì, na nèhivì ñuu-ndà, te ducán stnà nèhivì inga ñuu —nì cachi Pablo.

²⁴ Càhàn va Pablo ducán, dandu nì ndàhì Festo, cachí-te:

—Pablo, sàni culocó sàxiníntnùmí-ní ñà-cuàhà guá dacuaaha-ní.

²⁵ Doco nì cachi Pablo xì-né:

—Señor gobernador Festo, cuicahnù inì-ní, doco màdiá nì culoquì nduá, vàchi ñà-ndácuisi nduá cachí xì-ní. Càhàn sahnúì.

²⁶ Te cunaha-ní, yohó íá stná rey Agripa, te có-cúcáhán nú' cáhìn nùù mii-né, vächì ináhá-né sàhà chhuun yohó. Seguru icúmí ñà-sàni cundaà vaha ini-né, vächì chhuun yohó, cóni sándúá iin chhuun íá dèhé.

²⁷ Mii-ní rey Agripa, ádi xinindísá stná-ní ñà-ndúá nì tiaa nècuàchì profeta sàhana. Pues yuhù ináhí, ducán xinindísá-ní.

²⁸ Dandu nì cachi Agripa xì-né:

—Cuisi iyuhu gá palabra cachi-ní, te vihini yàha stnài cunchicuìn Jesucristu.

²⁹ Dandu nì cachi Pablo xì-né:

—A sea iyuhu-ní, te ò cuàhà gá cumàni, doco cahnú gá Dios iin-ni nì quidá stná-ní nacua nì quida yuhù, (nì xinindisé mii-yá. A sácú vaha nì cúnindísá stná-ní), mii-ní xì nsidaa gá stná nècuàchì iníni yohó. Cuisi-ní có-cùní cunuhnì stná-nsià cadena nahi mii

³⁰ —nì cachi Pablo.

Dandu nì ndacuítà nsidaa nècuàchì ndoó yucán, divi rey Agripa xì gobernador, xì Berenice, xì nècuàchì dava ga ndoó stná xì-né yucán.

³¹ Te nì cuxio-ne iladu, ndatnúhú-né, cachi-né:

—Nì còò falta xì nècuàchì jaàn dìsáhà-xí cui-né, nì ñà-cundiadi-né.

³² Te nì cachi rey mà xì Festo:

—Nú màsà cacán-né yàha-ne nùù rey cahnú César, dandu mà ùhì dàñà-né vichi duha nì cùí.

27

Nansa nì dáyáha-tè Pablo cùhùn-né ñuu Roma

¹ Daaní, Pablo xì itnii gá tè-ndiádí, nì yàha-ne ndahá iin capitán nani Julio, iin soldadu siempre cutnáhà xì soldadu xì meru rey César Augusto, vächì sàni cachi tè-xidandacu-ma ñà-icúmí-nsí quihin-nsi barcu cùhùn-nsi ladu Italia.

² Te nìsa ía stná iin tiàa nani Aristarco cutnahá stná xì-nsí cùhùn. Iin nècuàchì ladu Macedonia nduú-né, te meru ñuu-né nduú ñuu Tesalónica. Ñàyücàndúá, nì nana nsidaa-nsí iin barcu nì quixi ñuu Adramitio, vächì sàdaani cuàhàn-nu quihin-nù ichì nùhù-nu, te icúmí-nù yàha-nù ladu Asia. Dandu nì ditá-nu nì quihin-nù ichì cuàhàn-nu xì-nsí.

³ Dandu nì yàha iin quivi, te nì sàà-nsi ñuu Sidón. Te yucán nì quidamani capitán mà nì sàha-ne permisú (ñà-nuu Pablo barcu), ñàyücàndúá nì sàhàn nècuàchì mà ini ñuu yucán ndé ndoó amigo xì-ne, te nì nìhi-né ñà-ndúá xiñuhu.

⁴ Dandu nì ditá tu barcu mà ichì cuàhàn-nu, te nì yàha-nsi iin ñuu cahnú nani Chipre indúhu mahi mar. Ladu ndé có-dúcùn guá tàchi nì yàha-nsi, vächì ladu nùù-xí caná tàchi mà.

⁵ Daaní, nì yàha-nsi chicá nùù-xí mahi mar íá frente ladu Cilicia xì ladu Panfilia, te nì sàà-nsi ñuu nani Mira íá ladu Licia.

⁶ Yucán nì xini capitán mà inga barcu nì quixi ñuu Alejandría, te icúmí-nù cùhùn stná-nu ladu Italia. Ñàyücàndúá, divi barcu mà nì dándacú-né nana-nsi, te cuàhàn-nsi.

⁷⁻⁸ Daaní, cuàhà quivi nì xica cueé-nu, vächì ùhì xicá-nu, làcà ní cuyatni-nù nùù ñuu Gnido, te cóni sáha ga tàchi caca gá-nu. Ñàyücàndúá, nì sàha-nù vuelta nì yàha-nsi yatni iin esquina ñuu Creta ndé nani Salmón. Dandu yuhù mar diin ñuu Creta mà nì yàha-nsi, doco ùhì stná caca barcu yucán. Dandu nì sàà-nsi nùù ñuhù ichì iin xaan nani Buenos Puertos, yatni ndé íá ñuu Lasea.

⁹ Doco vichi sàni cuee sàstnùhù-nsí, dècuèndè sàni yàha vicò iníhí-ndà, te vihini quida quini mar xì barcu (nú nì cùhùn-nu). Ñàyücàndúá, nì cáhàn Pablo (xì nèhivì ndoó barcu mà),

¹⁰ cachi-né:

—Señores, sàni sàni nì cundaà inì cuàhàn coo cuàhà trùndoho xì-nda nú nì cùhùn gá-ndà nùù-xí. Mà ùhì ndañuhu carga, xì mii stná barcu, ndé stná mii-nda vihini ndañuhu-nda.

¹¹ Doco capitán mà, chicá nì xinindísá-né ñà-ndúá cachi tiàa dacaca-xi barcu mà, xì ñà-ndúá cachi stná stohò-nu, te màdi ñà-ndúá cachi Pablo.

¹² Ñàyücàndúá, cuàhà nècuàchì yucán, chicá nì cuni-né caquee-ne lugar mà, vächì có-ndúá iin lugar vaha yàha-nda tiempu vixin. Ñàyücàndúá, nì cachi-né chicá vaha cùhùn-né nùù-xí ndé ñuu Fenice, dandu vátùni cundoo-ne yucán tiempu vixin. Ñuu Fenice mà nduú iin ñuu inga orilla ñuu Creta, te cuisì dúcùn tàchi iin dián ndé quècahu hora.

Nansa nì dàñà fuerte dàvitàchì mar

¹³ Daaní, nì quesaha caná yadi tàchi ladu, te nì tuxi ini nècuàchì barcu ñà-vátùni cùhùn-nsi. Ñàyücàndúá, nì quihin tu-nsi ichì cuàhàn-nsi orilla mar iladu ñuu Creta mà.

¹⁴ Doco tixi inga iin ratu ni quesaha ni cana iin tàchi dâna, ladu ñuu mà vâxan, tàchi yódo ladu ñinu cachi-nè xân.

¹⁵ Te ni cacùhan barcu xi-nsi, màncùí gá ñihindèè-nsí caca ndaà-nu ladu vâxan, ñâyücândüá ni sahnde ini-nsi, vâchi ndé ndiâchi úun-nu cuâhân-nu.

¹⁶ Dandu ni yâha-nsi iladu ñuu tii nani Clauda indúhu mahi mar. Te yucán có-câná cuâhá guá tàchi. Cunaha-ní, barcu cahnú xí-nsí mà, íditâ stná-nu iin lancha tii. Te ndee ni quidachuún-nsí, dandu ni ñihí-nsí ni tavâ-nsínu.

¹⁷ Dandu ni dâcùnündúú-te iin cable ndee icâ barcu cahnú sâhá-ñá màsâ ndüá-nu. Te ni yùhi stná-te sâà-nu ndé yadi iâ ñusi, te cacùhun-nù. Ñâyücândüá, ni dânnù-te sicoto ndee dítâ tàchi-nú, te ndiâchi úun-nu cuâhân-nu quidâ tàchi mà.

¹⁸ Daaní, inga quivi, yâha ga caná ñi tàchi dâna mà. Ñâyücândüá ni quesaha-té ni dàndiâchi-té carga xi-nù ini mar.

¹⁹ Te quivi ùni ni dàndiâchi ndahâ stná-nsi nsidaa gá ñâ-ndüá ñihí-nu.

²⁰ Dandu ni yâha cuâhá gá quivi, te có-túí orá, có-túí sitnúú, te yâha ga dúcùn dàvitâchi danâ mà nsiùhù. Ñâyücândüá, cóò gá tnündé ini cacu-nsi ni cahan-nsí.

²¹ Daaní, na sâni yâha cuâhá quivi ndoó òcò-nsi có-xixí-nsí, dandu ni sâcùin Pablo mahi nsidaa-nsí, te ni cachi-nè xi-nsí:

—Compañeros, chica vâha nú ni inini-nsia yùhù ni cùí ñâ-màsâ quéeé-ndâ ñuu Creta quixi-nda, dandísâ mà cacùhun-nda tnündoho yohó.

²² Doco vichi, cachi xi-nsi, màsâ cùhúun ini-nsia, vâchi ni-iin-nda mà cúí-ndâ, cuisì barcu xi-nda cuâhân ndañuhu.

²³⁻²⁴ Doco cunaha-nsiá, ñuu ndùvehè ni xini yatni ndé (indúhí) ni sâcùin iin ángel xi Dios núí. Vâchi mii-yâ nduú-yâ Stohí, divi ana xinúcuâchi nù-xí. Pues divi ángel mà ni cachi-nè xí: “Màsâ yúhí-ní, Pablo, vâchi icúmi-ní sâà-ní nâcùin-ní nùú rey cahnú César. Te cunaha-ní, sâni indehè ndâhví Dios mii-nsiá, vâchi dohó cachi-yâ xi-ní: mà sââ ni-iin nêhivi cutnáhá xí-ní cui-nè, ni-iin nêhivi barcu yohó”, ni cachi ángel mà.

²⁵ Ñâyücândüá contentu ni nâcúndoo-nsia, compañeros, vâchi nacua sâni cachi Dios xí, divi ducán icúmi coo, te seguro icúmiâ.

²⁶ Doco antes icúmi-ndâ ndiâchi-nda orilla iin ñuu tii mahi mar —ni cachi Pablo.

²⁷ Daaní, ni yâha ùxin cùmi gá quivi, te vichi xicâ barcu iladu mar ndé cachi-nè nduú mar Adria. Nahí dava ñuu nduá, te ndiâchi ndiâchi barcu xi-nsi quidâ tàchi. Dandu peón xíquidachuún barcu mà, ni tuxi ini-te ádi sâni cuyatni-nù nùú ñuhú íchí càhân-té.

²⁸ Ñâyücândüá, ni chitacùhá-te nadaa tantu cunú ñuhú têtúí yucán, te ni cundaâ ini-te òcò sâhùn iin (36) metro cunú-te. Dandu iyuhu gá nùú-xí, tucu tu ni chitacùhá-te, te òcò ùsâ (27) metro cunú-te chicâ yucán.

²⁹ Ñâyücândüá, ni yùhí-te dúcùn barcu cavâ nahnú ñuhú ini mar. Sâhâmâ ni dânnù-te cùmi càa nahnú xí barcu ndé cahâ mar sâhá-ñâ màsâ cacâ gà-nu. Dandu ndiatú cuisì-té tûinuú.

³⁰ Daaní, peón xi barcu, ni cuni-te cunu-tè. Ñâyücândüá, ni sâcùita-tè nùú barcu mà, quidâ-te na ian cuâhân-te danuú gà-te inga càa nahnú ndè cahâ mar, doco dandâhví-te, vâchi lancha tii ma nduá ni dânnù-te.

³¹ Dandu ni cachi Pablo xi capitán xi stná soldadu ndoó yucán:

—Nú màsâ ndóo peón jaàn barcu yohó, mà cacu-nsia.

³² Ñâyücândüá, ni sâhân soldadu mà ni sahnde-te cable itácâá lancha mà, te ni ndiâchi-nú mahi mar.

³³⁻³⁴ Daaní, na sâcùahân tûinuú, dandu ni càhân Pablo xi nsidaa compañeru-nè, cachi-nè: —Chicâ vâha cuxi-nsia iñâha, vâchi sâcùahân-ndâ ùxin cùmi quivi có-xixí-nsiá, nchitò-nsiá, nacání ini-nsiâ. Ñâyücândüá sacúndâhví nùú-nsiá ñâ-cuxi-nsia, vâchi ducán xiñuhu quida-nda, dandu càcu vâha-nda, vâchi cunaha-nsiá, cóò ni-íñâha cuu xi ni-iin-nda.

³⁵ —ni cachi Pablo.

Dandu ni tñii-ne iin pan, te ni naquimaní-né Dios ni indehè nsidaa-né. Dandu ni dàcuâchí-nèâ, te ni quesaha-né xixí-né.

³⁶⁻³⁷ Ñâyücândüá, nsidaa gá nêhivi yucán, contentu ni ndóo-ne, te ni xixi stná-nè. Te nsidaa nsidaa nsiùhù nêcuâchi ñuhú barcu ma, ù cientu ùni dico sâhùn iin (276) nêhivi ni sanduu-nsi.

Nansa ni cuu xi barcu, ni tixi-nú ni sachi-nù nùú mar

³⁸⁻³⁹ Daaní, na ní nsihi ni xixi nêhivi mà ni ndenuu ini-nè, dandu ni sate nsihi-ne trigu (nduú carga xi-nù) ñâ-cùni-nè nduñama chii gá-nu. Dandu na ní tûinuú claru, (ni xini xicâ-té yucán iá) iin ñuu mahi mar. Doco cóni nâcùni-te indú ñuu nduá. Doco ni xini stná-te yucán iá iin ndahâ mar ndé iá ndââ ñusi orilla-ñâ, te vâha lugar mà daxínu-tè barcu cahan-té.

⁴⁰ Ñàyùcàndüá, nì sahnè-de cable xì càa itnúi xí-nù mahì mar, te nì ndòa. Dandu nì dàñà stná cable nuhnì yutnú chipála dacaca-xì-nù. Te nì nana stná sìcoto ndee itáníni ladu nù-nù (ñà-dítà tàchì-nù). Ñàyùcàndüá nì quesaha-nù nì nacaca-nù, te cueéni cueéni nì cuyatni-nù ndé iá ñuhù íchí mà.

⁴¹ Doco nì sàà-nu iin xaan ndé vaxì ùi ichì tècuíi, te yucán nì cacùhun-nù cahà mar. Nì ndùxin tnuu nù-nù, doco cahà-nù, nì quesaha nì sachi ì-ñá nì quida tècuíi dúcùn ndee guá lcà-nù.

⁴² Dandu soldadu yucán, nì cacuni-te cahni nshí-te nècuàchì ndiadi ndiaá-te, vächì vihini dutè-né mar mà, te cunu-ne cahan-té.

⁴³ Doco capitán yucán, cóni cùnì-nè cui Pablo. Ñàyùcàndüá, cóni sáha-ne cahni soldadu mà nècuàchì ndiadi. Dandu nì dandacú stná-nè nù nècuàchì túha dutè ñà-dihna mii-né nì quecoyo-ne mahì tècuíi dècuèndé nì xínu-ne ñuhù íchí.

⁴⁴ Dandu nècuàchì mà túha, cunchicùn-nè cùhùn-nè cundóo candee-né dìquì yutnú nduú tabla, ò inga yutnú xì barcu nì sachi. Ñàyùcàndüá, ducán nì nihì nshí-nsí nì quee-nsi ndé ñuhù íchí, te nì càcu-nsi.

28

Ñà-ndüá nì quida Pablo na ní ìa-nè ñuu tii Malta mahì mar

¹ Na ní nshí nì càcu-nsi nù mar mà, dandu nì xinitnùhu-nsi Malta nani ñuu yucán.

² Te nèhivì ndoó yucán, nì quida manì-né xì-nsí nì chifñuhu-nè iin ñuhu, te nì cachi-nè xì-nsí ñà-nì tnátuu-nsi nadaà-nsí, vächì cuún dàvì, te vixin ga.

³ Ñàyùcàndüá nì nducu stná Pablo chíi tutnú ichí. Doco na meru daquée-nènu mahì ñuhu mà, dandu nì quecunu iin còò dānā xínu-sì nù ñuhu, te nì tñinùhu tnuu-sì ndahà-né.

⁴ Ñàyùcàndüá, na ní caxini nècuàchì ñuu mà itácáá còò mà ndahà Pablo, nì cachi-nè iin-ne xì inga-nè:

—Ádi té-nì sahnì nduú tè-jaàn, ñàyùcàndüá vichi icúmí-té danáa-te sàhà-té. Mate sání càcu-tè nù mar, doco mà níhì-té cutiacu gà-te —nì cachi-nè.

⁵⁻⁶ Doco nì quidi Pablo ndahà-né, te nì ndiachi còò mà mahì ñuhu. Ñàyùcàndüá, nsidaa nèhivì yucán, ndé ndiátú úun-né, vächì tuxí ini-nè cuàhàn xiun ndahà Pablo, ò nú cóo, nanáà nacasàn-né cui-nè. Doco canì tiempu ndiátú-né indéhe-né, te còò ni-íñaha nì cuu-xì nècuàchì mà. Iin-ni iá-nè. Ñàyùcàndüá, tucu nì nacani ini nèhivì mà, cachi-nè:

—Ádi iin dios nduú nècuàchì jaàn.

Nansa nì dāndúvāha Pablo yua nècuàchì dandacú nani Publio

⁷ Yatni yucán nduú ñuhù xì nècuàchì dandacú nù ñuu mà; Publio nani-né. Te nècuàchì mà, nì dāyāha-ne nsiùhù vehe-ne. Òni quivì nì sandoo-nsi yucán. Te cuàhà gá nì cunsihi ini-nè nsiùhù.

⁸ Te yucán iá stná yua-né, indúhu-né, sáhayocá-nè, vächì cuhí-nè cuèhè daxìn. Dandu nì quihvi Pablo ndé indúhu nècuàchì mà, te nì xicàn tàhvi-né nù Dios, nì chitāndóo-né ndahà-né dìquì nècuàchì mà, te ducán nì nduvāha-ne.

⁹⁻¹¹ Dandu después dava ga nècuàchì cuhí ndoó ñuu mà, nì caquixi stná-nè, te nì nduvāha stná-nè. Ñàyùcàndüá, cuàhà gá nì cañúhu nècuàchì ñuu mà nsiùhù. Te na ní xínu ùni yòò ndoó-nsí yucan, dandu nì nana-nsi iin barcu cuàhàn-nsi quihin tu-nsi ichì nacaca-nù xì-nsí. Te nèhivì ñuu mà, nì sàhatahvi stná-nè nsiùhù nsidaa ñà-ndüá xiñuhu nù-nsí. Te barcu mà, iin yutnú nì ìa yucán ini tiempu vixin nduú-nu. Ñuu Alejandría nduú meru ñuu-nu; te nù-nù itá muñecu nani Cástor xì Pólux. Pues divi barcu mà nduú yutnú nì nana-nsi, te cuàhàn-nsi.

¹²⁻¹³ Daaní, primeru nì sàà-nsi ñuu Siracusa, te ùni quivì nì sandoo-nsi yucán. Dandu nì caquee tu-nsi, te duha duha nì càvā barcu xicá-nu cuàhàn-nu, te ducán nì sàà-nu xì-nsí ndé ñuu Regio. Dandu inga quivì, te nì quesaha tú tàchì ladu. Ñàyùcàndüá, nì caquee tu-nsi cuàhàn-nsi. Te tixi ùi quivì nì sàà-nsi iin ñuu nani Poteolos.

¹⁴ Ñuu yucán nì ndacùhun tnahá-nsí xì nècuàchì iin-ni nchícùn stná xì Jesús, te nì xicàn-nè ñà-ndòo-nsi xì-né iin ùsà quivì. Dandu después nì quihin tu-nsi ichì cuàhàn-nsi carretera cuàhàn ñuu Roma.

¹⁵ Daaní, ñuu Roma mà nì quee ga stná nèhivì xì Jesús vaxì-ne, vächì sàni xinitnùhu stná-nè sāvaxi-nsi. Dava-ne, dècuèndé ñuu nani Yàhvi xì Apio nì quesaa-nè, te dava ga-nè cuisì ndé ñuu tii nani ùni Changaru nì quesaa-nè (ñà-ndacùhun tnahà-né xì-nsí.) Te na ní xini Pablo nècuàchì mà, nì naquimani-né Dios, te nì ndòo-ne contentu.

¹⁶ Daaní, ni sàà nsidaa-nsí ñuu Roma. Te capitán cutnâhá xí-nsí, ni quida-ne entregar tiãa ndiaá-nè, ni ndòo nècuàchìmà ndahà iin comandante. Doco Pablo, ni nihi-né permisu coo cuaán-né, mii-né xì stná iin soldadu cundiaa xì-né.

Nansa ni càhàn Pablo xì nècuàchì raza-nè ndoó ñuu Roma

¹⁷ Daaní, ni yàha ùni quivi, te ni nacana Pablo nècuàchì raza-nè chicá idónuu ni sàà vehe-ne. Te na sání nataca nsidaa-né, dandu ni cachi Pablo xì-né:

—Ñání, còò ni-ñàha ni quidé diquí nècuàchì ñuu-ndà, te ni-iin xichi cóni càhíchi stná ini estilu xì xii-ndà. Doco ni tñii nècuàchì raza-ndà yùhù na ié ñuu Jerusalén, te ni dàyàha-ne yùhù ndahà tè-romanu.

¹⁸⁻¹⁹ Te tè-yúcán, ni xicán tñùhù váha-tè nùí, dandu cuàhàn-te dañá-té yùhù ni cùí, vâchi còò ni-ñàha disáhà-xí cùí. Doco nècuàchì raza-ndà ndoó yucán, cóni cùnì-nè dàñí. Ñâyücàndüá, fuerza ni xiquén dayáha-tè yùhù nùù rey cahnù César ñà-nsidandaà tèmà sàhí. Doco ni-iyuhu có-ndüámà ñá-cùnì daquéé cuàchì diquí nèhivi raza-ndà; còò.

²⁰ Pues cunaha-nsiá, iá ñà-disáhà-xí ni quide mii-nsiá invitar cundehí-nsiá, te càhìn xì-nsiá yohó, vâchi vichi ndisa sà-íá iin tñundé ini ndiaha xí nècuàchì raza-ndà Israel. Doco divi sàhà-ñá (xiníndisè tñundé ini ndiaha ma), ñâyücàndüá ni sàà ni sàcùnuhni cadena yohó —ni cachi Pablo.

²¹ Dandu ni cacachi nècuàchìmà xì Pablo:

—Còò; còò ni-iin carta ni quixí ladu Judea càhàn sàhà-ní, ni còò ni-iin stná nècuàchì raza-ndà ni quésáá daquéé cuàchì-xì diquí-ní.

²² Doco cachí-ní xì-nsí nansa iá ichì sàà, tuxí ini-ní. Vâchi nsiùhù cunì-nsi cundaà ini-nsi, vâchi nsidanicuú lugar càhàn ùhí nèhivi diquí ichì mà —ni cachi-nè.

²³ Daaní, ni saquin Pablo iin quivi quixí tu nsidaa-né. Te na ní sàà quivi mà, cuàhà gá nèhivi ni casaà vehe Pablo. Ñâyücàndüá, ndè dàtnàà, xì ndè ni cuaà dahuun ni ndòo-ne yucán, càhàn Pablo xì-né, datúí-ne nansa iá ichì ndé dandacú Dios, te dansínuu ini-nè nècuàchìmà nansa cachí ley xì Dios ni tiaa Moisés, xì nansa cunì cachi stná palabra ni tiaa nècuàchì profeta sánaha. Ducán ni quida-ne, vâchi cunì-nè dacúníndisá-né nècuàchìmà, te cahvi-ne xì Jesús.

²⁴ Daaní, na ní nsihamá, dandu dava nècuàchì iníní má, ni xiníndisá-né, te dava-ne, còò.

²⁵ Madi iin-ni ni xiníndisá nsidaa-né. Daaní después cunì-nè nùhù-nè. Doco na tãñàha ga caquee-ne, ni cachi Pablo xì-né:

—Ndisa, ñà-ndáà nduá ni cachi Espíritu Ìí xí Dios xì xii-ndà sánaha na ní dàcàhàn-yà profeta nani Isaiás, vâchi dohó ni cachi-yà xì nècuàchìmà:

²⁶ Cuahán-ní, càhàn-ní xì nècuàchì raza-ní yohó, te dohó cachí-ní xì-né: “Mii-nsiá, cuàhà gá icúmí-nsiá cunini-nsiá, doco mà sàà-nsiá màñhí ini-nsiá. Te cuàhà gá icúmí-nsiá cundehè-nsiá, doco mà cundáà ndisa ini-nsiá”. (Ducán cachí-ní xì nècuàchì raza-ní.)

²⁷ Vâchi nsidaa nèhivi mà, quidámáxiní-nè, na ian ùhí tiacu-nè. Te quidá-né na ian dãnácuañí-nè nùù-né, vâchi có-cùnì-nè cundehè-né (ichì váha), ni có-cùnì stná-nè cunini-ne, ni có-cùnì stná-nè màñhí ini-nè, ni có-cùnì stná-nè natahnù-nè ichì yùhù, te ducán nsida víí anima-nè, ni cachi Dios.

²⁸ Pues vichi cunaha-nsiá, sàni nihítáhvi nèhivi nsidaa gá raza cunini stná-nè razón ndiaha nansa càcu-ne nùù-yá. Te mii-né, ndisa, icúmí-nè cunsihi ini-ne cunini-ne

²⁹ —ni cachi Pablo.

Dandu nècuàchì raza Judea mà, ni caquee nsihi-ne, te ni quesaha-né ndatnúhú fuerte-nè sàhà palabra mà.

Nansa ni quida Pablo na ndiadí-nè vehe-ne ñuu Roma

³⁰ Daaní, inii ùi cuiá nisa ia Pablo iin vehe renta (ñuu mà), te dayáha-ne nsidaa nèhivi sàà nùù-né,

³¹ cachítñuhu-ne xì nècuàchìmà sàhà ichì ñuhiví Ìí xí Dios, vâchi libre iá-nè càhàn-nè xì nsidaa nèhivi mà. Ñâyücàndüá, cuàhà gá ni dàcuàhá-né nècuàchìmà sàhà Stoho-ndà Jesucristu, còò iin ni sadí xì nùù-né.

Tutu Nì Tiaa San Pablo nù Nèhivì xí Dios Ndoó Ñuu Roma

¹ Yùhù nduí Pablo, iin nècuàchì xinúcuáchì nù Jesucristu. Divi mii-yá nì cachi-yá xí ñà-cùhìn chuun xi-ya; mii-yá nì nacàxin-ya yùhù ñà-cachitnùhì razón ndiaha xí Dios inicutu.

² Te divi razón mà nduú stná palabra nì cachitnùhu-ya sàhana na ní dàtnúú-yá ini nècuàchì nì sacahàn cuenta xi-ya, te nì tiaa-ne ñà-yúcán nù tutu ìi.

³⁻⁴ Cunaha-nsiá, cáhàn palabra mà sàhà Dèhemani-yá, te cachá ñà-nduú-yá iin descendencia xí rey David, vèchi iin nècuàchì ñuhivì yohó nì sanduu xii-yá, cachá. Doco (diín lugar nì quixi) anima ìi-yá, vèchi Dèhemani Dios nduú-yá, te icúmí-yá poder, ináhá vâha-nda ñà-jaàn, vèchi mate ní xihì-yá, doco nì natiacu-yá.

⁵ Te divi nù mii-yá sàni ñihitáhvi nsiùhù cacanuun-nsi chuun xi-ya ñà-càhàn-nsi xì nèhivì nsidanicuú ñuu, áma sáá stná-nè cunini-ne ley xi-ya, te cunindisá-néyá, dandu más gà trùñuhu xí-yá quee.

⁶ Te mii-nsiá, ducán nì xinindisá stná-nsiá, vèchi nì cana stná Jesucristu mii-nsiá (ñà-cunchicùn-nsiáyà).

⁷ Te vichi tiaí tutu yohó nù nsidaa mii-nsiá nècuàchì ndoó ñuu Roma. Cunaha-nsiá, ñà-màni guá-nsiá nù Yua-nda Dios, ñàyúcandüá nì cana-yansiá sàhà-ñá cunduu stná-nsiá nèhivì ìi xí-yá.

Te vichi xicàn tàhvi sàhà-nsiá nù mii-yá xì nù Stoho-ndà Jesucristu ñà-nì cuàha-yansiá gracia, te contentu nì cündóó-nsiá quida-ya.

Nansa nì cachi Pablo ñà-cuní-nè cùhùn-nè ñuu Roma nàcòtò-nè nèhivì xí Dios ndoó yucán

⁸ Primeru cuàhìn cachi ñà-yohó: yùhù ndàcùcahín Jesucristu, te naquimání (Yua-nda) Dios sàhà nsidaa-nsiá ñà-ndiaha guá xinindisá-nsiá mii-yá. Te vichi dècuèndè inicutu ñuhivì sàni xinitnùhu-ne sàhájàn.

⁹ Yùhù, xì nsidaa animè xinúcuáchì nù-yá, cachitnùhì razón ndiaha sàhà Dèhemani-yá. Te mii-yá, ináhá-yá ñà-ndáà nduá nsinúú cuàhà ini mii-nsiá, te xicàn tàhvi sàhà-nsiá nù-yá.

¹⁰ Te xicàn tàhvi stnáí áma cóó iin quivì nihí tiempu sàì nàcòtì mii-nsiá, nú ducán cuní stná mii-yá.

¹¹ Vèchi cuàhà gà cuní sàì sàhà-ñá ñihitáhvi gà-nsiá más ñà-ndüá cui chindee xi anima-nsiá, dandu chicá nacuaàhandee ini-nsiá.

¹² Te ò nì cachí-ndá, ñà-cuní-ndá chindee stnaha-nda ñà-chicá cunindisá víi-ndayá, vèchi nsidaa-nda, iin-ni xinindisá-ndáyá.

¹³ Ñáni, cuní cundaà ini-nsiá ñà-cuàhà gà xichi nacánì ini sàì ndé ndoó-nsiá, doco siempre iá ñà-sàdì nù. Doco vichi ndisa, (vihini sàì), vèchi stná ndé ndoó-nsiá cuní quida stnáí chuun ìi xí Dios, nacua sàni quide dava ga ñuu, sàhà-ñá ducán quee stná cuàhà ñà-vàha xi mii-nsiá.

¹⁴ Vèchi ndiá lqué (cachitnùhì razón ndiaha xí-yá) xì nsidanicuú nèhivì, a xinduu-ne nècuàchì ñuu ndé cáhàn-nè dàhàn griegu, te ò ndéni ñuu nì cui, doco icúmí càhìn xì nsidaa-né, a nchichí-nè, te ò mà nchichí-nè.

¹⁵ Ñàyúcandüá, nù yùhù, dispuestu ié` sàì cachitnùhu stnáí xì mii-nsiá nècuàchì Roma ñà-nduú razón ndiaha.

Cahnú poder xì razón ndiaha xí Dios

¹⁶ Yùhù, có-cùcàhán nù cachitnùhì razón ndiaha xí Cristu, vèchi cunaha-nsiá, sàhà palabra jaàn vātūni càcu anima-nda quida poder xi-ya, nú sàni xinindisa-ndayá, mate nècuàchì ndéni ñuu nì cui nì cündúú-ndá. Doco dihna xiñuhu (cunitnùhu) nècuàchì raza Judea, dandu stná nèhivì dava ga ñuu ñuhivì.

¹⁷ Vèchi divi sàhà razón ndiaha ma datúí Dios nansa cui ndee vâha-nda nù-yá nú nì cunindisá vâha-ndayá, vèchi cui-ñi ñà-jaàn nduá ndiaá, nacua cachí stná tutu ìi: "Nú sàni ndee vâha-nda nù-yá ñà-xinindisá-ndáyá, dandu vida ndiaha ñihitáhvi stná-ndà".

Nsidaa nèhivì, iá cuàchì-ne, cachí Pablo

¹⁸ Sàni cundaà ini-nda fuerte icúmí quixi castigu xí Dios diquì nsidaa nèhivì có-quidá víi, vèchi quini quidá-né, te cuehé gà-nè, có-sàha-ne cuitiá palabra ndàcuisi xí-yá,

¹⁹ mate sá-ináhá vâha-ne sàhà ñà-ndüá cui cundaà ini-nda sàhà-yá, vèchi sàni dàtúí-yañá nù-nda.

²⁰ Vèchi dècuèndè nì sàcò ñuhivì nàhà claru ñà-ndüá cui cundaà ini-nda sàhà-yá; mà úhi cundehè-nda nsidaa ñà-ndüá nì quidavâha-ya, te cundaà ini-nda. Nàhà xicà icúmí-yá poder

ndisa nicanicuahàn, te claru cundáá stná ini-ndà ñà-mii-yá nduú-yá Dios. Ñâyùcàndüá, còò ni-iin ñà-disàhà-xí (nacuaà nèhivi-yá).

²¹ Vàchi na nisa inaha-néyà antes, cóni càhvi ndisa-neyà nacua ndiá icà-né, ni cóni náquímànì stná-nèyà. Cuisi ini-ni mii-né ni chitnùnì ndevàha ini-nè nansa quida-ne, mànicùí gá mànihi tnùnì ini-nè nansa quida vìi-né.

²² Ñà-nchichí guà-nè càhàn-né, ñà-yúcán ni tùi-ne nduú-né nècuàchi neciu.

²³ (Te ñà-neciu guà-nè), ni nandodó-né ñà-ndiaha guá iá-yà, te cahan-né iin figura iá nahi nèhivi nduú Dios, mate nèhivi, xíhi-nè, doco mii-yá, itiácú-yá nicanicuahàn. Te ni quidavàha stná-né figura laa, xi stná quisi nahnú, xi quisi cuàti, (te ni cahví-néñà).

²⁴ Ñâyùcàndüá, ni cuhuun ini Dios sàhà-né, te ni cachi-yà ni cùhùn-nè ichì siquini ni nchihò ini-nè. Te ducán ndisa ni quida-ne, (yáha ga quini) ni quida-ne xi iquicúñù-nè, cóni chívàha ga-nè tnùñuhu xí-né.

²⁵ Ni nacuaà dahuun-ne palabra ndàcuisi xí-yá, te ñà-nduú tnùhu ni candisá-né. Màdi mii-yá ana ni quidavàha xi ñuhivì ni càhvi-né; còó, cuisì-ní ñà-ndüá ni quidavàha-ya ñuhivì yohó ni cahví-né; cuisì ñà-jaàn nduá ni xinucuaachi-né nùù-xí, màdi nùù mii-yá ndiaha itíácú nicanicuahàn, amén.

²⁶ Ñâyùcàndüá, ni nacoo dahuun-yanè. Dandu chicá quini ni quida ndevàha-ne xi mii-né. Dècuèndè stná nècuàchi ñahà, cóni nándàhà gá-ña xi nècuàchi tiàa nacua quidá nècuàchi ñahà. Còó, entre mii-ña nisa quida-ña cuàchi.

²⁷ Te ducání stná tiàa, dava ga stná-te, cóni nándàhà gá stná-te xi ñahà. (Ndahví-te), vachi entre mii-té ni naxihò stnahá-te, te ni quida-te cuàchi. Doco sàhà ñà-yúcán ni nihi stná icà-té (cuèhè), vachi ñà-yúcán nduú castigu xi-tè nacua xiñuhu coo xi-té ñà-ni quee-tè ichì váha.

²⁸ Te-ña cóni cudúí gá ini-nè cunihnu ini-nè mii-yá, ñâyùcàndüá, ni nacoo dahuun stná-yànè, te sàhàmà ni cuchicuehe dahuun sàxìnitnùnì-nè. Cuisi ñà-có-ndiá icà-né quida-ne nduá nchìcùn-nè vichi.

²⁹ Vachi chitu anima-nè nsidanuu ñà-chìcuèhè. Ñâyùcàndüá quidá ndevàha-ne cuàchi xi nècuàchi ñahà. Yáha ga có-quidá vìi-né. Xího-né cuàhà iñàha, te cumbidia stná ini-nè. Te túha stná-nè cahni stnahá-né, vachi náà stnahá-né ñà-malu guà-nè, te dana ga stná-nè; dandahví stnahá stná-nè, te càhàn ndiaa stnahá-né,

³⁰ vachi quini ga càhàn-nè diquì ñanitnaha-ne. Có-xiñùhù-né Dios, vachi cuadú gà-nè, mii-né nduú-né mii-né cahan-né. Ndiaha gá-nè cahan-né, doco maña gà-nè. Có-iní-ní-né ñà-ndüá cachí yuadíhí-né.

³¹ Ni có-sàà-nè cundaà vaha ini-nè, te có-quidá stná-nè cumplir nú sàni cachi-nè iñàha. Mà túha-ne cuhi stnahá ini-nè. Nicanicuahàn chuhùn ini-ne sàhà iin ñanitnaha-ne, te mà túha-ne cundehè ndahví stnahá-né.

³² Te mate ináhà vaha-ne ñà-ìcúmì Dios nsidandaà-yà sàhà cuàchi quidá-némà, doco có-ndùlócò-nè, mate ináhà-né ñà-xiñùhù cui-nè sàhà falta mà, doco iin-ni quidá-néà, ndè cudúí gá stná ini-nè nú quidá stná nèhivi dava ga ducán.

2

Palabra xiñuhu cachi-ndà xi ana tuxí ini-xi chicá vaha-ne nùù ñanitnaha-ne

¹ Ñâyùcàndüá, (nú iá iin nèhivi), ndéni nèhivi ni cùndüú-né, te xítñuhu-ne ñanitnaha-ne, dandu vátuni cachi stná-ndà dohó xi-né: “Mii-ní, iá stná cuàchi-ní; ñâyùcàndüá có-xiñùhù cuitñuhu-ní ducán; iá-ní xítñuhu-ní ñanitnaha-ní, doco cunaha-ní, xidá cuàchi stná mii-ní quida-ní, vachi nacua quidá mii-né, ducán quidá stná mii-ní.

² Te sà-ináhà-ndá, palabra ndàcuisi cundua na nsidandaà Dios sàhà cuàchi nèhivi có-quidá víi.

³ Ñâyùcàndüá, ¿a tuxí ini-ní cui càcu-ní nùù castigu mà? (Mà cúí), vachi mate xítñuhu-ní nècuàchi quidá xi cuàchi ma, doco ducán quidá stná mii-ní.

⁴ Cunaha-ní, màni gá quidá Dios xi-ndà, vachi ndee cahnú ini-yà sàhà-ndà. Te ¿a cahìchi ini-ní ñà-quidá-yá ducán? ¿A có-cùndàà ini-ní ñà-ndüá disàhà-xí quidá ndiaha guá-yà ducán? Pues divì sàhà-ña ni sàà-ndà naxicocuñì ini-ndà sàhà cuàchi-nda ndüá.

⁵ Doco (mii-ní, còó), ndee gá ini-ní, có-cùù-ní arrepentìr, ñâyùcàndüá cáyà, te cáyà castigu nihi-ní quivì juiciu, dandu quivì mà icúmì nèhivi cundaà ini-nè cuisì nsidándáà Dios nacua ndiá icà-yá quida-ya,

⁶ te cuàha-yàndó (castigu, ò cuàha-yàndó iin ñà-vàha), según nansa ni quida iin iin-nda.

⁷ Dandu nèhivi iin-ni quida-xi chuun víi, nihi-né vida ndiaha nicanicuahàn, vachi sàhà ñà-ndüá quidá-némà nandúcú-né nansa quee tnùñuhu ndiaha xí-né (nùù-yá), vachi cuní-nè ndee vaha-ne nùù-yá, te cundoo stná-nè nùù-yá nicanicuahàn.

⁸ Doco nèhivi có-nchìcùn palabra ndàcuisi, iin castigu fuerte nihi-né ñà-cùdúchí guá ini-yà sàhà-né, vachi cuisì-ní ni nacani ini-nè quida-ne ñà-nduú gustu xi mii-né.

⁹ Cuahà tnùndoho fuerte cucumi nsidaa nècuàchì có-quidá víi ma, te yáha ga nacani cuaá ini-nè sàhàjàn. Dihna nècuàchì raza Judea ndundaà sàhà-xí, dandu después nsidaa gá nèhivi inga raza.

¹⁰ Doco nèhivi quidá víi ma, ñhì-né cundoo ndiaha-né, vàchi ñhì-né natùì-ne nùù Dios, dandu màni gá cundoo-ne. Dihna nècuàchì raza Judea ñihitáhvi ducán, dandu después nèhivi raza dava ga”.

¹¹ Pues ducán nduá, vàchi cunaha-nsiá, iin-ni indéhe Dios nsidanicuú nèhivi ñuhivi.

¹² Nèhivi tàcùni ley xi-ya, nú quida-ne cuàchi, dandu icúmi-nè ndañuhu-né, te quivi cuu xi-né ducán, mà chindéé ley mà-né. Daaní stná nèhivi ináhá vaha ley xi-ya, divi nacua cachí ley mà, ducán icúmi cuu xi-né quivi ndundaà sàhà-né.

¹³ Vàchi nú ni quidá ndisa nèhivi cumplir ley xi-ya, dandu vátùni ndee vaha-ne nùù-yá. Doco nú cuisì iníni uun-neà, dandu mà cundiámà.

¹⁴ Vàchi dava nèhivi, tàcùni-nè ley xi-ya, doco tùha-ne quida-ne cumplir ñà-nduá cachá, vàchi ini-ni mii-né nacáni ini-nè quida-ne ducán. Ñàyücànduá, divi ñà-jaàn cunduu na iin ley xi-ne.

¹⁵ Vàchi cuisì ñà-cundehè-ndané nansa quidá-né, te cundaà ini-ndà ñà-ini anima-nè sànihi ini-nè nansa iá ley xi-ya. Ináhá vaha-ne iá iin ley chivàha-nda. Te stná sàxinítnùni-nè, ducáni cachí stná` xi-né. Vàchi dava xichi dandohó sàxinítnùni-ndà ndohó, te dava xichi cachá` xi-ndà ñà-còò cuàchi-nda.

¹⁶ (Pues cunaha-nsiá, nsidaa ñà-jaàn, claru icúmiá tùia) quivi nsidandaà Yua-nda Dios sàhà nsidaa ñà-íá dehè ini anima nèhivi. Te divi ndahà Jesucristu icúmi-yá nacooyá juiciu mà, nacua cachí razón ndiaha cachítnùhi xi nèhivi.

Nansa ni quida nècuàchì raza Judea, cóni chivàha stná-nè ley xi-ya

¹⁷ (Vichi cuàhìn càhìn sàhà) nèhivi raza-nsi. Nècuàchì raza Judea nduá danani nèhivi raza-nsi. Te cuahà nèhivi raza mà, yáha ga ñihnú ndéé ini-nè ñà-icúmi-nè ley ì xí Dios; ñàyücànduá chicá ndiaá-nè cahan-né, vàchi mii-yá càhvi-né,

¹⁸ te ináhá-nè ñà-nduá dandacu-yá quida-nda. Te sàhà-ñà dàcuahá cuahà-né ley ì mà, ñàyücànduá cundáà ini-nè indù inàha nduú chuun vii, te indù ñà-còò.

¹⁹ Sàhámà quidá-né cuenta ñà-mii-né icúmi nacani xi nsidaa nèhivi nansa iá ichi vaha cahan-né; xiñuhu danátnùù ini-nè nsidaa nècuàchì xicá ichi ñáa, tuxí ini-nè.

²⁰ Cuisi mii-né cui dacundéhe xi tè-neciu iin ichi víi, vàchi maestro nduú-né cahan-né. Nahí meé có-ináhá xinduu nècuàchì dava ga, cahan-né, te ñàyücànduá, cuní-nè chinaha-nè nècuàchimà, vàchi tuxí ini-nè ñà-sàhà ley dacuahá-né mà vátùni mànihi ini-nè nsidanicuú inàha, te cundaà stná ini-nè sàhà nsidaa ñà-nduú ñà-ndáa.

²¹ Pues vichi, nú ducán cudíi guá ini-nè dacuahá-né nèhivi dava ga, ¿a có-xiñùhù dacuahá stná-nè mii-né? Vàchi cachí-nè xi nèhivi ñà-màsà quidá cuihná-né, doco ¿a ndísá có-xidá cuihná stná mii-né?

²² Te cachí stná-nè xi nèhivi ñà-màsà càhàn-nè xi inga nèhivi cóni nándàhà xi-né, doco ¿a ndísá có-quidá stná-nè ducán? Cahíchi ini-nè ñà-nduú yùù yóco, doco ¿a có-xidá cuihná stná-nè ñà-cuicà iá veheñuhu?

²³ Ndee càhàn-nè sàhà-ñà sà-icúmi-nè ley ì xí Dios, doco có-chivàha ndisa-neà, te cuní cachàmà na ian cahíchi ini-nè mii-yá nduá.

²⁴ Pues, divi ducán cachí stná tutu ì ndé cachá: “Sàhà modo ndahví xi nècuàchì raza-nda, ñàyücànduá sácúndiaa quini tè-inga raza Dios xi-nda”.

²⁵ Cunaha-nsiá, ñà-itúú seña xi-ya icà-nda, vátùni cundiaa mà nú chivàha ndisa-nda ley xi-ya; doco nú cóò, dandu davani queámà na ian cóò ni-iin seña mà icà-nda.

²⁶ Ñàyücànduá, nècuàchì (inga raza) cóò seña icà-xí, nú ni chivàha-ne ley xi-ya, dandu vátùni quida stná-nda cuenta na ian itúú ndisa seña mà icà-né.

²⁷ Cunaha-nsiá, mate cóò seña mà icà-né, te chivàha stná-nè ley mà, ñà-jaàn datúì claru ñà-có-quidá víi nècuàchì raza-nsi Judea, vàchi có-chivàha-ne ley mà, mate icúmi-nè tutu ì, te itúú stná seña mà icà-né.

²⁸ Ñàyücànduá, ¿ana cachi-nda nduú ndisa nècuàchì raza Judea? ¿a sàhà descendencia xi-ne nduá? Cóò. Te ñà-itúú seña xi Dios, ¿a cuisì sàhà icà-nda nduájàn? Cóò.

²⁹ Chuun xi anima-nda nduá, te ini anima-nda nduú ndisa-nda nècuàchì raza Judea. Te ducáni stná ñà-dúcùn-nda seña xi-ya, cuisì ini anima-nda nduú ñà-ndiáa. Iin ñà-ñihnú vaha ini-nda nduá, màdi iin ley ni tiaa nùù tutu. Te nú iá (vii ndisa) anima-nda ducán, dandu icúmi-nda ndee vaha-nda, doco nùù Dios, màdi nùù nèhivi.

3

¹ Nú ducán nduá, dandu ¿indù chuun cachí-nda ndiaha gá iá ñà-nduú-nda nèhivi raza Judea, te itúú seña xi Dios icà-nda?

² Pues cuàhà gá ventaja nduá, te cuàhà modo chindéa. Primeru, cuàhà gá nduá ñà-ni nihitáhvì nêhivì raza mà cucumi-né tutu ìì cachítnùhu palabra xi-ya.

³ Vâchi mate có-xiníndísâ dava-ne, doco có-cùni cachàmà ñà-nacuaà Dios ñà-nduá ni cachi-yâ.

⁴ Còò, vâchi mate nsidaa nêhivì, tnuhu-né, doco mii-yâ, icúmí-yâ quida ndisa-ya cumplir ñà-nduá ni cachi-yâ. Te ducán cachí stná nù tutu ìì (ndé cáhàn nêhivì xi-yâ, cachí-nè): “Claru icúmí tui ñà-cuisi mii-ní cachí xi ñà-nduú ñà-ndáà, te nú daquéé cuàchi nêhivì diquì-ní, dandu divi mii-ní icúmí-ní cundee-ní nù-né”.

⁵⁻⁶ Mate chicá nâhà claru ndiaha gá iá Dios (na xiní-ndâ ñà-quini guá quidá nêhivì cuàchi), doco ¿a sâhámâ cui cachi stná-ndâ ñà-có-quidá ví-yâ na sâha-yândó castigu sâhâ cuàchi-nda? Còò, màsâ nunca cachi-ndâ ducán. Cuisi ni cachi palabra jaàn sâhâ-ñâ divi ducán (tuxí ini dava) nêhivì. Doco còò, mà cúí cachi ndisa-nda ducán, vâchi nú ducán ni cundúâ, mà cúí nihì Dios nansa nsidandaà-yâ sâhâ cuàchi-nda ni cúí.

⁷ Doco cachí dava nêhivì ñà-chicá quee tñùñuhu xí Dios nú ni cachí-nè iin tñùhu, vâchi tuxí ini-nè ñà-sâhâjàn chicá nsinuu ini-ndâ ndâà cuisì ini Dios. Doco nú ducan ni cundúâ ñà-quee tñùñuhu xí-yâ sâhâ cuàchi-nda, dandu có-ndiâ icà-yâ nsidandaà-yâ sâhâ cuàchi-nda ni cúí.

⁸ Te nú ducán nduú stná, ¿amâdi chicá ndiaha ñà-quida cuahâ-ndâ ñà-có-ndiââ, dandu chicá quee víâ ni cúí? (Doco còò, màsâ cáchí-ndâ ducán, mate) cachí dava nêhivì ñà-divi ducán chináhâ nsiùhù, daquéé cuàchi-ne diquì-nsí. Doco nêcuàchímâ, icúmí-nè ndoho-nè sâhâ (ñà-dâquéé cuàchi-ne ducán), vâchi divi nduá xiñùhu coo xi-né.

Nsidanicuú nêhivì, iá cuàchi-ne

⁹ Pues, ¿índù ñà-cachi-ndâ vichì? ¿A ndísâ chicá ndiaha nêcuàchì (raza Judea)? Còò, vâchi sàni cundaà vâha ini-ndâ, nêhivì cuàchi nduú nsidanicuu-nda, nahì nêhivì inga raza, te ducán stná nêcuàchì raza-nsi Judea.

¹⁰ Vâchi ducán cachí stná nù tutu ìì:
Còò ni-iin ana nihnú ndâcuisi ini-xi;

¹¹ còò ni-iin ana sââ cundaà ini-xi, còò ni-iin nandúcú ndisa nansa iá ichì Dios.

¹² Nsidaa nêhivì, sàni tucù-nè ichì malu; nsidaa-né sàni cuchicuehe anima-nè. Ni-iin-ne có-quidá víi-né.

¹³ Te (ñà-quini guá) cáhàn-nè, ducán nduá nahì dico ndé ni nuna yavi xi nsii. Te túha ga stná-nè dandahví stnahâ-né. Ducán iá palabra xi-ne nahì venenu xi iin còò dàná.

¹⁴ Cuàhâ gá xicàn tàhvì chihán-nè diquì ñanitnaha-ne, te cáhàn ndiâa stná-nè diquì nêcuàchímâ.

¹⁵ Yâchì gâ nacání ini-nè cahni stnahâ-né.

¹⁶ Te ndéni ni cui ni yâha-ne, yucán xiní nêhivì tñùndoho.

¹⁷ Vâchi mà túha-ne cunchicùn-nè ichì ndé cundoo maní-ndâ.

¹⁸ Te có-yúhí stná-nè Dios, vâchi có-nihnú ini-nèyâ.

¹⁹ Pues ináhâ-ndâ, nsidaa ñà-nduá cachí ley sâhana ma, sâhâ-ñâ cunini nêhivì ndoó tixi ley mà nduá, te ducán (nducahan-ne), te cadì-nè yuhù-né, vâchi iá stná cuàchi-ne, nacua iá cuàchi nsidanicuú nêhivì ñùhiví.

²⁰ Ñâyúcânduá, ni-iin-nda mà sââ-ndâ ndee vâha-nda nù Dios sâhâ cuisì ñà-chivâha-nda ley sâhana ma, vâchi chuun quidá ley mà, cuisì nduá ñà-cundaà ini-ndâ iá ndisa cuàchi-nda.

Nú xiníndísâ-ndâ mii-yâ, icúmí càcu anima-ndâ

²¹ Doco vichì cunaha-nsiâ, iá ndisa nansa ndee vâha-nda nù-yâ, te còò ni-iin ley chivâha-nda sâhámâ. Mà úhì cundaà stná ini-ndâ ñà-jaàn nú ni cahvi-nda tutu nduú ley xi-ya, xi stná tutu ni tiaa nêcuàchì profeta.

²²⁻²³ Vâchi nú sàni xinindisa-nda Jesucristu, dandu icúmí-ndâ ndee vâha-nda nù-yâ, nsidanicuú ndohó nêcuàchì nchícùn xi-yâ. Vâchi iin-ni indéhe Dios nsidaa nêhivì sâhâ ñà-iin-ni iá cuàchi nsidaa-né, te iin-ni có-sââ stná-nè tavâ-né tñùñuhu xí-yâ.

²⁴ Doco sâhâ-ñâ ni dànáâ Jesucristu sâhâ-ndâ, ñâyúcânduá uun-ni sâhatahvi-yândó gracia xi-ya, te sâhâjàn vâtùni ndee vâha-nda nù-yâ, te càcu dahuun anima-ndâ.

²⁵ Vâchi ni chitnùmi ini Yua-nda Dios ñà-cunduu Jesucristu ana icúmí cui, te cuitiâ nù-yâ, dandu nsidaa ana cahvi xi ñà-nduá ni quida-ya, mà nsínúú gá ini (Yua-nda) Dios sâhâ cuàchi-ne. Te sâhâjàn cundaà stná ini nêhivì ñà-vâtùni ni quida-ya xi nêhivì sâhana na ní dàyâha uun-ya cuàchi-ne, te ni quidandee gá ini-yâ sâhâ-né.

²⁶ Daaní, inga ñà-dísâhâ-xí ni xihì-yâ nduú stná ñà-cundaà ini nêhivì ñà-ndiaha gá quidá stná-yâ tiempu vichì. Te mate ñà-ndââ cuisì cundua na nsidandaà-yâ sâhâ-ndâ, doco nú cahvi-nda xi Jesús, dandu vâtùni ndenihi-yândó na ian nduu-nda nêhivì còò falta xi.

²⁷ Daaní, nú ducán nduá, dandu ¿nansa cachi-ndà sàhà nèhivì ndeníhì vaha guá xì mii-xí? Pues, có-nduá ñà-cachi gà-nè ducán. ¿Índù chuun? ¿A sàhà-ñà cóni chivàha vii-né ley ì? Còó, divi sàhà-ñà mà cundiaá gà ni-ñàha nùu-yá, cuisì ñà-cunihnu vaha ini-ndáyà.

²⁸ Ñàyùcànduá, vichi sàni cundaà ini-ndà nansa quida-nda, te ndee vaha-nda nùu-yá. Divi ñà-cunihnu vaha ini-ndà mii-yá nduá xiñuhu, màdi ñà-chivàha-nda ley (sàhana ma).

²⁹ ¿A cuisì Dios xi nèhivì raza Judea nduú-yá? (Còó.) ¿A có-nduú stnà-yà Dios xi nsidaa gà nèhivì ñuhivì? Jaan, vachi Dios xi stnà mii-né nduú-yá.

³⁰ Vachi imindaa Dios iá, te vátuni ndee vaha nsidaa nèhivì nùu-yá nú ni cúnindisá-néyà, có-quidá a nduú-né nècuàchi raza Judea, te ò nèhivì inga raza.

³¹ Doco nú cachí-ndà cuisì cundiaa ñà-cunihnu vaha ini-ndáyà, dandu ¿a ducán queá na ian có-ndiáá gà ley ni sàha-ya? Còó, màdi ducán nduá. Dècuèndè chicá más icúmi cundiaa ley mà, nú ducán.

4

Nansa ni quida Abraham sàhana

¹ Doco ¿nansa cachi-ndà sàhà xii-ndà Abraham sàhana? ¿Nansa iá ñà-nduá ni nihitáhvi-né?

² Pues nú sàhà obra xi mii-né ni nihì-né ndee vaha-ne nùu Dios ni cùí, dandu vihini ndenihì ndiaha-né mii-né sàhàjàn, doco nùu mii-yá, còó, mà cùí.

³ Doco ¿nansa cachí tutu ì sàhà-né? Dohó cachá: “Ñà-ni xinindisá Abraham Dios, ñàyùcànduá ni nihì-né ni ndee vaha-ne nùu-yá”, cachá.

⁴ Pues, ni cachí-ndà iá iin ana quidáchúün nùu-ndà. ¿A cutàhvi-né ñà-nduú raya xi-ne? Còó, vachi ñà-ñihíca-ndà nùu-né nduá.

⁵ Doco (tucu iá xi ichi Dios), vachi mate còó obra ni quida-nda, doco nú xinindisá-ndà mii-yá, dandu vátuni quida-ya cuenta vaha ndisa-nda. Vachi nùu mii-yá iá nansa ndenihì vaha-yàndó, mate nèhivì cuàchi nduu-nda.

⁶ Daaní, ducán stnà David sàhana, ni cachi-né ñà-ndiaha guá iá xì nèhivì nihitáhvi ndee vaha nùu-yá mate còó obra xi-ne.

⁷ Ñà-yòhó nduá ni cachi David mà:

Nansicáhán nèhivì nú sàni xicahnú ini Stoho-ndà Dios sàhà falta xi-ne, te sàni cuxio cuàchi-ne.

⁸ Nansicáhán-nè nú có-ìtníí gà-yà cuenta sàhà cuàchi-ne.

⁹ Pues vichi, nú ducán nduá, ¿a vátuni nihitáhvi stnà nècuàchi nsidanicuú raza, te ò cuisì nèhivì iá seña xi-ya icà-xí? Pues iin casu mà nduú stnà Abraham yucán. Sàni cachi-ndà ni ndee vaha-ne nùu-yá sàhà cuisì-ñà ni xinindisá-né mii-yá.

¹⁰ Doco ¿índù ñà-disàhà-xí ni ndee vaha-ne nùu-yá? ¿A sàhà ñà-ìtúú seña mà icà-né? Còó, vachi tàyôo ñà-jaàn (na ní ndee vaha-ne nùu-yá).

¹¹ Dècuèndè después, dandu ni sàcùnaha-né ñà-màcùtuu seña mà, te cunduamà iin ñà-cundaà ini-ndà sàni ndee vaha ndisa-ne nùu-yá sàhà-ñà ni xinindisá-né mii-yá. Vachi tàñáha ga màcùtuu seña mà icà-né, te sàxinindisá-néyà. Te sàhà-ñà ni quida-ne ducán, ñàyùcànduá ndohó, quidá stnà-ndà cuenta na ian nduú stnà-né yua nsidaa nècuàchi xinindisá-xí-yá, mate còó ni-iin seña mà icà-né, doco xinindisá-né, te ducán ndee vaha stnà-né nùu-yá.

¹² Daaní, stnà nècuàchi iá seña mà icà-xí, yua stnà mii-né nduú stnà nècuàchimà. Doco màdi cuisì sàhà seña mà nduú nècuàchimà yua-né. Còó; sàhà-ñà ni xinindisá stnà-né mii-yá nduú stnà mà, vachi davani ni quida stnà-né nacua ni quida nècuàchimà na tàyôo seña mà icà-né.

Cuàhà ñà-ndiaha ñi ni quida Dios comprometer; doco cuisì-ni nèhivì xinindisá nihitáhvi xán

¹³ Sàhana ni quida stnà Dios comprometer xi Abraham mà ñà-nihitáhvi-né cucumi-né ñuhivì yohó, mii-né xi descendencia xi-ne. Doco ñà-yúcán ni sanduu sàhà-ñà ni xinindisá-né mii-yá, te ducán ni ndee vaha-ne nùu-yá, màdi sàhà iin estilu ni chivàha-ne.

¹⁴ Vachi nú cuisì ana chivàha xi estilu sàhana nihitáhvi, dandu mà cundiaá gà ñà-xinindisá-ndáyà, ni mà nihitáhvi gà stnà-ndà ñà-ndiaha ñi ni quida-ya comprometer.

¹⁵ Vachi nú sàhà ley sàhana ni cundúá, dandu cuisì ñà-ndoho-nda cunduú stnà. Doco nú cóó ni-iin ley, dandu còó stnà necesidad cutnii-ya cuenta sàhà cuàchi-nda.

¹⁶ Sàhà ñà-jaàn cuisì ñà-cunihnu vaha ini-ndà mii-yá nduú ñà-ndiáá, vachi modo jaàn vátuni dacùtáhvi stnà-yàndó gracia xi-ya, te ducán nihitáhvi stnà nsidanicuú ana nduú descendencia xi Abraham, nahì nèhivì nchícùn ley sàhana, te ducán stnà ndohó ana xinindisá nahì Abraham mà. Vachi ducán cui quida stnà-ndà cuenta ñà-nduú stnà nècuàchimà xii nsidanicuú-nda.

¹⁷ Pues ducán nì cachi stná Dios nùu tutu ì (na ní càhàn-yà xì-né), cachi-yà: “Cuàhà gá descendencia xi-ní cundoo; cuàhà ñuu cunduu-ne”. Ñàyùcàndùá, xii-ndà nduú stná Abraham mà nùu Dios. Vàchi nì xinindisá vaha-ne mii-yá, divi mii-yá tùha danátiácú xì nsii, te cuisì càhàn-yà, te màcòo ndéni iñàha nì cui, mate antes tàyoó nì-ian.

¹⁸ Te Abraham mà, mate còo tnùndé ini xi-ne (cahan-nda), doco iin-ni nì xinindisá-né mii-yá, niñnú ini-né íá ndisa tnùndé ini coo iin dèhe-ne, te nducuahà descendencia xi-ne, te sàà-né cunduu-ne cuàhà raza, nacua nì cachi Dios xì-né.

¹⁹ Iin-ni nì xinindisá-né ducán, mate ináhá-né yáha ga sàsàhnù-né. Vàchi sà-itúú xinu-ne 100 cuà, te ináhá stná-né ñà-mà cui gá coo dèhe (ñahàdihì-né) Sara.

²⁰ Doco nì xinindisá vaha-ne ñà-nduá nì cachi Dios xì-né, cóni ía-ne xì duda, vachi iin-ni niñnú ndàcuisi ini-né mii-yá; te nì naquimani stná-nèyà,

²¹ vachi nì xinindisá-né ñà-vàtùni quida ndisa-ya cumplir ñà-nduá nì cachi-yà xì-né.

²²⁻²³ Te sàhà ñà-niñnú ini-né ducán, ñàyùcàndùá nì ndee vaha-ne nùu-yá.

Divi ñà-jaàn nduá cachi stná tutu ì, doco màdi cuisì sàhà Abraham càhàn palabra mà.

²⁴ Còo, sàhà stná ndohó càhàn, vachi stná ndohó, vātùni ndee vaha stná-ndà nùu-yá nù nì cúnìñnú vaha stná ini-ndà mii-yá ana nì danátiácú xì Stoho-ndà Jesús, (divi Yua-nda Dios).

²⁵ Vachi mii-yá nduú ana nì chitnùnì ini-xì ñà-cui Jesús sàhà cuàchi-nda, te después natiacu-yà sàhà-ñá niñi-ndà nanduu-nda nèhivì vaha nùu-yá.

5

Nansa íá ñà-ndiaha ù niñtáhvi-ndà nú sàni ndee vaha-nda nùu Dios

¹ Vichi ndisa sàni ndee vaha-nda nùu-yá ñà-sàni xinindisa-ndayá. Ñàyùcàndùá, ndiaha gá sàndòo-ndà nùu-yá nì quida Stoho-ndà Jesucristu.

² Te sàhà ñà-niñnú ini-ndà mii-yá ducán, ñà-jaàn nì cundiatú cuàhà anima-ndà, vachi (nsiquivì) niñi-ndà gracia xi-ya, te cudíi gá stná ini-ndà ndiatu-nda sàà quivì cundoo-nda xi-yá gloria xi-ya.

³ Doco màdi sàhà cuisì ñà-jaàn cudíi ini-ndà. Còo, vachi cudíi stná ini-ndà nú icúmì-ndà yaha-nda tnùndohò, vachi sàhàjàn cutùha-nda quidandee ini-ndà.

⁴ Daaní, nú sàvātùni quidandee ini-ndà, dandu ñà-cudíi ini Dios sàhà-ndà queamà; daaní, nú ducán, dandu chicá sàà-ndà cunaha-nda íá ndisa consuelu xi-nda nùu-yá.

⁵ Te nú ducán niñnú ndisa ini-ndà, dandu seguru niñi-ndà consuelu mà, mà dándàhvì-yàndò. Vachi sàni sàhatahvì-yàndò Espíritu ì xì-yá, te divi Espíritu ì nduú ana chináhà xì-ndà ñà-cuàhà guá cuú ini Dios sàhà-ndà.

⁶ Vachi ndohó, na táñàha ga cucumi-nda ni-íñàha chindee xi-nda, dandu meru hora vaha ma nì xihì Cristu sàhà-ndà, mate nècuàchì có-quidá víi nduu-nda.

⁷ Vachi iin nèhivì ñuhivì, ùhì candisá-né cui-né sàhà iin ñanitnaha-ne, mate nèhivì vaha nì cundúu nècuàchimà. Doco vihini coo iin tiàa cuàhandee ini-xì cui sàhà inga nèhivì nú vaha ndisa ini nècuàchimà.

⁸ Doco Cristu, mate íá va cuàhà cuàchi-nda, nì sàha-ya nì xihì-yà cuenta xi-nda. Sàhà ñà-jaàn vātùni cundaà ini-ndà cuú ndisa ini Dios sàhà-ndà.

⁹ Te vichi sàni ndee vaha-nda nùu-yá ñà-nì xihì-yà ducán, te nì xitià nùu-yá. Ñàyùcàndùá, vichi, chicá más icúmì-yá dacácu-ya anima-ndà nùu castigu xi-nda, vachi ñà-sàni ndòo vaha-nda nùu-yá nduá.

¹⁰ Vachi antes, na ían xinì ùhì-ndáyá nì sandua, doco sàhà ñà-nì xihì Dèhemanì-yá sàhà-ndà, ñàyùcàndùá nì nàcúndoo vaha-nda nùu-yá. Te nú ducán nduá vichi, dandu chicá mà ùhì càcu dahuun-nda nùu-yá, vachi sàni natiacu Dèhemanì-yá, te itíácú-yá.

¹¹ Te yáha ga cudíi stná ini-ndà sàhà-yá vichi, vachi sacahvi-ndayá ñà-nì chindee Stoho-ndà Jesucristu ndohó, te nì niñi anima-ndà nì nàcúndoo vaha xi-yá.

Nansa nì quida Adán, xì nansa nì quida Cristu

¹² Cunaha-nsiá, sàhà ñà-nì quida imindaa tiàa Adán, ñà-jaàn nduá nì sàcòo cuàchi ñuhivì. Daaní, sàhà stná cuàchì nì quida-ne mà, ñàyùcàndùá nì xihì-né, te nì quesaha xihì stná nsidaa gá nèhivì nchícun gá, vachi nì quida stná-né falta.

¹³ Vachi (tiempu yucán), mate tàyoó ley xi Dios nùu nèhivì ñuhivì, doco divi cuàchi nduá nisa quida-ne. Ñà-ndáa nduá, có-itnífì Dios cuenta sàhà cuàchi-nda nú còo nì-iin ley.

¹⁴ Doco dècuèndè tiempu xi Adán xì dècuèndè tiempu xi Moisés, iin-ni nì xihì stná nsidaa nèhivì, mate có-ndúdává cuàchi nì quida-né xì cuàchi nì quida Adán mà.

Te Adán mà, mate iyuhu ndudává chuun nì quida-ne xì chuun nì quida Jesús na ní quesaa-yá ñuhivì,

¹⁵ doco có-ndúdává cuàhà-ñá. Vachi tnùmani niñi-ndà nùu mii-yá, tucu íá nùu ñá-nduá nì quida Adán, vachi sàhà cuàchi nì quida imindaa nècuàchimà, cuàhà sàstnùhù nèhivì nì

quesaha xihì. Doco iá stná imindaa ana nì nanduu tiàa nì quida chicá ndiaha, divi nduú Jesucristu, vâchi sâhà gracia xi-ya nì sâhatahvi-yâ cuâhâ nêhivi tnùmani ndiaha xî-yâ, te câyâ câyâ gracia mà nùu-ndâ.

¹⁶ Te ñâ-ndüâ nì cuu na ní quida mindaa tiàa ma cuâchi, có-ndüdávâ stná xî ñâ-ndüâ nì cuu na ní sâhatahvi Dios ndohó, vâchi cuisì imindaa cuâchi nì sandua, doco icúmí nêhivi ndoho-ne. Te vichi, mate cuâhâ cuâchi-nda iá, doco ndiaha gâ sâni nihitâhvi-ndâ nùu-yâ, te ndeé vâha-nda nùu-yâ.

¹⁷ Doco (tiempu xî Adán mà) nì quesaha xihì nêhivi; fuerza nisa xihì-nè sâhâ ñâ-ndüâ nì quida mindaa nècuâchimâ. Doco nú sâhâ imindaa-nè nì cuu xî nêhivi ducán, dandu nâhâ xicâ chicá ndiaâ ñâ-ndüâ nì quida imindaa Jesucristu, vâchi sâhâ mii-yâ vâtùni nihì-ndâ vihi gracia; nihì-ndâ tnùmani xî-ndâ ñâ-ndee vâha-nda nùu-yâ, te ducán seguru cundee-nda (nùu ñâ-có-ndiââ), te cutiacu ndiaha-nda quida-ya.

¹⁸ Ñâyücândüâ, nacua nì ia imindaa ana nì quida xî iin falta sâna, te ducán nì quixi tnùndoho nùu nsidaa nêhivi, pues ducán iá stná xî obra vâha nì quida imindaa mii-yâ; sâhâ obra mà vâtùni nihì nsidaa nêhivi ndee vâha-ne nùu-yâ, dandu cutiacu ndiaha-nè.

¹⁹ Imindaa nêhivi sâna cóni ínini xî-yâ, ñâyücândüâ, nì nanduu nsidaa descendencia xi-ne nêhivi cuâchi. Te ducán stná (Jesús), imindaa mii-yâ nì sanini vii xî (ñâ-ndüâ cachí Dios), te ducán nì nihì cuâhâ stná-ndâ nanduu-nda nêhivi nihnú ndâcuisì inì-xi.

²⁰ Nì sâhâ Dios ley xi-ya sâhâ (ñâ-cunahâ claru) cuâhâ cuâchi quidâ nêhivi. Te ndisa, cuâhâ gâ nì cucuahâ cuâchi-ne, doco cunaha-nsiâ, divi sâhâmâ chicá más sâni sâhatahvi Dios vihi gâ gracia xi-ya.

²¹ Ducán quidâ-yâ sâhâ-ñâ cui cundee gracia mà, vâchi antes na ian nì cundee cuâchi nùu nêhivi, te nì xihì-nè. Doco vichi icúmí cundee stná gracia xi-ya, dandu nanduu-nda nêhivi nihnú ndâcuisì inì-xi, te cutiacu-nda nicanicuahân. Te Stoho-ndâ Jesucristu nduú ana quidâ-xi nsidaâjân.

6

Nansa cundee-nda nùu cuâchi-nda, te nihì-ndâ quida vii-ndâ nacua cuní Jesucristu

¹ Nú ducán nduá, dandu ¿nansa cachi-ndâ? ¿A chicá vâha quida ga-ndâ más cuâchi sâhâ-ñâ nihì gâ-ndâ más gracia?

² Còó, mà váha, vâchi ¿nansa cui quida ga-ndâ ducán, nú na ian sâni xihì-ndâ nùâjân nduá? Còó nì-iin ñâ-disâhâ-xí quida ga-ndâ ducán.

³ Amâdi sâ-inâhá-nsiâ nansa nì cuu na ní cuhii-ndâ, nì sacatnahâ anima-ndâ xî anima Cristu. Pues nú ducan, dandu sâhâ ñâ-jaân xiñuhu quida stná-ndâ cuenta na ian nì xihì stná-ndâ na ní xihì mii-yâ,

⁴ te na ian nì cutnahâ stná-ndâ xî-yâ na ní ndùxin-ya. Ñâyücândüâ, ducán queâ na ian nì xihì stná-ndâ. Daani, ñâ-nì natiacu-yâ nì quida poder ndiaha xî Yuamán-yâ, divi ducán stná-ndâ, sâni nihì stná-ndâ iin vida saa nùu-yâ.

⁵ Cunaha-nsiâ, nú (ducán quida-nda cuenta) na ian iin-nì nì xihì stná-ndâ xî mii-yâ, dandu seguru icúmí sâ stná-ndâ natiacu-ndâ nahi mii-yâ.

⁶ Te inâhá stná-ndâ, nú nihnú inì-ndâ nì xihì-ndâ xî-yâ nchica cruz, dandu sâni cuxio stná sâxinítnùni nì sa-icumi-nda antes. Ducan quida-nda sâhâ-ñâ màsâ nihì gâ cuâchi-nda cundee nùu-ndâ, nì màsâ dándácú gâ stná-mâ nùu-ndâ.

⁷ Vâchi nú na ian sâni xihì-ndâ nduá, dandu mà cúí dandacú gâ cuâchi-nda nùu-ndâ ñâ-quida-ndañâ.

⁸ Ñâyücândüâ, nú (quida-nda cuenta) sâni xihì stná-ndâ xî mii-yâ, dandu xiníndísâ stná-ndâ icúmí-ndâ cutiacu-nda cundoo-nda xi-yâ.

⁹ Inâhá-ndâ nì xihì-yâ, doco vichi sâni natiacu-yâ. Te mà nunca sâà gâ-yâ cui-yâ. Còó gâ nansa cui-yâ.

¹⁰ Te na ní xihì-yâ, iin xichi-nì nì xihì-yâ sâhâ cuâchi-nda. Doco vichi ñâ-sâni natiacu-yâ nduá, te itiacú (ndiaha-yâ), iá-yâ nùu Yua-nda Dios nicanicuahân.

¹¹ Te ducán stná ndohó, xiñuhu cunihnu ini-ndâ na ian sâni xihì stná-ndâ sâhâ-ñâ màsâ quidâ gâ-ndâ cuâchi. Te nì cúnihnú stná ini-ndâ itiacú ndisa-nda nùu Dios quidâ Stoho-ndâ Jesucristu.

¹² Ñâyücândüâ, mientras itiacú-ndâ xî iquicúñú-ndâ ñuhiví yohó, màsâ cuâha-nda cundee cuâchi-nda nùu-ndâ ñâ-quida-nda ndéni cuâchi quini nì cui.

¹³ Màsâ cuâha-nda quida-nda nì-iin cuâchi, nì ndahâ-ndâ, nì sâhâ-ndâ, nì-iin xaan xi-nda. Còó, vâchi có-queé víamâ. Xiñuhu quida-nda cuenta na ian sâni natiacu-ndâ, te vichi nì dáyâha-nda mii-nda ndahâ Dios. Cuisi mii-ní-yâ nì cuâha-nda cuichuun-xi-nda, dandu cuisì ñâ-vâha cunduu ñâ-quida-nda.

¹⁴ Vàchi mà dándacû gá cuàchi-nda nùù-ndà, vâchi màdi ley sànahà nduá nchìcùn-nda vichi, cuisì gracia xi-ya nduá nihnú ini-ndà.

Iin ejemplu nacání nansa nisa ia xi-nda na táñaha ga cunucuachi-nda nùù Dios

¹⁵ Doco nú cuisì gracia xi-ya nduá nihnú ini-ndà, ¿a libre íá-ndà quida ndevàha-nda cuàchi sàhà-ñá còò gá ley sànahà ma nùù-ndà? Còò, mà nunca.

¹⁶ Vâchi sà-ináhà-nsiá nansa íá na sàà-ndà ndahà iin lamú, pues divi peón xi temà icúmí-ndà cunduu-nda, te cunucuachi-nda nùù-té. Te ducání íá stná xi anima-ndà, vâchi nú ni quida-nda cuàchi, dandu ndahà ñà-jaàn íá-ndà, te ducán icúmí-ndà sàà-ndà cui-ndà. Doco nú Dios xinúcuáchi-ndà nùù-xí, dandu sàà-ndà cunihu ndàcuisi ini-ndà.

¹⁷ Antes lamú xi-nsia nì sanduu cuàchi-nsia, doco ansivéhé Dios, xi nsidaa voluntad xi-nsia nì xinindisá-nsiá dàñùhù nì sàcùnaha-nsiá.

¹⁸ Te vichi sàni quee-nsia libre nùù cuàchi-nsia; cuisì ñà-íá vii xinúcuáchi-nsiá nùù-xí.

¹⁹ Pues ejemplu mà nacání xi-nsiá sàhà (peón quidáchuùn) ñuhívi yohó, vâchi cuahà xichi ùhi cundaà ini-ndà. Nâyùcándúá, dohó cachí xi-nsiá: nacua nisa cudii guá ini-nsia cunchicùn-nsiá ñà-íá siquini, te yáha ga nisa quida ndevàha-nsia, pues vichi xiñuhu cudii stná ini-nsia cunchicùn-nsiá cuisì chuun íá vii, dandu nihí-nsiá cunduu-nsia nêhivi ìi xí-yá.

²⁰ Vâchi cunaha-nsiá, na nisa ndoo-nsia nùù ndahà cuàchi-nsia, cóni sá-íníni-nsiá ley xi ichi víi.

²¹ Doco còò ni-íñàha ni nihí-nsiá nùù inga ichi mà, vâchi cuisì-ní ñà-dandáñuhú-xí-ndà nduámà. Te dècuèndè vichi nducáhàn vá-nsiá sàhà ñà-nduá nisa quida-nsia antes mà.

²² Ndahà cuàchi-nsia nì sandoo-nsia, doco vichi sàni cuxio-nsia nùájàn, te xinúcuáchi-nsiá nùù Dios; sàni dàhí stná-yà sàxinítnùn-nsiá, te fin xi-nsia cunduu ñà-cutiacu-nsiá nicanicuahàn.

²³ Vâchi nú cuàchi-nda nduá xinúcuáchi-ndà nùù-xí, dandu cuisì ñà-ndañuhu-nda cundua nihí-nda. Doco ñà-nduá cutáhvi uun-nda nùù Dios nduú ñà-cutiacu ndiaha-nda nicanicuahàn quida Stoho-ndà Jesucristu.

7

Inga ejemplu ñà-cundaà ini-ndà nansa nisa ia xi-nda na táñaha ga cunucuachi-nda nùù Dios

¹ Ñàni, dava-nsia sà-ináhà-nsiá nansa cachí ley xi Dios. Pues nú ducán, dandu mà ùhi cundaà stná ini-nsiá palabra cuahìn cachí yohó. Sà-ináhà-nsiá (ñà-cuisi-ní) dècuèndè quívi cui-ndà dandacú ley mà nùù-ndà.

² Vâchi nú sàni nandàhà iin nècuàchi ñahà, dandu iin-ni icúmí-né coo-ne xi ì-né mientras itíacù-va nècuàchimà, cachí ley mà; doco nú sàni xihí nècuàchimà, dandu mà cundíáá gá ley xi-ne.

³ Doco mientras itíacù-va-ne, còò permisú coo nècuàchi ñahà mà xi inga tiàa, vâchi nú ducán, dandu cuàchi nduá. Doco nú sàni xihí ì-némà, dandu libre íá-nè nandàhà-né xi inga nècuàchi tiàa, te mà cundúá cuàchi, cachí ley mà.

⁴ (Pues ejemplu nduú stná nsidaájàn), ñàni, vâchi sàhà ñà-quidà-ndà cuenta nì xihí stná-ndà xi Cristu, ñâyùcándúá, (ináhà-ndà) có-dàndacú gá ley sànahà ma nùù-ndà. Libre íá-ndà vichi, vâtùni cundoo-nda xi inga stoho-ndà, divi Stoho-ndà Señor nì natiacu, te ducán chindee-yándó quida-nda cuahà ñà-vàha, te cudii ini-yà.

⁵ Antes puru ñà-cudíi ini mii-nda nisa xihò-ndà quida-nda; doco na ní cundaà stná ini-ndà nansa cachí ley (xi Dios ñà-màsà quidà-ndà ducán), dandu chicá más nì cuni-ndà quida ndevàha-nda cuàchi, te sàhàjàn cuahàn-nda cui-ndà nì cui, (te ndañuhu-nda).

⁶ Doco vichi sàni cuxio-nda nùù ley sànahà ma, vâchi quida-nda cuenta na ian sàni xihí-ndà, te có-dàndacú gá ley mà nùù-ndà, vâtùni cunucuachi-nda (nùù Dios) vichi, vâtùni cunihu ini-ndà iin-ni ichi sàà ndé (cahvi-nda mii-yá) ini anima-ndà, màdiá cunchicùn cuisì gá-ndà nacua cachí tutu (nduú ley sànahà ma).

Nansa íá cuàchi ñuhú ini anima-ndà, te quidá quinia xi-ndà

⁷ Pues, nú ducán nduá, dandu ¿a cuàchi nduú ñà-cáchí ley mà? Còò, màsà nunca cachi-nda ducán. Vâchi còò nansa cundaà ini-ndà índù ñàhà có-íá vii nú màsà cáchitnùhu ley mà. Por ejemplu, nú màsà cáchí ley mà ñà-mà váha xihò-ndà (ñà-icúmí ñanitnaha-nda), dandu yùhù mà cundáá inì (cuàchi nduá) ñà-xihò-ndà nì cui.

⁸ Doco na ní inini nansa cachí ley mà, dandu cuàchi (íá ini anímè), màs gá nì dàxihoá yùhù, te sàhà ley mà vihi gá nì cucuahà deseú xi ñà-xíhoé. Vâchi nú có-cundáá ini-ndà sàhà ley mà, dandu (chicá dadí íá) cuàchi-nda na ian sàni xihà.

⁹ Antes nì la iin tiempu nìsa cudùì gá ini ié' ñuhiví, te còò ni-íñàha ni sándúú ley mà nùí. Doco nì sàà iin quívi nì cundaà ini sàhà-ñá, dandu na ian nì natiacu cuàchi iá ini anímè. Te (nì cuhuun ini) na ian nì xihì.

¹⁰ Te (nì cundaà ini) sàhà ley mà ñà-mate ní sàcòa sàhà-ñá chindeá-ndó cutiacu ndi-aha-nda ni cuí, doco vichi diví sàhájàn cuàhìn ndañuhí nì cuí.

¹¹ Vàchi cuàchi (iá ini anímè), sàhà-ñá ináhi nansa cachí ley mà, ñàyùcàndüá nì dándàhviá yùhù, te (nì cundeá nùí), na ian nì sahníá yùhù.

¹² Ñàyùcàndüá, (ináhá-ndá), ì ndisa ley xi-ya, te ì ndisa stná ñà-ndüá dandacuá, vachi ndiaha gá cachá'; vaha ndisa-ña.

¹³ Pues nú ducán nduá, dandu ¿a tuxí ini-ndá ñà-sàhà ley vaha ma (nì cuchicuehe) anímè, na ian nì xihà? Còò, màsà cáhí-ndá ducán. Diví cuàchi nduá nì quida quini xi anímè, (màdi ley mà). Te ducán nì cuu sàhà-ñá cunahà claru diví cuàchi nduá quidá quini, vachi mate ley vaha ndisa nduú ley xi-ya, doco sàhà diví ley mà nì ndudana cuàchi (ini anímè), te vihi gá nì nàcùnihu quini ini. Ñàyùcàndüá, sàhà ñà-nì ndudana cuàchi ducán sàhà iin ley vaha, chicá sàni nàcunahà claru ñà-yáha ga quini iá ñà-quida-nda cuàchi.

¹⁴ Ináhá-ndá, ndudu ì nì cachí Espíritu ì xí Dios nduú ley xi-ya; doco yùhù, còò; ducání nduí iin tiàa chícuehè, màdi libre ié' quide ñà-íá viì, cutu cuàchi nduá quidé.

¹⁵ Vàchi nì có-cùndáa vaha ini nansa iá ñà-ndüá quidé, vachi ñà-cùdî ini sàhà-xí, có-quidéa. Te ñà-có-cùnî quide, ñà-yùcán nduá quidé.

¹⁶ Te nú ducán nduá quidé, dandu náhà xicà, ley vaha ndisa nduú ley mà.

¹⁷ Ñàyùcàndüá, màdi ndisa yùhù quidà xi cuàchi ma, còò. Ñà-ndùú ñà-chícuehè ñuhú ini anímè, diví nduá quidà xi ñà-jaàn.

¹⁸ Yùhù ináhi, inií mií nacua nduú nèhiví, còò ni-iin ñà-vàha. Mate cudî ini quide ñà-íá viì, doco có-nànhí' nansa quida ndiseà.

¹⁹ Vàchi chuun viì cunî quide, có-quidéa; te chuun quini có-cùnî quide, ñà-yùcán nduá quidé.

²⁰ Ñàyùcàndüá, nú có-cùnî quidé ñà-ndüá quide, dandu màdi yùhù ndisa nduú ana quidà xi (ñà-có-ndiámà). Diví cuàchi iá ini anímè quidà xán.

²¹ Ñàyùcàndüá, sàni cundaà ini, ducán iá xí'; na quívi cunî quide iin chuun viì, dandu sadí ñà-chícuehè iá ini anímè nùí.

²² Ñà-ndáa nduá, ini anímè cudî ini sàhà ley xi Dios.

²³ Doco ñà-íá stná inga ley (chícuehè) ini ndahásáhi', ñà-yùcán nduá sadí xi nùú ñà-vàha nacání ini quide, te cundéamà nùí ñà-quide cuàchi cuní cuerpu xi quide.

²⁴ ¡Ndahví ndise! ¿Ana dacácu xí nùú iquicúñú malu icúmí? Vàchi sàhà ñà-yòhó cuàhàn ndañuhu dahuin nì cuí.

²⁵ Doco ¡ansivéhé Dios, vachi sàhà Stoho-ndá Jesucristu (vátùni càcui)! Ñàyùcàndüá, ini anímè xinúcuáhi nùú mií-yá nacua cachí ley xi-ya, doco iquicúñú, còò, cutu ñà-ndüú cuàchi (cuníá) quide.

8

Nansa cutiacu-ndá vida ndiaha quida Espíritu ì xí Dios

¹ Vichi sàhà nsidaa ñà-jaàn, mà cóó gá ni-iin castigu xi-nda nú nduú ndisa-nda nèhiví xí Jesucristu. Te có-ndùlócò gá-ndá sàhà ñà-ndüá xího-nda, cuisì-nì nihnú ini-ndá sàhà ñà-ndüá cachí Espíritu ì xí Dios.

² Vàchi ñà-íá-ndá ndahà Yà-ì mà, ñàyùcàndüá sàhà Jesucristu níhitáhvi-ndá vida ndiaha. Te ducán sàni quee dahuun stná-ndá libre nùú ndahà cuàchi-nda; mà cuí gá cahniándó.

³ Doco ley sàhana ma, màncúì (chindeándó), vachi mà sáa nèhiví chivàha vii-néa, ñàyùcàndüá, mií Dios (nì chindee-yándó), nì dàquixí-yá Dèhemani-yá, nì nanduu-ya iin tiàa nahi nsidaa ndohó nèhiví cuàchi, (dandu nì dānāá-yá) sàhà cuàchi-nda sàhà-ñá màsà dāndácú gá' mà nùú-ndá ñuhiví yohó.

⁴ Ducán, dandu vátùni quida ndisa-nda nsidaa ñà-vàha cachí ley xi-ya, vachi có-ndùlócò gá-ndá sàhà ñà-siquini xího nèhiví ñuhiví, cuisì-ní ñà-ndüá cachí Espíritu ì xí Dios nduá nihnú ini-ndá.

⁵ Vàchi nèhiví tùha chuncicùn ñà-ndüá cudî ini mií-né, cuisì-ní ñà-jaàn nduá nihnú ini sàxinítnùní-nè. Doco nèhiví nhícùn xi ñà-cudî ini Espíritu ì xí Dios, cuisì-ní chuun xi Yà-ì mà nduá nihnú ini-nè.

⁶ Vàchi nú cuisì-ní ñà-xího-nda nduá nihnú ini-ndá, dandu icúmí-ndá sàà-ndá cui dahuun-nda. Doco nú ndudu ì xí Espíritu xi Dios nduá nihnú ini-ndá, dandu cutiacu ndiaha ndisa-nda, te contentu cundoo-nda quida-ya.

⁷ Cunaha-nsiá, nú cuisí ñá-cùdîi ini mii-ni-nda nduá niñnú ini-ndà, dandu na ian xini ùhi-ndà Dios nduá, vâchi nú ducán, dandu có-íá gà-ndà sujetu nùù ley xi-ya, te ni mà cúí cunchicùn vii-ndà ley mà.

⁸ Ñâyücândüá, nêhivi niñnú ini-xi cuisí ñà-ndüü gustu xi mii-né, mà cúí natüi-ne nùù Dios.

⁹ Doco mii-nsiá, có-niñnú gà ini-nsiá ñà-ndüü gustu xi mii-nsiá, nú ndisa inácaa Espiritu Ì xi Dios anima-nsiá; cóo. Ñà-ndüá cachí Espiritu Ì nduá niñnú ini-nsiá. Doco cunaha-nsiá, nú íá iin nêhivi cóo Espiritu Ì xi Cristu anima-xi, có-ndüü ndisa-ne iin nêhivi xi mii-yá.

¹⁰ Doco nú íá Cristu ini anima-ndà, dandu ñà-sàni ndee vâha-nda nùù-yá nduá, te ducán itíacú ndisa anima-ndà nùù-yá, mate quida-nda cuenta na ian sàni xihì iquicúñü-ndà sàhà cuàchi ni quida-nda.

¹¹ Cunaha-nsiá, Yua-nda Dios nduú ana ni dânatíacú xi Jesucristu, te ñà-íá Espiritu Ì xi-yá ini-ndà, ñâyücândüá mate ni cui-ndà, doco icúmi stná-ndà natiacu-ndà quida-ya, vâchi inácaa Yà-ì mà ini-ndà.

¹² Ñà-jaàn nduá disáhà-xí có-xiññù quida ga-ndà nansa ni ni cui nacua cudîi ini mii-nda quida-nda. Cóo, ñáni. Masà cündóo-ndà quida-nda ducán.

¹³ Vâchi nú ni quida-nda cuisí ñà-ndüá cudîi ini mii-nda, dandu icúmi-ndà ndañuhu-nda. Ñâyücândüá, ni cuâha-nda chindee Espiritu Ì ndohó, dandu niñi-ndà dandáñuhú dahuun-nda chuun (siquini) cuni-ndà quida-nda, te nú ni niñi-ndà ducán, dandu vida ndiaha niñitâhvi-ndà.

¹⁴ Vâchi nsidaa ana niñnú ini xi Espiritu Ì xi Dios ñà-dacündêhe-yánè ichi cunchicùn-nè, divi xinduu dêhe ndisa-ya.

¹⁵ Nùù mii-yá sàni niñi-ndà Espiritu Ì xi-yá, doco Yà-ì mà, có-ndüü-yá iin ana dandacú ndéé nùù-ndà, te ò dayúhì xi-ndà. Cóo, siempre chindéé-yândó ñà-cunihnu ini-ndà nduú ndisa-nda dêhe Dios, te ducán cui cachí-ndà xi-yá: "¡Yuumáni!" vâchi yua-nda nduú-yá.

¹⁶ Te divi ducán cachí stná Yà-ì mà xi-ndà ini anima-ndà, ñà-ndüü ndisa-nda dêhe-ya; te stná anima-ndà, ducán cachí stná xi-ndà.

¹⁷ Te nú dêhe-ya xinduu-nda, dandu icúmi stná-ndà ndutahvi-ndà ñà-cuicà-yá nùù-yá, vâchi icúmi-ndà cutnaha-nda xi Cristu niñitâhvi stná-ndà nahi mii-yá, nú ni ndohó stná-ndà sàhà-yá. Vâchi nú ni ndoho-nda sàhà-yá, dandu icúmi stná-ndà sàà-ndà cundoo ndiaha-nda nùù-yá.

¹⁸ Vâchi iyuhu nduá icúmi-ndà ndoho-nda tiempu vichi, cachí yùhù, daaní, después, yáha ga chicá ndiaha cunduu ñà-ndüá niñitâhvi-ndà.

¹⁹ Te nsidanicuú ñà-ndüá ni quidavâha Dios, ducán ía na ian ndiatú stná, vâchi cuàhà gá cuniá sàà tiempu cunahá claru ana xinduu ndisa dêhe-ya.

²⁰ Vâchi nsidaa ñà-ndüá ni quidavâha-ya ñuhiví yohó, ni sàà ni cuchiaeha. Doco màdi sàhà ñà-cuní miá ni cúú ducán, cóo; sàhà-ñá ducán ni chitnùni ini mii-yá. Te vichi (sàni sàha-yândó iin) tnündé ini.

²¹ divi ñà-quee libre stná ñuhiví yohó, mà cündúú gá iin lugar ni cuchiaeha; vâchi icúmi cununa ndisa ñuhiví, dandu cundoo ndiaha nsidaa ana nduú dêhe-ya.

²² Te ináhà-ndà, ndè vichi ndohó ñuhiví yohó na ian ndohá sàhà ñà-vâxi inga ñuhiví saa.

²³ Te màdi cuisí ñuhiví nduá quidá ducán; cóo, ndè mii stná-ndà, na ian nsíhi ini-ndà ndiatu-nda cuu ducán. Doco vichi ía iin ñà-ndiaha sàni niñitâhvi-ndà, divi ñà-cucumi-nda Espiritu Ì xi-yá, vâchi divi-ya nduú tnùmani primeru xi-nda nùù-yá. Ñâyücândüá ndiatú cuisí-nda ndè cachí sàà tiempu cachí vate-yá xi nsidaa nêhivi ñà-divi dêhe-ya xinduu-nda, dandu quee ndisa-nda libre, (mà quidá gá-ndà cuàchi).

²⁴⁻²⁵ Vâchi na ní càcu anima-ndà, divi tnündé ini jaàn nduá ni niñi-ndà. Ñâyücândüá, cuéyàà-ni ni cundiátu-ndà dècuèndè cachí cuni-ndañá, vâchi nú tnündé ini ndisa nduá, dandu ñà-tañâha ga niñi-ndà nduá, vâchi nú sàni niñi-ndà iñâha, dandu mà cachí gà-ndà xán nduá tnündé ini.

²⁶ (Ináhà-ndà), mà fuerte anima-ndà, doco Espiritu Ì xi Dios, chindéé-yá ndohó, vâchi có-cündáà ini-ndà nansa càcàn tâhvi-ndà nùù Yuandiaha-nda modo ndiá icà-ndà, doco Yà-ì mà, càhàn niñni-ya sàhà-ndà nùù Yua-nda Dios, mate ndohó, cuisí-ni sàcàn ini-ndà quidá-yá, te ni có-sàà-ndà cachí claru-ndà ni-iin palabra.

²⁷ Doco mii-yá, indêhe vâha-ya nansa ía anima iin iin nêhivi, te ináhà stná-yá nansa niñnú ini Espiritu Ì xi-yá, vâchi Yà-ì mà, cuisí ñà-ndüá cuni Yuandiaha-nda nduá xicàn tâhvi-yá sàhà-ndà.

Na xínu tiempu icúmi-ndà cundee-nda nùù nsidaa tnündoho

²⁸ Ináhà stná-ndà ñà-yohó: nsidanicuú iñâha cuú xi-nda, ñà-chindee xi-nda sàhà ñà-vâha xi-nda nduá, nú cuú ini-ndà sàhà Dios, te nduu-nda ana ni chitnùni ini-yá cana-ya ladu xi-ya.

²⁹ Vâchi nsidaa nëhivi sà-ináhá-yâ dècuèndè antes, divi nì chitnùnì ini-yâ sàà-nè cunduu-ne nahì Dèhemani-yâ (Jesús), te ducán cundoo cuàhà gá dèhe-ya, te Jesús cunduu dèhe-ya primeru.

³⁰ Daaní, nsidaa ana nì chitnùnì ini-yâ cunduu nëhivi xí-yâ ducán, divi nduú ana nì cana-ya. Te nëhivi nì cana-ya, divi nì nihì stná nì ndee vâha nùu-yâ. Te nsidaa ana nì ndee vâha nùu-yâ ducán, divi nì nihítáhvi stná tnùñuhu ndiaha xí-yâ.

³¹ Pues nú ducán nduá, dandu ¿nansa cachi-ndá vichi? (Dohó cachi-ndá): nú Dios íá sàhà-nda, dandu còò ni-íñaha cundee nùu-ndá.

³² Vâchi cunaha-nsiá, nì Dèhemani-yâ còni cùhì ini-yâ; nì sàhatahvi-yándò nì xihì-yàmà sàhà nsidaa-nda. Nâyùcànduá seguru icúmí-yâ cuàha stná-yándò nsidaa ñà-nduá xiñuhu gá-nda.

³³ Te vichi, ¿a íá ana cui dacuidá cuàchi diqui-ndá nú sàni nacàxin-yándó? (Còò, mà cúí), vâchi sàndènhì vâha-yándò.

³⁴ Te ¿a íá stná ana cui dacúnsidá cuàchi xi-nda? Còò, vâchi divi Cristu nì xihì cuenta xi-nda, te nì natiacu-yâ, dandu nì sàcòo-ya ladu cuàhà Yuamáni-yâ Dios, te ndè cáhàn nihni stná-yâ sàhà-nda.

³⁵ Daaní, ¿a íá stná ana cui dacúxíó xí-ndá nùu Cristu ñà-màsà cúú gá ini-yâ sàhà-ndá? Còò, mà nihindèè-né ducán, mate cuàhà tnùndoho nì coó, te ò cuàhà vida nì yáha-nda, te ò ni quidá quínì nëhivi xi-ndá. Doco còò, mà nihì-né ducán, mate ni coó tnama, ò ni yáha ndahví-ndá, ò nùu cuàhà peligrú íá-ndá, te cuní nëhivi cahni-néndò, doco iin-ni cuú ini Dios sàhà-nda.

³⁶ Vâchi, ducán cachí stná tutu ìì (ndè cáhàn nëhivi xì-yâ, cachí-nè):

Sàhà ñà-nduú-nsí nëhivi xí mii-ní, ñâyùcànduá ndui te ñuú nhicùn nëhivi nsiùhù ñà-cahni-né nsiùhù, quidá-né cuenta na ian rii nduú-nsí cundaca-ne nsiùhù cùhùn ndé cui-nsí.

Ducán cachá.

³⁷ Doco cunaha-nsiá, nsidaa tnùndoho ma, sàni cundee dahuun-nda nuá, vâchi cuú ini-yâ sàhà-nda, te chindéè-yándò.

³⁸⁻³⁹ Te yùhù, ináhá vâhi iin-ni icúmí-yâ cuu ini-yâ sàhà-nda mate ni cuní-ndá cuàhà vida, te ò ni sàà-nda cui-ndá, te ò ndéni íñaha nì cui nì quidá iin ángel, ò iin ana dandacú, ò iin ñà-malu, doco iin-ni icúmí-ndá cundoo-nda nùu-yâ; mate ni coó cuàhà tnùndoho quivi vichi, ò tnaa ídá, doco cunaha-nsiá, còò ni-iin ana ndoó ansivi, ò andea, ò ndéni ni cui, mà cúí dacúxióándò nùu ndahá-yâ, vâchi cuú ini-yâ sàhà-nda, te sàhà Stoho-ndá Jesucristu (sàni indehè ndàhvi-yándò).

9

Icúmí Dios chindee-yâ nëhivi raza Israel

¹ Nëhivi xí Cristu nduí, te ináhá-yâ ñà-ndáà nduá (cuàhin cachi xi-nsiá); te icúmí cachi ndàì xi-nsiá, vâchi ináccá stná Espiritu Ìì xí Dios ini, ñâyùcànduá, ináhì ini anímè ñà-ndáà nduá cuàhin cachi yohó.

² Cunaha-nsiá, cuàhà gá tnùnsí ini ié, te nicanicuahàn íá ñà-nduá dandoho-xí,

³ vâchi (nacáni ini) sàhà ñanitnahi, divi nëhivi raza xi. Dispuestu ié nihichihén, te ndañuhí nùu Cristu nì cúí (sàhà-ñá ni sàà tnahi càcu-ne nùu-yâ).

⁴ Vâchi divi descendencia xi xii-nsí Israel nduú stná-nè, te quidá stná-yâ cuenta na ian dèhe-ya nduú stná-nè; mahì mii-né nisa itnuu ndiaha-yâ. Dècuèndè nì ndatnuhu sahnú stná-yâ xì-né, te nì saquin-yâ iin tratu, nì sàha-yanè ley ìì xí-yâ. Te nì cachitnuhu stná-yâ nansa cunucuachi-né nùu-yâ na cahvi-néya. Te cuàhà gá ñà-ndiaha ñi nì quida-ya comprometer xì-né.

⁵ Te yohòtèhè primeru-nè, divi yohòtèhè xii-nsí, (cuàhà gá fama-nè) nì sàcòò; te iin nëhivi ñuu-nsí nì sanduu stná dihi Cristu. Te Cristu, nicanicuahàn naquimani-ndá mii-yâ, vâchi Dios nduú-yâ, te dandacú-yâ nùu nsidanicuú íñaha, amén.

⁶ Doco nsidaa ñà-nduá nì cachi Dios (sàhà raza-nsí mà), màsà cúníhnu ini-ndá sàni yàha uan. Vâchi màdi nsidaa descendencia xi xii-nsí Israel nduú ndisa nëhivi ìì xí raza mà.

⁷ Mate descendencia xi Abraham nduú-né, doco có-cuní cachàmà ñà-nduú ndisa stná-nè cuenta xi Abraham, vâchi nì cachi Dios xi nècuàchi sàhnù-mà ñà-cuisi descendencia xi dèhe-ne Isaac cunduu nècuàchi nihítáhvi.

⁸ Te palabra jaàn cuní cachi ñà-còò ni-iin nëhivi cunduu dèhe ndisa Dios sàhà cuisì raza-nè. Còò, dèhe-ya nduú nsidaa ana nì saquin-yâ iin compromisu sàhà-xí.

⁹ Vâchi (ducán nduú modò nì quesaa dèhe Abraham); vâchi nì la iin palabra nì cachi sahnú-yâ xì nècuàchìmà, divi ñà-yòhò: “Iin quivi señaladu icúmí quixi, te daa sà-íá dèhe (ñahàdihí-ní nani) Sara”.

¹⁰ Doco cunaha-nsiá, màdi cuiși ñà-jaàn nduá iá, vâchi iá stná ñà-nduá ni cuu xi Rebeca, ñahâdihí xii-nsí Isaac. Na ñuhú dèhe-ne nduú cuatí,

¹¹⁻¹² ni cachi Dios xi-né: “Dèhe-ní cacu primeru icúmí cunucuachi nù luchi nchícùn gâ”. Doco (na ní cachi-yà ducán), tâñâha ga tùnuu méè mà, tâñâha ga quida-tè ni-ñâha, ni-iin ñà-vâha, te ni-iin stná ñà-có-íá vâha. Doco ñà-jaàn ni cachi-yà sâhâ-ñá cunahâ claru có-nâcâxin-ya ni-iin nêhiví sâhâ obra quidá-né, cuiși sâhâ-ñá ducán chítñuní ini-yà quida-ya.

¹³ Te ducán ni cachi stná-yà nù tutu ì: “Jacob cuú ini sâhâ-xí, doco Esaú, cóo, có-xiñhí-te”, ni cachi-yà.

¹⁴ Doco nú ducán nduá, ¿a ñá-cô-quidá ví Dios nduámâ? Còo, ¿màsà nunca cachi-ndâ ducán!

¹⁵ Vâchi dohó ni cachi stná-yà xi Moisés: “Cuisi yùhù icúmí cachi ana cundehè ndahví, te ana cuâhin cuhi ini”.

¹⁶ Ñâyùcânduá, màdi ñá-nduá cuní nêhiví quida-ne nduú ñà-cundiaa, ni màdi stná ñà-nduá sâhandee ini-nè quida-ne; cóo, cuiși cundiaa ñà-cundehè ndahví-yânè.

¹⁷ Vâchi nù tutu ì itándiaa palabra yohó ni cachi Dios xi rey ñuu Egipto nani Faraón: “Yùhù, sâni chítñuní ini cunduu-ní iin rey, doco ¿índu chuun? Cuisi sâhâ-ñá cundeí nù-ní xi poder cahnú xí, dandu cundaà ini nêhiví inicutu ñuhiví sâhí, nansa iá poder xi”, ni cachi-yà.

¹⁸ Ñâyùcânduá, nú ducán cuní-yà, vâtùni cundehè ndahví-yà iin nêhiví, te inga-nè nsidacaxin-yà anima-xi.

¹⁹ Doco (sâhâ ñà-jaàn) vihini cachi stná iin nêhiví: “Nú ducán quidá Yua-nda Dios, dandu có-ndiá icâ-yà cutnii-ya cuenta sâhâ cuâchi-nda, vâchi mii-yà nduú-yà mii-yà, te ¿ndiá quida ndohó?”

²⁰ Doco cóo, màsà cáhí-ndâ ducán, vâchi có-ndudávâ-ndâ xí mii-yà, te ¿índu chuun cachi-ndâ ducán xi-yà? Vâchi ni cáhí-ndâ iá iin quidi ni quidavâha iin nêhiví. ¿A vâtùni nú ni cachá` xi-né: “¿Índu chuun dohó ni quidavâha-ní yùhù?” Còo,

²¹ vâchi icúmí tîaa ma derechu quidavâha-neâ nansa ni cúdî ini-nè. Vâtùni tnii-ne chii barru, te tavâ-né iin quidi finu, dandu quihin stná-nè inga iyuhá, te quidayucun stná-nè inga quidi chicá corriente.

²² Pues ducán stná xi mii-yà, mate cuní-yà dacuní-yà nêhiví (xicá ichi malu) ñà-fuerte guá castigu xi-ya, te ñà-càhnù-guá poder xi-ya, doco caní tiempu ni quidandee ini-yà sâhâ-né mate ndiá icâ-né ñihí-né castigu, te xínduu-ne cuiși ana icúmí ndañuhu vâchi quida-ya, (nahi quidi corriente mà).

²³ Doco ndohó, cóo, (tucu iá), vâchi na iin quidi finu nduu-nda nù-yà, te cuní-yà cundaà stná ini nêhiví ñà-ndiaha guá quidá-yà xi ana indéhe ndahví-yà. Te divi nêcuâchi cundiátu mà nduú ndohó nêcuâchi ni chítñuní ini-yà ñihitâhvi xi trññuhu ndiaha xí-yà.

²⁴ Ñâyùcânduá, ni cana-ya nsidanicuú ndohó, màdi cuiși nêhiví raza Judea.

²⁵ Vâchi dohó cachi stná tutu ni tîaa Oseas sâhana ndé cachi Dios palabra yohó: Nêhiví yucán, mate sâni cachi xi-né có-nduú-né nêhiví xí, doco después icúmí cachi xi-né ñà-nduú-né nêhiví xí. Cóni sácúú ini sâhâ-né antes, doco icúmí sâi cachi ñà-mànì gâ-nè núí.

²⁶ Vâchi nêhiví ñuu ndé ni cachi ñà-có-nduú-né nêhiví xí, pues divi-ne cunduu-ne dèhe ndisa yùhù ana nduú Dios vivu.

²⁷ Doco nêcuâchi Israel, dohó ni tîaa Isaías sâhâ-né: “Mate cuáhâ gâ nêcuâchi Israel ndoo nahi ñusi cuâti ndoo yuhù mar, doco sacu-nè icúmí cacu,

²⁸ vâchi ñà-nduá sâni cachi Stoho-ndâ Señor quida-ya ñuhiví yohó, yâchi icúmí-yâ daxínu dahuun-yañâ”.

²⁹ Daani, ñà-yohó ni cachi stná Isaías mà:

Ansivéhé Stoho-ndâ Señor, vâchi dandacú-yà nù nsidanicuú iñâha; te nú mà dâcâcu-ya iin ùi-ndâ ni cúí, dandu (nsihi dahuun-nda) na ian ni cuu xi nêhiví ñuu Sodoma xi nêhiví ñuu Gomorra.

³⁰ Nú ducán nduá, dandu ¿nansa cachi-ndâ sâhâ nêcuâchi có-nduú raza Israel? (Pues dohó cachi-ndâ): mate cóni sánándúcú-nè nansa cui ndee vâha-ne nù-yà, doco vichi vâtùni ñihitâhvi-né ducán nú ni cúnindisâ-néyâ.

³¹ Doco nêcuâchi Israel, mate nchícùn-nè iin ley tuxí ini-nè ñà-ndee vâha-ne nù-yà, doco cóo, cóni ñihí-né natù-ne nù-yà ducán.

³² Te ¿índu chuun? Pues divi sâhâ-ñá cuní-nè ñihitâhvi-né sâhâ cuiși obra quidá-né, te màdi sâhâ ñà-ñihnú ini-néyâ. Vâchi (na ní cuduchi ini-nè sâhâ Jesús), dandu ni cuu xi-né na iin nêhiví ni saquihí sâhâ-xí iin yùu, te ni sâcasân-né.

³³ Vâchi divi ducán ni cachi Dios nù tutu ì, (ndé cáhí-yà):

Cuàhìn techuín iin ana sàà ñuu Sión, (divi nduú Jerusalén), te conduu-ya na iin yùù cahnú caqulhi sàhà nèhivì, te ndua-nè, vâchi nèhivì ñuu mà, icúmí-nè cuduchi ini-nè sàhà-yá. Doco nèhivì cunindisa-xi-yá, mà sàà-nè naxicocuñ ini-nè.

10

Ndèni nèhivì ní cui, nú ni cúnindísâ-né Jesús, vâtuni càcu-ne

¹ Ñàni, xi nsidaa anímè cuní càcu nèhivì raza xi Israel nùù Dios, te ñà-jaàn nduá siempre xicàn tàhví nùù-yá.

² Pues ñà-ndáa nduá, sàhandee ini-nè cahvi-néyà, doco tà cundáa vâha ini-nè nansa ndiá icà-né quida-ne.

³ Cuní-nè ndee vâha-ne nùù-yá, doco sàni nacuaà-né modo ni cachi-yá quida-ne ducán, te modo xi mii-né cuní-nè quida-neamà. Ñâyúcandúá, ducán queá na ian sàni cahíchi ini-nè ichì mii-yá.

⁴ Vâchi cunaha-nsiá, nú ichì Cristu xiníndísá-ndá, te ducán sàni ndee vâha-nda nùù-yá, dandu còò cá necesidad cunchicùn gà-ndà ley sàhana.

⁵ Daaní, Moisés, ni tiaa stná-nè iin palabra sàhà nèhivì nhíicùn ley mà, te sàhàmà cuní-nè ndee vâha-ne nùù-yá ni cui. Dohó ni cachi Moisés: “(Cuisi) nú quida ndisa-nda cumplir nsidaa ñà-ndúá cachí ley mà, dandu ñihí-ndà cutiacu ndiaha-nda”.

⁶ Doco nú sàhà fe xi-nda cuní-ndá ndee vâha-nda nùù-yá, (dandu ni cúniní-nda palabra yohó) cachí stná ley mà: “Màsà cútúxí ini-ndá mii-nda icúmí-ndá nana-nda ndè gloria —na ian cuàhàn-ndà cundaca-nda Cristu nuu ndè ñuhivì yohó— còò;

⁷ ni màsà cútúxí stná ini-ndá ñà-icúmí-ndá nuu cunú-ndá ndè tíxi ñuhivì”, na ian cuàhàn-ndá danátíacú-ndá Cristu, te cundaca-ndayá naxínu yohó. Còò.

⁸ Pues ¿nansa ndisa cachí palabra mà (quida-nda)? Divi dohó cachá: “Yatni uun iá palabra xi-ya, mà úhi càhàn-niá, mà úhi cunihnu vâha ini-niá ini anima-ní”. Te divi palabra mà nduá cachitñuhu-nsi xi nèhivì na cachí-nsi xi-né xiñuhu cunindísá-né mii-yá.

⁹ Vâchi nú cachí vate-nda ñà-mii Jesús nduú Stoho-ndá Señor, te ini anima-ndá xiníndísá-ndá ñà-ni natiacu-yà ni quida Dios, dandísá, càcu anima-ndá nùù-yá.

¹⁰ Vâchi ini anima-nda nduú lugar ndé xiníndísá-ndáyá, te ndee vâha-nda nùù-yá; te xi yuhù-ndá cachí vate-nda (ñà-nhíicùn-ndá mii-yá), dandu xi ñà-jaàn ñihí-ndá salvación xi-nda. Palabra yohó nduá cachitñuhu-nsi xi nèhivì.

¹¹ Vâchi dohó cachí tutu ìi: “Ni-iin nèhivì, mà sàà-nè naxicocuñ ini-nè ñà-ni xinindísá-né mii-yá”.

¹² Vâchi iin-ni ndiaá nsidaa-nda nùù-yá, nahi nècuàchi raza Judea, te ducán stná nèhivì inga ñuu. Vâchi imindaa Stoho-ndá Señor iá-yà nùù nsidaa-nda, te ndiaha gá sàhatahù-yándó gracia xi-ya na ndácùcahan-ndayá.

¹³ Vâchi nsidaa ana ndacùcahan xi quivì-yá, icúmí-nè càcu-ne.

¹⁴ Doco (nàhà xicà), nú tàñáha ga cunindísá nèhivì-yá, mà ndácùcahan-néyà. Te-ni còò stná nansa cunindísá-néyà nú tàñáha ga cunitñuhu-ne sàhà-yá. Te-ni còò stná nansa cunitñuhu-ne sàhà-yá nú còò ana cachitñuhu xi-nè.

¹⁵ Te ni mà cacánúú stná ana cachitñuhu sàhà-yá nú còò ana techuun-xi-né. Ñâyúcandúá, dohó cachí stná tutu ìi: “Na ndiaha máni iá nú sàni quesaa ana cachitñuhu xi-nda razón ndiaha xi mii-yá”.

¹⁶ Doco màdi nsidaa nèhivì raza Israel ni càhvi xi razón ndiaha ma. Vâchi (dohó) ni cachi stná Isaiás (xi Dios): “Sacu nèhivì ni xinindisa-xi ñà-ndúá ni cachi-nsi xi-né (sàhà mii-ni), Stoho-nsi Señor”.

¹⁷ Ñâyúcandúá, sàni cundaà ini-ndá, dihna icúmí-ndá cunini-nda (palabra), dandu ñihí-ndá cunindisa-nda. Te ñà-ndúá cunini-nda, divi razón xi Cristu nduá.

¹⁸ Doco amádi sàni inini nèhivì raza Israel. Jaan. Ñà-ndáa nduá sàni inini-ne palabra mà, vâchi (cachí tutu ìi):

Inicutu sàni tiacutñuhu-ne palabra (sàhà-yá). Dècuèndè ndè chicá xica sàni xinitñuhu-ne.

¹⁹ Doco ¿a sàhà ñà-cóni cundáa ini nèhivì Israel, ñâyúcandúá (cóni xiníndísá-né)? (Pues cunini-nsia palabra) ni tiaa Moisés, (ndé càhàn Dios xi nèhivì Israel, cachí-yá):

Mii-nsiá, có-nàcúní-nsià nèhivì inga ñuu ñà-ndúú-né ñuu ndisa, doco (ñà-cuàhà guá gracia) cuàhìn quide sàhà-né, icúmí-nsià cumbidia ini-nsia sàhà-né. Te mate ni có-sàà nèhivì ñuu mà cundaà vâha ini-nè vichi, (doco icúmí chindeí-nè), dandu cuidá ini mii-nsiá sàhà-né, ni cachi Dios.

²⁰ Daaní, después ni tiaa stná Isaiás inga palabra xi-ya. Ndee ní càhàn-yà, te dohó ni cachi-yà:

Nèhivì cóni nándúcú xí antes, sàni ñihítàhvi-né cahvi ví-né yuhù vichi. Mate antes cóni sándúlócò-nè sàhí, doco vichi sàni dàtnúú sàxinítñuní-nè.

²¹ Doco sàhà nècuàchì raza Israel, dohó cachí-yà: “(¡Ndahví-nè!) vèchi ndui te ñuó iín cáhin xì-né, te caná stnái-nè, doco có-iníni-né, cutu càhàn-nè dìqui palabra xì”.

11

¹ Pues nú ducán nduá, dandu ¿nansa cachi-ndà? ¿A ñá-sàni nacoo nihni Dios nèhivi xí-yá (Israel) nduá vichi? Còó, màsà cáhí-ndà ducán. Vèchi cunaha-nsiá, yùhù nduú stnái iin nèhivi Israel. Yohòtéhè stnái nduú Abraham, te descendencia xì xì-nsí Benjamín nduú stnái.

² Vèchi nèhivi raza-nsi Israel, dècuèndè chicá sàhaha sàni cachi Dios ñà-nèhivi xí mii-yá nduú-né. Ñàyùcànduá, màdi-ñá sàni nacoo nihni-ya nèhivi xí-yá nduá.

Mà nunca sàà ndañuhu nèhivi raza Israel

Amádi sá-ináhá-nsiá nansa cachi tutu ì ndé càhàn Elías, xicàn tàhvi-né nùò Dios, nacáni-né xì-yá ñà-cuàhà guá cuàchi nèhivi Israel iá. Pues divi palabra yohó nì cachi-né xì-yá:

³ “Nsiùhù nècuàchì càhàn cuenta xì-ní, sà-cuàhà-nsí sàni sahni nèhivi, te sàni dándutù stnà-nè nsidaa lugar ndé cahvi-nsí mii-ní, Stoho-nsi Señor: làcà mindái ndóí, te nchícun stnà-nè ñà-cahni-né yùhù”.

⁴ Doco ¿ndiá nduá nì cachi Dios xì Elías mà? Dohó nì cachi-yá: “Còó, vèchi sàni chitnùni inì ñà-cundoo ùsà gà mìl nèhivi-xí mà cáhvi xí yùò yócò nani Baal, ni mà sàá stnà-né cuiasisi-né nùá”, nì cachi-yá.

⁵ Te ducáni iá stnà tiempu vichi. Sàhà gracia xì-ya ndoó stnà dava nèhivi Israel xiníndiá xì-yá vichi, mate sacu xínduu-ne, doco sàni nacàxin-yanè.

⁶ Te nú cuisì sàhà gracia xì-ya nduá, dandu mà cúí cunduu stnà sàhà obra nì quidá-né. Vachi nú nì cundiáá obra xì-ne nùò-yá nì cúí, dandu mà cundiáá gà stnà gracia xì-ya.

⁷ Te nú ducán nduá, dandu ¿nansa cachi-ndà vichi? Pues dohó cachi-ndà: cuàhà gà nèhivi Israel cóni nihì-né (ñà-ndiaha ì) nisa nanducu guá-nè; cuisì nèhivi nì nacàxin Dios nì nihitáhvi xán. Dandu cuàhà gà dava nècuàchì Israel mà, nì yàha nì nducaxin anima-nè.

⁸ Te dohó cachi stnà nùò tutu ì: “Sàni chitnùni inì Dios cucumi nèhivi mà iin anima mà ndúlócò gà, na ian quidí-nè, quidámáxini-nè, na ian cuaá-nè, te ò doho stnà-nè, tè dècuèndè quívi vichi, ducán iá xì-né”, cachi tutu mà.

⁹ Daaní stnà David sàhaha, dohó nì cachi stnà-nè:

Nì sàá nèhivi (malu mà) yàha-ne tñundho na meru ndoó-né quidá-né vicò xì-né, te yàchi nì cundúamà; te nì sàá stnà-nè yàha-ne cuàhà vida, dandu nacuitacuhá sàhà cuàchi-ne.

¹⁰ Te màsà sàá stnà-nè cundaà vaha ini-nè; còó. Nì sàá-nè cunsida-ne (castigu xì-ne) nicanicuàhàn, nì cachi David.

¹¹ Ñàyùcànduá, vichi ndisa iá falta xì nècuàchì Israel. Doco, ¿a sàni ndañuhu dahuun-ne ñà-nì quida-ne ducán? Còó, vèchi cunaha-nsiá, sàhà-ñá nì quida-ne falta mà, ñà-jaàn nduá disàhà-xí sàni nihì stnà nsidaa nèhivi inga raza nansa càcu anima-nè. Daaní, después vihini naxicocuíñ stnà inì nècuàchì Israel na indèhe-né ñà-sàni càcu nèhivi inga raza mà.

¹² Cunaha-nsiá, sàhà-ñá nì quida nècuàchì Israel mà falta, ñàyùcànduá cuàhà gà ñà-ndiaha ì sàni ndòò nùò dava ga nèhivi ñuhiví. Doco nú sàhà falta xì nècuàchimà sàni nihitáhvi nèhivi dava ga, dandu chicá más ndiaha nàcòo na sàá quívi nàcundoo vaha nècuàchimà xì Dios.

Nansa nì nihitáhvi nèhivi nsidanicuú raza coo nansa càcu-ne

¹³ Vichi cuàhìn càhìn xì mii-nsiá nècuàchì có-nduú nèhivi Israel. Yùhù, nùò Dios sàni nihì chuun cacaniu cachítnùhi palabra xì-ya xì mii-nsiá. Te ndisa iin chuun ndiaha nduá, cachí.

¹⁴ Te cuní quida vií chuun yohó sàhà-ñá cundehè stnà nèhivi raza xì, áma ndúdñi stnà ini dava-ne (cuníndisá stnà-nè), te càcu-ne.

¹⁵ Vèchi nú (sàhà cuàchi-ne) nì cuxio-ne nùò Dios, te sàhámà nì nihì dava ga nèhivi ñuhiví nì nàcundoo vaha-ne nùò-yá, dandu (chicá más ndiaha) icúmí nàcòo nú sàni nandudí tu inì Dios sàhà-né. (Ndiaha gà ndisa) queamà na ian nì xihì iin nèhivi, te nì natiacu-nè.

¹⁶ Cunaha-nsiá, cachí estilu sàhaha sàhà pan primeru ñà-nduá pan ì dócò-ndà nùò Dios. Te nú ducán nduá, dandu nàhà xicà ì stnà dava ga yusán nì cuàha pan mà. Te nahi seña jaàn nduú palabra yohó (sàhà nèhivi Israel, vèchi nú ì yohòtéhè-né sàhaha, dandu ì stnà nsidaa gà descendencia xì nècuàchimà vichi). Te ducán iá stnà nahi yohó iin yutnù; nú iá vaha yohó-nú, dandu nsidaa stnà rama-nu iá vaha.

Nahi chiò yutnù nì natnù tnahá nduú nèhivi có-nduú raza Israel, cachí Pablo, vèchi sàni nihitáhvi stnà-nè ñà-ndiaha ì nisa icumi cuisì nècuàchì Israel antes

¹⁷ Vèchi nècuàchì raza-nsi Israel, na iin yutnù tátà olivo, ducán nduú stnà-nè, te nsidaa nèhivi inga raza, nahi chiò inga yutnù yucú, ducán nduú-né. Daaní, nì cachi-ndà ní tànhè

iin ùi rama yutnú tátá, te nì natnù tnahá xì iin ùi ndahá yutnú yùcù. Pues divi ducán nduá sàni quida Dios xì mii-nsiá nècuàchì inga raza; vâchi rama yutnú yùcù nì natnù tnahama, sà-itiácúà sàhà ñà-vàha dananá yohò yutnú tátá mà; dífá fuertéa tècuíi nùu yohò-núma. (Te divi ducán iá stná xì mii-nsiá, sàni nihitáhvi stná-nsiá ñà-ndiaha ì xì nècuàchì Israel.)

¹⁸ Doco màsà cútúxí inì-nsiá chicá ndiaá-nsiá nùu nèhivì Israel mà, vâchi divi sàhà nècuàchimà sàni nihitáhvi-nsiá ñà-ndiaha ì mà, nacua iá xì chiò cuatì yutnú nì natnù tnahama, divi sàhà yohò yutnú mà itiácúà, màdi-ñá sàhà chiò cuatimà itiácú yohò-nù.

¹⁹⁻²⁰ Doco vihini cachi-nsiá palabra yohó: “(Chicá ndiaá nsiùhù) nùu nècuàchì Israel, vâchi (nì quindiaa Dios-nè nùu lugar xì-ne sàhà-ñá quihvi nsiùhù), na ian nì tãhndè chiò yutnú finù mà sàhà-ñá coo lugar quihvi chiò yutnú yùcù”. Pues ñà-ndáa nduá nì cuxio dava nècuàchì (Israel nùu Dios). Doco ¿índù chuun? Cuisi sàhà-ñá cóni sánihnú gá inì-nè mii-yá. Ñâyùcànduá, mate nùu mii-yá ndoó-nsiá vichi, doco cuisì sàhà-ñá iin-nì nihnú vâha inì-nsiâyá nduá. Màsà cútúxí inì-nsiá chicá ndiaá-nsiá. Còo, chicá xiñuhu ñà-caquin-nsiá cuidadu.

²¹ Vâchi (nècuàchì Israel mà, cóni quidá víi-né, te sàhájàn) nì cuxio-ne nùu-yá nacua nì cuu xì chiò yutnú tátá nì tãhndè mà; ñâyùcànduá, ducán stná mii-nsiá ana nì quihvi después, cuidadu cundoo-nsiá còtò dacúxíó stná Dios mii-nsiá.

²² Sàhà nsidaa ñà-jaàn, vátùni cundaà vâha inì-ndà nansa iá modo xì Dios; iá ndisa gracia xi-ya, doco iá stná nansa sàha-ya castigu. Vâchi nècuàchì raza nì tucù inga ichì mà, cóni dácacu-yanè, doco mii-nsiá, còo; màni gá nì quida-ya xì-nsiá. Doco iin-nì xiñuhu quida-nsiá seguir cunchicùn-nsiá gracia xi-ya, vâchi nú coó, dacúxíó stná-yá mii-nsiá nùu-yá.

²³ Daaní, nècuàchì nì cuxio antes mà, nú nì nácúnindsá-né mii-yá, vátùni (nàcúndoo vâha stná-nè xì-yá), te ducán queamà na ian nì natnù tnahá tú chiò yutnú nì tãhndè mà, vâchi Dios, icúmi-yá poder quida-ya ducán.

²⁴ Vâchi mii-nsiá, mate nècuàchì inga raza nduú-nsiá, doco sàni nihitáhvi-nsiá cuahà ñà-vâha xì nècuàchì Israel mà. Te ducán queamà na ian nì tãhndè chiò yutnú yùcù olivo, te nì natnù tnahá-nu xì iin yutnú tátá. Pues nú sàni nihitáhvi mii-nsiá ducán, dandu chicá mà ùhi nansihvi tu nèhivì raza Israel mà lugar primeru xì-ne, vâchi queamà na ian danátnù tnahá tu-nda chiò yutnú finù ìcà mismo mii yutnú ndé nì tãhndè.

²⁵ Ñáni, cuní cundaà inì-nsiá sàhà iin chuun nisa ìa dèhé antes còtò cachi-nsiá ñà-chicá nchichí-nsiá. Vâchi cunaha-nsiá, cuahà nècuàchì Israel, quidámáxini-nè vichi, te ducán icúmi coo ndè cachi sàa cuacatnahá nadaa ga nèhivì inga raza quihvi ichì mii-yá.

²⁶ Daaní, icúmi càcu stná nsidaa nècuàchì raza Israel, nacua cachí Dios nùu tutù ìi: Mahì nèhivì ñuu Sión descendencia xì Jacob, yucán icúmi quee mii-yá ana dácacu xi-né, dandu dandáñuhú-yá nsidaa ñà-có-ndiáá nì quida-ne.

²⁷ Te nú sàni cuxio nsidaa cuàchi-nemà, dandu cundaà inì-nè sàni quida ndise cumplir palabra nì càhàn sàhnú xì-né antes.

²⁸ Cunaha-nsiá, sàhà-ñá (cahíchi inì) nèhivì Israel razón ndiaha xì Dios vichi, ñâyùcànduá na ian xiní ùhi-nèyá nduá, doco ñà-vâha xì mii-nsiá sàni queamà. Doco nècuàchimà, màni cuahà vá-né nùu-yá sàhà xì-né, vâchi nì cachi-yá xì xì-né icúmi-yá nacàxin-ya descendencia xi-ne.

²⁹ Te mà túha Dios naquihin-ya ñà-nduá sàni sàhatahvi-yándó; nì mà túha stná-yá naxic-ocuíñ inì-yá nú sàni chitnùnì inì-yá cana-yándó.

³⁰ Antes cónisá ínini-nsiá mii-yá, doco vichi sàhà-ñá cóni ínini nècuàchì Israel, ñâyùcànduá mii-nsiá nì indehè ndàhvi-yá vichi.

³¹ Te ducán iá stná xì mii-né, mate có-ínini-nèyá vichi, doco ¿índù fin cucumiámà? Divi sàhà-ñá nacundehè ndàhvi-yànè nacua nì indehè ndàhvi stná-yá mii-nsiá.

³² Ñâyùcànduá, nùu mii-yá iin-nì xínduu nsidanicuu-nda nèhivì cuàchi có-ínini xì-yá. Te divi sàhájàn vátùni iin-nì cundehè ndàhvi stná-yá nsidanicuu-nda.

Nchichí gá nì quida Dios nsidaa obra xi-ya

³³ ¡Na cuahà guá obra ndiaha sàni quida Dios! Te nchichí sàstnùhù stná-yá, ináhá-yá nsidanicuu ñàha. Te ináhá-yá ñà-nduá cachí-yá, xì ñà-nduá quidá-yá, mate nèhivì, có-sànihì inì-nè.

³⁴ Vâchi còo nì-iin ana cundáa ndisa inì-xì nansa nihnú inì Stoho-ndà Señor. Te nì còo stná ana chicá nchichí, te ducán sàha-xì-yá conseju.

³⁵ Nì còo stná ana xicàn tòó-yá ñàha nùu-xí, te cunihica-yá nùu-né; còo.

³⁶ Vâchi mii-yá nì quidavâha xì nsidanicuu ñàha, te sàhà poder xi-ya iá ì nsidaa ñà-jaàn ñuhivì yohó. Te cuisì sàhà (ñà-nì queè gá más tnùñuhu) xì-yá, ñâyùcànduá nì sàcòo nsidaámà, ansivèhé cahnú-yá nicanicuahàn. Amén.

12

Nansa cuní Dios quida-nda xi vida xi-nda

¹ Pues vichi, sàhà-ñá cuàhà guá sàni cuhi ini-yà ndohó, ñàyùcànduá, sacúndáhvî nùu-nsiá ñà-dayáha dahuun-nsia mii-nsiá ndahà-yá, ñàni. Vàchi nú ducán, dandu queamà na ian mii-nda nduu-nda promesa sàhatahvi-ndáyá, doco iin ñà-itiácú. Te ñà-jaàn nduú stná meru promesa ìi cudú ini-yà sàhà-xí, vàchi divi nacua ndiá ìcà-ndà cahvi vii-ndáyá ini anima-nda nduájàn.

² Doco modo chicuèhè nihnú ini nèhivi ñuhivi yohó, màsà cúnchícùn gà-ndañá. Xiñuhu ndusaa dahuun sàxinítnùní-nda sàhà-ñá dâma modo xi-nda, vàchi nú ni nácùnihu ndiaha ini-nda, dandu sàà-nda cundaà vâha ini-nda nansa cuní-yà quida-nda, vàchi cuàhà obra vâha cudú ini-yà quida-nda, xi cuàhà ñà-íá vii.

³ Yùhù sàni nihitáhvi gracia nùu-yá (ñà-quide chuun ndiaha xí-yá). Ñàyùcànduá, cachí xi nsidaa-nsiá ñà-mà vâha ndanihi vâha-nda mii-nda más gà nùu ñà-nduá ndiá ìcà-nda. Xiñuhu nacani sahnú ini-nda sàhà mii-nda según nansa ni sàhatahvi-yá iin iin-nda cunindisa-ndáyá, (te ducán cunucuachi-nda nùu-yá).

⁴ Na ian indêhe-nda iquicúñú-nda, cuàhà ñà-nduá icúmíâ, doco iin ian xi chuun quidá.

⁵ Pues ducání íá stná ndohó. Sàhà-ñá nchícùn-nda Cristu, iin-ni iquicúñú xinduu nsidaa-nda, mate cuàhà-nda, vàchi iin-ni chindéé stnaha-nda iin-nda xi inga-nda nahì cuerpu-nda.

⁶ Ñàyùcànduá, iin iin-nda sàni nihitáhvi-nda iin ñà-vâha cui quida-nda según nansa ni sàhatahvi-yândò gracia xi-ya. Ñàyùcànduá, nú sàni nihitáhvi-nda càhàn-nda iin razón ndiaha quixí nùu-yá, dandu divi ñà-jaàn nduá ni cúnsihi ini-nda quida-nda nacua sàà-nda xinindisá-nda.

⁷ Te ò nú sàni nihitáhvi-nda cunucuachi-nda nùu ñanitnaha-nda, dandu divi ñà-jaàn ni quidá stná-nda. Daaní, nú ñà-chinaha-nda ñanitnaha-nda nduá ni nihitáhvi-nda, dandu divi ducan ni quida-nda.

⁸ Daaní, nú ni nihitáhvi-nda danácuàhandee stnahá ini-nda, dandu divi ducan ni quidá ndisa stná-nda. Te ò nú chuun ni nihitáhvi-nda nduú ñà-dacútáhvi-nda ñanitnaha-nda iñâha, dandu divi ñà-jaàn ni quidá stná-nda, doco màdi sàhà-ñá ndanihi vâha nèhivi-ndó. Còó. Te ò nú ni nihitáhvi-nda ñà-cunuù-nda (chuun xi Dios), dandu ñà-jaàn ni quidá stná-nda, doco vivíi-ni ni quida-ndañá. Daaní, nú chuun ni nihitáhvi-nda nduú ñà-cundehe ndàhvî stnaha-nda, dandu ni cudú ini-nda quida-nda ducán.

Nansa ndiá ìcà-nda quida-nda nú sàni quihìn-nda ichi Jesús

⁹ Nsidaa-nda, icúmí-màdè cuu stnahá ini-nda sàhà-nda, doco màsà dánání uun-nda. Te ni loho màsà cúú ini-nda sàhà ñà-có-íá vâha. Còó; cuisí ñà-íá vii ni cúnchícùn-nda.

¹⁰ Te xiñuhu stná ñà-cuni màni stnahà-nda, vàchi iin-ni ñani xinduu-nda; te siempre xiñuhu quidañuhu stnaha-nda, te ni nácóó stná-nda ñanitnaha-nda ni queé tnùñuhu xí mii-né, (màdi ndohó).

¹¹ Màsà cudúsán-nda; còó. Ni cuàhandee ini-nda quida-nda ñà-nduá quidà-nda. Xi nsidaa anima-nda ni cúnucuáchi-nda nùu Stoho-nda Señor.

¹² Te iin-ni ni cudú stná ini-nda sàhà tnùndé ini ndiatu-nda nùu-yá. Te nú yâha-nda tnùndohó, dandu iin-ni ni quidándéé stná ini-nda, te nicanicuahàn ni càcàn tàhvi-nda nùu-yá.

¹³ Te nú íá ñà-nduá xiñuhu iin nèhivi xí Dios, dandu ni chindéé-ndáné. Te siempre ni quidañuhú-nda nècuàchì sàà visita vehe-nda.

¹⁴ Daaní, nèhivi quidá quíni xí-nda, ni càcàn tàhvi-nda sàhà-né, màdi-ñá càcàn chihán-nda diquì-né.

¹⁵ Ni cùndóó díi-nda xi nècuàchì cudú ini-xi, te ò nú tnùnsí ini ndoó-né, dandu stná ndohó ni cùndóó stná-nda tnùnsí ini.

¹⁶ Iin-ni ni cùndóó màni nsidaa-nda. Màsà cútúxí ini-nda mii-nda nduu-nda mii-nda; còó. Xiñuhu ñà-cunihnu ndahvi ini-nda. Màsà cúnihnú ini-nda nchichí gà-nda.

¹⁷ Te nú sàni quida quini nèhivi xi-nda, màsà nácání ini-nda naxicocuñ-nda quida stná-nda xi-né nacua ni quida mii-né xi-nda. Siempre ni cuàhandee stná ini-nda quida vii-nda xi nsidaa nèhivi.

¹⁸ Dècuèndè ñà-nduá sàà-nda quida-nda, ducán xiñuhu cundoo màni-nda xi nsidan-icuú-né.

¹⁹ Ñani màní, màsà nàchítacùhá-nda ñà-nduá quidá nèhivi xi-nda. Nùu Dios ni ndóo nsidaájàn, vàchi dohó cachí-yá nùu tutu ìi: “Cuisí yùhù icúmí nachitacùhá xi sàhà nsidaa iñâha. Nsidaa ana inñicá, icúmí-nè danáà-né quide, cachí Stoho-nda Señor”.

²⁰ Daaní, dohó cachí stná tutu ì: “Nú íá iin ana xíní ùhì xì-ndà, te xíhì-nè doco, ò xíhì-nè tècuí, dandu ni dácuí-xí-ndánè, te ni cuáha stná-ndané tècuí coho-ne. Vàchi nú ducan ni quida-nda, dandu icúmi-nè nducahan-ne”.

²¹ Màsà cuáha-nda quida stná-ndà nacua quidá nèhivì malu xì-ndà; còo. Ni quidá víi-nda xi-né, vâchi sâhâjan ñâ-sàni cundee-nda nù-né nduá.

13

¹ Nsidaa-nda ni cúníni-ndá nècuàchì xídandacú, vâchi Dios nduú ana ni chitnùni ìni-xi cundoo ana dandacú nsidanicuú lugar. Nècuàchì icúmi cargu vichi, nù mii-yá ni ñhì-né chuun ma.

² Ñâyùcândüá, iin nècuàchì cahíchi ìni xì autoridad, divi ley xi mii-yá nduá cahíchi stná ìni-nè. Te nsidaa ana có-ndùlócò (sàhà ley mà), tnùndoho nduá icúmi-nè ñhì-né.

³ Vâchi chuun xi nècuàchì dandacú, có-ndüá ñâ-dayúhì xì-ndà te nú quidá víi-nda. Còo. Cuisi nècuàchì có-quidá víi icúmi-nè dayúhì-nè. Te nú có-cùni-ndá dayúhì-nèndò, dandu cuisì ñâ-íá víi ni quida-nda, dandu icúmi nècuàchimà cudü ìni-nè sàhà-ndà.

⁴ Vâchi ducán queá na iin chuun xi Dios nduá quidá-né sàhà ñâ-vâha xi-nda. Doco nú có-quidá víi-nda, chicá vâha ni yúhì-ndà, vâchi autoridad mà, icúmi-nè derechu dandohó-nèndò, te vâtùni quida-neá. Vâchi na ian nù Dios xinúcuáchì-nè na dandohó-né ana có-quidá víi.

⁵ Ñâyùcândüá, xiñuhu cunini-ndané, doco màdi cuisì sàhà-ñâ yúhì-ndà ñhì-ndà castigu, còo; sàhà stná ñâ-màsà cùnsidá cuàchi-nda (nù Dios).

⁶ Ñâ-jaàn nduá disàhà-xí chiyâhvi stná-ndà renta nù ñuu-ndà. Vâchi autoridad xi-nda, na ian nù Dios xinúcuáchì-nè, te ñâ-jaàn nduú chuun xi-ne.

⁷ Ñâyùcândüá, xiñuhu danáa-ndà ñâ-ndüá iníhíca-ndá nù iin ñhì-nè. Nècuàchì xícàn ñhì-nè sàhà ñuu-ndà, ni cuáha-ndané, xì stná nècuàchì xícàn renta. Te nsidaa ana xiñuhu quidañuhu-nda, ni cóo tnùñuhu xi-nda nù-né.

⁸ Ni-ñâha màsà cúnihíca-ndá nù nèhivì. Doco ñâ-ndüá iníhíca ndisa-nda nduú ñâ-cuu ìni-nda sàhà-né. Te nú ni quida-nda ñâ-jaàn, dandu ñâ-sàni quida-nda cumplir nsidaa ñâ-ndüá cachí ley ì nduá.

⁹ Vâchi dohó cachí ley mà: màsà càhàn-ndà xì inga ana có-ndüú nècuàchì vehe-nda, te màsà càhni stnaha-nda, ni màsà quidácuíhñá-ndá; ni màsà càhàn-ndà iin tnùhu sàhà ñânitnaha-nda; ni màsà xího stná-ndà ñâ-ndüá icúmi nècuàchimà. Te íá gà màs ñâ-ndüá cachá, doco nsidaa palabra jaàn, iin cuisì palabra-ni nduá, vâchi ñâ-ndüá cuní cachàmà nduú ñâ-cuu stnahá ìni-nda sàhà-ndà nacua cuú ìni-nda sàhà mii-nda.

¹⁰ Te nú ducán quida-nda xi ñânitnaha-nda, dandísá (ñâ-quidá víi-nda xi-né nduá), vâchi còo ñâhu quidá-ndà xi-né. Ñâyùcândüá, nú cuú stnahá ìni-nda sàhà-ndà, dandísá ñâ-sàni quida víi-nda cumplir ley ì nduú stná.

¹¹ Nsidaámà xiñuhu quida-nda, vâchi ináhá-ndá nansa vâxi tiempu vichi, meru tiempu (ñâ-quida víi-ndà) nduá; ñâyùcândüá màsà cundóo-ndá quidámáxiní-ndà, vâchi vichi chicá sâcüyátní quívi càcu dahuun-nda, mà cuéé cuàhà gà na ian (ñâsà ñhñu ìni-nda) na quívi ni xâinidisa-nda mii-yá.

¹² Te vichi sâ-ítúu tiempu danátnùú (Dios ìni anima cuàhà nèhivì) ñhìcutu, vâchi tiempu vichi (na xicá-né ichì) ñâá, yâchì icúmiá yâha. Ñâyùcândüá, ni nácóo dahuun-nda nsidaa ñâ-ndüú chuun xi ichì ñâá ma, te ni cùtùha-nda quida-nda chuun vâha ñâ-cui chindee xi-nda caca-nda ichì ndé datnúú-yândó.

¹³ Xiñuhu cacanuú víi-ndà nacua datnúú-yà ìni-nda. Te nacoo dahuun stná-ndà ñâ-xíni-nda, xì-ñâ quidá-ndà escándalo, te màsà càhàn stná-ndà xì nèhivì cóni nándàhà xì-ndà. Ni màsà quidá ndevàha stná-ndà ñâ-íá quini; ni màsà nâá stnahá stná-ndà, te màsà cùmbidia stnahá ìni-nda sàhà-ndà.

¹⁴ Cuisi nacua ñhñú ìni Stoho-ndá Jesucristu, ducan ni cúnihñú stná ìni-nda, te ñâ-jaàn nduá icúmi chindee xi-nda. Ni-iyuhu màsà cúnihñú ìni-nda ñâ-ndüú ñâ-chicuèhè ñhñú ìni nèhivì ñhñivì, còtò sàà-ndà quida stná-ndà ñâ-jaàn.

14

Màsà cùtnùhu-nda ñânitnaha-nda

¹ Dava nèhivì, mate xiníndísá stná-nè mii-yá, doco có-sàà-nè cundaà ìni-ne (nansa íá nsidaa ley xi-ya). Doco ndohó, xiñuhu quidañuhu-ndané, te càhàn-ndà xi-né, doco màsà nâá-ndà xi-né sàhà ñâ-có-quidá-né nacua quidá ndohó.

² Vâchi dava-nda, nsidanicuú comida xixi-nda; íá víá, cachí-ndà. Doco dava nèhivì, có-sàà-nè cundaà ìni-nè, ñâyùcândüá có-sàxí-né ni-iin cuñu, cuisì inga ñâhà.

³ Pues nècuàchì xixì nsidanicuú iñàha, mà váha cahíchi ini-nè iin ñanitnaha-ne có-saxí cuñu. Te nècuàchì có-saxí cuñu mà, màsà cuítnùhu-ne ñanitnaha-ne saxí xi cuñu, vâchi iin-ni sàni ndee váha stná nècuàchì mà nùu Dios.

⁴ Vâchi nú xítñùhu tnaha-nda ducán, dandu queámà na ian quida-nda na xítñùhu-nda ana quidáchúun nùu inga nèhivì, te (ináhá-ndá) có-queè víamà. Cuisì lamú xi nècuàchì mà icúmí cachi a quidá víi peón xi-ne, á cóo. (Ñàyùcándüá, màsà cuítnùhu-nda inga ana xinúcuáchì nùu Dios), vâchi ádi vátuni sàa-nè quida víi-nè, vâchi icúmí-yâ chindee-yânè.

⁵ Dava nèhivì, quivì señaladu nduá nsidácáhnù-nè, doco dava ga-nè, iin-ni nihnú ini-nè nsidaa quivì ndiaá. Pues cada iin iin-nda ni cúnáhá-ndá nansa cuní-ndá quida-nda.

⁶ Nècuàchì chívàha xi iin quivì señaladu, sàhà-ñá nihnú váha ini-nè Stoho-ndá Señor nduá. Te ducání stná nècuàchì có-chívàha iin quivì señaladu, nicanicuahàn nihnú váha stná ini-nè mii-yá. Te nècuàchì xixì nsidanicuú stná comida, nùu Stoho-ndá Señor xixí-nèá, te naqumáni stná-nèyà sàhà-ñá. Daaní, nèhivì có-xixí ndéni comida ni cui, divi nùu stná mii-yá có-xixí-nèá, doco naqumáni stná-nèyà (sàhà ñà-nduá xixí-nè).

⁷ Vâchi màdi micuisi-nda ndoo-nda ñuhivì yohó, te màdi ini-ni mii-nda cachi-ndá cui-nda.

⁸ Vâchi nú itiacú-ndá ñuhivì yohó, divi nùu Stoho-ndá Señor ndoo-nda; te na sàá quivì cui-nda, mii-yá dandacú-yá sàhà stná mà. Ñàyùcándüá, a ducán itiacú-ndá te ò ní xihì-nda, iin-ni nduu-nda nèhivì xí Stoho-ndá Señor.

⁹ Vâchi Cristu, divi sàhà ñà-ni sàá-yâ cusahnú-yá nùu nsidaa nsii, xi stná nècuàchì itiacú, sàhà ñà-jaàn nduá ni xihì-yà, te ni natiacu-yà ni ndanchito-ya.

¹⁰ Ñàyùcándüá, mà váha cuítnùhu-nda ñanitnaha-nda; mà váha cahíchi stnahá stná ini-nda. Vâchi nsidanicu-nda, icúmí-ndá màcuita stná-nda nùu-yá, dandu cachi-yá xi-nda a ní quida víi-nda, á cóo.

¹¹ Vâchi ducán cachi stná tutu ì ndé cáhàn Stoho-ndá Señor, cachi-yá: Nicanicuahàn itiacuí, ñàyùcándüá seguru nduá yohó cachí vichi: icúmí nsidanicuú nèhivì màcuitasisi-nè nú, te cachi-nè (divi Dios nduí).

¹² Ñàyùcándüá, vátuni cundaá ini-nda, iin iin-nda icúmí-ndá nacuaàha-nda cuenta nùu-yá.

Cuidadu ni cundóo-ndá sàhà ñà-nduá quida-nda, còtó sàhà ndohó sàa iin ñanitnaha-nda cuida cuàchi-ne

¹³ Ñàyùcándüá, màsà cuítnùhu ga-nda ñanitnaha-nda. Doco iá ndisa ñà-nduá xífuhu quida-nda: xífuhu cundoo-nda cuidadu ñà-màdí sàhà ndohó cuida cuàchi iin ñanitnaha-nda.

¹⁴ Vâchi yuhù ináhí, còò ni-iñàha iá ñuhivì yohó nsidá cuàchi-xi ini-ni miá. Te ducán cachi stná palabra ni cachi Stoho-ndá Jesús xi-nda. Doco nú mii-nda dacuidá cuàchi-nda iñàha, dandu na ian iá ndisa cuàcha nùu-nda.

¹⁵ Ñàyùcándüá, nú cudúchì ini iin ñanitnaha-nda sàhà iin ñà-nduá xixi-nda (ñà-tùxì ini-nè cuàchi nduá), dandu màsà cúxí gá-nda ñà-jaàn, vâchi nú ducán, dandu có-quidá víi-nda, na ian có-cúgá ini-nda sàhà nècuàchì mà nduá. Ñàyùcándüá, cuidadu ni cundóo-ndá ñà-màsà sàa ndáfuhu anima iin ñanitnaha-nda sàhà ñà-cudíí guá ini-nda xixi-nda, vâchi sàhà stná nècuàchì mà ni xihì Cristu.

¹⁶ Vátuni iá nsidaa ñà-nduá quida-nda cahan-nda, doco cuidadu ni cundóo-ndá còtó cachi iin ñanitnaha-nda quini iá ñà-nduá quida-nda.

¹⁷ Vâchi ley xi rey xi-nda Dios, có-nduá iin ley sàhà ñà-xixi-nda ò ñà-xihì-nda. Còó, vâchi nùu mii-yá ñà-ndiaá ndisa nduú ñà-quida víi-nda, xi ñà-cundoo manì-nda, xi ñà-cudíi stná ini-nda quida Espíritu ì xi-yá.

¹⁸ Vâchi nú ñà-jaàn quida-nda, dandu divi ñà-xinúcuáchì-ndá nùu Cristu nduá, te cudíi stná ini Yua-nda Dios sàhà-ndá, decueñdè nùu stná nèhivì icúmí-ndá ndee váha stná-nda.

¹⁹ Ñàyùcándüá, xífuhu nacani cuàhà ini-nda nansa cundoo manì-nda xi ñanitnaha-nda, te nanducu stná-nda nansa nacuaàhandee ini-ndané.

²⁰ Te (cuidadu ni cundóo stná-nda) sàhà ñà-nduá xixi-nda, còtó sàhájàn dandáñuhú-ndá obra xi Dios (ini anima inga nèhivì). Ináhí, iá permisú caxi-nda, ò cuxi-nda ndéni iñàha ni cui. Doco mà váha caxi-ndañá nú tuxí ini inga-nè nduá cuàchi, màdí sàhà ndohó cuàhandee ini-nè caxi stná-nèá.

²¹ Chicá váha màsà caxi-nda iin cuñu, ò coho-nda iin vínu, ò ndéni iñàha ni cui nú tuxí ini iin ñanitnaha-nda cuàchi nduá, te vihini quida stná-nè ducán ñà-mà fuerte anima-nè.

²² Mate ináhá-ndá iá váha caxi-nda ndéni iñàha ni cui, doco ini-ni mii-ní-ndá ni chívàha-nda ñà-jaàn, chicá váha, dandu cuisì mii-nda xi Dios cunaha-nda sàhà-ñá.

Nú còò ni-iin duda, te ináhá-ndá màdí cuàchi nduá quida-nda, dandu nansicáhán-ndá.

²³ Doco nú iá-nda xi duda, te có-ínáhá ndisa-nda a cuàchi nduá ñà-caxi-nda iñàha, ò á cóo, dandu iin falta cundua nú ni caxi-ndañá, vâchi có-xiníndisá ndisa-nda iin ñà-vàha

nduá. Vâchi cunaha-nsiá, nsidaa ñà-nduá quida-nda, te có-xiníndisá-ndá nduá iin chuun vii, dandu cuâchi cundua.

15

Màsà quidá-ndá cui si ñà-cudü inì-ni mii-nda, sino que ñà-cunduu ñà-vàha xi ñanitnaha-nda

¹ Ñâyücànduá, ndohó tè-sà-xiníndisâ fuerte, ndiá icà-ndà quidandee ini-ndà sàhà ñanitnaha-nda nú tâñáha ga cunindisá vâha-ne. Te xiñuhu ñà-chindee stná-ndànè, màdi-ñá quida-nda cui si ñà-cudü inì-ni mii-nda.

² Vivii-ni ni quida-nda xi ñanitnaha-nda sàhà-ñá cundua ñà-vàha xi-ne, te cundoo-ne contentu, vâchi nú ducán, dandu chicá icúmi-nè nacuahandee ini-nè.

³ Vâchi ni stná Cristu, cóni quidá-yá cui si ñà-nduá ni cudü inì-ni mii-yá. Vâchi dohó cachí stná nùu tutu ìi, (ndé cáhàn Cristu xi Yuamáni-yá), cachí-yá: “Ñà-nduá ni canáhà nèhivi diqui mii-ni, yùhù ni nacuida xi nsidaajàn”.

⁴ Cunaha-nsiá, nsidaa palabra ni tiaa nècuàchi sàhana nùu tutu ìi, sàhà-ñá dacuahá stná ndohó nduá, te ducán dandu chicá cutùha-nda cucumi-nda paciencia, te nacuahandee stná ini-ndà, vâchi nú ducán, dandu chicá nsinuu ini-ndà ñà-íá ndisa tnùndé ini ndiaha xi-nda.

⁵ Pues divi Dios nduú ana chindéé xí-ndá quidandee ini-ndà ducán, te nacuahandee stná ini-yàndó. Ñâyücànduá, nùu mii-yá xicàn tàhvi ñà-ni cùndóó mání nsidaa-nsiá nacua cuní Jesucristu quida-nda.

⁶ Te xicàn tàhvi stná ñà-iin-ni ni cuníhnú vâha ini nsidaa-nsiá, te iin-ni ni náquimáni stná-nsiá mii-yá ana cáhvi Stoho-ndà Jesucristu, divi Yuamáni-yá.

⁷ Te (ináhá stná-ndà) cóni cáhichi ini-yá ni-iin-nda. Ñâyücànduá, xiñuhu-ñá cahvi stnaha-nda iin-nda xi inga-ndà, dandu chicá quee tnùñuhu xí-yá.

Nansa ni chitnùni ini Dios ñà-cunitnùhu nèhivi nsidanicuú ñuu razón ndiaha xí-yá

⁸ Nsidaa palabra jaàn, ñà-yohó nduá cuní cachà: ni quixi Cristu (ñuhiví yohó) ñà-quida-ya chuun ndiaha xí-yá sàhà raza-nsi Israel sàhà-ñá cuu ndisa ñà-nduá ni cachí Dios xi xii-nsi sàhana, te sàhà ñà-cundaà stná ini nèhivi ñà-mà túha-ya dandahví-yàndó.

⁹ Daaní, nsidaa stná nèhivi inga raza, ni indehè ndàhvi stná-yá mii-né, te vichi vátuni naquimani stná-nèyá sàhámà. Vâchi dohó cachí tutu ìi:

Ícúmi naquimani mii-ní (Dios), te cunini stná nèhivi nsidanicuú ñuu; cuàhin nacuatui alabanza xi-ní, te taví tnùñuhu xí-ní.

¹⁰ Daaní, nùu inga xaan xí tutu ìi mà dohó cachí stná:

Vátuni cudü stná ini mii-nsiá nèhivi nsidanicuú ñuu, nacua cudü ini nèhivi meru ñuu ni nacàxin-ya.

¹¹ Daaní, inga xaan dohó cachí stná:

Nsidaa mii-nsiá nècuàchi inga ñuu, te inga raza, ni náquimáni-nsiá Dios, te ndanihi cahnú stná-nsiâyà.

¹² Daaní, stná Isaías, ni tiaa stná-nè iin palabra, te dohó cachá:

Ícúmi quesaa iin descendencia xi Isaí, te chuun xi-ya cunduu ñà-cusahnú-yá nùu nèhivi nsidaa ñuu, te icúmi-nè cahvi-ne xi-yá, ni cachí Isaías.

¹³ Pues Dios nduú ana sàha xi-nda tnùndé ini ndiaha xi-nda; ñâyücànduá xicàn tàhvi sàhà nsidaa mii-nsiá nècuàchi xiníndisá-xí-yá ñà-ni cùndóó-nsiá contentu, te ni yàha vâha stná-nsiá quida-ya, dandu chicá más icúmi coo tnùndé ini xi-nsia quida ndudu ìi xí Espíritu ìi xí-yá.

¹⁴ Nànì, có-íé' xì dudu sàhà-nsiá; ináhi, vâha ndisa ini-nsiá, te cundàà vâha stná ini-nsiá (sàhà ichi-yá), vátuni dacuahá tnahá stná-nsiá ichi vâha.

¹⁵ Doco nùu tutu yohó tiaí iin palabra nùu-nsiá, te mate ní cáhàn ndéi xi-nsiá iyuhu, doco cui si ñà-ni dànsínúu inì mii-nsiá (sàhà ichi-yá) nduájàn. Vâchi (chuun quide ducán) nduá ni nihitáhvi nùu-yá na ní quida-ya gracia sàhi

¹⁶ ñà-cundui iin ana cunucuachi nùu-yá, te cacanui mahi nèhivi nsidaa ñuu cachitnùhi xi-né ñà-nduú razón ndiaha xí Jesucristu. Vâchi cuní sàà cuàhà-né nùu-yá na ían ni cùndúú-né promesa dóqui nùu-yá, dandu cudü stná ini-yá sàhà-né ñà-sàni nduhii stná anima-nè ni quida Espíritu ìi.

¹⁷ Vichi sàhà-ñá ni chindee Jesucristu yùhù, ñâyücànduá vátuni cudü ini sàhà chuun xi-ya sàni quide.

¹⁸ Doco iin chuun ni quida inga nèhivi, cóò, mà cáhàn sàhámà, cui si sàhà chuun ni chindee-yá yùhù, te ni cachitnùhi xi nèhivi sàhà-yá. Te cuàhà stná ñà-nduá ni quide, te ducán ni xiníndisá cuàhà nèhivi inga ñuu.

¹⁹ Cuàhà milagru ndiaha nì quide, xì cuàhà seña fuerte, te cuàhà gá nì chindee stná ndudu ìì xí Espíritu xi-ya. Ñâyücándüá, inicutu sàni cachitnùhi razón ndiaha xí Cristu ndé ñuu Jerusalén xì dècuèndé ladu Ilírico.

²⁰ Vàchi ñà-ndüá siempre cunf nduá cùhin ñuu ndé tàcùnì nèhivì palabra xi Cristu, te cachitnùhi xì-né ñà-ndüù razón ndiaha. Cò-cunf cùhin ndé sà-íá ana quidá xì chuun ìì mà.

²¹ Còó, vâchi cunf coo nacua cachí tutu ìì:
Nècuàchi ñuu ndé tãñáha ga sàà razón sàhà-yá, icúmí-né cunitnùhu-ne. Mate vichi tãñáha ga cunini-ne palabra mà, doco icúmí-né sàà-né cundaà ini-né.

²² Cunaha-nsiá, divì sàhà chuun jaàn tãñáha ga sàì ndé ndoó-nsiá, mate ní cunì sàì cuàhà xichi ní cùí.

²³ Doco vichi, còó cá chuun icúmí ladu yohó, te sàcànì cuà cuàhà gá cunf sàì nàcòti mii-nsiá.

²⁴ Ñâyücándüá, quivì quide disponer cùhin ladu España, dandu yàhi. Daaní, nú sàni sandoo chii-nda contentu, dandu iin ñà-vàha cundua nú ni chindéé-nsiá yùhù ñà-naquihin tui ichì cùhin ladu España.

²⁵ Doco vichi cùhin ñuu Jerusalén cunihì iyuhu ñà-chindee xì nèhivì xí Dios ndoó yucán.

²⁶ Vâchi nèhivì ladu Macedonia xì ladu Acaya, nì nacani ini-né nì dàcuátnáhà-né iin ñà-chindee xì nècuàchimà, vâchi dava nècuàchimà, ndahví yáha-ne.

²⁷ Ñâyücándüá, nì cudüì ini nècuàchi xicà mà nì dàcútãhvi tñahá-né, vâchi ducán ndiá icà-né quida-ne, vâchi divì nùù nèhivì ñuu Jerusalén mà nì quixi palabra vâha xiníndisá-né, nacua mii-né, (te ducán stná nsìuhù xì nsidaa stná mii-nsiá hermanu) ndoó inga ñuu. Ñâyücándüá, ndiá icà-ndà chindee-nda sàhà necesidad icúmí nècuàchi ñuu Jerusalén mà.

²⁸ Daaní, nú sàni dàxínuì chuun nacoì ñà-ndüá nì cutahvi nècuàchimà, dandu quihin tui ichì cùhin ladu España, te ichì mà icúmí yáha stnàì ndé ndoó-nsiá.

²⁹ Te nú sàni sàì, ináhì ñà-icúmí Cristu dachitu-yá anima nsidaa-nda ñà-ndiaha ìì icúmí palabra xi-ya.

³⁰ Nãni, yùhù ináhì, iin-nì nchícùn nsidaa-nda Stoho-ndà Jesucristu, te cuú stnahá stná ini-ndà sàhà-ndà quidá Espíritu ìì. Ñâyücándüá, sacúndãhvi nùù-nsiá ñà-iin-nì ni cãcàn tãhvi-nsiá sàhì nùù Dios, nacua quidá yùhù, xícàn tãhvi stnàì nùù-yá.

³¹ Cãcàn tãhvi-nsiá sàhì ñà-nì cãcui nùù ndahà nèhivì cò-xiníndisá ndoó ñuu Judea. Daaní, sàhà chuun cùhin ñuu Jerusalén ñà-nacoì ñà-chindee xì nèhivì xí Dios yucán, cãcàn tãhvi stná-nsiá nùù-yá sàhà ñà-nì cùdñì ini nècuàchimà sàhà ñà-ndüá cunihì cùhùn.

³² Dandísá vãtùnì cudüì stná ini na sàì ndé ndoó-nsiá, nú cuní-yá sàì, te después coo chí xì-nsiá quetatuì.

³³ Pues vichi nì cúndóo-nsiá xì Dios, te ni yáha vâha-nsia quida-ya. Amén.

16

Ñà-ndüá nì cachi Pablo na ní casàhù-né xì nsidaa nèhivì ináhà-né ñuu Roma

¹ Yùhù quidé recomendar dofa Febe, vâchi vâha ndisa-ne, na iin cùha-nda nduú-né, te nduú stná-né iin ana xinúcuáchì nùù nèhivì xí Dios natácá ñuu-né Cencrea.

² Ñâyücándüá, nacuna-nsia yehè-nsiá nùù-né nacua ndiá icà-ndà quida-nda xì nèhivì xí-yá, vâchi iin-nì nchícùn stná-né Stoho-ndà Señor. Te nú íá necesidad icúmí-né sàhà iin chuun xi-ne, dandu chindee-nsiáné, vâchi cuàhà gá sàni chindee stná-né nèhivì dava ga, xì stná yùhù.

³ Cásàhù xì Priscila xì Aquila; nècuàchi nìsa cutnahá stná xí quidá-nsí chuun xì Jesucristu nduú-né.

⁴ Dècuèndé cuàhàn-né cui stná-né sàhì nì cùí, ñâyücándüá yùhù naquímánì mii-né; te màdi cúisi yùhù, ndé stná nsidaa nèhivì cahvi xì Dios cuàhà gá ñuu, naquímànì stná-né nècuàchimà.

⁵ Te casàhù stnàì xì nsidaa gá nèhivì natácá vehe nècuàchimà cahvi xi-yá.

Daaní, casàhù stnàì xì Epeneto, vâchi màni gá-né nùù; nècuàchi primeru nì xinindisa-xi Cristu ladu Acaya nduú-né.

⁶ Te casàhù stnàì xì María. Ináhì, cuàhà gá quidá nècuàchimà chuun (xì Dios) jaàn ndé ndoó-nsiá.

⁷ Te casàhù stnàì xì nècuàchi ñuu nani Andrónico xì Junias. Ndüù-né íá fama-né nùù nsidaa gá nècuàchi apóstol. Te cunaha-nsiá, tãñáha ga sàì tenchicuìn ichì Cristu, doco sà-xiníndisá-né mii-yá. Daaní, después iin-nì nì sandiadi stná-nsiá vehècãa.

⁸ Daaní, casàhù stnàì xì Amplias, vâchi iin-nì íá stná-né nùù Stoho-ndà Señor, te cuú ndisa ini sàhà-né.

⁹ Te casàhù stnàì xì Urbano, vâchi iin-nì nìsa cutnahá-nsí quidá-nsí chuun xì Cristu. Daaní, casàhù stnàì xì Estaquis, vâchi màni stná nècuàchimà nùù.

¹⁰ Te cásàhù stnàì xì Apeles. Iin nèhivi seguru xì Cristu nduú stnà-nè. Te cásàhù stnàì xì nsidaa nèhivi vehe Aristóbulo.

¹¹ Daaní, cásàhù stnàì xì nècuàchì ñui nani Herodión. Te cásàhù stnàì xì nsidaa nèhivi vehe Narciso xiníndísà stnà xì Stoho-ndà Señor.

¹² Daaní, cásàhù stnàì xì Trifena xì Trifosa. Divi chuun xì Stoho-ndà Señor xíquida stnà nècuàchimà. Te Pérsida, cuàhà gá obra xì mii-yá quidá stnà-nè, te màni cuàhà stnà-nè nùu nsidaa-nda, ñàyùcàndùá cásàhù stnàì xì-né.

¹³ Daaní, cásàhù stnàì xì Rufo. Iin nèhivi vaha ndisa xì Stoho-ndà Señor nduú stnà-nè. Stnà dihi Rufo, cásàhù stnàì xì-né, vachi na iin dihi mii nduú stnà nècuàchimà, cunaha-nsiá.

¹⁴ Daaní, cásàhù stnàì xì Asíncrito, xì Flegonte, xì Hermas, xì Patrobas, xì Hermes, xì nsidaa stnà ñani-nda ndoo vehe-ne.

¹⁵ Daaní, stnà Filólogo, xì Julia, xì Nereo, xì cùha-ne, cásàhù stnàì xì nsidaa-né, xì stnà Olimpas xì nsidaa gá nèhivi xí Dios cutnàhà xí-né.

¹⁶ Te nsidaa-nsiá, nacasàhù tnahá víi-nsiá ñà-xínduu-nsia nèhivi ì xí mii-yá. Daaní, nsidaa nèhivi natácá cahvi xì Cristu (cuàhà ñuu ladu yohó), cásàhù stnà-nè xì-nsiá.

¹⁷ Yùhù sacúndàhvì nùu-nsiá, ñáni: cuidadu ni cúndóo-nsiá sàhà nècuàchi cuní datáhnèdè dava xì-nsiá, te datúcù-nènsiá iin ichì cóni dàcuàhà-nsiá. Nacoo dahuun-nsia nsidaa nècuàchimà.

¹⁸ Vachi nèhivi quidá ducán, màdi nùu Stoho-ndà Jesucristu xinúcuáchi-nè, cuisì-ní gustu síquini xì mii-né nduá quidá-né. Vii gá cáhàn-nè, te palabra vico xichúùn-né, ñàyùcàndùá mà ùhi dandahví-nè nèhivi mà-fuerte ini-xi.

¹⁹ Doco mii-nsiá, sà-quidá víi-nsiá, te cuàhà gá xaan sàni xitiá stnà cuentu nansa tùha-nsia cunini víi-nsiá (palabra xì Dios). Te yùhù, yáha ga cudí ini sàhàjàn, doco cuní ñà-más gá ni cúndáà vaha ini-nsia nansa quida víi-nsiá. Doco iin chuun malu, cóo; ni-iyuhu có-cuní mànihì tñuni ini-nsiá sàhàjàn.

²⁰ Te Dios, yàchi icúmi-yá (cundee-yá nùu) ñà-malu na ian cuànihni-ya ñini-sí, te ndòo-si tixi-xi cundehè-nsiá, vachi mii-yá, tùha-ya cuàha-yàndó paz.

Vichi ni cúcúmi-nsiá cuàhà gracia xì Stoho-ndà Jesucristu.

²¹ Yohó íá stnà Timoteo, iin nècuàchì cutnàhà xí quidá-nsí chuun ì xí-yá, te cásàhù stnà-nè xì-nsiá. Te cásàhù stnà (ùni) nècuàchì ñui nani Lucio, xì Jasón, xì Sosípater.

²² Yùhù nani Tercio, te nduí ana ni tiaa xì (palabra xì Pablo) nùu carta yohó, te cásàhù stnàì xì nsidaa-nsiá, vachi iin-ni xiníndísà stnà-nsiá Stoho-ndà Señor. (Pues vichi tucutu cachi Pablo iin palabra.)

²³ Daaní, cásàhù stnà Gayo xì-nsiá, nècuàchì divéhé-xí ndé ié'. Te divi yohó nduú stnà lugar ndé natácá nèhivi cahvi xì Dios. Daaní, cásàhù stnà Erasto, nècuàchì nduú tesorero ñuu yohó; te cásàhù stnà inga ñani-nda nani Cuarto.

²⁴ Vichi ni cúcúmi nsidaa-nsiá cuàhà gracia xì Stoho-ndà Señor. Amén.

Ultimo palabra xì carta yohó ndé naquímani Pablo mii-yá

²⁵ Vichi ni-ndánihí cahnu-nda mii-yá. Vátuni nacuahandee ini-yàndó nacua cachí razón ndiaha cachitnùhi xì nèhivi, divi palabra ni xinitnùhu-nsia sàhà Jesucristu; te divi nduú stnà palabra nisa ia dèhé caní cuà ñècuèndè sàhà.

²⁶ Doco vichi sàni tui vateá, vachi mii-yá ana itiacú nicanicuahàn, sàni dàtnùu-yà ini-nda sàhà razón xì-ya ni tiaa nècuàchì profeta sàhà. Te vichi dandacú-yá ñà-ni cuitiá palabra mà inicutu sàhà-ñá cunitnùhu nèhivi nsidanicuú ñuu, dandu cunindísà stnà-nèyà, te cunini-neyà.

²⁷ Mindaa-ní mii-yá nduú Dios, te mindaa-ní mii-yá nduú stnà ana nchichí ndisa. Te vichi sàhà Jesucristu ni naquímani-ndàyá nicanicuahàn. Amén.

Tutu Nuu Nì Tiaa San Pablo nù Nèhivì xí Dios Ndoó Nuu Corinto

¹ Yùhù nduí Pablo, te nduú stnái iin ana nì càná ñà-cucumí chuun ndiaha nù Jesucristu, vâchi ñà-jaàn nduá nì chitnùní inì Dios quide. Te yohó cutnâhâ stnái xí ñani-ndâ Sóstenes,

² tiaá-nsí tutu yohó nù nsidaa mii-nsiá nècuàchì natácá cahvi xí Dios ñuu Corinto jaàn. Nèhivì ñi xí-yá xínduu stná-nsiá ñà-sàni yâha-nsia ladu xí Stoho-ndâ Jesucristu, te nì càná stná-nsiá cunduu-nsia nèhivì cunihnu ñi inì-xi, nahi nsidaa gá nèhivì ndácùcahan xi quivì-yá, vâchi Stoho nsidaa-nda nduú-yá, nahi ndohó, te ducán stná mii-né.

³ Vichi ni cùcúmí cuahâ-nsiá gracia nù Yua-nda Dios xí nù Stoho-ndâ Jesucristu, te contentu nì cùndóó-nsiá quida-ya.

⁴ Yùhù, nicanicuahàn naqumáni⁷ Dios sâhâ-nsiá, vâchi cuahâ gá sàni sâhatahvì-yá mii-nsiá sâhâ-ñâ xínduu-nsia nèhivì xí Jesucristu.

⁵ Nsidanicuú modo sàni nihitâhvi-nsiá nù-yá; tûha-nsia càhàn ndiaha-nsiá, te cundâá vâha stná inì-nsia (sâhâ ichi-yá).

⁶ Ñâyucândüá, na xiní nèhivì (ñâ-ndiaha guá) quidá-nsiá vâtùni cundâá ini-nè ñâ-ndâá nduá sâni cachi-nsi sâhâ Cristu.

⁷ Vâchi có-cùmáni gá ni-inga modo nihitâhvi gá-nsiá tâhvi ndiaha nù-yá, te vichi ndiatú cuéyâá stná-nsiá naxicocuñ Stoho-ndâ Jesucristu, te cuni-ndâyá.

⁸⁻⁹ Te iin-ni icúmí Yua-nda Dios nacuahandee inì-yâ anima-nsiá, dandu mà cóó gá ni-iin falta xi-nsia nù-yá quivì naxicocuñ Dèhemanì-yâ Stoho-ndâ Jesucristu. Vâchi vâtùni cahvi-nda xi-yá, te mii-yá nduú ana sàni cana-yàndó ñâ-cundoo-nda nù Dèhemanì-yâ.

Màsâ tâhndè dava-nda

¹⁰ Sacúndâhvi⁷ nù-nsiá ñà-nì nsínúú inì-nsia Stoho-ndâ Jesucristu, te màsâ nâá stnahâ-nsiá, ñâni. Iin-ni ñâhâ ni cúnihnú vâha inì nsidaa-nsiá. Màsâ tâhndè dava-nsia. Iin-ni ni cùndóó mánì-nsiá, te iin-ni ñâhâ ni nácáni inì-nsia.

¹¹ Vâchi nacáni nèhivì vehe Cloé xí, cachí-nè ñà-sàni tâhndè dava-nsia, ñâni.

¹² Ñâ-sàni tâhndè dava-nsia nduá cachí, vâchi díin díin ñâhâ cachí iin iin-nsia. Vâchi dava-nsia, cachí-nsiá nèhivì xí Pablo nduú-nsiá, te dava-nsia, cachí-nsiá nèhivì xí Apolos ò Pedro nduú-nsiá, te dava ga-nsiá, nèhivì xí Cristu nduú-nsiá, cachí-nsiá.

¹³ Doco, ¿a ndísá ndoó cuahâ partidu xi Cristu? Còó. Té ¿a ndísá nì xihì yùhù Pablo cuenta xi-nsia? Còó. Té ¿a ndísá nì ndacùcahan nèhivì quivì yùhù na ní cuhii-nsiá? Còó.

¹⁴⁻¹⁵ Yùhù, ni cóni quidá ñi⁷ cuahâ-nsiá, cuisì Crispo xí Gayo. Ansivéhé Dios, cuisì mii-né nì quida ñi⁷, còtó cachi nèhivì nì ndacùcahn mii na ní quida ñi⁷ nècuàchimâ.

¹⁶ Pues, ndisa, stná nèhivì vehe Estéfanas nì quida ñi stnái, doco có-ináhá guè⁷ a ní quida ñi guè⁷ más gá nèhivì, á cóó.

¹⁷ Vâchi màdi-ñâ quida ñi⁷ nèhivì nduá nì dândâcú Jesucristu nùí, còó; cuisì ñâ-nacani xi-né ñâ-nduú razón ndiaha xí-yá, doco màdi ñâ-càhàn nchichí uin xi-né cundujàn, còó, còtó mà nâtúni tnùñuhu xí Cristu nansa nì xihì-yâ nchica cruz.

Cuisì ndiaá Jesucristu, màdiá càhàn nchichí-ndâ

¹⁸ Nèhivì nchicùn ichì ndé ndañuhu-nda, sácúndiaa uun-ne na càhàn-ndâ xi-né sâhâ obra nì quida Jesús (na ní xihì-yâ) nchica cruz; doco ndohó nècuàchì dâcâcu-ya, còó, vâchi nù ndohó, cahnú poder icúmí palabra mà.

¹⁹ Cunaha-nsiá, dohó (cachí-yâ) nù tutu ñi:

Cuàhìn dandâñuhí nsidaa palabra xicahàn tè-nchichí, xi stná palabra xi nècuàchì tuxí inì-xi ináhá guá, icúmí dandutí palabra mà, cachí-yâ.

²⁰ Ñâyucândüá, mà cúndiáá gá ñâ-nduá cachí guá tè-nchichí ñuhivì yohó, mate xínduu-tè maestrú xi ley sâhâ, te ò yâha ga tûha-tè càhàn-te sâhù. Vâchi sâhâ obra xi Dios sàni cundâá ini-ndâ có-ndiáá palabra tuxí inì nèhivì ñuhivì nduú palabra nchichí guá.

²¹ Cuahâ gá nandúcú-né nansa cunchichí-né, doco Dios, nì chitnùní inì-yâ ñâ-mâdi sâhâ ñâ-jaàn nihì-né cundâá ini-nè sâhâ-yâ. Ducán nì quida-ya disponer, vâchi nchichí ndisa-ya. Dandu nì chitnùní stná inì-yâ ñâ-cuitiá palabra ñi xí-yâ inicutu, te na xiníndísá nèhivì, dandu vâtùni càcu anima-né, mate (cachí nèhivì) palabra loco nduá.

²² Nècuàchì raza Judea, xicàn-né cuu iin milagru, (dandu cunindísá-né). Te nècuàchì raza Grecia, cuisì cunì-nè cunini-ne iin palabra chicá nchichí.

²³ Doco nsiùhù, palabra sâhâ nansa nì xihì Cristu nchica cruz nduá cachitnùhu-nsi, mate cudúchí inì nècuàchì raza Judea sâhâjàn, te tuxí stná inì nècuàchì inga ñuu palabra diquí nduá.

²⁴ Doco ndohó nêhivi nî nacâxin-ya, sâni cundaâ ini-ndâ sâhâ-yâ, inâhá-ndâ cahnú cuâhâ poder xi-ya, te nchichí ndisa stná-yâ. Ducán xiníndísá-ndâ, a ducán nduu-nda nêhivi raza Judea, te ò nêhivi inga raza.

²⁵ Vâchi mate ni tuxí ini nêhivi nî câhân Dios iin palabra diquí, doco cunaha-nsiá, chicá nchichí palabra mà nùu nsidaa ñâ-nduâ cui cachí nêhivi ñuhívi. Daaní, stná poder xi-ya, mate iyuhu ñâ-nduâ quidá-yâ tuxí ini-nê, doco chicá fuertéamâ nùu nsidanicuú poder xi mii-nê.

²⁶ Te xiñuhu nsinuu stná ini-nsiâ nansa nî quida Dios na ní nacâxin-yândó ñâ-cunduu-nda nêhivi xi-yâ, ñâni. Sacu-ndâ nduu-nda nêcuâchi nchichí cachí nêhivi ñuhívi, te sacu stná-ndâ nduu-nda nêcuâchi dandacú, te ò nêcuâchi cuicâ.

²⁷ Doco Dios, nî nacâxin-yândó, mate mà nchichí-ndâ. Te ¿indú chuun? Divi sâhâ-ñâ dandúcâhân-yâ nêhivi cachí xínduu ana nchichí guâ. Stná nêhivi còo poder-xi sâni nacâxin-ya sâhâ-ñâ nducahan nêhivi tuxí ini-xi chicá icúmi xí poder.

²⁸ Stná nêhivi chicá ndahví nî nacâxin stná-yâ, xí stná nêhivi cahíchi ini nêcuâchi dava ga, xí stná nêhivi chicá có-ndiáá, pues divi nduú ana sâni nacâxin-ya, te ducán cundee-yâ nùu nêcuâchi tuxí ini-xi ndiáá guâ.

²⁹ Daaní, quívi icúmi nsidaa nêhivi tnâtuu-ne nùu-yâ, mà cúnihnú gá ini ni-iin-ne ñâ-mii-nê nduú-nê mii-nê.

³⁰ Doco ndohó, nùu mii-yâ sâni ñihitâhvi-ndâ ñâ-cundoo-nda nùu Jesucristu, te datnúu-yâ sâxinítnúni-ndâ, dandu níhi-ndâ câhân nchichí ndisa-nda. Te sâhâ stná Dêhemani-yámâ sâni ndee vâha-nda nùu-yâ, te nî ndoo stná cuâchi anima-ndâ nî quida-ya, vâchi Dêhemani-yâ nduú ana nî ñânâá xí sâhâ-ndâ, te nî câcu-nda.

³¹ Ñâyücandüâ, ducán iá nacua cachí nùu tutu ñi: "Nú cuni-ndâ tavâ-ndâ tnùñuhu xí mii-nda, dandu ni cúnâhá-ndâ ñâ-cuisi Stoho-ndâ Señor nduú tnùñuhu xi-nda".

2

Cuisi sâhâ Jesús câhân Pablo xi nêhivi

¹ Yùhù, na ní sâi ñuu-nsiâ, màdi palabra nchichí nduâ nî câhîn xi-nsiá; còo. Ni màdi palabra finu guâ nî nacâni xi-nsiâ na ní cachitnùhi xi-nsiâ ñâ-nduú razón ndiaha xí Dios.

² Còo, vâchi nî nacani ini ñâ-màsâ câhîn sâhâ inga iin chuun, cuisí-ní sâhâ Jesucristu, xí sâhâ nansa ni xihí-yâ nchica cruz.

³ Te nî xini-nsiâ ndê nî cuitê', te ndê nî quidi stná ñâ-nacâni guâ ini

⁴ na ní câhîn xi-nsiâ ñâ-nduú palabra ñi xí-yâ. Màdi palabra vico uun xi maestru nchichí nduâ nî câchí xi-nsiâ daa; còo. Espiritu ñi xí Dios nduú ana nî chindee xí, mii-yâ xí milagru xi-ya.

⁵ Vâchi nî nacani ini mà váha cunchicùn-nsiâ ñâ-nduú iin palabra nchichí xi nêhivi uún. Còo, micuísí ndudu ñi xí Dios nduâ cuní cahvi xi-nsiâ.

⁶ Doco cunaha-nsiá, palabra nchichí ndisa nduâ xichúún stná-nsi na câhân-nsi xi nêhivi sâxiníndísâ váha xi-yâ. Doco tucu iá palabra mà nùu ñâ-nduâ câhân nêcuâchi nchichí ñuhívi yohó, te ò iin palabra câhân tê-xidandacú ñuhívi yohó. Vâchi mate ndee câhân-te, doco yâchi icúmi-tê ndañuhu-tê ñuhívi.

⁷ Doco nsiùhù, palabra nchichí xi Dios nduâ câhân-nsi.

Datnúu Espiritu ñi sâxinítnúni-ndâ sâhâ palabra nchichí xi Yua-nda Dios

Antes nisa ña dêhé palabra mà, cónisâ cundâá ini nêhivi. Doco cunaha-nsiá, dècuèndê na táyô ñuhívi, dandu nî chitnùni ini-yâ ñâ-ndohó sââ-ndâ cundaâ ini-ndâ sâhâ palabra mà, te ducán ñihitâhvi-ndâ sââ-ndâ gloria xi-ya.

⁸ Doco tê-xidandacú ñuhívi yohó, cóni sââ-te cundaâ ini-te palabra nchichí ñi mà, vâchi nú ni cundââ ini-te ni cuí, mà câhni-tê Stoho ndiaha-nda nchica cruz.

⁹ Doco cunaha-nsiá, dohó cachí nùu tutu ñi:

Cuâhâ ñâ-vâha sâni nsidayucun Dios ñâ-ñihitâhvi nêcuâchi cuú ini-xi sâhâ-yâ. Doco ni-iin nêhivi, tâñâha ga cuninúu-nê nansa iá mà; tâñâha ga cunitnùhu-ne sâhâ ñâ-nsiaha guâ mà; ni-iin xichi cóni ñihnú ini-nê nansa coa.

¹⁰ (Pues mate ducán ndisa nduâ), doco ndohó, sâni cundaâ ini-ndâ sâhâ-ñâ, sâ-inâhá-ndâ nansa iá, vâchi ducán sâni quida Espiritu ñi xí-yâ. Vâchi Espiritu ñi, inâhá-yâ nsidanicuú ññâha; ndê inâhá stná-yâ nsidanicuú ñâ-nduâ nacâni ini Yua-nda Dios.

¹¹ Ni cachí-ndâ iá iin nêhivi nacâni ini-xi sâhâ ññâha; pues còo inga nêhivi cundââ ini-xi sâhâ ñâ-nduâ ñihnú ini nêcuâchimâ, cuisí miini-nê inâhá-nê. Te ducán iá stná Dios, còo inga ana inâhá ñâ-nduâ nacâni ini-yâ, cuisí-ní Espiritu ñi xí-yâ.

¹² Te ndohó, màdi iin espíritu xi ñuhiví yohó nduá nì níhì-ndà; còó. Divi Espíritu Ìì xí mii-yá nì nihítáhvì-ndà, te sàhá yúcán nduá vátùni mànihì ini-ndà ñà-ndiaha guá sàni nihítáhvì-ndà nùù-yá.

¹³ Te divi ñà-jaàn nduá datúí-nsi nùù nèhivì nihnú vaha ini xi Espíritu Ìì xí-yá. Doco màdi palabra nchichí xi nèhivì ñuhiví nduá cáhàn-nsi na datúí-nsi ñà-jaàn; còó, cui si palabra chináhá Espíritu Ìì nduá cáhàn-nsi.

¹⁴ Doco nèhivì nihnú ini xi cui si ñà-nduá cachí sàxínítnùni mii-né, mà cúí sàà-nè cundaà ini-nè sàhá chuun xi Espíritu Ìì xí Dios, vachi nahi palabra loco nduá nùù-né. Ñàyúcànduá, mà cùí mànihì ini-nè, vachi cui si nú ni chindéé Espíritu Ìì nèhivì, dandu vátùni sàà-nè mànihì ini-nè.

¹⁵ Doco iin nèhivì datnúú Espíritu Ìì anima-xi, mà úhì sàà-nè cundaà vaha ini-nè sàhá nsidaa ñàhá. Doco nèhivì dava ga, mà cùí sàà-nè cundaà ini-nè nansa ndisa nihnú ini nèhivì xí Dios mà.

¹⁶ (Vachi ducán cachí nùù tutu ìì) “Còò ni-iin ana cùndàà ndisa inì-xi nansa nihnú ini Stoho-ndà Señor. Te ni còò stná ana chicá nchichí, te ducán cuàha-xi-yá conseju”, cachá. Doco cunaha-nsiá, divi nacua nihnú ini Cristu, ducán sàni nihítáhvì-ndà cunihnu stná ini-ndà vichi.

3

¹ Ducán iá, ñáni; doco (na ní sa-le xi-nsiá daa), mànicúí dacuahá vahi mii-nsiá, vachi tàñáha ga cunihnu vaha ini-nsia nacua cuní Espíritu Ìì xí Dios. Na nihnú ini ndéni nèhivì ní cui, ducán nihnú ini-nsia, na ian nihnú iquín ini-nsiá, có-sànihì víi ini-nsiá ichì Cristu.

² Na iin méé sáha-nda cui si-ní tëndodo, te màdiá comida chicá fuerte, ducán nì quida stná xi-nsiá, (puru palabra mà úhì cundaà ini-ndà nduá nì dàcuahí mii-nsiá, màdiá palabra chicá nchichí), vachi cóni sàá-nsiá cundaà ini-nsia, te dècuèndè stná vichi, tàñáha ga sàà-nsiá mànihì vaha ini-nsia.

³ Vachi nihnú ìì ini-nsia nahi nsidaa nèhivì dava ga ñuhiví. Vachi ñà-cúmbidia ini-nsia, te náá stnahá-nsiá, te táhndè dava-nsia, pues, zamádi divi ñà-jaàn nduú modo xíquida nèhivì ñuhiví? Te divi sàhá ñà-jaàn nàhá claru nihnú ìì ini-nsia nahi mii-né.

⁴ Vachi dava-nsia, cachí-nsiá nèhivì xí Pablo nduú-nsiá, te dava-nsia, cachí-nsiá nèhivì xí Apolo nduú-nsiá. Doco zamádi divi ñà-jaàn nduá quidá stná nèhivì ñuhiví yohó?

Nsidaa-nda cutnáhá-ndá xinúcuáché-ndá nùù Dios

⁵ Doco cunaha-nsiá, màdi nèhivì chicá ndiaá nduú Apolo, te ni màdi nèhivì chicá ndiaá nduú stná yùhù Pablo. Cui si nèhivì xinúcuáché nùù Dios nduú-nsí, te sàhá nsiùhù sàni xinindisá stná-nsiá palabra ìì xí-yá. Ñàyúcànduá, cada iin iin-nda xi chuun nì nihítáhvì-ndà nùù-yá.

⁶ Vachi (ducán iá nahi chuun itu-ndà), iin-nda chihí, te inga-ndà cùhñù, doco Dios nduú ana dacuahnu-xi viu. Te ducani iá stná xi nsiùhù, primeru yùhù (nì cachitnùhì xi-nsiá palabra ìì). Daaní, después nì chindee stná Apolo. Doco cui si sàhá Dios nì quee víi (obra mà).

⁷ Màdiá chicá ndiaá ana nì cáhàn xi palabra primeru, te ni màdiá chicá ndiaá stná ana nì chindee después, cui si mii Dios nduú ana chicá ndiaá, te cui si sàhá mii-yá nducuahà palabra xi-ya.

⁸ Nècuàchì quidáchúùn primeru, xi stná nècuàchì nchícùn gà, iin-ni xíndiaa-nsi nùù-yá. Doco segùn chuun quidá iin iin-nda, ducán icúmí-ndá ñhì-ndà tnùmani xi-ndà nùù-yá.

⁹ Te vichi iin-ni xinúcuáché nsidaa-nsí nùù-yá. Te mii-nsiá, na iin itu Dios (ndé quidáchúùn-nsí) nduú-nsiá. Te nahi stná iin vehe nì dándacú-yá cuàha, ducán nduú stná-nsiá.

¹⁰ Te yùhù, na iin albañil tùha vaha, ducán nduí, te nì quidachuín (chuun xi Dios ndé ndoó-nsiá). Na iin cimientu nduú (chuun primeru) nì quide jaàn sàhá gracia xi-ya. Te vichi sà-íá inga ana quida-xi chuun ma, na ian dacuahnú-né nama. Doco cuidadu nì cùndóo nsidaa nèhivì quidá seguir xi chuun nì dàquésáhi mà.

¹¹ Màsà cachí-nè iá inga (palabra chicá ndiaá); còó. Cui si ndiaá palabra sàhá Jesucristu (nì cachitnùhì xi-nsiá) primeru, vachi nahi cimientu nduá.

¹² Te nú cuní iin nèhivì (quida-ne seguir xi obra mà), dandu queámà na ian cuàhàn-nè dacuahnú-né nama ñiquí cimientu mà. Te nú cuàhàn-nè quida víi-né obra mà, dandu ducán queá na ian xichúùn-né oro, ò plata, ò yùù yéhè. Doco nú có-quidá víi-né obra mà, dandu ducán queá na ian xichúùn-né yutnú, ò mihì, ò ñùù.

¹³ Dandu después icúmí sàà iin quiví cundaà inì-xi nansa iá obra nì quida iin iin-nda. Vachi na sàà quiví mà icúmí coo nahi ñuhu xíxìn, te sàhá ñuhu mà cundaà ini-xi a natùì obra xi-nda nùù Dios, á coó.

¹⁴ Nú màsà cócò obra xi-nda, dandu icúmí-ndá nìhì-ndà ñà-vàha xi-nda nù-yá.

¹⁵ Doco nú nì cócá, dandu mà nìhì-ndà ñà-vàha cuàhàn-ndà nìhì-ndà nì cùí, doco anima-ndà, vātùnì càcu viá, mate cunduamà na ian (nì chindee-nda mii-nda nù) ñuhu xíxìn.

¹⁶ Mii-nsiá, ¿a có-nsinúú inì-nsia ñà-ndùù-ndà na iin vehe ì ndé iá Dios? Vàchi iá Espiritu ì xi-yá inì anima-nda.

¹⁷ Ñàyücàndüá, nú nì dándáñhúú iin nēhivì ñà-ì icúmí lugar xi-ya, dandu icúmí nècuàchì mà ndañuhu dahuun stná-nè quida-ya. Vàchi ndé iá-yá, yáha ga ì lugar mà, te cunaha-nsiá, divi nahi vehe ì-yá nduu-nda.

¹⁸ Mádì dandahví-nsiá mii-nsiá, vāchi nú iá ana tuxí inì-xi nduú nècuàchì nchichí nù nēhivì ñuhivì yohó, dandu xiñuhu dāma-ne, mate (cachí nēhivì) sàni culocó-nè, vāchi nú ducán, dandu ñà-sàni ndunchichí ndisa-ne cundua.

¹⁹ Vāchi ñà-ndüá tuxí inì nēhivì nduú ñà-chicá nchichí, pues nù Dios ñà-loco nduá. Te dohó cachí stná nù tutu ì: “Icúmí Dios cundee-yá nù tēchichí na meru xíquida cuahà-té maña dandahví-te”.

²⁰ Daaní, inga xaan cachí stná tutu mà: “Ináhá Dios, ñà-chicuéhè uun nduá chítñùnì guá inì nècuàchì nchichí”.

²¹ Ñàyücàndüá, màsà cútúxí inì nì-iin-nsia chicá ndiaá-nsiá ñà-nchícùn-nsiá iin tal nēhivì. Vāchi nsidanicuú nēhivì, xi nsidanicuú ñàha, divi cuenta xi mii-nsiá nduá.

²² A ducán yùhù Pablo, te ò Apolo, te ò Pedro, có-quidá, cuenta xi mii-nsiá nduú nsidaa-nsí. Dēcuèndè stná ñuhivì yohó, cuenta xi stná-ndà nduájàn, te mate nì cútíacú-ndà, te ò nì sàà-ndà cui-ndà, có-quidá, vāchi nsidaa ñà-ndüá cùù xi-ndà quivì vichi, ò quivì vāxi xi-nda, sàhà bien xi-nda nduá.

²³ Te Cristu nduú Stoho-ndà. Te Stoho mii-yá nduú (Yua-nda) Dios.

4

Nansa iá vida nì yàha nècuàchì apóstol nì nìhì chuun nù Jesús

¹ Sàhà ñà-ndüá sàni cachí jaàn xiñuhu ndanihi nēhivì nsiùhù ñà-ndùù-nsí ana xinúcuáchí nù Cristu; xiñuhu cundaa inì-nè ñà-ndáà nduá nì nìhì ndisa-nsí chuun ñà-dacuahá-nsí nēhivì palabra ì nisa ìa dēhé sàhana.

² Te nú ducán nduá, dandu ndiá icá-nsí quida vù-nsí chuun ma, vāchi divi ducán nduá xiñuhu quida nsidaa ana dandacú nù chuun xi inga nēhivì.

³ Doco yùhù, có-ndùlòquf nú cachí-nsiá ñà-quidá víii, ò á cóo. Ni có-nacání stná inì nú cachí dava ga nēhivì ñà-có-quidá víii, te caná-né yùhù nù iin juez. Ni yùhù, có-cāchí stná sàhà mii, a quidá víii, á cóo.

⁴ Te mate có-dāndòhò sàxiníñùnì mii, doco có-cùnì cachà mà ñà-còò falta xi, vāchi mii Stoho-ndà Señor icúmí cachí a ní quida víii, á cóo.

⁵ Ñàyücàndüá, màsà cuíñuhu-nda ñanitnaha-nda, vāchi tàsàà quivì cundaa ndisa inì-nda. Dēcuèndè naxicocuñ-ya, dandu natùì claru nansa ndisa iá nsidaa chuun iá dēhé vichi. Dandu mii-yá datù-i-ya nansa nihnú inì cada iin iin-nda, te cachí-yá xi-nda ndé tantu sàni quida vù iin iin-nda.

⁶ Cunaha-nsiá, sàhà ñà-vàha xi-nsia sàni cachí xi-nsiá nsidaajàn sàhà Apolo xi yùhù, ñàni, áma mánihì inì-nsiá ñà-mà váha dayáha-nda ñà-ndüá cachí tutu ì, vāchi mà váha ndenihì cahnu-nda iin (ana nchícùn-ndà), mientras inga-nè cahíchì inì-nda; cóo.

⁷ Vāchi iin-nì xinduu-nsia xi nsidanicuú gá nēhivì. Nsidaa ñà-ndüá sàni nìhítahví-nsiá, ñà-ndüá nì dācútahví Dios mii-nsiá nduá. Te nú sàni cutahví uun-nda ñàha, dandu mà váha cutuxi inì-nda chicá ndiaá-ndà sàhámà, vāchi ñà-nì cutahví uun-nda nduá.

⁸ Doco vichi nihnú inì-nsia na ian sàni nducuica-nsiá. Sàni ndanchito ducùn-nsiá na iin rey cahan-nsiá, te menos nì ndòo nsiùhù nù-nsiá. A sácú váha nú nì cundúú ndisa-nsia ana chicá dandacú, dandu nsiùhù, sàà stná-nsi cutnahá-nsí xi-nsiá dandacu-nda.

⁹ Doco nsiùhù nècuàchì apóstol, sàni sàha Dios nsiùhù iin lugar chicá cahá-xí tuxí inì, na ian nì cundúú-nsí nēhivì fuerza icúmí cui sàhà-ñá cundehè nēhivì (nansa ndohó-nsí. Doco cunaha-nsiá,) indéhe stná ángel mozo xi Dios.

¹⁰ Vāchi sàhà-ñá nchícùn-nsi Cristu, ndenihí nēhivì nsiùhù nahi nècuàchì loco. Doco mii-nsiá, (mà loco-nsiá); nchichí gá-nsiá cahan-nsiá ñà-ndòó-nsiá ladu xi-ya. Nsiùhù, cóò nì-ñàha nìhìndèè-nsí cahan nēhivì; doco mii-nsiá, cuahà gá poder xi-nsia iá (cahan-nsiá). Cahíchì stná inì nēhivì nsiùhù; doco mii-nsiá, iá tñùñuhu xi-nsiá nù-né.

¹¹ Nsiùhù, dēcuèndè vichi xihì-nsi doco, xihì-nsi tēcuí, cóò ñá-cundixi vù-nsí. Sahní cuí stná-nè nsiùhù, te xicánúú stná-nsi yoho yucán, vāchi cóò nì-iin xaan ndé cundoo sàin-nsí.

¹² Ndeè quidáchúñ-nsí, te nú cānàhá-nè xi-nsí, dandu viví-nì naxícónihí-nsí nù-né. Te nú quidá quíní-nè xi-nsí, dandu quidándéé inì-nsi.

¹³ Te nú càhàn quini-ne xì-nsí, dandu calma-ni sáha-nsinè ichì váha. Doco mii-né, ndeníhí-né nsiùhù nahi mihi chicuèhè, te ò ana chicá cò chuun-xi.

¹⁴ Pues, ¿índù chuun cachí xì-nsiá ducán? ¿A sáhà-ñá cuní cucahan núu-nsiá nduá? Còó, cui sí sáhà ñà-nì sàà-nsiá cundaà váha ini-nsiá, vâchi nahi dèhi nduú-nsiá, te màni-nsiá núí.

¹⁵ Pues mate ni cúndóó ùxin mìl ana dacuahá nchichí xì-nsiá ichi Cristu, doco imindaa ana nduú ndisa nahi yua-nsiá, divi yùhù. Vâchi yùhù ni cachitnúhi xì-nsiá razón ndiaha sáhà Jesucristu, ñâyücandùá divi nahi dèhi xínduu-nsia.

¹⁶ Sáhà ñà-jaàn sacúndáhvi núu-nsiá ñà-iin-ni quida-nsia nacua quidá yùhù.

¹⁷ Ñà-jaàn nduá disáhà-xí sàni techuín Timoteo sàà-nè ndé ndoó-nsiá, vâchi mii-né, nchícùn vii-né Stoho-ndá Señor. Na iin dèhi nduú stná-nè, te màni gá-nè núí. Pues divi icúmí càhàn xì-nsiá, te dansínúú ini-nè mii-nsiá nansa íá modo-xi nchícùn Cristu nacua nduá chináhi nèhivi nsidanicuú lugar ndé natácá-nè cahví-néyà.

¹⁸ Doco vichi, ináhi, ndee xicahàn dava-nsia, vâchi tuxí ini-nsia mà sái ndé ndoó-nsiá.

¹⁹ Doco yâchi icúmí sài, nú cuní mii-yá, dandu cundaà ini sáhà nècuàchi càhàn ndee guá mà, a ndísá icúmí-nè nduú ì, á coó.

²⁰ Vâchi ley xi ñuhiví ì xí Dios, màdi palabra uun nduá. Còó, poder xi mii-yá nduá icúmí stná.

²¹ Pues vichi cachi-nsiá xí nansa cuní-nsiá quide. ¿A cuní-nsiá sài, te càhàn ndeí xì-nsiá, te ò cuní-nsiá sài càhàn màni xì-nsiá, te cundoo vii-ndá?

5

Nansa ni cachi Pablo xiñuhu quida nèhivi ñuu Corinto xi iin tiàa cóni quidá víi xi iin nècuàchi ñahá

¹ Cachí nèhivi nacaní-né xí ñà-íá iin-nsia ni ìa xi dihi (quiín-xi). Cunaha-nsiá, cahnú cuàchi nduájàn; dècuèndè nèhivi có-ináhá sáhà Dios, ni có-quidá-né ducán.

² Doco mii-nsiá, (ndahví-nsiá), vâchi tuxí vá ini-nsiá ndiaha gá-nsiá. Doco ndiá ìcà-nsiá màcúndoo-nsia tnúnsí ini, te tavà cuàán-nsiá tiàa ni quida ducán ñà-màsà coó gá-nè núu-nsiá.

³ Te yùhù, mate xica ié, doco na ian jaàn íá animè cutnáhi xì-nsiá, ducán nduá; te sàni nacani ini sáhà chuun jaàn, ñâyücandùá, cuàhìn cachí xì-nsiá nansa quida-nsia xi nècuàchi ni quida xi cuàchi ma.

⁴⁻⁵ Xiñuhu nataca nsidaa-nsiá, te coo stná ndudu ì xí Stoho-ndá Jesucristu, te na ian coo stná animè xì-nsiá cundua. Dandu ndacúcahan-nsiá quivi-yá, te cachi-nsiá xi nècuàchimà ñà-icúmí-ndá naco-ndané núu ndahá ñà-malu, te ducán nihí iquicúñú-nè iin castigu sáhà-ñá después càcu anima-nè quivi (màcuíta-nda núu) Stoho-ndá Jesús.

Ejemplu ni sanduu vicò pascua sàhana na nisa cuxio nsihi pan nihí levadura nsidátáchí xân

⁶ Mii-nsiá, tuxí ini-nsiá ñà-vii gá xiquida-nsia vichi, doco còó, có-íá vii ñà-nduá quidá-nsiá. ¿A có-ináhá-nsiá dichu cachí: “Mate iyuhu-ní tàtnà nsidátáchí xí pan queé, doco cuàhà gá ndutáchá?” (Te ducán íá stná xi falta, mate iyuhu-ní-ñá ni coó, doco xitiá inicitu.)

⁷ Ñâyücandùá, (xiñuhu cuxio nsidaa ñà-quini nisa ìa antes, dandu nanduu-nda nèhivi sàa xí Dios, cunduu-nda nahi) yusàn pan cóni queé ni-iyuhu ñà-nsidátáchí xân. Vâchi mii-yá, sàndènhí-yàndó nduu-nda nèhivi sàa còó falta-xi ñà-sàni xihí Cristu cuenta xi-nda. Te ducán queámà na ian quidá-né vicò pascua (na xihí lelù nduú promesa), vâchi Cristu nduú nahi promesa xi-nda.

⁸ Te vicò pascua mà, puru pan có-ndütáchí xixí-né. (Te ejemplu nduámà.) Ñâyücandùá ndohó, puru ñà-nduú ñà-ndáa cui sí ni cúnchícùn-ndá. Màsà dátíiáa uun-nda quida-nda ñà-íá váha, vâchi queámà na ian có-chívàha vii-ndá vicò mà; te màsà cúníhnú chicuèhè stná ini-ndá, te ni màsà quidá-ndá ni-iin ñà-íá quini, vâchi nu ducán, dandu queámà na ian có-chívàha vii-ndá vicò, te na ian cóni cúxíó nsihi tàtnà nsidátáchí xí pan mà.

⁹ Núu inga tutu ni tiai antes ni cachí xì-nsiá ñà-màsà cútñáhá-ndá xí nèhivi túha càhàn xi ana cóni nándàhà xì-né.

¹⁰ Ducán ni tiai núu-nsiá, doco có-cuní cachàmà ñà-naco-nsia nsidanicuú nèhivi xiquida ducán ñuhiví yohó, vâchi cui sí inga ñuhiví cunduu lugar ndé mà cútñáhà gá-ndá xi nècuàchimà, vâchi ñuhiví yohó ndoó cuàhà ana có-quidá víi: xího-né cucumi-né cuàhà ñà-cuicà, o xidácúñhá-nè, te ò xicán tàhvi-né núu ñà-cò-nduú Dios.

¹¹ Doco ñà-nduá ni cachí núu carta mà nduá yohó: nú nècuàchi có-quidá víi ma nduú iin ñani-ndá (iin-ni cahví xi mii-yá), dandu màsà cútñáhà gá-ndá xì-né nú íá cuàchi-ne sáhà nècuàchi ñahá, te ò túha-ne xihò-né ñà-icúmí ñanitaha-ne, te ò cahví-né iin ñà-cò-nduú Dios, te ò túha-ne canáhà-nè, te ò túha-ne xini-ne, te ò xidácúñhá-nè, dandu màsà cútñáhà gá-ndá xì-né. Ni nácóó dahuun-ndané; ni màsà cuàhandee ini-ndá cuxi-nda xì-né.

12-13 Cunaha-nsiá, có-quidá tocar yùhù nsidandai sàhà cuàchi nèhivì có-nchìcùn ichì mii-yá. Mii-yá quida xi ñà-jaàn. Doco mii-nsiá, fuerza icúmí-nsiá cachi-nsiá nansa cuu xi nèhivì cutnàhà xí-nsiá nú ni sàà-nè quida-ne cuàchi. Ñàyùcàndüá, dohó cachí xí-nsiá: ni cúxíó dahuun tiàa iá falta-xi ma nù-nsiá.

6

Màsà cùhùn-ndà nùu juez, te canicuàchi stnaha-nda sàhà-ndà, cachí Pablo

¹ Có-ndiá icà-nsiá canicuàchi stnahá-nsiá sàhà-nsiá nùu iin juez có-xiníndisá-xí ichì Dios. Chicá vaha nùu nèhivì xí mii-yá ni ndúndàà sàhà chuun xi-nsiá.

² Amádi sá-ínahá-nsiá ñà-divi ndohó nèhivì xí-yá cunduu ana (chindee) nsidandaà-xi sàhà nèhivì ñuhivì yohó quivì juiciu. Pues nú ducán nduá, dandu ádi vátuni sàà-ndà nsidandaà-ndà sàhà chuun cuatiluha cuú ofrecer tiempu vichì.

³ Cunaha-nsiá, dècuèndè stná ángel icúmí-ndá nsidandaà-ndà sàhà-xí. Pues nú ducán, dandu ádi mà úhì nsidandaà stná-ndà sàhà chuun sencillu iá ñuhivì yohó-ní.

⁴ Ñàyùcàndüá, nú iá iin pleitu xi-nsiá, dandu xiñuhu nacàxin-nsiá nèhivì tuxí ini-nsiá chicá mà nchichí, te mii-né nsidandaà sàhà-jàn.

⁵ Pues, ñà-jaàn cachí iin xi-nsiá áma cùcàhàn nùu-nsiá sàhà-jàn. ¿A ndisá còò ni-iin ñani-ndà nchichí mahi-nsiá? ¿A ndisá còò iin cui nsidandaà sàhà chuun xi iin-nsiá inga-nsiá?

⁶ Doco (ndahví-nsiá), vachi sàhàn-nsiá sanicuàchi stnahá-nsiá sàhà-nsiá, mate iin-ni ñani xinduu-nda. Dècuèndè nùu iin juez có-xiníndisá (xí Jesús) sàhàn-nsiá.

⁷ Ñàyùcàndüá, iin falta cahnú xí-nsiá nduájàn, vachi có-ndiá icà-ndà canicuàchi stnaha-nda sàhà-ndà. Chicá vaha ni cuáha-nda quidaquini-ne xi-ndà, te quidandee ini-ndà. Chicá vaha nacoo-ndané cahñindàhvì-nèndó.

⁸ Doco mii-nsiá, có-quidándéé stnahá ini-nsiá sàhà-nsiá. Còò. Dècuèndè quidáquini-nsiá xi ñanitnaha-nsiá, te xidándiá-nsiá ñà-nduá icúmí-nè, mate iin-ni ñani xinduu nsidaa-nda.

⁹ Sà-ínahá-nsiá ñà-mà níhì nèhivì malu sàà-nè ñuhivì ì xí Dios. Ñàyùcàndüá, màsà dándàhvì ni-iin nèhivì mii-nsiá, vachi mà cundiátú anima ni-iin nèhivì nchìcùn xi ñahà, ni-iin stná nèhivì cahvi xi yùù ò figura, ni-iin stná nèhivì iá xi inga ana có-nduú nècuàchi vehe-ne, ni-iin stná nèhivì nduú ì nèhivì,

¹⁰ ni-iin tècuìhnà, ni-iin stná ana tùha xího xi ñà-icúmí inga nèhivì, ni-iin stná tè-xíni, ni-iin stná tè-tùha canáhà, ni-iin stná tè-sàhñindàhvì xi ñanitnaha xi. Ni-iin nècuàchi jaàn mà níhítàhvì xi ñuhivì ì xí Dios.

¹¹ Te mii-nsiá, divi ducán nisa quida dava-nsiá antes. Doco sàni ndoo cuàchi-nsiamà, te sàni ndu-ì stná anima-nsiá. Ñàyùcàndüá, nèhivì vaha sanduu-nsiá nùu mii-yá vichì. Ducán ni cuu xi-nsiá na ní (xinindisá-nsiá palabra ì, te nì) ndacùchan-nsiá quivì Stoho-ndà Jesucristu, vachi ni chindee stná Espíritu ì xí Yua-nda Dios.

Nsidaa-nda xiñuhu quidañuhu-nda cuerpu xi-nda; màsà quidá ndevàha-nda xi mii-nda

¹² (Cachí nèhivì): “Vátuni quida-nda ñà-nduá cudí ini-ndà”. Pues vihini, doco màdi nsidaa ñàhà nduá iin ñà-chíndéé xí-ndà. Mate vihini quida-nda ñà-nduá cuni-ndà, doco màsà cuáha-nda cundee ni-iin ñà-có-íá vaha nùu sàxinítnùnì-ndà.

¹³ Vachi dohó cachí stná iin dichu: “Tixi-nda nduú fin xi ñà-nduá xixi-nda, te chuun quidá tixi-nda nduú stná ñà-cuñhamà”. Doco cunaha-nsiá, iin-ni fin icúmí nduújàn, vachi vaxi iin quivì icúmí Dios dandáñuhù-yá nsidaájàn. Te cuerpu xi-nda, ¿jndù chuun icumíá? Pues màdi-ñà coo-nda xi ndéni ñahà ní cui; còò. Divi ñà-cunucuachi víi-nda nùu Stoho-ndà Señor nduú chuun xan. Te cunaha-nsiá, iá stná-yá sàhà-ndà.

¹⁴ Ñàyùcàndüá, nacua ni natiacu-yà ni quida Yuamàni-yá Dios, divi ducán stná ndohó, icúmí-ndá natiacu stná-ndà quida ndudu ì xí-yá.

¹⁵ ¿A có-nsínúu ini-nsiá ñà-ndahàsàhà Cristu nduu-nda? Te nú ducán, ¿a iá vaha coo stná-ndà xi iin ñahà ndevàha, nú nahì ndahàsàhà-yá sànduù-ndà? Còò, màsà nunca quida-nda ducán.

¹⁶ ¿A có-nsínuu stná ini-nsiá nansa iá xi iin tiàa ni quida iin cuàchi xi iin ñahà ndevàha, ñà-iin-ni nèhivì sàni nanduu-ne? Vachi ducán cachí tutu ì: “Iin-ni nèhivì cunduu nduú-nè, (nècuàchi tiàa xi nècuàchi ñahà)”.

¹⁷ Doco nú sàni yàha-nda ndahà Stoho-ndà Señor, dandu iin-ni anima sàni nanduu-nda xi mii-yá.

¹⁸ Ñàyùcàndüá, nacoo dahuun-nsiá cuàchi ñà-càhàn-ndà xi inga ana cóni nándàhà xi-ndà. Nsidaa cuàchi dava ga, có-quidá quini guá` xi iquicúñù-ndà. Doco nú ni quida-nda iin falta xi iin nècuàchi ñahà, dandu ñà-sàni quida-nda cuàchi nùu cuerpu xi mii-nda nduájàn.

¹⁹ ¿A có-ináhá-nsiá ñà-vehe Espiritu Ìi xí-yá nduú cuerpu xi-nda, vèchi sàni ñiháhvi-nda Yà-ìi mà nùu-yá? Ñàyùcàndùá, màdiá mii-nda nduu-nda stoho-nda;

²⁰ cóo. Mii-yá, sàni xiin-yàndó na ní ònàà-yá sàhà-nda, te sàhà mà nsidaa ñà-nduá quidà-nda na itiácu-nda xì cuerpu xi-nda, divi sàhà trùñuhu xí mii-yá ni cùndúá.

7

Nansa xiñuhu quida-nda xi nècuàchi vehe-nda

¹ Vichi cuàhìn càhìn xì-nsiá sàhà ñà-nduá ni tìaa-nsia nùí. Cunaha-nsiá, cuaha-ni ía nú ía mii iin tiàa, te có-íá-nè xì ni-iin nècuàchi ñahà.

² Doco cótó quida nècuàchì mà iin cuàchi, chícá vaha ni nándàhà-né; te ducání stná nècuàchi ñahà, chícá vaha ni cùcúmi-nè ìi-né.

³ Te cada iin iin tiàa sàni nandàhà, ndiá ìcà-né quida ndisa-ne cumplir chuun ni ñhì-né ñà-coo-ne xì ñahàdihì-nè. Stná nècuàchi ñahà, ndiá ìcà stná-nè quida vii-né cumplir nacua nduú chuun xi-ne ñà-coo stná-nè xì ìi-né.

⁴ Màdi micuísì nècuàchi ñahà nduú ana cachi nansa quida-ne, a coo-ne xì ìi-né, á cóo. Ícúmi cachi stná nècuàchi tiàa. Te ducání stná nècuàchi tiàa ma, màdi cuiisì mii-né cachi stná-nè nansa quida-ne xì ñahàdihì-nè, vèchi ícúmi cachi stná nècuàchi ñahà.

⁵ Màsà cachi-nsiá “cóo” nùu nècuàchi vehe-nsia. Cuisi nú vihini cuní-nsiá cunihii-nsiá iin ùi quívi sàhà-ñá càcàn tãhvi-nsiá nùu Dios. Dandu después nacua stnahá-nsiá, vèchi nú cóo, vihini dacá ñà-malu Satanás sàxínitùnì-nsiá ñà-có-cúndéé gá ini-nsiá cunihii-nsiá.

⁶ Nsidaa ñà-jaàn cachí xì-nsiá, doco màdi ñà-dàndacuí nùu-nsiá nduá; cóo. Cuisi cachí xì-nsiá ducán sàhà-ñá cundaá ini-nsiá nansa ía iin ñà-vaha cui quida-nsiá.

⁷ Vèchi yùhù, cudíi ini nú ní quidá nsidaa nèhivi nacua quidé, (ñà-có-ìé xì ni-iin nècuàchi ñahà). Doco cada iin iin-nda según nansa ni ñiháhvi-nda nùu Dios, vèchi tucu sàhatahvi-yá iin iin-nda.

⁸ Ñàyùcàndùá, yùhù cachí xì nsidaa nècuàchi ñahà cuaán, xì nsidaa stná nècuàchi tãñáha ga nandàhà, ndiaha gá coo xi-né nú ní quidá-né nahi yùhù (ñà-cóni nándàhì).

⁹ Doco nú mà cùndéé ini-nè cunihii-né ducán, dandu ni nándàhà-né chícá vaha, te màsà cacánúu-né xìho stnahá uun-ne.

¹⁰ Doco nèhivi sàni nandàhà, ía ndisa ñà-nduá dandacuí nùu-né. Te màdi cuiisì yùhù cachí xì-né palabra yohó; vèchi ducán dandacú stná Stoho-nda Señor. Te dohó cachí-yà: ni-iin nècuàchi ñahà màsà nácóo-né.

¹¹ Doco nú sàni nacoo-ne nècuàchì mà, dandu (màsà nándàhà gá-nè xì inga tiàa). Iin-ni ní cóo mii-né, te nú cóo, ní nàxícócuñ-nè nacua stnahá-né xì ìi-né. Daaní, divi ducání xí stná nècuàchi tiàa, màsà càtéstnahá stná-nè xì ñahàdihì-nè.

¹² Daaní, mii-nsiá nècuàchi dava ga tu, cuiisì cuàhìn cachi xì-nsiá ñà-nduá nacání uun ini, vèchi có-nduá iin ley dandacú Dios. Nú ía iin ñani-nda có-xiníndisá ñahàdihì-xi, màsà càté-nè nècuàchì mà nú cudíi ini nècuàchì mà coo ndisa-ne xì ìi-némà.

¹³ Te ducání stná xì nècuàchi ñahà: mate có-xiníndisá ìi-né, doco chícá vaha màsà càté stná-nè ìi-né, nú cudíi ini nècuàchì mà coo ndisa-ne xì ñahàdihì-némà.

¹⁴ Vèchi mate cuiisì nècuàchi ñahà xiníndisá, doco sàhàjàn chícá mà ùhi cundiatú stná ìi-né nùu Dios; te ducání stná nècuàchi ñahà có-xiníndisá, nú nècuàchi xiníndisá nduú ìi-né. Doco nú nduú-nè có-xiníndisá-né, dandu ùhi ía cundiatú mée xi-ne. Doco nú xiníndisá-né, (mate imíndaa-né), dandu mée ìi ndisa cunduu-ve.

¹⁵ Doco cunaha-nsiá, nú cuní nècuàchi có-xiníndisá-má quecuaán-né, dandu mà cùtnúu-ní, pues ní cùhùn-nè. Te nú sàcuàhàn-nè, dandu libre ía nècuàchi xiníndisá ní ndòo, ò sea nècuàchi tiàa ò nècuàchi ñahà ní cùndúu-né. Doco ¿indú ñà-chícá cuní Dios quida-nda? Divi ñà-cundoo maní-nda.

¹⁶ Vèchi iin nècuàchi ñahà, có-ináhá-nè ñà-vihini sàhà mii-né sàà nècuàchi vehe-ne càcu stná anima-nè. Te có-ináhá stná iin nècuàchi tiàa, pues vihini sàhà mii-né sàà stná ñahàdihì-nè càcu-ne.

Màsà nacání ini-nda nansa ndenihì nèhivi ñuhivì yohó ndohó

¹⁷ Nacua nduú modo ní chitnùnì ini Dios cundoo-nda ñuhivì, ducán xiñuhu cundoo cuéyàà-nda. Nacua ía-nda na ní quíhi-nda ichì-yá, ducán xiñuhu quida-nda seguir. Divi palabra jaàn nduá cachí xì nsidaa nèhivi cahvi xi-yá.

¹⁸ Vèchi nú sà-ítuú seña xì Dios ìcà-nda na ní quíhi-nda ichì-yá, dandu màsà nándúcú-nda nansa ndutu ñà-jaàn. Te ducání stná, nú cóo seña mà ìcà-nda na ní quíhi-nda ichì-yá, dandu màsà nándúcú-nda nansa màcùtua ìcà-nda.

¹⁹ Vèchi seña mà, nú itúá, ò nú có-ítuá, cóo ni-íñàha cuní cachàmà. Doco ñà-chivàha-nda ñà-nduá dandacú-yá, ñà-jaàn ndisa nduú ñà-ndiáá.

²⁰ Doco nacua ní sandoo iin iin-nda na ní quíhi-nda ichì-yá, divi ducán ní cùndóo ìi-nda.

²¹ Dava-nsia, có-ndòó-nsiá libre, fuerza quidáchúún-nsiá nùù lamú xi-nsia, te ducán nìsa ìa stná quivì nì quihì-nsia ichì-yá. Doco màsà nácánì ini-nsiá sàhájàn; còó. Doco nú ìá nansa cui caquee-nsia libre, dandu chicá vâha ni quidá stná-nsiá aprovechar.

²² Cunaha-nsiá, mate fuerza quidáchúún-ndá quidá inga nèhivì, doco nú ichì Stoho-ndá Cristu ndúa nchìcùn-ndá, dandu libre ìá-ndá nùù mii-yá. Te divì ducán stná, nú nèhivì xicánúú libre nduu-nda vichì, dandu ìá stná ana xinúcuáchì-ndá nùù-xí, divì mii-yá.

²³ Te sàni dânáâ-yá sàhâ-ndá. Nâyùcândüá, màsà cuâha-nda quida-nda chuun nì dândàcú ana nduú nèhivì ùun.

²⁴ (Pues sàhâ nsidaájàn yùhù cachí xì-nsiá) ñâ-nacua ndoo-nda antes na tâñâha ga quihì-nda ichì-yá, divì ducán ni cundóó ìi stná-ndá vichì, ñâni.

²⁵ Vichì cuâhìn câhìn sàhâ ñahâ cuâchì tâñâha ga nandâhâ. Còò ni-ñâha ni cachí Stoho-ndá Señor xí' sàhâ nècuâchimâ, doco sàhâ gracia xi-yâ, vâtùni cahvì-nsia xì conseju sâhi mii-nsiá. Pues sàhâmâ cuâhìn cachì ñâ-ndüá nihnú uun ini:

²⁶ Chicá vâha iin-ni ni cundóó-ndá nacua ndoo-nda vichì cahan yùhù, vâchi tiempu ùhì nduá vichì.

²⁷ Nâyùcândüá, nú ìá ñahâdihí-ndá, dandu màsà cátéstnâhâ-ndá. Te nú còò ñâhadihí-ndá, dandu chicá vâha màsà nândúcú-ndá nansa nandâhâ-ndá.

²⁸ Doco nú ni nândâhâ iin tiâa, màdi cuâchi nduá. Te ò nú ni nândâhâ iin ñahâ chùì, màdi cuâchi nduú stná. Cuisiá mà máni tnùndoho yâha-ne, te yùhù, có-cuní ndoho guá-nsiá.

²⁹ Cunaha-nsiá, mà vâxi ga cuâhâ tiempu, ñâni. Nâyùcândüá, nú ìá ñahâdihí-ndá, màsà cúnihnú ini-ndá nduámâ iin chuun chicá cahnú.

³⁰ Te nú sacu-nda (sàhâ iin tnùndoho), màsà ndúlócò gâ-ndá sàhájàn. Te nú cudíi ini-ndá sàhâ ñâha, màsà cútúxí ini-ndá chuun chicá ndiaá nduá. Te nú sàni xiin-nda iin traste, màsà cúnihnú ini-ndá yâha ga xiñuhâ nùù-ndá.

³¹ Te nú icúmí-ndá cuâhâ chuun ñuhivì yohó, màsà ndúlócò cuâhâ-ndá sàhájàn, vâchi ñuhivì yohó, icúmíâ ndañuhâ.

³² Yùhù, có-cuní nacani cuahâ ini-nsia sàhâ ni-ñâha. Iin nèhivì còò nècuâchì vehe-xi, (mâ ùhì) nihnú ini-nè sàhâ chuun xi Stoho-ndá Señor nansa quida-ne, te cudíi ini-yâ.

³³ Doco iin nècuâchì ìá ñahâdihí-xi, chicá nacánì ini-nè sàhâ chuun xi ñuhivì yohó, vâchi nandúcú-nè nansa cudíi ini ñahâdihí-nè.

³⁴ Daaní, iin nècuâchì ñahâ sàni nandâhâ, tucu quidá stná-nè nùù iin nècuâchì còò ìi-xí. Nècuâchì còò ìi-xí, (mâ ùhì) nihnú ini-nè chuun xi Stoho-ndá Señor, vâchi cuní-nè cundiaa-nè mii-nè, te coo ndoo anima-nè, dandu cunduu-ne iin nèhivì ìi xí-yá. Doco iin nècuâchì ìá ìi-xí, chicá nihnú ini-nè chuun xi ñuhivì yohó, vâchi nacánì ini-nè sàhâ nècuâchì vehe-ne.

³⁵ Pues, nsidaa ñâ-jaàn cachí xì-nsiá sàhâ ñâ-cunduu ñâ-vâha xi-nsia, màdi sàhâ-ñâ cadì nùù-nsiá iin modo có-ndiá ìqué. Cuisi cuní quida-nsia ñâ-ìá viì, te nìhì-nsiá cunucuachi vii-nsiá nùù Stoho-ndá Señor, màdiá coo iin ñâ-mâ cùì chivâha-nsia.

³⁶ Pues ni cachí-ndá ìá iin tiâa yâha ga cuní nandâhâ xì ana cudíi ini-te, te có-quidá ví-té ñâ-ìá miá cahan-té. Pues nú ducán nduá xiñuhu coo, dandu vâtùni quida-tè nacua nihnú ini-te, divì ñâ-nandâhâ-té xí-ñâ, màdi cuâchi cundua.

³⁷ Doco nú iin-ni sàni nacani vâha ini-te, te còò necesidad nandâhâ-té, vâtùni quidandee ini-te, cachí-te, dandu ñâ-jaàn quidá ví-té. Iin-ni sàni nacani ini-te ñâ-mâ nândâhâ-té, te amiga xi-te mà, señorita quida ìi-ñâ seguir cunduu-ñâ.

³⁸ Nâyùcândüá, (ndúijàn, vâtùni ìá): nú ni nândâhâ-té xí-ñâ, vâtùni ìá ñâ-ndüá quidá-te; te nú ni cachí-te mà nândâhâ-té, vâtùni quidá stná-te, doco chicá nsiha nduájàn nùù ingâ mà.

³⁹ Iin nècuâchì ñahâ sàni nandâhâ, iin-ni icúmí-nè coo-ne xi ìi-nè ndè cachi sàa cui nècuâchimâ. Doco nú sàni xihì nècuâchimâ, dandu libre ìá-nè nandâhâ-nè xi inga tiâa cudíi ini-nè, cuisì-ní ni cundúú stná inga tiâa ma iin nèhivì xì Stoho-ndá Señor.

⁴⁰ Doco nú ni cachí-nè mà nândâhâ gâ-nè, dandu chicá ndiaha quea, tuxí ini yùhù. Te yùhù quidè cuenta chindéé stná Espíritu ìi xí Dios sâxínitnùnì.

8

Màsà cáxi-nda ò cuxi-nda ñâ-ndüá chindóó nèhivì nùù ñâ-ndüá cahvì-né

¹ Vichì cuâhìn câhìn sàhâ nansa quida-nda xi ñâ-ndüú ofrenda chindóó nèhivì nùù ñâ-câhvi-né. Pues vihini cachì-ndá: “Nsidaa-nda ináhâ vâha-nda (sàhâ chuun jaàn)”. Doco nú ducán cachí-ndá ñâ-ináhâ cuâhâ-ndá ñâha, dandu queámâ na ìan ndiaá gâ-ndá tuxí ini-ndá. Doco nú cúú ndisa ini-ndá sàhâ ñânitnaha-nda, dandísâ sàâ-ndá cunduu-nda nèhivì ndiaá ndisa.

² Te nú tuxí ini-ndà ináhà cuàhà-ndà, dandu cumàni gá ñà-cundaà vaha ini-ndà nacua ndiá icà-ndà.

³ Doco nú cuú ini-ndà sàhà Dios, dandu mii-yá, ináhà ndisa stná-yà ndohó.

⁴ Ñâyùcàndüá, ñà-yòhó nduá cachí sàhà ofrenda chindóó nêhivi nù ñà-càhvì-né. Ináhà-ndà ñà-imindaa Dios iá, te còò ni-ñàhà ndiaá figura iá ñuhiví yohó,

⁵ mate cuàhà gá ñà-nduá cachí nêhivi nduú ana cahví-né ansivi ò ñuhiví, vâchi cuàhà ñàhà cachí-né nduú dios xi-ne ò stoho-né.

⁶ Doco nù ndohó, imindaa Yua-nda Dios iá. Cuisi mii-yá nì quidavàhà xi nsidaa ñàhà, te xinúcuáchi-ndà nù-yá. Te imindaa stná Stoho-ndà Jesucristu cahví-nda, vâchi sàhà nduú ì xi-yá nì sàcòo nsidaa ñà-íá, dècuèndè stná ndohó.

⁷ Doco màdi nsidaa nêhivi sànihì vaha ini-né sàhàjàn. Vâchi dava nècuàchi xiníndisá, quidá ñi-né cuenta ñà-dàcútiácú ndisa xi figura mà nduú ofrenda chindóó nêhivi nùá, vâchi antes ducán ñisa quida stná-né. Ñâyùcàndüá, na xixí-né ofrenda mà vichi, niñnú ini-né ñà-sàni cumanchá anima-né nduá, vâchi tañàhà ga cutùha vaha-ne nacuni-né sàhámà.

⁸ Pues, nàhà claru màdi xi ñà-itiácú-ndà icúmí-ndà ndee vaha-nda nù Dios, vâchi nú sàni saxi-ndà ñàhà, màdiá chicá ndiaá-ndà, te ò nú có-cùni-ndà caxi-ndà ñàhà, iin-ni iá stná-ndà, (cóni xidá cuàchi-nda.)

⁹ Doco cuidadu nì cùndóó-ndà, vâchi mate iá derechu xi-nda (caxi-ndà ñà-yúcán), doco vihini coo iin nêhivi có-cùndáà inì-xi sàhámà, te vihini sàhà ndohó cuida cuàchi-ne.

¹⁰ ¿Índü modo? Pues, nì cachí-ndà sàni xini iin nêhivi mii-nsiá nècuàchi ináhà guá, te nì quihví-nsia vehe ndé itá ñà-nduá cahví nêhivi, te ndoó-nsiá vehe ma, xixí-nsiá ofrenda xi-ñamà. Te nêhivi nì xini xi-nsiá mà, nú nì cùndúú-né iin nècuàchi có-cùndáà vaha inì-xi, vihini cuàhandee stná ini-né caxi stná-né ñà-jaàn.

¹¹ Ñâyùcàndüá, sàhà-ñá tuxí mii-nsiá ináhà guá-nsiá (nansa quidá-nsiá), vihini dandáñihú-nsiá anima ñanitnaha-nsia, mate sàhà stná mii-né nì xihì Cristu.

¹² Ñâyùcàndüá, có-queé víamà, vâchi nú nì quida-nda cuàchi nù ñanitnaha-nda ducán, dandu nù stná Cristu nì quida stná-ndà cuàchi queámà, vâchi sàni dàtúcù-ndà sàxinítnùni nècuàchimà ñà-có-sàhà-né cundaà vaha ini-né.

¹³ Ñâyùcàndüá, yùhù, nú cuàhàn iin ñanitnahi quida-ne iin cuàchi sàhà ñà-ndüá cuní caxí nì cùí, dandu chicá vaha màsà nunca caxi gué nì iin cuñu mà, còtò cuida cuàchi iin ñanitnahi.

9

Nansa nì cachi Pablo xi nêhivi xítñuhu xi-né ñà-quadáchúün-né nahi dava ga nêhivi

¹ Yùhù, ¿amádi libre ié? ¿Amádi iin nècuàchi apóstol nduú stnáí? Dècuèndè mii Stoho-ndà Jesús sàni xinínù stnáí. Te mii-nsiá, ináhà stná-nsiá nì quide chuun ndiaha xi-yá ndé ndoó-nsiá, te nì xiníndisá-nsiá mii-yá.

² Vihini có-nàcúni dava nêhivi yùhù ñà-nduú ndise iin apóstol, doco mii-nsiá, ináhà vaha-nsia, vâchi ñà-sàhà yùhù sà-xiníndisá-nsiá ichi-yá, divi sàhámà cundaà vaha ini-ndà ñà-nù mii-yá sàni nihitáhví chuun quidé.

³ Vichi cuàhin cachí ñàhà xi-nsiá, vâchi ndoó dava nêhivi xítñuhu xí.

⁴ Pues, ¿amádi iá stná derechu xi-nsi (cahví-nsi xi-nsiá) ñà-dacuxí-nsiá nsiùhù?

⁵ Te amádi iá stná derechu xi-nsi nandàhà-nsí, te cundaca-nsi iin ñahàdihí-nsi nacua quidá stná ñani Stoho-ndà Señor, xi stná Pedro, xi stná dava ga nècuàchi apóstol.

⁶ Vihini tuxí ini-nsiá ñà-cuisi Bernabé xi yùhù xínduu nêhivi còò derechu-xi; doco iá stná derechu xi-nsi nacoo-nsi chuun xi ñuhiví yohó, te quida-nsi cuisí chuun ì.

⁷ Vâchi ducán iá xi-nsí na ian quidá soldadu, màdi cuenta xi mii-té sàhàn-te guerra. (Còó.) Daani, nacua quidá stná tè-ndiáá xi yutnú quisi vídi, saxi stná-te iin ù-si; te ò nú quisi ndacá-te, iá stná derechu xi-tè cuhnì-tè tëndodo-sí coho-tè.

⁸ Te màsà cútuxí stná ini-nsia ñà-sàhà-ñá có-ndüú mii-yá, ñâyùcàndüá, có-ndiáá palabra cachí jaàn. Còó, vâchi divi ducán cachí stná ley ì ndé nì tiaa Moisés

⁹ nù tutu ì, te ò cachí Dios: “Màsà cùfíhú ñunú yuhù buey na sànihni-si trigu cóya”. Pues, nàhà claru, màdi sàhà-ñá màni guá quisi mà nù-yá nduá disàhà-xi nì càchí-yà ducán.

¹⁰ Còó, sàhà ndohó nì cachí-yà ducán, (vâchi ejemplu) nduá, te cuní cachàmà ñà-ndiá icà coo tñundé ini xi nècuàchi (chináhà palabra ì) ñà-nihì-né iin algu, divi nacua iá stná xi iin nècuàchi xitú, te ò iin peón dacóyo nùni, niñnú ini-né nihì stná-né iyuhá.

¹¹ Te nsiùhù, nú sàni cachitñuhu-nsi xi-nsiá meru palabra cutiacu ndiaha anima-nsiá, dandu amádi iyuhu nduá nú nì cuàhà-nsia nsiùhù iyuhu ñà-cutiacu-nsi ñuhiví yohó.

¹² Te nú ndoó nêhivi dava ga iá derechu-xi càcàn-né ñà-jaàn nù-nsiá, dandu ¿amádi chicá iá stná derechu xi nsiùhù sàhà ñà-jaàn?

Doco còo; có-xìcàn-nsi ni-ìñàha nùu-nsiá, mate iá ndisa derechu xi-nsi. Cuisi quidándéé ini-nsi, còtò nú ni cacàn-nsi ìñàha cadiàmà nùu nèhivì, te mà cúnindisá gá-nè razón ndiaha xí Cristu.

¹³ Ádi sá-ínahá stná-nsiá nansa xíquida dùtù quida-xi chuun ìlì veheñùhu (xi nècuàchì raza Judea), xixì-né promesa sáa yucán. Vachi dùtù xinúcuáchì nùu mesa ìlì ndé xixàn quisi nduú promesa, ìhì-né iyuhu cuñu mà.

¹⁴ Ñàyücàndüá, nàhà claru sàni chitnùni ini Stoho-ndà Señor ñà-dúcán quida stná nèhivi cachitnùhu razón ndiaha, divi sàhà chuun quidá-némà icúmì-nè ìhì stná-nè ñà-cutiacu-nè.

¹⁵ Doco yùhù, cóni xiquèn ñà-jaàn nùu-nsiá, mate iá derechu xi. Ni màsà cútúxì stná ini-nsia a tíaí carta yohó ñà-quidé reclamu ñà-nduú derechu xi. Còo, chicá vaha dihna ni cuí, te (màdiá quideajàn), vachi nú ducán, dandu mà cuí gá cachi xi nèhivi ñà-ndüá cudfi guá ini cachi xi-né, (divi ñà-có-xiquèn ni-ìñàha).

¹⁶ Ñà-ndáa nduá, razón ndiaha xí Dios nduá cachitnùhi; doco có-nihnú ini camáni nèhivi yùhù sàhámà, vachi nihnú ini ñà-fuerza cachitnùhi palabra mà, te ndahví (gà cuú ini) nú màsà cachitnùhi razón ndiaha mà.

¹⁷ Ñàyücàndüá, nú cuisì yùhù ni chitnùni ini cacànui xi palabra mà ni cuí, dandu vihini coo ñà-cunduu nahi raya xi. Doco nú nihnú ini ñà-fuerza quide chuun mà, dandu sàhájàn cundaà ini-ndà iin chuun ìlì ni ìhì nùu mii-yá nduá.

¹⁸ Doco te nú ducán ni ìhì chuun mà, dandu ¿indü ñàhà cunduu tnùmani nihitáhvi? Pues, divi ñà-uun-ni cachitnùhi xi nèhivi razón ndiaha xí Cristu, te có-quiyàhvi, mate iá derechu xi càquiàn, doco có-xiquèàn nùu-né.

¹⁹ Yùhù, libre ié; còò ni-iin ana cachi xí nansa quide. Doco nihnú ini ñà-ié' sujetu nùu nsidaa nèhivi áma vihini sàa stná-nè cunchicùn-nè ichì mii-yá.

²⁰ Yùhù, voluntad xi chívàha stnáì estilu xi nècuàchì raza-xi Judea na hora cutnàhì xi-né, áma sáa dava-ne cunindisá stná-nè. Ñà-jaàn nduá quidé mate nùu yùhù có-ndiáà gá ley sàhàha xí-némà, doco voluntad xi mii nchícuiàn áma sáa stná dava-ne cunindisá stná-nè.

²¹ Daaní, nú ié' cutnàhì xi nèhivi có-nchícùn estilu xi ley mà, dandu có-nchícùn stnáì-ñà, áma (chíndéé stná mà) ñà-cunindisá stná dava-ne ichì-yá. Doco màsà cúnihnú ini-nsia ñà-ndüí iin nèhivi còò ni-iin ley xi Dios nùu-xí; còo, vachi nchícùn ndisa stnáì ley xi Cristu.

²² Daaní, na ié' cutnàhì xi nèhivi mà-fuerte anima-xi, dandu quida stnáì na quidá mii-né, áma ñhì' dacuní stnáì dava-ne ichì váha. Vachi ducán quidé xi nsidaa nèhivi; nacua quidá mii-né, ducán quidá stnáì, áma sáa stná-nè càcu anima-nè.

²³ Nsidaa ñà-jaàn quidé sàhà-ñá chicá quee tnùñuhu xí razón ndiaha xí-yá, dandu nihitáhvi stnáì iin ñà-ndiaha sàhà palabra mà.

²⁴ Sà-ínahá-nsiá, na xinú tēcuachi carrera, cuisì imindaa-té ñhì xi premiù, mate cuàhà-té ni dàdávà stnahá-te. Pues ducánì iá stná xi ndohó, xiñuhu cuàhandee ini-nda, dandu nihitáhvi stná-ndà nùu-yá.

²⁵ Daaní, nú cuàhàn tēcuachi mà dadávà stnahá-te ducán, xíndiaa stná-te mii-té, có-guidá ndevàha-tè xi mii-té (áma ñhì-té cóo fuerte-te). Te ¿indü chuun? Divi sàhà-ñá cunì-te ñhì-té (iin premiù tii) mà-cunáhà ni-iin ratu, iin sicàhè ndahà cuí yutnù cuñuhu ñni-té. Doco ndohó, iin corona ndiaha mà nunca cutuhú nduá ñhì-ndà nú ni cuàhandee ini-ndà (cunchicùn-ndà mii-yá).

²⁶ Ñàyücàndüá, yùhù sàhandee cahnú ini, nahi tē-xinú carrera, doco ináhi indü nùu-xí cuàhìn. Te na quidá stná tēcuachi ìdiquí box, ducán sàhandee stná ini, doco có-ìdiquí uin; ináhi ñà-ndüá quidé.

²⁷ Sadí nùu ñà-xíhoé quide. Có-sàhi ñà-quida ndevàhi xi mií, còtò mà nátüi guè nùu mii-yá mate cuàhà gá sàni càhin xi nèhivi dava gá sàhà ichì-yá.

10

Màsà cáhvi-ndá figura nahi ñisa quida nèhivi Israel sàhàha na ní caquee-ne ñuu Egipto

¹ Ñáni, cuní cundaà ini-nsia nansa ni cuu xi nèhivi sàhàha, nsidanicuú-né (ni chindee Dios-nè), ñisa xica-ne tixi còndàhvi iin vico xí-yá, te nsidaa-né ni yàha uun stná-nè mahì mar yucán.

² Ñàyücàndüá, na ian cùu-xi-ndà na cuhí-ndà, ducan quida-nda cunta sàhà mii-né na ian ni cuhì stná-nè tixi vico mà xi ini mar mà, te ducán ni nanduu-ne nentà xí Moisés.

³ Daaní, iin-ni ñisa itiacu stná nsidaa-né ñà-ndüá ni sàhatahvi Dios-nè,

⁴ te iin-ni ñisa xihì stná-nè tēcuí ndiaha, divi tēcuí ni cana nùu iin cavà. Te cavà mà, seña ni sandua nahi Cristu, vachi ni cutnahá stná-yá xi-né ichì cuàhàn-nè.

⁵ Pues mate ducán ni cuu xi-né, doco cóni ndóo ini Dios xi modo xi-ne, te ñàyücàndüá cuàhà sàstnùhù-né ni xihì nùu yucú yucán.

⁶ Cunaha-nsiá, nsidaa ñà-nduá nì cuu xi nèhivì sàhana ma, divi sàhà-ñá cundaà ini ndohó vichi nduá, màdí nchihò stná ini-ndà quida chucuéhè-ndà na ian nì quida mii-né.

⁷ Ni màsà cáhvi stná-ndà figura na ian nì quida dava-ne, vâchi ducán nacání tutu ìi: “Ni sâcúndoo-ne nì xixi-ne, te nì xihi-ne, dandu después nì ndacuita-ne nì itasaha-né (nùu figura xi-ne)”, cachá.

⁸ Ni màsà cáhàn-ndà xì ana cóni nándàhà xi-ndà nacua nisa quida dava nècuàchi yucán, vâchi después nì xìhì òcò ùni mil-nè iin quivì-ní.

⁹ Ni màsà quidá canúú-ndá ñà-có-cùní Stoho-ndà Señor, vâchi ducán nì quida dava-ne, te sâhájàn nì ndecoyo cuàhà còò, nì tnii-siné, te nì xìhì-nè.

¹⁰ Ni màsà cáhàn ndiaa-ndà (diqui-yá) nacua nì quida dava-ne, te nì ndañuhu cuàhà-né nì quida ángel xi-ya.

¹¹ Cunaha-nsiá, nsidaájàn nì cuu xi nècuàchi sàhana ma sàhà ñà-nì cundáa ini-ndà (màsà quidá stná-ndà ducán). Vâchi divi sàhà ndohó nì tiaa nsidaamá nùu tutu ìi sàhà-ñá cundaà ini-ndà nansa quida-nda quivì vichi na xínu tiempu.

¹² Ñâyücándüá, nú nihnú ini-ndà sà-íá vâha-nda nùu Dios, dandu ni caquín-ndà cuidadu còtò sâa-ndà quida stná-ndà iin cuàchi có-nihnú ini-ndà.

¹³ Nsidaa ñà-nduá yâha-nda vichi, cuisì ñà-ndohó stná nsidanicuú nèhivì ñuhivì nduá. Te vâtùni cahvi vii-ndà xì-yá ñà-mà cuâha-ya cuu xi-nda ñà-nduá mà cundéé ini-ndà sàhà-xí. Còò, vâchi (nú cuàhàn-ndà quida-nda iin cuàchi nì cuí), dandu siempre datúí Dios nansa càcu-nda nùájàn sàhà-ñá vâtùni quidandee ini-ndà.

¹⁴ Ñâyücándüá, cuidadu ni cundóó-nsiá, ñani màní; màsà nunca cahvi-nsiá ni-iin figura.

Cuisì nùu Dios ni cuâha-nda promesa xi-nda; te màsà cáxi-nda ò cúxi-ndá ñà-ndüá ni chindoo nèhivì nùu figura

¹⁵ Cuàhìn cachì xi-nsiá iñâha, te mii-nsiá cachi-nsiá xì, amádi ndisa á coó, vâchi quidé cuenta xínduu-nsia nèhivì cundáa ini-xi.

¹⁶ Na (nacuitáhvi-ndà, xihi-nda) ñà-ñùhú copa ndiaha ma, te naquimáni-ndà mii-yá. Pues ducan quida-nda, te nihnú ini nsidaa-nda ñà-sàhà ndohó nì xitià nù-yá. Te na xixi stná-ndà pan ìi, dandu iin-ni nihnú stná ini nsidaa-nda nansa nì sàha-ya iquicúñü-yá (sàhà-ndà). Sâ-ínâhá-nsiá nsidaájàn.

¹⁷ Ñâyücándüá nahi imindaa nèhivì sàni nanduu nsidaa-nda, mate cuàhà-ndà ndoó, vâchi iin-ni pan (ìi) xixi nsidaa-nda.

¹⁸ Cundehè-nsiá nansa xíquida nècuàchi raza Israel nú sàni sàha-ne iin cuisì nduú promesa, te nì xìhì-si nùu mesa ìi, dandu después saxì-né cuñü-sì. Pues sàhà ñà-sàxi-né promesa mà, nâhá xicâ xínduu stná-nè ana (nihnú ini xì religión mà).

¹⁹⁻²⁰ Pues cachì nsidaájàn xi-nsiá, doco có-cùní cachàmà ñà-itiácú ndisa figura cahvi nèhivì có-ínâhá xí Dios, nì có-cùní cachì stná ñà-ndiáá ndisa promesa sâha-neñâ. Còò, doco cunaha-nsiá, ía ndisa ana dinúü-xí sâha-ne promesa xi-ne. Divi nùu ñà-malu sâha-neà, màdi nùu Dios. Te yùhù, có-cùní dahuin cunihnu ini-nsiá cuisì mà.

²¹ Vâchi còò permisú cuitahvi-ndà coho-nda copa ìi xí Dios, te después coho stná-ndà ñà-ndüá sâha-ne ñà-malu; còò. Vâchi còò permisú cuxi-nda pan ìi xí Dios, te después cuxi stná-ndà ñà-dàcùxi-nèsi.

²² Mii-nsiá, ¿a ndísá cuní-nsiá dacuidá ini-nsiá Stoho-ndà Dios ducán? ¿A tuxí ini-nsiá chicá fuerte-nsiá nùu-yá? (Doco mà ndísá.)

²³ (Ñà-ndáa nduá), libre ía-ndà quida-nda nacua cudí ini-ndà, doco (xiñuhu nsinuu ini-ndà) màdi nsidaa iñâha nduú iin ñà-vâha. Libre ía-ndà, cachí-ndà, doco màdi nsidaa iñâha nduú iin ñà-cuàhàn chindee xi-nda.

²⁴ Ñâyücándüá, màsà nándúcu-ndá ñà-ndüá cudí ini-ni mii-nda; chicá ndiaha nanducu-nda nansa chicá yâha vâha ñanitnaha-nda.

²⁵ Nsidaa cuñü dicó tè-dicó yâhvi, vâtùni caxì-ndañá. Còò necesidad nacani ini-ndà ndàcàtnùhù-ndà sâhámà,

²⁶ vâchi Stoho-ndà Señor nduú stoho nsidanicuú iñâha ía ñuhivì yohó.

²⁷ Daaní, na cánà-ndà cùhùn-ndà iin vicó ía vehe iin tiaa có-xinindísá-xí-yâ, te cudí ini-ndà cùhùn-ndà, dandu vâtùni caxì stná-ndà nsidaa ñà-ndüá taxì nècuàchimà; nì màsà ndàcàtnùhù-ndà sàhà comida mà; màsà nácání ini-ndà sàhà.

²⁸ Doco vihini cachì iin nèhivì xi-ndà: “Cuñü yohó, promesa nì sandoo nùu figura cahvi-né nduá”. Pues nú ducán, dandu sàhà nècuàchimà màsà cáxi-nda cuñü mà, còtò cuduchi ini-nè, vâchi vihini quida-ne cuenta nduájàn iin cuàchi.

²⁹ Mate có-quidá mii-nda cuenta ducán, vihini nihnú ini mii-né ducán.

Doco ndohó, vihini cachi-ndà ñà-libre ía-ndà, te màdiá fuerza icúmí-ndá quida-nda ñà-ndüá cuní inga nèhivì cachí ìi gá ini-xi.

³⁰ Vâchi naquímâni-ndâ Dios sâhâ ñâ-ndûâ saxí-nda, ñâyùcândûâ còò ñâ-disâhâ-xí cundoò nêhivi cuitnûhu-nëndó sâhâ ñâ-ndûâ saxí-nda.

³¹ (Vihini cachi-ndâ ducán, doco de todos modos), nsidanicuú ñâ-ndûâ quida-nda, sâhâ ñâ-nì quèé gá tnũñuhu ndiaha xí Dios ni cúndûâ, a ducán saxí-nda ò xihí-nda iñâha, te ò ndéni iñâha ni quida-nda.

³² Mâsâ dâcûdúchí ini-ndâ ni-iin nêhivi, a ducán nduú-né iin nêcuàchì raza Judea, ò iin nêhivi inga raza (cò-xiníndísâ), te ò iin nêhivi cahvi víi xi-yâ.

³³ Iin-ni ni quidâ stná-nsiâ nacua quidâ yùhù, cò-nândúquí ñâ-cudìi inì míi, cuiisí-ní quidê lucha ñâ-mâsâ cúdúchí ini nêhivi sâhí, dandu vihini sââ stná-nè càcu anima-nè.

11

¹ Ñâyùcândûâ, nacua quidâ yùhù, ducání quida stná mii-nsiâ, vâchi divi Cristu nduú ana nchícuin.

Nansa xiñuhu quida nêcuàchì ñahâ na natâcá-ndâ

² Cuaha-ní quidâ-nsiâ, ñâni, vâchi iin-ni nsinúú ini-nsia yùhù, te nsinúú stná ini-nsia palabra ni cachi xi-nsiâ ñâ-chivâha-nsia.

³ Te vichi cunf cundaâ ini-nsia ñâ-divi Cristu nduú ana dandacú nùú nsidaa nêcuàchì tiâa, te nêcuàchì tiâa nduú ana dandacú nùú nêcuàchì ñahâ, ducání nacua dandacú stná Yua-nda Dios nùú Cristu.

⁴ Cunaha-nsiâ, cò-ndûâ ducán càcàn tàhvi iin tiâa nùú Dios nú ñuhú-né mbelu, ni mà váha cachitnûhu stná-nè razón xi-ya nú ñuhú-néamâ, vâchi cò-ndûámâ tnũñuhu xí ñâni-né.

⁵ Doco nêcuàchì ñahâ, nú xicàn tàhvi-né, ò cachitnûhu-ne razón xi-ya, te cò-ídâhvi ñâni-né ni-iñâha, dandu xiñuhu cucahan nùú-né sâhâ ñâni-né, vâchi davani queamâ na ian sâni datê tehe-né.

⁶ Vâchi nú cò-ídâhvi ñâni-né ni-iñâha, dandu chicá váha ni dátê cuati ñâni-né. Te nú ni cúcâhán nùú-né datê cuati-né, ò datê tehe-né, dandu xiñuhu ni cúdâhvi ñâni-né.

⁷ Iin nêcuàchì tiâa, cò-xiñùhù cudâhvi ñâni-né, (na xicàn tàhvi-né), vâchi nacua iá mii-yâ ducán ni quidayucun-yâné, ñâyùcândûâ, xiñuhu tavâ-né tnũñuhu xí-yâ; doco nêcuàchì ñahâ, tnũñuhu xí nêcuàchì tiâa tavâ-né, ñâyùcândûâ (xiñuhu ni cúdâhvi ñâni-né).

⁸ Vâchi màdi (iin iquí) nêcuàchì ñahâ ni cúyúcùn nêcuàchì tiâa. Còó. Iquí tiâa ni cuyucun nêcuàchì ñahâ.

⁹ Te divi sâhâ-ñâ chindee-né iin-né, ñâyùcândûâ ni sâcòo-ne, màdiâ ni sâcòo tiâa ñâ-chindee-né nêcuàchì ñahâ.

¹⁰ Ñâyùcândûâ, xiñuhu cudâhvi ñâni-né nêcuàchì ñahâ, te cundumâ seña ñâ-íâ ana dândâcù-xi nùú-né. Te sâhâ stná (indêhe) ângel xí Dios, ñâyùcândûâ xiñuhu quida stná-nè ducán.

¹¹ Doco cò-câchí ñâ-cuisi nêcuàchì tiâa nduú ana ndiââ, ni cò-câchí stná ñâ-cuisi nêcuàchì ñahâ ndiââ stná; còó, vâchi nú ndoo-nda nùú Stoho-ndâ Señor, dandu iin-ni xiñuhu stnahâ nsidaa-nda.

¹² Ñâyùcândûâ, mate iin (iqué) nêcuàchì tiâa ni sâcòo nêcuàchì ñahâ, doco vichi nêcuàchì ñahâ nduú ana datúinuú xi nêcuàchì tiâa. Doco cunaha-nsiâ, mii Dios nduú ana chitnùnì ini-xi sâhâ nsidanicuú iñâha.

¹³ Mii-nsiâ cachi-nsiâ xí nansa tuxí ini-nsia: ¿a vâtùni iá cahan-nsiâ nú ni càcàn tàhvi iin nêcuàchì ñahâ nú uun-ni iá ñâni-né?

¹⁴ Pues, nsidaa-nda, ducání inâhá-ndâ cucâhán nùú iin nêcuàchì tiâa nú ni ndunaní ididini-né.

¹⁵ Doco nêcuàchì ñahâ, còó, cuâhâ gá cudíi ini-nè nú naní ididini-né, vâchi na iñâha ídâhvi ñâni-né nduâ, te ducán ni nihitâhvi-né coo-ne.

¹⁶ (Pues ñâ-jaân nduâ cachí xi-nsiâ), doco nú cò-ndôo ini iin nêhivi xí palabra yohó, dandu ni cúnâhá-né cuiisí ñâ-jaân nduú estilu xi-nda, te divi ñâ-jaân nduú stná estilu xi nsidaa gá nêhivi cahvi xí Dios.

Nansa ni cachi Pablo xi nêcuàchì ñuhu Corinto ñâ-cò-quidâ víi-né na nacutâhvi-né Cena ñi xí Stoho-ndâ Señor

¹⁷ Vichi cuâhín cachi xi-nsiâ iñâha, doco màdiâ ndeníhí vâhi mii-nsiâ nduâ; còó, vâchi cunaha-nsiâ, cò-quèé víi na natâcá-nsiâ; mal queâ.

¹⁸ Primeru cuâhín càhín xi-nsiâ sâhâ-ñâ tucu tucu niñnú ini iin iin grupu-nsiâ, vâchi ducán cachi nêhivi xí, te tuxí ini vihini ñâ-ndââ nduâ.

¹⁹ Vâchi vihini cachi stná-ndâ ñâ-ícúmi coo itnii grupu nùú-nsiâ sâhâ-ñâ cundaâ váha ini-ndâ ana xínduú nêcuàchì chicá ndiââ, (doco màdi ñâ-câhán sâhñù-ndâ cunduañân).

²⁰ Ñâyùcândûâ, yùhù cachí, màdiâ nacutâhvi ndisa-nsia Cena ñi xí Stoho-ndâ Señor nduâ na natâcá-nsiâ jaân.

²¹ Vàchi cada iin iin-nsia, yàchì quesáhá-nsiá xixí-nsiá ñà-nduá nihí iin iin-nsia, te dava ga nêhiví, ni có-sàà comida xi-ne, te dava ga-nè, dècuèndè xihí-né.

²² Cunaha-nsiá, vehe-nda nduú lugar ndé ndiá icà-ndà cuxi-nda ducán. Màsà quidá-ndá relaju na natácá-ndà, vâchi nêhiví xí Dios xínduu-nda. Ni màsà dándúcáhán-ndá ñanitnaha-nda nduú nècuàchì ndahví. Pues, ¿nansa tuxí ini-nsia? ¿A cuàhìn denihi vâhi-nsiá sàhà ñà-nduá quidá-nsiá? Còò, mà quidéa.

Nansa ni quida Jesús Cena ì primeru

²³ Nùù meru mii Stoho-ndà Jesús ni nihí palabra nacání nansa ni quida-ya na ní sanduu ñuú quiví ni cahìn-teyá. Te diví palabra yucán nduá sàni nacani xi-nsiá, nansa ni tnií-ya pan,

²⁴ te ni naquimani-yá (Yua-yá) sàhà-ñà, dandu ni dàcuàchí-yáñà, te ni cachi-yà: “Nahi iquicúñú mii nduá yohó, te diví iquicúñú nduá sáhatahví sàhà mii-nsiá. Te nacua quidé vichi, diví ducán icúmi-nsiá quida stnà-nsiá sàhà-ñà nsinuu ini-nsia yùhù”, ni cachi-yà.

²⁵ Daaní, na ní nsihi ni xixi nsidaa-né, dandu ni tnií-ya pocillu, te ni cachi-yà: “Ñà-ñùhù pocillu yohó nduú seña xi ichì saa nacóí cunchicùn nêhiví, vâchi nahi nii nduá. Te cada coho-nsia ndutè yohó, dandu nsinuu ini-nsia yùhù”, (ni cachi Stoho-ndà Señor).

²⁶ Te ndisa, cada xixi-nda pan mà, te xihí-nda ndutè ì mà, ñà-jaàn nsinúú ini-nda ñà-ni xihí-yà (sàhà-ndà), te iin-ni icúmi-ndá quida-nda ducán dècuèndè cachi sàà quiví naxicocuñ-yà.

²⁷ Ñàyùcànduá, nú cuní-nda nacuitahví-nda cuxi-nda pan xi Stoho-ndà Señor, ò coho-nda yà-ì xi-yá, dandu màdiá nansa ni ni cui ni quida-ndañá, vâchi nú ducán, dandu cuàchi cundua, vâchi ñà-cóni chívàha-nda tñùhu xi iquicúñú-yà xi nì-yá nduá.

²⁸ Ñàyùcànduá, xiñuhu nacani vâha ini-nda, te ndundoo anima-ndà, dandu vâtùni nacuitahví víi-nda pan mà, te coho-nda yà-ì mà.

²⁹ Vâchi nú có-nihnú ini-nda pan mà nduú nahi cuerpu xi-ya xixi-nda, te xihí stnà-nda yà-ì mà, dandu dacuidá cuàchi-nda mii-nda na quida-nda ducán.

³⁰ Pues, diví ñà-jaàn nduú meru ñà-disáhà-xí culí cuàhà-nsiá, te ndohó-nsiá quidá cuèhè; dècuèndè sàni xihí stnà dava-nsia.

³¹ Chicá vâha nacani vâha ini-nda, te ndundoo víi anima-nda antes, dandu mà níhi-nda castigu.

³² Doco te nú níhi-nda iin castigu nùù-yá, diví ñà-sàha-yàndó conseju nduájàn sàhà-ñà màsà ndáñùhù dahuun-nda nahi dava ga nêhiví ñuhiví.

³³ Ñàyùcànduá, na natácá-nsiá, cundiatu-nsia cundoo nsihi-nsia, ñáni, dandu vâtùni cuxi-nsia.

³⁴ Doco nú xihí ndisa iin nêhiví doco, dandu chicá vâha ndè vehe-ne ni cuxí-né, te màdiá nihí-nsiá castigu na natácá-nsiá cundua. (Ñà-jaàn nduá cachi xi-nsiá vichi) ndè cachi nasai yucán, dandu ndatnuhu gué xi-nsiá sàhà chuun íá gà.

12

Nansa íá ñà-nduá nihítahví ndiaha-nda cutáhvi-nda nùù Espíritu Ìi

¹ Yùhù cuní cundaà ini-nsiá sàhà ñà-nduá nihítahví ndiaha-nda nùù Espíritu Ìi, ñáni.

² Sà-ináhá-nsiá nansa ni saquida-nsia antes na tãñàha ga cunindisá-nsiá mii-yá, cui si nacua nisa cachi nêhiví xi-nsiá, ducán nisa quida-nsia, nisa cahvi-nsiá cuàhà figura xi yùù, mate có-càhàn mà.

³ Ñàyùcànduá, cuní cundaà ini-nsia palabra yohó: nú ndisa Espíritu Ìi xí Dios nduú ana chindéé xi-ndá càhàn-nda, dandu mà nunca cachi-nda sàhà Jesús ñà-có-ndiáa-yà. Te davani stnà, nú màsà chindéé Espíritu Ìi ndohó, dandu mà cúí cachi-nda: ñà-cuisi Jesús nduú Stoho-ndà Señor (dandacú inicutu).

⁴ Cunaha-nsiá, nsidanuu clase ñà-ndiaha sàni nihítahví-nda nùù-yá, doco imindaa Espíritu Ìi xí-yá nduú ana ni dàcutàhvi xi-ndañá.

⁵ Te cuàhà gà stnà modo xinúcuáchí iin iin-nda nùù-yá, doco imindaa-ní Stoho-nda Señor nduú ana xinúcuáchí-nda nùù-xí.

⁶ Te cuàhà gà stnà chuun ndiaha quidá Dios ini anima iin iin-nda, doco imindaa-yá nduú ana quidà-xi nsidaájàn.

⁷ Te iin iin-nda sàni nihítahví nansa chindee ndiaha Espíritu Ìi ndohó sàhà ñà-vàha xi nsidaa-nda.

⁸ Dava-nda, sàni nihítahví-nda ñà-càhàn nchichí-nda. Te dava-nda, sàni nihítahví-nda ñà-cundaà tui ini-nda, doco mismo mii Espíritu Ìi nduú ana chindéé xi-nda ducán.

⁹ Daaní, dava tu-nda, nùu mismo Espíritu Ì sàni nihitáhvi ndiaha-nda cucumi váha-nda fe; te dava tu-nda, ni nihitáhvi-nda dandúvaha-nda nehivi, doco mismo Espíritu Ì nduú ana ni sáhatahvi xi-nda ducán.

¹⁰ Te ò vihini ni nihitáhvi-nda quida-nda milagru ndiaha, te ò cachitnùhu-nda ñà-nduú razón ndiaha xí-yá. Te dava ga tu-nda, vátuni cundaá ini-nda a divi Espíritu Ì, ò iin ñà-malu nduú ana quida-xi ñháa. Daaní, dava tu-nda, túha-nda càhàn-nda inga dàhàn sàa, te dava ga tu-nda cachitnùhu-nda nansa cuni cachi dàhàn sàa mà.

¹¹ Doco nsidanicuú ñà-nduú ni nihitáhvi-nda mà, divi Espíritu Ì nduú ana chindéé xí-nda quida-nda ducán, te iin iin-nda nihitáhvi-nda según nansa chitnùni ini-yà cuàhatahvi-yándò.

Nahi iquicúñú mii-yá xínduu nsidaa-nda

¹² Ndohó, iá ndahà-nda, te iá sàhà-nda; cuàhà ñháa sàni nihitáhvi-nda cucumiá, doco mindaa cuerpu xi-nda nduú. Mate cuàhà ñháa quidá, doco imindaa-ní cuerpu nduú. Pues, ducán iá stná Cristu xi ndohó na ian ndohó xi iquicúñú-nda.

¹³ Váchi nsidanicu-nda, nahi iin-ni cuerpu xi mii-yá sàni nanduu-nda na ní nduhii anima-nda ni quida Espíritu Ì xí-yá. Váchi iin-ni Espíritu Ì sàni nihitáhvi ndiaha nsidaa-nda, ò xínduu-nda nècuàchi raza Judea, te ò nècuàchi inga raza, có-quidámà, ò xínduu-nda nècuàchi libre, te ò nècuàchi ndoó ana dándacù-xi núu-xí.

¹⁴ Sà-ínhá-nda, iá ndahà-nda, iá sàhà-nda; màdi uun-ni iá iquicúñú-nda.

¹⁵ Pues (nú ni cúí càhàn) iin sàhà-nda, vihini cachá: “Còó; yùhù, có-nduú iin ndahà, ñàyùcànduá, có-nduú cuerpu yohó”. Pues mate ducán ni cachá, doco iin-ni nduú sàhà-nda.

¹⁶ Te nú ni cachí stná tùtnù-nda: “Còó, yùhù, có-nduú iin nduchinùu, ñàyùcànduá có-nduú cuerpu yohó”. Pues, mate ducán ni cachá, doco divi iin-ni nduú tùtnù-nda.

¹⁷ Váchi nú cuisì nduchinùu-nda ni cùndúú inicutu-nda, dandu ¿nansa cui tiacu-nda? Te nú cuisì tùtnù-nda ni cùndúú-nda, dandu ¿nansa cui sahan ñháa ditni-nda? Mà cúí.

¹⁸ Ñàyùcànduá, sàni quidavàha Dios iquicúñú-nda xi nsidaa ñà-nduú xichúàn, te nsidaámà iá chuun quidá según nansa ni chitnùni ini-yà.

¹⁹ Váchi nú cuisì iin-ni chuun ni cúí quida cuerpu xi-nda, dandu mà cùndúú ndisa-nda nehivi.

²⁰ Doco còó, mate iin-ni cuerpu xi-nda nduú, doco nsidanuu clase chuun quidá.

²¹ Ñàyùcànduá, có-íá vaha cachi nduchinùu-nda xi ndahà-nda: “Có-xiñùhí mii-ní”. Ni mà vaha cachi stná òni-nda xi sàhà-nda: “Có-xiñùhí mii-ní”.

²² Còó, váchi mate iá dava xaan xi-nda tuxí ini-nda có-xiñùhù guá, doco nahnú chuun quidá.

²³ Te nú iá ndé tuxí ini-nda mà vícó iá, divi jaàn chicá ndiaá-nda, te saquín-nda cuidadu sàhà-ñá màsà cúcáhàn núu-nda.

²⁴ Váchi ndé vico-ni iá, có-xiñùhù (cundiaa guá-ndañá). Pues ducán ni chitnùni ini Dios coo cuerpu xi-nda sàhà-ñá chicá cundiaa-nda ndé xi-nda có-ndiaá cachí-nda mà.

²⁵ Dandu nsidaa ndahásàhà-nda, icúmiá chindee tnahá, te iin-ni coo vii iquicúñú-nda.

²⁶ Váchi mate imindaa lugar xi cuerpu-nda ndohó, doco inii iquicúñú-nda cuú stná sentir. Te nú cudí ini iin xaan xi-nda nahi ndahà-nda, dandu inii cuerpu xi-nda cudí stná iniá.

²⁷⁻²⁸ Pues vichi cachí xi-nsiá ñà-nahi iquicúñú Cristu xínduu nsidaa ndohó nècuàchi cahvi xi-yá, te iin iin-nda sàni sáhatahvi-yá chuun quida-nda nùu-yá nacua quidá sàhà-nda, ò ndahà-nda. Díhna nsiùhù nècuàchi apóstol sàni nihitáhvi-nsí ñà-cacanuu-nsi quida-nsi chuun xi-ya. Daaní, nchícùn gà ana xínduu nècuàchi cachitnùhu razón ndiaha xí-yá. Daaní, nchícùn gà nècuàchi chináhá palabra Ì. Daaní, ndoó stná nècuàchi quidá-xi milagru, xi stná nècuàchi dandúvaha xi-nda. Te ndoó stná nècuàchi xicánúu chindéé xí ñanitnaha-xi, xi stná nècuàchi dandacú, xi stná nècuàchi càhàn inga dàhàn sàa.

²⁹ Pues, nàhà xicà màdi nsidaa-nda ni nihitáhvi-nda chuun cunduu-nda apóstol; ni màdi nsidaa-nda túha-nda cachitnùhu-nda razón ndiaha xí-yá, te màdi nsidaa stná-nda túha-nda chinaha-nda nehivi; cóó. Ni màdi nsidaa-nda quida-nda milagru,

³⁰ ò dandúvaha-nda nehivi. Ni màdi nsidaa stná-nda càhàn-nda inga dàhàn sàa, ni mà túha nsidaa-nda cachitnùhu-nda nansa cuni cachi dàhàn sàa mà. Còó.

³¹ Doco de todos modos, iin iin-nda xiñuhu cudíi cuàhà ini-nda nihitáhvi-nda más gà ñà-chicá ndiaha sàni cachi mà. Doco cunaha-nsiá, iá inga ichi chicá nsiha cunchicùn-nda, te vichi cuàhàn càhàn xi-nsiá sàhámà.

¹ Ni cachí-ndá sàni nihitáhvi-ndá càhàn-ndá nsidanicuú dàhàn ñuhiví xì ndè stná dàhàn àngel, doco nú có-cùu stnahá stná ini-ndá sàhà-ndá, ni mà cùndiáá nsidaámà, vàchi ducán queé ñà-càhàn-ndàmà (nahi ruidu-ni), na ian cadì úún iin càa, ò iin platillu.

² Te ò vihini sàni nihitáhvi-ndá cachitnùhu-nda razón ndiaha, te sànihi stná ini-ndá sàhà nsidaa chuun nsiha chicá dèhé, te ináhá stná-ndá nsidanicuú iñàha, te iin-ni icúmí vâha-nda fe, dècuèndè vâtùni dandacu-nda, te cuxio iin yucù. Doco te nú có-cùu stnahá ini-ndá sàhà-ndá, dandísá uun-ni nduú nsidaa ñà-ndùá tùha-nda quida-ndama.

³ Te nú ni dasán nsíhí-ndá ñà-cuicà-ndá, te ò ni cuáha-nda coco-nda (sàhà iin chuun vâha), doco te nú có-cùu stnahá ini-ndá sàhà-ndá, ni-iyuhu mà cùndiáá nsidaámà.

⁴ Cunaha-nsiá, nú cuú stnahá ini-ndá sàhà-ndá, dandu mà úhi coo calma-ndá xì nêhivi, te cuhi ini-ndané. Te mà cùmbidia stnahá stná ini-ndá sàhà-ndá, nú ducán. Ni mà cútúxí stná ini-ndá mii-nda nduu-nda mii-nda, ni mà cùndàa cuadú stná-ndá.

⁵ Vâchi nú cuú ndisa ini-ndá sàhà iin nêhivi, dandu mà quidá-ndá ni-iin ñà-quini xi-né. Ni mà cóo interesadu stná-ndá, ni mà cuidá yâchi stná ini-ndá sàhà-né, te mà chùhún stná ini-ndá sàhà-né.

⁶ Vâchi cunaha-nsiá, nú cuú ndisa ini-ndá sàhà iin ñanitnaha-nda, dandu mà cúdú ini-ndá nú ni quidá-né iin ñà-có-ndiáá. Còó, ñà-cunchicùn vii-né ichì ndáa nduá cuní-ndá quida-ne, nú cuú ini-ndá sàhà-né.

⁷ Te nú màni-né nùu-ndá ducán, dandu mà úhi quidandee stná ini-ndá sàhà-né; ni mà úhi cahvi stná-ndá xì-né ñà-chicá quida vii-né después, vâchi siempre iá tnùndé ini, cachí-ndá, te vâtùni cucumi-nda paciencia.

⁸ Cunaha-nsiá, vâxi iin quivì, te mà cóo gá necesidad cachitnùhu nêhivi xì-ndá iin razón xi Dios, ni mà càhàn gâ-ndá dàhàn sàa, ni mà cóo cá stná necesidad cachitnùhu-ya xì-ndá iin ñà-có-ináhá-ndá. Doco ñà-cuu stnahá ini-ndá sàhà-ndá, mà nunca ndutámà nùu-yá.

⁹ Quivì vichi, có-ináhá nsihi-nda nsidaa iñàha; còó. Stná iin palabra dacàhàn-yà nêhivi, có-ndiámà iin palabra cachitnùhu nsihi xì-nda nsidanicuú iñàha; còó.

¹⁰ Doco na sàa quivì cununa ndisa ñuhiví, dandu mà càhàn gâ-ndá nsidaa ñà-có-ìá nsihi ma.

¹¹ Na tíi, nahi mèé nisa cahìn, vâchi nacua nacání ini nsidaa-vé, ducán nisa nacani stná inì; ducán nisa nihnu inì. Doco vichi sàni sahnui, te ñâyùcànduá, có-quadá gué nahi mèé.

¹² Te ducán icúmí coo stná xì-ndá después. Vâchi quivì vichi indéhe-nda (nansa yâha-nda, doco có-cùndàá vâha ini-ndá), vâchi na ian indéhe-nda nùu iin yùtátá có-túvì, ducán nduá. Doco vâxi iin quivì, dandu mà cóo gá ducán, vâchi vivì-ni icúmí-ndá cundehè claru-nda mii-yá. Quivì vichi cuisì iyuhu-ni cundáa ini-ndá, doco quivì yucán icúmí-ndá cundáa vâha ndisa ini-ndá nacua cundáa ini mii-yá sàhà ndohó.

¹³ Ñâyùcànduá, ùni iñàha xiñuhu quida-nda vichi. Ni cùcúmi vâha-nda fe, te ni cùnínú vâha ini-ndá ñà-siempre chindee-yándó; daaní, ni cùcúu stnahá stná ini-ndá sàhà-ndá. Doco nùu nsi-ùni ñà-jaàn, chicá ndiáá ñà-cuu stnahá ini-ndá sàhà-ndá.

14

Nansa ndiá ìcà-ndá quida-nda na càhàn-ndá inga dàhàn sàa quidá Espiritu Ìi

¹ (Ñà-ndáa ndua), xiñuhu cuu stnahá ndisa ini-ndá sàhà-ndá. Daaní, cuní stnái nanducu-nsiá nansa nihitáhvi gá-nsiá más tàhvi ndiaha xí-yá. Te ñà-chicá cunf nihitáhvi-nsiá nduú ñà-cachitnùhu-nsia razón ndiaha xí-yá.

² Vâchi na càhàn-ndá dàhàn sàa, màdi nêhivi ñuhiví càhàn xì-ndá. Còó. Dios càhàn xì-ndá, doco nêhivi ñuhiví, có-cùndàá ini-nè nansa cachí-ndá. Divi Espiritu Ìi chindéé xì-ndá càhàn-ndá ducán, doco iin chuun iá dèhé nduá cachí-ndá.

³ Doco na cachitnùhu-nda razón ndiaha xí-yá, dandísá nêhivi ñuhiví càhàn xì-ndá, vâtùni chindee-ndané ñà-chicá cunihnu vii ini-nèyá, te chicá nacuahandee ini-nè.

⁴ Doco nú dàhàn sàa nduá càhàn-ndá na natácá-ndá, dandu ñà-chindee xi anima mii-ni-nda nduámà. Doco na cachitnùhu-nda razón ndiaha xí-yá, dandu nsidanicuú nêhivi nacuahandee ini-xi.

⁵ Mate cúdú ini nú ni cuáhatahvi Dios nsidaa-nsiá ñà-càhàn-nsiá dàhàn sàa, doco chicá cudú ini nú ni nihitáhvi-nsiá cachitnùhu-nsia razón ndiaha xí-yá, vâchi chicá ndiaha ñà-jaàn. Doco nú ni càhàn-ndá dàhàn sàa, te después cachitnùhu stná-ndá nansa cuní cachí palabra mà, dandu vâtùni, vâchi (sàhà-ñá claru iá palabra mà) vâtùni nihì stná nsidaa compañeru-nda iin ñà-vâha xi mii stná-nè.

⁶ Ni cachí-ndá ni sái ndé ndoó-nsiá, te cuisì-ni inga dàhàn sàa ni càhàn xì-nsiá. ¿A vâtùni chindeámà mii-nsiá, ñàni? Còó, vâchi xiñuhu ñà-nacani claru stnái xì-nsiá iin palabra sàni dàtnúu ini Dios yùhù, te ò iin palabra ni cundáa túvì ini ni quida-ya, te ò nú cóo, iin razón ndiaha ni quixi nùu-yá, te ò iin ñà-vâha cui chinahì mii-nsiá.

7 Vâchi dècuèndè stná ñà-quidándáá-ndá, ni cundúá iin pitu, ò iin yutnú cuerda, nú nansa-ni ni cui ni quidándáá-ndáñá, dandu mà cundáá ini nèhivi indù yaa tavá-nda.

8 Stná corneta sivi soldadu, nú có-sivi vii-té, mà cundáá ini compañeru-te ñà-sà-íá hora quidayucùn-te cùhùn-te guerra.

9 Te ducání stná ndohó na cáhàn-ndá, nú có-cáhàn claru-ndá (dàhàn mii-nda), mà cúí cundáá ini nèhivi nansa cachí-ndá. Uun-ni queamá.

10 Pues cuàhà gá dàhàn iá ñuhiví, te iin ian vátùni cáhàn nèhivi, te cundáá stnahá ini-nè.

11 Doco nú có-ináhá-ndá nansa cuní cachí dàhàn cáhàn iin nèhivi, dandu có-cundáá ini-ndá nansa cachí-nè; nahi nèhivi inga ñuu xicà nduú-né, te ni mii-né, có-cundáá stná ini-nè ñà-ndúá cachí ndohó.

12 Pues ducání stná mii-nsiá (xì dàhàn sàà cáhàn-nsiá). Yùhù ináhi, yáha ga cuní-nsiá nihítàhvi-nsiá cuàhà ìñàha nùu-yá. Doco ñà-chicá xiñuhu ndúá nihítàhvi-ndá iin ñà-chindee xi ñanitnaha-nda natácá xi-ndá. Pues divi tàhvi clase jaàn nduá cuní nanducu-nsiá.

13 Ñâyücàndúá, nú sàtùha-nda cáhàn-ndá inga dàhàn sàà, dandu xiñuhu stná ñà-càcàn tàhvi-ndá cuàhatahvi Dios-ndó ñà-cachitnùhu-nda nansa cuní cachí dàhàn mà na cáhàn-ndáñá,

14 vâchi na cáhàn-ndá ducán, inì-ni anima-ndá cáhàn stná-ndá, xicàn tàhvi-ndá nùu-yá, doco ini sàxinítùnùni-ndá, có-cundáá ini-ndá nansa cachí-ndá.

15 Pues, nú ducán nduá, dandu ¿nansa chicá vâha quida-nda? Pues, cuàhàn-ndá càcàn tàhvi-ndá nùu-yá (xì dàhàn) ináhá espíritu xi-nda, doco màdi cuisì ñà-jaàn, Icúmí-ndá càcàn tàhvi stná-ndá nùu-yá xì iin palabra ñà-cundáá ini-ndá. Stná ñà-coto-nda; cuàhàn-ndá coto-nda (xì dàhàn) ináhá espíritu xi-nda, dandu después coto stná-ndá iin alabanza cundáá ini-ndá nansa cachá.

16 Vâchi nú naquímáni-ndá mii-yá xì cuisì-ní dàhàn ináhá espíritu xi mii-nda, dandu ùhi cachí nècuàchi mà-túha “amén” (na ní nsihì nì cáhàn-ndá), vâchi ni có-cundáá ini-nè nansa cachí-ndá.

17 Pues, ñà-naquimani-ndá Dios, divi naquímáni váha-ndayá, vátùni iá` mà, doco có-nñhi ñanitnaha-nda cundumá iin ñà-vâha xi stná anima mii-né.

18 Yùhù cachí, ansivéhé Dios, cuàhà gá cáhìn dàhàn sàà; chicá cáhìn ducán nùu nsidaa mii-nsiá.

19 Doco nú sàni nataca-ndá ñà-cahvi-nda mii-yá, dandu chicá nsiaha cáhìn siquiera ùhùn-ni palabra ñà-cundáá ndisa ini-nsiá, te màdiá ùxin mil palabra inga dàhàn mà-cundáá inì-nsiá, vâchi cuisì nú cundáá vâha ini-nsiá, dandu vátùni chinahì mii-nsiá ìñàha.

20 Màsà cúníhnú ini-nsiá nahi mée, ñáni. Vátùni iá nú nihnú iquin ini-ndá sàhà chuun chicuéhè iá ñuhiví; doco (nú chuun sahnú nduá), dandu xiñuhu nacani ini-ndá nahi nècuàchi sahnú, màdi gá nahi mée.

21 Nùu tutu ìi dohó cachí mii-yá: “Icúmí cáhìn xì nècuàchi raza yohó, vâchi icúmí quixi nècuàchi inga ñuu càhàn inga dàhàn, te cuenta-xì icúmí-nè cáhàn-nè xì nècuàchi yohó, doco ni sàhà ñà-yúcàn mà quíhìn casú-nè, cachí Stoho-ndá Señor”.

22 Ñâyücàndúá, ñà-jaàn cundáá ini-ndá seña nduá càhàn-ndá dàhàn sàà, áma cundáá ini nècuàchi có-xiníndisá. Doco ñà-cachitnùhu-nda razón ndiaha, quidámá chuun sàhà nèhivi sàxiníndisá, màdi sàhà nèhivi có-xiníndisá.

23 Ni cachí-ndá nú sàni nataca-nsiá, te cáhàn iin iin-nsia dàhàn sàà, te yucán sàà stná nèhivi có-cundáá inì-xì, ò nèhivi có-xiníndisá. Pues ádi icúmí-nè cachí-nè sàni culocó-nsiá.

24 Doco nú cachitnùhu iin iin-nsia iin razón ndiaha xí Dios (dàhàn cundáá inì-xì), dandu dansínúú iniàmànè cuàchi quidá-né, te cundáá ini-nè nansa iá ndisa anima-nè,

25 dècuèndè natùu vate stná ñà-ndúá iá dèhé nì quida-ne antes. Dandu màcuitasisi-né ñà-cahvi-né Dios, te cachí-nè iá ndisa Dios nùu-nsiá.

26 ¿Ndíá nduá cuní cachí nsidaa ñà-jaàn? Pues dohó iá, ñáni: na natácá-ndá, iin iin-nda iá iin alabanza coto-nda, ò iin palabra vâha chinaha-ndá, te ò iin ñà-ndiaha sàni dàcùnì Dios ndohó, ò iin palabra xì iin dàhàn sàà, te ò cachitnùhu iin-nda ñà-ndúá cuní cachí dàhàn sàà mà. Doco nsidaa ñà-jaàn, sàhà ñà-vâha xi nsidaa ana nì nataca ni cundúá.

Nsidaa ñà-ndúá quida-nda na natácá-ndá, xiñuhu quida vii-ndáñá, màdiá nansa ni nì cui

27 Nú ndoó nèhivi cuní cáhàn dàhàn sàà, dandu vátùni càhàn ùi-nè, ò ùni-nè, doco màsà yáha ùni-nè, te nì nsihì iin-ne, dandu quesaha inga-nè. Iin iin-ne nì cúcúmí-nè tiempu xi-ne càhàn-nè. Te xiñuhu coo stná iin ana cachitnùhu nansa cuní cachí palabra mà.

28 Doco nú còò ni-iin-nsia tùha cachitnùhu sàhà ñà-jaàn, dandu màsà cáhàn nèhivi dàhàn sàà na natácá-nsiá, cuisì-ní dècuèndè iá mii-né, dandu mii-né xì Dios cunini.

29 Daaní, nècuàchi cachitnùhu razón ndiaha xí-yá, vátùni càhàn ùi ò ùni-nè, te ni cúninì nèhivi dava ga, te cachí-nè a vátùni iá ñà-ndúá nì cachí nècuàchimá, á cóo.

³⁰ Doco nú yucán iá inga nècuàchì datnúù Dios sàxinítùnì-xi iin palabra ndiaha, dandu xiñuhu cudadí nècuàchì primeru.

³¹ Vàchi nsidaa ana datnúù Dios iin razón ndiaha, vètùni cachitnúhu iin iin-ne razón mà na hora quidá-né tocar, dandu vètùni sàà nsidaa-nda cundaà ini-ndà, te nacuahandee stná ini-ndà.

³² Te nsidaa ana sàni nihítàhvi cachitnúhu razón ndiaha, icúmí-nè dandacú-né nùù anima mii-né, (a càhàn-nè, á coó).

³³ Cunaha-nsiá, màdi nansa-ni nì cui quidá ndevàha Dios ñà-nduá quidá-yá, còó; viví-ni, te cuéyàà-ni nduú modo quidá mii-yá.

Nacua quidá nsidaa nèhivi xí Dios nsidaa lugar ndé natácá-nè cahvi-néyà, (ducán cunf quida stná mii-nsiá),

³⁴ màsà càhàn nècuàchì ñahà na natácá nsidaa-nsiá ducán, vèchi còò permisú. Icúmí-nè cunini-ne nacua cachí stná tutu nduú ley xi-yá.

³⁵ Nú cuní-nè ndàcàtnùhù-né, dandu ni càcàn tnùhù-né nùù nècuàchì vehe-ne nú sàni nasaa-nè vehe. Vèchi cò-nduá ducán càhàn iin nècuàchì ñahà na natácá-nsiá.

³⁶ Cuní nsinuu inì-nsia ñà-màdi mii-nsiá òmù-xí ni quésáhà palabra xi Dios. Ni màdi cuisì mii-nsiá ni xiníndisá stná xi palabra mà.

³⁷ Te nú jaàn ndoó nèhivi tuxí inì-xi datnúù Dios sàxinítùnì-xi, te ò ní nihítàhvi ndiaha-né cahan-né, dandu xiñuhu cundaà stná ini-nè ñà-divi palabra yohó nduú palabra ni dandacú Stoho-ndà Señor.

³⁸ Doco nú cò-cuní-nè nacuni-nè ñà-palabra ì xí mii-yá nduá yohó, dandu ni mii stná-nsiá, màsà nácuní stná-nsiànè ñà-nduú-né ana ni nihítàhvi ndisa.

³⁹ Ducán iá, ñàni. Yùhù cunf nanducu-nsiá más gà nansa nihítàhvi-nsiá cachitnúhu-nsia razón ndiaha xí-yá. Te nèhivi càhàn dàhàn sàà, màsà cádì-nsiá nùù-né; còó.

⁴⁰ Doco nsidaa ñà-nduá quidá-nsiá (na natácá-nsiá), viví-ni ni quidá-nsiàñà, te iin iin-nsia (ni càhàn-nsiá) nacua nchícùn stnahá-nsiá.

15

Sàni natiacu ndisa Jesucristu

¹ Ñàni, cunf cundaà vaha ini-nsiá sàhà palabra ndiaha ni cachitnúhi xì-nsiá daa. Vèchi ni xinindisá-nsiá palabra mà, te iin-ni dècuèndè vichi quidá stná-nsiá seguir ducán.

² Te sàhà stná palabra mà icúmí-nsiá càcu-nsia nú iin-ni ni cúnihmù vaha ini-nsiàñà. Vètùni càcu-nsia, cachí, doco ¿a víhíni uun-ni quee ñà-ni xinindisá-nsiá ducán? (Còó),

³ vèchi cunaha-nsiá, palabra ndiaa ndisa nduá ni cachitnúhi xì-nsiá daa, vèchi divi nduú stná palabra ni nihí (nùù) Cristu, te nacániamà nansa ni xihì-yà ni nacuida-ya cuàchi-nda nacua cachí nùù tutu ì.

⁴ Dandu ni ndùxin-ya, doco tixi ùni quivi ni natiacu-yà nacua cachí stná tutu mà.

⁵ Dandu ni ndecunu-ya nùù Pedro xi nùù stná dava ga nècuàchì dacuahá-yá; ùxin ùni ni sanduu-ne.

⁶ Daaní, después ni ndecunu stná-yà iin xichi na ní nataca más ùhùn cientu ñiani-ndà. Te cunaha-nsiá, dècuèndè vichi xí-itiacu ì cuàhà vá nècuàchimà, doco dava-ne sàni ndàhvà-nè ñuhiví yohó.

⁷ Daaní después, ni ndecunu stná-yà nùù Jacobo, xi nùù stná nsidanicuú nècuàchì xinduu apóstol.

⁸⁻⁹ Daaní, último ni ndecunu-ya nùù yùhù. Díin tiempu ni sandua, màdi iin-ni xi nècuàchì dava ga mà. Vèchi nùù nsidaa gà ana ni nihí chuun nùù-yá, yùhù nduí ana chicá cò-ndiá. Ndisa ni nihí chuun ndiaha nùù-yá, doco màdi sàhà-ñà vaha güé' ni sánduá; còó, vèchi yùhù, cuàhà gà nèhivi xí Dios nisa quida quini xí.

¹⁰ Doco sàhà gracia xi-ya ni nihítàhvi' cucumí chuun ì nùù-yá. Te màdi uun-ni sàni quee gracia ni quida-ya mà, vèchi cuàhà gà chuun ndiaha sàni quide, dècuèndè chicá más sàni quide nùù nècuàchì dava ga. Doco màdi ndisa yùhù ni quidá-xi nsidaa ñà-ndiaha ma; còó. Divi gracia xi-ya ni chindee xí.

¹¹ Doco có-quidámà, a sea yùhù, ò dava ga apóstol, doco iin-ni xícachì nsidaa-nsí sàhà Jesús ñà-ni natiacu ndisa-ya, te divi palabra jaàn nduá ni xinindisá stná mii-nsiá.

Nansa icúmí-ndá natiacu-ndà

¹² Pues, nú ducán cachí-nsi sàhà Cristu ñà-ni natiacu ndisa-ya, dandu ¿indù chuun cachí dava-nsia ñà-mà cúí natiacu ni-iin nsii?

¹³ Vèchi nú mà cúí natiacu nsii ni cúí, dandu ni cóni nátiácù stná mii-yá.

¹⁴ Te nú cóni nátiácù-yà ni cúí, dandu uun-ni quee ñà-càhàn-nsi xì nèhivi. Stná mii-nsiá, sàni xinindisá stná-nsiàyà, doco uun-ni quee stná mà ni cúí.

¹⁵ Te nsiùhù tu, na ian tnuhu-nsí cuní cachàmà, vèchi sàni cachi-nsi sàhà Dios nì dānātiácú-yà Cristu. Doco nú mà cúní natiacu ni-iin nsii (nacua cachí dava-nsia), dandu ñà-cóni nātiácú stná Cristu nduú stná mà.

¹⁶⁻¹⁷ Vèchi nú mà cúní natiacu nsii, dandu cóni nātiácú stná mii-yá, te iin-ni iá ì-ndà xì cuàchi-nda, cuquidá-xí nì xinindisa-nda, nú ducán.

¹⁸ Te divi ducán stná xì nēhivì xí-yá sàni caxihì, ñà-sàni ndañuhu dahuun stná-nē nduá, nú ducán.

¹⁹ Cunaha-nsiá, nēhivì chicá còò tñundé ini-xi nduu-nda nú cuisì ñuhivì yohó-ní chindéé Cristu ndohó.

²⁰ Doco (còó, ñà-ndàá cuisì nduá) sàni natiacu-yà; dihna mii-yá nì natiacu-yà, dandu después icúmí natiacu stná cuàhà gá ana nì xihì.

²¹ Sàhà cuàchi nì quida iin tiàa sàhana nì quesaha nēhivì xihì-nē. Doco vichi sàhà (mii-yá) ana nì nanduu na iin tiàa, ñàyùcànduá vātūni nìhitàhvi stná cuàhà-nē natiacu-nē.

²² Vèchi sàhà-ñà nduu-nda dependencia xi Adán, ñàyùcànduá xihì nsidaa nēhivì tiempu vichi. Doco nsidaa ana ndoó ladu xi Cristu, icúmí-nē sàà-nē natiacu-nē quida-ya.

²³ Doco diín nduú quivì nì natiacu Cristu, te diín cunduu quivì quida tocar dava ga nēhivì. Dihna mii-yá nì natiacu-yà, te mii-yá nduú primeru nì cuu xi ducán; daaní, después natiacu stná ndohó nēhivì xí-yá quivì (naxicocufin-yà, te) cuni-ndáyá.

²⁴ Daa cunduu quivì icúmí-yá cundee-yá nùù nsidaa ñà-malu cusáhnù, xì nùù stná nsidaa ana itá fuerte, xì nùù nsidaa gá stná ñà-fuerte iá ñuhivì. Daaní icúmí sàà quivì xinu tiempu, te dayáha Cristu chuun dandacú-yá ndé ndahá Yuamáni-yá.

²⁵ Doco antes ñà-jaan, iin-ni icúmí-yá cusahnú-yá dēcuendé cundee-yá nùù nsidaa ana xiní ùhì xì-yá.

²⁶ Pues sàhà ñà-yáha ga có-cudí ini-yá xihì nēhivì, ñàyùcànduá por último icúmí-yá cundee-yá nùù ñà-xihì-ndà, te mà nunca cui gá-ndà.

²⁷ Vèchi cachí tutu ì ñà-icúmí sàà nsidanicuú iñàha coa sujetu nùù-yá. Doco náhà xicà màdì Yuamáni-yá coo stná sujetu nùù-yá, vèchi divi Yuamáni-yá nduú ana disáhà-xí nì cundee-yá nùù nsidaa ana xiní ùhì xì-yá.

²⁸ Daaní, nú sàni cundee-yá nùù nsidaa contra xi-ya mà, dandu stná mii-yá, coo stná-yá sujetu nùù Yuamáni-yá, vèchi divi sàhà poder xi yá-yúcán nì cundee-yá ducán. Dandu quivì mà, mii Yua-nda Dios cunduu ana cusáhnù inicutu.

²⁹ Inga casu: dava stná nēhivì, sáhàn-nē cuhí-nē cuenta xi nēhivì sàni xihì. Pues, ¿índu chuun quidá-nē ducán, cuhí-nē sàhà nsii ma nú ndisa mà cúní natiacu ni-iin nsii nì cui?

³⁰ Daaní, nsiùhù tu, tixi cuàhà peligru ndoó-nsí nsidanicuú tiempu. (Doco uun-ni queamà nú mà sàà-ndà natiacu-ndà después.)

³¹ Quivì quivì yáha-nsi peligru cui-nsi, ñáni. Ñà-ndàá cuisì nduájàn divi nacua nduú stná ñà-ndàcuisì cudí gá ini sàhà-nsiá ñà-iin-ni nchicùn stná-nsiá Stoho-ndà Jesucristu.

³² Yùhù, cuàhà vida ni xiní ñuu Éfeso nùù (nēhivì dana guá nahi) nsicaha. Doco ni mà cundíá stná mà (nùù) nú mà nunca sàà-ndà natiacu-ndà. Vèchi te nú ducán, dandu chicá vaha quida-nda nacua cachí dichu: “Ni cuxí vaha-nda, te coho vaha-nda, vèchi tnaa cui-ndà”.

³³ Màsà cuàha-nsia dandahví ni-iin nēhivì-nsiá (ducán, vèchi cachí stná dichu): “Nú chicuèhè nēcuàchì nduú compañeru-ndà, dandu cuchicuehe stná modo xi-nda”.

³⁴ Xiñuhu nàcùnihu vii ini-nsia, (ñáni). Màsà quidá gá-nsiá cuàchi, vèchi sàni cundaà ini, dava-nsia nì có-ináhà-nsiá Dios. Ducán cachí xi-nsiá áma ndúcáhán-nsiá (nacua ndiá icà-nsiá).

Nansa coo iquicũñú-ndà na natiacu-ndà

³⁵ Doco vihini cachi iin nēhivì: “¿Índu modo cui natiacu iin nsii nú sàni xihì-nè? ¿Nansa cuàhàn coo iquicũñú-nè?”

³⁶ Pues neciu-ndà nú ni cachí-ndà ducán. Vèchi dēcuendé stná tata chihì-ndà, icúmíá ndūxan, dandu cuitiá.

³⁷ Te tata chihì-ndàmà, có-ndùdává xí ñà-nduá cuàhàn nacuitiá; còó, cutu iín tata uun nduá chihì-ndà, sea ni cundúá nùni trigu, ò inga nùni.

³⁸ Dandu dacuahnú Dios-ñà, te sàà coa nacua nì chitnùní ini-yá coa. Te nú sàni sahnua, dandu diín diín nùni cundua según iin iin clase nduá.

³⁹ Pues ducání iá stná xì cuerpu xi iin iin ñà-lá ñuhivì. Vèchi tucu tucu ndáa nēhivì, quisi, laa, siaca.

⁴⁰ Stná ñà-nchí itándiaa ansivi, tucu iá nùù ñà-lá ñuhivì yohó. Cuaha-ni iá ñà-lá ansivi, te cuaha-ni iá stná ñà-lá ñuhivì, doco tucu tucu xindàa vico iin ian.

⁴¹ Ndiaha gá nchí orá, te viconi iá nchí yoo, doco tucu nchí-si. Cuaha-ni iá nchí stná sitnúù, doco tucu tucu xindàa vico iin iin-si.

⁴² Pues ducán icúmí coo stná xì ndohó quìvì natiacu-ndà, tucu nàcòo stná cuerpu xi-nda. Nú sàni ndúxin iin nsìi, sívì iquicúñú-nè, doco na sàà quìvì natiacu-nè, iin-ni mà cúí gà-nè.

⁴³ Te mate mà cuáhá-ní nisá ìa-ne na ní ndúxin-ne, doco ndiaha gá nàcòo-ne quìvì natiacu-nè. Te còò gá ni-iin fuerza iin nsìi na ndúxin-ne. Doco nú sàni natiacu-nè, yáha ga fuerte ndiaha nàcòo-ne.

⁴⁴ Iin iquicúñú ñuhiví yohó icúmí-ndá na ndúxin-nda. Doco nú sàni natiacu-ndà, dandu cuerpu ndiaha cundua, vátuni cundoo-nda gloria. Cuerpu xi-nda icúmí-ndá vichi, iin ñà-cundoo-nda ñuhiví yohó nduá, doco cunaha-nsiá, icúmí coo stná iin ñà-cundoo-nda inga ñuhiví.

⁴⁵ Te dohó cachí stná nùu tutu ìi: “Tiàa nì cuyucun primeru, nì sàcùnduu-ne iin nèhivì itiácú, divi nduú Adán”. Doco iá stná inga ana nduú nahi Adán, divi mii-yá nì quixi nchícùn gá, te nùu anima mii-yá nihítahví nèhiví vida ndiaha.

⁴⁶ Doco ¿nansa nisa ìa iquicúñú nècuàchi nì quixi primeru mà? Pues divi primeru nì sàcòo iquicúñú cui coo ñuhiví yohó-ní, te màdì ñà-nduá itiácú ndiaha na iin Espiritu ìi. Còò, siempre nchícùn gá vaxamà.

⁴⁷ Ñàyùcànduá, nècuàchi primeru yucán, ñuhù ñuhiví yohó nì cuyucun-nè; doco ana nchícùn gá nì quixi ma, ansivi ní quixi-ya, te divi Stoho-ndà Señor nduú-yá.

⁴⁸ Nèhiví ñuhiví, nacua nisa ìa xì-nè nì cuyucun ñuhù, ducán xíndaa stná-nè vichi. Doco nsidaa nèhiví nduú nèhiví cuenta xi gloria, divi nacua iá mii-yá iá gloria, ducan xíndaa stná-nè.

⁴⁹ Ñàyùcànduá, tiempu vichi ndáa-nda nahi xii-ndà nì cuyucun ñuhù, doco después icúmí-ndá nàcùnduu-nda nacua iá mii-yá iá gloria.

⁵⁰ Doco cunaha-nsiá, na xínduu ìi-ndà nèhiví ñuhiví yohó xì iquicúñú-ndà, tàñáha ga cui sàà-ndà cundoo-nda ñuhiví ìi xí-yá, ñáni. Te ducání stná, nú tàñáha ga dàma iquicúñú-ndà, mà cúí sàà stná-ndà cundoo-nda ndé mà sívì gá iquicúñú-ndà; vachi tiempu vichi sívì-ndà na xíhì-ndà.

⁵¹ Ñàyùcànduá, cuàhìn cachì xì-nsiá iin palabra nisa ìa dèhé antes; cunaha-nsiá, mà sàà nsidaa-nda cui-ndà; doco nsidaa-nda icúmí-ndánadama iquicúñú-ndà.

⁵² Na tiácú sivi corneta último, dandu yáha ga yàchi, na iin cachí nadàma dahuun-nda. Vachi icúmí sivi corneta, dandu natiacu nsii ñà-mà cúí gà-nè.

⁵³⁻⁵⁴ Tiempu vichi xíhì nèhiví ñuhiví, te sívì-nè; doco ndohó, vaxi iin quìvì dandu nadàma-nda, dandu nicanicuahàn cunaha iquicúñú-ndà. (Ñà-ndáa nduá), xíhì-ndà vichi, doco nú sàni nadàma iquicúñú-ndà, dandu mà nunca cui gà-ndà. Daaní, (na tiempu sàni nihítahví-ndà ducán), dandu ñà-sàni cuu ndisa palabra cachí tutu ìi cundua, vachi dohó cachá: “Vichi ndisa sàni cundee dahuun Dios; mà cùndúú gá-ndà nsii.

⁵⁵ Na ní xíhì-ndà, cuàhàn-ndà ndoho fuerte-ndà nì cúí, doco vichi còò. Mate ní xíhì-ndà, doco mà nunca cundee gá tñùndoho ma nùu-ndà”, cachá.

⁵⁶ Pues sàhà ñà-ìá cuàchi nèhiví, ñà-yùcán nduá dayúhì xì-nè na xíhì-nè. Vachi nacua fuerte iá castigu cachí ley ìi, ducán fuerte icúmí coo stná tñùndoho ñhì-nè sàhà cuàchi nì quida-ne.

⁵⁷ Doco nùu ndohó, còò, vachi ansivéhe Dios, vátuni cundee-nda nùu nsidaájàn quida Stoho-ndà Jesucristu.

⁵⁸ Ñàyùcànduá, iin-ni xíñuhu-ñá nacuaàhandee ini-nsiá, ñani màní. Iin-ni nì cúnihnú vaha inì-nsia Stoho-ndà Señor, te quida stná-nsiá cuàhà obra ndiaha xí-yá, vachi ináhá-ndà, màdì úun-ní quee ñà-xínúcuàchí-ndà nùu-yá.

16

Nansa nì xicàn Pablo nùu nècuàchi ñuu Corinto ñà-datacá-nè cooperación sàhà nècuàchi ndahví

¹ Vichi cuàhìn càhìn xì-nsiá sàhà nansa quida tñaha-nda cooperar ñà-chindee-nda dava ga nèhiví xí Dios. Cunaha-nsiá, nacua nì cachì xì nèhiví xí-yá ndoo ladu Galacia, ducán cuní quida stná mii-nsiá.

² Cada quìvì domíngu xíñuhu tavà cuàán iin iin-nsia iyuhu ñà-nduá sàni quida-nsia ganar, dandu quìvì sàì ndé ndoo-nsiá, có-nduú gá ñà-càcàn gà-nsiá dìhùn.

³ Te nú sàni sàì, dandu icúmí stná-nsiá nacàxin-nsia iin ùi nèhiví techuín cùhùn ñuu Jerusalén ñà-cunihí-ne tñumani xí-nsiá cùhùn. Te icúmí tiaa stnáì iin carta cunihí-ne cùhùn ñà-nduá iin chuun vaha.

⁴ Te nú tuxí inì vátuni cùhùn stnáì, dandu cutnáhì xì nècuàchimà cùhùn-nsi.

Nansa nihú ini Pablo cacanuú ga-nè ñuu te ñuu

⁵ Yùhù nihnú inì quihin ichì cùhìn ladu Macedonia. Te nú sàni yàhi ladu yucán, dandu icúmí sàà stnàl ndé ndoó mii-nsiá ñuu Corinto jaàn.

⁶ Te vihini coo chíí xì-nsiá jaàn cahín, dècuèndè vihini coi inii tiempu vìxin, dandu después chindee-nsiá yùhù cùhìn chicá nù-xí ndé icúmí cùhìn.

⁷ Vàchi có-cùnî yàha uin ndé ndoó-nsiá; có-cùnî casàhú uin xì-nsiá. Cahnú gà Dios siquiera iyuhu tiempu cunî coi cutnahí xì-nsiá.

⁸ Doco vichi cuàhìn coi ñuu Éfeso yohó dècuèndè nacava vicò Pentecostés;

⁹ vàchi ñuu yohó, ndiaha gá-sàni nuna ñuhiví nduá, vàchi sà-íà cuàhà chuun xi mii-yá quida-nsi, mate ndoó cuàhà stnà ana xidá inì-xi.

¹⁰ Nú ni sàà Timoteo ndé ndoó-nsiá, quidañuhu-nsiánè sàhà ñà-nì còò-né contenu na íà-nè jaàn, vàchi iin-ni quidá stnà-nè chuun xi Stoho-ndà Señor, nahi yùhù.

¹¹ Ñàyucànduá, màsà cáhichi inì-nsianè. Te chindee-nsiánè na naquihin-ne ichì ndixi-ne ndé ié, vàchi ndiatuí-nè nsiá-nè xì compañeru-nè.

¹² Daaní, ñani-ndà Apolos, cuàhà gá ni sacundahví nù-né áma cútnáhâ-né xì compañeru-nsi sàà-nè ndé ndoó-nsiá. Doco có-íà-nè dispuestu cùhùn-nè vichi-ni. Ndé iin quivi chicá cusaa-ne, dandu sàà-nè.

Nansa ni cachi Pablo ni casàhú-nè xì nsidaa nèhiví xí Dios ndoó ñuu Corinto

¹³ Cundoo tùha-nsiá (ñà-màsà dándahví nèhiví-nsiá). Iin-ni cunindisá vaha-nsiá, te cunihnu fuerte ini-nsiá, te nacuahandee stnà ini-nsiá.

¹⁴ Nsidanicuú chuun icúmí-nsiá xi ñanitnaha-nsiá, màsà nándodó-nsiá cuu manì stnahá ini-nsiá sàhà-nsiá.

¹⁵ Ináhâ-nsiá sàhà Estéfanos xì nsidaa nèhiví vehe-ne, ñà-xínduu-ne nèhiví primeru ni xinindisa-xi mii-yá jaàn ladu Acaya. Te ináhâ stnà-nsiá ñà-cuàhà guá voluntad icúmí-nè chindee-né nsidaa nèhiví xí Dios, ñáni.

¹⁶ Ñàyucànduá, cunî quidañuhu stnà-nsiánè xì nsidaa stnà ana nihnú inì-xi nahi mii-né, xì nsidaa gá stnà nècuàchi xinúcuáchi nù-yá, te chindéé sàhà chuun nsiha, cunî quidañuhu víi-nsiánè.

¹⁷ Nì cudîi gá inì na ní quesaa Estéfanos xì Fortunato xì Acaico, vàchi mate mànicúí quixi mii-nsiá, doco siquiera mii-né ní quesaa-nè, te sàhájàn sà-ìé` contenu.

¹⁸ Sàni nacuahandee ini-nè anímè, te divi ducaní tùha stnà-nè quida-ne xì mii-nsiá, ináhi. Ñàyucànduá, xiñuhu quidañuhu víi-nsiánè, mii-né xì nsidaa gá stnà nèhiví nahi mii-né.

¹⁹ Nsidaa nèhiví natácá càhvi xì Dios ladu Asia yohó, casàhú-nè xì-nsiá. Te casàhú stnà Aquila, xì Priscila, xì nsidaa gá stnà nèhiví natácá vehe-ne; cuàhà gá (cudîi ini-nè) ñà-ndòó-nsiá ladu xi mii-yá.

²⁰ Nsidanicuú nèhiví xí-yá (ladu yohó), casàhú-nè xì-nsiá. Te mii-nsiá, nacasàhú stnahá víi stnà-nsiá ñà-ndùú-nsiá nèhiví ìi xí-yá.

²¹ Ndahà yùhù Pablo tiaí palabra yohó, te casàhú stnàl xì nsidaa-nsiá.

²² Nú íà ana có-cuú inì-xi sàhà Stoho-ndà Jesucristu, dandu ni sàà-nè ndañuhu-né nù-yá. Te vichi cachí-ndà xí-yá: "Naxicocuñ-ní cunî-nsi, Stoho-nsi Señor".

²³ Nì cúcúmí víhí-nsiá gracia xi Stoho-ndà Jesucristu.

²⁴ Te cunî nsinuu inì-nsiá nansa cuú inì sàhà-nsiá ñà-iin-ni xínduu-nda nèhiví xí Jesucristu. Sà-íà.

Tutu Òi Nì Tiaa San Pablo nùu Nèhivì xí Dios Ndoó Ñuu Corinto

¹ Yùhù nduí Pablo, iin nècuàchi nì nihì chuun ìi nùu Jesucristu, vèchi ducán nì chitnùni ini Dios quide. Te yohó cutnàhá stnái xì ñani-ndà Timoteo, te cásàhù-nsi xì mii-nsià nècuàchi natácá cahvi xì Dios ñuu Corinto jaàn, te cásàhù stnà-nsi xì nsidaa gá nèhivì xì mii-yá ndoo inicutu ladu Acaya yucán.

² Nùu Yua-nda Dios xì nùu Stoho-ndà Jesucristu ni quixí cuàhà gracia sàhà-nsià, te ni yáha vaha-nsia nicanicuahàn quida-ya.

Nansa ni ndoho Pablo sàhà ñà-nchicùn-nè Jesús

³ ¡Ansivéhé cahnú Dios xì Stoho-ndà Jesucristu, divi Yuamáni-yá! Te Yua ndohó nduu stnà-yà, te cuàhà gá cuhí ini-yàndó, te nàcuàhandee stnà ini-yàndó, vèchi cahvi-ndayá.

⁴ Te nàcuàhà-yàndó valor na hora yáha-nda tnùndoho. Ducán dandu vátùni nacuaàhandee stnà ini-nda compañeru-ndà quivì yáha stnà-nè tnùndoho, vèchi sàhà-ñá sàni chindee-yá ndohó, ñàyùcàndüá vátùni chindee stnà-ndà ñanitnaha-nda.

⁵ Ñà-ndàà nduá, ndohó cuàhà-ndà na yáha-nda tnùndoho na ian nì yáha stnà Cristu, doco cunaha-nsià, ndiaha gá nàcuàhà stnà-yàndó valor sàhámà.

⁶ Ñàyùcàndüá, nú ndohó nsiùhù, dandu sàhà-ñá nihì stnà mii-nsià ndufuerté anima-nsià, te càcu-nsia nduàjàn. Daaní, divi ducání stnà, nú sàni nacuaàhandee ini Dios anima nsiùhù, divini nduu stnà mà sàhà-ñá nacuaàhandee stnà ini-nsi mii-nsià. Dandu vátùni nihì stnà-nsià quidandee víi ini-nsia na hora ndohó-nsià nahi nsiùhù.

⁷ Ñàyùcàndüá, ináhá vaha-nsi, nú icúmí-nsià ndoho-nsia nahi nsiùhù, dandu icúmí quee viámà sàhà-nsià, vèchi ndiaha gá icúmí-yà nacuaàhandee stnà ini-yà mii-nsià nacua quidá-yá xì nsiùhù.

⁸ Ñáni, cuní-nsi cundaà ini-nsià nansa nì yáha-nsi ladu Asia, cuàhà tnùndoho nì xini-nsi yucán. Mà cundéé ini-nsi nì cahan-nsi, cuàhàn-nsi cui dahuun-nsi nì tuxi-nsi,

⁹ te sàni sahnde ini-nsi sàhà vida xi-nsi. Doco ducán nì cuu xi-nsi sàhà ñà-nì cundàà ini-nsi màsà cáhvi-nsi xì mii-nsi; cui si Dios ni cahvi xi-nda, vèchi mii-yá, mà úhi danátiácú stnà-yàndó mate sáni xihì-ndà.

¹⁰ Te ñà-ndàà nduá, divi mii-yá nì dàcàcu-ya nsiùhù nùu peligru cahnu-ma na cuàhàn-nsi cui-nsi nì cù, te (ansivéhé gá-yà), vèchi dècuèndé quivì vichi dàcàcu ìi-yá nsiùhù. Te xinindisá-nsi ñà-dècuèndé stnà tnaa idá icúmí-yá quida-ya ducán,

¹¹ nú iin-ni chindéé stnà mii-nsià xicàn tàhvi-nsià nùu Dios sàhà-nsi. Daaní, nú ducán xicàn tàhvi cuàhà nèhivì sàhà-nsi, dandu cuàhà gá stnà nèhivì icúmí naquimani xi-yá sàhà-ñá ndiaha guá quidá-yá sàhà-ndà.

Nansa ni cachi Pablo ñà-ndüü-né nècuàchi seguru, có-dàndàhvi-nè nèhivì

¹² Cunaha-nsià, cuàhà gá cudíi ini-nsi ñà-ináhá-nsi vii gá quidá-nsi ñuhivì yohó. Có-dàndàhvi-nsi nì-iin nèhivì, vèchi cui si ichi mii-yá indéhe-nsi. Te na ní sandoo-nsi ñuu-nsià yucán, chicá más nì sàhandee ini-nsi quida vii-nsi ducán. Cóni dátiaá uun-nsi nduú-nsi nècuàchi nchichí guá, na quidá dava nèhivì ñuhivì. Còó, cui si gracia xi Dios nì chindee xi-nsi.

¹³ Te carta tiaa-nsi nùu-nsià, (còò nì-iin palabra ndoo dèhé nùá), vátùni cahvi-nsiàña, te mà úhi cundaà ini-nsià ñà-ndüá cachá'. Vèchi cunaha-nsià, yùhù cunf' nì sàà-nsià mànihì vaha ini-nsia.

¹⁴ (Ináhi), algu sàcuàhàn-nsià cundaà ini-nsià vichi, doco cumáni vá. (Te nú sàni sàà-nsià nì cundaà vaha ndisa ini-nsià), dandu quivì naxicocuñi Stoho-ndà Jesucristu, icúmí-nsià cudíi ini-nsià sàhà-nsi, te cudíi stnà ini nsiùhù sàhà mii-nsià.

¹⁵⁻¹⁶ Pues sàhà-ñá ináhá vahi nsidaàjàn, ñàyùcàndüá nì nacani ini sàni ndé ndoo-nsià nì cù. Te sàhà-ñá cui nihitáhvi vaha-nsia, ñàyùcàndüá ùi xichi nàcòti mii-nsià nì cahín. Primeru yàhi ndé ndoo-nsià na cùhin ladu Macedonia; dandu nayàha tui na ndixi nì cahín. Te después, nú sàni chindee-nsià yùhù, dandu naquihin ichi cùhin ladu Judea nì cù.

¹⁷ Doco (ñà-cóni sái), màdi ñà-cóni nàcání sahnú ini nduá. Còó, vèchi màdiá nansa nì nì cui nacáni ini; nì có-nàcáni ini na iin nèhivì còò Dios ini anima-xi. Vèchi nú ducán nì cundú, dandu "jaan" cachì vichi, te después "còó".

¹⁸ Doco ináhá Dios (cóni dàrà-nsi palabra nì cachi-nsi xi-nsià daa) na ian dajúùn-nsi vichi, te después "còó" cachì-nsi. Còó.

¹⁹ Yùhù xi Silvano xi Timoteo, palabra sàhà Dèhemani Dios Jesucristu nduá nì càhàn-nsi xi-nsià daa. Te mii-yá, mà nunca (dandahvi-yà nèhivì), te cachi-yà: "Jaan, (iá consuelu)", dandu después), còó. Vèchi nú "jaan" cachì-yà, dandu divi ñà-ndàcuisi nduá.

²⁰ Vâchi nsidaa ñà-ndúá sàni quida Dios comprometer, seguru icúmíá cuu ndisa quida Cristu. Ñà-jaàn nduá disáhà-xí ndácùcahan-nda quivi Jesucristu na naquímáni-ndà Dios, te cachí-ndà xí-yá amén.

²¹ Te divi Dios nduú ana nácuàhandee ini xí-ndà ñà-cunchicùn vii-ndà Cristu, te sàni dàhñi stná-yà sàxínítnùni-ndà.

²² Te ducán íá stná na ian ni dùcùn seña xi-ya anima-ndà; te ni sàhatahvì stná-yàndó Espíritu Ìi xí-yá ñà-coo Yà-ìi mà ini anima-ndà, te cunaha-nsiá, cuiisì tnùmáni primeru nduú yà-jaàn, vâchi chicá más icúmí-ndá nihitàhvì-ndà después.

Ñà-ndúá disáhà-xí cóni sàa Pablo ñuu Corinto

²³ Cunaha-nsiá, cuiisì sàhà-ñá có-cunf càhàn ndeí xí-nsiá, ñâyùcàndúá disáhà-xí tãñáha ga sàa tui ñuu-nsiá jaàn. Ináhá Dios ñà-ndáá nduá cachí xí-nsiá, te nú dandahví, dandu ni cui chicá vâha.

²⁴ Doco màsà cúníhnú ini-nsiá ñà-cùní-nsi dandacú-nsi nùù-nsiá sàhà ñà-ndúá xiníndisá-nsiá. Còò, vâchi sàni xiníndisá víi-nsiá. Cuiisì cuní-nsi chindee-nsi mii-nsiá ñà-chicá contentu ni cúndóó-nsiá.

2

¹ Ñâyùcàndúá, yùhù ni cachì ini ànimè, mà cùhìn visita ndé ndoó-nsiá nú puru tnùnsí ini cundua.

² Vâchi nú ni nácùndoo-nsia tnùnsí ini quide, dandu mà sái cudíi gá ini, vâchi divi mii-nsiá nduú ana cunf cudíi ini sàhà-xí.

³ Ñâyùcàndúá, ni tiai iin carta nùù-nsiá còtó sài ndé ndoó-nsiá, te cuiisì cuhuun ini sàhà-nsiá mate ñà-cudíi ini sàhà-nsiá nduá cunf. Ducán cachí, vâchi tuxí ini ñà-ndúá cudíi ini yùhù sàhà-xí, divi nduú ñà-cudíi stná ini mii-nsiá sàhà-xí.

⁴ Cunaha-nsiá, cuàhà gá ní nacani ini na ní tiai carta mà; cuàhà gá ni dàndòhí mii, ndè ni sacuí. Doco màdi sàhà-ñá cunf dacúhúun ini mii-nsiá nduá ni tiaiàmà; còò, cuiisì sàhà-ñá ni cúndáá ini-nsiá ñà-cuàhà gá cuú ini sàhà-nsiá.

Xiñuhu cuicahnú ini-ndà sàhà iin nècuàchì ni quida xi cuàchì nú sàni cuu-ne arrepentir

⁵ Nú íá iin-nsia ni cuhuun ini dava-nda sàhà-xí, pues màdi yùhù nduú ana nisa icumi guá tnùnsí ini jaàn. Còò, mii stná-nsiá nisa icumi xi ñà-jaàn, siquiera iyuhá. “Iyuhá”, cachí, sàhà màsà quidá cuàhà güé-ñá.

⁶ Doco vichì, sà-íá; còò gá necesidad càhàn duchì gá ini-nsiá xi nècuàchì ni quida falta mà nacua ni càhàn-nsiá xí-né na ní nataca-nsiá daa.

⁷ Vichì xiñuhu cuicahnú ini-nsia sàhà-né, te nacuaàhandee ini-nsiànè sàhá màsà cóó-né cuàhà tnùnsí ini, te cundeámà nùù-né.

⁸ Ñâyùcàndúá, sacúndahví nùù-nsiá ñà-càhàn vii-nsiá xí-né vichì, te cachì-nsiá xí-né ñà-cùù ndisa ini-nsia sàhà-né.

⁹ Cunaha-nsiá, na ní tiai carta mà nùù-nsiá daa, divi sàhà-ñá cundaà ini a cúníni-nsiá, á cóó ni sandua.

¹⁰ Ñâyùcàndúá, nú xicáhnú ini mii-nsiá sàhà falta xi iin nèhivi, dandu ducání quidá stná yùhù. Te nú íá ndisa ñà-ndúá xiñuhu cuicahnú ini sàhà-xí, dandu quideà. Vâchi sàhà ñà-vàha xi mii-nsiá nduá. Te indèhe Cristu; ináhà-yá (nansa quida-nda). Pues xiñuhu cuicahnú tnahá ini-ndà sàhà-ndà sàhà-ñá

¹¹ màsà níhíndèè ñà-malu dacá-síndó, vâchi ináhà-ndá, maña cuàhà ndisa-si.

Sàhà Jesucristu icúmí-ndá cundee-nda nùù nsidaa tnùndoho, xí sàhà nsidaa cuàchì

¹² Na ní qesal ñuu Troas ñà-cachitnùhi palabra ìi xí Cristu, dandu ni cundaà ini íá ndisa nansa quide cuàhà chuun xi Stoho-ndà Señor (ñuu yucán) ni cuií.

¹³ Doco cóni cui coi contentu yucán, vâchi còò ñani-ndà Tito ni ndácùhin. Ñâyùcàndúá, ni ndaquíndèi xi nècuàchì ñuu mà, te ni quíhin tui ichì vâxi ladu Macedonia yohó.

¹⁴ Doco ansivéhé Dios, vâchi nicanicuahàn chindéé Jesucristu ndohó, vátuni cundee-nda nùù nsidanicuú tnùndoho. Te chindéé stná-yàndó na cachítñuhu-nda palabra ìi xí-yá inicutu sàhà-ñá cundaà ini nèhivi nansa íá ichì-yá, dandu na ian inicutu xítia iin dico tnami nduá.

¹⁵ Vâchi nsiùhù, (na cachítñuhu-nsi palabra) sàhà Cristu, dandu na ian xítia iin dico ndiaha nduá, te na ian sahán tnamiá nùù Dios, (vâchi cudíi ini-yá sàhà-ñá). Te nèhivi ñuhivi, na ian sahán stná dico palabra mà nùù-né, ni cúndúú-né nècuàchì càcu anima-xi, te ò nècuàchì ndañúhú anima-xi.

¹⁶ Nèhivi ndañúhú anima-xi, có-cudíi ini-né palabra mà, vâchi nahi dico nsi nduá nùù-né, te yúhí-né cui-né quida. Doco nècuàchì icúmí càcu anima-xi, cóò, na ian tnami gá palabra

mà nùu-né, vâchi sâhâmà vâtùni nìhì-né vida ndiaha. Pues sâhà nsidaájàn, cuisì nêhivì vâha ndisa xiñuhu (cachitnùhu xi palabra mà).

¹⁷ Ñâyücandüá nsiùhù, có-quidá-nsí na quidá cuàhà nêhivì, quidá ndevàha-ne xì palabra ì mà. Còò; có-dándàhvi-nsì nì-iin nêhivì. Mii-yá ináhà-yâ nansa quidá-nsí, cachì ndàà-nsì xi-né nacua nì cachi-yâ xì nsiùhù, càhàn vîi-nsì xi-né, vâchi nêhivì xì Cristu nduú-nsí.

3

Nansa iá tratu saa nì saquin Dios xì nêhivì

¹ Ñà-jaàn cachì-nsì xi-nsiá, doco màdi-ñà ndanìhí-nsí tnùñuhu xì mii-nsí nduú túá. Nì còò stná necesidad cunihi-nsì iin tutu nduú recomendación na sâà-nsì ndé ndoó-nsiá, nì còò stná necesidad càcàn-nsì iin tutu nùu-nsiá (ñà-cunihi-nsì cùhùn inga ñuu), mate ducán quidá dava nêhivì.

² Vâchi divi mii-nsiá nduú-nsiá nahi tutu (quidà-xì nsiùhù recomendar), vâchi mà úhi cundehè nêhivì (ñà-quidá vîi-nsiá), te cundaà ini-nè (ñà-ndàà nduá cachì-nsì). Na iin carta xínduu-nsia, cachì, te na ian itándiaa palabra xan ini anima-nsì, ducán nduá.

³ Na iin carta nì tiaa mii Cristu nduú-nsiá, vâchi (na ní cachitnùhu-nsì palabra ì xi-nsiá), dandu na ian nì dâsâà-nsì carta mà nì sandua. Doco màdi tinta nì tiaa Cristu carta mà. Còò, sâhà Espiritu Ì xì mii-yá iá nicanicuahàn, ducán nì tiaa-ya ini anima-nsiá, màdi icà iin yùu chipála.

⁴ Ináhà-nsí ñà-ndàà nduá cachì-nsì yohó, vâchi cundéé ini-nsì Dios sâhà-ñà xiníndisâ-nsí Cristu.

⁵ Doco có-tuxí ini-nsì vâtùni sâà mii-ní nsiùhù ñà-quida vîi-nsí chuun yohó. Còò, cuisì nú chindee Dios nsiùhù, dandu vâtùni sâà-nsì quida-nsì chuun (xi-ya).

⁶ Ñâyücandüá, sâhà mii-yá vâtùni cachitnùhu vîi-nsí xì nêhivì nansa iá ley saa xí-yá. Te ley mà, có-ndüá palabra nì tiaa uun-ni; còò, palabra nì taxi Espiritu Ì xí-yá nduá. Vâchi nú letra uun nì cündüá, dandu cuisì cuàhàn cachâmà xi-ndà ñà-cui-ndà; doco tucu quidá Espiritu Ì; puru vida ndiaha sâha-ya.

⁷⁻⁸ Ñà-ndàà nduá, ndiaha gá nisa la ley sâhana mate icà yùu chipála nì sàcùtandiaà. Vâchi (na ní nìhì Moisés ley mà), nì nanchii ndiaha nùu-né, te sâhà ñà-yúcán mànicuí gá cundehè nêhivì Israel nùu-né. Doco inga iin ratu gá, dandu có-nchií gá mà. Ñâyücandüá, nú nì cachì-ndà ndiaha gá nisa la ley primeru mà, te cutu ñà-sâà-ndà cui-ndà cachá, dandu chicá nâhà xicà ndiaha gá iá (palabra cachì) Espiritu Ì.

⁹ Cunaha-nsiá, sâhà ley sâhana mà vâtùni nì cundaà ini-ndà iá castigu sâhà cuàchi-nda. Doco nú nì cachì-ndà ndiaha gá nì ia na ní quesaa ley mà, dandu chicá más ndiaha palabra saa cachitnùhu xi-nda nansa ndee vâha-nda nùu-yá.

¹⁰ Te vichi, sâhà-ñà yâha ga nsiha palabra saa ma, ñâyücandüá có-quidá gá-ndà cuenta nsiha gá ley primeru mà.

¹¹ Doco nú nì cachì-ndà ley ndiaha nduú ley sâhana ma, te cóni ía naha cuáhà, dandu vihi gá ndiaha ndisa iá palabra saa, vâchi nicanicuahàn icúmíá coa.

¹² Te vichi, sâhà-ñà ináhà-ndà iá tnündé ini ndiaha xi-nda ma, ñâyücandüá có-yùhí-nsì càhàn vate-nsì xì nêhivì.

¹³ Có-quidá-nsí na ian nì quida Moisés, nì chidàhvi-ne nùu-né xì iin sicoto sâhá màsà cúní nècuàchì (raza-nè) Israel na cueé-ni cueé-ni ndàhva ñà-tnùu ndiaha nùu-né.

¹⁴ (Te seña nduámà) ñà-cóni cündàà vâha ini nècuàchì Israel yucán. Te dècuèndè stná tiempu vichi, ducán iá na ian idàhvi sàxínitnùni-nè iin sicoto, ñâyücandüá có-sâà-nè cundaà ini-nè na iníni-nè cahví nêhivì tutu xi ley sâhana. Cuisì-ní nú nì quíhvi-ne ichi Cristu, dandísá, vâtùni sâà-nè cundaà ini-nè.

¹⁵ Te dècuèndè stná vichi, na cahví-né (tutu nì tiaa) Moisés mà, ducán iá na ian idàhvi ì sàxínitnùni-nè, (có-cündàà ini-nè).

¹⁶ Doco nú nì quíhvi-ne ichi Stoho-ndà Señor, dandísá cuxio ñà-dàdàhvi xì sàxínitnùni-nè, te claru mànihì ini-nè.

¹⁷ Vâchi Stoho-ndà Señor, divi Espiritu Ì nduú-yá, te ndéni nì cui nì coó Espiritu Ì xí-yá, yucán ndisa nuná ñuhivì ì xí-yá nùu-ndà.

¹⁸ Ñâyücandüá, ndohó, sàni cundaà ini-ndà, có-idàhvi ga nùu-ndà (nahi Moisés), còò. Te ñà-ndiaha guá sàni nàcòo anima-ndà nì quida-ya, ñâyücandüá, queámà na ian nduu-nda iin yütátà nchií ndiaha quidá iin luz. Te cueé-ni cueé-ni dáma stná-ndà dècuèndè sâà-ndà coo ndiaha-nda nahi mii-yá. Pues divi ñà-jaàn nduá quidá-yá xi-ndà, vâchi Espiritu Ì nduú-yá.

4

1 Sàhà gracia xi Dios nì nihítàhvi-nsí chuun ndiaha quidá-nsí; ñàyùcàndüá, có-cùhúún ini-nsi.

2 Mà túha-nsi quida dehé-nsi ni-iin chuun chicuéhé, ni mà túha-nsi dandahví-nsi nêhivi; te mà túha stná-nsi dama-nsi palabra ì xi-yá. Còó, puru ñà-ndácuisi nduá cachitnùhu vate-nsí xi-né. Mà ùhi cundehè-néndò, te cachi-nè a quidá vî-nsí á cóó. Te mii-yá, indêhe stná-yà nansa quidá-nsi.

3 Te nú cachitnùhu-nsi razón ndiaha xí-yá, te có-sàà nêhivi cundaà vâha ini-nè, pues ¿ndiâ dîsâhâ-xí nduâmâ? Divi sâhâ-ñâ nchícùn-nè ichi ndé cuâhân-nè ndañuhu-né.

4 Vâchi quisi cahvi guá nêhivi ñuhiví yohó, sâni dàcuââ-si anima nêhivi có-xiníndîsâ sâhâ ñâ-màsâ dàtnùú ndiaha Dios sâxinítnùni-nè; ñàyùcàndüá mà cù cundaà ini-nè razón vâha sâhâ Cristu, mate ndiaha gá-yâ, te mimí nacua íá Yua-nda Dios, ducán íá stná-yâ.

5 Cunaha-nsiá, na cachitnùhu-nsi palabra ì, màdì sâhâ mii-nsí câhân-nsi. Còó, sâhâ Stoho-ndâ Jesucristu câhân-nsi, te cuisì cachi-nsi sâhâ nsiùhù ñâ-ndüú-nsi nêhivi xinúcuâchì nùú mii-nsiá, vâchi ináhâ-nsí (mâni cuâhâ-nsiâ) nùú-yâ.

6 (Vichi cunî nsinuu ini-nsiâ nansa nì cuu sânahâ) na nîsa ìin tnuu inicutu ñuhiví, te nì cachi Dios: “Ni cóó luz”, te nì sâcòa. Pues ducán nì quida stná-yâ xi ndohó, nì dàtnùú-yâ ini anima-ndâ, dandu nì cundaà ini-ndâ ñâ-ndiaha guá-yâ, te divi sâhâjân na ian nchí ndiaha stná nùú Jesucristu.

Iin-ni ni cúnthnú vâha ini-ndâ Jesucristu nicanicuahân

7 Ndisa ndudu ì xi mii-yâ nduá sâni nihítàhvi-ndâ vichi, te nahi ñâ-cuicâ-ndâ nduú stná mà. Doco có-cùni cachâ-mâ ñâ-câhnú gá poder icúmí ndohó, còó. Vâchi cuisì na iin quidi ñuhù ndé ñuhú ndudu ì mà nduu-nda. Ñàyùcàndüá nâhâ xicâ poder ndiaha xí mii-yâ nduâjân.

8 Sahâjân, nsiùhù, có-cùhúún ini-nsi, mate yâha-nsi cuâhâ tnùndoho, te nacánì cuâhâ ini-nsi dava xichi, doco siempre íá nansa càcu-nsi.

9 Quini quidá nêhivi xî-nsí, doco có-nâcòó nihni Dios nsiùhù. Sahní cuií-nè nsiùhù, doco mà cù sâà-nè dandâñùhú dahuun-ne nsiùhù.

10 Na xicánúú-nsí ñuhiví yohó, siempre nihnú ini-nsi vihini cui-nsi nahi nì xîhî stná Stoho-ndâ Jesús. Doco nú ducán nihnú ini-nsi, dandu sâhâmâ vâtùni cundaà stná ini nêhivi ñâ-itiácú stná-yâ, te chindéé-yândó.

11 Doco na ndoó ñ-nsí ñuhiví, nicanicuahân ndoó-nsí tixi peligrú cui-nsi sâhâ-yâ sâhâ-ñâ cundaà ini nêhivi ñâ-divi vida ndiaha xí-yâ nduá icúmí-ndâ, mate siempre íá peligrú cui-nsi.

12 Ñàyùcàndüá, nicanicuahân ducán íá xî nsiùhù na ian cuâhân-nsi cui-nsi, doco sâhâ ñâ-jaân vâtùni nihî mii-nsiá nansa cutiacu-nsiâ vida ndiaha xí-yâ.

13 Nùú tutu ì dohó nì tiaa iin nêhivi: “Yùhù xiníndîsê mii-yâ, ñàyùcàndüá, nì cachi ñâ-ndüá nì cachi”. Pues nsiùhù, divi ducán nihnú stná ini-nsi mii-yâ nahi nêcuâchì yucán, te sâhâjân câhân vate stná-nsi palabra xí-yâ.

14 Te nsinúú ini-nsi nansa nì quida Yua-nda Dios, nì danátíácú-yâ Stoho-ndâ Jesús. Ñàyùcàndüá, divi ducán icúmí-yâ quida stná-yâ xi ndohó, danátíácú stná-yândó, dandu sâà nsidaa-nda nùú-yâ.

15 Cunaha-nsiá, nsidanicúú ñâ-ndüá yâha-nsi, sâhâ ñâ-vâha xi mii-nsiá nduá. Te nú sâhâmâ chicá cuâhâ nêhivi nihî xî gracia xî-ya, dandu chicá cuâhâ stná-nè naquimanì xî-yâ sâhâ-ñâ nì queé gâ más tnùñuhu xí-yâ.

16 Ñàyùcàndüá, có-cùhúún ini-nsi, vâchi mate cueé-ni cueé-ni chicá cuítâ-nsi, doco anima-nsi, còó, vâchi nsiquívì (chicâ nácuâhandee ini-nsi) na ian ndusáá-nsi.

17 Ñâ-ndâá nduá, ndoho-nda vichi, doco quida-nda cuenta na ian, sacú-ni nduá, te yâchi icúmíâ nsiha. Doco sâhâ-ñâ ndoho-nda vichi, cuâhâ sâstnùhù ñâ-ndiaha ñî xí-yâ icúmí-ndâ nihítàhvi-ndâ después, te nicanicuahân cundua.

18 Ñàyùcàndüá, có-ndülócò gâ-ndâ sâhâ ñâ-ndüá indêhe-nda ñuhiví yohó, cuisì (nihnú ini-ndâ) sâhâ ñâ-tâñâha ga sâà-ndâ cuni-ndâ. Vâchi ñâ-ndüá tû indêhe-nda, ñâ-yâha-ni nduá, doco (ñâ-ndiaha ñî xí mii-yâ), mate có-túíá cundehè-ndâ, doco nicanicuahân cunaha-ñâ.

5

1 Có-quidá nú ni sâà ndañuhu iquicúñú-ndâ ñuhiví yohó, vâchi nahi vehe ndé ndoó toó-ní-ndâ nduá. Doco ináhâ-ndâ nú sâni nsiha, dandu cucumi-nda inga iquicúñú-ndâ íá ansivi, te na iin vehe saín-ndâ cundua, vâchi Dios icúmí quidavâha xân, màdì nêhivi, te nicanicuahân icúmíâ cunahâ.

² Doco tiempu vichi na ian sácàn ini-ndà, vèchi yáha ga cuní-ndà nihì-ndà iquicúñú saa íá ndè gloria mà. Vèchi nahi vehe saa-nda cundua, te cunduu stná na ian màcùndixi-nda inga sícoto saa.

³ Te ináhà-ndá, nú sàni nihì-ndà iquicúñú saa ma, màdi uun-ni coo anima-ndà na ian chaá; còo.

⁴ Doco mientras ndoó ì-ndà xì iquicúñú-ndà ñuhivì yohó, sácàn ini-ndà, có-cùù vaha ini-ndà; doco màdi sàhà-ñá cuní-ndà cuxio iquicúñú-ndà icúmí-ndà vichi nduàjàn, còo; ñà-cùnì-ndà naquihin-nda iquicúñú saa-nda nduá, dandu mà sàà gà-ndà cui-ndà, vèchi vida ndiaha icúmí-ndà nihì-ndà, te icúmíamà cundee dahuan nùù ñà-cui-ndà.

⁵ Pues divi Dios nduú ana chindéé xí-ndá ñà-nihitáhvi-ndà ducán, vèchi sàni sàhatahvi-yándò Espíritu Ì xí-yá, doco cuisì tñumanì primeru nduú Yà-ì mà.

⁶ Ñàyùcàndüá nihnú ndéé guá ini-ndà vichi. Te ináhà stná-ndà ñà-mientras ndoó ì-ndà cuerpu xi-nda, dandu tãñáha ga cui cuní-ndà nùù-yá.

⁷ Vèchi na ndoo-nda ñuhivì yohó, cuisì nihnú vaha ini-ndáyá, màdiá xinínùù-ndáyá.

⁸ Pues vichi nihnú ndee ndisa ini-ndà, cachí. Doco chicá cudii ini-ndà nú ni nácóo-ndá iquicúñú-ndà yohó, te cùhùn-ndà cundoo-nda nùù-yá.

⁹ Ñàyùcàndüá disàhà-xí sàhandee ini-ndà, áma cùdì ini-yà sàhà ñà-ndüá quidà-ndà, a sea sàndò-ndà nùù-yá, te ó tãñáha ga sàa-ndà nùù-yá.

¹⁰ Vèchi nsidanicuu-nda icúmí-ndà màcùta-nda nùù Stoho-ndà Cristu, te cachi-yà xi-ndà nansa ndisa íá, a sáni quida vii-ndà ñuhivì yohó, ó á coó. Dandu cuàha-yándò ñà-ndüá ndiá icà iin iin-nda nihì-ndà.

¹¹ Ñàyùcàndüá, nsiùhù, yúhì-nsì còto mà ndóo ini-yà sàhà-nsì, te sàhámà càhàn-nsì xì nsidaa nèhivì áma (cúníndisá stná-nèyà).

Vaha ndisa ni coó anima-ndà, màdiá datiaá uun-nda quida vii-ndà

Ináhà vaha Dios nansa ía anima-nsì, te cahnú gá Dios ni cùndáa vaha stná ini mii-nsiá nansa nihnú ini-nsì.

¹² Tucutu cachí-nsì xì-nsiá ducán, doco màdi ñà-cùnì-nsì càhàn vii-nsì sàhà mii-nsì nduá, còo. Cuisì nandúcu-nsì nansa cui cudii inì-nsiá sàhà-nsì, te ducán nihì-nsiá nansa naxiconihí-nsiá nùù nècuàchì (xítñuhu xi-nsì), vèchi nècuàchìmà, có-ndúlócò-nè nú ía vaha anima-ndà, á coó. Doco nú datiaá uun-nda quida vii-ndà, xì ñà-jaàn cudii ini-nè.

¹³ Te nú tuxí ini-nè loco-nsì, pues sàhà mii-yá nduá. Te nú ndisa nècuàchì nihnú víi ini-xi nduú-nsì, dandu divi sàhà-ñá vaha xì mii-nsiá nduú stná mà.

Nansa cui nàcùndoo vaha nèhivì nùù Dios

¹⁴ Cunaha-nsiá, yáha ga cuú ini Cristu sàhà nsidaa-nda, ñàyùcàndüá icúmí-nsì quida-nsì ñà-ndüá quidá-nsì. Vèchi ni xihì-yà sàhà-ndà, te mate imindaa ana ni xihì, doco cuenta xi nsidaa-nda nduámà. Ñàyùcàndüá quidá stná-ndà cuenta na ian sàni xihì stná nsidaa-nda.

¹⁵ Te nú sàni xihì-yà sàhà nsidaa ndohó nècuàchì itiácu, dandu có-xiñùhù gá-nda cundoo uun-nda ñuhivì, te quida-nda cuisì ñà-cùdì ini mii-nda; còo. Cuisì mii-yá xiñuhu cunihnu ini-ndà, vèchi mii-yá ni xihì sàhà-ndà, te ni natiacu-yà.

¹⁶ Ñàyùcàndüá, vèchi có-ndènhí gá-nsì ni-iin nèhivì na ian ndenihí stnahá nèhivì ñuhivì yohó. Còo. Mate antes dècuèndè stná Cristu ni sandenihì-nsì na quidá nèhivì ñuhivì yohó, doco vichi còo cá.

¹⁷ Sàhámà (cundáa ini-ndà), nú ndoó ndisa-nda ladu xi Cristu, dandu nèhivì saa nduu-nda. Sàni yàha nsidaa ñà-ndüá nisa ia antes, te vèchi sàni ndusaa nsidanicuu ñàhà nùù-ndà.

¹⁸ Pues nsidaámà, cuisì ñà-ndüá ni quida (Yua-nda) Dios sàhà-ndà nduá. Ñàyùcàndüá, vátùnì ni nàcùndoo vaha-nda xi-yá sàhà obra ni quida Jesucristu. Te nsiùhù, sàni nihitáhvi stná-nsì chuun ñà-càhàn-nsì xì nèhivì sàhà-ñá nàcùndoo vaha stná-nè xi-yá.

¹⁹ Ñàyùcàndüá, dohó cachí-nsì xì-né, ñà-íá Yua-nda Dios anima Cristu (na ní xihì-yà nchica cruz), te ducán ni nihì-yá nansa nàcùndoo vaha nsidaa nèhivì ñuhivì nùù-yá, mà cùtníí gá-yà cuenta sàhà cuàchi-ne. Daani, ni sàha-ya nsiùhù chuun ñà-cachitñuhu-nsì xì nèhivì nansa vátùnì nàcùndoo vaha-ne xi-yá.

²⁰ Sàhà ñà-jaàn cuenta xi Cristu xicánúú-nsì càhàn-nsì xì nsidaa nèhivì. Doco (màdi ndisa nsiùhù càhàn), Dios nduú ana càhàn xì-né, na ian sacúndáhvi-yà nùù-né sàhà palabra xi-nsì. Ñàyùcàndüá, càhàn-nsì cuenta xi Cristu, sacúndáhvi-nsì nùù-né, á ma nàcùndoo vaha-ne xì (Yua-nda) Dios.

²¹ Vèchi Dèhemanì-yá, còo ni-iin cuàchi ni quidá-yá, doco sàhà ndohó ni chitnùnì ini Yuamáni-yá ñà-nacuìda-ya castigu xi-nda, na ian mii-yá ni quida-ya nsidaa falta xi-nda. Te divi sàhámà nú nchicùn-ndáyá, dandu ñà-sàni ndee vaha dahuun-nda nùù-yá nduá.

6

Quivì vichi nduú meru quivì nàcùndoo vâha-nda xi Dios

¹ Chuun ì xi mii-yá nduá quidá-nsí, te cutnâhâ stnâ-yâ xi-nsí nùá; ñâyücàndüá, sacúndâhvi-nsi nùu-nsiâ ñâ-màsâ cùndüá uun-ni ni nihitâhvi-nsiâ gracia xi-ya.

² Vâchi dohó cachí-yâ nùu tutu ì:

Meru tiempu vâha ni sandua na (ní sacundahví-ní) nùí, ñâyücàndüá ni inini, te ni indehè ndahví mii-ní. Ni chindeí mii-ní, vâchi meru quivì dacácuì nêhivi ni sandua.

Pues cunaha-nsiâ, vichi vichi nduú meru quivì nihî-ndâ gracia xi-ya; divi quivì vichi nduú meru quivì (cuní-yâ) dacácu-yândó.

Nansa iá modo vîi ni quida Pablo chuun ì xi Jesús

³ Nsiùhù, quidá-nsí lucha ñâ-màsâ quidá-nsí ni-ñâhâ ñâ-cuitnùhu nêhivi nsiùhù, vâchi có-cuní-nsi daquéé cuâchi-ne diquì chuun ì quidá-nsí.

⁴ Mate cuâhâ ñâhâ yâha-nsi, doco cuní-nsi quida vîi-nsi chuun, áma cúndâá ini nêhivi ñâ-divi nùu Dios xinúcuâchí-nsi? Doco dava xichi cuâhâ gâ icúmi-nsi quidandee ini-nsi, te ndoho cuahâ-nsí. Cuâhâ vida yâha-nsi, xi cuâhâ tnùndoho.

⁵ Dècuèndè sahní cuii-nè nsiùhù, te chicádí-nè nsiùhù; te dava xichi nacuídâ stnâ-nè sâhâ-nsí. Ùhî gâ iá chuun quidá-nsí. Xicánú-nsi desveladu, te xihî stnâ-nsi doco.

⁶ Doco quidá-nsí lucha ñâ-màsâ cóo ni-iin falta xi-nsi. Cuisi ñâ-ndüá ináhâ-nsí (nùu Dios) nduá cachí-nsi xi nêhivi. Te quidándéé stnâ ini-nsi sâhâ-né, viví-ni quidá-nsí xi-né. Te chindéé stnâ Espiritu Ì xi-yâ nsiùhù sâhâ ñâ-ni cùu ndisa ini-nsi sâhâ-né.

⁷ Puru ñâ-ndüü ñâ-ndâcuisi xí Dios cáhân-nsi xi-né, te chindéé stnâ ndudu ì xi-yâ nsiùhù. Te ¿jndú arma nihí-nsi? Cuisi ñâ-quidá vîi-nsi nacua cuní mii-yâ, divi ñâ-jaàn nduá chindéé-nsí mii-nsí, te quidá-nsí mii-nsí defender.

⁸ ò sea cañúhu-né nsiùhù, te ò cahíchi ini-nè nsiùhù, iin-ni quidá-nsí seguir chuun xi-nsi. Mate daquéé cuâchi-ne diquì-nsí, te ò tavá-né tnùñuhu xi-nsí, có-quidá mà. Tnuhu-nsi cahan-né, doco có-quidá, vâchi micuísí ñâ-ndüü ñâ-ndââ cáhân-nsi xi-né.

⁹ Te mate dava-ne nacuaá-né nsiùhù, doco cuâhâ gâ stnâ-nè ináhâ vâha-ne nsiùhù. Cuâhâ xichi cuâhân-nsi cui-nsi ni cúí, doco itiácu ì-nsí. Dandohó stnâ-nè nsiùhù, doco tãñáha ga nihî-né cahni-né nsiùhù.

¹⁰ Mate iá nansa ndoó-nsí tnùnsí ini, doco nicanicuhân ndoó stnâ-nsi contentu. Ndahví yâha stnâ-nsi, doco divi sâhâ nsiùhù níhî cuâhâ nêhivi ñâ-cuicâ (ndiaha xí Dios). Còo ni-ñâhâ icúmi-nsi ñuhiví yohó, doco nsidanicuú ñâhâ sàni nihitâhvi-nsi cucumi-nsí.

¹¹ Mii-nsiâ nècuâchì ñuu Corinto, claru sàni dàtú nùu-nsiâ nsidaa ñâ-ndüá nihnú ini. Sàni cachí xi-nsiâ nsidaa ñâ-ndüá ñuhú ini anímè.

¹² Ñâyücàndüá, nùu yùhù, còo desconfianza, vâchi màni cuâhâ-nsiâ nùí. Mii-nsiâ nduú ana cuú desconfiar. Cuenta xi mii-nsiâ nduájàn, màdi yùhù.

¹³ Na iin yua-nsiâ, ducán cáhîn xi-nsiâ vichi, te cachí xi-nsiâ ñâ-cùu ndisa ini sâhâ-nsiâ. Ñâyücàndüá sacúndâhvi nùu-nsiâ ñâ-dúcání ni quidá stnâ-nsiâ xi yùhù.

Na iin vehe Dios nduu-nda

¹⁴ Màsâ nâcuátnâhá-ndâ xí nêhivi có-xiníndisâ-xí mii-yâ, vâchi nahi yunta có-ndüdává queámâ. ¿A ndísâ vátuni nacuaastnahâ ñâ-íá vîi xi ñâ-íá quini? Còo, ni mà cúí nacuaastnahâ stnâ ñâ-nchii orá xi ñâ-íin tnúu.

¹⁵ Ni mà cúí nacuaatnahâ stnâ Cristu xi ñâ-malu Satanás. Stnâ iin nècuâchì xiníndisâ, mà vâha nacuaatnahâ-né xi iin nêhivi có-xiníndisâ.

¹⁶ Te ò iin veheñuhu ì xi Dios, ¿a váha cuita stnâ yùu yócò yucán? Còo. Pues cunaha-nsiâ, nahi veheñuhu ì ndé iá Dios vivu, ducán xínduu stnâ ndohó, vâchi dohó cachí-yâ nùu tutu ì:

Yùhù cuâhîn coi ndé ndoó-né, te cacanu stnâi mahî-né, vâchi ana cahvi-né cundui, te mii-né, nêhivi xí cunduu-ne.

¹⁷ Ñâyücàndüá, dohó cachí stnâ-yâ:

Quee cuaán-nsiâ nùu nsidaa nêhivi (malu mà), màsâ cùndóo gâ-nsiâ mahî-né. Ni màsâ tnúí-nsiâ ni-iin ñâ-siquini, dandu cudüi ini sâhâ-nsiâ,

¹⁸ te cundui na iin yua-nsiâ, te mii-nsiâ cunduu-nsiâ nahi dèhi, cachí Stoho-ndâ Señor, divi mii-yâ ana icúmi xí nsidanicuú poder.

7

¹ Pues ducán sàni cachi-yâ quida-ya xi-ndâ, ñani màni. Ñâyücàndüá, xiñuhu-ñâ nacoo dahuun-nda nsidanicuú ñâ-íá quini, a ducán nduá cuâchi quida-nda xi ndahâsâhâ-ndâ, te ò ñâ-ndüá quida-nda cuisí ini ánima-ndâ. Nsiquívi chicá más xiñuhu cunihnu ì ndisa ini-ndâ, te yúhî stnâ-ndâ (cótó mà cúdfi) ini-yâ sâhâ-ndâ.

Nansa ni naxicocuñin ini nècuàchì ñuu Corinto sàhà falta xi-ne

² Sacúndáhví-nsi nùu-nsiá ñà-nì nácúnhnú vaha ndisa ini-nsiá nsiùhù, vàchi cóni quidá quíni-nsí xi ni-iin-nsia; ni cóni dátúcù-nsí ni-iin-nsia; ni cóni dàndáhví stná-nsí ni-iin-nsia.

³ Doco màdiá daquéé cuàchi diquì-nsiá nduá cachí xi-nsiá ducán. Còó, vàchi sàni cachì xi-nsiá ñà-màni cuàhà-nsiá núu, te nicanicuahàn nihnú inì mii-nsiá ini animè, a ducán itiacù-ndà ñuhiví, te ò ni sàà-ndà cui-ndà.

⁴ Cuàhà gá confianza sà-icúmí xi-nsiá vichi, te cudíi gá inì sàhà modo nihnú ini-nsia, ñàyùcànduá, mate ni sái yàhi cuàhà tnùndoho, doco cudíi inì, vàchi sàni ndòo vaha inì sàhà-nsiá, te contentu ié` vichi.

⁵ Doco cunaha-nsiá, na ní quesaa-nsi ladu Macedonia yohó, mànicúí cundoo dadí-nsí. Cuàhà ñàhà sadí xi nùu-nsí, te cuàhà nèhivi xini` ùhi xi-nsí, dècuèndè ini stná anima-nsi ni nacani cuahà ini-nsi.

⁶ Doco iá ana chindéé xí nècuàchì cuhúun inì-xi, divi mii-yá; ñàyùcànduá na ní ndacùhun tnahà-nsí xi Tito, cuàhà gá ni nacuahandee ini-nsi na ní xini-nsinè.

⁷ Te màdi cuiis sàhà-ñá ni quesaa nècuàchìmà ni cudíi ini-nsi; còó, vàchi sàhà stná ñà-nì cudíi guá ini mii-né sàhà-nsiá, ñàyùcànduá ndiaha gá ni ndòo ini-nsi. Vàchi ni nacani-ne xi-nsí ñà-cudíi ini-nsiá cuni-nsiá nsiùhù inga tu, te cuú cuàhà stná-nsiá sentir (sàhà ñà-nduá ni quida-nsia). Sànihnú vaha ini-nsia nsiùhù, cachí-nè. Pues sàhà nsidaájàn chicá ni nihi yùhù ni ndudíi inì.

⁸ Cunaha-nsiá, mate ní sandoo-nsia tnùnsí ini ni quida tutu ni tiai daa, doco có-ié` arrepentidu sàhámà vichi, mate antes ndisa, ni nacani inì nanduu gué` ni tiaiámà cahín, vàchi (ni xini) ni sàcúndoo-nsia tnùnsí ini, mate iyuhu-ní quiví.

⁹ Doco vichi sàni ndudíi tú inì. Doco màdi sàhà-ñá ni cuhuun ini-nsia nduájàn. Còó, divi sàhà-ñá ni nihi-nsiá ni cuu-nsia arrepentir na ní nsihi ni cuhuun guá ini-nsia mà. Vàchi ñà-nì sàcúndoo-nsia tnùnsí ini mà, iin obra ndiaha xí Dios ni sandua, màdiá iin dañu ni quidá-nsí xi-nsiá.

¹⁰ Vàchi nú Dios nduú ana quidà-xi tnùnsí ini xi-nda, dandu vátùni sàà-ndà naxicocuñin ini-ndà, te nihi-ndà càcu-nda. Te nú sàni càcu-nda, dandu mà nunca naxicocuñin gá ini-ndà sàhájàn. Doco nú ndoo-nda tnùnsí ini nahì dava ga nèhivi ñuhiví, mà ùhi cahniámàndó.

¹¹ Doco mii-nsiá, sàhà-ñá Dios ni sàha xi-nsiá tnùnsí ini mà, (cuàhà gá ñà-vàha sàni quea nùu-nsiá). Vàchi ni quesaha-nsiá nacani sahnú ini-nsia sàhà ñà-nduá ni cuu, te ni cunsihi ini-nsiá cuxio dahuun falta mà nùu-nsiá. Cóni ndóo ga ini-nsia sàhà chuun quini ma, dècuèndè ni yùhí stná-nsiá. Dispuestu ni ndòo-nsia naquida vii tú-nsiá, te ndundaà vaha sàhà chuun ma. Dandu ni nsinuu stná ini-nsia yùhù. Pues vichi sàni cundaà ini ni quida-nsia, sà-íá vii anima-nsiá.

¹² Na ní tiai carta mà, màdi cuiis sàhà nèhivi ni quida xi falta mà ni tiaià. Ni màdi cuiis sàhà stná nèhivi ni ndoho sàhà falta mà; còó. Ni tiai sàhà ñà-nì sàà-nsiá mànihi vaha ini-nsia ñà-cúu ndisa ini-nsi sàhà-nsiá, nacua ináhá mii-yá.

¹³ Te vichi sàhà-ñá sàni cundaà vaha ini-nsia ñà-dúcán nduá, ñàyùcànduá sàni ndòo vaha inì. Te chicá más ni cudíi stná ini na ní xini ñà-contentu guá ni ndòo stná Tito sàhà-nsiá, vàchi yáha ga ni cudíi ini-nè ni quida-nsia.

¹⁴ Te divi nacua ni cachì xi-né antes ñà-ináhí, icúmí-nsiá quida vii-nsiá, (pues ducán ni cuu ndisa). Ñàyùcànduá, có-cùcàhán nú ni cachì ducán. Vàchi nacua ni cachì xi-né, ducán ni xini-nè ñà-ndáa nduá nacua iá ndàà nsidaa palabra (ì) ni cachì xi-nsiá antes.

¹⁵ Te mii-nsiá, chicá màni stná-nsiá nùu-né vichi, vàchi cudíi ini-nè na nsinúu ini-nè nansa ni quida-nsia, vàchi ni quidañuhu-nsiánè na ní sàà-nè yucán, te ni inini vii-nsiánè dècuèndè ni quidi stná-nsiá ni yùhí guá-nsiá.

¹⁶ Ñàyùcànduá, yùhù cudíi inì vichi, vàchi ináhá vahi vátùni cahvi xi-nsiá (ñà-quida vii-nsiá).

8

Xiñuhu chindee tnahà-nda quiví iá necesidad xi ñanitnahà-nda

¹ Ñáni, cuàhìn nacani xi-nsiá ñà-cuàhà guá gracia sàni quida Dios xi nèhivi xí-yá ndóo ladu Macedonia.

² Vàchi mate cuàhà gá tnùndoho yáha-ne, doco contentu ndoó-né. Te mate ndahví gà-nè, doco ni cudíi ini-nè, (ni quida stná-nè cooperar), ñàyùcànduá, cuàhà gá ñà-nduá ni taca.

³ Vaha ga voluntad icúmí-nè, ináhí, vàchi ni sàha-ne ñà-nduá sàà-nè quida-ne; còó, dècuèndè más ñà-nduá sàà-nè quida-ne ni sàha-ne, mate ndahví dahuun-ne.

⁴ Doco ni sacundahví-nè nùu-nsí, áma cuáha-nsi quida stná-nè cooperar chindee stná-nè nècuàchì (ndahví) nhíicùn stná xi Yua-nda Dios.

⁵ Te divi ducán nì quida-ne. Te más gà nì quida-ne nùù ñà-ndúá nì tuxi ini-nsi cuàhàn-nè quida-ne, vâchi primeru nì ðâyáha-ne mii-né ndahà Stoho-ndà Señor, dandu después nì ndòo stná-nè cunini-ne ñà-ndúá cachi nsiùhù según nansa cuni stná mii-yá.

⁶ Pues sàhà nsidaamá sàni cachi stná-nsi xì Tito ñà-nì cáhàn-nè xì mii-nsiá, áma quidá máni stná-nsiá, te cuacatnahá nsihi cooperación xi-nsia, vâchi divi nècuàchì mà nduú ana (nì cáhàn xi-nsiá) primeru sàhájàn.

⁷ Mii-nsiá, cuàhà gá sàni nihitáhvi-nsiá (nùù Yua-nda Dios). Xiníndisá fuerte-nsiá, te cáhàn ndiaha stná-nsiá palabra xi-ya. Sàcúndáà vâha stná inì-nsia sàhà ichi-yá, te dii gá stná inì-nsia cunchicùn-nsiá ichi mà. Daaní, cuú cuàhà stná inì-nsia sàhà-nsí. Ñâyücàndúá, ndiaha gá coo nú nì cútùha stná-nsiá quida-nsia cuàhà obra ñà-chindee stna-nda.

⁸ Màdi-ñà dandacuí nùù-nsiá nduá yohó, còo. Cuisi cuní cundaà inì-nsia ñà-cuàhà guá sàni cunsihi stná inì nèhivì dava ga (nì quida-ne cooperar), te cuní stná cunahà claru ñà-cuàhà guá cuú inì-nsiá sàhà ñanitnaha-nsia.

⁹ Vâchi ináhá stná-nsiá ñà-ndiaha guá nì quida Stoho-ndà Jesucristu; cuica sàstnùhù iá-yà (gloria xi-ya), doco sàhà ndohó nì quixi ndahví-yà, te ñâyücàndúá, vâtùni nì nihì-ndà ñà-cuicà ndiaha ndisa.

¹⁰⁻¹¹ Vichi cuàhàn cachi xi-nsiá ñà-ndúá tuxí ini yùhù sàhà chuun yohó. Cunaha-nsiá, ndiaha gá nì quida-nsia agua na ní cunsihi inì-nsia, te nì quesaha-nsiá (datacá-nsiá algu). Ñâyücàndúá, chicá vâha nì dáxnu dahuun-nsia obra mà vichi. Te nacua nisa cudú guá inì-nsia daa, ducani xiñuhu quida stná-nsiá seguir vichi, te cuàha-nsia cooperación xi-nsia según nansa sàà iin iin-nsia cuàha-nsia.

¹² Vâchi nú iá vâha voluntad xi-nda cuàha-nda, dandu cudú ini Dios sàhà-ndà, (a cuàhà', ò iyuhá), vâchi según ñà-icúmi-ndà nduá; có-xicàn-yà ñà-có-icúmi-ndà.

¹³ Màdiá cuní ndundahví mii-nsiá, te nducuaica nècuàchì mà. Còo.

¹⁴ Cuisi cuní ñà-dava dava nì coá. Vâchi vichi icúmi mii-nsiá algu, te vâtùni chindeamá nèhivì iá guá necesidad xi. Daaní, na quiví coo stná necesidad xi mii-nsiá, vâtùni chindee stná nècuàchì mà mii-nsiá. Ducán dandu sàà ndudava ñà-ndúá icúmi nsidaa-nda.

¹⁵ Cunaha-nsiá, divi ducán cachí stná nùù tutu ì ndé cachá': "Nècuàchì nì dàtácà cuàhà (ñà-cuxi-ne), cóni cùyódoá nùù-né; te nècuàchì nì dàtácà xì iyuhu-niá, nì cóni quidá mániá nùù-né".

Nansa nì quida Pablo recomendar Tito nùù nècuàchì ñuu Corinto

¹⁶ Ansivéhé Dios sàhà gracia nì quida-ya xì Tito, vâchi iin-ni nihnú stná inì-nè nahi yùhù, iin-ni cuní stná-nè chindee-né mii-nsiá.

¹⁷ Ñâyücàndúá, na ní cáhàn xi-né (ñà-nì cùhùn-nè ndé ndoó-nsiá) nì dàndáà-nè. Te voluntad xi-ne nì sanduu stná, vâchi cudú gá stná inì-nè sàhà-nsiá.

¹⁸ Daaní, iá stná inga ñani-ndà icúmi cutnahá stná xì Tito sàà. Cuàhà tnùñuhu icúmi-nè nùù nsidaa nèhivì xì Dios ndoó cuàhà ñuu, vâchi cuàhà gá chindéé-nè xitiá razón ndiaha xi-yá.

¹⁹ Te divi stná-nè nì quee-ne nombradu ñà-cutnahá-né xi-nsí chindee stná-nè xì obra quidá-nsi (sàhà nècuàchì ndahví). Te ¿ndù chuun quidá-nsí obra mà? Divi sàhà-ñá nì quee más tnùñuhu xì Dios, te cundaà stná inì nèhivì ñà-cuàhà guá cudú ini-nsiá quida-nsia obra.

²⁰ Ñâyücàndúá, (cutnahá stná nècuàchì mà xi-nsí) sàhà-ñá màsà nihindèè nèhivì cuitnùhu-ne nsiùhù sàhà dihùn mà, vâchi cuàhà gá nduá sàni taca.

²¹ Cuní-nsi quida vii-nsí nùù nsidanicuú chuun xi-nsi, vâchi indéhe Dios. Doco nùù stná nèhivì cuní-nsi quee vii stná mà.

²² Daaní, iá stná inga ñani-ndà techuún-nsí cutnahá stná-nè sàà jaàn. Cunaha-nsiá, cuàhà gá chuun sàni sàha-nsinè, ñâyücàndúá sàni cundaà ini-nsi cunsihi ndisa ini-nè quidá-né chuun xi mii-yá. Te vichi chicá más cudú ini-nè, vâchi ináhà-nè cuàhàn-nsiá quida stná-nsiá cumplir vichi.

²³ Ñâyücàndúá, nú ndàcàtnùhù nèhivì ana nduú Tito, pues cachi-nsiá xi-né ñà-divi compañoeru yùhù nduú-né; ndú-nsi iin-ni quidá-nsí chuun ì xi-yá ñà-chindee-nsi mii-nsiá. Te nú nì ndàcàtnùhù stná-nè sàhà dava ga ñani-ndà (icúmi sàà), dandu cachi-nsia ñà-ndúú-nè nècuàchì nì quida nèhivì xì Dios nombrar, te quidá vii stná-nè nacua cuní Cristu.

²⁴ Ñâyücàndúá, quidañuhu-nsiá nsidaa nècuàchì mà sàhà-ñá cundaà ini-nè màni ndisa-ne nùù-nsiá, te ducán cundaà stná inì nèhivì xi-yá ndoó cuàhà inga ñuu. Te nú ducán màni guá quida-nsia xi-né, dandu cunahà claru stná divi ñà-ndáà nduú nsidaa ñà-vâha sàni cachi xi nèhivì sàhà-nsiá.

9

Ñà-ndúá ðisàhà-xi nì techuún Pablo nèhivì cùhùn ñuu Corinto quihìn xi cooperación sàhà nècuàchì ndahví

¹ Vichi còò necesidad cachi guè xi-nsiá sàhà ñà-nduá datacá-nsiá sàhà nèhiví xí Dios,
² vâchi inâhî iá cuàhà voluntad xi-nsia, te ducán sàni cachi stnâi xí nècuàchi ladu Macedonia yohó. Vâchi cudîi ini nacani xi-né nansa quidá-nsiá ladu Acaya jaàn, dècuèndè agua sàndòò-nsiá dispuestu chindee-nsiá, cachî xi-né. Ñâyùcànduá, cuàhà gá stnâ nècuàchi ladu yohó sàni ndudiî stnâ ini-nè (cuàha-ne).

³ Doco de todos modos, cuàhin techuín iin ùi ñani-ndâ sàà ndé ndoó-nsiá (ñà-chindee-né) mii-nsiá datacá nsihi-nsia ñà-nduá cuàhàn-nsiá cuàha-nsia. Dandu cunahà claru ñà-ndâcuisi nduá ni cachi (xi nècuàchi ladu yohó), màdi tñuhu, vâchi icúmí coo ndisa cooperaciôn xi-nsia.

⁴ Vâchi cahví xi-nsiá ñà-coo listu nsidaamá, vâchi nú sàni sàà-nsi después, te tãñáha ga cuacatnahá, dandu cucahan nú-nsí, yùhù xi stnâ nècuàchi Macedonia cutnâhâ xí. Te mii stnâ-nsiá, vihini cucahan nú-nsiá, nú coá.

⁵ Ñâyùcànduá, ni nacani ini, chicá vâha càhlin xi iin ùi ñani-ndâ yohó ñà-codònuù-né sàà-nè chindee-né mii-nsiá cuacatnahá ñà-nduá ni cachi-nsiá antes mà. Dandísá, coo listuá, te cundua na iin tñumani ndiaha ni sâhatahvi-nsiá, màdiá nahi dihùn ni tavâ-nsí nuù-nsiá.

⁶ Cuní nsinuu ini-nsia palabra yohó: nú iyuhu chihi-nda, dandu iyuhu cosecha nachivâha-nda; doco nú chihi cuahâ-nda, dandu cahnú coo stnâ cosecha xi-nda.

⁷ Cada iin iin-nda segùn cudîi ini-nda, ducan xiñuhu cuâhatahvi-nda; nú có-cuní ndisa-nda quida-nda cooperar; dandu còò necesidad cuàha-nda; màdi fuerza nduá. Vâchi Dios, cuàhà gá cudîi ini-yá nú iá vâha voluntad xi-nda cuâhatahvi-nda iñâha.

⁸ Te vâtuni quida stnâ-yâ cuàhà gracia sàhà-ndâ, te nihî-ndâ nsidaa ñà-nduá xiñuhu nuù-ndâ. Ni-iñâha mà-quidá falta nuù-ndâ, dandu vâtuni quida stnâ-nda nsidanicuú clase obra vâha.

⁹ Vâchi dohó cachi stnâ nuù tutu ìi: Ni dacútahvi nècuàchimâ cuàhà nèhivi ndahví; cóni cùhí ini-nè biene xi-ne, ñâyùcànduá nicanicuahàn iá obra xi-nemâ (nuù Dios).

¹⁰ Divi Dios nduú ana sâha xi-nda ñà-nduá chihi-nda, xi ñà-nduá xixí stnâ-nda. Ñâyùcànduá, icúmí-yâ cuàha stnâ-yándò nsidaa ñà-nduá xiñuhu sàhâ-ñâ (quida-nda obra), dandu quee cuahâ stnâ (ñà-vâha nuù-ndâ). Vâchi nahi tata chihi-nda, ducán nduú biene xi-nda, te nahi cosecha nduú stnâ obra quida-ndama.

¹¹ Ñâyùcànduá, nú sàni nducuahâ ñà-nduá icúmí-ndâ, dandu chicá más cui dacútahvi stnahâ stnâ-nda. Te divi sàhà tñumani cuàhàn-nsi dasàn-nsimâ icúmí cuàhà nèhivi naquimani-né Dios.

¹² Vâchi na chindéé-ndâ ñanitnaha-nda ducán, (cuàhà gá quidá), màdi sàhà cuisí necesidad xi-ne chindéá; cóo, vâchi cuàhà gá stnâ nèhivi icúmí naquimani ndiaha xi-yâ sàhà obra mà.

¹³ Vâchi nú sàni xini-nè nansa ni chindee-nsiánè, dandu icúmí-nè ndenihî cahnú-néyâ sàhâ-nsiá ñà-sàni xini-nè ñà-ndâá nduá, nchícùn vii-nsiá razón ndiaha xí Cristu nacua cachi-nsiá. Te icúmí stnâ-nè naquimani-néyâ sàhâ ayuda ni sâha-nsianè, xi sàhâ stnâ nsidaa ayuda sâha-nsia ndéni nèhivi ní cui.

¹⁴ Ñâyùcànduá, màni gá icúmí-nè cunihnu ini-nè sàhâ-nsiá, te càcàn tàhvi stnâ-né sàhâ-nsiá nuù-yâ ñà-ni xini-nè cuàhà gá gracia quidá-yâ sàhâ-nsiá.

¹⁵ Te vichî, jansivéhé cahnú-yâ sàhâ ayuda ni sâha-nsianè, xi sàhâ stnâ-ndâ (divi Dèhemani-yâ)! Ni mà cúí sàà-ndâ naquimani-ndâyâ nacua ndiá icà-ndâ.

10

Nansa ni dânsnúú ini Pablo nècuàchi ñuu Corinto ñà-iá derechu xi-ne, vâchi Jesús nduú ana ni sâha xi-né chuun ìi quidá-né

¹⁻² Sâ-inâhá-nsiá màni ini Cristu; mà dánâ-yâ. Ñâyùcànduá, yùhù Pablo, sacúndáhvî nuù-nsiá ñà-màsà cóo ni-iin necesidad càhàn ndeí xi-nsiá na sái. Vâchi cachi dáva nèhivi sâhî ñà-nduú iin nèhivi cùchitnu na ié' cutnâhî xi-nsiá, doco na iá xiqué, (te tiaí carta xi), dandu mà ùhî càhàn ndeí, cachi-nè. Pues ñà-ndâá nduá, vihini nihnú ini càhàn fuertí xi dáva-nsia. Vâchi tuxí ini dáva-nsia sàhâ-nsí ñà-quidá ndevâha-nsi na quidá ndéni nèhivi ní cui ñuhiví yohó.

³ Pues, ñà-ndâá nduá, nèhivi ñuhiví yohó nduú-nsí, doco na cuní-nsi cundee-nsí (nuù ñà-có-ndiáá), có-quidá-nsí guerra na quidá nèhivi ñuhiví yohó.

⁴ Iá ndisa nahi arma xi-nsi, doco có-nduá arma xi ñuhiví yohó. Cóo, arma ndiaha xí Dios nduá xichúún-nsí, te nihâ ndudu ìi xí-yâ, ñâyùcànduá vâtuni cundee-nsí nuù nsidaa ñà-có-ndiáá iá ñuhiví yohó mate fuerte gâ-ñâ.

⁵ Vâtuni cundee-nsí nuù nsidaa palabra nchichí chítñuní ini nèhivi tuxí ini-xi mii-né nduú-né mii-né, te sadí-nè nuù (palabra cachítnùhu) nansa cunitnâhâ-ndâ xi Dios. Vâtuni

cundee stná-nsi nùu-né ñà-ni sàà-nè cunini stná-nè Cristu, te cunihnu vâha stná ini-nè cuisì nacua cuní mii-yá.

⁶ Te mii-nsiá tu, nú sàà-nsiá cunini vâha ndisa-nsiayà, dandu ndiaha gá coo. Doco nècuàchì iin-ni có-cùnì cunini (xi-yá), icúmí-nsí cuàha-nsinè iin conseju fuerte.

⁷ Yùhù cuní cundehè-nsiá nansa ndisa iá chuun yohó. Nú iá iin-nsia tuxí inì-xi nduú nèhivi xí Cristu, pues ni cúnáhá-nsiá ñà-stná nsiùhù nduú stná-nsi nèhivi xí-yá nahì mii-nsiá.

⁸ Mate ní càhàn ndeí iyuhu xi-nsiá na ní cachì ñà-íá ndisa derechu xi, doco có-cùcáhàn núúí sàhámà. Vâchi derechu mà, sàhà-ñá nacuàhandee ini-nsi mii-nsiá nduá disàhà-xí ni nihì-nsiá nùú Stoho-ndà Señor, màdiá sàhà-ñá quida quini-nsi xi-nsiá.

⁹ Te màdi sàhà-ñá dayúhì stná-nsi mii-nsiá tiaá-nsí carta yohó. Còo.

¹⁰ Yùhù (ináhí) cachí dava nèhivi sàhí ñà-ndee càhìn nùú carta xi, te fuerte palabra tiaí, doco nú sà-íé' nùu-né, te indèhe-né núú, dandu mà finu guè, te ni mà túha guè càhàn víí, cachí-nè.

¹¹ Doco ni cúnáhá-né ñà-divi nacua cachí-nsi nùú carta xi-nsi na ndoó xicá-nsí, divi ducán icúmí-nsí quida stná-nsi na sàà-nsi ndé ndoó-nsiá.

¹² Nsiùhù, ni-iyuhu có-cùnì-nsi dadavá stnahá-nsí xì nèhivi ndeníhí vâha guá xì mii-xí, còo; vâchi tucu dahuun xíquida-ne. Tuxí ini-nè ñà-cuisì modo xi mii-né nduú ley chicá ndiaá, te ndeníhí vâha tnahá iin-ne inga-nè. Ñâyücàndüá (nàhà xicà), nècuàchì có-cundáà inì-xi nduú-né.

¹³ Doco nsiùhù, có-nándúcú-nsí ñà-quee tñùñuhu xí-nsí, ni có-dàquhvi-nsi mii-nsí nùú iin chuun cóni sàha Dios nsiùhù. Cuisì chuun ni nihì-nsi nùú mii-yá nduá càhàn-nsi sàhà-xí. Te dècuèndè ndé ndoó-nsiá jaàn ni sàha stná-yà nsiùhù chuun quida-nsi.

¹⁴ Ñâyücàndüá, màdiá yàha-nsi nùu-xí ndé ni cachí-yá xi-nsi nduá. Tucu cundua nú màsà sàà-nsi ndé ndoó-nsiá ni cùí. Doco còo, nècuàchì primeru ni càhàn xi-nsiá razón ndiaha xí Cristu nduú-nsí.

¹⁵ Doco iin chuun cóni sàha-ya nsiùhù, còo, mà càhàn-nsi sàhámà na ian nduá chuun xi-nsi; còo. Doco nihnú ini-nsi quida ga-nsi más gá chuun xi-ya ndé ndoó-nsiá jaàn nú sàni nihì-nsiá ni xinindisá-nsiá chicá fuerte, doco siempre mà yàha-nsi ndé nduú nùu-xí ni cachì Dios xi-nsi.

¹⁶ Dandu después dècuèndè stná ñuu ndoó chicá nùu-xí cuní stná-nsi cùhùn-nsi cachitnùhu-nsi razón ndiaha xi-yá, doco ni xi ñà-jaàn, mà nándúcú-nsí quee tñùñuhu xí-nsí sàhà iin chuun ni quida inga nèhivi.

¹⁷ Vâchi nú cuní-ndà tavà-ndà tñùñuhu xí mii-nda, dandu ni cúnáhá-ndá ñà-cuisì Stoho-ndà Señor nduú tñùñuhu xi-nda.

¹⁸ Vâchi ¿indù clase nèhivi icúmí ndee vâha nùu-yá? ¿A nèhivi tavá tñùñuhu xí mii-xí? Còo, cuisì ana cudí ini mii-yá sàhà-xí icúmí ndee vâha.

11

Ñà-ndüá ni cachì Pablo sàhà nèhivi dananí uun nduú apóstol ni nihì chuun nùú Jesús

¹ Vichi cuàhìn càhìn iin ratu na iin tè-cùmání; ñâyücàndüá, sacúndáhvi' nùu-nsiá ñà-quidandee ini-nsia sàhí, por favor.

² Vâchi yùhù, cuàhà gá nacání inì sàhà-nsiá na ian nacání stná ini Yua-nda Dios sàhà ndohó. Cunaha-nsiá, ducan iá stná na ian ni ndiadi tñùhu xi iin novia cuàhàn nandàhà. Vâchi mii-nsiá, na iin noviá nduú-nsiá, te cuní sàà-nsiá ndé iá Cristu te cundoo-nsia nùu-yá nicanicuàhàn. Doco na sàà-nsiá yucán cuní cunduu-nsia (nèhivi víi ndisa) na iin novia siempre sàni quida víi.

³ Doco yúhí xì-nsiá, còtó dàcà òni-nsiá, te mà cúníhnú vâha ga ndisa ini-nsiayà. Vâchi ducán ni cuu xi Eva sàna, (ni tñàtuu) còo (nduú ñà-malu), te ñà-tñùhù guá-si ni nihì-sí ni dàndàhvi'-siné.

⁴ Ñâyücàndüá, mii-nsiá, (caquin-nsiá cuidadu), vâchi nú ni sàà iin nèhivi nùu-nsiá, te càhàn-nè sàhà inga Jesús, mà úhì candisá-nsiánè, mate diín nduú Jesús xi nècuàchmà, te diín nduú Jesús ni cachì nsiùhù xi-nsiá; te (xiní-nsi) mà úhì candisá stná-nsiá yàha-nsia ndahà inga espíritu (quida-ne), mate diín espíritu nduá, màdi Espiritu Ì ni nihì-nsiá daa. Te (xiní-nsi), mà úhì stná cunindisá-nsiá inga palabra saa có-ndúdává xí palabra ì ni xinindisá-nsiá daa.

⁵ Doco siquiera, yùhù, davani ndiaá stnái xì nècuàchì tuxí inì-xi xínduu guá apóstol ndiaha.

⁶ Mate vihini mà túha güé càhàn víí, doco ináhá vâhi ñà-ndüá cachí. Te mii-nsiá ináhá vâha stná-nsiá ñà-divi ñà-ndáà nduájàn, vâchi sàni xininùu-nsiá nsidaa ñà-ndüá sàni quida-nsi.

⁷ Doco za tuxí inì-nsia cuàchi nduá ñà-uun-ni nì cachtitnùhi xì-nsiá razón ndiaha xí mii-yá? Dècuèndè menos nì ndòì sàhà-ñá cuní nì ndóo mii-nsiá xì chicá más tnùñuhu.

⁸ Vàchi na ní sa-ìe jaàn chindéí mii-nsiá, ¿índù nì quixi ñà-nisa itiacuí? Pues divi nùù nèhivì xí-yá ndoó inga ñuu. Ñàyùcàndüá, yùhù quidé cuenta na ian nì sahnìndàhvì nècuàchmà, te có-ndüá ducán.

⁹ Daaní, después na ní quida manì dihùn nùì, ni-iin centavu cóni xíquèn nùù-nsiá. Còò; divi ñani-ndà nì quixi ladu Macedonia nì taxi xì ñà-ndüá xiñuhí mà. Te cuàhà cuidadu nì saquin vahi ñà-màsà quidá-nsiá ni-iin gastu sàhí, te nicanicuahàn ducan icúmí quide.

¹⁰ Te yùhù cachí xì-nsiá nacua chindéé Cristu yùhù càhàn ndài, mà nácóí cachí xì nèhivì inicutu ladu Acaya xi-nsia (ñà-có-tníì dihùn xì-nsiá). Còò, mà cuáhi cadì ni-iin nèhivì nùù cachí ñà-jaàn.

¹¹ Te, ¿índù chuun cachí ducán? ¿A sàhà-ñá có-cúú inì sàhà-nsiá? Còò, vachi ináhà Dios ñà-cúú ndisa inì sàhà-nsiá.

¹² Doco iin-ni icúmí quidé ñà-ndüá quide sàhà màsà níhìndèè nèhivì-mà coo cuadú gà-nè, te cachí-nè davani íá stná chuun xi-ne xì chuun xì nsiùhù.

¹³ Vàchi cunaha-nsiá, tnùhu nduá cachí-nè ñà-nùù mii-yá nì nihì-né chuun xi-ne. Dandahví uun-ne, te dananí uun-ne nduú-né apóstol xì Cristu.

¹⁴ Te mà ùhì quida-ne ducán, vachi stná ñà-malu Satanás, tùha stná-si dama-si mii-sí nanduu-sì na iin àngel nchíì ndiaha.

¹⁵ Ñàyùcàndüá, nècuàchì nchícùn xì-sí, mà ùhì stná dama-ne modo xi-ne na iin nèhivì quida-xì iin chuun vii. Doco cunaha-nsiá, icúmí-nè nihì-né (iin castigu) xi-ne nacua ndiá icà-né.

Nansa nì ndoho Pablo sàhà-ñá quidá-né chuun ì xì Jesús

¹⁶ Vichi tucutu cachí xì-nsiá: màsà cútuxí inì-nsia iin tè-loco nduí. Doco nú ducán tuxí inì-nsia, dandu nì cuàha-nsia lugar càhàn chíí na iin tè-loco; vachi stná yùhù cudíì stná inì cachí nansa ndiáá güè (nacua quidá dava nèhivì ndé ndoó-nsiá).

¹⁷ Doco ñà-ndüá cuàhìn cachí xì-nsiá vichi, có-ndüá na iin palabra (sahnú) nì nihì nùù Stoho-ndà Señor; cuiisì na iin palabra loco nduá, vachi ñà-cuàhìn ndenihì vahi mii nduá.

¹⁸ Vàchi sàni xini, ñà-cuàhà guá nèhivì ndenihí vaha xì mii-xí sàhà ñà-ndüá quidá-né, ñàyùcàndüá yùhù stná cuàhìn quide ducán.

¹⁹ Vàchi mii-nsiá, ñà-cuàhà guá ináhà-nsiá, ñàyùcàndüá mà ùhì candisá-nsiá càhàn iin tè-loco xì-nsiá.

²⁰ Dècuèndè candisá stná-nsiá nú xichúùn nèhivì mii-nsiá, te ò tnií-né ñà-icúmí-nsiá, te ò dandacú ndee-nè nùù-nsiá, te ò cachíchì inì-nè mii-nsiá, te ò caní-né nùù-nsiá; pues nsidaámà candisá-nsiá.

²¹ Doco nsiùhù, cuicahnú gà inì-nsia sàhà-nsí, vachi cóni quidá-nsí xì-nsiá ducán.

Doco nú (jaàn) ndoó guá nèhivì sáhandee inì-xì ndenihí vaha xì mii-xí, ádi vátuni stná yùhù càhìn sàhà mii ducán. Cuiisì cuní cundaà inì-nsia ñà-na ian càhàn iin tè-loco nduá yohó.

²² Pues cachí nèhivì mà ñà-divi raza hebreu xínduu-ne. Doco yùhù, divi raza mà nduú stnáì. Daaní, nècuàchì ñuu Israel nduú stná-nè cachí-nè; pues divi ducaní stná yùhù. Daaní, cachí stná-nè ñà-Abraham nì sanduu yohótéhè-né. Pues nì cúnáhà-nè yohótéhè stnáì nì sanduu nècuàchmà.

²³ Daaní, cachí-nè ñà-divi Cristu xinúcuáchí-nè nùù-xí. Pues divi ducaní stná yùhù. Doco chicá más chuun xì mii-yá sàni quide nùù mii-né. Mate na càhàn tè-loco càhìn, doco ducán cachí, màs gà nì quide nùù mii-né. Chicá cuàhà nì ñàhni cuií. Te chicá cuàhà nì sandiadi nùù mii-né. Cuàhà gá xichi sà-ìé ñà-cui nì cùí.

²⁴ Ùhùn xichi nì casahnì cuií tè-raza Judea yùhù xì chirrión, 39 golpe nì nihì iin iin xichi.

²⁵ Te ùni xichi nì ñàhni cuií stnáì xì vara, te iin xichi nì caniyuu-té yùhù sàhà-ñá cui. Te ùni xichi nì càhà stná barcu ndé cuàhìn, ñàyùcàndüá iin nduí xì iin ñuu nì xique mahì tècuií mar.

²⁶ Cuàhà gá sàni xicanui. Dava yùte, ndé cùunàhí nì yàhi. Te dava xichi ndiatú tècuìhnà yùhù yàhi. Dècuèndè stná nèhivì raza mii, cuní stná-nè quida quini-ne xí, mii-né xì stná nècuàchì inga ñuu. Cuàhà gá peligrú yáhi na xicánuí ñuu nahnú, te ò yucú dänä, ò mar. Te peligrú nduú stná na íe mahì nèhivì dananí uun nchícùn xì mii-yá.

²⁷ Cunaha-nsiá, yáha ga ùhì chuun quidé, vachi cuàhà vida yáhi xicánuí. Có-quidì, xíhi doco, xíhi tècuií; te nú coámà, quidándéé inì, mate xíhi vixin ñà-còò sicoto vaha xi.

²⁸ Pues, ñà-jaàn nduá yáhi, te íá gà más ñà-cóni cachí xì-nsiá. Daaní, nsiquívì cuàhà gá nacaní stná inì sàhà nèhivì xí Dios ndoó iin iin ñuu.

²⁹ Vàchi nú débil íá anima iin ñani-ndà, dandu stná yùhù, na ian débil íá stnáì; te nú sàni tucú iin-ne nì quida nèhivì, dandu stná yùhù ndohó stnáì.

³⁰ Ñàyücàndüá, nú ndisa íá necesidad ndenihi vaha mií, dandu chicá vaha nacani xí-nsiá ñà-cuàhà guá vida yáhi, te dandohámà yùhù.

³¹ Cunaha-nsiá, ñà-ndácuisi nduú nsidaa ñà-ndüá cachí xí-nsiá yohó, te ináhá stná mii-yá ana cahvi Stoho-ndá Jesucristu, divi Yuamáni-yá, ansivéhé-yá nicanicuahàn.

³² Na ní sa-íe ñuu Damasco, íá stná iin gobernador xinúcuáchí nùu rey Aretas yucán, te divi-tè nì dándácù-te cundiaa soldadu yehè ñuu mà ñà-cùnì-te tniì-tè yùhù.

³³ Doco (nì nani) nama ndiadí ñuu mà ndé íá iin ventana tii, te nì sàcùnacà iin ìcà sicàtè, te nì dànùù nèhivì yùhù (inga ladu), te ducán nì nihí nì càcui nùu gobernador mà.

12

Nansa nì dácùnì Dios Pablo iñàha, te nì xini-nè cuàhà ñà-ndiaha

¹ Yùhù ináhí còò nì-iñàha nihindèè-ndà nú ndenihi vaha-nda mii-nda, doco cuàhìn quide seguir. Vichi cuàhìn càhìn xí-nsiá sàhà ñà-ndüá dacunì Dios ndohó, vachi cuàhà gá ñà-ndiaha xini nèhivì dava xichi.

² Yùhù ináhí iin tiàa xiníndísá-xí Cristu, te sàcuàhàn-ndà iin ùxìn cùnì cuà nì ndiachi-né dècuèndè ansivi ùnì (chicá diqui-xí). Có-ináhí a ní sàhàn-nè yucán xì na íá iquicúñú-nè, te ò cuisì anima-nè, sólo Dios ináhá.

³⁻⁴ Doco yùhù, ináhí nècuàchimà, te nì ndiachi-né nì sàhàn-nè ndè (iin lugar ndiaha) nani paraiso, mate có-ináhí a ní ndiachi stná iquicúñú-nè nì sàhàn, te ò mii-ní anima-nè, cuisì Dios ináhá. Te ndè lugar yucán nì inini-ne palabra yáha ga ndiaha. Doco còò stná permisù cachi-ndà palabra mà xì nèhivì.

⁵⁻⁶ Pues iin nècuàchì nì xini ñà-jaàn, vihini taví tnuñuhu xí-né sàhà ñà-jaàn, vachi màdì tnuhù nduá, te nì màdì palabra cumàni cundua nú nì cachí ducán nì cùí, (vachi cunaha-nsiá, yùhù nduú nècuàchimà). Doco còò, mà cachí ñà-jaàn. Cuisì nacánì xí-nsiá ñà-ndüú iin nèhivì ùnì, te ndohó stnáí, còtó cutuxi inì nèhivì cuàhà gá ndiaí, mate tãñàha ga cuni-nè nansa ndisa quidé, te ò tãñàha ga cunitnuhù-ne nansa ndisa ía modo xì.

⁷ Cunaha-nsiá, ñà-ndiaha guá íá ñà-ndüá nì xini ansivi daa, ñàyücàndüá nì sàha Dios yùhù iin (ñà-dàndòhò-xí na ian) ihí iin iñù cahnú iqué. Ducán (sàha-ya permisù) quida ñà-malu xí sàhà-ñà màsà ndénihí vaha güé mií.

⁸ Mate ùnì xichi nì xicàn tàhvi nùu-yá áma dácúxíó-yáña,

⁹ doco dohó nì cachi-yá xí: “Cunaha-ní, vätùni sàa gracia xì nùu-ní. Vachi nú cuítá-ní, dandu chicá ndiaha icúmí chindeí mii-ní”, nì cachi-yá. Ñàyücàndüá, vichi cudí inì nú cuítè, vachi nú ducán, dandu chicá más icúmí nihitáhvi ndudu ìi xí Cristu.

¹⁰ Sàhà ñà-jaàn, cudí inì nú còò fuerzì, te ò cànàhá nèhivì xí, te ò yáha ndahví, te ò taxi nèhivì yùhù, te ò yáhi cuàhà vida sàhà mii-yá, vachi nú (cuàhà gá ndohí), te còò fuerzì, dandu chicá cuàhà icúmí nihitáhvi ndudu ìi xí-yá.

Ndiá disàhà-xí nì nacani guá ini Pablo sàhà nèhivì xí Dios ñuu Corinto

¹¹ Cunaha-nsiá, na ní ndenihi vaha güé mií xì palabra jaàn, na iin palabra cachí iin tè-cumàni nì sandua. Doco fuerza nì cachi ducán sàhà ñà-ndüá (cachí) mii-nsiá sàhí. Vachi mii-nsiá nduú ana ndiá ìcà tavá xì tnuñuhu xí nì cùí. Mate nì cachi-ndà còò nì-iñàha ndiaí, doco siquierà dava-nì ndiaí xì nèhivì cachi guá xí-nsiá nduú-né apóstol xì mii-yá.

¹² Vachi na ní sa-íe xí-nsiá, cuàhà gá milagru fuerte nisa quide. Cuàhà gá iñàha ñà-ndulocó nèhivì nì quide, te cuàhà gá nì quidandee stná inì (na ní xini cuàhà vida). Ñàyücàndüá, sàhà nsidaámà vätùni cundaá inì-nsiá divi ana nì techuún mii-yá nduí.

¹³ Nacua siempre quidé xì nèhivì xí Dios inga ñuu, divi ducán nisa quida stnáí xì mii-nsiá. Cuisì imindaa iñàha cóni ndúdává, divi ñà-cóni tnií dihùn xí-nsiá. Te nú cuàchì nduájàn, dandu sacundáhvi nùu-nsiá ñà-cuicahnú inì-nsiá sàhí, por favor.

¹⁴ Vichi sà-íe ñà-sàì ndé ndoó-nsiá inga tu, te vichi cundua ùnì xichi. Doco nì-iñàha mà cáquìn nùu-nsiá, vachi màdì ñà-icúmì-nsiá nduá cuú inì sàhà-xí, còò; mii-nsiá cuú inì sàhà-xí. Vachi (nahi dèhi xínduu-nsiá, te) có-quidá tocar iin dèhe dacáyà biene ndutahvi yuadíhà. Còò, yuadíhà quidá tocar dandútahvi xì biene xì nùu miá.

¹⁵ Ñàyücàndüá, dispuestu íe quide ndéni gastu nì cui sàhà ñà-vàha xì anima-nsiá, dècuèndè vida xì cuàha stnáí nù íá necesidad. Doco ñà-ndüá xinf, mate ducán chicá más cuú inì sàhà-nsiá, doco chicá menos cuú inì mii-nsiá sàhí.

¹⁶ Dava stná nèhivì, cachí-nè sàhí ñà-ndàá nduá, cóni tnií dihùn xí-nsiá, doco ñà-cuàhà guá maña icúmí, ñàyücàndüá, inga modo nì sahnìndahví mii-nsiá, cachí-nè.

¹⁷ Doco ¿a ní sahnìndahví ndise mii-nsiá na ní techuún nèhivì nì sàà nùu-nsiá? (Còò.) Te ¿a ní candiaa-nè dihùn xí-nsiá? (Còò.)

¹⁸ Nì sacundahví nùu Tito (ñà-cùhùn-nè) ndé ndoó-nsiá, teayücàndüá cutnàhà-né xì inga ñani-ndà nì sàà. Doco ¿a ndisá nì sahnìndahví-nè mii-nsiá? (Còò.) Amadí iin-nì nì quida stná-nè nahì yùhù, vachi iin-nì nihnú stná inì-nè nahì yùhù.

¹⁹ Vihini tuxí ini-nsia cuisì cáhìn ducán sàhà-ñá ndòo vaha tu-nsi xi-nsiá. Doco còo. Indéhe Dios, ináhá-yá nansa cachi, te ndácùcahan stnái Cristu. Cuisì sàhà ñà-nacuàhandee ini mii-nsiá, ñàyùcànduá tiaí nsidaa ñà-yòhó, ñiani màní.

²⁰ Doco yúhí sàhà-nsiá còtò sài yucán, te mà cúdîí gá ini sàhà ñà-nduá quidá-nsiá, te ò mii-nsiá, mà ndóo stná ini-nsia sàhí. Ndisa, yúhí sàhà-nsiá, còtò sài, te ndoó-nsiá nâá tnahá-nsiá, cumbidia ini-nsia, dacuáá stnahá ini-nsia, te ò ndeníhí ndiaha gá-nsiá mii-nsiá, te ò dandahví tnahá-nsiá, te xítñùhu tnahá-nsiá, te ò cucuádû-nsiá, có-xìcánúú víí gá-nsiá.

²¹ Ndisa, yúhí, còtò sàà tui, te ndòo cahin nùù Dios. Nacání gá ini ñà-vihini cundoo nècuàchì nì quida cuàchì sà-íá quivì, te tañáha ga naxicocuñin ini-nè sàhà-ñá. Ndisa icúmí coi tnúnsí ini sàhà-né nù tañáha ga cuu-ne arrepentir sàhà cuàchì nì quida-ne, a sea nì càhàn-nè xì ana cóní nándàhà xì-né, te ò íá viciu xi-ne, te ò ní quida-ne inga ñà-siquini.

13

Nansa ni cachi Pablo na ní dàxínu-ne carta yohó, cuidadu ni cundóo-ndá màsà quidá ndevàha-nda, cachí-nè

¹ Vichi cunduu ùni xichi sài ndé ndoó-nsiá. Te nù sàni sài, (te quesáhá-ndá ndatnúhú-ndá sàhà ana có-quidá víí), dandu fuerza nduá cundoo ù ò ùni testígu, dandu cundaà ini-ndá índù ñà-nduú ñà-ndácuisi.

² Te vichi íá stná ñà-nduá cunf cachi xi nsidaa nèhivì nì xida cuàchì antes, te nì cúníní stná nsidaa gá-nsiá, vachi nacua nì cachi na ní sàhìn visita ùi mà, ducán cachí stnái vichi mate xica íé; nù nì sài, mà dácàcui ni-iin nèhivì (xiñuhu conseju).

³ Ducán icúmí quide, vachi xìcàn-nsiá iin seña cundaà ini-nsia, a ndísá divi Cristu nì sàha xí derechu ñà-càhìn xì-nsiá ducán, á cóo. Cunaha-nsiá, màdì débil íá mii-yá ana dandàcù-xì nùù-ndá, còo; quidá-yá poder xi-ya nùù-ndá.

⁴ Mate na ian débil nì ía-ya na ní chituu-tèyá nchica cruz, doco vichi, còo. Itiácú-yá vichi sàhà poder xi ndudu ù xí Dios. Ñàyùcànduá, stná nsiùhù, mate còo stná fuerza xi-nsi nahi Cristu daa, doco sàhà poder xi-ya icúmí-nsí cutiacu gá-nsí ñà-chindee-nsí mii-nsiá.

⁵ Nacani vaha ini-nsia, a xiníndísá ndisa-nsia mii-yá, á cóo. Cundehè váha-nsia anima-nsiá. Xiñuhu cuàha-nsia cuenta ñà-ínacáá Jesucristu ini anima-nsiá. Doco te nù còo-yá, dandísá, có-nduú-nsiá nèhivì sàni natùì nùù-yá.

⁶ Doco cahnú gá Dios vátùni cundaà ini-nsia sàhà nsiùhù ñà-nduú-nsí nècuàchì sàni natùì nùù-yá.

⁷ Te vichi xìcàn tàhvi-nsí nùù-yá sàhà-nsiá ñà-màsà quidá-nsiá ni-iin falta. Doco có-càchì-nsí ducán sàhà ñà-cutuxi ini-nsiá vaha ga nsiùhù. Cuisì cuní-nsí quida-nsia ñà-íá víí, mate vihini mà sàá-nsiá cundaà vaha ini-nsia ñà-sàni natùì stná-nsi nùù-yá.

⁸ Doco nù ñà-ndácuisi nduú palabra chináhá-nsi, dandu mà cúí cadì nèhivì nùá, cuisíá cui quidañuhu-nèá, te dacuítìà-nèá.

⁹ Te nsiùhù, mate nduú-nsí nahi nèhivì còo ni-íñàha-xi, doco cudí ini-nsi sàhámá; cuisíá cuní-nsi ñà-cucumi-nsiá iin fe fuerte. Te iin-ni icúmí-nsí càcàn tàhvi gá-nsi nùù-yá sàhà-nsiá ndè cachi sàà-nsia nduhii dahuun ini-nsia.

¹⁰ Cunaha-nsiá, cuàhìn dasái carta yohó nùù-nsiá na tañáha ga sài nàcòti-nsiá, còtò sài, te icúmí dandacú ndeí nùù-nsiá. Vachi ñà-ndáà nduá, íá derechu xi sàni nihí nùù Stoho-ndá Señor, doco cuisì sàhà ñà-nacuàhandee ini mii-nsiá nduájàn, màdì sàhà-ñá quida quini xi-nsiá.

¹¹ Vichi, ni yáha vaha nsidaa-nsiá, ñáni. Quida-nsia lucha quida vii-nsiá nicanicuahàn. Te màsà cùhúún ini-nsia. Iin-ni ni cúníhnú stná ini nsidaa-nsiá, te cundoo maní-nsiá, dandu icúmí Dios cutnahá ndisa-ya xi-nsiá. (Ansivéhé-yá), cuú ini-yá sàhà-ndá, te danácòo dadí ndiaha-yá ini-ndá.

¹² Nacasàhú stnahá víí-nsiá ñà-xínduu-nsia nèhivì ù xí-yá.

¹³ Te nsidaa stná nèhivì xí-yá ndoó yohó, cásàhú stná-nè xì-nsiá.

¹⁴ Vichi nì cùcúmí-nsiá cuàhà gracia xi Stoho-ndá Jesucristu. Te ni sàà stná-nsiá cundaà ini-nsia ñà-cuàhà guá cuú ini Yua-nda Dios sàhà-ndá. Te nicanicuahàn ni cùtnáhá stná Espíritu ù xí-yá xi nsidaa-nsiá. Amén.

Tutu Nì Tiaa San Pablo nùu Nèhivì xí Dios Ndoó Ladu Galacia

¹ Yùhù nduí Pablo, iin ana nì nihì chuun ì nùu Jesucristu xì nùu ana nì dànátíacú xì-yá, divi Yua-nda Dios. Màdi nùu nèhivì nì níhí chuun ma. Còò, màdi nèhivì úun nduú ana nì sàha xì-ñà.

² Yùhù xì nsidaa nèhivì xì-yá cutnàhá xì yohó, cásahú-nsi xì nsidaa mii-nsiá nècuàchi ladu Galacia natácá cahvi xi-yá.

³ Nì cùcúmi cuàhà-nsiá gracia nùu Yua-nda Dios xì stná Stoho-ndà Jesucristu. Te nì cùndóò cueé-nsiá quida-ya.

⁴ Pues divi Jesucristu nduú ana nì sàha nì xihì sàhà cuàchi-nda sàhà-ñá càcu-nda nùu nsidaa ñà-có-íá vù ìá ñuhivì yohó, vàchi ñà-jaàn nduá nì chitnùnì ini Yua-nda Dios coo,

⁵ ansivéhé cahnú-yá nicanicuahàn. Amén.

Còò cá inga palabra ì cunchicùn-ndà, te càcu-nda, cuisì-ní palabra ì xí Jesús

⁶ Cunaha-nsiá, cuàhà gá ndulóquf ñà-yàchi guá sàni nacoo-nsia ichì vù mii-yá ana nì cana xi-nda sàhà gracia xi-ya. Vàchi inga palabra sànhicùn-nsia vichi. Vàha palabra mà cahan-nsiá,

⁷ doco còò, mà sàà ndudava xi ñà-nduú palabra vàha ndisa xi mii-yá. (Cunaha-nsiá, nàhà xicà) jaàn ndoó dava nèhivì cunì dacà xi-nsiá, cunì-nè dama-ne ñà-nduú razón ndiaha xí Cristu.

⁸ Doco nú có-ndùdávà palabra xi-ne mà xi palabra nì cachitnùhu nsiuhù xì-nsiá daa, dandu nì sàà nècuàchimà ndañuhu-né ndè andea chicá vàha, mate ángel nì quixi ansivi nduú-né; te ò stná nsiuhù, nú có-ndùdávà gá palabra cachí-nsi vichi xi ñà-primeru, dandu nì sàà stná-nsi ndañuhu-nsí chicá vàha.

⁹ Tucutu cachí xì-nsiá nacua sàni cachì xì-nsiá antes, ndéni nèhivì ní cui nì cáhàn xì-nsiá iin palabra tucu iá, te có-nduá palabra nì xinindisá-nsiá daa, pues nì sàà-nè ndañuhu-né andea chicá vàha.

¹⁰ Ducán cachí, doco màdi sàhà-ñá cuní ndòò vàhi xì nèhivì ñuhivì nduá. Còò. Dios nduú ana cuní cudìi ini-xì sàhí, vàchi nú nèhivì-ní, dandísá mà cùí cunduu guè iin nècuàchi xinúcuáchí nùu Cristu.

Nansa nì nihì Pablo chuun ì nùu Jesucristu

¹¹ Cunaha-nsiá, màdi nèhivì úun nì náchuhùn tnahá xi palabra ndiaha nì cachitnùhi (xì-nsiá), ñáni.

¹² Màdi nèhivì ñuhivì yohó nì nácánì xí palabra mà xì. Cónì dàcuàhíá nùu nèhivì úun. Còò, divi Jesucristu nduú ana nì dàtnúú xì sàxinítnùnì sàhà mà.

¹³ Mii-nsiá, sà-ináhà-nsiá nansa nisa quide antes na ní sanchicùn religión xi nècuàchi raza-nsi Judea, yáha ga nisa quida quini xì nèhivì natácá cahvi xi Dios, vàchi nisa cunì dandáñuhí nsidaa nècuàchimà nì cùí.

¹⁴ Te yàchi nì quee stná cuàhà fama xi nùu nèhivì religión xi-nsi, te menos nì ndòò nsidaa nècuàchi dava ga nùí, vàchi chicá ndee nì sanchicùn estilu xi xii-nsí.

¹⁵ Doco Dios, sàhà ñà-sàni nacàxin-ya yùhù ndè na táñàha ga túnui ñuhivì, ñàyúcànduá nì quida-ya gracia sàhí, te nì cana-ya yùhù, vàchi ducán nì chitnùnì ini-yá

¹⁶⁻¹⁷ ñà-cuninùí Dèhemani-yá, dandu después (cùhin cacanu) cachitnùhi xì nèhivì nsidaa ñuu (ñà-ndiaha guá) Dèhemani-yá. Daaní, na ní nsihì nì xini mii-yá, dandu yàchi nì sàhìn ladu Arabia. Cónì sàhìn ndatnùhì xì nèhivì ñuhivì yohó, nì cónì sàhàn stnáí ñuu Jerusalén ndè ndoó nècuàchi apóstol mate dihna-ne nì nihì-né chuun ì xì-yá, dandu yùhù. Còò, dihna ladu Arabia nì sàhìn, dandu nì ndixi tui ñuu Damasco.

¹⁸ Daaní, nì yàha unì cuà, dandísá nì sàhìn ñuu Jerusalén, te nì xinitnàhì xì Pedro. Te yucán nì ìe sàhùn quivì nì sacutnahí xì nècuàchimà.

¹⁹ Doco nècuàchi xinduu apóstol dava ga, còò, cónì xini-nè, cuisì-ní ñani Stoho-ndà Señor nani Jacobo nì xini.

²⁰ Te cunaha-nsiá, nsidaa ñà-nduá tiaí nùu-nsiá yohó, ñà-ndàcuisì nduá, vàchi ináhà Dios.

²¹ Daaní, después, màndixi nì nsiaa tui ladu Siria, te después nì nsiaa stnáí ladu Cilicia.

²² Doco nèhivì cahvi xi Cristu ndoó ladu Judea, cónì sàà-nè cunitnàhà-né xí,

²³ cuisì-ní nì xinitnùhu-ne ñà-có-quidá quini guè xì-né. Antes nisa cunì dandáñuhí nècuàchimà sàhà-ñá xinindisá-né mii-yá, doco vichi xicánúú stnáí cachitnùhi xì nèhivì nansa cunindisá stná-nèyà. Pues divi palabra jaàn nduá nì xinitnùhu nècuàchimà sàhí,

²⁴ te cuàhà gá nì naquimani-né Dios sàhà mà.

2

Ñà-nduá ni cacachi dava ga nècuàchi apóstol na ní nataca-nè xì Pablo ñuu Jerusalén, te ni ndatnuhu-né

¹ Daaní, ni yàha ùxìn cùmi cuà, dandu ni sàhàn tui ñuu Jerusalén, cutnáh stnái xì Bernabé, te ndacá stnái Tito.

² Vàchi ni dàtnúú Dios ini anímè ñà-icúmí cùhìn, ñàyùcànduá ni sàhìn ñuu mà. Te na ní sài yucán, dandu ni nataca cuaán-nsí, yùhù xì nèhivi idónuu, te ni ndatnuhí xì-né ni dàtúú nùù-né nansa ndisa iá palabra ìi cacitnúhi xì nèhivi inga ñuu. Ducán ni quide sàhà màsà ndóo uun nsidaa chuun cuàhìn quide, ni màsà ndóo uun stná nsidaa ñà-nduá sàni quide antes.

³ Doco còo, cóni cächì-nè (iá ñà-quidámànì gá). Ni cóni cächì stná-nè icúmí màcùtuu stná seña xì Dios icà compañerui Tito, mate nècuàchi inga raza nduú-né.

⁴ Ñà-ndàà nduá, yucán ni sandoo stná dava nèhivi (cachí ñà-fuerza màcùtuu seña mà), doco nèhivi ni tnatuu dhèhé uun ndé nataca-nsi ni sanduu-ne, có-nduú ndisa-ne nèhivi xì Yua-nda Dios, vachi màña uun ni quida-ne, cuisì-ní cuní-nè cuitnúhu-ne nansa quida-nda ñà-có-nhìcùn gá-ndà ley xi mii-né sàhà-ñá libre ndoo-nda ni quida Jesucristu. Doco vichi cuní-nè natenhicùn tu-nda ley xi-ne.

⁵ Doco nsiùhù, còo, ni-iyuhu cóni cándísá-nsí palabra xi-ne, vachi cuní-nsí ñà-iin-ni cucumi ìi-nsiá palabra ndàcuisì xì-yá nacua cachí razón ndiaha xì-yá.

⁶ (Nacua sàni cachi), yucán ni ndatnuhí xì nècuàchi cachí chícá idónuu. Doco nùù yùhù, có-quidámà a xínduu-ne nècuàchi iá fama xi, ò á coó, vachi iin-ni indèhé Dios nsidanicuu-nda. Pues, cunaha-nsiá, cóni dándacù nècuàchimà nùù ñà-dami ñà-nduá quide.

⁷ Còo, vachi ni cundaà ini-nè ñà-yùhù quidá tocar cacanuì mahì nèhivi cuàhà raza (cacitnúhi palabra ìi); doco Pedro, còo, cuisì nèhivi raza-nsi Judea cacitnúhu xì-né palabra mà.

⁸ Te mate ducán nduá, doco imindaa mii-yá nduú ana chindéé xì ndúú-nsi. Mahì nèhivi raza Judea xicánúú Pedro quidá-né chuun ìi xì-yá, te yùhù, mahì nèhivi inga raza xicánúú, doco iin-ni chindéé-yá ndúú-nsi.

⁹ Ñàyùcànduá, ni sàà nècuàchi idónuu ma ni cundaà ini-nè nansa iá chuun ìi sàni ñihitáhví. Te sàhámà ni tniì ndahà tnhàh-né xì, xì stná Bernabé. Cunaha-nsiá, Jacobo xì Pedro xì Juan ni sanduu nècuàchi idónuu ma, te ni cachi-nè xì-nsí ñà-iin-ni chuun nduá quidá nsidaa-nsí, cuisìá nùù nèhivi inga raza ni cùhùn nsiùhù, te mii-né, nèhivi raza Judea càhàn xì-né, ni cachi-nè.

¹⁰ Cuisì-ní (inga palabra gá) ni cachi stná-nè xì-nsí, divi ñà-màsà nándodó-nsí chindee-nsí nèhivi ndahví (ndoó ladu xi-ne). Ñàyùcànduá, yùhù siempre ñà-jaàn nduá nacánì inì quide.

Nansa ni cachi Pablo xì Pedro na ní ia-ne ñuu Antioquia, ni sàha-ne nècuàchimà iin conseju

¹¹ Doco después, na ní quesaa Pedro ñuu Antioquia, dandu ni càhìn xì-né, ni indehé vahi nùù-né, te ni chinahí-né, vachi cóni quidá víi-né yucán.

¹² Vachi na táñaha ga quesaa nècuàchi ñuu-nsi vaxì cuenta xì Jacobo, dandu ni saxixi tàcá-né xì nsidaa nècuàchi inga raza yucán. Doco na sàni caquesaa nècuàchi inga mà, dandu ni naxicocuñin ini-nè, cóni xixì gá-né xì nècuàchi inga raza mà, vachi yúhì-nè cuitnúhu nècuàchi raza-nsi Judea.

¹³ Dandu después, nsidaa gá stná nècuàchi raza-nsi ndoo yucán, cóni quidá víi stná-né, (vachi ni quecuáan stná-né), mate ináhá-né nansa ndiá icà-né quida-ne; ndè stná Bernabé ni quida stná-né ducán.

¹⁴ Doco yùhù, na ní xini có-xíquida víi-né nacua cachí palabra ndàcuisì xì razón ndiaha, dandu ni cachi xì Pedro, te iníni nsidaa nèhivi yucán; ni cachi: “Mii-ní, iin nècuàchi raza-nda Judea nduú stná-ní, doco vichi (sàquidà-ní nahi nèhivi inga ñuu), có-chívaha gá-ní estilu xì raza-ndà, vachi vichi sàquidà-ndà na quidá nèhivi inga raza. Ñàyùcànduá, ¿ìndù chuun sàni quida stná-ní na ian cuní-ní ñà-fuerza chivàha stná nècuàchi inga raza mà estilu xì raza-ndà?” (ni cachi xì-né).

Nansa icúmí nècuàchi raza Judea quida-ne sàhà-ñá càcu-ne, divi icúmí stná-nè cunindisá-né mii-yá

¹⁵ Nsiùhù nècuàchi raza Judea, có-nduú-nsí nècuàchi cuàchi nahi nècuàchi inga raza (cahan-nsí).

¹⁶ Doco ináhá vaha-nsi còo ni-iin ndee vaha nùù Dios sàhà-ñá chivàha uun-ne ley sàhana. Còo, cuisì-ní nù ni cúníhnú vaha ini-ndà mii Jesucristu, dandísá càcu-nda, ináhá-ndà. Ñàyùcànduá, divi ñà-jaàn nduá quidá-nsi, vachi ináhá-nsí cuisì ñà-cunihnu vaha ini-ndà mii-yá ndiaá, te ducán ndee vaha-nda nùù-yá, màdiá chivàha-nda ley sàhana ma, vachi sàhà ley mà, mà sàà ni-iin nèhivi ndee vaha-ne nùù-yá.

¹⁷ Doco nú micúisi sàhà Cristu cuní nsiùhù nècuàchi raza Judea ndee vaha-nsi nùu (Yua-nda) Dios, dandu ñà-yúcán queá ñà-ndùu stná-nsi nèhivi cuáchi (nahi nèhivi dava ga). Doco te nú ducán nèhivi cuáchi nduú stná-nsi, dandu ¿a sàhà ñà-nchícùn-nsi Cristu nduájàn? Còò, ni loho có-ndúá ducán.

¹⁸ Doco nú iladú sàni nacoo canúú-ndá iñàha (nahi ley sàhana ma), te tucutu cuní-ndà natenchícùn-ndáñá, dandísá nsidá cuáchi-nda, doco cuiúsi mii-nda quidá xi mii-nda ducán.

¹⁹ Yùhù, sàhà-ñá (fuerte guá castigo) xi ley mà, ni sài ni quide cuenta na ian sàni xihì ni quidamà; doco vichi sàni natiacu stnáì, te sà-itiácúì nùu Dios.

²⁰ Vàchi quidé cuenta na ian ni cutnahí xi Dèhemani-yá Cristu na ní sàcùtuu-ya nchìca cruz. Doco vichì, sà-itiácúì, vàchi inì animè itiácú mii-yá, màdi ndisa yùhù. Mate ñuhiví yohó ié, te iá iquicúñuì, doco cuiúsi sàhà ñà-nihnú vaha inì mii-yá, ñàyücàndúá itiácúì vichì. Cahví xi-yá, vàchi cuú iní-yá sàhì, te ni sàha-ya ni xihì-yá sàhì.

²¹ Ñàyücàndúá, yùhù cachí, mà vaha nacoo-nda gracia xi Dios iladu; (doco divi ducán quea) nú sàhà ley sàhana ma sàni ndee vaha-nda nùu-yá ni cùì, vàchi nú ducán, dandu uun-ni nduá ni xihì Cristu.

3

Cuiúsi sàhà fe xi-nda cui ndee vaha-nda nùu Dios, màdi sàhà-ñá chivàha-nda ley sàhana

¹ ¡Nahví mii-nsiá nècuàchi Galacia! vàchi có-nihnú ví gá inì-nsia vichì. ¿Índú chuun ni sàha-nsia ni dàndàhvi nèhivi mii-nsiá, te vichì có-nchícùn gá-nsiá palabra ndàcuisi xí-yá, mate claru sàni cachitnùhi xi-nsiá sàhà Jesucristu, nansa ni xihì-yá nchìca cruz?

² Pues vichì cuní cachi-nsiá xí: ¿ndá nduá ni quida-nsia, te ni nihì-nsiá Espíritu Ìì xí Dios? ¿A ní chivàha-nsia iin ley sàhana? (Còò), cuiúsi ñà-ni inini-nsia palabra Ìì, te ni xinindisá-nsiá, ñàyücàndúá ni nihì-nsiá Espíritu Ìì.

³ Ñàyücàndúá, ¿índú chuun có-sàà-nsiá cundaà inì-nsia? (Sà-ìnhá-nsiá) ñà-divi Espíritu Ìì nduú ana ni chindee xi-nsiá na ní quesaha-nsiá xicá-nsiá ichi Dios. Te vichì ¿a tuxí inì-nsia ñà-micúisi-nsiá cuàhàn-nsiá daxínu-nsia (salvación xi-nsia)?

⁴ Cuàhà gá sàni ndoho-nsia (sàhà Jesús), te ¿a icúmi ndòo uun stná nsidaamà? Cahnú gá Dios ñà-màsà ndòo uan.

⁵ Daaní, jaàn iá stná iin ana dànihítàhvi xi-nsiá ñà-chindee Espíritu Ìì mii-nsiá, te quidá stná-ndè mílagru ndiaha. Doco ¿a sàhà ñà-nchícùn-nè ley sàhana nduá quidá-nèamà? Còò, cuiúsi sàhà ñà-xinindisá-né mii-yá.

⁶ Pues, divi ñà-jaàn nduá ni quida stná Abraham sàhana, ni xinindisá-né Dios, te ñà-yúcán ni ndee vaha-ne nùu-yá.

⁷ Sàhà ñà-jaàn vátùni cundaà ini-ndà sàhà nsidaa nècuàchi sà-icúmi xí fe ñà-nahi descendencia xi Abraham xínduu stná-nè.

⁸ Vàchi nùu tutu Ìì ni tiaa sàhana ni cachitnùhu Dios nansa icúmi nèhivi vichì ndee vaha-ne nùu-yá sàhà cuiúsi-ñá xinindisá-né mii-yá, mate nèhivi ndéni raza ni cui ni cundúú-né. Ñàyücàndúá, ni cachitnùhu-ya xi Abraham iin ñà-vàha, cachí-yá: “Sàhà mii-ni icúmi nèhivi nsidaa ñuu nihítàhvi-né cuàhà gá ñà-ndiaha Ìì”.

⁹ Ñàyücàndúá, vátùni cundaà ini-ndà, nú xinindisá stná-ndáyá, dandu cundiatú stná anima-ndà na ian ni cundiatú Abraham sàhana na ní xinindisá-né mii-yá.

¹⁰ Doco nú cuiúsi cuní-ndà cundoo-nda sujetu nùu ley sàhana, dandu iin-ni icúmi stná-ndà nihì-ndà castigo cachí ley mà, vàchi dohó cachá: “Nèhivi có-quidá ndisa nsidaa ñà-ndúá cachí tutu yohó, tàhvi chíhán-né”, cachá.

¹¹ Sàhámà nàhà claru, mà sàà iin nèhivi ndee vaha-ne nùu Dios sàhà-ñá nchícùn-nè ley mà, vàchi cachí stná tutu Ìì mà: “Nèhivi xinindisá-xí-yá, te ndee vaha-ne nùu-yá, divi cucumi xi vida ndiaha”.

¹² Doco ley sàhana ma, màdi fe nduá xicàn cucumi-nda. Còò, vàchi cachá: “Cuiúsi nú ni quidá ndisa-nda cumplir nsidaa ñà-ndúá cachá, dandu nihì-ndà cutiacu ndiaha-nda”.

¹³ Doco ndohó, sàni xidahan Cristu-ndó nùu chihan cachí ley mà, vàchi mii-yá, cuenta xi-nda ni ndoho-ya castigo sàhà chihan ma nacua cachí nùu tutu Ìì: “Tàhvi chíhán nsidaa ana itácaá nùu iin yutnù”, (cachí Dios).

¹⁴ Pues divi ducán ni cuu xi Jesucristu sàhà-ñá vátùni nihítàhvi stná nèhivi nsidanicuú ñuu ñà-ndiaha Ìì ni cachí Dios xi Abraham. Ñàyücàndúá, vichì cuiúsi xiñuhu cunindisa-ndáyá, dandu nihítàhvi-ndà Espíritu Ìì ni quida-ya comprometer antes.

Tucu iá ley sàhana, có-ndúává xí ñà-ndiaha Ìì ni cachí Dios xi Abraham chicá antes

¹⁵ Vichì cuàhìn nacani xi-nsiá iin ejemplu tii, ñàni; cuàhìn nacani xi-nsiá nansa quidá nsidaa-nda ñuhiví yohó. Ináhá-ndá nú sàni cuyucun iin tutu ndé ni ndatnuhu sahnú-nda

ñà-quida-nda iñàha, te sàni cua firmar, dandu iin-ni sàni ndòa, mà dáma, ni mà chíyòdo gá-nda palabra núá. Te ducán quida-nda mate tutu xi nêhivi ùun nduá.

¹⁶ (Pues divi ducán sàni quida stná Dios), ni saquin-yà compromisu nùu Abraham ñà-nihitáhvi-né ñà-ndiaha fi xi-yá, mii-né xi ana cunduu descendencia xi-ne. Doco (na ní cachi-yá xi-né ducán), cóni cachi-yá icúmí nsidaa gá inga descendencia xi-ne nihitáhvi-né, na ian cuàhà-né (càhàn-yà sàhà-xi) ni cúí. Còó, sàhà imindaa descendencia xi-ne ni càhàn-yà sàhà-xi, divi nduú Cristu.

¹⁷ Ñâyùcàndùá, yùhù cachí, nú ducán fuerte guá ni saquin Dios compromisu xi Abraham, te ùi xichi ni cachi-yá xi-né palabra mà, dandu mà cúí dáma-ña quida iin ley ni cuyucun 430 cuà despues; cóo, mà cúí ndòo uun ñà-nduá ni cachi-yá mate ní sàcòo inga ley mà.

¹⁸ Vâchi nú sàhà ley mà nihitáhvi-nda ni cúí, dandu mà cundúá iin compromisu icúmí-yâ quida ndisa-ya cumplir. Còó. Doco ñà-ndiaha fi ni cachi-yá xi Abraham mà, ñà-yúcán ndisa nduú compromisu.

¹⁹ Pues (sàhàmà ndacàtnùhù-nda), ¿índù chuun quidá ley sànahama vichi? Pues cui si sàhà ñà-cundaà ini nêhivi índù-ñá nduú cuàchi, ñâyùcàndùá ni sàha-yanè ley mà, dandu cucumí-néa ðeucèndè quesaa mii-yá ana nduú ndisa descendencia xi Abraham, vâchi divi mii-yá nduú ana cuàhàn nihitáhvi xi ñà-ndiaha fi ni cachi Dios daa. Cunaha-nsiá, tixi iin àngel mozo xi-ya ni sàha-ya ley mà, te Moisés nduú ana ni sàcuin dava cuenta xi nêhivi nùu Dios.

²⁰ Doco nú cachí-nda ni sàcuin dava Moisés, pues cuní cachàmà ndoó ùi ana (ndatnúhù), màdiá imindaa (ana càhàn). Doco (na ní saquin Dios compromisu xi Abraham), cóo, cui si-ní imindaa mii-yá (ni càhàn, te sàhàmà mà cúí ndòo uan).

Chuun quidá ley sànahama nduá chindéandò sà-nda cunindisa-nda Jesucristu

²¹ (Pues, ¿nansa cachi-nda vichi?) ¿A sadí ley sànahama ma nùu compromisu ni cachi Dios quida-ya? ¿Còó, mà cúí! Vâchi ni có-sàà ley mà taxa vida ndiaha. Doco nú vâtùni quida ducán ni cúí, dandísá divi sàhàjàn vâtùni ndee vâha-nda nùu-yá.

²² Doco cóo, màdi ñà-jaàn nduú chuun quidá ley mà, cui si nduá iin ñà-càchítmùhu uun xi-nda ñà-ndòó nsidaa-nda tixi poder xi cuàchi-nda. Te ducán iá sàhà-ñá ni sàà-nda cunindisa-nda Jesucristu, te nihí-nda ñà-ndiaha fi ni cachi Dios antes.

²³ Doco na tãñâha ga sàà tiempu ñà-cuisi cunindisa-ndayá, dandu ley sànahama ma nduá ni sanchicùn-nda, cóo inga iñàha, vâchi ducán ni chitnùni ini Dios quida-nda, divi ñà-cundiatu uun-nda ndè cachi sàà quivì datú-ya nansa cui cunindisa-nda (Jesús).

²⁴ Vâchi ley sànahama ma, na ian quidá nècuàchi ndiaá xi ñà-cuati, ducán ni saquida, cui si nisa chindeándò ndè cachi ni sàà tiempu ni quesaa Cristu, dandu cunindisa-nda mii-yá, te ducán ndee vâha-nda nùu-yá.

²⁵ Te vichi cui si-ní fe mà nduá nhicùn-nda, ñâyùcàndùá có-xiñùhù gá cunindisa-nda ley sànahama ma na ian nduá ana ndiaá xi-nda vichi.

²⁶ Còó, vâchi sàhà-ñá xiníndísá-nda Jesucristu, ñâyùcàndùá, nahi dèhe sahnú-yá sàndúu nsidaa-nda.

²⁷ Vâchi, na ní cuhii-nda quivì ni tenchicùn-nda Cristu, dandu na ian ni dàma anima-nda nduá, te ni nàcùnihnu ini-nda nahi mii-yá.

²⁸ Sàhàmà mà cúí cachi gá-nda diín nduú nècuàchi raza Judea, te diín nduú nècuàchi raza Grecia; cóo. Stná nècuàchi nduú patrón, xi stná nècuàchi quidáchúun saín nùu-né, na ian iin-ni sàni nanduu nsidaa-né vichi. Ni màdi (chicá ndiaá) stná nècuàchi tiàa nùu nècuàchi ñàhà; cóo. Iin-ni xínduu nsidaa-nda ñà-nhicùn-nda Jesucristu.

²⁹ Te nú nêhivi xí Cristu nduu-nda, dandu vâtùni quida stná-nda cuenta ñà-nduú stná-nda descendencia xi Abraham, te ducán vâtùni nihitáhvi stná-nda ñà-ndiaha fi ni cachi Dios daa.

4

¹ Vichi chicá claru cuàhàn cachi xi-nsiá ñà-nduá cuní cachi nsidaa palabra jaàn. Ni cachí-nda iá iin tètii icúmí ndutahvi xi ñà-cuicà nùu yua-té. Doco nú tii vá-te, dandu queámà na ian peón uun nduú-te, mate stoho nsidanicuú ñà-cuicà mà icúmí-tè cunduu-tè. Doco tii vá-te,

² ñâyùcàndùá, iá-te ndahà ana ndiaá xi-té, te ndoó stná ana ndiaá xi ñà-cuicà témà ndè cachi sàà-te cuà-te ni cachi yua-té.

³ Pues divi ducán nisa iá stná xi ndohó na tãñâha ga sàà-nda cundaà vâha ini-nda; nahi ñà-cuati ni sanduu stná-nda; iin ichi chicá sencillu xi ñuhivì yohó-ní nduá ni sanchicùn-nda, te cui si ñà-nduá cachàmà nisa quida-nda.

⁴ Doco na ní sàà meru tiempu vaha, dandu ni techuún Dios Dèhemani-yá quixi-ya ñuhiví yohó ñà-tùmuù-yá nùù dihi-yá. Te (na nisa ia-ya yohó) nisa ia stná-yà sujetu nùù ley sahnú-ma.

⁵ Doco ñà-disàhá-xí ni quixi-ya nduú ñà-danàa-yá sàhà nsidaa nèhiví ndoó stná sujetu nùù ley mà, dandu càcu-ne. Ñàyùcàndüá, (sàhà-ñà-ni quida-ya ducán), vátùni ni sàcùnduu-nda dèhe ndisa Yuamáni-yá.

⁶ Te Yuamáni-yá, sàhà stná-mà sàni sàhatahvi stná-yàndó Espíritu xi Dèhemani-yá ñà-coo Yà-ì mà ini anima-ndà; te vichi cachí fuerte-yàmà “Yuamáni” (ini anima-ndà, cáhàn-yà cuenta xi-nda nùù Yua-nda Dios).

⁷ Ñàyùcàndüá có-ndüú gá-ndà cuisì nahi peón xi-ya; cóó. Dèhe ndisa-ya sàndüù-ndà, te nù ducán, dandu cuàhà gá icúmi-ndà nihitáhvi-ndà nùu-yá sàhà ñà-nchícùn-ndà Cristu.

Ñà-ndüá ni cachi gá Pablo, nduló-cò-nè sàhà-ñà ni tùcù nècuàchì Galacia inga ichi

⁸ Antes, na táñaha ga cunaha-nsiá Dios, dandu stoho-nsiá ni sanduu ñà-có-ndüú ndisa Dios, te ndee ní sacusahnúá nùù-nsiá.

⁹ Doco vichi, sà-ináhá-nsiá mii-yá, te ò chicá vaha ni cachí-ndà sà-ináhá-yá mii-nsiá. Ñàyùcàndüá, ¿indü chuun cuní tu-nsia nàcùndoo-nsia tixi iin ley mà cúí chindee xi-nsiá? Vàchi ley mà, cóò ni-iñaha nihì-nsiá.

¹⁰ Doco vichi cuàhà estilu chívaha-nsia; cuàhà quivì chívaha-nsia, xi cuàhà stná vicò, te nsidácáhnü stná-nsiá na natiácú yoo. Dècuèndè stná cuià nsidácáhnü-nsiá.

¹¹ Ñàyùcàndüá, cuàhà gá nacáni inì sàhà-nsiá, màdì ndòo uun nsidaa ñà-ndüá sàni dàcuàhì mii-nsiá.

¹² Yùhù sacùndáhvi nùù-nsiá ñà-iin-ni ni nácùnhnú inì-nsia nacua nihnú ini yùhù, ñàni; vachi (na ní sàì yucán) ndè modo xi mii-nsiá ni nadàma stnáì.

Mii-nsia, cóò ni-iñaha ni quidá-nsiá xi yùhù.

¹³ A nsinúú inì-nsia ñà-sàhà iin cuèhè (ni ndòì ndé ndoó-nsiá), dandu ni càhìn xi-nsiá razón ndiaha xí mii-yá.

¹⁴ Te mii-nsiá, cóni càhìchi inì-nsia yùhù, mate cuàhà vida ni xinì sàhà cuèhè mà, doco cóni nácóó-nsiá yùhù. Cóó; ni naquimani-nsiá yùhù na ian ángel xi Dios nduú, ò nahi mismo Jesucristu.

¹⁵ Pues vichi, ¿ndiá nduá ni cuu? Vachi yáha ga ni sacudii inì-nsia antes ni cui. Yùhù ináhì, dispuestu ni sandoo-nsia dècuèndè cuàhà stná-nsiá yùhù nduchínüù-nsiá nù ni cáquiàn ni cui.

¹⁶ Dòcò vichi, ¿a sání nacuni ùhì-nsiá yùhù ñà-ni cachi xi-nsiá cuisì ñà-ndüú ñà-ndàa?

¹⁷ Nècuàchì sàni dandáhvi xi-nsiá, màni gá cáhàn-nè xi-nsiá, doco có-íá vaha, vachi cuisì cuní-nè danándodó-né mii-nsiá nsihùhù, te cunchicùn-nsiá mii-né.

¹⁸ Pues vátùni iá ñà-cáhàn màni-ndà xi nèhivì, cuisì-ní iin chuun vaha ni cùndüá, dandu ñà-jaàn ndisa cudii inì, mate có-ìé' xi-nsiá jaàn.

¹⁹ Vachi cunaha-nsiá, nahi dèhi xinduu-nsiá; doco vichi cuàhà gá dandohì mii sàhà-nsiá inga xichi, te iin-ni icúmi ndohi ndè cachi sàà-nsiá (nàcùnhnu vaha tu inì-nsia) nahi Cristu. Vachi na ian ndohó dihi-nda na quesáa-ndà ñuhivì, ducán ndohó stnáì sàhà mii-nsiá.

²⁰ A sácú vaha ni cói ndé ndoó-nsiá vichi. Te a sácú vaha stná ñà-màsà cáhàn ndee gué' xi-nsiá ni cui. De plano, có-cùndàà ini nansa ga quide xi-nsiá.

Ejemplu sàhà ùi nècuàchì ñahà sàhana nani Agar xi Sara

²¹ Vichi cuàhìn cachi inga iin palabra xi mii-nsiá nècuàchì cuní cunchicùn xi ley sàhana. Cuní ñà-nsinuu ini-nsiá nansa cachí mismo ley mà ndé

²² nacáníá nansa ni quida Abraham sàhana. Ùi dèhe-ne ni tùmuù-xí ñuhivì, cachá, te dihi dèhe sahnú-né ni sanduu (Agar). Nècuàchì-mà, iin nècuàchì có-íá libre ni sanduu-ne, vachi ducání quidáchúùn saín-né. Doco dihi inga dèhe Abraham mà (nani Isaac, cóó; meru ñahàdihì-nè) ni sanduu nècuàchì-mà, te iin nècuàchì libre ni sanduu-ne.

²³ Te iá inga iñaha sàhà dèhe criada mà, vachi na ian quesáa nsidanicuú gá mée ñuhivì, ducán ni quesaa-te. Doco dèhe nècuàchì libre mà, cóó. Milagru ni sandua ni tùmuù-vé ñuhivì, te ducán ni cuu ndisa palabra ni cachí Dios xi Abraham antes.

²⁴ Te cunaha-nsiá, ejemplu nduú stná nsidaájàn, vachi nahi ùi ley xinduu stná nècuàchì ñahà mà. Agar yucán nduú ley ni nihì nèhivì ndé yucú Sinaí, te nèhivì nchícùn xi ley mà vichi, có-ndoó-né libre.

²⁵ Ladu Arabia iá yucú mà, te ley ni nihì nèhivì lugar yucán nduú nahi Agar mà. Te (ináhà-ndá) có-ndoó nèhivì nchícùn xi ley mà libre vichi, vachi ñuu-nè Jerusalén, có-ndüá iin ñuu iá libre vichi.

²⁶ Doco ñuu ndohó Jerusalén iá ansivi, nahi dihi-nda nduá, te libre ndisa iá.

²⁷ Vachi dohó cachí tutu ì:

Nècuàchì ñàhà còò déhe-xi, ni cúdii ini-nè mate ni-iin dèhe-ne còò. Te xiñuhu ndàhì vico stná-nè, te cudii ini-nè mate táñàha ga tùinuù ni-iin mée xi-ne, vèchi (cuàhà gá cundiátú-nè). Mate còò gá nècuàchì vehe-ne, vátùni cudii ini-nè (na ian) ndoó cuàhà dèhe-ne.

²⁸ Pues cunaha-nsiá, nahi (dèhe Abraham nani) Isaac mà (xínduu nsidaa-nda), ñáni, vèchi dèhe ndisa mii-yá sàni nanduu-nda sàhà palabra ndiaha ni cachi-yà, na ian ni cuu xi stná Isaac mà.

²⁹ Doco ñani Isaac ni tùinuù-xí nahi nsidaa gá nèhivi ñuhiví, quini ni quida-tè xi ñani tii-té, divi tètii ni tùinuù ñuhiví ni quida Espiritu Ìi. Te iin-ni dècuèndè vichi ducán quidá stná nèhivi có-nchícùn xi Espiritu Ìi, quini quidá stná-nè (xi-nda).

³⁰ Doco ¿índù gá ñà-cáchí tutu ìi? Dohó cachá: “Tavà dahuun-ní criada mà xi dèhe-ne vehe-ní, vèchi mà ndútáhvì dèhe-ne nùù-ní, cuisì-ní dèhe nècuàchì libre ñhítáhvì”, ducán cachá.

³¹ Ñàyücàndüá, (sàhà ejemplu mà sàni cundaà ini-nda), divi nahi dèhe nècuàchì libre mà xínduu-nda, ñáni, màdi nahi dèhe nècuàchì có-íá libre.

5

Iin-ni ni cúndóó-ndá libre nùù ley sàhana

¹ Vichi sàni tavà Cristu ndohó libre nùù ley sàhana, te sàhájàn cuní-yà cundoo dahuun-nda libre nicanicuahàn. Ñàyücàndüá, iin-ni ni cúnáhá-nsiá ñà-jaàn, te màsà túcù-nsiá cunchícùn-nsiá ley sàhana ma, vèchi sadiámà nùù-nda na iin yugu (xi buey).

² Cunini vaha-nsia; yùhù Pablo cáhìn xi-nsiá: mà cúí chindéé Cristu mii-nsiá te nú fuerza ni cacán-nsiá màcùtuu seña xi Dios icà-nsiá (nacua cachí ley sàhana).

³ Yùhù cachí xi nsidaa mii-nsiá nècuàchì cuní màcùtuu seña mà icà-xí, nú ducán ni cuu-xi-nsiá, dandu fuerza quida stná-nsiá cumplir nsidaa gá ñà-ndüá cachí ley mà.

⁴ Vèchi nú cuní-nsiá ndee vaha-nsia nùù-yá sàhà ley mà, dandu còò ni-íñàha nduú gá Cristu nùù-nsiá. Vèchi ñà-sàni nacuaà-nsiá gracia xi-ya ndüá.

⁵ Doco cunaha-nsiá, cuisì ñà-cunindisa-nda mii-yá ndüá xiñuhu, te ducán chindéé stná Espiritu Ìi xi-yá ndohó quida-nda, vèchi sàhà cuisì ñà-jaàn ndüá nihnú ini-nda ndee vaha-nda nùù-yá.

⁶ Vèchi nùù ndohó nèhivi xí Jesucristu, có-quidámà a itúú seña mà icà-nda, ó à coó, cuisì ñà-ndiáà nduú ñà-cunihnu vaha ini-nda mii-yá, te cuu stnahá ini-nda sàhà-nda.

⁷ Mii-nsiá, ndiaha gá ni saquida-nsia antes na nisa xinindisá víi-nsiá. Doco vichi, ¿nansa ni ñhì nèhivi ni dátúcù-nè mii-nsiá ñà-có-nchícùn gá-nsiá ñà-ndüú ñà-ndácuisi?

⁸ Pues (náhà xicà), màdi mii-yá ana cana-xi-nsiá gloria nduú ana dátúcù xi-nsiá ducán. Còò.

⁹ Te (ináhá-nsiá) iyuhu-ní tàtnà nsidátáchí xí pan queé, te cuàhà gá ndutáchá. (Te ducán stná xi chuun malu, iyuhu-ní ñà-có-ndiáà, te sàni xitiá inicutu.)

¹⁰ Doco yùhù cáhvi xi Stoho-nda Señor ñà-màsà cunchícùn gá-nsiá ichi mà. Te nècuàchì dacá xi òmí-nsiá, icúmi-nè cunsida-ne cuàchi-ne, ndéni nèhivi ní cui ni cúndüú-né.

¹¹ Ñáni, nú ni quésáhí cachì xi nèhivi ñà-xiñùhù màcùtuu seña mà icà-né, dandísá mà quidá quini ga nècuàchì (raza Judea) xí ní cù, ni mà cúdúchí stná ini-nè sàhà palabra cachí sàhà (nansa ni xihì Jesús nchica) cruz.

¹² Nècuàchì dacá xi-nsiá, chicá vaha ni sàà-nè quida quini-ne xi mii-né, (màdi mii-nsiá).

¹³ Cunaha-nsiá, divi sàhà-ñá ñhì-nda quee-nda libre, ñàyücàndüá ni cana Dios ndohó, ñáni. Doco màdi sàhájàn icúmi-nda permisu quida ndevàha-nda; coó, mà cúí. Vèchi vichi ñà-ndüá xiñuhu nduú ñà-iin-ni cuu stnahá ini-nda sàhà-nda, te ducán ñhì-nda cunucuachi víi-nda nùù ñanitnaha-nda.

¹⁴ Vèchi íá iin palabra tii cachí ley mà, te nú ni quida-ndañi cumplir, dandu queámà ñà-sàni chivàha stná-nda nsidanicuú ley mà. Te divi palabra tii ma nduú ñà-xiñùhù cuu ini-nda sàhà ñanitnaha-nda nacua cuú stná ini-nda sàhà mii-nda.

¹⁵ Doco nú nàá stnàhà-nda na iin quisi dàná, dandu vihini sàà stná-nda dandáñùhù stnaha-nda.

Nansa chindéé Espiritu Ìi ndohó, sadí-yà nùù ñà-có-íá víi cuní-nda quida-nda dava xichi

¹⁶ Yùhù cachí xi-nsiá, iin-ni ni cándísá-nda chindee Espiritu Ìi xí Dios anima-nda, dandu mà quidá gá-nda ñà-có-ndiáà xího nèhivi ñuhiví quida-ne.

¹⁷ Vèchi Espiritu Ìi, có-ndóo ini-yá sàhà ñà-chicuéhè cuní ndahà sàhà-nda quida, te ni có-cándísá stná-mà quida ñà-ndüá cuní Espiritu Ìi, vèchi có-xiñùhù tnàhà-yá xán, ñàyücàndüá, ùhì íá quida-nda ñà-ndüá cuní-nda quida-nda.

¹⁸ Doco nú Espíritu ìi nduu ana dachítùnìni ini xì-ndà, dandu còò modo dandacú gá ley sàhaha ma nùu-ndà.

¹⁹ Nàhà xìcà ìndù ìnhà nduá xího nèhivì ñuhivì quida-ne, vàchi xini-ndà càhàn-nè xì nèhivì cóni nándàhà xì-né. Quini quidá-né, doco có-cùcàhàn nùu-né.

²⁰ Cahvi-né ñà-có-nduú Dios ndisa, te sàhàn stná-nè nùu tètàtnà xì nùu tètadí. Daaní, xini ùhi stnahá stná-nè, te nàá stnahá stná-nè. Xího stná-nè ñà-ìcúmì ñanitnaha-ne. Te yàchi xidá stná ini-nè. Ventaja xi mii-né nduá siempre cunì-nè tavà-né. Te ma ùhi cudoo stná-nè, te quecuaán-né xì nècuàchì xínduu nèhivì xí mii-né.

²¹ Tùha stná-nè cumbidia ini-nè, te sahní stnahá stná dava-ne. Xini stná-nè, te quidá-né escándalo. Te cuàhà gá ñà-chìcuèhè nahi ñà-jaàn quidá stná-nè. Pues sàni cachì xì-nsiá sàhà nèhivì tùha ducán, te tucutu cachì guè xi-nsiá vichì sàhà-né ñà-mà nunca nihitáhvi-né sàà-nè cundoo-ne ñuhivì ìi xí Dios.

²² Doco diín ìnhà nduá quidá Espíritu ìi ini anima-ndà, vàchi sàhà mii-yá vátùni cuu stnahá ini-ndà sàhà-ndà, te cudii ndiaha stná ini-ndà. Vátùni cunihnu dadí ndiaha stná ini-ndà quida-ya. Te ma ùhi quidandee stnahá stná ini-ndà sàhà-ndà, nú chindéé-yândò. Te ma ùhi stná càhàn màni stnaha-nda iin-nda inga-ndà, te cunduu stná-ndà nèhivì vaha. Sàhà mii-yá mà ùhi quida ndisa-nda cumplir;

²³ Te mà cóó dana stná-ndà. Te vátùni nihì stná-ndà cadì-ndà nùu-ndà ñà-màsà quidá ndevàha-nda. Cunaha-nsiá, (ìnicutu ñuhivì) còò ni-iin ley cachì xì-ndà ñà-màsà quidá-ndà ñà-vàha yohó.

²⁴ Vàchi nsidaa ndohó nèhivì xí Jesucristu, quida-nda cuenta na ian ni xihì stná-ndà na ní xihì-yà nchìca cruz, te sàhàyùcànduá mà xího gá-ndà quida quini-nda, ni mà cúnihnú quini gá stná ini-ndà.

²⁵ Vàchi nú sàhà Espíritu ìi itiacú-ndà vichì, dandu ni cuàha stná-ndà dacúndéhe-yándò ichì-yá.

²⁶ Màsà cùcàhàn-ndá mii-nda nduu-nda mii-nda, te cundoo-nda datnahá stnaha-nda. Còò, màsà cùmbidia stnahá ini-ndà sàhà-ndà.

6

Ndiá icà-ndà chindee stnaha-nda

¹ Ñàni, nú ni càndiàà sàhà iin-nsiá nùu cualquier iin cuàchi, dandu vivì-ni càhàn-nsiá xì nècuàchì cóni quidá víi ma sàhà ñà-nihì-né nacunihnu vii ini-nè, doco cuisì nèhivì chitu Espíritu ìi xí Dios ni cùnduú ana càhàn xì-né. Te xiñuhu coo stná nècuàchì mà cuidadu màdi quida stná mii-né iin falta.

² Te nú ia iin ñanitnaha-nda có-cùndàà vaha ini-xi, dandu siempre ni nàcuàhandee ini-ndané, vàchi ñà-chívàha vii-ndà ley xi Cristu nduámà.

³ Te nú tuxì ini-ndà cuàhà gá ndiaá-ndà, dandu cuisì mii-nda dandahví-ndà mii-nda nduámà, vàchi còò ni-ìnhà ndiaá-ndà, nú ducán.

⁴ Ñàyùcànduá, iin iin-nda xiñuhu nacani ini-ndà a vátùni íá ñà-nduá quidà-ndà, á coó, te nú ducán, dandísà vátùni cudii ini-ndà sàhà mii-nda, màdiá cundehè-ndà ñà-nduá quidá ñanitnaha-nda, a ver, amádi chicá quidá víi ndohó.

⁵ Vàchi iin iin-nda icúmì-ndá nacuaaha-nda cuenta sàhà ñà-nduá ni quida-nda.

⁶ Nsidaa nèhivì dacuahá palabra ìi nùu ana chìnàhà xì-né, ndiá icà stná-nè chindee-né nècuàchì mà xì ñà-nduá icúmì-né.

⁷ Màsà cuàha-nsiá dandahví nèhivì mii-nsiá. Mà cúí nàcuidiqui uun-nda mii-yá, vàchi cachì dichu: “Ñà-nduá ni chihì-nda, divi nihì-ndà”.

⁸ Vàchi nú ni quida-nda cuisì ñà-nduá xího ini mii-nda, dandu icúmì-ndá sàà-ndà ndañuhu dahuun-nda. Doco nú ni quida-nda nacua cunì Espíritu ìi xí Dios, dandu sàhámà nihitáhvi-ndà vida ndiaha nicanicuahàn.

⁹ Ñàyùcànduá, màsà cùñáñá-ndá quida-nda nsidaa ñà-íá vii, vàchi nú iin-ni ni quida-nda ducán, te có-cùhúin ini-ndà, dandu cundiatú ndiaha anima-ndà.

¹⁰ Sàhájàn, nú íá nansa quida-nda obra nùu ñanitnaha-nda, dandu ni quida-ndañá. Te nú nèhivì iin-ni cahví stná xì Yua-nda Dios nduú stná-nè, dandu chicá más xiñuhu chindee-ndané.

Ultimo ñà-nduá ni cachi Pablo xì nècuàchì ladu Galacia, te ndahà mii-né ni tiaa-neà

¹¹ Vichì mií tiaí letra nahnú yohó.

¹² (Cuàhin càhàn guè xi-nsiá sàhà) nècuàchì cunì màcùtuu seña xi Dios icà nèhivì. Cunaha-nsiá, cuisì sàhà-ñá cunì-nè ndòò vaha-ne xì nèhivì nduá, vàchi yúhì-nè quida quini nèhivì xì-né (nú nchìcùn-nè cuisì ichì mii-yá ana ni xihì) nchìca cruz, divi Cristu.

¹³ Te cunaha-nsiá, ni có-chívàha vii stná mii-né ley sàhaha ma, mate cudí guá ini-nè itúú seña mà icà-né. Te cuní-nè màcùtuu stná mà icà mii-nsiá sàhà-ñá cundee-né nuù-nsiá, te ducán quee cuàhà tnùñuhu xí-né (cahan-né).

¹⁴ Doco yùhù, cuiisì tnùñuhu xí ana nì xihì nchìca cruz nduá cunf` quee, divi tnùñuhu xí Stoho-ndà Jesucristu. Te sàhà-ñá nì xihì-yà ducán, còò cá ni-ìñàha íá ñuhiví yohó (ndiaá nù), vàchi quidé cuenta na ian sàni xihì stnáì nchìca cruz xì mii-yá, te có-ndulócò guè sàhà ñà-íá ñuhiví yohó.

¹⁵ Vàchi nú nèhiví xí Jesucristu nduu-nda, dandu màdì ñà-cutuu seña icà-ndà nduá ndiaá. Te nú còò stná seña mà, ni mà chíndéé stná mà-ndó, cuiisì ndiaá ñà-cucumi-nda iin anima saa.

¹⁶ Te nsidaa nèhiví nchícùn ndisa xi palabra yohó, ni sàà-nè cundiatú ndiaha anima-nè, te Dios ni cúndéhe ndahví xì-né, vàchi quidá-yá cuenta na ian xínduu stná-nè nèhiví xí-yá Israel.

¹⁷ Vichi màsà cuáhachuún uun ga ni-iin nèhiví yùhù, vàchi cuàhà gá (sàni ndohi sàhà) Jesús, cuàhà gá seña itándiaa ìqué (ndé nì dùcùn).

¹⁸ Ni cúcúmí anima-nsiá cuàhà gracia xi Stoho-ndà Jesucristu, ñáni. Sà-íá.

Tutu Nì Tiaa San Pablo nùù Nèhivì xí Dios Ndoó Ñuu Éfeso

¹ Yùhù nduí Pablo, iin ana nì nhì chuun ì nùù Jesucristu, vâchi ducán nì chitnùni ini Dios quide. Te vichi tiaí carta yohó nùù nsidaa mii-nsiá nèhivì ì xí-yá ñuu Éfeso, nsidaa mii-nsiá nècuàchì iin-ni cahvi stná xì Jesucristu.

² Contentu ni cùndóó-nsiá quida Yua-nda Dios xì Stoho-ndà Jesucristu, te cuàhà gá gracia xi-ya ni cùcúmí-nsiá.

Cuàhà gá cundiatú anima nsidaa nèhivì xì Jesús

³ Ansivéhé cahnú Yua-nda Dios, divi mii-yá ana cahvi stná Stoho-ndà Jesucristu, vâchi Yuamánì-yámà nduu-yá. Te sàhà-ñá nduu-nda nèhivì xì Dèhemani-yá, ñâyùcàndúá sàni sàhatahvi-yándò nsidanicuú ñà-ndiaha ñi íá ansivi.

⁴ Te sàhà stná ñà-ndúá nì quida mii-yá, ñâyùcàndúá nì nacàxin Dios ndohó dècuèndè na táyô ñuhivì sàhà-ñá cundoo-nda nùù-yá, te cunduu-nda nèhivì ì còò falta xi.

⁵ Te sàhà ñá-cùù guá ini-yá sàhà-ndà, ñâyùcàndúá nì chitnùni ini-yá sàà-ndà cunduu-nda dèhe ndisa-ya. Divi ñà-jaàn nduá nì nacani ini-yá, te sàhámà nì chitnùni ini-yá ñà-nihitáhvi-ndà ducán sàhà (obra nì quida) Jesucristu.

⁶ Te vichi tavá-nda tnùñuhu xí-yá ñà-ndiaha guá nì quida-ya nì sàhatahvi-yándò gracia, te sàhà gracia mà sàni nhì-ndà nì cundiatú vâha anima-ndà nì quida Dèhemani-yá.

⁷ Vâchi sàhà-ñá nì xihì Dèhemani-yá, te nì xitiá nì-yá, ñâyùcàndúá vâtùni nì nacuida-han-yándò nùù tnùndoho, vâchi nì ndutu cuàchi-nda ñà-nì quida guá-yá gracia sàhà-ndà;

⁸ te sàhà gracia nì quida-ya mà, fuerte gá sàni dàtnúù-yá ini anima-ndà; ndiaha gá sàni nduhì sàxinítùnì-ndà nì quida-ya.

⁹ Tiempu antes nisa ía dèhé ñà-ndúá nì nacani ini-yá quida-ya quivì vâxi xi-nda, doco vichi sàni cachitnùhu-ya xi-nda nansa íámà, nì cachi-yá nansa nì chitnùni ini-yá quida-ya,

¹⁰ ñà-cunduu Cristu ana cusahnú nùù nsidanicuú ñàhà, ñà-íá ansivi xì ñà-íá stná ñuhivì. Te seguru icúmí cuu ndisa nsidaámà na sàà meru quivì xán.

¹¹ Sàhà-ñá nduu-nda nèhivì xì Cristu, ñâyùcàndúá sàni nihitáhvi guá-ndà nùù Dios, vâchi divi ñà-jaàn nduá nì nacani ini-yá antes. Te mii-yá, nacua chitnùni ini-yá quida-ya, divi ducán siempre quidá ndisa stná-yá.

¹² Te nsìhù nècuàchi primeru nì quivì ichì Cristu, ducán nì chitnùni ini-yá nihitáhvi gá-nsi sàhà-ñá chicá más tnùñuhu xí-yá quee sàhà ñà-ndiaha guá nì quida-ya xì-nsí.

¹³ Daanì, después nì xinitnùhu stná mii-nsiá palabra ndàcuisi xí-yá, divi razón vâha nansa càcu-nda, te nì xinindisá stná-nsiá Cristu. Ñâyùcàndúá nì nhì stná-nsiá Espiritu ì xí-yá, nacua nì quida-ya comprometer. Te Espiritu ì mà nduú nahi seña ñà-sàni nanduu-nda nèhivì ì xí-yá.

¹⁴ Doco cuisì-ní tnùmánì primeru nduú Espiritu ì, vâchi más gá icúmí-ndà nihitáhvi-ndà na sàà quivì nacua-yándò, vâchi nèhivì xì mii-yá nduu-nda ñà-sàni dànaá-yá sàhà-ndà. Te cuàhà gá stná tnùñuhu ndiaha xí-yá icúmí quee quivì (nihitáhvi guá-ndà ducán).

Nansa ni xicàn tàhvi Pablo nùù Dios ñà-nì cuàhatahvi-yá nèhivì xí-yá iin anima nchichì

¹⁵ Cunaha-nsiá, sàni xinitnùhì ñà-fuerte guá nihnú ini-nsia Stoho-ndà Jesús xì ñà-cuàhà guá cuú stná ini-nsia sàhà nsidaa nèhivì xí-yá. Ñâyùcàndúá,

¹⁶ siempre naquímaní Dios sàhà-nsiá, te xicàn tàhvi nùù-yá

¹⁷ ñà-nì ndúnchichì ndiaha-nsiá quida Espiritu ì; te nì chindéé stná-yá mii-nsiá mànhì ini-nsiá sàhà Dios, dandu chicá cunaha vâha-nsiayá. Divi ñà-jaàn nduá xicàn tàhvi nùù Yuandiaha-nda Dios, divi mii-yá ana cahvi stná Stoho-ndà Jesucristu.

¹⁸ Daanì, xicàn tàhvi stná nùù-yá ñà-nì dàtnúù-yá sàxinítùnì-nsiá sàhà-ñá cundaà vâha ini-nsiá nansa íá tnùndé ini ndiatu-nda nùù-yá, vâchi ñà-sàni cana-yándò íá ndisa tnùndé ini xi-nda. Te xicàn tàhvi stná ñà-nì sàá-nsiá mànhì ini-nsiá ñà-ndiaha guá sàni nihitáhvi-ndà cuàhà ñà-vâha nùù-yá, nsidanicuú ndohó nèhivì ì xí-yá.

¹⁹ Te xicàn tàhvi stná ñà-nì cundáà ini-nsia ñà-cuàhà guá poder ndiaha icúmí-yá, te vâtùni nacuañandee ini-yá ndohó nècuàchì xinindisá-xí-yá. Te divi sàhà poder ndiaha ma

²⁰ nì dãnátíacú-yá (Dèhemani-yá) Cristu, dandu nì nsihì nì natiacu-yá nì nana-ya ansivi dècuèndé gloria, te nì sàcòo-ya ladu cuahá Yua-nda Dios.

²¹ Te vichi diquí-xí íá-yá, te cuàhà gá más ndiaá-yá nùù nsidaa ana cusahnú, xì nùù nsidaa ana itá fuerte, xì nùù nsidaa ana icúmí xí poder, xì nùù nsidaa ana dàndácú, xì nùù nsidanicuú gá stná ana ndácúchan nèhivì tiempu vichì, te ò tiempu vâxi xi-nda inga ñuhivì.

²² Nsidanicuú iñàha, sàni ndòa sujetu nùu Cristu nì quida Yua-nda Dios. Te nsidaa ndohó nèhivi iin-nì cahvi xi-yá, sàni chitnùnì ini-yá dandacú Cristu nùu-nda na ian dándacú òni-nda nùu-nda.

²³ Te ndohó, nahi iquicúñú mii-yá nduu stná-nda. Te sàhà ndohó na ian sàni sacatnahá nsihi cuerpu xi-ya, na ian iá nsihi-ya vichi. Te mii-yá nduu ana iá inicutu ñuhiví xi ansivi.

2

Nansa cuú ini Dios sàhà-nda, te nì dácacu-yándó

¹ Vichi sà-itiácú ndisa anima-nsià. Doco antes na ian còò vida xi anima-nsià nì sá-ia nùu-yá ñà-cuàhà guá cuàchi-nsià;

² vàchi nisa cudii inì-nsià quida-nsià falta nahi nsidaa gá nèhivi ñuhiví. Nisa inini-nsià tàchi malu cusáhnú nùu nsidaa gá ñà-malu xicá ansivi, te divi quisi jaàn dachàhàn xi nsidaa nèhivi có-ínì xi Dios.

³ Daaní, stná nsiùhù, nisa xicanuu stná-nsi cutnàhà-nsí xi nècuàchi có-quidá víi ma; vàchi nsidaa-nda, nacua nisa xicàn ini cuerpu xi-nda xi sàxinítñùnì-nda, ducán nisa cudii inì-nda quida-nda. Ñàyùcàndüá, cuàhà gá castigu xi Dios nì càyà sàhà cuàchi-nda, nacua càyà-ñà sàhà nsidaa gá stná nèhivi cuàchi.

⁴ Doco Dios, cuàhà sàstnùhù cuhí ini-yándó; vàchi yáha ga cuú ini-yá sàhà-nda;

⁵ ñàyùcàndüá, nì quida-ya gracia sàhà-nda, te nì dácacu-yándó. Mate còò vida ndiaha nùu anima-nda sàhà cuàchi nì quida-nda, doco nì quida-ya cuenta na ian nì natiacu stná-nda na nì natiacu Cristu.

⁶ Ñàyùcàndüá, ducán iá na ian nì cutnaha-nda xi-yá na ní natiacu-yá nì quida Yua-nda Dios. Te quidá stná-yá cuenta na ian sàni nana stná-nda ndé gloria, te vichi cutnaha-nda xi Jesucristu ndoo-nda yucán xi-yá nì quida Yua-nda Dios.

⁷ Pues ñà-jaàn sàni quida-ya sàhà-ñà nicanicuahàn nì queé cuàhà tnùñuhu xi-yá sàhà gracia nì quida-ya na ní indehè ndahví-yándó sàhà Jesucristu;

⁸ vàchi micuisi gracia nduá sàni càcu-nda ñàni xinindisa-ndayá. Màdi iin chuun nì quidá ndohó nduá nì càcu-nda, còò. Ñà-ndüá nì cutahvi-nda nùu Dios nduá.

⁹ Nì màdi obra vàha nì quida-nda nduá nì dácacu xi-nda. Còò, còò sàà iin-nda cucahan-nda chicá ndiaá-nda.

¹⁰ Còò, mii-yá nì quida-ya obra xi ndohó, te sàhàjàn sàni ndusaa anima-nda. Vàchi na ní sàcùndoo-nda nùu Jesucristu nì ndusaa ínì-nda sàhà-ñà cui quida stná-nda cuàhà obra vàha nacua nì chitnùnì ini-yá quida-nda.

Nsidaa nèhivi xi Jesús, iin-nì nèhivi xínduu-ne

¹¹ Ñàyùcàndüá, xiñuhu nsinuu ini nsidaa mii-nsiá nècuàchi inga raza, vàchi có-ndüú-nsiá nèhivi raza Judea. Nèhivi còò seña xi Dios icà-xí cachí nsiùhù nècuàchi raza mà xi mii-nsiá; te nèhivi seña xi Dios cachí-nsi xi mii-nsí, vàchi iá iin seña nì chituu nèhivi icà-nsí. Ñàyùcàndüá xiñuhu nsinuu ini-nsiá nansa nisa la xi-nsiá antes,

¹² cónisá ñihnú ini-nsiá Cristu antes, manícú (nìhitáhvi-nsiá) nahi nèhivi ñuu-nsi Israel, te cónisá ínhá stná-nsià nì-íñàha sàhà tratu nì saquin-yá, te nì quida-ya comprometer cuàhà gá ñà-ndiaha. Còò nì-iin tnùndé ini nisá ícúmì-nsiá, nì còò stná Dios nisá la nùu-nsiá.

¹³ Xica nisa la-ya nùu-nsiá antes, doco vichi sàhà-ñà (nì xihì) Cristu, te nì xitiá nù-yá, ñàyùcàndüá vátùnì sàni tnàtuu yatni-nsià nùu-yá nduá, vàchi divi Jesucristu sàni xinindisá stná-nsiá.

¹⁴ ùi raza nì sanduu-nda antes, na ian nì tàhndè dava-nda; doco vichi sàni nacuatnaha-nda nì quida-ya; iin-ni nì nàcùnduu-nda quidá-yá cuenta vichi, te iá paz, có-xinì ùhi stnahá gá-nda.

¹⁵ Cunaha-nsiá, sàhà-ñà nì nanduu-ya nèhivi, (te nì xihì-yá), ñàyùcàndüá nì ñihì-yá nì nacadi-yá ichì ley sàhana. Cuàhà gá nisa dandacú ley mà nùu-nda, cuàhà gá nisa xicàn-ñà quida-nda, doco nsidaamà, sàni cuxicá nì quida-ya, te vichi iin-ni nèhivi saa sàni nanduu-nda, có-ndüú gá-nda ùi raza, ñàyùcàndüá, sà-íá paz.

¹⁶ Vàchi na ní xihì-yá nchica cruz, nì ñihì-yá nì nàcùndoo vàha ndúi raza-nda xi Dios, te nì ñihì stná-yá nì nachindoo vàha-yándó, có-xinì ùhi tnahá gá-nda vichi. Vàchi iin-ni nèhivi sàni nanduu nsidaa-nda nì quida-ya.

¹⁷ Na ní quixi Cristu, ñihì-yá iin razón ndiaha nì quesaa, te nì cachitnùhu-ya nansa coo paz nùu nsidaa-nda. Mii-nsiá, mate xica nisa la Dios nùu-nsiá, doco nì sàà stná palabra mà nùu-nsiá. Daaní, nsiùhù, na ian yatni nùu ichì-yá nì sandoo-nsi, te nì sàà stná palabra mà nùu-nsí.

¹⁸ Vàchi sàhà Jesucristu sàni ñihindèè ndúi raza-nda tnàtuu-nda nùu Yua-nda Dios. Te iá stná imindaa Espiritu Ì xi-yá, te chindee stná-yàmà ñà-tnàtuu-nda nùu-yá.

¹⁹ Mii-nsiá, có-ndúú gá-nsià nahi nêhivi xio, ò nêhivi fuera, còo. Meru nêhivi ì xi ñuu Dios nduú stná-nsià vichi nahi nsiùhù. Dêcuèndè nduú stná-nsià nahi nêhivi ndoo vehe-ya.

²⁰ Te ndisa, na iin vehe nduú stná-ndà. Te nahi cimientu xan nduú apóstol xi nsidaa stná profeta nisa cahàn cuenta xi-ya. Te nahi cavà cahnú indúhu esquina cimientu, ducán nduú Jesucristu.

²¹ Nâyücàndüá, base xi-nda nduú-yá, te na ian cueé-ni cueé-ni cudúcün iin vehe na cuàha-ña, ducán stná ndohó, (cueé-ni cueé-ni nacuatnáhá-ndá) dêcuèndè sàà-ndà cunduu ndisa-nda na iin veheñùhu ì xi Stoho-ndà Señor.

²² Te mii-nsiá, sàhà-ña nchícün stná-nsià mii-yá, vätüni sàni nacuatnáhá stná-nsià (xi nsiùhù), te ducán sàà nsidaa-nda cunduu-nda na iin vehe-ya ndé coo-ya nicanicuahàn sàhà Espiritu ì xi-yá.

3

Nansa iá chuun xi Pablo ña-cachitnùhu-ne palabra ì xi nêhivi inga raza

¹ Yùhù Pablo, ndiadí vehecà vichi sàhà-ñá (quidè chuun ì xi) Jesucristu. Te chuun ì mà, sàhà ña-vàha xi stná mii-nsiá nècuàchi inga raza nduú stná.

² Ádi sá-inhá-nsià nansa ni quida Dios gracia sàhi, te ni nihitáhvì quide chuun (chinahì) mii-nsiá.

³ Váchi mii-yá, ni dàtnúú-yà sàxinítñunì yùhù nansa iá palabra ndiaha nisa ia dèhé antes. Te divi sàhàmà ni tiai iin carta tii (ni sàà nùu-nsiá) daa.

⁴⁻⁵ Nâyücàndüá, nú sàni cahvi-nsia carta mà, dandu vätüni cundaà ini-nsià nansa ni nihitáhvì mànihì ini palabra sàhà Cristu nisa ia dèhé antes. Cunaha-nsiá, cóni nihitáhvì nêhivi sàhana cunitnùhu-ne palabra mà; doco vichi sàni dàtnúú Espiritu ì sàxinítñunì nsiùhù nècuàchi apóstol xi-ya, xi stná nècuàchi dava ga càhàn cuenta xi-ya.

⁶ Te divi ña-yòhó nduú (palabra mà): ña-vätüni nihitáhvì stná nêhivi inga ñuu nú ni cúnindísà-né palabra xi-ya, mate có-ndúú-né nècuàchi raza-nsi Judea. Nahi iin-ni nêhivi cunduu ndüi raza mà. Nâyücàndüá, vätüni nihitáhvì nècuàchi inga raza ña-ndiaha ì ni quida-ya comprometer, vâchi nêhivi xi Cristu cunduu stná-nè.

⁷ Cunaha-nsiá, ni quida Dios gracia sàhi ni sàhatahvì-yá yùhù chuun ña-cachitnùhi palabra ì xi-yá; te sàhà poder ndiaha xi-yá (ni cana-ya yùhù),

⁸ mate ndüi iin ana chicá có-ndiáà nùu nsidaa nêhivi xi-yá, doco ni nihì (chuun) ndiaha nùu-yá, divi ña-cachitnùhi xi nêhivi nsidaa ñuu ña-ndiaha guá iá ña-ndüá sàhatahvì Cristu ndohó.

⁹ Te ni nihì stnáì chuun datüi nùu nsidaa nêhivi nansa ni chitñunì ini Dios quida-ya. Dêcuèndè chicá sàhana nisa ia dèhàmà, cuisì Dios nisa inaha xán; iin-ni ndè antes ni quidavàha-ya ñuhivì ináha-yàñà.

¹⁰ Doco vichi sàni dàtüi-ya nsidaámà sàhà-ña ndulocó nsidaa ángel xi-ya xi nsidaa stná espíritu xicá ansivi, na indèhe-né ña-ndiaha guá quidá-yá xi nêhivi càhvi xi-yá, dandu cundaà vâha ini-nè nchichì cuàhà-yá sàhà nsidaa chuun quidá-yá.

¹¹ Pues dêcuèndè nicanicuahàn antes, ña-jaàn nduá ni nacani ini-yà quida-ya, te divi ña-jaàn ni nihì stná-yà ni dàxínu-ya na ní quida Stoho-ndà Jesucristu (obra xi-ya).

¹² Te vichi nuná ñuhivì nùu-ndà, vätüni tnätuu-nda nùu Dios, mà yúhi gà-ndà, vâchi xiníndísà-ndá Jesucristu.

¹³ Nâyücàndüá, yùhù sacúndáhvì nùu-nsiá nà-màsà cúhuún ini-nsià sàhà ña-cuàhà guá ndohì sàhà mii-nsiá (nècuàchi inga ñuu); còo, vâchi xiñuhu quida-nsia cuenta na ian tnèñuhu xi-nsiá nduá.

Cuàhà sàstmùhù cuú ini Jesucristu sàhà-ndà

¹⁴⁻¹⁵ Cunaha-nsiá, nsidaa ña-jaàn nduá disàhà-xi cuàhàn càcàn tàhvì nùu Yua-nda Dios vichi. Siempre sàcuün sisì nùu-yá, te cachí xi-yá Yua-nda Dios, vâchi mii-yá nduú yua nsidaa ndohó nècuàchi ndoo nùu-yá, a sea ndoo-nda ñuhivì yohó, te ò ansivi ndoo-nda.

¹⁶ Pues vichi xicàn tàhvì nùu-yá ña-nì nàcuàhandee ini Espiritu ì xi Dios mii-nsiá, vâchi cuàhà gá poder ndiaha icúmi-yá.

¹⁷ Te xicàn tàhvì stnáì nùu-yá ña-nicanicuahàn ni cúníhnü vâha ini-nsia Cristu, te ducán coo-ya contentu ini anima-nsiá. Te xicàn tàhvì stnáì nùu-yá ña-nì cùú fuerte ndisa ini-nsiá sàhà-yá xi sàhà stná ñanitnaha-nsia na ian iin fuerte iin yutnù ducún, te ò indúhu fuerte iin vehe cahnú.

¹⁸⁻¹⁹ Te nú ducán, dandu vätüni mànihì vâha ini-nsiá ña-cuàhà guá cuú ini Cristu sàhà-ndà. Te divi ducán xicàn tàhvì stnáì sàhà nsidaa gá nêhivi xi-yá, ña-nì sàà nsidaa-nda mànihì ini-ndà ña-yáha guá cuàhà cuú ini-yá sàhà nsidaa-nda, ndéni ana ni cui ni cundúú-ndá, te ndéni ni cui ni cundóó-ndá. Doco còo, ni mà cui sàà-ndà cundaà nsihi ini-ndà sàhàjàn,

doco siquierá xícàn tàhvi ñà-chicá más ni cúndáa ini-nsià sàhà-ñá, te ducán sàa anima-nsià nachituá mii Dios.

²⁰ Te vichi ansivéhé Dios, vátùni quida-ya nsidanicuú ñà-nduá xícàn tàhvi-ndà nùu-yá, dècuèndè yáha ga más cui quida-ya nùjàn, mate iin chuun cahnú sàstnùhù nduá ni cùnhnú ini-ndà càcàn-ndà, doco (vátùni nihì-ndàñá), vàchi cahnú poder xi-ya, te divi poder mà quidáchúùn stná ini anima-ndà.

²¹ ¡Ansivéhé cahnú-yá! Nicanicuahàn xiñuhu naquimani-ndáyá sàhà ñà-ndiaha guá iá Jesucristu xi ñà-ndiaha guá quidá stná-yà xi nsidaa ndohó nèhivi cahvi xi-yá. Te dècuèndè nicanicuahàn ducanicoó. Amén.

4

Iin-ni nèhivi sàni nanduu-nda ni quida Espiritu Ìi xí Dios

¹ Sàhà-ñá nchicuín Stoho-ndà Señor ié vehécàa yohó. Ñàyùcànduá sacúndáhvì nùu-nsiá ñà-nì càcánúvì víi stná-nsià nacua ndiá icà-ndà, vàchi sàni cana-yàndó (ñà-cunduu-nda nèhivi Ìi xi-yá).

² Sàhà ñà-jaàn xiñuhu cunihnu ndahvi ini-ndà, te cunihnu manì stná ini-ndà. Iin-ni ni quidándéé cahnú ini-ndà sàhà ñanitnaha-nda. Calma ni cúndóó-ndá. Iin-ni ni cúcúvì ini-ndà sàhà-né.

³ Vàchi nahi iin-ni nèhivi xínduu-nda ni quida Espiritu Ìi xí-yá; ñàyùcànduá, iin-ni ni cúndóó màni nsidaa-nda, vàchi chindéàmà ñà-màsà táhndè dava-nda.

⁴ Vàchi nahi iin-ni cuerpu mii-ya (nduú nsidaa-nda), te imindaa Espiritu Ìi xí-yá iá stná, te iin-ni trùndé ini ndiatú stná nsidaa-nda ñà-sàni cana-yàndó.

⁵ Te imindaa Stoho-ndà Señor iá stná, xi imindaa stná ñà-nduá xiníndisá-ndá. Daaní, iin-ni sàni cuhì stná nsidaa-nda.

⁶ Vàchi imindaa Dios iá, te Yua nsidanicuú-nda nduú-yá, vàchi cusáhnù-yá nùu nsidaa-nda, te chindéé-yá nsidaa-nda, te iá stná-yà ini anima nsidaa-nda.

⁷ Doco cada iin iin-nda sàni nihitáhvì-ndà nùu Cristu según nansa ni cudii ini mii-yá cuàhatahvì-yàndó.

⁸ Ñàyùcànduá, dohó cachí nùu tutu ìi:

Sàni nana-ya ndè gloria, ndacá stná-yà cuàhà gá ana nì cundee-yá nùu-xí, dandu nì sàhatahvì stná-yà nèhivi ñuhivì cuàhà ñà-vàha.

⁹ Pues cachí tutu mà ñà-nì nana-ya (ansivi), doco ¿ndiá nduá cunì cachàmà? Dohó cunì cachà, ñà-antes nì nuu-ya ndè tixi ñuhù ndé chicá cunú.

¹⁰ Daaní, después nì nana stná-yà ansivi ndé chicá ducún sàhà-ñá nachitu inicutu ñuhivì poder xi-ya.

¹¹ Te nì sàhatahvì stná-yà nèhivi cuàhà ñà-ndiaha. Dava-nsi nì nihitáhvì-nsí cunduu-nsi apóstol cacanuú-nsi chuun xi-yá. Te dava-nda nì nihitáhvì-ndà cunduu-nda profeta cáhàn razón quixí nùu-yá. Te dava ga-ndà nì nihitáhvì-ndà cunduu-nda ana tùha víi cachitnùhu xi nèhivi nansa càcu anima-nè. Te dava stná-ndà nì nihitáhvì-ndà cunuú-ndà nèhivi xí mii-yá, te chinaha stná-ndané.

¹² (Ducán nì chitnùvì ini-yà nihitáhvì iin iin-nda) sàhà-ñá cui chindee stnaha-nda, te sahàjàn nihì stná-ndà cunucuachi víi-nda nùu-yá, dandu nacuaàhandee stná ini nsidaa-nda na ian cuàhàn ndufuerté cuerpu xi mii Dèhemani-yá Cristu.

¹³ Ducán dandu vátùni sàa nsidaa-nda cunindisá víi-nda palabra xi-ya, te cunaha ndisa-nda Dèhemani-yá. (Te ndiaha gá ñà-jaàn), vàchi nú ducán, dandu nàcùnihnu ini-ndà nahi iin nèhivi sahnú, te ini stná anima-ndà cuacatnahá stná nsidaa gracia xi Dèhemani-yá Cristu.

¹⁴ Mà cúndúú gá-ndà nahi méé; (mà cúníndisá-ndá) nansa ni nì cui ñà-nduá chináhà nèhivi. (Mà túcù nahá-ndà inga ichi) na ian dandiachi tàchì-ndó yohó te yucán. Ni mà ñhì stná nèhivi maña dandahví-nèndó, mate cunì-nè datúcù-nèndó iin ichì có-nduú ñà-ndáa.

¹⁵ Ñàyùcànduá, sàhà-ñá màsà cúu xi-ndá ducán, xiñuhu ni càhàn-ndà puru ñà-ndácuisi xi ñanitnaha-nda. Màni màni ni càhàn-ndà xi-né, dandu sàa-ndà quida sahnu-nda nacua cunì Cristu, vàchi mii-yá, nahi òni-ndà (dandacu-xi nùu-ndà), ducán nduú-yá.

¹⁶ Te ndohó, nahi ndahásáhà-yá nduu-nda, vàchi iin-ni sàni nacuatnahá nsidanicuú-nda nì quida-ya sàhà-ñá nì chindéé stnaha-nda, te cunduu-nda nahi iin-ni cuerpu xi-ya. Vàchi chuun xi mii-yá nduá dandacú-yá, te chuun xi ndohó nduá ñà-quida-nda chuun nì quida tocar iin iin-nda. Ñàyùcànduá, ducán queé stná mà na ian sahnú cuerpu xi-ya, te ndufuertèa, dandu chicá (ndiaha gá) cucuu stnahá stná ini-ndà sàhà-ndà.

Nansa ndiá icà-ndà quida-nda ñà-sàni nihitáhvì-ndà vida ndiaha nùu Jesucristu

¹⁷ Ñàyùcànduá, yùhù ndácùcahín Jesucristu, te chináhì mii-nsiá ñà-màsà quidá gá-nsià na quidá nèhivi có-ináhà xí Dios, vàchi cuisì ñà-chicuéhé nihnú ini-nè.

¹⁸ Cò-dàtnù Dios sàxìntnùnì-nè. Còò vida ndiaha xí mii-yá nùù-né, vâchi cò-cùndàà tnùnì ini-nè sàhà-yá ñà-caxin guá anima-nè.

¹⁹ Mà túha-ne cucahan nùù-né, mate cuàhà gá viciu icúmì-nè, vâchi ñà-diì xí-né nduá quidá siquini-nè.

²⁰ Doco mii-nsiá, còò. Tucu iá ichi Jesucristu ni dàcuahá-nsiá.

²¹ Te (a sácú vâha) nú sàni sàà-nsiá ni cundaà vâha ndisa ini-nsia sàhà-yá, te (a sácú vâha) nú sàni chinaha-yá mii-nsiá nacua nduú ñà-ndàcuisi sàhà-yá.

²² Te dohó cachí palabra xi-ya, (ñà-có-íá vâha) ñà-nduá nisa quida-nda antes. Xiñuhu nacoo dahuun-nda modo nisa nihnu ini-ndà, vâchi ñà-yúcán cuàhàn dandáñúhú xí-ndá ni cuí. Cutu dandahviándó, te daxíhoándó cuàhà ñà-siquini.

²³ Ñâyücàndüá vichi xiñuhu nacani ini-ndà iin modo saa,

²⁴ te quida-nda cuenta na ian sàni ndusaa-nda, na ian làcà ni quidavâha Dios ndohó, vâchi vichi sàni sàhatahvi-yándó ñà-cunduu-nda nahì mii-yá, vâtùni quida-nda nacua cachí palabra ndàcuisi ndé cachí-yá xi-ndà ñà-cunihnu ì ini-ndà, te quida vii-ndà xì ñanitnaha-nda.

²⁵ Ñâyücàndüá, ni-iin xichi màsà dándàhvi stnàhá gá-ndà. Micuísì palabra ndàcuisi ni cáhàn-ndà xì ñanitnaha-nda, vâchi iin-ni nêhivi xínduu nsidaa-nda vichi.

²⁶ Te nú ni cuídà ini-ndà sàhà iñàha, cuidadu ni cùndóó-ndá ñà-màsà quidá-ndá iin cuàchi; màsà cuídà ini-ndà inii ndui yacá.

²⁷ Màsà cuáha-nda lugar dacà ñà-malu sàxìntnùnì-ndà.

²⁸ Nú nisa xidacuihna-nda antes, màsà quidá gá-ndà ducán. Iin chuun vii ni quidáchuún-ndá vichi, dandu cucumi-nda iñàha xi mii-nda, te cui dacutâhvi-ndà nêhivi iá necesidad-xi.

²⁹ Daani, màsà cáhàn quini stnà-ndà vichi. Còó, puru palabra vii ni cùndüá, cundaca xi anima-ndà, dandu ndiaha gá chindeá nècuàchi ininì na cáhàn-ndà.

³⁰ Te màsà dácúhuún stnà ini-ndà Espíritu Ìl xí Dios, vâchi mii-yá nduú seña ñà-nduù-ndà nêhivi ìl xí-yá, te iin-ni cucumi-ndayá dècuèndè quivì cäcu dahuun-nda.

³¹ Màsà chùhún gá ini-ndà sàhà iñàha. Te màsà cuídà gá stnà ini-ndà. Ni màsà ndúdánà-ndá; còò. Ni màsà cànàhá stnà-ndà, te màsà cáhàn quini ga stnà-ndà. Ni màsà cùndéhe ùhi stnàhá stnà-ndà.

³² Còó, màni ni cùndóó-ndá xí ñanitnaha-nda, te cuhi stnàhá stnà ini-ndà. Te nsidaa-nda xiñuhu cuicahnú stnàhá ini-ndà sàhà-ndà nacua ni quida Yua-nda Dios xi ndohó (ñà-ni xihì) Cristu sàhà-ndà.

5

¹ Ñâyücàndüá, na ian quidá Dios, ducan ni quidá stnà-ndà, vâchi dèhe-ya nduu-nda, te màni cuàhà-ndà nùù-yá.

² Iin-ni ni cúcúú stnàhá ini-ndà sàhà-ndà nacua cuú stnà ini Cristu sàhà ndohó, vâchi sàhámà ni sàha-ya vida xi-ya cuenta xi-nda, te ducán ni nihì-ndà ni cudii ini Yua-nda Dios sàhà-ndà.

³ Nêhivi xí mii-yá nduu-nda vichi, ñâyücàndüá, màsà cáhàn-ndà xi ana cóni nándàhà xi-ndà; màsà quidá siquini-ndà, ni màsà xihò-nda ñà-nduá icúmì inga nêhivi. Còò. Ni màsà ndàcúcahan ga stnà-ndà ni-iin chuun si-quini mà, vâchi nêhivi ìl xí mii-yá nduu-nda vichi.

⁴ Na cáhàn-ndà, màsà cáhàn-ndà palabra siquini, ò palabra chicuèhè, ni màsà cuácùndiaa stnaha-nda. Còò, mà vâha cáhàn-ndà ducán. Lugar xi ñà-jaàn xiñuhu naquimani-ndà Dios.

⁵ Vâchi ináhà-ndá, mà cäcu ni-iin nêhivi cò-quidá sahnú xi nècuàchi ñahà; mà cäcu ni-iin nêhivi siquini, ni-iin stnà ana xihò cucumi cuàhà iñàha, vâchi nêhivi xihò guá ducán, queámà na ian cahvi-né ñà-jaàn. Pues ni-iin nêhivi quidá ducán, mà níhitâhvi-né ñuhivi ìl xí Cristu, divi nduú ñuhivi ìl xí Dios.

⁶ Nú dacáhàn nêhivi-nsiá ñà-quida-nsia ñà-có-ndiàà mà, màsà cuáha-nsia dandahvi-nè mii-nsiá, vâchi icúmì Dios dandohó-yá nsidaa nêhivi cò-ininì xí-yá, te quidá-né ñà-chicuèhè (sàni cachì mà).

⁷ Ñâyücàndüá, màsà quíhvi tnahá-nsiá xì nêhivi quidá ducán.

Nansa ndiá icà-ndà quida-nda ñà-sàni dàtnùù Dios sàxìntnùnì-ndà

⁸ Ichì ñàa nduá ni sanchicùn-nda antes, doco vichi sàni dàtnùù Stoho-nda Señor sàxìntnùnì-nda, ñâyücàndüá, xiñuhu cacanu vii-ndà vichi.

⁹ Vâchi nú ndisa datnúù ndiaha-yá ini-ndà, dandu cunduu-nda nêhivi vâha ini-xi nihnú ndàcuisi ini-xi, te cunchicùn vii stnà-ndà palabra ndàcuisi.

¹⁰ Nsidaa ñà-nduá quidà-nda, xiñuhu nacani ini-ndà a cudii ini Stoho-nda Señor sàhà-ñá, á còò.

¹¹ Mäsà quíhvi tnaha-nda xi nêhiví có-quidá víi, vâchi ichí ñáa xicá-né. Còo, vihi gá vâha dahíhí-ndané.

¹² Vâchi ndóo cahan stná-ndá nú ndatnúhú-nê sâhá chuun sìquini quidá dèhé-nè.

¹³ Doco nú ni dáhihí-ndané dandu queámà na ian datnúú-ndá iin luz núu chuun quidá-né sâhá-ñá cunahà xicà nansa iá chuun ma. Vâchi claru náhá nsidaa iñâha nú tnúú nihni iin luz núá.

¹⁴ Ñâyücândüá, ducán cachí (dichu):

Ndacóo mii-ní nêcuâchi quidí jaàn, te nsicuihnú ini-ní, na ian natiacú-ní, dandu datnúú ndiaha Cristu núu-ní, cachá'.

¹⁵ Ñâyücândüá, xiñuhu nacani vâha ini-ndá nansa quida-nda mientras ndoo-nda ñuhiví yohó. Mäsà cacánúú-ndá nahi nêhiví có-cündää ini-xi; ni cúníhnú sahnú ini-ndá.

¹⁶ Te nú iá nansa quida-nda (iin chuun vii), yâchi ni nácání ini-ndá quida-ndañá, vâchi ndoó cuahà gá nêhiví có-quidá víi tiempu vichi.

¹⁷ Ñâyücândüá, mäsà quidá-ndá nahi nêhiví neciu; cuahà gá xiñuhu màñihí ini-ndá nansa divi cuní Stoho-ndá Señor quida-nda.

¹⁸ Ni mäsà cóhó-ndá vinu, te xini-nda, vâchi escándalo nduámà. Còo, fuerte ni cóo Espíritu ñi xí Dios ini anima-ndá, chicá vâha.

¹⁹ Te na cáhàn-ndá ndatnúhú-ndá iin-nda xi inga-ndá, dandu coto stná-ndá salmu nacuatú-nda alabanza xi Stoho-ndá Señor xi alabanza datnúú Espíritu ñi xí-yá sâxinítnúni-ndá. Nsidaa modo yohó coto-nda, te ndenihi vâha-nda mii-yá xi nsidaa anima-ndá.

²⁰ Nicanicuahàn xiñuhu ndacúcahan-nda Stoho-ndá Jesucristu, te naquimani-ndá Yua-nda Dios sâhá nsidanicuú iñâha.

Nansa xiñuhu quida-nda xi nêhiví vehe-nda

²¹ Nsidaa-nda, xiñuhu cahvi stnaha-nda iin-nda xi inga-ndá, vâchi nsidaa-nda, iin-ni cahvi stná-nda mii-yá.

²² Mii-nsiá nêcuâchi ñahà, xiñuhu cahvi-nsiá ñi-nsiá na ian quidá-ndá xi Stoho-ndá Cristu.

²³ Vâchi nacua dandacú mii-yá núu nêhiví càhvi xi-yá, ducán dandacú stná iin nêcuâchi tiàa núu ñahàdihí-nè. Vâchi divi Cristu nduú ana ni dácácu xi ndohó nêhiví xi-yá, te nahi cuerpu xi-ya nduú stná-ndá.

²⁴ Ñâyücândüá, nacua iníni-ndá mii-yá, ducán xiñuhu cunini stná nêcuâchi ñahà nsidaa ñà-ndüá cachí ñi-né.

²⁵ Daaní, mii-nsiá nêcuâchi tiàa, icúmí-nsiá cuu ini-nsiá sâhá ñahàdihí-nsiá nacua quidá Cristu xi nsidaa ndohó nêhiví càhvi xi-yá. Vâchi ni sâha-ya vida xi-ya cuenta xi-nda

²⁶ sâhá-ñá nduhii ini-ndá, te ndoo cuâchi iá anima-ndá quida palabra ñi xí-yá, na ian ni ndoa xi têuúí.

²⁷ Daaní, quiví cana-yândó, vâtùni sâà-ndá núu-yá, te ndiaha gá cundoo-nda. Mà cóo gá ni-iin mancha anima-ndá, ni iin xaan ndé iá chicuêhè; còo ni-iñâha, vâchi nêhiví ñi xí-yá cunduu-nda. Mà cóo gá ni-iin falta xi-nda núu-yá.

²⁸ Cunaha-nsiá, nacua cuú ini iin nêcuâchi tiàa sâhá mii-né, ducán xiñuhu cuu stná ini-nè sâhá ñahàdihí-nè. Te nú ducán ni cuú ini-nè sâhá nêcuâchímà, dandu queámà na ian cuú stná ini-nè sâhá mii-né.

²⁹ Te ináhá-ndá, còo ni-iin nêhiví cahíchi ini xi mii-xí. Còo, de por sí dacuxi-nda mii-nda, te ndiaá-ndá mii-nda. Te divi ducán quidá stná Stoho-ndá Señor xi nsidaa ndohó nêcuâchi càhvi xi-yá.

³⁰ Vâchi nahi iquicúñú mii-yá nduu-nda.

³¹ Te divi ñà-jaàn nduú stná ñà-dísahà-xí nándàhà iin nêcuâchi tiàa xi iin nêcuâchi ñahà, te quecuâân-né núu yuadíhí-nè. Ñâyücândüá, mate díin díin ni sanduu-ne antes, doco vichi na iin-ni nêhiví sàni nanduu-ne. (Ducán cachí tutu ñi.)

³² Te mate ùhi cundaá nsihí ini-ndá sâhá palabra ndiaha ma, doco cunaha-nsiá, sâhá stná Cristu cáhàn, xi sâhá stná ndohó nêhiví càhvi xi-yá.

³³ Doco de todos modos, xiñuhu cuu ini nêcuâchi tiàa sâhá ñahàdihí-nè nacua cuú ini-nè sâhá mii-né. Te nêcuâchi ñahà, xiñuhu cahvi vii stná-nè ñi-né.

6

Nansa ndiá icà quida nêcuâchi cuàti xi stná nêcuâchi cuâchi

¹ Daaní, nsiohó nêcuâchi cuàti xi nêcuâchi cuâchi, cunini-ndá yuadíhí-ndá, vâchi ñà-jaàn nduú ñà-íá vii núu Stoho-ndá Señor.

²⁻³ Ni cóo tnúñuhu xi-ndá núu yuadíhí-ndá, dandu yâha vâha-ndá; caní cuà cundoo naha-ndá ñuhiví. Cunaha-ndá, ley jaàn nduú ñà-primeru ni cachi Dios ñà-cutahvi-ndá iin ñà-vâha (nú ni chívâha-ndañá).

⁴ Daaní, mii-nsiá nècuàchè tiàa xínduu yua, màsà dácuidà uun inì-nsia dèhe-nsia; xiñuhu dacuahú vî-nsiáñà. Conseju vî ni cuàha-nsia, te chinaha vî-nsiáñà nacua cuní Stoho-ndà Señor.

Nansa xiñuhu quida peón ndoó saín nùu lamú xi

⁵ Daaní, mii-nsiá nècuàchè xínduu peón, cunini vî-nsiá ñà-nduà dandacú lamú xi-nsia ñuhivi yohó. Quidañuhu-nsiánè, te cahvi vî-nsiánè. Iin-ni cunihnu vâha inì-nsia na ian Cristu nduú ana xinúcuáchi-nsiá nùu-xí.

⁶ Doco màdià cui si na indèhe-nè, dandu quidachuún vî-nsiá sàhà-ñá ndee vâha-nsia nùu-né; còo. Quidachuún-nsiá na ian Cristu nduú patrón quidáchuún saín-nsiá nùu-xí; iin-ni ni cúnihnú inì-nsiá ñà-quida vî-nsiá nacua cuní Dios quida-nda.

⁷ Na quidáchuún-nsiá, ni cóo vâha voluntad xi-nsiá ñà-quida-nsia iin chuun vî, quida-nsia cuenta na ian Stoho-ndà Señor xinúcuáchi-nsiá nùu-xí, màdi nùu nèhivi úun.

⁸ Vâchi ináhá-ndá, nùu mii-yá icúmí-ndá ñihí-ndá iin ñà-vâha xi-nda sàhà nsidanicuú chuun vî ni quida-nda, a ducán xínduu-nda nècuàchè libre, te ò nècuàchè ndoó saín nùu iin lamú.

⁹ Daaní, mii-nsiá nècuàchè xínduu lamú, divi ducání quida stná-nsiá xi ana nduú peón xi-nsia. Màsà càhàn dana-nsia, vâchi ináhá-ndá iá stná ana nduú Stoho-ndà, divi mii-yá iá ansivi, te (xiñuhu nsinuu inì-nsiá) ñà-nùu mii-yá iin-ni ndiaá nsidanicuú nèhivi.

Ñà-nduà sáhatahvi Dios ndohó ñà-chindee xi-nda cundee-nda nùu ñà-malu

¹⁰ Imindaa iñaha iá gà cachì, ñáni: iin-ni ni cúnihnú fuerte ini-ndà Stoho-ndà Señor, te ducán ñihí-ndà nacuahandee ini-ndà, vâchi yáha ga cahnú poder xi-yá.

¹¹ Cunaha-nsiá, cuàhà ñà-nduà ni chitnùni inì-yá cunduu nahi arma xi-nda ñà-chindee xi-nda sàhà-ñá màsà dáca ñà-malu-ndó, te dandahví-sindó.

¹² Vâchi màdi nèhivi ñuhivi yohó nduú ana nâá stnàhà xi-nda. Còo, Divi ñà-malu nâá stnàhà xi-nda. Cuàhà-sí, te fuerte-si, te ndoó stná ana xícusahnú nùu-sí. Cunaha-nsiá, divi ñà-malu nduú ana dandacu-xi nùu nsidaa nèhivi nchícùn ichì ñáa. Divi quisi siquini xicánúú ansivi nduú-si.

¹³ Ñâyücandüá, ni cuíchúun-ndá nsidaa ñà-nduú arma ni chitnùni ini Dios chindee xi-nda na quivi cuní ñà-malu ntàtuu fuerte-si nùu-ndà. Daaní, nú sàni cundee-nda (nùu-sí), vâtùni cundoo fuerte ñi-ndà.

¹⁴ Sàhà ñà-jaàn iin-ni ni cúnihnú fuerte ini-ndà. (Cuisi ñà-ndácuisi ni cúnihnú ini-ndà, te chindeámàndó) na ian chindéé cinturón ndee nuhní tixi soldadu (ñà-coo fuerza-te). Daaní, xiñuhu quida-nda puru ñà-íá vî, te cunduamà na iin dùhnú cáa ndixí soldadu ñà-chindee xi nchìca-tè.

¹⁵ Daaní, na ian màcùnàì soldadu ndisàn-té (ñà-cacanu-u-tè), ducán stná ndohó, ndiá icà-ndà cunihnu ini-ndà (cacanu-u-nda xi) razón ndiaha nansa nàcúndoo vâha-nda xi Dios.

¹⁶ Cunaha-nsiá (fuerte gà cuní ñà-malu dacà-síndó), na ian dandiachi-sí cuàhà flecha xixìn icà-ndà; doco nú iin-ni nihnú vâha ini-ndà mii-yá, dandu chindéámàndó na ian ni cúnduá iin ñà-sicàté caxin (ñà-màsà cuída flecha mà-ndó).

¹⁷ Daaní, nahi mbelú cáa soldadu, ducán nduú stná ñà-ñihnú ini-ndà ñà-sà-íá salvación xi-nda; daaní, nahi espada xi-nda nduú stná palabra ñi ni cachì Dios, vâchi divi palabra mà nduá xichúun Espíritu ñi xí-yá.

¹⁸ Daaní, nicanicuahàn xiñuhu càcàn tàhvi-ndà nùu-yá nacua datnúú Espíritu ñi xí-yá ini-ndà. Càcàn-ndà nùu-yá nsidaa ñà-nduá xiñuhu, te iin-ni ni cúndóo tùha stná-ndà. Màsà cúdúsán-ndà càcàn tàhvi-ndà nùu-yá, còo. Xiñuhu càcàn tàhvi-ndà ñà-chindee-yá nsidanicuú ana nduú nèhivi xí-yá.

¹⁹ Daaní, sàhà stná yùhù ni càcàn tàhvi stná-nsiá sàhà-ñá chindee-yá yùhù na càhìn xi nèhivi, te màsà dáyùhià yùhù càhìn sàhà razón ndiaha xí-yá, divi razón nisa ia dèhé sàna.

²⁰ Cunaha-nsiá, divi sàhà-ñá ni cuítià palabra mà, ñâyücandüá ni techuún Dios yùhù ñà-cacanu, te divi sàhà stná mà ié' vehecàa yohó. Ñâyücandüá, càcàn tàhvi-nsiá sàhí sàhà-ñá màsà yùhí càhàn vatí palabra mà nacua ndiá iqué.

Nansa ni dàxínu Pablo carta xi-ne, cásàhú-nè xi nsidaa nèhivi ñuu Éfeso

²¹ Yùhù cuní cundaà inì-nsia nansa yáhi xi nansa quidé yohó; ñâyücandüá sàni càhìn xi ñani màni-ndà Tiquico yohó, áma nacani-ne xi-nsiá nsidaájàn. Te cunaha-nsiá, cuàhà gà sàni chindee stná nècuàchì mà yùhù. Iin-ni quidá vî stná-nè nsidaa chuun xi Stoho-ndà Señor.

²² Pues vichi cuàhìn techuún-nè sàà-nè ndé ndoó-nsiá, dandu vâtùni cachitnùu-ne nansa yáha-nsi yohó sàhà màsà cùhúun gà ini-nsiá.

²³ Vichi ndácùcàhìn Stoho-ndà Jesucristu, te xicàn tàhvi nùu Yua-nda Dios sàhà-nsiá, ñáni. Xicàn tàhvi ñà-ni cúndóo vî-nsiá, te ni cúcúú stnàhá stná ini-nsiá sàhà-nsiá; te nicanicuahàn ni cúnihnú vâha inì-nsia mii-yá.

²⁴ Te vichi ni cúcúmí cuáhà-nsiá gracia xi Stoho-ndà Jesucristu, nú ndisa iin-ni cuú ini-nsiá sàhà-yá nicanicuahàn. Amén.

Tutu Nì Tiaa San Pablo nùù Nèhivì xí Dios Ndoó Ñuu Filipos

¹ Yùhù nduí Pablo, te compañerui yohó nduú Timoteo. Nèhivì xinúcuáchí nùù Jesucristu nduú-nsí. Te tiaá-nsí tutu yohó nùù nsidaa mii-nsiá, naquímání Dios sàhà-nsiá, xínduu-nsia ana idónuu, xì stná ana xinúcuáchí, xì nsidaa gá stná mii-nsiá nèhivì dava ga ndoó nùù-yá.

² Contentu ni cundóo-nsiá quida Yua-nda Dios xì Stoho-ndà Jesucristu, te cuàhà gá gracia xi-ya ni cùcúmi-nsiá.

Ñà-nduá ni xicàn tàhvi Pablo nùù Dios ñà-quida-ya sàhà nècuàchì xinúndísiá

³ Yùhù, na cada nsinúú ini mii-nsiá, naquímání Dios sàhà-nsiá.

⁴ Te cuàhà gá cudíi stná ini na cada xicàn tàhvi sàhà-nsiá nùù-yá,

⁵ vâchi nsinúú ini nansa quidá-nsiá chindéé stná-nsiá ñà-cuitiá razón vâha xi-ya, nacua quidá yùhù. Te ináhi iin-ni sàni chindee stná-nsiá ducán ndè quivi ni xinitnâhí xì-nsiá xì ndè vichi.

⁶ (Ñâyùcànduá, nâhà xicà) iin obra ndiaha nduá sàni quesaha-yá quidá-yá ini anima-nsiá, te ináhi iin-ni icúmi-yá quida-ya ducán dècuèndè sàà quivi (naxicocuñin) Jesucristu.

⁷ Te divi ducán ndiá ìqué cunihnu ini sàhà-nsiá, vâchi màni cuàhà-nsiá nùù, te iin-ni nihitâhvi stná-nsiá gracia (xi Dios) nahi yùhù. Vâchi cunaha-nsiá, mate yohó ié' ndiadí vehecà, doco sáhatahvi stná-yá yùhù gracia, te iin-ni icúmi nihitâhvi gué' ducán, mate (dacúhùn-te yùhù nùù juez), doco siempre icúmi càhàn nihni sàhà razón ndiaha xí-yá ñà-nduá palabra ndàcuisi.

⁸ Te mii-yá, ináhá-yá ñà-cuàhà guá nsinúú ini nsidaa-nsiá, nacua quidá stná Jesucristu xì-ndà, cuàhà gá cuú ini-yá sàhà-ndà.

⁹ Ñâyùcànduá, yùhù xicàn tàhvi nùù-yá ñà-chicá más ni sàà-nsiá cucuu stnahá ini-nsiá sàhà-nsiá, te iin-ni ni sàà stná-nsiá cundaà ini-nsia índù chuun nduú ñà-ìá vii, te índù chuun có-ìá vii.

¹⁰ Nú ducán, dandu mà ùhi cudíi ini-nsiá quida-nsia cuisì ñà-chicá ndiaha, te cunihnu ii ini-nsiá dècuèndè quivi naxicocuñin-yá, mà cóó gá ni-iin falta xi-nsia.

¹¹ Te mii-yá, icúmi-yá chindee-yándò ñà-quida vii-ndà ducán, dandu chicá cuàhà ñà-vâha xi-nda quee, te chicá cuàhà naquimani stná-ndâyá, te quee ga más tnũñuhu xí-yá.

Cuàhà gá ñà-ndiaha xí Jesucristu nihì-ndà nú ni cunchicùn vii-ndâyá vida xi-nda ñuhivì yohó

¹² Ñáni, cuní cundaà ini-nsiá sàhà ñà-nduá yáhi yohó, vâchi divi sàhà ñà-nduá sàni cui xí, ñâyùcànduá chicá más sàni xitiá razón ndiaha xí-yá inicutu.

¹³ Dècuèndè nsidaa nèhivì ndoó vehechuún cahnú, xì nsidaa stná soldadu, sàni cundaà ini-nè ñà-divi sàhà Cristu ndiadí.

¹⁴ Te cuàhà gá stná ñani-ndà nchicùn xì Stoho-ndà Señor, sà-sàha stná-nè valor vichi, vâchi sàni xini-nè (nansa quidè mate) ndiadí vehecà yohó, te sàhâyùcànduá vichi có-yúhí gá-nè càhàn vate-né palabra xi-ya.

¹⁵ Yùhù ináhi nansa quidá dava nèhivì càhàn sàhà Cristu, cuisì quidá-nè ducán ñà-cumbidia ini-nè, vâchi có-ndò sàhà ini-nè xì (ñà-nduá cachí). Doco dava-ne, cóó, quidá víi ndisa-ne, vâchi sàhà ñà-ìá vâha voluntad xi-ne, ñâyùcànduá càhàn-nè sàhà Cristu.

¹⁶ Doco nècuàchì có-quidá víi ma, sàhà-ñá interesadu gá-nè, ñâyùcànduá càhàn-nè sàhà-yá, có-nduá sàhà ñà-quidá víi ndisa-ne, cóó; cuisì cuni-nè ñà-chicá màsà yâha vâhi vehecà yohó.

¹⁷ Doco tucu quidá nèhivì quidá víi ndisa ma, cuú ndisa ini-nè (sàhí) na càhàn-nè sàhà-yá, vâchi ináhá-nè iin-ni nihnú stná ini càhàn razón ndiaha xí-yá nicanicuahàn.

¹⁸ Pues vichi ¿nansa cachì-ndà sàhà nsidaájàn? Pues yùhù cachí ñà-có-quidámà, a dananí uun-ne, te ò càhàn sahnú-nè, ndéni modo ni cui, doco xitiá palabra sàhà Cristu, te ñà-jaàn nduá cudíi ini sàhà-xí. Te chicá más icúmi cudíi gá ini después.

¹⁹ Vâchi ináhi, icúmi chuun jaàn quee viá sàhí, vâchi xicàn tàhvi-nsiá sàhí, te chindéé stná Espiritu Ìi xí Jesucristu.

²⁰ Yùhù nicanicuahàn nacání ini còtó quide iin ñà-cui nducahìn sàhà-xí. (Có-cuní quide ducán); iin-ni cuní quide nacua siempre quidé, divi ñà-càhàn vatí sàhà-yá. Iin-ni cuní quida víi' áma queé más gá tnũñuhu xí Cristu a ducán ni cuí sàhà-yá, te ò cutiacu gué ñuhivì yohó.

²¹ Vâchi nú itiàcù-ve, dandu puru (ñà-taví más gá tnũñuhu) xí mii-yá cundua. Te ò nú ni sàì cui stnáì (sàhájàn), dandu chicá ndiaha quee stnáma.

²² Doco nú ni coó gué' ñuhiví yohó, vihi-ni quida gué más gá obra xi-ya. Ñâyúcàndüá, có-ináhí ìndù-ñá chícá nsiha cuu xí,

²³ vâchi ndúi chuun jaân ndiaha gá íá', te ùhì nacàxin-ñà. Ian nduá ñà-nú ni cùi cùhìn coi nùù Cristu; te cuàhà gá nihnú stná ini ñà-jaân, vâchi chícá ndiaha queamâ cahín.

²⁴ Daani, ingâ nduu ñà-nú ni nánhítâhvi gué' ñuhiví. Ñà-jaân ndisa chícá cunduu ñà-vâha xi mii-nsiá,

²⁵ ináhí. Ñâyúcàndüá, sàni cundaà ini, icúmi coo chíi gué' ñuhiví yohó sàhà-ñá cutnahí xi-nsiá, te chindee gué' mii-nsiá ñà-chícá cunindisá víi-nsiáyâ, te cudüi gá ini-nsia sàhà-yá.

²⁶ Te cuàhà gá icúmi stná-nsiá naquimani-nsiáyâ sâhí na sâá tui ndé ndoó-nsiá, te cutnahá túi xi-nsiá.

²⁷ Mii-nsiá, sà-xínduu-nsia nècuàchì nchícùn xì palabra ndiaha xí Cristu. Ñâyúcàndüá, xiñuhu quida-nsia cuiisí ñà-íá vii nacua cachí palabra mà, a ducán ni sâi nâcòti-nsiá, te ò màsà sâi, có-quidâ, ndéni modo ni cui, cuní cunitnùhi sàhà-nsiá iin razón vâha ñà-iin-ni nchícùn ñi-nsiá ichì víi, te iin-ni anima icúmi stná-nsiá. Cuní cunitnùhi sàhà-nsiá ñà-iin-ni nihnú vâha ini-nsia, te sâhandee stná ini-nsia xiníndisâ víi-nsiá razón ndiaha xi-yâ.

²⁸ Te nècuàchì xiní ùhì xi-nsiá, màsà cuâha-nsia dayúhí-nè mii-nsiá ni-iyuhu. Te ñà-có-yúhí-nsiá mà, divi cundua seña nùù-né ñà-mii-né icúmi-né sàà-né ndañuhu-né. Doco nùù ndohó, cóò, seña cundua mà ñà-icúmi càcu anima-ndâ nùù Dios.

²⁹ Vâchi cunaha-nsiá, màdi cuiisí ñà-cunindisa-nda Cristu nduá ni chitnùni ini-yâ quida-nda. Còó, vâchi sàhâ gracia xi-ya sàni chitnùni stná ini-yâ ñà-ndoho stná-ndâ sàhà-yâ.

³⁰ Te sàni xini-nsiá, divi ducán ni cuu xi yùhù antes; cuàhà gá ni ndohi, te ndè vichi ndohó íi' (sàhà-yâ), ináhâ-nsiá.

2

Nansa ni nacoo chíi Jesucristu gloria xi-ya, doco después ni nanihi-yâ más gâ tnũñuhu xi-yâ ni quida Yua-nda Dios

¹ Ináhâ-ndâ, sàhâ Cristu cuní-ndâ quida vii-ndâ; te sàhâ-ñá màni stná-ndâ nùù-yâ ducán, ñâyúcàndüá sâhandee ini-ndâ nchícùn vii-ndâyâ. Te (ináhâ stná-ndâ) cutnahâ Espiritu ñi xi-ndâ ndoo-nda ñuhiví, te kuhí stnahâ stná ini-ndâ.

² (Pues sàhâ nsidaájân, cuní cuacundahví nùù nsidaa-nsiá) ñà-ni quidâ-nsiá iin ñà-dacúdî ini xí': cuní ñà-iin-ni cunihnu ini nsidaa-nsiá. Cuní ñà-iin-ni cucuu stnahâ ini-nsiá sàhâ-nsiá, na ian iin-ni anima xi ñi-ñi nâxinítnùni icúmi-nsiá.

³ Màsà quidâ-nsiá ni-ñâha sàhâ cuiisí interés; cóò. Ni màsà cútúxí ini ni-iin-nsia ñà-mii-nsiá nduu-nsiá mii-nsiá, te quida-nsia iñâha. Còó. Chícá vâha cunihnu ndahvi ini-ndâ; iin iin-nda ni cúnihnú ini-ndâ ñà-chícá ndiaá ñanitnaha-nda nùù mii-nda.

⁴ Ni màdi gá cuiisí chuun xi mii-nda cunsihi ini-ndâ quida-nda; cóò. Xiñuhu nacani stná ini-ndâ sàhâ ñà-ndüá cuní ñanitnaha-nda.

⁵ Ni cúcúmi-ndâ iin sâxinítnùni nahi ñà-icúmi Jesucristu,

⁶ vâchi mate Dios nduú-yâ, doco cóni nâcâni ini-yâ ñà-chícá ndiaá nduá ñà-ndùdávâ-yâ xi Yuandiahâ-yâ; cóò.

⁷ Ñâyúcàndüá, ni nacoo-ya (nsidaa tnũñuhu ma), te ni nanduu-ya na iin (tiâa ñuhiví yohó; na iin) ana xinúcuáchí uun, ducán ni nanduu-ya.

⁸ Te sàhâ ñà-jaân ni nâcùnihnu ndahvi stná ini-yâ, ni inini-ya nsidaa ñà-ndüá ni ndacu nuù-yâ quida-ya, dandu ni xihí-yâ, dècuèndè nchica iin cruz ni sâcütuu-ya.

⁹ Ñâyúcàndüá, vichí sàni nanihi-yâ chícá cuàhâ tnũñuhu ndiaha xi-yâ ni quida Yua-nda Dios; te chícá ndiaá quiví-yâ nùù quiví nsidanicuú gá nèhiví.

¹⁰ Sàhâ ñà-jaân (icúmi sàà iin quiví) ndacùcahan vate xi quiví-yâ Jesús, dandu icúmi nsidanicuú nèhiví nâcùtasisi-né (nùù-yâ), nsidaa nèhiví ñuhiví yohó, xi nsidaa stná ana ndoó ansiví xi tixi ñuhù,

¹¹ nsidaa-né icúmi-né nacuni-nè mii-yâ, te cachi vate-né ñà-divi Stoho-ndâ Señor nduú-yâ, dandu chícá más icúmi quee tnũñuhu xí Yuandiaha-yâ Dios.

¹² Ñâyúcàndüá cuní cunini-nsia ñà-ndüá cachí xi-nsiá mate xica ié' nùù-nsiá, ñani màni. Na nisa ñe ndé ndoó-nsiá nisa inini vii-nsiá yùhù; doco vichí chícá más cuní cunini-nsia, te quida vii-nsiá lucha ñà-câcu-nsia (nùù chuun có-íá vii yucán), vâchi nú iin-ni ni cúnihnú ndahvi ini-nsiá, te cahvi víi-nsiá mii-yâ, dandu vâtni càcu-nsia.

¹³ Vâchi Dios nduu ana datnúú xi ini-ndâ ñà-quida-nda ñà-ndüá cuní-yâ, te chindeé stná-yândò ñà-quida ndisa-nda cumprir nsidaámâ.

Nicanicuahân ni cündóó màni-ndâ

¹⁴ Mäsà cündóó-nsiá daquéé cuàchi tnahá-nsiá, te nää stnahá-nsiá sàhà ñà-ndúá quidá-nsiá.

¹⁵ Còó; iin-ni ni cündóó mání-nsiá sàhà-ñá mäsà cuídá cuàchi-nsia, vàchi ducán nduá ndiá icà quida ana nduú ndisa dèhe Dios; vàchi ndoó ñ-ndà ñuhiví yohó, te cuàhà ñanitnaha-nda, malu-nè, có-nìhnú víi ini-nè. Ñàyücàndúá, mäsà quidá-ndá ni-iin ñà-có-íá víi, vàchi ndohó nduú ana datnúú Dios sàxinínùnì-xi sàhà-ñá cundehe ñehivi ñuhiví ichi váha.

¹⁶ Sàhà ñà-jaàn iin-ni ni cúnchicùn-nsiá palabra cáhàn sàhà vida ndiaha, vàchi nú ducán, dandu na quívi (naxicocuíñ) Jesucristu, vátùnì cudíi cuàhà inì ñà-màdi uun-ni ni queé nsidaa ñà-ndúá ni ndoho güé' na ní quide chuun ìl xí-yá (ndé ndoó-nsiá).

¹⁷ Ináhí xiníndísá víi-nsiá vichi, te ñà-jaàn nduú na iin chuun ndiaha quidá-nsiá nùù-yá, na iin ofrenda dócò-nsiá nùù-yá. Te yùhù, nú ni sái cui stnái (sàhà-yá), dandu nahi inga ofrenda sáhatahvi gá-nsiáyà cunduu stná ñà-jaàn. Te cachí yùhù vátùnì iájàn, vàchi cudíi stná inì sàhà-ñá. Ndé stná mii-nsiá, vátùnì cudíi stná inì-nsia sàhà-ñá.

¹⁸ Te divi ducán cuní quida-nsia.

Timoteo xi Epafrodito

¹⁹ Nú ni cundéhe ndahví Stoho-ndá Jesús, yàchi icúmí techuín Timoteo sàà-nè ndé ndoó-nsiá, dandu (na nsiaa tu-ne), vátùnì nacunitnúhu stnái nansa yáha-nsia jaàn, dandu ndòo vaha inì sàhà-nsiá.

²⁰ Te divi Timoteo nduú ana cuàhìn techuín sàà, vàchi ndé ié' yohó, còò cá ana nahi mii-né, còò cá inga ana cuú ndisa inì-xi sàhà-nsiá nahi mii-né.

²¹ Vàchi nsidaa gá ñehiví, cuisì chuun xí mii-né nsíhi ini-nè, có-nàndúcú-nè (nansa nducuahà) chuun ìl xí Jesucristu.

²² Doco sà-ináhá-nsiá Timoteo, ñà-vàha ndisa-ne; te ináhá stnâ-nsiá cutnâhá-nsí ni xicanuu-nsi cachínúhu-nsí razón ndiaha xí-yá, nacua chindéé iin dèhe ana nduú yua-né, ducán ni quida Timoteo.

²³ Ñàyücàndúá, divi-ne cuní techuín sàà ndé ndoó-nsiá nú sàni cundaà inì nansa cuàhàn coo xí.

²⁴ Doco cahví xí Stoho-ndá Señor ñà-yàchi quee stnái libre yohó, te sàà stnái.

²⁵ Doco vichi tuxí inì chicá vaha techuín Epafrodito nasaa-nè. Cunaha-nsiá, na iin ñani mii nduú-né, vàchi iin-ni quidá-nsí chuun ìl xí Capitán ndiaha xi-nda. Te divi nduú ana ni techuín stná mii-nsiá ñà-cunihì-ne ñà-ndúá xiñuhu nú quixí.

²⁶ Te vichi cuàhà gá cuní-nè cuni tu-ne mii-nsiá. Te cuhúún gá stná ini-nè, vàchi ináhá-nè sàni xinitnúhu-nsia ñà-nì quicuehè-nè.

²⁷ Te ndisa, cuèhè dana ni sandua, cuàhàn-nè cui-nè ni cùí, doco ni indehè ndahví Dios-nè, (cóni xihì-nè). Te màdi cuisì mii-né ni níhitáhvi ducán; còó, vàchi dècuedè stná yùhù ni níhitáhvi sàhà-ñá ni nduvàha-ne, te vichi mà cóó gué' tnùnsi ini.

²⁸ Ñàyücàndúá, chicá cuní naquihìn-ne ichi nasaa-nè sàhà-ñá cudíi gá stná ini mii-nsiá. Te nú ducán, dandu yùhù stná, chicá mà cóó gué' tnùnsi ini.

²⁹ Daaní, nú sàni nasaa tu-ne, dandu xiñuhu cudíi ini-nsiá sàhà-né, te quidañuhu-nsiánè nacua ndiá icà-ndà quida-nda xi nsidaa ñani-ndà iin-ni (xinúcuáchi víi) stná nùù Stoho-ndá Señor.

³⁰ Vàchi mii-né, sàhà chuun ìl xí Cristu cuàhàn-nè cui-nè ni cùí; ni cóni ndúlócò-nè sàhámà, cuisì-ní cuní-nè quida ndisa-ne cumplir chuun (ni níhì-né) ñà-chindee-né yùhù, vàchi mii-nsiá, mà cùí quida-nsia ñà-jaàn (ñà-xica ndoó-nsiá).

3

Ñà-ndiáá ndisa sàhà ñà-ndee vaha-nda nùù Dios

¹ Iá inga iñàha cuní cachí xi-nsiá, ñáni: nicanicuahàn xiñuhu cudíi ini-ndà ñà-ndòò-ndà nùù Stoho-ndá Señor. Te nú divi palabra jaàn sàni tiai nùù-nsiá antes, có-quidámà, vàchi iin palabra chindee ndisa xi-nsiá nduá, te yùhù, có-cuñáñi natiaia.

² Cuidadu cundoo-nsia sàhà ñehivi malu chináhá xi ley chicuèhè, vàchi nècuàchi quidá ducán, nihnú siquini ini-nè na iin quisí. Te caquin stná-nsiá cuidadu sàhà ñehivi (cuní màcùtuu seña xi raza Judea icà ñehivi), vàchi cutu ñà-danácuehè-nè nècuàchì mà queájàn.

³ Vàchi ndohó nduú ñehivi icúmí ndisa xi seña mà, doco ini anima-ndà iá, vàchi anima-ndà nduú ndé cahví-nda Dios. Cuisì Jesucristu cudíi ini-ndà sàhà-xí, có-tuxí ini-ndà cui cundiaa inga iñàha quida-nda,

⁴ mate yùhù, vihini cunihnu inì ndiáá stnái, te chindeámà yùhù (nùù Dios). Cunaha-nsiá, nú cuisì descendencia xi-nda, te ò obra xi-nda ni cundíáá nùù-yá ni cùí, dandu cuisì yùhù chicá cundiaa.

⁵ Vàchi na ní tùinuí ñuhiví, ni sàcùtuu stná seña mà ìqué tixi ùnà quívì (nacua cachí ley). Iin nècuàchi raza Israel nduú stnái, vàchi descendencia xi dèhe Israel nani Benjamín nduí,

te cáhàn stnái dàhàn hebreu nahi yuadíhí. Daaní, iin nècuàchì fariseu nduu stnái, te nacua (chívàha fuerte) nècuàchìmà ley sàhaha, ducán nisa quida stnái.

⁶ Yáha ga nisa xinindisé (ley mà), te ñàyücàndüá nisa quida quini güé' xì nèhivì cahvi xi Jesús. Nsidaa ley sàhaha ma nisa chivàhi; còò falta nì quidé diqui ley mà.

⁷ Ñàyücàndüá, vätùni cundiaa nsidaamà (nùù Dios) nì cahìn. Doco còò, vächì na ní sài nì cundaà inì sàhà Cristu, dandu nì sànihì stnái inì ñà-ni-iyuhu có-ndiáá nsidaa ñà-ndüá nisa quide mà.

⁸ Te vichi nihnú inì vätùni ndañuhu nsidanicuú fama xi mà ñà-sà-ìnahí Stoho-ndà Jesucristu vichi, te yáha ga ndiaha ñà-jaàn. Doco nsidaa ñà-ndüá nisa cahvi xí antes, ndevàha iñàha ndua nú vichi, còò cá chuan nú. Ducán nihnú inì sàhà-ñà nì nihitáhvi' cutnahì xi-yà nicanicuahàn,

⁹ te ndahà mii-yá coi. Doco màdì sàhà obra xi mií icúmì ndee vahi nùù-yá, còò, vächì cuiisì nùù ley sàhaha ndiáá obra mà. Te vichi único ñà-ndiáá ndisa nduu ñà-cunindisa-ndayá, dandisà vätùni ndee vaha-nda nùù Yuamáni-yá, vächì xiníndisá-ndáyà.

¹⁰ Ñà-jaàn nduá quidé vichi sàhà-ñà cui sài cunaha vaha ndise mii-yá, te cucumi stnái poder ndiaha xí-yá, vächì divi sàhà poder ndiaha ma nì nihì-yá nì natiacu-yà. Daaní, dispuestu iá stnái ndohi nahi mii-yá, te cunihnu stnái inì nì xihì stnái na ian nì xihì-yà,

¹¹ áma nihitáhvi' natiacu stnái.

Xiñuhu cuàhandee ndisa ini-ndà áma ñhìndèè-ndà cunduu-nda nèhivì vaha ndisa

¹² Tãñáha ga sài cunduu ndise iin nèhivì nacua cunì Jesucristu cundui. Tãñáha ga sài cundui iin ana còò ndisa falta xi; còò. Cuisì iin-ni nchícuìn mii-yá, áma ducán ñhìndèí cundui iin nèhivì vaha ndisa nacua nihnú inì-yà cundui na ní cana-ya yùhù.

¹³ Ináhí tãñáha ga sài cundui nacua icúmì cundui después; còò, ñàni. Doco iá ndisa iin ñà-ndüá quidé: quidé lucha nandòó dahuin nsidaa ñà-ndüá sàni yàha, te sàhandee cahnú inì, áma nihì' (chicá quida vii) quivì vaxì xi-nda.

¹⁴ Na ian quidá tēcuachi dadavástnàhà carrera, ducán quidé, iin-ni nchícuìn ichi cuàhìn, divi ichi mii-yá iá ansivi; dandu quivì nsihì (vida xi), nihnú inì nihì stnái iin ñà-vàha ndiaha nùù-yá, vächì divi sàhàjàn nduá nì cana Dios ndohó ñà-cunchicùn-ndà Jesucristu.

¹⁵ Ñàyücàndüá, nsidaa ndohó ana xiníndisá vaha, xiñuhu cunihnu ini-ndà nacua sàni cachì jaàn. Te nú tucu nacáni ini-nsiá sàhà iñàha, dandu icúmì Dios datnúù-yà sàxinítnùnì-nsiá sàhámà.

¹⁶ Doco nsidaa ñà-ndüá sàni sàà-ndà nì cundaà vaha ini-ndà, divi ñà-jaàn nduá xiñuhu cunchicùn ndisa-nda.

¹⁷ Ñáni, nacua quidá yùhù, ducán cunì quida stnái mii-nsiá. Te sà-ìnahá-nsiá nansa quidá-nsì, ñàyücàndüá, cundehè-nsiá ana quidá ví stnái nahi nsihùh, te ducáni quida stnái mii-nsiá.

¹⁸ Vächì ndoo cuàhà ana có-quidá ví. Cuàhà xichì sàni cànìn xi-nsiá sàhà nècuàchìmà, te vichi tucu tu dansínuu inì mii-nsiá sàhà-né, dēcuèndē sacú stnái sàhámà. Vächì quidé cuenta na ian xinì ùhì nècuàchìmà (palabra nacáni nansa nì xihì) Cristu nchica cruz (sàhà-ndà).

¹⁹ Doco fin icúmì-né nduú ñà-ndañuhu dahuun-ne, vächì còò ndisa Dios nùù-né, cuiisì ñà-ndüá xího mii-né nduá ndulócò-né sàhà-xí, te tuxí inì-né ñà-sàhà chuun siquini quidá guá-nemà icúmì quee tñùhuhu xí-né, vächì cuiisì ñuhví yohó-ní nduá nihnú inì-né.

²⁰ Doco ndohó, còò. Ansivi nduú ñuu-ndà, te dēcuèndē yucán icúmì nuu ana dacácu xi-nda, divi nduú Stoho-ndà Jesucristu. Ñàyücàndüá, vichi ndiatú cuéyàà-ndà sàà quivì naxicocuin-yà,

²¹ dandu nadama-ya iquicúñú icúmì-ndá vichi, vächì ñà-débil nduá, doco na sàà quivì yucán, icúmíà dāma stnái nahi cuerpu ndiaha mii-yá. Te mà ùhì quida-ya ñà-jaàn, vächì cahnú poder xi-ya, vätùni cundee-yá nùù nsidanicuú iñàha, te cusahnú-yá.

4

¹ Pues sàhà nsidaajàn iin-ni nì cúnihnú vaha ini-ndà Stoho-ndà Señor.

Xiñuhu nàcùndoo vaha-nda xi ñanitnaha-nda

Cunaha-nsiá, màni gá-nsiá nù, ñàni; cuàhà gá nsinúú inì mii-nsiá, te cudí stnái inì sàhà-nsiá. Na iin ñà-vàha-xi xínduu-nsia nù, vächì cuú ndisa inì sàhà-nsiá.

² Te yùhù, sacúndáhvi' nùù Evodia xi nùù Síntique ñà-nì nàcùndoo vaha-ne, vächì iin-ni Stoho-ndà Señor càhvi-ndà.

³ Daaní, stnái mii-ní nècuàchì nduú compañeru màni jaàn, sacúndáhvi' stnái nùù-ní ñà-chindee-ní nècuàchì ñahà jaàn, vächì cuàhà gá nì chindee stnái-né yùhù; iin-ni nì iicanuu nsidaa-nda nì dàcútià-ndà razón ndiaha xí-yá, ndohó, xi mii-né, xi stnái Clemente, xi dava

ga stná compañeru ndoo jaan. Nsidaa-nsiá, sàni nacáva stná quivi-nsiá nùu tutu xi vida ndiaha.

Màsà nácánì ini-ndà, vächì icúmì Jesús naxicocufin-yà

⁴ Nicanicuahàn xiñuhu cudii ini-ndà ñà-ndòò-ndà nùu Stoho-ndà Señor. Tucutu cachí xì-nsiá, ni cúdii cuahà ini-ndà sàhà-yá.

⁵ Màni gá ni quida-nda xi nsidanicuú nèhivi, te (nsinuu stná ini-ndà) ñà-sà-ítúú Stoho-ndà Señor naxicocufin-yà.

⁶ Màsà nácánì ini-ndà sàhà ni-ìñàha; còó. Nsidaa ñà-nduá yáha-nda, ni càhàn-ndà xì Dios sàhá. Ni càcàn tàhvi-ndà nùu-yá, te naquimani stná-ndáyá.

⁷ Dandu seguru sàà-ndà cunihnu dadì ndiaha ini-ndà quida-ya, te mà yúhì gá-ndà, ni mà ndúlócò gá stná-ndà, vächì ndiaha gá chindéé Jesucristu, mate có-sàà-ndà mànihi ini-ndà nansa quidá-yá, te ndañuhu ñà-yúhì-ndà.

Ndiá ìcà-ndà nacani ù ini-ndà

⁸ Ultimo ñà-nduá cachí xì-nsiá nduá yohó: cuidadu ni cundóó-nsiá sàhà ñà-nduá nihnú ini-nsiá. Cuisi-ní ñà-nduú ñà-ndácuisi ni cúnfnú ini-ndà, ñànì; cuisì-ní ñà-ìá tñùñuhu-xì, xì ñà-ìá vii, xì ñà-nduú chuun sahnú ò chuun ndiaha, nsidaájàn vátùni nacani ini-ndà sàhà-xì. Vächì nù íá tñùñuhu víi xán, te ò íá stná fama xan ñà-nduá iin chuun vaha, dandu vátùni cunihnu vaha ini-ndàñá.

⁹ Ni quidá ndisa-nsiá cumplir nsidaa ñà-nduá nì chinahì mii-nsiá na ní dàcuahí-nsiá, vächì ni xini stná-nsiá nansa íá modo xì, te nì inini stná-nsiá ñà-nduá nì cachì xì-nsiá. Pues nsidaájàn xiñuhu quida ndisa-nsiá cumplir, dandu vátùni cundoo vaha-nsiá xì Dios; te cunaha-nsiá, cuahà gá cuní-yà cundoo manì-ndà.

Nansa ni cachi Pablo ni naquimani-né nècuàchì ñuu Filipos sàhà ñà-nduá ni cutahvi-né nùu nècuàchmá

¹⁰ Cuahà gá cudíi inì sàhà mii-nsiá quidá Stoho-ndà Señor, vächì sàni nsinuu tu ini-nsiá yùhù. Sà-ìá quivi có-chindéé gá-nsiá yùhù, doco cuisì sàhà-ñá mà cùu, màdiá sàhà ñà-nì nándòó ndisa-nsiá yùhù.

¹¹ Te màdi sàhà ñà-ìá cuahà necesidad xi nduá cachí ducán; còó, vächì sàni cutùhe coi contentu a yáha vahi, á coó.

¹² Sàni càin yáha ndahví, te sàni càan stnàì nù icúmì cuahà ìñàha; vátùni íá nsidaájàn nùu. Vächì a ducán xihì doco, te ò có-xihì doco, davani queá nùu, có-quidá, a ducán íá necesidad xì, te ò cuahà ìñàha icúmì,

¹³ ndéni ìñàha nì cui yáhi, vátùni ié' ñà-quadandee ìni sàhá, vächì divi Cristu nduú ana nàcuàhandee ìni xí.

¹⁴ Cunaha-nsiá, mate ducán cachí xì-nsiá, doco cuaha-nì íá ñà-nduá nì quida-nsiá nì chindee-nsiá yùhù sàhà necesidad nisa icumí.

¹⁵ Te inahá-nsiá nansa nì quida-nsiá quivi primeru na ní xicanui xì razón ndiaha, te nì quei ndé ndoo-nsiá ladu Macedonia jaan vaxì. Pues còó cá nèhivi xì mii-yá nì nàxícónfhi iin ñà-vaha nùu, cuisì mii-nsiá nècuàchì ñuu Filipos.

¹⁶ Te màdi cuisì ñà-jaan, vächì iin ùi xichi nì techuún gá stná-nsiá iin cooperación xì-nsiá na ní sa-ìe ñuu Tesalónica.

¹⁷ Doco cunaha-nsiá, màdi ñà-cùnfi nìhì cuahà ìñàha nùu-nsiá nduá, còó. Cuisì cuní coo obra xì-nsiá, te ducán nìhì-nsiá cuahà ñà-vaha nùu Dios.

¹⁸ Pues vichì sàni quesaa nsidaa ñà-nduá nì techuún-nsiá nùu, vächì sàni quida Epafrodito-ñà entregar nùu; ñàyùcànduá, ndiaha gá sàni cundiatùu vichì, na ian sàni nducuiqué nduá. Te tñùmani xì-nsiá mà, na iin promesa nì dòcò-nsiá nùu Dios nduú stná, na iin ñà-tnami nì sàhatahvi-nsiá mii-yá, te cudíi gá ini-yá sàhà-ñá, vächì divi ducán cuní-yá quida-nda.

¹⁹ Ñàyùcànduá, nsidaa ñà-nduá xiñuhu nùu mii-nsiá, icúmì-yá taxi-yañà, vächì cuahà gá ñà-cuicà ndiaha icúmì-yá, te sàhatahvi-yañà ndohó sàhà ñà-nduú-ndà nèhivi xì Jesucristu.

²⁰ ¡Ansivhéhe cahnú-yá! Nicanicuahàn nì tavá-nda tñùñuhu xì-yá, vächì Yuandiáhá-ndà nduú-yá. Amén.

Nansa ni casàhù stnahá Pablo xì nsidaa gá nèhivi ñuu Filipos

²¹ Casàhù-nsiá xì nsidaa gá ana nduú nèhivi xì Jesucristu ndoo jaan. Te nsidaa stná compañeru yohó, casàhù stná-nè xì mii-nsiá.

²² Stná nèhivi xì-yá quidáchuún vehe rey cahnú César, cuahà gá casàhù stná-nè xì-nsiá. Te nsidaa dava ga nèhivi xì-yá ndoo yatni yohó, casàhù stná-nè.

²³ Ni cùcúmì nsidaa-nsiá cuahà gracia xì Stoho-ndà Jesucristu. Sà-ìá.

Tutu Nì Tiaa San Pablo nùu Nèhivì xí Dios Ndoó Ñuu Colosas

¹ Yùhù nduí Pablo, iin ana ni nìhì chuun nùu Jesucristu, vâchi ducán ni chitnùnì ini Dios. Te yohó iá stná ñiani-ndà Timoteo,

² cutnáhâ-nsí cásàhù-nsí xì nsidaa mii-nsiá nèhivì ñí xí Cristu ndoó ñuu Colosas, vâchi mii-nsiá, iin-ni nchìcùn vîi stná-nsiá ichì-yá, te nahi iin-ni ñani xinduu stná nsidaa-nda. Pues, vichi ni cùcúmì cuàhâ-nsiá gracia xi Yua-nda Dios. Contentu ni cùndóó-nsiá quida-ya.

Ñà-nduá ni xicàn Pablo nùu Dios na ní xicàn tàhvi-ne' sàhà nèhivì xiníndisá-xí-yá

³ Nsiùhù, cada xicàn tàhvi-nsí nùu Yuandiaha Stoho-ndà Jesucristu, naquímáni-nsí mii-ya sàhâ-nsiá.

⁴ Vâchi sàni xinitnùhu-nsi ñà-cuàhâ guá nihnú vâha ini-nsiá Dèhemani-yá, xì ñà-cuàhâ guá cuú stná ini-nsiá sàhâ nsidaa nèhivì xí-yá.

⁵⁻⁶ Ansivéhé-yá, vâchi cuàhâ gá tnùndé ini icúmí-ndá ñà-nihitáhvi-ndà ñà-ndiaha ñí xí-yá iá ansivi. Te divi ñà-jaàn nduá ni xinitnùhu-nsia na ní sàa palabra ndàcuisi xí-yá nùu-nsiá, te ni inini-nsiá razón vâha xi-ya. Pues divi palabra mà nduá sàni xitiá stná inicutu ñuhivì, te ndiaha gá chindéá nèhivì. Te vichi cuàhâ gá stná nèhivì sàni quihvi ichì mà nacua ni quida mii-nsiá quivì ni xinitnùhu-nsia palabra mà, te ni cundaà ini-nsia nansa iá ndisa gracia xi Dios.

⁷ Pues inii dècuèndè quivì yucán sàni chindeámà mii-nsiá. Te gracia xi-ya mà nduú stná ñà-nduá ni dàcuàhá stná Epafra mii-nsiá. Vâchi iin-ni xinúcuáchí stná nècuàchimà nùu Cristu nahi nsiùhù, te màni cuàhâ stná-nè nùu-nsí. Vîi gá quidá stná-nè nsidaa chuun ñí xí-yá yucán ndé ndoó-nsiá.

⁸ Te divi nùu mii-né ni xinitnùhu-nsi nansa yáha-nsia xì nansa cuú stná ini-nsia sàhâ-nsí quidá Espiritu ñí xí Dios.

⁹ Ñâyùcànduá, dècuèndè quivì ni cundaà ini-nsí ñà-jaàn, iin-ni xicàn tàhvi-nsí nùu-yá sàhâ-nsiá, xicàn tàhvi-nsí ñà-ni sàa-nsiá mànihi ini-nsiá nansa cunì-yá quida-nda ñuhivì yohó. Te xicàn tàhvi stná-nsi ñà-ni sàa-nsiá cundaà nsihi ini-nsia sàhâ ichì-yá, te cumi-nsiá iin sàxinitnùnì ndiaha.

¹⁰ Ducán dandu nihindèè-nsiá cacanuú vîi-nsiá ñuhivì yohó nacua ndiá icà-ndà quida-nda ñà-nduù-ndà nèhivì xí Stoho-ndà Señor. Te ducán cudìi stná ini-yá sàhâ-ndà, vâchi modo jaàn nìhì stná-ndà quida-nda nsidanicuú clase obra vâha, te sàa stná-ndà cunaha vâha-ndayá chicá más.

¹¹ Te sàhâ-ñà ndiaha gá poder xi-ya, ñâyùcànduá xicàn tàhvi stná-nsi ñà-ni nàcuàhandee ini-yá mii-nsiá xì poder ndiaha mà, dandu vâtùni quidaandee cahnú ini-nsia, (mate ni yáha-nsia tnùndoho), doco vâtùni cudìi ini-nsia,

¹² te naquimani stná-nsiá Yua-nda Dios (sàhâ gracia xi-ya). Vâchi sàni dama-ya anima-ndà, te vichi vâtùni nihitáhvi stná-ndà cuàhâ ñà-ndiaha ñí xí-yá nacua nihitáhvi nsidaa gá nèhivì ñí xí-yá, vâchi sàni dàtnùu-yá sàxinitnùnì-ndà.

¹³ Te vichi sàni tavà-yándó nùu ndahà (ñà-malu, vâchi) cuisì ichì ñáa ni sanduamà, te ni dàyáha-yándó ndé ndahà Dèhemani-yá Jesús.

¹⁴ Sàni quee-nda libre (nùu ndahà-sí), vâchi sàhâ nìi Jesús ni xitiá, ñâyùcànduá vâtùni ni xicahnú ini-yá sàhâ cuàchi-nda.

Nansa ni nìhì-ndà ni nàcùndoo vâha-nda xi Dios sàhâ-ñà ni nìhì Jesucristu sàhâ-ndà

¹⁵ Có-tùí Yua-nda Dios cundehè-ndáyá, doco mimí nacua iá-yá, divi ducán iá stná Dèhemani-yá (Jesús). Te divi Dèhemani-yá nduú ana chicá ndiaá nùu nsidanicuú iñàha iá ñuhivì.

¹⁶ Vâchi sàhâ ndahà Dèhemani-yá ni quidavâha-ya nsidaa ñà-iá ñuhivì xì ansivi, nsidaa ñà-nduá indéhe-nda, xì nsidaa stná ñà-có-tùí cundehè-ndà, divi sàhâ ndahà Jesús ni cuyucun nsidaajàn. Vâchi ni quida vâha-ya ángel dandacú, xì stná ángel chicá xinúcuáchí, xì nsidaa gá stná ana fuerte xicánúú ansivi, nsidaa-némà, sàhâ ndahà-yá ni cuyucàn sàhâ-ñà ni quee gá más tnùñuhu xí-yá.

¹⁷ Tàyóo ni-iñàha ñuhivì, te sà-iá mii-yá. Te sàhâ stná poder xi-ya itnìí tnahá nsidanicuú iñàha.

¹⁸ Te ndohó nècuàchì iin-ni cahvi xi-yá, nahi cuerpu xi-ya nduu-nda, te mii-yá, dandacú-yá nùu-ndà na ian dandacú ñini-ndà nùu-ndà. Nùu mii-yá sàni nìhì-ndà vida xi-nda. Dihna-ya ni natiacu-yá nùu nsidaa nèhivì, ñâyùcànduá nduú-yá ana chicá cusáhnù inicutu ñuhivì.

¹⁹ Vächì sàni chitnùni ini Yua-nda Dios cuñuhu chitu (vida saín xí-yá) ini anima Dèhemaní-yá.

²⁰ Te cunaha-nsiá, ñà-nì xihì-yá nchìca cruz, te nì xitiá nù-yá, sàhà ñà-jaàn nduá vátùni nàcùndoo vaha-nda nù-yá, vátùni nihitáhvi nsidaa nèhivi nàcùndoo vii-né xí-yá, a ducán nduú-né ana ndoo ñuhivi yohó, te ò ana ndoo ansivi.

²¹ Antes cónisá nìhnú ini-nsiá mii-yá. Ndè nisa xini ùhi stná-nsiàyà sàhà chuun malu nisa quida guá-nsiá, doco vichì sàni nàcùndoo vaha-nsia xí-yá.

²² Vächì sàhà ñà-nì nanduu-ya nahi nèhivi ñuhivi, te nì xihì-yá, ñàyùcànduá vátùni nì nihitáhvi-nda nàcùnhnu ì ini-nda, te cuxio dahuun cuàchi-nda, ndutu nsihá. Ducán dandu vátùni sàà-nda nù (Yua-nda Dios) quida-ya.

²³ Doco xiñuhu ñà-iin-nì cunihnu vaha ini-ndàyá; màsà nácóó-nda fe xi-nda. Màsà nándodó-nda ichì-yá, nì màsà cuáha-nda datúcù nèhivi-ndó nù razón ndiaha, vächì sàhà palabra mà iá tnündé ini xi-nda. Te (ansivéhé Dios), sàni inini stná-nsiá palabra mà; daaní, dècuèndè stná inicutu ñuhivi sàni xitiá stná. Te yùhù stná Pablo, xinúcuachí stná (nù chuun ma), cachítnùhi palabra mà xì nèhivi.

Ñà-nduú chuun nì nihì Pablo ñà-cunucuachi-né nù nsidaa nèhivi iin-ni cahvi xi Jesús

²⁴ Mate cuáhà gá ndohí sàhà-nsiá, doco cudí inì, vächì nú nì ndohí ducán, dandu chicá yächì cuacatnahá nsidaa ñà-icúmi ndoho gá Cristu sàhà nèhivi cahvi xí-yá, vächì nahi cuerpu-yá nduu-nda.

²⁵ Te sàhà ñà-vaha xi mii-nsiá sàni chitnùni ini-yá cunucuachí nù nsidaa nèhivi cahvi xí-yá. Te chuun sàni nihí nduú ñà-cachitnùhu nsihì palabra xí-ya.

²⁶ Palabra nisa ia dèhé antes nduá cachítnùhi. Caní cuà cóni cundáà ini xii-nda sàhámà. Doco vichì sàni dátú-yañà nù nèhivi xí-yá.

²⁷ Vächì nì chitnùni ini-yá cundaà ini-nda ñà-ndiaha guá iá palabra mà, te cuní stná-yá cunitnùhu nèhivi nsidanicuú ñuu. Pues dohó cachí palabra mà: vátùni coo Cristu meru ini anima-nda, te sàhámà vichì iá iin tnündé ini ndiaha xi-nda ñà-sàà-nda ndè gloria.

²⁸ Ñàyùcànduá, divi mii-yá disàhà-xí cáhàn-nsi xì nsidaa nèhivi, chináhà-nsinè, te sàha-nsinè ichì vaha, áma sàà-nè cunihnu vaha ndisa ini-nè mii-yá nacua ndiá icà-né.

²⁹ Pues ñà-jaàn nduú chuun sáhandee inì quide nacua chindéé-yá yùhù, vächì sàha fuerte-yá yùhù poder ndiaha xí-yá quideámà.

2

¹ Yùhù cuní cundaà ini-nsia ñà-cuáhà guá (xícàn tàhvi nù Dios) sàhà-nsiá xì sàhà stná nècuàchì ñuu Laodicea, te có-nándodó stná nsidaa nèhivi ndoo jaàn tàñáha ga cuni nù xí.

² Xícàn tàhvi ñà-nì nàcuàhandee ini-nsia, te iin-ni nì cuú stnahá stná ini-nsia sàhà-nsiá. Te nì sàà stná-nsiá cundaà vaha ini-nsia sàhà ichì-yá, dandu mà cundóó gá-nsiá xì duda. Te ndiaha gá cundujàn, vächì después icúmi-nsiá sàà-nsiá mànihì ndisá ini-nsia palabra sàhà-yá nisa ia dèhé antes, divi palabra sàhà Jesucristu.

³ Vächì cuiisì ichì mii-yá nduú ichì nchichì ndiaha ndisa; cuiisì ichì-yá nduú ichì ndé cundaà ndisa ini-nda.

⁴ Ducán cachí xì-nsiá sàhà màsà chíyúhu nì-iin nèhivi mii-nsiá, te dandahví-nènsiá.

⁵⁻⁶ Vächì mate có-ié cutnáhi xì-nsiá yucán, doco nihnú inì mii-nsiá, te cudí gá inì na xinítnùhi quidá víi-nsiá, te xiníndisá fuerte stná-nsiá Stoho-nda Jesucristu. Ñàyùcànduá, nacua nì quida-nsia na ní quihvi-nsia ichi-yá, divi ducán quida-nsia seguir vichì, iin-ni nì cunchícùn vii-nsiá ichì-yá.

⁷ Iin-ni màsà tícù-nsiá quida inga palabra, te nsiquívi chicá más nì sàà-nsiá cunihnu fuerte ini-nsia mii-yá sàhà-ñà màsà nunca naco-nsia ñà-nduá nì chinaha-nsi mii-nsiá. Iin-ni nì quidá-nsiá nsidaámà, te nicanicuhàn nì náquimàni stná-nsiáyà.

Nansa iá vida saa sà-icúmi-nda ñà-nchícùn-nda Jesucristu

⁸ Cuidadu nì cundóó-nsiá màdí datúcù inga nèhivi mii-nsiá. Nchichì cáhàn-nè, doco dandahví uun-ne. Cutu estilu nì naco-nsiá nèhivi nduá cachí-nè. Dàñhù xì nèhivi úun ñuhivi yohó nduá, có-nduá ley xi Cristu.

⁹ Doco mii-yá, meru Dios nduú-yá; mimí nacua iá Yua-nda Dios, ducán iá stná-yá, te iá stná iquicúñu-yá.

¹⁰ Te sàhà ñà-sàni ndèe anima-nda ini anima mii-yá, ñàyùcànduá chitu stná anima-nda mii-yá vichì. Te chicá fuerte-yá nù nsidanicuú ángel, xì nù stná nsidanicuú ñà-malu.

¹¹ Daaní, sàhà stná ñà-nchícùn-ndàyá, sàni sàcùtuu stná seña xi Dios, (ini anima-nda); màdí icà-nda nì sàcùtua. Te ¿indú ñà-cuní cachì seña mà? Divi ñà-sàni cuxio cuàchi anima-nda, nsidanicuú cuàchi nisa xicàn guá cuerpu xi-nda quida-nda.

¹² Te na ní cuhii-ndà, seña nì sanduamà na ian cutnaha-nda xi mii-yá nì ndùxin stná-ndà, te nì natiacu stná-ndà nahi mii-yá. Pues ducan quida-nda cuenta ni cuu xi-nda ñà-sàni xinindisa-nda cahnú gá poder icúmí (Yua-nda) Dios, te sàhámà nì dānātiácú-yà Jesús.

¹³ Te mii-nsiá, sàhà falta xi-nsia, xi sàhà stná ñà-có-nduú-nsiá raza itúú seña xi-ya icà-xí, ñàyùcàndúà còò vida ndiaha xí anima-nsià nìsà ìa. Doco tucu iá vichi, sàni natiacu-nsià quidá-yá cuenta, (nacua mii-nsiá, te ducán stná nsiùhù). Vàchi ñà-nì dānātiácú-yà Jesús, divi ndiaá stná sàhà nsidaa ndohó. Te sàhà-ñá ducán nduá, sàni xicahnú stná ini-yá sàhà nsidaa cuàchi-nda.

¹⁴ Nì dāndùtù-yá nsidaa ñà-nduá inihicá-ndá nuù-yá. Nì ndutu dahuun cuenta itnii-yá sàhà-ndà. Iá ndisa falta xi-nda nisa cachi cuenta ma, doco vichi sàni cuxi nsidaámà nì quida Jesucristu, vachi nì sàcùtuu-ya nchica cruz, te sàhà ñà-jaàn nduá nì ndutu cuenta mà.

¹⁵ Te nsidaa ñà-malu, mate yáha ga fuerte-si, te ò dana guá-si, doco nì cundee dahuun-ya nuù-sí. Yáha ga nì nducahan-sì nì quida-ya, vachi ndiaha gá nì cundee-yá (na ní xihì-yà) nchica cruz.

Xiñuhu nandòò dahuun-nda nsidaa estilu cāhàn sàhà cuisì modo xi ñuhivì yohó

¹⁶ Sàhà nsidaa ñà-jaàn, màsà ndúlócò-nsià nēhivì xitnùhu xi-nsiá sàhà ñà-nduá xixí-nsiá, ò ñà-nduá xihì-nsiá, te ò iin vicò (cuni-nè) chivàha-nsia, mate nì cundúá iin vicò cahnú, ò vicò natiácú yoo, te ò iin quivì ndoó ndahà-nsiá.

¹⁷ Vachi nsidaa estilu sàhà ma, seña uun nì sandua, vachi divi Cristu nduú ana nì cachtinùhamà sàhà-xí.

¹⁸ Ñàyùcàndúà, màsà cuáha-nsia (dandahví nēhivì-nsiá, vachi nú ducán), dandu ndañuhu premiu xi-nsia. Cachi nēhivì dandahví mà ñà-xiñùhù cahíchi ini-ndà mii-nda, te cahví stná-ndà ángel, cachí-nè, (vachi) iá ñà-nduá nì dācùnì Dios-nè, cachí-nè. Mii-nè nduú-né mii-né cāhàn-né, doco cuisì ñà-ìá ñuhivì yohó-ní nduá nihnú ini-nè.

¹⁹ Ducán quidá-né, doco ñà-có-nchicùn ndisa ga-nè Cristu nduá. Doco cunaha-nsiá, nahi òni-ndà nduú mii-yá, te ndohó, nahi cuerpu xi-ya nduun-nda, ñàyùcàndúà iin-nì cahnú sàni nanduu nsidaa-nda nì quida-ya, nacua ñuhú tnáhà ndahàsàhà iquicúñù-ndà. Ñàyùcàndúà, sàhà mii-yá siempre nācuàhandee ini-ndà, te ndufuértē anima-ndà nacua chitnùnì ini Yua-nda Dios cuu xi-nda.

²⁰ Vichi, xiñuhu quida-nda cuenta na ian nì cutnaha-nda xi Cristu na ní xihì-yà, te ñàyùcàndúà có-xiñùhù gá ñà-cunihnu ini-ndà ni-iin ley cāhàn sàhà cuisì ñà-ìá ñuhivì yohó-ní. Mate ndoo-nda ñuhivì, doco có-nduá ñà-chivàha-nda

²¹ Cuàhà ley cachí ñà-màsà tnii-ndá iin ñà-jaàn, ò màsà cóxí-ndá inga iñàha, te ò màsà ducùn ndahà stná-ndà ñà-yùcán.

²² Còò, vachi ñà-icúmì nsihì-ni nduú nsidaajàn, te cuisì nēhivì ñuhivì nduú ana nì quidavàha xi ley jaàn.

²³ Vihini tuxí ini-ndà iin palabra nchichí nduá cachí-nemà, vachi cachí-nè ñà-fuerte ni cuàhandee ini-ndà sàhà religión mà, te nì cāhíchi stná ini-ndà mii-nda, te nì dāndòhò stná-ndà mii-nda, cachí-nè. Doco cunaha-nsiá, ni-iyuhu mà cúí chindee ley mà ndohó ñà-cadi-ndà nuù (cuàhà ñà-chicuéhè) xiho-nda quida-nda dava xichi.

3

¹ Bueno, sàhà-ñá quidà-ndà cuenta cutnàhà stná-ndà xi Cristu na ní natiacu-yà, ñàyùcàndúà xiñuhu nanducu-nda nansa quida vii-ndà nacua nduú ley xi ansivi, vachi ndé ansivi yucán iá-yà ladu cuahá Yua-nda Dios.

² Te vichi xiñuhu cunihnu ini-ndà chuun xi (mii-yá iá) ndé gloria mà, màdì chuun xi ñuhivì yohó.

³ Vachi ducán nduá na ian nì xihì stná-ndà (na ní xihì mii-yá), doco vichi itiácú-ndà sàhà poder xi-ya, te cutnàhà stná-ndà xi-yá ñuhu-nda (ndahà Yua-nda) Dios.

⁴ Daanì, na sàà quivì naxicocuin-yà, dandu cutnahá stná-ndà xi-yá cundoo-nda ndé yáha ga nchii ndiaha.

Nacoo dahuun-nda ñà-nduá nisa quida-nda antes, te quida-nda ñà-vàha cachí Jesús

⁵ Ñàyùcàndúà, xiñuhu dandañuhú dahuun-nda nsidaa (chuun siquini cudí guá ini nēhivì) ñuhivì quida-ne. Màsà nāxícocuin gā-ndà cāhàn-ndà xi ana cóni nāndàhà xi-ndà, te màsà cūñhñù siquini ini-ndà; màsà cūñhñù ini-ndà ñà-coo-nda xi inga nēcuàchi ñàhà. Nì màsà xiho stná-ndà cucumi-nda cuàhà iñàha, vachi na ian cahvi-nda ñà-jaàn queá.

⁶ Cunaha-nsiá, sàhà nsidaa cuàchi jaàn icúmì quixi castigu fuerte xí Dios diquì nsidaa nēhivì có-ínini xi-yá.

⁷ Te divi nsidaa cuàchi jaàn nisa quida stná-nsià antes na nisa cudii gá ini-nsia sàhà.

⁸ Doco vichi xiñuhu nacoó stná-ndà más gà falta xi-nda. Màsà cuídà gà ini-ndà; màsà ndúdánà gà-ndà. Te màsà cùndéhe úhi stnàhá stná-ndà. Ni màsà dáquée cuàchi-nda diqui ñanitnaha-nda; te màsà cáhàn quini-nda.

⁹ Ni màsà dándáhví stnàhá gà stná-ndà, vàchi sàni nacoó dahuun-nda modo nisa nihnu ini-ndà antes; có-quidá gà-ndà nahi antes.

¹⁰ Nahi nêhiví sàà sàni nanduu-nda, te cueé-ni cueé-ni cuàhàn ndusaa stná sàxíníntùn-nda, dandu sàà-ndà cundaà vaha ini-ndà, te cunihnu stná ini-ndà nacua nihnú ini mii-yá ana ni dándúsáá xí-ndá.

Có-quidá, ndéni nêhiví ní cui ní cùndúú-ndá, cuisí ndiaá ñà-nchícùn-nda Jesús, màdi raza-ndà

¹¹ Nêhiví sàà xínduu-nda, có-quidá a nduu-nda nêhiví raza Grecia, te ò nêhiví raza Judea. Te ni có-quidá stná a itúú marca xi Dios icà-ndà, ò á cóó. Ni có-cùní cachi stná nú nduu-nda nècuàchi inga ñuu, mate nècuàchi siúmí ni sanduu-ne. Cóó. Ni có-quidá stná a nduu-nda nêhiví libre, te ò nêhiví quidáchúün saín nùú iin lamú. Cóó, vàchi cuisí ñà-nchícùn-nda Cristu nduú ñà-ndiáá; te divi-ya iá stná ini anima nsidaa-nda.

Calma ni cùndóó-ndá xí ñanitnaha-nda, te nacuahandee stnàhá ini-ndà

¹² Sàni nacàxin Dios ndohó. Nêhiví ìì xí-yá sàndùù-nda vichi, te màni-ndà nùù-yá. Ñàyúcàndüá, xiñuhu cutùha-nda cuhi stnàhá ini-ndà. Iin-ni ni cúníhnú máni ini-ndà, te cunihnu ndahvi stná ini-ndà. Màsà cóó dana-nda. Cóó; iin-ni ni quidándéé ini-ndà.

¹³ Te nú iá iin ñanitnaha-nda ni quida xi iin falta, dandu ni quidándéé cahnú ini-ndà sàhà-né, te cuicahnú ini-ndà sàhà-né nacua ni xicahnú stná ini Cristu sàhà ndohó.

¹⁴ Daaní, ñà-chicá más xiñuhu nduú ñà-cuu stnàhá ini-ndà sàhà-ndà, vàchi nú ducani quida-nda, dandu ñà-sàni nacuatnàhá nsidaa ñà-vàha xiñuhu quida-nda nduájàn.

¹⁵ Te ni caquín stná-ndà cuidadu ñà-màsà quidá-ndá ni-ñàha dandáñúhú xí ñà-nìhnú dadí ndiaha ini-ndà nacua cuní Dios cunihnu dadí ini-ndà. Vàchi cunaha-nsiá, divi sàhà-ñá cundoo ndiaha-nda, te cunduu-nda nahi iin-ni nêhiví, ñàyúcàndüá ni cana-yàndó (ladu xi-ya). Te xiñuhu ñà-naquimani stná-ndáyá.

¹⁶ Nicanicuahàn ni cóó chitu anima-nda palabra ìì xí Cristu. Te xiñuhu càhàn stná-nda iin-nda xi inga-ndà, te chinaha stnàhá víi-nda palabra nchichí ndiaha xí-yá sàhà-ñá chicá ni cùnsihí ini-ndà (quida vii-ndà). Te coto stná-nda nsidaa clase alabanza xi-ya, nacuat-nda, te coto stná-nda alabanza nacua datnúú Espíritu ìì xí-yá ini-ndà. Te siempre naquimani-ndáyá ini anima-nda.

¹⁷ Nsidanicuú ñà-ndüá quidá-ndà, xì ñà-ndüá cachí-ndà, xiñuhu ndacùcahan-nda Stoho-nda Jesús, te ducán naquimani stná-nda Yua-nda Dios.

Nansa quida-nda, te cundoo mani-nda xì nsidaa nêhiví, a nduú-né tnaha-nda, ò lamú xi-nda, ò peón xi-nda

¹⁸ Mii-nsiá nècuàchi ñahà, xiñuhu cahvi-nsiá ìì-nsiá nacua ndiá icà nêhiví xí Stoho-nda Señor quida-ne.

¹⁹ Daaní, mii-nsiá nècuàchi tiàa, xiñuhu cuu ini-nsiá sàhà ñahàdihí-nsiá. Màsà dándácú ndee-nsiá nùù-né.

²⁰ Te nsiohó nècuàchi cuàti xì nècuàchi cuàchi, ni cúníni stná-nda nsidaa ñà-ndüá cachí yuadlíhí-ndà, vàchi ducán dandu cudíi ini Stoho-nda Señor sàhà-ndá.

²¹ Daaní, mii-nsiá nècuàchi tiàa xínduu yua, màsà dácuídà canúú ini-nsiá dèhe-nsiá sàhá màsà cùhúün inià.

²² Daaní, mii-nsiá nècuàchi ndoó saín nùú iin lamú, ni cúníni víi-nsiáné. Màdiá cuisí na indéhe-né, dandu quidachuún víi-nsiá sàhà-ñá ndee vaha-nsiá nùù-né. Cóó. Chicá vaha nsinuu ini-nsiá Dios, te iin-ni ni cúníhnú víi ini-nsiá quidachuún víi-nsiá.

²³ Nsidanicuú chuun ndacú nùù-nsiá, contentu ni quidá-nsiáñà. Quida-nsiá cuenta na ian Stoho-nda Señor nduú patrón xi-nsiá, te màdiá nêhiví uún.

²⁴ Vàchi nùú Stoho-nda Cristu icúmí-nsiá nihitáhví-nsiá, te cundiatú stná anima-nsiá, vàchi divi mii-yá nduú ana xinúcuáchi ndísá-ndá nùù-xí.

²⁵ Doco nêhiví có-quidá víi, icúmí nacuitacùhá-nè nacua quidá-né, te mà quíhín casu Dios ana nduú-né.

4

¹ Daaní, mii-nsiá nècuàchi nduú patrón, quida vii-nsiá xì peón xi-nsiá nacua ndiá icà-ndà quida-nda, vàchi ináhá-ndá dècuèndè gloria iá stná ana dandacu-xi nùù-ndà.

² Daaní, nsidaa-nsiá, iin-ni ni càcàn tàhvi-nsiá nùú Dios. Màsà nácóó-nsiá ñà-jaàn. Te naquimani stná-nsiá mii-yá.

³ Te quida-nsia favor; sàhà stná nsiùhù ni cãcàn tãhvi-nsiã sàhà-ñã ni cúnúnã ichì cachitnùhu cuahà-nsi palabra xi Cristu, divi palabra nisa ia dèhé sàna. Pues divi sàhà stná palabra (ndiaha ma ié yohó) ndiadí vehecãa.

⁴ Ñâyücandúã, cãcàn tãhvi-nsiã sàhí nùù-yã, ãma níhí nansa cãhàn vatí palabra mà xi nèhivi nacua ndiã iquẽ quide.

⁵ Siempre xiñuhu quida vii-ndã xi nèhivi có-nchícùn xi ichì-yã. Te nú iã nansa cui quida-nda iin obra, dandu yãchi nì quidã-ndañã.

⁶ Te na cãhàn-ndã xi nèhivi, vivií-ni ni cãhàn-ndã xi-né. Meru palabra xiñuhu ni cundúã cachi-ndã xi-né. Chicã vãha nacani vãha ini-ndã nansa naxiconihí víi-nda nùù iin iin ana cãhàn xi-ndã.

Ultimo palabra cachí Pablo, cãsàhú-nè xi nsidaa nèhivi ñuu Colosas

⁷ Ñani-ndã Tiquico, màni cuahà-né nùù; cuahà gá sàni chindee-né yùhù, te iin-ni xinúcuáchí víi stná-né nùù Stoho-ndã Señor. Pues mii-né icúmí-né nacani-ne xi-nsiã sàhí, nansa yáhi.

⁸ Ñã-jaàn nduã sàni sãcùnaha-né quida-ne na sãã-né ndé ndoó-nsiã, cachitnùhu-ne xi-nsiã nansa iã chuun xi-nsi yohó sàhà ñã-ndòo vãha stná inì-nsia.

⁹ Daaní, icúmí cutnahá stná inga ñani-ndã (sãã-né xi Tiquico), divi compañeru-nsiã nani Onésimo. Iin-ni niñnú stná ini-né ichì Yua-nda Dios, te cuahà gá cuú stná inì sàhà-né. Pues ndúì nècuàchimã, icúmí-né nacani-ne xi-nsiã sàhã nsidaa ñã-iã yohó.

¹⁰ Cunaha-nsiã, iã stná inga compañeruì vehecãa yohó nani Aristarco, te cãsàhú stná-né xi-nsiã. Te (ñuu) yohó iã stná primu xi Bernabé nani Marcos, te cãsàhú stná-né xi-nsiã. Te Marcos mà, sàni cachi xi-nsiã sàhã-né ñã-nì quidãñúhú-nsiã nè nú ni sãã-né ndé ndoó-nsiã.

¹¹ Daaní, yohó iã stná Jesús Justo, te cãsàhú stná-né xi-nsiã. Cunaha-nsiã, còò cá más nècuàchì raza Judea yohó chindéé xí nùù chuun xi ñuhiví ì xí Dios, cuiis nècuàchì yohó, ñâyücandúã cuahà gá cudí inì sàhã-né.

¹² Daaní, cãsàhú stná Epafras, divi nècuàchì ñuu-nsiã (iã yohó). Nècuàchimã, xinúcuáchí víi-né nùù Cristu, te cuahà gá xicàn tãhvi-né nùù Dios sàhã-nsiã, sacúndáhví-né nùù-yã ñã-iin-ni ni cúníhnú vãha inì-nsia ichì-yã, te iin-ni ni quidã stná-nsiã ñã-ndúã cuní-yã.

¹³ Yùhù nduí testigu ñã-cuahà guá nacaní ini-né sàhã-nsiã xi sàhã stná nècuàchì ñuu Laodicea xi ñuu Hierápolis.

¹⁴ Daaní, cãsàhú stná doctor Lucas. Màni cuahà nècuàchimã nùù-ndã. Daaní, cãsàhú stná Demas.

¹⁵ Te mii-nsiã, casàhú stná-nsiã xi ñani-ndã ndoó ñuu Laodicea yucán. Te casàhú stná-nsiã xi Ninfas xi nsidaa gá nèhivi natácã vehe-ne.

¹⁶ Nú sàni cahvi-nsia carta yohó, dandu dacúhùn-nsiãñã nùù nèhivi xí Dios ndoó ñuu Laodicea mà sàhã-ñã cahvi stná nècuàchimãñã. Te carta (nì tiaa stnáì) nùù mii-né, cahvi stná-nsiãñã.

¹⁷ Daaní, cãhàn stná-nsiã xi Arquipo cachi-nsiã xi-né ñã-màsã nándodó-né quida ndisa-ne chuun ndiaha sàni nihí-né nùù Stoho-ndã Señor.

¹⁸ Yùhù nduí Pablo, te ndahã mií tiaí saludu yohó nùù nsidaa-nsiã. Te sacúndáhví nùù-nsiã ñã-nì nsínuu inì-nsia ñã-yohó ié' ndiadí vehecãa.

Nì cúcúmí-nsiã cuahà gracia xi-ya. Sã-iã.

Tutu Nuu Nì Tiaa San Pablo nù Nèhivì xí Dios Ndoó Nuu Tesalónica

¹ Yùhù Pablo, xì Silvano, xì stná Timoteo, cásàhù-nsì xì nsidaa mii-nsiá nècuàchì ñuu Tesalónica cahvi stná xì Jesús. Mii-nsiá, sàni natù-nsia nùu Yua-nda Dios, xì nùu Stoho-ndà Jesucristu. Te vichi nì cuní màni-yá mii-nsiá; contentu nì cùndóó-nsiá quida-ya.

²⁻³ Nsiùhù, nicanicuahàn naquímáni-nsì Dios sàhà nsidaa-nsiá, te càhàn-nsì xì-yá xícàn tàhvi-nsì sàhà-nsiá nsiquívi. Nsinúú ini-nsì nansa nì quida-nsia na ní xinindisá-nsiá mii-yá, te sàhámà nì quesaha-nsiá quidá vii-nsiá cumplir. Ináhà-nsì cuú stnahá stná ini-nsiá sàhà-nsiá, te chindéé stnahá stná-nsiá. Daaní, ináhà stná-nsì ñà-iin-ni cundéé ini-nsia Stoho-ndà Jesucristu nsiquívi (nahi nsiùhù). Te sàhà-ñà indéhe stná Yua-nda Dios ndohó, ináhà stná-yà nsidaájàn.

⁴ Te cunaha-nsiá, cuú cuahà ini-yà sàhà-nsiá, ñàni. Te ináhà váha stná-nsì ñà-sàni nacàxin stná-yà mii-nsiá ñà-cunduu-nsia nèhivì xì-yá.

⁵ Vàchi na ní sàà-nsì yucán, te ní càhàn-nsì xì-nsiá ñà-nduú razón ndiaha xì-yá, màdi palabra uun nì sánduámà. Còó, vachi Espíritu Ì xì-yá nduú ana nì chindee stná xì-nsì, te nì quida stná-yà milagru xì-ya. Te ndee ní càhàn-nsì xì-nsiá, vachi ináhà-nsì ñà-ndàà nduá. Te ináhà-nsiá nansa nìsa quida-nsi na ní sandoo-nsì yucán, ñà-cuisi sàhà ñà-cunduu bien xì-nsia nìsa quida-nsi nsidanicuú iñàha.

⁶ Daaní, mii-nsiá, nì quesaha stná-nsià nì tenchicùn-nsià ñà-nduú ichì nsiùhù, vachi divi ichì Stoho-ndà Señor nduú stnámà. Te divi palabra xì mii-yá nduá nì xinindisá-nsiá daa, ñàyucànduá nì cudii cuahà ini-nsia nì quida Espíritu Ì xì-yá, mate cuahà gá nì dándòhó nèhivì-nsiá.

⁷ Dècuèndè stná nècuàchì xinindisá ndoó ladu Macedonia xì ladu Acaya, nsidaa-né sàni cundaà stná ini-nè nansa ndiá ìcà-né quida stná-nè ñà-nì xinitnùhu-ne nansa quidá víi mii-nsiá.

⁸ Vachi sàhà mii-nsiá nì xitià palabra xì Stoho-ndà Señor inicutu ladu yucán. Doco màdi cuisì ladu yucán, còó, vachi cuahà gá stná ñuu nì xinitnùhu nansa nì quida-nsia na ní xinindisá-nsiá Dios. Cunaha-nsiá, nì còó gá necesidad càhàn-nsì sàhà-nsiá xì nèhivì (inga ñuu mà), vachi dècuèndè stná mii-né,

⁹ nacání-né xì-nsì nansa nì quida-nsia na ní sàà-nsì ndé ndoó-nsiá, nì nacoó-nsia ñà-nduú yùu yòcò, te nì tenchicùn-nsià ichì mii-yá, vachi nì cudii ini-nsiá cahvi-nsiá ana nduú ndisa Dios itiacú nicanicuahàn.

¹⁰ Te vichi ndiatú cuéyàà stná-nsià naxicocuñin Dèhemani-yá Jesús iá ndè gloria, vachi divi Yà-yucán nduú ana nì dānātiácu Yuamāni-yá, te divi stná-yà icúmi-yá dacácu-yàndó ñà-màsà níhi-ndà castigu icúmi quixi.

2

¹ Ináhà-nsiá nansa nì ìa na ní sàà-nsì ndé ndoó-nsiá, màdiá uun-ni nì sanduamà, ñàni.

² Còó, vachi nì chindee Dios nsiùhù, te cóni yúhi-nsì càhàn ndee-nsì, nì cachitnùhu-nsì xì-nsiá razón ndiaha xì-yá, mate xiní ùhi nèhivì nsiùhù, te mate antes nì ndoho guá-nsì ñuu Filipos na ní quida quini-tè xì-nsì yucán. Sà-ináhà-nsiá nsidaájàn.

³ Te palabra nì cachitnùhu-nsì xì-nsiá, palabra ndàcuisi xì mii-yá nduá. Ni-iin ñà-siquini cóni cāchì-nsì xì-nsiá, te ni-iyuhu cóni dāndāhvi stná-nsì mii-nsiá.

⁴ Còó, vachi Dios nduú ana nì natù-nsì nùu-xì ñà-nìhi-nsì chuun dacutià-nsì razón ndiaha xì-yá. Nàyucànduá, divi ñà-jaàn nduá cachitnùhu-nsì xì nèhivì; te cunaha-nsiá, ñà-ndee váha-nsì nùu mii-yá nduá nandúcu-nsì, màdiá nùu nèhivì, vachi cuisì mii-yá nduú ana indéhe ini anima-ndà.

⁵ Sà-ináhà-nsiá ñà-ni-iin xichi cóni càhàn vico uun-nsì xì-nsiá. Te ináhà stná-yà, mà nunca nì dāndāhvi-nsì mii-nsiá sàhà-ñà tavà-nsì dihùn nùu-nsiá.

⁶ Nì cóni xícàn-nsì quidañuhu-nsiá nsiùhù, nì mii-nsiá, te nì nèhivì dava ga, mate iá derechu xì-nsì càcàn-nsì ñà-quidañuhu nèhivì nsiùhù, vachi divi Cristu nì sàha xì-nsì chuun quidá-nsì.

⁷ Doco còó, cóni xícàn-nsì ñà-jaàn. Viví-ni nì càhàn-nsì xì-nsiá na ní sandoo-nsì yucán. Na ian quidá iin dihi ndiaá xì mée xì, ducán nìsa quida stná-nsì.

⁸ Nì cachitnùhu-nsì razón ndiaha xì-yá, doco màdi cuisì ñà-jaàn, vachi ñà-cuahà guá cuú ini-nsì sàhà-nsiá, ñàyucànduá dispuestu nì sandoo stná-nsì cui-nsì sàhà-nsiá, ñà-màni guá-nsià nùu-nsì.

⁹ Te ádi nsinúú stná ini-nsià nansa nisa quida-nsi, ñáni, ndui te ñuú nisa quidachuún-nsí, ðecuèndè nisa xávi sàstnùhù stná-nsi, vâchi có-cuní-nsi quida-nsia cuahà gastu sàhà-nsí, ñâyùcàndùá màdi cuisì-ní razón ndiaha xí Dios nì càhàn-nsi xì-nsiá, còó; nisa quidachuún stná-nsi.

¹⁰ Mii-nsiá, sàni xinínùù-nsiá nansa nisa quida-nsi na ní sandoo-nsi mahì-nsiá na ní quesaha-nsiá xiníndisá-nsiá; stná Dios, ináhá-yá nansa nisa quida-nsi, modo cudí ini mii-yá nisa quida-nsi, iin modo vâha; còò ni-iin falta nì quidá-nsí.

¹¹ Ináhá-nsiá nansa nì càhàn-nsi xì-nsiá ñà-xiñùhù quida vii-nsiá, te nì nacuahandee stná ini-nsi iin iin-nsia na ian càhàn iin yua xi ðehe-ne.

¹² Ni chinaha-nsí mii-nsiá ñà-cacauuu vii-nsiá ñuhiví, vâchi ducán ndiá icà-ndà quida-nda ñà-sàni cana-yàndó sàà-ndà ñuhiví ì xí-yá ndé ndiaha guá íá.

¹³ Ñâyùcàndùá nicanicuahàn naquímáni-nsí Dios, vâchi na ní càhàn-nsi xì-nsiá palabra xi-ya, nì xiníndisá-nsiá, te nì cundaà ini-nsia palabra ndisa xi mii-yá nduá, màdi palabra xi nèhiví ùún. Te diví ñà-ndáà nduá, palabra xi mii-yá nduá, te ndiaha gá quidáchuân ini anima nsidaa ndohó nècuàchi xiníndisá-xí-yá.

¹⁴ Daaní, después, ducán nì cuu stná xì-nsiá nacua nì cuu xi nèhiví xí Jesucristu ndoó ladu Judea, vâchi cuahà nèhiví xí-yá ladu yucán, nì ndoho stná-nè nì caquida tè-raza Judea. Te diví ducán nì ndoho stná mii-nsiá nì caquida nècuàchi ñuu-nsiá, ñáni.

¹⁵ (Doco ndahví nècuàchi raza Judea mà, vâchi nì casahni-né Stoho-ndà Jesús, te nì casahni stná-nè nècuàchi raza-nè nì càhàn xì-né razón ndiaha xí-yá. Daaní, ðecuèndè nsiùhù nì taxi stná-nè. De por sí, mà túha-ne quida vii-né nùù Dios; te xiní ùhi stná-nè nsidaa nèhiví.

¹⁶ Vâchi sadí-nè nùù-nsí na cuní-nsi càhàn-nsi xì nèhiví inga raza sàhà-ñá nihì-né càcu anima-nè. Doco nècuàchi razí mà, có-sàha-ne quida-nsi ducán; ñâyùcàndùá, cuahà gá sàni yàha-ne nì xida cuàchi-ne. Doco vichi sàni sàà hora nihì-né castigu xi-ne ñà-ndoho-ne.

Nansa nì cachi Pablo ñà-cuú cuahà ini-nè sàhà nècuàchi xiníndisá ndoó ñuu Tesalónica

¹⁷ Nsiùhù, yáha ga cuní-nsi sàà-nsi nàcòtò-nsi mii-nsiá, ñáni. Ndahví-nsi, vâchi xica ndoó-nsiá, doco siempre nsinúú ini-nsi mii-nsiá, mate có-xini stnaha-nda iin ù quiví.

¹⁸ Ñâyùcàndùá, nì quida-nsi lucha sàà-nsi yucán. Yùhù, Pablo, itnii xichi nì cuní sàì, doco nì sadí ñà-malu nùù-nsi.

¹⁹ (Doco màni cuahà-nsiá nùù-nsi), vâchi ¿ana disáhà-xí cundua icúmí coo consuelu xi-nsi, te cudii cuahà ini-nsi? Pues, diví mii-nsiá nduú ana disáhà-xí, vâchi sàhà mii-nsiá icúmí-nsí nihì-nsí iin ñà-vàha nùù Stoho-ndà Jesús, te cudii gá ini-nsi quiví naxicocuñ-yá, te màculita-nda nùù-yá.

²⁰ Vâchi ndisa, sàhà mii-nsiá ndiaha sàstnùhù nihnú ini-nsi, te yáha ga cudí ini-nsi.

3

¹⁻² Daaní, después nì cachi-nsi chicá vâha sàà Timoteo ndé ndoó-nsiá, vâchi có-cundéé gá ini-nsi ñà-nàcání ini-nsi nansa nihí-nsiá cuahàn, te cahan-nsí vátùni ndòo mii-nsí ñuu Ate-nas. Te Timoteo, ñani ndisa-nda nduú stná-nè, te xinícuàchi stná-nè nùù Dios, cutnáhà-né xì-nsí quidá stná-nè chuun ìì (dacuítà-ndà) razón ndiaha xí Cristu. Ñâyùcàndùá, (chicá vâha techuún-nsí mii-né sàà-né cahan-nsí), dandu chindee-né mii-nsiá, nacuahandee ini-nènsiá ñà-chicá fuerte nì cuníndisá vâha-nsia,

³ te màdí ndulocó-nsiá na quidá quini nèhiví xì-nsiá; vâchi seguru icúmí-ndá yàha-nda ducán, ináhá-nsiá.

⁴ Vâchi na ndoó vá-nsí ndé ndoó-nsiá, nì cachi-nsi xì-nsiá ñà-icúmí-ndá yàha-nda vida quida nèhiví. Te diví ducán nì cuu xi-nsiá sàni xini-nsiá.

⁵ Ñâyùcàndùá, yùhù, ñà-nàcání guá ini sàhà-nsiá, nì techuín Timoteo nùhù-nè (nàcòtò-nè mii-nsiá, dandu) nacachitnùhu-ne xí nansa yáha-nsia, a íin-ní nihnú vâha ini-nsia mii-yá, á coó, vâchi yúhí-nsi dacá ñà-malu ðini-nsiá, te uun-ní ndòo chuun nì quida-nsi xì-nsiá.

⁶ Doco cóó, vichi sàni nsiaa tu-ne ñà-nì nùhù-nè nì nàcòtò-nènsiá, te iin razón vâha nduá sàni nacachitnùhu-ne xì-nsi, vâchi iin-ni nihnú vâha ndisa ini-nsiáyà, te cuú stnahá ini-nsia sàhà-nsiá. Te nsinúú stná ini-nsia nsiùhù, cachí-nè, vâchi nacua yáha ga cuní nsiùhù sàà-nsi nàcòtò-nsi mii-nsiá, diví ducán ndohó stná mii-nsiá sàhà nsiùhù.

⁷ Ñâyùcàndùá, mate ndohó-nsí yohó, te yáha-nsi cuahà vida, doco ndiaha gá sàni ndòo vâha ini-nsi, ñáni, vâchi sàni cundaà ini-nsi iin-ni nihnú vâha ini-nsiá mii-yá.

⁸ Cunaha-nsiá, dohó nduámá na ian natiácú-nsi (na nacúínitnùhu-nsi) iin-ni nchícùn vii-nsiá ichi Stoho-ndà Señor.

⁹ Te vichí ¡na cuahà guá naquímáni-nsí Dios sàhà-nsiá! Te ináhá-yá yáha ga cudí ini-nsi sàhà-nsiá.

¹⁰ Ndui te ñuú xicàn tàhvi cuahà-nsí nùù-yá áma nihítàhvi-nsí nàcòtò gá-nsi mii-nsiá, te ducán cui chindee gá-nsi mii-nsiá ñà-cuníndisá vâha ga-nsiá.

¹¹ Te vichi, xicán tàhvi stná-nsi nùu Yua-nda Dios xì nùu Stoho-ndà Jesucristu ñà-nì dácùndéhe-yá nsiùhù ichì sàà tu-nsi visita ndé ndoó-nsiá.

¹² Daaní, xicán tàhvi stná-nsi nùu-yá ñà-chicá ni cúcuú stnahá ini-nsiá sàhà-nsiá xì sàhà nsidaa gá stná nèhivi nacua cuú stná ini nsiùhù sàhà mii-nsiá.

¹³ Váchi nú ducán, dandu ñà-sàni nàcùnihu ì ndisa ini-nsia cundua, te mà cóó gá falta xi-nsia nùu Yua-nda Dios na quívi naxicocuñ Stoho-ndà Jesucristu, te cutnahá-yá xi nsidaa nèhivi xí-yá.

4

Màsà nácáni ini-ndà quida-nda iin falta xì iin nècuàchi ñahà

¹ Cuisì mindaa ñàhà cachi gá-nsi xì-nsiá, ñáni. Sàni dàcuàhà-nsí mii-nsiá nansa ndiá icà-nsiá cundoo vù-nsiá ñuhivi, dandu cudù ini Dios sàhà-nsiá. Pues vichi chinaha-nsí mii-nsiá, te sacùndàhvi-nsi nùu-nsiá ñà-chicá más quida-nsia ñà-jaàn cumplir.

² Váchi ináhá vâha-nsia ñà-nduá ni dândàcú-nsí nùu-nsiá na ní sandoo-nsi xì-nsiá, te nì càhàn-nsi xì-nsiá cuenta xi Stoho-ndà Jesús.

³ Pues divi ñà-yòhó nduá cuní-yá quida-nda sàhà-ñá cunduu-nda nèhivi ì xí-yá: divi ñà-màsà càhàn-ndà xì ni-iin nèhivi cóni nándàhà xì-ndà.

⁴ Cuní-yá cundaà ini-ndà nansa càcàn vù-ndà iin ana cunduu ñahàdihí-ndà, dandu iin-ni coo sahnù-nda xi-né. Te nsidaa nècuàchi ñàhà dava ga, ni cóó stná tnùuhu xi-nda nùu-né.

⁵ Màsà xího-nda coo-nda xi inga nècuàchi ñahà. Màsà quídá ndevàha-nda xi mii-nda nansa ni nì cui, vâchi ñà-jaàn nduá quídá nèhivi cóò Dios nùu-xí.

⁶ Te màsà quídá-ndá iin falta dandahví-ndà ñanitnaha-nda, te quihvi tnaha-nda xi nècuàchi vehe-ne, vâchi icúmí Stoho-ndà Señor nachitacùhà-yá sàhà nsidaámà. Ñà-jaàn sàni cachi-nsi xì-nsiá antes na ní chinaha vâha-nsi mii-nsiá sàhàjàn.

⁷ Ñâyùcànduá, nacani ini-nsiá, ¿indù chuun sàni cana Yua-nda Dios ndohó? Pues divi sàhà-ñá coo ndoo anima-ndà, màdi sàhà-ñá quida ndevàha-nda xi iin nècuàchi ñahà.

⁸ Ñâyùcànduá, nú ndoo ana cahíchi ini xì palabra yohó, pues màdi nèhivi ùun nduú ana cahíchi ini-nè; cóó, mii Dios cahíchi ini-nè, divi ana sàni sàhatahvi xì-ndà Espíritu ì-xí.

Cuàhà gá cuú stnahá ini nècuàchi ñuu Tesalónica sàhà-né

⁹ Vichi (sàni cundaà ini), divi Dios nduú ana nì chindee xì-nsiá ñà-cùú stnahá guá ini-nsia sàhà-nsiá. Ñâyùcànduá, cóò necesidad tiai ni-iin palabra nùu-nsiá sàhàjàn.

¹⁰ Váchi ináhí cuú ini-nsiá sàhà nsidaa nèhivi xí Yua-nda Dios ndoo inicutu ladu xi-nsia Macedonia. Doco cuní-nsi chicá más quida-nsia ducán.

¹¹ Nacua sàà-nsiá, cundoo mani-nsiá xì nèhivi. Cuisì chuun xi mii-nsiá cunsihi ini-nsiá, te quidachuún cuéyàà-nsiá oficiu xi-nsia, vâchi divi ducán nì dândàcú-nsí nùu-nsiá daa.

¹² Váchi nú ducán nì quida-nda, dandu stná nècuàchi có-xiníndisá, quidañuhu stná-nèndó, te mà cóó stná ni-ñàhà quidamanì nùu-ndà.

Nansa icúmí coo na naxicocuñ Jesús

¹³ Ñáni, cuní cundaà ini-nsia sàhà compañeru-ndà sàni caxihì, nansa cuàhàn cuu xi-né, dandu mà cùhúun gá ini-nsia sàhà-né. Váchi nècuàchi có-xiníndisá, yáha ga cuhúun ini-nè sàhà nsii xi-ne, vâchi cóó gá tnùndé ini icúmí-né.

¹⁴ Doco ndohó, xiníndisá-ndá ñà-ndàà nduá ni xihì Jesús, te nì natiacu-yá, ñâyùcànduá, divi ducán icúmí cuu stná xì ndohó nú xiníndisá-ndáyá na xihì-ndà, icúmí-ndá natiacu stná-ndà quida (Yua-nda) Dios.

¹⁵ Pues vichi cachitnùhu-nsi xì-nsiá iin razón nì quixi nùu Stoho-ndà Señor. Cunaha-nsiá, mate itiácú ì-ndà na sàà quívi naxicocuñ-yá, doco mà códonuu-nda nùu nècuàchi sàni ndàhvà ñuhivi. Cóó,

¹⁶ vâchi icúmí-yá nuu-yá ansivi quixi-ya, dandu tiacu-ndà ndàhì-yá dandacú-yá. Te tiacu stná-ndà tàchi iin añgel cusáhnù, te ndee sivi stná corneta xi Dios. Dandu nèhivi xí Cristu xinduu nsii, icúmí-né natiacu-né primeru, (canacoyo-ne yavi xi-ne).

¹⁷ Daaní, nsidaa ndohó nèhivi (xí-yá) ndoo cutiacu daa, ndiachì stná-ndà nana-nda mahì vicò nacuatnaha-nda xi nsidaa nècuàchi nsii ma nànhicùn ichi-ndà mii-yá mahì ansivi. Ducán cundoo-nda cutnaha-nda xi-yá nicanicuahàn.

¹⁸ Jaàn ni inini-nsia iin razón xi-ya. Ñâyùcànduá, dansínúú tnahá ini-nsiá palabra yohó sàhà-ñá màsà cùhúun gá ini-nsia (sàhà nècuàchi nì xihì).

5

¹ Doco cóò necesidad tiaa guè nùu-nsiá sàhà ñà-nduá icúmí coo quívi vâxi xi-nda, ñáni,

² vâchi sà-ináhá vâha-nsia nansa sàà quívi xi Stoho-ndà Señor, ñà-cundua iin tiempo có-nìhnú ini-ndà, na ian quixi tècuìhnà (vehe-nda) ñuú, te có-nìhnú ini-ndà.

³ Vàchi meru quìvi cachí nèhivì dadí uun íá, còò ni-ìñàha cuu xi-né, dandu nanáá quixi tnùndoho cahnu-ma, na ian quessáhá dolor xi nècuàchi ñahà cuàhàn tùnuù mèé-xi, dandu (nèhivì có-ndòó tùha), mà cácu-ne.

⁴ Doco ndohó, màdi ichì ñáa nduá nchícùn-ndà, ñáni; ñàyùcànduá mà cùndúú quìvi mà iin tiempu có-nìhnú ini-ndà.

⁵ Vàchi sàni dàtnúú Dios sàxinítnùní-ndà, te ducán nduá na ian xicánúú-ndà ndui, màdiá ñuu; còò, vàchi có-nduù-ndà nèhivì xí ichì ñáa.

⁶ Ñàyùcànduá, màsà quidá-ndá na quidá nèhivì xicá ichì malu mà, vàchi mii-né, (có-ndúlócò-nè), na ian quidí-nè nduá. Doco ndohó, ni cùndóó tùha-nda, te nacani sahnú ini-ndà.

⁷ Vàchi nècuàchi quidí, ñuu xiquidí-nè, te necuachi xini, ñuu xihí-né (cuàhà xichi).

⁸ Doco ndohó, nècuàchi nchícùn ichì datnúú-yà sàxinítnùní-xi nduu-nda, te na ian ndui (nduú ñuu) nùù-ndà. Ñàyùcànduá, xiñuhu nacani sahnú ini-ndà, te cunindisá vaha-nda mii-yá. Te ni cuú stnahá stná ini-ndà sàhà-ndà, (dandu chindeámá anima-ndà, na ian quidá soldadu), ndixí-te dùhnú cáa (chindee xi anima-te). Daaní, ñuhú stná-te iin mbelú cáa (chindee xi òni-té). Pues ducáni stná ndohó, íá iin tnùndé ini xi-nda (chindeé xí sàxinítnùní-ndà), divi nduú tnùndé ini ñà-càcu-nda nùù Dios.

⁹ Vàchi màdi ñà-nihì-ndà castigu nduá sàni chitnùni ini-yà cuu xi-nda. Còò, divi ñà-càcu-nda quida Stoho-ndà Jesucristu nduá sàni chitnùni ini-yà.

¹⁰ Vàchi mii-yá, ni sàha-ya ni xihì-yà cuenta xi-nda sàhà-ñá nihì-ndà cundoo-nda nùù-yá nicanicuahàn, a ducán nduu-nda nècuàchi itíácú, te ò nècuàchi sàni xhì, doco nsidaa-nda icúmí-ndá cundoo-nda ini-yá.

¹¹ Ñàyùcànduá, càhàn-nsià nacuahandee stnahá ini-nsià nacua quidá-nsiá vichi.

Ultimo ñà-nduú ley xi Jesús ni cachi Pablo xi nècuàchi ñuu Tesalónica nùù tutu yohó

¹² Sacúndáhvì-nsi nùù-nsiá ñà-quidañuhu-nsiá nèhivì quidáchúún chuun ìi xí mii-yá ndé ndoó-nsiá, ñáni, vàchi nècuàchi xí-idònuù nduú-né, te sàha-ne mii-nsiá ichì váha.

¹³ Sàhà chuun ndiaha quidá-né xiñuhu coo cuàhà tnùñuhu xí-nsiá nùù-né, te cuu stná ini-nsiá sàhà-né. Te nsidaa-nsiá, ni cùndóó máni stná-nsiá.

¹⁴ Vichi chináhí mii-nsiá iin ùi gà ìñàha icúmí-nsiá quida-nsiá, ñáni: xiñuhu cuàha-nsiá nècuàchi xicánúú xixin iin conseju víi: te nècuàchi cuhúún ini-xi, nacuahandee ini-nsiánè. Daaní, nècuàchi tàñáha ga cunindisá víi, chindee-nsiánè. Cuàhà gá calma cundoo-nsiá xi nsidanicuú nèhivì.

¹⁵ Te nú quidá quíni-né xi-ndà, màsà náchítacùhá-ndà ñà-nduá ni quida-ne. Còò, cuisì-ni ni cúnihnú ini-ndà quida-nda ñà-nduú iin ñà-vaha xi ñanitnaha-nda, a ducán nduú-né iin nècuàchi xiníndisá stná, te ò nècuàchi còò.

¹⁶⁻¹⁷ Nicanicuahàn xiñuhu cundoo-nda contentu, te nsidanicuú tiempu ni cácan tàhvi-ndà nùù Dios,

¹⁸ te naquimani stná-ndáyá sàhà nsidaa ñà-nduá yáha-nda, vàchi ñà-jaàn nduá cuní Dios quida-nda nú nduu-nda ana nchícùn xí Jesucristu.

¹⁹ Màsà cádi-ndà nùù ñà-nduá cuní Espíritu Ìi quida-ya (ini anima-ndà),

²⁰ te màsà cáhichi stná ini-ndà ñà-nduá cachí nèhivì na dacàhàn Dios-nè iin razón xi-ya.

²¹ Nsidanicuú chuun, xiñuhu ndàcàtnùhù váha-nda, a chúún váha nduá, á coó; te nú (sàni cundaà ini-ndà) chuun víi nduá, dandu divi ñà-jaàn ni cúnchícùn ndisa-nda.

²² Doco nsidanicuú chuun malu, còò; nacoò dahuun-ndañá.

²³ Ndiaha gá ndoo-nda ñuhivì quidá Yua-nda Dios. Te vichi xicàn tàhvi-nsí nùù-yá ñà-sàhà poder xi-ya ni sàà-nsiá cunihnu ìi ndisa ini-nsiá. Cahnú gà Dios màsà cóó ni-iin falta nùù-nsiá ndé cachi sàà quìvi naxicocuñ Stoho-ndà Jesucristu. Màsà quidá-nsiá ni-iin falta ini anima-nsiá, ni ini stná sàxinítnùní-nsiá, ni sàhà stná ndahàsàhà-nsiá; iin-ni ni coó víi nsidaajàn.

²⁴ Divi mii-yá sàni cana-yàndó, ñàyùcànduá vátùni cucumi-nda seguru ñà-quida ndisa-ya cumprir (nsidaa ñà-nduá sàni cachí-yà xi-ndà).

²⁵ Ñáni, cuàhà gá xiquèn càcan tàhvi-nsiá nùù Dios sàhà-nsí.

²⁶ Nacasàhú-nsiá xi nsidaa hermanu. Cuàha-nsianè iin saludu váha.

²⁷ Yùhù, nùù Stoho-ndà Señor chináhí mii-nsiá ñà-ni càhvi-nsiá carta yohó cunini nsidaa nèhivì iin-ni cahví stná xi-yá.

²⁸ Ni cùcúmí cuàhà-nsiá gracia xi Stoho-ndà Jesucristu. Sà-íá.

Tutu Òi Nì Tiaa San Pablo nùu Nèhivì xí Dios Ndoó Ñuu Tesalónica

¹⁻² Yùhù Pablo, xí Silvano, xí stná Timoteo, cásahú-nsi xí nsidaa mii-nsiá nècuàchi ñuu Tesalónica nchícùn xí Yua-nda Dios xí Jesucristu, vâchi cahvi-nsiáyâ. Pues vichi ni cunimàni-yá mii-nsiá; contentu ni cundóo-nsiá quida-ya.

³ Nsiùhù, nicanicuahàn icúmi-nsí naquimaní-nsí mii-yá sàhà-nsiá, ñàni. Te ñà-jaàn ndiá icà-nsí quida-nsi, vâchi nsiquívì chicá más xiníndisâ ví-nsiá, te chicá cuú stnahá stná ini nsidaa-nsiá sàhà-nsiá.

⁴ Ñâyücandüá, na xicánúu-nsí sàhàn-nsi visita ndé natácá nèhivì xí Dios, cudí ini-nsi nacání-nsí xí-né nansa quidá-nsiá, iin-ni xiníndisâ vâha-nsia, te quidándéé stná ini-nsia, mate quidá quíni nèhivì xí-nsiá, te yâha-nsia tnùndoho quidá-né.

Nèhivì dandoho-xi-nda vichi, icúmi-nè ndoho stná-nè quívì naxicocuñ Jesús

⁵ Cunaha-nsiá, sàhà-ñâ quidándéé víi ini-nsia na ndohó-nsiá, seña nduájàn ñà-después icúmi Dios nsidandaà-yá sàhà-nsiá iin modo ndiaha, dandu natú-nsia nùu-yá, te yâha-nsia ñuhivì ìi xí-yá. Vâchi (ináhí) divi sàhà-ñâ nchícùn-nsiá ñuhivì ìi mà, ñâyücandüá dandohó nèhivì-nsiá vichi.

⁶ Sàhámâ cuisí ñà-ndiá icà coo cundua na dandohó-yá nèhivì dandoho-xi-nsiá.

⁷ Mate quíni quidá-né xí-nsiá vichi, doco icúmi-yá cuàhatahvi-yánsiá ñà-vâha ndiá icà-nsiá nihì-nsiá, vâchi icúmi-nsiá cutnahá-nsiá xí nsiùhù nàcundoo ndiaha-nda paz quívì naxicocuñ Stoho-ndâ Jesús. Icúmi-ndâ cuni-ndâ mii-yá na nuu-ya ansivi, cutnahá-yá xí ángel fuerte xi-ya.

⁸ Mahí ñuhu xíxin icúmi-yá nuu-ya, dandu nihì nèhivì có-nàcúnì xí Dios castigu xiñuhu nihì-né, vâchi có-ndùlôcò-nè sàhà razón ndiaha xí Stoho-ndâ Jesucristu.

⁹ Ñâyücandüá, icúmi-nè danâà-né; nicanicuahàn icúmi-nè ndoho-ne; vâchi icúmi-nè cuxica dahuun-ne nùu-yá; mà cundóo-né cuni-nè cusahnú ndiaha-yá.

¹⁰ Doco ndohó nèhivì ìi xiníndisâ-xí-yâ, cuàhâ gá icúmi-ndâ tavâ-ndâ tnùñuhu xí-yá, te naquimaní stná-ndâyá quívì naxicocuñ-yâ. Pues ducán icúmi-ndâ quida-nda, nsiùhù te mii-nsiá, vâchi stná mii-nsiá ñi xiníndisâ-nsiá na ní sàà-nsi ñi cachitnùhu-nsi xí-nsiá sàhà-yá.

¹¹ Ñâyücandüá, nicanicuahàn xicán tàhvi-nsí nùu-yá sàhà-ñâ vâtùni ndee vâha-nsia nùu-yá, vâchi sàni cana-yàndó (sàà-ndâ nùu-yá). Te xicán tàhvi stná-nsi ñà-chindee-yá mii-nsiá xí poder xi-ya, te ducán nihì-nsiá quida ndisa-nsia nsidaa ñà-vâha nihnú ini-nsia quida-nsia xí nsidaa stná obra cuní-nsiá quida-nsia ñà-xiníndisâ-nsiáyâ.

¹² Vâchi nú ñi quidá-nsiá ducán, dandu chicá más quee tnùñuhu xí Stoho-ndâ Jesucristu. Daaní, stná mii-nsiá, sàhâ gracia xí Yua-nda Dios xí Stoho-ndâ Jesucristu, icúmi-nsiá quee stná tnùñuhu xí-nsiá.

2

Nansa icúmi ndecunu contra xi Cristu, te dandahví-te nèhivì có-nchícùn xí ley xi-ya

¹ Vichi cuàhìn càhìn xí-nsiá sàhâ quívì naxicocuñ Stoho-ndâ Jesús, te nacuatnaha-nda nùu-yá, ñàni. Pues sacúndahví-nsi nùu-nsiá

² ñà-màsâ yúhí-nsiá nú cachí nèhivì ñà-vichi sàni sàà quívì xí Stoho-ndâ Señor. Còo, màsâ nácání ini-nsiá, (vâchi có-ndüá ducán). Mate cachí-nè divi Espiritu ìi xí Dios ñi cachitnùhu xi-né, te ò ducán cachí stná-nè na càhàn-nè sàhù, te ò cachí-nè íá carta nùu-nsí cachí ducán, (doco còo, màsâ cuníndisâ-nsiánè).

³ Màsâ cuàha-nsia dandahví ni-iin nèhivì mii-nsiá ni-iyuhu; vâchi mà cúí quixí quívì mà ðecuèndè cachí sàà iin tiempu quesaha càhàn cuàhâ nèhivì ðiqui Dios, dandu ndecunu iin tiaa nihnú ini-xi micuísì cuàchi. Doco tèmâ, mà cúí nihì-té càcu-tè nùu andea.

⁴ Vâchi icúmi-tè cunì ùhì-te nsidaa ñà-ndüá cahvi nèhivì nduú dios xi-ne, te ducán stná nsidaa inga iñâha cahvi-né, vâchi chicá ndiaá mii-té cachí-te. Te icúmi stná-te màcòo-tè veheñuhu cahnú xí Dios, te cachí-te xi nèhivì ñà-cuisi mii-té ndiá icà-né cahvi-né.

⁵ ¿A sání nandódo-nsiá ñà-jaàn? Vâchi divi chuun jaàn ní chinahì mii-nsiá na nísâ ìe ndé ndoó-nsiá.

⁶ Te vichi ináhâ stná-nsiá ndiá nduá sadí nùu tèmâ ñà-mâ cùì ndecunu-tè vichi. Doco na sàà meru quívì xí-te, dandu ndecunu-tè.

⁷ Doco ðecuèndè vichi, sà-íá ley malu xi-tè ñuhivì yohó, mate quidáchuñ dèhá. Te divi ducán icúmi coo dèhá ðecuèndè cachí cuxio ana (sadí xí nùu-té).

⁸ Dandísá ndecunu vate-té, divi tè-nihnú-guá inì-xi micuísì cuàchi. Doco icúmí-té cui-tè quida tàchi Stoho-ndà Señor, vâchi icúmí stná-yà natùì-ya, te yâha ga ndiaha cunchii-yà na quívi naxicocuñi-yà, te divi sâhâjân icúmí-tê ndañuhu-té.

⁹ Cunaha-nsiá, divi ñà-malu Satanás nduú ana icúmí chindee xi-té ñà-ndecunu-tè ñuhívi yohó. Te divi sâhâ poder xi quisi mà icúmí-té quida-tè nsidanun clase milagru xi-té ñà-nduloco ñehivi, te cunindísá-nète. Doco nsidaamá, ñà-truhù chuunaa.

¹⁰ Te sâhâ-ñá malu guá-te, icúmí-té dandahví dahuun-tè nsidaa ñehivi icúmí sâà ndañuhu anima-xi. Divi sâhâ-ñá cahíchi ini-nè palabra ndâcuisi xí Dios cunduumá, vâchi cóni cúu ini-nè sâhâ palabra cuâhân dacácu xi-né ni cúu.

¹¹ Ñâyücândüá, icúmí-yâ nacoo dahuun-yanè sâhâ-ñá dàcà sâxinítuní-nè, te cunindísá-né palabra truhù xí témâ.

¹² Doco ducán icúmí coo sâhâ-ñá nihì nsidaa ñehivi mà castigu nacua ndiá icà coo xi-né, vâchi có-xiníndísâ-né palabra ndâcuisi; cóo, cuisì ñà-có-ndiáá cudíi ini-nè cunchicùn-nè.

¹³ Doco mii-nsiá, cuú ini Dios sâhâ-nsiá, ñáni. Ñâyücândüá ndiá icà stná-nsi naquimani-nsí mii-yâ sâhâ-nsiá, vâchi dècuèndè tiempu chicá antes sâni chitnùni ini-yâ càcu-nsiá nùu-yâ. Te icúmí-nsiâ càcu ndisa-nsia, vâchi sâni nduhii anima-nsiâ ni quida Espíritu ìi xí-yâ na ní xinindísá-nsiá ñà-nduú palabra ndâcuisi.

¹⁴ Te divi sâhâ ñà-ni sâà-nsiâ càcu-nsia mà, ñâyücândüá ni cana-ya mii-nsiá na ní cahitnùhu-nsi xi-nsiá ñà-nduú razón ndiaha xí-yâ, vâchi cuní-yâ cutnahá stná-nsiâ xi Stoho-ndà Jesucristu cundoo-nda xi-yâ ndé ndiaha guá iá nsidaa iñâha.

¹⁵ Ñâyücândüá, iin-ni cunihnu vâha inì-nsia mii-yâ, ñáni. Te iin-ni quida stná-nsiâ cumprir ñà-nduú ley ni chinaha-nsi mii-nsiá, a ducán nduá ñà-ni inini-nsia nùu-nsí, te ò ñà-nduá ni cahvi-nsia nùu carta ni tiaa-nsi.

¹⁶⁻¹⁷ Te vichi xicân tàhvi-nsí nùu Stoho-ndà Jesucristu xi nùu Yua-nda Dios, vâchi divi-yâ nduú ana ni quida iin obra ndiaha sâhâ-ndà ñà-mâni guá-ndà nùu-yâ, vâchi ni sâhatahvi-yândô gracia xi-ya, te ducán vâtùni nacuahandee ini-ndà nicanicuahân, te ndiaha gá stná iá trundé ini (icúmí-ndá vichi. Pues) divi nùu mii-yâ xicân tàhvi-nsí ñà-ni nâcuahandee ini-yânsiâ càhân-nsiâ micuísì ñà-íá vii, te cuisì ñà-nduú chuun vii ni quidá stná-nsiâ, xicân tàhvi-nsí.

3

Nansa ni xicân Pablo ñà-ni càcân tàhvi nècuàchi ñuu Tesalónica sâhâ-né

¹ Ñà-yohó cachí guè xi-nsiá, ñáni. Sacúndáhvī nùu-nsiá ñà-ni càcân tàhvi-nsiá nùu Dios sâhâ-nsí ñà-vâtùni nihì-nsí dacuítia-nsí palabra ìi xí Stoho-ndà Señor nsidanicuú xaan. Te càcân tàhvi stná-nsiâ sâhâ-ñá ni cóo truhùhu xí ñehivi sâhâ palabra mà nacua ni quida mii-nsiá.

² Daaní, càcân tàhvi stná-nsiâ sâhâ-ñá vâtùni càcu-nsi nùu ñehivi malu, vâchi màdi nsidaa ñehivi nduú ñehivi xiníndísá.

³ Te vâtùni cahvi-nda xi-yâ, vâchi icúmí-yâ nacuahandee ini-yâ anima-ndà, te nacuidahan-yândô nùu ñà-malu.

⁴ Ñâyücândüá, cahvi-nsí xi-yâ sâhâ-nsiá; ináhâ-nsí ñà-iin-ni icúmí-nsiâ quida-nsia cumprir ñà-nduá ni chinaha-nsi mii-nsiá, divi nacua sâquidá-nsiá vichi.

⁵ Doco xicân tàhvi-nsí nùu Stoho-ndà Jesucristu ñà-chicá ni nsínúu ini-nsia ñà-cuahà guá cuú ini-yâ sâhâ-ndà, te chicá ni sâà-nsiâ quidandee stná ini-nsiâ nacua ni quida mii-yâ.

Màsà cúndóo xixín-ndà ñuhívi

⁶ Nú iá iin compañeru-nsiâ tûha cacanu xixín, te có-cùni-nè cunchicùn-nè ñà-nduá ni chinaha-nsi mii-nsiá, dandu màsà cútnáhâ gá-nsiâ xi-né. Nsihùh ndâcùcahan-nsí quívi Stoho-ndà Jesucristu, te cachí-nsí xi-nsiá ñà-nacoo-nsianè, ñáni.

⁷ Vâchi ináhâ-nsiâ nansa ndiá icà-nsiâ quida-nsia, divi nacua nisa quida stná nsihùh na ní sandoo-nsi xi-nsiá, cóni sâcúdsán-nsí.

⁸ Màdi uun-ni ni níhi-nsí ñà-nduá ni saxixi-nsi; cóo. Ndui te ñuu nisa quidachuún-nsí, ndé nisa xâvi tehe-nsí sâhâ-ñá màsà cuâhachuún-nsi mii-nsiá,

⁹ mate icúmí-nsí derechu càcân-nsi ñà-chindee-nsiâ nsihùh, doco cóo. Ní quidachuún-nsí sâhâ-ñá cundaà ini-nsiâ ducán xiñuhu quida stná mii-nsiâ.

¹⁰ Vâchi ñà-yohó nduú ley ni sâha-nsi mii-nsiá na ní sandoo-nsi xi-nsiâ: nú có-cùni ñehivi quidachuún-né, cóo derechu icúmí-né (càcân-nè) ñà-cuxi-ne.

¹¹ Vâchi sâni xinitnùhu-nsi ndoó dava compañeru-nsiâ xicánúu xixín, có-quidáchuún-né, cuisì daquíhi yuhù-né nùu chuun xi dava ga ñehivi.

¹² Ñàyùcàndùá, nsidaa mii-nsiá nècuàchì quidá ducán, ni cúníní-nsiá, vèchi cuenta xi Stoho-ndà Jesucristu cáhìn, te cachí xiñuhu quidachuún-nsiá, te cundehè-nsiá chuun xi mii-nsiá, dandu cuenta xi mii-nsiá cutiacu-nsiá. Ñà-jaàn nduá dandacuí nùù-nsiá.

¹³ (Vichi cáhìn xi nsidaa-nsiá), ñáni: iin-ni ni cúnchícùn-nsiá quida-nsiá nsidanicuú chuun vii, te màsà cúnáñá-nsiá quida-nsiá ducán.

¹⁴ Doco nú iá iin compañeru-nsiá có-ndúlócò sàhà ñà-nduá cachí-nsi nùù tutu yohó, dandu cundehè-nsiá ana nduú-né, te màsà cùtnáhà gá-nsiá xi-né. Nacoo-nsianè áma sàá-nè cucahan nùù-né.

¹⁵ Doco màsà cundéhe úhì-nsiànè; còó. Cuàha-nsianè ichì váha na ian cáhàn-ndà xi iin ñani-ndà.

Ultimo ñà-nduá ni cachi Pablo xi nècuàchì ñuu Tesalónica na ní xicàn tàhvi-né nùù Dios sàhà nècuàchimá

¹⁶ Pues vichi xicàn tàhvi-nsí nùù Stoho-ndà Señor ñà-iin-ni ni cúndóó-nsiá contentu nsidanicuú quivì, ndéni ni cui ni cúndóó-nsiá, vèchi mii-yá, (cudii inì-yà) chindee-yándó cundoo-nda contentu ducán. Pues vichi ni ndóo nsidaa-nsiá xi-yá nicanicuahàn, (ñáni).

¹⁷ Yùhù nduí Pablo, te cásàhúi xi nsidaa-nsiá. Ndahà mii tiaí saludu yohó, vèchi divi nduú seña tiaí nùù nsidaa carta xi; ducán nduú modo tiaí (firma xi).

¹⁸ Ni cúcúmí nsidaa-nsiá cuàhà gracia xi Stoho-ndà Jesucristu. Sà-ìá.

Tutu Nuu Nì Tiaa San Pablo nùu Timoteo

¹ Yùhù nduí Pablo, te cásàhúì xì mii-ní Timoteo. Yùhù nduí iin apóstol xicánúú chuun xi Stoho-ndà Jesucristu, vâchi ducán nì chitnùni ini mii-yá xi Yuamáni-yá, divi ana nì dâcâcu xi-nda, te vichi iá ndisa tnùndé ini xi-nda nùu-yá.

² Te vichi tiaí tutu yohó nùu mii-ní Timoteo, vâchi sàni xinindisá stná-ní (ichi-yá), te quidá ndisé cuenta nahi dèhi nduu-ní. Pues vichi xicàn tâhví nùu Yua-nda Dios xi Stoho-ndà Jesucristu ñà-nì cùnì màni-yá mii-ní. Nì cundéhe ndahví-yá mii-ní, te iin-ni nì coo-ní contentu xicàn tâhví.

Ñà-ndúá nì cachi Pablo xi Timoteo sàhà nêhivi chináhá iin ichì có-ndúú ndisa ichi Jesús

³ Na ní quihin ichì cuàhìn ladu Macedonia, nì xiquèn ñà-ndòo chii gá-ní ñuu Éfeso sàhà ñà-cachi-ní xì dâva tiàa yucán ñà-màsà chináhá gâ-nè ñà-có-ndúú ñà-ndâá. (Pues nacua nì cachi xi-ní daa, divi ducán quida-ní vichi.)

⁴ Cachi-ní xi-né ñà-màsà ndúlócô-nè sàhà cuentu nacánì nêhivi, nì sàhà stná lista xi cuàhà xii-ndà, vâchi còò fin xi ñà-jaàn, te còò stná ni-iin chuun vâha quidá stná, cuisì ñà-dacuáá xi nêhivi nduá. Nì có-chindéamândó cunucuachi víi-nda nùu Dios, vâchi cuisì fe xi-nda nduá chindéé xí-ndá quida-nda ducán.

⁵ Doco ¿indù-ñá disàhà-xí sàni sâcùnaha-nda chivâha-nda palabra ì xi-yá? Pues divi sàhà ñà-ndundoo cuàchi anima-ndà, dandu cunihnu vii ini sâxìnítùnùni-ndà, te cunihnu vâha ndisa ini-ndâyá, vâchi nú ducán, dandu sàà stná-ndà cucuu stnahá ndisa ini-ndà sàhà-ndà.

⁶ Doco dâva nêhivi, có-quidá-né cumplir ducán, ñâyúcândúá, sàni tûcù-nè inga ichì, te vichi ndoó-né câhàn câhàn-nè chináhá-nè nêhivi, doco còò ni-iñâha ñíhi ndèè-né.

⁷ Maestru chináhá vii xì ley ì nduú-né cahan-né, doco ni mii-né có-cundâá ini-nè ñà-ndúá dacuahá-né, mate ndee gâ câhàn-nè (xi nêhivi).

⁸ Ináhá-ndá, vâha ndisa ley xi mii-yá, doco nú cuàhàn-ndà chinaha-ndâñá, dandu xiñuhu chinaha-ndà nacua ndiá icâ-ndà.

⁹ Te ináhá stná-ndà cóni cùyúcùn ley mà sàhà-ñá cadiâ nùu nècuàchì nihnú ndâcuisì ini-xi; cóó. Sàhà-ñá cadiâ nùu nêhivi cuàchi, ñâyúcândúá nì cuyucàn. Vâchi ndoó nêhivi nihnú chicúehè ini-xi, có-iníni-né ley xi-ya, vâchi cahíchi ini-nè ley mà, te quidá ndevâha-ne cuàchi. Malu-nè, vâchi có-ndúlócô-nè sàhà ichi-yá. Dâva-ne, dècuèndè caní stná-nè ana sahnú xí-né, te ò sahní stnahá-né.

¹⁰ Tùha-ne cundoo ñahà xí-né. Te ò dâva-ne nduú tiàa nihnú ini-xi na ian nihnú ini nècuàchì ñahà, te dâva-ne, xidâcúihná stnahá-né; truhu gâ stná dâva-ne; có-câhàn sahnú-né. Sàhà nsidaa nècuàchimâ nì cuyucun ley ì xi Dios, sàhà-ñá màsà quidá gâ-nè ñà-ndúá sàni cachi jaàn, te ò ndéni iñâha có-ìá nacua cachí palabra ì.

¹¹ Te palabra mà, divi nduú razón ndiaha câhàn yùhù; vâchi nùu Dios ndiaha xi-nda sàni nihitâhví ñà-câhìn razón mà xi nêhivi.

¹² Te vâtùni nì nihindéi quide chuun jaàn, vâchi nì nacuahandee ini-yá yùhù. Ñâyúcândúá, naquímâni mii-yá, divi Stoho-ndà Jesucristu. Ansivéhé-yá, nì ndenihi-ya yùhù ñà-ndúú iin nècuàchì seguru, te ñâyúcândúá nì sâha-ya yùhù chuun ndiaha jaàn.

¹³ Yùhù, ndisa, antes ni sacahàn ndevâhi diquì-yá, te nîsa quida quini xi nêhivi xí-yá; yâha ga dana nîsa ie. Doco ni indehè ndahví-yá yùhù, vâchi sàhà-ñá cóni-cundâá ini, ñâyúcândúá nîsa quide ducán, vâchi tâñâha ga sâi cunindisé.

¹⁴ Dandu cuàhà gâ nì sâhatahvi Stoho-ndà Jesucristu gracia xi-ya, te nì nihí nì xinindisé mii-yá; nì quesahí cuú ini sàhà-yá.

¹⁵⁻¹⁶ Vâchi ni nuu-ya ndè ñuhiví yohó sàhà-ñá dacâcu-ya ndohó nècuàchì iá cuàchi-xi. Palabra ndâcuisì nduájàn, te nsidaa-nda xiñuhu cunindisa-ndañá. Te yùhù, mate nècuàchì chicá malu nì sandui, doco ni indehè ndahví-yá yùhù. Te ¿indù chuun? Divi sàhà-ñá cundâá ini nêhivi ñà-cuàhà guá quidándéé ini-yá sàhà iin ana chicá (có-quidá víi). Dandu nêhivi vâxi después, cunindisá stná-nè mii-yá nacua nì quida yùhù, te cucumí stná-nè vida ndiaha nicanicuahàn.

¹⁷ Sàhà nsidaájàn, nicanicuahàn xiñuhu tavâ-ndà tnùñuhu xí-yá, te naquimani stná-ndâyá, vâchi único ana cusâhnú nicanicuahàn nduú-yá; mate có-tú-yá cundehè-ndà, doco iin-ni iá-yá nicanicuahàn. Mindalini Dios nduú-yá, te nchichí sâstnùhù-yá.

¹⁸ Nahi dèhi nduu-ní, Timoteo, te chináhí mii-ní ñà-quida-ní nacua sàni cachi xi-ní. Te divi ducán nì cacachi stná razón ndiaha nì quixi nùu Dios daa, te nì cachitnùha sàhà-ní. Ñâyúcândúá, nsinuu vâha ini-ní ñà-ndúá nì cachi palabra mà, vâchi sâhâmâ vâtùni nihí-ní cuahandee gâ ini-ní (sàhà chuun ì xi-yá), na ian sâhandee fuerte ini iin soldadu quidá víi chuun-xi, ducán quida-ní.

¹⁹ Mäsà nácóó-ní ñà-xiníndísá víi-ní. Cunsìhi inì-ní sàhà anima-ní ñà-nì còó víiá, vèchi dawa nèhivì, sàhà-ñà có-ndùlócó-nè sàhà anima-nè, ñàyùcàndùá có-xiníndísá víi gá-nè. Te ñà-jaàn ndisa nduá tñùndoho.

²⁰ Ùì tiàa sàni quida ducán nduú Himeneo xì Alejandro. Ñàyùcàndùá, sàni nacoó dahuin-nè ñà-coo-ne ndahá ñà-malu áma sàá-nè cundaà ini-nè ñà-mà váha càhàn ndevàha-nda sàhà ichì Dios.

2

Ñà-nduá nì cachi Pablo sàhà nansa càcàn tàhvi-ndà nùù Dios

¹⁻² Primeru cachí xì-ní ñà-xiñùhù càcàn tàhvi-ndà nùù Dios sàhà nsidaa nèhivì. Cuàhà gá càcàn tàhvi-ndà sàhà nècuàchi cusáhnù nùù ñuu-ndà xì sàhà stná nsidaa ana nihí chuun. Càcàn tàhvi-ndà sàhà nsidaa-né áma chindee Dios-nè. Te naquimani stná-ndà mii-yá sàhà-né áma nihí-ndà cundoo cuéyàà-ndà ñuhivì, còò ni-ñàhà mäsà yáha-nda, te iin-ni cahvi víi-ndayá, dandu quida víi-ndà nacua ndiá icà-ndà.

³ Vèchi nsidaamá, chuun váha nduá nùù Dios, te divi nduá cudí ini-yà sàhà-xí. Mii-yá nduú ana nì dàcácu xi-nda,

⁴ te cuní stná-yà càcu anima nsidaa stná nèhivì; cuní-yà sàà stná-nè cundaà váha ini-nè ñà-nduú palabra ndàcuisi xí-yá.

⁵⁻⁶ Vèchi imindaa Dios iá, te imindaa ana càhàn nihni sàhà-ndà nùù-yá, divi nduú Jesucristu, vèchi mii-yá, nì nanduu-ya iin nèhivì, te nì sàha-ya vida xi-ya nì xihì-yá cuenta xì nsidaa-nda sàhà-ñà dàñà-ndà nùù cuàchi-nda. Ndoó testigu, te sàhámà meru tiempu váha nì dàtú-ne palabra mà nùù nèhivì.

⁷ Ñàyùcàndùá, nì ndacu nùù stná yùhù ñà-cacanui cachitnùhi xì nèhivì palabra mà. Ñà-ndáa nduá cachí, có-nduá tñuhu, ináhá Cristu, divi nùù mii-yá nì nihí chuun mà ñà-chinahi nèhivì nsidaa ñuu nansa iá palabra ndàcuisi ndiá icà-né cunindísá-né.

⁸ Nsìdanicuú lugar (ndé natácá-nsiá), yùhù cuní càcàn tàhvi nècuàchi tiàa nùù Dios. Doco nú cuàhàn-nè càcàn tàhvi-né nùù-yá, te chitanini-ne ndahà-né (nùù-yá), dandu nì cùndú-né nèhivì iá ndoo anima-xi, nèhivì có-xidá ini-xi; nì mäsà cùndúú stná-nè nèhivì xiní ùhì stnahá.

⁹ Te nècuàchi ñahà, cuisì estilu iá víi nì coó sicoto ndixí-né, iin estilu có-ndáa quini, iin modo mà cuítñuhu nèhivì-né. Te mäsà (dáyàha-ne) natnii vico-né òni-né, nì mäsà ndúcúú cuàhà-né xì oro, ò yùù mina, ò vestidu (yáha ga ndiaá).

¹⁰ Còó, anima-nè nì coó víi chicá váha sàhá ducán quida-ne cuàhà obra, vèchi ducán xiñuhu quida nsidaa ñahà cachí cahvi ndisa xì Dios.

¹¹ Te na ndoo-né inini-né chináhá nèhivì (palabra xi-ya), dandu nì cùndóó dadí-né, te nì quidá-né cumplir ñà-nduá cachí palabra mà.

¹² Te có-sáhi chinaha nècuàchi ñahà, nì có-sáhi dandacú stná-nè iin chuun nùù nècuàchi tiàa; cóó. Icúmi-nè cundoo dadí-né.

¹³ Vèchi òhna nècuàchi tiàa Adán nì quidavàha-ya, màdi nècuàchi ñahà Eva.

¹⁴ Te màdi Adán nduú ana nì dandàhvi (ñà-malu), cóó; nècuàchi ñahà nduú ana nì xinindísá tñuhu xi-sì, te ducán nì xida cuàchi-ne.

¹⁵ Doco iin nècuàchi ñahà quivì vichi, nú iin-ni xinindísá víi-né, te cuú ini-nè sàhà (nècuàchi vehe-ne), dandu vätùni càcu-ne na túnuù mée xi-ne ñuhivì. Doco iin-ni nì coó sahnú ini-nè, te coo ñì stná ini-nè, dandu càcu-ne na quesaa mée xi-ne.

3

Índù clase nèhivì xiñuhu cunduu iin tiàa cunuù nùù nèhivì xí Dios

¹ Nú cuní iin tiàa nihí-né chuun cunuù-né nùù nèhivì xí Dios, dandu vätùni, vèchi ñà-ndáa nduá, iin chuun ndiaha nduá.

² Ñàyùcàndùá, nècuàchi cuàhàn nihí chuun cunuù mà, icúmi-nè cunduu-ne iin nèhivì còò falta xì, iin nèhivì imindaa nècuàchi vehe-xi. Xiñuhu cunduu-ne nècuàchi sahnú ini-xi, iin nècuàchi iá tñùñuhu-xi; mäsà cùndúú-né nècuàchi quidá escándalo. Te xiñuhu stná ñà-cunduu-ne iin tiàa cudí ini-xi dayáha visita vehe-ne. Te xiñuhu stná cunduu-ne ana tùha chinaha váha xì nèhivì.

³ Mäsà cùndúú-né nècuàchi tùha xini, ò iin nècuàchi tùha cani stnahá, cóó; nècuàchi váha inì-xi nì cùndúú-né, nècuàchi màni inì-xi. Te mäsà cùndúú-né iin ana tùha nàá stnahá, ò iin ana tòó xì òhùn.

⁴ Iin tiàa dandacú víi nùù nèhivì vehe-xi nì cùndúú-né; xiñuhu cunini víi dèhe-ne, te nì coó stná tñùñuhu xán nùù-né.

⁵ Vèchi nú mà tùha iin tiàa dandacú víi-né nùù nèhivì vehe-ne, dandu mà cúí cunuù víi stná-nè nùù nèhivì xí Dios.

⁶ Te cuidadu ni coó stná-ní ñà-màsà cúndúú-né iin ana làcà saa-ní nì quihin ichi-yá, còtó cutuxi ini-nè cuàhà gá ndiaá-nè, vâchi nú ducán, ñà-sàni xidacuàchi-ne cundua nacua ni cuu xi ñà-malu.

⁷ Daaní, ni cúndúú stná-nè iin ana icúmí tnũñuhu nuù dava ga nèhivi ñuu-nè; vâchi nú có-quidá víi-nè nuù nècuàchi ñuu-nèmà, dandu mà ùhi daquée cuàchi nècuàchimà dìquì-nè, te ducán ñà-sàni quida ñà-malu ganar cundua.

Índü clase nèhivi cunduu nècuàchi ñihí chuun xinúcuáchi nani díacono

⁸ Daaní, stná nècuàchi xinúcuáchi dasán obra, ni cécúndúú stná-nè nècuàchi tnũñuhu, nècuàchi cumplidu ndisa. Màsà cúndúú-nè nècuàchi xihí cuàhà vinu; ni màsà cúndúú stná-nè nècuàchi cuú ini-xi sàhà dihùn; còó.

⁹ Xiñuhu cunduu-ne nècuàchi cúnsihí ini-xi sàhà anima-xi ñà-nì còó víiá. Te iin-ni ni cunchícùn stná-nè ndudu ìi ni dātúí Dios nuù-ndà ñà-cunindisa-nda.

¹⁰ Te nú cuàhàn-nè cunucuachi-né ducán, dihna xiñuhu quidachuún chii-né chuun ma, dandu nú còó ni-iin falta xi-ne, dandu vātūni ndòo ndisa-ne xi cargu mà.

¹¹ Stná nècuàchi ñahà (cunucuachi ducán), xiñuhu cunduu stná-nè nècuàchi tnũñuhu, màdì nècuàchi túha cuitñuhu, còó; nècuàchi sahnú ini-xi ni cúndúú-nè, nècuàchi mà túha dandahví ni-iyuhu.

¹² Nècuàchi tiàa xinúcuáchi, mindaa ñahàdihí-nè ni cécúmi-nè, te ni cúndúú stná-nè ana dandacú víi nuù dèhe-xi, xi nuù nsidaa gá nèhivi vehe-ne.

¹³ Vâchi nú ni cúnúcuáchi víi-nda chuun xi mii-yá, dandu ñihí-ndà iin gradu ndi-aha (núu-yá), te ñihí stná-ndà ñà-mà yúhí gá-ndà càhàn-ndà sàhà Jesucristu, nansa xiníndísá-ndáyá.

Nansa ni cachi Pablo ndiá disàhà-xi ni tiaa-ne carta yohó

¹⁴⁻¹⁵ Yâchi sàì jaàn ndé iá-ní cahín, doco nú ni cueé cuàhí coi yohó, dandu siquiera sàni tiaí iin ùi iñàha ñà-cundaà vâha ini-ní nansa cacanu vâha-ní. Vâchi ndohó, iin-ni nèhivi nihnú vâha ini xi Dios xinduu-nda; te mii-yá, mindaa ana itiacú nicanicuañan nduú-yá. Te sàni cana-ya nsidaa-nda ñà-cunduu-nda nèhivi xí-yá. Te icúmí stná-ndà palabra ndâcuisi xí-yá, ñâyúcandúá inúù-ndañá, te ndiaá-ndañá.

¹⁶ Ndisa, ñà-ndáa nduá, ndiaha gá palabra sàni dātúí-ya nuù-ndà, vâchi nacaníá nansa ni nanduu-ya nèhivi, te ni xini nèhivi ñuhiví-yà. Te sàhà Espíritu Ìi ni cundaà ini-nè, còó falta xi-ya. Daaní, stná ángel xi-ya, ni xini stná-nèyá, dandu ni dàcuiñá nèhivi razón sàhà-yá mahí nèhivi ndoó cuàhà ñuu ñuhiví yohó, te cuàhà gá-nè ni xiníndísá stná xi-yá. Daaní, mànuhù-yá ansivi ndé gloria xi-ya.

4

Nansa coo palabra tnũhu cuitià na sàà quivì xinu tiempu yohó

¹ Claru cachitnũhu Espíritu Ìi xí Dios nansa icúmí coo quivì xinu tiempu yohó. Dava nèhivi, dècuèndè sàà-nè nacuaá-nè ñà-nduá xiníndísá-né, cachí-yá, dandu cunchícùn-nè ñà-tnũhu cacachi ñà-malu, vâchi cunindísá-né nacua cuniá cunindísá-né.

² Te tiàa icúmí dacuaha-xi-né ducán, vâha gá-te datiaá-te, doco tnũhu cundua cachí-te. Mà cúí gá màñihí ini-te índü chuun nduú iin chuun vâha, vâchi mà cúú gá sàxinítnùni-te sentir, na ian (xíhí) iin quisi ndé dúcùn tnuni.

³ Te cuàhàn-te cachí-te xi nèhivi ñà-cuàchi nduá cucumi-nda ñahàdihí-ndà, te cuàchi nduú stná ñà-caxi-ndà dava ñà-nduá saxí-nda, cachí-te. Doco nsidaa ñà-itiácú-ndà, ñà-nduá ni quidavâha Dios nduá; nuù mii-yá vâxan, ñâyúcandúá vātūni cutiacu-ndañá nú naquímáni-ndáyá sàhà-ñá, vâchi xiníndísá-ndà (ichi-yá), te ináhá-ndà ñà-nduú palabra ndâcuisi.

⁴ Vâchi nsidaa ñà-nduá ni quidavâha-ya, iá víiá. Te màsà càhíchi ini-ndà ni-iñàha ni quidavâha-ya, vātūni iá nsidaá nú ni náquímáni-ndáyá sàhà-ñá.

⁵ Vâchi sàhà palabra ni cachí-yá xi sàhà stná ñà-nàquímáni-ndáyá, ducan sàà ñà-cutiacu-ndà ndee vâha-ña nuù-yá.

Ñà-nduá ni cachi Pablo xiñuhu quida iin ana dacuaha-xi nèhivi nchícùn ichi-yá

⁶ Palabra ni cachí xi-ní jaàn cachí stná-ní xi nsidaa nèhivi iin-ni xicahvi xi Yua-nda Dios ducán. Dandísá cunduu-ní iin ana xinúcuáchi víi nuù Jesucristu, te chicá ndufuerté anima-ní ñà-xiníndísá vâha-ní, te nchícùn-ní dàññùhù iá víi mà.

⁷ Doco màsà ndúlócó-ní sàhà cuentu có-ndiáá, ò sàhà creencia-ni. Còó, ñà-nduá xiñuhu nduú ñà-fuerte cuàhandee ini-ní cunihnu ini-ní cuisí ichi mii-yá.

⁸ Cunaha-ní, nú fuerte ni quida-nda iin ejerciciu, dandu chindeámà iguicúñú-ndà iyuhu. Doco nú fuerte nihnú ini-ndà ichi-yá, ñà-jaàn ndisa, nsidanicuú modo chindeámàndó, vâchi

ducán nihì-ndà iin vida ndiaha na ndoo-va-nda ñuhiví yohó, xì stná na cundoo-nda inga ñuhiví.

⁹ Palabra ndàcuisì nduá yohó, te nsidaa-nda ndiá icà-ndà cunindisa-ndañá.

¹⁰ (Pues sàhà-ñá nduámá ñà-ndàcuisì), ñàyùcànduá sáhandee inì-ndà quida vii-ndà (chuun ì xi-yá) mate quidá quíni nêhiví xì-ndà, vâchi mii-yá, nicanicuahàn itíacú-yá, te sàhámá iá tñundé inì xi-nda nù-yá, vâchi túha-ya dacácu-ya nsidaa clase nêhiví, ñàyùcànduá nù nduu-nda nêhiví xiníndísá-xí-yá, dandu ináhá-ndá vátuni càcu vii-ndà nù-yá.

¹¹ Divi palabra jaàn icúmi-ní dacuaha-ní nêhiví, te chinaha-nínè quida-neà.

¹² Te mii-ní tu, xiñuhu (quida vii stná-ní), màdi cachichi inì nêhiví mii-ní ñà-nduù-ní iin nêcuàchi chiì. Ñàyùcànduá, càhàn vii-ní xi-né; te cacanu vii-ní. Te ni cúcuú stná inì-ní sàhà nsidaa ñanitaha-ní. Te siempre cunihnu vâha inì-ní mii-yá, vâchi ducán cundiaa-ní anima-ní. Daaní, nù indêhe nêcuàchi xiníndísá gá ñà-iin-ni quida-ní nsidaajàn, dandu vátuni quida stná-nè ducán.

¹³ Mate cuéi dandu sàì ndé iá-ní, iin-ni quida-ní seguir cahvi-ní tutu ì, te iin-ni ni nacuahandee inì-ní nêhiví, te dacuahá stná-nínè (na natácá-nsià jaàn).

¹⁴ Te nsinuu stná inì-ní ñà-íá iin ñà-nduá nì nihitáhvi-ní (nùu Dios) daa na ní chitándóo nêcuàchi sahnú ndahá-né ñini-ní, te ni càhàn-nè xi-ní razón ndiaha xí-yá. Ñàyùcànduá, iin-ni quida-ní ñà-nduá sàni nihitáhvi-ní quida-ní.

¹⁵ Nsidaa ñà-nduá cachí xi-ní yohó, nsinuu vâha inì-niá; iin-ni cunihnu vâha inì-niá, dandu cundaà inì nêhiví ñà-chicá más sàni cutúha-ní cunchicùn vii-ní ichi-yá.

¹⁶ Te cuidadu coo-ní xi mii-ní (ñà-quida vii-ní), te cuidadu coo stná-ní ñà-màsá dácuahá ndevâha-ní nêhiví. Dandu nù iin-ni ni quida-ní nsidaa ñà-yohó, vátuni càcu-ní nùu Dios, te càcu stná nêhiví iníni xí ñà-nduá chináhá-ní.

5

Modo ndiá icà-ndà càhàn-ndà xì nêcuàchi íá falta-xi na sáha-ndané ichi vâha

¹ Nù ni quidá iin nêcuàchi sahnú iin falta, màsá cánahá ndevâha-nda xi-né. Còo. Càhàn vii-ndà xi-né na ian càhàn-ndà xi iin yua-nda. Te nù tiàa chiì nduú ana íá falta xi, dandu càhàn vii-ndà xi-né na ian iin ñani-ndá nduú-né.

² Te nù nêcuàchi ñahá sahnú nduú ana (sáha-nda ichi vâha), dandu càhàn vii stná-ndà xi-né na ian dihi-nda nduú-né; te ò nù nêcuàchi ñahá chiì nduú-né, dandu càhàn tññuhu-nda xi-né iin modo vii na ian ni cundúú-nè iin cùha-nda.

Nansa xiñuhu chindee-nda tnaha-nda nù yâha ndahví-nè

³ Nù ndoó nêcuàchi ñahá nì xihí ì-xí, dandu dacútiacú-nsià nêcuàchìlà, nù ndisa (còò tnaha-ne cundehè-nè nù-xí).

⁴ Doco nù ndoó dêhe-ne, ò dêheñani-né, dandu xiñuhu cundaà inì nêcuàchìlà ñà-ndiá icà-né quidañuhu-nè tnaha-nemà, te nachindee-né ana sahnú xí nèmá, vâchi cunduumá iin obra vâha nùu Dios, iin obra cudí inì-yá sàhà-xí.

⁵ Doco cunaha-nsiá, nù nêcuàchi cuaán ndisa nduú-né, te còò tnaha-ne cundehè-né nù-xí, dandu cuisì Dios cundéé inì-nè, te iin-ni xicán tàhvi stná-nè nù-yá ndui te ñuú.

⁶ Doco nù tucu nihnú inì-nè, te cuisì cudí inì-nè quida-ne ñà-nduú gustu xi mii-né, dandu mate itíacú-nè, doco ñà-sàni ndañuhu vida ndiaha xí-né nduá.

⁷ Nsidaa palabra jaàn chinaha vâha-ní nsidaa compañeru-ní sàhà-ñá màsá quidá-né ni-iin falta, te ducán nihí nêhiví nansa daquée cuàchi-ne diqu-ndá,

⁸ vâchi cunaha-ní, chuun cahnú nduá chindee-nda tnaha-nda, te chicá más cahnú chuun nduú ñà-chindee-nda nêhiví meru vehe-nda, vâchi nù coó, dandu ñà-sàni nacuaà-ndà ichi Dios nduá, te chicá quini queá nùu modo xi nêcuàchi có-xiníndísá.

Ñà-nduá nì cachi Pablo quida nêhiví xí Jesús na cuáhàn-nè tavà-né lista xi nêcuàchi ñahá sahnú nihí xi ayuda

⁹ Cuisì nêcuàchi cuaán sàni xinu ùni dico (60) cuiá ni cundúú ana nàcava nùu lista, cuisì ana nisa ía xí imindaa nsi-ì-xí.

¹⁰ Te ni cundúú stná-nè iin nêcuàchi ináhá-nsiá nì quida cuàhà obra. Xiñuhu cundaà inì-nsia a ní dàcuahmú ví-né luchí cuatí, te ¿a túha stná-nè quidañuhu ví-né nêhiví sàá vehe-ne? ¿A túha stná-nè cunucuachi-né nùu dava ga nêhiví xí Dios, mate chuun cuatí luha nduá? Te ¿a túha stná-nè chindee-né nêcuàchi yâha tñundoho, te ò ndéni nêhiví ní cui yâha ndahví? Nù ducán quidá-né, dandu vátuni nàcava stná-nè nùu lista xi nêhiví (chindee-nsiá).

¹¹ Doco nêcuàchi chicá cuachi, còo, vâchi (sàhà-ñá cuachi vá-né), mà ùhì sàa-ne nacani tucu inì-nè, te nandódo-né (chuun) cuní Cristu quida-ne, te nandàhà tú-né.

¹² Doco iin falta xi-ne cunduumà, vâchi ñà-nduá nì cachi-nè, sàni nacoo-neà.

¹³ Nècuàchi chicá cuachi ma, mà úhi cuni dùsàn-né, te cacanu xixín-né vehe vehe. Te màdi cuisí ñà-jaàn, vâchi cutùha stná-nè cuitnùhu-ne, daquihiyuhù-né nùu chuun xi nècuàchi dava ga, te cachi-nè ñà-có-ndiá icà-né cachi-nè.

¹⁴ Ñâyùcàndùá, yùhù cachí, chicá vâha ni nándàhà ñahàcuáán nú cuachi-né, te ni cúnsihi ini-nè dèhe-ne, xi chuun vehe-ne, dandu mà ñihindèè nècuàchi có-íá ladu xi-nda daquéé cuàchi-ne (diquí-ndà sàhà nècuàchimà).

¹⁵ Vâchi cunaha-ní, vichi sandoó dava nècuàchimà sàni tùcù ichi ñà-malu.

¹⁶ Ñâyùcàndùá, nú íá iin nècuàchi tiàa xiníndisá, ò iin nècuàchi ñahà xiníndisá, te ndoó tñaha-ne ni xihí ì-xí, dandu mii-né ndiá icà-né chindee-né nècuàchimà sàhà-ñà màsà cóo necesidad cundehè nècuàchimà nùu táca mii-nsiá. Vâchi nú chindee-nsiá tñaha-nsiá ducán, dandu vâtni sàa-nsiá chindee-nsiá nècuàchi cuaán íá ndisa necesidad xi.

Nansa xiñuhu quidañuhu-nda nècuàchi sahnú inúu nùu nèhivi xí Dios

¹⁷ Nècuàchi sahnú inúu víi nùu nèhivi xí Dios, ndiá icà-ndà quidañuhu-ndané. Te nú nduú-né iin nècuàchi càhàn xi-nda sàhù, te dacuahá-nèndò palabra ì xi-yá, dandu chicá màs xiñuhu quidañuhu-ndané.

¹⁸ Vâchi cachí nùu tutu ì (iin ejemplu tii) ndé cachá: “Màsà cúñúhú ñunù yuhù buey na sánihni-si sicâyòcò trigu cóyo nùnìá”. Daaní, cachí stná tutu mà: “Nú sàni quidachuun-nda, íá stná derechu xi-nda nihí-ndà raya xi-nda”, cachá.

Nansa quida-nda nú daquéé cuàchi nèhivi diquí iin nècuàchi sahnú inúu xi-nda

¹⁹ Nú daquéé cuàchi iin nèhivi diquí iin nècuàchi sahnù-mà, doco imindaa ana daquéé cuàchi, dandu màsà cándisá-ní, vâchi xiñuhu siquiera ùi ò úni-nè, (dandu vâtni cunini vâha-ní ñà-ndùá cachí-nè).

²⁰ Te nú ndisa íá falta xi nècuàchi xidá cuàchi ma, te có-ndulócò-nè, dandu chinaha-nínè nùu nsidaa compañeru-nsiá sàhà-ñà (ni nácáni ini-nè, te) yùhí-nè.

²¹ Yùhù cachí xi-ní, (Timoteo), iin-ní nacua nduú nsidaa ley yohó, ducán icúmí-ní quida-ní (xi nècuàchi sahnú dandacú); iin-ní icúmí-ní ndenihi-ní nsidanicuú-né, màdí chicá víi quida-ní xi ana íá vâha xi-ní. Ducán chináhi mii-ní quida-ní, te ináhá stná (Yua-nda) Dios xi Jesucristu, xi nsidaa stná ángel ì xi-yá.

Màs gâ conseju ni sàha Pablo Timoteo

²² Na cuáhàn-ní cuàha-ní iin nèhivi chuun ñà-dandacú-né, màdí nansa-ni ni cui quida-ñà. Dihna nacani vâha iní-ní. Te màsà (cuàha-nínè chuun nú nduú-né) nècuàchi có-quidá víi, vâchi nacuida stná-ní cuàchi quida-ne. Cundiaá-ní anima-ní.

²³ (Ináhí) tutoo ndecuéhè-ní kuhí tixi-ní, ñâyùcàndùá coho stná-ní chii vinu si-uva, màdí cuisí tējuí uun.

²⁴ Dava nèhivi, mate tãháha ga sàa hora coo juicio xi-ne, doco nàhà xicà íá cuàchi-ne. Te dava ga-nè, cuisí ndè después natù cuàchi-ne.

²⁵ Te divi ducáni stná xi nècuàchi quidá víi; vâchi nú sàni quida-nda obra, claru tùia nùu nèhivi; te mate dhé ni quida-ndañá, doco mà cúf coo dhé nicanicuahàn.

6

Nansa xiñuhu quida nècuàchi ndoó saín nùu iin lamú

¹ Nècuàchi ndoó saín nùu iin lamú, ni cóo tñùñuhu xí-né nùu lamú xi-ne, vâchi nú ducán, mà ñihindèè nèhivi càhàn-nè diquí mii-yá ana cahvi-nda, ni diquí stná ñà-ndúá xiníndisá-ndá.

² Te nú iin nècuàchi xiníndisá nduú lamú xi-ne, dandu màdí chicá menos quidañuhu-né lamú xi-nemà sàhà-ñà dava-ni nduú-né nùu Yua-nda Dios. Cóo; chicá màs ni cóo voluntad xi peón mà quidachuún víi-né, vâchi iin-ní xi-xiníndisá-né, te cuú stnahá stná ini-nè sàhà-né, ñâyùcàndùá chicá ndiá icà peón mà cunucuachi víi-né nùu nècuàchimà.

Cunaha-ní nsidaa palabra yohó icúmí-ní cachitnùhu-ní xi nèhivi yucán, te dacuahá víi-nínè.

Contentu ni cúndóo-ndá xí ñà-ndùá icúmí-ndá, màsà xího-nda cuàhà iñàha, vâchi sà-íá mii-yá ini anima-nda

³⁻⁴ Nú ndoó nèhivi chináhá stnahá xi tucu palabra có-cáchí nacua cachí palabra víi xí Stoho-ndá Jesucristu, dandu (màdí ichi mii-yá nduá), cutu tuxí ini nècuàchimà ndiaá cuàhà-né. Te nú có-cándisá-né palabra nacua nduú ichi ìi mii-yá, dandu cóo ni-iñàha ináhá ndisa-ne. Cóo, cuisí-ní ñà-cúdú ini-nè cuàhà-nè sàhà chuun cuatiluha nduá. Doco después mà úhi quesaha-né cumbidiá stnahá ini-nè sàhà-né, te nàá stnahá stná-nè; dandu víhi gâ pesadu càhàn-nè diquí ñanitnaha-ne, te chicá indéhe díin stnahá stná-nè.

⁵ Dandu quesáhà-nè daquéé cuàchi stnahá stná-nè, vâchi sàni dàcà sàxinítnùnì-nè, te có-nihnú gâ ini-nè ñà-nduú ñà-ndácuisí. Cutu ñà-nihí-nda dihùn nduá disáhà-xí

cunchicùn-ndà ichi Dios cahan-né. Pues nsidaa nècuàchi nihnú inì-xi ducán, nacoò dahuun-nínè.

⁶ Pues ñà-ndàá nduá, cuàhà gá ñà-cuicà nduá nuù-ndà nú nhcìcùn vii-ndà ichi-yá, te ndoo-nda contentu xì ñà-nduá sà-icúmi-ndá.

⁷ Vàchi còò ni-ñàhà nihi-nda ni quésáá ñuhiví yohó, te còò ni-ñàhà cunihì stná-ndà cùhùn na quee-nda yohó.

⁸ Ñàyùcàndüá, nú iá ñà-cutiacu-ndà xì ñà-cundixi-nda, xì ñà-jaàn-ní ni cùndóó-ndá contentu.

⁹ Dava nèhivì, yáha ga cuní-nè nducuica-né, doco cunaha-ní, cuàhà peligrü ndacá mà, vâchi nú nihnú inì-nè ducán, mà ùhi sàà-nè dacuidá cuàchi-ne mii-né, te mà ùhi dandahví ñà-malu-nè, te dacá-sì òò ñà sàhà-ñá xího cuàhà-né ñàhà. Doco mii-né quidáquini-né xì mii-né, vâchi sàhà ñà-jaàn icúmi cuchicuehe anima-nè, te mà nátüi ga-nè nuù Dios.

¹⁰ Vâchi nú cuú inì-ndà sàhà òòhùn, mà ùhi quida-nda nsidanuu clase cuàchi, vâchi nahì yohó cuàchi nduá. Doco divi ducán sàni quida ñàhà nèhivì, ni cuu cuahà inì-nè sàhà òòhùn, te sàhàjan ni tùcù-nè inga ichi ndé có-xiníndísá víi gá-nè, te cunaha-nsiá, dècuèndè vâchi cuàhà gá dandohó-né anima-nè.

¹¹ Doco mii-ní, iin nèhivì xì Dios nduu-ní. Ñàyùcàndüá ni-iin xichi màsà nácáni inì-ní quida-ní nacua quidá nècuàchi yucán. Iin-ni cuàhandee inì-ní quida-ní ñà-ndüü ichi vâha, te nanducu-ní nansa cahvi-ní mii-yá. Iin-ni ni cùnìhnü inì-niyá, te iin-ni cuu stná inì-ní (sàhà-yá xì sàhà stná ñanitnaha-ní). Quidandee inì-ní sàhà nsidaa ñàhà, te siempre coo màni inì-ní.

¹² Cuàhandee gá inì-ní ñà-màsà dáca xì òòhùn-ní, te nacoò-ní fe vâha xì-ní; iin-ni cunsihi inì-ní ñà-seguru cucumi-ní vida ndiaha nicanicuahàn, vâchi sàhà-ñá nihi-niámà, ñàyùcàndüá ni cana Dios mii-ní, te ndee ní cachi stná-ní iin palabra vâha ñà-cuàhàn-ní cunchicùn vii-ní ichi-yá; te cuàhà stná nèhivì ni inini na ní cachi-ní ducán.

¹³⁻¹⁴ Ñàyùcàndüá, vâchi chináhì mii-ní ñà-chivâha-ní palabra ndiaha ni cachi Dios. Ducán cachí xì-ní, te iníni stná mii-yá, divi mii-yá ana dipoder-xì itiacú nsidanicuú ñàhà iá ñuhivì; te iníni stná Jesucristu, divi mii-yá, ana ni cachi vate stná ñà-ndüü palabra ndiaha na ní dàtnátuu-tèyá nuù Poncio Pilato. Ñàyùcàndüá, iin-ni chivâha-ní ñà-ndüá ni ndacu nuù-ní nuù-yá. Màsà cùmáncâhà anima-ní, te ni-iyuhu palabra mà màsà nándòó-ní ndè cachi sàà quivì naxicocuñin Stoho-ndá Jesucristu.

¹⁵ Vâchi meru quivì xì-yá icúmi-yá tùi-ya nuù-ndà quida Yua-nda Dios, (ansivéhé-yá), vâchi ndiaha gá-yá. Mindalini mii-yá dandacú-yá ñuhivì, cuiisì mii-yá cusáhnü-yá nuù nsidaa rey, xì nuù nsidaa gá ana icúmi chuun ñuhivì yohó.

¹⁶ Cuiisì mii-yá nduü ana de por sí icúmi xì vida ndiaha nicanicuahàn. Fuerte tnüü nihni ndiaha ndé iá-yá, te mà cùì nihi nèhivì cuyatni-ne. Còò ni-iin ana ni xinínüü xì-yá, ni mà nunca sàà-nè cuni-nèyá. Te vâchi nicanicuahàn ni queé tnüñuhu xì-yá, te nicanicuahàn ni cúsáhnü fuerte-yá (inicutu), amén.

Nansa xiñuhu cunihnu inì nècuàchi cuicà

¹⁷ Càhàn-ní xì nèhivì icúmi xì ñà-cuicà ñuhivì yohó, te chinaha-nínè ñà-màsà cóo cuadú-nè, ni màsà cáhvi-né xì òòhùn xì-némà, vâchi còò seguru xan. Còò. Dios ni cahvi xì-nda, vâchi mii-yá, nicanicuahàn itiacú-yá, te cuiisì mii-yá vâha ndisa inì-xi, te sàha-yàndó nsidanicuú ñà-ndüá xiñuhu nuù-ndà sàhà ñà-cundoo-nda contentu ñuhivì yohó.

¹⁸ Cachi-ní xì nècuàchi cuicà mà ñà-ndiá icà-né quida-ne obra; dispuestu ni cùndóó-né dasàn-né ñà-ndüá icúmi-nè, te cundehe ndahví-nè ñanitnaha-ne, dandu obra ndiaha-ma cunduu ñà-cuicà-né.

¹⁹ Te na cáya cuàhà ñà-jaàn, dandu cunduumà ñàhà chindee xi-né dècuèndè stná inga (vida) vâxi xì-nda, te ducán nihi stná-nè cutiacu ndisa-ne vida ndiaha.

²⁰⁻²¹ Yùhü cachí xì-ní Timoteo, cundiaa vâha-ní (palabra ñi) ni ndacu nuù-ní cundiaa-ní. Màsà quíhitnaha-ní xì nèhivì càhàn ndevâha palabra loco mate cachí-nè chicá ndiáá ñà-ndüá ináhá mii-né. Ináhá-nè, cachí-nè, doco cachí va-ne, vâchi có-ndüá ducán. Dava nèhivì, ducán ni tuxi inì-nè, doco divi sàhámà ni tùcù-nè ni quee-ne nuù ichi xiníndísá víi-nda mii-yá.

Ní cùcúmi cuàhà-ní gracia xì-ya. Sà-íá.

Tutu Ûi Nî Tiaa San Pablo nùu Timoteo

¹ Yùhù nduí Pablo, iin nècuàchì nì nìhì chuun ndiaha nùu Jesucristu, vâchi ducán nì chitnùnì inì Dios sàhí nacua nì chitnùnì stná ini-yà ñà-nìhì-ndà vida ndiaha nùu Jesucristu, vâchi ducán sàni cachi-yà xi-ndà.

² Te vichi cásàhúì xì mii-ní Timoteo, vâchi nahi dèhemaní nduu-ní. Te xicàn tàhví nùu Yua-nda Dios xì Stoho-ndà Jesucristu ñà-nì cuàha-ya mii-ní vihi gracia, te nì cùndéhe ndahví stná-yà mii-ní. Contentu ni coo-ní quida-ya.

Nansa ni cachi Pablo xi Timoteo ñà-nsinúú ini-nè nècuàchì mî

³ Nacua nîsa quida xîí nîsa xinucuaachi víi-né nùu Dios, ducán quidá stná yùhù vichi, còò nì-iin falta dandoho-xì sàxinítùnì. Pues divi nùu mii-yà xicàn tàhví sàhà-ní: ndui te ñuu naquímánì mii-yà sàhà-ní. Nicanicua hà n nsinúú ini mii-ní.

⁴ Mà cù nándodí nansa ni sacu-ní daa. Yáha ga cunf cundehí mii-ní, dandu ndòo vâha ini animè.

⁵ Yùhù nsinúú stná inì nansa quida-ní ñà-siempre ñihnú vâha inì-ní mii-yà, màdiá danani úun-ní nduá. Primeru nitá xi-ní Loida, nîsa xinindisá-né mii-yà, dandu después dihi-ní Eunice, te vichi stná mii-ní, ducán ñihnú vâha stná ini-níyá ináhi.

⁶ Ñâyücàndüá, xiñuhu nsinuu inì-ní nansa ni ñihitâhvi-ní na nì chitândòí ndahí ñini-ní daa, te vichi cunf nandudii inì-ní quida-ní nacua nduú tàhvi-ní.

⁷ Vâchi çíndü ñàha quidá Espiritu xi Dios ini anima-ndà? ¿A chicá yúhî-ndà quidá-yà? Còò, ñà-chicá ndufuerté anima-ndà nduá quidá-yà; te sàhà mii-yà chicá cuú stnahá stná ini-ndà sàhà-ndà, te chicá nacánì sahnú ini-ndà quidá-yà.

⁸ Ñâyücàndüá, màsà cùcáhán nùu-ní càhàn-ní xì nèhivi sàhà Stoho-ndà Señor, ni màsà cùcáhán nùu stná-ní sàhà yùhù ñà-ìé' vehecáa sàhà-yà. Còò. Dispuestu ni coo-ní ndoho stná-ní sàhà razón ndiaha xí-yà, vâchi icúmí-yà chindee-yándò.

⁹ Nì dâcâcu-ya anima-ndà, te nì cana-yándò ñà-cunchicùn-ndà ichi ñi-yà. Doco màdi sàhà obra vâha ni quida-nda nduámà; còò; cuiis sàhà-ñá ducán nì chitnùnì ini mii-yà, te sàhà-ñá màni gá stná ini-yà. Dècuèndè na táyòo ñuhiví, dandu nì chitnùnì ini-yà ñà-cuàha-yándò gracia xi-ya nù sàni tenchicùn-ndà Jesucristu.

¹⁰ Te vichi sàni tùi vate gracia mà nì quida-ya, vâchi nì quixi Jesucristu ñuhiví yohó ñà-dacâcu-yándò, te sàhà-ñá nì cundee-yà nì càcu-nda, mà sàà-ndà cui ndisa-nda. Còò. Te vichi xitiá razón ndiaha xí-yà, te ducán datnúu-yà anima nèhivi ñuhiví nansa ñihì-né vida ndiaha nicanicua hà n ñà-mà nunca cui ndisa-ne.

¹¹ Pues divi razón mà nì nìhì chuun cachitnùhi xì nèhivi, vâchi mii-yà, nì techuún-yà yùhù cùhìn chinahì nèhivi nsidanicúú ñuu.

¹² Te divi sàhà ñà-jaàn ñé' ndohí (quidá nèhivi). Doco có-cùcáhán nùu', vâchi ináhi ana xiníndisè; ndahà mii-yà sàni dâyáhi mii', te ináhi iin-ni icúmí-yà cundiaa-yà vida xi dècuèndè quiví nasai nùu-yà.

¹³ Dâñùhù nì dâcuàhí mii-ní, ñà-jaàn nsinuu vâha inì-ní, te màsà dâamá-ñá, vâchi vâtùnì chindeá mii-ní, cuiis xiñuhu ñà-iin-ni cunihnu vâha stná inì-ní mii-yà, te cuu stná inì-ní sàhà nsidaa nèhivi, vâchi ducán ndiá icà-ndà quida-nda nú nchicùn-ndà Jesucristu.

¹⁴ Sàhà poder xi Espiritu ñi cundiaa vâha-ní palabra ndâcuisì nì nacoí nùu-ní, vâchi iá-yà ini anima-ndà.

¹⁵ Nacua ináhá-ní tucu sàncánì ini nsidaa compañeru-ndà ndoó ladu Asia, có-cuú gá ini-nè sàhí. Iin nècuàchì mà nduú Figelo, te inga-nè mà nduú Hermógenes.

¹⁶ Doco Onesiforo, còò; có-cùcáhán nùu-né ñà-ìé' vehecáa yohó. Nì cùndéhe ndahví Dios-né xì stná nèhivi vehe-ne, vâchi cuàhà xichi nì quixi-ne visita, te ndiaha gá nì ndòo vâha inì nì quida-ne.

¹⁷ Vâchi na ní quixi-ne ñuu Roma yohó, cuàhà nì xicanuu-ne nì nanducu-né yùhù, dandu nì ndacùhun-ne yùhù.

¹⁸ Ñâyücàndüá, nì cùndéhe ndahví Stoho-ndà Señor-né na sàà quiví (nacua ha-nda cuenta nùu-yà). Vâchi mii-ní, ináhá vâha-ní ñà-cuàhà guá ñà-vâha nì quida stná-né (xi-ndà) na nì sandoo-nda ñuu Éfeso.

2

Xiñuhu cuàhandee ini-ndà cunchicùn vîi-ndà Jesucristu

¹ Nahi dèhe mii nduu-ní, te cach' xi-ní ñà-nì nsinúú vâha inì-ní nansa nì quida Jesucristu gracia sàhà-ndà, te nì ndèe anima-ndà ini anima mii-yà. Pues vichi divi sàhà gracia mà nì cuníhnú fuerte inì-ní.

² Cuàhà gá ìñàhà sàni dàcuàhí mii-ní, te ni inini stná cuàhà gá más nèhivì. Pues vichi xiñuhu nacàxin-ní itnii nècuàchì seguru, te chinaha stná-nínè ñà-ndúu palabra ni dàcuàhí mii-ní, dandu vātùnì chinaha stná-nè más gà nèhivì.

³⁻⁴ Quidandee inì-ní sàhà nsidaa vida yáha-ní, nacua quidándéé ini iin soldadu vaha, vāchi soldadu xi Jesucristu nduu stná-ndà. Te cunaha-ní, nsidaa ana nduu soldadu, nacóo ñihní-te nsidaa chuun xi mii-té sàhà-ñá cuní-te cunchicùn vii-té ana dandacú núu-té.

⁵ (Inga ejemplu): nú nduu-nda tècuachi dadavástnàhà juegu, dandu fuerza icúmi-ndá cunchicùn-ndà ley xi juego mà, vāchi nú coó, mà nunca quida-nda ganar.

⁶ Daaní, nú nduu-nda nècuàchì xitú, te quidáchúún víi-nda itu-ndà, dandu primeru mii-nda cunduu nècuàchì ñihí xi ñà-ndúá caná viu mà.

⁷ Pues nacani vaha inì-ní sàhà ñà-ndúá cachí xi-ní yohó, te icúmi Dios chindee-yá mii-ní ñà-cundaà vaha inì-ní sàhà nsidaájàn.

⁸ Nsinuu inì-ní sàhà Jesucristu ñà-ní natiacu-yà, te nduu stná-yà descendencia xi rey David. Divi ñà-jaàn nduá cachí xi nèhivi na (xicánúí) cachítñhì xi-né razón ndiaha xi-yá.

⁹ Te sàhà-ñá quidè ducán, ñàyucàndúá ndohí vichi, sà-inàhà-ní; dècuèndè ndiadi stnái vehecàa vichi, vāchi quidá nèhivi cuenta ñà-ndúú iin tè-tùha quini. Doco palabra xi Dios, cóo, có-ndiàdiá, (xitià ìiá).

¹⁰ Ñàyucàndúá, quidándéé inì sàhà nsidaa ñà-ndúá yáhi, vāchi nú ducán, dandu ñihítàhvi nècuàchì ni nacàxin Dios sàà-nè càcu ndisa-ne quida Jesucristu, te nicanicuahàn cundoo ndiaha stná-nè núu-yá (nahi ndohó).

¹¹ Ñà-ndáà nduu palabra yohó: nú icúmi-ndá cui-ndà sàhà-ñá nhcìcùn-ndà mii-yá, dandu icúmi stná-ndà natiacu-ndà, te cundoo-nda núu-yá.

¹² Te nú dandohó nèhivi-ndó (sàhà-yá), dandu quivi sàà-yà cusahnú-yá, cutnahá stná-ndà xi-yá cusahnú-nda. Doco nú ni nacuaa-ndayá, dandu icúmi stná-yà nacuaa-yá ndohó.

¹³ Mate ndohó, có-xiníndisá-ndá, doco mii-yá, iin-ni icúmi-yá quida vii-yá cumplir. Mà cúí nacuaa-yá (ñà-ndúá sàni cachí-yà), vāchi mii-yá nduu-yá mii-yá.

Nansa xiñuhu quida nèhivi chináhá xi palabra xi Dios

¹⁴ Càhàn-ní xi nècuàchì (chináhá xi nèhivi xí Dios), te dansínúú inì-nínè sàhà palabra yohó. Cachi-ní xi-nè ñà-Stoho-ndà Señor nduu ana ndácùcahan-nda, te sàhàyucàndúá màsà cundóo-ndá nàá stnahá uun-nda sàhà chuun cuatiluha, vāchi nú ducán, mà ñihíndèè-ndà ni-iyuhu ñà-vaha, cuisì danácáni gá inì-nda nèhivi iníni mà.

¹⁵ Cuàhandee inì-ní (quida vii-ní) sàhà-ñá ndee vaha-ní núu Dios, màdí cucahan núu-ní (núu-yá) na iin peón có-quidá víi. Quida vii-ní chuun xi-ní; chinaha vii-nínè palabra ndacuisi divi nacua iá ndisa palabra mà.

¹⁶ Doco iin palabra chicuèhè, ni loho màsà quíhín casu-ní ñà-jaàn. Vāchi ñíndù ìñàhà ñihí-nda núu palabra mà? Cuisi ñà-chicá más tucù-nda inga ichi có-ndúú ichi mii-yá.

¹⁷ Vāchi nahi cuèhè xitià ñihni iguicúñú-nda, te saxá-ndó, ducán quidá stná dàñhùh (có-ndiàà mà). Te divi ñà-jaàn nduá quidá stná dàñhùh chináhá Himeneo xi Fileto.

¹⁸ Vāchi sàni tucù nècuàchimà iin ichi tñhùh, te cachí-nè (màdiá quivi núu-xi natiacu-nda); cóo, ñà-sàni natiacu-nda nduá, cachí-nè, te sàhà palabra jaàn sàni dacà-né ñini dava nèhivi, te có-xiníndisá gá nècuàchimà.

¹⁹ Doco tucu iá iin obra xi Dios; mà nunca ndañuhá; na iin cimientu fuerte nduá; te na ñan itúú stná iin seña xi-ya icà-ñá (ndé cachá): “Ináhá Stoho-ndà Señor ñíndù nèhivi nduu nèhivi xí-yá”. Te cachí stná palabra mà: “Nsidaa ana ndácùcahan xi quivi Cristu, ni nácóo dahuun-ne ichi malu”.

Ejemplu sàhà traste vehe nècuàchì cuicà

²⁰ Cuàhà traste yuhùnùhú ndoo vehe iin nècuàchì cuicà, te dava traste mà, oro ò plata ni cuyucán, te cuisì ñà-vii quee inià. Doco dava traste mà, yutnú ò ñuhù ni cuyucán, ñàyucàndúá xichúún-ndáñà ndéni chuun ni cui.

²¹ (Pues ducán iá stná xi mii-nda.) Ñàyucàndúá, nú ni cúxío nsidaa ñà-íá quini ini anima-nda, dandu nahi traste vico-ma cunduu-nda, vāchi sà-íá ndoo anima-nda, te vātùnì quida-nda chuun núu Stoho-ndà Dios; vātùnì quida-nda nsidaniciu obra vaha.

²² Ñàyucàndúá, mii-ní, nandòdó dahuun-ní nsidaa ñà-ndúá xího guá tècuachi dava ga, te cuisì ichi ndáa Dios cunchicùn-ní, divi ichi ndé ñihnú vaha ini-nda mii-yá, te cuú stnahá ini-nda sàhà-nda, vāchi ichi mà ñihí-nda cundoo màni nsidaa-nda. Divi ducán xiñuhu quida nsidaa ndohó nècuàchì iá ndoo anima-xi, te ndácùcahan-nda Stoho-ndà Señor.

²³ Doco nú ndoo nèhivi ndatnúhú cuàhà gá sàhà chuun cuatiluha có-ndiàà ndisa, dandu màsà quíhvihnà-ní xi-né, vāchi mà ùhì quesaha-nsiá nàá stnahá-nsiá sàhà chuun nahi ñà-jaàn.

²⁴ Doco có-íá vâha nâá-ndâ xî ñèhivî, vâchi ana xinúcuáchî nùú Stoho-ndâ Señor nduu-nda. Còó, vivíí xiñuhu càhàn-ndâ xî-né, te dacuahá víi-ndané; nî coó calma-ndâ xî-né.

²⁵ Mate càhàn-nè dìquì ley xi-nda, doco vivíí-nî dansítñùú ini-ndâné, vâchi vihini cundehé ndahví Dios-nè, te naxicocuñî ini-nè nacuni-nè índú palabra nduú palabra ndâcuisî,

²⁶ dandu nihî-né nacunihnu vîi ini-nè, te càcu-ne nùú ndahâ ñâ-malu, vâchi quisi mà, nî dacâ-sí ñî-né sâhâ-ñâ dandacú-sî nùú-né nacua cudíi ini-sî.

3

¹ Yùhù cuní cundaâ ini-ní nansa icúmî coo quivî xînu tiempu yohó, vâchi tiempu ùhî cundua.

² Cuâhâ gâ ñèhivî tiempu yucán chicá icúmî-né cuu ini-nè sâhâ mii-né, xî sâhâ ñîhùn stná; chicá ndiaâ mii-né cucahan-né, te coo cuadú stná-nè, mà ùhî càhàn-nè dìquì Dios. Nî mà ndúlócô gâ-nè sâhâ ñâ-nduâ cachí yuadíí-nè; mà náquímâni stnahá gâ stná-nè; te icúmî-né cahíchi stná ini-nè nsidaa ñâ-nduú chuun ìi.

³ Te mà cùhí stnahá gâ stná ini-nè. Mà cùcâhán gâ-nè nâcùndoo vâha-ne; nècuâchî xicánúú uun xî ñâ-tnùhù cunduu-ne, nî mà cá-chítñùni gâ ini-nè. Cuâhâ gâ icúmî-nè ndu-tehîi stná-nè, te cahíchi stná ini-nè nsidaa ñâ-nduú chuun vâha.

⁴ Mà ùhî cahin stnahá-né, te mà cóó ìi gâ stná ndahâ-né; mii-né nduú-né mii-né cucahan-né. Chicá cuu ini-nè sâhâ ñâ-cùdîi ini-nè quida-ne, te màdî sâhâ Dios.

⁵ Mate quidá-né na ian cahví-néyâ, doco mà cándísâ-né ndudu ìi xî-yâ. Doco mii-ní, màsâ quíhvi tñaha-ní xî nècuâchî quidá ducán.

⁶ Vâchi nacua icúmî quida ñèhivî tiempu mà, ducán sâquidá stná dava tiâa vichi, tùha-tè cacanu-tè vehe vehe, te na có-sâha ñèhivî cuenta, dandu dacúnindísâ-tè nècuâchî ñahâ palabra xi-tè, vâchi mà fuerte ini nècuâchímâ sâhâ-ñâ dandoho guá cuâhâ falta xi-ne mii-né; mà ùhî quida ndevâha-ne cuâhâ ñîñâha.

⁷ Ñâyücândüâ, cuâhâ ley dacuahá-né, doco ni có-sââ-nè cundaâ ini-nè ñâ-nduú palabra ndâcuisî.

⁸ Te tiâa (chináhâ chicuèhè xî-né) ducán, xíquida-tè nacua nî caquida tètâtnâ nani Janes xî Jambres sâhana na ní cunî-te cadî-te nùú Moisés; te divi ducán quidá stná (tètñùhù) chináhâ vichi, cunî stná-te cadî-te nùú (ñèhivî chináhâ vîi) xî palabra ndâcuisî, vâchi yâha ga ndahví sâxínítñùni-tè, ñâyücândüâ có-cunî Dios cunindísâ-nda palabra chináhâ-te.

⁹ Doco cunaha-ní, divi jaân-ní nùú-xî sââ-te, vâchi claru icúmî nsidaa ñèhivî cundaâ ini-nè sâhâ tèmâ ñâ-loco-te, divi nacua nî xini stná ñèhivî sâhana sâhâ tètâtnâ yucán.

¹⁰ Doco mii-ní, sâni xini-ní nsidaa ñâ-nduâ chinâhî ñèhivî; ináhâ-ní xicánúú sahnúí, te nihnú vâha ini mii-yâ. Ináhâ stná-ní ñâ-nduâ nihnú ini quide vida xî. Te in áhá stná-ní ndee cahnú ñî, te cuú ndisa ini sâhâ ñanítñahi; quidá ndéé ñî sâhâ-né.

¹¹ Te sâni xini stná-ní ñâ-cuâhâ guá vida nî yâhî nî quida ñèhivî, te nî ndoho cuahí, vâchi nî xini-ní nansa nî cuu xî na ní le ñuu Antioquía, xî ñuu Iconio, xî ñuu Listra. Ináhâ-ní nansa nî quida quini ñèhivî xî yucán. Doco (ansivéhé) Stoho-ndâ Señor, nî xidahan-yâ yùhù nùú nsidaa tñundoho ma.

¹² (Pues ducán nî ndohi), vâchi nsidaa ana cunî cunchicùn vîi ichî Jesucristu, icúmî stná-nè cunî-nè cuâhâ vida quida ñèhivî.

¹³ Doco nècuâchî malu, xî nècuâchî tñùhù, chicá más icúmî dàcâ sâxínítñùni-nè ñâ-dândâhví stnahá-né.

¹⁴ Doco mii-ní, iin-nî cunihnu vâha inî-ní ñâ-nduâ sâni dàcuâhâ-ní, te nî xinindisa-ní, vâchi ináhâ-ní ana nduú nècuâchî nî chinaha xî-ní, ñâ-nduú-né nècuâchî seguru.

¹⁵ Te ináhâ stná-ní ñâ-dècuèndè tii-ní sâni cundaâ inî-ní nansa cachí tutu ìi; te cunaha-ní, nú sâni cundaâ ndisa ini-ndâ nansa cachí tutu mà, te xiníndísâ stná-ndâ Jesucristu, vâtùni càcu anima-ndâ.

¹⁶ Vâchi nsidaa ñâ-nduâ cachí nùú tutu ìi, ñâ-nî dàtnùú Dios sâxínítñùni ñèhivî nduâ. Ñâyücândüâ, sâhâ tutu mà vâtùni chinaha-ndâ ñèhivî ichî-yâ. Vâtùni càhàn stná-ndâ xî-né nú sâni tùcù-nè inga ichî, dandu chindee-ndané natenchicùn-nè ichî vâha, te dacuahá gâ-ndané nansa cunduu-ne ñèhivî ndâcuisî ini-xi. Pues sâhâ nsidaa ñâ-jaân vâtùni quida tutu ìi mà chuun

¹⁷ nùú ndohó ñèhivî xî Dios, te ducán chindeá cuacatnahá nsidaa ñâ-nduâ xiñuhu nùú anima-ndâ, mà quidá falta gâ ñî-ñâhâ nùú-ndâ, te ducán mà ùhî quida-nda ndéni chuun vâha nî cui.

4

¹ Vichi indéhe Yua-nda Dios xî Stoho-ndâ Jesucristu, divi ana icúmî naxicocuñî cusahnú-yâ, te nsidandaâ-yâ sâhâ nsidaa ñèhivî, nècuâchî itíácú xî nècuâchî nî xihî; pues

mii-yá nduú ana indéhe, (te iníní-yá) ñà-chínáhi mii-ni palabra cuàhìn cachì xì-ní yohó, (Timoteo):

² dacuítia-ní palabra ì xí-yá; coo tùha-ní (càhàn-ní xì nèhivì) nsidanicuú tiempu, ndéni hora nì cui. Nú iá falta xì-ne, càhàn vii-ní xì-né; dansítuú inì-nínè sàhà falta xì-nemà, te nacuahandee inì-nínè áma naquida vii-né. Iin-ni quidandee inì-ní sàhà-né, te iin-ni dacuaaha-nínè.

³ Vàchi vaxi iin quivì mà cándisá gá nèhivì cunini-ne palabra ndàcuisì. Còó, cuàhàn-nè nanducu-né cuàhà ana chinaha xì-né cuisì ñà-nduá cudí inì mii-né cunini-ne, vachi ducán nchihò inì-né quida-ne.

⁴ Cuàhàn-nè quidamaxínì-nè. Mà cúniní gá-nè palabra ndàcuisì xí-yá, puru ñà-nduú cuentu uun cuàhàn-nè cunini-ne.

⁵ Doco mii-ní, nicanicuahàn nacani sahnú inì-ní. Quidandee inì-ní sàhà nsidaa trùndoho icúmí-ní cunì-ní; (inicutu) cachitnùhu-ní razón ndiaha xí mii-yá, te daxínu vii-ní nsidaa chuun ì xí-yá sàni sàha-ya mii-ní.

⁶ Vachi yùhù, sà-ié ñà-nùhì (nùù Dios). Nahi promesa sàha-nda mii-yá nduí, vachi sàni sàà hora caqui.

⁷ (Doco cunaha-ní, inii vida xi) sàni sàhandee gá inì quide ñà-nduá sài quide; sàni xínu nùù-xí ñà-nduá nì sàcùnahí quide, te iin-ni nihnú vaha inì Stoho-ndà Señor.

⁸ Sàháyucànduá, icúmí-yá dacutáhvi-yá yùhù iin ñà-vaha na sàà quivì ndiaha vaxi xì-nda, vachi iin juez ndàcuisì inì-xi nduú-yá. Doco màdi cuisì yùhù nihitáhi na sàà quivì mà. Còó, vachi cundiatú stná nsidanicuú ana cudí inì-xi cuninùù xì-yá na quivì naxicocufin-yá.

Ñà-nduá nì cachi Pablo na ní xìcàn-nè favor nùù Timoteo, te nì ndaquindèè stná-nè xì nècuàchimà

⁹ Sacúndáhvi nùù-ní yàchì quixi-ní yohó.

¹⁰ Vachi sàni nacoo nihni Demas yùhù, vachi chicá nì cudí inì-nè ñà-nduá iá ñuhivì yohó, te ñàyúcànduá sàcuàhàn-nè ñuu Tesalónica. Daaní, Crescente, ladu Galacia cuàhàn-nè; te Tito, ndè ladu Dalmacia cuàhàn nècuàchimà.

¹¹ Làcà mindaa Lucas iá xí vichi. Nàyúcànduá, cachí xì-ní ñà-nacuaca-ní Marcos cutnahá-nsiá quixi, vachi (ináhì), vātùni chindee stná-nè yùhù ñà-quide chuun ì xí mii-yá.

¹² Daaní, Tiquico, sàni techuín-nè cuàhàn-nè ñuu Éfeso.

¹³ Cunaha-ní, iá iin dôi nì ndòo vehe Carpo ñuu Troas. Diviajàn naquihin-ní, te cunihì-ní quixi na quivì quixi-ní. Te cunì stnáì quixi tutu xi, xì stná libru xi; doco tutu mà nduá chicá xiñuhu (nùù).

¹⁴⁻¹⁵ Cuidadu coo-ní xì herreru nani Alejandro, vachi cuàhà gá dañu nì quida-ne nì càhàn quini-ne diquí, xì diquí stná ñà-nduá nì cachì-nsì. Doco icúmí Stoho-ndà Señor cuàha-yanè según ñà-nduá nì quida-ne.

¹⁶ Cunaha-ní, primeru xichi nì càhìn sàhà mií nùù juez, còò nì-iin tiàa nì chindéé xì. Cahnú gá Dios màsà cúniní-yá cuenta sàhà ñà-nduá nì quida-nemà, vachi nsidaa-né nì nacoo nihni-ne yùhù.

¹⁷ Doco mii-yá, còó; iin stná-yá cutnahá-yá xí na ní sàhìn yucán, te nì nacuahandee ini-yá yùhù, vātùni nì daxínui chuun icúmí ñà-càhìn xì nèhivì palabra xi-ya, te cunini nsidanicuú raza nèhivì. Daaní, (na ní nsihì nì càhìn), dandu nì càcui, mate cuàhàn-te dandáñuhú dahuun-tè yùhù nì cùí.

¹⁸ Te cunaha-ní, icúmí Stoho-ndà Señor nacuidahan-yá yùhù nùù nsidaa ñà-nduá quida nèhivì malu, vachi iin-ni icúmí-yá cundiaa-yá yùhù ndè cachi sài ñuhivì ì xí-yá iá ansivi. Ansivéhé cahnú-yá nicanicuahàn, amén.

¹⁹ Casàhú-ní xì Prisca xì Aquila, xì stná Onesíforo xì nèhivì vehe-ne.

²⁰ (Cachitnùhu stnáì xì-ní) ñà-ni ndòo Erasto ñuu Corinto. Te Trófimo, ñuu Mileto nì ndòo-ne, vachi cuhì-nè.

²¹ Yùhù sacúndáhvi nùù-ní ñà-nì quixí yàchì-ní antes tiempu vixin. Casàhú Eubulu xì-ní, te casàhú stná Pudente, xì Lino xì Claudia, xì nsidaa gá nèhivì nduú hermanu.

²² Nì cutnahá anima-ní xì Stoho-ndà Jesucristu, te cuàhà gracia xi-ya nì cúcúmí-ní. Sà-iá.

Tutu Nì Tiaa San Pablo nùè Tito

¹ Yùhù nduí Pablo, iin ana xinúcuáchí nùè Dios. Ñàyùcàndüá xicánúí cáhín xì nèhivì sàhà-ñá vátùnì sàà nècuàchì sàni nacàxin-ya cunindisá-néyá. Vàchi ñà-jaàn nduú chuun nì nihì nùè Jesucristu quide, dandu cundaà ini nèhivì indü-ñá nduú palabra ndàcuisì sàhà nansa cahví vii-ndáyá,

² xì sàhà stná tñundé ini ndiatu-nda ñà-nihì-ndà vida ndiaha nicanicuahàn, vachi ndé na táyòo ñuhivì, sàni quida-ya comprometer nihitáhvi-ndà ducán, te mii-yá, mà nunca dandahví-yándó.

³ Te vichi sàni dàtúi-ya palabra mà, vachi sàni sàà meru tiempu tùa, te cunitñuhu-ndañá. Ñàyùcàndüá, xicánúí cachitñuhi palabra mà nacua nì dandàcü-yá nùè quide, vachi mii-yá, cuní-yá dacácu-ya (nsidaa) nèhivì.

⁴ Pues, vichi tiaí tutu yohó nùè mii-ní, Tito, vachi nahi dèhe ndise nduu-ní, ñà-iin-ni sàni xinindisá stná-ní ichì váha. Ñàyùcàndüá, xicàn tàhvi nùè Yua-nda Dios xì Stoho-ndà Jesucristu, divi ana nì dacácu xi-nda, te xiquèn ñà-nì cuáha-ya mii-ní cuahà gracia xi-ya, te nì cundéhe ndahví stná-ya mii-ní; contentu nì coo-ní quida-ya.

Ñà-ndüü chuun nì ndacu nuù Tito quida-ne ñuu Creta

⁵ Na ní quei ndé iá-ní jaàn ñuu Creta, nì cachì xi-ní ñà-nì ndóo-ní daxínu-ní chuun cumánì vá. Te iin chuun ma nduú ñà-nacàxin-nda nècuàchì cunuú xì nèhivì xí Dios iin iin ñuu. Ñàyùcàndüá, nacua nì cachì xi-ní, divi ducán quida-ní.

⁶ Doco cuisì tiaa còò falta-xi nì cécundúú ana nacàxin ma. Vachi xiñuhu cunduu-ne tiaa iá xì imindaa nècuàchì vehe-xi, te nì cundúú stná-nè iin ana inínì víi dèhe-xi, vachi nú cachì nèhivì escandaloso dèhe-ne, te ò có-íá sahnú inia, dandu màsà queé nècuàchimà nombradu.

⁷ Vachi iin tiaa inúú xì nèhivì cahví xì Dios, icúmí-né cunduu-ne iin nècuàchì còò falta-xi, vachi divi mii-yá nduú ana xinúcuáchí-nè nùè-xí. Ñàyùcàndüá, màsà cundúú-né nècuàchì cuadú, ò iin nècuàchì xidá yàchì ini-xi; còò. Nì màsà cundúú stná-nè ana tùha coho, ò iin nècuàchì cáhàn tèhì. Nì màsà cundúú stná-nè iin ana cuú ini-xi sàhà dihùn.

⁸ Te xiñuhu cunduu stná-nè iin tiaa cudfì ini-xi dayáha visita vehe-xi; iin nèhivì cudfì ini-xi sàhà nsidanicuú chuun vaha nì cundúú-né. Doco màsà cundúú-né nècuàchì quidá nansa nì nì cui xi mii-xi; còò. Nècuàchì sahnú ini-xi nì cundúú-né, nècuàchì ì ndisa ini-xi, vachi nsidaa nècuàchì inúú mà, xiñuhu cunduu-ne nècuàchì ndàcuisì ini-xi.

⁹ Iin-ni xiñuhu cunchicùn vii-né palabra ndàcuisì xí-yá nacua nì dàcuahá nèhivì-né, dandu vátùnì nacuaàhandee stnahá ini-nè, te nihì stná-nè naxiconihí víi-né nùè nècuàchì xitñuhu, vachi divi dàñhù ndàcuisì nduá nì dàcuahá-né.

¹⁰ Vachi cunaha-ní, ndoó cuahà nèhivì chináhá ndevàha iin palabra loco, te dandahví uun-ne nèhivì. Nècuàchì chicá quidá ducán xinduu nècuàchì raza Judea.

¹¹ Ñàyùcàndüá, xiñuhu cadi xì nùè-né. Vachi dava xaan sàni dacá-né ò dñi nsidanicuú nèhivì ndoó iin vehe. Te dècuèndé quiyáhvi stná-nè na chináhá-nè palabra chicuèhé mà; ñàyùcàndüá, dihùn chicuèhé nduú stná ñà-ndüá nihì-né mà.

Ñà-ndüá nì sanduu modo xi nèhivì ñuu Creta sànhá

¹²⁻¹³ Ñà-ndáà nduá nì cachì iin tiaa ñuu jaàn na ní cáhàn-te sàhù xì nècuàchì ñuu-te. Te dohó nì cachì-te: “Dohó nècuàchì ñuu Creta yohó, de por sí tñuhu-nda; nahi quisi daná nduú stná-ndà, vachi ndadi sàstñuhù-ndà, te dusan gá stná-ndà”, nì cachì-te. Ñàyùcàndüá, icúmí-ní chinaha víi-ní nècuàchì ndoó jaàn sàhà-ñá cunihnu vii ndisa ini-nè nsidaa ñà-ndüá xiñuhu cunindisá-né.

¹⁴ Màsà quihín casu gà-nè ñà-ndüú cuentu uun nacánì tè-raza Judea xi-né; nì màsà cúniní gá stná-nè ñà-ndüá dandacú nì-iin nèhivì sàni tucù ichì ndàcuisì.

¹⁵ Nú iá ndoo ndisa anima-ndà, dandu ndiaha gá iá nsidaa ñà-íá ñuhivì nùè-ndà. Doco nèhivì nihnú siquini ini-xi, te có-xinindisá-né, còò ni-íñàha nduú ñà-vii nùè-né, vachi dècuèndé stná sàxinítnùnì-nè có-íá vii gá. Nì có-cucáhán gá nùè-né ñà-quini guá nihnú ini-nè.

¹⁶ Vachi ndahví gà modo xi-ne, mà túha-ne cunini-ne, ñàyùcàndüá mà cúí quida-ne nì-iin chuun vii. Mate cachì-né ináhá-nè Dios, doco còò, vachi sàhà modo quidá-né, ñà-jaàn cundáà ini-ndà sàni nacuaà-néyá.

2

¹ Doco mii-ní, cuisì ñà-íá vii nì cundúú ñà-ndüá chinahá-ní nèhivì.

² Nècuàchì tiàa sahnú, màsà cóhó-né, te xíni-ne. Xiñuhu nacani sahnú stná ini-né, te quida vii-né sàhà ñà-nì-còò tnũñuhu xí nèhivi nù-né. Fuerte ni cúnindísà stná-né mii-yá. Te ni cuú stná ini-né sàhà ñanitnaha-ne nacua ndiá icà-né. Te iin-ni ni coó calma stná-né.

³⁻⁴ Daaní, stná nècuàchì ñahà sahnú, divi ducán ni quidá stná-né. Ni cacánúú víi-né nacua xiñuhu quida nsidaa ndohó nèhivi xí mii-yá. Màsà cuítñuhu-ne ñanitnaha-ne, te màsà tníí stná viciu-né. Cuisi ichi váha ni cuáha-ne nècuàchì ñahà chicá cuachi sàhà-ñá ducán cutùha stná nècuàchì mà nansa cuu ndisa stná ini-né sàhà ii-né xí sàhà dèhe-ne.

⁵ Te ni cutùha stná-né nacani sahnú ini-né, te cunihnu ii stná ini-né. Ni cúnshi stná ini-né chuun vehe-ne, te ni cúnihnú màni stná ini-né. Daaní, icúmí stná-né cunini vii-né ii-né sàhà-ñá màsà sàà-né dandáñuhú-né tnũñuhu xí palabra xi Dios.

⁶ Daaní, nècuàchì tiàa chicá cuachi, cachi-ní xí-né ñà-nì cundóó sahnú-né.

⁷ Te mii-ní tu, cuisì ichi váha ni cúnchícùn-ní sàhà-ñá màsà túcù nècuàchì dava ga. Te na chináhà-níne, cãhàn ndàà-ní xí-né, cãhàn tnũñuhu-ní.

⁸ Cuisi ñà-lá vii ni cãhàn-ní xí-né sàhà-ñá màsà ñíhi ni-iin nèhivi cachi-né iá falta xi-ní, vachi nú ni cãhàn vii-ndá, dandu cucahan nú nècuàchì xini ùhi xi-ndá ñà-có-níhi-né nansa daquée cuàchì-ne diqui-ndá.

⁹ Cachi-ní xí peón ndoó saín nù lamú-xi ñà-nì cúnini-né ñà-nduá cachí nècuàchì mà. Icúmí-né quida-ne cumplir ñà-nduá dandacú lamú xi-ne; màsà náná táchì-né xí nècuàchì mà.

¹⁰ Ni màsà cuídá cuihná stná-né ñà-nduú biene xi nècuàchì mà; còó; nècuàchì ndàcuisi ini-xi ni cundúú-né sàhà-ñá ducán ni cundáà ini nèhivi ñà-ndiaha guá iá ley xi mii-yá ana dacácu xi-nda.

¹¹ Vachi vichi sàni sàà tiempu ni xinimànì Dios nèhivi ñuhiví; sà-lá nansa càcu anima nsidaa-né.

¹² Te divi sàhà ñà-yúcán cundáà ini-ndá xiñuhu nacoo dahuun-nda ichi malu; màsà xího gá-ndá ñà-nduá xího guá nèhivi dava ga ndoó ñuhiví yohó. Còó, vachi sàhà gracia xi-ya sàni cundáà ini-ndá nansa xiñuhu quida-nda na ndoo-va-nda ñuhiví yohó, ñà-cundoo sahnú-nda, te cunihnu ndàcuisi ini-ndá nacua cuní Dios quida-nda.

¹³ Te ndiatú stná-ndá sàà quivi ndiaha nduú tnundé ini xi-nda, divi quivi nanchii ndiaha (ansivi), te cuninùú-ndá naxícócuñ Jesucristu, divi ana ni dàcácu xi-nda. Te mii-yá, nahnú gá obra xi-ya, vachi Dios nduú-yá.

¹⁴ Te ni sàha-ya vida xi-ya ni dãnáà-yá sàhà-ndá sàhà-ñá càcu-nda nùú ichi malu, te ndoo stná anima-ndá, dandu sàà-ndá cunduu ndisa-nda nèhivi xi-yá, te cudii ini-ndá quida stná-ndá cuàhà ñà-vàha.

¹⁵ Cunaha-ní, ñà-jaàn nduá icúmí-ní cachi-ní xí nèhivi yucán. Cãhàn-ní xí-né sàhà-ñá quida-neà cumplir. Te nú iá falta xi-ne, dandu cãhàn stná-ní xí-né, vachi icúmí-ní derechu. Màdi cahíchi ini ni-iin nèhivi mii-ní.

3

Nansa xiñuhu quida-nda na ndoo-nda ñuhiví yohó

¹ Dansínúú ini-ní (nèhivi xí-ní) ñà-icúmí coo tnũñuhu xi-nda nùú nèhivi xí gobiernu xi nùú nsidaa stná tè-níhi chuun. Ni cúnini-ndá ñà-nduá cachí-te, te ni coó stná voluntad xi-nda chindee-nda nsidanicuú chuun vaha.

² Te màsà cãhàn quini-nda diqui ni-iin nèhivi. Ni cundóó màni nsidaa-nda. Màsà náá stnaha-nda. Còó. Ni cãhàn tnũñuhu-nda xi nsidaa nèhivi.

³ Vachi ndohó stná, nahi quisi ni sandoo-nda ñuhiví antes. Cónisá íníni-ndá Dios. Iin ichi tnùhù nduá ní sanchicùn-ndá. Nsidanuu clase viciu ní tnii xi-nda, te cuàhà diversión chicuèhè nisa nanducu-nda. De por sí, mà váha-nda dihna, vachi nisa cumbidia stnahá ini-ndá, te nisa cahíchi stnahá stná ini-ndá. Cuàhà gá nisa xini ùhi stnaha-nda sàhà-ndá.

⁴ Doco ni sàà iin quivi ní xinitnùhu-nda sàhà Dios, ñà-vàtùni dacácu-yandó, ñàyúcandüá ni cundáà ini-ndá, vaha ga ini-yá, te màni gá stná ini-yá.

⁵ Dandu ni dàcácu-ya anima-nda, doco màdi sàhà ñà-ní ía obra vaha ni quidá ndohó. Còó. Cuisi sàhà ñà-ní indehè ndahví-yandó, ñàyúcandüá ni càcu-nda, vachi ni nsidandoo-ya cuàchì iá nùú anima-nda ñà-ní nacacu saa-nda (ñuhiví ii xí-yá), te ni ndusaa stná anima-nda ni quida Espíritu ìi xí-yá.

⁶ Vachi ñà-ní dàcácu Jesucristu ndohó, ñàyúcandüá cuàhà gá ni dàquixí stná Yua-nda Dios Espíritu xi-ya anima-nda.

⁷ Ñàyúcandüá, sàhà gracia xi-ya sàni ndee vaha-nda nùú-yá, te sà-lá ndisa tnundé ini xi-nda ñà-nihitáhvi-nda vida ndiaha nicanicuahàn.

⁸ Nsidaa ñà-sàni cachí xí-ní yohó, vátùni cahvi-ní xán. Doco xiñuhu stná cãhàn fuerte-ní palabra yohó xi dava ga nèhivi cahvi stná xi-yá, áma cúnshi ini-né quida-ne nsidanicuú

chuun vii. Vàchi palabra ndiaha nduá, te nú ni quida-ndañá, dandísá, cuàhà gá ñà-ndiaha ñhì-ndà.

⁹ Doco nú xiní-ndà náá stnahá nèhivì sàhà iin chuun có-ndúú ñà-ndiáá ndisa, dandu màsà quihví-ní sàhámà. Ni màsà ndúlócò stná-ní sàhà cuentu uun sàhà xii-ndà. Stná ley sàhana, màsà náá-ní xì nèhivì sàhámà, vèchi còò ni-ñàha tava-ndà quida-nda ducán.

¹⁰ Nú iá iin nècuàchì grupu xi-nsia tùha cahnde dava xi-nsiá, dandu càhàn-ní xì-né iin ò úi xichi. Te nú có-quihín casu-nè, dandu nacoò dahuun-nsianè.

¹¹ Vèchi ináhá-ndá sàni tùcù-nè inga ichì. Iá ndisa cuàchi-ne, te mismo cuàchi-ne icúmí dayúhì xì-né.

Nansa nihnú ini Pablo quida-ne quivì nùù-xí

¹² Yùhù nihnú ini techuín Artemas ò Tiquico sàà-nè ndé iá-ní. Te nú sàni sàà-nè jaàn, dandu quida-ní lucha quixi-ní ñuu Nicópolis, vèchi divi ñuu mà nihnú inì coi inii tiempu vixin.

¹³ Te na sàá stná Apolos xì abogadu nani Zenas ndé iá-ní, dandu cunsihi inì-ní chindee-ní nècuàchimà. Quida-ní arreglar nansa cùhùn-nè chicá nùù-xí, te màsà cùmání ni-ñàha nùù-né cùhùn-nè.

¹⁴ Cunaha-ní, nsidaa nèhivì xì-ndà, xiñuhu cutùha-ne quidachuún-né iin chuun vaha sàhà-ñá màsà cùndóó uun-ne ñuhivì, vèchi nú ducán ni quida-nda, dandu vètùni chindee stná-ndà quivì iá necesidad nùù iin ñanltnaha-nda.

¹⁵ Nsidaa nècuàchì ndoó yohó, cásàhù-nè xì-ní. Te mii-ní, casàhù stná-ní xì nsidaa nècuàchì cuú inì-xì sàhà-nsí ñà-iin-ni xiníndísá stná-nsì mii-yá. Ni cùcúmí cuáhà nsidaa-nsiá gracia xi-ya. Sà-iá.

Tutu Nì Tiaa San Pablo nùu Filemón

¹ Yùhù nduí Pablo. Te vichi ndiadí vehecàa sàhà-ñá nchícùn Jesucristu. Te ñani-ndà Timoteo, yohó íá stná-nè xí. Te cásàhù-nsì xì mii-ní Filemón, vàchi iin-ni quidá stná-ní chuun xì Jesús (nahi nsìùhù). Te màni cuàhà-ní nùu-nsì.

² Te cásàhù stná-nsì xì doña Apia, vàchi màni stná-nè nùu-nsì na iin cùha-nda. Daaní, cásàhù stná-nsì xì Arquipo, vàchi iin-ni nchícùn stná-te capitán ndiaha xí-nda. Stná nsidaa ana natáca cahvi xì Dios vehe-nsia, cásàhù stná-nsì xì-né.

³ (Pues vichi xícàn tàhvi-nsì nùu) Yua-nda Dios xì Stoho-ndà Jesucristu ñà-ni cùnì màni-yá nsidaa-nsiá, te contentu ni cùndóo-nsiá quida-ya.

Ñà-ndúá nì xicàn Pablo nùu Filemón

⁴ Yùhù naquímání mii-yá sàhà mii-ní na cada xícàn tàhvi nùu-yá sàhà-ní,

⁵ vàchi sàni xinitnùhi ñà-cuàhà guá cuú ini-ní sàhà nsidaa nèhivi xì Dios, te xiníndísà vaha stná-ní Stoho-ndà Jesús.

⁶ Ñàyùcàndúá, xícàn tàhvi nùu Dios ñà-ni sàa-ní mànihi ini-ní ñà-cuàhà guá ñà-vaha ndiaha sàni nìhitàhvi-ndà nùu Jesucristu, vàchi nú ducán cundaà vaha ini-ndà, dandu vátùni quida stná-ndà cuàhà obra, te ñà-jaàn nduá ndiá icà-ndà quida-nda nú sàni xinidisa-nda mii-yá.

⁷ Cunaha-ní, cuàhà gá cudfi ini ñà-cùu guá ini-ní sàhà nèhivi xì Dios. Ndiaha gá sàni ndòo ini vichi, vàchi tùha-ní nacuàhandee ini-ní nèhivi xí-yá.

⁸ Ñàyùcàndúá, sàhà-ñá nchícùn stná-ní Cristu, mà úhi dandacuí nùu-ní quida-ní favor sàhà iin chuun cuú ofreer.

⁹ Doco còo, mà quidé ducán; chicá vaha cuacundahvî nùu-ní, vàchi ináhi cuàhà gá cuú stnahá ini-ndà sàhà-ndà. Te cunf' nsinuu stná ini-ní ñà-nduí iin nècuàchi chicá sàni sahnu cuahà, te ndiadí stnái ñà-íé' ladu xì Jesucristu.

¹⁰ Ñàyùcàndúá sacúndáhvi nùu-ní ñà-nacuaca-ní Onésimo, vàchi na iin dèhi nduú-né. Ndiadí vahi yohó, doco sàhà yùhù sàni nihì stná-nè nì xinindisá-né mii-yá.

¹¹ Cunaha-ní, mate antes cóni quidá víi-né na ní sa-ia-ne nùu-ní, doco vichi vátùni quida víi-né chuun vaha nùu-ní, xì stná nùu yùhù.

¹² Te vichi cuàhin techuín-nè nasaa-nè ndé íá-ní. Ñàyùcàndúá, quidamaní-ní nacuaca-nínè, vàchi màni cuàhà-né nùu.

¹³ Cachì-ní, vàchi nisa nihnu ini ndòo-ne xí yohó ñà-coo-ne cuenta xì mii-ní, te cunucuaachi-né nùu na íé' vehecàa yohó sàhà-ñá chicá cuitià razón ndiaha xí-yá.

¹⁴ Doco còo, chicá vaha màsà ndóo-ne yohó nú tàñaha ga cachi mii-ní, vàchi có-cunf' cundua fuerza quida-ní favor mà. Còo, ñà-ndúá cudfi ini mii-ní nì cùndúá, cunf'.

¹⁵ Mate iin ùi quivi nì quee-ne nùu-ní, doco quida-ní cuenta na ian ducán (nì quida Dios) sàhà ñà-vátùni nàcòo tu-ne xì-ní nicanicuaàn.

¹⁶ Doco vichi, mà cùndúu gá-né peón nì xiin-ní, còo. Nahi ñani-ní cunduu-ne, te chicá ndiáa iin ñani-ndà nùu iin peón. Màni cuàhà-né nùu, doco chicá más icúmi-nè coo maní-né nùu mii-ní, vàchi cuàhàn-nè coo-ne xì-ní vehe-ní, cutnahá stná-nè xì-ní cahvi-nsiá Stoho-ndà Señor.

¹⁷ Ñàyùcàndúá, nú nihnú stná ini-ní ñà-iin-ni xínduu-nda compañeru (nùu Dios), dandu quida stná-ní xì nècuàchi jaàn na ian quidá-ní xì yùhù.

¹⁸ Te nú íá iin cuàchi nì quida-ne nùu-ní, ò nú íá ñà-ndúá iníhíca-nè, dandu nùu yùhù quida-ñá cobrar.

¹⁹ Yùhù nduí Pablo, te icúmi danái-ñà. Cunaha-ní, ndahà yùhù tiaí palabra yohó. Doco sà-ináhá-ní, cuàhà gá iníhíca stná mii-ní nùu yùhù, te có-xiñhùhù dansínúu ini mii-ní ñà-sàhà yùhù nì nanihitáhvi-ní vida xì-ní.

²⁰ Ñání, sacúndáhvi nùu-ní, quidamaní-ní xì ñà-jaàn, vàchi iin-ni nchícùn-ndà Stoho-ndà Señor. Quida-ní favor sàhà-ñá nì cói contentu, vàchi (ináhá-ní) iin-ni xiníndísà-ndá mii-yá.

²¹ Pues yùhù, cundéé ini mii-ní ñà-cunini-ní yùhù; te ináhi icúmi-ní quida-ní ñà-ndúá cachí; ndé más gá icúmi-ní quida-ní, ñàyùcàndúá, tiaí carta yohó nùu-ní.

²² Daaní, cuní stnái nì coó tùha iin vehe tii ñà-coi ndé íá-ní, vàchi icúmi esperanza ñà-chindee Dios yùhù, vàchi divi ñà-jaàn nduá xícàn tàhvi-nsiá nùu-yá sàhí. Ñàyùcàndúá, nihnú ini sài ndé ndóo-nsiá.

²³ Yohó íá stná Epafras, ndiadí stná-nè sàhà-ñá nchícùn-nè Jesucristu. Te cásàhù stná-nè xì mii-ní,

²⁴ te cásàhù gá stná dava ga compañerúu xì-ní, divi Marcos, xì Aristarco, xì Demas, xì Lucas; vàchi xínduu stná-ne ana chindéé xí sàhà chuun (xì Dios).

²⁵ Pues vichi ni níhitáhvi cuáhà-nsiá gracia xi Stoho-ndà Jesucristu ini anima-nsià. Sà-lá.

Tutu Nì Tiaa Iin Nèhivì xí Dios nù Nècuàchì Hebreu

Nì quixi Dèhemani Dios, nì cachitnùhu-ya xì nèhivì ñuhivì ñà-ndúú palabra xi Yua-yá

¹ Sàhaha na cuní Dios càhàn-yà xì xì-ndà, nisa techuún-yá iin nèhivì ñà-cachitnùhu-ne xì nècuàchìmà palabra xi-ya. Cuàhà gá xichi nì quida-ya ducán, te cuàhà gá ejemplu nisa xichuún-yá na nì cachitnùhu-ya palabra mà.

² Doco quívi vichi na cuàhàn xinu tiempu, Dèhemani-yá nduú ana nì techuún-yá càhàn xì-ndà. Vàchi sàhà ndahà fuerte Dèhemani-yá nì quidavàha-ya nsidanicuú ñuhivì iá, te nì chitnùnì stná ini-yá ñà-divi Yà-mà cunduu ana nihitáhvi dandacú sàhà nsidaámà.

³ Cunaha-nsiá, nacua ndiaha gá mii-yá, ducán ndiaha stná Dèhemani-yá, na ian nduà-yá nduú Yà-mà, vachi iin-ni nacua iá-yá, divi ducán iá stná Yà-mà. Te Yà-mà, sàhà-ñá fuerte dandacú ndiaha-yá, ñàyücàndúá quidáchúùn víi nsidanicuú ñà-iá ñuhivì. Te na nì nsihi nì nsidandoo-ya cuàchi-nda, dandu mànuhù-yá ansivi, te nì sàcòo-ya ladu cuàhá Yuandiáhà-yá.

⁴ Ñàyücàndúá, chicá más ndiaá-yá nùú nsidaa ángel, vachi nì chitnùnì ini Yuamáni-yá ñà-cachi-ndà xì Jesús Dèhemani-yá, te ñà-yòhó nduú ñà-chicá ndiaá nùú nsidaa ñà-ndúá cachí-ndà xì iin ángel.

⁵ Vachi còò ni-iin ángel nì nihitáhvi cachi Dios xì-né dohó:

Dèhemani' nduu-ní: vichi sà-itiácù-ní nì guide.

(Còó, có-càchí-yá ducán xì ni-iin ángel.)

Daaní, inga xichi dohó nì cachi stná-yá (sàhà Jesús):

Na quidá iin yua, ducán icúmí guide xì mii-yá; te mii-yá, na iin dèhi cunduu stná-yá nùú.

(Nì cóni cachí Dios ducán xì ni-iin ángel.)

⁶ Daaní, nì chitnùnì stná ini-yá quesaa Dèhemani-yá ñuhivì yohó, te quívi nì cuu ducán, dandu nì cachi-yá (xì nsidaa ángel xi-ya):

Nsidaa nsiohó ana nduú ángel xì, icúmí-ndá cahvi-ndá Dèhemani' yohó.

⁷ Doco na nì càhàn-yá sàhà ángel mà, dohó nì cachi-yá:

Nì quidavàha-ya ángel xi-ya (ñà-cacanuú yàchì-nè) nahi tàchi; vachi nahi mozo xinúcuáchì nùú-yá nduú-né (sàhà-ne castigu xi-ya) nahi ñuhu xixìn.

⁸ Doco na nì càhàn-yá sàhà Dèhemani-yá, dohó nì cachi-yá:

Dios nduu-ní, te nicanicuahàn icúmí-nì cusahnu-ní; te micuísì modo víi icúmí-nì dandacu-ní nùú nèhivì.

⁹ Cuú ndisa inì-ní sàhà nsidaa ñà-iá víi, doco có-cúú dahuun inì-ní ni-iyuhu sàhà cuàchi. Ñàyücàndúá, nùú mii-yá ana cahvi-ní sàni nihitáhvi-ní ñà-cudíi cuàhá inì-ní; cunaha-ní, chicá icúmí-ní cudíi inì-ní nùú nsidaa gá ana cutnáhá xì-ní.

¹⁰ Daaní, (inga xaan nacání nansa nì cachi stná nèhivì na càhàn-nè xì-yá):

Stoho-nsì Señor, sàhaha nì quidavàha-ní ñuhivì. Ndahà mii-ní nì cuàha stná nsidaa sitnùú itándiaa ansivi.

¹¹ Te mate nsidaájàn icúmíá nsiha, doco mii-ní, còó; nicanicuahàn icúmí-ní coo-ní. Nsidaa ñà-iá ñuhivì, icúmíá ndutuhá, na ian sicoto.

¹² Te na ian nacáhnù víi nèhivì iin dùhnù-né, ducán icúmí-ní quida-ní xì ansivi, vachi icúmíá nadàma, na ian nadama-nda ñà-ndixi-ndà. Doco mii-ní, còó. Iin-ni icúmí-ní coo-ní; mà nunca sàà quívi ndañuhu-ní, nì cachi-nè.

¹³ Doco Dios, cóni càchí-yá xì ni-iin ángel palabra yohó; (cuísì mii Dèhemani-yá nì cachi xì-yá dohó):

Yohó coo-ní ladu cuahí ndè cachi sàà cundeí nùú nsidaa ana xiní ùhì xì-ní; dandu cusahnu fuerte-ní nùú-né, nì cachi-yá.

¹⁴ Vachi ángel, ináhà-ndá ñà-cuísì espíritu víi xinúcuáchì nùú Dios nduú-né; ndacú-ní nùú-né ñà-cacanuú-ne cunucuachi-né nùú-yá, te chindee-né nsidaa ndohó nèhivì icúmí càcu anima-xi.

2

Màsà nunca nandòdò-nda gracia xi-ya ñà-cùnì-yá dacácu-ya anima-ndà

¹ Sàhà nsidaájàn, cuàhà gá xiñuhu cunihnu vaha ini-ndá razón ndiaha sàni xinitnùhu-nda, còtó cueé-ni cueé-ni tùcù-ndà inga ichì.

² Vachi ley sàhaha, mate cuísì ángel nduú ana nì cachitnùhu xi-nda sàhà-ñá, doco fuerte nì sandiaa stná, te nècuàchì cóni ndúlòcò sàhà-ñá, iin castigu cahnú nì nihì-né nacua ndiá icà cuu xi nsidaa nèhivì có-iníni.

³ Ñâyücändüá, ndohó nècuàchì (tiempu vichi), ¿nansa cui càcu stná-ndà nú màsà quíhín casu-ndà sàhà palabra ndiaha cachi nansa càcu-nda? Vàchi divi Stoho-ndà Señor nduú ana primeru nì cachtñùhu palabra mà, dandu después nì xinitñùhu stná ndohó nì quida nèhivi nì inini nì càhàn mii-yá.

⁴ Te nì chindee stná Yua-nda Dios sàhà-ñá cundaà ini-ndà divi ñà-ndáa nduámà, vachi nì quida-ya nsidanuu clase milagru ndiaha, te nì sàhatahvi stná-yándó Espíritu Ìi xí-yá; (te vichi) cuahà gá ñà-ndiaha ìi quidá Espíritu Ìi sàhà-ndà segùn nansa cuní Yua-nda Dios.

Nansa nì nanduu Jesús nahi nèhivi, te ducán nì nihì-yá nansa dacácü-yàndó

⁵ Cunaha-nsiá, sàni cachi xì-nsiá sàhà inga ñuhiví vaxi xi-nda. Doco màdi ángel cunduu ana cusahnú nùá, vachi cóni chitnùni ini Dios ducán.

⁶ Nùu tutu ìi iá ndé nì càhàn iin nèhivi (xì-yá), te dohó nì cachi-nè:

Nèhivi ñuhiví, có-ndiáa guá-nè, doco nihnú inì-nínè. Còò necesidad icúmí-ní ñà-nsinuu inì-ní nèhivi ñuhiví, doco divi nduá quida-ní.

⁷ Te sàni chitnùni stná inì-ní ñà-sàhà sacu quivì mà-sáa nèhivi ñuhiví ndudava-ne xì ángel xi-ní. Te nì nihitáhvi stná-nè cuahà gá tnùñuhu ndiaha nì quida-ní. Te nì chitnùni stná inì-ní ñà-cusahnú-nè nùu nsidaa ñà-ndüá nì quidavàha-ní.

⁸ Nsidanicuú iñàha, vätùni dandacú-né nùá nì quida-ní. Ducán cachá.

Pues nú ducán sàni nihitáhvi nèhivi quida-ne, dandu nsidanicuú iñàha, mà cúi ndòo uan iladu, fuerza icúmí-nè dandacú-nè nùu nsidanicuú iñàha. Doco quivì vichi nàhà xicà, tàñáha ga sàà quivì dandacú ndisa-ne nùu nsidaa ñà-jaàn.

⁹ Doco Jesús, ndisa, sàni cundaà vaha ini-ndà sàhà mii-yá, cuahà gá tnùñuhu ndiaha sàni nanihì-yá. Vachi sacü-nì quivì cóni ndúdává-yá xì ángel, doco sàhà gracia xi Dios nì ndoho-ya, te nì xihì-yá sàhà nsidaa-nda, te sàháyücändüá nì nanihì nsihì-yá tnùñuhu ndiaha xi-yá.

¹⁰ Dios nduú ana nì quidavàha xi nsidanicuú ñà-íá. Te sàhà ñà-nì còò más tnùñuhu xí-yá, ñâyücändüá nì sàcòo nsidaámà. Doco cuní stná-yá cundoo cuahà dèhe-ya gloria xi-ya. Ñâyücändüá, nì chitnùni ini-yá ñà-ndoho Jesús, vachi ducán nduá xiñuhu cuu xi-yá sàhà-ñá nì cuácátnáhà nsidaa ñà-ndüá icúmí cuu xi-yá. Ñâyücändüá, sàhà-ñá nì ndoho-ya ducán, ñà-jaàn nì nihì-yá salvación xi-nda.

¹¹ Te cunaha-nsiá, mate divi-ya nduú ana ndiaha dandúhii xì anima-ndà, doco iin-ni Yuamáni-yá icúmí-yá nahi ndohó. Sàháyücändüá có-cucáhàn nùu-yá cachi-yá xi-ndà ñà-ndüu-ndà nahi tnahà-ya.

¹² Vachi (nùu tutu ìi) dohó cachí-yá (xì Yuamáni-yá):

Na natácá tnahi, dandu icúmí nacani xì-né (ñà-ndiaha guá) iá-ní, te coto stnáì alabanza nùu-ní, cachí-yá.

¹³ Daanì, inga xaan cachí stná:

Yùhù icúmí cahvi xì mii-yá.

Te inga xaan cachí stná:

Cundehè-nsiá, yohó iá stnáì xì nèhivi nì chitnùni ini Dios cunduu (nahi) dèhi.

¹⁴ Pues sàhà-ñá nduu-nda dèhe-ya, te iá iquicúñü-ndà, ñâyücändüá stná mii-yá, nì nihì stná-yá iin iquicúñü (nahi ndohó), te ducán nì nihì-yá nansa cui-yá. Ñâyücändüá, sàhà-ñá nì xihì-yá, vätùni nì cundee-yá nùu ñà-malu, vachi quisi jaàn nisa dandacú sàhà-ñá cui nèhivi ñuhiví.

¹⁵ Te nèhivi, yúhi sàstnùhù-né cui-nè, ñâyücändüá, mà ùhi dandacú-si nùu-né inii vida xi-ne. Doco vichi (sàhà-ñá nì cundee-yá nùu-sí), vätùni cuidahan-yándó nùu ndahá-sí.

¹⁶ Vachi màdi ángel nì cùhí ini-yá na ní quixi-ya ñuhiví yohó; cóo. Divi ndohó nècuàchì descendencia xi Abraham nì quixi-ya nì chindee-yá.

¹⁷ Ñâyücändüá nì xiñuhu nanduu-ya iin tiàa; meru nacua ndáa nèhivi ñuhiví yohó, ducán nì nanduu-ya, na iin tnahà-ne. Te sàhà ñà-jaàn vätùni nì sàcünduu stná-yá nahi dùtù xi-nda nùu Dios, vätùni cahvi-nda xi-yá ñà-cundehè ndàhvi-yándó. Te sàhà stná nì nanduu-ya iin tiàa, vätùni nì dånáa-yá sàhà cuàchi-nda, te ducán mà nihì gá-ndà castigu sàhà cuàchi-nda.

¹⁸ Te sàhà-ñá nì yàha stná-yá cuahà vida na ní ndoho guá-yá, ñâyücändüá vätùni chindee stná-yándó na quivì yàha stná-ndà tnùndoho.

3

Chicá ndiáa Jesús nùu Moisés mate ndahà nècuàchimà nì quixi ley sàhana

¹ Cunaha-nsiá, iin-ni xínduu-nda nèhivi ìi xí Dios, te iin-ni sàni cana stná-yándó ñà-sàa-ndà gloria xi-ya, ñàni. Ñâyücändüá, sàhà nsidaajàn nicanicuahàn xiñuhu cunihnu vaha ini-ndà Jesús, vachi mii-yá nduú ana cahvi-nda, te divi stná-yá nduú ana nì techuún Dios ñà-quixi nùu-ndà, te nì sàcünduu-ya dùtù xi-nda.

² Te na ní techuún Dios-yá quixi-ya, dandu ni quida ndisa-ya cumplir nsidaa ñà-nduá ni sacúnaha-yá, nacua ni quida stná Moisés sánaha na ní sandiaa-nè nèhivi xí-yá.

³ Doco chicá más tñũñuhu icúmí Jesús nùu Moisés mà. Vàchi ducán nduá na ian cuáha iin vehe, cuisí tñũñuhu xí ana ni quidavàha xán nduá queé, màdi tñũñuhu xí miá.

⁴ Te iin iin vehe, í ana ni quidavàha xán, doco nsidanicuú ñà-íà ñũhívi, cuisí Dios nduú ana ni quidavàha xán.

⁵ Ñâyücàndüá, ducán nisa quida vii Moisés sánaha, ni sandiaa-nè nèhivi xí Dios na iin nècuàchi xinúcuáchi (nùu-yá); te chuun xi-ne ni sanduu stná ñà-cáhàn-nè sàhà palabra icúmí Dios datú-ya después.

⁶ Doco Cristu, (tucu ía xí mií-yá, vachi) Dèhemaní Dios nduú-yá. Te quidá víi stná-yá (nahi Moisés), doco chuun xi-ya nduá ñà-dàndacú-yá nùu nsidaa nèhivi xí Yuamáni-yá. Te divi nèhivi xí-yá sànduú stná ndohó nú màsà yúhí-ndà, te iin-ni ni cúdñi ini-ndà cahví-nda xi-yá dècuèndè na sàà xínu tiempu.

Nansa sàà nèhivi xí Jesús ndé ía descansu ndiaha xí-yá

⁷ Ñâyücàndüá, xiñuhu quida-nda nacua cachí Espíritu Ìi xí-ndà nùu tutu ìi ndé cachí-yá: Vichi sacúndáhví nùu-nsiá ñà-ni cúníni-nsiá ñà-nduá dandacú Dios.

⁸ Màsà quídámáxiní-nsiá na ian nisa quida xii-nsiá sánaha na ní xica-ne yucú dàná. Cuàhà gá ni dàcuída ini-nè yùhù, ndè ni nanduu-ne nahi contra xi.

⁹ Te ùi dico cuìa ni xini nècuàchì mà milagru ndiaha ni quide xì-né; doco còo, iin-ni ni quida canúu-nè (ñà-nduá dàcuída ini xí).

¹⁰ Ñâyücàndüá, yáha ga ni cuduchi inì sàhà nsidaa-né, te ni cachi: “Cutu cuní nècuàchì mà tucù-nè inga ichì; mà túha-ne cunchicùn vii-né ichì”.

¹¹ Ñâyücàndüá, ni xidà ini; ndee ní cachí xì-né palabra yohó, te mà dámíà: “Mà nunca cuàhi yàha-ne (lugar ndiaha xí) ndé cundoo-ne descansu ni cúí”. Ducán ni cachi Dios.

¹² Ñâyücàndüá, cuidadu ni cúndóo-nsiá ñáni, còtò coo iin-nsia nacáni chícuéhè ini-xi, te nandóo-nsiáyà, có-xiníndisá gá-nsiáyà, mate Dios ía nicanicuahàn nduú-yá.

¹³ Sàhájàn nsiquívi xiñuhu nacuahandee stnahá ini-ndà, mientras ía va tiempu vichi, còtò sàà-ndà cunduu-nda nècuàchi quídámáxiní, vachi mà úhi dandahví cuàchi-nda ndohó, te cuu xi-nda ducán.

¹⁴ Vachi cunaha-nsiá, cuisí nú iin-ni ni cúnchicùn vii-ndáyà ndè xínu tiempu, te cunihnu vaha ini-ndáyà nacua ni quesaha-nda, dandísá sàà-ndà nihítahví-ndà cundoo-nda nùu Cristu.

¹⁵ Ñâyücàndüá, dohó cachí-yá (nùu tutu ìi): Vichi sacúndáhví nùu-nsiá ñà-ni cúníni-nsiá ñà-nduá dandacú Dios. Màsà quídámáxiní-nsiá na ian nisa quida nècuàchi sánaha, te cuàhà gá ni dàcuída ini-nè yùhù, cachí-yá.

¹⁶ Te ãndü nèhivi nduú nècuàchi ni inini xi (palabra xi-ya), te después ni cahíchi ini-nèà? Pues divi nsidaa nècuàchi ni tava Moisés ñuu Egipto yucán.

¹⁷ Te ãana divi nduú nèhivi ni cuduchi guá ini Dios sàhà-xí inii ùi dico cuìa mà? Pues, divi nècuàchi cuàhi ma, te ñâyücàndüá disàhà-xí ni xihì-nè yucú dàná mà.

¹⁸ Te ãamádi divi-ni stná-nè xínuu ana ni cáhàn ndee guó-yá sàhà-xí ñà-mà yáha-ne lugar xi-ya ndé nihì-né descansu ni cúí? Pues jaan, vachi nècuàchì mà, cóni cùnì-nè cunini-neyà.

¹⁹ Ñâyücàndüá, vátuni cundaà ini-ndà, divi sàhà-ñà cóni cùnì-nè cunindisá-né, ñâyücàndüá màni cúí yàha-ne (lugar ndiaha ma).

4

¹ Doco cunaha-nsiá, vichi ía va nansa cui sàà-ndà lugar ndiaha xí-yá nacua ni cachi-yá xí-ndà. Ñâyücàndüá, cuidadu ni cúndóo-nsiá còtò ndañuhu-nsiá ichì sàni tñii-nsia cuàhàn-nsiá cundoo-nsia nùu-yá ducán.

² Vachi nùu ndohó sàni cachitnùhu-ne ñà-nduú razón ndiaha xí-yá davani nacua ni cachitnùhu stná-nè xi nèhivi sánaha ma. Doco mií-né, cóni nihì-né ni-iin provechu nùu palabra mà, vachi mate ní xinitnùhu-ne, doco cóni xiníndisá-né.

³ Doco ndohó nècuàchi xiníndisá, vátuni sàà-ndà ndé ía descansu ndiaha ma, vachi (mà nihítahví gá nècuàchi sánaha ma, vachi) dohó ni cachi-yá:

Yùhù, ni xidà ini; ndee ní cachí xì-né iin palabra, te mà dámíà: mà nunca cuàhi yàha-ne (lugar ndiaha xí) ndé cundoo-ne descansu ni cúí.

Ducán ni cachi Dios, vachi dècuèndè tiempu ni quidavàha-ya ñũhívi sàni xínu chuun xi-ya.

⁴ Vachi nùu tutu ìi ía ndé cachí nansa (ni quida-ya) quívi usà; te dohó cachá:

Quívi usà ni quetatu Dios, vachi sàni xínu nsidaa chuun ni quida-ya.

⁵ Daaní, ía stná ndé cachí stná-yá inga palabra yohó nùu tutu mà:

Mà nunca cuàhi sàà nècuàchì mà lugar ndiaha xí ndé cundoo-ne descansu ni cúí.

⁶ Pues (nàhà xicà) fuerza icúmí cundoo dava nêhivì lugar ndiaha ma, doco nêhivì nì inini xì razón ndiaha primeru mà, cóni nîhî-nê sàà-nê cundoo-ne yucán, vâchi cóni xinîndîsâ-nê.

⁷ Sâhâ ñâ-jaàn nì cachi stná-yà inga palabra después: vâtùni iá inga tiempu vâha, cachí-yà, divi nduú quivì vichi. Vâchi nì yâha inga caní tiempu, dandu nì tiaa stná David inga palabra xì Dios. Divi nduú palabra làcâ (nì tiaa nùu tutu yohó) ndé cachí-yà:

Vichi sacúndâhvi nùu-nsiá ñâ-nì cúninî-nsiá ñâ-nduá dandacú Dios. Màsâ quídámáxîní-nsiá, cachí-yà.

⁸ Daaní, después nì sàà stná Josué (cusahnú-nê nùu nêhivì sânahâ ma, doco) nì sâhâ mii-nê cóni nîhî nêcuâchîma descansu ndiaha ma. Vâchi nú jaan, dandu mà cachí Dios coo inga quivì (cui nîhî-ndâ descansu mà) después.

⁹ Doco divi sâhâ ñâ-jaàn vâtùni cundaà ini ndohó ana nduú nêhivì xì Dios ñâ-îâ va iin lugar ndé cundoo-nda quetatu ndiaha-nda.

¹⁰ Vâchi cunaha-nsiá, nú sâni nîhî-ndâ descansu mà, dandu ñâ-sâni nsihi chuun xi-nda (ñuhivì yohó) cundua, divi nacua nì là stná xì mii-yâ na ní xîmu chuun nì quida-ya, nì quetatu-yâ.

¹¹ Ñâyücândüâ, xiñuhu ñâ-cuâhandee ini-ndâ sàà-ndâ lugar ndiaha ma ndé nîhî ndisa-nda descansu, cõtó quida-nda nacua nì quida nêhivì sânahâ ma, cóni xinîndîsâ-nê.

¹² Vâchi cunaha-nsiá, cahnú poder xì palabra ì xì Dios. Na ian itiácüâ, teayücândüâ (vâtùni sââ yâchâ ndé chicâ ini anima-ndâ) na ian nduá iin espada ñân ndúu ladu-xi, doco palabra mà, chicâ fuerteâ nùu iin espada, vâchi dècuèndè meru espíritu xi-nda sââ stná, xì dècuèndè stná chicâ ini sâxinîtnî-ndâ. Te divi sâhâ palabra mà vâtùni cunahâ claru nansa nacánî ndisa ini-ndâ, xì nansa nihnú stná ini-ndâ quida-nda.

¹³ Cunaha-nsiá, còo nì-îñâha cui coo dèhé nùu Dios; vâchi nùu mii-yâ túi claru nsidanicuú îñâha, te indêhe stná-yâ nsidaa ñâ-ndüâ quida-nda, dandu después divi nùu mii-yâ icúmî-ndâ nacua-nda cuenta.

Jesús nduú dùtù ndiaha xi-nda

¹⁴ Dêhemani Dios nduú Jesús, te vichi sâni nasaa-yâ nùu Yuamáni-yâ iá ansivi; dùtù ndiaha xi-nda nduú-yâ vichi, ñâyücândüâ iin-nì nì cúnchîcùn vîi-ndâ ichî-yâ nacua sâquidâ-ndâ vichi.

¹⁵ Vâchi mii-yâ, vâtùni cuhi ndisa ini-yândó na yâha-nda tnündoho, vâchi cuâhâ gâ îñâha sâni yâha stná mii-yâ, doco cóni quidâ-yâ nì-iin cuâchi.

¹⁶ Ñâyücândüâ, màsâ yúhi-ndâ càcàn tâhvi-ndâ nùu-yâ, vâchi yucán iá-yâ nùu silla ndiaha xî-yâ ndé sâhatahvi-yâ gracia xi-ya. Vâchi icúmî-yâ cundehe ndâhvi-yândó, te quida-ya gracia mà sâhâ-ndâ na meru xiñuhâ.

5

¹ Nsidaa dùtù ñuhivì yohó, chuun nì nîhî-nê nduá ñâ-câhàn-nê sâhâ nêhivì nùu Dios, te dócò stná-nê promesa xi nêhivì nùu-yâ. Stná promesa icúmî coco nùu-yâ, icúmî-nê cahmî stná-nê nsidaamâ sâhâ cuâchi nêhivì.

² Te sâhâ-ñâ nduú stná-nê iin ana iin-nì ndohó nahi ñanîtnaha-xi, vâtùni cuhi ini-nê nêhivì dava ga nú có-sââ nêcuâchîmâ cundaà vâha ini-nê, te ó nú sâni quee-ne ichî váha.

³ Doco sâhâ-ñâ nduú stná dùtù mà nêhivì ùún, ñâyücândüâ icúmî-nê cuâha stná-nê promesa sâhâ cuâchi mii-nê nacua quidâ-nê sâhâ nêhivì dava ga.

⁴ Te màdi mii dùtù nâcâxin-ne mii-nê ñâ-nîhî-nê chuun ndiaha ma; còo. Cuisi Dios nâcâxin xî-nê, na ian nì quida-ya xì Aarón sânahâ.

⁵ Pues, ducánî stná Cristu, màdi mii-yâ nì càchî-yâ cunduu-ya dùtù sâhâ-ñâ chiigá tavâ-yâ tnùñuhu xì mii-yâ; còo. Divi Yuamáni-yâ nì sâha xî-yâ chuun ma, vâchi dohó nì cachi yâmâ xî-yâ:

Mii-ní nduu-ní Dêhemani; vichi sâ-itiácù-ní nì guide.

⁶ Te divi ducán nì cachi stná-yâ inga xaan xì tutu ì mà:

Nicanicuahàn cucumî-ní chuun cunduu-ní nahi dùtù, nacua iá chuun xi (dùtù sânahâ nani) Melquisedec, nì cachi Dios.

⁷ Vâchi (iin xichi) na iá va Jesús (ñuhivì yohó) nahi tiaa, dandu nì xicàn tâhvi fuerte-yâ nùu Yuandiaha-yâ Dios, vâchi sâhâ-yâmâ vâtùni càcu-ya ñâ-màsâ cúu dahuun-ya. Cuâhâ gâ nì sacundahvi-yâ, dècuèndè nì sacú stná-yâ; te sâhâ-ñâ nihnú ndiaha guá ini-yâ, ñâyücândüâ nì cuhi ini Yuandiaha-yâ mii-yâ.

⁸ Cunaha-nsiá, mate meru Dêhemani Dios nduú-yâ, doco nì quida stná-yâ tocar ndoho stná-yâ sâhâ-ñâ cundaà vâha ini-yâ nansa iá ñâ-nchîcùn-ndâ nsidaa ñâ-ndüâ nì ndacu nuú-yâ.

⁹ Daaní, na ní nsihi nì ndoho-ya, dandu sâ-îâ, nicanicuahàn vâtùni dacâcu-ya nsidaa nêhivì inínî xî-yâ.

¹⁰ Vächì sàni cachi Yuamáni-yá ñà-mii-yá cunduu-ya dùtù chicá ndiaá, te quida-ya chuun xi dùtù na ian nisa quida Melquisedec mà (sàhana).

Ndahví nsidaa nèhivi nacóó xí ichì Jesús

¹¹ Cunaha-nsiá, iá cuahà gà ñà-cùni' cachi xi-nsiá sàhà chuun yohó, doco ùhi chinahi mii-nsiá sàhà-ñà vichi, vächì ùhi sàà-nsiá cundaà vaha inì-nsia,

¹² mate vichi sàni sàà tiempu ñà-chinaha mii-nsiá dava ga nèhivi ni cùí, doco còó, xiñuhu ñi ñà-danácuahà gà nèhivi mii-nsiá ndè palabra chicá mà úhi xi-ya. Vächì nahi ñà-cuati nduú-nsiá, nahi ana tà cùtùha cuxi comida fuerte, nahi mée chichi ñi nduú-nsiá.

¹³ Vächì nèhivi tà cùtùha vii nansa cuní cachi palabra xi ichì váha-ya, nahi mée xínduu-ne, na ian tëndodo itíacù-va-ne.

¹⁴ Doco nèhivi sàni cutùha nacuni índù ichì nduú ichì váha, pues nahi nècuàchì sahnú xixi xi comida fuerte xínduu-ne, vächì sàni sàhandee íni-nè cutùha váha-ne índù-ñá iá váha, te índù-ñá có-íá váha.

6

¹ Ñàyucàndüá, xiñuhu cunduu-nda nahi nècuàchì sahnú, te cutùha-nda palabra chicá nchichí xi Cristu, màdiá cuisì dàñùhù chicá sencillu cunihnu ini-ndà nicanicuahàn; còó. Màsà ndésáhà tú-ndá xí palabra primeru, vächì sàni cundaà vaha ini-ndà sàhà palabra mà, ináhà-ndá nacaniá nansa naxicocufin ini-ndà sàhà cuàchi-nda ñà-còò chuan. Te sà-ináhà stná-ndà nansa icúmi-ndá cunihnu vaha ini-ndà Dios,

² xi nansa cuhü-ndà, xi nansa chitandòò-ndà ndahà-ndà dìni nèhivi (na xicàn tàhvi-ndà sàhà-né). Te sà-ináhà stná-ndà nansa icúmi nsii natiacu-nè, xi nansa icúmi coo stná juiciu final.

³ (Doco cumáni gà ñà-ndüá xiñuhu cundaà ini-ndà sàhà-xí.) Ñàyucàndüá, cahnú gà Dios icúmi-ndá quida-nda seguir (ndè cachi ndufuerte fe xi-nda).

⁴⁻⁶ Vächì nú sàni dàtnúú Dios sàxinítnúni iin nèhivi, te después sàà-nè nacoo-ne (ichì ndiaha ma), dandu mà cùí gà sàà-nè naxicocufin ini-nè inga xichi sàhàmà. Vächì sà-ináhà-nè nansa iá ñà-nihitáhvi ndiaha-nda nùú Dios, te sàni xini stná-nè nansa iá ñà-cucumi-nda Espiritu ñi xí-yá. Ndè ináhà stná-nè ñà-ndiaha guá iá palabra ñi xí-yá, te ini anima-nè sàni xini stná-nè milagru xi-ya nahi milagru xi inga ñuhiví vaxi xi-nda. Doco (ndahví-nè) nú sàni nacoo-nè ichì mà, vächì cuní cachàmà na ian ni nachituu-ne Dèhemani-yá nchìca cruz inga xichi tu, te nduú stná na ian sácundiaa vate-néyà.

⁷ Ñàyucàndüá, (ducán icúmi cuu xi nècuàchimà nahi ejemplu sàhà) ñuhù xi-nda, vächì nú sàni cuun ndiaha dàvi, te ni ndèe cunú ndèhì, dandu (tuxí ini-ndà) cuahàn cundiátú-ndà, ádi cuàha vii itu-ndà. Te divi ducáni stná xi nèhivi. (Nú iin-ni nchìcùn vii-nè mii-yá), dandu vátùnì cundiátú anima-nè.

⁸ Doco nú (nacoo-ne ichì-yá), dandu cunduu-ne nahi ñuhù ndé cuisì sahnú yucù iñu, ò yucù chicuéhè, vächì mà ndéè váha-ne nùú-yá, te vichi sà-itúú ñihì-nè iin castigu cahnú, te fin xi-ne cunduu ñà-coco-ne.

⁹ Doco tucu icúmi cuu xi mii-nsiá, ñani màní, ináhì, mate sàni cachi xi-nsiá ñà-ndüá ni cachi. Vächì seguru icúmi mii-nsiá ñà-cundiátú anima-nsiá, te càcu-nsia.

¹⁰ Vächì váha Dios, te mà nándodó-yá obra sàni quida-nsia; ni mà nándodó stná-yá nansa cuú guá ini-nsia sàhà-yá, te sàhàmà ni chindee-nsiá dava ga nèhivi xí-yá; te dècuèndè vichi chindéè ñi-nsiánè.

¹¹ Te nsiùhù, cuní-nsì iin-ni ni cúnshì ini-nsia quida-nsia ducán ndè quivì último sàhà-ñá cucumi-nsiá seguru cuahàn-nsiá ñihitáhvi ndisa-nsia ñà-ndiaha ñi ndiatu-nda.

¹² Màsà cúdúsán-ndá; còó. Iin-ni ni cúníndísá-ndá, te quida ndee ini-ndà nacua nisa quida nèhivi sàni ñihitáhvi ñà-ndiaha ñi ni cachi-yá xi-ndà.

Iin tnúndé ini ndiaha icúmi nsidaa nèhivi xí Dios

¹³ Na ní saquin Dios compromisu xi Abraham sàhana, ni cachi-yá xi-né: “Yùhù chináhí mií”. Ducán ni cachi-yá, vächì còò cá inga ana chicá ndiaá nùú mii-yá.

¹⁴ Te ni cachi stná-yá xi (Abraham) yucán: “Seguru icúmi cundiátú anima-ní quide; te cuahà gà descendencia xi-ní icúmi cundoo”.

¹⁵ Ñàyucàndüá, ducán ni sandiatu cuéyàà nècuàchimà dècuèndè ni sàà quivì ni ñihì-nè ñà-ndüá ni cachi Dios xi-nè.

¹⁶ Nèhivi ñuhiví yohó, nú cuní-nè caquin fuerte-nè iin compromisu, dandu ndácùcahan-né quivì iin ana chicá ndiaá nùú mii-né, (nahi Dios), te nú sàni chinaha-né mii-yá, dandu sà-íá, icúmi-nè nacahan-né Dios.

¹⁷ Ñàyucàndüá, na ní quida Yua-nda Dios comprometer ñà-icúmi-ndá ñihitáhvi-ndà ñà-ndiaha ñi xí-yá, dandu ni ndacùcahan-yá mii-yá, vächì cuní-yá cundaà vaha ini-ndà iin palabra mà-dáma ndüá ni cachi-yá.

¹⁸ Ducán dandu ùi palabra nduámà, (dihna cuisì-ní nì cachi-yà, dandu después nì chinha-yá mii-yá), ñàyùcàndüá, nicanicuahàn icúmí cundiaa palabra nì cachi sahnü-yá mà; mà nunca dandahví-yàndó, seguru icúmí coo tnündé ini fuerte xi nsidaa ndohó ñècuàchì cundéé inì-xi ñà-dacácu-yàndó, te sàni cahví stná-ndá xi consuelu ndiaha sáhatahvi-yá.

¹⁹⁻²⁰ Te consuelu mà, vätüni chindeá anima-ndà, vächì có-ndüá tnühu; ñà-seguru ndüá. Vächì dècuèndé lugar ndé (chicá inì-xi vehe ì Dios ansivi), yucán sàni nansihví Jesús, nì yàha-ya nù ñà-sádì nihni nù-ndá yucán, te dècuèndé lugar mà sáhatahvi-yàndó tnündé ini mà, vächì dihna-ya nì sàà-yá yucán ñà-càhàn-yá sàhà-ndá. Vächì vichì sàni nihì-yá chuun cunduu-ya dùtù xi-nda, te nicanicuahàn icúmí-yá quida-ya chuun mà, divi nacua nìsa quida Melquisedec sàhana.

7

Nahi chuun xi dùtù nani Melquisedec, ducán nduú chuun quidá Jesús vichi

¹ Ñècuàchì dandacú nù ñuu Salem nì sanduu Melquisedec mà. Te nì sanduu stná-nè dùtù xi Stoho-ndá Dios, divi ana dandacú ndé chicá ansivi. Te divi-ne nì quee nì nanchicùn ichì xi Abraham na mándixi ñècuàchimà nì sàhàn-nè guerra nì cundee-né nù cuahà rey, dandu nì quee Melquisedec mà nì dàhü-ñáné.

² Te nì sàha ñècuàchimà-né diezmu sàhà nsidaa ñà-ndüá nihì-né. Te quivi Melquisedec mà, cuní cachà “rey ndacuisì inì-xi”. Te ñà-ndüú stná-nè rey xi ñuu Salem yucán, ñàyùcàndüá cuní cachi stná quivi mà “rey xi ndé iá paz”, vächì quivi Salem mà, cuní cachà “iá paz”.

³ Te cunaha-nsiá, còò (ndé nacáni sàhà) yuadìhì-nè, nì (sàhà) yohòtèhè-né, nì nansa nì tünüü-né, nì nansa nì xihì-nè; ñàyùcàndüá, ducán queámà na ian nicanicuahàn quidá-nè chuun xi dùtù nacua quidá Dèhemanì Dios.

⁴ Pues na cahnu-guá iá chuun nì nihì Melquisedec sàhana mà, vächì dècuèndé stná yua raza-nda Abraham nì sàha xi ñècuàchimà diezmu, divi diezmu nì tavà-né nù ñà-cuicà nì nihì-né na ní sàhàn-nè guerra.

⁵ Daaní, después nì sàà iin tiàa nani Levì nì nihì-né chuun ñà-cunduu stná-nè dùtù, mii-né xi descendencia xi-ne. Te nì sàcùnaha nsidaa-né tavà-né diezmu nù ñanitnaha-ne raza-nda nacua cachì ley ì. (Ñàyùcàndüá, ducán nì quida-ne) mate iin-nì descendencia xi Abraham nì sanduu stná nsidaa ñanitnaha-nemà.

⁶ Doco dùtù Melquisedec yucán, mate có-ndüü-né descendencia xi Levì, doco dècuèndé nù stná Abraham nì cutahvi-né diezmu mà, dandu nì dàhü stná-nè ñècuàchimà, mate (iin ana ì gá nduú ñècuàchimà) ñà-nì saquin Dios iin compromisu xi-né.

⁷ Ñàyùcàndüá, (chicá ì Melquisedec), vachì ináhá vâha-nda, cuisì iin ana chicá ì cui dahí xi inga nèhivi.

⁸ Te dùtù xinduu descendencia xi Levì, nèhivi úun nduú-né, mà cútíacú-nè nicanicuahàn, doco tavà-né diezmu vichi. Doco tucu iá ñà-ndüá cachì (tutu ì) sàhà Melquisedec, vächì ducán càhàn mà sàhà-né (na ian) itiácú ì-né.

⁹⁻¹⁰ Te mate vichi tavà descendencia xi Levì mà diezmu nù nèhivi, doco tucu nduá nìsa quida-ne antes, vächì como yohòtèhè Levì nduú Abraham, te nì dòcò-né diezmu nù Melquisedec mà, ñàyùcàndüá dècuèndé cui quida stná-ndá cuenta na ian stná Levì nì dòcò xi diezmu mà nù ñècuàchimà na ní quee-ne nì sanchicùn ichì-né Abraham.

¹¹ (Ináhá-ndá), nì nihì ñècuàchì raza-nda ley ì xí Dios sàhà ndahà dùtù descendencia xi Levì. Te tñaha Aarón nì sanduu stná nsidaa dùtù mà. Doco siempre cumáni gá quee vü chuun nìsa quida-ne, ñàyùcàndüá nì ndecunu inga dùtù, (divi nduú mii-yá). Doco có-quidá-yá na ian nìsa quida Aarón sàhana; còò. Na ian nìsa quida Melquisedec, ducán quidá-ya.

¹² Te ñà-sàni dama (Dios) modo quidá dùtù, ñàyùcàndüá icúmí stná-yá dama-ya ley (nchicùn nèhivi).

¹³ Vächì Jesús nduú (dùtù saa) càhàn-ndá sàhà-xí, te diin descendencia icúmí mii-yá; còò nì-iin yohòtèhè-yá nìsà quidáchüün nahi dùtù nù mesa ì xí Dios.

¹⁴ Vächì ináhá-ndá, divi tiàa nani Judá nduú yohòtèhè Stoho-ndá Señor, doco còò nì-iin palabra nì càchì Moisés sàhà ñècuàchì yucán ñà-cunduu-ne iin dùtù, nì stná descendencia xi-ne.

¹⁵ Ñàyùcàndüá, nàhà chicá claru (ñà-ndáà nduá cachì xi-nsiá), vächì vichì sàni ndecunu inga dùtù, te (nicanicuahàn) quidá-yá chuun ì mà nù Dios nacua nìsa quida dùtù Melquisedec sàhana.

¹⁶ Vächì divi sàhà-ñá itiácú-yá nicanicuahàn, te iá cuahà poder xi-ya, ñàyùcàndüá nì nihì-yá chuun xi dùtù mà, màdi sàhà-ñá nduú-yá descendencia (xi inga dùtù) nacua cachì iin ley.

¹⁷ Vâchi ducán nì cachi Yua-nda Dios xì Jesús:

Nìcanicuahàn cucumi-ní chuun xi dùtù nacua nduú chuun nìsa quida Melquisedec.

¹⁸ Ñâyùcàndüá, nì ndañuhu ley sàhana ma, vâchi cóni quèè víiá. Mànicúí chindee cuàhà-ñá nêhivì,

¹⁹ mànicúí nacuahandee iniànè ñà-sàà-nè quida vii-né nacua ndiá icà-né. Ñâyùcàndüá nì sàha-yàndò inga tñundè ini chicá ndiaha, te divi sàhàjàn vâtùni thàtuu-nda nùu-yá vichi.

²⁰ Cunaha-nsiá, na nì sàha Yua-nda Dios Jesús chuun xi dùtù, nì chinaha-yá mii-yá (ñà-nìcanicuahàn cunduu-yamà dùtù).

²¹ Doco dùtù (descendencia xi Leví mà), còó, cóni cáhàn-yà ducán na nì sàha-yanè chuun yucán. Cuisi Jesús nduú ana nì nìhitáhvi nì cáhàn xi Dios ducán, te dohó nì cachi-yá:

Yùhù nduí Stohò-ní Señor, te chináhi míí, (seguru cundua), mà dáma ini: nìcanicuahàn cucumi-ní chuun xi dùtù nahi chuun nìsa quida Melquisedec.

²² Pues ducán nì cachi-yá xi Jesús, te sàhà-ñá fuerte guá palabra xi-ya, ñâyùcàndüá chicá ndiáá tratu saa (nì saquin-yà).

²³ Daaní, dùtù úún-ní, màdi nìcanicuahàn icúmí-né chuun xi-ne, vâchi xíhi-nè; ñâyùcàndüá, cuàhà-né sàni quida xi chuun xi dùtù mà.

²⁴ Doco Jesús, còó; mà nunca sàà inga nêhivì cunduu-ne dùtù lugar xi-ya, vâchi nìcanicuahàn itiácú-yá.

²⁵ Ñâyùcàndüá, nú xicàn tàhvi-ndà nùu Dios, te ndácúcahan-nda quivì Jesús, vâtùni dacácu dahuun-yàndò nìcanicuahàn, vâchi nìcanicuahàn itiácú-yá cáhàn-yà sàhà-ndà.

²⁶ Cunaha-nsiá, meru dùtù xiñuhu-nda nduú Jesús, vâchi ìi ndisa-ya, mà dáná-yá, còó cuàchi-ya, tucu dahuun iá-yà nùu nècuàchi cuàchi, te vichi dècuèndè (gloria) chicá nùu-xi ansivi sàni sàà-yá.

²⁷ Còó necesidad icúmí-yá dòcò-yá promesa nsiquivì sàhà-ñá nàà sàhà cuàchi nêhivì. Ducán quidá dava ga dùtù, dihna dócò-né promesa sàhà mii-né, dandu después sàhà nècuàchi dava ga. Doco Jesús, còó, iin xichi-ní nì sàha-ya vida xi-ya nì sanduu-ya promesa nì dánáá dahuun-yá sàhà-ndà, te nìcanicuahàn ndiáá ñà-jaàn.

²⁸ Daaní, cachí stná ley sàhana ma ñà-vâtùni cunduu nêhivì iin dùtù mate iá cuàchi-ne. Doco vichi, còó, sàni yàha ley mà, te sàni cachi fuerte Dios ñà-divi Dèhemani-yá cunduu dùtù xi-nda; te nìcanicuahàn cundiaa chuun ìi quidá mii-yá.

8

Nansa cáhàn Jesús sàhà-ndà nacua cachí ley saa sàni sàha Dios cunchicùn-ndà

¹ Nsidaa ñà-jaàn sàni cachí sàhà-ñá cundaà ini-nsiá ñà-divi mii-yá nduú dùtù xi-nda, vâchi chuun jaàn quidá-yá vichi ndé iá-yà ansivi ladu cuahá silla ndiaha ndé iá Yua-nda Dios.

² Xinúcuàchi-yá ini vehe ìi-yá, vâchi vehe ma nduú veheñuhu ndisa xi-ya, te Stoho-ndà Señor nduú ana nì quidavàha xán, màdi nêhivì.

³ Daaní, nsidaa dùtù (ñuhivì yohó), chuun xi-ne nduá chíndoo-né promesa xi nêhivì nùu Dios, te sahmí stná-nè ñà-ndüá dócò-né nùu-yá. Ñâyùcàndüá nì xiñuhu cucumi stná Jesús ñà-cui chindoo stná-yá nahi promesa.

⁴ Vâchi nú ni cóó ìi-yá ñuhivì yohó nì cui, dandu mà cúí cunduu-ya dùtù, vâchi sàndoo cuàhà dùtù xi ley xi Moisés, te (nsiquivì) chíndoo-né promesa xi nêhivì nùu Dios.

⁵ Doco cunaha-nsiá, seña uun nduú veheñuhu xi nêhivì, xi stná nsidaa ñà-ndüá xi-chúún-né nùu chuun xi dùtù mà, có-ndüá ñà-ndiaha ndisa iá ansivi. Vâchi na cuàhàn Moisés quidavàha-ne veheñuhu sicoto sàhana, nì cachí Dios xi-né: “Caquin-ní cuidadu ñà-quidavàha-ní nsidaájàn nacua iá veheñuhu nì dácúmí mii-ní (na nì nana-ní) yucú yucán”.

⁶ Doco vichi icúmí Jesús iin chuun chicá ndiaha (nùu dùtù ndoo ñuhivì yohó), vâchi ley saa sàni sàha-ya vichi nduú iin ley chicá vaha, vâchi chicá ndiaha nì cachi-yá quida-ya xi-ndà vichi.

⁷ Vâchi ley primeru mà, nú còó ni-ñàha cumáni gá nùá, dandu mà cáquin gá Dios inga ley saa ma nì cui.

⁸ Doco cóni ndóo ini-yá xi nêhivì (nchicùn ley primeru mà), ñâyùcàndüá, dohó nì cachi-yá (nùu tutu ìi):

(Yùhù nduí) Stoho-nsiá Señor, te cachí, vâxi iin quivì, dandu icúmí cuàhi iin ley saa cunchicùn nècuàchi ñuu Israel, xi stná nècuàchi ñuu Judea.

⁹ Te ley saa ma, tucu coa nùu ley nì sàhi xii-né quivì nì tavi-nè nùu ñuu Egipto, te nì dácúndèhì-nè ichì ndé nì caquee-ne; vâchi ley mà, cóni chívaha vii-néa. Ñâyùcàndüá nì nacoì-nè.

¹⁰ Còo, tucu coo ley saa icúmí cuàhi nsidanicuú nècuàchìmà quivì nùù-xí, cachí. Vàchi meru ini sàxinítnùní-nè icúmí chíhi ley xi; dècuèndè meru ini anima-nè icúmí stná ndòo dahuan. Dandu mindaa yùhù cunduu ana cahvi-né, te mii-né cunduu ndisa-ne nèhivì xí.

¹¹ Te quivì yucán, mà còo gá necesidad chinaha tnahá-né sàhí sàhà-ñá cunaha tnahá-né xí; còo, vàchi nsidanicuú-né, icúmí-nè cunaha-né yùhù, nècuàchì ndahví te nècuàchì cuicà.

¹² Te yùhù icúmí cuicahnú stná ini sàhà nsidaa ñà-có-ndiáá nì quida-ne; te mà nunca nsinuu ga ini sàhà cuàchi-ne mà, nì cachi Dios.

¹³ Pues sàhà palabra jaàn (vátùni cundaà ini-nda) ley tuhú sàni nanduu ley primeru mà, vàchi ley saa nduá cachí-yà (xì inga ley nì sàha-ya). Ñàyucànduá, nú ñà-tùhù nduú ley sàhana ma, dandu sà-itúú ndañuhu dahuan.

9

Veheñuhu íá ñuhiví yohó xì veheñuhu íá ansivi

¹ Ley primeru mà, nì cachá xì nèhivì nansa xiñuhu cunucuachi dùtù nùù Dios, xì nansa cuyucun stná iin vehe ì ñuhiví yohó.

²⁻³ Ñàyucànduá, nì cuyucun iin veheñuhu sìcoto ndiadí nihni xi iin sìcoto caní, dandu nì nandua ùi cuartu. Te ini cuartu primeru mà iin iin candelero, xì stná iin mesa ndé itándoo pan ì nùù Dios. Daaní, inga ladu mà nduú vehe ndé cachí-nè nduú vehe chicá ìi.

⁴ Te icúmí lugar mà mesa oro ndé sahmí-né inciensu, te yucán íá stná caja ì xí ley mà, idáducán iin chididá oro. Te ini caja mà ináccá iin quidi oro ndé ñuhù comida nani maná, te ináccá stná vara xì Aarón nì cana ita. Daaní, ñuhù stná nduú tabla yùù ndé itándiaa palabra xì ley mà.

⁵ Te diquí caja ì mà xí-itasisi ángel ndiaha nani querubín, itaníní ndìxin-né diquí-nú, te tíxi ndìxin-némà nì sanduu lugar ndé nisa xicahnú ini Dios sàhà cuàchi nèhivì. Doco vichi có-cúsái càhàn cuàhà guè xì-nsiá sàhà nsidaámà.

⁶ Pues nì nsihì nì cuyucun nsidaa iñàha ini veheñuhu sìcoto mà, dandu nsiquivì nisa sahàn dùtù ini cuartu primeru mà ñà-quida-ne chuun icúmí-nè quida-ne.

⁷ Doco cuartu ùi íá chicá ini-xima, còo; cuisì dùtù íchicá cusáhnú nduú ana quíhvi ini-xima, doco cutu iin quivì cada cuà quíhvi-ne, nihí-né nùì (quisì) sàha-ne sàhà cuàchi mii-né xì sàhà stná cuàchi nèhivì dava ga, divì cuàchi nì quida-ne cóni sàha-ne cuenta.

⁸ Pues sàhà-ñá ducán nì ndacu nuù nèhivì sàhana ma, seña nduá nì cachitnùhu Espíritu ìi ñà-tàyoo permisú yàha nèhivì ndè lugar chicá ì xí-yá na quivì xichúùn vá-né vehe ìi primeru mà.

⁹ Pues cunaha-nsiá, iin ejemplu nduú nsidaa ley xì veheñuhu yucán sàhà-ñá cundaà ini ndohó nècuàchì tiempu vichi. Vàchi cachí ley mà ñà-xiñùhù dòcò-nda cuàhà iñàha (veheñuhu), te cahmi stná-nda quisì nduú promesa xi-nda. Doco mate ducan nì cahvi-ndayá, mà cúí dacúxióámà cuàchi-nda nùù sàxinítnùní-nda.

¹⁰ Vàchi cuisì càhàn ley mà sàhà índù comida xiñuhu cuxi-nda, te ò índù ñà-coho-nda, ò nansa icúmí ndoo traste xi-nda, xì nansa icúmí-nda cuchi-nda; cuisì sàhà ñà-íá ñuhiví yohó-ní càhàn ley mà. Vàchi nì chitnùní ini Dios ñà-cuisì cundiaámà nùù-nda dècuèndè quivì quee inga ley saa xí-yá.

¹¹ Doco vichi sà-íá Cristu, te mii-yá nduú-yá dùtù xi-nda sàhà-ñá cui nihitáhvi-nda ñà-ndiaha ì xí-yá. Te xinúcuáchí-yá ini iin veheñuhu có-íá ñuhiví yohó, vàchi màdi ndahà nèhivì nì cùyúcàn, ñàyucànduá chicá ìi-ñá, te chicá ndiaha stná.

¹² Te mii-yá, iin xichì-nì nì quíhvi-ya ini lugar chicá ì yucán, doco màdi nùì chelù, ò nùì litú nduá nihí-yá nì quíhvi. Còo; divì nùì mii-yá nduá nì sàha-ya, te sàhámà vátùni nì nihì-yá nansa càcu dahuun-nda nicanicuahàn.

¹³ Vàchi nèhivì (antes), nú sàni quida-ne iin falta nùù ley xi-ne, te có-íá ndoo ga-nè (nacua cachí ley mà), dandu xihì buey, ò xihì litú, te xixin stná iin chelù dihí, te nandúú-si nahi mii yàa. Dandu sódò nsiquin dùtù nùì quisì mà, xì stná yàa mà diquí nèhivì mà, dandu ñà-sàni ndañuhu falta xi-ne cundua. Sàni ndundoo-ne iyuhu, mate cuisì cuerpu xi-ne, (màdi anima-nè).

¹⁴ Te nú ducán nisa (quida nèhivì xì nùì quisì), dandu na cuahà gá más ndiáá nùì Jesús sàhà-ñá ndoo cuàchi anima-nda, nsidanicuú cuàchi cuàhàn dandañuhú dahuun xi-nda nì cuí. Vàchi sàhà-ñá itiácu anima-yà nicanicuahàn, ñàyucànduá nì sàha-ya meru vida xi-ya ñà-cundua na iin promesa; te promesa ndiaha ndisa nduá, vàchi còo nì-iin cuàchi nì quidá-yá. Pues sàhà nsidaajàn, sàvátùni cunucuachi víi-nda nùù mii-yá íá nicanicuahàn.

¹⁵ Vàchi sàhà ñà-nduá nì quida (Dèhemani-yá) Jesús, nì sàha-ya inga ley saa xí-yá sàhà ñà-vàha xi-nda. Mate ní quida nèhivì falta ñà-cóni chívàha víi-né ley primeru mà, doco nì xihì Jesús nì dānāá-yá sàhà nsidaa falta mà, te vichi vátùni cundiatú anima nsidaa ana caná-yá, vátùni nihitáhvi-né ñà-vàha xi-ya dècuèndè nicanicuahàn.

¹⁶ Cunaha-nsiá, nú cuní-ndà ndutahví dèhe-nda biene xi-nda, dandu tiaa-nda iin tutu cachi nansa ndutahví-né. Doco fuerza cundiatu-ne dècuèndè nú sàni xihì-ndà,

¹⁷ vâchi mate sàni tiaa-nda tutu mà, mà cúndiáá' dècuèndè cachi sàa cui-ndà; có-ndiáá' na itíácú ì-ndà.

¹⁸ Ñâyücàndüá, na ní sàha Dios ley sàhana ma, ni chitnùni stná ini-yà ñà-cui quisi, te cuitià nì-sí.

¹⁹ Vâchi (ducán cachi nùu tutu ì), ni nsihì ni cachtitnùhu Moisés xi nèhivi nsidaa palabra nduú ley mà, dandu ni tniì-ne idi cuahá, xi yùcù nani hisopo, te ni dándaxín-néa xi nù chelù xi nù simbee, te ni dàcà stnahá nsidaámà xi tècuí, dandu ni sòdò nsiquin-nè ndutè mà diquí libru ì xí-yá, xi diquí nsidaa stná nèhivi itá yucán.

²⁰ Te ni cachi-nè: "Sàhà nù yohó sàni saquin Dios iin ley ñà-chivàha-nsia vichi".

²¹ Daaní, davanì ni sòdò nsiquin stná-nè nù mà inicutu ini veheñùhu sicoto mà xi nù stná nsidaa còhò xichuún dùtù nùu chuun xi-ne.

²² Vâchi cachi ley mà ñà-casi nsidaa iñàha icúmí còdò nù mà icà-xí, te ducán ndundoa nùu Dios. Vâchi cunaha-nsiá, mà sàa-yà cuicahnú ini-yà sàhà ni-iin cuàchi-nda nú còò nù ni xitià.

Nansa ni sàha Jesucristu vida xi-ya sàhà-ñá cuxio cuàchi-nda

²³ Ñâyücàndüá, na sàcuahàn Moisés dahí-né veheñùhu sàhana ma, vâtùni ni xichuún-né nù quisi, vâchi veheñùhu ñuhiví yohó-ní ni sandua, te cuisì ejemplu uun ni sandu stná, cóni sándüá veheñùhu ndisa xi-ya iá ansivi. Doco meru vehe ì-yá iá yucán, promesa chicá ndiaha xiñuhá, màdi cuisì nù quisi.

²⁴ Ñâyücàndüá, vichi sàni nasaa Jesús ndè meru ansivi ñà-màcuñn-yà nùu Dios sàhà-ndà. Màdi veheñùhu ñuhiví yohó nduú lugar ndé ni nasaa-yà, còò; vâchi cuisì ejemplu uun nduú veheñùhu ñuhiví yohó, có-ndüú ndisa-ña vehe ì ni quidavàha mii-yá ansivi.

²⁵ Dùtù cusáhnù raza-ndà Judea, na quíhvi-ne ini cuarto chicá ì xí veheñùhu, nù (quisi) nihí-né sàhàn, màdi nù mii-né. Te cuiá cuiá quidá-né ducán. Doco Jesús, còò; có-xiñùhù cuàha-ya vida xi-ya cuàhà xichi, còò.

²⁶ Vâchi nú ducan ni cùndüá, dandu cuàhà gá xichi icúmí-yà ndoho-ya dècuèndè na ní sàcòò ñuhiví xi ndè vichi ni cuí. Doco còò, vâchi na ní xinu tiempu antes, dandu ni quixi-ya ñuhiví yohó, te ni sàha-ya vida xi-ya, doco cuisì iin xichi-ni ni xihì-yà, vâchi ni dånáà nsihí-yà sàhà-ndà, te ni nihí-yá nansa cuxio dahuun cuàchi-nda.

²⁷ Vâchi divi nacua icúmí nsidaa nèhivi sàa-nè cui-nè iin xichi, te después nsidandaà Dios sàhà-né,

²⁸ divi ducání stná Cristu, iin xichi-ni ni sàha-ya vida xi-ya ni nacuida-ya cuàchi cuàhà gá nèhivi. Dandu después icúmí-yà naxicocuñn-yà ñuhiví yohó, doco màdi gá sàhà-ñá (ndoho-ya sàhà) cuàchi-nda; còò. Cunaha-nsiá, divi sàhà ñà-càcu nsidaa ndohó nèhivi ndiatú naxicocuñn-yà cundumà.

10

¹ Ley sàhana ma, màdi meru ñà-chicá ndiaha ì xí Dios ni sándüú ndisa; cuisì ni cachtitnùhu uan ñà-después icúmí quixi ñà-ndiaha ì ndisa xi-ya. Ñâyücàndüá, mate nicanicuahàn dócò ì-né promesa cachi ley mà, te cuiá cuiá quidá dùtù ducán, doco mà cúí ndoo cuàchi nèhivi sàhàn nùu (veheñùhu) sàhámà.

² Vâchi nú jaan, dandu mà cuàha ga xi promesa mà, vâchi mà dándóhò gá cuàchi nèhivi sàxíntnùni-nè ni cùí.

³ Doco vichi, sàhà-ñá cuiá cuiá sàha ì-né promesa (cachi ley) mà, ñâyücàndüá nsinúú ini-nè iá ì cuàchi-ne.

⁴ Vâchi sàhà nù buey, ò nù simbee, mà nunca cui cuxio cuàchi ni-iin nèhivi.

⁵ Ñâyücàndüá, na ní quesaa Jesucristu ñuhiví yohó, dohò ni cachi-yà xi Yuamáni-yá: Mii-ní, màdi promesa nduá cuní gá-ní cuàha nèhivi mii-ní. Màdiá cui quisi coco gá-si nùu-ní nduá cuní-ní. Còò. Ñâyücàndüá vichi sàni quidayucùn-ní iin iquicúñú cucumí.

⁶ Vâchi màdi quisi ni xixìn, ni màdi inga clase promesa sàhà cuàchi nduá cudí ini-ní sàhà-xí; còò.

⁷ Dandu yùhù, ni cachi: "Yohó vâxi ñà-quida ndise cumplir ñà-ndüá cuní-ní, nacua cachi tutu ì sàhí, Dios mío".

⁸ Cunaha-nsiá, jaàn ni cachi Dios ñà-có-cudí gá ini-yà sàhà promesa sàhatahvi nèhivi, ni có-cudí gá stná ini-yà sàhà quisi sahmi-né; còò, có-cudí ini-yà sàhà ni-iin ñà-jaàn ni sàha-ne sàhà cuàchi-ne, mate divi nduá cachi ley (primeru-mà) cuàha-ne.

⁹ Daaní, después ni cachi Jesucristu: "Yohó vâxi ñà-quida ndise cumplir ñà-ndüá cuní-ní, Dios mío". Pues ñà-jaàn cuní cachi cuàhàn-yà dandáñuhú-yá ley primeru mà, te caquin-yà inga ley sàa xí-yá.

¹⁰ Te sàhà-ña ni quida ndisa-ya nsidaa ñà-ndúá ni ndacu nuù-yá, ñàyùcàndúá vátùni nduhii dahuun anima-ndà, vàchi nì sàha-ya iquicúñú-yá nahi promesa ñà-danáá-yá sàhà-ndà. Iin xichi-ni nì quida-ya ducán, doco nicanicuahàn cundiaá.

¹¹ Quivi vichi itá dùtù raza-ndà, quidá-né chuun xi veheñùhu xi-ne; te nsiquivi sàha-ne cuhà xichi promesa xi ley mà, mate mà nunca dacúxióá cuàchi-nda.

¹² Doco Jesús, cóo, iin xichi-ni nì danáá-yá sàhà cuàchi-nda, te nicanicuahàn cundiaámà, dandu nì sàcòo-ya ladu cuahá Yuamáni-yá,

¹³ Te ndiatú-ní-yá dècuèndè cundee dahuun-yamà nuù nsidaa ana xiní ùhi xì-yá, te cusahnú-yá nuù-né.

¹⁴ Vàchi iin xichi-ni nì danáá-yá (sàhà cuàchi-nda), dandu nicanicuahàn icúmí ndee vaha nsidaa ana sàni ndoo cuàchi anima-xi.

¹⁵ Te divi ducán cachí stná Espíritu Ìi xí-yá. Vàchi primeru nì cachí Stoho-ndà Señor palabra yohó:

¹⁶ Tucu coo ley saa icúmí cuàhi nècuàchímà quivi nuù-xí, cachí, vàchi meru ini anima-nè icúmí nacoo dahuin ley mà; meru ini sàxinítnùnì-nè icúmí chihà.

¹⁷ Dandu después cachí-yà:

Ndè nicanicuahàn mà nunca nsinuu ga inì sàhà cuàchi-ne.

¹⁸ Ñàyùcàndúá, cunaha-nsiá, nú sàni ndutu dahuun cuàchi-nda, còò gá necesidad cuàha-nda ni-iin ga promesa ñà-danáá xì sàhà-ñá.

¹⁹ Sàhà ñà-jaàn, có-yùhí gá-ndà datnátuu-nda anima-ndà nuù Dios, mate iá-yà lugar xi-ya ndé chicá Ìi, vàchi sàhà nù Jesús sà-nùnà ichì, ñáni.

²⁰ Na iin ichì saa nduá, te divi mii-yá nì quidayucun xán, vàchi sàhà-ñá itiacú ndiaha-yá, ñàyùcàndúá iá ichì mà. (Antes iin sicoto nìsa sadi nihni ndé nduú lugar chicá Ìi xí Dios, doco) sicoto mà, ejemplu sàhà cuerpu xi Jesús nì sandua, (vàchi na ní xihì-yà), divi sàhà ñà-jaàn nì nihì-ndà nansa yàha-nda nuù Dios.

²¹ Te vichi sà-icúmí-ndá iin dùtù ndiaha chindéé xí nsidaa ndohó ana nduú dèhe ndisa-ya.

²² Ñàyùcàndúá, màsà yùhì-ndà datnátuu-nda anima-ndà nuù-yá. Iin-ni nì cúníhnú ndisa ini-ndà mii-yá; ni cúníndísá víi-ndayá, màsà cúcáhán-ndá a jaan á cóo. Vàchi sàhà-ñá nì xitià nù-yá, ñàyùcàndúá sàni ndundoo sàxinítnùnì-nda, te có-dàndohó gá-ndó; te ducán queamá na ian sàni xichi-nda tècuí limpiu.

Màsà nándodó-nda ichi-yá

²³ Pues sàhà nsidaa ñà-jaàn xiñuhu cunchicùn vii-ndà ñà-ndúá xiníndísá-ndá; iin-ni nì cúníhnú vaha ini-ndà ñà-jaàn. Màsà dáma sàxinítnùnì-nda, vàchi sàni sàha-ya palabra xi-ya, te mà dàndáhvi-yándó.

²⁴ Te xiñuhu stná nanducuu-nda nansa nacuahandee stnahá ini-ndà sàhà-ñá chicá más ni cúcúu stnahá ini-ndà sàhà-ndà, te quida vii-ndà xì ñanítnahà-nda.

²⁵ Ni màsà nácóo-ndá ñà-nataca-ndà na ian quidá dava nèhivi. Còò; vichi chicá xiñuhu cunuú stnahà-ndà, te nacuahandee stnahá ini-ndà, vàchi sà-índéhe-nda chicá sà-cùyátní quivi (naxicocufín-yà).

²⁶ Vàchi cunaha-nsiá, nú sàni cundaà vaha ini-ndà nansa iá ichì ndàcuisi-yá, doco quidá canúu Ìi-ndà cuàchi-nda, dandu còò cá ni-iin promesa cui danáá xì sàhà-ndà.

²⁷ Ndé cuisì-ní ndóo ga ñà-yùhí cuaa-ndà, vàchi vaxi castigu cahnú, vaxi ñuhu níhi coco nsidaa ana có-ndóo ladu xi-ya.

²⁸ Nèhivi sàhana, nú nì cahíchi ini-nè ley xi Moisés, dandu fuerza cui-nè nú ndoo ùi ò ùni testigu cachí nansa nì cuu, te nú ducán, dandu còò iin ni cuhí ini xì-né na ní xihì-nè.

²⁹ Doco nú meru Dèhemani Dios nduú ana cahíchi ini iin nèhivi, dandu ¿nansa tuxí inì-nsia cuu? ¿Amadí cuahá gá más castigu icúmí-nè nihì-né? Vàchi nú có-quidáñùhù-nè ñà-nì xitià nù ndiaha-yá, dandu cahnú sàstnùhù coo castigu xi-ne, vàchi sàhà nù mà nì ndoo anima-nè, te sàhà stná mà nì saquin Dios iin tratu xì-né. Daaní, stná Espíritu Ìi xí Dios, gracia nì quida stná-yá xì nècuàchímà, doco nú vichi cutu nì cahíchi ini-nè nsidaámà, dandu ndahví-nè.

³⁰ Ináhá-ndá ñà-divi Dios nduú ana nì cachí xì-ndà dohó: “Mii quidá tocar nachitacuhá sàhà falta xi nèhivi; còò cá ana icúmí nacuahà xi-né castigu”. Te cachí stná (tutu Ìi) ñà-divi mii-yá icúmí-yá nsidandaà-yà sàhà cuàchi nèhivi xí-yá.

³¹ Cunaha-nsiá, tnùndoho cahnú cundua nú nì níhi nèhivi castigu nuù ndahà Dios iá nicanicuahàn.

³²⁻³³ Doco mii-nsiá, xiñuhu nsinuu ini-nsiá nansa nì cuu xi-nsiá quivi primeru na lácà nì dàtnùu-yá sàxinítnùnì-nsiá, cuahà tnùndoho nì yàha-nsia. Dava xichi nì canáhà nèhivi xì-nsiá, te dava xichi nì dàndohó stná-nè mii-nsiá nuù tàcá nèhivi. Te dava xichi cuisì-ní nì quida-nsia acompaña nècuàchi nì ndoho ducán, doco calma nì quidandee inì-nsia sàhà nsidaámà.

³⁴ Te na ní sàcùndiadi stná compañeru-nsià, dandu nì indehè ndahví-nsiànè; te na ní candiaa nèhivi biene xi-nsia, (cóni cùhúun ini-nsia), còo, duha nì cudii ini-nsia, vèchi ináhà-nsià, ndè gloria xi Dios chicá cuahà ìñàha icúmí-ndá, te chicá ndiaa` mà, vèchi nicanicuahan cunaha-ñá.

³⁵ Ñàyücàndüá, iin-ni nì cúnihnú vaha ini-ndà (ichi-yá), màsà nácóo-ndáñá, vèchi iin ñà-vàha cahnú icúmí-ndá nihì-ndà nuù-yá.

³⁶ Iin-ni nì cúnchícùn cueyàà-ndà ichi mà, vèchi nú sàni nsihi nì quida-nda nsidaa ñà-ndüá cuní Dios quida-nda, dandu nihì-ndà ñà-ndiaha ì sàni cachi sahnú-yá xi-ndà.

³⁷ Vèchi dohó cachi tutu ìi:

Cunaha-nsià, icúmí-yá naxicocuñi-yà: làcà sacu tiempu cumáni gá; mà cuéé gà-yà.

³⁸ Te (cachi stná-yà): “Nèhivi vaha xi, nú xiníndisá vaha-ne yùhù, dandu nihì-né vida ndiaha. Doco nú nì ndédumá ini-nè, dandu ni-iyuhu mà ndóo ini sàhà-né”, cachi-yà.

³⁹ Doco ndohó, có-ndüü-ndà nèhivi ndedumá ini-xi, vèchi nú jaan, ndañuhu anima-ndà. Còo, nèhivi xiníndisá nduu-nda, ñàyücàndüá icúmí-ndá càcu-nda nuù-yá.

11

Xiñuhu cunindisá ví-nda

¹ Nú ndisa xiníndisá vaha-nda Dios, dandu cuní cachàmà ñà-nìhnú cuisì ini-ndà icúmí cuu ndisa ñà-ndüá ndiatu-nda. Te nú xiníndisá-ndá ducán, dandu quidá stná-ndà cuenta na ian sà-íá ndisa ñà-tàñàha ga cuninüü-ndà.

² Te divi ñà-jaàn ndüü stná ñà-ndüá nisa quida xi-ndà sàhana, nì xinindisá-né mii-yá, te nì ndee vaha-ne nuù-yá.

³ Ndohó, xiníndisá-ndáyá, te sàhájàn vätüni cundaà ini-ndà nansa nì quidavàha-ya ñuhiví, cuisì nì càhàn-yà, te nì sàcòa; ñàyücàndüá, indèhe-nda iá ñuhiví vichì, doco màdi ñà-túf cundehe-nda ndüá nì cuyucán; còo.

⁴ Daaní, Abel, na ní sàha-ne Dios promesa xi-ne, chicá nì sandiaàmà nuù promesa nì sàha Caín. Te ¿indü chuun chicá ndiaàmà? Divi sàhà-ñá nì xinindisá nècuachimà mii-yá. Ñàyücàndüá, nì cachi-yà: “Sàni ndee vaha Abel nù; cudii ini sàhà promesa xi-ne”. Ñàyücàndüá, mate còo cá Abel mà, doco dècuèndè vichì iá ì fama-nè ñà-nì xinindisá-néyà.

⁵ Daaní, Enoc tu, nì xinindisá stná-nè mii-yá, te vivu nì sàà-nè nuù-yá, cóni xíhi-nè, nì ndañuhu uun-ne (nuù nèhivi), vèchi sàhà poder ndiaha xí Dios nì ndiachi-né dècuèndè ndé iá-yá. Te cachi tutu ìi, ducán nì cuu xi-né ñà-nì cudii guá ini-yá sàhà-né.

⁶ Doco nú có-xiníndisá-ndá, dandu mà nunca cudii ini-yá sàhà-ndà. Vèchi nú cuní-ndà sàà-ndà nuù-yá, dandu fuerza cunindisa-nda iá ndisa-ya, te seguru datnúü-yá sàxinítnüni nsidaa ana nandúcu ndisa-xi-yá.

⁷ Daaní, stná Noé, nì xinindisá stná-nè mii-yá na ní cachitnúhu-ya xi-né ñà-ndüá icúmí cuu quivi nuù-xi; ñàyücàndüá, nì quida-ne ñà-ndüá nì cachi-yà, nì quidavàha-ne iin barcu cahnú sàhà-ñá càcu-ne, mii-né xi stná nèhivi vehe-ne. Ducán nì quida-ne, te ñà-jaàn claru nì tui ñà-cóni quidá víi dava ga nèhivi ñuhiví. Doco mii-né, nì ndee vaha-ne nuù-yá ñà-nì xinindisá-néyà.

⁸ Daaní, stná Abraham; nì xinindisá stná-nèyà, te ñàyücàndüá nì quee-ne cuahàn-nè na ní cana-yanè ñà-cùhùn xicà-né inga ñuu ndé icúmí-né sàà-nè cunduu-ne stoho nsidaa ñà-íá yucán. Ñàyücàndüá, nì inini-ne ñà-ndüá nì ndacu nuù-né, mate có-cùndáà ini-nè índü cùhùn-nè.

⁹ (Dandu nì sàà-nè) ñuu ndé nì cachi Dios xi-né mà. Yohó te yucán nì ìa chii-né ñuu mà, nihnú ini-nè ndüü-nè nècuàchì inga ñuu, doco siempre iin-nì xiníndisá víi-néyà. Cuisì vehe sícoto nì sanduu vehe-ne, te divi clase vehe yucán nisa xichuún stná (dèhe-ne) Isaac, xi stná (dèheñani-né) Jacob. Cunaha-nsià, stná nècuàchì yucán, iin-ni nì sandiatu stná-nè cuu xi-né ñà-ndüá nì cachi Dios xi Abraham antes.

¹⁰ Vèchi nècuàchimà, (na ní quee-ne ñuu-nè), nandúcu-nè iin ñuu sàni quidavàha-ya; vèchi nihnú ini-nè iá iin ñuu nì chitnúni ini mii-yá coo, te fuerte ndisa cimientu xan.

¹¹ Daaní, stná (ñahàdihì-nè) Sara, nì xinindisá stná-nè mii-yá. Mate sáyàha ga sahnú-né, doco nì nhitáhvì-né valor ñà-coo iin mèé xi-ne, vèchi antes sàni cachi sahnú Dios xi-né, te ñàyücàndüá nì tuiñuu iin dèhe-ne, vèchi xiníndisá-né mà nunca dandahví-yànè.

¹² Ñàyücàndüá, mate sàsàhnú cuàha Abraham, doco nì ìa iin dèhe-ne, te sàhà imindaa dèhe-nemà nì sàà-nè nì sàcùnduu-ne yohótéhè cuahà gá mil nèhivi; cuahà sàstnúhù nèhivi nì nanduu-ne nahi cuahà sitnúü ansiví, ò ñusi ndiquin yuhù mar, vèchi mà cù nandiahvia.

¹³ Cunaha-nsià, nsidaa nècuàchì sàni nacani xi-nsià sàhà-ximà, iin-ni nì xinindisá víi-né mii-yá dècuèndè nì xíhi-nè. Te mate cóni sàà-nè cuninüü-né cuu ndisa ñà-ndüá nì cachi Dios xi-né, doco iin-ni nì xinindisá-né, mate tàyóa, te nì cudii ini-nè sàhà-ñá, vèchi (nì

cundaà ini-nè) màdi ñuu ndisa-ne nduú ñuu-nè ñuhiví yohó, ñàyùcànduà ni cachi-nè xi nèhivi ñà-cuisi-ní yáha uun-ne ñuhiví yohó.

¹⁴ Te nú ducán cachí nèhivi, dandu náha claru inga ñuu nduá nandúcú-né, iin ñuu ndé cunduu ñuu ndisa-ne.

¹⁵ Te nú cuàhàn-nè nsinuu ini-nè ñuu-nè primeru ni cùí, dandu vihini naxicocuíñ-nè yucán.

¹⁶ Doco còó, cóni núhù-nè, vàchi ni cuni-nè cundoo-ne iin ñuu chicá ndiaha, divi ñuu mii-yá iá ansivi. Te sàhà-ñá (ni xinindisá-né ducán), ñàyùcànduà có-ndùcàhán-yá cachí-yá ñà-nduú-yá ana cahvi-né, vàchi sàni quidayucun-yá iin ñuu (ndiaha) ndé cundoo-ne (xi-yá).

¹⁷ Daaní, después, ni cachi Dios xi Abraham ñà-ni cuàha-ne dèhe-ne Isaac cunduu-tè iin promesa. Ducán ni quida-yá sàhà-ñá cundaà ini-yá a cunini vù-néyá, á coó. Te (ni quida-ne cumplir), ni xinindisá-né mii-yá, dispuestu ni la-ne ñà-cunduu dèhe-ne promesa, mate mindaa-tè nùù-né, te mate antes sàni cachi sahnú Dios xi-né

¹⁸ ñà-divi núu tèchii Isaac mà icúmí quee cuàhà descendencia xi-ne.

¹⁹ Doco ni cundee ini-nè ñà-vàtùni danátíacú-yàte nú ni cùí-te. (Te ñà-ni càcu-tè) ni ndòo-tè vivu nùù-né, ñàyùcànduà vátùni quida-nda cuenta na ian ndisa, sàni natiacú-te.

²⁰ Daaní, después (ni cundaà ndisa ini-xi) ñà-xiníndisá stná Isaac mà mii-yá, vàchi cuàhà gá ñà-ndiaha ñi ni cachitnúhu-ne xi (ùù dèhe-ne) Jacob xi Esaú sàhà nansa icúmí cuu xi-né quívi nùù-xi.

²¹ Daaní, Jacob mà, ni xinindisá stná-nè mii-yá, (ináhá-ndá), vàchi na sá-ítúú cuàhàn-nè cui-nè, dandu ni càhàn-nè xi iin iin dèhe José, ni cachitnúhu-ne xi dèheñani-né mà ñà-icúmí-tè ñihí-té cuàhà ñà-vàha ndiaha nùù Dios. Ducán ni cachi-nè, naquímáni-né Dios, te ítúú-nè nùù bastón xi-ne.

²² Daaní, José mà, ni xinindisá stná-nè mii-yá, (ináhá-ndá), vàchi na sá-ítúú cuàhàn-nè cui stná-nè, ni cachi-nè ñà-seguru icúmí caquee libre nsidaa nècuàchi raza-nè Israel nùù ñuu Egipto. Te ni nacoó stná-nè órden nansa quida nèhivi xi iquícúñú-nè nù sàni xihí-nè.

²³ Daaní, stná yuadíhí Moisés, ni xinindisá stná-nè mii-yá na ní tünnu dèhe-ne mà. Te ni caxini-nè cuahani iá-vè, ñàyùcànduà mate sàni dandacú rey cui-vè, doco cóni yúhí-nè; ùni yòò ni la dèhé-vè ni quida-ne.

²⁴ Daaní, stná Moisés mà, ni xinindisá stná-nè mii-yá, te sàhámà na sàni sahnú-ne, cóni cùnì-nè cachi gá nèhivi ñà-dihí-nè nduú dèheyoco rey.

²⁵ Còó, chicá ni cudíi ini-nè cùhùn-nè cutnahá-né xi nèhivi xí Dios, mate cuàhà gá ni ndòhó-né, te màdià ndòo-ne (ndé iá-né), te quida-ne ñà-vico sìquini iá ñuhiví yohó, vàchi cuisí sacú-ni tiempu coo ñà-vico ma.

²⁶ Chicá nsiha ichi Cristu ni cunchícùn-nè nihnú ini-nè, mate ni cáhíchi ini nèhivi-né; te cóni xího stná-nè ñà-cuica ñuu Egipto yucán, vàchi iin-ni nihnú ini-nè ñà-cuisi nùù Dios icúmí-nè ñihítàhvi-né cuàhà ñà-ndiaha ñi.

²⁷ Daaní, na ní quee-ne ñuu Egipto mà cuàhàn-nè, divi sàhà-ñá xiníndisá-né mii-yá ni sandua. Ni cóni yúhí-nè ñà-ni xidá guá ini rey dandacú yucán, vàchi iin-ni nchícùn vù-néyá na ian xinínùù-néyá, mate có-tù-yá indéhe-nda.

²⁸ Daaní, ñà-sàni xinindisá-né mii-yá nduú stná na ní quida-ne vicó pascua primeru, mii-né xi nèhivi raza-nè, te ni dàcáa-ne nùù (lelù icá yehè-né) sàhá màsà cùí dèhe sahnú-né quida àngel yàha yucán.

²⁹ Daaní, na ní yàha-ne Mar Cuahá, te ni nduhichí cahà mar mà nahi ñuhù íchí, divi sàhà-ñá ni xinindisá-né Dios ni sanduu stná` mà. Doco tè-ñuu Egipto, na ní cuni stná-te yàha-tè yucán, dandu ni càhà nsihí-tè.

³⁰ Daaní, sàhà-ñá ni xinindisá stná nèhivi raza-ndà mii-yá, ñàyùcànduà ni nacunnduu-nè ñuu Jericó usà quívi, te ni caà nama ndiadí nùù ñuu mà.

³¹ Daaní, stná nècuàchi ñahà nani Rahab, mate cuàhà tiàa ni xicanuu xi-né (antes), doco ni sàà-nè ni xinindisá stná-nè mii-yá, vàchi na ní techuún Moisés iin ùi tiàa ñà-nacuni-te nansa iá ñuu nècuàchmà, dandu ni chindee-néte. Ñàyùcànduà, cóni xihí-nè nahi nèhivi dava ga có-xiníndisá.

³² Pues vichí có-xìñùhù cachi guè (sàhà nèhivi sàna ma), ni mà sàà stnáì nacani nsihí xi-nsiá sàhà nsidaa-né, divi sàhà Gedeón, xi sàhà Barac, xi Sansón, xi Jefe, xi David, xi Samuel, xi sàhà stná dava ga nècuàchi nisa càhàn cuenta xi Dios.

³³ Cunaha-nsiá, divi sàhà-ñá ni xinindisá nsidaa nècuàchmà mii-yá, (ñàyùcànduà ni quida-ne cuàhà obra ndiaha). Dava-ne ni cundee-né nùù nsidaa nèhivi ndoó inga ñuu. Dandu ni cusahnú víi-né, te ni ñihí-né ñà-vàha ni cachi sahnú Dios xi-né. Te dava-ne ni càcu-ne nùù nsicaha, cóni sàxí-siné.

³⁴ Te dava stná-nè, ni cundee-né nùù ñuhu xixìn, cóni quidá dañuà xi-né. Te dava-ne ni càcu-ne nùù nèhivi cuàhàn cahni xi-né xi espada ni cùí. Stná nècuàchi còò fuerza xi, ni

xinindisá stná-nè mii-yá, te nì ndufuerté-nè, vátùni nì nacuahandee ini-nè, te na ní caquixi soldadu inga ñuu, vátùni nì chindee-né mii-né, te nì taxi-né nsidaa tèmà.

³⁵ Stná nècuàchi ñahà, nì xinindisá stná-nèyà, te ñàyùcàndüá nì nihitáhvi dava-ne nì natiacu iin nèhivi vehe-ne. Doco dava stná nècuàchima, nì dàndòhò nèhivi-né, te nì xihì-nè; vihini dacácu-téné nì cùí (nú nì nácóó-né ichì-yá); doco cóò, cóni quidá-né ducán, vàchi cuní-nè nihitáhvi-né iin ñà-vàha chicá ndiaha, divi ñà-natiacu-nè.

³⁶ Daaní, dava stná nècuàchi sàhana ma, cuahà gá nì sàcùndiaa nèhivi-né, te nì ñàhni cuní stná-nè. Te dava stná-nè, nì sàcùnuhni stná-nè cadena, te nì sàcùndiadi-nè.

³⁷ Te dava stná-nè, nì sahnì nèhivi-né xì yùù, ò machete. Te dava-ne, serruchu nì quedava-ne. Cuahà gá nì candoho-ne nì quida nèhivi. Ñàyùcàndüá, yohó te yucán nì xicanuu ndahví-nè, nisa idàhvi-ne xi cuisì iin rii ò simbee, vàchi ndahví dahuun-ne, cuahà tñundoho nì xini-nè; quini nì dàndòhò nèhivi-né.

³⁸ Nì xicanuu ndahví-nè yucù dãnà, ò inga xaan ndé cóò nèhivi, te yucán nì caquidi-nè ini cueva, ò ini iin chìcòhò cahnú. Ducán nì cuu xi-né mate chicá ndiaá-nè nùù nsidaa gá nèhivi ñuhiví.

³⁹ Doco nsidaa nècuàchi sàhana ma, mate ní nihì-né nì ndee vaha-ne nùù Dios ñà-nì xinindisá-nèyà, doco cóni nihitáhvi-né ñà-ndiaha ñi nì cachi-yà (xì xii-ndà) antes.

⁴⁰ Cóò, vàchi sàhà-ñà nihnú stná ini-yà ndohó, ñàyùcàndüá nì chitnùnì ini-yà ñà-dècuèndè quivì vichì coo iin ñà-chicá ndiaha nihitáhvi-ndà, dandu iin-ni nacuatnaha-nda xi nècuàchi yucán cundiatú anima nsidaa-nda.

12

Cuisì Jesús ni cùndéhe-nda nùù-xì

¹ Vichì cuahà sàstnùhù nèhivi (sàhana) sàni nacani xi-nda ñà-ndiaha guá iá (nú xinindisá-ndá mii-yá). Ñàyùcàndüá, xiñuhu nacoò dahuun-nda nsidaa ñàhà sadí xì nùù-ndà. Nì nácóó-ndá nsidanicuú cuàchi quida-nda, vàchi ñà-yucán nduá dacá xì ñi-ndà. Iin-ni nì cunchícùn vii-ndà mii-yá inií vida xi-nda; nacua quidá nècuàchi dadavá stnahá xinú carrera, ducán xiñuhu nacuahandee ini-ndà.

² Iin-ni nì cùndéhe-nda nùù Jesús, vàchi sàhà mii-yá nì quesaha-nda xinindisá-ndá ichì-yá, te divi-ya icúmí chindee stná xi-ndà ndé cachi xinu vida xi-nda. Te mate nchìca cruz nì ndoho-ya, doco cóni ndúlócó-yà na ní cahìchi nì nèhivi-yá ñà-nì xihì-yà ducán, vàchi ináhá-yà, después icúmí-yà sàà-yà coo-ya contentu. Daaní, (mànùhù-yà gloria), te yucán nì sàcòo-ya ladu cuahá Yua-nda Dios.

³ Pues vichì xiñuhu nsinuu ini-nsia nansa nì cuu xi-yá, cuahà gá nì quida quini nèhivi cuàchi xi-yá, doco nì quidandee ini-yà. Ñàyùcàndüá, nsinuu ini-nsia ñà-jaàn, cóto cucahan-nsiá mà cùndéé gá ini-nsia, te cuhuun ini-nsia.

⁴ Vàchi ñà-ndáà nduá, cuahà lucha fuerte sàni quida-nsia ñà-màsà cùndéé nèhivi cuàchi ma nùù-nsiá, doco nì-iin-nsia tãñaha ga cahni-né.

⁵ Doco nacua indéhí sàni nandòdó-nsiá nansa cachí Dios nùù tutu ì ndé cãhàn-yà xi-ndà na iin yua-nda. Pues dohó cachí-yà:

Hijos míos, màsà cùñãñã-nsiá nú nãni-nsia nùù yùhù ana nduú Stoho-nsiá Señor; cóò, nì màsà cùhúùn stná ini-nsia nú sàni sãhi-nsiá iin conseju tii.

⁶ Vàchi Stoho-nsiá nduí, te cuú ini sàhà nsidaa-nsiá, ñàyùcàndüá fuerza nàni-nsia, vàchi nsidaa ana sàni nacàxin ñà-cunduu-ne dèhi, icúmí-nè ñàhni stná-nè, cachí Dios.

⁷ Ñàyùcàndüá, xiñuhu quidandee ini-ndà na nãni-nda nùù-yá, vàchi sàhà-ñà nduú ndisa-nda dèhe-ya nduájàn. Sã-ináhá-ndá, na cuati-nda, nsidanicuu-nda nì nihì-ndà conseju nùù yua-nda.

⁸ Doco quivì vichì, nú cóò nì-iin conseju nihì-ndà nùù mii-yá, dandu cuní cachãmà ñà-có-nduú ndisa-nda dèhe-ya, vàchi nsidaa ana nduú dèhe ndisa-ya, ducán quidá-yá xì-né.

⁹ Vàchi yua-nda ñuhiví yohó, nisa danáni stná-nèndó, te nisa cahvi-ndané. ¿Amádi chicá ndiá icà-ndà cundoo stná-ndà sujetu nùù Yua-nda iá ansivi, te ducán nihì-ndà cutiacu ndiaha-nda?

¹⁰ Vàchi sacu tiempu nì ndòo-nda nùù yua-nda ndoó ñuhiví yohó, te nacua cudí ini-nè, ducán nisa danáni-nèndó. Doco mii-yá, cuisì sàhà ñà-cunduu ñà-vàha xi-nda nduá danáni-yãndó, te ducán cunduu ndisa-nda nèhivi ì nahi mii-yá.

¹¹ Pues ñà-ndáà nduá, có-cùdì ini-ndà na hora nihì-ndà conseju; tñundoho nduá cahan-nda; doco nú sàni yàha, te sàni sàà-ndà nì cundaà vaha ini-ndà, dandu chicá ndiaha coo vida xi-nda, vàchi chicá vii sàni sàà-ndà nacani ini-ndà.

Cuahà gá peligru ndácàn nú cahìchi ini-ndà palabra cachí Yua-nda Dios

¹² Ñàyùcàndüá, màsà cúndóó-nsiá cuatúun gá inì-nsia na ian nì còyo ndahàsàhà-nsiá; còò. Iin-ni nì nàcuàhandee inì-nsiá cuniá,

¹³ micuísì ichì vâha-ya nanducu-nsiá sâhà-ñá màsà túcù iin nècuàchi tàcútùha vii cacanuu nacua ndiá icà-né. Te nú sà-iá iin ana tàcúndáâ vâha inì-xi ducán, dandu nanducu-nsiá nansa ndufuerté anima-nè.

¹⁴ Ni cúndóó màni-nsiá xì nsidaa ñanitnaha-nsia, te ni cuáhandee stná inì-nsia cunihnu ì inì-nsia nicanicuahàn, vâchi nú có-nihnú ì ini-ndà, mà nunca sàà-ndà cuni-ndà nù Stoho-ndà Señor.

¹⁵ Te cuidadu ni cúndóó stná-nsiá còtó nandòó-nsiá gracia xi-ya, te sàà-nsiá nanduu-nsia nèhivi malu ndedumá inì-xi, vâchi nacua quidá iin yohò yùcù dàná, ducán cui quida stná nècuàchi malu, mate imindaa-né, doco vihini cunduu-ne dañu xi cuàhà gá nèhivi.

¹⁶ Ñàyùcàndüá, cuidadu cundoo-nsia, còtó coo iin-nsia cútòò xì ñahà, te ò iin ana có-ndùlócò-xì ichì ì-yá na ian nì quida Esaù sâhaha. Dêhe sahnú nì sanduu-ne, ñàyùcàndüá, icúmí-nè ndutahvi-né cuàhà ñà-ndiaha ni cui, doco nì dama-ne derechu mà sâhà cuisì iyuhu ñà-ndüá nì xixi-ne.

¹⁷ Te ináhá-nsiá nansa nì cuu xi-né después, cóni ñihí-né ndutahvi gá-nè ñà-ndiaha ma nùu yua-né, mate yâha ga nì cuni-nè ñihí-né. Nì sacundahvi-nè (nùu nècuàchimà), te nì sacu fuerte-nè, doco mànicúí gá, vâchi cóni ñihí-né nansa nadama-ne ñà-ndüá sàni quida-ne mà.

Tucu iá ñà-ndüá nì xini nèhivi sâhaha na ní sâha Dios-nè ley primeru

¹⁸ Vâchi ndohó, cóni tnátuu-nda nùu iin yucù (ñuhiví yohó nacua nì quida nècuàchi Israel sâhaha), vâchi yucù (Sinaí yucán), xixàn, te iin tnúú ndúchí, có-túnnúú, te caná fuerte tàchi.

¹⁹ Te nì sivi stná corneta; dandu nì tiacu câhàn fuerte mii-yá. Doco nèhivi mà, nì sacundahvi-nè nùu-yá ñà-màsà câhàn gâ-yá xi-né ducán.

²⁰ Vâchi màni cúndéé gá ini-nè quida-ne cumplir palabra nì cachi-yá. Te dohó nì cachi stná-yá: “Màsà náná-nsiá icà yucù jaàn, te nì quisi xí-nsiá, vâchi nú ducán, dandu icúmí-nsiá cahni-nsiási xì yúú, ò xì lanza”.

²¹ Cunaha-nsiá, yâha ga nì cayúhí cuaá nèhivi mà na ní indehè-né nansa nì cuu. Dècuèndè stná Moisés nì cachi-nè: “Ndé quidí cuisì ñà-yúhí güè”.

²² Doco ndohó, còò, vâchi ichì yucù nani Sión sàni quihìn-nda vichi, vâchi yucù yucán nduú ñuu mii-yá iá nicanicuahàn. Te Jerusalén Nsiaha Iá Ansivi, ducán nani stná ñuu mà. Te sàni sàà stná-ndà ndé ndoó tàcà cuàhà mil ángel xi-ya,

²³ ndeníhí vâha-neyá. Te sàni nacuatahá stná-ndà xì nsidaa gá nèhivi xínduu dèhe-ya, divi nsidaa ana itándiaa quiví-xí ndé gloria xi-ya. Te sàni dàtnátuu stná-ndà anima-ndà nùu mii-yá ana icúmí nsidandaà sâhà nsidaa nèhivi, divi nduú Dios; te vichi iin-nì sàndúú stná-ndà xì nèhivi nì ndee vâha nùu-yá sâhaha, doco vichi sàni ñihí stná-nè nì cundiátú ndiaha stná anima-nè.

²⁴ Vâchi nùu Jesús sàni tnátuu anima nsidaa-nda, vâchi divi mii-yá nduú ana câhàn ñihni sâhà-ndà, te nì saquin stná-yá iin tratu saa xi-nda, divi nduú ñà-nì xitiá nù-yá (sâhà-ndà); te cunaha-nsiá, chicá ndiaha quidá nù-yá mà nùu nì Abel sâhaha.

²⁵ Ñàyùcàndüá, cuidadu ni cúndóó-nsiá ñà-màsà nácuáa-nsiá mii-yá ana câhàn xi-ndà vichi. Vâchi nú cóni cácu nèhivi sâhaha na ní cahíchi ini-nèyá na ní câhàn-yá xi-né ñuhiví yohó, dandu chicá mà cácu ndohó nú cahíchi ini-ndà palabra cachí-yá xi-ndà dècuèndè ansivi.

²⁶ Na ní câhàn-yá antes, fuerte nì tnàa ñuhiví; doco vichi sàni cachitnùhu-ya xi-ndà inga palabra yohó, cachí-ya: “Inga xichi icúmí datnáí ñuhiví. Doco màdi cuisì ñuhiví yohó icúmí tnàa; còò, dècuèndè stná ansivi icúmí tnàa”.

²⁷ Te na ní cachí-yá palabra mà ñà-inga xichi icúmí tnàa, pues cuni cachàmà ñà-icúmí cuxio nsihí nsidaa ñà-ndüá nì quidavâha-ya ñuhiví yohó. Doco nsidaa ñà-cuàhàn cunaha nicanicuahàn, icúmíá ndòa.

²⁸ Vâchi ñuhiví ì ndé icúmí-ndá cundoo-nda, mà nunca ndutá. Ñàyùcàndüá, iin-ni xíñuhu naquimani-ndáyá sâhámá sâhà-ñá vâtùni cunucuachi víi-nda nùu-yá nacua cuni-yá quida-nda, te cahvi víi-ndáyá; màsà nácuídiqui uun-nda ichí-yá,

²⁹ vâchi nahi ñuhu níni nduú-yá, te mà úhi cahmi nsihí-ya (ana cahíchi ini).

13

Nansa quida-nda, te cudüi ini Dios sâhà-ndà

¹ Iin-ni nì cuú stnahá ini-ndà sâhà-ndà na ian iin-ni ñani xínduu-nda.

² Màsà nándodó-nda coo màni ini-ndà xì nèhivi cóyo vehe-nda, vâchi dava nèhivi, ndé stná ángel xì Dios nì dáyâha-ne vehe-ne, te cóni cúndáâ ini-nè.

³ Te xiñuhu nsinuu stná ini-ndà compañeru-ndà xíndiadi vehecàa; te ducán quida-nda cuenta na ian cutnahá stná-ndà xi-né ndiadi-ndà. Te nú quidá quini nêhiví xí dava ga compañeru-ndà, dandu cundehè ndahví stná-ndà nècuàchìimà, vâchi na nêhiví nduú stná-ndà, te vihini cuu stná xi-ndà ducán iin quivì.

⁴ Daaní, xiñuhu quida tnũñuhu stná-ndà xi nècuàchì vehe-nda. Màsà quidá-ndá ni-iin falta xi inga nêhiví. Vâchi iin castígu fuerte cuàha Dios ana nchícùn xi ñahá, te ò ana cáhàn xi nècuàchì có-nduú nècuàchì vehe-xi.

⁵ Màsà xiho-nda cucumi-nda ñà-cuicà ñuhiví yohó. Nacua sà-icúmí-ndá, xi ñà-jaàn-ní ní cúndóó-ndá contentu, vâchi sàni cachi-yà: “Yùhù, mà nunca nandodí mii-nsiá. Mà nunca nacoo nihni mii-nsiá”.

⁶ Ñâyücàndüá, vâtùni cáhàn ndee-nda, cachí-ndà:

Divi Stoho-ndà Señor nduú ana chindéé xí. Mà yúhí, vâchi còò ni-ñàha cui quida nêhiví xí.

⁷ Daaní, xiñuhu nsinuu stná ini-nsiá nècuàchì nisa idónuu nùu-nsiá antes, divi nècuàchì nisa dacuaha-xi-nsiá palabra ìi xí Dios. Xiñuhu nsinuu ini-nsiá nansa nisa quida vii-né vida xi-ne, te iin-ni ní cúnindisá stná-nsiá nahi mii-né.

⁸ Cunaha-nsiá, iin-ni iá Jesucristu, dècuèndè sàhana xi vichi, te nicanicuahàn.

⁹ Màsà cuàha-nsiá chiyuhù nêhiví-nsiá ñà-cunchicùn-nsiá inga ichì có-ináhà-nsiá, vâchi cuàhà ichì tucù iá chináhà-nè; cuàhà gá ichì tàcùnì-ndà iá. Doco ndohó, chicá vâha cuisì gracia xi mii-yá ní cúnihnú ini-ndà, te ndufuerté anima-ndà, màdiá cunchicùn-ndà iin ley cachí sàhà cuisì índu comida cui cuxi-nda, vâchi nêhiví nacání guá ini-xi sàhámà, còò ni-iin ñà-vâha xi anima-nè tavá-né.

¹⁰ Dùtù xinúcuáchí veheñuhu (xi raza-ndà, itiácú-nè ñà-nduú promesa xi nêhiví). Doco ndohó, iá stná promesa xi-nda, (divi nduú Jesús); doco nècuàchì veheñuhu ma, còò derechu xi-ne nihitáhvi-né ni-ñàha nùu mii-yá.

¹¹ Vâchi quisi nduú promesa sàha-ne veheñuhu ma, xitià nìi-sí, dandu nihí dùtù-ñà sàhàn ndé nduú lugar chicá ìi, te quidá-néamà presentar sàhà cuàchì nêhiví. Doco iquicúñú quisi mà, còò; ndè fuera ñuu icúmiá coca.

¹² Pues divi ducán ní cuu stná xi Jesús sàhà-ñá nihì nêhiví ndoo ndisa cuàchì-ne sàhà nìi-yá. Vâchi fuera ñuu ní ndoho stná-yá.

¹³ Ñâyücàndüá ndohó, iin-ni ní cúnchicùn stná-ndáyá, mate icúmí-ndá nacoo-nda ñuu-ndà, te cahíchi ini nêhiví-ndó nacua ní quida-ne xi mii-yá.

¹⁴ Vâchi ni-iin ñuu iá ñuhiví yohó, mà cúndüá ñuu-ndà nicanicuahàn. Còò, iin ñuu quesaa quivì vâxi xi-nda nduá ndiatu-nda.

¹⁵ Ñâyücàndüá, nicanicuahàn ndiá icà-ndà ndenihi vâha-nda Dios sàhà ñà-ndüá ní quida Jesús. Vâchi na iin ofrenda xi-nda nùu-yá nduájàn na ndàcùcahan-nda quivì-yá, te naquímáni-ndáyá.

¹⁶ Daaní, màsà nándodó stná-ndà quida-nda obra xi ñañitnaha-nda, te chindee stnaha-nda, vâchi ñà-jaàn ndisa nduú promesa cudíi ini-yá sàhà-xí.

¹⁷ Nsidaa ñà-ndüá cachí nècuàchì idónuu nùu-nsiá, cunini-nsia, te cundoo-nsia sujetu nùu-né; vâchi inùu-né nùu-nsiá sàhà ñà-cunduu ñà-vâha xi anima-nsiá; te icúmí stná-nè nacuàha-ne cuenta nùu Dios sàhà nsidaájàn. Ñâyücàndüá, cunini-nsianè sàhà-ñá cudíi ini-nè quida-ne chuun ma, te màdiá dacúhúun ini-nsiànè; vâchi nú ní cúhúun ini-nè quida-nsia, mà cúí cunduumà iin ñà-vâha xi-nsia.

¹⁸ Cacán tàhvi-nsiá nùu Dios sàhà-nsí, vâchi ináhà-nsí còò ni-iin cuàchì dandoho-xi-nsí, te iin-ni cuní-nsi quida vii-nsí nsidanicuú tiempu.

¹⁹ Ñâyücàndüá, sacúndáhvi nùu-nsiá ñà-nì cacán tàhvi cuàhà-nsiá sàhí sàhà-ñá chicá yâchi cui nasai ndé ndoó-nsiá.

²⁰ Ndiaha gá ndoo-nda ñuhiví quidá Yua-nda Dios, vâchi sàhà-ñá ní xitià nìi Stoho-ndà Jesucristu, ñâyücàndüá ní saquin Yuandiaha-yá iin tratu saa xi nêhiví, te nduámà iin palabra mà nunca nsihí, vâchi mate ní xihí Jesucristu, ní natiacu-yá ní quida Yuamáni-yá, te ní sàà-yá ní sacúnduu-ya Pastor ndiaha xi-nda.

²¹ Te vichí cahnú gá Dios ní sàà-nsiá nihitáhvi-nsiá nsidanicuú ñà-vâha xi-ya sàhà-ñá cui quida-nsia cumplir ñà-ndüá cuní-yá quida-nda; vâchi nú ní nacuàhandee ini-yándó (xi poder ndiaha) xí Jesucristu, dandu vâtùni quida ndisa-nda ñà-ndüá cudíi ini-yá sàhà-xí. ¡Ansivéhé cahnú-yá nicanicuahàn! Amén.

²² Yùhù sacúndáhvi nùu-nsiá, ñàni, màsà cúdúchí ini-nsia sàhà conseju tii sàni tiai nùu-nsiá yohó, vâchi iin ùi-ni palabra nduá.

²³ Cunaha-nsiá, sàni quee ñani-ndà Timoteo vehecàa. Te nú ní quésáa yâchì-nè ndé ié yohó, dandu cutnahá-nsí sàà-nsí ndé ndoó-nsiá.

²⁴ Cásàhù xi nsidaa ana idónuu nùu-nsiá, cachí-nsiá xi-né. Te cásàhù stná xi nsidaa gá nêhiví xí Dios. Daaní, nècuàchì ladu Italia cutnahá-xí yohó, cásàhù stná-nè xi-nsiá.

²⁵ Te nsidaa-nsiá, ni cúcúmí cuáhà-nsiá gracia xi-ya. Sà-ìá.

Tutu Nì Tiaa Santiago nù Nèhivì xí Dios

¹ Yùhù nduí Santiago, iin ana xinúcuáchí nù Yua-nda Dios xì nù Stoho-ndà Jesucristu, (te tiaí tutu yohó) nù nsidaa mii-nsiá nècuàchì nduú descendencia xì nsi-úxin ùi dèhe yohòtèhè-ndà Israel, doco vichi inicutu ñuhivì sàni xitià-nsiá. Yùhù cásàhúì xì nsidaa-nsiá.

² Ñáni, xiñuhu cudii ini-ndà na yáha-nda nsidanuu clase tñundoho.

³ Vàchi iin tñundoho, prueba nduá a ndisa xiníndísá ví-ndayá, á coó. Te cunaha-nsiá, divi sàhà tñundoho ma vátùni cutùha stná-ndà quidandee ini-ndà.

⁴ Ñàyùcàndúá, iin-ni ni quidándéé ini-ndà ducán dècuèndè nihì-ndà vátùni cundee ini-ndà sàhà ndéni iñàha nì cui, dandu cunduu ndisa-nda nèhivì ìi ini-xi nacua cuní-yà cunduu-nda, te mà quidámànì gá ni-iin ñà-vàha nù anima-ndà.

Nansa nihì-ndà cunchichì ndisa-nda quida Dios

⁵ Cunaha-nsiá, nú có-cùndáa ini-ndà nansa quida-nda, dandu ni cacán tàhvi-ndà nù Dios, te ducán cundaà vàha ini-ndà sàhámà, vàchi mii-yá, sàhatahvi-yándó ñà-nduá xiñuhu, mà dihndiá-yà, te mà cánahá-yà xì-ndà.

⁶ Doco ni cúnindísá vàha-nda, te màsà nácánì ini-ndà a jáán, ò á coó, vàchi nú ducán, dandu cundumà na ian quidá tècui mar, yohó te yucán ndiachi-té quidá tàchì.

⁷ Te nú divi ducán quidá stná ndohó, dandu màsà cúníhnú ini-ndà nihitáhvi-ndà ni-iñàha nù Stoho-ndà Señor.

⁸ Vàchi nèhivì mà-íin-ní nihnú inì-xi, mà nunca sàà-nè cutùha-ne quida vii-né nacua ndiá icà-né.

⁹ Ñáni, nú nècuàchì ndahví nduu-nda, dandu xiñuhu cudii ini-ndà, vàchi cunaha-nsiá, nù mii-yá sàni nana ducún-ndà.

¹⁰ Doco nú nèhivì cuicà nduu-nda, te sàà-ndà yàha ndahví-ndà, dandu vátùni cudii stná ini-ndà sàhájàn, vàchi nècuàchì cuicà, mà ùhì ndañuhu yàchì-nè na ian cuú xi ita caná yùcù iá campu.

¹¹ Vàchi nú sàni xinu fuerte orá, te ni cuhigni, dandu íchì yùcù mà, te ndáhvà ita-ñà, mà vícò gá lá-yà. Pues ducán iá stná xì iin nècuàchì cuicà, icúmì-nè ndañuhu yàchì stná-nè mahi chuun xi-ne.

Nansa xiñuhu quida-nda na yáha-nda tñundoho

¹² Nansicáhàn-ndá nú ni quidándéé ini-ndà na yáha-nda tñundoho, vàchi nú ducán, dandu icúmì-ndá ndee vàha-nda nù Dios, te nihì stná-ndà iin ñà-vàha ndiaha xi-nda nù-yá, divi ñà-cutiacu-ndà nicanicuahàn, vàchi ñà-jaàn nduá sàni quida-ya comprometer xì nsidaa nèhivì cuú ini-xi sàhà-yá.

¹³ Doco nú xího iin nèhivì quida-ne iin ñà-có-ndiáá, dandu màsà cácih-nè Dios daxího xi-né. Còó, vàchi Dios, mà cúí xihò-yá quida-ya ñà-có-ndiáá, ni có-daxího stná-yà ni-iin nèhivì quida-ne ducán.

¹⁴ Cunaha-nsiá, cuiisì-ní ini anima mii-nda xího quini-nda ducán, te ñà-jaàn nduá dítà xì-ndà ñà-cùnì-ndà quida quini-nda.

¹⁵ Daaní, nú ducán xího-nda quida-nda, dandu después sàà stná-ndà quida ndisa-nda iin cuàchì ma. Doco ¿indú fin cucumi cuàchì ma? Cuisi ñà-cahni dahuàn-ndó.

¹⁶ Ñàyùcàndúá, (cachí xì-nsiá), ñani màní, màsà nunca cuàha-nda datùcù ni-iin nèhivì-ndó.

¹⁷ (Cunaha-nsiá), nù Yua-nda Dios iá ansivi quixí nsidaa ñà-vàha nù-ndà, vàchi nsidaa ñà-ndiaha nihitáhvi-ndà, divi nù mii-yá quixá. Te chicá datnúu-yà (sàxinífnùnì-ndà) nù nsidaa ñà-tnúu iá ansivi. Doco mii-yá ni-iyuhu có-dàma-ya (nahi orá), vàchi orá, xicá-yá, te iá còndàhvi-yá, doco Dios, còó, mà dàma-ya.

¹⁸ Te ni chitnùnì stná ini-yà ñà-cunini-nda palabra ndàcuisi xí-yá sàhà-ñà ducán sàà-ndà cunduu-nda dèhe ndisa-ya; dandu nù nsidanicuú ñà-nduá ni quidavàha-ya, ndohó cunduu-nda ana chicá cudii ini-yà sàhà-xí na iin primicia ndiaha.

¹⁹ Ñàyùcàndúá, siempre xiñuhu cundoo tùha-nda cunini vàha-nda sàhà iñàha, te màdiá càhàn yàchì-ndà, te menos màsà cuidà yàchì ini-ndà, ñani màní.

²⁰ Vàchi nú ni cuidà ini-ndà sàhà iñàha, mà chindéámàndó quida vii-ndà nacua cuní Yua-nda Dios.

²¹ Ñàyùcàndúá, ni nácóó dahuun-nda nsidaa ñà-lá quini, xì nsidaa stná ñà-có-ndiáá iá guá ñuhivì yohó, te ni màsà ndúcuèhé stná-ndà; còó. Iin-ni ni cúnini-ndá palabra ndiaha xí-yá ni chiñuhu-ya ini anima-nda, vàchi sàhà palabra ìi mà vátùni càcu-nda.

²² Doco màdí cunini uun-nda palabra mà. Xiñuhu ñà-quida ndisa stná-ndañá cumplir, vàchi nú coó, dandu cuiisì-ní ñà-dàndàhvi-ndà mii-nda nduá.

²³ (Uun-ni queá) nú iníní-ndá palabra ì mà, te có-quidà-ndà ñà-ndúá cachá, vâchi ducán queámà na ian indêhe-nda nù-ndà nù ì in yùtátá,

²⁴ te xiní-ndà nansa iá-ndà, doco nú sàni quee-nda cuàhàn-ndà, dandu nándòdó-nda nansa iá nù-ndà.

²⁵ Doco nú iníní víi-nda ñà-ndúá cachí ley ndiaha xí-yá, te có-nândodó-ndañá, iin-ni nchícùn-ndàñá, dandísá, icúmí-ndá nihítàhvi-nda gracia ñà-chindee xi-nda. Te divi ley mà nduá tavá xi-nda libre (nù ì cuàchi-nda).

Nansa xiñuhu quida-nda nú cahvi ndisa-nda mii-yá nacua ndiá icà-nda

²⁶ Dava nèhivi, tuxí iní-nè nchícùn víi-nè religión xi-ne, doco tûha stná-nè canàhá ndevàha-ne. Cunaha-nsiá, uun-ni queámà sàhà religión xi-ne, cuisì dandahví uun-nè mii-nè.

²⁷ Vâchi nú cuní-nda cunucuachi ndisa-nda nù Dios, dandu xiñuhu chindee-nda penchì ndahví, xi nècuàchi cuáán ndahví, te cundíaa-nda mii-nda sàhà-ñá màsà dásivi-nda mii-nda xi chuun siquini iá ñuhívi yohó, dandu ñà-jaàn ndisa cunduu iin religión vâha nù Yua-nda Dios.

2

Màsà cáhichi iní-nda ñanitnaha-nda

¹ Ñáni, màsà cáhichi iní-nda ni-iin nèhivi, vâchi nèhivi xiníndísá-xí Stoho-nda Jesucristu nduu-nda, te ndiaha gá mii-yá.

² Ni cachí-nda ñi sàà iin nèhivi ndixí vico lugar ndé natácá-nda cahvi-nda mii-yá, te ñuhú stná iin anillu oro ñiníndáhá-nè. Daaní, ni cachí-nda ñi sàà stná iin nècuàchi ndahví yucán, te ndahví gá ndixí-nè.

³⁻⁴ Doco nú màdi iin-ni quidáñúhú-nda ndù nècuàchimà, mà vâha. Màsà quidáñúhú-nda (cuisì) nècuàchi ndixí víi, te cachi-nda xi-né: “Yohó coo-ní iin lugar víi”, te nècuàchi ndahví mà, còò, cutu cachí-nda xi-né: “Jaàn cuiin-ní”, te ò: “Yohó coo-ní ñuhù”, vâchi ñà-jaàn nduá sàni cáhichi iní-nda nècuàchimà.

⁵ Cunini vâha-nsia palabra yohó, ñani màní. Mate iyuhu icúmí nècuàchi ndahví ñuhívi yohó, doco ¿amádi mii-nè nduú ana (chicá) sàni nacàxin Dios ñà-nihítàhvi-nè cunindísá-nè mii-yá, te divi fe xi-ne nduú ñà-cuicà-nè? Daaní, después sàà stná-nè cundoo-ne ñuhívi ì xi-yá, vâchi ducán sàni quida-ya comprometer xi nsidaa ana cuú iní-xi sàhà-yá.

⁶ Doco mii-nsiá, (ndahví-nsià), vâchi cáhichi iní-nsia nècuàchi ndahví. ¿Amádi nècuàchi cuicà nduú nècuàchi sahníndahví xi-nsiá, te sanícuàchi stná-nè sàhà-nsiá?

⁷ ¿Amádi divi stná-nè càhàn quini guá dìquì quívi ndiaha-yá, divi quívi ñi ndacùcahan-nda (na hora ñi quíhvi-nda ichi-yá)?

⁸ Pues nú cuní-nda quida víi-nda, dandu xiñuhu quida ndisa-nda cumplir nacua cachí ley ñi ñi sàhà mii-yá ana cusáhnú nù-ndà. Dohó cachí tutu nduú ley mà: “Nacua cuú iní-ní sàhà mii-ní, ducán xiñuhu cuu stná iní-ní sàhà ñanitnaha-ní”, cachá’.

⁹ Doco nú chicá quidáñúhú-nda iin nèhivi nù inga-nè, dandu cuàchi nduá, iá ndisa falta xi-nda, cachí ley mà.

¹⁰ Vâchi cunaha-nsiá, nú ni chívàha víi-nda nsidanicuú ñà-ndúá cachí ley ñi mà, te iá iin xaan ndé cóni quidà-nda cumplir, dandu queámà na ian cóni chívàha-nda ni-iñàha,

¹¹ vâchi imindaa mii-yá ñi sàhà xi nsidaa ley mà. Cunaha-nsiá, iin ley xi-ya nduú ñà-màsà càhàn-nda xí inga ana có-ndúú nècuàchi vehe-nda. Daaní cachí stná-yá ñà-màsà càhni stnaha-nda. Pues mate có-nchícùn-nda inga nècuàchi ñàhà, doco sahní stnaha-nda, dandu iá ndisa cuàchi-nda nù ley mà (mate iá iyuhá sàni chívàha-nda).

¹² Nâyücànduá, ndiá icà-nda càhàn víi-nda, te quida víi stná-nda. Vâchi divi nacua cachí ley ndiaha ñi tavá xi-nda libre, divi sàhàjàn icúmí ndundaà sàhà cuàchi-nda.

¹³ Te nú có-indêhe ndahví-nda ñanitnaha-nda vichi, dandu quívi ndundaà sàhà-nda, mà ñihí-nda cundehè ndahví stná-yá ndohó. Doco nú sàni indehè ndahví stnaha-nda, dandu mà yúhí-nda quívi ndundaà sàhà-nda.

Màsà cachí uun-nda xiníndísá-nda mii-yá

¹⁴ Ñáni, ¿a cundíáá ndisa ñà-càchi-nda cahvi-nda mii-yá te nú có-quidà-nda obra? ¿A ndísá càcu anima-nda nú ducán nduú modo cahvi-nda Dios?

¹⁵ Pues, ni cachí-nda iá iin ñanitnaha-nda xíhí vixin, te còò sicoto vâha xi-ne; te xíhí stná-nè doco, vâchi còò ni-iñàha.

¹⁶ Daaní, ni cachí-nda iá stná iin compañeru-nda ñi cachi xi nècuàchi ndahví mà: “Vàtùni cùhùn-ní; ni sàà-ní nadaà iní-ní, te ni sàà stná-ní chitu tixi-ní”, cachí-nè. Doco nú có-sàha-ne nècuàchimà ni-iin ñà-cutiacu-nè, amádi uun-ni queámà.

¹⁷ Ducán stná xi ñà-cahvi-nda mii-yá nú còò obra xi-nda. Vachi nú ducán, dandu nàhà xicà có-càhvi ndisa-ndayá, vâchi cutu mindaa ñà-jaàn quidà-nda.

¹⁸ Vihini cachí iin nêhivì: “Dava-nda cuisì fe xi-nda iá, te dava-nda, cuisì obra xi-nda iá”, doco còò, vâchi ÷nansa cui cundaà ini-nda cahvi ndisa iin nêhivì mii-yá nú còò obra xi-ne? Doco nú iá stná obra quidá-né, dandu vâtùni cundaà ini-nda ndisa iá stná fe xi-ne.

¹⁹ Ndohó, xiníndísá-ndá ñà-imindaa Dios iá, te ndiaha gá iá ñà-xiníndísá-ndá ducán. Doco cunaha-nsiá, dècuèndè stná ñà-malu, ináhá stná-si imindaa-yá iá, te quidí stná-si ñà-yúhí-siyá.

²⁰ Ndahví-ndá, te neciu-ndá nú tuxí ini-nda cuisì fe xi-nda nduá ndiaá, te còò obra xi-nda.

²¹ Amadí ináhá-nsiá sàhà xii-nda Abraham nansa ni ndee vâha-ne nùù Dios sàhà ñà-nduá ni quida-ne, ñà-ni ña-ne dispuestu cuàhatahvi-né mii-yá (dèhe maní-né) Isaac, (dècuèndè sàni chinduhù-néte) nùù mesa ìi.

²² ¿A xiní-nsiá nansa ni quida nècuàchi yucán? Ni cahvi-né Dios, te ni quida stná-nè cumplir (ñà-nduá ni cachi-yà): ñâyùcànduá, ndúlàjàn ni sacatnahá, te sàhà obra xi-ne mà ni sàà-nè ni cahvi vii ndisa-ne mii-yá.

²³ Dandu ni cuu ndisa ñà-nduá cachí tutu ìi ndé cachí palabra yohó: “Ni xiníndísá Abraham Dios, te ducán ni ndee vâha-ne nùù-yá”. Dècuèndè ni cachi stná Dios amigo xi-ya nduú Abraham mà.

²⁴ Ñâyùcànduá, nàhà xicà, màdi cuísi-ní ñà-cahvi-ndayá nduá cuní-yà sàhà-ñá ndee vâha-nda nùù-yá. Cuní stná-yà quida ndisa-nda cumplir nansa cachí-yà.

²⁵ Inga casu nduú stná nècuàchi sàhaha nani Rahab. Iin nècuàchi ñàhà cónisá ia sahnú inì-xi ni sanduu-ne, doco na ní casaà nècuàchi (ñuu Israel) ñuu-nè, ni quidañuhu-né nècuàchimà, dandu después ni dānùhù-nè nècuàchimà inga ichi. Pues sàhà-ñá ni quida-ne obra mà, ñâyùcànduá ni ndee vâha stná-nè nùù Dios.

²⁶ Vâchi nú cahvi-nda Dios, doco có-quidá ndisa-nda ñà-nduá cachí-yà, dandu (mà chindéé) fe mà-ndó. Na ian sàni xihà nduá, vâchi cóá quidá, na iin cuerpu nsii còò cá anima-xi.

3

Cuidadu ni cundóo-ndá sàhà ñà-nduá cachí-ndá

¹ Chicá vâha màsà cundúu cuàhà-nda nècuàchi chináhá (palabra ìi), ñáni, vâchi cunaha-nsiá, chicá icúmi-yá nandacàn-yà cuenta nùù nsiùhù nècuàchi chináhá.

² Nsidaa-nda, cuàhà falta quida-nda. Te nú mà túha-nda cachi-nda ni-iin ñà-có-ndiáá, dandu iin nêhivì quidá víi ndisa sàndùù-nda, vâchi sàni cutùha-nda cadì-nda nùù nsidaa ñà-chicuehè vihini sàà-nda quida-nda.

³ Cundehe-nda idu, chicáá-nda frenu yuhù-sí sàhà-ñá cunini-sindó, dandu vâtùni cuitàndòò-ndási mate nahnú-si.

⁴ Stná barcu, mate nahnú cuàhà-nú, te ndee caná tàchì dāndiàchì xi-nú, doco cuisì iin yutnù chipalá tii nduá dacaca-xi-nú cùhùn-nda ndéni ni cui cahan-nda.

⁵ Te divi ducán iá stná yuhù-nda. Tiá, doco cuàhà gá chuun nahnú chiñùhà. (Ináhá-ndá), cuisì iin ñuhu tii cui dacucùn xi inicutu iin yucù cahnú, te coco nsidaámà.

⁶ Te nacua quidá ñuhu mà, ducán quidá stná yuhù-nda: cuàhà sàstnùhù chuun quini cáhàn sàhà-xí. Iá nùù cuerpu xi-nda, doco mà ùhì dacúnsidá cuàcha-ndó. Inii vida xi-nda, ducán quidá yuhù-nda, cuàhà gá chuun daquíñùhà, te ¿indù divi níhà' cachí quini guá? Pues divi nùù ñà-malu.

⁷ Nsidanicuù clase quisi, vâtùni ndumansú-si quida nêhivì, a ducán nduú-si quisi yùcù, ò laa, ò quisi cuatì, ò quisi mar, nsidanicuù clase-sí sàni nsidamansú nêhivì-sí.

⁸ Doco yuhù-nda, còò; tãnáha ga cundee ni-iin nêhivì núá. Iin mal nduá; mà cándisá dandacu-nda núá. Na ian quidá iin tàtnà dānà, ducán quidá stná, vâchi chitúa ñà-có-ndiáá.

⁹ Xi yuhù-nda naquímani-nda Yua-nda Dios, te después divi-nia (vihini) canáhá-nda xi ñanitnaha-nda, mate nahi mii-yá iá stná-nè, vâchi nacua iá mii-yá, ducán ni quidayucun stná-yàndó.

¹⁰ Mismo yuhù-nda sàni naquimani-nda mii-yá, te ni canáhá stná-nda (xi ñanitnaha-nda). Pues cunaha-nsiá, mà vâha quida-nda ducán, ñáni.

¹¹ Vâchi iin tè-dòcò, iin-ni ndéà tècuí vâha, te ò iin-ni ndéà tècuí ùhà.

¹² Te ò iin yutnù, ¿a vâtùni cucàa quisi vídi-nu nú díin yutnù nduú-nu? Còò. Ni mà cúí cuàha stná síhigu nùù nducu yòhò sì-uva. Te lugar ndé caná tècuí ùhà, có-càná stná tècuí vâha.

Cuisì nêhivì datnúù Dios sàxinítnùnì-xi nduú nêhivì nchichí ndisa

¹³ ¿A nchichí dava-nsia (cahan-nsiá), te ò sàni dàcuàhà stná dava-nsia? Nú jaan, dandu xiñuhu cunihnu ndahvi stná ini-nsiá, te quida-nsia puru ñà-íá vii, dandísá, sàà cunahà xicà nchichí ndisa-nsia.

¹⁴ Doco nú tûha-nsia cumbidia cuàhà ini-nsià, ò cui sí sàhà mii-nsiá nacání ini-nsià, dandu màsà cáhí gâ-nsià nchichí-nsià, vâchi có-nduá ñà-ndáa; tnùhu nduá.

¹⁵ Vâchi modo xi-nsia mà, có-nduá nahi palabra nchichí vâxi nùu mii-yá iá ansivi. Vâchi nú cutu cáhàn nchichí-ndà, te có-quadá víi-nda, dandu náhà xicà, cui sí ñuhiví yohó vâxi palabra mà; òmí ñèhiví úún nì quea, te divi ñà-malu nì chitnùní ini xán.

¹⁶ Vâchi nú cumbidiá ini ñèhiví, te cuadú-nè, dandu seguru cundoo stná-nè náâ stnahá-né, te quida stná-nè nsidanuu clase chuun có-ndiáa.

¹⁷ Doco nú nchichí ndisa-nda quidá mii-yá iá ansivi, dandu ñà-sàni ndu-ii sàxínitnùní-nda nduá, te tûha-nda cundoo maní-ndà; mà dáná-ndá. Cáhàn víi stná-ndà xì ñèhiví, te cundehe ndahví stnahá stná-ndà, vâchi vâha ini-ndà, iin-ni cáhàn ndàa-ndà nacua iá iin chuun, mà dánání uun-nda.

¹⁸ Cunaha-nsiá, nú cuní-ndà cunduu-nda ñèhiví quidá víi ndisa, dandu viví-ni ni cáhàn-ndà xì ñanitnaha-nda sàhà-ñá cundoo maní nsidaa-nda, vâchi ducán queamà na ian chihí-ndà iin tata vâha, dandu después ndanchito iin cosecha ndiaha.

4

Màsà cándisá-nda cunchicùn-nda modo xi ñuhiví yohó

¹ Dava-nsia indéhe úhi stnahá-nsiá, te náâ stnahá stná-nsià. Pues, ¿ndiá disáhà-xí iá ducán, tuxí ini-nsiá? Amadí sàhà ñà-xího guá-nsià iñàha, te dacá mà sàxínitnùní-nsià.

² Xího-nsià iñàha, te nú mà cùí ñihí-nsiáñà, dandu (cuní-nsià) ndañuhu ñèhiví (icúmi xán). Te nú cumbidiá stnahá ini-nsià sàhà iñàha, te mà cùí ñihí stná-nsiáñà, dandu náâ stnahá-nsiá, te cáhàn ndiaa stnahá stná-nsià. Doco ¿indú chuun có-icúmi-nsiá ñà-nduá xího-nsiá? Divi sàhà-ñá có-xicàn tàhvi-nsiáñà nùu mii-yá.

³ Te mate ni cácan tàhvi-nsiá nùu-yá, doco mà ñihí-nsiáñà, vâchi mal xicàn-nsià, cutu cuní-nsià iñàha sàhà-ñá quida ndevàha-nsia nacua cudí ini mii-nsiá.

⁴ ¿ndahví-nsià! ¿Indú chuun nchicùn-nsià ñà-có-ndiá icà-nsiá? ¿A có-ínahá-nsià ñà-mà vâha candisá-nda cunchicùn-nda modo xi ñuhiví yohó, vâchi ducán queá na ian có-ndóó vâha ga-ndà xi Dios?

⁵ Te ducán cachí stná tutu ì: “Sàni ñhitàhvi-nda nùu Dios ñà-coo Espíritu ìi xí-yá ini anima-nda, te màni cuáhà-nda nùu Yà-ì mà; ñàyücànduá, có-cùní dahuun-ya cunihnu ini-nda inga iñàha cunchicùn-nda”. Te cunaha-nsiá, màdi úún-ní cachí tutu ì mà ducán, (ñà-ndáa nduá).

⁶ Doco Dios, chicá cuàhà gracia sáhatahvi-yándò. Ñàyücànduá, dohó cachí stná tutu ì: “Dios, sadí-yà nùu nsidaa ñèhiví nducuehé, doco ñèhiví nihnú ndáhvi ini-xi, sáhatahvi-yánè gracia xi-ya”.

⁷ Ñàyücànduá, ni cúnini-nda nsidaa ñà-nduá dandacú-yá, doco ñà-nduá cuní ñà-malu, cóo; iin-ni màsà cuàha-nda cundee-sí nùu-nda, vâchi nú màsà cuàha-nda quida-si ducán, dandu icúmi-sí cunu-si nùu-nda.

⁸ Xiñuhu tnàtuu-nda nùu Dios, dandu mii-yá, chicá cuyatni stná-yà nùu ndohó. Te nú iá cuàchi-nda, dandu xiñuhu nsidandoo-nda anima-nda na ian ndàhà-nda. Te nú ùi ichí nduá nchicùn-nda, dandu xiñuhu ndoo stná anima-nda.

⁹ (Vâchi nú iá falta xi-nda, dandu chicá vâha) ni dándóhó-nda mii-nda, te cundoo-nda tnùnsí ini, te cuacu cuahà-nda (sàhà cuàchi-nda). Xiñuhu cuhuun ini-nda sàhàjàn; màsà cudí gá ini-nda, ni màsà cuacú gâ-ndà; cóo. Xiñuhu cundoo-nda tnùnsí ini,

¹⁰ te cuacan nùu-nda nùu Stoho-nda Señor. Cuisi nú ducán, dandu ñihí-nda nduvii tú anima-nda quida-ya.

Màsà cuítñuhu stnaha-nda

¹¹ Ñàni, màsà cáhàn-nda diqui ñanitnaha-nda, vâchi nú ni quida-nda ducán, te xítñuhu tnaha-nda, dandu ñà-sàni cáhàn-nda diqui stná ley xi mii-yá nduá, te ducán queámà na ian xítñuhu stná-nda ley mà. Te nú xítñuhu-nda ley mà, dandu có-nduú gâ-ndà ana chívàha xán; cóo, ana xítñuhu xán nduu-nda.

¹² Cunaha-nsiá, mindaa mii-yá nduu ana ni sàha xi ley ì, te imindaa-yá nduú stná ana icúmi nsidandaá xì sàhà falta xi iin iin-nda. Còò ni-iin ana cachi a cácu-nda, á cóo, cui sí mii-yá. Ñàyücànduá, ¿ana tuxí ini-nda nduu-nda te xítñuhu stnaha-nda ducán?

Có-ínahá-nda nansa cuàhàn cuu xi-nda tnaa idá

¹³ Cunini vâha mii-nsiá nècuàchì cáhàn ndee guá. Vâchi cachí dava-nsia vichi ò tnaa cùhùn-nsià inga ñuu cundoo-nsia yucán iin cuià, te cuiin-nsia, te nadicò-nsiá, nsidacuahà-nsiá òhùn xí-nsiá cahan-nsiá.

¹⁴ Doco ni có-ínahá-nsiá nansa cuu xi-nsiá tnaa idá. Vâchi vida xi-nda, (yàchì nsiha) nahi vícònùhù. Iin ratu tii iá, dandu cóò cá’.

¹⁵ Ñàyücàndüá, ndiá icà-ndà cachi-ndà: “Pues, nú ducán cuní Stoho-ndà Señor, dandísá cutiacu-ndà, te ò nú cudfí ini-yá, dandu dohó te dohó quida-nda”.

¹⁶ Doco mii-nsiá, ¿nansa quidá-nsiá vichi? Ndee gá cáhàn-nsiá. Mii-nsiá nduú-nsiá mii-nsiá cahan-nsiá. Doco mà váha cáhàn-ndà ducán.

¹⁷ Ñàyücàndüá, (nsinuu ini-nsia palabra yohó): nú ináhà-ndà nansa ndiá icà-ndà quida-nda, te có-quidà-ndañá, dandu cuàchi nduá.

5

Ñà-ndüá nì cachi Santiago xì nècuàchì cuicà malu

¹ Cunini váha nsidaa mii-nsiá nècuàchì cuicà. Chicá váha cuacu-nsia, te cundoo-nsia tnùnsí ini, vâchi sà-itúú tnùndoho nahnú dñiqui-nsiá.

² Vâchi nsidaa ñà-cuicà-nsiá, sàni cuchicueha; nsidaa sìcoto vico xí-nsiá, sàni cusiquidiá.

³ Nsidaa oro xì plata xi-nsia, dihùn chicúehè sàni nandua; sàni nana ditnu-ña. Te divi ñà-jaàn cunduu testigu ñà-cundaà ini nèhivi (cóni quidá víi-nsiá), te ducán icúmí quea na ian sàni saxi stná ditnu dihùn mà icà-nsiá, na ian nì xìxìn cuñu-nsiá nì quidamà (ñà-cuàhà guá tnùndoho cucumi-nsiá), vâchi yáha ga sàni càyà ñà-ndüá icúmí-nsiá ñihì-nsiá quivi xìnu tiempu.

⁴ Te peón ndahví nì ndanihi xi cosecha xi-nsia, nì dândahví uun-nsianè, vâchi cóni sáha-nsianè raya xi-ne nacua ndiá icà-nsiá, ñàyücàndüá, raya xi-ne mà, na ian ndáhi stná-ña, te tiacú stná Stoho-ndà Señor, iníni-yá quidá peón mà reclamu nùu-yá. Te cunaha-nsiá, cuàhà gá mil soldadu dandacú-yá nùu-xí.

⁵ Vico gá sàni sandoo-nsia ñuhiví yohó; cuiisí gustu xi mii-nsiá sàni quida-nsia. Doco nahi quisi sàni nei, te nì ndundatnù-sí, ducán nduú stná-nsiá; te vichi sàni sàa meru quivi cui-nsiá.

⁶ Vâchi tûha stná-nsiá canicuàchi-nsia sàhà nèhivi ndàcuisi ini-xi, te sàhà yuhù-nsiá xíhi-nè; mientras mii-nè, có-nàndúcú-nè nansa chindee-nè mii-nè.

Màsà cùhuún ini-ndà, vâchi sà-itúú naxicocuñ Jesús

⁷ Ñàni, iin-ni nì quidándéé ini-ndà dècuèndè sàa quivi naxicocuñ Stoho-ndà Señor. Quida-nda na quidá iin nèhivi campu, ndiatú-nè ndè cuun dàvi nùu, (dandu xitú-nè); daaní ndiatú cuéyàà-nè dècuèndè cuun dàvi dânsihì sàhà-ñá ducán cuida ndiaha viu xi-ne.

⁸ Te divi ducán stná ndohó, xiñuhu cundiatu cuéyàà-ndà dècuèndè naxicocuñ Stoho-ndà Señor. Ñàyücàndüá, vichi xiñuhu nacuañandee ini-ndà, vâchi sà-itúú-yá ndixi-ya.

⁹ Te màsà cáhàn cuàchi-nda sàhà compañeru-ndà, ñàni, vâchi nú ducán, dandu icúmí-yá danáni-yàndó, te cunaha-nsiá, sàni cuyatni ndisa quivi nsidandaà-yá sàhà-ndà.

¹⁰ Xiñuhu nsinuu stná ini-nsia nansa nì cuu xi nècuàchì sàhana nì sachàn cuenta xi Stoho-ndà Señor, cuàhà gá nì dândohó nèhivi-nè, doco iin-ni nì quidandee ini-nè. Ñàyücàndüá, nacua nì quida nècuàchimà, ducan nì quida stná ndohó vichi, ñàni,

¹¹ vâchi ndiaha gá nì quida-ne nì quidandee gá ini-nè. Te ináhà stná-ndà nansa nì cuu xi nècuàchì sàhana nani Job, iin-ni nì quidandee stná ini-nè, dandu después nì quee víi (ñà-ndüá nì cuu xi-nè), vâchi nì chindee Stoho-ndà Señor-nè. Ñàyücàndüá, nàhà claru tûha ndisa Dios cuhi ini-yàndó te cundehè ndahví stná-yàndó.

¹² Màsà nunca chinaha-nda Dios, ñàni. Chuun cahnú nduá màsà quidá-ndà ducán. Ni màsà ndácùcahan stná-nda ansivi, ò ñuhiví. Còó. Ni-iin xichi màsà chínahà-ndà ducán. Coó; vâchi nú nì cachi-ndà “Jaán”, dandu divi nì cundüá, te ò nú nì cachi-ndà “Còó”, divi ñà-jaàn nì cundúú stná. Ducan nì quida-nda sàhà màsà ñihì-ndà castigu nùu-yá.

¹³ Nú iá tnùndoho yáha-nda, dandu xiñuhu càcàn tàhvi-ndà nùu-yá. Te nú cudfí ini-ndà, dandu coto-nda alabanza xi-ya.

¹⁴ Te nú cuhí-ndà, dandu cana-nda nècuàchì sahnú ndiaá xi nèhivi xí Dios quixi-ne caquin-nè seña aceite ñini-ndà, te càcàn tàhvi-nè nùu-yá sàhà-ndà, ndacùcahan-nè quivi Stoho-ndà Señor.

¹⁵ Te nú xiníndísá-ndà na xicàn tàhvi-nè, dandu càcu-nda nùu cuèhè mà, vâchi icúmí-ndà nduvàha-nda quida-ya. Te nú iá stná cuàchi nì quida-nda, dandu cuicahnú stná ini-yá sàhà-ndà.

¹⁶ Ñàyücàndüá, nì nàhmà-ndà falta xi-nda nùu ñanitnaha-nda, te càcàn tàhvi stnàhà-ndà sàhà-ndà sàhà-ñá nduvàha-nda quida-ya. Vâchi iin nèhivi váha, cuàhà gá ndiaá na xicàn tàhvi-nè nùu Dios; cuàhà gá chindéa.

¹⁷ Iin casu nduú Elías sàhana. Iin nèhivi ñuhiví nahi ndohó nì sanduu stná-nè, te nì xicàn tàhvi-nè nùu Dios ñà-màsà cúun dàvi. Te ndisa, nì yàha ùni cuà dàva, te cóni cúun ni-iin dàvi.

¹⁸ Daaní, tucu tu nì xicàn tàhvi-nè nùu-yá, te nì ndesaha tú dàvi, vátùni nì cana tu itu.

¹⁹ Nú íá iin compañeru-ndà nì tucù iin ichì có-ndùú ñà-ndáà, dandu ni cáhàn-ndà xì-né áma naxicocufín-nè ichì váha, ñánì.

²⁰ Váchì cunaha-nsiá, nú ni cáhàn-ndà xì iin nècuàchì nì tucù ichì cuáchi, te nìhì-ndà natnahnù-nè ichì váha, dandu ndiaha gá queamà, váchì sàhà ndohó sàni càcu anima-nè, mà sáà gá anima-nè cuià; mate cuáhà gá cuáchi-ne nì ìa, doco sàhà palabra xi-nda sàni ndutu nsidaámà.

Tutu Nuu Nì Tiaa San Pedro nù Nèhivì xí Dios

¹ Yùhù nduí Pedro, iin ana nì nìhì chuun ndiaha nù Jesucristu, (te tiaí tutu yohó) nù mii-nsiá nècuàchì sàni xitìà nihni inicutu ndé`ladu Ponto, ladu Galacia, ladu Capadocia, xi stná ladu Asia, xi ladu Bitinia.

² Mii-nsiá nduú stná-nsiá nèhivì nì nacàxin Yua-nda Dios, vàchi dècuèndè sàhana nì chitnùnì ini-yà ducan. Te sàhà-ñà sàni nduhù stná anima-nsiá nì quida Espíritu Ìì xí-yá, ñàyùcàndùá sà-iníni ví-nsiáyà vichi, te nì cuxio stná cuàchi-nsiá nì quida nì Jesucristu. Pues vichi nì cúcúmi cuàhà-nsiá gracia xi-ya, te contentu nì cúndóó stná nsidaa-nsiá.

Iin tnùndé ini ndiaha icúmi-ndá nù Dios

³ Ansivéhé cahnú Yua-nda Dios, divi mii-yá ana cahvi stná Stoho-ndá Jesucristu, vàchi Yuamáni-yámà nduú-yá. Pues vichi sàni indehè ndàhví-yàndó ñà-nì xihì Jesucristu (sàhà-ndá), te nì natiacu-yá; ñàyùcàndùá, vátùnì nì nacacu saa-nda ñuhivì Ìì xí-yá, te vichi iá ndisa tnùndé ini xi-nda na ndoo-va-nda ñuhivì yohó.

⁴ Te ndiaha gá icúmi stná-nda nihitáhvi-nda nù-yá. Vàchi ndè gloria iá vaha nsidaa ñà-ndiaha Ìì xi-ndàmà, te mà nunca sàà cusiquidiá, nì mà nunca sivi stná, dècuèndè nicanicuahàn icumíá cunahá.

⁵ Te sàhà-ñà nihnú vaha ini-ndáyá, te ndiaá-yàndó xi poder xi-ya, ñàyùcàndùá vátùnì nihì-nda salvación xi-nda; te vichi sà-ì listu salvación mà, doco ndè sàà xinu tiempu, dandu cundaà vaha ini-nda (ñà-ndiaha guá) iámà.

⁶ Ñàyùcàndùá, cuàhà gá cudí ini-nda vichi, mate vihini sàyáha-nda cuàhà clase tnùndoho sacu tiempu.

⁷ Vàchi ducán quidá-yá sàhà-ñà cunahá claru, a xiníndísá ndisa-ndáyá, á coó, nacua quidá nèhivì xí oro, dadáà tífi-néà nù ñuhu sàhà-ñà cundaà ini-nè (a oro vaha nduá, á coó). Doco nú nihnú vaha ini-nda Jesucristu, dandu chicá ndiaámà nù oro, vàchi oro, mà ùhì ndañuhá, doco nú iin-nì nihnú vaha ini-nda mii-yá mate yáha-nda tnùndoho, dandu sàhà ñà-yúcán sàà-nda ndee vaha-nda nù-yá na quívi naxicocuíñ-yá, te nihì stná-nda cuàhà tnùñuhu ndiaha.

⁸ Mii-nsiá, tàñáha ga cuninù-nsiáyà, doco cuú inì-nsia sàhà-yá; te mate có-xinì-ndáyá vichi, doco xiníndísá-ndáyá, te cudí gá ini-nda ñà-ndiaha guá (quidá-yá), te nì có-sàà-nda cachì nsihì-nda ñà-cuàhà guá cudí ini-nda.

⁹ Daaní, icúmi stná-nda nihì-nda càcu anima-nda, vàchi divi sàhájàn nduá nì xinindisa-ndáyá.

¹⁰ Sàhana nisa cahàn nècuàchì profeta ñà-nduú razón xi-ya, nì cachitnùhu-ne nansa cuàhàn cuu xi ndohó tiempu vichì, te nihì-nda cuàhà gracia. Doco cuàhà gá nì nacani inì nècuàchì sahnù-ma, vàchi cóni cúndáà ini-nè nansa iá salvación icúmi-nda nihì-nda tiempu vichì,

¹¹ Te nì cuni stná-nè cundaà ini-nè indù tiempu divi cuu nsidaájàn. Vàchi inácaa Espíritu Ìì xí Cristu inì anima-nè, te nì cachitnùhu-ya xi-nè ñà-icúmi Cristu ndoho-ya, dandu después nauqihìn-ya tnùñuhu ndiaha xí-yá.

¹² Doco después na ní dàtnúù gá Espíritu Ìì sàxinítnùnì-nè, dandu nì sàà-nè nì cundaà ndisa ini-nè ñà-màdi sàhà (tiempu xi) mii-nè càhàn razón mà. Còó. Divi sàhà ndohó nì càhàn mà, te mii-nè, cuisì-nì nì cachitnùhu uun-ne. Te vichi ndè ansivì sàni nuu Espíritu Ìì xí-yá, te chindéé-yá nèhivì (xí-yá) ñà-cachitnùhu stná-nè razón ndiaha ma; teayùcàndùá, vichì mii stná-nsiá sàni xinitnùhu-nsia palabra mà. Te cunaha-nsiá, dècuèndè stná ángel xi Dios, cuní stná-nè chicá cundaà ini-nè sàhà razón mà (ñà-ndiaha guá).

Nì cúníhnú Ìì ini-nda na xicánúú-nda ñuhivì yohó

¹³ Ñàyùcàndùá, nì nácuàhandee ini-nda sàxinítnùnì-nda, te nacani sahnú ini-nda; iin-nì nì cúníhnú vaha ini-nda ñà-nihitáhvi-nda cuàhà gá gracia na quívi naxicocuíñ Jesucristu, te cuninù-ndáyá.

¹⁴ Iin-nì nì quidá víi-nda na ian quidá iin dèhe-nda tùha cunini víi xi-nda. Te màsà nácóó-nda mii-nda xího ndevàha-nda na ian nisa quida-nda antes na tàñáha ga cundaà vaha ini-nda. Còó.

¹⁵ Nacua Ìì mii-yá ana nì cana xi-nda, ducaní quida stná-nda, nì cúníhnú Ìì stná ini-nda sàhà nsidaa chuun quida-nda.

¹⁶ Vàchi ducán cachì Dios nù tutu xi-ya: “Ìì gá yùhù, ñàyùcàndùá, stná mii-nsiá nì cúndúú stná-nsiá nèhivì Ìì”.

¹⁷ (Cunaha-nsiá), iin-ni ndeníhí Yua-nda Dios nsidanicuú nêhivì; te nacua quidá iin iin-nda, ducán icúmi-yá nacuaaha-yándó. Ñâyücándüá, nsidaa ndohó nêcuàchi ndácùcahan xi quìvi-yá, cuàhà gá xiñuhu yùhi-ndà, còtó mà cudü ini-yá sàhà ñà-ndüá quida-nda ñuhivì yohó.

¹⁸ Vâchi ináhà-ndà, sàni dãnàá-yá sàhà cuàchi-nda, te ducán sàni càcu-nda nùu estilu ni nacoo xiì-ndà, vâchi mànicü chindeámándó. Doco màdi oro ò plata ni dãnàá sàhà cuàchi-nda, vâchi cuisì iñaha ñuhivì yohó-ní nduámà.

¹⁹ Còó, cuisì nì ndiaha Cristu ni dãnàá xi sàhà-ndà; na iin lelü còò ni-iñaha iá ni dòcò nùu Dios, ducán ni sanduu-ya.

²⁰ Vâchi dècuèndè na táyoo ñuhivì sàni chitnùni ini Yua-nda Dios ñà-cuu xi Jesús ducán, doco cuisì dècuèndè tiempu vichi na xínu tiempu, dandu ni cuu ndisa xi-yá ducán sàhà-ñà (càcu-nda).

²¹ Te divi sàhà Jesús sàni nìhi-ndà ni xinindisa-nda Yuamámì-yá. Te sàhà stná poder xi Yuandiaha-yá ni natiacu-yá, dandu ni naquihin-ya tnùñuhu ndiaha xi-yá. Pues divi sàhà ñà-jaàn ni nìhi-ndà cunihnu vâha ini-ndà Yua-nda Dios, te ni sàcòo stná iin tnùndè ini ndiatu-nda nùu-yá.

²² Vâchi sàni chindee Espiritu Ì xi-yá, te xiníndísá-ndà palabra ndàcuisì xi-yá. Ñâyücándüá, sàni ndoo stná cuàchi anima-ndà, vâtùni cuu stnahá ndisa ini-ndà sàhà-ndà vichi, ñàni. Sàhámà fuerte ndisa xiñuhu cuu stnahá ini-ndà sàhà-ndà, te màsà dátiaá úun-ndà quida-nda ducán.

²³ Vâchi sàni nacacu saa-nda ñuhivì Ì xi-yá. Doco màdi nêhivì ñuhivì ni quidà-xi-ndà ducán, còó, divi palabra Ì xi Dios ni quida xi-nda ducán. Vâchi nsidaa nêhivì, xihì-nè. Doco palabra mà, nicanicuahàn cunaha-ñà nùu-ndà na ian itiácüa nicanicuahàn.

²⁴ Vâchi nsidaa nêhivì ñuhivì, (yâchi nsihi-ne) nahi yücù pastu, te nsidaa ñà-vico xi-né, (yâchi nsihi stná) nahi ita yucù; vâchi íchi yücù, te ndáhvà stná ita-ñà.

²⁵ Doco palabra sàni cachi Stoho-ndà Señor, còó, nicanicuahàn icúmiá coa. Te divi palabra mà nduú razón ndiaha sàni cachitnùhu nêhivì xi-nsiá.

2

¹ Ñâyücándüá, xiñuhu nacoo dahuun-nda nsidaa ñà-có-ndiaá. Màsà dándáhvì stnahá gá-ndà, ni màsà dãnání uun-nda nduu-nda nêhivì vâha. Te màsà cúmbidia stnahá stná ini-ndà, ni màsà càhàn quini ga-ndà ñiquì ñanìtnaha-nda.

² Na quidá mèé tíquìn, yáha ga cudü ini-vè tëndodo, ducán xiñuhu quida stná-ndà; xiñuhu cudü cuàhà ini-ndà sàhà palabra Ì xi-yá, vâchi vâha ndisa; dandu nìhi-ndà ndufuerté fe xi-nda.

³ Te nú ndisa sàni cundaà vâha ini-ndà màni gá ini Stoho-ndà Señor, dandu (vâtùni nihitáhvi-ndà ducán).

Nahi cimientu fuerte nduú Jesús

⁴⁻⁵ Vâchi xiñuhu tnàtuu-nda nùu-yá, te quida-nda cuenta na ian nduu-nda yùu (cuàha vehe), te mii-yá nduú-yá nahi cavà xi cimientu, (doco màdi cimientu ndisa, vâchi) itiácü-yá. Te mate ní cahìchi ini nêhivì-yá, doco ni cachi Dios ñà-ndüú-yá ana chicá ndiaá. Ñâyücándüá, ni cuàha-nda cuichuún-yándó na ian quidáyücün-yá iin vehe ndiaha-yá.

Daaní, nahi dùtù Ì xi-yá nduú stná-ndà; vâtùni cuàha-ndayá promesa xi-ya, divi ñà-vâha ñuhú ini anima-ndà, vâchi sàhà (obra ni quida) Jesucristu icúmi Dios cudü ini-yá sàhà promesa mà.

⁶ Vâchi ducán cachi (Dios) nùu tutu Ì:

Cunaha-nsiá, icúmi techuín iin ana sàà Ñuu Sión; cunduu-ya ana chicá ndiaá; te yáha ga cuàhà tnùñuhu cucumi-yá; cuàhà gá cundiaa-yá. Te chuun quida-ya cunduu nahi chuun xi cavà cahnú nduú cimientu xi vehe. Te mà nunca naxicocufin ini nêhivì ñà-ni xinindísá-né mii-yá.

⁷ Ñâyücándüá, nùu nsidaa ndohó nêcuàchi xiníndísá, ndiaá ndisa-ya, doco nùu nêcuàchi có-xiníndísá, còó. Doco seguru icúmi cuu (nahi ejemplu nacání sàhà) cavà ni cahìchi ini albañil, vâchi ni sàà cavà mà ni nandua yùu vico indúhu esquina vehe. (Pues ducán ni cuu stná xi mii-yá.)

⁸ Te vâchi nduú stná-yà na iin yùu cahnú caquihì sàhà nêhivì (cahìchi ini xi-yá), te na ian nduá-nè, vâchi cudúchi ini-nè sàhà-yá. Ñâyücándüá icúmi-nè nìhi-né (tnùndoho) ni chitnùni ini Dios cuu xi-né, na ian caquihì sàhà-né, te nâcasàn-né, vâchi có-cùni-nè cunini-ne.

⁹ Doco ndohó, còó, vâchi sàni nacàxin-yándó, te vâchi nduu-nda dèhe (ndisa-ya). Te nahi dùtù xinduu stná-ndà, te xinúcuàchí-ndà nùu rey xi-nda, divi mii-yá. Nêhivì Ì xi-yá nduu-nda vâchi. Còò cá ana nduú Stoho-ndà, cuisì mii-yá. Pues sàhà nsidaájàn vâtùni

dacutiã-ndà palabra sàhà ñà-ndiaha guá-yà, vâchi sàni tavà-yândó nùu ichi ñáa, te ni cana-yândó cunchicùn-ndà ichi ndé datnúu ndiaha-yá ini-ndà.

¹⁰ Te mii-nsiá, mate còò trññuhu ndiaha xí raza-nsiá antes, doco vichi sàni sàà stná-nsiá cunduu-nsiá nèhivi xí-yá. Te mate còò stná ni-iin ana ni ñdèhe ndahví xì-nsiá antes, doco vichi (ndiaha gá) sàni indehè ndàhví-yànsiá.

Iin-ni ni cunchicùn-ndà Jesús mate xítnñuhu nèhivi-ndó

¹¹ Cuàhà gá cuú ñi sàhà-nsiá, te sàhàjàn cachí xì-nsiá ñà-màdi ñuhivi yohó nduu ñuu-ndà vichi. Ñàyùcàndüá sacúndáhvĩ nùu-nsiá ñà-màsà xího gá-nsiá ñà-ndúú gustu quini iá ñuhivi yohó, vâchi sadiámà nùu ñà-vàha xi anima-ndà.

¹² Ndoó-nsiá mahi nèhivi có-ináhá xí Dios, te ñàyùcàndüá xiñuhu quida vii-nsiá. Ñà-ndáà nduá, xítnñuhu-ne mii-nsiá vichi; quini quidá-nsiá, cachí-nè, doco nú sàni xini-nè obra vâha quidá-nsiá, dandu quivi quixi (Dios ndàcàn-yà cuenta sàhà cuàchi nèhivi), dandu icúmí-nè sàà-nè ndanihi vâha-neyá.

¹³⁻¹⁴ Sàhà ñà-ni cudí ini Stoho-ndà Señor sàhà-ndà, ñàyùcàndüá icúmí-ndà cunini-nda nsidaa nècuàchi nihí chuun vehechuún, a ducán nduú-né ana chicá cusáhnù, te ò nduú-né nècuàchi cucuáchi, vâchi nècuàchimà, quidáchuún-né cuenta xi nècuàchi chicá cusáhnúmá, te dandohó-né nsidaa ana có-quidá víi. Doco nú quidá víi-nda, dandu cudí ini-nè sàhà-ndà.

¹⁵ Te divi ducán cuní stná Dios, cuní-yà quida vii-ndà, dandu mate xítnñuhu nècuàchi có-cúndáà inì-xi ndohó, doco icúmí-nè sàà-nè (nducahan-ne), mà cáchi gá-nè ni-ñàha.

¹⁶ Libre iá-ndà, (ñà-ndáà nduá), ñàyùcàndüá xiñuhu quida vii-ndà nacua ndiá icà quida nècuàchi libre. Doco mà vâha cachi-ndà vâtùni quida ndevâha-nda sàhà-ñá iá-ndà libre. Còó, vâchi iá stná iin Stoho-ndà dandacu-xi nùu-ndà, divi Dios.

¹⁷ Te xiññuhu cahvi vâha-ndayá, te quidaññuhu stná-ndà nsidanicuú nèhivi. Ni cúcúú stná ini-ndà sàhà nsidaa ana nduú stná dèhe ndisa-ya. Te nècuàchi dandacu-xi nùu-ndà, ni cóó stná trññuhu xi-nda nùu-né.

¹⁸ Mii-nsiá nècuàchi peón xíndoo saín nùu iin lamú, cunini vii-nsiá ñà-nduá dandacú nècuàchimà, mate dana-ne. Màdiá cuisì cahvi-nsiánè nú màni ini-nè.

Nú icúmí-ndà ndoho-nda, dandu xiññuhu nsinuu ini-ndà nansa ni ndoho Jesucristu sàhà-ndà

¹⁹ Vihini icúmí-ndà ndoho-nda sàhà-ñá nchicùn-ndà ñà-nduá cachí Dios, mate còò ni-ñàha inihíca-ndà. Doco vâtùni iámà, te xiññuhu quidandee ini-ndà sàhà.

²⁰ Vâchi nú cuisì sàhà cuàchi-nda ndoho-nda, dandu mà nihí-ndà ni-iin ñà-vâha nú quidándéé ini-ndà sàhámà. Doco nú sàhà-ñá quidá víi-nda ni ndoho-nda, te quidá ndéé ini-ndà, dandísá, gracia xi Dios (icúmí-ndà nihí-ndà).

²¹ Pues, divi ñà-jaàn nduú vida icúmí-ndà yâha-nda nú sàni cana-yândó, vâchi mii-yá, ni ndoho stná-yá, doco sàhà ndohó; te ducán vâtùni ni cundaà ini-ndà nansa xiññuhu quidandee stná ini-ndà nacua ni quida mii-yá.

²² (Te ¿nansa ni quida-ya?) Pues còò ni-iin cuàchi ni quidá-yá, ni còò ni-iin xichi ni dandahví-yà nèhivi.

²³ Mate ní canáhà nèhivi xì-yá, doco mii-yá, cóni cánáhà-yà xì-né. Na ní ndoho-ya, cóni cãhàn dana-ya. Còò, nùu ndahà Dios ni nacoo-ya chuun xi-ya, vâchi (ináhà-yà) tùha Dios nsidandaà-yà ñà-ndúú ñà-ndácuisi.

²⁴ Te (na ní sàcütuu-ya) nchica cruz, ni nacuida-ya cuàchi-nda nùu iquícúññu-yà. Ñàyùcàndüá, vâtùni nihí-ndà (nacoo dahuun-nda cuàchi-nda), quida-nda cuenta na ian sàni xihí-ndà, (te có-ndúlócó gá-ndà sàhà). Dandu sàhà obra xi-ya mà, vâtùni nihí stná-ndà quida vii-ndà ñuhivi yohó. Vâchi na ní sahnì cuíi-teyá, dandu sàhàjàn nduá ni nihí-ndà ni nduvii anima-ndà.

²⁵ Vâchi antes, nahi riì ni quecuaán ni sanduu-nda, doco vichi sàni naxicocuñ-ndà ni nàcúndoo-nda nùu Stoho-ndà inúú xi anima-ndà.

3

Nansa ndiá icà-ndà quida-nda xi nècuàchi vehe-nda

¹⁻² Mii-nsiá nècuàchi ñàhà sàni nandàhà, icúmí-nsiá cahvi-nsiá ñi-nsiá; dandu mate có-cãhàn-né cunindisá-né palabra xi-ya, doco ñà-ñdèhe-né quidá víi-nsiá, vâtùni sàà stná-nè cunindisá-né mate có-cãhàn-nsiá xì-né sàhámà. Ñàyùcàndüá, xiññuhu quida sahnú-nsiá, te cahvi tnahá stná-nsiá.

³ Te nú cuní-nsiá cundáa vico-nsiá, màsà cúcãhàn-nsiá a cúisi xiññuhu ñà-natnii vico ñni-nsiá, te ò nduvico-nsiá xì oro, o sìcoto finu.

⁴ (Còo, vâchi ñà-cundâa vico ndisa-nsia nduá yohó); divi ñà-cunihnu maní ini-nsiá, xí ñà-coo calma-nsiá. Ñà-jaàn ndisa icúmí cunaha nicanicuahàn, vâchi ini anima-ni-nda íá dèhá. Te nú Dios cuahá gá ndiaá ñà-cunihnu ini-nda ducán.

⁵ Te divi ducán nisa quida stná nècuàchi ñahà ñi nisa xinindisa-xi Dios tiempu sàhana, vâchi divi ini anima-nè ni sansida vico-nè mii-nè. Nisa cahví-nè ñi-nè.

⁶ Vâchi ducán nisa quida stná (ñahàdihí) Abraham nani Sara, ni inini-ne ñi-nè, te dècuèndè “Señor xí” nisa cachi stná-nè xi nècuàchimà. Te nú quidá víi-nsiá, te có-yúhi stná-nsiá ni-ñi nèhivi, dandu vâtùni ndudava stná-nsiá xi-nè.

⁷ Daaní, mii-nsiá nècuàchi tiàa íá ñahàdihí-xi, xiñuhu cundoo maní-nsiá xi nècuàchimà nacua quidá ñi nèhivi cundâa vâha ini-xi. Ináhá-nsiá, mà fuerte guá-nè, ñâyùcandúá xiñuhu cuhi ini-nsiánè, vâchi ñi-ñi sàni nihitáhvi ndú-nsiá vida ndiaha xí Dios. Te nú ducan ni quidá-nsiá, dandu mà cóo ni-ñàha cadi xi núu palabra xi-nsia na hora xicàn tàhvi-nsiá núu-yá.

Nansa xiñuhu cunihnu ini-nda nú ni sàa-nda ndoho-nda sàhà ñi chuun víi ni quida-nda

⁸ Cuisì inga palabra yohó cachi guè: ñi-ñi sàxínitnùnì ni cúcúmí nsidaa-nsiá. Te cundehè ndáhvi stnahá stná-nsiá. Te cucuu stnahá stná ini-nsiá sàhà-nsiá, vâchi ñi-ñi ñani xinduu-nda. Nsidaa-nda, ñi-ñi ni cuhi stnahá ini-nda sàhà-nda, te cunihnu ndahvi stná ini-nda.

⁹ Te ñi sàni quida quini nèhivi xi-nda, màsà nàchítacùhá-nda nacua ni quida-ne xi-nda. Te ò nú ni cànàhá-nè xi-nda, màsà cànàhá stná-nda diquì-nè; còo. Ni cànàn tàhvi-nda núu Dios sàhà-nè, vâchi cuahá gá ni nihitáhvi-nda na ní cana-yàndò.

¹⁰ Vâchi (dohó cachi tutu ñi):

Nú cuni-nda cucumi-nda vida ndiaha, te yàha vâha-nda, dandu xiñuhu cundoo-nda cuidadu ñà-màsà càhàn quini-nda, ni màsà dándáhvi stnahà-nda.

¹¹ Te màsà tucù-nda inga ichi malu; cuisì-ní ñà-íá víi ni quida-nda. Te ni nándúcú stná-nda nansa cundoo maní-nda ñuhivi; cuahá gá xiñuhu nacani ini-nda nansa quida-nda ducán.

¹² Vâchi Stoho-nda Dios, inú-yá nsidaa nècuàchi nihnú vâha ini-xi, te iníni-yá na xicàn tàhvi-nè. Doco nècuàchi quidá siquini, na ñi xini ùhì-yà nsidaa nècuàchimà.

¹³ Nú puru chuun vâha quida-nda, dandu ¿a quidá quini nèhivi xi-nda sàhámà?

¹⁴ (Ádi cóo); doco nú ni sàa-nda ndoho-nda sàhà ñi ñà-íá víi ni quida-nda, dandu ndiaha gá queé stná mà. Ñâyùcandúá, màsà yúhì-nda na càhàn dana nèhivi xi-nda, te ni màsà ndúlócò-nda.

¹⁵ ñi-ñi ni cúnihnú víi ini-nda Jesucristu ñà-ndúu-yá Stoho ndiaha-nda. Te nú ndácàn tnùhù-nè núu-nda índu chuun nihnú vâha guá ini-nda (mii-yá) ducán, dandu siempre cundoo tùha-nda naxiconihí víi-nda núu-nè. Doco viví-ñi ni càhàn tnùñuhu-nda xi-nè.

¹⁶ Màsà quidá-nda ni-ñi ñà-cui dandoho-xi sàxínitnùnì-nda después. Daaní, mate ndoo nèhivi xifnùhu xi ñà-vâha quida-nda ñà-ndúu-nda nèhivi xí Cristu, có-quidámà, vâchi icúmí-nè sàa-nè nducahan-ne.

¹⁷ Doco nú sàha-ya lugar ndoho-nda, dandu chicá vâha ndoho-nda sàhà ñi ñà-vii ni quida-nda, te màdiá sàhà ñi falta xi-nda.

¹⁸ Vâchi stná Cristu, ni ndoho stná-yá; ñi xichi-ñi ni ndoho-ya sàhà falta xi nsidaa ndohó nèhivi cuáchi ñuhivi, mate mii-yá, còo ni-ñi cuáchi ni quidá-yá. Te sàháyùcandúá, vâtùni ni ñi-nda ni nàcundoo vâha-nda xi Dios. Ñà-ndaá nduá ni xihì iquicúñu-yá, doco espíritu xi-ya ni dånáticú xi-yá.

¹⁹ Te divi espíritu xi-ya mà ni sàa ndé ndoo anima ni sandiadi, te ni cachitnùhu-ya xi-nè ñi razón.

²⁰ Anima yucán nduú anima nèhivi cóni sàxíníndisá sàhana tiempu xi Noé na ní quidandee guá ini Dios sàhà nèhivi ñuhivi, te ni sandiatu-ya ni cuyucan barcu cahnú (xi Noé) mà. Te sacu nèhivi ni càcu núu barcu mà, cuisì ùnà-nè ni càcu ni quida tècuí mà.

²¹ Cunaha-nsiá, ejemplu ndúu stná nsidaa ñà-jaàn, vâchi nduámà nahi ñà-cùhí-nda tècuí quivi vichi, te càcu-nda sàhà-ñà ni natiacu Jesucristu. Doco ñà-cùhí-nda mà, có-ndúá ñà-ndundo uun ñua icà-nda, cóo; ñà-xicàn tàhvi-nda núu Dios nduá, divi ñà-xicàn tàhvi-nda ndundo sàxínitnùnì-nda.

²² Te mii-yá, ndè gloria sàmànù-yá, íá-yá ladu cuahá Yua-nda Dios vichi, te nsidanicuú àngel, icúmí-nè cunini-neyà, mate àngel chicá cusáhnù nduú-nè, te ò inga ana ñi fuerte.

4

Nacoo dahuun-nda nsidaa ñà-có-íá vâha nisa quida-nda antes

¹ Vichi xiñuhu (nsinuu ini-nda) nansa ni ndoho Jesucristu ñuhiví yohó, te dispuestu ni cúndóo-ndá ñà-ndoho stná-ndà, vâchi nú sàni ndoho stná-ndà ducán, dandu ñà-sàni nacoo-nda cuàchi-nda nduá.

² Vâchi nú nihnú ini-ndà ducán, dandu mà xîho ndevàha ga-ndà ñà-chicuéhè iá ñuhiví yohó na ian quidá ñèhiví dava ga; vâchi puru ñà-vâha cudîi ini Dios cunduu ñà-quida-nda.

³ Vâchi mii-nsiá, tiempu ni yâha xi-nda nisa quida ndevàha-nsia nacua quidá ñèhiví có-ínahá xí Dios, vâchi cuahâ viciu nisa icumi-nsiá; cuahâ iñâha nisa xihò-nsiá, te nisa xîni stná-nsiá; cuahâ escândolo nisa quida-nsia, vâchi nisa xîhi cuahâ-nsiá. Cuisi figura yùu nisa cahvi stná-nsiá antes, mate quini iá quida-nda ducán. Doco vichi, mà quidá gá xî nsidaa ñà-jaàn.

⁴ Ñâyücandüá, ndulócò ñècuàchi dava ga vichi, xítñuhu-ne mii-nsiá, có-cúndàà ini-nè índu chuun có-cùtnáhâ gá-nsiá xî-né na quidá-né ñà-có-ndiáà mà.

⁵ Doco (vâxi iin quiví) dandu icumí ñècuàchima nacuaña-ne cuenta (sàhà nsidaamá) nùu mii-yá. Te sà-itúú ndacân-yâ cuenta sàhà cuàchi nsidaa-nemâ, na ñècuàchi itiacú, te ducán stná ñècuàchi sàni xîhi.

⁶ Ñâyücandüá, ndè stná ñècuàchi nsii ni nihí-né ni xinitñuhu stná-nè razón vâha xi-ya sàhâ-ñâ vâtuni cutiacu stná anima-nè vida xi Dios, mate na nisa itiacu-nè ni nihí-né castigu, vâchi ñèhiví ñuhiví ni sanduu stná-nè.

⁷ Cunaha-nsiá, sà-itúú quiví nsiih nsidaa iñâha. Ñâyücandüá, xiñuhu nacani vîi ini-ndà, te cunihnu cuahâ ini-ndà câcân tàhvi-ndà nùu Dios.

⁸ Doco ñà-chicá xiñuhu nduú ñà-cuu cuahâ ini-ndà sàhâ ñanitnaha-nda, vâchi sàhâ ñà-jaàn nduá mà úhi nandòdò-nda nsidaa falta ni quida ñècuàchima mate cuahâ gá nduá.

⁹ Xiñuhu nacuna-nda yehè nùu ñanitnaha-nda (nú xicánúú ndahví-nè), te màsà cúñâñâ-ndá quida-nda ducán.

¹⁰ Según nansa ni nihitâhvi iin iin-nda, ducán xiñuhu cunucuachi-nda nùu ñanitnaha-nda, vâchi ducán ndiá icâ-ndà quida-nda xi gracia ni nihitâhvi-ndà nùu-yá, te cuahâ clase gracia nduá yohó.

¹¹ Nú (sàni nihitâhvi) iin ñèhiví câhân-nè (palabra ì), dandu ni cúndúamâ nahi meru palabra ni cachi mii-yá. Te nú xicánúú-ndá indéhe ndahví tnaha-nda, dandu ni quida-nda chuun jaàn xi nsidaa valor nihí-ndà nùu Dios. Nsidanicuú ñà-ndüá quidâ-ndâ, xiñuhu quida vîi-ndâñâ sàhâ-ñâ sà ñèhiví naquimani-né mii-yá sàhâ Jesucristu. (Ansivéhé-yâ), te nicanicuahân ni cúsâhnû-yá, te ni queé stná cuahâ tnùñuhu xí-yá (inicutu), amén.

Dispuestu ni cúndóo-ndá ñà-ndoho-nda sàhâ Jesucristu

¹² Mii-nsiá ñècuàchi màni guá nùí, màsà ndulócò-nsiá nú ni yâha-nsia tnùndoho fuerte (quida ñèhiví); cóndüá ñà-ndulocò-nsiá na ian nduájân iin ñà-cóni nihnú ini-nsiá cuu xi-nsiá; cóo.

¹³ Xiñuhu cudîi ini-ndà sàhámâ vichi, vâchi ñà-davani ndohó stná-ndà nahi Cristu nduá. Daani, quiví cuni-ndà (naxicocuñin-yâ) te nchií ndiaha-yá, dandu yâha ga icumí-ndá cudîi ini-ndà.

¹⁴ Te nansicâhân stná-ndâ nú ni câhân quini ñèhiví diquí-ndâ ñà-nchícùn-ndâ mii-yá, vâchi Espiritu ndiaha xí Dios icumí chindee xi-nda na yâha-nda ducán. Ñà-ndâà nduá, quini câhân-nè (xî-ndâ) sàhâ-yá, doco ndohó, cóo. Tnúñuhu xí-yá nduá tavá-nda.

¹⁵ Te nú icumí-ndá ndoho-nda, màsà cúndúamâ sàhâ-ñâ ni sâhni stnaha-nda, te ò ni quidâcuñhâ-ndâ iñâha, te ò ni quidâ-ndâ iin ñà-có-ndiáà, ò ni dáquihvivyuhù-ndâ nùu chuun xi inga ñèhiví; cóo.

¹⁶ Doco nú sàhâ-ñâ nduu-nda ñèhiví xí Jesucristu ndoho-nda, dandu màsà nunca cucahan nùu-ndâ sàhâjân. Cóo, ñà-naquimani-ndâ Dios nduámâ.

¹⁷ Vâchi vichi sà-iá cuahân ndundaà sàhâ ndohó ñècuàchi nduú dèhe ndisa-ya. Te nú mii-nda nduú ñècuàchi primeru, dandu ¿índu iñâha icumí yâha ñècuàchi có-ndulócò sàhâ razón ndiaha xí-yá?

¹⁸ Vâchi ndohó, ñèhiví vâha xi-ya nduu-nda, te cuahâ gá ndoho-nda, dandu sàà-ndâ nùu-yá. Te nú ducán nduá, dandu yâha ga ndahví cunduu castigu xí ñèhiví malu quida guá xi cuàchi.

¹⁹ Doco de todos modos, icumí dava-nda ndoho-nda tiempu vichi, vâchi ducán ni chitnùnî ini mii-yá. Ñâyücandüá, iin-ni xiñuhu ñà-quida vîi-ndâ ñuhiví yohó, te nsinuu ini-ndâ ñà-ini ndahâ-yá iá anima-ndâ, vâchi mii-yá nduú ana ni chitnùnî ini-xi cundoo-nda ñuhiví yohó, te vâtuni cahvi-nda xi-yá (ñà-cundiaa-yàndó).

5

Nansa xiñuhu quida ñèhiví sahnú idónuu, xi stná ñècuàchi cucuáchi

¹ Vichi cuàhìn càhìn xì mii-nsiá nècuàchì cusáhnù jaàn. Yùhù nduú stnàì iin nècuàchì sahnù dandacù. Cunaha-nsiá, yùhù nì xinìnù nansa nì cuu na ní ndoho Cristu; te quívi natùì stnà poder ndiaha xí-yá, dandu icúmí cuni stnàì ñà-jaàn, nahi mii-nsiá.

² (Ñàyùcàndùá, yùhù cachí xì-nsiá) nì cúnùú víi-nsiá nèhivì xí Dios ndoó jaàn, nacua quidá pastor xì rìi xí-né. Doco nì cundúá xì nsidaa voluntad xì-nsiá, màdiá fuerza nì quidá nèhivì xì-nsiá. Nì màsà quidá-nsiá chuun jaàn sàhà dihùn, còó; ñà-cùdìi inì-nsiá nì cundúá.

³ Nì màsà cúnìhnù inì-nsiá nduú-nsiá lamú xì nècuàchì ndiaá-nsiá. Còó; chuun xì-nsiá nduá quida víi-nsiá, dandu cundehè stnà nèhivì ndiaá-nsiá, te quida stnà-nè nacua quidá mii-nsiá.

⁴ Daaní, después na quívi naxicocuíñ mii-yá ana ndiaá xì nsidanicuu-nda, dandu nihì iin iin-nda iin ñà-vàha xì-nda cunduu iin corona ndiaha cuñuhu ñìnì-ndà, te nicanicuahàn coo vicoá.

⁵ Daaní, mii-nsiá nècuàchì chicá cuachi, xiñuhu cunini-nsiá ñà-nduá xicachi nècuàchì sahnù dandacù. Cunaha-nsiá, nsidanicuu-nsiá, nicanicuahàn nì cúnìhnù ndahivì inì-nsiá, te cahivì tnahá stnà-nsiá, vàchi Dios, sadí-yà nùù nsidaa nèhivì nducuehé; doco nècuàchì nihnú ndahivì inì-xì, sáhatahvi-yànè gracia xì-ya.

⁶ Ñàyùcàndùá, xiñuhu cunihnu inì-ndà ducán, vàchi ndahà Dios ñuhú nsidaa-nda, te fuerte-ya. Dandu después sàà stnà iin quívi quee ndisa tñùñuhu xì-nda nùù nsidaa nèhivì quida-ya.

⁷ (Doco vichi) nùù ndahà mii-yá nì ndóo nsidaa chuun nacánì inì-ndà sàhà-xì, vàchi nihnú vaha inì-yàndó.

⁸ Nicanicuahàn xiñuhu cundoo-nda cuidadu, te cundoo tùha-nda, vàchi iá ana xicánúú xinì ùhì xì-ndà, divi nduú ñà-malu, te quidá-sì na quidá sì-león, vàchi xicánúú-sì ndáhi-sì nandúcú-sì ñà-caxì-sì.

⁹ Doco màsà cuáha-nda mii-nda ditá-sindó, iin-nì nì cúnìndísá víi-nda mii-yá, te nsinuu inì-ndà ñà-divi ducán ndohó stnà dava ga ñani-ndà ndoó inicutu ñuhivì.

¹⁰ Cunaha-nsiá, cuisì Dios nduú ana sáhatahvi xì-ndà gracia, te divi stnà-yà sàni cana-yàndó ñà-cundoo ndiaha-nda nùù-yá nicanicuahàn quida Jesucristu. Ñàyùcàndùá, mate ndoho-nda vichi, doco ñà-yáha-nì nduá. Te mii-yá, icúmí-yá nsida víi-yá ànima-ndà, te nacuahà-yàndó valor. Icúmí-yá nacuahandee stnà inì-yàndó, te chindee-yàndó ñà-màsà queé-ndà nùù ichì vaha.

¹¹ Te vichi nì queé gá más tñùñuhu xí-yá, te iin-nì nì cusáhnù stnà-yà dècuèndè nicanicuahàn. Amén.

Ñà-nduá nì cachi Pedro na ní ndaquindèè-né xì nèhivì tiaá-né nùù-xì

¹² Iin ñani-ndà quidá víi ndisa nduú Silvano. Te divi mii-né nduú ana xichúin ñà-tiàì tutu tii yohó ndé càhìn xì-nsiá sàhà ñà-cundaà inì-nsiá nansa xiñuhu quida-nda, te cundaà stnà inì-nsiá ñà-divi gracia ndiaha xì Yua-nda Dios nduá (sàni nihì-ndà). Ñàyùcàndùá, iin-nì nì cúnìndísá víi-nsiá gracia mà.

¹³ Ñuu Babilonia yohó ndoó stnà nèhivì nì nacàxin stnà Yua-nda Dios nahi mii-nsiá, te cásahù stnà-nè xì-nsiá. Daaní, yohó iá stnà Marcos, iin nècuàchì nduú nahi dèhi, te cásahù stnà-nè xì-nsiá.

¹⁴ Te mii-nsiá, nacasàhù màni stnahá stnà-nsiá entre mii-nsiá.

Nì cundóó cueé nsidaa mii-nsiá nècuàchì nduú nèhivì xì Jesucristu. Sà-íá.

Tutu Ûi Nî Tiaa San Pedro nùu Nèhivì xí Dios

¹ Yùhù nduì Simón Pedro, iin ana xinúcuáchí nùu Stoho-ndà Jesucristu. Te divi nùu mii-yá ni nihí chuun ndiaha quidé. Te vichi tiaí tutu yohó nùu nsidaa mii-nsiá nècuàchì iin-ni sàni nihitáhvi stná gracia ndiaha xí-yá ñà-cunindisá-nsiáyá. Vàchi ducán ni chitnùni ini-yá quida-nda, divi mii-yá ana chiigá ndàcuisi inì-xi. Dios nduú-yá, te cahvi-ndayá, vâchi mii-yá nduú ana ni dâcâcu xi-nda.

² Pues vichi ni cûcûmí-nsiá cuàhà gracia xi-ya, te contenu ni cûndóó-nsiá sàhà-ñá ináhá-nsiá mii-yá xì (Yuamáni-yá) Dios.

Nansa ndiá icà nèhivì xí Jesucristu quida-ne

³ Cunaha-nsiá, fuerte gâ mii-yá, te ndiaha gâ quidá-yá, ñâyücândüá ni cana-yândó ñà-cunaha-ndayá. Dandu ni chindee ndudu ì xi-yá ndohó, te ni nihitáhvi-ndà nsidanicuú ñà-ndüá xiñuhu ñà-cundoo ndiaha-nda nùu-yá, te cahvi-ndayá nacua ndiá icà-ndà.

⁴ Te sàhà-ñá fuerte guá-yá, te ndiaha guá-yá, ñâyücândüá ni cundiatú-ndà cuàhà gâ ñà-vàha ndiatu-nda cuu xi-nda, te dècuèndè ndulócò-ndà ñà-ndiaha guá palabra sàni cachi-yá. Vâchi sàhà palabra mà vâtùni cucumi stná-ndà meru vida xi anima mii-yá, te ducán nihì ndèè stná-ndà nacoò-nda modo siquini icúmi nècuàchì dava ga ñuhivì yohó, divi modo cudí guá ini-nè quida-ne.

⁵ Te divi sàhà-ñá ni cachi-yá xi-ndà palabra mà, ñâyücândüá xiñuhu cuàhandee ini-ndà (cunchicùn-ndâyá) chicá vii. Pues vichi sà-xinindisá-ndâyá, doco xiñuhu cutùha stná-ndà cunihnu vii ini-ndà. Daaní, xiñuhu sàà stná-ndà mànihì vâha ini-ndà (sàhà ichi-yá).

⁶ Daaní, xiñuhu cutùha stná-ndà cadì-ndà nùu mii-nda. Daaní, xiñuhu cutùha stná-ndà quidandee ini-ndà; daaní, xiñuhu cutùha stná-ndà cunihnu vâha ini-ndà mii-yá nicanicuahàn.

⁷ Daaní, xiñuhu cutùha stná-ndà cunihnu manì ini-ndà sàhà ñanitnaha-nda; daaní, xiñuhu sàà stná-ndà cuu stnahá ndisa ini-ndà sàhà-ndà.

⁸ Vâchi cunaha-nsiá, nú ni cútùha vâha-nda nsidaa ñà-jaàn, te quida ndisa-ndañá cumplir; dandu màdi uun-ni cundoo-nda nùu Stoho-ndà Jesucristu; ni màdi uun-ni quea ñà-ináhá-ndâyá.

⁹ Doco nèhivì còò ñà-vâha ma ini anima-xi, có-cùndàà vâha ini-nè, na ian quidámáxinì-nè, te có-nsinúú gâ ini-nè nansa ni quida Dios na ní nsidandoo-ya cuàchi-ne.

¹⁰ Ñâyücândüá, chicá vâha cunsihi ini-ndà cundoo-nda seguru ñà-ndüü-ndà nèhivì ni nacâxin-ya, te ni cana-ya. Vâchi nú ni quida ndisa-nda ñà-vâha jaàn, dandu mà sàà-ndà tûcù-ndà ichi cuàchi.

¹¹ Coó, ndiaha gâ icúmi quixi cuàhà gracia xi mii-yá ana ni dâcâcu xi-nda, divi Stoho-ndà Jesucristu, te dayáha stná-yândó ñuhivì ì xi-yá ndé dandacú-yá nicanicuahàn.

¹² Ñâyücândüá, cuní dansínuu ga ini mii-nsiá nansa (quida-nsia), mate sà-ináhá-nsiá iyuhu sàhámà vichi, te nihnú vâha ini-nsia palabra ndàcuisi ni xinindisá-nsiá.

¹³ Doco yùhù tuxí inì, mientras itiácù-ve ñuhivì yohó, chicá vâha dansínuu inì mii-nsiá nansa xiñuhu cunihnu inì-nsiá.

¹⁴ Vâchi ináhì sà-itúú quivì icúmi cui nacua ni cachi Stoho-ndà Jesucristu xì.

¹⁵ Doco icúmi nanduquí nansa cui sinuu inì-nsia palabra yohó nú sàni xihì.

Nansa ni xini Pedro ni natnuù ndiaha Jesús

¹⁶ Cunaha-nsiá, palabra ì ni cachitnùhu-nsi xi-nsiá, màdi cuentu ni nachuhun tnahá uun nèhivì maña nduá. Còò, vâchi sàni xininùu-nsi ñà-ndiaha guá iá Stoho-ndà Jesucristu, ñâyücândüá, ni nacani-nsi xi-nsiá sàhà poder xi-ya, xì nansa icúmi stná-yá naxicocuiñ-ya.

¹⁷ Vâchi nsiùhù, ni xini-nsi na ní tavá Yua-nda Dios tnùñuhu ndiaha xí-yá, te ni natnuù fuerte-yá. Dandu ndiaha gâ ni càhàn Yuamáni-yá sàhà-yá na ní cachi-yámà: “Dèhemaní nduú ana yohó, te cudí inì sàhà-yá”.

¹⁸ Nsiùhù, ni inini-nsi ñà-jaàn na ní sàhàn-nsi xi-yá òni yucù ì yucán, te ni tiacu-nsi ni càhàn (Yuamáni-yá) ansivi.

¹⁹ Ñâyücândüá, sàhà ñà-jaàn chicá más nàhà claru ñà-ndàcuisi nduá ni cacachi profeta nisa càhàn sàhà-yá sàhà; te vichi ndiá icà-ndà cunihnu vâha ndisa ini-ndà palabra xi nècuàchimà, vâchi palabra mà, ndiaha gâ datnúá sàxinítùnùni-ndà na iin ñuhu nchii fuerte ndé iin tnúú, te iin-ni icúmi chindee stná-màndó dècuèndè quivì danátnùu ndiaha-yá nùu (nèhivì ndoó inicutu ñuhivì). Daaní, quivì jaàn (icúmi-yá datnúu-yá ini anima-nda na ian) quidá sitnúú cahnú cachítnùhu ñà-sàcuahàn tûnuù inga quivì.

²⁰ Cenaha-nsiá, chuun cahnú nduú ñà-sàà-ndá cundaà vâha ini-ndá nansa ía palabra ìi nì cachitnúhu nêhivì sâhana ma, te nì tiaa-neà nùu tutu. Màdi sâhà cuisì sâxinítnúni ndohó cui sâà-ndá cundaà vâha ini-ndá nansa cuní cachâmâ.

²¹ Vâchi nêhivì ìi sâhana ma, màdi ini-ni mii-né nì chítnúni ini-nè ñà-nduá nì cachi-nè sâhà mii-yá. Còò, divi Espiritu ìi xí-yá nduú ana nì dátnúú xì sâxinítnúni-nè, te nì cachi-nè ñà-nduá nì cachi-nè.

2

Màsà nâcutnúhú-ndá ñà-tnùhù chináhá nêhivì

¹ Tiempu sâhana ma nì sandoo stná tètñùhù ñuu-nsì, datiaá uun-tè câhàn-te cuenta xi Dios. Doco vichi ndé ndoó stná mii-nsiá icúmi casaà stná tètñùhù nahi tè-sâhana ma. Te icúmi-tè daquíhvi dèhé-te iin dàñùhù chináhâ-te. Ndé icúmi stná-te nacuaà-té Stoho-ndá Señor, mate sâni dânáa-yá sâhà cuâchi-nda. Doco cuisì mii-té quidá quini-tè xì mii-té, ñâyücandüá yâchi icúmi-tè ndañuhu dahuun-tè.

² Doco cuâhâ gâ nêhivì icúmi tenchicùn xì ichi sìquini mà, dècuèndè sâà stná-nè cahichi ini-nè ichi ndâcuisì-yá.

³ Te tètñùhù mà, ñà-cuâhâ guá cuú ini-te sâhà dihùn, ñâyücandüá, víco uun icúmi-tè câhàn-te xi-nsiá ñà-dandahví-te mii-nsiá, te ducán nsidandahví stná-te mii-nsiá. Doco dècuèndè sâhana sâni cachi Dios ñà-icúmi-tè cunsida-tè cuâchi-tè, te sâ-itúú sâà stná quivì ndañuhu dahuun-tè.

⁴ Stná ángel nì sanduu mozo xi-ya, na ní caquida-ne cuâchi, cóni xícâhnú ini-yâ sâhâ-né, vâchi nì sâcùnuhni-nè cadena, te nì ndiachi-né ndé cahâ andea ndé iin tnúú, te yucán ndiatú-né dècuèndè sâà quivì ndundaà sâhâ cuâchi-ne.

⁵ Stná nêhivì ñuhivì sâhana, cóni dâcâcu Dios-nè, vâchi cuâhâ gâ cuâchi-ne nì-ia, teayücandüá nì quixi diluviu diquí-né. Doco tiaa nani Noé, cóo. Nì câcu-ne. Cunaha-nsiá, cuâhâ gâ nì câhàn stná nècuâchímâ xì nêhivì sâhana ma âma quidá víi stná-nè, doco (cuisì) Noé mà xi inga usâ gâ tñaha-ne nì câcu.

⁶ Daaní, stná ñuu Sodoma xì ñuu Gomorra, nì xixìn nsiha, ndé cuisì yàà-ñá nì ndòo, vâchi iin castigu xì mii-yá nì sanduu tnùndoho ma, âma yúhí stná nsidaa gâ nêhivì malu icúmi cundoog ga ñuhivì quivì nùu-xì.

⁷⁻⁸ Doco ñuu mà ñisa ìa stná iin nècuâchi vâha nani Lot. Te yâha ga nì cuduchi ini-nè sâhâ modo sìquini xì nêhivì ñuu mà. Vâchi yucán ía-nè mahì nècuâchímâ, te nsiquivì iníni-né, te indêhe-né ñà-quini guá quidá nècuâchímâ. Ñâyücandüá yâha ga nì ndòo cahan-ne sâhâ nècuâchímâ. Daaní, na (ní ñihì ñuu mà tnùndoho), nì dâcâcu Dios-nè nùájân.

⁹ Pues sâhâ ñà-yúcán náhâ claru, tûha ndisa Dios tavâ-yâ nêhivì vâha xi-ya nùu tnùndoho yâha-ne nì cûi. Te ináhâ vâha stná-yâ nansa cuâhàn-yâ quida-ya xì nêhivì malu vichi, itníí-yâ cuenta sâhâ-né ndé cachi sâà quivì juiciu, dandu ndoho-ne.

¹⁰ Te nècuâchi chicá icúmi ndoho nduú nècuâchi quidá sìquini guá xì mii-xí nacua nduú gustu xi-ne, te cahíchì stná ini-nè ñà-nduá dandacú mii-yá nùu-né.

Vâchi tètñùhù mà, atrevidu gâ-te, mii-té xínduu-tè mii-té. Mà ía yuhù-té; quini ga câhàn-te sâhâ ana fuerte (xicánúú) ansivì.

¹¹ Doco cunaha-nsiá, ndé ángel xi Dios, có-cânâhá quini-ne na câhàn-nè sâhâ falta xi ana fuerte mà nùu Stoho-ndá Señor, mate chicá cuâhâ poder xi-ne (nùu témâ), te chicá dandacú stná-nè.

¹² Doco tèmâ, mate có-sâà-te cundaà ini-te sâhâ iin chuun, doco quini ga câhàn-te sâhâ-ñá. Nahi quisi có-cundâà ini-xì xínduu-tè, te quidá-te na ían còò anima-te. Ñâyücandüá, divi icúmi cuu xi-té na ían cùu-xì quisi yùcù, cuisì ndoó-si ñuhivì sâhâ-ñá tñii nêhivì-sí, te cahni-nésì; pues divi ducán icúmi cuu stná xì tètñùhù mà, icúmi-tè ndañuhu dahuun-tè ñà-sâni cuchicuehe anima-te.

¹³ Iin castigu ùhì nduá ñihì-té, divi nacua nì quida-tè xì ñanitñaha-tè. Doco vichi cudíi ini-te quidá-te ndéni ñà-sìquini nì cui ndui (ò ñuuú) nì cundüá. Ñâyücandüá, ndohó, ndóo cahan-nda sâhâ escândalo xíquida guá-te. Mate sâhàn stná-te ndé ndoo-nda vícò xì-ndâ, doco dandahví uun-tè, vâchi cudíi gâ ini-te dandahví-te.

¹⁴ Indêhe stná-te nsidaa nècuâchì ñahâ, te cuní-te dâvá diquí-tené. Có-nâcòó-te cuâchi quidá-te. Te nêhivì mà-fuerte anima-xì, mà úhì dandahví-tené. De por sí, cuâhâ ññâha xího stná-te cucumí-té. Doco icúmi-tè ñihì chíhân-te.

¹⁵ Vâchi sâni nacoo-tè ichi vâha mii-yá, te sâxínchicùn-te ichi malu nacua nì quida Balaam dèhe Beor sâhana; iin nècuâchì xinitúí nì sanduu nècuâchímâ, doco cuâhâ gâ ñisa cuu ini-nè sâhâ dihùn; mate iin chuun có-ndiââ nduá, doco quida-neâ sâhâ dihùn.

¹⁶ Doco ni nihì-né iin conseju vâha nùu burru xi-ne, có-íá vâha ñà-ndúá quidá-né, ni cachì-si xi-né. Mate quisi nduú-si, doco ni càhàn-si na iin ñèhivì, te ni sadì-si nùu nècuàchimà ñà-màsà quidá-né chuun loco cuàhàn-nè quida-ne ni cùí.

¹⁷ Cunaha-nsiá, na iin pozo ndé ni ndoco tècuií, ducán xínduu tètñùhù mà. (Còò ni-íñàha níhì-ndà) nùu-té, nahi vicò tàchì, còò ni-íñàha nihá. Ñâyùcàndúá icúmí-té sàà-te iin xaan ndé iin tnúú ndúchì, te nicanicuahàn cundoo-tè yucán, cachì Dios.

¹⁸ Doco vichì, fuerte càhàn-te na ian yâha ga ndiaá-te. Doco puru palabra chicuèhé nduá cachì-te, vâchi chináhà-te ñà-vàtùni quida ndevâha-nda nansa ni ni cui; vâtùni íá ñà-cuñuhu quini ini-ndà, cachì stná-te; te sâhâyùcàndúá, nâditá-te cuàhà ñèhivì ladu xi-tè, dècuèndè stná ñèhivì sà-ítúú càcu nùu ichì malu mà ni cùí.

¹⁹ Libre cundoo-nda, cachì-te ni ñèhivì, doco mà cùí, vâchi ndè stná mii-té, dandacú stná cuàchì-tè nùu-té. Te nú sàni cundee íñàha nùu-ndà, dandu có-ndòò gà ndisa-nda libre.

²⁰ Vâchi ni cachì-ndà íá iin ñèhivì, te nisa cundaà vâha ini-nè sàhà Stoho-ndà Jesucristu, te ni càcu stná-nè nùu modo siquini xi ñuhivì yohó; doco nú tucu tu ni dáca òni-né, te cundee cuàchì ma nùu-né, dandu chicá quini queamá nùu ñà-primeru.

²¹ Vâchi chicá vâha màsà cúnitñuhu-ne sàhà ichì vâha-ya ni cùí, te màdiá ni xinitñuhu-ne, dandu después ni naxicocuñin tu ini-nè, te ni nacoò-ne palabra ì ni cachì-yà xi-né.

²² Doco cunaha-nsiá, ducán cuú stná xi-né nacua cachì dichu sàhà sihina: “Ni sihi ni ndusan-si, dandu naxicocuñin tu-si saxí-si ñà-jaàn; te ò nacua quidá stná cochi, nú sàni xichi-si, dandu tucutu ndècahu-si mahì ndèhì tuí nihni-si”.

3

Icúmí naxicocuñin Stoho-ndà Jesús ñuhivì

¹ Ñà-ùí nduá tiaí nùu-nsiá vichì, ñani màní. Te nùu ndúí carta xi sàni quide lucha nacuañandee ìni mii-nsiá sàhà-ñà ducán nsinuu ini-nsiá nacani vii ini-nsiá.

² Te cuní stnáí nsinuu ini-nsiá nansa íá palabra xi Dios ni cachitñuhu ñèhivì ì sàhana, xi stná palabra ni sàcunaha-nsiá nùu nsiùhù nècuàchì ni nihì chuun nùu Stoho-ndà Señor ni dáca xi-nda, vâchi palabra xi mii-ya nduá.

³ Doco íá íñàha chicá cunf cundaà ini-nsiá. Cunaha-nsiá, na sàà quivì xínu tiempu, dandu icúmí ndecoyo ñèhivì cuàcundiaa (sàhà ichì-yá). Icúmí-né quida ndevâha-ne xi mii-né nansa ni ni cui.

⁴ Te dohó icúmí-nè cachì stná-nè: “¿Índù ní xini-nsi naxicocuñin-yà nacua ni cachì-yà? Vâchi dècuèndè sàhana na ní xihì xii-ndà, còò ni-íñàha, vâchi iin-ni íá ñuhivì vichì nacua ni sàcòà quivì primeru”, cachì-nè.

⁵ Doco na cachì ñèhivì ducán, cuisì quidámáxini-nè sàhà nansa ni cuu sàhana na ní sàcòò ansivi, te ni xínu stná ñuhù íchì mahì tècuií, nsidanicuú ladu ñuhú-te. Pues nsidaa ñà-jaàn nduá ni dàndacú Dios, te ducán ni cuu.

⁶ Doco sàhà divì tècuií mà ní ndañuhu stná ñuhivì sàhana ma, vâchi ni dàhvia dàvi inicitu.

⁷ Doco ansivi xi ñuhivì íá vichì, sàhà divì palabra ni cachì-yà antes mà íá stná orden xi-ya ñà-icúmíá coco nsiha, cuisì ndiatú-yá ndè cachì sàà quivì ndundaà sàhà cuàchì ñèhivì malu, dandu coco ñuhivì, te ndañuhu stná nsidaa nècuàchì malu mà.

⁸ Doco íá iin palabra cunf nsinuu ini-nsiá, ñani màní. Cunaha-nsiá, mate imindaa quivì, te ò mil cuà nduá, doco iin-ni nduá nùu Stoho-ndà Señor.

⁹ Ñâyùcàndúá, mate cachì ñèhivì ¿Índù chuun cucuèé-guá cuu ñà-ndúá ni cachì-yà? doco cóo; màdi ñà-cò-ndulócò-yà nduá; ñà-quadandéé cahnú ini-yà sàhà-ndà nduá, vâchi có-cuní-yà ndañuhu ni-iin-nda; cóo; ñà-ni sàà nsidaa-nda naxicocuñin ini-ndà sàhà cuàchì-nda nduá cuní-yà.

¹⁰ Doco cunaha-nsiá, (nanáà) icúmí sàà quivì quida ndisa Stoho-ndà Señor (nacua ni cachì-yà); na ian có-nihnú ini ñèhivì quixì tècuìhnà ñuú, ducán coo. Dandu yâha ga fuerte icúmí caha ndee, te ndañuhu dahuun ansivi; te nsidaa ñà-ndúá ni cuyucun ñuhivì, icúmíá dàà titiá, te coca, te ndañuhá, vâchi ñuhivì yohó xi nsidaa ñà-íá nùá, icúmíá coco nsiha.

¹¹ Pues vichì, sàhà-ñá sà-ínahá-ndà icúmí ndañuhu nsidaajàn, ñâyùcàndúá xiñuhu ñà-cunsihi ini-ndà cacanuu vii-ndà ñuhivì nacua cuní mii-yá, te cunihnu ì stná ini-ndà.

¹² Siempre ni nsínúú ini-ndà ñà-icúmí sàà quivì xí Dios, te quida-nda nacua cui quida-nda ñà-ni sàà yàchà. Vâchi quivì yucán icúmí chiñuhu Dios ansivi, te coca, dandu ndañuhu dahuan; te nsidaa stná ñà-ni cuyucun ñuhivì, icúmíá ndutea, te coca.

¹³ Doco ináhá vâha stná-ndà ñà-después icúmí nacòò stná inga ansivi saa xi ñuhivì saa nacua ni cachì-yà xi-ndà, te ñuhivì saa ma, puru ñà-íá vii icúmí coo nùá.

¹⁴ Pues, ináhá vâha-nda ducán icúmí cuu, ñani màní, ñâyùcàndúá, cuàhà gá xiñuhu cunsihi ini-ndà cundoo mani-ndà ñuhivì, màsà cóo ni-iin falta xi-nda, ni màsà cóo ni-iin mancha anima-ndà. Te iin-ni ni cóo ducán dècuèndè quivì naxicocuñin-yà.

¹⁵ Te nú dacueé-yà, te quidandee gá ini-yà sàhà-ndà, dandu xiñuhu cunihnu ini-ndà ñà-cuisi sáha-yàndó tiempu càcu-nda nduájàn. Te divi ñà-jaàn nduá sàni tiaa stná ñani màni-ndà Pablo na ní tiaa-ne iin carta nùu-nsiá antes. Nchichí gá tiaá-né, vâchi ducán nì nihitáhvi-né.

¹⁶ Te nùu nsidaa carta xi-nemà, cachítñuhu stná-nè sàhà chuun tiaí yohó. Ñà-ndáa nduá ùhì cundaà ini-ndà dava ñà-nduá cachí-nè nùu carta mà. Ñàyùcànduá, nèhivi có-sàa cundaà ini-xi, dasívi uun-ne palabra mà, vâchi nèhivi có-xiníndisâ vâha nduú-né. Te divi ducani dasívi stná-nè dava ga tutu ì xi Dios, doco (ndahví-nè), vâchi cuisì icúmí-nè sàa-nè ndañuhu-nè sàhámà.

¹⁷ Doco mii-nsiá, sà-ináhá-nsiá nansa iá nsidaa ñà-jaàn, ñani màni. Ñàyùcànduá, cuidadu ni cùndóo-nsiá sàhà tètñuhu có-ndùlócò sàhà ley xi Dios, còtó naditá-te mii-nsiá ladu xi-tè, te sàa-nsiá quee-nsiá nùu ichì vâha nchícùn vii-nsiá vichi.

¹⁸ Te sacúndáhvi stnáì nùu-nsiá ñà-nì cúnsìhi ini-nsiá nansa cucumi gá-nsiá más gracia xi Stoho-ndà Jesucristu, xi nansa nihì stná-nsiá cunaha vâha-nsiayà, vâchi mii-yá nduú ana nì dàcácu xi-nda.

Ansivéhé cahnú-yá ndè quìvi vichi, te nicanicuahàn. Amén.

Tutu Nuu Nì Tiaa San Juan nùu Nsidaa Nèhivì xí Dios

Nansa ía vida ndiaha xí mii-yá

¹⁻² Cuní-nsi cáhàn-nsi xí-nsiá sàhà mii-yá. Dècuèndè antes quesaha ñuhivì, sà-íá-yà. Te nsiùhù, sàni inini-nsi nì cáhàn-yà; sàni xininùu-nsiyá, dècuèndè sàni tniù ndahà stná-nsi icà-yá. Te mii-yá nduú ana nì quixi xí palabra ì cachítnùhu nansa cutiacu ndiaha anima-ndà. Te sàhà mii-yá itiacù-ndà. Ñàyùcàndüá, (nì quixi-ya) ndè ñuhivì yohó, te nì xini nèhivì-yá. Dècuèndè stná nsiùhù, nì xininùu stná-nsiyá, ñàyùcàndüá, vichi cachítnùhu-nsi, te dansítnùu ini-nsi mii-nsiá sàhà-yá, vàchi mii-yá nduú ana sáhatahvì xí vida ndiaha nicanicuahàn. Nùu Yuamáni-yá nisa la-ya, dandu nì quesaa-yá ñuhivì yohó, te nì xini-nsiyá.

³ Te ñà-ndüá nì xini-nsi, te nì inini-nsi, divi nduá cachítnùhu-nsi xí-nsiá sàhà-ñá iin-nì nì cúníhnú vaha stná ini-nsiá nacua quidá nsiùhù. Te nacua nihnú ini-ndà Yua-nda Dios xí Dèhemanì-yá Jesucristu, ducán nihnú stná ini-yà ndohó.

⁴ Te vichi, sàhà-ñá cuní-nsi ñà-chicá cudíi ini-nsiá, ñàyùcàndüá disàhà-xí tiaá-nsi ñà-yohó nùu-nsiá.

Na ian nchii ndai luz, ducán ía anima Dios

⁵ Cunaha-nsiá, palabra yohó nduá nì inini-nsi nì cachi Dèhemanì-yá (xí-ndà), te ñàyùcàndüá dohó cachítnùhu stná-nsi xí-nsiá ñà-nahì luz nchii ndai, ducán nduú stná (anima) Dios, (vachi micuísì ñà-vàha nduú-yá), te ni-iyuhu có-nìhnú ini-yà ichi ñáa.

⁶ Ñàyùcàndüá, nú nì cachí-ndà íá vaha-nda xi-yá, doco xicá stná-ndà ichi ñáa, dandísá, tnuhu-nda, te có-nchícùn-ndà ichi ndàcuisì-yá.

⁷ Doco nú xicánúu víi-nda, datnúu-yá sàxinítnúnì-ndà, te nihnú vaha ini-ndà nacua nihnú ini mii-yá, dandu mà úhì cundoo manì tàcá nsidaa-nda. Te nùu Dèhemanì-yá Jesucristu nsidándóó xí nsidanicuú cuàchi-nda.

⁸ Nú nì cachí-ndà có-ndüu-ndà nèhivì cuàchi, dandu ñà-dàndàhvì-ndà mii-nda nduá, te ducán nàhà xicá có-nìhnú ini-ndà palabra ndàcuisì.

⁹ Doco nú nì cuàha-nda cuàchi-nda, dandu icúmì-yá quida ndisa-ya cumplir, mà dándàhvì-yàndó, seguru cuicahnú ini-yà sàhà-ndà, te nsidandoo-ya nsidaa ñà-có-ndiáa ñuhú anima-ndà.

¹⁰ Doco nú nì cachí-ndà cóo cuàchi nì quida-nda, dandu ducán queá na ian ndeníhì tñuhù-ndáyá. Te nú ducán, dandu nàhà xicá, tàñáha ga sàà-ndà cunihnu ini-ndà palabra xi-ya.

2

Jesucristu nduú ana cáhàn nihni sàhà-ndà nùu Dios

¹ Nahi dèhe mii xinduu-nsiá, ñàyùcàndüá tiaí palabra yohó nùu-nsiá ñà-màsà quidá-nsiá cuàchi. Doco nú íá ana nì quida iin cuàchi, dandu (nì cúnáhà-nè) íá stná ana cáhàn nihni sàhà-ndà nùu Yuandiaha-nda. Te ¿ana quidá ducán? Divi Jesucristu, vachi mii-yá, ndàcuisì ini-yá.

² Te divi sàhà ñà-ndüá nì quida-ya nì xihì-yà sàhà cuàchi-nda, ñàyùcàndüá, mà nsínúú gà ini Yua-nda Dios sàhà-ñá. Te màdi cuisì sàhà cuàchi ndohó nì xihì-yá, cóo, vachi nì dànàà stná-yà sàhà cuàchi nsidanicuú nèhivì ñuhivì.

³ Te vichi nú nì chivàha-nda ñà-ndüá cachí-yá, dandu vātùni cundaà ini-ndà ñà-sàni xini stnàhà ndisa-nda xi-yá nduá.

⁴ Doco nú cachí iin nèhivì ináhà-nèyá, doco có-chivàha-ne ñà-ndüá cachí-yá, dandu (cundàà ini-ndà), tnuhu-né, có-nìhnú ndàa cuisì ini-nè palabra xi-ya.

⁵ Doco nú quidá-né cumplir ñà-ndüá cachí-yá, dandísá sàni sàà-nè cuu ndisa ini-nè sàhà-yá, te ducán vātùni cundaà ini-ndà iin nèhivì xí-yá sàndüu-né.

⁶ Vachi nú nì cachí-nè nèhivì xí-yá nduú-né, dandu ndiá icà-né quida viì stná-nè nacua nì quida mii-yá.

Ñà-ndüu palabra saa dandacú Dios chivàha-nda

⁷ Màsà cúcáhàn-nsiá iin ley saa nduá tiaí nùu-nsiá vichi, ñáni. Còo, ley yucán nduá, divi ley nì xinindisá-nsiá na ní quihvì-nsiá ichì-yá, vachi divi ley yucán nduú palabra nì xinitnùhu-nsiá daa.

⁸ Doco cunaha-nsiá, nahi ley saa nduú stná ñà-ndüá tiaí nùu-nsiá yohó. Te nú nsinúú ini-nsiá nansa nì quida mii-yá (na ní ìa-ya yohó), xí nansa (quidá stná-yà) xí ndohó vichi, dandísá vātùni cundaà ini-nsiá, ley saa nduá, vachi cueé-nì cueé-nì làcà iyuhu iin tñuú

ini-ndà, te vichi ndiaha gá sàdàtnùù-yà sàxìnítnùnì-ndà sàhà-ñá cundaà ini-ndà nansa íá ñà-ndàcuisl.

⁹ Nú íá iin ana cachí sàdàtnùù Dios sàxìnítnùnì-xi, doco có-xiñùhù-né ñanitnaha-ne, dandu ichi ñáa nduá nchícùn ì-né dècuèndè vichi.

¹⁰ Doco nècuàchi cuú ini-xi sàhà ñanitnaha-xi, mii-né ndisa, iin-ni datnúù Dios sàxìnítnùnì-né, te có-nàcání ini-né sàhà inga iñàha cuida cuàchi-ne.

¹¹ Doco nècuàchi có-xiñùhù xi ñanitnaha-xi, tãñáha ga tnùù ndiaha sàxìnítnùnì-né. Xicá ñáa-né, ni có-sàha tnuní ini-né índu cuàhàn-né, vàchi iin tnúú ini anima-né ñà-sàni quihin-ne ichi ñáa.

¹² Hijos míos, tiaí tutu yohó nùù-nsiá sàhà-ñá sàni xicahnú ini-yà sàhà cuàchi-nsia (na ní xinindisá-nsiáyà), te nì ndacùcahan-nsiá quívl-yá.

¹³ Stná mii-nsiá nècuàchi sahnú, tiaá stnáí palabra yohó nùù-nsiá ñà-sà-ináhá stnahá stná-nsiá xi mii-yá ana itíacú nicanicuahàn. Daaní, mii-nsiá nècuàchi chicá cuachi, tiaá stnáí nùù-nsiá ñà-sàni cundee-nsiá nùù ñà-malu.

Hijos, ñà-yohó tiaí nùù-nsiá sàhà ñà-sàni sàa stná-nsiá nì xini stnahá-nsiá xi Yuandiaha-nda.

¹⁴ Te mii-nsiá nècuàchi sahnú jaàn, tiaá stnáí ñà-yohó nùù-nsiá ñà-sà-ináhá stnahá stná-nsiá xi mii-yá ana itíacú nicanicuahàn. Daaní, mii-nsiá nècuàchi chicá cuachi, tiaá stnáí ñà-yohó nùù-nsiá sàhà-ñá fuerte gá anima-nsiá, vàchi nihnú ndisa ini-nsiá palabra ì xi Dios, te sàni cundee stná-nsiá nùù ñà-malu.

¹⁵ Ni-iin-nsia, màsà cuú ini-nsiá sàhà ñà-nduú modo xi ñuhiví yohó, ni màsà xího stná-nsiá ñà-nduá íá nùá. Vàchi nú ni cuú ini-ndà sàhà modo xi ñuhiví yohó, dandu (nàhà xicà) ñà-có-cuú ini-ndà sàhà Yua-nda Dios nduá.

¹⁶ Vàchi nèhivi nihnú ini-xi ñuhiví yohó, xího cuàhà-né quida cahnú-né cuàchi-ne xi iquicúñù-né, te xího stná-né cundehè-né cuàhà iñàha có-ndiáá, te nducuéhè stná-né sàhà ñà-nduá icúmi-né. Doco nsidaa ñà-jaàn, có-nduá ñà-cúdú ini Yua-nda Dios sàhà-xí. Còò, ñà-cúdú ini nèhivi ñuhiví yohó nduá.

¹⁷ Doco ñuhiví yohó, icúmiá nsiha, te mà níhi gá nèhivi ñà-nduá nisa xihò guá-nemà. Doco ana quidà-xi ñà-nduá cachí Dios, nicanicuahàn cundoo ndiaha-né.

Nansa cundaà ini-ndà índu ñà-nduú ñà-ndáá, te índu ñà-nduú ñà-tnùhù

¹⁸ Hijos míos, na ian vaxi xínu tiempu yohó nduá. Te sàni xinitnùhu-nsia icúmi quixi iin ana nduú contra xi Jesucristu, divi nduú Anticristu. Doco dècuèndè stná tiempu vichi ndoó stná cuàhà contra xi-ya. Ñàyùcànduá, vátùni cundaà ini-ndà ñà-vàxi xínu tiempu yohó nduá.

¹⁹ Tiaa xínduu contra xi-ya, antes nisa cutnahá stná-né xi-ndà, doco vichi sàni quecuaán-né, vàchi cóni ía ndisa-ne ladu xi-nda, vàchi nú nèhivi ladu xi-nda nduú-né nì cuí, dandu dècuèndè vichi cutnahá íi-né xi-ndà. Doco, còò, sàni quecuaán-né sàhà-ñá cunahá xicà ñà-diín ladu ía-né.

²⁰⁻²¹ Te mii-nsiá, nùù mii-yá ana chicá ì sàni nihitáhvi sàxìnítnùnì-nsiá, te sà-ináhá nsidaa-nsiá ñà-nduú ñà-ndáá. Te ñà-sà-ináhá-nsiámà, ñàyùcànduá tiaí tutu yohó nùù-nsiá, màdi sàhà-ñá có-ináhá-nsiá, vàchi ndisa, ináhá-nsiá ñà-nduú ñà-ndáá. Te sàhà-ñá nduá palabra ndàcuisl, ñàyùcànduá ni-iyuhu mà cundúá ñà-tnùhù.

²² Te ñana chicá nduú tètñùhù ndisa? Divi tiaa cachí sàhà Jesús ñà-có-nduú-yá Cristu ndiaha ni quixi nùù Dios. Cunaha-nsiá, contra xi Jesucristu nduú ana cachí: “Còò ana nduú Yua-nda Dios, ni còò stná Dèhemani-yá”.

²³ Nú ni cachí-ndà: “Còò Dèhemani-yá”, dandu ducán queá ñà-sàni nacuaà stná-ndà Yua-nda Dios. Doco nú ndacùcahan-nda Dèhemani-yá, dandu Yua-nda Dios íá vaha stná xi-ndà.

²⁴ Ñàyùcànduá, mii-nsiá, nicanicuahàn xiñuhu cunihnu ini-nsia palabra xi-yá, divi palabra ni xinitnùhu-nsia sàhana. Nú iin-ni nì cúnihnú ini-ndà ñà-nduá nì xinitnùhu-nda daa, dandu iin-ni cunduu stná-ndà nèhivi xí Dèhemani-yá, nèhivi xí Yua-nda Dios.

²⁵ Te mii-yá, sàni quida-ya comprometer nihi-ndà vida ndiaha nicanicuahàn.

²⁶ Cunaha-nsiá, tutu yohó tiaí nùù-nsiá sàhà-ñá cundaà vaha ini-nsia sàhà nèhivi tnùhù cuní dandahví xi-nsiá.

²⁷ Doco mii-nsiá, sàni nduhii sàxìnítnùnì-nsiá nì quida-ya, te ducání íá dècuèndè vichi; còò necesidad dacuahá inga nèhivi mii-nsiá, vàchi sàni nsida ì-yá sàxìnítnùnì-nsiá, te dècuèndè vichi chindéamà mii-nsiá, vátùni cundaà ini-nsiá sàhà nsidaa iñàha, vàchi palabra ndàcuisl nduá nì chinaha-yá, còò ni-iin ñà-tnùhù nduá. Te divi nacua nì chinaha-yá mii-nsiá antes, divi ducán xiñuhu quida stná-nsiá vichi, nicanicuahàn ni cúnihnú ini-nsiá cunduu ì-nsiá nèhivi xi-yá.

²⁸ Hijos míos, vichi cachí xí-nsiá: iin-ni ni cúndúú-ndá nêhivi xí-yá, dandu quívi naxic-ocuíñ-yá, mà yúhí-ndá, ni mà cúcáñ nù-ndá cundehê-yándô.

²⁹ Ináhá-ndá, ndâcuisi ini-yá. Ñâyúcândúá nú nihnú ndâcuisi stná ini ndohó, dandu vátuni cundaà ini-ndá ñâ-sàni sàà-ndá cunduu ndisa-nda dèhe-ya nduá.

3

Dêhe ndisa Dios nduu-nda, cachí San Juan

¹ Hijos míos, na cuáhà guá cuú ini Yua-nda Dios sàhà-ndá, vâchi sàni nihitáhvi-ndá cachi-yá xi-ndá ñâ-ndúú-ndá dèhe ndisa-ya. Te divi xínduu-nda. Ñâyúcândúá, nêhivi ñuhívi yohó, có-nâcúni-nê ndohó, vâchi ni mii-yá, cóni nâcúni-nêyâ daa.

² (Cachí xí) mii-nsiá nêcuâchi màni guá nú ñâ-vichi sândúú-ndá dèhe ndisa-ya. Te mate tâñâha ga datúí-ya nù-ndá índu forma nù-xí sàà-ndá cunduu-nda, doco ináhá-ndá quívi naxicocuíñ-yá, dandu nahi mii-yá nanduu-nda, vâchi mimíi nacua íá-yá, ducán icúmi-ndá cuni-ndá nù-yá.

³ Ñâyúcândúá, nú ducán nihnú ini-ndá ñâ-icúmi-ndá cuni-ndá nù-yá, dandu cuáhàn-ndá nsidavii-ndá anima-nda, ndoa nacua íá ndoo stná anima mii-yá.

⁴ Nú tûha nêhivi quida-ne cuâchi, dandu ñâ-câhíchi stná ini-nê ley xi-ya queámâ, vâchi nsidanicú cuâchi, ñâ-có-sâha ley xi-ya nduá.

⁵ Sâ-ináhá-nsiâ ñâ-disáhà-xí nì quixi-ya ñuhívi yohó; ináhá-nsiâ nì quixi-ya ñâ-dandutu-yá cuâchi-nda. Doco mii-yá, cóò ni-iin cuâchi ni quidá-yá.

⁶ Nsidaa ndohó nêcuâchi nduu ndisa nêhivi xí-yá, mà tûha-nda quida ga-nda cuâchi. Doco ana tûha quida ducán, tâcúni-nê mii-yá, ni tâcúni stná-nê nansa íá modo xi-ya.

⁷ Hijos míos, màsâ cuâha-nsia dandahví ni-iin nêhivi mii-nsiâ, vâchi (ináhá-ndá ñâ-ndáâ nduá yohó): nú quidávi-nda, dandu (vátuni cachi-nda) ndâcuisi ini-ndá nahi mii-yá.

⁸ Nêcuâchi tûha quida-xi cuâchi, íá-nê ladu xi ñâ-malu, vâchi ñâ-malu, dècuèndê yuté ñuhívi xí dècuèndê vichi, iin-ni quidá-si cuâchi. Te (ináhá-ndá) índu-ñâ disáhà-xí nì quixi Dêhemani Dios ñuhívi yohó: divi sàhà-ñâ dandutu-yá nsidaa ñâ-ndúá quidá quisi mà.

⁹ Nsidaa ana nduú dèhe ndisa Dios, mà tûha-ne quida-ne cuâchi, vâchi mii vida saín xi Dios ñuhú ini-nê, te mà sàà-nê quida-ne ducán, vâchi dèhe ndisa-ya nduú-né.

¹⁰ Mà úhi cundaà ini-ndá ana nduú dèhe-ya, te ana nduú dèhe ñâ-malu. Iin nêcuâchi có-quidá víi, ò iin nêcuâchi có-cúú ini-xi sàhà ñanitnaha-xi, có-ndúú-né nêhivi xí Dios.

¹¹ Vâchi sàhana na ní xinitnùhu-nsia razón ndiaha sàhà-yá, te iin-ni dècuèndê vichi, ducán ni sâcunaha-nsiâ ñâ-nì cúú stnahá ini-ndá sàhà-nda.

¹² Màsâ quidá-nda na nì quida Caín (sàhana). Íá-te ladu xi ñâ-malu, ñâyúcândúá nì sahní-té ñani-te. Te ¿índu chuun nì sahní stnahá-te? Divi sàhà-ñâ nì xini-te có-quidá víi mii-té, te ñani-te, quidá víi-né.

¹³ Ñâni, màsâ ndúlócô-ndá nú indêhe-nda có-xiñùhù nêhivi ñuhívi ndohó.

¹⁴ Divi sàhà-ñâ cuú stnahá ini-ndá sàhà-nda, ñâyúcândúá cundaà ini-ndá sàni yàha-nda ladu xi Dios ndé cutiacu anima-nda nicanicuahàn; có-íá gà-ndá ladu ndé xíhi anima-nda.

Nú có-cúú ini iin nêhivi sàhà ñanitnaha-ne, dandu náha xicâ tâñâha ga yàha-ne ladu ndé itíacú anima-nda.

¹⁵ Vâchi nsidaa ana có-xiñùhù xi ñanitnaha-xi, ndudávâ-né xi iin tê-sàhní. Te ináhá-ndá, ni-iyuhu vida ndiaha có-ñuhú anima iin tê-quidá ducán.

¹⁶ Te vichi sàni sàà-ndá nì cundaà vâha ini-ndá nansa ndiá ícà-nda cuu stnahá ini-ndá sàhà-nda, vâchi sàni xini-ndá ñâ-ndúá nì quida mii-yá, nì xihí-yá cuenta xi-nda. Ñâyúcândúá, ndiá ícà stná-nda cundoo-nda dispuestu cui-nda sàhà ñanitnaha-nda.

¹⁷ Vâchi nú indêhe iin nêhivi íá necesidad nù iin ñanitnaha-ne, te có-índêhe ndahví-nê nêcuâchímâ, mate algu icúmi-nê, dandu ñâ-jaàn cundaà ini-ndá có-cúú ini-nê sàhà Dios.

¹⁸ Hijos míos, màsâ cáhí uun-nda ñâ-cúú stnahá ini-ndá sàhà-nda; màsâ cáhàn uun-nda cachí-nda ducán. Xiñuhu ñâ-quida ndisa-nda cumplir, te quida stná-nda obra nù ñanitnaha-nda.

¹⁹ Nú nì quida-nda ducán, dandu vátuni cundaà ndisa ini-ndá palabra ndâcuisi nduá sânhícùn-nda, te mà yúhí gà-nda sàhà anima-nda nù Dios.

²⁰ Vâchi nú dayúhí cuâchi-nda mii-nda, dandu (xiñuhu nsinu ini-nda), cahnú Dios xi-nda, te ináhá-yá nansa íá nsidaa iñâha.

²¹ Doco te nú cóò ni-iñâha dayúhí xi anima-nda, dandísâ mà yúhí-ndáyâ, (ñani) màni,

²² vátuni càcàn tâhvi-nda nù-yá, te nihí-nda ñâ-ndúá xicàn-nda, vâchi chívâha-nda ñâ-ndúá cachí-yá, te quida-nda ñâ-ndúá cudí ini-yá sàhà-xí.

²³ Te ¿ndiá nduá nì dândâcú-yá nù-ndá? Divi ñâ-cahvi-nda xi Dêhemani-yá Jesucristu, te cuu stnahá stná ini-ndá sàhà-nda nacua nì cachi-yá xi-nda.

²⁴ Te nú chívàha-nda ñà-nduá cachí-yà, dandu ñá-sàni ndèe anima-nda ini anima mii-yá nduá, te iá stná-yà ini anima ndohó. Te sàni sàhatahvi stná-yàndó Espíritu Ìi xí-yá, te ñàyùcànduá, vátùni cundaà ini-nda iá ndisa Dios ini anima-nda.

4

Nansa quidá Espíritu Ìi xí Dios, xí nansa quidá stná espíritu xi ana nduú contra xi Cristu

¹ Mii-nsiá nècuàchì màni guá núi, màsà cúníndisá ndevàha-nsia ñà-nduá cachí nèhivi nú cachí-nè Espíritu Ìi dacáhàn xì-né. Còó, vàchi xiñuhu-ñá quida-nsia prueba, a ndisa Dios dacáhàn xì-né, á coó. Vàchi cuàhà tètñùhù sàni quesaha xicánúu ñuhiví vichi, te cachí-te ñà-cuenta xi Dios cáhàn-te.

²⁻³ Doco nú ndisa Espíritu Ìi xí Dios dacáhàn xì iin nèhivi, dandu cuàhàn-nè candisá-né cachí-nè: “Ñà-ndáa nduá, ni sàcòo cuerpu Jesucristu, te ni tùinuú-yá ñuhiví yohó”. Ducán xiñuhu cachí-nè, dandu cundaà ini-nda, divi Dios dacáhàn xì-né. Doco nú có-cáchí-nè ducán, dandu cundaà ini-nda màdi Dios dacáhàn xì-né; còó, iin espíritu iá ladu xi contra xi Cristu dacáhàn xì-né. Te sà-ináhá-nsiá icúmí quixi ana nduú contra xi Cristu. Doco cunaha-nsiá, vichi sà-íá espíritu xi temà ñuhiví yohó.

⁴ Hijos míos, nèhivi xí Dios xínduu-nda, te sàni cundee-nda nùu nèhivi (xínchicùn xì contra xi Cristu), vàchi chicá fuerte mii-yá iá nùu anima-nda, te chicá mà fuerte mii-sí xicánúu guá ñuhiví yohó.

⁵ Nèhivi (nchícùn contra xi-ya) mà, cuisì modo xi ñuhiví yohó nihnú ini-nè, te ñàyùcànduá, modo xi ñuhiví yohó cáhàn-nè, te compañeru-nè, divi ducán nihnú stná ini-nè, te cudí ini-nè cunini-ne ñà-nduá cachí guá nècuàchì mà.

⁶ Doco ndohó, nèhivi (nihnú ini xi) Dios nduu-nda. Te nsidaa ana ináhá xí-yá, cudí ini-nè cunini-ne palabra cáhàn-nda. Doco nècuàchì có-nduú nèhivi xí-yá, có-cùnì-nè cunini-ne. Ñàyùcànduá, ducán nduú modo cundaà ini-nda a ndisa Espíritu Ìi chindéé xí iin nèhivi, te ó iin espíritu malu dandahví xì-né.

Cuú ndisa ini Dios sàhà nsidaa nèhivi

⁷ Nicanicuahàn ni cúcuú stnahá ini-nda sàhà-nda, (ñani) màni, vàchi divi ñà-jaàn nduá cuní Dios quida-nda. Nsidaa ana cuú ini-xi sàhà ñanitnaha-xi, dèhe ndisa Dios nduú-né, te ináhá stnahá-né xì-yá.

⁸ Doco nsidaa ana có-cúu ini-xi sàhà ñanitnaha-xi, có-ináhá-nè Dios, vàchi mii-yá, de por sí ducání cuú ini-yá sàhà nèhivi.

⁹ Divi ñà-jaàn nduá disàhà-xí ni techuún-yá mindaa Dèhemani-yá ni quixi ñuhiví yohó sàhà-ñá nihì-nda vida ndiaha nicanicuahàn. Sàhámà sàcundáa vaha ini-nda ñà-cúu ndisa ini Dios sàhà-nda.

¹⁰ Vàchi màdi ñá-sàni cuu ini ndohó sàhà mii-yá nduá, cóó; divi ñà-cúu ini mii-yá sàhà ndohó nduá, te sàhàyùcànduá ni techuún-yá Dèhemani-yá ni quixi-ya ni xihì-yá sàhà-nda, dandu mà nsínúu gá ini-yá sàhà cuàchi-nda.

¹¹ Pues cunaha-nsiá, nú ducán tantu guá cuú ini Dios sàhà-nda, dandu ndiá icà stná-nda cucuu stná ini-nda sàhà ñanitnaha-nda, ñani màni.

¹² Ni-iin nèhivi, tàñáha ga cuni-nè meru nùu Dios. Doco nú cuú stnahá ini-nda sàhà-nda, dandu vátùni cundaà ini-nda ñà-ini anima-nda iá-yá, te chindéé-yàndó sàa-nda cuu stnahá ini-nda sàhà-nda nacua ndiá icà-nda.

¹³ Te sàni sàhatahvi stná-yàndó Espíritu Ìi xí-yá. Ñàyùcànduá cundaà ini-nda ñà-sàni ndèe anima-nda ini anima mii-yá nduá, te mii-yá, iá stná-yà ini anima ndohó.

¹⁴ Te nsiùhù, sàni xinínùu-nsí ñà-nduá ni quida Yua-nda Dios ni techuún-yá Dèhemani-yá ni quixi-ya ñà-dacácu-ya nèhivi ñuhiví. Ñà-jaàn nduá cachítnùhu-nsi xì nèhivi.

¹⁵ Vàchi nú sàni cachí vate-nda ñà-divi Dèhemani Dios nduú Jesús, dandu iá Dios ini anima-nda, te sàni ndèe stná anima-nda ini anima mii-yá.

¹⁶ Sàni xini-nda ñà-cúu ndisa ini-yá sàhà-nda, te sàni xinindisá stná-nda ñà-jaàn. Vàchi mii-yá, de por sí ducani cuú ini-yá sàhà nèhivi. Ñàyùcànduá, nú iin-ni cuú stnahá stná ini-nda sàhà-nda, dandu vátùni cundaà ini-nda ñà-sà-íá anima-nda ini anima mii-yá, te mii-yá, iá stná-yà ini anima ndohó.

¹⁷ Ducán iá sàhà ñà-ni sàa-nda cuu ndisa ini-nda sàhà-yá, dandu na sàa quivì juiciu, vátùni cunihnu ini-nda, mà yúhì-nda, vàchi na ian nihnú ini mii-yá, ducán nihnú stná ini ndohó na ndoó gá-nda ñuhiví yohó.

¹⁸ Te nú cuú ndisa ini-nda sàhà-yá, dandu sadiàmà nùu ñà-yúhì-nda. Doco nú yúhì-nda, dandu dandóhàmàndó. Te cunaha-nsiá, nsidaa ana yúhì, cumáni vá sàa-nè cuu ini-nè sàhà-yá modo ndiá icà-né.

¹⁹ Ndohó, cuú ini-nda sàhà-yá, vàchi ñihna mii-yá ni quesaha cuú ini-yá sàhà-nda.

²⁰ Doco vihini cachi iin nêhivî ñà-cùù ini-nè sàhà-yá, mate íá iin ñanitnaha-ne có-xiñhù-né. Pues nú ducán, dandu (náhà claru) dandahví uun-ne. Vâchi nú có-cùù ini-ndà sàhà iin nêhivî sàni xininùù-ndà, dandu ¿nansa cui cuu ini-ndà sàhà iin ana tâñáha ga cuninùù-ndà nahi Dios?

²¹ Cunaha-nsiá, nsidaa ndohó nècuàchì cuú ini-xi sàhà-yá, sàni dândàcú stná-yá nùù-ndà ñà-nì cùù stná ini-ndà sàhà ñanitnaha-nda.

5

Nansa cundee-nda nùù nêhivî malu ñuhivî yohó

¹ Nú sàni xinindisa-nda ñà-divi Cristu nì quixi ansivi nduú Jesús, dandísá, dèhe Yua-nda Dios xinduu-nda; te nú cuú ini-ndà sàhà mii-yá ana nduú Yua-nda, dandu cuàhàn-nda cuu stná ini-ndà sàhà nsidaa dèhe-ya.

² Vâchi nú cuú ini-ndà sàhà-yá, te chivàha-nda ñà-nduá cachi-yá, dandu cundaà ini-ndà, cuú ndisa ini-ndà sàhà ñanitnaha-nda xinduu stná dèhe-ya.

³ Vâchi ñà-chivàha-nda ñà-nduá nì cachi-yá, divi ñà-cùù ndisa ini-ndà sàhà-yá queé stná mà. Te ñà-nduá dândàcú-yá, mà cúñáñá-ndá chivàha-ndañá.

⁴ Vâchi cunaha-nsiá, nsidaa ana nduú dèhe ndisa-ya, nicanicuahàn icúmí-nê cundee-né nùù nêhivî malu ñuhivî yohó. Vâchi divi sàhà-ñá xiníndísá-ndá mii-yá, ñà-jaàn nduá dísàhà-xí ñihì-ndà cundee-nda nùù nècuàchì mà.

⁵ Vâchi ¿ana gà cui cundee-xi nùù nsidaa nêhivî malu ñuhivî yohó? Cuisi nêhivî xiníndísá-xí Jesús ñà-nduú-yá Dêhemani Dios cundee.

Ñà-nduá cachítmùhu xi-nda sàhà Dêhemani Dios

⁶ Nì quixi Jesús ñuhivî yoho, te nì cuhii-yá xì tècuí, te nì xitiá stná nùù-yá. Màdì cui siá nì cùhii-yá xì tècuí nduá; cóó, divi sàhà-ñá nì cutiá stná nùù-yá nduá nì quixi-ya. Te Espiritu Ìi xí-yá nduú ana datnúù xì anima-nda sàhà nsidaajàn, vâchi micuisi ñà-ndáá nduá cachí Espiritu Ìi.

⁷ Cunaha-nsiá, nùù gloria na ian ndoó ùni ana cachítmùhu xi-nda sàhà stná mà, divi Yua-nda Dios, xì (Dêhemani-yá nani) Palabra Ìi, xì stná Espiritu Ìi xí-yá. Doco imindaa mii-yá nduú-yá.

⁸ Te ñuhivî yohó, ùni stná modo íá cundaà ini-ndà sàhà Jesús, vâchi Espiritu Ìi xí-yá nduú iin ana cachítmùhu sàhà-yá; te íá stná tècuí nì cuhii-yá, xì stná nùù-yá nì xitiá. Sàhà nsi-ùni modo jaàn cundaà ini-ndà sàhà-yá, doco iin-ni razón ndiaha nduú nsidaámà.

⁹ Cunaha-nsiá, nú nêhivî ùun cachítmùhu xi-nda iñàha, mà ùhì xiníndísá-ndá palabra xi-ne. Te nú ducán, dandu chícá más ndiá icà-nda cunindisa-nda razón ndiaha sàni cachítmùhu Dios sàhà Dêhemani-yá, vâchi íá ñà-nduá sàni cachi-yá.

¹⁰ Te ndohó, ináhá-ndá palabra ndàcuisi nduá, vâchi ñuhá anima-nda, te ducán ñuhú stná anima nsidaa ana xiníndísá-xí Dêhemani-yá. Doco nècuàchì có-xiníndísá, (ndahví-nè), vâchi ducán queá na ian ndaníhì tnúhú-nè Dios, vâchi có-xiníndísá-né ñà-nduá sàni cachi-yá sàhà Dêhemani-yá.

¹¹⁻¹² Te divi ñà-yohó nduá sàni cachi-yá: íá nansa ñihitáhvi-nda vida ndiaha nicanicuahàn quida-ya, te Dêhemani-yá nduú ana sáhatahvi xì vida mà. Ana iná cáá Dêhemani-yá anima-xi, sà-icúmí-né vida ndiaha ma, te ana cóò-yá anima-xi, cóò stná-mà nùù-né.

Nì cacán tàhvi-nda nùù Dios sàhà-ñá ñihì-nda gracia

¹³ Palabra yohó tiai nùù mii-nsiá nècuàchì cahví xì Dêhemani-yá, te ndácùcahan xi quivi-yá áma sàá-nsiá cundaà vâha ini-nsiá ñà-sàni ñihì ndisa-nda vida ndiaha nicanicuahàn.

¹⁴ Te vichi có-yùhì-nda cacán tàhvi-nda nùù-yá, vâchi nú iin chuun vâha nduá xicàn tàhvi-nda, dandu iníni-yá, ináhá-ndá.

¹⁵ Te nú iníni-yá na xicàn tàhvi-nda ducán, dandu ináhá-ndá sà-icúmí-nda ñà-nduá nì xicàn-nda, ndéni iñàha nì cui nì cundúá.

¹⁶ Nú xini-nda iin nècuàchì iin-ni cahví stná xi-yá ñà-nì quida-ne iin cuàchì có-nduú cuàchì cui-nda sàhà-xí, dandu xiñuhu cacán tàhvi-nda nùù-yá sàhà-ñá nì ñihì-né cutiacu va-ne, nú ndisa có-nduá iin cuàchì cui-nda sàhà-xí. Vâchi íá cuàchì cui-nda sàhà-xí, te nú sàni quida iin nêhivî-ñá, dandu mà cacán tàhvi-nda nùù-yá sàhà-né.

¹⁷ Nsidaa ñà-có-ndiáá, cuàchì nduá. Doco íá cuàchì mà cúí-nda sàhà-xí.

¹⁸ Cunaha-nsiá, nú dèhe ndisa Dios nduu-nda, dandu có-quidá ndevàha ga-nda cuàchì. Te ndiáá stná Dêhemani-yándó sàhà másà tnúí ñà-malu-ndó.

¹⁹ Divi Dios nduú Yuandiaha-nda, ináhá-ndá, doco nsidaa gà nêhivî ñuhivî, ndahà ñà-malu ndoó-né.

²⁰ Te ináhá-ndá nì quixi Dêhemani-yá, te nì sàà-nda nì cundaà ini-nda nì quida-ya, vátùni nì xini stnaha-nda xì mii-yá ana nduú Dios ndisa; te nì ndèe stná anima-nda ñni anima

mii-yá, ñàyùcàndùá, sà-lá anima-ndà ini anima Dèhemanì-yá Jesucristu. Te divi mii-yá nduú-yá Dios ndisa, te vida ndiaha nicanicuahàn sáhatahvì-yándô.

²¹ Hijos míos, cuidadu cundoo-nsia ñà-màsà cáhvì-nsiâ ni-íñàha có-ndùú ndisa Dios.

Tutu Ùi Nì Tiaa San Juan

¹ Yùhù nduí nècuàchì sahnú ináhá-ní, te tiaí tutu yohó nùù mii-ní nècuàchì ñahà nì nacàxin Dios, xì nùù stná dèhe-ní. Yùhù, cuú ndisa inì sàhà nsidaa-nsiá. Doco màdì cuiisì yùhù, vèchi nsidaa gá ana cundáa inì-xì sàhà palabra ndàcuisì xí-yá, cuú stná ini-nè sàhà-nsiá.

² Vèchi iin-ni palabra ndàcuisì nchícùn-ndà, te nicanicuahan icúmí coo palabra mà anima-ndà.

³ Pues vichi xicàn tàhvì nùù Yua-nda Dios xì Dèhemani-yá Stoho-ndà Jesucristu ñà-ni cuàha-ya mii-nsiá cuàhà gracia xi-ya. Ni cundéhe ndahví stná-yà mii-nsiá, te contentu ni cundóo-nsiá quida-ya. Te iin-ni, ni cunchícùn vii-nsiá palabra ndàcuisì mà, te ni cúcuú stnahá stná inì-nsia sàhà-nsiá.

⁴ Cuàhà gá nì cudii inì na ní xinitnùhi ñà-iin-ni quidá víi dèhe-ní nacua cachí palabra ndàcuisì nì cachi Yua-nda Dios quida-nda.

⁵ Te vichi sacundáhvì nùù mii-ní, señora, ñà-ni cùú inì-ní sàhà nsidaa ñanitnaha-ní. Vèchi màdì lácá vichi-ni nì sàcòo palabra cachí ducán, còo, dècuèndè tiempu nì quesaha xitiá palabra xi-ya, ndè quivì yucán nì ndacu nuù-ndà cuu stnahá ini-ndà sàhà-ndà. Te vichi tiaí nùù mii-nsiá ñà-iin-ni nì quidá stná-nsiá ducán.

⁶ Te ¿nansa divi iá ñà-cúú stnahá ini-ndà sàhà-ndà? Pues divi ñà-chivàha-nda ñà-nduá nì cachi-yà nduá. Te mii-yá, dècuèndè sàhana, ducán nì cachi-yà (xì-ndà) ñà-iin-ni nì cunchícùn-ndà ichì ndé cuú stnahá ini-ndà sàhà-ndà.

Cuidadu ni cundóo-ndá sàhà tètñùhù cuní datúcuì xì-ndà inga ichì

⁷ Vèchi vichi sàni ndecoyo cuàhà tètñùhù; xicánúú-te ñuhivì, cachí-te ñà-cóni ía ndisa iquicúñù Jesucristu na ní quixi-ya ñuhivì, cachí-te. Cunaha-nsiá, divi-tè xínduu ndisa-tè tètñùhù, te xínduu stná-te contra xi Cristu queámà.

⁸ Ñàyùcànduá, cuidadu ni cundóo-ndá sàhà-té, còtó ndañuhu chuun vaha sàni quida-nda; chicá vaha nì coo nsihì ñà-vaha icúmí-ndá ñihì-ndà.

⁹ Vèchi nú nì túcù iin nèhivì inga ichì, te nacoo nihni-ne ichì Cristu, dandu ñà-jaan cundaà ini-ndà, còo ndisa Dios nùù anima-nè. Doco nèhivì iin-ni nchícùn ñà-nduá cachí Cristu, ía ndisa Yua-nda Dios ini anima-nè, te inácaa stná Dèhemani-yá.

¹⁰⁻¹¹ Te nú nì sàa iin nèhivì vehe-nsia (ñà-chinaha-nè mii-nsiá) iin dàñùhù có-nduú dàñùhù sàni cachimà, màsà dáyàha-nsianè vehe, ni màsà cásàhú gá-nsiá xì-né. Vèchi nú ducán nì quida-nda, dandu icúmí stná-ndà nacuida cuàchi-nda nahi mii-né.

¹² Cuàhà gá stná ñà-cùnì guè cachì xì-nsiá, doco vichi tuxí inì chicá vaha màsà tiáá guè nùù tutu yohó, vèchi nacáni inì sàì nàcòtì mii-nsiá, dandu ndatnuhu vaha-nda, te cudii gá ini-ndà.

¹³ Cunaha-ní, yohó ndoó stná dèhe cùhì-ní nì nacàxin stná Dios, te cásàhú stná-nè xì-ní. Sà-íá.

Tutu Ònì Nì Tiaa San Juan

Nansa nì tiaa Juan nùù iin nècuàchì nani Gayo, te cachí-nè chuun vâha nduá quidá nècuàchìmà

¹⁻² Yùhù nduì nècuàchì sahnú ináhá-ní, te cásàhúì xì mii-ní Gayo. Cunaha-ní, màni cuáhà-ní nùì; cuú ndisa inì sàhà-ní. Te xícàn tàhvi stnàì nùù Dios ñà-nì yâha vâha-ní nsidanicuú chuun, te màsà quícuéhè-ní; nì coó vâha-ní nacua iá vii stnà anima-ní.

³ Yùhù nì cudíi cuáhà inì na ní caquesaa ñani-ndà, te nì nacani-ne xí sàhà-ní ñà-iin-ni xiníndísà vii-ní palabra ndàcuisì xí Dios, cachí-nè, vâchi iin-ni chívâha vii-ní ndudu ìì xí-yá.

⁴ Cunaha-ní, nahi dèhi xínduu-nsia, te yâha ga cudíi inì na xiníntùhi quidá víi-nsiá nacua cachí palabra ndàcuisì. Ndisa, divi ñà-jaàn nduú ñà-yâha ga cudíi inì sàhà-xí.

⁵ Ñani màní, sàni xinì ñà-tùha-ní quida vii-ní, vâchi siempre chindéé-ní dava ga nèhivi xiníndísà, te nú xínduu-ne nècuàchì vâxi inga ñuu, dandu chicá más cúnsihi inì-ní chindee-ní nècuàchìmà.

⁶ Vâchi sàni nacani-ne xì nsidaa nsiùhù na natácá-nsi cahvi-nsí Dios, cachí-nè xì-nsí nansa cuú cuáhà inì-ní sàhà-nè. Ñâyùcàndùá, quida-ní seguir chindee-ní nècuàchì (sàa vehe-ní ducán), te màndaca ichi-nínè nacua cuní Dios quida-nda.

⁷ Vâchi mii-nè, sàhà-ñà cuú stnà ini-nè sàhà-yá, ñâyùcàndùá nì caquihin-ne ichi ñà-cacanu-ne chuun ìì xí-yá. Ni có-xícàn stnà-nè ní-ìñàha nùù nèhivi có-xiníndísà ñuu ndé yâha-ne.

⁸ Ñâyùcàndùá, ndohó, ndiá icà-ndà dayâha-nda nècuàchìmà vehe-nda, te ducán chindee stnà-ndà (xì chuun quidá-né dacuítà-nè) palabra ndàcuisì xí Dios.

Nansa quidá Diótrefes, có-quidá víi-né, cachí Juan

⁹ Nì tiaa iin carta nùù nèhivi xí Dios natácá (ndé iá-ní), doco Diótrefes, có-cùnì-nè nacuni-nè nsiùhù, vâchi mii-né cudíi ini-nè cunduu-ne ana dandacú.

¹⁰ Ñâyùcàndùá, na sái jaàn, icúmì càhìn xì-né, vâchi có-quidá víi-né, cáhàn ùhì-nè dìquì-nsí. Te màdi cuisì ñà-jaàn; chicá mal quidá stnà-nè. Vâchi na xísàà ñani-ndà ñuu-nsia, dandu nacuaá-né nècuàchìmà. Te nú iá iin-nsia cuní dayâha xì nècuàchìmà vehe-xi, dandu sadí Diótrefes mà nùù-nsiá; còò gá permisú nataca gâ-nsiá xì nèhivi xí Dios, cachí-nè.

¹¹ Doco mii-ní ñani màní, màsà cúnchícùn-ní ichi malu; còò. Cuisì ñà-vâha ndisa nì cúnchícùn-ní. Vâchi iin nèhivi quidá víi, nèhivi xí Dios nduú-né; doco iin nèhivi quidá quíni, ní có-sâha tnùnì ini-nè nansa ndisa iá-yà.

Nansa quidá nècuàchì nani Demetrio

¹² Daaní, jaàn iá stnà Demetrio. Vâha ga quidá-né, cachí nsidaa nèhivi. Te nâhá xicà palabra ndàcuisì nduá nchícùn-nè. Te stnà nsiùhù, cachí stnà-nsi vâha ndisa-ne, te ináhà-ní màdi tnúhu nduá cachí-nsi.

¹³ Cuáhà gá cuàhìn tiaa nùù-ní ni cuí, doco vichi mà tiáá gué` nùù tutu yohó,

¹⁴ vâchi nacání inì yâchi sàà mimí nàcòtì mii-ní, dandu ndatnuhu-nda.

¹⁵ Nì cúcuéé ní-ní. Cásàhú nsidaa amigo xì-ní. Te mii-ní, casàhú stnà-ní xì iin iin amigo xì-nda ndoó jaàn.

(Ducán nì nsihi carta ùnì nì tiaa San Juan.)

Tutu Nì Tiaa San Judas Tadeo nù Nsidaa Nèhivì xí Dios

¹ Yùhù nduí Judas, iin ana xinúcuáchí nù Stoho-ndà Jesucristu. Te nduú stnái ñani Jacobo. Te tiaa carta yohó nù mii-nsiá nècuàchì sàni nacàxin stná Yua-nda Dios. Màni gá stná-nsiá nù-yá, te divi Jesucristu nduú ana ndiaá xì stná-nsiá.

² Nì cùndéhe ndahví cuàhà-yá mii-nsiá, te nì cùcuéé ni-nsia quida-ya. Te mii-nsiá, ni cuú stnahá stná inì-nsia sàhà-nsiá.

Cuidadu ni cùndóo-ndá ñà-màsà dándáhvì tètñùhù ndohó

³ Ñani màni, cuàhà gá nì nacani inì tiaa iin tutu càhìn xi-nsiá sàhà salvación xi-nda ni cuí. Doco después nì cundaà inì chícà vaha tiaa, te cuacundahví nù-nsiá ñà-nì cuàhandee inì-nsiá (ñà-màsà dándáhvì nèhivì mii-nsiá) sàhà ñà-nduá xiníndísá-ndá. Nèhivì ì xí Dios xinduu-nda, te ndahà ndohó nì nacoo-ya palabra ì xiníndísá-ndá.

⁴ Doco cunaha-nsiá, xicánúú dava nèhivì quidá maña, te sàni quihvi stnahá stná-nè xi-nda. Malu sàstnùhù-nè, doco dècuèndè sàhana sàni tiaa nèhivì xí Dios sàhà nècuàchímà ñà-icúmí-nè nìhì-nè castigu xi-ne, vachi tucu nihnú inì-nè sàhà gracia xi Yua-nda Dios. Tuxí inì-ne vátùnì quida quini ndevàha-nda, vachi cuicahnú inì-yá sàhà-nda, cachí-nè. Te ducán queamá na ian có-nàcúnì-nè Stoho-ndà Jesucristu, divi mii-yá ana nduú mindaa Stoho-ndà Dios.

⁵ Ñàyucàndüá, cuní dansínúú inì mii-nsiá nansa nì cuu xi nèhivì raza Israel sàhana. Mate sàni caquee-ne libre nù ñuu Egipto nì quida Stoho-ndà Señor, doco después nì dándáñùhù-yá cuàhà-nè sàhà-ñá cóni xiníndísá-néyà. Sà-ináhá-nsiá ñà-jaàn, doco cuní dansínúú inì mii-nsiá.

⁶ Daaní, stná ángel (sàhana), cóni ndóo-ne lugar ndé dandacú-né; nì nacoo-ne lugar ndé ndiá icà-nè cundoo-nemà. Ñàyucàndüá, nì sàcùndiadi vaha-ne, nì sàcùnùhì-nè cadena, te yucán cundoo-ne nicanicuahàn ndé ìn tnúú dècuèndè cachi sàà quivì cahnú xí Dios, dandu ndundaà sàhà cuàchì-ne.

⁷ Daaní, ducán nì quida stná nèhivì nì sandoo ñuu Sodoma xì ñuu Gomorra, xì ñuu yatni ga yucán, vachi nansa-nì nì cui nisa nacuidiqui uun tiaa ñuu mà nècuàchì ñahà, te ducán nisa quida stná-te xì tiaa. Ñàyucàndüá, nì nìhì-nè iin castigu ñà-ndoho-ne mahi ñuhu xixìn nicanicuahàn, sàhà-ñá ducán cundaà inì nsidaa nèhivì ñà-mà vaha quida-nda ducán.

⁸ Mate ñà-ndáà nduú nsidaa ñà-jaàn, doco tè-xidandahví mà, iin-nì có-quidáñùhù-tè cuerpu xi-tè, có-ndulócò-te sàhà ñà-nduá cachí Stoho-ndà Señor; te tùha stná-te càhàn quini-tè sàhà ana fuerte ndoó ansivì. Ducán xiquida-tè, vachi ducán nì sàni-te, (cachí-te).

⁹ Doco cunaha-nsiá, dècuèndè ángel chícà dandacú nani Miguel, nì mii-nè, cóni cànáhà-nè xì ñà-malu quivì nì nàà tnahé-nè xi-sí na nì cunì-sí nìhì-sí iquicúñù nsì-Moisés (sàhana). Vachi Miguel mà, cuisì ní cachí-nè xi-sí: “Dios nì cadí xì núu-ní”.

¹⁰ Doco tè-xidandahví mà, mate có-sà-te cundaà inì-te sàhà iin chuun, doco mà úhì càhàn quini-tè sàhà-ñá, vachi cutu nihnú inì-te na iin quisi, mà cùl cundaà vaha inì-te, doco ñà-nduá de por sí nihnú inì-te, divi ñà-jaàn icúmí dándáñùhù xí-tè.

¹¹ ¡Ndahví nsidaa-té! Vachi ichì tè-nì sanani Caín nduú ichì xinchicùn-te. Sàni tucù stná-te na ian nì tucù Balaam (sàhana); vachi Balaam mà, puru sàhà dihùn nisa quidachuùn-te chuun ì xí-te. Daaní, ndudává stná tètñùhù ndoó vichì xi (tiaa sàhana nì sanani) Coré. Cuàhà gá nì càhàn quini stná tèmà diquì ana dandacú. Ñàyucàndüá, nì ndañuhu stná-te.

¹² Tètñùhù ndoó vichi, cudí inì-te cutnahá-te xi-nsiá na natácá-nsiá ndoó màni-nsiá xixí-nsiá. Doco ndóo cahan-nda quidá-te, vachi có-chivaha-tè tñùhùhu nù nì-ñàha. Cuisi sàhà mii-tè ndulócò-te. Nahì vicò tàchí, ducán xinduu-tè (ñà-còò chuun vaha quidá-te). Ñàyucàndüá, ducán xinduu stná-te nahì yutnù có-càn ñà-vidì-xi tiempu xan, te ò nahì yutnù nì tñuhu-nda, (te nì ichì) yohò-nú, ducán xinduu stná-te, ñàyucàndüá, ùl modo còò chuun vaha quidá-te.

¹³ Cunaha-nsiá, nahì mar ndé nacuahnú yucù tècuí, te vaxì chihñù nù-té, ducán xinduu stná tè-tñùhù mà ñà-quini guá xiquida-tè. Nahì stná sitnúú xicá nihñì ansivì, ducán quidá stná-te, (vachi sàni tucù-te inga ichì), ñàyucàndüá lugar xi-tè cunduu iin xaan ndé ìn tnúú nduchi nicanicuahàn.

¹⁴ Daaní, nì ìa stná Enoc sàhana. Descendencia usà xi Adán nì sanduu nècuàchì yucán. Te nisa càhàn stná-nè cuenta xi Dios, nì cachitñuhu-ne sàhà tètñùhù xicánúú vichi. Te dohó nì cachi-nè: “Cunaha-nsiá, icúmí Stoho-ndà Señor quixi-ya ñuhivì, cutnahá stná-yá xì cuàhà sàstnùhù ángel ì xí-yá.

¹⁵ dandu ndàcàn-yá cuenta sàhà cuàchì nì quida nèhivì, vachi icúmí-yá dacúndàà inì-yá nècuàchì malu mà ñà-có-íá vaha ñà-nì quida quini-ne ducán, te nì có-íá vaha stná ñà-nì

nandòdó-né ichi-yá, te ni càhàn ndevàha-ne dìquì-yá, vàchi cuàchi cahnú nduámà”. (Ducán ni cachi Enoc sàhà tètñùhù ndoó vichi.)

¹⁶ Te cunaha-nsiá, có-ndôo stná inì-te sàhà ni-ìñàha. Puru cudúchí inì-te sàhà nsidaá, te cuisì nandúcu-tè ñà-nduá xího mii-té quida-tè. Có-yùhí yuhù-té càhàn-te na ian mii-té nduú-te te mii-té. Vihini coo nansa càhàn tñùñuhu-té xí nèhivì, doco cuisì sàhà interés xi mii-té nduájàn.

¹⁷ Doco mii-nsiá nècuàchì mánì guá nùì, xiñuhu nsinuu inì-nsia nansa ni cachi apóstol ni nihì chuun nùù Stoho-ndà Jesucristu,

¹⁸ vàchi ni cachitñùhu nècuàchì mà ñà-seguru icúmí cundoo cuàhà tè-sácùndiaa, xì cuàhà stná tètùha quini.

¹⁹ (Te ñà-ndàà nduá), sàndòó-te vichi; divi xínduu tiàa siempre sahdé dava xi nèhivì. Cuisì quidá-te ñà-nduá xího mii-té quida-tè, vàchi còò Espíritu Ìì xí Dios ini anima-te.

Nansa ndiá icà-ndà quida-nda

²⁰ Doco mii-nsiá nècuàchì cùù guá ini sàhà-xí, chicá xiñuhu cunindisá vii-nsiá palabra ìì, vàchi ducán nacuahandee ini-ndà. Te na xicàn tàhvi-ndà nùù Dios, ni cuàha-nda chindee stná Espíritu Ìì xí-yá ndohó.

²¹ Ni-iyuhu màsà tucù-ndà inga ichì còtò nandòdó-nda ñà-cuàhà guá cuú ini-yà sàhà-ndà. Te cuéyàani cundiatu-nda ndè cachi sàà quivì cundehè ndàhvi-yàndó, te nihì-ndà vida ndiaha nicanicuahàn.

²² Dava nèhivì, iá-nè xì cuàhà duda; ñàyùcànduá, càhàn vii-nsiá xì-né dècuèndè ni sàà-nè cundaà vaha ini-nè.

²³ Xiñuhu chindee-nda nècuàchì mà, vàchi ducán queámà na ian meru cuàhàn-nè quiñuhu-nè, te ni ditá-ndané, te ni càcu-ne. Te nsidaa stná nèhivì (sàni tucù dahuun), cundehè ndàhvi stná-ndané, doco cuidadu ni cundóó-ndà ñà-màsà cúmànchá stná anima-nda, vàchi dava-ne, quini iá stná modo xi-ne.

Nansa ni dàxínu San Judas carta yohó, cuàhà gá naquímáni-né Dios

²⁴⁻²⁵ Cunaha-nsiá, mindaa mii-yá nduú Dios; cuisì mii-yá nduú ana nchichí ndisa, te cuisì mii-yá nduú ana dacácu xi-nda; vátùni cundiaa-yàndó ñà-màsà tucù-ndà inga ichì có-ndiáá; vátùni cundiaa-yàndó te ducán nihì-ndà sàà-ndà nùù-yá, ni-ìin cuàchi-nda mà túi, dandu cundehè-ndà ñà-ndiaha guá-yà, te cudìì cuàhà stná ini-ndà. Pues vichi ndácùcàhín Stoho-ndà Jesucristu, te ducán naquímáni cuáhí mii-yá. Te xicàn tàhvi ni queé cuàhà tñùñuhu ndiaha xí-yá, te ni sàà-yà cusahnú fuerte-yà inicutu, te ni cundàà stná ini nèhivì ñà-ndahà mii-yá iá nsidanicuu ñàhà ndè sàhà xi dècuèndè vichi, xi nicanicuahàn. Amén.

Ndudu Ì Nì Dàcùní Dios San Juan

Nà-nduá cachínùhu nùu tutu yohó

¹ Tutu yohó nduú tutu ndé cachínùhu Jesucristu nà-nduá sà-ítúú vaxi cuu. Nùu Yua-nda Dios nì nìhi Jesucristu palabra yohó nà-dacúndéhe-yá nsidaa nèhivi xinúcuáchí nùu-yá. Ìn ángel mozo xi-ya nduú ana nì cachitnùhu xi palabra yohó, te nì inini yùhù. Juan naní, te nduú stnái iin nèhivi xí mii-yá.

² Nùu tutu yohó cáhàn Yua-nda Dios; te itándiaa stná palabra xi Jesucristu, xì stná nsidaa nà-nduá nì xini yùhù. Yùhù testigu nduí, te nsidaa palabra itándiaa yohó, nà-ndáa nduá.

³ Ndiaha gá coo xi ana cahvi xì tutu yohó, xì stná nèhivi iníni xân, nú nì chívaha-ne nà-nduá cachá; vachi palabra nì quixi nùu Dios nduá, te sà-ítúú cuu ndisa nà-nduá (cachitnùha).

Nansa ni casáhú Juan xi nèhivi xí Dios, ndoó nùu usà ñuu

⁴⁻⁵ Yùhù Juan, cásahúí xì nsidaa mii-nsiá nèhivi natáca cáhvi xì-yá xíndoo usà ñuu ladu Asia. Nì cuní màni-yá mii-nsiá, te nì ndóo vaha iní-nsiá quida-ya. Ducán cuní-yá cuu xì-nsiá, divi mii-yá ana itíacú nicanicuahàn. Dècuèndè nicanicuahàn iá-yá, te ndé nicanicuahàn quivì nùu-xí icúmí-yá coo-ya. Te ducán cuní stná usà espíritu ndiaha itá ladu nùu silla ndiaha xí-yá. Te ducán cuní stná Jesucristu, divi ana nì cachitnùhu xi-nda puru palabra ndacuisl. Làcà mindaa mii-yá nduú ana nì natiacu primeru, làcà mindaa-yá cusáhnú nùu nsidanicuú ana dandacú ñuhivì yohó. Ansivéhé-yá, cuu ini-yá sàhà-ndà, te sàhà nùu-yá (nì xitià), ñàyùcànduá nì ndoo cuàchi-nda nì quida-ya.

⁶ Sàhà mii-yá sàni nìhitáhvi stná-ndà chuun nà-dandacu-nda, xì stná chuun nahi chuun xì dùtù nà-cunucuachi-nda nùu mii-yá ana cahvi-yá, divi Yuandiáhá-yá. Pues vichì nùu mii-yá nì coó tñùhuu xì nsidanicuú nèhivi, te nicanicuahàn nì cusáhnú-yá nùu-ndà, amén.

⁷ Cunaha-nsiá, icúmí-yá naxicocuñn-yá. Mahì vicò icúmí-yá nuu-ya tui-ya nùu nsidanicuú nèhivi. Te icúmí cundehè stná nèhivi (nì xicàn) nì quihvi lanza icà-yá. Dandu yáha ga tñana fuerte nsidaa nèhivi nsidanicuú ñuu iá ñuhivì na cuni-nèya. Ducán icúmí coo, cachí.

⁸ Cachí mii-yá: "Nicanicuahàn ié". Sàhà yùhù nì sàcòo nsidaa iñàha, te còò ni-iñàha chicá cunaha nù. ñàyùcànduá, ducán nduí nahi letra nuu nani A, te ducán nduú stnái nahi letra dansihí nani Z".

Ducán cachí mii-yá ana nduú Dios vivu, vachi dècuèndè sàhaha iá-yá, te nicanicuahàn coo stná-yá quivì vaxi xi-nda, te nsidanicuú iñàha, vātùnì quida-ya.

Nansa ni nìhitáhvi Juan ni dàcùnì Dios-nè Jesucristu, te ndiaha gá-yá

⁹ Yùhù Juan, iin-nì nduú stnái dèhe Dios nahi mii-nsiá, iin-nì ndohò stnái sàhà-yá, te iin-nì ndiatù stnái sàà quivì cusahnú Jesucristu, te quidándéè inì dècuèndè sàà quivì mà. Cunaha-nsiá, yucán nìsa le ñuu nani ñuu Patmos, iin ñuu indúhu mahì mar. Divì sàhà-ñà nchícuin Palabra xi mii-yá, ñàyùcànduá nì sàì yucán (nì quida tè-xidandacú), vachi vate nì cachì ié' ladu xi Jesucristu, ñàyùcànduá nì sàì yucán.

¹⁰ Te nì cuu iin quivì (domingu), divi quivì xí mii-yá, te ié' ndahà Espíritu Ì xí Dios, na ian sánf, dandu nì tiacu cáhàn-yá yátí, fuerte iá tàchì-yá, na ian sivi corneta.

¹¹ Te dohó nì cachì-yá:

—Nicanicuahàn ié'; sàhà yùhù nì sàcòo nsidaa iñàha, te còò ni-iñàha chicá cunaha nù, vachi nahi letra A nduí, xì nahi letra Z. Vichì icúmí-yò tiau nùu tutu nsidaa nà-nduá nì xinù, te dasáa-ñà nùu nèhivi-xí ndoó usà ñuu ladu Asia. Dohò nani usà ñuu yucán: ñuu Éfeso, xì ñuu Esmirna, xì ñuu Pérgamo, xì ñuu Tiatira, xì ñuu Sardis, xì ñuu Filadelfia, xì ñuu Laodicea, ducán nani ñuu yucán —nì cachì-yá.

¹² Daaní, nì nacucóe yátí nà-cundehì ana cáhàn, te primeru nì xinì yucán itá usà candeleru. Oro nì cuyucán, te itá iin iin isì xíxin.

¹³ Daaní, mahì usà isì mà nì xinì jaàn iin mii-yá, na indéhe nèhivi indéhe-yá, ndixì-yá iin dùhnù quihín sàà ndè diquì sàhà-yá. Te nchìca-ya nuhnì iin siuhma nì cuyucun oro.

¹⁴ Cuxín yaa ididini-yá nahi idi nì ndoo, ò nahi yùhà. Te nduchínúú-yá, tñuá nahi ñuhu.

¹⁵ Daaní, sàhà-yá, yéhé nina-ñà na iin càa yahá nì dàà titi ini xitnù. Te fuerte cáhàn stná-yá na ian cahá tēñuhu cuàhà.

¹⁶ Te ndahà cuàhà-yá iníndáhá-yá usà sitnùu, te iníyúhú-yá na iin espada ñiin ndúu ladu-xi. Daaní, nùu-yá, nchiá na ian nchií fuerte orá.

¹⁷ Ducán nì xinì mii-yá, dandu nì nduè sàhà-yá na ian sàni xihì. Doco ndahà cuàhà-yá nì tñii-ya iqué, te nì cachì-yá:

—Còo, màsà yùhù. Cunahu, sàhà yùhù nì sàcòo nsidaa iñàha, te còò ni-iñàha chicá cunaha nùì.

¹⁸ Te vichi itiácuì. Ñà-ndáá nduá nì xihì, doco sàni natiacuì, te nicanicuahàn icúmi cutiacuì. Yùhù nduú ana dandacú sàhà nsii, nansa cuu xi-né, te dandacú stnáì sàhà andea (ana cùhùn yucán).

¹⁹ Vichi tìaa-yó nsidaa ñà-nduá nì xinù yohó, te tìaa stná nansa iá tiempu vichi, xì nansa icúmi cuu stná quivì nùù-xì.

²⁰ Cunahu, cuàhìn cachi xùn ndiá nduá cuní cachi usà sitnúù iníndáhá ndahà cuàhì nì xinù. Te cuàhìn cachi xùn ndiá nduá cuní cachi usà candelero oro yohó. Pues, usà sitnúù yohó, xíndua usà nècuàchi cachítnùhu palabra-xì. Te usà candelero oro yohó, xíndua usà grupu nèhivì natáca iníni xì palabra xi mà ndè usà ñuu yucán.

2

Razón ni dásáa Jesús nùù nèhivì xí-yá ñuu Éfeso

¹ Vichi, tìaa-yó iin tutu cùhùn nùù nècuàchi cachítnùhu palabra xi ñuu Éfeso, dandu cahvi-neà cunini nsidaa nèhivì-xì ndoó ñuu yucán. Dohó tìaa: Yùhù nduú mii-yá iníndáhá usà sitnúù ndahà cuàhì, te xicánúì mahì usà candelero oro, te dohó cachí xì-ní:

² Ináhì nansa quida-ní vida xi-ní. Ináhì nansa nì sàhandee inì-ní quida-ní (chuun xi), te nì quidandee inì-ní. Te nèhivì malu, có-cùdì inì-ní modo xi-ne. Te dava nèhivì, nì cachi-nè xínduu stna-ne ana nì nihì chuun nùì, doco cóo, mà ndisá. Dandu mii-ní, nì nanducu váha-ní sàhà ñà-nduá nì cachi-nè, te nì cundaà inì-ní, tnuhu-né.

³ Cuàhà gá sàni quidandee inì-ní, mate cuàhà vida nì yàha-ní sàhà yùhù, doco iin-ni sàni quida-ní chuun xi, cóni nácóo-ñà.

⁴ Doco cunaha-ní, có-cùdì inì sàhà iyuhu ñà-nduá quida-ní, vachi có-cùù gá inì-ní sàhì nacua nisa cuu inì-ní sàhì dihna.

⁵ Ñàyucánduá, nsinuu inì-ní nansa nisa ia-ní nà táñàha ga quida-ní falta, te naxicocufin inì-ní sàhà falta mà, te quida tu-ní nacua nì saquida-ní antes. Vachi nù coó, sàì ndé iá-ní, te dacúxióe candelero xi-ní, nú mà nì naxícocufin inì-ní.

⁶ Doco iá iin ñà-vàha quida-ní, vachi có-xiñùhù-ní modo xíquida tè-nicolaíta. Yùhù, nì-iyuhu có-xiñùhì ñà-nduá quidá témá.

⁷ Nsidaa mii-nsiá nècuàchi natáca càhvi xì Dios, nì cúniní vaha-nsia ñà-nduá cachí Espiritu ñì xí-yá, vachi dohó cachí-yà: Nú nì cúndéé-nsiá nùù nsidaa ana cuní datúcu xì-nsiá, dandu nùù yùhù nihitáhvi-nsiá caxi-nsiá quisi vídi caná nùù yutnú ndiaha iin ndé iá ñuu ndiaha Dios, vachi fruta mà cutiacu-nsia nicanicuahàn.

Razón ni dásáa Jesús nùù nèhivì xí-yá ñuu Esmirna

⁸ Daanì, nùù nècuàchi cachítnùhu palabra-xì ñuu Esmirna, dohó tìaa-yó, dandu cahvi-neà cunini nsidaa nèhivì-xì ndoó ñuu yucán: Cunaha-ní, sàhà yùhù nì sàcòo nsidaa iñàha, te còò ni-iñàha chicá cunaha nùì. Ndisa, nì xihì, doco sàni natiacuì.

⁹ Yùhù ináhì ñà-nduá quida-ní, ináhì nansa yàha-ní cuàhà tñùndoho quidá nèhivì. Ináhì ndahví dahuun yàha-ní. Doco cunaha-ní, nùù yùhù cuica-ní. Te ináhà stnáì nansa quidá dava nèhivì, quini ndatnúhú-nè sàhà-ní, nècuàchi raza Judea xínduu-ne, cachí-nè, doco cóo, mà ndisá. Nèhivì natáca cuenta xi ñà-malu xínduu-ne.

¹⁰ Vichi icúmi-ní ndoho gà-ní quida nèhivì, doco màsà yùhì-ní ñà-nduá icúmi-ní yàha-ní. Dècuèndè cundiadi stná dava-nsia quida ñà-malu. Doco cunaha-nsiá, sàhámá vátuni cundaà inì-xì, a xiníndisá ndisa-nsia. Ùxin quivì coo tñùndoho ma. Doco mii-ní, iin-ni cunindisá vù-ní, mate nì cuí-ní quida-ne, dandu nihitáhvi-ní iin ñà-vàha nùì, divi ñà-cutiacu-ní vida (ndiaha nicanicuahàn).

¹¹ Nsidaa mii-nsiá nècuàchi natáca càhvi xì Dios, nì cúniní vaha-nsia ñà-nduá cachí Espiritu ñì xí-yá, vachi dohó cachí-yà: Nú nì cúndéé-nsiá nùù ana cuní datúcu xì-nsiá, dandu mà sàà-nsia cui-nsia ùì xichi (nahì nècuàchi dava ga).

Razón ni dásáa Jesús nùù nèhivì xí-yá ñuu Pérgamo

¹² Daanì, nùù nècuàchi cachítnùhu palabra-xì ñuu Pérgamo dohó tìaa-yó, dandu cahvi-neà cunini nsidaa nèhivì-xì ndoó ñuu yucán: Yùhù nduú ana nihì-xi espada diin nduú ladu xi.

¹³ Yùhù ináhì ñà-nduá quida-ní; ináhì nansa iá ñuu ndé iá-ní, vachi mero ñuu ndé dandacu-guá ñà-malu nduá yucán. Doco ináhì mii-ní ñà-iin-ni nhicùn-ní yùhù, te ndácùcahan-ní quivì, cóni nácuaa-ní yùhù, iin-ni xiníndisá-ní, mate yucán nì sahnì-té iin ana nì cachi vate iá-nè ladu xi, cóni chidéhè-nè. Divi nduú Antipas, te yucán nì xihì-nè ñuu ndé iá fuerte guá ñà-malu.

¹⁴ Doco, cunaha-ní, có-cùdì inì sàhà iyuhu ñà-nduá quida-ní. Vachi jaàn ndé iá-ní ndoó stná dava nècuàchi nhicùn ley xi Balaam. Divi Balaam mà nduú nècuàchi nì

càhàn xì tè-Balac sàhaha, nì cachi-nè xì tèmà nansa chiyuhù-té nècuàchi Israel ñà-quida-ne ñà-có-ndià icà-né, nì chiyuhù-téné caxi-né promesa nì sàcòo nùù figura cahvi nèhivi, te nì chiyuhù stná-tené ñà-càhàn-nè xì nèhivi cóni nandàhà xì-né.

¹⁵ Daaní, jaàn ndé iá-ní ndoó stná dava nèhivi nchícùn ley xì tè-nicolaíta. Cunaha-ní, ni-iyuhu có-xiñhí ley mà.

¹⁶ Ñàyücàndüá, naxicocuñin inì-ní. Te nú coó, yàchi sàì ndé iá-ní, te cuàhi mii-né castigu xi-ne. Sàhà espada iá yuhí, ñà-jaàn nihi-né castigu.

¹⁷ 'Nsidaa mii-nsiá nècuàchi natácá càhvi xì Dios, ni cúniní vaha-nsia ñà-ndüá cachí Espíritu Ìi xí-yá, vachi dohó cachí-yá: Nú ni cundéé-nsiá nùù nsidaa ana cuní datúcù xì-nsiá, dandu nihitáhvi-nsiá cuxi-nsia comida ndiaha iá dèhé (nùù Dios), divi nduú maná ndiaha. Te dacútáhvi stnáì iin iin-nsia iin iin yùù siòcò ndé itúù quivì saa iin iin-nsia. Còò inga ana cunaha xi quivì yucan, cuisì ana cutahvi xì yùù mà.

Razón ni dásàà Jesús nùù nèhivi xí-yá ñuu Tiatira

¹⁸ 'Daaní, nùù nècuàchi cachitnùhu palabra-xi ñuu Tiatira dohó tiaa-yó, dandu cahvi-neà cuniní nsidaa nèhivi-xí ndoó ñuu yucán: Yùhù nduí Dèhemaní Dios, te nduchinúí, nchiá na ian tnúù ñuhu, te sàhí, yèhé-ñà nahi càa yahá. Te dohó cachí xì-ní,

¹⁹ ináhi nansa quida-ní, te ináhi cuú inì-ní sàhà ñanitnaha-ní. Daaní ináha stnáì nihnú inì-ní yùhù, te ináha stnáì nansa chindéé stnahá-nsiá xì nansa quidá ndee inì-nsia (nú iá tnùndoho), te ináha stnáì iá cuàhà obra xi-ní, te vichi más iá obra xi-ní nùù antes.

²⁰ Doco cunaha-ní, iá iyuhu ñà-disáhà-xí có-cúdfi inì quida-ní, vachi sàha-ní permisù chináhà nècuàchi ñahà nani Jezabel. Dios dacáhàn xì-né, cachí-né, (doco cóo). Dacuahá-né nèhivi-xí, te datúcù-né nècuàchimà, vachi cachí-né iá permisù càhàn nèhivi xì ana cóni nandàhà xì-né, te vátuni caxi stná-né promesa nì sàcòo nùù figura cahvi nèhivi. (Ducán cachí ñahà mà.)

²¹ Pues, yùhù, nì sandiatui, áma naxicocuñin inì-né sàhà cuàchi quidá-né xì nècuàchi tiàa, doco cóo, cóni naxícócuñin inì-né.

²² Ñàyücàndüá, icúmi-né quicuehè-né quide, te cunduhù-né. Stná tiàa ni caquida xi cuàchi ma, icúmi stná-né ndoho cuahà-né nú màsà cuú-né arrepentir sàhámà.

²³ Stná dèhé nècuàchi ñahà mà, icúmi stná-né quicuehè-né, te cui-né. Dandu nsidaa nèhivi-xí ndoó nsidaa ñuu, sàhámà cundaà ini-né ñà-yùhù ináhi nansa nihnú ini nsidaa nèhivi ini saxinítnùni-né, te segùn nansa quidá iin iin-ne, ducán icúmi-né nihi stná-né nùù.

²⁴ Doco vichi cuàhin cachì inga iñaha xì nsidaa mii-nsiá jaàn có-nchícùn xì ley (chicuehé) mà, vachi có-dàcuàhà-nsiá palabra siquini sàhà ñà-malu, palabra cachí-né palabra dèhé. Cunaha-nsiá, mà cachí guè xì-nsiá ni inga iñaha chivàha-nsia,

²⁵ cuisì ñà-ndüá sàni nihi-nsiá chivàha-nsia ndé vichi, divi ñà-jaàn quida ndisa-nsia seguir dècuèndé quivì nasai ndé ndoó-nsiá.

²⁶ 'In nèhivi, nú ni cundéé-né nùù nsidaa ana cuní datúcù xì-né, te iin-ni quida ndisa-ne ñà-ndüá cachí dècuèndé quivì último, ndiaha gá coo xi-né. Vachi icúmi-né nihitáhvi-né dandacú stná-né nùù cuàhà ñuu ñuhiví.

²⁷ Nahi yùhù, nùù Yuamáni' nì nihitáhvi' cusahnúí nùù ñuhiví, ducán icúmi stná mii-né cusahnú stná-né, cunindaha-né iin vara càa cunduu seña, te nèhivi (có-íniní, ndahví-ne), vachi yáha ga fuerte icúmi-né nàni fuerte-né na ian cháhmà iin quidí còò chuun-xi.

²⁸ (Doco nèhivi nchícùn vii xì), icúmi-né nihitáhvi stná-né cucumi-né sitnúú cahnú xínu dàtnàà.

²⁹ Nsidaa mii-nsiá nècuàchi natácá càhvi xì Dios, ni cúniní vaha-nsia ñà-ndüá cachí Espíritu Ìi xí-yá.

3

Razón ni dásàà Jesús nùù nèhivi xí-yá ñuu Sardis

¹ 'Daaní, nùù nècuàchi cachitnùhu palabra-xi ñuu Sardis, dohó tiaa-yó, dandu cahvi-neà cuniní nsidaa nèhivi-xí ndoó ñuu yucán: Yùhù nduí ana icúmi xì usà espíritu ndiaha xí Dios, te inindáhà stnáì usà sitnúú. Te dohó cachí xì-ní, ináhi nansa quida-ní. Mate iá fama-ní quidá vii-ní, doco nùù Dios ndahví iá anima-ní na ian sàni xihì-ní.

² Ñàyücàndüá, cuidadu coo-ní, te cundiaa-ní anima-ní ñà-màsà ndañúhù ni-iin ñà-vàha ñuhù anima-ní, vachi iyuhá iá, te vihi-ni ndañuhá. Cunaha-ní, mà víi sàni quida-ní nùù, sàni xini.

³ Sàhà ñà-jaàn, nsinuu inì-ní nansa iá palabra ndiaha nì cachì xì-ní antes, te nì inini-ní. Pues divi ñà-jaàn nduá cuní chivàha-ní vichí, te naxicocuñin inì-ní sàhà cuàchi-ní. Vachi nú màsà nácúnihnú vii inì-ní, te coo tùha-ní, dandu yàchi màsàì ndé iá-ní. Nanàà sàì yucán, te nì mà cundáà inì-ní indù hora sàì.

⁴ Doco ndoo itnii nêhivî (vâha) jaàn ndé iá-nî ñuù-nî Sardis, te mii-né, cóni cùchicuéhé anima-nè. Ñâyùcàndüá, icúmî-nè cutnahá-né xí' na cacanuî, te iin-nî cundixi stná-nè sicoto cuxín na ian mii, vâchi ducán natûi-ne nihitâhvi-nè nûi.

⁵ 'Cunaha-nî, nú ni cundéé iin nêhivî nùu nsidaa ana cunî datúcù xi-né, dandu nihitâhvi stná-nè cundixi cuxín-nè. Te mà nunca dandutí quivî-né nùu tutu xi vida ndiaha. Te claru icúmî cachî xi Yuandiáhî ñâ-divî nêhivî-xî nduú nècuàchî xiníndísámá; te divî ducán cachî stnáî xi àngel xi-ya.

⁶ Nsidaa mii-nsiá nècuàchî natácá càhvi xi Dios, ni cúnínî vâha-nsia ñâ-ndüá cachî Espíritu Ìi xî-yá.

Razón ni dásáà Jesús nùu nêhivî xî-yá ñuu Filadelfia

⁷ 'Daaní, nùu nècuàchî cachítñuhu palabra-xî ñuu Filadelfia, dohó tiaa-yó, dandu cahvi-neà cunini nsidaa nêhivî-xî ndoo ñuu yucán: Yùhù nduí ana ì, te puru ñâ-ndácuisi càhìn. Yùhù nihî ndaháca xi rey David, te nú sàni nacune iñàha, còò ni-iin ana cui nacadi xán, te nú sàni nacadi, mà cufí gá nuna. Ñâyùcàndüá, ducán cachî xi-nî,

⁸ ináhi nansa quida-nî. Te cunaha-nî, nuná ñuhivî nùu-nî nahi yehè nuná, te còò ni-iin cui nacadi xán. Vâchi mate có-ndúu-nsiá nêhivî chicá icúmî fuerza, doco vâtùni, sàni chivâha-nsia palabra-xî, cóni nácuáa-nsiá yùhù.

⁹ Doco jaàn ndoo dava nêhivî cachî-nè xínduu-ne (nêhivî ndiaha), nêhivî raza Judea nduú-né, cachî-nè, doco tñuhu-né, vâchi xínduu nsihi-ne ana nchícùn xi ñâ-malu. Pues, yùhù icúmî datnátui mii-né nùu-nî ñâ-cuitasisi-né nùu-nî, te quidañuhu-né mii-nî, dandu cundaà ini-nè, màni-nî nûi.

¹⁰ Cunaha-nî, vâxi iin tiempu ùhî inicutu ñuhivî na icúmî nêhivî ndoho-ne, te cundaà ini-xi nansa ndisa iá anima-nè. Doco mii-nî, mà cuáhi cunî-nî tiempu mà, vâchi iin-nî sàni quidaandee ini-nî (ni xinindisa-nî) nacua sàni cachî xi-nî.

¹¹ Cunaha-nî, yâchi icúmî nasai ñuhivî. Ñâyùcàndüá, nacua sàni sà-nî quida vîi-nî, iin-nî quida-nî seguir ducán, màdi nihî inga nêhivî ñâ-ndüá cuàhàn cunduu premiu xi-nî.

¹² 'Nsidaa nêhivî-xî, nú ni cundéé-nè nùu nsidaa ana cunî datúcù xi-né, dandu iin-nî icúmî-nè cundoo-ne nùu Dios na ian nduú-né iin castillo vehe ndiaha-yá, vâchi mà quéé gá-nè nùu-yá. Te icà-né icúmî chítuu stnáî quivî Dios-xî, xi quivî saí, xi stná quivî ñuu Dios-xî, divî Jerusalén Saa, vâchi ndé ansivi ndé iá-yá icúmî nuu ñuu mà quixa.

¹³ Ñâyùcàndüá, nsidaa mii-nsiá nècuàchî natácá càhvi xi Dios, ni cúnínî vâha-nsia ñâ-ndüá cachî Espíritu Ìi xî-yá.

Razón ni dásáà Jesús nùu nêhivî xî-yá ñuu Laodicea

¹⁴ 'Daaní, nùu nècuàchî cachítñuhu palabra-xî ñuu Laodicea, dohó tiaa-yó, dandu cahvi-neà cunini nsidaa nêhivî-xî ndoo ñuu yucán: Yùhù nduí ana chicá seguru. Micuisi ñâ-ndácuisi càhìn, mà dándâhvi', te divî ndahá yùhù ni cuyucun nsidaa iñàha iá ñuhivî xi Dios. Te ducán cachî xi-nî,

¹⁵⁻¹⁶ ináhi nansa quida-nî. ¡A sácú vâha coo dahuun-nî ladu xi, te ò claru cachî-nî mà cóo-nî ladu xi! Vâchi yùhù ndanihî mii-nî nahi təcui có-xihî vîi, ñâ-mà ihní-tè ni mà vixin-tè, te ñâyùcàndüá, vihini dacúxióí mii-nî nûi, na ian quidá nêhivî xi təcui có-xihî vîi, sasi-nète.

¹⁷ Vâchi dohó cachî-nî: Sà-íá ñâ-cuiqué. Cuàhà biene xi, còò ni-iin necesidad icúmî, cachî-nî. Te ni có-cundáà ini-nî ñâ-mii-nî nduú ana iá tñundoho xi, te mii-nî nduú ana chicá ndahvî ini anima-xi, te quidámáxinî stná-nî. Vâchi nùu yùhù, mii-nî nduú ana chicá ndixî ndahvî, (vâchi ndahvî iá anima-nî), te sàhámá chicá vâha cuhi ini-nî mii-nî.

¹⁸ Ñâyùcàndüá, iin palabra vîi cachî xi-nî, chicá vâha (nàcùnhnu vîi ini-nî), dandu nihî-nî ñâ-cuicá ndisa nûi, divî ñâ-ndúu nahi oro ni daà, te ni cundaà ini-xi, vâha-ña. Te xiñuhu stná (ñâ-naquida vîi-nî) na ian cuàhàn-nî cuiin-nî sicoto cuxín nûi ñâ-màsá cóo chaa gá-nî (nûi), te ducán màsá cùcàhàn nùu-nî. Daaní, xiñuhu (ñâ-cundehè-nî cuisî ichi vâha. Vâchi nú ducán, dandu queamà na ian cuàhàn-nî) cuiin-nî iin tàtnà nûi, te cutatna nduchinúu-nî, te natùinuù-nî.

¹⁹ Cunaha-nî, nsidaa ana cuú ini sàhà-xî, sáhi-nè consejo, te danáni stná-nè dava xichi. Ñâyùcàndüá, nacani vâha ini-nî, te naxicocuñin ini-nî sàhà falta xi-nî.

²⁰ 'Pues, ducán iá na ian càhìn yehè nêhivî, áma cunini-ne, te nacuna-ne quihvi cutnahí xi-né, vâchi nahi vicò ndé cundoo-nda cuxi vâha-nda, ducán queamà. Ñâyùcàndüá, càhìn xi ndéni nêhivî ni cui áma cunini-ne, te quihvi.

²¹ 'Cunaha-nî, ndéni nêhivî-xî, nú ni cundéé-nè nùu nsidaa ana cunî datúcù xi-né, dandu icúmî-nè cutnahá stná-nè xí' ndé (gloria) ndé coo stná-nè nùu iin silla ndiaha dandacú-né nacua ni quida yùhù, ni cundeí, dandu ni sàcòì silla ndiaha xî, te vichi cutnahí xi Yuamáni' dandacú stnáî.

²² Nsidaa mii-nsiá nècuàchì natáca càhvi xì Dios, ni cúnínì vaha-nsia ñà-nduá cachí Espíritu Ìì xí-yá, —nì cachì Jesús.

4

Nansa cahvi-né Yua-nda Dios ansivi

¹ Daaní, nì nsihì nì xini ñà-jaàn, dandu nì nuna iin yehè ansivi nì xini. Te nì tiacu tàchì-yá càhàn-yà xí' na ian nì càhàn-yà xí' daa. Divi na ian sivi corneta, ducán tiacú, te nì cachì-yà xì':

—¡Nahà-ní dìquixí yohó! Cuní dacuní mii-ní nansa cuàhàn cuu quivì vaxi xi-nda.

² Dandu vichì vichì ducán nì sàcòì na ian sání nì quida ndudu ìì xí Espíritu xì Dios. Te nì xini yucán ndè gloria iín iin silla ndiaha ndé iá mii-yá.

³ Na iin yùù yéhè jaspe, ò iin yùù yéhè cuahá, ducán nahà-yà. Te dìquì stná silla mà iín iin sìcòyàhncì, na iin yùù yéhè cuií nani esmeralda, ducán nàhàmà.

⁴ Te nsidanicuú ladu silla xi-ya itá stná silla cuachì. Cuahani ndáa-nù, òcò cùmi-nù, te nùù iin iin-nù ndoó iin iin nècuàchì sahnú. Sìcoto cuxín xíndixi iin iin-ne, te xíñuhu stná corona dìni iin iin-ne.

⁵ (Te nì xini), yucán silla cahnú xí-yá, yáha gà tása, te na ian càhàn dàvi, ducán tiacú, te ndee níhì stná. Te frente silla mà itá usà ñà-xíxìn nduú usà espíritu ndiaha xí Dios.

⁶ Te frente stná silla mà iá stná nahi mar nì cuyucun vidriu, ducán nahà lugar mà, te yéhà na iin yùù nchíi ndai.

Daaní, nsidaa ladu mii-yá itá iin iin ana itá. Cùmi nduú-né, te iá stná cuàhà nduchìnúù-né ladu nùù-né xì ladu yàtà-né.

⁷ Iin-ne, na iin nsicaha iá-nè; te inga-nè, na iin buey iá-nè, te inga-nè, nùù nèhivi níhì-né; te nècuàchì cùmi, na iin águila ndavá ansivi, ducán iá-nè.

⁸ Te iin iin-ne, iá ìñù ndìxìn-né, te iá chitu stná nduchìnúù-né ìcà ndìxìn-né. Te tixi stná ndìxìn-né iá stná cuàhà nduchìnúù-né. Te nicanicuahàn ndui te ñuú ducán cána-ne cachì-nè dohó:

Ìì gá mii-yá, divi mii-yá dandacú nùù nsidanicuú ìñàha. ìì gá-yà. Ndè sàhana iá-yà, te vichì iá-yà, te ndè nicanicuahàn ìcùmi-yà coo-ya. ìì gá-yà.

⁹⁻¹⁰ Ducán cachì-nè, ndaníhì cahnú-né mii-yá, te tavá-né tñùñuhu xí-yá, naquímáni-néyà, divi mii-yá iá nùù silla ndiaha, te itiacú-yà nicanicuahàn. Daaní, cada cachì-nè ducán, dandu càhàn stná òcò cùmi nècuàchì sahnú yucán, tutuyúhú-nè nùù sàhà-yà, te cahvi-néyà, chitánini-né corona ndiaha-nè nùù-yá, cachì-nè xi-yá:

¹¹ Ndaníhì cahnú-nsí mii-ní, Stoho-nsì Dios, te ni coó tñùñuhu xí-ní nùù nsidaa ana itiacú, te ni cúsáhnú-ní nùù nsidaa ñuu. Ducán ndá ìcà coo, vachì mii-ní nì quidavàha-ní nsidanicuú ìñàha, nì chitnùnì inì-ní, te nì quidayucùn-ní nsidaa ìñàha, te ñàyùcànduá ndè vichì iá ìì nsidaájàn.

5

Nansa ni quida Jesucristu xi tutu itúì

¹ Daaní, indéhì nùù silla ndiaha ndé iá mii-yá, te nì xini ndahàcuahá-yà iníndáhá-yà iin tutu itúì. Te tutu mà, itándiaa letra ndúì laduá. Te nì xini, usà lugar xan nuhní, te iin iin ndé nuhní mà itúú iin sellu.

² Daaní, nì xini yucán iín iin ángel ndacuì, ndáhi fuerte-nè, ndacàtnùhù-né, cachì-nè:

—¿Ana nátùì cunduu ana cui nacani xì ñà-nùhní tutu yohó, te nuna-ña?

³ Doco, cunaha-nsiá, còò ni-iin ni túì nacani xì tutu mà, vachì còò iin ni nátùì cui quida ducán, te cundehè-né ñà-itándiaa yucán. Ni-iin ana iá ansivi, ni-iin ana iá ñuhivì yohó, ni-iin ana nduú nsì, ni-iin-ne màni cùì quida-neà.

⁴ Ñàyùcànduá, nì quesahí sacú fuertí, vachì còò iin nátùì nacuna xi tutu mà cahvi-neà, nì còò stná ana nátùì siquiera cundehè-nèà.

⁵ Dandu nì càhàn iin nècuàchì sahnù-mà nì cachì-nè xì':

—Màsà cuácú-ní, vachì sàni túì ana cui nacuna xi tutu jaàn, te nandaxin-xi usà ñà-nùhní. Divi nduú descendencia ndiaha xí David, vachì sàni cundee-yá (nùù contra xi-ya), ñàyùcànduá vátùni nacuna-yañà. Te nani stná-yà Nsicaha nduú descendencia xi Judá, ducan nani stná-yà.

⁶ Te nì ndacotì, te nì xini yucán iín mii-yá, na iin lelù nahà-yà, te ducán iá na ian nì sahnì nèhivi-yá, doco vichì iín-yá dava mahì-xí silla ndiaha, xì òcò cùmi nècuàchì sahnú, xì nsì-cùmi ana itá saín nùù-yá. Usà nsiquì-yá na iin nsiquì riì, te usà nduchìnúù-yá. Cunaha-nsiá, nsì-usà nduchìnúù mà xínduu stná usà espíritu vaha xì Dios, te inicutu ñuhivì xicánúù espíritu mà quidá-yá.

⁷ Te divi mii-yá iín dava mahi-xí yucán, ni tnàtuu-ya nùu ana iá nùu silla ndiaha, te ni tnii-ya tutu iá ndahàcuahá-yàmà.

⁸ Te ni nsihi ni tnii-ya tutu ma, dandu nsicúmi ana itá nùu-yá mà xi nsidaa stná òcò cùmi nècuàchi sahnú-ma, ni tutuyuhu-né nùu sàhà mii-yá nduú Lelù ñí xí Dios. Nihí stná-nè iin iin yutnù cuerda quidandaa-né, te nihí stná-nè còhò oro chitu inciensu. Te inciensu mà, palabra ni cachi nèhivi na xicàn tàhvi-né nùu Dios nduá.

⁹ Daaní, nsidaa ana tutuyúhú ñuhú yucán, ni xito-ne iin alabanza saa, te ni inini mii-yá; te dohó cachí alabanza mà:

Icúmi-ní tnii-ní tutu itùí, te cahndè-ní ñà-nùhnià. Te vátuni quida-ní ducán, vàchi ni xihì-ní, ni xitià nù-ní, te ducán ni dànaà-ní sàhà nèhivi. Te divi sàhàmà vátuni ni yàha-ne ni sàcúnduu-ne nèhivi xí Dios, xínduu-ne nèhivi nsidanicuú raza cáhàn nsidanicuú dàhàn xí nsidanicuú ñuu inicutu ñuhiví.

¹⁰ Te ni chitnùni iní-ní cunduu stná-nè nahi dùtù xinúcuáchi nùu Dios xi-nda. Te icúmi-nè dandacú-né nùu nèhivi dava ga ñuhiví. (Ducán cachí-nè xitò-né.)

¹¹ Daaní ni ndacotí inga xichí, te ni xini sàni nataca yáha ga cuahà sàstnùhù mil ángel mozo xi Dios, itá-né nsidanicuú ladu ndé iá Dios, xi ndé itá nsicúmi ana itá nùu-yá, xi stná ndé ndoó nècuàchi sahnú. Te ni tiacuí

¹² cáhàn ndee nsidanicuú-né, cachí-nè:

Ndiaha gá ni quida mii-yá ana nani Lelù ñí xí Dios, vàchi ni xihì-yà (sàhà nèhivi).

Ñàyùcànduá, icúmi-yà sàà-yà cusahnú-yá, icúmi-yà naquihin-ya ñà-cuicà ndiaha-yá, te icúmi-yà cuiin fuerte-yà, te (dandacú) nchichí-yà nùu nèhivi; te mii-né, icúmi-nè ndenihi cahnú-néyà, te tavà-né tnùñuhu xí-yá, vàchi naquímáni-néyà.

¹³ Daaní ni inini cáhàn ndee nsidanicuú ana xíndoo ansivi xi ñuhiví, xi nsidaa stná nsii, xi nsidaa iñàha ni quidavàha Dios, ñà-íà ñuhiví xi ñà-íà tècuí cuahà, nsidanicuú ñà-jaàn, ni tiacuí xicachi-nè:

Naquímáni-nsi mii-yá iá nùu silla ndiaha; te naquímáni stná-nsi mii-yá nani Lelù ñí. Quidañuhú-nsi mii-yá, te ducanicoó nicanicuahàn. Te ni sàà-yà cusahnú ndiaha-yá nicanicuahàn, ni cachi-nè.

¹⁴ Dandu ni cáhàn stná nsicúmi ana itá nùu-yá:

—Divi ducanicoó —ni cachi-nè.

Dandu nsi-òcò cùmi nècuàchi sahnú yucán, ni tutuyuhu-né nùu sàhà-yá, te ni cahvi-néyà.

6

Nansa icúmi cuu na cahnde Jesús iñu lugar ndé nuhni tutu itùí iá ansivi

¹ Daaní, ni xini mii-yá nani Lelù ñí, ni sahnde-yà iin ñà-nùhni tutu itùimà. Te ni tiacuí cáhàn iin ana iín saín nùu-yá; na cáhàn dàvi, ducán fuerte ni cáhàn-nè, cachí-nè:

—¡Naha!

² Te ni xini ni quecunu iin idu cuxín. Te indánuú iin ana indánuú yàtà-sí, te nihí-né arcu. Te ni nihí stná-nè iin corona ñà-cuñuhu-ne. Ñàyùcànduá, ni quee-ne cuahàn-nè, vàchi icúmi-nè cundee-né nùu cuahà ñuu.

³ Daaní, (ni xini), ni sahnde-yà ñà-ùí nuhni tutu itùimà, te ni tiacuí ni cáhàn inga ana iín nùu Dios, te ni cachi-nè:

—¡Naha!

⁴ Te ni quecunu inga idu, idu cuahá nduú-si, te yàtà-sí indánuú inga ana indánuú, te icúmi-tè permisú dacà-té nèhivi ñà-nàà stnahá-né, te cahní stnahá-né. Te ni sàha xi-té iin espada cahnú.

⁵ Daaní, ni sahnde-yà ñà-ùni nuhni tutu itùimà, te ni tiacuí ni cáhàn inga ana iín nùu-yá, cachí-nè:

—¡Naha!

Te ni xini ni quecunu iin idu tnuu, te iá stná ana indánuú yàtà-sí, te iníndahá-tè iin balanza.

⁶ Te tiacuí cáhàn ana cáhàn mahi nsicúmi ana itá nùu Dios, te dohó cachí-nè:

—Vichi ndiaá gá nùni, quidáchuún-ndá iin quivi, te cutu iin litro-ñà nihì-ndà; te nù cebada, cuisí iin quartillu dava; doco aceite xi vínu, cóni nàná yàhvi guá —cachí-nè.

⁷ Daaní, ni sahnde-yà ñà-cúmi nuhni tutu itùimà, te ni tiacuí cáhàn inga ana iín nùu-yá, cachí-nè:

—¡Naha!

⁸ Dandu ni xini ni quecunu inga idu, te idu cuaán nduú-si. Te iá ana indánuú yàtà-sí. Te muerte nduú quiviá, te jaàn nchicùn gá vaxi ingá, te diviamà nduú ana ndaca-xi nèhivi cùhùn ndé ñuhú vaha anima nsii. Sàhà nduú ñà-jaàn icúmi cui cuahà nèhivi; nùu cada cùmi

nèhivi icúmí cui iin-ne quida, vâchi icúmíá dandacúá nùù guerra, xì nùù tnama, xì nùù cuèhè, xì nùù quisi daná, te sàhà nsidaájàn icúmí cui cuàhà nèhivi.

⁹Daaní, nì sahnde-yà ñà-úhùn nuhní tutu itúlmà, te nì xini tìxi mesa ndé sáha-ne promesa xi Dios, yucán ndoó anima nèhivi. Xínduu-ne nèhivi xiníndísá palabra ìi xí Dios, te sàhà ñà-jaàn nì sahní nèhivi-né, vâchi nì cachi vate-né ndoó-né ladu xi-ya.

¹⁰Te vichi, cána fuerte-nè, cachí-nè xì Yua-nda Dios:

—Stoho-nsi Dios, ¿nadaa ga quivi, dandu nacuitacùhà sàhà-nsi? Vâchi nèhivi ñuhívi, nì sahní-né nsiùhù, ñâyùcàndúá xiñuhu ndoho-ne, vâchi mii-ní, ìi ndisa inì-ní, siempre tùha-ní quida vii-ní —nì cachi-nè.

¹¹Dandu nècuàchì nsii ma, nì cutahví-né iin iin dùhnù quihín cuxín yaa, te nì sàcùnaha-né cundiatu cuéyàà-nè quetatu chíi gá-nè dècuèndè cui stná cuàhà compañeru-nè nchícùn ichi Dios, te cuacastnahá nsidaa ana icúmí cui stná nacua nì xihí mii-né.

¹²Daaní, nì sahnde-yà ñà-íñù nuhní tutu itúlmà, te nì xini nì tnàa fuerte, te nì nàcutnùù orá nahi sicoto tnuu. Te yoo, nì nducuahá stná-si nahi nìi.

¹³Te nì còyo chitu stná sitnúù ñuhívi yohó, na ian còyo ñà-vídí quidá tàchì, ducán nì còyo-si.

¹⁴Te nì ndañuhu ansivi nì natuíá na ian natúii iin tutu caní, te nsidaa yucú íá ñuhù íchí, xì nsidaa stná ñuu íá mahí mar, nì ndutá.

¹⁵Dandu nsidanicuú nèhivi ñuhívi, nì xinu dèhé-nè yucú, nì chidèhé-nè mii-né inì cueva, te mahí cavá nahnú, xínduu-ne rey, xì gobiernu, xì nècuàchì cuicá, xì soldadu dandacú, xì nècuàchì idónuu, xì cuàhà stná-nè peón, xì nèhivi úun.

¹⁶Te nì cacachí nsidaa-né xì yucú, xì stná cavá ducún:

—A sácú vâha nì còya diquì-nsí te dàhvi-nsi, ñà-màsà tûi-nsi nùù mii-yá íá nùù silla ndiaha, te màsà níhì-nsí castigu quida mii-yá nani Lelù Íi.

¹⁷Vâchi vichi sàni sàa quivi ndoho-nsi quida-ya, te còò iin cui cundee inì-xi na xídà ini-yà.

7

Nansa icúmí màcùtuu seña xi Dios tnaa cuàhà mil nèhivi raza Israel

¹Daaní, nì nsihamá, dandu nì xini cùmi ángel, itá-né nsiçúmí ladu ñuhívi, te sadí-nè nùù tàchì caná nsidaa ladu sàhà-ñà màsà caná gá tàchimà nùù ni-iin ñuu, nì nùù mar, te nì nùù ni-iin yutnù.

²Te nì xini inga ángel nì nana-ne vâxi-ne dècuèndè ndé caná orá, nihí-né sellu dùcùn nèhivi xí Dios. Te nì ndàhi ndee ángel mà nì càhàn-nè xì nsiçúmí tnaha-nemà, diví ángel nì sàha Dios poder ñà-quida-ne ñaũu xì ñuhívi xì mar.

³Dandu dohó nì cachi ángel mà xì tnaha-ne:

—Màsà quidá-nsiá ni-íñàha xì ñuhívi, nì xì mar dècuèndè nú sàni dùcùn seña xi Dios tnaa nèhivi xinúcuáchí nùù-yá.

⁴Dandu nì inini nì nacani-ne nadaa nèhivi icúmí nihí xì seña mà, te nsidaa nsidaa-né, 144,000 nèhivi xínduu-ne. Te nsidaa-né, nècuàchì descendencia xi Israel nduú stná-nè.

⁵Te iin dèhe Israel mà nani Judá, te (nì xini) nì sàcùtuu seña mà nùù ùxin ùi mil nèhivi descendencia xì nècuàchimà. Daaní, nì sàcùtuu stná seña mà nùù ùxin ùi mil nèhivi descendencia xi (ñani Judá mà) nani Rubén. Te nì sàcùtuu stná seña mà nùù ùxin ùi mil nèhivi descendencia xi inga (ñani-nè) nani Gad.

⁶Stná ùxin ùi mil nèhivi descendencia xi inga (ñani-nè) nani Aser, xì stná ùxin ùi mil nèhivi descendencia xi inga (ñani-nè) nani Neftalí, xì stná ùxin ùi mil nèhivi descendencia xi Manasés, nì dùcùn stná nsidaa-né seña mà.

⁷Stná ùxin ùi mil nèhivi descendencia xi Simeón, xì inga ùxin ùi mil nèhivi descendencia xi Leví, xì stná ùxin ùi mil nèhivi descendencia xi Isacar, nì dùcùn nsidaa-né seña mà.

⁸Stná ùxin ùi mil nèhivi descendencia xi Zabulón, xì stná inga ùxin ùi mil nèhivi descendencia xi José, xì stná inga ùxin ùi mil nèhivi descendencia xi Benjamín, nì dùcùn nsidaa-né seña mà.

Nansa nì xini Juan cuàhà mil nèhivi ndixí cuxín

⁹Daaní, nì ndacoti, te nì xini yucán itá yáha ga cuàhà nèhivi, mà cùì nandiahvi nadaa xínduu-ne. Nèhivi nsidanicuú ñuu xínduu-ne, nèhivi nsidanicuú ladu xì nsidanicuú raza, te nsidanuu dàhàn xícahàn-nè. Te itá-né nùù mii-yá íá nùù silla ndiaha, xì nùù mii-yá nani Lelù Íi, ndixí-né dùhnù quihín cuxín yaa. Te iníndáhà-nè ndahà nù-ñúù.

¹⁰Te cána fuerte-nè, cachí-nè:

Còò inga ana nahi Dios, diví mii-yá íá nùù silla ndiaha, vâchi sàni dàcácu-yàndó. Còò inga ana nahi mii-yá nani Lelù Íi, vâchi sàhà mii-yá sàni càcu-nda, nì cachi-nè.

¹¹ Daaní, nsidaa ángel mozo xi Dios, itá-né nsidaa ladu nècuàchì sahnú ndoó yucán xi stná nsiçúmí ana itá nùù-yá, te ni tutuyuhu-né ñuhù nùù sàhà-yá ndé iá-yá nùù silla ndiaha xí-yá, te ni cahvi nsidaa-né mii-yá,

¹² xícachi-nè:

¡Amén! Mii-ní nduu-ní Dios, ñàyùcàndüá, ndaníhí ndiaha-nsí mii-ní, (te cachí-nsí xì-ní) yáha ga nchichí-ní. Sàhà nsidaájàn naquímáni-nsí mii-ní, te ni coó tnùùuhu xí nsidaa nèhivi nùù-ní, te ni sàà-ní cusahnú ndiaha-ní, te ni sàà stná-ní dandacú fuerte-ní inicutu.

¡Ducanicoó nicanicuahàn!

¹³ Dandu ni càhàn iin nècuàchì sahnú yucán xi yùhù, cachí-nè:

—¿A ináhá-ní índù nècuàchì xínduu nècuàchì ndixí cuxín yaa yohó? ¿A ináhá-ní índù ni quixi-ne?

¹⁴ Te ni cachí xi nècuàchimà:

—Còó, có-ináhí, señor; doco mii-ní, ináhá-ní.

Dandu ni cachi-nè xí:

—Nècuàchì yohó, xínduu-ne nèhivi ni xini cuàhà vida tiempu nani tiempu xi tnùndoho cahnú. Doco sàni ndoo cuàchì-ne ñà-ni xitià nùù mii-yá nani Lelù Íi, ñàyùcàndüá sàndixí cuxín yaa-ne vichi,

¹⁵ te xíndoo saín-né nùù silla ndiaha ndé iá Dios; ndui te ñuu xíxinucuaachi-né nùù-yá, te ndoo-né ini vehe cahnú ndiaha-yá. Te mii-yá, nicanicuahàn cutnàhà-yá xì-né ndiaá-yànè.

¹⁶ Ñàyùcàndüá mà nunca sàà-nè cui gà-nè doco, ni mà cúí gà-nè tècuí, ni mà nsíí gá-nè quida orá, ni mà cúíí ihni gá-nè.

¹⁷ Vàchi mii-yá nani Lelù Íi, icúmí-yá cunuù-yànè. Íín-yá ladu nùù silla ndiaha yucán, te icúmí-yá cundaca-yànè sàà-yá xì-né ndé coho-ne tècuí ndiaha cutiacu-nè nicanicuahàn. Ni mà cuácú gá-nè, vàchi contentu cundoo-ne quida-ya.

8

Nansa cuàhàn cuu na tàhndè ñà-úsà ndé nuhní tutu itúí, te nachitu stná còhò oro inciensu

¹ Daaní, ni sahnde-yá ñà-úsà nuhní tutu itúimà, te ni nsihi ni quida-ya ducán, dandu ni nàcuíln dádí inicutu ansivi nahí dava hora.

² Te ni xini yucán nùù Dios sà-itá tùha ùsà gà ángel, nihí-né iin iin corneta ñà-sivi-nè.

³⁻⁴ Dandu ni tnàtuu inga ángel ni sàà-nè nùù iin mesa oro iá nùù silla ndiaha, divi mesa ndé sahmí-né inciensu nùù-yá. Te vichi nihí ángel mà iin còhò oro ni sàà, te ni sàha stná xì-né cuàhà inciensu ñà-cahmi-neà dìqui mesa mà sàhà-ñá cana ñùhmà-ñà mànana nùù Dios. Te na hora mà nana ñùhmà mà, dandu cutnahá stná palabra ni cachi nsidaa nèhivi xí Dios na ní xicàn tàhvi-né nùù-yá. Ñàyùcàndüá, divi ducán ni quida ángel mà, ndahà-né ni chitanini-ne nsidaamà nùù Dios.

⁵ Daaní, ni tava-né chii ñuhu xíxin nùù mesa oro mà, te ni dàquee-neà ini còhò mà ndé ni chitua, dandu ni dandiàchì ndee-neà nùù ñuhiví. Dandu ni tiacu cuàhà gá ana càhàn fuerte, te ni càhàn ndee dàvi, te ni tàsa, te ni tnàa.

Nansa icúmí cuu na sivi ángel corneta xi-ne

⁶ Dandu ùsà ángel nihí corneta xi-ne, ni nsidayucun-nè cuàhàn-nè sivi-nè.

⁷ Te ni sivi ángel primeru corneta xi-ne. Te na ní tiacu ni sivi, dandu ni còyo iin nùù ñuhiví, doco dáca stnahá iin ma xi ñuhu xíxin, xí stná nùù. Ñàyùcàndüá, nùù cada ùni yutnú (itá ñuhiví) ni xixìn iin-nù, te ni xixìn nsihi stná yùcù iá campu.

⁸ Daaní, ángel ùi, ni sivi-nè corneta xi-ne, dandu ni xini iñàha cuú mànuu na ian iin yucú xíxin, ducán nàhà, te ni nacava ini mar. Te cuàhà tècuí mar ni nanduu-tè nùù (ni quidamà). Iyuhu cumáni gá, te cunduu davatahvi tècuí mar ni cucichuehe ducán.

⁹ Stná nsidaa quisi ndùtè ñuhú ini mar, iyuhu cumáni gá, te cunduu stná davatahvi-sí ni xihí. Stná barcu, iyuhu cumáni gá, te cunduu stná davatahvi-nú ni sachi.

¹⁰ Daaní, ángel ùni, ni sivi-nè corneta xi-ne, te dècuèndè ñuhiví ni nacava iin sìtnúú cahnú nisa ituu ansivi, xíxin fuerte-si, te tnúú nihni-si na iin ñuhu cahnú. Te ni nacava-si nùù ñuhiví ni còya nùù cuàhà yùte xi cuàhà pozo, iyuhu cumáni gá cunduu davatahvi yùte xi pozo ni còya nùù-xí.

¹¹ Te sìtnúú mà, Ajenjo nani-sí, te yáha ga ni ndu-uà yùcù tècuíí ndé ni còyo-si. Te cuàhà gá stná nèhivi ni xihí ñà-ni xihí-ne tècuíí ùà mà.

¹² Daaní, ángel cùml, ni sivi stná-nè corneta xi-ne, te cuàhàn nsihi stná fuerza xi orá ni cúí, te cuàhàn nsihi fuerza xi yoo ni cúí xí stná sìtnúú; iyuhuni cumáni gá, te nsihi dava fuerza xi-si. Ñàyùcàndüá, ni nanchii ndahvi orá ndui, te ni nanchii ndahvi yoo ñuu.

¹³ Te ni xini meru dìqui-xí ansivi, yucán yáha ga ducún ndavá iin ángel, ndàhì ndee-né cachí-nè:

—Cunini nsidaa mii-nsiá nêhivî ñuhivî. Ndahví-nsiá, vãchi ndahví cuahà cuahàn cuu xi-nsiá, vãchi cumáni gá ùi gá xichi sivi ángel corneta xi-ne, te ndahví-nsiá na hora sivi-nê.

9

¹ Daaní, ángel ùhùn, ni sivi-nê corneta xi-ne, te ni xini dècuèndè ansivi xi dècuèndè ñuhivî ni nacava iin ana nchií nahi sítmúú. Te ni nihî-né ndahàcáa ñà-nacuna-ne yavi cahnú cunú sàstnùhù.

² Te na ní nacuna-neà, dandu ni quecoyo cuahà ñùhmà, na ian xixin ini xitnú cahnú, te ni nanchii ndahví orá ni quida ñùhmà mà, te ni nàcutnúú inicutu.

³ Daaní, mahî ñùhmà mà ni caquee cuahà sica ni ndava-si ñuhivî. Sàni nihitáhvi-si cucumi-sí iñù ñà-cunduu-si quisi daná nahi siduhma.

⁴ Te ni sàcúnaha stná-si ñà-màsà cáxi-sí yùcú itá ñuhivî, ni-iin stná ndahà yutnú, cui-si-ñà dandohó-si nêhivî có-itúú seña xi Dios tnaà-xi.

⁵ Doco nêhivî tui-si mà, mà cúí cúí-nê, còó, cui-si ndoho cuahà-né, na ian ndoho-nda na tui siduhma-ndó. Te ùhùn yòò icúmí cuu xi-né ducán.

⁶ Te mate nanducu-né modo cui dahuun-ne, doco mà níhî-né ñà-jaàn, mate yáha ga cucuni-né ndañuhu-né ñuhivî, doco mà cúí.

⁷ Te ni xini sica ma, te ducán ndáa-si nahi idu fuerte sáhàn guerra. Dini-sí, sicátè oro ñuhá. Te nùú-sí, nahi nùú nêhivî nduá.

⁸ Te ididíni-sí, na iá ididíni nêcuàchi ñahà, ducán iá; te nùhu-si, na iá nùhu nsicaha, ducán iá.

⁹ Te icà-sí, nahi càa nduá. Te na ndavá-si ansivi, yáha ga ndee cahá ndixin-sí, na ian cahá cuahà gá carreta íditá idu, te cuahàn-nu guerra.

¹⁰ Te ndohò-sí, nihá iñù nahi siduhma, vátùni tui-sindó. Te ùhùn yòò icúmí-sí dandohó-si nêhivî.

¹¹ Daaní, iá stná ana dandacú nùú-sí, divi nduú ñà-malu dandacú nùú yavi cunú mà; Abadón nani-sí nùú dàhàn hebreu, te nùú dàhàn griegu Apolión nani-sí.

¹² Pues, vichi sàni yáha iin tnùndoho chicá cahnú. Doco cumáni gá ùi gá tnùndoho nahnú fuerte.

¹³ Daaní, ángel iñù, ni sivi-nê corneta xi-ne, dandu ni tiacuí iá ana cáhàn yucán ndé iin mesa oro nùú Dios. Nsicúmi esquina mesa mà itúú iin iin ñà-iá nahi nsiqui quisi, te mahî ñà-jaàn tiacú cáhàn iin ana cáhàn

¹⁴ xi ángel làcà ní sivi xi corneta-xi, te dohó ni cachi-nê:

—Cuahán-ní ndaxi-ní cümü ángel nuhní yuhú yùte cahnú nani Eufrates.

¹⁵ Ñàyúcàndúá, ducán ni quida ángel mà, ni ndaxi-nê cümü ángel yucán, vãchi yucán ndoó tùha-ne sàà meru cuà, meru yòò, meru quiví, meru hora ñà-cacahnî-né cuahà nêhivî. Nùú cada ùni nêhivî ñuhivî, icúmí cui iin-ne.

¹⁶⁻¹⁷ Dandu ni xini na ian ni sànf, te ni xini cuahà sàstnùhù idu, te itádoó nêhivî yàtà-sí. Ùi cientu millón nêhivî xinduu-ne, ni tiacuí, vãchi iá ana ni cachitnúhu nadaa-ne. Te xindixi-ne ðùhnù càa, color cuahá nduú ðùhnù dava-ne, te dava ga-ñà color ndiaa, te dava ga-ñà, cuaán-ñà. Te ðini idu mà, na iá ðini nsicaha, ducán xi-ia-ña. Te yuhù-sí caná fuerte ñuhu xi ñùhmà xi stná azufre (sáhàn aya).

¹⁸ Cunaha-nsiá, sàhà nsi-ùni ñà-dàná queé yuhù-sí, sàhámà ni ca-xihi cuahà nêhivî, iyuhu cumáni, te cunduu davatahvi nêhivî ñuhivî ni caxihî ni quida ñuhu mà xi ñùhmà mà xi azufre dana ma.

¹⁹ Te iin iin idu, iá ñà-dàná nùú ðini-sí xi nùú ndohò-sí, vãchi ndohò-sí, na iá còó, ducán iá, te iá ðiniá nahi còó, vátùni tui-sindó.

²⁰ Doco nêhivî ni càcu nùú nsidaa tnùndoho nahnu-ma, ni cóni cùú-né arrepentir sàhà cuàchi ni caquida-ne ni quidayucun-né ñà-nduá cahvi-né. Còó, iin-ni ni quida-ne seguir sàha-ne promesa nùú ñà-malu, te cahvi-né cuahà figura, sea oro ni cuyucàn, ò sea plata, ò sea càa yahá, ò sea yùú, ò sea yutnú ni cuyucàn. Te nsidaa ñà-nduá cahvi-némà, ni có-indéhá, ni có-itiaçuá, ni có-xicá.

²¹ Te nêhivî ndóo ga ñuhivî, ni cóni náxicócuñ ini-nê sàhà cuàchi-ne, iin-ni ni caquida-ne ñà-nduá xiquida-ne, sahnî stnahá-né, sàhàn tàtnà-né, sàhàn tàdi-né, te iá-nê xi ñahá xi-né, te xidácuñhá stná-né.

10

Angel iníndáhá libru tii

¹ Daaní, ni xini vaxi inga ángel fuerte, mànuu-ne dècuèndè ansivi vaxi-ne. Íducún-né iin vicò, te ñuhú ðini-né iin sicòyàhñchî. Nchií nùú-né na ian nchií orá, te tnúú sàhà-né nahi ñuhu.

² Te iníndáhá-nè iin libru tii nuná. Te nì sàcuìn-nè ñuhíví, sàhà cuàhá-nè ián diquí mar, te sàhà itní-nè, ián diquí ñuhù íchí.

³ Te nì ndàhì ndee-né, na ian ndàhì nsicaha, ducan tiacú. Daaní, nì nsihi nì ndàhì-nè, dandu nì tiacu cáhàn iin ana cáhàn fuerte na ian cáhàn dàvi. Usà xichi nì cáhàn ana cáhàn mà.

⁴ Te yùhù, cuàhìn chitui ñà-nduá nì cachi-nè nì cùí, doco momentu mà nì tiacuí iá ana cáhàn ansivi, cachí-yà xí:

—Màsà chítúú-ní ñà-nduá nì cachi ana nì cáhàn usà xichi, te nì ia na ian cáhàn dàvi, vèchi icúmí coo dèhé palabra mà —nì cachi-yà.

⁵ Daaní, ángel iín mahì mar xì diquí ñuhù íchí, nì ndanihi-ne ndahàcuàhá-nè ansivi,

⁶ te nì ndacùcahan-né mii-yá itíacú nicanicuahàn, divi mii-yá nì quidayacun xì ansivi, xì ñuhíví, xì mar, xì nsidaa ñàhà iá lugar yucán. Te nì cachi-nè:

—Chínáhi Dios, mà cuéé gà,

⁷ te sàà quíví cuu ndisa nsidaa ñà-nduá nì cachitnúhu nèhiví xí Dios sàhà, vèchi na cuàhàn sivi trompeta xì ángel usà, dandísá, icúmí xínu nsidaa ñà-nduá cuní Dios quida-ya, te iá dèhá` vichi.

⁸ Daaní, inga tu nì tiacuí iá ana cáhàn ansivi, te dohó nì cachi-yà xí:

—Tnàtuu-ní nùù ángel iín mahì mar xì diquí ñuhù íchí, te tnii-ní libru tii nuná ini ndahà-né.

⁹ Ñàyucànduá, nì tnàtúi nùù-né, te nì cachi xì-né:

—Taxi-ní libru tii núí.

Te nì cachi-nè:

—(Yoho iá`.) Tnii-ñà, te caxì-ñá. Icúmí nduvidi yuhù-ní nahi ndudi ñùñù, doco nú sàni coco-níá, dandu icúmíá ndu-uà-ñà tíxi-ní.

¹⁰ Daaní, nì tnii libru iníndáhá-nè mà, te nì saxíá. Te (ñà-ndáá nduá), saxí vídiá, nahi ndudi, doco nì nsihi nì coquíá, dandu nì nsicúhñú uà ini.

¹¹ Dandu nì cachi tu ángel mà xí:

—Icúmí-ní cachitnúhu gà-ní ñà-nduú razón ndiaha xí Dios sàhà cuàhà nèhiví ndoó cuàhà ñuu cáhàn cuàhà dàhàn. Daaní, stná cuàhà rey dandacú nùù ñuu mà, icúmí-ní cachitnúhu stná-ní sàhà-té —nì cachi ángel.

11

Ûì nèhiví cáhàn cuenta xi Dios

¹ Daaní, nì sàha-ya yùhù iin vara caní nahi metro, te nì cachi-yà xí:

—Ndacuíin-ní, cuahán-ní, chitacuhá-ní veheñùhu cahnú ndé cahvi nèhiví Dios, te chitacuhá stná-ní mesa ndé sàha-ne promesa ì xì-né, te nacañvi stná-ní nadaa-ne sàhàn cahvi xì-yá yucán.

² Doco patiu yàtà veheñùhu màsà chítacuhá-ní, vèchi icúmí ndòamà ndahà tiàa inga raza. Tiàa ma, icúmí-tè cundoo-tè nsidanicuú gà lugar ñuu ì, te quida quini-tè xì nèhiví yucán. Ûì dico ùì (42) yòò cunduu tiempu caquida-tè ducán.

³ Doco yucán cuàhàn cundoo stná ùì nèhiví-xí icúmí ñihitáñvi cáhàn cuenta xi. Iin mil ùì cientu ùì dico quíví icúmí-nè cáhàn-nè xì nèhiví ñà-nduú razón xi. Te sicoto cundixi-ne, sicoto tnuu cundua —nì cachi-yà.

⁴ Cunaha-ní, mii-yá nduú-yá Stoho nsidaa ñuu iá ñuhíví. Te frente silla ndé iá-yà (ansivi) itá ùì nù-olivú, xì ùì candelero. Pues na quidá nsidaa ñà-jaàn nùù-yá gloria, ducán quidá stná ùì nèhiví cáhàn cuenta xi-ya (ñuu mà).

⁵ Te nú xiní ùhì iin tiàa xi-né, te cuní-te quida quini-tè xì-né, dandu cuàhàn cana ñuhu yuhù-nè coco-tè. Te ducán icúmí cuu xi nsidaa ana cuní quida quini xi-né.

⁶ Te ndahà stná ùì nècuàchimà icúmí ndòo poder ñà-cadí xì dàvi ñà-màsà cuun ni-iin dàvi inii tiempu cáhàn-nè cuenta xi Dios. Te icúmí-nè dandacú stná-nè nùù tècuí ñà-nanduu-tè ñì, te nú cuní-nè, vátùnì dandohó stná-nè nèhiví nsidanuu clase tnùndoho, según nadaa xichi cuní-nè.

⁷ Daaní, nú sàni nsihi tiempu cáhàn-nè xì nèhiví cuenta xi Dios, dandu icúmí-nè cui-nè, vèchi iá iin quisi daná inácaá ini yavi cùnú sàstnúhù yucán, te icúmí quisi ma nana-sì quee-sì, nàá-sì xi ndúì nèhiví cáhàn cuenta xi Dios mà, te icúmí-sì cundee-sì nùù-né, dandu cui-nè.

⁸ Te yucán mahì calle ñuu ndé nì xihì Stoho-ndá Señor nchica cruz, yucán icúmí nsii ma cuitànduhù-né. Te divi ñuu mà, Sodoma cachí stná-nè xán, te Egipto cachí stná-nè xán, (vèchi malu gà modo xi nèhiví ndoó yucán).

⁹ Pues, ñuu yucán cuitànduhù nsii ma, te cundehè cuàhà nèhiví-né, nèhiví cuàhà raza ndoó cuàhà ñuu, te cuàhà dàhàn cáhàn-nè. Ùni quíví dava cuitànduhù nècuàchimà yucán, ni mà cuàhà nèhiví cundùxin-ne.

¹⁰ Al contrario, cuàhàn-nè cudii ini-nè ñà-sàni xihì nsii ma. Cuàhàn-nè quida-ne vicò, te dacutàhvi stnahá-né iñàha, te cudii ini-nè, vâchi còò gá ndúú nècuàchi sàhnú nì sachàn cuenta xi Dios, vâchi antes cuàhà gá nì ndoho-ne nì quida nècuàchimà.

¹¹ Daaní, nú sàni yàha ùni quivì dava, dandu icúmi nsii ma natiacu-nè quida Dios, te ndacuíta-ne. Ñâyùcàndüá, yàha ga icúmi yùhì nsidaa nèhivì cundehè xi-né.

¹² Dandu icúmi tiacu tàchi ana cãhàn ansivi, te dohó cachí-yà:

—Nahà-nsia diquì-xi yohó.

Dandu canana nècuàchi sàhnümà diquì-xi ansivi. Mahì vicò nana-ne cùhùn-nè, cundehè nsidaa nèhivì xini ùhì xi-né.

¹³ Dandu divi hora mà, ndee gá icúmi tñaa ñuhivì. Nùu cada ùxin vehe itánduhù ñuu mà, icúmi caà ian. Te icúmi cui usà mìl nèhivì sàhà-ñá icúmi tñaa guá ducán. Dandu nèhivì dava ga, cuàhà gá yùhì-nè, te nacuni-nè cahnú gá poder xi mii-yá iá ansivi.

¹⁴ Pues, ñà-jaàn nduú tñundoho cahnú ñà-ùì. Doco cumáni gá ñà-ùni, te sà-itúú vâxa.

Nansa icúmi cuu na sivi ángel usà corneta xi-ne

¹⁵ Daaní, ángel usà, nì sivi-nè corneta xi-ne. Te nì inini ndee cána cuàhà-né ansivi, cachí-nè:

Sàni sàà quivì cusahnú Stoho-ndà Señor nùu nsidaa ñuu ñuhivì, te nicanicuahàn icúmi-yá cusahnú-yá, mii-yá xi Dèhemani-yá Cristu.

¹⁶ Dandu òcò cümü nècuàchi sàhnú ndoó nùu Dios diquì silla vico, nì tutuyuhu-né nùu sàhà-yá, te nì cahvi-néyà,

¹⁷ cachí-nè:

Naquímáni-nsí mii-ní Stoho-nsi Dios, vâchi icúmi-ní nsidanicuú poder. Dècuèndè sàhana iá-ní, te nicanicuahàn icúmi-ní coo-ní. Ansivéhé-ní, vâchi sàni quesaha-ní cuàhàn-ní cusahnú dahuun-ní nùu ñuhivì, cuàhàn-ní dandacu-ní nùu nsidaa nèhivì ñuhivì.

¹⁸ Mii-né, nì xidà ini-né, doco sàni sàà quivì nachitacuhá-ñínè castigu xi-ne. Te sàni sàà stná tiempu nsidandaà-ní sàhà nècuàchi nduú nsii. Te vichì icúmi cundiatú stná anima nsidaa ana xinúcuàchì nùu-ní, nacua nècuàchi cãhàn cuenta xi-ní, te ducán stná nsidaa gá ana xinduu nèhivì xi-ní, divi ana cahvi xi-ní, a ducán nduú-né nèhivì ùún, ò nèhivì chicá nì ñihì chuun nùu-ní. Doco nèhivì nì quida quini xi ñuhivì, còò, vâchi icúmi-ní dandáñuhú-ñínè, nì cachi nècuàchi sàhnümà.

¹⁹ Daaní, nì nuna veheñùhu ùi xí Dios ansivi, te nì xini ini veheñùhu ma iá caja ùi ndé inácaá palabra nì cachí-yà na ní ndòo sahnú-yá xi nèhivì xi-yá sàhana. Dandu yàha ga nì tàsa, te nì tiacu cahá fuerte; te ndee gá nì cãhàn stná ðavi, te nì tñaa. Te nì còyo stná iin.

12

Nansa nì xini Juan seña sàhà nècuàchi ñahà nì xinudèhé na nì xidà ini quisi cuahá

¹ Daaní, nì xini iin seña cahnú ansivi. Nì natùu iin nècuàchi ñahà. Txi sàhà-né iá luna, te tñuú ñihni ñà-ndüá ndixí-né, vâchi orá nduá, te ðini-né, ñuhá iin corona ndé itándiaa ùxin ùi sìnsivì.

² Meru sà-itúú tùinuú meé xi-ne, ñâyùcàndüá, ndáhi-nè, vâchi nì quicuehè-nè, cuàhàn cacu dèhe-ne.

³ Te nì tui inga seña nùu ansivi. Nì quecunu iin quisi cahnú cuahá, caní-si nahi còò nahnu-guá, te cuahá laà-si. Usà ðini-sí, te ùxin nsiqui-sí itá. Cada iin iin ðini-sí ñuhú sicaté vico.

⁴ Te iá stná ndohò caní-si, te xi ndohò-símá nì caní-si cuàhà sitnúu itándiaa ansivi, nì dandiàchi-ñásí nùu ñuhivì. Iin tantu sitnúu mà nì ndiàchi nùu ñuhivì, te ùi tantu-si nì ndòo ansivi. Dandu nì sàcuin quisi mà nùu nècuàchi ñahà mà, ndiatú-si tùinuú meé xi-ne, vâchi cuní-si caxi-sivè na sàni cacu-ve.

⁵ Dandu nì tùinuú-vé, tiàa nduú-vé, te nduú stná-vé mii-yá cuàhàn cusahnú nùu nsidan-icuú ñuu, te mà cuàha-ya quida ndevàha-ne. Dandu (nì xini) nì ndanchito-ya dècuèndè ndé iá Dios nùu silla ndiaha xi-yá.

⁶ Daaní, nècuàchi ñahà mà, nì xinudèhé-nè yucù ðaná, vâchi yucán sàni nsidayucun Dios iin xaan ndé coo-ne, te yucán icúmi-nè ñihí-né ñà-cutiacu-nè iin mìl ùi cientu ùni dico quivì.

⁷ Doco nì quesaha iá guerra ansivi. Ángel nani Miguel xi compañeru-nè nduú iin ladu, te quisi cuahá mà xi compañeru-si nduú inga ladu, te nì canáa stnahá-si.

⁸⁻⁹ Doco cóni cundéé-si. Ñâyùcàndüá, nì taxi-nési ansivi, vâchi còò gá permisú cundoo gà-si yucán (ndé iá Dios). Nì dandiàchi-yási nùu ñuhivì yohó, mii-sí, xi nsidaa ana nchicùn xi-sí. Vâchi quisi (cusahnuma), divi còò iá ndè sàhana nduú-si; ñà-malu nduú-si, te Satanás nani stná-sí, te divi-si nduú ana dandahví xi nèhivì inicutu ñuhivì.

¹⁰ Dandu nì tiacuú iá ana cãhàn fuerte ansivi, te dohó cachí-nè:

—Vichi sàni càcu nsidaa nèhivi xí Dios. Te sàni sàa quívi cusahnú fuerte-yà, te cusahnú stná Dèhemanì-yá Cristu. Vàchi sàni ndiachi ñà-malu fuera, vachi divi-sì nduú ana daqúee cuàchi xì dìqui ñani-ndà (iin-ni cahvi stná xi Yua-nda Dios), vachi ndui te ñuú dacuidá cuàchi-sinë.

¹¹ Doco mii-né, ni cundee-né nù-sí ñà-nì ndacùcahan-né mii-yá nani Lelù Íi, divi mii-yá ni xitià nì-xì sàhà-ndà. Ni cóni cáyùhì-nè, ni cachi vate-né nchícùn-nèyà, vachi dispuestu ni sandoo-ne cui-nè, cóni cùhì ini-nè vida xi-ne.

¹² Pues vichi xiñuhu cudìi ini nsidaa ana ndoó ansivi, (vachi sàni cùxio ñà-malu). Doco nèhivi ndoó ñuhivì xì mar, ndahví-nè, vachi yucán sàni nasaà-si, vachi cuahà ini-sì, vachi ináhá-sì làca iyuhu quívi ndoó nù-sí (ñà-quida-sì ñà-nduá cunì-sì).

¹³ Daanì, na sàni cundaà inì-sì ñà-sàni ndiachi-sì ñuhivì yohó nduá, dandu ni quesaha-sì nàá-sì xi nècuàchi ñahà mà, divi nècuàchi ni tùinuú meè xi.

¹⁴ Dandu mii-né, ni nihitáhvi-né coo ndixìn-né nahi ndixìn yanuni nahnú, te ni ndava-ne cuahàn-nè yucù ndé coo dèhé-nè. Yucán icúmí-nè lugar (dèhé) xi-ne ndé nihì-né ñà-cutiacu-nè ùni cuià dava, te ducán càcu-ne nù cò mà.

¹⁵ Doco yuhù cò mà ni cana cuahà tècuí nahi yùte, vachi cunì-sì tnani nècuàchi ñahà mà;

¹⁶ doco ni chindee ñuhivì nècuàchimà, vachi ni nsicà ñuhù ni ndèe nsihi tècuí ni cana yuhù-síma.

¹⁷ Ñàyücànduá, ni xidà gà inì-sì sàhà nècuàchi mà, te ni quesaha-sì xicánú-sì nandú-cú-sì dava ga dèhe-ne, vachi, cunì-sì quida quini stná-sì xi nsidaa dèhe-ne chívaha xi ley xi Dios, te nchícùn vii xi ñà-nduá cachí Jesucristu.

13

Nansa ni ndecoyo ùi gà quisi daná

¹ Daanì, ni sàcùn yuhù mar, te ni xinì mahì tècuí ni quecunu iin quisi daná, ùsà ñni-sì, xi ùxin nsiquì-sì. Te iin iin nsiquì-sì ñuhù iin sicaté vico. Te icà iin iin ñni-sì itándiaa quivi-sì, iin quivi iá quini, te càhàn contra xi Dios.

² Nahi tigre, ducán nàhà quisi ni xinì mà. Doco sàhà-sì, nahi sàhà si-oso, ducán ndáa-ña. Te yuhù-sì, nahi yuhù nsicaha, ducán iá'. Te quisi ni quecunu antes, te iá nahi cò, divi nù quisi yucán ni nihì quisi yohó poder dandacú-sì nù ñuhivì. Ñàyücànduá, ndee ní cusahnú-sì; vachi nù inga quisi mà ni nihì-sì coo-sì nù silla cahnú dandacú-sì.

³ Daanì, ni xinì ni nacuehè-sì, iin ñni-sì ni nacuehè, cuahàn cuià cahín. Doco ni nduvàha ndé ni nacuehè xi-sì. Ñàyücànduá, ni ndulocó nsidaa nèhivi ñuhivì ñà-nì nduvàha-sì.

⁴ Sàháyücànduá, ni cahvi-né quisi nahi cò chindéé xi quisi ùi mà ñà-dàndacú-sì. Stná quisi ùi mà, ni cahvi stná-nèsi, cachì-nè:

—Cò ana ndudává xí quisi jaàn. Cò iin cui cundee xi nù-sì nú ni nàá-nè xi-sì —xícahi-nè.

⁵ Te ni nihì stná-sì ñà-màsà yúhì yuhù-sì càhàn ndevàha-sì dìqui Dios; ndee ni càhàn quini-sì dìqui-yá. Te ni nihitáhvi stná-sì ñà-cusahnú-sì ùi dico ùi (42) yò.

⁶ Te ndee ní canáhá-sì dìqui Dios, quini gà ni càhàn-sì dìqui-yá, xi dìqui lugar ndé iá-yà, xi dìqui nsidaa ana ndoó cutnàhà xi-yá ansivi.

⁷ Te ni nihì stná-sì ñà-quida quini-sì xi nèhivi xí-yá, te cuahà-né ni sahni-sì. Te ni nihitáhvi stná-sì ñà-dandacú-sì nù nsidaa raza nèhivi ndoó nsidaa ñu, ndéni dàhàn ni cui càhàn-nè.

⁸ Te nsidanicuú nèhivi ñuhivì, cuahàn-nè cahvi-nèsi. Doco ni-iin nèhivi mà, có-ítúú quívi-né nù libru xi Lelù Íi. Vachi cunaha-nsiá, dècuèndè na táyoo ñuhivì, dandu sà-ítándiaa quívi nsidaa ana icúmí cutiacu nù-yá.

⁹ Ni cúninì vaha nsidaa nèhivi nansa cachí palabra yohó.

¹⁰ Nú ni chícadí nèhivi-ndó, dandu mii stná-nè icúmí-nè cundiadi stná-nè; te nú ni cahnú nèhivi-ndó machete, divi machete icúmí-nè cui stná-nè. Sàhà ñà-jaàn, xiñuhu cundoo-nda calma, te cunihnu vaha ini-ndà mii-yá, vachi nèhivi xí-yá nduu-nda.

¹¹ Daanì, ni xinì yucán ni quecunu inga quisi daná. Nù ini ñuhù ñuhivì ni nana-sì. Itá ùi nsiquì-sì, nahi nsiquì lelù, doco nacua càhàn quisi cahnú nahi cò mà, ducán càhàn stná quisi yohó.

¹² Ladu nù quisi ni quecunu nù mar, jaàn iin quisi yohó, te sàhà chindéé quisimà-sì, ñàyücànduá quidá-sì cuahà ñàhà ndulocó nèhivi. Te quidá stná-sì xi nèhivi ñuhivì ñà-fuerza cahvi-né quisi iá-sì nù-xì, divi quisi ni nacuehè daná ñni-xì, te ni nduvàha-sì.

¹³ Te quisi iin yucán, cuahà gà ñàhà quidá-sì ñà-quida tontó-te nèhivi, dècuèndè cóyo stná ñuhu ansivi cundehè-né, ducán quidá-sì,

¹⁴ dandáhvi-sinë ñà-cuahà guá quidá-sì, vachi ni nihì-sì ñà-quida-sì ducán nú iin-sì nù inga quisi mà. Ñàyücànduá, cachì-sì xi nèhivi ñà-quidayucun-nè figura cahnú cunduu quisi ni nacuehè, te ni nduvàha ma.

¹⁵ Te figura mà, ndè nì ditá' tàchá, vâchi ducán nì nihì inga quisi mà quida-sì xán. Dècuèndè cáhàn stná nì quida quisi mà. Te nú có-cândísá iin nêhivì cahvi xán, dandu dandacú-sì cui nècuàchìmà.

¹⁶ Te icúmí stná-sì dandacú-sì màcùtuu iin tnuni xi-sì icà nsidanicuú nêhivì, ò sea màcùtua ini ndahàcuahá-nè, te ò nuù tnaa-nè. Doco nsidanicuú-né, icúmí màcùtuu tnuni mà icà-né, a sea nì cùndúú-né nêhivì nihì chuun, te ò nêhivì úún, ò nècuàchì ndahví, ò nècuàchì cuicà, ò iin peón-nì, ò iin lamú.

¹⁷ Vâchi nú còò tnuni xi-sì, ò quivì-sì, te ò número xi quivì-sì icà-né, dandu còò permisú cuiin-ne ò dicò-né.

¹⁸ Cunaha-nsiá, palabra nchichí nduá cuahìn cachì xi-nsiá yohó. Iin nècuàchì nchichí, vârtùnì cahvi-ne nadaa nduá sàà número xi quivì quisi mà, vâchi número xi quivì iin tiàa nduá. Te divi 666 nduú número mà.

14

Alanbanza icúmí coto 144,000 nêhivì xí Jesús

¹ Daaní, nì xini dècuèndè yucú Sión, te yucán iin mii-yá nani Lelù Íi, te cutnáhá-yá xi iin cientu ùi dico cùmí mil (144,000) nêhivì, te icà tnaa iin iin-ne itúú quivì Yuandiáhá-yá.

² Dandu nì inini ndè ansivi tiacú na ian cundáá nuù yutnú cuerda nani arpa. Te fuerte tiacú nahi têñuhu cuahá, na ian cáhàn ndee dàvi.

³ Te nì caxito nêhivì cuahá mà iin alabanza saa, itá-né frente silla ndiaha xí-yá ndé itá stná cùmí ana itá saín nuù-yá, te ndé ndoó stná òcò cùmí nècuàchì sàhnú. Doco nì-iin nècuàchì dava ga, mànicúú cutúha stná-nè coto-ne alabanza mà, cuisì nêhivì cuahá itá yucán, divi nêhivì xínduu iin cientu ùi dico cùmí mil tiàa ma. Te nsidaa-né nduú nêhivì nì càcu nuù ñuhivì yohó nì quida (Jesucristu).

⁴ Te nì còò nì-iin cuàchi nì quidá-né xi nècuàchì ñahá, vâchi cóni cáhàn-nè xi nècuàchì ñahá nì-iin xichì. Te vichi, nchícùn-nè mii-yá nani Lelù Íi ndéni nì cui nì cùhùn-yá. Antes mahi nêhivì ñuhivì nì sandoo-ne, doco vichì sàni càcu-ne ñà-nì dànáa-yá sàhá-né, te sàhàjàn nì càcu-ne ñà-cunduu-ne na iin promesa chica ndiaha nuù Yua-nda Dios xi nuù Lelù Íi,

⁵ vâchi de por sí, mà túha-ne dandahví-nè; te nicanicuahàn ndoó-né nuù silla ndiaha ndé iá-ya, vâchi còò nì-iin falta xi-ne nuù-yá.

Ùni razón nì cachitnúhu ùni ángel ndavá ansivi

⁶ Daaní, nì xini ndavá inga ángel dìquì-xí ansivi, nihí-né razón vâha xi Dios, iin razón icúmí cunaha nicanicuahàn. Te cuahàn ángel mà cachitnúhu-neà xi nsidaa nêhivì nsidanicuú ñuu iá ñuhivì, nsidanicuú raza-nè ndéni dàhàn nì cui cáhàn-nè.

⁷ Te dohó nì cachì ángel xi nêhivì mà:

—Cahvi-nsiá Dios, te tava-nsiá tnúñuhu xí-yá, vâchi sàni sàà quivì nsidandaà-yá sàhá cuàchi nêhivì ñuhivì. Ñâyücàndúá, cahvi-nsiáyá, vâchi divi mii-yá nduú ana nì quidayucun xi ansivi, ñuhivì, mar, xi nsidaa stná ndé caná tècuí.

⁸ Daaní, (nì xini) nchícùn gà vâxi inga ángel, te dohó nì cachì-nè:

—Sàni ndaíñuhu ñuu Babilonia, sàni chàhmà dahuan nì quida Dios, vâchi nì sàha nêhivì ñuu mà ñà-coho stná nêhivì inga ñuu, tè ñâyücàndúá, nì xini stná nècuàchìmà, te quini nihnú stná ini-nè vichi. Ñâyücàndúá, icúmí nècuàchì Babilonia mà nihì-né iin castigu fuerte —nì cachì ángel mà.

⁹ Daaní, nchícùn gà vâxi inga ángel, te vichi nduú ùni ángel sàni quecoyo. Te nì ndàhi ndee-né, cachì-nè:

—¡Ndahví nsidaa ana cahvi xi quisi daná mà ò figura-sì! ¡Te ndahví stná ana sà-itúú tnuni xi-sì nuù tnaa-xì, ò ini ndahá-xí!

¹⁰ Vâchi yáha ga icúmí-nè ndoho-ne mahi ñuhu cahnú ndé xíxin azufre sahán quini, te indéhe stná ángel ìi xí Dios, xi stná Lelù Íi. Te castigu mà, ducán quea na ian cuahàn dacohó Dios-nè iin ndutè quini, te micuísì ndutè fuerte cunduu-tè, doco fuerza coho-nète, vâchi xidá ini-yá sàhá-né.

¹¹ Ñâyücàndúá icúmí-nè cundoo-ne ndoho-ne nicanicuahàn ndé (xíxin ñuhu, te) caná ducún ñuhmà, nì mà nunca nihì gà-nè cundoo dadí-né, ndui te ñuu icúmí-nè ndoho-ne, vâchi nì cahvi-né quisi mà xi figura-sì, te nì sàcùtuu stná quivì-sì icà-né.

¹² Ñâyücàndúá, cuahá paciencia xiñuhu cucumi nsidaa nêhivì xí Dios, divi nsidaa ana chivâha xi ley xi-ya, te nihnú vâha ini xi (Dêhemani-yá) Jesús.

¹³ Daaní, nì tiacu tu iá ana cáhàn ansivi, cachì-nè xí:

—Vichì tiàa-yó palabra yohó cachì xùn: “Dècuèndè vichì xi quivì nuù-xí, ndiaha gá coo xi nêhivì cui, te nú nduú-né ana nchícùn xi Stoho-ndá Señor”. Ñà-ndàà nduá, cachì Espíritu Íi xi

Dios, icúmí nècuàchìmà quetatu vâha-ne, mà ndóhó gá-nè nùu chuun quidá-né, te dècuèndè gloria nacuni stná mii-yá nsidaa obra ni quida-ne.

Nansa cuàhàn cuu quivì ùltimo

¹⁴ Daaní, nì xini iin vicò cuxín yaa, te nùu vicò mà iá ana indéhe nahi mii-yá ana nduú Tnaha Nèhivì Ñuhivì. Te òinì-yá, ñuhá iin corona oro, te iníndáhá-yá iin hoz diin.

¹⁵ Dandu nì quee inga ángel nùu veheñuhu ì xí-yá, te nì ndàhì-nè nì càhàn-nè xì mii-yá iá nùu vicò, cachi-nè:

—Cahndè-ní viu ndanihi-ní cosecha, vâchi sàni xida viu ñuhivì, te vichi sà-íá ndanchitoa.

¹⁶ Daaní, nì sahnde-yá viu iá ñuhivì, te ducán nì ndanchito cosecha mà.

¹⁷ Dandu nì quee inga ángel nùu veheñuhu ì iá gloria mà, te iníndáhá stná-nè iin hoz diin.

¹⁸ Dandu nì quee inga ángel nùu ndé iin mesa ì ndé cahví-né Dios, te nduú-né ángel dandacú nùu ñuhu xixin. Te nì ndàhì ndee-né, cachi-nè xì ángel iníndáhá hoz mà:

—Xì hoz diin jaàn cahndè-ní nsidaa si-uva caá nducuyòhò ñuhivì, vâchi sàni xichi-sì —nì cachi-nè.

¹⁹ Ñâyùcàndüá, nì sahnde ángel mà si-uva ñuhivì xì hoz xi-ne, te nì dàtácá-nè nsidaa-sí nì dàqueé-nèsi ini lugar ndé chàhmá-sí quee tècuí-sí. Te seña ñà-icúmí-sí chàhmá-símà nduú ñà-icúmí Dios cuàha-yá nèhivì malu iin castigu fuerte.

²⁰ Vâchi cunaha-nsíá, fuera ñuu nì chàhmá-né, te nì xitia nùu-né, ducán cuàhà nùu mà nahi yùte ndé quee cuàhà tèñuhu, te cunú nì xica (nahi ùi metro), na ian ducún iá frenu xi idu. Te ùni cientu kilómetro nduú ñà-càni yùte nùu mà.

15

Ùsà ángel dandacú nùu ùsà tnùndoho chicá nahnú

¹ Daaní, nì xini cuú inga seña ansivì, iin seña ndiaha. Te nì nduloquí, vâchi nì xini ndoó ùsà ángel dandacú nùu ùsà tnùndoho chicá nahnú, te ñà-ùltimo nduájàn, vâchi sà-íá, xì ñà-jaàn-ní mà cuidà gá ini Dios nú sàni yàha.

² Dandu nì xini mar iá (ansivì) yucán, nahi vidriu nduá, te dáca stnahá stná vidriu mà xì ñuhu xixin, ducán nàhà. Te nùu mar mà itá cuàhà nèhivì, xínduu-ne ana nì cundee nùu quisi daná mà, xì nùu figura-sí, xì nùu número xi quivì-sí, nùu nsidaa ñà-jaàn nì cundee-né, te vichi itá-né yucán, nihí-né yutnú cuerda cundaa.

³ Te nacuatú stná-né, xitò-né alabanza xi Moisés nì xinucuachi nùu Dios (sánaha), te xitò stná-né alabanza xi Lelù Ì, cachi-nè palabra yohò:

¡Ndiaha gá nsidaa obra quida-ní, Stoho-nsi Dios; ndulócò-nsi ñà-cuàhà guá quida-ní!

Nsidanicuú poder icúmí-ní. Doco micuísì ñà-íá vii nduá quida-ní, cuiisì ñà-íá vâha nacua ndiá ìcà. Ansivéhé-ní, vâchi rey nduu-ní, te cusáhnú-ní nùu nsidaa ñuu.

⁴ Te vichi xiñuhu cahví nsidaa nèhivì mii-ní, Stoho-nsi Señor; xiñuhu nsidaa-nsí ndanihi cahnú-nsí mii-ní, vâchi cuiisì mii-ní ì ndisa-ní. Te icúmí nèhivì nsidaa ñuu tnàtuu-ne cuítasisì-né nùu-ní, vâchi nùu nsidaa-né nàhà claru iá vii nsidaa ñà-ndüá nì quida-ní xì nèhivì ñuhivì.

Ducán nì cachi-nè.

⁵ Daaní, nì nsihamá, dandu nì xini nì nuna cuarto chicá ì iá ini veheñuhu xi-ya ndé iá vâha ley ì xí-yá.

⁶ Te nì caquee ùsà ángel mà vâxi-ne, diví ángel dandacú nùu ùsà tnùndoho nahnú icúmí ndoho nèhivì. Te ndixí-né sicoto yèhè cuxín yaa, te nuhní nchica-ne iin siuhma oro.

⁷ Dandu nì tnàtuu iin ana iin saín nùu-yá, te nì sàha-ne iin iin ángel mà iin yaxìn oro, chitu iin iin-si castigu xi Dios, divi mii-yá itíacú nicanicuañàn, vâchi sàhà cuàchi nèhivì, ñâyùcàndüá, xidá ini-yá.

⁸ Daaní ñà-ndiaha fuerte guá-yá, te ñà-ndee guá dandacú-yá, ñâyùcàndüá nì cana ñùhmà, te nì xitiá inicutu veheñuhu ì mà. Te sàhà ñùhmà mà mànicúis nansihvi ga ni-iin nèhivì ini lugar mà dècuèndè sàni nsihì ùsà tnùndoho nahnú dandacú ángel mà nùu-xí.

16

Nansa icúmí dacóyo ángel ñà-ñùhú ini ùsà yaxìn oro, divi ñà-ndüú tnùndoho nahnú

¹ Daaní, nì tiacuí iá ana càhàn fuerte ini veheñuhu ì mà, cachi-yá xi ùsà ángel mà:

—Cuahán-ndá dacóyo-ndá ñà-ñùhú ini iin iin yaxìn mà òiqui ñuhivì ñà-cundua castigu fuerte sàhà-ñá xidá ini Dios sàhà cuàchi nèhivì —nì cachi-nè.

² Dandu nì quee ángel primeru nì dàcóyo-ne ñà-ñùhú ini yaxìn xí-né òiqui ñuhivì. Ñâyùcàndüá, nsidaa nèhivì itúú tnuni xi quisi daná mà, nì cana iin nsihì ùhì ìcà-né, quini iá, te yáha ga cuhíá; nùu nsidanicuú ana cahví xi figura quisi mà, nì cana nsihì ùhì mà ìcà-né.

³ Daaní, ángel ùi, nì dácóyo-ne ñà-ñùhú ini yaxìn xí-né mahi mar. Te nì nanduu nsihi təcuií mà nìi, nahi nìi nèhivi nì xihì. Ñàyùcàndùá, nì xihì nsidanicuú quisi itiacú ñuhú mar.

⁴ Daaní, ángel ùni, nì dácóyo-ne ñà-ñùhú ini yaxìn xí-né, nì còya nùu nsidaa yùte xì nùu nsidaa lugar ndé caná təcuií, te nì nanduu stná təcuií mà nìi.

⁵ Dandu nì tiacuí cáhàn iin ángel dandacú nùu nsidaa təcuií, te nì cachi-nè xì Yua-nda Dios:

—Stoho-nsì Señor, mii-ní nduú ana iá ndè nicanicuahàn sàhana. Te ì gá stná-ní, ñàyùcàndùá, iá vii ñà-nduá sàni quida-ní xì nèhivi sàhà cuàchi-ne.

⁶ Vàchi mii-né, nì casahni-né nèhivi vaha xì-ní; cuàhà tiàa nì cáhàn cuenta xì-ní nì casahni-né, te nì xitià nù-né, ñàyùcàndùá, divi nùu nduá icúmí nècuàchì mà coho-ne quida-ní. Ducán icúmí coo xì-né, vachi malu-né.

⁷ Dandu nì inini iá inga ángel yatni nùu mesa ì ndé cahvi-né Dios, te nì cachi-nè:

—Ñà-ndáa nduá, Stoho-nsì Dios. Nsidanicuú poder icúmí-ní, te micuísì ñà-íá vii nduá sàni quida-ní xì nèhivi sàhà cuàchi-ne, cuisi ñà-ndiá icà nduá sàni quida-ní xì-né.

⁸ Daaní, ángel cùmi, nì dácóyo-ne ñà-ñùhú ini yaxìn xí-né nùu orá, te ñàyùcàndùá nì nìhitáhvi orá dansii fuerteà nèhivi. Nahi ñuhu xixìn nì nandua,

⁹ te yáha ga cuàhà nì nsii-né sàhà ñà-ihni gá. Ñàyùcàndùá, quini guá nì canàhà-né diquì Dios, vachi divi-ya nduú ana nì dandacú coo tnùndohoma; doco cóni náxicócuñi ini-né sàhà cuàchi-ne, nì cóni nácúni-né ñà-vii nduá quidá-yá.

¹⁰ Daaní, ángel ùhùn, nì dácóyo-ne ñà-ñùhú ini yaxìn xí-né nùu silla ndé iá quisi daná mà, te nì nàcuñi tnùu inicutu ñuu ndé dandacú-si. Te nèhivi ndoo yucán, mà cùndéé gá ini-né dolor ndohó-né, ñàyùcàndùá nì tnii nùhu-ne yàá-né.

¹¹ Te nì canàhà quini-ne diquì mii-yá iá ansivi ñà-cuàhà guá tnùndoho yáha-ne, te ndohó stná-né sàhà nsihì ùni nì cana icà-né. Doco nì sàhà ñà-jaàn cóni cùu-né arrepentir sàhà ñà-có-ndiáá quidá-né.

¹² Daaní, ángel ìñù, nì dácóyo-ne ñà-ñùhú ini yaxìn xí-né diquì yùte cahnú nani Eufrates. Dandu nì ndoco təcuií, te ducán mà cádi yùte ma nùu soldadu cuàhàn cundaca rey inga ñuu caquixi ladu ndé caná orá.

¹³ Daaní, nì xìnì nì quee iin sì-dicui yuhù iin iin quisi yucán. Ñà-malu nduú sì-dicui ma. Iin-sì nì quee yuhù quisi cuahá nahi còò, te ingá-sì nì quee yuhù quisi nì quecunu mahi mar, te ingá-sì nì quee yuhù quisi cáhàn cuenta xì quisi ùi mà.

¹⁴ Te espíritu xì ñà-malu nduú sì-dicui ma, te nì quee-sì cuàhàn-sì ñà-chiyuhù-sì nsidaa rey dandacú ñuhiví yohó. Cuàhà gá icúmí quisi mà quida-sì ñà-ndulocó rey mà, te candisá-te quixi-tè nataka nsihì-tè, cundoo tùha-tè sàà quivi coo guerra, te cundua quivi cahnú xì Dios, divi mii-yá icúmí xì nsidanicuú poder.

¹⁵ Te vichi cachí-yà xì-ndá: “Cunaha-ndá, naànáá icúmí sàì ndé ndoo-ndá. Ñàyùcàndùá, cundoo tùha-ndá, te cunihnu vaha ini-ndá sàhà màsà cùcáhàn-nùu-ndá na ian cucahan-nùu iin nèhivi nú còò sicoto xì-ne”.

¹⁶ Daaní, nì nataka nsihì soldadu, xì stná tè-dandacú nùu-té, nì casaà-te iin xaan nani Armagedón, vachi ducán nani lugar mà dàhàn hebreu.

¹⁷ Dandu ángel ùsà, nì dácóyo-ne ñà-ñùhú ini yaxìn xí-né mahi ansivi. Te nì tiacu fuerte cáhàn ndee ana cáhàn ini veheñùhu ì xì Dios ansivi. Divi mii-yá iá nùu silla ndiaha nduú ana nì cáhàn, te nì cachi-yà:

—¡Sà-íá!

¹⁸ Dandu nì tása cuahà, te nì nìhi fuerte, te yáha ga nì cáhàn dàvi, te nì tnàa fuerte sàstnùhù. Chicá fuerte nì tnàa nùu nsidaa xichì ini tiempu ndoo nèhivi ñuhiví.

¹⁹ Te ñà-ndee guá nì tnàa, ñàyùcàndùá nì tahné ñuu cahnú yucán, ùni ñuu nì nandua. Te nsidaa gá stná ñuu ñuhiví, nì caà nsihì vehe yucán. Dandu nì nsinuu ini Dios sàhà ñuu Babilonia, ñà-cuàha-ya ñuu mà iin castigu cahnú, vachi xidá ini-yà sàhà nsidaa cuàchi nècuàchì ñuu mà, ñàyùcàndùá cuàhàn-yà quida-ya xì-né na ian dacohó-yáné iin nduté có-cùni-né.

²⁰ Dandu nsidaa yucú iá ñuhiví, nì ndèa ini ñuhù, te nì ndèe stná ñuu iá mahi mar.

²¹ Daaní, ndé ansivi nì còyo iin nùu ñuhiví, nahnú sàstnùhù iin ní cacóyo ma, ùi dico kilo vèe iin ian, cunaha-nsiá. Te nèhivi ñuhiví, quini ga nì dàquee cuàchi-ne diquì Dios, vachi yáha ga nì ndoho-ne ñà-nì còyo guá iin nahnuma.

17

Nansa icúmí ndoho ñahà malu

¹ Daaní, iin ángel nùu nsi-úsà nècuàchì xì-inindaha yaxìn, nì tnàtuu-ne nùu nì cáhàn-nè xì nì cachi-nè:

—Cùhùn-ndà dacuní mii-ní nansa icúmi ndoho ñahà malu iá guá fama xi, te iá-ña ndé ñuhú cuahà tècuí.

² Divi ñahà mà nduú ana iá guá xi cuahà tè-cùsáhnú ñuhiví yohó. Te divi nùu mii-ñá sàni cutùha stná dava ga ñehiví ñuhiví quida quini stná-nè nahi miá. Te queámà na ian iin-ni vinu xihí nsidaa-né xi-ñá, te ducán xini stná-nè —ni cachi ángel.

³ Ñâyúcàndüá, ndacá ángel mà yùhù cuahàn xicà-nsí dècuèndè ndé nduú yucú. Na ian sání quidá Espíritu Ì xi Dios, ducán nduá cuahàn-nsi. Te na ní sàa-nsi yucú mà ni xini iá iin ñahà indánuú-ña iin quisi daná cuahá, ùsà òdini-sí xi ùxin nsiqui-sí, te itándiaa cuahà quivi siquini cáhàn contra xi Dios.

⁴ Te ndixí-ña sicoto moradu vico, xi sicoto cuahá laa, te ni nducutá oro xi yùu yéhè, xi stná sidiqui cuxín vico. Te iníndahá-ñá iin copa oro chitu nsidaa ñà-có-ndiáá xi nsidaa ñà-siquini, vachi cuachi ñahà mà nduú ñà-ñùhümá.

⁵ Daaní, icà tnaá-ña itúú iin quivi ùhi mànihi ini-ndà. Dohó cachá: Ñuu cahnú Babilonia, divi ñahà ni dàcuahà-xi dèhe yoco-xí ñà-quida quini stná-ña, te nsidaa ana quidá quini ñuhiví, xínduu stná-nè dèhe ñahà yohó, ducán cachá.

⁶ Te ni xini ñahà mà, na ian xini-ña, vachi ñà-ni cudüi guá inia sàhà ñà-ni xitia nù ñehiví xi Dios, ñâyúcàndüá, ducán queá na ian xini-ña ni quida nù mà, vachi ni cudüi guá inia ni xihí ñehiví váha cáhàn vate sàhà Jesús. Te yùhù, cuahà gá ni nduloquí indéhi ñahà mà.

⁷ Dandu ni cachi tu ángel mà xi:

—Màsà ndúlócò-ní, vachi cuahàn dacuní mii-ní iñàha ñà-cundaà vaha inì-ní sàhà ñahà mà xi sàhà stná quisi indánuú-ña, divi quisi iá ùsà òdini-xí, xi stná ùxin nsiqui-sí.

⁸ Cunaha-ní, antes nisa ia quisi mà ñuhiví, te vichi còò cá-si, doco icúmi-sí naquecunu-si quee-si yavi cunú cuahà, dandu después sàa-si ndañuhu dahuun-si. Te cuahà gá ñehiví ñuhiví, icúmi-né ndulócò-nè na cuni-nè quisi mà ñà-ni ìa-si ñuhiví, te còò cá-si, doco icúmi-sí nandecunu tu-si. Doco ñehiví mà, ni-iin-ne có-itándiaa quivi-né nùu tutu xi Dios. Vachi tutu mà, dècuèndè na táyò ñuhiví, dandu sà-itándiaa quivi nsidaa ñehiví cutiacu nicanicuahàn.

⁹ Pues vichi, yohó iá iin palabra nchichí cundaà ini ñècuàchi nchichí. Cunaha-ní, nsi-ùsà òdini quisi mà, ùsà yucú nduá, te diquí yucú mà iá ñahà mà.

¹⁰ ùsà stná rey ndoó. Ùhùn-te sàni yàha, te iin-tè, dandacú-te vichi, te iá stná ingà-te, doco cumáni gá quesaa-te. Daaní, nù sàni quesaa-te, dandu iin ratu tii icúmi-tè dandacú-te.

¹¹ Te quisi daná nisa ia, te vichi còò cá-si, pues divi quisi mà nduú stná-si iin rey dandacuma, divi rey ùnà cunduu-si, doco nùu ùsà rey primeru, iin-tè nduú stná-si. Dandu después icúmi-sí sàa stná-si ndañuhu dahuun-si.

¹² Daaní, ùxin nsiquí quisi mà, ùxin rey xíndua, doco tãñáha ga ñhì-tè ñuu ndé cusahnú-te. Cuisi imindaa hora ñihitáhvì-tè cutnahá-te xi quisi daná ñà-cusahnú-te.

¹³ Vachi nsi-ùxin rey mà, iin-ni sàni candatnuhu váha-tè ñà-dayáha-tè ñuu-te ndahá quisi mà ñà-dandacú-si lugar xi-tè.

¹⁴ Te icúmi stná-te quida-tè guerra nàa-te xi Lelù Ì, doco mii-yá, icúmi-yá cundee-yá nùu-tè, vachi Stoho-ndà Señor nduú-yá, te rey ndiaha nduú stná-yá, vachi chicá fuerte-yá nùu nsidaa gá ana dandacú, xi nsidaa gá stná ana itá fuerte; te nsidaa ana nchícùn xi-yá, ñehiví ni cana-ya xínduu-ne, divi ñehiví ni nacàxin-ya, te iin-ni nchícùn-nè palabra xi-ya nicanicuahàn.

¹⁵ Dandu ni cáhàn tu ángel cutnahá xí, cachí-nè:

—Cunaha-ní, nsidaa tècuí cuahà ndé iá ñahà malu mà, ñehiví nduú-te, divi ñehiví ndoó cuahà ñuu inicutu ñuhiví, vachi cuahà raza nduú-né, te cuahà dàhàn cáhàn-nè.

¹⁶ Doco ùxin rey nduú ùxin nsiquí itá òdini quisi daná mà, icúmi-tè cuidá inì-te sàhà ñahà mà. Ñâyúcàndüá, cuahàn-te dacuxíó-te nsidaa ñà-icúmi-ñá. Còò ni-ñàha cucumiá. Dandu cahni-téñá, te cahmi-téñá.

¹⁷ Iin-ni icúmi nsidaa-tè nacani inì-te quida-tè ducán, vachi icúmi Dios danacání ini-yàte quida-tè ñà-ndüá ni chitnùnì ini-yà cuu, te sàhámà icúmi-tè cuahà stná-te quisi mà dandacú-si lugar xi-tè dècuèndè cuu ndisa ñà-ndüá sàni cachitnùhu-ya antes.

¹⁸ Te cunaha-ní, ñahà ni xini-ní mà, divi ñuu cahnú dandacú nùu nsidaa rey ñuhiví nduú-ña.

18

Nansa icúmi ndañuhu ñuu Babilonia

¹ Daaní, ni nsihí ñà-jaàn, dandu ni xini mànuu iin ángel ansivi vaxi-ne. Iin ángel dandacú nduú-né, te nanchí fuerte ñuhiví ñà-yéhè guá-nè.

² Te ni ndàhi ndee-né, cachí-nè:

—Sàni ndañuhu dahuun ñuu cahnú Babilonia. Te vichi cuisí ñà-malu xíndoo yucán, cuisí espíritu ia quini, vachi sàni nanduu lugar yucán nahi nchihò nsidanuu laa siquini.

³ Vâchi ndê nùù ñuu mà (nì quesaha cuàhà estilu sìquini nì cutùha nèhivì nsidaa gá ñuu, te nì quida-ne nahi ñahà malu mà), na ian iin-ni sàni xihì-ne xì-ñá, te xíni stná-nê. Daaní, cuàhà stná rey ndoó ñuhivì, nisa xi-ía stná-nê xì ñahà mà. Te nèhivì nacuíñ, te nadíco, sàni cucuica cuàhà stná-nê sàhà ñà-sìquini vico nì xiin nècuàchì ñuu mà.

⁴ Dandu nì tiacuí iá ana cáhàn ansivi inga xichi, te dohó cachí-yà:

—Nsidaa nsiohò nèhivì-xí, caquee-ndá nùù ñuu sìquini jaàn sàhà-ñá màsà quidá stná-ndá cuàchi na ian quidá vecinu xi-ndá jaàn, dandu mà nìhì stná-ndá castigu nahi mii-né.

⁵ Vâchi ndê ansivi iin ñini cuàchi-ne, te vichi sàni sàà stná quivì mà-cúndéé gá inì sàhà nsidaa ñà-có-ndiàá xiquida-ne.

⁶ Ñàyùcàndüá, vichi, nacua sàni quida quini-ne, divi ducán icúmí stná-nê nìhì-né tñundoho, dècuèndé ùù tantu icúmí-nê nìhì-né sàhà cuàchi nì quida-ne, vâchi yáha ga tùha-ne quida quini-ne xì nècuàchì dava ga, ñàyùcàndüá, iin doble icúmí nacuitacuhá-né.

⁷ Yáha ga cuadú-nê ndoó-nê ñuhivì, cutu ndoó vico-né quidá ndevàha-ne nicanicuahàn. Ñàyùcàndüá, dava nì tantu icúmí-nê ndoho-ne, te cundoo-ne tñúnsi ini, mate vichi nihnú ini-nê, cachí-nê: “Ndiàha máni iá vida xi. Yùhù nduí ana dandacú, còò ni-ñàha cuu xí, ni mà nunca sàì coi tñúnsi ini”.

⁸ Doco sàhà-ñá nihnú ini-nê ducán, ñàyùcàndüá icúmí-nê yáha-ne cuàhà tñundoho, cuàhà gá icúmí-nê ndoho-ne, te tnana-ne, te coo stná tnama ñuu-nê, te cui cuàhà-né, dandu coco stná ñuu-nê. Te nsidaa tñundoho ma, iin quivì-nì icúmí quixa diqui-né, vâchi fuerte gá mii-yá ana cuàha xi castigu mà, vâchi divi Stoho-ndá Dios nduú-yá.

⁹ Daaní, nsidaa stná rey ñuhivì, icúmí-tê cuacu-tê, te cuhuun cuahà inì-te na cundehè-té xixìn ñuu mà, te caná ñùhmà-ñá, vâchi mii-té, iin-ni nisa cutnahá stná-te nì caquida-tè cuàchi nahi nèhivì ñuu mà, iin-ni nì sacutnahá stná-te xi-né cundoo vico-né ñuhivì.

¹⁰ Ñàyùcàndüá, xica itá-te ñà-yúhì-te nìhì stná-te castigu, te cachí-te:

—¡Ndahví nècuàchì ñuu cahnú Babilonia yucán! ¡Ndahví-né! Vâchi mate ñuu fuerte nì sandua, doco tixi imindaa hora nì ndañuhu dahuan nì quida Dios.

¹¹ Daaní, stná tè-nacuíñ te nadíco ndoó inicutu ñuhivì, icúmí-tê cuacu stná-te sàhà ñuu mà, te cuhuun cuàhà inì-te, vâchi còò cá nècuàchì ñuu ma cuiin xi ñà-nduá nìhì-te dicò-té.

¹² Vâchi nìhì-te oro, xì plata, xì yùù yèhè, xì sidiqui cuxín vico, xì sìcoto cuxín finu, xì sìcoto moradu, xì sìcoto seda, xì sìcoto cuahá, xì yutnù sahán vii, xì stná cuàhà ñàha nì cuyucun nùhu elefante, xì cuàhà ñàha nì cuyucun yutnù finu, ò cãa yahá, ò cãa uun, ò yùù finu mármol.

¹³ Te nìhì stná-te canela, xì cuàhà ñà-nì nchico sahán tnami, xì inciensu, xì vinu, xì tàtná mirra, xì cutù, xì aceite, xì harina, xì trigu, xì idunsiqui, xì rii, xì idu, xì carreta, ndê stná nèhivì dicò stná-te. (Nsidaa'jàn nduá nisa xiin nècuàchì ñuu mà.)

¹⁴ Ñàyùcàndüá, dohó icúmí cachì nèhivì xì nècuàchì ñuu mà:

—¡Ndahví-nsiá! vâchi nsidaa ñà-vico xihò guá-nsiá, sàni ndañuhá. Nì saxixi vâha-nsiá puru ñà-chicá vii, te vico gá nì sandixi stná-nsiá, doco vichì còò cá nì ian mà, ni mà nunca tui ga nùù-nsiá.

¹⁵ Cunaha-nsiá, cuàhà gá nì cucuica nsidaa tè-dicò ma sàhà ñà-nduá nì sadicò-té nùù nècuàchì ñuu mà. Ñàyùcàndüá, itá xica-té, (indéhe-té), yúhì-te ñà-càhnù-guá tñundoho iá ñuu mà, te sacú-te, tnaná-te,

¹⁶ cachí-te:

—¡Ndahví nècuàchì ñuu cahnú yucán! Vâchi sìcoto cuxín finu nì sandixi-ne, xì sìcoto moradu, xì sìcoto cuahá, na iin nècuàchì ñahà ndixì vico ní nducutu xì oro, xì yùù yèhè, xì stná sidiqui cuxín vico.

¹⁷ Doco cunaha-nsiá, tixi iin hora-ni sàni ndañuhu nsidaa ñà-cuicà mà —nì cachí-te.

Daaní, nsidaa gá stná tiàa dacaca-xi barcu nahnú, itá xica stná-te, cutnàhà-te xì peón quidáchúñ nùù-té, xì stná cuàhà tiàa sàhàn viaji inì-nu,

¹⁸ itá nsidaa-té indéhe-té ndé caná ñùhmà xixìn ñuu mà, te cachí-te:

—¡(Na cuaha guá) nisa ia ñuu yucán! Còò cá nì-iin ñuu ndudává xân —cachí-te,

¹⁹ sacú-te, tnaná-te, sòdò-te ñuhù ñini-té, cachí-te — ¡Ndahví ñuu cahnú yucán! Vâchi sàhà nèhivì ndoó yucán nì cucuica nsidaa tè-icúmí xì barcu xicá mar, ñà-cuica guá ñuu-nê. Doco, ndahví-nê, vâchi tixi iin hora-ni sàni ndutu nsihá —nì cachí-te.

²⁰ Pues vichi xiñuhu cudii gá inì nsidaa ana ndoó ansivi, xì nsidaa stná nèhivì (ñuhivì) nì nìhì chuun nùù Dios, xì nsidaa stná profeta cáhàn cuenta xi-ya, xì nsidanicuú gá stná nèhivì xi-yá, vâchi vichì sàni nachitacuhá-yá sàhà ñà-quini gá nì quida nèhivì ñuu mà xi-né.

²¹ Daaní, nì (ndecunu) iin ángel fuerte, nì ndanihì-ne iin yùù cahnú nahi yùù yódó xì molinu, te nì dandiàchì-néa mahì mar, te nì cachí-né:

—Cunaha-nsiá, ducán icúmí cuu stná xì ñuu cahnú Babilonia mà, icúmíá ndañuhu dahuan, te mà nunca gá sàà ndecunua.

²² Mâ nunca tiacu gâ cundáá yutnú cuerda ñuu mà, ni stná pitu, ni mà síví gâ stná ni-ĩñaha cundáá, vâchi mà cóó gâ ni-ĩin músico yucán, ni mà cóó gâ ni-ĩin tiãa quida-xi oficiu xi-tè, ni mà tiácú gâ stná nchicó ni-ĩin nècuàchi (ñahà).

²³ Ni mà cútñú gâ ñuhu ni-ĩin vehe, ni mà cóó gâ vicò nandàhà novia xi noviu. Vâchi nsidanicu ña-jaàn, mà cóó gâ, mate yâha ga cuica ni sandoo nsidaa tè-dicò ñuu mà antes, chicá cuica ni sandaa-tè nùu nsidaa tè-dava ga ñuhiví. Te ndè ñuu mà ni sandoo cuàhà stná tètãtnà xi tètãdí, te nisa dandahví-te nsidaa gâ ñuu.

²⁴ Te ini ñuu mà ni casahní nèhiví cuàhà tiãa cãhàn cuenta xi Dios, xi cuàhà gâ stná nèhiví vâha xi-ya. Ñâyùcandüá, icúmi ñuu mà cunsida cuàcha sàhà nsidaa nsì ma, xi sàhà nsidaa gâ stná ana ni xihí ñuhiví ni quida nèhiví.

19

¹ Daaní, ni nsihi ña-jaàn, dandu ni tiacu cãhàn ndee cuàhà gâ nèhiví ansivi, te dohó xícachi-nè:

¡Ansivéhé cahnú mii-yá! ¡Ansivéhé-yá! vâchi sàni càcu dahuun nèhiví xí-yá. Yâha ga ndiaha ni quida-ya, ñâyùcandüá, tavá-nda tnùñuhu xí-yá. Fuerte cusáhnú-yá vichi, vâchi Stoho-ndà Dios nduú-yá.

² Te cuisí ña-íá víi sàni quida-ya, cuisí ña-ndiá icà cuu nduá ni quida-ya na ní sàha-ya castigu ñahà malu iá guá fama xi, vâchi sàhà mii-ñá ni cuchicuehe anima nèhiví ñuhiví ña-ni sanchicùn-nè modo siquini xi-ñá. Ñâyùcandüá, vichi sàni nachitacuhá-yà cuàchi-ñá ni sahni-ñá nèhiví xinúcuáchi nùu-yá.

³ Daaní, ña-úi ni cacachi nsidaa nèhiví mà:

—¡Ansivéhé cahnú mii-yá! —ni cachi-nè—. (Te yucán tuí xica) caná ñùhmà ndé xíxin ñuu mà nicanicuahàn.

⁴ Dandu òcò cùmi nècuàchi sãhnú, xi nsicùmi ana itá saín nùu-yá, ni tutuyuhu-né nùu sàhà-yá ndé iá-yá nùu silla ndiaha, te ni cahvi-néyà, cachí-nè:

—¡Ansivéhé cahnú-ní, amén!

⁵ Daaní, nùu yatni silla ndiaha xí-yá ni inini cãhàn iin ana cãhàn, cachí-nè:

Xiñuhu ndanihi cahnú-nda Yua-nda Dios, nsidaa ndohó ana xinúcuáchi nùu-yá, te xícahvi xi-yá, a ducán nduu-nda ana nihí chuun cahnú nùu-yá, te ò nduu-nda nèhiví úún.

Nansa cuàhàn coo vicò nandàhà gloria

⁶ Dandu ni inini cãhàn yâha ga cuàhà nèhiví, te ducán tiacú na ian cahá fuerte tèñuhu cuàhà, na ian yâha ga ndee cãhàn ðàvi, te dohó cachí nèhiví cuàhà mà:

¡Ansivéhé cahnú mii-yá! Vâchi vichi sãcúsãhnú-yá, te nduú-yá Stoho-ndà Señor, divi mii-yá ana cui quida nsidanicuú iñãha.

⁷ Ñâyùcandüá, cuàhàn-ndà cudii cuàhà ini-ndà sàhà-yá, cuàhàn-ndà naquimani-ndáyá, vâchi sàni sàà quivi nandàhà mii-yá nani Lelù íi.

⁸ Te vichí sàni nducutu ndiaha ana cuàhàn nandàhà xi-yá, vâchi sàni nihitãhvi-né cundixi-ne sicoto cuxín yaa finu còò ni-ĩin mancha-xi, te na ian nchíá.

Ducán ni cachi-nè, vâchi nsidaa nèhiví xí-yá, icúmi-nè (cutnahá xi-yá cundoo ndiaha-né na ian) ni nandàhà-né xi-yá. Te sicoto cuxín ndixí-né, obra vâha ni caquida-ne nduá.

⁹ Dandu ni cachi tu ángel mà xí:

—Dohó tiãa-ní: “Nansicãhàn nsidaa ana càna cundoo vicò nandàhà xí mii-yá nani Lelù íi”.

Te ni cachi stná-nè xí:

—Palabra ndãcuisí xí Yua-nda Dios nduá yohó.

¹⁰ Dandu ni tutuyuhí ñuhu nùu sàhà ana ni cãhàn xí, cuàhàn cahví-nè ni cúí. Doco ni cachi-nè xí:

—Màsã quidá-ní ducán, vâchi cutu nduú stná iin ana xinúcuáchi nùu Dios, nacua quidá mii-ní, xi ðava ga compañeru-ní cãhàn stná sàhà Jesús. Iin-ni nduú stná iñani-ní nahi mii-né. Còò; cuisí Dios nduú ana ndiá icà-ndà cahvi-nda. Te nú cãhàn vate-nda sàhà ichí Jesús, dandu queãmà ña-ĩin-ni quidá stná-ndà nacua ni saquida nècuàchi sãhana ni sacahàn cuenta xi-ya —ni cachi ángel mà.

Nansa icúmi cuu na nuu Jesús ansivi, cuindànúu-yá idu cuxín

¹¹ Daaní, ni xini ni nuna ansivi, te ni quecunu iin idu cuxín yaa, te indãnuú mii-yá, divi mii-yá nani Quidá ndise cumplir, te nani stná-yá Ma túhe dandahví. Mii-yá, de por sí, quidá ví-yá na nsidãndã-yà sàhà cuàchi, te quidá víi stná-yá na sãhàn-yà guerra naá-yá xi ana xini ùhi xi-yá.

¹² Te nduchinúu-yá, nahi ñuhu xíxin, ducán iá, te ðini-yá, cuàhà corona vico ñuhá, te icà corona mà itúú iin quivi-yá, doco ni-ĩin nèhiví có-ináhá xí quivi mà, cuisí mii-yá ináhá-yá.

¹³ Te ndixí-yá sícoto nì nducuahá nì quida nùì. Te nani stná-yà Palabra ìì xí Dios.

¹⁴ Daaní, dècuèndè ansivi nchícùn gà vàxi ana xínduu soldadu xi-ya. Cuàhà sàstnùhù-né, te itándóó stná-nè idu cuxín yaa, te xíndixi stná-nè sícoto finu cuxín yaa.

¹⁵ Te yuhù mii-yá queé iin espada òìn, vàchi divi ñà-jaàn nàá-yà xì nèhivi nsidaa ñuu ñuhiví yohó, te ducán cundéé-yá nùù-né, dandu dandacú ndee-yá nùù-né. Pues divi-ya nduú ana icúmí dacháhmà xì nèhivi xídà gà ini Dios sàhà-xí, vàchi mii-yá nduú-yá mii-yá.

¹⁶ Te itúú stná inga quìvì-yá nùù capa-yà xì ìcà òìn stná-yà, te ducán cachá: Rey dandacú nùù nsidaa rey nduú, te nduu stnáì Stoho nsidanicuú ñà-ia, ducán cachá.

¹⁷ Daaní, nì xìnì nùù orá, yucán ìin iin ángel, ndáhi ndee-né, cachí-nè xì nsidaa laa ndavá ansivi:

—Nahà-ndá —nì cachi-nè—. Natacà-ndá ndé iá cuàhà ìñàhà caxi-ndá quida Stoho-ndá Dios.

¹⁸ Vàchi cuàhàn cui cuàhà rey, xì cuàhà gà stná tè-dàndacú nùù soldadu, xì stná cuàhà soldadu fuerte, xì stná idu, xì stná tè-itándóó yàtà-sí, xì stná peón, xì stná lamú xi-tè, xì stná nècuàchi chícà idónuu, xì stná nècuàchi nchícùn cahà-xí.

¹⁹ Dandu nì xìnì sàni nataca nsidaa rey ndóó ñuhiví, xì nsidaa soldadu xi-tè, itá-te xì quisi daná mà, vàchi cunì-sì quida-sì guerra xì mii-yá indánuú òiquì idu (cuxín) xì nsidaa stná ana nchícùn xì-yá.

²⁰ Doco (cónì cundéé-sì), vàchi nì tñi-sì, mii-sì xì stná inga quisi nì sachàn cuenta xi-sì, te nduú stná quisi mà ana nì saquida guá cuàhà ìñàhà na ìin-sì nùù quisi primeru mà, vàchi ducán nì ñihì-sì nì dàndàhvì-sì nèhivi ñuhiví, te nì sàcùtuu tñuni xì quisi mà nùù-né, te nì cahvi-né figura-sì. Pues ndúì quisi mà, vivu nì dàndiàchi xì-sì ndé xíxìn ñuhu cahnú sahán quini nahi azufre.

²¹ Te soldadu dava ga xi-sì, nì xìhi-te nì quida mii-yá indánuú nùù idu. Divi xi espada queé yuhù-yá, ñà-jaàn nì sahnì-yáte. Dandu nì nataca nsidaa laa (nì càrà mà), te nì saxi-sité nì chitu tìxi-sì.

20

Nansa icúmí Jesús dandacú-yá mil cuà

¹ Daaní, nì xìnì nì nuu inga ángel ansivi, ñihí-né ndahàcàa xi yavi cunú cuàhà, te iníndáhá stná-nè iin cadena canì.

²⁻³ Te nì tñi-ne quisi cuahá nahi còò cahnú, nì chichuhni-nèsi nì chinacaa-nèsi ini yavi cunú mà, te nì sàcùndiadi vàhà-sì ñà-màsà queé gà-sì dècuèndè nsihì iin mil cuà ñà-màsà dàndàhvì gà-sì nèhivi ñuhiví. Vàchi còò mà nduú quisi xicánúú ñuhiví ndé sànahà, divi ñà-malu nduú-sì, te Satanás nani stná-sì. Pues yucán nì sàcùndiadi-sì, doco nú sàni nsihì mil cuà mà, dandu icúmí-sì dàñà-sì iin ratu tii.

⁴ Daaní, nì xìnì, yucán itá cuàhà silla ndiaha, te òiquì-nú ndoó stná ana sàni ñihitáhvì nsidandaà sàhà nèhivi. Te nì xìnì anima nèhivi nì quendodò òìn-xí ñà-nì càhàn vate-né ndoó-né ladu xi Jesús, te ñàyùcànduá nì xìhi-nè, vàchi iin-nì nì xinindisá-né palabra xi Dios, te sàhámà cónì cándisá-né cahvi-né quisi daná mà, nì cónì càhvi-né figura-sì, nì cónì dúcùn-nè tñuni xi-sì nì ìcà tnaa-nè, nì ini ndahà-né. Ñàyùcànduá, nì natiacu-nè, te dava nì nì cusahnú stná-nè xì Cristu iin mil cuà, (nì xìnì).

⁵ Cunaha-nsiá, ñà-jaàn cunduu primeru natiácú nèhivi xínduu nsii. Doco dava ga nsii, còò, mà natiácú-nè dècuèndè nsihì mil cuà mà.

⁶ Te nèhivi natiacu primeru mà, nansicàhàn-nè, vàchi cunduu-ne nèhivi ndiaha xí Dios. Mà sàà-nè cui-nè ñà-ùì. Còò, vàchi icúmí-nè cundoo-ne cucumì-né chuun nùù Dios nahi dùtù, te cunucuachi-né nùù mii-yá xì nùù Cristu, te iin-nì cutnahá stná-nè xì Cristu cusahnú-nè iin mil cuà.

⁷ Daaní, nì nsihì mil cuà mà, dandu icúmí Satanás dàñà-sì quee-sì ndé ndiadí-sì,

⁸⁻⁹ cacanu-sì chiyuhù-sì nsidanicuú nèhivi ndoó imicutu ñuhiví. Stná (tè-dàndacú nani) Gog, icúmí-sì dandàhvì stná-sité, mii-té xì nsidaa stná tè-ndóó ñuu-te Magog, dandu nataca nsihì-tè, nàá-te guerra xì ñuu ndé ndoó nèhivi xí Dios. Cunaha-nsiá, yáha ga cuàhà-té, nahi ñusi cuàhà ndoó yuhù mar, ducán cuàhà-té. Te nì quecoyo-tè nì nana-tè nì sàcuìta-tè nsidaa ladu ñuu ndé ndoó nèhivi xí mii-yá, mero ñuu cùù-guá ini-yá sàhà-xí. Doco nì còyo ñuhu ansivi nì quida-ya, te nì sahnì nsiha tè-malu mà.

¹⁰ Te ñà-malu nì dàndàhvì xi-tè, nì dàndiàchi xi-sì ini ñuhu cahnú ndé xíxìn azufre sahán quini ma. Te cunaha-nsiá, mahì ñuhu jaàn, ndoó ì stná quisi daná xì stná quisi nìsa càhàn cuenta xi-sì. Te nsì-ùni quisi mà, icúmí-sì ndoho-sì ndui te ñuú nicanicuhàn.

Juiciu final na màcòò Dios nùù silla cahnú cuxín, dandu ndàcàn-yà cuenta sàhà cuàchi nèhivi

¹¹ Daaní, ni xini iin silla cahnú. Ndiaha gá-nu, te cuxín yaa-nù, te yucán iá-yà nùu-nú. Te (ni xini) ni ndañuhu ansivi xi ñuhiví, còò gá ñà-jaàn nùu-yá, ni còò cá stná ni-iin lugar ndé coa.

¹² Dandu ni xini stná i yucán nùu Dios ni sàcuíta nsidanicuú nsii, nècuàchi cuicá xi nècuàchi ndahví. Te ni ia stná ana ni nacuna xi tutu ndoó yucán nùu-yá. Te ni nacuna stná-nè inga tutu más gá, divi tutu xi vida ndiaha nicanicuahàn. Dandu ni ndundaà sàhà cuàchi ni quida nsidaa nsii ma, según nansa cachá nùu nsidaa tutu primeru mà, según nansa ni quida iin iin-ne (ñuhiví yohó).

¹³ Te ni natiacu nèhivi ni càhà ini mar, xi nsidaa stná nsii ndoó tixi ñuhù, nsidaa anima ndoó vaha, nsidaa-nè ni casaà-nè nùu-yá, te ni nsidandaà-yà sàhà cuàchi-ne según nansa ni quida iin iin-ne (na ni sandoo-ne ñuhiví).

¹⁴ Daaní cunduu quivi nsihi tiempu xíhi nèhivi nahi vichi, ni mà cóo vaha ga anima-nè, cutu ñà-cundoo dahuun-ne mahi ñuhu cahnu ma. Divi ñà-jaàn nduá icúmí cuu xi nèhivi nù sàni xihí-nè ñà-ùì cundua, icúmí-nè cundoo-ne mahi ñuhu cahnuma.

¹⁵ (Vàchi ni xini), nú cóni-nàtùì quivi iin nèhivi nùu tutu xi vida nicanicuahàn, dandu ni dàndiàchi xi-nè mahi ñuhu cahnuma.

21

Ansivi saa xi ñuhiví saa

¹⁻² Daaní, yùhù Juan, ni xini ni sàcòo ansivi saa xi ñuhiví saa, vachi ansivi nuu xi ñuhiví nuu, sàni yàha, te vichi còò gá ni-iin mar. Te ni xini stná ñuu ì nani Jerusalén Saa, ndè nùu Dios ansivi ni quea mànuu. Ndiaha gá iá, vachi sàni nducutá na iin novia cuahàn nandàhà xi noviu.

³ Daaní, ni tiacuì càhàn ndee iin ana càhàn ansivi, cachí-nè:
—Cunaha-nsiá, sàni sàà tiempu coo saín Dios xi nèhivi ñuhiví, vachi icúmí-yà cutnahá-yá xi-nè ndé cundoo-ne. Te mii-nè, nèhivi xí-yá cunduu-ne, te mii-yá, (cutnahá-yá xi-nè) cunduu-ya Dios xi-ne.

⁴ Ñàyucànduá, nsidaa ndutènùu-nè, icúmíá ndèa quida-ya, mà cuácú gá-nè. Ni mà sàà gá-nè cui-nè, ni mà cóo gá-nè tnùnsi ini, ni mà tnáná gá-nè, ni mà cúhí gá-nè, vachi mà cóo gá nahi antes.

⁵ Dandu mii-yá iá dìquì silla ndiaha cahnú, ni cachí-yà:
—Cunaha-nsiá, cuahìn quidayucun saí nsidanicuú iñàha.
Te ni cachí stná-yà xí:
—Tiaa-ní palabra yohó, vachi palabra ndisa nduá, mà dándahvíà ndohó.

⁶ Dandu ni cachí-yà:
—Sà-íá. Nahi letra nuu nani A, ducán nduí, vachi sàhà yùhù ni sàcòo nsidaa ñà-íá. Te nahi letra dansihí nani Z, ducán nduú stnáì, vachi nsidaa iñàha, sàhà yùhù cucumiá fin xan. Cunaha-nsiá, nú iá ana xíhi tècuì ndiaha, yùhù icúmí cuàhi-nè cuahà tècuì mà, vachi iá ndé ndéa-tè caná ducún-te, coho nèhivi cutiacu-nè nicanicuahàn.

⁷ Te nsidaa ana cundee xi nùu ana cuní datúcù xi-nè, icúmí-nè ndutahví-nè nsidaa iñàha. Te yùhù cundui Dios xi-ne, te mii-nè cunduu-ne dèhi.

⁸ Doco nsidaa nècuàchi ia, xi nècuàchi có-xiníndisá, xi nècuàchi quidá quini, xi nècuàchi sahní, xi nècuàchi tùha cundoo ñahà-xí, xi nècuàchi sàhàn xi promesa nùu yucú, xi nècuàchi cahvi xi yùu yócò ò figura, xi nsidaa stná nècuàchi tnùhù, (ndahví-nè), vachi ñuhu cahnú nduú lugar ndiatù xi-nè, divi ñuhu xixín xi azufre sahàn quini. Ducán icúmí cuu xi-nè na cui-nè ñà-ùì.

Ñuu Jerusalén Saa icúmí nuu ndè gloria

⁹ (Inaha-nsiá), ndoó usà àngel ni sa-icumi xi yaxin ñuhú usà castigu mà. Pues iin-ne ni quixi ni càhàn-nè xí, cachí-nè:

—Nahà-ní dacuní mii-ní ana nduú nahi novia, vachi iá ana cunduu nahi ñahàdihí mii-yá nani Lelù Ì.

¹⁰ Dandu Espiritu Ì xi Dios, nihí-yá yùhù ni tuxi cuahàn xiqué ndè iin yucú cahnú ducún, te ni dàcuní-yá yùhù ñuu ì nani Jerusalén, dècuèndè nùu Dios mànuu ansivi vaxan.

¹¹ Nchíi yèhè ndiahá quidá-yá, na ian yèhè guá iin yùu ndiaha yáha ga ndiaá, vachi nahi yùu yèhè nina nani jaspe, ducán nchíi ndai-ña.

¹² Te ndiadí ñuu mà iin nama cahnú sàstnùhù, te ducún-ñà, te ùxin ùi yèhè icúmíá. Iin iin yèhè mà itá iin ìin àngel. Te icá yèhè mà itándiaa quivì descendencia ùxin ùi dèhe Israel.

¹³ Te iin iin ladu ñuu mà iá ùni yèhè. Ladu ndé caná orá iá ùnià. Te ladu norte iá ùni stná, xi stná ladu sur xi ladu quécahnú orá, iin iin ladu mà iá stná inga ùni yèhè.

¹⁴ Te sàhà nama ñuu mà itánduhù ùxin ùi yùu nahnú xínduu cimientu xan. Te nùu cimientu mà itándiaa quivì ùxin ùi nècuàchi ni nihì chuun nùu mii-yá nani Lelù Ì.

¹⁵ Daaní, (ni xini) iníndáhá ángel ni càhàn xí iin nù-iin oro ñà-chitacùhá-né ñuu mà xì yehá xì stná nama xan.

¹⁶ Cunaha-nsiá, cùmi laduá, vâchi iin-ni itácùhá nsicúmi laduá. Te na ní chitacùhá ángel ñuu mà xì nù-iin xi-ne mà, dandu iin mil ùi cientu (1,200) kilómetro itácùhá-ñà. Te ñà-nduá caniá, divi ducún-ñà, te divi xica stná-ñà.

¹⁷ Dandu ni chitacùhá stná-né nama yucán, te ùni dico cùmi (64) metro ni quee ñà-dùcún-ñà. Na chitácùhá nêhivi ñuhívi, ducán ni chitacùhá ángel mà ñuu mà.

¹⁸ Cunaha-nsiá, yùu jaspe ni cuyucun nama mà, te ñuu mà, micuísì oro finu nduá. Te na nchíi ndai vidriu, ducán nchíi oro mà.

¹⁹ Te cimientu nama mà, ndiaha gá íá, vâchi puru yùu yéhè xínduu cavà mà, nsidanuu clase yùu yéhè. Cavà primeru xi cimientu xan nduú iin cavà cahnú puru yùu yéhè nani jaspe. Daaní, nchícùn gá indúhu cavà nduú puru yùu zafiro; te parte ùni nduú puru yùu ágata; daaní, ñà-cúmi, puru yùu esmeralda nduá;

²⁰ Te ñà-ùhùn, puru yùu ónice nduá; te ñà-íñù, puru yùu cornalina nduá; te ñà-úsà, puru yùu crisólito nduá; te ñà-únà, puru yùu berilo ndua; te ñà-ñin, puru yùu topacio nduá; te ñà-úxin, puru yùu crisoprasa nduá; te ñà-úxin iin, puru yùu jacinto nduá; te ñà-úxin ùi, puru yùu amatista nduá.

²¹ Te ùxin ùi yehè nama mà, ùxin ùi ñà-vico sibóla cuxín nani perla ni cuyucàn, iin mindaa perla cahnú ni cuyucun iin iin yehè. Te calle chicá ndé xicá nêhivi ñuu mà, mii oro finu ni cuyucàn, nahi vidriu nchíi niñnú.

²² Cunaha-nsiá, còo veheñùhu ni xínî ñuu yucán, vâchi inicutu ñuu mà cahvi-né mii-yá icúmi-xí nsidanicuú poder, divi Stoho-ndà Dios xi mii-yá nani Lelù ñi.

²³ Te có-xiñùhù nêcuàchì ñuu mà ni-iin orá, ni-iin yoo cunchii yucán, vâchi mii Dios nchíi ndiaha inicutu; mii-yá nani Lelù ñi itnúu-yá yucán.

²⁴ Ñàyùcánduá tnúu ñuu mà, vâtùni tuí núu nêhivi xicánúu yucán. Te icúmi casaà nêhivi nsidaa ñuu, xínduu-ne nêhivi ni càcu anima-xi. Te rey ndoó ñuhívi yohó, nihi-te ñà-cuicà-té quécoyo-tè ñuu mà, te dócò-téá.

²⁵ Te mà nunca cundiadi yehá, vâchi nicanicuahàn cundua ndui, te mà nunca sàa cuñaà.

²⁶ Te yucán xínu stná ñà-vico íá cuahà ñuu ñuhívi yohó, te cóyo stná nsidaa nêcuàchì idónuu, nihi-né ñà-cuicà-né sáa.

²⁷ Doco mà nunca quíhvi ni-iin ñà-siquini yucán, ni-iin tèt-niñnú quini inì-xi, mà quíhvi-tè yucan, ni-iin stná tètñùhù. Cuisi quíhvi nêhivi itándiaa quívì-xí núu libru icúmi mii-yá nani Lelù ñi, divi nduú libru xi vida ndiaha nicanicuahàn.

22

¹ Daaní, ni dàcùnì ángel mà yùhù iin yùte caná dècuèndè ndé íin silla ndiaha xí Yua-nda Dios, xì Lelù ñi. Ndaí gá tècuí ñuhú, na ian nchíi-te. Te tècuí coho-nda, te cutiacu ndiaha-nda nduú-te.

² Te (ni xini stnáì) mahì ichì cahnú ñuu mà itá fila cuahà yutnú, yutnú xí vida ndiaha nicanicuahàn nduú-nu. Te itá stná-nu ndúu ladu yùte ma. Te ùxin ùi clase quisi vídì sáha-nù. Iin iin yòò sáha-nù díin díin quisi vídì. Daaní, ndahà cuí-nu, ñà-jaàn cutátná nêhivi ñuhívi ñà-nduvàha-ne.

³ Te inicutu ñuhívi mà cóó gá ni-íñàha ni tàhvi chíhán, cuisì icúmi coo Yua-nda Dios xi Lelù ñi dandacú-yá, te cundoo stná nêhivi xí-yá cunucuachi-né núu-yá.

⁴ Icúmi-né cundehè-né núu-yá, te màcùtuu stná quívì-yá tnaa-né.

⁵ Te mà nunca cuñaà yucán. Ñàyùcánduá, còó gá necesidad cucumi-né ñuhu cutnúu núu-né, ni còó stná necesidad cucumi-né iin orá cunchii núu-né, vâchi mii Stoho-ndà Dios icúmi cunchii núu-né ñà-cutùu núu-né. Te nicanicuahàn icúmi-né cundoo-ne cusahnú stná-né.

Sà-itúu naxicocuin Jesucristu ñuhívi, cachí-yá

⁶ Daaní, ni cachi tu ángel mà xí:

—Palabra ndàcuisì xí Stoho-ndà Dios nduá sàni cachi xì-ní, vâtùni cahvi nêhivi xán. Vâchi iin ángel xi mii-yá nduú ana ni quixi ni cachitnúhu xi nsidaa ana xinúcuáchì núu-yá sàhà-ñá cundaà inì-né nansa icúmi cuu yàchì. Vâchi ducán ni saquida stná-yá sànahà, ni techuún-yá nêhivi ñi xí-yá quixi-ne cachitnúhu-ne palabra xi-yá.

⁷ (Dohó cachí Jesucristu:)

—Cunaha-nsiá, yàchì màsàì ndé ndoó-nsiá. Te ndiaha gá icúmi cundiatú nsidaa ana chivàha xì ñà-nduá cachitnúhu núu tutu yohó (—ni cachi-yá).

⁸ Yùhù Juan, nì xìnì nsidaa ñà-jaàn, te nì inini nsidaa ñà-ndúá nì cuu. Daaní, nì nsihi nì xini, te nì inini, dandu nì tutuyuhí ñuhù nùù sàhà ángel nì dàcùnì xí' nsidaamá, cuàhìn cahví-nè nì cùí.

⁹ Doco nì cachi-nè xí':

—Màsà quidá-ní ducán. Vàchi yùhù, iin-ni nduú stnái iin ana xinúcuáchí nùù Dios, iin-ni (nchicùn stnái mii-yá) nahi mii-ní xí' ñanitnaha-ní cáhàn cuenta xi-ya, te iin-ni chívaha stnái nacua cachí nùù tutu yohó. Còò, micuúsi Dios cahvi-ní.

¹⁰ Te nì cachi stná-nè xí':

—Màsà chídèhé-ní nì-íñàha cachítñuhu nùù tutu yohó, vachi sà-itúú cua.

¹¹ Ñàyücàndúá, vichi nì cúnàhá tèmalu nì quidá-te seguir quida quini-tè; stná tètùha quini, nì quidá-te seguir quida-tè ducán, (mà cútñúni). Doco nècuàchí nihnú ndáa cuiúsi inì-xi, iin-ni nì quidá-né seguir quida vii-né ducán, te iin-ni nì coó ndoo anima-nè.

¹² (Te dohó cachí stná Jesús:)

—Cunaha-ní, yàchì naxicocuíñ ndé ndoó-nsiá, te cunihi iin ñà-vàha xi-nsia sàì dacútáhvì' iin iin-nsia, segùn nansa nì quida vii iin iin-nsia.

¹³ Ndè sàhana iá yùhù, te ndè nicanicuahàn coi. Ñàyücàndúá, ducán ié' nahi letra nuu nani A, xí' stná letra dansihí nani Z, vachi sàhà yùhù nì sàcòò nsidanicuú ñàha, te còò nì-íñàha, chícá cunaha nùí.

¹⁴ 'Ndiaha gá coo xi nsidaa ana nsida ndoo xi anima-xi; vachi ducán queamá na ian sàni ndoo vaha sicoto xi-ne (te sàndixí víi-né). Nsidaa ana quida ducán, nihítáhvì-né caxí-né quisi vídà yutnú tâtá cutiacu-nè nicanicuahàn, te nihítáhvì stná-nè quihvi-ne yehè nahnú ñuu-yà (cundoò-ne yucán).

¹⁵ Doco nsidaa nèhivì tùha quini, mà sàà-nè quihvi-ne, nì mà quihvi stná tètàtnà, nì-iin stná tètàdì, nì-iin stná tètòó cundoò ñàhà-xí, nì-iin stná tè-sàhní canúú, nì-iin stná tè-càhvi xí' yùù yócò ò figura, te nì-iin stná tètùha dandahví.

¹⁶ 'Yùhù nduú Jesús, te nì techuín ángel-xi sàà-nè cáhàn-nè xí' nsidaa mii-nsiá nèhivì natácá ndáucacahan xí, te nì cachítñuhu-ne xi-nsiá nsidaa palabra yohó. Pues yùhù nduú descendencia xí' rey David. Te na ian quidá stná sitnúú cahnú xínu dàtnàà (cachítñuhu-si túinuú quivì sàà), divi ducán quidá stná yùhù —nì cachi Jesús.

¹⁷ Te dohó cachí stná Espíritu Ìì (xí' iin iin ana tàyóò vida ndiaha xí):

—¡Nahà-ní! (cunindisa-ní Jesús), —cachí-yà xí-né, te ducán cachí stná nèhivì xínduu nahi novia cuàhàn nandàhà (xí-yá).

Te nsidaa stná mii-nsiá ana sà-inínì xí' palabra yohó, divi ducán xiñuhu cachi stná-nsiá, ñà-nì ntátuu nèhivì nùù-yá. Daaní, stná yùhù, cáhàn stnái xí' nsidaa ana cunì (cucumi xí' vida ndiaha), cachí xí-né:

—Nahà-nsiá (cunindisá-nsiá mii-yá), te nihítáhvì-nsiá coho-nsiá tècuí cutiacu-nsiá nicanicuahàn, nì mà chíyàhvì-nsiá.

¹⁸ Cunaha-nsiá, dohó cachí' xí' nsidaa ana inínì xí' ñà-ndúá cachí Dios nùù tutu yohó; màsà chiyódo gá-nsiá más nùù ñà-ndúá cachá', vachi nú jaan, dandu cuàhà castigu nihí stná-nsiá nùù-yá, divi castigu cachítñuhu libru yohó sàhà-xí.

¹⁹ Te nú nì cándiáá iin nèhivì iyuhu ñà-ndúá cachí-yà nùù tutu yohó, dandu dandutu stná-yà quivì-né nùù libru xí' vida ndiaha nicanicuahàn, te mà nunca nihítáhvì-né cundoò-ne ñuu ì xí-yá nacua cachí tutu yohó.

²⁰ (Dohó cachí Jesús vichi:)

—Yùhù nduú ana nì cachi xí-nsiá nsidaa ñà-jaàn, te cachítñuhu stnái xí-nsiá ñà-yàchì icúmì naxicocuíñ ndé ndoó-nsiá —cachí-yà.

Pues ducanicóò, Señor Jesús. Yàchì cunì-nsi naxicocuíñ-ní.

²¹ Nì cúcúmì nsidaa-nsiá gracia xí' Stoho-ndà Jesucristu. Amén.